


Dios
pejumelivaisibaxuto
pejanalivaisibaxuto



New Testament in Guahibo

Dios pejumelivaisibaxuto pejanalivaisibaxuto

New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Mar 2025 from source files dated 29 Jan 2022
bc03f416-faf8-5000-bfb5-5ca8a3fa98cf

Contents

SAN MATEO	1
SAN MARCOS	110
SAN LUCAS	173
SAN JUAN	285
HECHOS	359
ROMANOS	459
1 CORINTIOS	505
2 CORINTIOS	553
GÁLATAS	583
EFESIOS	602
FILIPENSES	617
COLOSENSES	628
1 TESALONICENSES	638
2 TESALONICENSES	646
1 TIMOTEO	651
2 TIMOTEO	663
TITO	671
FILEMÓN	676
HEBREOS	679
SANTIAGO	714
1 SAN PEDRO	726
2 SAN PEDRO	739
1 SAN JUAN	747
2 SAN JUAN	757
3 SAN JUAN	759
JUDAS	761
APOCALIPSIS	766

Pexanialivaisi Jesucristo pelivaisi, San Mateo peyaquinaelivaisi

Jesucristo pijasalinaivimi yabara pelivaisi (Lc 3.23-38)

¹ Mapalivaisije Jesucristo pijasalinaivimi pelivaisi. Jesucristo rabaja Davidpijinē pemomoxiyajuvēnē. Davidpijinē pijinia Abrahampijinē pemomoxiyajuvēnē.

² Copiaya Abrahampijinēmi xaina pexēnato. Pevēnē Isaac. Isaacpijinē juya pexēnato xaina. Pevēnē Jacob. Jacobpijinē juya pexi xaina. Pexiyajuvēnē pevēnē Judá. Judápijinē pematapijinēbeje, pejuyapijivi ata, xaina.

³ Judápijinē juya pexēnatobeje xaina. Itsanē pevēnē Fares. Itsanē Zara. Bajaraponēmibeje penapijiva pevēnē Tamar. Farespijinē juya pexēnato xaina. Pevēnē Esrom. Esrompijinē juya pexēnato xaina. Pevēnē Aram.

⁴ Arampijinē juya pexēnato xaina. Pevēnē Aminadab. Aminadabpijinē juya pexēnato xaina. Pevēnē Naasón. Naasónpijinē juya pexēnato xaina. Pevēnē Salmón.

⁵ Salmónpijinē juya pexēnato xaina. Pevēnē Booz. Boozpijinē penapijiva pevēnē Rahab. Boozpijinē juya pexēnato xaina. Pevēnē Obed. Obedpijinē penapijiva pevēnē Rut. Obedpijinē juya pexēnato xaina. Pevēnē Isái.

⁶ Isáipijinē juya pexēnato xaina. Pevēnē David. Bajaraponēmi nacuaeetsinēmi. Davidpijinē yacajērēta Uríaspijinē pijavami. Nexata bajarapajivibeje juya pexēnato xainabeje. Pevēnē Salomón.

⁷ Salomónpijinē juya pexēnato xaina. Pevēnē Roboam. Roboampijinē juya pexēnato xaina. Pevēnē Abías. Abíaspijinē juya pexēnato xaina. Pevēnē Asa.

⁸ Asapijinē juya pexēnato xaina. Pevēnē Josafat. Josafatpijinē juya pexēnato xaina. Pevēnē Joram. Jorampijinē juya pexēnato xaina. Pevēnē Uzías.

⁹ Uzíaspijinē juya pexēnato xaina. Pevēnē Jotam. Jotampijinē juya pexēnato xaina. Pevēnē Acáz. Acázpijinē juya pexēnato xaina. Pevēnē Ezequías.

¹⁰ Ezequíaspijinē juya pexēnato xaina. Pevēnē Manasés. Manaséspijinē juya pexēnato xaina. Pevēnē Amón. Amónpijinē juya pexēnato xaina. Pevēnē Josías.

¹¹ Josíaspijinē juya pexi xaina. Pexiyajuvēnē pevēnē Jeconías. Jeconías pematapijinē, pejuyapijivi ata, xaina. Pamatacabi Israel nacuapijivi cobecébiaya caponatsi Babilonia nacuyabelia, bajarapamatacabi naexana Jeconíaspijinē.

¹² Bajaraxuacujinae Jeconíaspijinē juya pexēnato xaina. Pevēnē Salatiel. Salatielpijinē juya pexēnato xaina. Pevēnē Zorobabel.

¹³ Zorobabelpijinē juya pexēnato xaina. Pevēnē Abiud. Abiudpijinē juya pexēnato xaina. Pevēnē Eliaquim. Eliaquimpijinē juya pexēnato xaina. Pevēnē Azor.

¹⁴ Azorpijinē juya pexēnato xaina. Pevēnē Sadoc. Sadocpijinē juya pexēnato xaina. Pevēnē Aquim. Aquimpijinē juya pexēnato xaina. Pevēnē Eliud.

¹⁵ Eliudpijinē juya pexēnato xaina. Pevēnē Eleazar. Eleazarpijinē juya pexēnato xaina. Pevēnē Matán. Matánpijinē juya pexēnato xaina. Pevēnē Jacob.

16 Jacobpijinē juya pexēnato xaina. Pevēnē José. Bajaraponēmi María pamona. Bajarapovami Jesús pena, ponē yabara: “Cristo, ponē Dioso athēbēvetsica itorobatsi jivi pecapanepaenexa,” jaitsi.

17 Nexata Abrahampijinēmita petaxuxuabicujinae jivi penaexanaponaejava, trecenēta naexana Davidpijinē. Bajaraxuacujinae icatsia Davidpijinēmita petaxuxuabicujinae jivi penaexanaponaejava, trecenēta icatsia naexana Jeconíaspijinē. Pamatacabi Israel nacuapijivi cobecēbiaya caponatsi Babilonia nacuayabelia, naexana Jeconíaspijinē. Bajaraxuacujinae icatsia Jeconíaspijinēmita petaxuxuabicujinae jivi penaexanaponaejava, trecenē pijavata naexana Jesucristo jane baja, ponē Dioso athēbēvetsica itoroba jivi pecapanepaenexa.

Pacuenia Jesús naexana yabara pelivaisi
(Lc 2.1-7)

18 Jesucristo ita naexana mapanacuataje, naexana mapacueniaje. Copiata Josébeje Mariabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajēnaeyabeje, María nayapētane penacoxitsijava Espiritu Santo pejamatabēcueneta.

19 José, María jane baja pamonanexa, bitso penajamatabēcuenereviabinē. Bajaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bēpēnēa jamatabējumai tsaponaponae:

—Itsanējavabelia María nacoxita. Nexata ajumejibia copatsianajē. Apo pitsinē baja tsane María tajavanexa, jamatabējai picani bēpēnēa tsaponaponae José.

20 Pamatacabi abaxē José bajarapacuenia najamatabēxainaponapona, majitsinaebota José tsitanaitajētatsi Dioso pitorobinētsica, ángel. Nexata ángel jumaitsi Joséjavabelia:

—José, xamē raja Davidpijinē pemomomē. Pētsa cujunavame nepitsijava María nijavanexa. Tsipaji raja panacueto María yacotaponapona, Espiritu Santo saya pejamatabēcueneta nacoxita.

21 Bajarapova exanaena penacuetonēyo. Vēnērubianame bajarapanacuetonēyo Jesús. Tsipaji raja bajaraponē capanepaena daxita pijajivi pibisiacuenepexanaeconimivecua.

22 Bajarapacuenia María penacuetonēyo exanaena pecopiapatsinexa pacuenia baja cajena bajayata Diosojumepaebinēmi profetanēmi Dioso pejamatabēcueneta tajēvelia vajunupaeba. Profetanēmi bajayata tajēvelia bajarapanacuetonēyo yabara jumaitsi mapacueniaje:

23 Petiriva apo naperabēquenatsinejeva pebijavabelia, nacoxitsiana. Exanaena penacuetonēyo. Vēnērubianatsi Emanuel. “Emanuel,” pejaijume: “Dioso nacayajava,” pejaijume, jai bajayata tajēvelia profetanēmi Dioso pejamatabēcueneta, jai ángel majitsinaebota Joséjavabelia.

24 Nexata José piamajitsinaecujinae naēcota. José jumecovēnēta pacuenia itorobatsi ángel. Nexata baja José pijaboyaberena María barēpata pi javanexa.

25 Itsiata abaxē José apo imoxoyobi pijava penamataxainacuetonēyo pevecuanaexanaevajēnaeyatsi. Bajarapanacuetonēyo jane baja José vēnēruba JESUS.

2

Pacuenia tulupu perubenaejava pecanaëcobivi najetarubena petaenexa Jesúsnëyo yabara pelivaisi

1 Jesús naexana Belén tomarata, Judea nacuata pecaetomarata. Bajarapamatacabi nacuaevetsinë Herodes Judeanacua eveta. Nexata Jesús penaexanaecujinae, pebijivi, tulupu perubenaejava pecanaëcobivi, pata tajënacua javavetsina. Pata Jerusalén tomarajavabetsina.

2 Tulupu perubenaejava pecanaëcobivi yanijobapona jivijavabelia:

—¿Detsa jota barëcatsi panacuetonëyo naexana judíovi pepo pevetsinëxena? Payapëtaniji bajaraponëyo penaexanaejava. Tsipaji baja cajena pataniji bajaraponëyo penaexanaejavata penaitajëtsituluputo. Bajarapatuluputo pataniji patajanacuatareca. Bajaraxuata paponainajë mabetsinaje patataenexa bajaraponëyo, bajaraponëyo pitabarata yayiataeya patamatabacabëta patatonubenaenexa, jai tsaponae jivijavabelia tulupu perubenaejava pecanaëcobivi.

3 Nexata Herodes, Judeanacua pevetsinë, vënëlvivaisitane tulupu perubenaejava pecanaëcobivi bajarapacuenia pejumaitsaponaejava jivijavabelia Jesúsnëyo yabara. Nexata Herodes bitso najamatabëxaina. Daxita Jerusalén tomarata pejinavanapevi ata bitso najamatabëxaina.

4 Nexata Herodes junata daxita sacerdotevi penamatacitorobivi, judíovi pecujarubivi yajava, penacaeuatsinexa Herodes pijabota. Nexata Herodes jumaitsi penacaeuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

5 Nexata penacaeuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata pecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniaje:

6 Belén tomarata naexanaena jivi pepo pevetsinëxena. Bajaraponë jane baja evetsiana Dioso pijajivi, Israel nacuapijivi. Bajaraxuata Judea nacuata penaetomaraxi, daxita tomaraxivecua, Be léntomara cajena bitso peyayataetomaratsi tsane,

jai baja cajena mapacueniaje bajayata tajëvelia Diosojumepaebinëmi profetanëmi peyaquinaelivaisita, jai penacaeuatsivi Herodesjavabelia.

7 Bajaraxuacujinae Herodes muetsia junata tajënacuaevetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajuametobeje xaina bajarapatuluputo penaitajëtsicujinae? jai.

8 Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitsi tulupu perubenaejava pecanaëcobivijavabelia:

—Paponaremelia Belén tomarabelia. Xaniavaetsia pajaitsianame bajaraponëyo. Itsa pacaxitajarabianame, panevajunucaponaeremena. Nexata xanë ata nalianë tsane. Yaiyataeya tamatabacabëta tonanucaejitsianë bajaraponëyo pitabarata, jai Herodes tulupu perubenaejava pecanaëcobivijavabelia.

9 Nexata jane baja tulupu perubenaejava pecanaëcobivi ponalia Belén tomarabelia. Nexata bajarapamonae namutualia penajetarubenaejavata,

jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matacanajetarucatsi. Matapania itsajota Jesúsñeyo pena barëecatsi pematatsënëatsia, bajarapatuluputo rucojopa. ¹⁰Tulupu perubenaejava pecanaëcobivi itsa tane bajarapatuluputo, bitso barëya.

¹¹Nexata bajarapamonae boyalia itsa joneya, tane Jesúsñeyo, pena yajava. Nexata tulupu perubenaejava pecanaëcobivi yaiyataeya pematabacabëta tonubenajunua Jesúsñeyo pitabarata. Bajaraxuacujinae pecapatsicajonixi matapana, penamatamotsijavanë pejebicajonixi. Nexata Jesúsñeyo rajuta orojavanë. Rajutanua petuxujuvijavabeje. Itsajava inciensovënëjjava. Itsajava mirravënëjjava.

¹²Bajaraxuacujinae tulupu perubenaejava pecanaëcobivi meravi majitsinaebota Dioso itavetatsi penaviabiyaniya nacuaevetsinë Herodesjavabelia. Nexata tulupu perubenaejava pecanaëcobivi saicaya namutua baja naviaba pijanacuayabereca.

Pacuenia José barënajetabajirava Jesúsñeyo Egipto nacuyabelia yabara pelivaisi

¹³Tulupu perubenaejava pecanaëcobivi penaviabicujinae, Dioso pijaängel meravi José majitsinaebota tsitanaitajëtatsi. Nexata ängel jumaitsi Joséjavabelia:

—José, nonotapunare baja. Barëponare baja penacuetonëyo, pena yajava. Barënajetabajiravare Egipto nacuyabelia. Bajarajotalia barëponaponaename. Matapania icatsia itsa catsipaebianatsi, barënaviatsiaremena. Tspiji raja nacuaevetsinë Herodes tsiquirinëyo tsimaxërenajitsiatsi pebeyaxuabinexatsi, jai ängel Joséjavabelia.

¹⁴Nexata José nonotapuna. Piamajitsinaemeravi baja José barëpona Jesúsñeyo, pena yajava. Barënajetabajirava Egipto nacuyabelia.

¹⁵Bajarajotalia José barëponapona bajayajebi. Matapania baja Herodes itsa tëpa, José barëpatsijitsiarena Israel nacuyaberena. Bajarapacuenia tocopiapatatsi tspiji baja cajena bajayata Diosojumepaebinëmi profetanëmi Dioso pejamatabëcueneta tajëvelia jumaitsi Jesús yabara mapacueniaje: “Taxënato icatsia junatsiarenajë penaviatsinexa Egipto nacuverena,” jai ra Dioso, jai baja cajena bajayata tajëvelia profetanëmi Jesús yabara.

Pacuenia nacuaevetsinë Herodes pijajivi itoroba pebinacuetoxi pebeponaenexa yabara pelivaisi

¹⁶Nacuaevetsinë Herodes picani jumaitsi tulupu perubenaejava pecanaëcobivijavabelia: “Itsa pacaxitajarabianame bajarapanacuetonëyo, panevajunucaponaeremena,” jai picani Herodes Jesúsñeyo yabara. Itsiata tulupu perubenaejava pecanaëcobivi caxitajarabi ata Jesúsñeyo, apo vajunucaponaeremena Herodesjavabelia. Nexata Herodes itsa yapëtane tulupu perubenaejava pecanaëcobivi apo pevajunucaponaeremena, caxitajarabi ata Jesúsñeyo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonëjjava ata. Daxita papebinacuetoxi abaxë apo xainae acueyabi pavaibeje, pabeponaename. Pejanaanaxanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsñeyo picani peyajavabeyaxuabinexatsi. Tspiji tulupu perubenaejava

pecanaëcobivi Herodesjavabelia tsipaeba paepatota taxuxuaba petaejava tuluputo.

¹⁷ Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinëmi profeta Jeramíaspijinë bajayata tajëvelia yaquina pebinacuetoxi pebejavanexatsi yabara. Bajayata baja cajena profeta Jeramíaspijinë peyaquinaelivaisita tajëvelia jumaitsi mapacueniaje:

¹⁸ Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabëxainaejava. Tsipaji pexi totëpaenatsi,

jai bajayata tajëvelia profeta Jeramíaspijinë peyaquinaelivaisita pecoxibeponaejavanexatsi yabara bajarapatomarata.

¹⁹ Nacuaevevsinë baja Herodes pepuatëpae, Dioso icatsia pijaánel itoroba Joséjavabelia. Nexata ánel meravi majitsinaebota José tsitanaitajëtatsi Egipto nacuata.

²⁰ Nexata ánel jumaitsi Joséjavabelia:

—José, nonotapunare. Barëponaename baja tsiquirinëyo, pena yajava. Barënaviaremelia baja icatsia Israel nacuyabelia. Tëpa rabaja ponë picani jamatabëbeyaxuabatsi tsiquirinëyo, jai ánel majitsinaebota Joséjavabelia.

²¹ Nexata baja José nonotapuna. Barëpona tsiquirinëyo, pena yajava. José icatsia barënaviata Israel nacuyabelia.

²² Nacuaevevsinëmi Herodespijinë pexë nato pevënë Arquelao. Nexata Arquelao eveta Judeanacua paxa pevënamuto. Nexata José ita vënëlivaisitane nacuaevevsinëmi Herodespijinë pexë nato pevetsijava Judeanacua, José cunjnava Jesúsñëyo pebarëponaejava Judea nacuyabelia. Majitsinaebota José Dioso itavetatsi Jesúsñëyo pebarëponaeyaniva Judea nacuyabelia. Nexata José barëpona Jesúsñëyo Galilea nacuyabelia.

²³ José ita barëpata Jesúsñëyo Galilea nacuyabelia, Nazaret tomarata barëpatajopa pebarëcaenexa Nazaret tomarata. Bajarapacuenia José Nazaret tomarata ita barëca Jesúsñëyo, copiapata jane baja pacuenia baja cajena bajayata Diosojumepaebivimi profetavi tajëvelia jumaitsi. Diosojumepaebivimi profetavi bajayata baja cajena tajëvelia jumaitsi Jesús yabara mapacueniaje: “Ponë Dioso itorobijitsiatsica jivi pecapanepaenexa, bajara-ponë yabara jivi jumai tsane: ‘Mara ponëje Nazaret tomarapijinëje,’ jai tsane,” jai baja cajena bajayata tajëvelia profetavimi Jesús yabara.

3

Pacuenia Juan jivibautisabinë Dioso pitorobilivaisi jivi tsipaeba petusato nacuata yabara pelivaisi

(Mr 1.1-8; Lc 3.1-9, 15-17; Jn 1.19-28)

¹ Jesús ita baja xaina bejamatabëcuene treinta pavaije, Juan jivibautisabinë najetaruca Judea nacuatusatöjava.

² Juan jivibautisabinë Dioso pitorobilivaisi jivi tsipaebanajetaruca. Jumai tsanajetaruca mapacueniaje:

—Dioso rabaja pijajivi pevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene paneexanabiabijava. Panajamatabëcuenepeñëyorore Diosojavabelia, jai tsanajetaruca Juan jivijavabelia.

³ Bajarapacuenia Juan Dioso pitorobilivaisi jivi itsa tsipaebanajetaruca, copiapata jane baja pacuenia Diosojumepaebinēmi profeta, Isaíaspijinē, bajayata tajēvelia yaquina Juan pelivaisi. Juan jivibautisabinē Dioso pitorobilivaisi jivi petsipaebanajetarucaejavanexa yabara, yaquina. Profeta Isaíaspijinē peyaquinaelivaisita tajēvelia jumaitsi mapacueniaje:

Tanejumulivaisipaebinē vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejitsia petuxanenē. Batoroviaexananua namuto. Bajara pijinia pacuenia paxamē ata panajamatabēcuenexaniavaere pepo petuxanenē pepatsivajēnaeyarena,” jai tsane tanejumulivaisipaebinē, jai profeta Isaíaspijinē bajayata peyaquinaelivaisita Dioso pitorobilivaisi Juan jivi petsipaebanajetarucaejavanexa yabara.

⁴ Juan naxatata camellonata pexanaejava. Naepacēta cuerobocoto. Pexaejava ēbosesē, jabēra yajava.

⁵ Juan petsipaebilivaisi pejumetaenexatsi, muxunapatabiatsi Jerusalén tomarapijivi, Judea nacuapijivi ata, Jordánmene imoxoyopijivi ata.

⁶ Nexata bajarapamonae pibisiacuene pexanaejavami, roviaalia Diosojavabelia navecuapaebapona. Nexata bajarapamonae Juan bautisabapona Jordán meneta.

⁷ Jivibitsaētoxaneto pata Juanjavaberena pebautisabinexa picani Juan. Bajarapamonae apo jumecovēnētsi ata Dioso pitorobilivaisi, jamatabēcuenenavēxaniabiaya jamatabējumaitsi:

—Juan itsa nacabautisabiana, Dioso nacacapanepaena, jamatabējai.

Nexata Juan itsa tane ayaibitsaētoxaneto fariseovi, saduceovi ata, pepatsi-javarena Juan picani pebautisabinexa, nexata Juan jumaitsi bajarapamonaejavabelia:

—¡Panajamatabēcuenenavēxaniabivi! Pacuenia jomo rēcēpa itsa tane isoto petajuenajetarucaejava, bajara saya paitsimē. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa.

⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovēnētavanapare. Nexata daxitajivi pacayapētaena pepacuene baja panecopabijava pibisiacuene paneexanabiabijavami. Pacayapētaenanua panenajamatabēcuenē pēñeyorstijava Diosojavabelia.

⁹ Jamatabēcuenenavēxaniabiaya pētsa panajumaitsimē: “Vaxaitsi cajena Abrahampijinē pemomoxitsi. Nexata Dioso nacacapanepaena,” panajamē pētsa. Abrahampijinē picani papemomoxi atamē, itsiata pibisiacuene itsa paxanavanapame, nexata bajarapacuenē apo pacatonamatamotsi tsipae Diosojavabelia papecacapanepaenexa. Dioso baja cajena caējēpatsi jivi pexanaenexa mapaibotonēmi ataje, Abrahampijinē bepemomoxi Dioso petaenexa. Nexata bajarapamonae ata Dioso itsa apo jumecovēnētsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso.

¹⁰ Peubinaenē pexainaenē itsa apo tonacuaitsitsi pexaniacuai, nicata sipalita daxita ponaenē apo tonacuaitsitsi pexaniacuai. Nexata baja penicatsicujinae itsa niona bajaraponaenē, caetuata. Xuaba isotojavabelia. Nexata bajaraponaenē tajuatsi. Bajara pijinia pacuenia paxamē ata Dioso pacaxuabiana infiernojavabelia papecatajuenexa, Dioso apo panejumecovēnētsivi.

11 Xanë raja saya jivi bautisabaponajë merata. Tsipaji baja bajarapamonae copaba pibisiacue ne pexanabiabijava. Najamatabëcuenepëñeyorotana Diosojavabelia. Itsiata baitsi jane ponë tacovëverena najetarucaena, tabautisabivi Espíritu Santo tsijamatabëjoneyaexanaenatsi, pitarunutsicotia yajava. Xanë raja saya beveliajamatabëcuenenënë bajaraponëvecua. Nexata bajaraponë vecuaauranë pijazapato ata tatocaponenexa beprijajivitonëcuenianë.

12 Arroxainanë baja itsa vereta arroz pesiricaejava, jëaba arroz pejëabijavata pepitsinexa ëpexu. Nexata pijaarroz pejëabijavata, saicaya tsatapona ëpexu pesivecua. Nexata ëpexu xaniavaeteta peetsibojavabelia. Pesi pijinia penetafona vayafuabelia petajuitsinexa. Bajara pijinia pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infernojavabelia panenaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo pevereverecaesitojavabelia, jai Juan daxita bajarapamonaejavabelia.

Pacuenia Juan bautisaba Jesús yabara pelivaisi

(Mr 1.9-11; Lc 3.21-22)

13 Jesús naropota Galilea nacujavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan.

14 Juan picani apo jitsipae pebautisabijava Jesús. Juan nexata jumaiti Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

15 Itsiata Jesús jumaiti Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana vajaexanaenexa daxita Dioso vajanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús.

16 Nexata jane baja Juan bautisaba Jesús. Jesús pebautisabicujinaetsi nonotajuna menevetsina. Bajarapaepatota Jesús tane athëbëtatsia itaboxo penapatsijava. Nexata Jesús tane Espíritu Santo perunaejavatsica beucucuto. Tsimatrunaicatsi.

17 Nexata Juan jumetane athëbëvetsica Dioso pejumaitisijava: “Mara ponë taxënato tasivanëje. Sivajamatabëcuenearëyanë bitso,” pejaijava.

4

Pacuenia Jesús jamatabëcueneejëbatsi dovathi yabara pelivaisi

(Mr 1.12-13; Lc 4.1-13)

1 Jesús pebautisabicujinaetsi, Espíritu Santo ponaeyaexanatsi petusato nacuyabelia. Bajarabelia ponaeyaexanatsi pejamatabëcueneejëbinexatsi dovathi.

2 Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso pijani.

3 Nexata dovathi Jesús imoxoyotatsi pejamatabëcueneejëbinexatsi Jesús picani pibisiacue ne pexanaenexa. Dovathi jumaiti Jesúsjavabelia:

—Itsa pepacue ne Dioso pexënatomë, itorobare mapabotonëje penaexanaenexa pan, jai dovathi.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae épexaejava pexaenexa. Jivi raja namatavenona daxita Dioso pejumelivaisi ata pejumecovēnētsinexa pexainaenexa matacabi apo pevereceajava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barēliatsi dovathi Jerusalén tomarabelia. Barējunayatsi templobo matatuyabetsia.

⁶ Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexēnatomē, jirevaremeca irabereca. Bajarapacuenia jirevaremeca irabereca tsipaji xamē nitsacunenyaniva pecaevetsinexa Dioso pejumelivaisibaxutota jumaitsi mapacueniaje:

Dioso itorobianica pijaánglevi pecaevetsinexa. Nexata ánglevi pecobeta cayotsiana pecataxutsaquitsiyaniya ibotonējavabelia, jai Dioso pejumelivaisibaxutota xamē pecaevetsinexa ánglevi, jai dovathi Jesúsjavabelia.

⁷ Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabēcuenenavēxaniabiaya pijacuata apo bejamatabējumaitsi: ‘Xanē Dioso jamatabēcuenejētšianajē. Nexata exanaenajē pacuene bitso netsiyayi tatēpaenexa. Itsiata Dioso neyavenonaena tavecuapanepaenexa bajaraxua.’ Nexata bajarapacuenia yapētaenajē Dioso taneyavenonaejava,’ apo bejamatabējai,” jai Dioso pejumelivaisibaxutota, jai Jesús dovathijavabelia.

⁸ Jesús icatsia barēliatsi dovathi pinijitsutoxanetojavabelia. Barējunayatsi bajarapatsutojumabetsia. Nexata bajarapatsutojumavetsica dovathi Jesús tsitajētatsi daxitanacuanē. Daxita bajarapanacuanēta daxitacuene pexainaejava yajavatsitajētatsi.

⁹ Nexata icatsia dovathi jumaitsi Jesúsjavabelia:

—Ayaijamatabēcuenenēnē netaeya taitabarata nematabacabēta itsa netonucajunuame, nexata daxita mapanacuanētaje, daxitacuene xua xaina, cayajavarajutsianatsi, jai dovathi Jesúsjavabelia.

¹⁰ Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajēcae pematabacabēta caenē pepo petuxanenē Diosojavabelia. Tonacuenebinua bajaraēponēnexa,” jai raja Dioso pejumelivaisibaxutota, jai Jesús dovathijavabelia.

¹¹ Nexata baja dovathi Jesús vecuaponatsi. Bajaraxuacujinae ánglevi patsica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaejivaya yabara pelivaisi

(Mr 1.14-15; Lc 4.14-15)

¹² Jesús vēnēlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuyabelia.

¹³ Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabolónvēnē nacuabeje Neftalivēnē nacuabejevata. Capernaumtomara eca pucaxanetoitapata.

¹⁴ Bajarapacuenia Jesús itsa patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Dioso-jumepaebinē profeta, Isafaspijinē, tajēvelia yaquina Jesús pelivaisi. Dioso

pitorobilivaisi Jesús Capernaum tomarata jivi petsipaebijavanexa yabara, Isaiáspijinê peyaquinaelivaisita tajêvelia jumaitsi mapacueniaje:

15-16 Zabulón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapêtae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaêtoxanetonê apo judíovi, bitso apo yapêtae Dioso pitorobilivaisi. Daxita bajarapanacuanêpijivi pexaniajailivaisi, Dioso pitorobilivaisi, apo peyapêtaexae, bepitaquirinacuanêjava jinavanapa. Nexata pacuenia pinijicotiaxaneto itayotsipatsi petanexa xaniavaetsia, bajara pijínia pacuenia bajarapamonae jamatabêcueneitayotsianatsi itsa tsipaebianatsi Diosojavabelia pecapanepaelivaisinexatsi,

jai tajêvelia Isaiáspijinê peyaquinaelivaisita Dioso pitorobilivaisi Jesús petsipaebijavanexa yabara bajarapanacuanêpijivijavabelia.

17 Nexata Capernaum tomarata Jesús taxuxuaba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

—Dioso rabaja papecaevetsimatacabinexa, imoxoyo baja pevajênae pecopiapatsinexa. Nexata baja pacopabare pibisiacuene paneexanabiabijava. Panajamatabêcuenepeñeyorore Diosojavabelia, jai tsaponae Jesús jivijavabelia.

Pacuenia Jesús junata cuatro ponêbeje dujuai peyamatajucabiabivi yabara pelivaisi

(Mr 1.16-20; Lc 5.1-11)

18 Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanêbeje nacaebananêbeje, Simónbeje Andrésbeje. Simón itsavênê Pedro. Bajaraponêbeje daxitamatacabi canacujitsia dujuai yamatajucabiababeje. Dujuai peyamatajucabiabijavatabeje, yamatajucaponaponabeje.

19 Nexata Jesús jumaitsi Simónbeje Andrésbejejavabelia:

—Naxanitsia. Panepênaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaename Dioso pijajivinexa, jai Jesús.

20 Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepêta.

21 Bajaraxuacujinae icatsia bebeliayo pevajênaeyabelia Jesús barêpona. Icatsia taenuta anijanêbeje nacaebananêbeje, Zebedeo pexênatobeje. Bajaraponêbeje Santiagobeje Juanbeje. Pijajeraênêta paxa yajava xanepaponaponabeje dujuai peyamatajucaejavanexabeje. Nexata icatsia Jesús junata Santiagobeje Juanbeje.

22 Nexata bajarajota paxa puenetanutabeje jera yajava. Santiagobeje Juanbeje naponabeje baja Jesús pepêta.

Pacuenia Jesús livaisi tsipaeba jivi ayaibitsaêtoxanetojavabelia yabara pelivaisi

(Lc 6.17-19)

23 Jesús jane baja najetaruca daxita Galilea nacujava. Dioso pitorobilivaisi tsipaebaona judíovi penacatuatabibonêjava. Jesús tsipaebaona jivijavabelia pexanialivaisi. Tsipaebaona Dioso pijajivi pevetsijavanexa. Jamatejemayaexanaponanua daxitaviriavítane pexainaevimi.

²⁴ Nexata daxita Siria nacuajava pejinavanapaevi ata vënëlivaisitanetsi Jesús. Jesús tocapatatsi daxitaviriavitane pexainaevi. Tocapatatsinua dovathi peyajavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae.

²⁵ Nexata Jesús pëñaponatsi jivi ayaibitsaëtoxaneto Galilea nacuapijivi, Decápolis nacuapijivi ata, Jerusalén tomarapijivi ata, Judea nacuapijivi ata, Jordánmene itsapanaverenapijivi ata.

5

Pacuenia Jesús jivi livaisi tsipaeba petsutoyenepanajavata yabara pelivaisi (Lc 6.20-23)

¹ Jesús itsa tane jivibitsaëtoxaneto, nexata junaya petsutotsia. Bajarapatsutoyenepanata epatota ecaya. Nexata bajarajota Jesús pijajivi matatoyorotsia nacaetuatatsi. ² Nexata Jesús taxuxuaba livaisi petsipaebijava.

³ Jesús jumaitsi pijajivijavabelia mapacueniaje:

—Jamatabëcuenebarëya tsavanapae tsane pamona picani mapanacuata yajamatabëcuenebëjai tsavanapae pibisiacuene pexanabiabijava. Bajarapamonae jonena Dioso pijanacuayabetsia.

⁴ Jamatabëcuenebarëya tsavanapae tsane pamona picani mapanacuata bejamatabëjiobi tsavanapae itsamonae pibisiacuene petoexanaeatsi. Bajarapamonae Dioso jamatabëcueneavenonaenatsi.

⁵ Jamatabëcuenebarëya tsavanapae tsane pamona apo jamatabëbëjai tsabiabi mapanacuata, itsacueniababiabi atatsi itsamonae. Apo cuenecanaviatabiabinua. Bajarapamonae jinavanapaena Dioso pijanacuatsia pacuenia Dioso najumecapanepaeya jumaitsi bajarapamonae yabara.

⁶ Jamatabëcuenebarëya tsavanapae tsane pamona mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabibianatsi pexanaenexa bajarapacuene.

⁷ Jamatabëcuenebarëya tsavanapae tsane pamona mapanacuata itsamonae ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonae.

⁸ Jamatabëcuenebarëya tsavanapae tsane pamona mapanacuata ëpexaniacuene pexanaenexa najamatabëxainabiaba. Bajarapamonae taena Dioso.

⁹ Jamatabëcuenebarëya tsavanapae tsane pamona mapanacuata penaitoyavimi ata, nabarajamatabëcuene xanepanaeyaexanapona. Bajarapamonae yabara: “Taxi,” jai tsane Dioso.

¹⁰ Jamatabëcuenebarëya tsavanapae tsane pamona mapanacuata bejiobiaexanabiabatsi Dioso pitorobicueniatsi pexanabiabijava yabara. Bajarapamonae jonena Dioso pijanacuayabetsia.

¹¹ Patajajivixaemë, itsamonae pibisiacuenia itsa pacabaracuaicuaijai, itsiata pajamatabëcuenebarëyamë tsavanapae tsane. Bajarapamonae pacabejiobiaexanae ata tsane, najumetsënëtsiaya pacabaracuaicuaijai atanua tsane, itsiata pajamatabëcuenebarëyamë tsavanapae tsane.

¹² Bajara tsipaji pacuenia panevajënaeyapijivimi ata, Diosojumepaebivimi profetavi, bajayata bejiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuenia itsa pacaexanaena. Tsipaji

raja athëbëtatsia itsamatacabi Dioso pacarajutsiana bitso pexaniacuene, jai Jesús pijajivijavabelia.

Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi
(Mr 9.50; Lc 14.34-35)

¹³ Icatsia Jesús jumaitsi petsutoyenepanaxavata pijajivi ayaibit-saëtoxanetojavabelia:

—Yajobeno xanepana vajaexabinexa pevi piabejeyaniva. Paxamë rabaja pijinia bepajajomë tsavanapae mapanacuapijivijavabeliaje, mapanacuapijivi bitso piabejeyaniva pibisiacuene pexanaeneconi yabara. Paxamë xaniavaetsia panetsipaebavanapaexae Dioso pejumelivaisi, bajarapamonae bitso pibisiacuene apo exanae. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacuenejavayonexa ata baja apo xanepanae tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacuenejavayonexa ata, apo paxanepanaemë tsipae.

¹⁴ Pacuenia piaitayotsicotia itayota piaitaquirjavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame pajamatabëcueneitaquirivimi. Bajarapacuenia pajamatabëcueneitayotsianame itsa patsitajinavanapaename xaniavaetsia daxitajivi pitabarata. Petsutojumata peecaetomara acuenebi penacaranatecaejava tsipae.

¹⁵ Itsajivi ata lãmparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotocaenexa.

¹⁶ Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonae pacacuenetaena pexaniacuene paneexanavanapaejava. Nexata bajarapamonae itsa pacacuenetaena pexaniacuene paneexanavanapaejava, jumai tsane paxamë yabara paneaxa Diosojavabelia: “Diosomë, bitso ayajamatabëcuenenëmë. Yavenonabiabame nijajivi,” jai tsane bajarapamonae paneaxa, athëbëtatsia peecaenëjavabelia, jai Jesús pijajivijavabelia.

Pacuenia Jesús tsipaeba pijajivi bajayata Dioso Moiséspijnëta penajumecopatsilivaisi yabara pelivaisi

¹⁷ Icatsia Jesús jumaitsi petsutoyenepanaxavata pijajivi ayaibit-saëtoxanetojavabelia:

—Pëtsa panesivajamatabëjumaitsimë: “Maponë patajopaje piajibiaexanaenexa Dioso Moiséspijnëta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba bajarapalivaisitabeje.

¹⁸ Xaniajanë pacuenia pacatsipaebijitsiatsi. Dioso Moiséspijnëta penajumecopatsilivaisi epatua itsalivaisicuenia, caeitane toyo ata, Dioso apo ithothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najumecapanepaeya jumaitsi bajarapalivaisitabeje.

¹⁹ Nexata pajivi jumecovënëtsi ata Dioso Moiséspijnëta penajumecopatsilivaisi, itsiata itsa apo jumecovënëtsi caelivaisiyo bajarapayajuvënëlivaisiyo,

naneconitsiana Diosojavabelia. Bajarapajivi itsa itavetsiananua itsamonae ata pejumecovênëtsiyaniva bajarapalivaisiyo, nexata bajarapaneconi yabara bajarapajivi beveliajamatabëcuenejevivi taenatsi daxitajivivecua Dioso pijanacuatatsia. Pajivi jumecovênëta daxita bajarapalivaisi, itsa tsipaebanua itsamonae ata pejumecovênëtsinexa bajarapalivaisi, nexata bajarapajivi ayaijamatabëcuenejevivi taenatsi Dioso pijanacuatatsia.

²⁰ Xaniajanë pacuenia pacatsipaebijitsiatsi. Paxamë xaniavaetsia Dioso pajumecovênëre. Xaniavaetsia Dioso pajumecovênëre judïovi pecujarubivi Dioso pejumecovênëtsijava matatoxenetsia. Xaniavaetsia Dioso pajumecovênëre fariseovi ata Dioso pejumecovênëtsijava matatoxenetsia. Paxamë xaniavaetsia Dioso itsa apo pajumecovênëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

*Pacuenia Jesús muxujioba pijajivi pecopatsinexa penabaraanaepanabiabi-
java yabara pelivaisi*
(Lc 12.57-59)

²¹ Icatsia Jesús jumaitsi petsutoyenepanajavata pijajivi ayaibit-saëtoxanetovjavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Moiséspijinë bajayata panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia.

²² Itsiata baitsi jane xanë pacatsipaebatsi mapacueniaje. Pajivi baranaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiayaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiayaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatajemabinë,” jai, bitso tsiyaiatsi. Bajarapaneconi yabara bajarapajivi Dioso naneconitsiayaexanaenatsi inferno isotovjavabelia.

²³ Itsa paponame altarvênëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacuene paneexanaejava, nexata mapacuenia paexanaenameje.

²⁴ Altarvênëjava pitabarata abaxë papuenera ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabëcuene xanepanaenexabeje icatsia. Bajaraxuacujinae icatsia panaviatsiaremena altarvênëjavajavaberena panerajutsinexa jane baja ofrenda Diosojavabelia.

²⁵ Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaiacuajamërebeje panenasivajamatabë xanepanaenexabeje xua yabara picani pacaneconitsijitsia. Bajarapacuenia xaniavaetsia panabarëcuaiacuajamërebeje papecanutsiyaniva jueznë pitabarata. Tspaji raja jueznë itorobijitsipa policïavi pijananeconi yabara papecacaponaenexa penaneconitsivi pejebabiabiboyabelia. Nexata policïavi pacananeconitsiaexanetsipa penaneconitsivi pejebabiabibota.

²⁶ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepïjia apo

papitsapaemē tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

Pacuenia Jesús pijajivi muxujioba penacojiobinē itsava pejaitsyaniva pijavavecu yabara pelivaisi

²⁷ Icatsia Jesús jumaitsi petsutoyenepanajavata pijajivi ayaibit-saētoxanetojavabelia:

–Paxamē rabaja payapētaneme pacuenia bajayata Dioso Moiséspijinēta penajumecopatsilivaisi jumaitsi. Dioso Moiséspijinēta penajumecopatsilivaisi jumaitsi mapacueniaje: “Pētsa jaitame itsava nijavavecu,” jai.

²⁸ Itsiata baitsi jane xanē mapacuenia pacatsipaebatsije. Ponē petiriva itsa taenuta, nexata itsa jamatabējumaitsi: “Jema xania tavitota pibisiacuene apo caexanaetsi mapovajavabeliaje,” itsa jamatabējai, bajaraponē naneconita Diosojavabelia. Nexata najēpaeya naneconitabeje Diosojavabelia ponēbeje pepacuene itsavajavabelia pibisiacuene pevitota exana pijavavecu.

²⁹ Panecujuaitaxutota panetaejava yabara pibisiacuene itsa paexaname, panaitaxutocajure. Tajē baja paxuare. Xanepana panenavecuaxuabinexa bajarapaitaxuto, padaxitaperabētojivimē Dioso papecaxuabianiva infiernojavabelia.

³⁰ Panecujuacobeta pibisiacuene itsa paexaname, panacobecaucure. Tajē baja paxuare. Xanepana panenavecuaxuabinexa, bajarapacobe padaxitaperabētojivimē Dioso papecaxuabianiva infiernojavabelia, jai Jesús pijajivijavabelia.

Pacuenia Jesús pijajivi muxujioba penacojiobinē pijava pexuabianiva yabara pelivaisi

(Mt 19.9; Mr 10.11-12; Lc 16.18)

³¹ Icatsia Jesús jumaitsi petsutoyenepanajavata pijajivi ayaibit-saētoxanetojavabelia:

–Bajayata Dioso Moiséspijinēta penajumecopatsilivaisi jumaitsi mapacueniaje: “Ponē jamatabēxuaba pijava, copaiya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinēta penajumecopatsilivaisi.

³² Itsiata baitsi jane xanē mapacuenia pacatsipaebatsije. Ponē pijava xuaba, itsanējavabelia bajarapovā pevitota pibisiacuene apo vecuaeaxanae atatsi, bajaraponē naneconita Diosojavabelia pijava pexuabixae. Petiriva pamona pexuabixaetsi, nacojiobijitsipa itsanējavabelia. Nexata jane baja bajaraponē pijava pibisiacuene vecuaeaxanejitsipatsi itsanējavabelia. Tsipaji abaxē bajaraponē pijavacuena Dioso totanetsi. Nexata pijinia ponē pita bajaraponē pexuabicovēvami, bajaraponē ata pibisiacuene exana pevitota. Tsipaji abaxē bajaraponē pijavacuena Dioso totanetsi, jai Jesús pijajivijavabelia.

Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsyaniva jivi pejumexaniataenexatsi yabara pelivaisi

³³ Icatsia Jesús jumaitsi petsutoyenepanajavata pijajivi ayaibit-saētoxanetojavabelia:

–Paxamē rabaja payapētaneme pacuenia bajayata Moiséspijinē jumaitsi panijasalinaivimijavabelia. Panijasalinaivimi penajumetsēnētsyaniva, bajayata Moiséspijinē panijasalinaivimijavabelia jumaitsi mapacueniaje: “Itsa

baja pepacuene najumecapanepaeya panavajunupaebame xua paexanaejitsiamē, itsamonae papecajumexaniataenexa itsa pajumaitsimē: ‘Xaniajanē raja. Cajumaitsitsi mapacueniaje Dioso pitabarata,’ itsa pajamē, pētsa epatua panajamatabēcopatame bajaraxua paexanaejevamē,” jai bajayata Moiséspijinē panijasalinaivimijavabelia.

34 Itsiata baitsi jane xanē mapacuenia pacaitorobatsije. Najumecapanepaeya itsa panavajunupaebame xua paexanaejitsiamē, roviaalia panavajunupaebare. Pētsa pematatsēnēa itsajumeyo ata yajava pajumaitsimē jivi papecajumexaniataenexa. Papecajumexaniataenexa itsajivi pētsa pajumaitsimē mapacueniaje: “Xaniajanē raja. Cajumaitsitsi mapacueniaje Dioso pitabarata,” pajamē pētsa. Pētsa pajumaitsimēnua: “Xaniajanē raja. Cajumaitsitsi mapacueniaje athēbēnacua pevēnēta,” pajamē pētsa. Tspiji bajarajotatsia Dioso eca pijatronovēnējavata, itsajota ecabiaba pitorobinexa pijajivi.

35 Pētsa pajumaitsimēnua: “Xaniajanē raja. Cajumaitsitsi mapacueniaje mapairaje pevēnēta,” pajamē pētsa. Tspiji raja Dioso pijaira. Pētsa bajarapacuenia pajumaitsimē Jerusalēntomara ata pevēnēta. Tspiji Jerusalēntomara Dioso pepo nacuaevevsinē pijatomara.

36 Pētsa pajumaitsimēnua: “Xaniajanē cajena. Itsa apo xaniajanē tsane, nexata nacaevetsianajē tanematathinaxuabinexamē tatēpaenexa,” pajamē pētsa. Tspiji panematabocoto ata Dioso eveta. Nexata paxamē apo pacačējēpae caematanatoyo ata panenamatananiojaiyaexanaenexa, panenamatanatsaejaiyaexanaenexa ata.

37 Itsa pepacuene paexanaejitsiamē, “Jājā, exanaenajē,” pajamē roviaalia. Itsa apo pajamatabēexanaemē, “Jume, apo exanaenē tsane,” pajamē roviaalia. Pematatsēnēa pētsa pajumaitsimē itsajumeyo ata jivi papecajumexaniataenexa. Tspiji bajarapajume dovathi pejamatabēcueneta pajumaitsimē tspiae, jai Jesús pijajivijavabelia.

Pacuenia Jesús pijajivi muxujioba pecunenecanaviatsiyaniva itsajivi itsacueniabi atatsi yabara pelivaisi
(Lc 6.29-30)

38 Icatsia Jesús jumaitsi petsutoyenepanajavata pijajivi ayaibit-saētoxanetojavabelia:

—Paxamē rabaja payapētaneme pacuenia bajayata Dioso Moiséspijinēta penajumecopatsilivaisi jumaitsi. Bajayata Dioso Moiséspijinēta penajumecopatsilivaisi jumaitsi mapacueniaje: “Pajivi itsanē itaxutobijianatsi, juya bajarapajivi namatamoitaxutobijianae. Pajivi ata itsanē vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinēta penajumecopatsilivaisi.

39 Itsiata baitsi jane xanē mapacuenia pacaitorobatsije. Itsanē itsa jamatabēpacabia, pētsa panayajivibiame. Itsanē itsa pacaítabarapacabiaxuaba anaeya, nexata icatsia itsanenia ata papecaítabarapacataxuabinexa, panaitabaracaevere.

40 Itsajivi itsa pacaneconitsijitsia jueznējavabelia paneamoneyabijamatabēcuenē papecavecuapitsinexa panijacamisa, nexata patocopare panijacamisajumavelia panenaxatatsijava ata papecavecuapitsinexa.

41 Vajabitsaē itsa pacacaponaeaxana pijajava anijakilómetrobejecuenia, nexata patocaponare pematatsēnēa ata. Cuatro pakilómetrobejecuenia ata patocaponare.

42 Bitso bepejiobijivi itsa pacavajēta itsacuenējavayo, parajure. Itsa paca-covaeta, patsicopare. “Jume,” pajamē pētsa, jai Jesús pijajivijavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi

(Lc 6.27-28, 32-36)

⁴³ Icatsia Jesús jumaitsi petsutoyenepanajavata pijajivi ayaibit-saëtoخانetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi mapacueniaje: “Pasivamëre papecayapëtaenë bitso. Paitoyamëre papecaityavi,” jai bajayata Dioso Moiséspijinëta penajumecopatsilivaisi.

⁴⁴ Itsiata baitsi jane xanë mapacuenia pacaitorobatsije. Pasivamëre papecaityavi ata. Pamonae ata pibisiacuenia pacabaracuaicuajai, bajarapamonae paxamë xaniavaetsia pabaracuaicuajamëre. Pamonae ata pacaitoya, bajarapamonae pexaniacuene patoexanare. Pamonae ata pibisiacuenia pacabijatane, pibisiacuene pacaexanae ata, patovajëre Diosojavabelia peyavenonaenexatsi.

⁴⁵ Bajarapacuenia nexata paneaxa, athëbëtatsia peecaenë, papeximëcuenia patsitajinavanapaename. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisiajamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata.

⁴⁶ Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestomatamo peyanijobabiabivi bitso pibisiacuene exana. Itsiata bajarapamonae ata asiva piasivatsi.

⁴⁷ Xaniavaetsia itsa pacopiapitsipame ëpaneyapëtaevi, nexata pexaniacuene apo paexanaemë tsipae pamonae Dioso apo pejumecovënëtsivivecua. Tsipaji Dioso apo pejumecovënëtsivi ata xaniavaetsia copiapitabiaba peyapëtaevitsi.

⁴⁸ Pacuenia jamatabëcueneitsi pejamatabëcuenexanepanaenë, paneaxa, athëbëtatsia peecaenë, bajara paxamë ata pajamatabëcueneitsimëre, jai Jesús pijajivijavabelia.

6

Pacuenia Jesús pijajivi muxujioba pexaniacuene pexanaenexa yabara pelivaisi

¹ Icatsia Jesús jumaitsi petsutoyenepanajavata pijajivi ayaibit-saëtoخانetojavabelia:

—¡Xania baja tsane! Pëtsa pexaniacuene paexaname saya jivi papecacuenaenexa, “Maponë bitso pexaniajamatabëcuenenëje,” papecasivajamatabëjainexa saya paneexanaejava yabara. Bajarapacuenia itsa paexanaejitsipame, nexata paneaxa, athëbëtatsia peecaenëjavabelia, apo paxainaemë tsipae itsacuenejavayo ata, pexaniacuenejavayo, papecaratsinexa athëbëtatsia.

² Bajaraxuata itsa payavenoname bepejiobivi, pëtsa panavajunupaebame daxitajivijavabelia paneyavenonaejava bepejiobivi. Itsamonae xua exana, navajunupaebabiaba daxitajivi pitabarata judiövi penacatuatabiabi-bonëjava, callejava ata. Bajarapamonae navajunupaebabiaba bepejiobivi peyavenonaejava, bepexaniajamatabëcuenevi saya petaenexatsi jivi. Xaniajanë pacuenia pacatsipaebijitsiatsi. Pamonae bajarapacuenia navajunupaebabiaba, bajarapacuenia penavajunupaebabiabixae, Diosojavabelia apo xainae tsane athëbëtatsia perajutsijavanexatsi.

³ Itsa payavenoname bepejiobivi, pëtsa panavajunupaebame itsajivijavabelia ata, bitso papecayapëtaejivijavabelia ata.

⁴ Muetsia payavenonare bepejiobivi. Nexata paneaxa, papecataenë muetsia paneexanaejava ata, pacarajutsiana bepejiobivi muetsia paneyavenonematamo, jai Jesús pijajivi yabara pelivaisi.

Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi

(Lc 11.2-4)

⁵ Icatsia Jesús jumaisi petsutoyenepanajavata pijajivi ayaibit-saëtoxanetojavabelia:

—Itsa pavajëcame Diosojavabelia, pëtsa pavajëcame pacuenia itsamonae vajëcabiaba. Bajarapamonae saya jema vajëcabiaba Diosojavabelia jivi petaenexatsi Dioso bepejumecovënëtsivi. Bajarapamonae jitsipabiaba nucaeya pevajëtsinexa Diosojavabelia daxitajivi pitabarata judiovi penacae-tuatabiabilonëjava, calle penaepacaxitajarabijava ata. Bajarapacuenia vajëcabiaba Diosojavabelia Dioso bepejumecovënëtsivi petaenexatsi jivi. Xaniajanë pacuenia pacatsipaebijitsiatsi. Pamonae bajarapacuenia ex-anabiaba, bajarapacuenia pexanaexae, Diosojavabelia apo xinae tsane athëbëtsia perajutsijavanexatsi.

⁶ Nexata paxamë Diosojavabelia itsa pavajëcame, pacaenëmë canacujitsia, pajonemeya panijaboyalia. Pabaupaxatare. Bajaraxuacujinae pavajëcare paneaxajavabelia. Nexata paneaxa pacayajava tsane bajarajota. Nexata paneaxa, papecataenë muetsia paneexanaejava ata, pacarajutsiana bajaraxua paneexanaematamo.

⁷ Itsa pavajëcame Diosojavabelia, pëtsa napëna pavajëcame saya piapi-anexa pavajëcaejava pacuenia Dioso apo peyapëtaevi vajëcabiaba. Dioso apo peyapëtaevi jamatabëcuenenavëxaniabiaya jamatabëjumai tsabiabi: “Itsa bitso apiä vajavajëcaejava Diosojavabelia, nexata matapania Dioso nacajumetaena vajavajëcaejava,” jamatabëjai tsabiabi Dioso apo peyapëtaevi.

⁸ Pëtsa bajarapacuenia paxamë pajamatabëcuenetsimë. Panevajëcaevajënaeya ata raja paneaxa, Dioso, yapëtane xua panamatavenoname.

⁹ Bajaraxuata itsa pavajëcame Diosojavabelia, pavajëre mapacueniaje: Taxamë, athëbëtsia neecaenë, jitsipajë pecayaiyataejava daxitajivi.

¹⁰ Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejjitsipaecuenia pecatoex-anabiabinexa, pacuenia baja athëbëtsia nijajivi nejjitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje.

¹¹ Ajena, pamatacabinexa, panerajure pataxaejavanexa pacuenia panamatavenonajë.

¹² Panevecuaajibiaexanare pibisiacuene pataexanaeconimi. Pacuenia paxanë pajamatabëcuenecaevajë, pabarajamatabëcuenexanepanua, itsamonae paxanëjavaberena pibisiacuene patanexanaejava, bajara pijinja pacuenia xamë ata nitabarata pibisiacuene pataexanaejava jamatabëcuenecaevare. Panebarajamatabëcuenexanepanua.

¹³ Panevecuatsare dovathi patanejamatabëcuenëjëbiiyaniva. Panecapanepare jane pibisiacuenevecua. Pamatacabi xamë taxuxuabianame daxita nijajivi nevetsijava mapanacuataje, nejamatabëcuenesaëta evetsianame. Nexata nijajivi jumai tsane xamë yabara: “Dioso cajena bitso ayaijamatabëcuenenë,” jai tsane. Bajarapacuenia nijajivi evetsianame daxitamatacabijavabelianexa, pajamë tsanë mapacueniaje itsa pavajëcame Diosojavabelia,

jai Jesús pijajivijavabelia.

¹⁴ Jesús icatsia jumaitsi pijajivijavabelia:

–Nexata paxamē itsamonae pibisiacuene pacaexanae ata, pajamatabēcueneceavare. Pabarajamatabēcuenexanepanarena. Nexata paxamē itsamonae pibisiacuene papecaexanaejava, itsa pajamatabēcueneceavianame, itsa pabarajamatabēcuenexanepanaenamenua, nexata paneaxa, athēbētatsia peecaenē, pítabarata pibisiacuene paneexanaejava jamatabēcueneceaviana. Pacabarajamatabēcuenexanepanaenanua.

¹⁵ Paxamē itsa apo pajamatabēcueneceavimē tsane itsamonae pibisiacuene papecaexanaejava, itsa apo pabarajamatabēcuenexanepanaemēnua tsane, nexata paneaxa ata apo jamatabēcueneceavi tsane. Apo pacabarajamatabēcuenexanepanaenua tsane, pítabarata pibisiacuene paneexanaejava, jai Jesús pijajivijavabelia.

Pacuenia Jesús pijajivi tsipaeba pacuenia Jesús pijajivi exanaejitsia pamatacabibeje Diosojavabelia vajēta pona pexaejava xaenejeva yabara pelivaisi

¹⁶ Icatsia Jesús jumaitsi petsutoyenepanajavata pijajivi ayaibit-saēto xanetojavabelia:

–Itsa apo paxaemē panexaejava pamatacabibeje pavajēcame Diosojavabelia, pētsa pajinavanapame panaitabaraquiatsinejevamē, panamatatiatsinejevamēnua. Itsamonae Diosojavabelia itsa vajēcabiaba pexaejava xaenejeva, pamatacabibeje vajēcabiaba Diosojavabelia, apo naitabaraquiatabiabi, apo namatatiatabiabinua. Bajarapacuenia jinavanapabiaba pamatacabibeje vajēcabiaba Diosojavabelia tsipaji saya bajarapamonae jitsipa petaevitsi pesivajamatabējumaitsinexatsi: “Mapamonaeje Dioso bitso pejumecovēnētsivi. Diosojavabelia bitso pevajēceavi pexaejava xaenejeva. Nayapētane Diosojavabelia bitso pevajēceajava. Tsipaji naitabaraquiatsinejeva, namatatiatsinejevanua, jinavanapa,” pesivajamatabējainexatsi petaevitsi. Xaniajanē pacuenia pacatsipaebijitsiatsi. Bajarapamonae pexaejava xaenejeva vajēcabiabi ata Diosojavabelia, itsiata bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovēnētsivi, bajarapacuenia vajēcabiaba.

¹⁷ Paxamē itsa apo paxaemē panexaejava pamatacabibeje pavajēcame Diosojavabelia, itsiata panaitabaraquiare. Panamatatiarenua xaniavaetsia.

¹⁸ Bajarapacuenia paexanaename jivi peyapētaeyaniva Diosojavabelia panevajēcaponaejava panexaejava paxaenejevamē. Caenē paneaxa, papeyajavanē, yapētaena. Nexata bajaraponē itsamatacabi pacarajutsiana panijamatamo, jai Jesús pijajivijavabelia.

Pacuenia Jesús pijajivi tsipaeba xaniavaetsia Dioso petonacuenebavanapaenexa itsamatacabi ayajava pexainaenexa athēbētatsia yabara pelivaisi (Lc 12.33-34)

¹⁹ Icatsia Jesús jumaitsi petsutoyenepanajavata pijajivi ayaibit-saēto xanetojavabelia:

–Pētsa pacaetuataponame ayajava panexinaejavanexa mapanacuataje. Tsipaji pacatobijianaējitsipa piucubaxaevi. Pacatotasibijitsipatsinua. Pacatonacobetoxotsipanua penacobetoxotsivi.

²⁰ Dioso jane xaniavaetsia patonacuenebavanapare. Nexata Diosojavabelia ayajava pexaniacuene paxainaename athēbētatsia. Nexata bajarajotatsia apo pacatobijianaē tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane.

²¹ Panacuatatsia pacatoxaniavaeta panexainaejavanexa, bajarapanacua panejamatabëethëtovetsina pajamatabënjavanapaename, jai Jesús pijajivi-javabelia.

Pacuenia vajaitaxuto belámparabë yabara pelivaisi

(Lc 11.34-36)

²²⁻²³ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Lámparabë bo ënëtuatuajëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

Pacuenia Jesús pijajivi muxujioba bitso pejitsipaeyaniva palata yabara pelivaisi

(Lc 16.13)

²⁴ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Itsajivi ata acuenebi caecuenia petonacuenebijava anijanëbeje pijatuxanenëbejeyavabelia. Caenëjavabelia, ponë jitsipa petonacuenebinexa, tonacuenebijitsipa. Ponëjavabelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

Pacuenia Dioso pijajivi eveta mapanacuataje yabara pelivaisi

(Lc 12.22-31)

²⁵ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënajinavanapaenexa. Pëtsa pasivanajamatabëxainamenua ëpananaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvjanaperabëxatabinexa.

²⁶ Pataema baratsuimonae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoy Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa.

²⁷ ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

²⁸ Bajaraxuata pëtsa bitso pasivanajamatabëxainame ëpananaxatabijavanexa. Pacanaëjëre pacuenia vitsabapona pematono vayaføjava. Bajarapamatono apo natsijumanacuenebi. Penaxatatsijavanexa ata apo natsijumaexanae.

²⁹ Bajayata nacuaevevetsinēmi Salomónpijinē, bitso pexainaenēmi. Naitabētsiaya naxatababiaba bitso pexaniaviriajavanē. Itsiata baitsi jane Salomónpijinē penaitabētsijava matatoxenetsia bitso aitabē mapamatonotoxije.

³⁰ Paxamē bevelia panejumecovēnētsivi Dioso, asaēya bepajumecovēnētame Dioso papecaevevetsijava. Ajena pitsijavata vayafota tanetsi pexaniaponamatonotoxi. Bajaraxuacujinae, caematacabibejecujinae, tajuatsi baja bajarapaponamatonotoximi. Pacuenia Dioso aitabēyaexana ponamatonotoxi, bajara pijinia pacuenia paxamē ata Dioso pacaxatabiana piatibējava itsa pajumecovēnētame Dioso.

³¹ Bajaraxuata pētsa jamatabēbējiaja pajamatabējumaitsimē: “¿De tsaeta xua xaenatsi? ¿De tsaeta xua matavējēa apaenatsi? ¿De tsaeta xua naxatabianatsi?” pajamatabējamē pētsa.

³² Pamonaē Dioso apo pejumecovēnētsivi, bajarapacuenia bitso sivana-jamatabēxainabiaba ēpexaejavanexa, ēpenaxabijavanexa ata. Itsiata baitsi jane paneaxa paxainame, athēbētatsia peecaenē. Bajaraponē yapētane daxita xua panamatavenoname.

³³ Bajaraxuata, daxita xua panamatavenoname, matatoxenetsia, Dioso pi-jacuenē bitso pasivanajamatabēxainabiabianame panetoexanavanapaenexa pacuenia Dioso pacaitoroba. Nexata Dioso pacarajutsiana daxita xua panamatavenoname.

³⁴ Itsa baja pajamatabēcuenebējamē ajena pitsijavata itsacuenejavayo yabara, pētsa caecuenia payajavajamatabēcuenebējamē xua yabara meravia pitsijavata pacatocopiapatsijitsia. Tspaji xua caematacabi canacujitsia nacatocopiapatabiaba vajajamatabēcuenebējainexa, ayaijava baja tsabiabi. Bajaraxuata ajena pitsijavata apo besivajamatabēcuenebējaitsi xua meravia pitsijavata nacatocopiapatsijitsia, jai Jesús pijajivijavabelia.

7

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi (Lc 6.37-38, 41-42)

¹ Icatsia Jesús jumaitsi petsutoyenepanajavata pijajivi ayaitbit-saētoخانetojavabelia:

—Pētsa panataneme pepacuenē bepaneanēconijibivi. Nexata itsamonae pibisiacuene pexanaejava xaniavaetsia payapētaenejevamē, pētsa pabaracuaicuaijamē mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamē pētsa. Tspaji paxamē ata pijinia bajarapitsineconi itsa paxainame, Dioso bitso ayaicuenia pacananeconitsiaexanaejitsipa.

² Itsamonae pexanaejava xaniavaetsia payapētaenejevamē, pētsa pabaracuaicuaijamē mapacueniaje: “Bajarapitsicuene pexanaevi Dioso naneconitsiaexanaenatsi,” pajamē pētsa. Tspaji paxamē ata bajarapitsicuene itsa paexaname, itsamonae pijinia bajarapacuenia pacabaracuaicuaijai tspiae.

³ Bajaraxuata paxamē pepacuenē bepaneanēconijibivi nataeya pētsa pa-muxujiobame itsajivi pijaneconi yabara. Tspaji raja apo payapētaemē paxamē ata pijinia paneconivajēto paxainame.

⁴ Nexata paxamē ata ayaneconixaneto itsa paxainame, nexata itsajivijavabelia apo bepajumaitsimē: “Papibisiacuene exaname, copare baja,” apo bepajamē.

⁵ Yamaxëitojorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

⁶ Icatsia Jesús jumaiti petsutoyenepanajavata pijajivi ayaibit-saëtoxanetojavabelia:

—Pëtsa matavëjëa patsipaebaponame Dioso pejumelivaisi, pamonaepatsipaebi atamë, apo yayatae bajarapalivaisi. Tshipaji saya capocaponabiaba bajarapalivaisi. Vaxaiti itsanë pijsaaviri pexaejavanaxa rajutsi atatsi tsipae, saya nacaitoya tsipae. Nacasinijitsipanua. Bajara pijinia jamatabëcueneitsi pamonaepo yayatae Dioso pejumelivaisi, patsipaebi atamë. Pacuenia marrano ata itsa rajutsipatsi perlavënëjáva, bitso penamatamotsijava, saya taxunanonobijitsipa, bajara saya jamatabëcueneitsi bajarapamonaepo, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëtaponaejitsia yabara pelivaisi

(Lc 11.9-13; 6.31)

⁷ Icatsia Jesús jumaiti petsutoyenepanajavata pijajivi ayaibit-saëtoxanetojavabelia:

—Pavajëtaponare Diosojavabelia bajayajebi ata pacuenia bajayajebi ata pajaitsipamë panecaxitajarabinexa itsa pacatonaxuaba itsacuenejavayo. Pavajëtaponare Diosojavabelia asaëyata pacuenia asaëyata padocodocotsipame baupa papecatobaupatsinexa itsa baupa xatatanuta.

⁸ Bajarapacuenia asaëyata pavajëtaponare Diosojavabelia tsipaji pajivi vajëtabiaba, rajutobiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi.

⁹ Paxamë papebijivimë panexinaevi. Panexënatonëyo itsa pacavajëta panbë, apo panacoxirajutsimë tsipae iboto.

¹⁰ Itsa pacavajëta dujuainëyo, apo panacoxirajutsimë tsipae jomo.

¹¹ Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itsa pavajëtame.

¹² Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaejavabelia. Bajarapajamatabëcuene jëpa Dioso Moiséspijinëta penajumecopatsilivaisi.

Diosojumepaebivimi profetavi peyaquinaelivaisianë ata jëpa bajarapajamatabëcuene, jai Jesús pijajivijavabelia.

Tsiquiribaupayo epatajërëtsialia yabara pelivaisi

(Lc 13.24)

¹³ Icatsia Jesús jumaiti petsutoyenepanajavata pijajivi ayaibit-saëtoxanetojavabelia:

—Pajonemeya tsiquiribaupayovalia panepatsinexa Dioso pijanacuayabelia. Tshipaji pinijibaupa, pinijinamutonua, pata infiernojavabelia. Nexata jivi ayaibitsaëtoxanetonë bajaraxuayo jonepona.

¹⁴ Pabaupa tsiquiribaupayo, tsiquirinamutoyonua, bajarapanamuto pata maticabi apo peveverecaejava pexinaevi pijanacuayabelia. Nexata

saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

Pacuenia peubinaenë itsa nacuaita, nayapëtane pavirianaecuene yabara pelivaisi

(Lc 6.43-44)

¹⁵ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Xania panayajivitaema. Pamonaе saicayacuenia Dioso pejumeliv-aisivecua jivi tsipaebapona, bajarapamonae najumetsënëtsiaya pacajumi tsabiabi: “Paxanë raja Dioso patanitorobicuenia livaisi jivi patsipaebaponajë,” pacajai tsabiabi. Bajarapamonae Dioso pejumecovënëtsivi cuenecataeya najonena paxamëjavaberena. Itsiata baitsi jane pacuenia nevëthë pianaepanaevi jamatabëcueneitsi, bajara jamatabëcueneitsi. Jamatabëpacopatsiaexana Dioso panejumecovënëtsijavami.

¹⁶ Vaxaitsi rabaja yapëtanetsi mapacuenije. Peubinaenë itsa nacuaita, yapëtanetsi ponaecuai xanepana vajaxaenexa. Nexata bajaraponae cuaixanetsi. Ponaе pijinia pibisiacuai nacuaita, yapëtanetsi piabejecuene. Nexata bajaraponae apo cuaixaetsi. Nexata pacuenia peubinaenë itsa nacuaita, nayapëtane ponaecuai xanepana vajacuaixaenexa, bajara pijinia pacuenia paxamë payapëtaename pacuenia jamatabëcueneitsi bajarapamonae itsa pacuenaetaename xua exanavanapa. Uvaru apo paucutsimë cucunanaeta. Higovënëcuaito ata apo paucutsimë jomovaënaeta. ¹⁷ Nexata ponaе pexanianae, pexaniacuai pijinia nacuaita vajaxaenexa. Ponaе pijinia pibisianaе, ëpiabejecuai nacuaita.

¹⁸ Pexanianaе pexaniacuai nacuaita. Apo nacuaitsi piabejecuai. Pibisianaе pijinia apo nacuaitsi pexaniacuai.

¹⁹ Daxita ponaenë nacuaita pibisiacuai, apo vajaxaecuai, yapëtanetsi. Nexata daxita bajaraponaenëmi nicatatsi. Nexata tajuitatsi isotota.

²⁰ Bajara pijinia pacuenia paxamë ata payapëtaename itsa pacuenaetaename xua exanavanapa pamonaе saicayacuenia Dioso pejumelivaisivecua jivi tsipaebapona, jai Jesús pijajivijavabelia.

Pacuenia daxitajivi apo jone tsane Dioso pijanacuayabetsia yabara pelivaisi

(Lc 13.25-27)

²¹ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Daxita pamonaе: “Tajatuxanenë,” tanejaivi ata, itsa apo jumecovënëtsi tsane taxa Dioso, athëbëtatsia peecaenë, nexata apo jone tsane taxa Dioso pijanacuayabetsia. Itsiata pamonaе exanavanapa taxa, athëbëtatsia peecaenë, pejitsipaecuena, ëbajarapamonae jonena taxa pijanacuayabetsia.

²² Pamatacabi copiapatsiana pijaneconi pexainaevi Dioso penaneconitsaexanematacabinexa, bajarapamatacabi jivi ayaibitsaëtoxanetonë nejumaitsi tsane: “Patajatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jivivecua pacapitsaponaenë. Nevënëtanua pinijicuene pataexanaejavanë, Dioso pesaëta paexanaponaenë,” nejai tsane jivi ayaibitsaëtoxanetonë.

²³ Itsiata baitsi jane xanë jumaitsinë tsane bajarapamonaejavabelia: “Apo pacayapëtaetsi cajena paxamë. Panevecuaponare pibisiacuene paneexanabiabivi,” janë tsane bajarapamonaejavabelia, jai Jesús pijajivijavabelia.

Pacuenia Jesús livaisi tsipaeba anijanēbeje bo pexanaenēbeje pelivaisicuenia yabara pelivaisi

(Mr 1.22; Lc 6.47-49)

²⁴ Jesús icatsia jumaitsi petsutoyenepanajavata pijajivi ayaibit-saētoخانetojavabelia:

—Pajivi nejumecovēnētsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinē tsane. Tsipaji ponē pijabo exanaejitsia, peyapētaexae itsajota pijabo exanetsijitsia pebubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponē bo pexanaejava apo nacueratsi.

²⁵ Bo peveretetsicujinae ayaiemaxaneto jopa. Menianē avajubua tsaponae. Ira bubuta. Ayaijovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata.

²⁶ Pajivi nejumetae ata patacatsipaebilivaisi, apo nejumecovēnētsi tsane, nexata itsa apo exanae tsane taitorobicuenia, bajarapajivi nacueratsiana. Pacuenia tajetabota bo pexanetsinē nacuerata bo pexanaejava, bajara itsi tsane. Ponē tajetabota pijabo exaneta, yapētae ata emarapae pecopiapatsijavanexa, bajaraponē nacuerata bo pexanaejava.

²⁷ Tsipaji bo peveretetsicujinae ayaiemaxaneto jopa. Menianē avajubua tsaponae. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuenia baja nexata bomi abeje, jai Jesús mapacueniaje pijajivijavabelia.

²⁸ Itsa baja Jesús najumevereta petsutoyenepanajavata bajarapalivaisi petsipaebijava, pejumetaevitsi bitso jamatabēcuenenabenajaca.

²⁹ Jesús pejumetaevitsi bitso jamatabēcuenenabenajaca tsipaji Jesús livaisi tsipaeba pinijijamatabēcuene pexainaenēcuenia. Apo tsipaebi pacuenia judiōvi pecujarubivi tsipaebabiaba.

8

Pacuenia Jesús jamatejemayaexana bajayajebi bitso peperabētsabanaenē yabara pelivaisi

(Mr 1.40-45; Lc 5.12-16)

¹ Itsa baja Jesús runaica petsutojumavetsica, jivi ayaibitsaētoخانeto pēnaponatsi.

² Nexata imoxoyotatsi bajayajebi bitso peperabētsabanaenē. Pitabarata pematabacabēta tonucatsi. Bitso peperabētsabanaenē jumaitsi Jesúsjavabelia:

—Jesús, cacaējēpa raja tanejamatejemayaexanaenexamē. Itsa jitsipame, nejamatejemayaexanare mapavitanevecuaje, jai bitso peperabētsabanaenē.

³ Nexata Jesús pecobeta perabējajalia bitso peperabētsabanaenē. Jesús jumaitsi bajaraponējavabelia:

—Jājā, jitsipajē cajena. Jamatejemamē rabaja, jai Jesús bajayajebi bitso peperabētsabanaenējavabelia.

Bajarapacuenia Jesús pejumaitsijavata peperabētsabanaenēmi baja perabēxanepananajereca.

⁴ Nexata icatsia Jesús jumaitsi bajaraponējavabelia:

—Nejumetaema. Pētsa tsipaebame itsajivijavabelia ata tacajamatejemayaexanaejava. Naitajētsiaremelia jane sacerdotenējavabelia, templobeta penacuenebinējavabelia. Nexata jivi yapētaena pepacuenia baja pecavecuajibijava niavitanejavami. Diosonexa rajuremelia ofrenda sacerdotenējavabelia pecavecuajibiaexanaexae niavitanejavami. Bajara tsipaji

pacuenia bajayata vajasalinainemi Moiséspijinē nacaitoroba. Nexata sacerdotenē cataena pecavecuaajibijava baja niavitanejavami, jai Jesús bajaraponējavabelia.

Pacuenia vajabitsaē pijacapitán pijabota petonacuenebaponaponaenētsi, Jesús tojamatejemayaexana yabara pelivaisi

(Lc 7.1-10)

⁵ Itsa baja Jesús pata Capernaum tomarabelia, Romano nacuapijivajabitsaēvi pijacapitán Jesús imoxoyorenatsi pevajétsinexatsi. ⁶ Vajabitsaēvi pijacapitán bitso ayaicuenia vajēta Jesúsjavabelia. Jumaitsi:

—Petuxanenē, tajajivitonē raja tajabota camata boboca. Bitso cuenabatsi. Pinijicuenia navixaetaeyabiaba, jai.

⁷ Nexata Jesús jumaitsi capitánjavabelia:

—Xanē ponaenajē nijaboyabelia. Nexata catojamatejemayaexanaenatsi nijajivitonē, jai Jesús.

⁸ Nexata capitán jumaitsi Jesúsjavabelia:

—Petuxanenē, xanē raja bitso beveliajamatabēcuenenēnē xamēvecua. Nexata apo xanepanae tsipae nejonejava tajaboyabelia. Nexata saya maveliaje ėnijume itorobare. Nexata tajajivitonē netojamatejema tsane.

⁹ Xanē ata xainajē taneitorobabiabivi taneitorobicuenia tajumecovēnētabinexa. Xanē ata juya xainajē vajabitsaēvi tajajivi taitorobicuenia tanetoexanabinexa. Nexata itsa itorobajē caenē vajabitsaēnē peponaenexa, bajaraponē ponabiaba. Itsa junarenajē itsanē vajabitsaēnē pepatsinexa xanējavaberena, bajaraponē patabiabarena. Itsa itorobajē tajajivitonē tanetoexanaenexa itsacueneyavayo, nexata netoexanabiaba. Bajara pijinia pacuenia xamē ata nexanaenexa cacajēpa. Nexata saya maveliaje ėnijume itorobare saya ėnijumeta tajajivitonē tanetojamatejemayaexanaenexamē, jai capitán Jesúsjavabelia.

¹⁰ Jesús itsa jumetane bajarapacuenia capitán pejumatsijavatsi, nexata Jesús jamatabēcuenenabenajaca. Nexata Jesús jumaitsi pepēnaponaevitsijavabelia:

—Xaniajanē pacuenia pacatsipaebijitsiatsi. Israel nacuapijivi nejumecovēnētsi ata, itsiata caeto ata apo caxitajarabaxuabinē xanējavaberena bitso tanesivanajamatabēcuenecopatsinē pacuenia mapacapitán nesivajamatabēcuenecopatsiaya jumaitsije.

¹¹ Nexata pacatsipaebatsi paneyapētaenexa. Apo judíovi ata raja, ayaibitsaētoxanetonē daxifanacuanēpijivi, Dioso jumecovēnētsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatatsia, Abrahampijinē yajava, nabaniana. Isaacpijinē ata, Jacobpijinē ata yajava, nabaniana.

¹² Itsiata baitsi jane judíovi, pamonaē picani Dioso athēbētatsia toxaniavaetatsi peyajavajinavanapaenexatsi, bajarapamonae caranata apo jumecovēnētsi Dioso. Nexata bajarapamonae infiernojavabelia Dioso xuabianatsi. Bajarajota nuena. Navonosiniana bitso penavixaetaexae, jai Jesús mapacueniaje pepēnaponaevitsijavabelia.

¹³ Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanējavaberena nesivanajamatabēcopsiaya jumaitsimē tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonē baja tojamatejematsi.

Pacuenia Simón Pedro pijava pena Jesús tojamatejemayaexana yabara pelivaisi

(Mr 1.29-31; Lc 4.38-39)

¹⁴ Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucaejavatsi camata.

¹⁵ Nexata Jesús cobejayata peromaebanucaeavatsi. Jesús pecobejayatsijavata, bajarapova vecuaajibitsireca baja domae. Nexata baja bajarapova jamatejema. Jesús bana pexaejava bajarapova toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi

(Mr 1.32-34; Lc 4.40-41)

¹⁶ Itsa baja ajena meravitsia, Jesús javaberena tocapatatsi ayaibitsaëto dovathi peyajavajinavanapaevi. Caejumeta saya Jesús caecuenia dovathi vecuacapitsapa bajarapamonae. Bajarajota jamatejemayaexananua daxita piavitanevi.

¹⁷ Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebinëmi profeta Isaíaspijinë tajëvelia vajunupaeba. Profeta Isaíaspijinë bajayata tajëvelia jumaitsi mapacueniaje: “Bajaraponë nacavecuajibiaexanaena vajaavitanejavami,” jai bajayata tajëvelia Isaíaspijinë Jesús yabara.

Pacuenia picani Jesús jamatabëpënaponatsi itsamonae yabara pelivaisi

(Lc 9.57-62)

¹⁸ Nexata Jesús itsa tane jivi ayaibitsaëto pematatoyoronaevavatsi, pijajivi junata pepënaaxuabinexatsi pucaxaneto itsapanabelia.

¹⁹ Nexata bajarapaepatota judíovi pecujarubinë Jesús imoxoyorenatsi. Judíovi pecujarubinë jumaitsi Jesús javabelia:

–Petuxanenë, itsabelia poname, capënaponaenatsi cajena, jai.

²⁰ Nexata Jesús jumaitsi judíovi pecujarubinë javabelia:

–Itsa nepënaponaejitsipame, apo napatabiabimë tsipae tajabota nenacuer-aetetabibinexa. Tsipaji tajabo apo xainaenë. Namo pijamëthëanë xaina pepatabibinexa pemajitabibinexa. Baratsui ata pematapenanë xaina. Itsiata baitsi jane xanë, Daxitajivi Pematapijinë, itsajavabelia ata apo xainaenë itsajota nacueraetetabibijitsianë, jai Jesús judíovi pecujarubinë javabelia.

²¹ Nexata Jesús pijajiviyajuvënënë jumaitsi Jesús javabelia:

–Tajatuxanenë, caepatoyo abaxë necopare tamëthësinexa taxa petëpaenë, jai.

²² Jesús nexata jumaitsi pijajivitonë javabelia:

–Naxanitsia. Nepënaponare. Copare matababi apo peverevereaejava apo pexainaevinexa pemëthëcaenexatsi nijamonaemi itsa tëpa, jai Jesús pijajivitonë javabelia.

Pacuenia Jesús itaveta joviboxaneto, malataca yajava, piyajavami yabara pelivaisi

(Mr 4.35-41; Lc 8.22-25)

²³ Jesús, pijajivi yajava, runa jera ënëabereca. Nexata Jesús pijajivi jerata yajavanajetarua pucajava.

²⁴ Nexata jemata pinijjoviboxaneto najetarua. Malatacaxanetonë bitso ayai. Nexata malataca jera ënëaberena mera epabajarabapona. Itsiata Jesús jamatejema majitanuca.

²⁵ Nexata Jesús pijajivi yaitavabatsi pemajitanucaeñe. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! ¡jai Jesús pijajivi.

²⁶ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? ¡jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba.

²⁷ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia Gadara tomarapijinëbeje, dovathivi peyajavaponaponaeñebeje, Jesús vecuacapsapa Gerasa nacuata yabara pelivaisi
(Mr 5.1-20; Lc 8.26-39)

²⁸ Jesús pijajivi barëpata pucaxaneto itsapanabelia, Gerasa nacuayabelia. Jesús itsa pata Gerasa nacuata, Gadara tomarapijinëmibeje pitsaparenabeje jivimëthëañejavaverena. Imoxoyorenatsibeje Jesús. Bajaraponëbeje dovathivi peyajavaponaponaeñebeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava.

²⁹ Nexata dovathivi peyajavaponaponaeñebeje vavajabeje.

—Jesús, Dioso pexënatomë, ¿detsa xua namatavenoname paxanëbejejavaverena? ¿Dioso tsaja daxitajivi penaneconitsia exanaematacabinexavajënaeya patame patanenaneconitsiaexanaexamëbeje? ¡jabeje Jesúsjavabelia dovathivi peyajavaponaponaeñebeje.

³⁰ Nexata bajarajota, imoxoyo petsutojavata, marranobitsaëtoxaneto xaevanapa.

³¹ Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marranobitsaëtoxanetojavabelia, ¡jai.

³² Nexata Jesús jumaitsi dovathivijavabelia:

—Paponare baja panejonenexa marranobitsaëtoxanetojavabelia, ¡jai.

Nexata bajaraponëbeje dovathivi vecuapitsapatsibeje. Nexata baja marranobitsaëtoxanetojavabelia junua dovathivi. Nexata daxita bajara pamarranobitsaëtoxanetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoxanetomi meneta bubuna.

³³ Bajara pamarranobitsaëtoxanetomi pevetavanapaevi, rëcëpeca. Itsa bajarapamonae Gadara tomarabelia pata, tsipaeba pacuenia tane. Tsipaebanua pacuenia Jesús dovathivi vecuacapsapa dovathivi peyajavaponaponaeñebeje.

³⁴ Nexata daxita bajarapatomarapijivi ponarena Jesúsjavaverena. Nexata itsa tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecuca, ¡jai bajarapamonae Jesúsjavabelia tsipaji cjunavatsi.

9

*Pacuenia Jesús jamatejemayaexana petabusipacuenabinëtsi yabara peliv-
aisi*

(Mr 2.1-12; Lc 5.17-26)

¹ Jesús runareca jera ënëabereca. Nicabalia puca itsapanabelia. Pata nexata pijatomarabelia.

² Bajarajota Jesús tocapatatsi petabusipacuenabinëtsi. Pacamayota bocabiaba, yavëtarapatatsi. Jesús jamatabëcuenyapëtane pacuenia sivanajamatabëxainatsi petocapsivitsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcuenyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, jamatabëcuenebarëyamëre. Pibisiacuene rabaja nexanaeconimi cavecuaajibiaexanatsi, jai Jesús petabusipacuenabinëtsijavabelia.

³ Nexata judíovi pecujarubivi itsa jumetaeyena bajarapacuenia Jesús pejumait sijava, najamatabëxainena.

—Maponë Jesúsje Dioso apo pejitsipacuena cuaicuaijai, jamatabëjai tse-nae judíovi pecujarubivi Jesús yabara.

⁴ Jesús jamatabëcuenyapëtane judíovi pecujarubivi bajarapacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisiajamatabëcuene.

⁵ Paxamë apo pacacajëpae ata itsajivi pibisiacuene pexanaeconimi panvecuaajibiaexanaenexa, pacacajëpa picani saya jema panejumait sinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeconimi,” panejainexa. Tspaji itsajivi ata apo yapëtae tsipae saya jema panejumait sijava. Itsiata baitsi jane itsa apo pacacajëpae panejamatejemayaexanaenexa petabusipacuenebinëtsi, acuenebi panejumait sinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tspaji bajarapacuenia pajumait simë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacajëpaeacuene panejamatejemayaexanaenexa, jai nexata Jesús judíovi pecujarubivijavabelia.

⁶ Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necajëpa tavecuaajibiaexanaenexa itsajivi pibisiacuene pexanaeconimi ata pacuenia baja exanajë maponëjavabeliaje. Nexata patanecueneyapëtaenexamë tanecajëpaeacuene tavecuaajibiaexanaenexa itsajivi pibisiacuene pexanaeconimi ata, pataema pacuenia jamatejemayaexanaejitsianë maponëje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinëtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

⁷ Nexata bajarapacuenia Jesús pejumait sijavata, petabusipacuenabinëmitsi nonotapuna. Pijaboyabelia baja pona.

⁸ Nexata jivi itsa tane bajaraxua, junava cajena bitso. Nexata bajarapamonae jumaitsi Diosojavabelia:

—Diosomë, bitso ayaijamatabëcuenenëmë. Tspaji jivi cajëpaeayaexaname pinijicuene pexanaenexa, jai.

Pacuenia Jesús pijajivitonēnexa junata Mateo yabara pelivaisi

(Mr 2.13-17; Lc 5.27-32)

⁹ Jesús baja vecuapona itsajota jamatejemayaexana petabusipacuenabinētsi. Nexata Jesús penajetarucaejavata taeyeta Mateo. Mateo gobierno pejamatabēcuene impuestomatamo pematamoyanijobabiabinē. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumaitsi Mateojavabelia:

—Mateo, nepēnaponare, jai.

Jejai Mateo. Nexata nonotapuna. Mateo baja napona Jesús pepēta.

¹⁰ Nexata Mateo junata Jesús pebarēnabaninexa pijabota. Nexata Mateo pijabota Jesús pexaejava naxane. Mateo pijabota naena ayaibitsaēto gobierno pejamatabēcuene jivijavabelia impuestomatamo petomatamoyanijobivi. It-samonae ata nanabane, piajamatabēcuenebejevi. Jesús pijajivi nayajavaeca bajarapamesajavata.

¹¹ Nexata fariseovi itsa tane bajarapacuenia, jamatabēcuenenavēxaniabiaya jumaitsi Jesús pijajivijavabelia:

—Papecacujarubinē rabaja Jesús naneconita Diosojavabelia. Tsipaji gobierno pejamatabēcueneta impuestomatamo pematamoyanijobabiabivijavata, piajamatabēcuenebejevijavatana, naxaeyeca pexaejava, jai fariseovi Jesús pijajivijavabelia.

¹² Jesús nexata jumetaeyeca bajarapacuenia fariseovi pejumaitsijava. Nexata Jesús jumaitsi fariseovijavabelia:

—Pevaēbinē raja apo vaēbi pejamatabējemavi. Pevaēbinē raja piavitanevi vaēba. Bajara pijinia xanē ata itsinē. Sivapatajopajē tajunatsinexa pibisiajamatabēcuenevi pecapanepaenexatsi Diosojavabelia.

¹³ Paponare. Palebianame Dioso pejumelivaisibaxuto. Nexata payapētaename pajamatabēcuene yabara jumaitsi Dioso pejumelivaisibaxutota mapacueniaje: “Jitsipajē paneitaxutotsoniataejava itsamonae. Apo jitsipaenē saya patanetobeyabiabijavamē dajubicuene ofrendacuenia patanerajutabiabinexamē,” jai Dioso pejumelivaisibaxutota. Xanē raja apo sivapatajopaenē tajunatsinexa pamonaē baja aneonijibi tsavanapae. Bijl rajane sivapatajopajē tajunatsinexa pijaneconi pexainaevi. Junataponajē bajarapamonae pecopabinexa pibisiacuene pexanaejava penajamatabēcuenepeñēyorotsinexa Diosojavabelia, jai Jesús fariseovijavabelia.

Pacuenia Jesús yanijobatsi pamatacabibeje jivi vajētaƨona Diosojavabelia pexaejava apo pexaeyabiabixae yabara pelivaisi

(Mr 2.18-22; Lc 5.33-39)

¹⁴ Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniaje:

—Petuxanenē, paxanē pataxaejava apo paxaeyabiabinē pamatacabibeje pavajētaƨonajē Diosojavabelia. Bajara pijinia itsi fariseovi ata pamatacabibeje vajētaƨona Diosojavabelia. Pexaejava apo xaeyabiabi. ¿Detsa xujajitsia xamē nijajivi pamatacabibeje vajētaƨona Diosojavabelia pexaejava xaeyabiaba? jai Juan pijajivi Jesúsjavabelia.

¹⁵ Nexata Jesús jumaitsi Juan pijajivijavabelia:

—Pamonae junatatsi penacasabifistajavabelia penanabaninexa, apo at-sobi pexaejava itsa abaxē yajavaecatsi pejananacasabinē. Itsiata baitsi jane pejananacasabinē itsa tsimaxēpatsipatsi pevecuacaponaeenexatsi itsajavabelia, nexata bajarapamonae pexaejava apo xae tsipae. Tsipaji bitso najamatabēxainaejitsipa pevecuacaponaeaxetsi. Bajara pijinia itsi tajajivi

ata. Tayajavaponaponaepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponaena bajarapamonaevecta, nexata jane baja bajarapamatacabi pexaejava apo xae tsane bitso tanesivanajamatabëxainaexae, jai Jesús Juan pijajivijavabelia.

16 Nexata Juan pijajivi perujujamatabëcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa ëpejanalivaisi, Jesús petsipaebilivaisi. Juan pijajivi anijajamatabëcuenebeje pexainaeyaniva, perujujamatabëcuene baja pecopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaiti Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa.

17 Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaraxuata bepac pejanavinoranë pejanabocodoruanëjavabelia. Nexata vinoranë peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bajarapacuenia Jesús jumaiti Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja pecopabinexa.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

(Mr 5.21-43; Lc 8.40-56)

18 Jesús livaisi petsipaebanucaejavata Juan pijajivijavabelia, judíovi penacaetuatabiabibo pevetsinë parena Jesúsjavaverena. Nexata bajaraponë Jesús pitabarata yayataeya pematocababëta nucajunua. Jumaiti Jesúsjavabelia:

—Taxënatovayo rabaja aeconoxae netotëpa. Itsiata baitsi jane itsa poname tajaboyabelia, nexata itsa netoperabëjayatsianame necobeta, icatsia netoasaë tsane, jai bajaraponë Jesúsjavabelia.

19 Nexata Jesús nonotapuna. Judíovi penacaetuatabiabibo pevetsinë pepëta Jesús, pijajivi yajava, napona.

20 Nexata Jesús namutua penajetarucaejavata, pepënëverena imoxoyotatsi petiriva, piavitaneva. Bajarapova pijanacuene pecapunaecujinaetsi doce baja pavaijebeje xaina. Nexata bajarapova Jesús pepënëvelia ponataba, jivibit-saëttoxaneto tuatuajëvalia. Nexata bajarapova tojayataba Jesús penaxatatsijavacopia.

21 Bajarapacuenia tojayataba Jesús penaxatatsijavacopia tsipaji bajarapova jamatabëjumaiti mapacueniaje:

—Ita tojayatabianajë Jesús penaxatatsijavacopia, nexata tavitaneyavami nevecuaajibi tsane, jamatabëjai bajarapova.

22 Nexata Jesús napënëyorotaxuaba. Taenuta bajarapova. Nexata Jesús jumaiti bajarapovajavabelia:

—Jamatabëcuenebarëyamëre. Xamë nesivajamatabëjumaitsimë: “Itsa to-jayatabianajë Jesús penaxatatsijava, nexata tavitanëjavami nevecuaajibi tsane,” nesivajamatabëjamë. Bajaraxuata jamatejemamë baja, jai Jesús bajarapovajavabelia.

Bajarapacuenia Jesús pejumait्सijavata bajarapova jamatejema baja.

²³ Bajaraxuacujinae Jesús jane baja pata judíovi penacaetuatabiabibo pevetsinë pijaboyabelia. Nexata Jesús itsa pata, tane pevajënae pepat-sivi, flauta piobivinexa itsabelia caponaejitsia petëpaevayo pemëthëtsinexa piobinexa. Tanenua jivi bitso pinijicuenia pematanueyabavanapaejava petëpaevayo.

²⁴ Nexata Jesús jumait्सi bajarapamonaejavabelia:

—Papitsapare mapabovecuaje. Pejanava raja apo tēpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jumecapocaponatsi bajarapacuenia pejumait्सijava.

²⁵ Jesús nexata bajarapamonae bovecua pitsapaeyaexana. Nexata itsaxu-ayolia petëpaevayo boca, Jesús joneya. Cobepita petëpaevayo. Bajarapovayo baja namatacota.

²⁶ Nexata daxita bajarapanacuapijivi Jesús vënëlvaisitanetsi piasaëyaexanaejava petëpaevayomi.

Pacuenia Jesús itaxutoxaniavaeta bitso pitaxutotsëcënaenëmibeje yabara pelivaisi

²⁷ Itsa baja Jesús pona judíovi penacaetuatabiabibo pevetsinë pijabovecua, anijanëbeje bitso pitaxutotsëcënaenëbeje Jesús pënaponatsi. Bajaraponëbeje vavajaiya jumai tsaponaebeje Jesúsjavabelia:

—¡Jesús, Davidpijinë pemomo, paneitaxutotsoniataemabeje! jaibeje tsaponae Jesúsjavabelia.

²⁸ Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumait्सi bajaraponëbejejavabelia:

—¿Payapëtanemebeje tsaja tanecaëjëpaeuene patacaitaxutoxanepanaeya exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumait्सibeje Jesúsjavabelia:

—Jãjã, payapëtanijibeje cajena, jaibeje.

²⁹ Nexata Jesús itaxutojayata bitso pitaxutotsëcënaenëbeje. Jesús jumait्सi bitso pitaxutotsëcënaenëbejejavabelia:

—Pacuenia baja xanëjavaberena nesivanajamatabëcuene copatsiaya panesi-vanajamatabëxainamebeje patacaitaxutoxaniavaetsinexabeje, bajarapacue-nia pacatoexanatsibeje, jai Jesús.

³⁰ Nexata bitso pitaxutotsëcënaenëmibeje itaxutoxanepanabeje baja. Bajaraxuacujinae Jesús asaëya jumeitaveta bajaraponëbeje. Jumait्सi:

—Pëtsa panavajunupaebamebeje itsamonaejavabelia patacaitaxutoxani-avaetsijavabeje, jai Jesús.

³¹ Itsiata saya ajena bajarapabovecua pitsapaliabeje, navajunupaebapon-abeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacuajava.

Pacuenia Jesús natsipaebiaexana apo pecuaicuaijainëmi yabara pelivaisi

³² Itsa baja bovecua pitsapabeje ponëbeje Jesús itaxutoxanepanaeyaexana, bitso pitaxutotsēcēnaenēmibeje, nexata icatsia itsamonae Jesús tocaparenatsi apo pecuaicuaijainē. Bajaraponē dovathi peyajavaponaponanē.

³³ Nexata apo pecuaicuaijainē Jesús dovathi itsa vecuacapitsapa, cuaicuaijai baja xaniavaetsia. Nexata petaevitsi bitso jamatabēcuenenabenajaca. Najumaitsi bajarapamonae:

—Caeto ata cajena Israel nacuata itsajivi ata apo tae mapitsicueneye, najai bajarapamonae.

³⁴ Itsiata baitsi jane fariseovi jamatabēcuenenavēxaniabiaya jumaitsi Jesús yabara:

—Mara ponëje dovathi jivivecua capitsapabiaba dovathivi pepo penamat-acaitorobinē pesaëta, jai fariseovi Jesús yabara.

Pacuenia Jesús itaxutotsoniatane jivi yabara pelivaisi

³⁵ Jesús najetaruca daxita tomaranējjava, tsiquiritomaxijava ata. Nexata bajarapatomaranējjava judiövi penacaetuatabibonējjava pexanialivaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavaxana. Piavitanevi ata Jesús jamatejemayaexanapona, daxitavirivitanepexainavimi.

³⁶ Jesús jivi itsa tane, itaxutobejobiatane. Tsipaji jivi bitso baja cajena cuerana. Apo caējēpaetsinua jivi penatoexanaenexa itsacueneyavayo ata. Jesús jivi sivajamatabējumaitsi mapacueniaje:

—Pacuenia itsi ovejabitsaëtoanaxeto itsa toajibitsi pevetsinëtsi, bajara itsi mapamonaeje, sivajamatabējai Jesús.

³⁷ Nexata Jesús jumaitsi pijajivijavabelia:

—Xaniajanē pacuenia pacatsipaebijitsiatsi. Pabita peubijava penaveretsijava abaxē bitso ayaijava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabēcopabivinexa. Abaxē sajina ayaibitsaëtoanaxeto. Itsiata baitsi jane Dioso panetonacuenebivi pacaējiviyomēbeje saya.

³⁸ Bajaraxuata Diosojavabelia pavajēcabiabare icatsia itsamonae Dioso pijajivi pitorobinexa papecayavenonaenexa, jai Jesús pijajivijavabelia.

10

Pacuenia Jesús pijajivi ayaibitsaëtoanaxetoyajuvënēvi itapeta saya doce ponëbeje apóstolevinexa yabara pelivaisi

(Mr 3.13-19; Lc 6.12-16)

¹ Jesús pijajivi ayaibitsaëtoanaxetoyajuvënēvi junata saya doce ponëbeje Jesús pebarēnacaetuatsinexa. Jesús pijajivi pecaējēpajamatabēcuenetsi jamatabēcuenecaējēpaeyaexana dovathi peyajavajinavanapaevi pevecuacapitsapaponanexa, pejamatejemayaexanaponaenexanua daxitaviriavitane pecapunaevitsi.

² Mara doce ponëbeje Jesús pijajivi, apóstolevi, pevënēanēje. Itsanē pevënē Simón. Itsavënē bajaraponē Pedro. Itsanē pevënē Andrés, Simón pejuyapijinē. Itsanēbeje pijinia Santiagobeje Juanbeje nacaebananēbeje, Zebedeo pexēnatobeje. ³ Itsanē pevënē Felipe. Itsanē Bartolomé. Itsanē Tomás. Itsanē Mateo, impuestomatamo gobierno pejamatabēcuenē jivijavabelia petomatomoyanijobinēmi. Itsanē pevënē Santiago, Alfeo pexēnato. Itsanē pevënē Lebeo. Bajaraponē itsavënē Tadeo.

⁴ Itsanē Simón, celotenē. Itsanē pevenē Judas Iscariote. Bajaronē bexēajavabelia canajetsijitsiatsi Jesús pijavajabitsaē pecobeyabelia pebexuabinexatsi.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mr 6.7-13; Lc 9.1-6)

⁵ Jesús pijajivi pitorobivajēnaeya jumaitsi pijajivijavabelia mapacueniaje: —Pētsa paponame apo judiōvi pijanacuayabelia. Pētsa paponame Samaria nacuata penaetomaranējavabelia ata.

⁶ Paponare jane Israel nacuapijivijavabelia. Pacuenia ovejabitsaētoxaneto pevetsinētsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa.

⁷ Patsipaebanajetarubenaename bajarapamonae imoxoyo baja pevajēnae pecopiapatsijavanexa Dioso pijajivi pevetsimatacabinexa.

⁸ Pajamatejemayaexanaponaename piavitanevi. Pasaēyaexanaponaenamenua petēpaevimi ata. Pajamatejemayaexanaponaenamenua bajayajebi bitso peperabētsabanaevi. Pavecuacapitsapaponaenamenua dovathi peyajavajinavanapaevi. Amoneya raja pacacaējēpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaename. Pētsa pamatamoyanijobame panejamatejemaya exanaejamatabēcuene, jai Jesús pijajivijavabelia pitorobivajēnaeya.

⁹ Jesús icatsia jumaitsi pijajivijavabelia pitorobivajēnaeya:

—Panijanamutonexa pētsa pacaponame palata.

¹⁰ Pētsa pacaponame panijadoro ata. Saya pajumaponaename caenaxatatsi. Panenataxuxatatsijava ata, pataxunaponaename caejava. Naeboyo ata pētsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanējavabelia tonacueneba, bajarapajivi juya pexaejava barajutsi.

¹¹ Itsa papatabiabianame pinijitomarata, tsiquiritomarayojavata ata, bajarajota pajaitabiabianame ponē peyaiyataenētsi. Nexata bajaraponē pijabota pamajitabiabianame. Pētsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaaename.

¹² Itsa pabota papatsijitsiamē, ajena pajonejitsiamēlia, pajumaitsimē tsabiabi tsane: “Diosojavabelia raja pacatovajētsijitsiatsi xaniavaetsia panejinavanapaenexa,” pajamē tsabiabi tsane.

¹³ Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajētame, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pētsa patovajētame Diosojavabelia peyavenonaenexatsi.

¹⁴ Itsa apo pacacopiapitsi tsane, itsa apo jitsipaenua tsane papecanamuxu-naevetsinexa panetsipaebilivaisi, bajarapabo pavecuaponaename. Bajaratomara ata baja pavecuaponaename. Nexata baja itsa paponaejitsiamē bajarapatomaravecua, paneponaejavēnae, bajarapatomarata panataxuatsapērēvarēbianame. Bajarapacuenia itsa panataxuatsapērēvarēbianame, bajarapatomarapijivi yapētaena Diosojavabelia penaneconitsicuene apo papecacopiapitsixae papecanamuxu-naevetsinexa panetsipaebilivaisi.

¹⁵ Xaniajanē pacuenia pacatsipabijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi Dioso ayaicuenia naneconitsiaexanaenatsi patomarapijivi apo pacacopiapitsi

tsane. Paneconivajētota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajēto matatoxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajēnaeya.

Pacuenia Jesús pijajivi bejibiaexanaejitsiatsi yabara pelivaisi

16 Icatsia Jesús jumaitsi pijajivijavabelia:

—ǰXania panayajivitaename! Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiayaitsi itsa jinavanapa pianaepanaevi nevēthē tuatuajēata, bajarapaitsimē tsane. Nexata pacuenia unupijivi nayajivitaeyajinavanapa pitsacueniabiyativatsi, bajara paitsimē tsane. Pacuenia ata ucucu aneconijibia jinavanapa, bajara paitsimē tsa-anapae tsane.

17 Xania baja tsane. Patajajivixaemē raja jivi pacaneconitsiana papecananeconitsiaexanaenexa. Nexata itsajota nacaetuatabiaba tomara pevetsivi, bajarabelia pacacoponaena. Judíovi penacaetuatabiabibonējava pacajumatitibabeyabiabiana penaneconitsivi pejumaconitabiabimacata.

18 Patajajivixaemē pacanubiananua nacuaevevtsivi pitabarata, presidentevi pitabarata ata. Bajarajota nexata xanē talivaisi patsipaebianame bajarapamonaejavabelia, apo judíovi ata pitabarata.

19 Itsiata baitsi jane itsa pacanubiana nacuaevevtsivi pitabarata, pētsa pajamatabēbējamē panenayajivicuauicuaijainexa bajarapamonaejavabelia. Tsiapai raja paepatotā panayajivicuauicuaijamējitsia, bajarapaepatotā Dioso pajamatabēcueneta pacacuauicuaijaiyaexanaena.

20 Itsa panayajivicuauicuaijamē tsane, paxamē panijacuata apo pacuauicuaijamē tsane. Espírítu Santo raja pacacuauicuaijaiyaexanaena.

21 Itsamonae pematapijivi, pejuyapijivi ata, canajetsiana nacuaevevtsivijavabelia pebeyaxuabinexatsi. Itsamonae nacoxicanajetsiana nacuaevevtsivijavabelia pebeyaxuabinexatsi. Itsamonae canajetsiana paxa, pena ata, nacuaevevtsivijavabelia pebeyaxuabinexatsi.

22 Daxita nacuapijivi pacaitoya tsane patajajivixaemē. Pajivi bejiobiaexanae atatsi tsane, itsiata itsa casaē tsaonaponae tsane tanejume-covēnētsijava, bajarapajivi capanepaenatsi Dioso pijanacuayabetsia.

23 Itsa patomarata pacabejiobiaexanaena, bajarapatomaravecua parēcēpecaename itsatomarabelia. Xaniajanē pacuenia pacatsipaebijitsiatsi. Daxita Israel nacuata penaetomaranējava abaxē patsipaebiveretsinejevamē pexanialivaisi, xanē, Daxitajivi Pematapijinēnē, itacarajeta icatsia patsianicajē.

24 Itsajivi ata apo jamatabēcuenematatoxenetsi pecujarubinētsi. Itsajivi ata pijinia itsanē itsa pijajivitonē, apo jamatabēcuenematatoxenetsi pijatuxanenē.

25 Pacuenia pecujarubinē itsamonae coplaya bejiobiaexanatsi, bajarapacuenia icatsia bajaraponē pecujarubivi ata bejiobiaexanaenatsi. Pacuenia petuxanenē coplaya bejiobiaexanatsi, bajarapacuenia icatsia pijajivitonē ata cotocaevi bejiobiaexanaenatsi. Xanē panijatuxanenēnē: “Beelzebú, daxita dovathivi pijatuxanenē,” nejai tsabiabi itsamonae. Nexata pijinia patajajivixaemē bitso pibisiavēnēta paxamē ata cotocaevi pacajunatabiabi-ana, jai Jesús pijajivijavabelia.

Pacuenia Jesús pijajivi tsipaeba pecujunaviyaniva pebeyaxuabijavatsi yabara pelivaisi
(Lc 12.2-7)

26 Icatsia Jesús jumaitsi pijajivijavabelia:

—Pëtsa pacujunavame jivi, pacaatiobi ata. Daxita xua jivi muetsia pibisi-acuene exana, bexëjavabelia cueneyapëtaeponaenatsi daxitajivi.

²⁷ Palivaisianë muetsia vajaepatojavata pacatsipaebaponatsi, bajarapali-vaishianë paxamë pinijijumeta patsipaebaponaename jivi penacaetuatabi-abijavata.

²⁸ Pëtsa pacujunavame jivivevi ata. Bajarapamonaë pacabeyaxuabi ata tsipae, acuenebi matavëjëa papecaitsacueniabinexa pepo panejamatabëcuenejavabelia. Biji rajane pacujunavare Dioso, ponë caëjëpatsi papecaxuabinexa infiernojavabelia papecabeyaxuabicujinae.

²⁹ 'Anijanëbeje baratsuitobeje namatamota saya caepalatanëyo. Itsiata baitsi jane caenë ata baratsuito Dioso pepëya jemata muetsia apo jopaetsica petëpaenë. Tsipaji paneaxa, Dioso, asiva baratsui ata.

³⁰ Dioso cajena bitso pacaasiva baratsui matatoxenetsia. Nexata pane-matanatoxi ata, caematanatoyo canacujitsia, Dioso namataëjëta.

³¹ Bajaraxuata pëtsa pacujunavame itsacuenejavayo ata. Tsipaji paxamë Dioso bitso pacaasiva baratsuitoxi matatoxenetsia, jai Jesús pijajivijavabelia.

Pacuenia Jesús pijajivi apo benayavajunuaxainae Jesús pijajivicuene yabara pelivaisi

(Lc 12.8-9)

³² Icatsia Jesús jumaitsi pijajivijavabelia:

—Daxita pamonaë tajajivi, jivi pitabarata itsa navajunupaebiana taja-jivicuene, xanë ata vajunupaebianajë bajarapamonaë tajajivicuene taxa, athëbëatsia peecaenëjavabelia.

³³ Pamonaë jumai tsane itsamonaëjavabelia: “Xanë cajena Jesús apo pija-jivitonëne,” jai tsane, nexata pijinia bajarapamonaë yabara xanë jumaitsinë tsane taxa Diosojavabelia: “Mara pamonaë apo tajajivije,” janë tsane, jai Jesús pijajivijavabelia.

Pacuenia Jesús apo penajuajumecovënëtsixae, nacaemonaë ata apo naja-matabëcuenejëpae tsane yabara pelivaisi

(Lc 12.51-53; 14.26-27)

³⁴ Icatsia Jesús jumaitsi pijajivijavabelia:

—Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpaeja pejinavanapaeyaexanaenexa,” panesivajamatabëjamë pëtsa. Bajaraxu-anexa apo patsinëtsica. Biji rajane xanë tapatsixaetsica mapanacuayabetsi-cape, jivi itsa nejumecovënëtsiana, apo najamatabëcuenejëpae tsane pamona-aejavabelia apo nejumecovënëtsi, nacaemonaë ata. Napijavajabitsaë tsane namataenetsia.

³⁵ Xanë apo tanenajuajumecovënëtsixaebeje, pebibeje paxabeje apo najamatabëcuenejëpaebeje tsane. Petrivabeje ata, pexënatoyobeje xanë apo tanenajuajumecovënëtsixae penabeje apo najamatabëcuenejëpaebeje tsane. Pamebeje ata pecopenabeje apo najamatabëcuenejëpaebeje tsane.

³⁶ Nexata xanë apo tanenajuajumecovënëtsixae, caejivi canacujitsia bepi-javajabitsaëjivi taenatsi pijamonaëjivi ata.

³⁷ Pajivi nejumecovënëtsi ata, apo niasiva tsane paxa, pena ata, piasiva-java matatoxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexënato, pexënatoyo ata, piasivajava matatoxenetsia, bajarapajivi apo tajajivi tsane.

³⁸ Pajivi nejumecovënëtsi ata, pecajunavi apo nepënaponea tsane pe-beyaxuabixaejitsiatsi xanë tajumelivaisi yabara, bajarapajivi apo tajajivi tsane.

³⁹ Pajivi nayavajunuaxaina tajajivicuene pebejiobiaexanaeyanivatsi, pebeyaxuabiyaniavatsinua, bajarapajivi naxuabiana daxitamatacabi-javabelianexa. Itsiata baitsi jane pajivi beyaxuabatsi tajajivixae, bajarapajivi daxitamatacabijavabelianexa Dioso capanepaenatsi, jai Jesús pijajivijavabelia.

Pacuenia Dioso matamotsijitsiatsi pamonae xaniavaetsia copiapita Jesús pijajivi yabara pelivaisi

(Mr 9.41)

⁴⁰ Icatsia Jesús jumaitsi pijajivijavabelia:

—Pajivi pacacopiapitsiana patajajivixaemë, bajaraxua xanë taniji tanecopiapitsijava. Pajivi necopiapitsiana, bajaraxua taxa Dioso tane pecopiapitsijavatsi.

⁴¹ Diosojumepaebinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinë, bajarapajivi ata Dioso matamotsianatsi. Nexata xuavajëto Diosojumepaebinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaebinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

⁴² Pajivi yavenonaena tajajivi, tsiquirijavayo ata mera rajutsiana pia-paenexa, bajarapajivi pepacue ne matamotsianatsi Dioso, jai Jesús pijajivijavabelia.

11

Pacuenia Juan jivibautisabinë itoroba pijajiviyajuvënëvi Jesúsjavabelia yabara pelivaisi

(Lc 7.18-35)

¹ Jesús baja najumevereta pijajivi doce ponëbejejavabelia livaisi petsipae-bijava. Nexata baja Jesús pona livaisi petsipaebinxaxa bajarapanacuata penaetomaranëjava.

² Bajarapamatacabi Juan jivibautisabinë naneconitsiaponapona penaneconitsivi pejebabiabibota. Nexata Juan vënëlivaisitane Dioso pesaëta Jesús pinijicuene pexanaponaejava. Bajaraxuata Juan itoroba pijajiviyajuvënëvi Jesúsjavabelia.

³ Juan itoroba pijajivi peyanijobinxaxa Jesúsjavabelia. Nexata Juan pijajivi jumaitsi Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebaona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsinexatsica? jai Juan pijajivi Jesúsjavabelia.

⁴ Nexata Jesús jumaitsi Juan pijajivijavabelia:

—Paponare baja. Patsipaebianame Juan pacuenia baja pataneme taex-anaponaejava. Patsipaebianamenua pacuenia baja pajumetaneme tatsi-paebilivaisi jivijavabelia.

⁵ Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxisipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeconimivecua tsipaebaponajë bepejio-bivijavabelia. Daxita bajaraxua taexanaponaejava patanetaejavamë, patsipabianame Juanjavabelia.

⁶ Pajumaitsimënua tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca jumecovënëta xanë Dioso pexënatocuenenë,’ jai raja Jesús;” pajamë tsane Juanjavabelia, jai Jesús Juan pijajivijavabelia.

⁷ Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia mapacueniaje:

—Itsa paponame petusato nacuyabelia, pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota?

⁸ Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacuenieje. Pamona naitabëtsiaya pexaniajava naxatababiaba, bajarapamonae jinavanapa nacuanë pevetsivi pijabonëjava.

⁹ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja pepo profetanë, Diosojumepaebinë, pataneme. Nexata saya bevelia profetanë apo pataemë.

¹⁰ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena Juan yabara, Dioso pejumelivaisibaxutota jumaitsi mapacueniaje:

Itorobianajë nevajënaeyabelia tanejumelivaisipaebinënexa, jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota tapatsivajënaeya Juan tanelivaisi paebanajetaruaejavanexa yabara.

¹¹ Xaniajanë pacuenia pacatsipaebijitsiatsi. Juan ayaijamatabëcuenejé mapanacuataje. Nexata bajayata Juan pevajënaeya paprofetavi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcuenejivi ata, itsa nejumecovënëta tacapanepaejavanexa, bajarapajivi ayaijamatabëcuenejivi Dioso exanaenatsi Juan matatoxenetsia.

¹² Juan jivibautisabinë petaxuxuabijavaveliacujinae, Dioso pitorobilivaisi jivi petsipaebanajetaruaejava mapamatacabijavaberena ataje, ayaibitsaëtoxaneto picani jivi jitsipa Dioso pitorobilivaisi pejumecovënëtsinexa. Itsiata itsamonae pesaëta caranatapona bajarapamonae pejumecovënëtsiyaniva Dioso pitorobilivaisi.

¹³ Juan penaexanaevajënaeya, daxita Diosojumepaebivimi profetavi tajëvelia vajunupaebapona itsamatacabi Dioso pijajivi pevetsijavanexa. Dioso Moiséspijinëta penajumecopatsilivaisi ata, tajëvelia vajunupaeba Dioso pijajivi pevetsijavanexa.

¹⁴ Itsa baja jamatabëpajumecovënētame, pajumecovënëre xua aeconoxae pacatsipaebijitsiatsi. Dioso pejumelivaisibaxutota tajëvelia jumaitsi mapacueniaje: “Eliaspjinë icatsia patsiana,” jai. Bajarapacuenia tajëvelia itsa jumaitsi, Juan jivibautisabinë yabara jumaitsi. Tspaji pacuenia jamatabëcueneitsi profeta Eliaspjinë, bajara jamatabëcueneitsi Juan ata. Nexata Juan pepatsivajënaeya, tajëvelia yapëtanetsi pacuenia Juan exanaejitsia.

¹⁵ Pajivi jamatabënejumeyapëtane patacatsipaebilivaisi, nenamuxu-naevetsi xaniavaetsia, jai Jesús jivijavabelia.

¹⁶ Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: “Bajarapamonae abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia.

¹⁷ Pevavajajavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëanecatsi picani penemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonaë aeconoxae jinavanapa mapanacuataje,” janë meta tsane paxamë yabara.

¹⁸ Juan jivibautisabinë Dioso pitorobilivaisi jivi tspaebanajetaruca. Pexaejava itsajavata apo xaeyabiabi, pamatacabibeje Diosojavabelia vajëtafona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “Juan raja dovathi yajavaponapona!” pajamë tsabiabi jamatabëcuenenavëxaniabiaya.

¹⁹ Bajaraxuacujinae icatsia xanë, Daxitajivi Pematapijinë, najetarucajë. Itaxutojema xaniji. Matavëjëa apaeyabiabajënuu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maonëje! Ayaijava xaeyabiaba. Ayaira matavëjëa apaeyabiabanua piatijabinexa. Barënajamatabëcuenejëpanua gobiernu pejamatabëcuene impuestomatamo pematamoyanijobabiabivi. Pamonaë ata pijamatabëcuenebejevi, barënajamatabëcuenejëpa,” pajamë tsabiabi xanë yabara. Itsiata baitsi jane xuanë paxanëbeje Juanbeje paexanaponajëbeje, bajaraxuanë Dioso pejamatabëcueneta pataexanaejavabeje itsamonae xaniavaetsia yapëtaena. Nexata daxita bajarapamonae yapëtaena pacuenia Dioso paneyapëtaeyaexanabeje pepacuenepo pexaniajaijamatabëcuene, jai Jesús mapacueniaje jivijavabelia.

Pacuenia Jesús jumaitsi patomarapijivijavabelia apo jumecovënëtsitsi yabara pelivaisi

(Lc 10.13-15)

²⁰ Itsatomaranëjava Dioso pesaëta Jesús pinijicuene pexanaejavanë navtsia exanapona. Itsiata bajarapatomaranëpjiivi apo copabi pibisiacuene pexanabiabijava. Apo najamatabëcuenepeñëyorotsi Diosojavabelia. Nexata Jesús ajumesaëya jumaitsi bajara patomaranëpjiivijavabelia:

²¹ ¡Bitso bepajlobimë tsane paCorazín tomarapijivimë! ¡Bitso bepajlobimë tsane paBetsaida tomarapijivimë ata! Pinijicuene Dioso pesaëta taexanaejavanë patae atamë, itsiata apo panejumecovënëtsimë. Apo pacopabimë pibisiacuene paneexanabiabijava. Apo panajamatabëcuenepeñëyorotsimë Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava.

Najamatabëcuenepeñeyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsumataothocaejitsipa bitso peyajamatabëcuenebëjaixae pibisiacuene pexanabiabineconi.

²² Xaniajanë pacuenia pacatsipaebijitsiatsi. PaCorazín tomarapijivimë, paBetsaida tomarapijivimë ata, patae atamë pinijicuene Dioso pesaëta taexanaejavanë, apo panejumecovënëtsimë. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso pacananeconitsiaexanaena. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia pacananeconitsiaexanaena.

²³ Paxamë paCapernaum tomarapijivimë, jamatabëcuenenavëxaniabiaya pajamatabëjumaitsimë tsabiabi: “Vaxaitsi cajena ayaijamatabëcuenevitsi. Nexata Dioso nacacapanepaena athëbëabetsia,” pajamatabëjamë tsabiabi. Itsiata baitsi jane athëbëabetsia Dioso apo pacacapanepae tsane. Dioso raja pacaxuabiana infernojavabelia apo patanejumecovënëtsixaemë. Bajayata Sodoma tomarapijivimijavata itsa exanaejitsipajë Dioso pesaëta pinijicuene taexanaejava, pacuenia paxamëjavata exanaponajë, nexata Sodoma tomarapijivimi copabijitsipa pibisiacuene pexanaejava. Najamatabëcuenepeñeyorotsipa Diosojavabelia. Nexata bajarapamonaemi Dioso apo verebiabi tsipaetsi pibisiacuene pexanaeneconi yabara. Nexata abaxë mapamatacabi ataje jivi jinavanapaejitsipa bajarapatomarata.

²⁴ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexainaevi, ayaicuenia Dioso pacananeconitsiaexanaena. Tspaji Dioso pesaëta navitsia pinijicuene taexanaponaejava patae atamë, apo panejumecovënëtsimë. Nexata Sodoma tomarapijivimi matatoxenetsia Dioso bitso ayaicuenia pacananeconitsiaexanaena, jai Jesús patomarapijivijavabelia apo jumecovënëtsitsi.

Pacuenia Jesús pijajivi junata pejamatabëcueneasaëyaexanaenexa pejamatabëcuene cueranaejavavecua yabara pelivaisi

(Lc 10.21-22)

²⁵ Jesús pevajëtsijavata paxa Diosojavabelia jumaitsi:

—Axa, nevetsinë athëbëtsia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tspaji pamonaemi bitso apo penacujarubivi ata, yapëtaeyaexanaename nevetsijavanexa daxita nijajivi mapanacuataje. Bajarapamonaemi yapëtaeyaexanaename pexanialivaisi, xanë talivaisi, palivaisi vecumatayatame bitso peyapëtaevi mapanacuapijilivaisije. Bajarapalivaisi vecumatayatame bitso penacujarubivi ata mapanacuapijicuene yabaraje.

²⁶ Bajarapacuenia exaname tspaji baja exaname nejitsipaecuenia, jai Jesús paxa Diosojavabelia pevajëtsijavata.

²⁷ Icatsia Jesús jumaitsi pijajivijavabelia:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneypätae pacuenia xanë jamatabëcueneitsinë, Dioso pexënatonë. Caenë taxa Dioso nejamatabëcueneypätane. Itsajivi ata apo jamatabëcueneypätae pacuenia taxa Dioso jamatabëcueneitsi. Caenënë xanë, pexënatonë, jamatabëcueneypätaniji. Pamonaemi

tojtsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata yapëtaeyaexanaponaenajë.

²⁸ Pabita penacuenebabiabinë, piarevejava pejotabiabinë, bitso bavemaxëcuerana. Bajara pijinia pacuenia paxamë ata bitso itsa pajamatabëcueneacueranare pibisiacuene paneexanabiabijava yabara, xanëjavaberena paponare paneajamatabëcuenesaënexa icatsia.

²⁹ Bueyubeje banavësijumacaevetabeje petsivësijumabuatsinexatsibeje yugovënëjava penacuenebinexabeje. Bajara pijinia pacuenia paxamë ata panajamatabëcueneacaevere patacatsijamatabëcuenebuatsinexa patacatsipaebilivaisi. Panejumecovënëtsianame pacuenia pacaitorobatsi patanetonacuenebinexamë. Nexata panevajënaeyabelia panejamatabëcueneypëtaeponaename. Tsipaji xanë xaniavaetsia pacatsipae-baponaenatsi. Xanë beayaijamatabëcuenenë apo nataenë. Nexata bajarajota panajamatabëcueneevetsianame paneajamatabëcuenesaënexa icatsia. ³⁰ Pacuenia bueyu tsivësijumabuatsi yugovënëjava petoyapëxanepanaenexatsi penacuenebijava, bajara pijinia pacuenia paxamë ata pacatoyapëxanepanaeyaexanaenatsi paneexanaenexa xua pacaitorobijitsiatsi, jai Jesús pijajivijavabelia.

12

*Pacuenia Jesús pijajivi trigoxu namutua siricanajetarubena penacuer-
aevetsimatacabita yabara pelivaisi*
(Mr 2.23-28; Lc 6.1-5)

¹ Judïovi penacueraevetsimatacabita Jesús, pijajivi yajava, najetaruca trigo pabianëjava. Jesús pijajivi bitso pijajani. Nexata trigoxu siricanajetarubena. Xuxaeyabuatapona.

² Nexata fariseovi tane Jesús pijajivi pesiricanajetarubenaajava trigoxu. Nexata fariseovi jumaitsi Jesúsjavabelia:

–Taema mapamonaaje. Dioso Moiséspijinëta penajumecopatsilivaisi vanacaitavetsicuene nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacuneje, jai fariseovi Jesúsjavabelia.

³ Nexata Jesús jumaitsi fariseovijavabelia:

–Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso pijajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabita bitso pijajani?

⁴ Davidpijinë joneya Dioso pijatemploboyalia. Nexata Dioso pijatemplobënëta, mesajumata, bobena Diosonexa ofrendacuenia petojebipanbëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsyaniva Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia.

⁵ ¿Apo palebimë tsipaji Dioso Moiséspijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatacabita ata apo nacueraevetabiabi. Penacueraevetsimatacabita sacerdotevi nacuenebabiabi ata templobota, itsiata apo naneconitsi Diosojavabelia.

⁶ Xanë cajena ayaijamatabëcuenenënë. Nexata Dioso netojtsipa jivi taneyaiyataenexa templobo matatoxenetsia.

⁷ Dioso pejumelivaisibaxutota jumaiti mapacueniaje: “Jitsipajë paneitax-utotsoniataenexa itsamonae ata. Apo jitsipañë cajena saya patanetobeyabiabinexamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xua yabara jumaiti bajarapacuenia, apo pajumeyapëtaemë baja cajena. Tshipaji ita pajumeyapëtaejitsipame xua yabara jumaiti, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitsimë tshipae: “Dioso Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tshipae. Tshipaji tajajivi apo naneconitsi Diosojavabelia. Tshipaji tajajivi bitso pjanixae, trigoxu xane.

⁸ Nexata xanë, Daxitajivi Pematapijinëne, netoxanepana cajena tatsipaebinexa xua xanepana jivi pexanaenexa penacueraevetsimatocabita ata, jai Jesús mapacueniaje fariseovijavabelia trigo pabianëjavata.

Pacuenia Jesús jamatejemayaexana pebi pecobetsaquenaenë yabara pelivaisi

(Mr 3.1-6; Lc 6.6-11)

⁹ Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacaetuatabi-abiboyalia.

¹⁰ Nexata bajarajota pebi naeca, pecobetsaquenaenë. Itsamonae fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara neconitsijitsiatsi. Nexata fariseovi Jesús jamatabëcueneëjëbiaya yanijobatsi mapacueniaje.

—¿Vajanacueraevetsimatocabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

¹¹ Jesús nexata jumaiti fariseovijavabelia:

—Paxamëyajuvënëni pijaoveja ita tojopaejitsiparecatsi meramëthëareca, penacueraevetsimatocabita ata ponaejitsipa. Nexata jutsipaina pijaoveja. ¿Baja tsabaiti jane?

¹² ¡Biji ra jivitonë bitso namatamota oveja matatoxenetsia! Bajaraxuata itsiata nacatoxanepana vajaexanaenexa pexaniacuene vajanacueraevetsimatocabita ata, jai Jesús fariseovijavabelia.

¹³ Nexata Jesús jumaiti pecobetsaquenaenëjavabelia:

—Namaxërovire, jai Jesús.

Ita bajaraponë namaxërovita, pacuenia itsanenia cobeitsi, bajara cobeitsi. Cobexanepanareca baja. Pecobetsaquenaevjavami baja ajibi.

¹⁴ Nexata fariseovi ita tane Jesús pecobexanepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabiabibovecua. Nexata jane baja fariseovi najumejaita Jesús pebeyaxuabinexatsi.

Pacuenia Diosojumepaebinë profetanë bajayatami tajëvelia vajunupabatsi Jesús yabara pelivaisi

¹⁵ Jesús jamatabëcuenyapëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayaibitsaëtoخانeto Jesús pënaponatsi. Jesús nexata jamatejemayaexana daxita piavitanevi.

¹⁶ Jesús jumeitaveta bajarapamonae petsipaebiyaniya itsamonaejavabelia Jesús Dioso pexënatocuene.

¹⁷ Bajarapacuenia Jesús pejamatejemayaexanaevi ita jumeitaveta petsipaebiyaniya itsamonaejavabelia, copiapata jane baja pacuenia bajayata

Diosojumepaebinēmi profeta Isaíaspijinē tajēvelia jumaitsi. Dioso pejumait-sijava Jesús yabara profeta Isaíaspijinē bajayata tajēvelia jumaitsi mapacue-niaje:

¹⁸ Maponē taitapetsinē, taitorobicuenia exanabiaba. Bajaraponē tasivanē. Sivajamatabēcuenebarēyanē. Espiritu Santo runaeyaexanaenicajē ba-jaraponē pematatsēnēatsica. Bajaraponē apo judíovijavabelia tsipaeb-iana tananeconitsiaexanaejavanexa daxita bibisiacuene pexanaevi.

¹⁹ Bajaraponē itsajivijavabelia ata apo jumeanaenotsi tsane. Livaisi itsa tsipaebapona, pinijijumeta apo vavajai tsane.

²⁰ Pamonaē xanē tajumelivaisi pejumecovēnētsijava abaxē apo ajamatabēcuenesaē ata, itsiata bajaraponē bajarapamonae apo xuabi tsane. Capanepaena. Pamatacabi tocopiapatsianatsi bajaraponē pijajivi pevetsimatocabinexa, xaniavaetsia bajaraponē evetsiana daxita pijajivi.

²¹ Nexata daxitajivi, apo judíovi ata, sivanajamatabēcueneocopatsianatsi baja-ronē pecapanepaenexa,

jai bajayata tajēvelia profeta Isaíaspijinē Dioso pejumait-sijava Jesús yabara. Bajarapacuenia bajayata tajēvelia jumaitsi Isaíaspijinē peyaquinaebaxutota.

Pacuenia itsamonae Jesús yabara jamatabēcuenenavēxaniabiaya jumaitsi: "Beelzebú raja pesaēta Jesús dovathi jivivecua capitsapapona," jai yabara pelivaisi

(Mr 3.20-30; Lc 11.14-23; 12.10)

²² Jesús tocapatatsi bitso pitaxutotsēcēnaenē, apo penatsipaebinē. Ba-jaraponē dovathi yajavaponapona. Bajaraponē Jesús jamatejemayaexana. Xaniavaetsia baja nexata tane. Natsipaebanua baja.

²³ Jivi itsa tane Jesús pejamatejemayaexanaejava bajaraponē, jamatabēcuenenabenajaca. Nexata jivi najumaitsi Jesús yabara:

—¿Matsaeta ponē Davidpijinē pemomoje, Dioso pitorobinētsicaje? najai bajarapamonae Jesús yabara.

²⁴ Nexata fariseovi itsa jumetane bajarapacuenia jivi pejumait-sijava, fariseovi jumaitsi jivijavabelia:

—Mara ponē Jesúsje, dovathi jivivecua capitsapabiaba Beelzebú pesaēta. Beelzebú raja daxita dovathivi pitorobinē, jai fariseovi jivijavabelia ja-matabēcuenenavēxaniabiaya Jesús yabara.

²⁵ Jesús jamatabēcuenyapētane pacuenia fariseovi sivanajamatabēxainatsi. Nexata Jesús jumaitsi fariseovijavabelia:

—Nacaenacuapijivi ata itsa navecuanatsanaejitsipa penasivanavajabit-saētsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomarapijivi ata. Itsa navecuanatsanaejitsipa pena-sivanavajabitsaētsinexa, nexata namataenetsia naverebiabijitsipa nacaetomarapijivi ata. Bajara pijinia itsipae nacaemonae ata. Itsa navecuanat-sanaejitsipa penasivanavajabitsaētsinexa, nexata namataenetsia naverebi-abijitsipa nacaemonae ata.

²⁶ Bajara pijinia itsipae dovathi ata. Dovathi jivivecua itsa capitsapa-ponaejitsipa pijajivi, dovathivi, nexata bepijavajabitsaēnē taejitsipatsitsi pijajivi. Itsajamatabēcuene vecuaxinaejitsipa pijajivi. Pesaē ata apo xainaponaē tsipae.

²⁷ Paxamē ata panijajivi dovathi jivivecua capitsapabiaba. Nexata xanē Beelzebú pesaēta dovathi jivivecua itsa capitsapabiabajē, ¿detsa nexata ponē pesaēta panijajivi ata dovathi jivivecua capitsapabiaba? Caenē rabaja

Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitsijava xanë yabara.

²⁸ Espiritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxucua bijava pijajivi pevetsijava paxamë tuatuajëta, jai Jesús fariseovijavabelia.

²⁹ Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi fariseovijavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota.

³⁰ Pajivi apo neyavenonaeyacaetuatsi jivi Diosojavabelia, bajarapajivi betajavajabitsaëjivi. Tspaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa.

³¹ Bajaraxuata pacatsipaebijitsiatsi, Dioso caëjëpatsi daxitajivi pibisiacuenia pexanaeconomicsi pevecuaajibiaexanaenexa. Pibisiacuenia jivi Dioso baracuaicuaijai ata, bajarapaneconi ata Dioso caëjëpatsi pevecuaajibiaexanaenexa. Itsiata baitsi jane pajivi pibisiacuenia baracuaicuaijai Espiritu Santo, pacuenia paxamë pajumaitsimë, Dioso apo vecuaajibiaexanae tsane bajarapaneconi.

³² Pajivi pibisiacuenia nebaracuaicuaijai ata, xanë, Daxitajivi Pematapijinëne, bajarapaneconi ata itsiata Dioso vecuaajibiaexanaenatsi itsa vajëta Diosojavabelia. Itsiata baitsi jane pajivi pibisiacuenia baracuaicuaijai Espiritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

Pacuenia peubinaenë itsa nacuaita, nayapëtane pavirianaecuenie yabara pelivaisi

(Lc 6.43-45)

³³ Icatsia Jesús jumaitsi fariseovijavabelia:

—Pexaniavirianaenë itsa ubatsi, nacuaita pijinia pexaniacuai. Ponae pijinia pibisiana, nacuaita pibisiacuai. Caeviriana canacujitsia yapëtanetsi itsa nacuaita.

³⁴ Bajara pijinia pacuenia paxamë ata dovathi papijajivimë, panayapëtaneme panejamatabëcuenenebejjava. Nexata apo pacacajëpae panecuaicuaijainexa pexaniacuene yabara. Pajamatabëcuenie bëpënë panejamatabëëthëtota panajamatabëxainame, panecuibovojotuatsina pitsapa panecuaicuaijainexa.

³⁵ Itsamonae pijinia majamatabëcuenetsije. Pacuenia vajaubinae, pexaniae, pexaniacuai pijinia nacuaita, bajara pijinia jamatabëcuenetsi itsamonae. Ponë pexaniajamatabëcuenenë, pexaniacuene yabara cuaiacuajai. Tspaji pexaniajamatabëcuenie xaina pejamatabëëthëtota. Ponë pijinia pibisiajamatabëcuenenë pibisiacuene yabara cuaiacuajai. Tspaji pibisiajamatabëcuenie najamatabëxaina pejamatabëëthëtota.

³⁶ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexinaevi, caejivi canacujitsia, naneconitsiaexanaponaena caejumeyo canacujitsia pibisiacuenia pecuaicuaijajava yabara.

³⁷ Pibisiacuenia panecuaicuaijajava yabara Dioso pacananeconitsiaexanaena. Pexanialivaisi itsa pacuaicuaijamë tsabiabi tsane, nexata paneconijibimë tsane Diosojavabelia, jai Jesús fariseovijavabelia.

*Pacuenia pibisiajamatabëcuenevi Jesús picani itorobatsi Dioso pesaëta pini-
jicuene pexanaejava petsitaexanaenexa yabara pelivaisi*
(Mr 8.12; Lc 11.29-32)

³⁸ Fariseovi, judiövi pecujarubivi ata, jumaitsi Jesúsjavabelia:

—Jesús, pajitsipajë patataenexa Dioso pesaëta pinijicuene nexanaejava, patacayapëtaenexa pepacuene Dioso athëbëvetsica pecaitorobinëcuenetsica, jai bajarapamonae.

³⁹ Jesús nexata jumaitsi bajarapamonaejavabelia:

—Bitso pibisiacuene paneexanaevi, Dioso panejumecovënëtsijavami panecopabivi. Paneitorobame picani Dioso pesaëta pinijicuene taexanaejava patacatsitaexanaenexa pataneyapëtaexamë Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinëmi profeta Jonáspijinë exanatsi, bajara ëpitsicuene taneexanaejava pacatsitajëtsianatsi.

⁴⁰ Bajayata Jonáspijinë boca ayainë dujuainë pënëta acueyabi pamatacabibeje, acueyabi pameravibeje yajava. Bajara pijinia pacuenia xanë ata, Daxitajivi Pematapijinë, bocaenajë mëthëta acueyabi pamatacabibeje, acueyabi pameravibeje yajava.

⁴¹ Bajayata Nínive tomarapijivimi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene pexanaejava. Najamatabëcuene pënëyorota Diosojavabelia. Copiapatsiana rabaja Dioso papecananeconitsia exanaematacabinexa daxita panijaneconi panexainaevi. Panijaneconi panexainaevi pacanubiana Dioso pitabarata. Nexata bajarapamatacabi Nínive tomarapijivimi nonobapunaena Diosojavabelia papecananeconitsinexa Dioso apo panejumecovënëtsivi. Xanë majotaje ponaponajë, bitso ayaijamatabëcuenenënë Jonáspijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panajamatabëcuene pënëyorotsimënuu pibisiacuene paneexanaejavaveua. Bajaraxuata ayaineconi paxainame Diosojavabelia.

⁴² Pamatacabi Dioso naneconitsiaexanaena pijaneconi pexainaevi, bajayata peponaponaevami, Saba nacuapijivi pevetsivami, nonotapunaena Diosojavabelia papecaconitsinexa Dioso apo panejumecovënëtsivi. Bajarapova pacananeconitsiana. Tspijaji bajayata bajarapovami tajë nacuatabuverena ata muxunarena pejumetaenexa Salomónpijinë, bitso daxitalivaisi peyapëtaenëmi, petsipaebilivaisi. Xanë majotaje ponaponajë, bitso ayaijamatabëcuenenënë Salomónpijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panenamuxunaevetsimënuu. Bajaraxuata Dioso pacananeconitsiaexanaena, jai Jesús tajëvelia fariseovijavabelia, judiövi pecujarubivijavabelia ata.

*Pacuenia dovathi jivitonë pevejamatabëpitsapaecujinaetsi, icatsia naviarena
pecovëyaberena petsijamatabëcaenexatsi icatsia yabara pelivaisi*
(Lc 11.24-26)

⁴³ Jesús jumaitsi fariseovijavabelia, judiövi pecujarubivijavabelia ata:

—Dovathi itsa vejamatabëpitsapa jivitonë, nexata dovathi jinaruta petseviranëjava. Jaitapona itsanëjavabelia petsijamatabëjonenexa penacuer-
aevetsinexa bajaraponëjavata. Itsa apo caxitajarabi ponëjavabelia tsijama-
tabëjonejitsi, nexata dovathi jamatabëjumaitso:

⁴⁴ “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia
petsijamatabëjonenexatsi. Dovathi baja caevëa itsa naviarena, caxitajaraba

peyajavaponaponaenēmitsi. Nexata peyajavaponaponaenēmitsi pejamatabēēthēto, dovathi tane bepēnēsajinecaebo, bepēnēxaniavaetetsibo, bepiracajuetetsibo.

⁴⁵ Nexata dovathi icatsia sivapona peyajavapatsinexarena itsadovathivi, siete ponēbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabējunuatsi peyajavaponaponaenexa. Belia jane baja pebi dovathivi bitso bejiobiaexanatsi. Copiaya abaxē caenē itsa tsijamatabēecatsi pacuenia bejiobiaexanabiabatsi, matatoxenetsia bejiobiaexanatsi. Bajara pijinia pacuenia tocopiapatsianatsi pamonaē aeconoxae jinavanapa, piacujirubejevi, jai Jesús fariseovijavabelia, judíovi pecujarubivijavabelia ata.

Pacuenia Jesús pejuyapijivi, pena yajava, nubena bojumavelia yabara pelivaisi

(Mr 3.31-35; Lc 8.19-21)

⁴⁶ Jesús abaxē jivi livaisi itsa tsipaeba bo ēnētuaqjēalia, pata Jesús pejuyapijivi, pena yajava. Nexata bojumavelia nubena bajarapamonae. Jamatabēbarēcuaicuaijaiti picani Jesús.

⁴⁷ Nexata itsajivi Jesús tsipaebatsi.

—Patajatuxanenē, ena raja, nejuyapijivi yajava, nuca bojumaverena. Bajarapamonae pina jitsipa pecabarēcuaicuaijajava, jaiti Jesús.

⁴⁸ Nexata Jesús jumaiti petsipaebijivitsijavabelia:

—¿Detsa pitsijamatabēcunevi taena, tajuyapijivinu? jai Jesús.

⁴⁹ Nexata Jesús pecobeta itaropita pijajivi. Jumaiti petsipaebijivitsijavabelia:

—Mara jane pamonaē taenajivije, tajuyapijivinu.

⁵⁰ Tsipaji raja pajivi exana taxa, athēbētatsia peecaenē, pitorobicueniatsi, bajarapajivi cajena tajuyapijinē, tajuyapijiva, taenanua, jai Jesús petsipaebijivitsijavabelia.

13

Pacuenia Jesús jivi livaisi tsipaeba pabi peubinē pelivaisicuenia yabara pelivaisi

(Mr 4.1-9; Lc 8.4-8)

¹ Jesús baja itsa najumevereta jivijavabelia livaisi petsipaebijava, pitsapa baja bajarapabovecua. Pona baja itsajavabelia. Nexata Jesús ecojopa pucaxaneto itapata.

² Nexata pucaitatapata jivi ayaibitsaētofaneto Jesús itaxutuanacaetuatatsi. Nexata Jesús runareca jera ēnēabereca. Ecareca jera ēnētareca. Daxita jivibitsaētofaneto nubena tajetabovelia.

³ Nexata Jesús daxitacuene livaisianē tsipaeba jivijavabelia. Jesús jumai tsaponae bajarapamonaejavabelia mapacueniaje:

—Peubinē pona pabiabelia peubinexa.

⁴ Nexata itsa pata pabita, peubixu pexucayabajarabicuenia ubanajetaruca. Pexucayabajarabijavata itsaxu othopa pabi tuatuaqjējava penajetarucaenamutojumata. Nexata bajarajota pata baratsui. Xane bajarapaxumi juvinejeva.

⁵ Itsaxu pijinia othopa ibopananējumata, itsajota bitso ira apo aitayaē. Nexata bajarapaxu bepija juva. Tsipaji bitso ira apo aitayaē.

⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca.

7 Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë maticënëatsi peubijavami.

8 Itsaxu pijinia othopa pexaniairata. Bajarapaxu itsa juva, vitsaba. Xaniavaetsia nacuaita. Itsabotonë capitsapa cien paxutoyobeje tsaponae. Itsabotonë capitsapa sesenta paxutoyobeje tsaponae. Itsabotonë capitsapa treinta paxutoyobeje tsaponae.

9 Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

Pacue ne yabara Jesús jivijavabelia livaisi tsipaeba ëcomparacióncuenia yabara pelivaisi

(Mr 4.10-12; Lc 8.9-10)

10 Jesús pijajivi imoxoyotatsi. Nexata Jesús pijajivi jumaitsi Jesúsjavabelia: —Patajatuxanenë, jivijavabelia livaisi itsa tsipaebame, ¿detsa xuajitsia tsipaebame ëcomparacióncuenia? jai Jesús pijajivi.

11 Nexata Jesús jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Itsiata itsamonae apo yapëtae bajarapacue ne.

12 Pajivi xaniavaetsia nejumeyapëtane tatsipaebilivaisi, bajarapajivi icatsia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae yamatatsënëa pejumeyapëtaeponaenaxa tatsipaebilivaisi, bajarapajivi xuayovajëto jumeyapëtane picani, nacofënëtsiana.

13 Bajaraxuata livaisi itsa tsipaebajë bajarapamonae, ëcomparacióncuenia tsipaebajë. Nexata bajarapamonae tae atã Dioso pesaëta piniijcuenie taexanaejava, itsiata apo yapëtae pajamatabëcuenie yabara exanajë piniijcuenie taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuenie xaina tatsipaebilivaisi.

14 Bajarapacuenia apo jumeyapëtae tsipaji jane baja tocopiapatatsi pacuenia bajayata tajëvelia Diosojumepaebinëmi profeta Isaíaspijinë yaquina. Dioso pejumaitsijava apo tanejumeyapëtaevinexa yabara, bajayata profeta Isaíaspijinë peyaquinaelivaisita jumaitsi mapacueniaje:

Bajarapamonae picani jumetaena. Itsiata apo jumeyapëtae tsane xua yabara tsipaebianatsi. Bajarapamonae taena picani. Itsiata apo yapëtae tsane pajamatabëcuenie xaina petaejava.

15 Bajarapamonae ajamatabëcuenetaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuenie xaina xua taena. Jumeyapëtaejitsipanaa palivaisi jumetaena. Pejamatabëthëtojavavetsina jumeyapëtaejitsipa. Nexata xanëjavaberena namatabëcuenepënyorotsipa perujumatabëcuenievecua. Nexata xanë jamatabëcuenie xanepanaeyaexanaejitsipajë, jai bajayata tajëvelia Isaíaspijinë peyaquinaelivaisita xua yabara tsipaebajë bajarapamonae apo tanejumeyapëtaejavanexa yabara.

16 Itsiata baitsi jane paxamë baja pajamatabëcueniebarëyamë. Tsipaji payapëtaneme pajamatabëcuenie xaina xua pataneme. Pajumeyapëtanemenua pajamatabëcuenie xaina palivaisi pajumetaneme.

17 Xaniajanë pacuenia pacatsipaebijitsiatsi. Bajayatami ayaibitsaëto profetavimi necopiaevetavanapa tanetaenexa picani tapatsijavatsica. Itsamonae ata aneconijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonaemi tëpa baja. Jamatabëjumetaeyabiabanua picani palivaisianë

baja aeconoxae paxamē pacatsipaebaponatsi. Itsiata apo jumetaenejeva bajarapalivaisianē, bajarapamonaemi tēpa baja, jai Jesús pijajivijavabelia.

Pacuenia Jesús yapētaeyaxana pijajivi pajamatabēcuene xaina palivaisi tsi-paeba peubinē pelivaisicuenia yabara pelivaisi
(Mr 4.13-20; Lc 8.11-15)

¹⁸ Icatsia Jesús jumaitsi pijajivijavabelia:

—Xaniavaetsia panenamuxunaevere panejumeyapētaenexa pajamatabēcuene xaina palivaisi pacatsipaebatsi pabita peubinē pelivaisicuenia.

¹⁹ Pamonae jumetae ata Dioso pejumelivaisi, itsiata itsa apo jumeyapētae pejamatabēēthētota, bajarapamonae bepiothopaexu pabi tuatuajēva penajetarucaenamutumata. Nexata najetaruca dovathi. Nexata bajara-pamonae tsijamatabējuvinejevatsi, dovathi vecuapitatsi bajarapalivaisimi, petsijamatabēubilivaisimitsi.

²⁰ Pacuenia pijinia itsi paxu othopa ibopananējumata, itsajota bitso ira apo aitayaē, bajara tsijamatabēcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barēyaya jumecovēnēta.

²¹ Itsiata baitsi jane pacuenia irabereca apo atabunepepiareca paxu othopa ibopananējumata, nexata nabijiana, bajara tsijamatabēcueneitsitsi bajarapamonae Dioso pitorobilivaisi. Tsi-paji pepacuene pejamatabēēthētovetsina apo jumecovēnētsi bajarapalivaisi. Nexata apo ajamatabēcuenesaē tsavanapae bajayajebi pejumecovēnētsinexa bajarapalivaisi. Nexata itsa tocopiapatatsi daxita petoyapēbejecuenetsi, itsa yalivaisibatsinua Dioso pitorobilivaisi yabara, nexata pejumecovēnētsijava bajarapalivaisi bepijia copaba. Pevajēnaeyabelia apo jumecovēnētavanapae.

²² Pacuenia pijinia paxu othopa xanēebacabomijavata, itsa juva, bitso matakēnēnatsi xanēebotonē, bajara tsijamatabēcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabēcueneenatsi mapanacuapijicuenie yabaraje. Tsi-paji najamatabēxaina ayaijava palata pexainaenexa. Nexata pijacuta najamatabēcueneyamaxēitojoroba. Bajaraxuata Dioso pitorobilivaisi apo tovitsabitsi pejamatabēēthētota. Nexata pacuenia itsi pabita piacuaijibibotonē, bajara itsi bajarapamonae. Tsi-paji Dioso xaniavaetsia apo tojinavanapae.

²³ Pacuenia pijinia itsi paxu othopa pexaniairata, bajara tsijamatabēcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Jumeyapētanenua. Nexata pevajēnaeyabelia tsijamatabēcuenevitsabaponatsi Dioso pitorobilivaisi. Nexata pacuenia peubijava capsapa itsabotonē cien paxutoyo-beje tsaponae, itsabotonē sesenta paxutoyo-beje tsaponae, itsabotonē treinta paxutoyo-beje tsaponae, bajara tsijamatabēcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia peubijava tuatuajēa piabejjava juva yabara pelivaisi

²⁴ Dioso apo pejumecovēnētsivi, pamonae najinavanapa Dioso pejumecovēnētsivijavata, itsamatacabi Dioso naneconitsiaexanaena. Nexata jivi peyapētaenexa bajarapamonae Dioso penaneconitsiaexanaejavanexa, Jesús comparacióncuenia livaisi tsi-paeba jivi ayaiBITSaētoXanetojavabelia. Jesús jumaitsi mapacueniaje:

—Mara pacuene jēpaje Dioso pijajivi pevetsijavaje. Pabi pexainaenē, ēpexaniaviriatrigoxu uba pijapabita.

²⁵ Itsiata baitsi jane daxitajivi pemajitsijavata meravi, pabi pexainaenē pijavajabitsaenē tojunuatsi pijapabita. Nexata toubatsi trigo tuatuajējava pibisiaviriajava, betrigobotonē pecataejava. Bajaraxuacujinae vemaxēpona baja.

²⁶ Nexata trigoxu juva. Vitsaba. Itsa baja trigobotonē namatonota, nexata matapania bajarajota nayapētane pibisiaviriajava yajava penamatonotsi-
java.

²⁷ Nexata pabi pexainaenē pijajivi pata petsipaebinxatsi. Pabixainaenē pijajivi jumaiitsi: “Nijapabita ubame ēpexaniaviriatrigoxu. ¿De tsæta pacuenia pitsapa pibisiaviriaxu pibisiajava peyajavajuvinxæ trigojava?” jai pabixainaenē pijajivi.

²⁸ Nexata pabixainaenē jumaiitsi pijajivijavabelia: “Tajavajabitsaenē raeta bajaraxua uba,” jai. Nexata pabixainaenē pijajivi jumaiitsi: “¿Jitsipame tsaja bajaraxua pataxunaejava?” jai.

²⁹ Itsiata baitsi jane pabixainaenē jumaiitsi pijajivijavabelia: “Jume. Tsi-paji panexunaejavata payajavaxunaejitsipame trigobotonē.

³⁰ Copatsianatsi abaxē penacuaitsinexa. Nexata penotsimatacabi itorobianajē tanetonotsivi copiaya pecaetuatsinexa piabejejava. Pepacunuanē exanaena. Bajaraxuacujinae bajaraxua tajuitsiana. Bajaraxuacujinae ētrigoxu netonotsiana taetabiabibota tanetoetsinexa,” jai pabixainaenē pija-
jivijavabelia, jai Jesús jivi ayaibitsaētoخانetojavabelia.

Pacuenia mostazaxutoyo pejuvicujinae, mostazanae bepijia vitsaba yabara pelivaisi

(Mr 4.30-32; Lc 13.18-19)

³¹ Jesús livaisi tsipaeba comparacióncuenia jivi ayaibitsaētoخانetojavabelia. Jumaiitsi mapacueniaje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaētoخانeto naexanaena. Pabi pexainaenē mostazaxu uba pijapabita.

³² Mostazaxu raja bitso tsiquirixutoxi daxita peubixuvecua. Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenē matatoxenetsia. Nexata baratsui ata pata bajaraponaeta. Pematapenanē exana bajaraponaemaxērananējava. Bajara pijinia itsane jivi ata. Bepijia ayaibitsaēto Dioso pijajivi naexanaena, jai Jesús jivi ayaibit-
saētoخانetojavabelia.

Pacuenia pan pexanaematabēnexa, levaduravēnejava fufunaeyaexana yabara pelivaisi

(Lc 13.20-21)

³³ Jesús livaisi tsipaeba comparacióncuenia jivi ayaibitsaētoخانetojavabelia. Jumaiitsi mapacueniaje:

—Dioso raja pijajivi pevetsijava maitsije. Pacuenia pan pexanaematabēnexa, levaduravēnejava yacaējēpa daxita panmatabējava, bajara pijinia itsi Dioso pijajivi pevetsijava. Yacaējēpaena daxitanacuanējava. Petiriva pan pexanaenexa, acueyabi patarroxanetobeje trigobenonē matajērēaba levaduravēnejavata. Nexata pan pexanaematabēnexa, ayaimatabē ata, levaduravēnejava pijinia tsiquirijavayo ata, itsiata levaduravēnejava yacaējēpa daxitamatabējava. Nexata levaduravēnejava fufunaeyaexana daxita panmatabēnexa. Bajara pijinia itsi Dioso pijajivi pevetsijava. Yacaējēpa daxitanacuanējava Dioso pijajivi pevetsicueni, jai Jesús jivi ayaibitsaētoخانetojavabelia.

Pacuenia Jesús jivi livaisi tsipaebabiaba comparacióncuenia yabara pelivaisi

(Mr 4.33-34)

³⁴ Jesús itsa tsipaeba jivijavabelia Dioso pijajivi pevetsijavanexa, livaisianë tsipaebapona ëcomparacióncuenia.

³⁵ Bajarapacuenia Jesús jivi livaisianë itsa tsipaebapona ëcomparacióncuenia, tocopiapatatsi jane baja pacuenia Diosojumepaebinë profetanë bajayata tajëvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanë peyaquinaebaxutota jumaitsi mapacueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicue Dioso nacua pexanaejavaveliacujinae itsajivi ata abaxë apo yapëtae,

jai tajëvelia bajayata profetanë peyaquinaebaxutota Jesús jivi livaisi comparacióncuenia petsipaebaponaejavanexa yabara.

Pacuenia Jesús pijajivi yapëtaeyaxana pajamatabëcuene xaina palivaisi tsipaeba trigobotonë tuatuajëa pejuvijava pelivaisicuenia yabara pelivaisi

³⁶ Jesús naviabiaexana jivi ayaibitsaëttoxaneto. Bajaraxuacujinae Jesús boya joneya. Bajarapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipaebare pajamatabëcuene xaina palivaisi tsipaebame jivi ayaibitsaëttoxanetojavabelia. Baitsi palivaisi tsipaebame trigobotonë tuatuajëa pejuvijava pelivaisicuenia, jai Jesús pijajivi.

³⁷ Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë.

³⁸ “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë, Dioso pijanacuayabetsia pejonevinexa yabara jumaitsinë. “Pibisiaviriajava pejuvijava,” itsa janë, dovathi pijajivinexa yabara jumaitsinë.

³⁹ “Pijavajabitsaënë, ponë pabi pexainanë toubatsi pibisiaviriajava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua peverevereaejavanexa yabara jumaitsinë. “Tanetonot-sivi itorobianajë,” itsa janë, ángelevi yabara jumaitsinë.

⁴⁰ Nexata pacuenia piabejejava caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuae peverevereaeatacabi.

⁴¹ Bajarapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecuajutsinexa daxita pamonaë pibisiacuene pexanabiabivi. Pamonaë ata itsamonaëjavabelia pibisiacuene exanaeyaxana, bajarapamonaë ata taevetsinacua netovecuajutsiana tajaángelevi.

⁴² Bajarapamonaë xuabianatsi infiernojavabelia. Bajarajota nuena. Navonosiniana bitso penavixaetaexae.

⁴³ Pamonaë jumecovënëtsiajinavanapa Dioso pitorobicueniatsi, bajarapamonaë perabënnaitayotsiana taxa Dioso pijanacuatatsia. Pacuenia matacabipijijuameto naitayota, bajarapacuenia perabënnaitayotsiana. Pajivi jamatabënejumeyapëtane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

Pacuenia pebi caxitajaraba bitso penamatamotsijavanë, itsanë irata pemëthëtetsijavami, yabara pelivaisi

⁴⁴ Icatsia Jesús comparaciõncuenia jumaitsi pijajivijavabelia:

—Pebi irata mëthëteta bitso penamatamotsijavanë. Bajaraxuanë bitso xanepana. Nexata juya itsanë bexëajavabelia bajaraxuanë caxitajarabeta irata. Nexata abaxë bajaraponë apo jutsi bajaraxua. Abaxë saya mataacateta bajarajota. Nexata jamatabëcuenebarëyaya pona pijaboyabelia. Nexata xuacujinae bajaraponë canajeta daxita pexainaejavaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotana, xuanë bajaraponë bajarapaira yacomuata, bajara pijinia itsi Dioso pijajivi pevetsijava. Bitso xanepana. Bitso namatamotana, jai Jesús pijajivijavabelia.

Perlavënëjava bitso penamatamotsijava yabara pelivaisi

⁴⁵ Icatsia Jesús jumaitsi pijajivijavabelia:

—Pacuenia itsi bitso pexaniaviriajava perlavënëjava, bajara pijinia itsi Dioso pijajivi pevetsijava, bitso pexaniacuene. Perlavënëjavanë pecanajetarutsinë jaitapona pexaniaviriajavanë juya pecanajetaponaenexa.

⁴⁶ Nexata itsa caxitajarabaxuaba pexaniaviriaperlajava, bitso penamatamotsijava, pona pijaboyabelia pecanajetsinexa daxita pexainaejavami. Nexata comuata bajaraperlajava, jai Jesús pijajivijavabelia.

Dujuai peyamatajucaejava yabara pelivaisi

⁴⁷ Icatsia Jesús comparaciõncuenia jumaitsi pijajivijavabelia:

—Dujuai peyamatajucaejavata, pibisiaviriadujuai itsa yamatajuta, bavecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejumecovënëtsivitsi pexuabinexa infernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta.

⁴⁸ Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona.

⁴⁹ Bajara pijinia itsane nacua pevereverecaematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pecanepaenexatsi.

⁵⁰ Nexata pibisiacuene pexanaevi xuabianatsi infernojavabelia. Bajara-jota nuena. Navonosiniana bitso penavixaetaexae, jai Jesús pijajivijavabelia.

Bitso penamatamotsijavanë, pejanajavanë, perujujavanë ata, yabara pelivaisi

⁵¹ Jesús yanijoba pijajivijavabelia.

—¿Panajumeyapëtaneme tsabaja daxita xua yabara pacatsipaebatsi? jai Jesús.

Nexata Jesús pijajivi jumaitsi:

—Jājā, pacajumeyapëtanetsi rabaja, jai.

⁵² Nexata Jesús jumaitsi pijajivijavabelia:

—Ponë judiõvi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexainanë pijabovetua jutapona bitso penamatamotsijavanë, pejanajavanë, perujujavanë ata, bajara pijinia jamatabëcueneitsi tsane ponë nejumecovënëtsiana, judiõvi pecujarubinë

ata. Tshipaji bajaraponë yapëtaena pexanialivaisianë jivijavabelia petsipae-
binexa. Bajaraponë yapëtaena xanë talivaisianë, pejanalivaisianë, perujuli-
vaisianë ata, jai Jesús pijajivijavabelia.

Pacuenia Jesús naviata pijanacuayabelia, Nazaret tomarabelia, yabara pelivaisi

(Mr 6.1-6; Lc 4.16-30)

⁵³ Jesús baja penajumeveretsicujinae jivijavabelia livaisianë petsipaebi-
java comparacióncuenia, pona baja icatsia itsajavabelia.

⁵⁴ Jesús baja naviata pevitsabinacuayabelia. Nexata Jesús pevitsabinacu-
ata taxuxuaba livaisi petsipaebijava judíovi penacaetuatabiabibota. Nex-
ata pejumetaevitsi sivajamatabëcuenenabenajacatsi. Nexata bajarapamonae
Jesús jamatabëcuenaeabiatanetsi. Bajarapamonae Jesús yabara najumaitsi
mapacueniaje:

—¿De tsaeta jota maponë nacujaruba peyapëtaenexa mapalivaisije? ¿De
tsaeta pacuenia caëjêpatsi mapacuenia Dioso pesaëta pinijicue ne pex-
anaenexaje?

⁵⁵ Maponëje vaxaitsiyajuvënënë, carpinteronëmi pexënato. Maponëje
María pexënato. Bajaraponë pejuyapijivi, Santiago, José, Simón, Judas.

⁵⁶ Papetiriavi ata vajatomarata jinavanapa, maponëje pejuyapijivi. ¿Detsa
verena nexata capitsapa palivaisianë nacatsipaebapona maponëje? najai
bajarapamonae Jesús yabara.

⁵⁷ Nacaetomarapijivixae, bajarapamonae Jesús apo jumexaniataetsi. Nex-
ata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiy-
ataeyabiabatsi. Itsiata pijanacuapijivi, pijamonae ata, apo yaiyataeyabi-
abitsi, jai Jesús pijatomarapijivijavabelia.

⁵⁸ Jesús pevitsabitomarata pejinavanapaevi apo jumecovënëtsitsi. Ba-
jaraxuata Jesús Dioso pesaëta pinijicue ne pexanaejava bajarapatomarata
bitso apo tsitaexanae.

14

Pacuenia Juanpijinë jivibautisabinëmi beyaxuabatsi yabara pelivaisi

(Mr 6.14-29; Lc 9.7-9)

¹ Herodes, Galileanacua pevetsinë. Nexata Herodes Jesús vënëlivaisitanetsi
Dioso pesaëta pinijicue ne pexanaponaejava.

² Nexata Herodes pijajivijavabelia jamatabëcuenenavëxaniabiaya jumaitsi
Jesús yabara:

—Juanpijinëmi raeta jivibautisabinëmi icatsia asaë petëpaecujinae. Bajarax-
uata caëjêpatsi Dioso pesaëta pinijicue ne pexanaenexa, jai Herodes Jesús
yabara.

³ Bajarapacuenia Herodes jumaitsi tshipaji abaxë Juanpijinë itsa asaë,
Herodes pijajivi, vajabitsaëvi, itoroba Juanpijinë pevaetabinexatsi. Nex-
ata vajabitsaëvi Juanpijinë cobecëtsiaya caponatsi penaneconitsivi peje-
babiabiboyabelia. Bajarapacuenia Herodes pijajivi itoroba Herodes pi-
java, Herodiasva, pejamatabëcueneta. Herodiasva picani copiata pita Felipe,
Herodes pejuyapijinë. Nexata Herodes pejuyapijinë pijava yacajërëta.

⁴ Nexata Herodes pejuyapijinë pijava peyacajërëtsixae, Juanpijinë abaxë
itsa apo vaetabitsi, Herodes muxujioba. Juanpijinë jumaitsi Herodesjav-
abelia:

—Acuenebi raja nejuyapijinë pijava nepitsijava, jai Juanpijinë Herodesjavabelia.

⁵ Bajarapacuenia Juanpijinë Herodes pemuxujiobixae, Herodes picani jamatabëbeyaxuabatsi Juanpijinë. Itsiata baitsi jane abaxë apo beyaxuabatsi. Tspaji Herodes cjunava jivi. Daxitajivi Juanpijinë yapëtanetsi Diosojumepaebinëcuene.

⁶ Nexata Herodes itsa najamatabënapita penaexanaematacabi, fiesta exana. Herodes junata jivi ayaibitsaëto. Nexata bajarapafiestamatacabi pejonëyo, pijava pexënatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barëitajitsipa peyavajibijava pejonëyo.

⁷ Nexata Herodes najumecapanepaeya pexaniajajumeta jumaitsi pejonëyojavabelia:

—Xua jitsipame nevajëtsianame. Nexata itsa nevajëtsianame, itsacuenejava ata carajutsianatsi, jai Herodes najumecapanepaeya pejonëyojavabelia.

⁸ Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinë pematabocoto, jai bajarapovayo Herodesjavabelia.

⁹ Bajarapacuenia Herodes pejonëyo itsa jumaitsitsi, Herodes bejamatabëjiobi tsanajetsireca. Herodes nexata acuenebi: “Jume,” pejaijava. Tspaji baja najumecapanepaeya jumaitsi pejonëyojavabelia pexaniajajumeta daxita Herodes pejunatsivi pitabarata. Nexata Herodes jejai.

¹⁰ Nexata Herodes pijajivi, vajabitsaëvi, itoroba penaneconitsivi pejebabiabiboyabelia pevësiucutaxuabinexatsi Juanpijinë.

¹¹ Bajaraxuacujinae vajabitsaëvi Juanpijinë pematabocoto tocaparenatsi platota. Nexata Herodes rajutsiaexana pejonëyojavabelia. Bajarapova juya pena rajuta. Nexata baja Herodíasva yapëtanë capanepaeya baja Juanpijinë pebeyaxuabijavatsi.

¹² Nexata Juanpijinë pijajivi parena itsajota Juanpijinë boca petëpaenë. Pitatsi petëpaenë. Nexata Juanpijinë pijajivi mëthëtatsi. Bajaraxuacujinae bajarapomnae pona Jesúsjavabelia petsipaebinexa Juanpijinë pebeyaxuabijavatsi.

*Pacuenia Jesús pexaejava rajuta cinco mil ponëbeje yabara pelivaisi
(Mr 6.30-44; Lc 9.10-17; Jn 6.1-14)*

¹³ Jesús vënëlivaisitane Juanpijinë pebeyaxuabijavatsi. Nexata Jesús ëpijajivi jerata barëpona itsabelia ajibi jivi. Itsiata baitsi jane jivi ayaibitsaëtoxaneto yapëtanë itsabelia Jesús pona. Nexata pijatomaranë vecuapona. Matatsënëa najetarubena pepëjajitsivitsi Jesús.

¹⁴ Itsa Jesús nonotajuna jeravecua, tane jivibitsaëtoxaneto. Nexata Jesús itaxutobejiobiatane bajarapomnae. Tocapatatsi piavitanevi. Nexata Jesús tojamatejemayaexana piavitanevi.

¹⁵ Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tspaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

¹⁶ Nexata Jesús jumaitsi pijajivijavabelia:

—Apo beponae raja abaxë. Paxamë parajure pexaejava, jai Jesús pijajivijavabelia.

17 Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai.

18 Nexata Jesús jumaitsi pijajivijavabelia:

—Panetocarenamëre pan maberenaje, dujuainëyobeje yajava, jai Jesús.

19 Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacapona. Pijajivijavabelia rajuta bajarapan. Nexata juya Jesús pijajivi tsicobetsana jivijavabelia.

20 Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë.

21 Pamonaë pexaejava xane, ayaibitsaëtoxaneto. Cinco mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtatsi.

Pacuenia Jesús mene itaboxoya najetaruca yabara pelivaisi

(Mr 6.45-52; Jn 6.16-21)

22 Jesús jivi ayaibitsaëtoxaneto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota.

23 Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapat-sutojumatatsia.

24 Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena.

25 Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya.

26 Jesús pijajivi itsa tanetsi mene itaboxoya penajetarucaejava, nabena-jaca. Vavajai pecajunavi.

—jPetëpaenë raeta pejumape najetaruca! jai Jesús pijajivi.

27 Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

28 Nexata Pedro jumaitsi Jesúsjavabelia:

—Tajatuxanenë, itsa pepacuene xamë, nexata nejunaremelia talianexa mene itaboxoyalia, xamëjavabelia, jai Pedro.

29 Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecua runareca meniabereca. Lia mene itaboxoyalia pepatsinexa Jesúsjavabelia.

30 Itsiata baitsi jave Pedro itsa tane jovibo piasaëjava, bitso cujunavatava. Nexata bubunanajereca. Pedro ajena bubunanajereca, vavajai.

—jTajatuxanenë, nevaetabare! jai Pedro.

31 Bepijia Jesús cobepitajaraba. Jumaitsi Pedrojavabelia:

—Tsiquirijavayo saya nejumecovënētame tacaevetsijava. ¿Detsa xuajitsia nejumeabiataneme? jai Jesús.

³² Nexata baja Jesúsbeje Pedrobeje jera ënëabelia ita nonoliabeje, jovibox-anetomi baja ajibi tsaxuabi.

³³ Nexata daxita jerata peponaevi pematabacabëta tonubena Jesús pitabarata. Jumaiti bajarapamonae:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

Pacuenia Jesús jamatejemayaexana piavitanevi Genesaret nacuada yabara pelivaisi

(Mr 6.53-56)

³⁴ Jesús, pijajivi yajava, pata puca itsapanabelia. Pata Genesaret nacuada.

³⁵ Genesaret nacuapijivi ita yapëtanetsi Jesúscuene, nexata daxita bajarapanacuajava vajunupaebatsi pepatsijava. Nexata tocapatatsi daxita piavitanevi Jesúsjavaberena.

³⁶ Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonaevi Jesús penaxatatsijavacopia tojayataponatsi, jamatejema tsaponae piavitanejavavecuca.

15

Pacuenia Jesús tsipaeba xua jivi jamatabëcuenebijanatsi yabara pelivaisi

(Mr 7.1-23)

¹ Fariseovi, judïovi pecujarubivi yajava, pata Jerusalën tomaraverena. Bajarapamonae Jesús imoxoyorenatsi. Nexata bajarapamonae jumaiti Jesúsjavabelia:

² —Jesús, nijajivi naneconita Diosojavabelia. Tsipaji nijajivi apo jumecovënëtsiajinavanapae vajasalinaivi pijacuene. Nijajivi ita xane pexaejava, xane anijatone napëna nacobequiatsinejeva, jai bajarapamonae Jesúsjavabelia.

³ Nexata Jesús jumaiti fariseovijavabelia, judïovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasalinaivi pijacuene penacatsitecaenexa.

⁴ Dioso Moiséspijinëta penajumecopatsilivaisi jumaiti mapacueniaje: “Axa yayiyataema. Ena ata yayiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi.

⁵ Itsiata baitsi jane paxamë jivi pamuxubijiapenetabiabame peyaiy-ataeyaniva paxajivi, penajivi ata. Paxamë jivijavabelia pajumaitimë tsabiabi mapacueniaje: “Axa, ena ata, ita cavajëta neyavenonaenexa, nexata ita apo jitsipaemë neyavenonaejava, jumaitimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia.

6 Nexata caranata Dioso pejumaitisijume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaex-anaponaame. Tsipaji paxamë patsipaebaponame saicaya vajasalinaivi pijalivaisi.

7 ¡Paxamë saya jivi paneyamaxëitojorobivi! Diosojumepaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitisijava paxamë yabara, profeta Isaíaspijinë peyaquinaelivaisita jumaitsi mapacueniaje:

8 Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajê tsane.

9 Saya baitsi bajarapamonae pijajumaitsi tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsi-paebaponaena pejamatabëcuene pijilivaisi. Pepo taitorobilivaisi apo tsi-paebi tsane,

jai tajëvelia Isaíaspijinë peyaquinaelivaisita Dioso pejumaitisijava paxamë yabara, jai Jesús fariseovijavabelia, judíovi pecujarubivijavabelia ata.

10 Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia patanejumeyapëtaenexamë patacat-sipaebilivaisi.

11 Xua jivi xane pecuibovojotota, pexaevajënaeya napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi pecuibota pibisiacuenia cuaicuaijai, bajara jane xua jivi bajamatatabëcuenebijianatsi, jai Jesús bajarapamonaejavabelia.

12 Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenë, ¿yapëtaneme tsabaja fariseovi pecabaraanaepanaejava itsa cajumetane bajarapacuenia nejumaitisijava? jai Jesús pijajivi.

13-14 Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonae. Bajarapamonae saya apo yapëtae. Bajarapamonae bepitatsëcënaevi. Nexata bepematacaponaevi pitatsëcënaevi pijinia. Pitatsëcënaenë itsa matacaponaejitsipa itsanë pijinia pitatsëcënaenë, nexata najuajopaejitsiparecabeje mëthëxanetojavareca. Pabita piabejejava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athëbëtatsia peecaenë, verebiabianatsi daxita bajarapamonae, jai Jesús pijajivijavabelia fariseovi yabara.

15 Pedro nexata jumaitsi Jesúsjavabelia:

—Patajatuxanenë, paneyapëtaeyaexanare pajamatatabëcuene xaina palivaisi tsi-paebame jivijavabelia. Palivaisi baitsi jumaitsimë: “Xua jivi xane pecuib-ota, apo jamatabëcuenebijianaetsi,” jamë, jai Pedro Jesúsjavabelia.

16 Nexata Jesús jumaitsi:

—¿Paxamë ata tsarovia abaxë apo panejumeyapëtaemë?

17 Daxitacuene xua jivi xane pecuibovojotota, junua pecotsorotubareca. Bajaraxuacujinae vecuapitsapatsi.

18 Baitsi rajane xua jivi pecuibuatsina pitsapa pecuaicuaijainexa pacuenia najamatabëxaina pejamatabëëthëtovetsina, bajara jane xua jivi jamatabëcuenebijianatsi.

19 Tsi-paji rabaja jivi pejamatabëëthëtöjavavetsina pitsapa pibisiacuenia pe-najamatabëxainanexa. Pitsapa jivi pebeyaxuabijamatatabëcuenenexa. Pitsapa pebi pijava pevecuanamatayajitsi jamatabëcuenenexa. Pitsapa petirivijavabelia pebi penaperabëquenetsiatæ jamatabëcuenenexa. Pitsapa penacobetoxotsijamatatabëcuenenexa. Pitsapa itsamonae pexanaejava yabara

najumetsënëtsiaya pepaebijamatabëcuenenexa. Pitsapa itsamonae yabara najumetsënëtsiaya pebaracuacuajai jamatabëcuenenexa. Daxita bajarapajamatabëcuene pitsapa jivi pejamatabëëthëtojavavetsina.

²⁰ Daxita bajarapajamatabëcuene jivi jamatabëcuenebijianatsi. Jivi raja pexaejava xae ata, anijatonë napëna nacobequiatsinejeva, apo jamatabëcuenebijianaetsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi

(Mr 7.24-30)

²¹ Jesús baja Genesaret nacuavecua pona. Naropota itsanacuayabelia, itsabelia eca anijatamarabeje, Tiro tomarabeje Sidón tomarabeje. Jesús baja pata bajarapanacuayabelia.

²² Nexata bajarapanacuata ponapona cananeaviriava. Bajarapova apo judíova. Bajarapova Jesúsjavaberena pata. Piniijumeta bajarapova jumaitsi Jesúsjavabelia:

—¡Petuxanenë, Davidpijinë pemomomë, nitaxutotsoniataema! Taxënatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

²³ Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaitsi Jesúsjavabelia:

—Patajatuxanenë, ponaeayaexanare baja mapovaje. Bitso raxua nacapëvabanajetaruca, jai Jesús pijajivi.

²⁴ Nexata Jesús jumaitsi bajarapovajavabelia:

—Dioso baja cajena nitoroba tayavenonaenexa ëjudíovi, Israel nacuapijivi, pamonaë Dioso tane boveja. Tsipaji bajarapamonae Diosovecua naxuabavanapa, jai Jesús bajarapovajavabelia.

²⁵ Itsiata bajarapova imoxoyorenatsi Jesús. Bajarapova Jesús yaiyataeya pematabacabëta nucajunua Jesús pitabarata. Nexata bajarapova jumaitsi Jesúsjavabelia:

—¡Petuxanenë, neyavenonare! jai.

²⁶ Nexata Jesús jumaitsi bajarapovajavabelia:

—Apo xanepanae copiaya xamë itsanacuapijivamë tacayavenonaenexa. Abaxë copiaya veyavenonajë tajanacuapijivi, judíovi. Xamë copiaya itsa cayavenonaëjitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁷ Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainaenëtsi pexaeyecacemesa bëxëpanareca piothopaepërë. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁸ Nexata icatsia Jesús jumaitsi bajarapovajavabelia:

—¡Petiriva, bitso najamatabëcuenecopatame Diosojavabelia pecayavenonaenexa! Nexata pacuenia jumaitsimë, bajarapacuenia Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta tojamatejematsi baja pijabotalia.

Pacuenia Jesús jamatejemayaexana ayaibitsaëtoخانeto piavitanevi yabara pelivaisi

²⁹ Itsa panacuata eca Tiro tomarabeje Sidón tomarabeje, Jesús baja ve-cuapona. Nexata Jesús najetaruca Galilea pucaxaneto muxubèrèa. Nexata Jesús petsutojumabetsia junaya. Nexata petsutojumatatsia Jesús ecojopa.

³⁰ Nexata jivi ayaibitsaëtoخانeto pata Jesúsjavaberena. Tocapatatsi pejayu-jayunaevi. Tocapatatsinua bitso pitaxutotsècènaevi. Tocapatatsinua apo pecuaicuajiaivi. Tocapatatsinua penabejenaevi. Tocapatatsinua ayaibit-saëtoخانeto piavitanevi. Bajarapamonae tojebatsi Jesús pitabarata. Nexata Jesús jamatejemayaexana daxita bajarapamonae.

³¹ Nexata jivi jamatabècuenenabenajaca itsa tane pecuaicuajiajjava apo pecuaicuajiaivimi. Jesús xanepanaeyaexana penabejenaevimi ata. Xanepanaeyaexana pejayujayunaevimi ata. Itaxutoxanepanaeyaexana bitso pitaxutotsècènaevimi ata. Nexata jivi itsa tane bajarapacuenè, jumaitsi Diosojavabelia: “Diosomè, bitso ayaijamatabècuenenèmè, palsrael nacuapijivinè patajaDiosomè,” jai bajarapamonae.

Pacuenia Jesús rajuta pexaejava bejamatabècuene cuatro mil pajivibeje yabara pelivaisi
(Mr 8.1-10)

³² Jesús jivi ayaibitsaëtoخانeto pènjajinavanapatsi. Nexata Jesús junata pija-jivi. Jumaitsi pijajivijavabelia mapacueniaje:

—Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanèjavata pejinavanapaecujinae. Pemarue baja tovereverecatsi. Pexaejava xaenejeva, apo jitsipaenè taitorobijava pepon-aenexa pijabonèjavabelia. Namuto epatua meta cuenabijitsipatsi piajani, jai Jesús pijajivijavabelia.

³³ Nexata Jesús pijajivi jumaitsi:

—¿Detsa jane pacuenia pexaejava tocaxitajarabianatsi mapajivibit-saëtoخانetoje? Majotaje ajibi pexaejava. Tsipaji itsajivi ata pijabo apo xainae majotaje, jai Jesús pijajivi.

³⁴ Nexata Jesús yanijoba pijajivijavabelia.

—¿Detsa papanbèbeje paxainame? jai.

Nexata Jesús pijajivi jumaitsi:

—Siete papanbèbeje paxainajè, dujuainèxi yajava, jai.

³⁵ Nexata Jesús itoroba daxitajivi penaenexa irata.

³⁶ Nexata Jesús pita siete papanbèbeje, dujuainèxi yajava. Nexata Jesús jumaitsi Diosojavabelia:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan, dujuainèxi yajava. Nexata Jesús pepatsicacaejan rajuta pijajivijavabelia. Nexata juya Jesús pijajivi tsicobetsana bajarapajivi bitsaëtoخانetojavabelia.

³⁷ Daxita bajarapamonae nabane xaniavaetsia. Nexata peya-juvènècopabijavanè Jesús pijajivi caetuata. Vènèba siete xuabeje bemapirecuenia pexanaejavanè.

³⁸ Pamonae pexaejava xane, ayaibitsaëtoخانeto. Cuatro mil ponèbeje namataèjètatsi xaniavaetsia. Petiriavi, pejevaxi ata, apo namataèjètsitsi.

³⁹ Pexaecujinae pexaejava, Jesús baja naviabiayaexana jivi. Nexata Jesús runareca jera ènèabereca. Pona baja Magdala nacuayabelia.

16

*Pacuenia fariseovibeje saduceovibeje Jesús itorobatsi Dioso pesaëta pini-
jicuene pexanaejava petsitaexanaenexa picani yabara pelivaisi*
(Mr 8.11-13; Lc 12.54-56)

1 Fariseovibeje saduceovibeje pata Jesúsjavabereña. Nexata bajarapamonae Jesús jamatabëcuenejëbiaya itorobatsi picani pinijicuene pexanaejava Dioso pesaëta Jesús petsitaexanaenexa. Bajarapacuenia picani Jesús itorobatsi peyapëtaenexatsi Dioso pepacuenë athëbëvetsica pitorobinëcuenetsitsica.

2 Nexata Jesús jumaitsi bajarapamonaejavabelia:

—Pamatacabi caniviyo itaboxo tsohia, paxamë pajumaitsimë tsabiabi: “Meravia pexaniamatacabi tsane. Tsipaji itaboxo tsohia,” pajamë tsabiabi.

3 Pamatacabi bajayacunua nacuaitaboxo itacaënanuca, pajumaitsimë tsabiabi: “Ajena anacuayajitsia daxita matacabi. Tsipaji nacuaitaboxo itacaënanuca,” pajamë tsabiabi. Payapëtaneme picani xaniavaetsia pacuenia matacabi itsijitsia. Tsipaji itarërëbo pepitsapaexae, payapëtaeyabiabame. Itsiata baitsi jane patae atamë Juan jivibautisabinëmi pexanaponaejava, xanë ata taexanaponaejava patae atamë, itsiata apo payapëtaemë Dioso athëbëvetsica taneitorobinëcuenetsica.

4 Bitso pibisiajamatabëcuene xaina pamonae copaba Dioso pejumecovënëtsijavami. Bajarapamonae picani nitoroba Dioso pesaëta pinijicuene taexanaejava tatsitaexanaenexa taneypëtaenexa pepacuenë Dioso athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Pacuenia bajayata Diosojumepaëbinë profeta Jonáspijinë exanatsi, bajara ëpitsicuene taneexanaejava, tsitajëtsianajë, jai Jesús petëpaecujinae icatsia Dioso piasaëyaexanaejavanexatsi yabara.

Jesús baja nexata bajarapamonae vecuapona.

*Pacuenia Jesús pijajivi muxujioba fariseovi petsipaëbilivaisi
pejumecovënëtsianiva yabara pelivaisi*
(Mr 8.14-21)

5 Jesús pijajivi nicabilia puca itsapanabelia. Nexata nacofënëta pamarue. Apo caponae pan.

6 Nexata Jesús pijajivi muxujioba pejumecovënëtsianiva fariseovi, saduceovi ata, itsa tsipaëbatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaëbaponaelivaisi, saduceovi ata petsipaëbaponaelivaisi, Jesús pijajivi pejumecovënëtsianiva.

7 Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuaijai bajarapacuenia Jesús pejumaitsiyume yabara. Jesús pijajivi jamatabëcuenenavëxaniabiaya najumaitsi:

—Jesús nacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitsi pan apo vajacaponaeaxae, najai Jesús pijajivi jamatabëcuenenavëxaniabiaya.

8 Jesús pijajivi jamatabëcueneyapëtane bajarapacuenia jamatabëcuenenavëxaniabiaya pejumaitsiyava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacaju-
maitsi pan apo vajacaponaxae,” panajamë? ¡Apo payapëtaemë tsipaji
tanecaëjëpaejava taexanaenexa pan itsa namatavenonatsi!

⁹ Paxamë abaxë apo panejumeyapëtaemë. ¿Apo panajamatabënapitsimë
tsipaji pacuenia exanajë pamatacabi pan namatavenonatsi? Tsicobet-
sanajë cinco papanbëmibeje cinco mil ponëbeje pexaenexa. ¿Detsa xuabeje
pavëñëbame peyajuvëñënacopabijavanë bemapirecuenia pexanaejavanë?

¹⁰ ¿Apo panajamatabënapitsimënuu tsipaji pacuenia tsicobetsanajë siete
papanbëmibeje cuatro mil pajivibeje pexaenexa? ¿Detsa xuabeje bajarapa-
matacabi pavëñëbame peyajuvëñënacopabijavanë bemapirecuenia pexanae-
javanë?

¹¹ Itsa pacajumaitsitsi: “Xania panayajivitaema fariseovi pijalevadura.
Panayajivitaema saduceovi ata pijalevadura,” itsa pacajaitsi, pan yabara
apo pacajumaitsitsi, jai Jesús pijajivijavabelia.

¹² Nexata jane baja Jesús pijajivi xaniavaetsia jumeyapëtanetsi. Nex-
ata Jesús pijajivi najumaitsi: “Xania panayajivitaema fariseovi pijale-
vadura. Panayajivitaema saduceovi ata pijalevadura,” nacajai tsaena Jesús,
fariseovi, saduceovi ata, itsa nacatsipaeba saicayacuenia Dioso pejumeliv-
aisivecua vajajumecovëñëtsiyaniva, najai Jesús pijajivi.

*Pacuenia Pedro jumaitsi Jesúsjavabelia: “¡Xamë raja Cristomë!” jai yabara
pelivaisi*

(Mr 8.27-30; Lc 9.18-21)

¹³ Jesús, pijajivi yajava, najetaruca Cesarea de Filipovëñë tomaramuxune-
nia. Nexata Jesús pijajivijavabelia jumaitsi mapacueniaje:

—Xanë, Daxitajivi Pematapijinëñë. ¿Detsa jivi jumai tsabiabi xanë yabara?
¿De tsaeta xanë ponëñë? jai Jesús pijajivijavabelia.

¹⁴ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautis-
abinëmi icatsia asaë,” jai tsabiabi. Itsamonae pijinia jumai tsabiabi: “Dioso-
jumepaebinëmi raeta, profeta Elíaspijinë, ponëmi bajayata ponapona, icatsia
asaë,” jai tsabiabi. Itsamonae pijinia jumai tsabiabi: “Diosojumepaebinëmi
raeta profeta Jeremíaspijinë, ponëmi bajayata ponapona, icatsia asaë. Itsa
jume, nexata meta bajayata Diosojumepaebivimi profetavimiyajuvëñëñë
icatsia asaë,” jai tsabiabi itsamonae xamë yabara, jai Jesús pijajivi.

¹⁵ Nexata Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë
ponëñë? jai Jesús pijajivijavabelia.

¹⁶ Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi neca-
panepaenexa. Xamë Dioso piasaëtsaponaponaenë pexënatomë, jai Pedro
Jesúsjavabelia.

¹⁷ Jesús nexata jumaitsi Pedrojavabelia:

—Simón, Juan pexënatomë, xamë jamatabëcuenebarëyamë. Tsipaji itsajivi
ata apo cayapëtaeyaxanae xanë taneyapëtaenexamë Cristocuenenë. Biji ra-
jane taxa, athëbëtatsia peecaenë, cayapëtaeyaxana.

¹⁸ Nexata catsipaebianatsi mapacueniaje. Xamë rabaja Pedromë,
beibotomë. Pacuenia ibopanaxanetojumata pexanetsibo bajayajebi
ajamatabësäë tsecae, bajara pijinia itsane tajajivi tanejumecovëñëtsivi
Cristocuenenë. Nexata dovathi apo jamatabëcuenematatoxenetsitsi tsane.

19 Pacuenia baupaevetsinē evetsiaexanatsi llavianē, bajara pijinia pacuenia caevetsiaexanaenatsi athēbēnacuaapijilivaisianē. Xua itavetsianame mapanacuataje, bajaraxua Dioso ata athēbēnacuatatsia itaveta. Xua tocopatsianame pexanaenexa mapanacuataje, bajaraxua Dioso ata athēbēnacuatatsia tocopata pexanaenexa, jai Jesús Pedrojavabelia.

20 Nexata Jesús pijajivi jumeitaveta petsipaebiyaniiva itsajivijavabelia ata: “Mara ponē Cristoje, Dioso athēbēvetsica pitorobinētsica jivi peca-paneaenexa,” pejaiyaniva.

Pacuenia Jesús tajēvelia navajunupaeba pebeyaxuabijavanexatsi yabara pelivaisi

(Mr 8.31-9.1; Lc 9.22-27)

21 Jesús pebeyaxuabijavanexatsi, tajēvelia navajunupaeba pijajivijavabelia. Jumaitsi mapacueniaje:

—Ponaejitsianē Jerusalén tomarabelia. Nexata bajarajotalia nebejiobiaexanaena judíovi pijaancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatēpaecujinae, acueyabi matcabita, icatsia asaēnē tsane, jai Jesús tajēvelia pijajivijavabelia.

22 Nexata Pedro junata Jesús pebarēponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—¡Tajatuxanenē, Dioso caitaxutotsoniataena bajarapamonae pecaexanaeyaniiva daxita pacuenia tajēvelia navajunupaebame! jai Pedro Jesúsjavabelia.

23 Nexata Jesús Pedrovecua napēnēyorotaxuaba. Taenuca pijajivi penaejavabelia. Nexata Jesús napēnēyorotsia jumai tsanucae Pedrojavabelia:

—¡Dovathi, nevecuanatixire! Nejamatabēcueneējēbjitsipame. Necopare Dioso taneitorobicuena taexanaenexa. Xamē apo jitsipaemē pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

24 Nexata Jesús jumaitsi pijajivijavabelia:

—Pajivi jitsipa tanepēnaponaejava, bajarapajivi copatsi pejitsipaecuenia penajamatabēxainabiabijavami. Exanaponaponae taitorobicuena. Najamatabēcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara pjamatabēcuenesaē tsaponaponaeenexa. Nexata jane baja xuacujinae nepēnaponae.

25 Pajivi exanaponapona penatojitsipaecuenia, apo xainae tsane matacabi apo peverevereaejava. Pajivi xanē tajamatabēcueneta copata penatojitsipaecuenia pexanaejavami, bajarapajivi xainaena matacabi apo peverevereaejava.

26 Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata, mapanacuapijicuenije, itsiata nacuerata. Tsipaji pexainaecuene apo capanepae tsanetsi Diosojavabelia. Tsipaji acuenebi tsane itsajivi ata pematamotsinexa penaxuabiyaniiva Diosovecua.

27 Xanē, Daxitajivi Pematapijinēnē, yajavapatsianicajē taxa Dioso pijapenivenivenaectotia. Yajavapatsianicajēnua tajaángelevi. Nexata matamotaponaeñajē caejivi canacujitsia, tanetonacuenebivi. Naneconitsiaexanaenajē pijinia pijaneconi pexanaevi.

28 Xaniajanē pacuenia pacatsipaebijitsiatsi. Daxita paxamē patēpaenejevamē, xanē, Daxitajivi Pematapijinēnē, tajajivi ayaiBITSaētoXaneto

naexanaena. Nexata paxamëyajuvënëvi pepuatae tsane xanë tajajivi ayaiBITSaëttoxaneto taevetsijava, tēpaena, jai Jesús pijajivijavabelia.

17

Pacuenia Jesús caeepatoyo perabēnivenivenataba yabara pelivaisi (Mr 9.2-13; Lc 9.28-36)

¹ Jesús petēpaejavanexa tajēvelia penavajunupaebicujinae, seis pamatacabibejecujinae, Jesús pijajivi, acueyabi ponēbeje, barējunaya pinijitsutoxanetojumabetsia. Jesús barējunaya mapamatabēxëyoje: Pedro, Santiago, Juan. Bajarapamatabēxëyo Jesús barējunaya pinijitsutoxanetojumabetsia. Santiago raja pejuyapijinē Juan.

² Nexata petsutojumatatsia Jesús perabēnivenivenareca bajarapamonae pitabarata. Pacuenia matabicipijijumeto banaitayota, bajarapacuenia Jesús itabaranaityota. Penaxatatsijavareca, daxita nivenivenaeya niojai.

³ Nexata bajarajota Jesús pijajivi tane bajayata petēpaenēmibeje, Moiséspijinēbeje Elíaspijinēbeje. Jesús barēcuaicuajiaitsi bajaraponēbeje.

⁴ Nexata Pedro jumaiti Jesúsjavabelia mapacueniaje:

—¡Patajatuxanenē, pijacuaxae panebarēponame! Itsa jitsipame, paca-toexanaenatsi acueyabi pabobērētoebeje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro Jesúsjavabelia.

⁵ Itsa abaxē Pedro cuaicuajiai tsanucae, penaitayotsiitarērēbo mataacataxuabatsi daxita bajarapamonae. Nexafa bajarapamonae jumetane bajarapaitarērēbojavavetsica Dioso pejumaitisijava: “Mara ponē taxēnato, tasivanēje. Bitso sivajamatabēcuenebarēyanē. Pajumetaema bajaraponē,” pejaijavatsica bajarapamonae jumetane.

⁶ Jesús pijajivi itsa jumetane bajarapacuenia Dioso pejumaitisijavatsica, irataeya othopa irata. Jesús pijajivi bitso najunaviaca.

⁷ Nexata Jesús imoxoyolia pijajivi. Jayalia. Jumaiti pijajivijavabelia:

—Panonobapunare. Pētsa pajunavame, jai Jesús pijajivijavabelia.

⁸ Nexata Jesús pijajivi itsa naēcobarēcēpalia Jesúsjavabelia, ajibi baja Moisésbeje Elíasbeje. Caenē baja Jesús nuca.

⁹ Nexata Jesús pijajivi itsa barērunanucaponaica petsutojumavetsica, jumeitaveta pijajivi. Jumaiti pijajivijavabelia:

—Pētsa patsipaebame itsajivi ata pacuene pataneme. Matapania xanē, Daxitajivi Pematapijinēnē, icatsia asaēnē tsane tatēpaecujinae, nexata jane baja matapania patsipaebianame, jai Jesús pijajivijavabelia.

¹⁰ Nexata Jesús pijajivi yanijoba Jesúsjavabelia. Jumaiti:

—Patajatuxanenē, ¿detsa xuajitsia judíovi pecujarubivi jumai tsabiabi: “Bajayata ponēmi ponapona, Elíaspijinē, petēpaecujinae icatsia asaē tsane. Bajaraponē copiata patsiana. Bajaraxuacujinae patsiana Cristo, pepo vanacacapanepaenēnexa jane baja,” jai tsabiabi? jai Jesús pijajivi.

¹¹ Nexata Jesús jumaiti pijajivijavabelia:

—“Copiata Elíaspijinē patsiana. Nexata bajaraponē jamatabēcuenexanetsiana daxitajivi,” itsa jai, Juanpijinēmi jivibautisabinēmi yabara jumaiti. Xaniajai rabaja pacuenia judíovi pecujarubivi jumaiti.

¹² Xaniajanē pacuenia pacatsipaebijitsiatsi. Elíaspijinē rabaja patajopa. Itsiata jivi apo yapētaetsi ponēcuene. Nexata pacuenia jivi jitsipa pexanaenexa bajaraponējavabelia, exana baja. Beyaxuabatsi. Bajara pijinia pacuenia

xanë ata, Daxitajivi Pematapijinënë, nebejioabiaexanaena bajarapamonae, jai Jesús pijajivijavabelia.

13 Nexata Jesús pijajivi jumeypëtanetsi. Nexata Jesús pijajivi jamatabëjumaitsi:

—“Elíaspijinë rabaja patajopa,” itsa jai Jesús, Juanpijinëmi jivibautisabinëmi yabara jumaitsi, jamatabëjai Jesús pijajivi.

*Pacuenia Jesús jamatejemayaexana pejevaxinë, dovathi peyjavapon-
aponaenë, yabara pelivaisi*

(Mr 9.14-29; Lc 9.37-43)

14 Jesús pijajivi, acueyabi ponëbeje, barënaviata petsutojumavetsica. Nexata bajarapatsutoxanototabuta vajënaeevetatsi jivi ayaibitsaëtoxaneto. Nexata pebi Jesús imoxoyorenatsi. Bajaraponë Jesús yayiataeya pematatabëta nucajunua Jesús pitabarata. Bajaraponë jumaitsi Jesúsjavabelia:

15 —Jesús, netoitaxutotsoniataema taxënatonëyo. Netodevacaiababiabatsi raja. Bitso bejiobi tsabiabi. Anijatonë isotuabelia natajuitabiaba. Itsajavata menialia jopabiabalia.

16 Nijajivijavaberena picani capatajë tanetojamatejemayaexanaenexa. Itsiata baitsi jane apo caëjëpaetsi tanetojamatejemayaexanaenexa, jai bajaraponë Jesúsjavabelia.

17 Nexata Jesús jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjëpae pejevaxinë panevecuacapitsapaenexa dovathi. ¡Panejamatatabëcuenetajavi baja rovia! Pexaniajaillivaisivecua saicayacuenia panajamatabëxainame. ¿Detsa paepatojebi abaxë paxamëjavata ponaponaeñajë? ¿Detsa paepatojebi abaxë paxamëjavabelia ajamatabëcuenesaenë tsaponaponae tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

18 Nexata Jesús itaveta dovathi pejevaxinë pevecuapitsapaenexatsi. Nexata baja pejevaxinë dovathi vecuapitsapatsi. Pejevaxinë baja jamatejema.

19 Bajaraxuacujinae Jesús pijajivi barëcuaicuaijaiti pijaepatojavata. Jesús pijajivi jumaitsi:

—Patajatuxanenë, ¿detsa xuajitsia meta paxanë apo panecaëjëpae patavecuacapitsapaenexa dovathi? jai Jesús pijajivi.

20 Nexata Jesús jumaitsi pijajivijavabelia:

—Apo pacacaëjëpae pejevaxinë panevecuacapitsapaenexa dovathi. Tsiapaji xaniavaetsia apo pajumecovënëtsimë Dioso papecayavenonaejavanexa. Xaniajanë pacuenia pacatsipaebijitsiatsi. Paxamë tsiquirijavayo ata itsa pajumecovënëtsipame Dioso papecayavenonaejavanexa, nexata pacacaëjëpaejitsipa Dioso pesaëta pinijicuene paneexanaenexa. Nexata itsa pajumaitsimë tsipae mapatsutoxanetojavabeliaje: “Vecuanatixire majotaje. Itsajavabelia ecaename,” itsa pajamë, pacajumecovënëtsipa. Nexata natixitsipa. Nexata paxamë paneexanaenexa itsacuenejavayo ata, apo pacatsitaayapëbeje tsipae itsa pepacuene xaniavaetsia pajumecovënëtsipame Dioso papecayavenonaejavanexa.

21 Mara paviriadovathije apo jitsipae pepitsapaejava. Matapania panexaejava apo paxamë tsipae pamatacabibeje asaëyata Diosojavabelia pavajëtaponame dovathi pepitsapaenexa, pitsapaejitsipa, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mr 9.30-32; Lc 9.43-45)

²² Jesús abaxë pijajivi itsa barëponapona Galilea nacuata, pijajivijavabelia tajëvelia navajunupaebapona pebeyaxuabijavanexatsi. Jesús pijajivijavabelia jumai tsaponaë mapacueniajæ:

—Xanë, Daxitajivi Pematapijinënë, necanajetsiana itsamonæ pecobeyabelia.

²³ Bajarapamonæ nebeyaxuabiana. Itsiata baitsi jane tanebeyaxuabicujinaë, acueyabi matababita, icatsia asaënë tsanë,” jai tsaponaë Jesús pijajivijavabelia.

Nexata Jesús pijajivi itsa jumetanetsi bajarapacuenia Jesús penavajunupaebaponaëjava petëpæjavanexa, Jesús pijajivi bitso najamatabëxaina.

Pacuenia Jesús matamota impuestomatamo yabara pelivaisi

²⁴ Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonæ yanijobatsi Pedro.

—Pedro, ¿xaniajai tsajä? ¿Panijatuxanenë impuestomatamo apo matamotabiabi, paimpuestomatamo judïovi matamobabiaba templobo pevet-sivijavabelia? jaitsi.

²⁵ Pedro nexata jumaitsi:

—Jājä. Matamotabiaba cajena, jai.

Nexata Pedro joneya Jesús peecaeboyalialia. Nexata Pedro pejonejavatalialia Jesús peecaeboyalialia, Jesús jumaitsi Pedrojavabelia:

—Pedro, ¿detsa xamë jamatabëcueneitsimë? Nacuaevetsivi palata peptsinexa, pijajivi itoroba impuestomatamo petoyanijobinexatsi. ¿Detsa nexata pamonaëjavabelia nacuaevetsivi pijajivi yanijobabiaba impuestomatamo? ¿Nacuaevetsivi tsaja pijamonæjavabelia? Itsa jume, ¿saicayavijavabelia tsaja, nacuaevetsivi pevet-sinacuata pejinavanapaevijavabelia? jai Jesús Pedrojavabelia.

²⁶ Pedro nexata jumaitsi Jesúsjavabelia:

—Nacuaevetsivi raja pijajivi impuestomatamo yanijobabiaba saicayavijavabelia, nacuaevetsivi pevet-sinacuata pejinavanapaevijavabelia. Apo yanijobabiabi nacuaevetsivi pijamonæjavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaevetsivi pijamonæ apo matamotsitsi impuestomatamo, bajara pijinia pacuenia xanë ata apo jitsipaenë picani tamatamotsinexa impuestomatamo templobo pevet-sivijavabelia taxa Dioso pijatemploboxæ.

²⁷ Itsiata baitsi jane xamë matamotsianame itsajivi ata vajanacabaraanaepanaeyanivabeje. Liamëre pucaxanetojavabelia.

Ëjëbianame culupabota. Padujuainëyo copiaya catoxaena, jutsianame. Pecuibota caxitajarabianame palatanëyo. Bajarapapalatanëyota caëjëpaena vajamatamotsinexabeje impuestomatamo xanë tamatamotsinexa, xamë ata nematamotsinexa. Nexata bajarapalatanëyo caponaename impuestomatamo nematamotsinexa templobo pevet-sivijavabelia, jai Jesús Pedrojavabelia.

18

Pacuenia Jesús pijajivi jumaitsi: “¿Detsa ponë paxanëyajuvënënë paneve-cuaayajamatabëcuenenë?” jai Jesúsjavabelia yabara pelivaisi

(Mr 9.33-37; Lc 9.46-48)

¹ Jesús baja itsa najumevereta Pedrojavabelia pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa ponë paxanëyajuvënënë bitso ayaijamatabëcuenenë tsane daxitavecua Dioso pijanacuatatsia? jai.

² Nexata Jesús junata pejevaxinëyo. Pijajivi tuatujëta nuteta pejevaxinëyo.

³ Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapapejevaxinëyoje beveliajamatabëcuenenëyo nataeya najamatabëcuenecopata Diosojavabelia Dioso pevetsinexatsi. Nexata paxamë itsa apo panajamatabëcuenepënëyorotsimë tsane perujumatabëcuenevecua beveliajamatabëcuenevi panenataenexa pacuenia mapapejevaxinëyo itsije, nexata apo pajonemë tsane Dioso pijanacuayabetsia.

⁴ Nexata ponë jitsipa Dioso pijanacuatatsia ayaijamatabëcuenenë penaexanaenexa daxitavecua, bajaraponë beveliajamatabëcuenenë natae, pacuenia mapapejevaxinëyo jamatabëcueneitsije.

⁵ Pajivi copiapita tanejumecovënëtsijiviyo, mapitsijamatabëcuenejiviyoje, bajaraxua xanë taniji tanecopiapitsijava, jai Jesús pijajivijavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi

(Mr 9.42-48; Lc 17.1-2)

⁶ Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatujëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovënëtsiviyajuvënëvi.

⁷ Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcuene tsitecaponaena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

⁸ Bajaraxuata panecobeta, panetaxuta ata, pibisiacuene itsa paexaname, panacobecacure. Panataxucacure. Tajë panavecuaxuare. Itsiata xanepana panejonenexa cobemataxucaeja, taxumataxucaeja ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo pevereverecaeisotjavabelia.

⁹ Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaetitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infernojavabelia, jai Jesús pijajivijavabelia.

Pacuenia Jesús pijajivi livaisi tsipaeba oveja penaxuabinë pelivaisicuenia yabara pelivaisi

(Lc 15.3-7)

¹⁰ Jesús jumaitsi pijajivijavabelia:

—Itsamonae mapanacuata bijiyaya taeyabiaba mapitsipejevaxijivixi ataje, tanejumecovënëtsijivixi. Saya beveliajamatabëcuenevi taeyabiaba. Pëtsa

bajrapacuenia paxamë ata bijiaya pataneme tanejumecovënëtsivi. Bijiaya pëtsa pataneme mapitsipejavaxinéyo ataje, tanejumecovënëtsijiviyo. Tsipaji bajarapamonae ángelevi yajavajinavanapa peyavenonabiabinexatsi. Bajarapaángelevi taxa Dioso, athëbëtatsia peecaenë, pitabarata jinavanapa.

¹¹ Xanë, Daxitajivi Pematapijinënë, patajopajë tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

¹² Jesús icatsia jumaitsi pijajivijavabelia:

—Pacanaëjere mapacueneye. Pebi xainaejitsipa cien ponëbeje oveja. Nexata itsa toyajuvënë naxuabijitsipatsi caenë, oveja pexainaenë puenetsipa noventa y nueve ponëbeje oveja. Bajaraxuacujinae jaitsipa petonaxuabinëtsi.

¹³ Xaniajanë pacuenia pacatsipaebijitsiatsi. Bajaraponë itsa caxitajarabijitsipa pijaoveja, petonaxuabinëmitsi, bitso barëyataejitsipa. Nexata noventa y nueve ponëbeje, apo petonaxuabivitsi, pesivajamatabëcuenebarëyajava, matatoxenetsia bitso sivajamatabëcuenebarëya tsipae petonaxuabinëmitsi.

¹⁴ Bajara pijinja pacuenia paneaxa ata, athëbëtatsia peecaenë, apo jitsipae pevecuanaxuabinexatsi caejivi ata mapitsipejavaxijivixi ataje, tanejumecovënëtsivi, jai Jesús pijajivibelia.

Pacuenia Dioso pejumecovënëtsijivi bebarajamatabëcuenexanepana, itsacueniabi atatsi itsajivi, yabara pelivaisi

(Lc 17.3)

¹⁵ Icatsia Jesús jumaitsi pijajivijavabelia:

—Itsanë Dioso pejumecovënëtsinë pibisiacuene papecatoexanaejava, itsa pavënëlvaisitaename, xaniavaetsia payanijobianame caenëjavata. Nexata xaniavaetsia itsa panabarëcuaicuaijamëbeje, panabarajamatabëcuene xanepanaenamebeje.

¹⁶ Xaniavaetsia itsa apo pacabarëcuaicuaijai tsane, nexata Dioso pejumecovënëtsinë pajunatsianame caenë, anijanëbeje ata, paneyajavaponaenexa pibisiacuene papecatoexanaenëjavabelia pemuxujobinexatsi. Nexata bajaraponëbeje pacajumetaena xaniavaetsia panebarëcuaicuaijajava pibisiacuene papecatoexanaenëjavabelia. Bajrapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename.

¹⁷ Ponë pibisiacuene pacatoexana, itsa apo namuxunaevetsi tsane paneyajavaponaenëbeje ata pemuxujobijava, nexata daxita Dioso pejumecovënëtsivi penacaetuatsijavata, payanijobianame papibisiacuene pacatoexana. Nexata ponë pibisiacuene pacatoexanaena, daxita Dioso pejumecovënëtsivi muxujobianatsi. Bajaraponë itsa apo namuxunaevetsi tsane, muxujobi atatsi Dioso pejumecovënëtsivi, nexata bajaraponë pataename Dioso apo pejumecovënëtsinëcuenia. Panavecuaitavetsianame pepatsiyaniva panenacaetuatsijavata, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athëbënacuataatsia ata itaveta. Xua jivi patocopatsianame pexanaenexa mapanacuataje, bajaraxua Dioso ata athëbënacuataatsia tocopata pexanaenexa, jai Jesús pijajivijavabelia.

¹⁹ Icatsia Jesús jumaitsi pijajivijavabelia:

—Pacatsipaebijitsianua mapacueniaje. Mapanacuata paanijanëmëbeje itsa panajamatabëcuenejëpamebeje xua pavajëtsijitsiamëbeje Diosojavabelia, nexata taxa, athëbëtatsia peecaenë, pacajumecovënëtsianabeje xua pavajëtimebeje.

²⁰ Tsipaji itsajota anijajivibeje, acueyabi ata, nacaetuata, tanejume-covēnētsivi, bajarajota xanē bajarapamonae yajavaecaenajē, jai Jesús pija-jivijavabelia.

²¹ Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenē, panetsipaebame rabaja. Panejumaitsimē mapacueniaje: “Itsajivi Dioso pejumecovēnētsijivi pibisiacuene itsa pacaexanaena, pajamatabēcaevianame. Barajamatabēcuenexanepanaeya pataename. Itsa pavēnēlivaisitaename pibisiacuene papecatoexanaejava, xaniavaetsia payanijobianame caenējavata. Nexata xaniavaetsia itsa panabarēcuaiacuajamēbeje, panabarajamatabēcuene xanepanaenamebeje,” panjamē. ¿Detsa xuabeje pibisiacuene nexanae ata, pibisiacuene netoexanae atanua, jamatabēcaevianajē barajamatabēcuenexanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

²² Jesús nexata jumaitsi Pedrojavabelia:

—Siete xuabejenexa yabara apo jumaitsinē. Biji rajane siete pasentabeje pibisiacuene pacaexanae ata, pibisiacuene pacatoexanae atanua, pajamatabēcaevare barajamatabēcuenexanepanaeya panetaenexa, baitsi cuatro-cientos noventa xuabeje ata, jai Jesús Pedrojavabelia.

Ponē apo jitsipa pebarajamatabēcuenexanepanaenexa itsanējavabelia yabara pelivaisi

²³ Jesús livaisi tsipaeba comparacióncuenia pijajivijavabelia. Jumaitsi mapacueniaje:

—Dioso pijanacuatatsia pijajivijavabelia exanaena pacuenia nacuaevevtsinē pijajivijavabelia baexana. Nacuaevevtsinē jitsipa piamoneyabivitsi pematamotsinexatsi xua amoneyabatsi.

²⁴ Nexata itoroba pijajivi petotsipaebaponaenexatsi daxita pamonae amoneyabatsi. Nexata pijajivi tobarēparenatsi ponē bitso ayajava amoneya-batsi, baitsi millones de pesos piamoneyabinētsi.

²⁵ Nexata bajaraponē apo xainae pematamotsijavanexatsi. Nexata nacuaevevtsinē itoroba pijajivi. Jumaitsi: “Mara ponē bitso ayajava nia-moneyabaje. Nexata pacanajetaxuabianame dajubicuenia itsamonaejavabelia amoneya petonacuenebaponaenexa daxitamatacabijavabelianexa. Daxita pexi, pijava ata, pecobcovē ata yajava, pacanajetaxuabianame. Bajarapacuenia pitsianajē tsiquirijavayo ata taneamoneyabijavamatamo,” jai nacuaevevtsinē pijajivijavabelia.

²⁶ Nexata ponē amoneyaba, nacuaevevtsinē pitabarata pematatabcabēta nucajunua. Pinijicuenia vajēta nacuaevevtsinējavabelia. Jumaitsi: “Nejamatabēcueneevere abaxē. Camatamotsianatsi rabaja daxita xua camoneya-batsi,” jai.

²⁷ Nexata nacuaevevtsinē itaxutotsoniatane piamoneyabinētsi. Nexata nacuaevevtsinē jumaitsi piamoneyabinētsijavabelia: “Daxita rabaja tanea-moneyabijavamē, iquinajē. Nexata baja apo nematamotsimē tsane,” jai nacuaevevtsinē piamoneyabinētsijavabelia. Bajaraxuacujinae copata baja penaviatsinexa.

²⁸ Nexata bajaraponē penaviatsinexa, ajena pitsapalia nacuaevevtsinē pijabovēcuca, caxitajarabaxuaba itsanē penajuanacuenebabiabinēbeje nacuaevevtsinē pijajava. Bajaraponē nexata jamatabējumaitsi: “Maponē tsiquirijavayovajēto niamoneyabi ataje, yanijobianajē tanematamotsinexa,” jamatabējai. Nexata cuibocamisavaetaba. Cuibocuetasaca asaēyata. Jumaitsi bajaraponējavabelia: “Nematamore taneamoneyabijavamē,” jai.

²⁹ Nexata piamoneyabinētsi bajaraponē pitabarata pematābacabēta nucajunua. Piniijucuenia vajēta. Jumaitsi: “Nejamatabēcueneevere abaxē. Camatamotsianatsi raja itsiata daxita xua camoneyabatsi,” jai.

³⁰ Itsiata baitsi jane bajaraponē piamoneyabinētsi apo itaxutotsoniatae. Barēpona baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi.

³¹ Nexata nacuaevevtsinē pijajivi itsa tane bajarapacuenia pexanaejava penajua nacuenebabiabinēbejejavabelia, bajarapamonae bitso najamatabēxaina. Nexata nacuaevevtsinē pijajivi ponalia petsipaebinexa bajaraxua pijatuxanenējavabelia.

³² Nexata nacuaevevtsinē pijajivi itsa tsipaebatsi, itoroba icatsia pijajivi petojunatsinexatsi bajaraponē. Nexata itsa tocapatatsi, nacuaevevtsinē jumaitsi bajaraponējavabelia: “Niamatabēcuenebejenē baja rovia. Catoiquinatsi rabaja picani taneamoneyabijavamē. Tsipaji pinijucuenia nevajētame.

³³ Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinē,” jai nacuaevevtsinē.

³⁴ Nexata nacuaevevtsinē bitso baranaešana millones de pesos piamoneyabinētsijavabelia. Nexata nacuaevevtsinē jumaitsi pijajivijavabelia: “Bajaraponē pacaponae remelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena ēpematamoveretsijavabelianexa daxita taneamoneyabijava,” jai nacuaevevtsinē, jai Jesús pijajivijavabelia.

³⁵ Jesús icatsia jumaitsi pijajivijavabelia:

—Bajara pijinia pacuenia paxamē ata taxa, athēbētatsia peecaenē, pacaexanaena, itsa apo pajamatabēcaevimē tsane panebarajamatabēcuene xanepanaenexa pamonae pacaitsacueniaba, jai Jesús pijajivijavabelia.

19

Pacuenia Jesús jivi livaisi tsipaeba penacojobinē pijava pexuabiyanima yabara pelivaisi

(Mr 10.1-12; Lc 16.18)

¹ Jesús pijajivi pemuxujobicujinae pebarajamatabēcuene xanepanaenexa itsamonae itsacueniabi atatsi, Jesús baja pona Galilea nacuavecua. Jesús nexata pata Judea nacuyabelia, Jordánmene itsapanabelia.

² Jivi ayaibitsaētoخانeto pēnaponatsi. Bajarajotalia Jesús jamatejemayaexana pivitanevi.

³ Nexata fariseovi Jesús imoxoyorenatsi. Jamatabēcueneējēbiaya yanijobatsi. Jesús bijiaya itsa jumecnaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojobinē pijava pexuabinexa itsacuenejavayo ata yabara? jai fariseovi.

⁴ Jesús nexata jumaitsi fariseovijavabelia:

—¿Apo palebimē tsipaji paneyapētaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava.

⁵ Nexata Dioso pejumelivaisibaxutota jumaitsi mapacueniaje: “Pebi itsa nacojoba pijavajavabelia, banatsata paxavecua, pena atavecua. Nexata Dioso tane anijajivimibeje becaejivi,” jai Dioso pejumelivaisibaxutota.

⁶ Nexata Dioso apo tae beanijajivibeje. Becaejivi saya tane Dioso. Baraxuata itsanë ata apo bexuabi pijava. Tspijaji Dioso pejamatabëcueneta napitsiaexanatsibeje, jai Jesús fariseovijavabelia.

⁷ Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinë copata penacojiobinë petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

⁸ Jesús nexata jumaitsi fariseovijavabelia:

—Paneajamatabëcuenetajaxae, Moiséspijinë pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejevaveliacujinae, apo tocopatsi picani bajarapacuenia pexanaenexa.

⁹ Nexata mapacuenia pacatsipaebianatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Nexata pijava pexuabinë itsa nacojioba icatsia itsavajavabelia, bajaraponë pibisiacuene exana pevitota. Tspijaji pepo pijavavecuja jaita itsava. Dioso cajena abaxë bajaraponë pexuabiva pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Tspijaji itsanë pijavami pita, pova abaxë Dioso totanetsi itsanë pijavacuenia, jai Jesús fariseovijavabelia.

¹⁰ Nexata Jesús pijajivi jumaitsi Jesúsjavabelia:

—Itsa bajarapacuenia pebi apo tocopatsitsi itaxutojema pijava pexuabinexa, nexata meta baja apo benacojiobi, jai Jesús pijajivi.

¹¹ Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinë. Itsiata nejumeyapëtaena pamonae Dioso jamatabëcueneyavenonatsi.

¹² Apo caejamatabëcuene raja xua yabara pebijivi apo nacojiobi. Itsamonae penabejenaenë naexana. Nexata apo caëjëpaetsi penacojiobijava. Itsamonae jivi pejamatabëcueneta bepenabejenaenëcuenia exanatsi. Nexata apo caëjëpaetsi penacojiobijava. Itsamonae ëDioso pijacuene petonacuenebinexa, apo nacojiobi. Nexata ponë jamatabëcuenecaëjëpatsi nacojiobinejeva peponaponaenexa ëDioso pijacuene petonacuenebinexa, bajaraponë nejumecovënëtsi, jai Jesús pijajivijavabelia.

Pacuenia Jesús jumaitsi pejevaxijivixijavabelia yabara pelivaisi (Mr 10.13-16; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pecobeta pejayataponenexa. Petovajëtsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeaebinejeva, xaniavaetsia bajumecovënëta palivaisi tsipaebatsi. Nexata pamonae jitsipa pejonejaya Dioso pijanacuayabet-sia, bajara pijinia pacuenia jumeaebinejeva, xaniavaetsia bejumecovënëta Dioso pejumelivaisi, jai Jesús pijajivijavabelia.

¹⁵ Jesús nexata pecobeta jayatapona pejevaxijivixi, caejiviyo canacujitsia. Baraxuacujinae Jesús baja pona bajarapanacuavecuja.

Pacuenia pevëjëato, bitso pexainaenë, cuaicuajjai Jesúsjavabelia yabara pelivaisi

(Mr 10.17-31; Lc 18.18-30)

¹⁶ Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexanicuene, exanaenäjë taxainaenexa matabacabi apo pevereverecejava? jai pevëjëato.

¹⁷ Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa jitsipame nexainaenexa matabacabi apo pevereverecejava, jumecovënëre pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

¹⁸ Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianäjë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecua. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame.

¹⁹ Axa yayyataema. Ena ata yayyataema. Asivamëre itsajivi ata pacuenia xamë nijacuata nasivamë,” jai Dioso pejumelivaisibaxutota, jai Jesús pevëjëatojavabelia.

²⁰ Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua netosaica abaxë taexanaenexa? jai pevëjëato.

²¹ Nexata Jesús jumaitsi pevëjëatojavabelia:

—Itsa jitsipame pepacue nejamatabëcuenexanepanaejava, nejamatabëcuenevitsabijavanua, nexata ponare. Canajetsianame daxita xua xainame. Bajarapamatamomi tsicobetsanaename bepejiobivi. Nexata bajarapacuenia xainaname bitso nexainaejava Dioso pijanacuatsia. Bajaraxuacujinae nepënaponaename, jai Jesús pevëjëatojavabelia.

²² Nexata pevëjëato itsa jumetane bajarapacuenia Jesús pejumaitsiyava, najamatabëxainaejava baja vecuapona Jesús. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba.

²³ Nexata pevëjëato pecovëta Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Ponë bitso daxitacuene pexainaenë, tsiayapëbejetsi bitso penajamatabëcuenecopatsinexa Diosojavabelia pecapanepaenexatsi Dioso pijanacuayabetsia.

²⁴ Icatsia matavëjëa pacajumaitsi. Pacuenia camello acuenebi pejonejava palutaetoitaxutovojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia, jai Jesús pijajivijavabelia.

²⁵ Jesús pijajivi itsa jumetane bajarapacuenia Jesús pejumaitsiyava, bitso jamatabëcuenenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

²⁶ Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caējēpaetsi pijacuata penacapanepaenexa Diosojavabelia. Caenē Dioso caējēpatsi. Dioso raja caējēpatsi daxitacuene pexanaenexa, jai Jesús pijajivijavabelia.

²⁷ Nexata Pedro jumaitsi Jesúsjavabelia:

—Patajatuxanenē, paxanē rabaja pacopatajē daxitacuene pataxainaejavami. Nexata baja pacapēnainavanapatsi. ¿Detsa xua meta panerajutsiana? jai Pedro Jesúsjavabelia.

²⁸ Nexata Jesús jumaitsi pijajivijavabelia:

—Xaniajanē pacuenia pacatsipaebijitsiatsi. Pamatacabi daxitacuene pejanajava icatsia naexanaena, xanē, Daxitajivi Pematapijinēnē, ecaenajē tronovēnējavata taevetsinexa daxitajivi. Bajaramatacabi paxamē ata, doce paponēmēbeje patanepēnainavanapaevimē, paenaename, pacanenēmē canacujitsia, panijatronota vajanajuaevetsinexa xua evetsianajē. Nexata paxamē paenaename jueznēcuenia panenaneconitsiaexanaenexa pijaneconi pexainaevi. Pananeconitsiaexanaename Israelpijinēmi pexi, doce paponēmēbeje, pemomoxi.

²⁹ Daxita pamonaē tajamatabēcueneta pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijairanē ata, Dioso nexata bajarapamonae rajutsianatsi ayaijava bitso pepuenetsijavanēmi matatoxenetsia. Caejavayomijamatabēcueneta tsaponae, rajutsianatsi cien xuabeje tsaponae pevājēnaeyabelia. Rajutsianatsinua matacabi apo pevereverecaēja.

³⁰ Pamonaē aeconoxae mapamatacabitaje ayaijamatabēcueneta tanetsi, bajarapamonae itsamatacabi Dioso beveliajamatabēcueneta exanaenatsi. Pamonaē pijinia mapamatacabitaje beveliajamatabēcueneta tanetsi, bajarapamonae itsamatacabi Dioso ayaijamatabēcueneta exanaenatsi, jai Jesús pijajivijavabelia.

20

Pacuenia Jesús livaisi tsipaeba pabi pexainaenē petonacuenebivitsi najēpaeya pematamotsijava pelivaisicuenia yabara pelivaisi

¹ Icatsia Jesús jumaitsi pijajivijavabelia:

—Aeconoxae Dioso pejumelivaisi comparacióncuenia pacatsipaebianatsi patanejumeyapētaenexamē. Dioso pijajivi pematamotsijava pijanacuatsia, jēpa mapalivaisije. Pabixaneto pexainaenē ponapona. Ajena matacabi tsarucaponae, naropota jivi pejaitsinē petonacuenebinexatsi uvavēnējava peubipabita.

² Caxitajarabaxuaba baja nexata jivi. Junata petonacuenebinexatsi. Caematacabi matamotsiapaeba caedenario. Jejai nexata bajarapamonae. Nexata itoroba pijapabiabelia petonacuenebinexatsi.

³ Bajaraxuacujinae juameto baja tajē ita rucaina, a las nueve, naropota icatsia. Taenuba tomara tuatujēta pebijivi, saya jema pejinavanapaevi.

⁴ Nexata jumaitsi bajarapamonaejavabelia: “Paxamē ata paponaremelia tajapabiabelia. Panetonacuenebianame. Pacamatamotsianatsi raja xaniavaetsia,” jai pabixainaenē.

⁵ Nexata bajarapamonae ata ponalia petonacuenebinexatsi. Bajaraxuacujinae, matonejeepatota, junata icatsia itsamonae. Bajarapamonae ata ponalia petonacuenebinexatsi. Bajaraxuacujinae, bejamatabēcueneta a las tres, junata icatsia itsamonae. Bajarapamonae ata ponalia petonacuenebinexatsi.

⁶ Bajaraxuacujinae, caniviyo, bejamatabēcueneta a las cinco, pabixainaenē icatsia pona tomara tuatujēareca. Caxitajarabaxuaba icatsia pebijivi,

saya jema pejinavanapaevi. Nexata pabixainaenē jumaitsi bajarapamonaejavabelia: “¿Detsa xuajitsia saya daxitamatacabi pajinavanapame panacuenebinejevamē?” jai.

7 Nexata bajarapamonae jumaitsi: “Tsipaji itsajivi ata apo panejunatsi patatonacuenebinexa,” jai. Nexata pabixainaenē jumaitsi: “Paxamē ata paponaremelia tajapabiabelia patanetonacuenebinexamē. Pacamatamot-sianatsi raja xaniavaetsia,” jai pabixainaenē. Nexata bajarapamonae jejai. Ponalia petonacuenebinexatsi.

8 Nexata baja juameto itsa tabujuniya, pabixainaenē jumaitsi pijajivitonējavabelia: “Junare baja tanetonacuenebivi. Matamobare baja. Copiaya matamobare pamonaepapacotocaevi pejonevi. Pamonaepapacopiaya pejonevi cotocaevi matamobianame,” jai pabixainaenē pijajivitonējavabelia.

9 Nexata pamonaepapacotocaevi junua a las cinco penacuenebinexa, parena pematamobinexatsi. Nexata caenē canacujitsia matamobatsi caedenario.

10 Nexata daxita pamonaebajayacunua pepacopiaya junua penacuenebinexa, pepacotocaevi juya parena pematamobinexatsi. Nexata bajarapamonae jamatabējumaitsi: “Caedenario meta pematatsēnēa vaxaitsi nacamatamobiana. Tshipaji copiaya vaxaitsi junuatsi vajanacuenebinexa,” jamatabējai bajarapamonae. Itsiata baitsi jane bajarapamonae ata, caenē canacujitsia, matamobatsi caedenario tsaponae.

11 Nexata bajarapamonae penacuenebimatamo baja itsa nota, baraanaepana pabixainaenējavabelia.

12 Jumaitsi bajarapamonae: “Mapamonae cotocaevi pepatsivi, nacueneba saya caehora. Paxonē baja rovia ayaicuenia panacuenebajē. Icotia daxitamatacabi panetsajava. Itsiata mapamonae matamobame pacuenia panematamobame,” jai bajarapamonae.

13 Itsiata baitsi jane pabixainaenē jumaitsi bajara pamonaeyajuvēnējavabelia: “Itsacunejavayo ata pibisiacuene apo pacaexanaetsi. Patacajunatsijavata patanetonacuenebinexamē, caedenario pacatsipabatsi patacatamatotsinexa patanetonacuenebimatamomē. Nexata baja bajarapacuenia pacarajutatsi.

14 Panijamatamo baja papitame. Paponare baja panijabonējavabelia. Pamonaepapacotocaevi junua tanetonacuenebinexa, bajarapamonae ata matamobajē pacuenia pacamatamobatsi. Bajarapacuenia matamobajē pacuenia xanē jitsipajē.

15 Tajapalataxae, netoxanepana pacuenia jitsipajē tarajutsinexa. ¿Pacobeceabame tsaja bajarapamonae ayaijava tarajutsixae? jai pabixainaenē petonacuenebivitsi yajuvēnējavabelia.

16 Bajara pijinia pacuenia Dioso ata, pacuenia jitsipa, exanaena pijajivijavabelia. Pamonaemapanacuata ayaijamatabēcuenevi tanetsi, bajarapamonae itsamatacabi Dioso beveliamatabēcuenevi exanaenatsi. Pamonaepijinia mapanacuata beveliamatabēcuenevi tanetsi, bajarapamonae itsamatacabi Dioso ayaijamatabēcuenevi exanaenatsi. Bajarapacuenia Dioso exanaena tsipaji picani jivi ayaiBITSaēttoxaneto Dioso junata. Itsiata bajarapamonae yajuvēnēvi, caejiviyobeje saya, Dioso jumecovēnēta, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavexatsi yabara pelivaisi

(Mr 10.32-34; Lc 18.31-34)

¹⁷ Jesús pona Jerusalén tomarabelia. Nexata Jesús, pijajivi ayaibitsaëto yajava, najetaruca namutua, itsamonae yajava. Nexata bajarapamonaeve-cua ëpijajivi, doce ponëbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

¹⁸ —Panejumetaema. Mara Jerusalén tomarabelia ponatsije. Bajara-jotalia xanë, Daxitajivi Pematapijinënë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judiövi pecujarubivi pecobeyabelia ata. Nexata xanë neneconitsiana tanebeyaxu-abinexa.

¹⁹ Bjaraxuacujinae icatsia necanajetsiana itsanacuaverena pepatsivi pecobeyabelia. Bajarapamonaecanecaponaena. Nejumatitibabena penaneconitsivi pejumacunitabiabimacata. Bjaraxuacujinae cruzajavabelia necobematabiarubiansiana tatëpaenexa. Itsiata baitsi jane tanebeyaxu-abicujinae, acueyabi matababita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Santiagobeje Juanbeje pena vajëta Jesúsjavabelia pexaniacuene petoexanaenexatsi yabara pelivaisi
(Mr 10.35-45)

²⁰ Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje Jesúsjavabelia. Bajarapova pematatabacabëta nucajunua Jesús pitabarata. Vajëta pexaniacuene petoexanaenexatsi.

²¹ Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxënatobeje nemuxuneneta penaecaenexabeje panenajuaevevtsinexa. Itsanë tocopatsianame necujanenia peecaenexa. Itsanë tocopatsianame netsavenonenia peecaenexa, jai bajarapova Jesúsjavabelia.

²² Nexata Jesús jumaitsi Santiagobeje Juanbejejavabelia:

—Paxamëbeje apo payapëtaemëbeje xua pavajëcaeyaexanamebeje ena xanëjavaberena. ¿Pacacaëjëpabeje tsaja panenacaevevtsinexabeje papecabejibiaexanaenexabeje pacuenia xanë nacaevetsianajë tanebejiobiaexanaenexa? ¿Pacacaëjëpabejenua tsaja panenacaevevtsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitsiibeje:

—Jãjã, panecaëjëpabeje cajena, jaiibeje.

²³ Nexata icatsia Jesús jumaitsi Santiagobeje Juanbejejavabelia:

—Paxaniajamëbeje rabaja. Paxamëbeje pacabejiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. Itsiata baitsi jane xua panevajëtamëbeje panenacaenexabeje, itsanë tacujanenia, itsanë tatsavenonenia, bajaraxua Dioso apo netocopatsi patacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

²⁴ Nexata diez ponëbeje Jesús pijajivi vënëtane pepëya bajaraxua Santiagobeje Juanbeje Jesúsjavabelia pevajëcaejavabeje. Nexata bajarapamonaecanecaponaena Santiagobeje Juanbejejavabelia.

²⁵ Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaë jina-
vanapa pevetsinacuanëjava. Nexata bajarapanacuanë pevetsivi ayajja-
matabëcuenevi nataeyabiaba. Xua jamatabëitoroba pevetsinacuanëjava peji-
navanapaevi petoexanaenexatsi, ajumesaëya itorobabiaba petoexanaenex-
atsi.

²⁶ Pëtsa paxamë bajarapamonae cuenejëpaeya bajarapacuenia paexaname
itsamonaëjavabelia. Biji rajane ponë paxamëyajuvënënë jitsipa ayajja-
matabëcuenenë penaexanaenexa daxita paxamëvecua, bajaraponë daxita
paxamë bepanijajivitonëcuenia bepacayavenonabiaba.

²⁷ Ponë paxamëyajuvënënë jitsipa penaexanaenexa papecanamat-
acaitorobinënexa, bajaraponë daxita paxamë bepanijajivitonëcuenia
bepacayavenonabiaba.

²⁸ Tsipaji rabaja xanë ata, Daxitajivi Pematapijinë atanë, apo patajopaenë
jivi tanevavenonaenexa. Biji rajane xanë patajopajë tayavenonaenexa
daxitajivi. Patajopajë tasivatëpaenexa jivi ayabit-saëto-xaneto pibisiacuene
pexanaeneconimi taneconimatamotsinexa, jai Jesús pijajivijavabelia.

*Pacuenia Jesús itaxutoxanepanaeyaexana bitso pitaxutotsëcënaenëbeje, apo
petaenëbeje, yabara pelivaisi*

(Mr 10.46-52; Lc 18.35-43)

²⁹ Jesús, pijajivi yajava, pitsapa Jericó tomaravecua. Nexata jivi ayabit-
saëto pënaponatsi.

³⁰ Panamutojava Jesús najetaruca, bajarapanamutojavata ecabeje
bitso pitaxutotsëcënaenëbeje, apo petaenëbeje. Nexata bajaraponëbeje
itsa jume-tanebeje bajarapanamutua imoxoyo Jesús penajetarucajava,
vavajai-beje tsecae.

—Jesús, Davidpijinë pemomomë, paneitaxutotsioniatamabeje! jai-beje
tsecae pitaxutotsëcënaenëbeje.

³¹ Jivi picani jumeitavetatsibeje pemoyanexabeje tsecae. Itsiata biji bit-
soyo orijibia vavajai-beje tsecae.

—Jesús, Davidpijinë pemomomë, paneitaxutotsioniatamabeje! jai-beje
tsecae Jesúsjavabelia.

³² Nexata Jesús muxunanucojopa. Junata pitaxutotsëcënaenëbeje. Jesús
jumaitsi bajaraponëbejejavabelia:

—¿Detsa xua pajitsipamebeje patacaexanaenexabeje? jai.

³³ Nexata bajaraponëbeje jumaitsibeje Jesúsjavabelia:

—Jesús, pajitsipajëbeje pataitaxutoxanepanaejavabeje, jai-beje tsecae.

³⁴ Nexata Jesús itaxutotsioniatane bajaraponëbeje. Jesús itaxutojayata
bajaraponëbeje. Bajarajota caecuenia bajaraponëbeje itaxutoxanepanabeje
baja. Nexata bajaraponëbeje Jesús pepëta naponabeje.

21

Pacuenia Jesús pata Jerusalén tomarata yabara pelivaisi

(Mr 11.1-11; Lc 19.28-40; Jn 12.12-19)

¹ Jesús baja pijajivi barëimoxoyotanajetaruca Jerusaléntomara. Barëpata
baja Betfagé tomarata. Patsutojumata nubena olivonaenë, bajarapats-
toyenepanata eca Betfagétomara. Nexata Betfagé tomarata Jesús jumaitsi
pijajivitonëbejejavabelia mapacueniaje:

² —Paponarebeje mapatomarayo ecaliajejavabelia. Bajarajotalia,
ajena papatsiaremeliabeje, pataenutsianamebeje burro pecëtanutsinëtsi,

pexēnatonēyo yajava. Paisinaenamebeje bajarapaburrobeje. Payamaēyacarenamēbeje tsane.

³ “¿Detsa xuajitsia burrobeje paisinamebeje?” itsa pacajaibeje tsane it-sajivi, nexata pajumaitsimēbeje tsane: “Vajatuxanenē raja namatavenona. Aeconoxae raja icatsia canaviatsiarena,” pajamēbeje tsane, jai Jesús pijajivi-tonēbejevavelia.

⁴ Bajarapacuenia Jesús itsa jumaiti, tocopiapatatsi jane baja pacuenia Diosojumepaebinēmi profetanē bajayata tajēvelia yaquina Jesús pepatsi-javanexa yabara Jerusalén tomarata. Jerusalén tomarata Jesús pepatsi-javanexa yabara, profetanēmi bajayata peyaquinaelivaisita jumaiti ma-pacueniaje:

⁵ Pajumaitsimē tsane Jerusalén tomarapijivijavavelia: “Pataename pepo paneevetsinē paxamējavaberena penajetarucajava. Beveliajamatabēcuenenēcuenia najetarucaena. Pejanaburroyota yapatanajetarucaena,” pajamē tsane Jerusalén tomarapijivijavavelia, jai bajayata tajēvelia profetanēmi peyaquinaelivaisita Jerusalén tomarata Jesús pepatsijavanexa yabara.

⁶ Nexata Jesús pijajivitonēbeje liabeje. Jumecovēnētabeje pacuenia Jesús itorobatsibeje.

⁷ Yamaēya carenabeje burro, pexēnatonēyo yajava. Nexata bajarapabur-robeje Jesús pijajivi tsijumajeba pijacama,” pajamē tsane Jerusalén tomara-pijivijavavelia,

jai bajayata tajēvelia profetanēmi peyaisajumavelia penaxatabijavanē. Jesús yanajetaruca burrota.

⁸ Panamutuarena Jesús najetaruca, bajarapanamutuarena jivi ayaibit-saētoxaneto, pijacamisajumavelia penaxatabijavanē, Jesús pevajēnaeya namutua yerequejebapona. Itsamonae naemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yayiataeya pecopiapitsinexatsi.

⁹ Jesús penajetarucajavata jivi ayaibitsaētoxaneto Jesús pevajēnaeya namataxainaeja najetarubena. Itsabitsaētoxaneto Jesús pecovēya cotocaevana-jetarubena. Daxita bajarapamonae vavajai tsanajetarubena. Jumaiti tsanajetarubena:

—¡Dioso yavenonaenatsi maponēje, pepo nacuaevevetsinēmi Davidpijinē pe-momo! ¡Dioso yavenonaenatsi maponē najetarucaje nacua pevetsinēnexa Dioso pejamatabēcueneta! Nexata vaxaitsi pexaniajamatabēcuenē rajutatsi Diosojavavelia, jai tsanajetarubena bajarapamonae.

¹⁰ Nexata Jesús itsa pata Jerusalén tomarata, daxita Jerusalén tomarapijivi jamatabēcuenenabenajaca. Nexata nayanijoba.

—¿Detsa meta maponē najetarucaje? najai bajarapamonae.

¹¹ Nexata jivi jumaiti:

—Jesús ra manajetarucaje, Diosojumepaebinē profetanē. Galilea nacuata peecaetomara, Nazaret tomarapijinē, jai bajarapamonae.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi (Mr 11.15-19; Lc 19.45-48; Jn 2.13-22)

¹² Jesús itsa pata Jerusalén tomarata, joneya templobotalia. Nexata templobota Jesús tane pecanajetabiabivi, pecomuacaevinua. Nexata daxitaiti:

—Jesús ra manajetarucaje, Diosojumepaebinē profetanē. Galilea nacuata peecaetomara, Nazaret tom bajarapamonae Jesús pitsapaeyaexana

templobovecua. Palata pecambiababiabivi ata pijamesanēmi Jesús topēñeyorobajaraba. Ucucu pecanajetabiabivi ata penabiabijavanēminua topēñeyorobajaraba.

¹³ Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajēvelia jumaitsi mapacueniaje: “Tajabo raja jivi xanējavaberena penavajēcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamē yamaxēitojorobiaya panenacobetoxotsinexa panacaeuatabi-abame mapabotaje, jai Jesús templobota pecanajetabiabivijavabelia.

¹⁴ Bajarajota templobota Jesús imoxoyorenatsi pitaxutotsēcēnaevi, pejayuyajunaevinua. Nexata Jesús bajarapamonaexanepanaeyaexana.

¹⁵ Templobota nubena sacerdotevi. Nubena judíovi pecujarubivinua. Bajarapamonaexanepanaeyaexanaeva pejayuyajunaevi. Taenubenana Jesús pexanepanaeyaexanaeva pejayuyajunaevi. Jumetaenubenana pejevaxi templobota pevavajaijavata pejumaitsijava Jesús yabara: “¡Dioso yavenonaenatsi maponēje, pepo nacuaeetsinēmi Davidpijinē pemomo!” pejaijava Jesús yabara. Bajaraxuata sacerdotevi baranaepanatsi Jesús. Judíovi pecujarubivi ata baranaepanatsi Jesús.

¹⁶ Nexata bajarapamonaexanepanaeyaexanaeva Jesúsjavabelia:

—¿Tsipaji apo jumetaemē mapapejevaxi xamē yabara pejumaitsaponaevajave? ¿Apo necajumeitavetsi? jai.

Nexata Jesús jumaitsi bajarapamonaejavabelia:

—Jājā. Jumetaniji picani. Itsiata apo jumeitavetsinē. ¿Paxamē tsipaji Dioso pejumelivaisibaxuto apo palebimē paneyapētaenexa pacuenia tajēvelia jumaitsi xanē yabara bajarapapejevaxi pevavajaijavaneva? Dioso pejumaitsijava xanējavaberena, tajēvelia Dioso pejumelivaisibaxutota jumaitsi mapacueniaje:

Pejevaxi, mítóapaenacuetoxi ata, naxēanaeyaexanaename penaxēanaevavata xamējavaberena pecajumaitsinexa: “Ayaijamatabēcuenenēmē bito,” pecajainexa,

jai Dioso pejumelivaisibaxutota xanējavaberena Dioso pejumaitsijava. Bajaraxuata mapapejevaxije jumaitsi bajarapacuenia, jai Jesús sacerdotevijavabelia, judíovi pecujarubivijavabelia ata.

¹⁷ Nexata baja Jesús bajarapamonaevavecua pona. Jerusalén tomaravecua pitsapa. Navialia Betania tomarayojavabelia. Nexata Jesús Betania tomarayota majita.

Pacuenia Jesús bijataenuta higeranae piacuaijibixae yabara pelivaisi (Mr 11.12-14, 20-26)

¹⁸ Jesús pijajivi Betania tomarata pebarēmajitsicujinae, meravia pitsijavata, bajayacunua, Jesús pijajivi barēlia icatsia Jerusalén tomarabelia. Jesús nexata namutua penajetaruaevavata, piajani.

¹⁹ Jesús nexata taenuta higeranae namuto muxuneneta. Nexata Jesús imoxoyolia higeranae, pecuai itsa xaina, pexaenexa. Pecuai itsiata apo xaina higeranae. Ēpexaxu saya tsanucuae. Bajaraxuata nexata Jesús jumaitsi higeranaejavabelia:

—¡Xamē baja apo nacuaitsimē tsane! jai Jesús.

Bajarapacuenia Jesús pejumaitsijavata, bepimia higeranae tēpanajereca yatabutopaya.

²⁰ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi nayanijoba.

—¿Detsa pacuenia maponae bepijia tēpanajerecaje? najai.

²¹ Nexata Jesús jumaitsi pijajivijavabelia:

—Xaniajanē pacuenia pacatsipaebijitsiatsi. Itsa pajamatabējumaitsimē tsipae Dioso yabara: “Dioso nejumecovēñetsiana xua vajētsianajē Diosojavabelia,” itsa pajamatabējamē tsipae, nexata paxamē ata pacacaējēpaejitsipa paneexanaenexa pacuenia exanajē mapahigueranaejavabeliaje. Itsiata ēbajarapacuenē paneexanaenexa, apo pacacaējēpae tsipae. Pematatsēñēa itsacuenējavāñēna paneexanaenexa, pacacaējēpaejitsipa. Nexata itsa pajumaitsimē tsipae mapatsutojavabelia ataje: “Natixire majotavecuaaje. Pucaxanetojavabelia jopare,” itsa pajamē tsipae, pacajumecovēñetsipa. Nexata mapatsuto ataje paneitorobicuenia pacajumecovēñetsipa.

²² Nexata daxitacuene xua pavajētsianame Diosojavabelia, pasivajamatabējumaitsimē tsane mapacueniaje: “Xua vajētajē Diosojavabelia, pepacuenē Dioso nejumecovēñetsiana,” pasivajamatabējamē tsane. Nexata xua pavajētsianame Diosojavabelia, Dioso pacajumecovēñetsiana, jai Jesús pijajivijavabelia.

Pacuenia Jesús caējēpatsi daxitacuene pexanaenexa yabara pelivaisi (Mr 11.27-33; Lc 20.1-8)

²³ Jesús junua temploboyalia. Nexata templobota Jesús jivi livaisi tsipae. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonae jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitapame mapatemplobopanbovecaaje? jai bajarapamonae Jesúsjavabelia.

²⁴ Nexata Jesús jumaitsi bajarapamonaejavabelia:

—Xanē copiaya caejumeyo pacayanijobianatsi. Itsa paxamē panejumecanaviatsianame, nexata xanē juya pacatsipaebianatsi ponē nitoroba taexanaenexa bajarapacuenē.

²⁵ ¿Jipatsa jane pejamatabëcueneta Juanpijinē jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

Nexata ēpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovēñetsimē Juanpijinē pepaebilivaisi?” nacajai tsipae.

²⁶ “Jivi raja saya pejamatabëcueneta Juanpijinē jivi bautisabaponapona,” itsa jai tsipaetsi, nexata jivi belia nacabejebijitsipa. Bajarapacuenia nacabejebijitsipa tsipaji raja Juanpijinē yabara daxitajivi sivajamatabējumaitsi: “Juanpijinē raja pepacuenē Diosojumepaebinēmi,” sivajamatabējai, najai sacerdotevi, judíovi pijaancianovi yajava.

²⁷ Nexata saya bajarapamonae jumaitsi Jesúsjavabelia:

—Apo payapētaenē ponē Juanpijinē itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanē ata apo pacatsipaebi tsanetsi ponē nitoroba taexanaenexa bajarapacuenē, jai Jesús.

Pacuenia Jesús jivi livaisi tsipaeba anijanēbeje pexēnatobeje pexainaenē pelivaisicuenia yabara pelivaisi

²⁸ Jesús icatsia jumaitsi sacerdotevijavabelia, judíovi pijaancianovijavabelia ata:

—Panejumecanaējētsianame palivaisi aeconoxae pacatsipaebijitsiatsi. Pebi xaina anijanēbeje pexēnatobeje. Nexata pexēnatojavabelia jumaitsi: “Taxēnato, ajena netonacuenebianame tajauvabacabota,” jai pexēnatojavabelia.

²⁹ Nexata bajaraponē paxajavabelia jumaitsi: “¡Jume! ¡Apo jitsipaenē tanacuenēbijava! jai. Itsiata xuacujinae bajaraponē icatsia najamatabēxaina. Nexata jamatabējumaitsi: “Xanē baja rovia pibisijamatabēcuene najamatabēxainajē. Nexata baja ponajē taxa tatonacuenebinexa,” jamatabējai. Naropota baja penacuenebinē.

³⁰ Bajaraxuacujinae pexēnatobeje pexainaenē pona icatsia itsanē pexēnatojavabelia. Bajaraponējavabelia ata jumaitsi: “Taxēnato, ajena netonacuenebianame tajauvabacabota,” jai pexēnatojavabelia. Nexata jejai itajara pexēnato. Itsiata apo ponae.

³¹ ¿Detsa ponē bajaraponēbejeyajuvēnēnē paxa jumecovēnēta? jai Jesús bajarapamonaejavabelia.

Nexata bajarapamonaē jumaitsi Jesúsjavabelia:

—Copiata ponē paxa itorobatsi, apo jejai ata, itsiata paxa tonacueneba, bajaraponē paxa jumecovēnēta, jai.

Nexata Jesús jumaitsi bajarapamonaejavabelia:

—Xaniajanē pacuenia pacatsipaebijitsiatsi. Bajara pijinia itsane pamonaē copabiana pibisiacuene pexanabiabijavami, pamonaē najamatabēcuene pēnēyorotsiana Diosojavabelia. Impuestomatamo gobierno pejamatabēcuene petomatamoyanijobabiabivimi ata jonena Dioso pijanacuayabetsia itsa najamatabēcuene pēnēyorota Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia itsa najamatabēcuene pēnēyorota Diosojavabelia pibisiacuene pexanabiabijavamivecua. Itsiata baitsi jane paxamē apo pajonemē tsane.

³² Juanpijinē jivibautisabinē patajopa Dioso pejumelivaisi papecatsipaebinexa panenajamatabēcuene pēnēyorotsinexa pibisiacuene paneexanabiabijavavecua. Itsiata paxamē apo pajumecovēnētsimē bajarapalivaisi. Itsiata bajarapalivaisi jumecovēnēta impuestomatamo gobierno pejamatabēcuene pematamoyanijobabiabivi. Petiriavi palata pepitsinexa pevitota pibisiacuene pexanabiabivimi ata jumecovēnēta bajarapalivaisi. Paxamē patae atamē bajarapamonaē pejumecovēnētsijava, itsiata apo panajamatabēcuene pēnēyorotsimē panejumecovēnētsinexa Dioso, jai Jesús bajarapamonaejavabelia.

Pacuenia exana pijamatabēcuenebejevi, itsanē pijauvabacabo petoēvetsivi, yabara pelivaisi

(Mr 12.1-12; Lc 20.9-19)

³³ Icatsia Jesús jumaitsi sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainaenē pijairata uba ayaibacaboxaneto uvavēnējava. Bajaraxuacujinae pijaira matatoyorotsia, ibopanaxanetonē mataropotsia pefaratsijavata, yacaranata. Bajarapayacaranatsijava athēēabetsia apia jivitonē matatoxenetsia. Bajaraxuacujinae irata méthē cueyeta. Nexata pecueyetsimēthējavata exana uvacuubarēmene pecayucabiabijavanexa. Bajaraxuacujinae pijauvabacabo

tuatuajëta exananuta piapiabotsia, penacuaitsimatacabi itsa tonaveretatsi, athëbëyo pevetaabiabeaenexa pijauvabacabo.

'Nexata bajaraponë itsamonae evetsiaexana pijauvabacabo. Uvabacabo pexainaenë jumaitsi petoevetsivitsijavabelia: "Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa," jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuayabelia pona.

³⁴ Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivi. Itoroba petoevetsivitsijavabelia petsicobetsatsinexatsi.

³⁵ Nexata uvabacabo pexainaenë pijajivi uvabacabo petoevetsivitsi totaicansi. Caenë bajarapamonaeyajuvënëne toconibabiatsi. Itsanë pepacuenetobeyaxuabatsi. Itsanë ibotonëta totseconatsi.

³⁶ Nexata uvabacabo pexainaenë icatsia itsabitsaëto pijajivi itorobalia. Bajara icatsia pacuenia exana uvabacabo pevetsivi.

³⁷ 'Nexata uvabacabo pexainaenë itoroba icatsia pexënato jane baja. Uvabacabo pexainaenë jamatabëjumaitsi: "Netoyaiyataena meta taxënato," jamatabëjai.

³⁸ Itsiata baitsi jane uvabacabo petoevetsivitsi uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonaenajumaitsi: "Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane," najai uvabacabo petoevetsivitsi.

³⁹ Nexata icatsia uvabacabo pexainaenë pexënato ata tovaetabatsi. Caponaliatsi bajarapauvabacabo pënëyabelia. Nexata uvabacabo pexainaenë pexënato ata bajarapacuenia icatsia tobeyaxuabatsi, jai Jesús.

⁴⁰ Nexata bajarapalivaisi yabara Jesús yanijoba sacerdotevijavabelia, judiövi pijaancianovijavabelia ata. Jesús jumaitsi:

—Uvabacabo pexainaenë itsa patsiarena, ¿de tsaeta xua exanaena uvabacabo petoevetsivitsijavabelia? jai Jesús bajarapamonaejavabelia.

⁴¹ Nexata bajarapamonaenajumaitsi Jesúsjavabelia:

—Pijauvabacabo raeta pexainaenë apo itaxutotsoniatæ tsane. Nexata verebiabiana bajarapamonaemi pibisiacuenepexanaevi. Nexata icatsia itsamonae evetsiaexanaena bajarapauvabacabo. Nexata uvacuai penaveretsimatacabi bajarapamonaenatsa nota, tscobetsatsianatsi pacuenia baja tocajëtatsi uvabacabo pexainaenë perajutsinexatsi, jai bajarapamonaenajumaitsi.

⁴² Nexata Jesús jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. Vajatuxanenë Dioso raja exanaena bajarapacuenetobeyaxuabatsi. Nexata bitso nacatsita pexaniacuenetobeyaxuabatsi, jai bajarapacuenetobeyaxuabatsi.

'Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi.

⁴³ Nexata pacuenia uvabacabo pexainaenē icatsia itsamonae evetsiaexanaena, bajara pijinia pacuenia Dioso exanaena paxamējavabelia. Xua picani Dioso pacaevetsiaexana, copiarucaena. Nexata juya itsamonae Dioso evetsiaexanaena bajaraxua, pamonae xaniavaetsia jumecovēnēta Dioso pitorobieniatia.

⁴⁴ Pamonaē apo nejumecovēnētsi Dioso pexēnatocuenenē, bajarapamonae bitso bejamatabējiobi tsane apo tanejumecovēnētsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonaē naneconitsiaexanaenājē, bajarapamonae pepacuenē naxuabiana daxitamatacabijavabelianexa. Pacuenia iboto pematacēnēbinētsi apo asaē, bajara itsane, jai Jesús bajarapamonaejavabelia.

⁴⁵ Sacerdotevi penamatacaitorobivi, fariseovi yajava, itsa jumetane bajarapacuenia Jesús pejumaitisijava, bajarapamonae jamatabējumai tsenae: “Vaxaitsi yabara raeta jumaitis,” jamatabējai tsenae bajarapamonae.

⁴⁶ Nexata picani bajarapamonae Jesús jamatabēvaetabatsi. Itsiata bajarapamonae jamatabējumaitis: “Bajaraponē jivi tanetsi Diosojumepaebinēcuene. Nexata nacaitsacueniabijitsipa vaxaitsi itsa vaetabijitsipatsi maponēje,” jamatabējai tsenae bajarapamonae. Bajaraxuata Jesús apo vaetabitsi.

22

Pacuenia Jesús jivi livaisi tsipaeba penacasabifiesta pexanaenē pelivaisicuenia yabara pelivaisi

(Lc 14.15-24)

¹⁻² Jesús icatsia livaisi tsipaeba sacerdotevijavabelia, judiōvi pijaancianovijavabelia ata. Bajarapacuenia Jesús tsipaeba bajarapamonae pepapētaenexa pacuenia itsamatacabi itsijitsia, pamatacabi Dioso pijajivi evetsiana. Jesús jumaitis mapacueniaje:

—Pepo nacuaevevtsinē fiesta exana pexēnato petonacasabifiestanexatsi.

³ Nexata nacuaevevtsinē jumaitis pijajivijavabelia: “Pamonaē baja tajēvelia junatajē, patsipaebare baja tanetopatsinexarena fiestanexa jane baja,” jai nacuaevevtsinē pijajivijavabelia. Pijajivi baja nexata pona petsipaebinexa. Itsiata pejunatsivi apo jitsipae peponaejava. Nexata nacuaevevtsinē pijajivi naviabarena petsipaebinexa pijatuxanenējavabelia.

⁴ Nexata nacuaevevtsinē itsamonae icatsia pijajivi itorobalia pesivaponaeenexalia. Nacuaevevtsinē jumaitis pijajivijavabelia: “Pajumaitsimē tsane tajunatsivijavabelia: ‘Veretejeba rabaja panexaejavanexa. Beyaexana rabaja baca penasitsivi, becerro yajava. Daxita rabaja veretejeba panenabainexa. Naxanitsia. Daxita pina paponaezemelia,’ pajamē tsane tajunatsivijavabelia,” jai nacuaevevtsinē pijajivijavabelia.

⁵ Itsiata baitsi jane bajarapamonae icatsia sivaponae atalia, nacuaevevtsinē pejunatsivi apo jejai. Pejunatsiviyajuvēnēnē itsanē pona pijapabianējavabelia. Itsanē pijinia pona penavijatsinexa.

⁶ Itsamonae nacuaevevtsinē pijajivi taicatsi. Bejiobiaexanatsi pibisiacuenia. Beyejebatsi baja belia.

⁷ Bajaraxuata nexata nacuaevevtsinē bitso baraanaepana pejunatsivimijavabelia. Nexata nacuaevevtsinē itorobalia vajabitsaēvi pebenexa pamonaē tobeyejebatsi pijajivi. Itorobanua pijatamaranēmi ata petotajuitsinexa.

⁸ Bajaraxuacujinae nacuaevevtsinē icatsia pijajivijavabelia jumaitis: “Daxitacuenē baja picani veretejebiaexanaejē taxēnato penacasabifiestanexa. Itsiata baitsi jane tajunatsivimi apo netopatsirena.

9 Paponaremelia pinijicallexanetonējavabelia. Nexata daxita pamonae pacaxitarabaponaename bajarapacallexanetonēja, pajunataponaename taxēnato penacasabifiestajavaberena pepatsinexa,” jai nacuaevetsinē pijajivijavabelia.

10 Nexata nacuaevetsinē pijajivi ponalia. Najetarubena callexanetonēja. Junatapona daxita pamonae caxitarabapona. Junatapona pija-matabēcuenebejevi, pejamatabēcuenexanepanaevi ata. Nexata bajarapamonae barēpona fiesta pexanaebojavabelia. Nexata pabota fiesta exana, vēnēca jivi.

11 Nexata nacuaevetsinē jonena bajarapaboyarena petaenexa petopat-sivitsi. Daxita pamonae topatatsi, jumapata xua banaxataba itsa pona penacasabifiestajavabelia. Nexata nacuaevetsinē taenuta bajarajota itsanē, saicayaviriajava penaxatatsinē. Apo naxatatsi xua naxataba daxita.

12 Nexata nacuaevetsinē jumaitsi bajaraponējavabelia: “¿Detsa xuaajtsia najunuame apo nenaxatatsinē pacuenia daxita naxataba penacasabifiesta-javaberena penajonevi?” jai nacuaevetsinē. Nexata bajaraponē moya nuca.

13 Nexata nacuaevetsinē jumaitsi mesa pevetsivijavabelia: “Maponē pataxucēreje. Pacobecēre yajava. Paxuaremelia bopēnēyabelia, pitaquiri-javabelia. Bajarajotalia nuena. Navonosiniana bitso penavixaetaexae,” jai nacuaevetsinē.

14 Pacuenia fiesta pexanaenē ayaibitsaētoxfaneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibit-saētoxfaneto junata pijajivinexa. Itsiata saya caejiviyobeje jumecovēnētatsi, jai Jesús sacerdotevijavabelia, judíovi pijaancianovijavabelia ata.

Pacuenia Jesús jamatabēcueneējēbiaya yanijobatsi impuestomatamo pe-matamotsijava yabara pelivaisi
(Mr 12.13-17; Lc 20.20-26)

15 Fariseovi nacaetuata penabarēcuaicuaijainexa. Bajarapamonae najamatabēcuenejēpa Jesúsjavabelia jamatabēcueneējēbiaya peyanijobinexa. Nexata Jesús bijiaya itsa jumecanaviata, Jesús picani peneconitsinexatsi nacuaevetsinējavabelia.

16 Nexata fariseovi itoroba pijajivi, Herodes pijajivi yajava, Jesúsjavabelia jamatacueneējēbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabēcueneējēbiaya jumaitsi:

—Jesús, payapētaniji cajena nexaniajaicuenē, xua yabara tsipaebabiabame livaisianē. Pexaniajaicuenē tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamē apo cujunavimē. Apo auramē livaisi netsipaebabiabijava. Nexata daxitajivi najēpaeya livaisi tsipaebabiabame.

17 Panetsipaebare pacuenia najamatabēxainame mapacuenē yabaraje. ¿Xanepana tsaja vajamatamotsinexa impuestomatamo Romanonacua pepo pevetsinējavabelia? Itsa jume, ¿apo xanepana tsaja vajamatamotsinexa? jai bajarapamonae jamatabēcueneējēbiaya Jesúsjavabelia.

18 Itsiata baitsi jane Jesús jamatabēcuenyapētane bajarapamonae jamatabēcueneējēbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—Paneyamaxēitojorobivi, ¿detsa xuaajtsia jamatabēcueneējēbiaya paneyani-jobame?

19 Panetsitajēre pitsipalatanēyota pamatamotabiabame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanēyo.

²⁰ Jesús itsa tane bajarapapalatanëyo, nexata jumaiti bajarapamonaejavabelia:

—¿Jipatsa mapitabaraje, pevënëna, ruca mapapalatanëyomataje? jai Jesús.

²¹ Nexata bajarapamonae jumaiti Jesúsjavabelia:

—Romanonacua raja pepo pevetsinë pitabara, pevënëna, jai.

Nexata Jesús jumaiti bajarapamonaejavabelia:

—Nexata parajutabianame Romanonacua pepo pevetsinë pijajava. Parajutabianame pijinia saicaya Diosojavabelia Dioso pijajava, jai Jesús.

²² Nexata Jesús xaniavaetsia itsa jumecanaviata, bajarapamonae jamatabëcuenenabenajaca bajarapacuenia Jesús pejumaitisjavata. Nexata baja copatatsi Jesús jamatabëcuenejëbiaya peyanijobijavatsi. Naviaba baja bajarapona.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

(Mr 12.18-27; Lc 20.27-40)

²³ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaiti mapacueniaje:

²⁴ —Jesús, Moiséspijinë bajayata vajanacatoyaquinaelivaisi, jumaiti mapacueniaje: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi.

²⁵ Nexata jinavanapa ënacaemonae siete ponëbeje paxanëjavata. Pepo matapijinë copiaya nacojioba. Nexata bajaraponë pijava vecuatëpa pexi xainaenejeva. Nexata pematapijinëmi pepënarucaenë pita pematapijinëmi pijavami.

²⁶ Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatuajëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bajarapacuenia tëpa daxita siete ponëmibeje nacaemonae, bajarapova pepitaponaevi. Itsiana itsanë ata pexi apo xinae bajarapovajavabelia.

²⁷ Bajaraxuacujinae bajarapova ata tëpa baja.

²⁸ “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë bajarapomonaeyajuvënëne pijava tsane bajarapova bajarapamatacabi? Daxita pamonae siete ponëmibeje nacaemonae pitapona picani bajarapovami, jai saduceovi Jesúsjavabelia.

²⁹ Nexata Jesús jumaiti saduceovijavabelia:

—Paxamë saya pajamatëbëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaiti. Apo payapëtaemëna pacuenia Dioso cajëpatsi daxitacuenë pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë.

³⁰ Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojiobinexatsi. Bajarapamonae nacojiobinejeva, jinavanapaena athëbëtatsia pacuenia angelevi jinavanapa.

³¹ Itsa pepacuene paxamë xaniavaetsia paneyanijobame paneyapëtaenexa Dioso icatsia piaseÿaexanaejavanexatsi petëpaevimi, nexata pacatsi-paebianatsi. Paxamë rabaja payapëtaneme pacuenia bajayata Dioso jumaitsi. Abraham baja peputëpae, Isaac ata baja peputëpae, Santiago ata baja peputëpae, bajarapamonae yabara bajayata Dioso jumaitsi Moiséspijinëjavabelia mapacueniaje:

³² “Xanë rabaja abaxë Abraham pijaDiosonë. Isaac ata pijaDiosonë. Jacob ata pijaDiosonë,” jai baja cajena Dioso bajayata petëpaevimi yabara. Bajarpacuenia Dioso pejumaitsixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia, jai Jesús saduceovijavabelia.

³³ Jivi ayaibitsaëtoخانeto itsa jumetane bajarapacuenia Jesús pejumaitsi-
java saduceovijavabelia, jivi bitso jamatabëcuenenabenajaca Jesús petsipae-
bilivaisi yabara.

*Palivaisi bitso jivi bejumecovënëta daxita Dioso pitorobilivaisianë pejume-
covënëtsijava matatoxenetsia yabara pelivaisi*

(Mr 12.28-34)

³⁴ Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vënëtane saduceovijavabelia Jesús xaniavaetsia pejumecanaviatsijava, nexata fariseovi nacaetu-
ata penabarëcuaicuajainexa. Nexata fariseovi najumejaita pacuenia yanijojijitsia Jesúsjavabelia.

³⁵ Nexata fariseoviyajuvënënë, judíovi pecujarubinë, Jesúsjavabelia jamatabëcuenejëbiaya yanijoba. Jumaitsi Jesúsjavabelia mapacueniaje:

³⁶ —Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

³⁷⁻³⁸ Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pe-
jumecovënëtsijava matatoxenetsia, jumaitsi mapacueniaje: “Pasivamëre panijatuxanenë panijaDioso daxita panejamatabëëthëtojavavetsina, daxita panejamatabëcueneta ata, daxita panenajamatabëxainaesaëta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pe-
jumecovënëtsijava matatoxenetsia.

³⁹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta.

⁴⁰ Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaebivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi

(Mr 12.35-37; Lc 20.41-44)

⁴¹ Fariseovi penacaeuatsijavata, fariseovijavabelia Jesús pijacuata nayabarajumaitsi mapacueniaje:

⁴² —¿Detsa pacuenia pasivanajamatabëxainaename Cristo itsa patsianica? ¿Jipatsa pexënato tsane? nayabarajai Jesús pijacuata fariseovijavabelia.

Nexata fariseovi jumaitsi Jesúsjavabelia:

—Davidpijiné pemomo tsane, jai.

⁴³ Nexata Jesús jumaitsi fariseovijavabelia:

—Pajamatabëcuenenavëxaniabame raja. Cristo raja Dioso pexë nato. Bajayata Dioso pejumaitsiyava Cristo yabara, Davidpijiné Espíritu Santo pejamatabëcueneta tajëvelia jumaitsi mapacueniaje:

⁴⁴ Dioso jumaitsi tajatuxanenëjavabelia:

“Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia,

jai bajayata tajëvelia Davidpijiné mapacueniaje Cristo yabara.

⁴⁵ Nexata Davidpijiné bajayata Cristo yabara: “Tajatuxanenë,” itsa jai, nexata Cristo, Davidpijiné apo pemomo. Tsipaji baja cajena saicaya Cristo Dioso pexë nato, nayabarajai Jesús pijacuata fariseovijavabelia fariseovi pecanaëjëtsinexa Cristo Dioso pexë natocuene.

⁴⁶ Nexata itsanë ata fariseoviyajuvënënë Jesús apo jumepitsitsi caejumeyo ata. Bajaraxuacujinae fariseovi, saduceovi ata, cujunava Jesúsjavabelia baja jamatabëcuenëjëbiaya livaisi peyanijobijava.

23

Pacuenia Jesús tsipaeba fariseovijavabelia, judíovi pecujarubivijavabelia ata, bajarapamonae penaneconitsijava Diosojavabelia yabara pelivaisi (Mr 12.38-40; Lc 11.37-54; 20.45-47)

¹ Jesús jumaitsi jivi ayalbitsaëtojavabelia, pijajivijavabelia ata:

² —Judíovi pecujarubivi, fariseovi ata, Dioso tocopatatsi jivi xaniavaetsia peyapëtaeayaxanaponanexa pajamatabëcuenelivaisi xaina Dioso Moiséspijinëta penajumecopatsilivaisimi.

³ Nexata pajumecovënëtsianame daxita pacuenia bajarapamonae pacatsipaebapona. Itsiata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba.

⁴ Palivaisianë ayapëbeje itsajivi ata pejumecovënëtsinexa, bajara-palivaisianë pacatsipaebabiaba panejumecovënëtsinexa. Pamonaë bajarapacuenia pacatsipaeba, itsanë ata bajarapamonae yajuvënënë apo jamatabënajinae pexanaenexa bajarapacuenia.

⁵ Daxita xua bajarapamonae exana, exanabiaba saya jivi petaenexatsi. Bajarapamonae jamatabëjumai tsabiabi: “Bajaraxua itsa exanaenatsi, jivi nacayaiyataena,” jamatabëjai tsabiabi. Bajarapamonae pitapata, pecofiata ata, becajonixicuenia pexanaejavaxita yacajonia cëbarubejebabiaba Dioso-jumelivaisi peyaquinaebaxutoxi. Bajarapamonae itsamonae matatoxenetsia pijajumanavaitabënexa, piapiafleco pijanavatabuyalia cëbarubabiaba. Bajarapacuenia bitso jitsipabiaba pexanabiabinexa.

⁶ Bajarapamonae itsa najunatatsi fiestajavabelia penanabaninexa, nexata jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae itsa najoneyabiaba judíovi penacaetuatabiabilbota, jitsipabiaba penaenexa peyayataevitsi penaenexa petsinubijavanëta.

⁷ Bajarapamonae bitso jitsipabiaba jivi pebajacobinexatsi yayataeya callejaya ata. “Patanecujarubinë,” pejaijavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

⁸ Icatsia Jesús jumaitsi jivi ayalbitsaëtoxanetojavabelia, pijajivijavabelia ata:

—Pëtsa paxamë pajitsipame jivi papecajumaitsinexa paxamëjavabelia: “Patanecujarubinë,” papecajainexa. Tsipaji daxita paxamë bepanacaemon-aemë Dioso panejumecovënëtsivixae. Xanë, caenënë Cristonë, athëbëvetsica Dioso taneitorobinëtsica jivi tacapanepaenexa, panexainame patacacujaru-binënexa.

⁹ Itsanë itsa pacacujaruba, “Axa,” pajamë pëtsa bajaraponëjavabelia. Tsipaji caenë paneaxa paxainame, ponë eca athëbëtatsia.

¹⁰ Pëtsa pajitsipame itsamonae papecajumaitsinexa: “Jivi pevetsinë,” papecajainexa. Tsipaji xanë, caenënë Cristonë, patacaevetsinë.

¹¹ Ponë paxamëyajuvënëne pacavecuayaijamatabëcuenenë, bajaraponë pacayavenonabiaba padaxitamë.

¹² Pajivi daxitajivi matatoxenetsia pijacuata ayaijamatabëcuenejivi natane, bajarapajivi itsamatacabi daxitajivivecua beveliajamatabëcuenejivi Dioso exanaenatsi. Pajivi pijinia daxitajivivecua pijacuata beveliajamatabëcuenejivi natane, bajarapajivi itsamatacabi daxitajivi matatoxenetsia ayaijamatabëcuenejivi Dioso exanaenatsi, jai Jesús jivi ayabitsaëtöxanetojavabelia, pijajivijavabelia ata.

¹³ Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Pacuenia bo babaupaxatata jivi pejonayaniva, bajara bepacuenia paxamë paexaname. Itsamonae jitsipae ata pejonenexa Dioso pijanacuayabetsia, apo pacopat-simë pejonenexa saicayalivaisi panecujarubixae. Paxamë ata apo pajitsi-paemë panejonenexa Dioso pijanacuayabetsia.

¹⁴ ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Yamaxëitojorobiaya pavecuanotabiabame pamonajivi pevecuatëpaevanëtsi pecobecovëjavaximi. Bajaraxuacujinae pinijicuenia itajara Diosojavabelia pavajëcabiabame. Itsiata pepo panexaniajaijamatabëcueneta apo pavajëcabiabimë Diosojavabelia. Bajarapacuenia pavajëcabiabame saya jivi papecataenexa Dioso itajara bitso bepanejumecovënëtsivi. Bajaraxuata bitso ayaicuenia Dioso pacananeconitsiaexanaena pamatacabi Dioso naneconitsiaexanaena daxita pamona Dioso apo pejumecovënëtsivi.

¹⁵ ¡Paxamë saya jivi paneyamaxëitojorobivi! ¡Paxamë judíovi panecujaru-bivi, pafariseovimënu, ayaineconi panatsixainame Diosojavabelia! Pali-vaishi pacajinavanapame, caejivi ata panejumecovënëtsiaexanaenexa, papecacuenejëpaenexanua, ayaicuenia daxitajava jivi patsipaeabarutame. Nex-ata pajivi pacajumecovënëta, bajarapajivi pevajënaeyabelia bitso naneconi-tapona Diosojavabelia. Nexata paxamë panejamatabëcueneta bajarapajivi paxamë matatoxenetsia bitso Dioso naneconitsiaexanaenatsi pexuabinex-atsi infernojavabelia.

¹⁶ ¡Paxamë apo payapëtae atamë, Dioso pejumelivaisi ja-matabëcuenenavëxaniabiaya pacujarubabiabame itsamonae! Nexata paxamë panecujarubijamatabëcueneta bajarapamona pananeconitsiaexaname Diosojavabelia. ¡Bajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumaitsimë tsabiabi: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacue. Cajumaitsi cajena templobo pevënëta,’ jai, apo itsacuenë. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi

rajane itsanējavabelia jumaiṣi pejumexaniataenexatsi: ‘Catoexanaenatsi pepacuene. Cajumaiṣitsi cajena templobopijiorojavanē pevēnēta,’ jai, bajara jane xua abeje. Nexata bajarapajivi exanae pejumaiṣicovēya penaneconitsiyaniva Diosojavabelia,” pajamē tsabiabi jivijavabelia.

¹⁷ Pajamatabēcuenenavēxaniabiame raja saya bajarapacuenia itṣa pajumaiṣimē. Biji rajane templobo beyaiyatanetsi bajarapatemplobopijiorojavanē matatoxenetsia. Bajarapaorojavanē ata yaiyatanetsi. Tsipaji bajarapaorojavanē templobopijiorojavanē.

¹⁸ Jamatabēcuenenavēxaniabiaya pajumaiṣimē tsabiabinua: “Pajivi itsanējavabelia najumecapanepaeya jumaiṣi pejumexaniataenexatsi: ‘Catoexanaenatsi pepacuene. Cajumaiṣitsi altarpvēnējava pevēnēta,’ jai, apo itsacuene. Bajarapajivi pejumaiṣicovēya apo exanae ata, itsiata apo naneconitsi Diosojavabelia,” pajamē tsabiabi. “Pajivi rajane pejumexaniataenexatsi itsanējavabelia jumaiṣi: ‘Catoexanaenatsi pepacuene. Cajumaiṣitsi altarpvēnējavajumata pebuatsiofrenda pevēnēta,’ jai, bajara jane xua abeje. Nexata bajarapajivi pepacuene exanae pejumaiṣicovēya penaneconitsiyaniva Diosojavabelia,” pajamē tsabiabinua jivijavabelia.

¹⁹ Paneamatabocotajavi, bepaneitatsēcēnavanapaevinua panejamatabēēthētota. Biji rajane beyaiyatanetsi altarpvēnējava, bajarapaaltarpvēnējavajumata pebuatsiofrenda matatoxenetsia. Bajarapaofrenda ata yaiyatanetsi. Tsipaji altarpvēnējavajumata boca.

²⁰ Pajivi jumaiṣi: “Cajumaiṣitsi altarpvēnējava pevēnēta,” jai, caecuenia yajavavēnējona bajarapaaltarpvēnējavajumata pebocaeofrenda.

²¹ Pajivi pijinia najumecapanepaeya jumaiṣi pejumexaniataenexatsi: “Cajumaiṣitsi templobo pevēnēta,” jai, caecuenia yajavavēnējona bajarapatemplobota peponaponanē Dioso.

²² Pajivi pijinia najumecapanepaeya jumaiṣi pejumexaniataenexatsi: “Cajumaiṣitsi athēbētatsia panacua pevēnēta,” jai, caecuenia yajavavēnējona Dioso pijatrono. Caecuenia yajavavēnējonanua Dioso, ponē ecabiaba bajarapatronota pitorobabiabinexa pijajivi.

²³ ¡Paxamē jivi paneyamaxēitorobivi! ¡Paxamē judiōvi panecujarubivi, pafariseovimēnua, ayaineconī panatsixainame Diosojavabelia! Panenacanabijava diez xuabejeyajuvēnējava, caejavayo, parajutabiabame ofrendacuenia Diosojavabelia. Daxitaviria paneubijavaxi ata, diez xuabejeyajuvēnējava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamē, apo pajumecovēnēṣimē itṣalivaisianē, Dioso papecatonajumecopatsilivaisianē, palivaisianē picani bitso Dioso pacatojitsipa panejumecovēnēṣinexa. Bajarapalivaisianē picani pacaitoroba itṣamonaejavabelia pexaniacuene panetoexanabiabinexa. Pacaitorobanua picani paneitaxutotsoniataeyabiabinexa itṣamonae ata. Pacaitorobanua picani xaniavaetsia panenajamatabēcuenecopatsinexa Diosojavabelia. Bajarapacuenia picani bepaexanavanapame pacopatsinejavamē bajaraxua, ofrendacuenia panerajutabiabijava Diosojavabelia.

²⁴ ¡Paxamē apo payapētae atamē Dioso pejumelivaisi, jamatabēcuenenavēxaniabiaya pacujarubabiabame itṣamonae! Palivaisianē Dioso najumecopata panejumecovēnēṣinexa, bajarapalivaisianē yajuvēnēlivaisixi, saya beveliajamatabēcuenelivaisixi, pacaasaēmē tṣavanapae. Palivaisianē picani Dioso bitso pacatojitsipa panejumecovēnēṣinexa, caranata panamuxujematame. Nexata panecujarubivi panecujarubicuenia

pexanavanapaexae, panecujarubivi ata naneconita Diosojavabelia pacuenia paxamē pananeconitame Diosojavabelia.

²⁵ ¡Paxamē jivi paneyamaxētojobivi! ¡Paxamē judíovi panecujarubivi, pafariseovimēnua, ayaineconi panatsixainame Diosojavabelia! “Najamatabēcuenebijianaejitsipajē Diosojavabelia,” panejamatabējaitsabiabixae, panecaxaevajēnae panecaxaenēanē, taza ata, naniavelia paquiatabiabame xaniavaetsia panijasalinaucuenia. Tsipaji jamatabēcuenenavēxaniabiaya pajamatabējumaitsimē tsabiabi: “Itsa caxaejitsipajē xaniavaetsia quiatsinejevanē, Diosojavabelia naneconitsipajē,” pajamatabējamē tsabiabi. Itsiata baitsi jane panejamatabēēthētota bēpēnēa panajamatabēxainabiabame pibisiacuene. Panajamatabēxainabiabame itsanē pecobecovē paneyacajērētsinexa. Panajamatabēxainabiabamenua panexainaenexa ayaijava ēpaxamēnexa.

²⁶ Paxamē pafariseovimē, bepeneitaxutotsēcēnaevi panejamatabēēthētota. Pajivi quiata pecaxaenē, taza yajava, piaxuirajibinexa, copiaya xaniavaetsia quiata pēnēvelia. Bajaraxuacujinae xaniavaetsia quiata pejumavelia. Bajara pijinia pacuenia paxamē ata copiaya Dioso pacajamatabēcuenequiatsi paneajamatabēcuenexuirajibinexa. Nexata bajaraxuacujinae pacajamatabēcuenecaējēpaena paneexanaenexa ēpexaniacuene pacuenia Dioso pacaitoroba.

²⁷ ¡Paxamē saya jivi paneyamaxētojobivi! ¡Paxamē judíovi panecujarubivi, pafariseovimēnua, ayaineconi panatsixainame Diosojavabelia! It-sajota jivimēthēanē bobena, jivimēthēanējumavereca itsamonae caiquina peniojairata bajarapacuenia pitabētsinexa. Itsiata baitsi jane bēpēnēareca petēpaevimi petsabanaejava, pesi yajava, abeje. Bajaraxua apo jitsipaeitsi vajajayatsinexa. Bajara pijinia paxamē ata Dioso patsitajamatabēcuenēitsimē.

²⁸ Itsamonae naniavelia itsa pacatane, pacatane bepexaniajamatabēcuenēvimē itajara. Itsiata baitsi jane panejamatabēēthētota bēpēnēa panajamatabēxainabiabame jivi paneyamaxētojobinexa. Itsajava ata pematatsēnēa pibisiacuene paneexanaenexa, panajamatabēxainabiabame.

²⁹ ¡Paxamē saya jivi paneyamaxētojobivi! ¡Paxamē judíovi panecujarubivi, paxamē ata pijinia pafariseovimē, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata mēthēca. Nexata mapamatacabitaje bajarapaprofetavimi pemēthēanējumavereca bo paexanabiabame itabētsiaya, jivi itsa tane, penajamatabēnapitabiabinexa bajarapaprofetavimi. Pamonaemi ata bajayata tēpa, pamonae aneconijibia pejinavanapaevimi Dioso pitabarata, pemēthēanējumavereca aeconoxae mapamatacabitaje itabētsiaya parubabiabame itsacuenejavaxi.

³⁰ Bajarapacuenia itabētsiaya paneexanaecujinae, jivijavabelia pajumaitsimē tsabiabi mapacueniaye: “Vajasalinaivimi bajayata pibisiacuene exana. Beyaxuababiaba profetavimi. Paxanē bajarapamatacabi pajinavanapae atanē tsipae, apo payavenonaenē tsipae bajarapamonaemi pēbeyabiabijava profetavimi,” pajamē tsabiabi.

³¹ “Vajasalinaivimi beyaxuababiaba profetavimi,” panejaixae, panavajunupaebame papemomoxicuenemē bajayata pamonaemi beyaxuababiaba profetavimi. Bajarapamonaemi papemomoxixaemē, pacuenia bajaramonaemi jamatabēcuenēitsi, bajara paxamē ata pajamatabēcuenēitsimē.

³² Paxamē ata papihisiajamatabēcuenēvixamē, xanē ata jamatabēpanebeyaxuabame. ¡Panebeyaxuare paneveretsinexa xua panijasalinaivimi taxuxuaba!

³³ ¡Paxamē bitso pibisiacuene paneexanaevi! Pacuenia jomo rēcēpeca itsa tane petajuenajetarucaejava isoto, bajara paitsimē. Itsiata apo panepaemē tsane infiernovecua panijaneconi yabara.

³⁴ Paxamē picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peyapētaeyaexanaevitsi. Pacatoitorobianatsinua picani xanē talivaisi papecatsipaebivinexa. Itsiata baitsi jane bajarapamonaeyajuvēnēvi itsamonae pabeyaxuabaponaname. Itsamonae cruzajavabelia pacobematabiaxuababiabiananame. Itsamonae pajumativabeyabiabiananame penaneconitsivi panejumaconitabiabimacata judiovi penacaetuatabibonējava. Itsamonae bajaraponabiabiananame itsa tomaranējavabelia ata panebejiobiaexanaenexa.

³⁵ Bajarapacuenia nexata paxamē ayaineconi panatsixainaename Diosojavabelia. Daxita pamonaē aneonijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamē pacatsijumajopaena. Dioso pitabarata aneonijibia pejinavanapaevimi, panijasalinaivimi pebeyaxuabaponaejava, taxuxuaba Abelpijinēta. Bajaraxuacujinae icatsia pevājēnaeyabelia beyaxuabapona itsamonae ata, Dioso pitabarata aneonijibia pejinavanapaevimi. Nexata bexēajavaberena ata Berequíaspijinē pexēnatori, Zacariáspijinē, panijasalinaivi beyaxuaba. Zacariáspijinēmi panijasalinaivimi beyaxuaba templobopanabota, templobobeje altarvēnējavabeje tuatuažeta.

³⁶ Xaniajanē pacuenia pacatsipaebijitsiatsi. Daxita pamonaemi Dioso pitabarata aneonijibia pejinavanapaevimi, panijasalinaivimi beyaxuababiaba. Bajarapaneconimi yajava, paxamē aeconxae panejinavanapaevi, pacatsijumajopaena Dioso papecananeconitsiaexanaenexa, jai Jesús judiovi pecujarubivijavabelia, fariseovijavabelianua.

Pacuenia Jesús najamatabēxainaeya sivanua Jerusalén tomarapijivi yabara pelivaisi

(Lc 13.34-35)

³⁷ Jesús najamatabēxainaeya sivanua Jerusalén tomarapijivi. Jumaitsi pesivanuejavata mapacueniaje:

—¡PaJerusalén tomarapijivimē, pabeyabiabame Diosojumepaebivimi profetavi! ¡Ibotonēta ata patseconabiabame bajarapacuenia panebeyaxuababiabonexa Diosojumelivaisi pecaponaevi paxamējavaberena! ¡Pacuenia vacara banacoxicaetuata pecorofetobēxēpanaberena, bajara pijinia pacuenia xanē ata picani bitso jitsipabiabajē patacaetuatsinexa, patacacapanepaenexa picani panijaneconivecua! ¡Itsiata baitsi jane paxamē apo pajejamē cajena!

³⁸ Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponapone.

³⁹ Xaniajanē pacuenia pacatsipaebijitsiatsi. Paxamē rabaja apo panetaemē tsane matavējēa. Matapania itsa panejumecovēnētsianame Cristonēcuenenē, Dioso taneitorobinētsica, icatsia panetaename. Itsa panesivajamatabējumajitsimēnua tsane: “Dioso, bitso yavenonare maponē najetarucaje, nejamatabēcueneta penajetarucaenē,” itsa panesivajamatabējamē tsane xanē yabara, nexata jane baja icatsia panetaename itsa patsianicajē, jai Jesús mapacueniaje najamatabēxainaeya pesivanuejavata Jerusalén tomarapijivi.

24

Pacuenia Jesús pijajivi tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi

(Mr 13.1-2; Lc 21.5-6)

¹ Jesús pitsaparena temploboverena. Itsa baja Jesús vecuaponaejitsia templobo, pijajivi imoxorenatsi. Nexata Jesús pijajivi jumaitsi:

–Patajatuxanenë, templobo nataema pemuxuneneta penaeboxanetonë ata, jai.

² Nexata Jesús tajëvelia vajunupaeba itsamatacabi itsanacuapijivi bajarapaboxanetonëmi pepenetsijavanexatsica. Jesús jumaitsi pijajivijavabelia mapacueniaje:

–Xaniajanë pacuenia pacatsipaebijitsiatsi. Daxita raja paboxanetonë pataneme, bajarapaboxanetonëmi itsamatacabi itsanacuapijivi penetsianica irabetsica. Nexata paibotonë catsanaruba mapaboxanetonëtaje, itsai-boto ata pejumavereca apo bocaë tsane, jai Jesús tajëvelia pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

(Mr 13.3-23; Lc 21.7-24; Lc 17.22-24)

³ Jesús eca petsutojumata, patsutojumata olivonaenë apaaxayo. Jesús itsa eca petsutojumata, nexata pijajivi pijaepatojavata imoxoyorenatsi peyanijobinexatsi. Nexata Jesús pijajivi jumaitsi:

–Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë icatsia itsa patsijitsiamëtsica? ¿Detsa peneta pitsicuene pataenajë mapanacua ata itsa vereverecaëjitsiaje? jai Jesús pijajivi.

⁴ Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

–Xania panayajivitaename. Pëtsa panacopatame itsajivi ata papecaya-maxëitojorobinexa.

⁵ Tsipaji raja peyamaxëitojorobivonexa, ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajarapamonae jivi ayaibitsaëto yamaxëitojorobiana.

⁶ Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsanë mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane.

⁷ Mapanacuaje pevereverecaevajënaeje peneta copiaya itsaviriavi nabena itsavirivijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetarucaena itsanacuanëjava. Vitancuene ata najetarucaena itsanacuanëjava. Ira najëbiana ayaicuenia itsanacuanëjava.

⁸ Daxita bajarapacuenia itsa pataename, saya abaxë taxuxabaponaena piayacuene, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

⁹ Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

–Nexata paxamë pacacaponae naeacuevetsivijavabelia papecabejio-bi-aexanaenexa. Nexata pacabeyejebiana. Daxitanacuanëpijivi pacaitoya tsabiabi tsane patajajivixaemë.

10 Nexata bajarapamatacabita jivi ayaibitsaëto navecuacopabiana tanejumecovënëtsijava. Namataenetsia naitoya tsane. Namataenetsia nacanajetsiana nacuaeavetsivi pecobeyabelia.

11 Nexata ayaibitsaëto najetarubenaena jivi petsipaebaponaevinexa saicayalivaisi Dioso pejumelivaisivecua. BeDiosojumelivaisipaebivicuenia tsipaebaponaena. Bajarapamonae yamaxëitojorobiana jivi ayaibitsaëtoxaneto.

12 Jivi pibisiacuene pexanavanapaevi, pevajënaeyabelia ayaibitsaëtoxaneto tsaponae tsane. Nexata ayaibitsaëto Dioso pejumecovënëtsivi, namataenetsiana penaasivajava vereverecaonaena.

13 Itsiata pajivi ajamatabëcuenesaë tsane Dioso pejumecovënëtsijava petëpaejavabelianexa, bajarapajivi Dioso capanepaenatsi.

14 Itsamonae daxita nacuanëjjava tsipaebiana jivi peyapëtaenexa imoxoyo baja pevajënae Dioso pijajivi pecapanepaejavanexa. Bajaraxuacujinae jane baja mapanacua vereverecaenaje, jai Jesús pijajivijavabelia tajëvelia pevajunupaebijavata pacuenia itsamatacabiti itsijitsia mapanacuataje.

15-16 Icatsia Jesús tajëvelia vajunupaeba papiayaicuene itsamatacabiti copiapatsijitsia Jerusalén tomarata. Jesús jumaitsi pijajivijavabelia mapacueni-aje:

—Diosojumepaebinëmi profeta Danielpijinë piayaicuene tajëvelia pevajunupaebilivaisi bajayata yaquina. Xua panijatamaranëmi vereverecaeyaexanaeitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë ita pataename bajarapapiayaicuene penucaejava templobota, nexata Judea nacuata pejinavanapaevi pëtsa nubena. Naxanitsiayo rëcëpecaena petsutonëjavabelia.

17 Pajivi pijabojumata athëbëyo ecaya, ita vënëlivaisitaena bajarapapiayaicuene penucaejava templobota, bajarapajivi perunaecujinaetsica, bepijia najetabajiraviana. Pëtsa joneya pijaboyalia pejutsinexa pecobecovë.

18 Pajivi pijinia nacuenebaponapona pijapabita, ita vënëlivaisitaena bajarapapiayaicuene penucaejava templobota, bepijia najetabajiraviana. Pëtsa naviata pijaboyabelia pejutsinexa penaxatabijava.

19 ¡Papetiriavi penacueto yacotajinavanapa, bitso bejiobi tsane bajarapamatacabiti! ¡Bitso nabejiobitsiaya jinavanapaena! ¡Papetiriavi ata mitopaenacuetoxi isajinavanapa, bitso bejiobi tsane bajarapamatacabiti!

20 Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabiti parëcëpecaename, pexaniamatacabiti Dioso pacatocopatsiana bitso nabejiobitsiaya paneponaeyaniva. Pavajëcarenuva penacueraevetsimatacabita bajarapapiayaicuene papecatocopiapatsiyaniva, nexata papecatoayapëbejeyaniva.

21 Tspaji raja bajarapamatacabiti bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane.

22 Dioso epatua yatuucutsiana jivi bitso nabejiobitsiaya pejinavanapaematacabianëminexa bitso jivi nabejiobitsiaya pejinavanapaeyaniva. Dioso epatua ita apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijav-

abelia tajëvelia pevavjunupaebijavata papiayaicuene itsamatacabi copiapatsijitsia mapanacuataje.

²³ Icatsia Jesús tajëvelia navavjunupaeba icatsia pepatsijavanexatsica. Jesús jumaiti pijajivijavabelia mapacueniaje:

—Nexata itsajivi yamaxëitojorobiaya itsa pacajumaiti tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsinua tsane: “Bajarajota nuca Cristo,” itsa pacajai tsane, pëtsa pajumecovënëtame.

²⁴ Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaxavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepacuene Dioso pijajivi, Dioso pitapetsivitsi, bajarapamonae apo yamaxëitojorobi tsanetsi.

²⁵ Tajëvelia rabaja maje pacatsipaebatsije.

²⁶ Nexata itsamonae itsa pacajumai tsane: “Cristo raja ponapona petusato nacuatolia. Naxanitsia. Panataename,” itsa pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapænëyatuucutsibotaje. Naxanitsia. Panataename,” itsa pacajai tsane, pëtsa pajumecovënëtame.

²⁷ Payapëtaneme rabaja mapacueneje. Yamaxë itsa nivejai tsajuni athëbëvetsica, caeuenia jivi bacotiatane daxitajava. Bajara pijinia peneta pacuenia daxitanacuanëpijivi caeuenia netaena pamatacabi patsianicajë xanë, Daxitajivi Pematapijinënë.

²⁸ Payapëtaneme rabaja mapacuene ataje. Quequeremonae bepijia bayapëtanë itsajota petuxutsaebinë boca. Nexata bajarajota bepijia banacætuana. Bajara pijinia pacuenia daxitanacuanëpijivi tajajivi bepijia yapëtaena tapatsijavatsica. Nexata bepijia nacaetuanæna xanëjavaberena, jai Jesús pijajivijavabelia tajëvelia penavavjunupaebijavata icatsia pepatsijavanexatsica.

Pacuenia Jesús tajëvelia navavjunupaeba icatsia pepatsijavanexatsica petëpaecujinae yabara pelivaisi

(Mr 13.24-37; Lc 21.25-33; 17.26-30, 34-36)

²⁹ Jesús tajëvelia navavjunupaeba itsamatacabi icatsia pepatsijavanexatsica. Jesús jumaiti pijajivijavabelia mapacueniaje:

—Xanë tapatsivajënaetsica jivi taena pecujunavicuene. Jivi nabëjiohitsiaya jinavanapaena. Nexata jivi nabëjiohitsiaya pejinavanapaematacabicujinae, matacabi pijiuameto aitaquiri tsane. Meravipijiuameto ata aitaquiri tsane. Tulupu ata othopaenica irabetsica. Daxitacuenë, xua rubena athëbëtsatsia, najëbiana. Xaniavaetsia apo rubenae tsane.

³⁰ Bajaraxuacujinae jane baja xanë athëbëvetsica najetarucaenajë, Daxitajivi Pematapijinënë. Nexata daxitaviriavi mapanacuapijivi natsinuena pecajunavi pijaneconi yabara. Nexata bajarapaepatota, xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuenë taevetsinexa. Tanivenivenaecotia yajavapatsianicajë.

³¹ Bajaraxuacujinae trompeta itsa najumetsiana ayajumeta, itorobianajë tajaängelevi. Angelevi daxitanacuanëjavaverena xanëjavaberena netocaetuatsiana tajajivi, pamonaepacuene Dioso pitapetsivitsi, jai Jesús pijajivijavabelia tajëvelia penavavjunupaebijavata itsamatacabi icatsia pepatsijavanexatsica.

³² Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

–Pacanaëjere pacuenia itsi higuerranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonexa.

³³ Bajara pijinia pacuenia peneta itsa pataename pecopiapatsijava xua tajëvelia vajunupaebajë, nexata payapëtaename imoxoyo baja tavajënae tsane tapatsijavanexatsica.

³⁴ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua tajëvelia vajunupaebajë itsa baja copiapatsiana, bajarapamonae jane baja vereverecaena.

³⁵ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁶ Icatsia Jesús jumaitsi pijajivijavabelia:

–Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaebajë. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³⁷ Jesús icatsia tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

–Pacuenia bajayata jemata itsi pamatacabi Noépijinë ponapona, bajara icatsia jemata itsane pamatacabi xanë, Daxitajivi Pematapijinë, patsianicajë.

³⁸ Pamatacabi Noépijinë ponapona ira pebubutsivajënaeya, jivi picani xaniavaetsia jamatejema pexaejava xaevanapa. Apaevanapanua. Nacojobapona itsamonae. Itsamonae pexënatoyonë pebijavabelia canajetapona petonacojobinexatsi. Bajarapamonae jamatejema saya jinavanapa. Nexata bajarapamatacabi Noépijinë ëpijamonaë piniijbarcoxanetojavabelia barëjunua.

³⁹ Daxitajivi abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemaxaneto itsa jopa ira pebubutsinexa, yapëtane jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinë, tapatsijavanexatsica, jemata patsianicajë.

⁴⁰ Nexata bajarapamatacabita anijanëbeje najuanacuenabanuacënabeje pabita. Itsanë tanejumeconvënëtsinë tsane. Itsanë apo tanejumeconvënëtsinë tsane. Nexata tanejumeconvënëtsinë pitsianatsi ángelnë. Apo tanejumeconvënëtsinë copatanutsianatsi.

⁴¹ Bajara pijinia itsane petirivabeje ata. Najuacuabanuacënabeje caevavata. Nexata tanejumeconvënëtsiva pitsianatsi ángelnë. Apo tanejumeconvënëtsiva copatanutsianatsi.

⁴² Nexata nejamatabëcueneevetsiaya panecopiaevetavanapaename. Tsipaji raja apo panevajënaeyapëtaemë tsane paepatota xanë panijatuxanenënë icatsia patsijitsianëtsica.

⁴³ Pacanaejëre mapacueneye. Bo pexainaenë itsa yapëtaejitsipa paepatota meravi pijaboyaberena patsijitsia pecobecovë petonacobetoxotsinënexatsi, nexata naëcotsiaya vajënaeevetsipa. Apo copatsi tsipae pijaboyaberena peto-joneyanivatsi penacobetoxotsinënexa.

⁴⁴ Bajara pijinia pacuenia paxamë ata najamatabëcuenexaniavaetsiaya panecopiaevetavanapaename. Tsipaji xanë, Daxitajivi Pematapijinënë, paepatota apo panejämatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata it-samatacabi icatsia pepatsijavanexatsica.

Pacuenia Jesús pijajivijavabelia livaisi tsipaeba petuxanenë pijajivitonëbeje pelivaisicuenia yabara pelivaisi
(Lc 12.41-48)

⁴⁵ Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bajarapacuenia pijajivijavabelia tsipaeba copiaevetsiaya petonacuenebavanapaenexatsi icatsia pepatsimatacabitsicajavabelianexa. Jesús jumaitsi mapacueniaje:

–Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatabëcueneiñtsaneje. Bajaraponë itsa-jamatabëcuene xainaenejeva, copiaevetaponaponaena pijatuxanenë pepat-sijavabelianexa. Bajaraponë pijatuxanenë pijajivi pecovëta toevetapon-aponena piabatabiabinexa pexaejava caematacabi canacujitsia pacuenia pijatuxanenë itorobatsi.

⁴⁶ Bajaraponë bitso barëya tsane pamatacabi pijatuxanenë patsiana, xani-avaetsia pijajivi petoevetaponaponaexae pecovëta.

⁴⁷ Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bajaraponë evetsiaexanaenatsi daxita xua xaina pijatuxanenë.

⁴⁸ Itsa bajaraponë pijamatabëcuenebejenë tsipae, nexata pijatuxanenë pecovëta jamatabëjumaitsi tsipae: “Tajatuxanenë ajibi tsarucae tsane bajaya-jebi,” jamatabëjai tsipae.

⁴⁹ Nexata toconibabeyabiabijitsipa pijatuxanenë pijajivi. Ayajava xaeyabiabijitsipa. Naapaeyabiabijitsipanusia piatajibivita.

⁵⁰ Nexata itsajota apo jamatabënajinae tsipae pijatuxanenë pepatsija-vanexa, patsipa pijatuxanenë.

⁵¹ Nexata bajaraponë ayaicuenia naneconitsiaexanaejitsipatsi pijatuxa-nenë. Pacuenia jivi peyamaxëitojorobabiabivi, Dioso ayaicuenia naneconit-siaexanaenatsi, bajarapacuenia pijatuxanenë naneconitsiaexanaejitsipatsi. Nexata natsinuejitsipa. Navonosinijitsipanusia bitso penavixaetaexae, jai Jesús pijajivijavabelia petuxanenë pijajivitonëbeje pelivaisicuenia petsipae-bijavata.

Bajarapacuenia Jesús tsipaeba pijajivi xaniavaetsia pecopiaevetavana-paenexatsi Jesús icatsia pepatsimatacabitsicajavabelianexa.

25

Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi

¹ Jesús icatsia jumaitsi pijajivijavabelia:

–Pamatacabi icatsia patsianicajë, tajajivi peyapëtaexae tapatsijavanex-atsica, jamatabëcueneaitavaya necopiaevetavanapaena. Itsamonae tajajivi

yapētae ata tapatsijavanexatsica, itsiata jamatabēcueneaitavaya apo necopi-aevetavanapae tsane. Bajarapacue ne yabara pacatsipaebianatsi mapalivaisije. Diez papejanavabeje yapētane itsava pejanava penacasabijavanexa. Nexata diez papejanavabeje pijalámparabēxi, caeva canacujitsia, xaniavaeta penaponaenexa. Nexata capona pijalámparabēxi pabojavabelia eca penacasabivanexa. Bajarajota vajēnaeevensijitsia pepatsijava penacasabinēnexa. Nexata itsa ponabeje penacasabijivibejenexa, bajarapapejanavi penaponaenexa bajarapajivibeje pepēta penacasabifestajavabelia.

²⁻⁴ Bajarapamonaeyajuvēnēvi, cinco povabeje, yapētae ata picani pet-sicaponaejavanexa aceiteranē pijalámparabēxinexa, itsiata apo tscaponaē itsa tovereverecatsi aceitera peepatsinexa icatsia pijalámparabēxijavabelia. Cinco pijinia povabeje peyapētaexae petsicaponaejavanexa aceiteranē pijalámparabēxinexa, tscapona.

⁵ Nexata bajarapapetiriavi itayotena pijalámparabēxita. Bajayajebi picani vajēnaeetena penacasabinēnexa pepatsijava. Nexata pijalámparabēxita paaceiteranē capona, tovereverecaponatsi baja. Tsipaji penacasabinēnexa abaxē cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita.

⁶ Bajaraxuacujinae ayaimeravi tuatuajēta jumetane pevavajaijava. “¡Najetaruca rajane baja penacasabinēnexa! ¡Papitsaparemena jane baja panecopiapitsinexa!” pejaijava jumetane.

⁷ Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranē tscapona, epaca pijalámparabēxijavabelia. Caeva canacujitsia pijalámparabēxi ayaiocitia exana.

⁸ Nexata papetiriavi apo tscaponaē aceiteranē, jumaitsi aceiteranē petsicaponaevijavabelia mapacueniáje: “Panenarajure tsiquirijavaxi aceiteraxi. Tsipaji patajalámparabēxi panetoitacaēcaēnaona,” jai bajarapamonaē.

⁹ Itsiata aceiteranē petsicaponaēvi jumaitsi: “Jume. Apo caējēpae. Paxanē ata meta apo panetocaējēpae tsipae. Paponaremelia. Panijacuata pacomuare itsajotalia canajetabiaba aceiteranē,” jai aceiteranē petsicaponaēvi pijalámparabēxinexa.

¹⁰ Nexata papetiriavi aceiteranē apo tscaponaē pijalámparabēxinexa, ponalia aceiteranē pecomuacaenexa. Nexata pecovēta penacasabinēnexa patana-jetaruca. Nexata papetiriavi aceiteranē tscapona pijalámparabēxinexa, napona baja penacasabifestanexa pexanaebojavabelia. Pejonecujinaelia baupaxatata.

¹¹ Bajaraxuacujinae aceiteranē pijalámparabēxi petsicomuacaēvi pata. Nexata bajarapapetiriavi jumaitsi penacasabinēnexajavabelia: “¡Panetobaupare! ¡Panetobaupare! jai tsanubenae bojumavelia.

¹² Nexata penacasabinēnexa jumaitsi: “Xaniajanē pacuenia pacatsipaebi-jitsiatsi. Apo pacayapētaetsi cajena paxamē,” jai bajarapapetiriavijavabelia, jai Jesús mapalivaisije pijajivijavabelia.

¹³ Jesús icatsia jumaitsi pijajivijavabelia:

—Pacuenia cinco povabeje peyapētaexae, aceiteranē tscapona pijalámparabēxinexa, bajara pijinia pacuenia paxamē ata paneyapētaexae, jamatabēcueneaitavaya panecopiaevetavanapanaename. Tsipaji apo payapētaemē tsane pamatacabita, paepatota ata, xanē, Daxitajivi Pematapijinēnē, icatsia patsijitsianētsica, jai Jesús pijajivijavabelia.

Pacuenia Jesús pijajivi livaisi tsipaeba pijapalata pijajivi pevetsiaexanaenē pelivaisicuenia yabara pelivaisi
(Lc 19.11-27)

¹⁴ Jesús icatsia jumaitsi pijajivijavabelia:

– Tacovēta patajajivimē, itsamonaē ata, pamonaē tajajivi, panetonacuenebianame. Nexata pamatacabi icatsia patsianicajē, pacuenia pacasivanajamatabēxainaejitsiatsi, aeconoxae pacatsipaebianatsi. Pacatsipaebianatsi comparacióncuenia mapacueniaje. Petuxanenē itsa ponaejitsia tajēnacuyabelia, junata pijajivi. Evetsiaexana pijapalata petoevetsinexatsi pecovēta.

¹⁵ Caenē canacujitsia evetsiaexanapona petocanacuenebinexatsi pecovēta pacuenia bajarapamonaē caējēpatsi. Nexata petuxanenē pijinia evetsiaexana cinco mil ponēbeje pepovi, bitso penamatamotsivi. Itsanē pijinia evetsiaexana dos mil ponēbeje. Itsanē pijinia evetsiaexana mil ponēbeje. Bajaraxuacujinae petuxanenē pona tajēnacuyabelia.

¹⁶ Nexata jane baja ponē evetsiaexana cinco mil ponēbeje, canacueneba jane baja pecovēta bajarapapalata. Nexata pematatsēnēa topitsapatsi icatsia itsacincio mil ponēbeje. Nexata baja daxitata diez mil ponēbeje caejavata.

¹⁷ Bajara pijinia pacuenia itsanē canacueneba dos mil ponēbeje. Nexata pematatsēnēa topitsapatsi icatsia itsados mil ponēbeje.

¹⁸ Itsiata baitsi jane ponē toeveta mil ponēbeje, pona pematayatsinexa pijatuxanenē pijapalata. Matayatsia mēthēteta irata.

¹⁹ Bexēa nexata najetaruca petuxanenē. Junata pijajivi peyapētaenexa pacuenia toevetatsi pecovēta pijapalata.

²⁰ Copiaya pata ponē cinco mil ponēbeje evetsiaexanatsi. Nexata bajara-ponē tocanaviata pijatuxanenējavabelia diez mil ponēbeje. Jumaitsi bajara-ponē pijatuxanenējavabelia: “Nevetsiaexaname cinco mil ponēbeje tacato-evetsinexa. Bajara macatocanaviatatsi bajarapapalataje. Catocanaviatatsi yajava icatsia itsacincio mil ponēbeje, xua nacanabajē bajarapapalata,” jai bajaraponē pijatuxanenējavabelia.

²¹ Nexata petuxanenē jumaitsi: “Xanepana rabaja. Xaniavaetsia neto-evetaponaponame. Itsajamatabēcuene apo najamatabēxainaeimē. Tsiquirijavayo ata xaniavaetsia neto-evetame. Nexata aeconoxae caevetsiaexanaenatsi pematatsēnēa ayaijava. Jonemena xanējavaberena barēyaya neponaponaeenexa xanējavata,” jai petuxanenē pijajivitonējavabelia.

²² Bajaraxuacujinae pata ponē dos mil ponēbeje evetsiaexanatsi. Nexata bajaraponē jumaitsi pijatuxanenējavabelia: “Nevetsiaexaname dos mil ponēbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsados mil ponēbeje, xua nacanabajē bajarapapalata,” jai bajaraponē pijatuxanenējavabelia.

²³ Nexata petuxanenē jumaitsi: “Xanepana rabaja. Xaniavaetsia neto-evetaponaponame. Itsajamatabēcuene apo najamatabēxainaeimē. Tsiquirijavayo ata xaniavaetsia neto-evetame. Nexata aeconoxae caevetsiaexanaenatsi pematatsēnēa ayaijava. Jonemena xanējavaberena barēyaya neponaponaeenexa xanējavata,” jai petuxanenē pijajivitonējavabelia.

²⁴ Icatsia pata ponē evetsiaexana mil ponēbeje. Bajaraponē jumaitsi pijatuxanenējavabelia: “Cacueneyapētanetsi. Xamē nijajivi apo itaxutobejibiatayabiabimē. Xamē nijajivi ubiaexanabiabime neubiaexanabiabijava nexata bajarapamonaē pejamatabēcueneta ayaijava palata pecatopit-sapaenexa. Bajara pijinia pacuenia xanē ata nevecuapitsipame xua nacanabijitsipajē nijapalata ita canacuenebijitsipajē.

25 Bajaraxuata junavajë. Ponajë irata tamatayatsiamëthëtetsinexa nijapalata. Bajara manijapalata catocanaviatatsije,” jai bajaraponë pijatuxanenëjavabelia.

26 Nexata petuxanenë jumaitsi: “Tajajivitonë atamë, itsiata ajamatabëcuenebejemë. Afaetabimënuu. Xamë baja cajena yapëtaneme tajajivi taubiaexanabiabijava, taubiaexanabiabijava nexata bajarapamonae pejamatabëcueneta ayajiva palata tanetopitsapaenexa.

27 Bajaraxuata xanepanaejitsipa itsa netocanacuenebiaexanaejitsipame tajapalata banco pevetsivijavabelia. Nexata aeconoxae banco pevetsivi tajapalata pecacovaetsijamatabëcuene netocanaviatsipa tajapalata pematatsënëa,” jai petuxanenë pijajivitonëjavabelia.

28 Nexata petuxanenë jumaitsi bajarajota penubenaevijavabelia: “Pavecuapire bajarapamil ponëbeje. Nexata juya parajure ponëjavabelia xaina diez mil ponëbeje. Tspajaj bajaraponë caëjëpatsi tanetoevetsinexa pematatsënëa.

29 Tspajaj pajivi ayajiva baja xaina, pematatsënëa icatsia itsajava rajutsianatsi. Nexata xainaena ayajiva. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi.

30 Maponë tajajivitonëje, itsacuenejavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosinianua bitso penavixaetaxae,” jai petuxanenë, jai Jesús comparacióncuenia pijajivijavabelia.

Bajarapacuenia Jesús jumaitsi pamonae pijaneconi pexainaevi Jesús penaneconitsiaexanaenexa pamatacabi icatsia patsianica.

Pacuenia Dioso naneconitsiaexanaena pijaneconi pexainaevi yabara pelivaisi

31 Jesús tajëvelia navajunupaeba pacuenia itsamatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanë, Daxitajivi Pematapijinënë, icatsia itsa najetarucaenajë daxitanacua taevetsinexa, ángelevi nematatoyoronaeya yajavanajetarucaenajë. Nexata ecaenajë tajapenivenivenaetronovënëjavata.

32-33 Nexata daxitanacuanëpiviji caetuatsianatsi taitabarata. Tsauponaeenajë bajarapamonae. Oveja pevetsinë ovejavecua chivo saicaya tsatapona. Nexata oveja pevetsinë petsavenonenia chivo nubenaeyaexana. Pecujanenia pijinia oveja nubenaeyaexana. Bajara pijinia pacuenia xanë tsataponaenajë Dioso apo pejumecovënëtsivi, Dioso pejumecovënëtsivivecua. Dioso apo pejumecovënëtsivi tatsavenonenia nubenaeyaexanaenajë. Dioso pijinia pejumecovënëtsivi tacujanenia nubenaeyaexanaenajë.

34 Nexata jumaitsinë tsane tacujanenia penubenaevijavabelia, Dioso pejumecovënëtsivi: “Naxanitsia. Paxamë taxa papecaitaxutotsoniataevi. Payajavajinavanapaename taxa pijanacuatatsia, itsajotatsia pacatoxaniavaeta tajëvelia. Dioso pacatoxaniavaeta nacua pexanaejavaveliacujinae.

35 Itsa tajani, paxamë taxaejava panerajutame. Itsa mera jitsipajë, panerajutame mera. Itsanaxaverena itsa patajë, panecopiapitame xaniavaetsia.

36 Itsa ajibi bitso tanaxatatsijava, panerajutame tanaxatatsijavanexa. Itsa avitanenë, papatame patanevetsinexamë. Itsa neeta penaneconitsivi pejebabiabibota, papatame patanetaenexamë,” janë tsane tacujanenia penubenaevijavabelia.

37 Nexata bajarapamonae nejumai tsane: “Tajatuxanenë, ¿detsa pacujinae niajanijavata patajacarajutsi nexaejava?” nejai tsane. ¿Detsa pacujinae mera nejitsipaejavata patajacarajutsi mera? nejai tsane.

38 Itsa jume, nejumai tsane: “¿Detsa pacujinae itsanacuaverena nepatsinē patajacacopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae piajibijavata bitso nenaxatatsijava patajajarajutsi nenaxatsijavanexa?” nejai tsane.

39 Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane.

40 Nexata xanē jumaitsinē tsane bajarapamonaejavabelia: “Xaniajanē pacuenia pacatsipaebijitsiatsi. Daxita xua patoexaname paneyavenonaenexa tajajiviyajuvēnjivi, beveliajamatabēcuenevi petaevitsijavabelia, bajaraxua xanē taniji xanējavaberena bepatanetoexanaejavamē,” janē tsane.

41 Nexata tatsavenononia penubenaevi, Dioso apo pejumečovēnētsivijavabelia, jumaitsinē tsane: “Panevecuanatsare panijaneconi paneyajavajinavanapaevi. Paponaremelia apo peverevere caeisotojavabelia. Bajarapaisoto Dioso tajēvelia toxaniavaeta dovathinexa, dovathi pijajivinexa ata.

42 Xanē itsa tajani, paxamē apo panerajutsimē taxaejava. Itsa mera jitsipajē, apo panerajutsimē mera.

43 Itsanacuaverena itsa patajē, apo panecopiapitsimē xaniavaetsia. Itsa ajibi bitso tanaxatatsijava, apo panerajutsimē tanaxatatsijavanexa. Itsa avitanenē, apo papatsimē patanevetsinexamē. Itsa neeta penaneconitsivi pejebabiabibota, apo papatsimē patanetaenexamē,” janē tsane tatsavenononia penubenaevijavabelia.

44 Nexata bajarapamonae pijaneconi peyajavajinavanapaevi nejumai tsane: “Tajatuxanenē, ¿detsa pacujinae nijanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinē, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponanē patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota pecaetsijavata, apo paponanē patacataenexa?” nejai tsane bajarapamonae.

45 Nexata xanē jumaitsinē tsane bajarapamonaejavabelia: “Xaniajanē pacuenia pacatsipaebijitsiatsi. Bajarapacuenia itsa apo patoexanaemē paneyavenonaenexa tajajiviyajuvēnjivijavabelia, nexata bajaraxua xanē taniji xanējavaberena apo patanetoexanaejavamē,” janē tsane pijaneconi peyajavajinavanapaevijavabelia.

46 Bajaraxuacujinae bajarapamonae ponaena penaneconitsiajinavana-paenexa daxitamatacabijavabelianexa. Pamonae Dioso pejumecovēnētsivi, bajarapamonae Dioso rajutsianatsi matababi apo peverevere caejava, jai Jesús pijajivijavabelia tajēvelia penavajunupaebijavata itsamatababi penaneconitsiaexanaejavanexa pijaneconi pexinaevi, pamatababi icatsia patsianica.

26

Pacuenia picani Jesús pijavajabitsaē jamatabēvaetabatsi yabara pelivaisi (Mr 14.1-2; Lc 22.1-2; Jn 11.45-53)

¹ Itsa baja Jesús najumevereta pijajivijavabelia livaisi petsipaebijava, Jesús icatsia tajëvelia navajunupaeba itsamonae cruzajavabelia pecobematabiabarutsijavanexatsi. Jesús jumaiti pijajivijavabelia mapacueniaje:

² –Payapëtaneme rabaja anijamatacabibeje pesajinaejava pejonenexa baja pascuavënëfiesta. Nexata xanë, Daxitajivi Pematapijinënë, necana-jetsiana itsamonae pecobeyabelia tanecobematabiabarutsinexa cruzajavabelia, jai Jesús pijajivijavabelia tajëvelia penavajunupaebijavata cruzajavabelia pecobematabiabarutsijavanexatsi.

³ Nexata bajarapaepatota nacaetuata sacerdotevi penamatacaitorobivi. Nacaetuata judiovi pecujarubivina. Nacaetuata judiovi pijaancianovina. Daxita bajarapamonae nacaetuata Caifásvënëñë pijaboxanetota. Bajaraponë Caifás, sacerdotevi pepo penamatacaitorobinë. ⁴ Bajarajota daxita bajarapamonae najumejaita. Penajumetsënëtsilivaisita picani Jesús jamatabëvaetabatsi pebeyaxuabinexatsi.

⁵ Itsiata bajarapamonae najumaiti:

–Fiestajavata meta abaxë apo vaetabi tsanetsi jivi vajanacaitsacueni-abiyani, najai daxita bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi

(Mr 14.3-9; Jn 12.1-8)

⁶ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi.

⁷ Nexata Jesús petiriva cobenaimoxoyorenatsi petuxujuviaceitera, alabastrobellabëta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsimataepanaicatsi bajarapaaceitera.

⁸ Nexata Jesús pijajivi itsa taeyena Jesús petsimataepanaejavatsitsica bajarapaaceitera, Jesús pijajivi jamatabëcueneanaepanareca. Nexata ëpamonae najumai tsenae:

–¿Detsa xuajitsia saya xuaba bajarapacuenia maporaje?

⁹ Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

¹⁰ Nexata Jesús jumetane bajarapacuenia pijajivi pejumaitisijava. Nexata Jesús jumaiti pijajivijavabelia:

–¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje.

¹¹ Daxitamatacabi raja bepejiobivi jinavanapa itsaxuayo pajinavana-pame. Itsiata baitsi jane xanë daxitamatacabi apo ponaponaenë tsane pxamëjavata.

¹² Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae.

¹³ Xaniajanë pacuenia pacatsipaebijitsiatsi. Daxitanacuanëjiva taja-jivi itsa paebanajetarubenaena pexanialivaisi jivi tacapanepaelivaisinexa, vajunupaebabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Judas Jesús yajumejailia pijavajabitsaë pecobeyabelia pecanajetsinexa yabara pelivaisi

(Mr 14.10-11; Lc 22.3-6)

¹⁴ Jesús pijajivi, doce ponëbejeyajuvënënë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi.

¹⁵ Nexata Judas jumaitsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatänänë, bitso penamatamotsinänë.

¹⁶ Nexata bajaraxuacujinae Judas Jesús naitaxutocaevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabi-jävënaetsi yabara pelivaisi

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Junua jane baja fiesta, pafiestajava judiovi baxane levadurata matajërëabinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponanajë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

¹⁸ Nexata Jesús jumaitsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainaenëjavabelia mapacueniaje: “Vajanacacujarubinë raja jumaitsi: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxaenexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainaenëjavabelia, jai Jesús pijajivijavabelia.

¹⁹ Nexata baja Jesús pijajivi pona pacuenia Jesús jumaitsi. Nexata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jane baja.

²⁰ Nexata baja ajena meraviyotsia, Jesús pijajivi, doce ponëbeje, barëca mesa muxuneneta.

²¹ Nexata pexaeyenaevavata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

²² Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

²³ Nexata Jesús jumaitsi pijajivijavabelia:

—Ponëbeje peneta caeuenia panajuacajabutsianajëbeje panbë platojavabelia, bajaraponë necanajetsiana tajavajabitsaë pecobeyabelia.

²⁴ Xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pini-jicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia Judas yabara.

25 Nexata Judas, ponë jane baja canajetsijtsiatsi Jesús pijavajabitsaë pecobeyabelia, jumaitsi:

—Petuxanenë, ¿xanë tsaja tsane? jai.

Nexata Jesús jumaitsi:

—Jājā, xamë rabaja tsane, jai.

26 Pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

27 Bajaraxuacujinae icatsia Jesús copavënëjavata yapita piapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamë maporaje.

28 Tsipaji tajana othopaena jivi ayaibitsaëttoxaneto pibisiacuene pexanaeneconi pevecuaajibiaexanaenexatsi. Nexata tatëpaejaya pejamatabëcueneta, jivi yapëtaena pepacune xaniajai Dioso jivi peca-panepaejavanexa, pacuenia baja cajena tajëvelia Dioso najumecapanepaeya jumaitsi.

29 Xaniajanë pacuenia pacatsipaebijitsiatsi. Xanë rabaja mapanacuataje matavëjëa apo apaenë tsane uvacuaiira, matapania icatsia pejanauvacuaiira pacayajavaapaenatsi taxa pijanacuatatsia, jai Jesús pijajivijavabelia pe-NAVAJUNUPAEBIJAVATA PEbEXUABIJAVANEXATSI.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi (Mr 14.26-31; Lc 22.31-34; Jn 13.36-38)

30 Jesús pijajivi barënaXëana Diosojumevajanë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona.

31 Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaët nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename.

32 Itsiata baitsi jane tatëpacujinae, icatsia asaënë tsane. Nexata paxamë panevajënaeyabelia, copiata ponaenajë Galilea nacuyabelia, jai Jesús pija-jiVijavabelia.

33 Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxu-abatabajiravi tsanetsi, jai Pedro.

34 Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, naniaaevëpata, vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

35 Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanívnëjavata yabara pelivaisi (Mr 14.32-42; Lc 22.39-46)

³⁶ Jesús pijajivi pecunuameravita yajavapata Getsemanívnëjavata. Bajara-jota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

³⁷ Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia mapamatabëxëyoje. Pedro, Santiago, Juan, bajarapamatabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjjobireca.

³⁸ Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatabëxainajava, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

³⁹ Nexata Jesús caenë pevajënaeyabelia icatsia tsiquirijavayo ponataba. Nexata Jesús irataeya bocajunua pevajëtsinexa Diosojavabelia. Jumaitsi Diosojavabelia:

—Taxa Diosomë, netocopatame picani tanebeyaxuabinexa betajobicueneta. Daxitacuenë raja cacaëjëpa nexanaenexa. Nexata necapanepare bajarapabejjobicuevecua. Itsiata xanë apo tajitsipaecuenë ata, pacuenia xamë jitsipame, netocopatsianame, jai Jesús Diosojavabelia pevajëtsijavata pebeyaxuabijavanexatsi.

⁴⁰ Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaëjëpae tsabaja rovia caeepatoyo ata paneaitavatsenaenexa?

⁴¹ Pëtsa pamajitame. Paitavamëre. Pavajëre Diosojavabelia papecayavenonaenexa pibisiacuene paneexanaeyaniva. Tsipaji raja dovathi pacajamatabëcueneëjëbiana. Pëxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

⁴² Nexata icatsia Jesús pona pecovëyabelia pevajëtsinexa icatsia Diosojavabelia. Vajëta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajobicueneta tatëpaejavanexa, nexata pacuenia jitsipame, netocopatsianame, jai Jesús Diosojavabelia.

⁴³ Bajaraxuacujinae Jesús icatsia naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana.

⁴⁴ Nexata abaxë bajarapamonae pemajitanubenaevajavata, Jesús icatsia pona pecovëyabelia pevajëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xuabeje vajëta.

⁴⁵ Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsijitsia pibisiacue ne pexanaevi pecobeyabelia.

⁴⁶ Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

*Pacuenia Jesús vaetabatsi pijavajabitsaë yabara pelivaisi
(Mr 14.43-50; Lc 22.47-53; Jn 18.2-11)*

⁴⁷ Jesús pijavajabitsaë pevaetabijavatanexatsi, cuaicuaijai tsanucæ pija-
vijavabelia. Nexata bajarapaepatota patanajetaruca Judas, Jesús pijajivi
doce ponëbejeyajuvënëñemi. Judas pënanajetarubenatsi jivi ayaibitsaëtoxaneto.
Bajarapamonaeyajuvënëvi itsamonæ canajetarubena espadanë. Itsa-
monæ canajetarubena naebonë yajava. Bajarapamonæ itorobatsi sacer-
dotevi penamatacaitorobivi, judiövi pijaancianovinua.

⁴⁸ Judas pebarërenavajënae bajarapamonæ, copiaya baja cajena Judas
tsipæba pacuenia bajarapamonæ yapëtaejitsia Jesúsucue. Judas jumaitsi
mapacueniaje:

—Ponë raja peneta bajacobiaya itabaratsutsunexuabianajë, bajaraponë
Jesús tsane. Bajaraponë pavaetabianame. Pacobecëtsiana xaniavaetsia, jai
baja cajena Judas pematacanajetarucaevijavabelia pebarërenavajënae.

⁴⁹ Nexata jane baja Judas itsa patanajetaruca, exana pacuenia jumaitsi pe-
matacanajetarucaevijavabelia. Judas Jesús itabaratsutsuniaya bajacobatsi
Judas jane baja pematacanajetarucaevi pepapëtaenexa Jesúsucue.

⁵⁰ Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi.
Cobecëtsi xaniavaetsia pecaponaenexatsi.

⁵¹ Bajarajota Jesús pijajiviyajuvënëñë pijaespada navemarajonotaxu-
abina. Muxuyoropaebiaxuaba sacerdotevi pepo penamatacaitorobinë pija-
jivitonë.

⁵² Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tsipaji pamonæ na-
maxëvanita espadata, daxita bajarapamonæ juya espadata babiatsi, jai
Jesús.

⁵³ Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa
tanetoitorobinexatsica, nexata tavajëtsiepatota netoitorobijitsipaica bitso
ayaibitsaëtoxanetonë angelevi.

⁵⁴ Itsa vajëtsipajë taxa Diosojavabelia tanetoitorobinexatsica
taneyavenonaevinexa, nexata baja apo netocopiapatsi tsipæ pacuenia
Dioso pejumelivaisibaxutota tajëvelia nevajunupaeba pacuenia
nevaetabijitsia tanebeyaxuabinexa, jai Jesús pijajivitonëjavabelia.

⁵⁵ Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata
pacaponame espadanë, naebonë yajava, patanevaetabinexamë pacuenia
pavaetababiabame penacobetoxotsinë. Xanë caematacabi canacujitsia
Dioso pejumelivaisi paxamëjavabelia pacatsipaebabiabatsi templobota.
Itsiaata bajarapamatacabi apo panevaetabimë.

56 Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús tajëvelia jumaitsi pijajivijavabelia.

Pacuenia Jesús nutatsi judíovi penamatacaitorobivi pitabarata yabara pe-livaisi

(Mr 14.53-65; Lc 22.54-55, 63-71; Jn 18.12-14, 19-24)

57 Jesús pevaetabivitsi caponaliatsi Caifás pijaboyabelia. Bajaraponë Caifás sacerdotevi pepo penamatacaitorobinë. Nexata Caifás pijabota naeactuana judíovi pecujarubivi, judíovi pijaancianovi yajava.

58 Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajarajota Pedro naeca petaenexa pacuenia Jesús pijavajabitsaë exanatsi.

59 Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuajjai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinoxatsi.

60 Ayaibitsaëto pata penajumetsënëtsilivaisi pepaebinexa Jesús yabara. Itsiata caelivaisi ata najumejëpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumejëpaeya neconitatsibeje.

61 Jumaitsiibeje bajaraponëbeje Jesús yabara:

—Maponë jumaitsiije: “Xanë necaëjëpa taxuabinoxatsica Dioso pijatemplobo. Necaëjëpanua acueyabi matababita icatsia taveretetsinexa itsabo,” jai maponëje, jaiibeje bajaraponëbeje Jesús yabara.

62 Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia maponëbeje caneconitsiajumaitsiibeje? jai sacerdotevi pepo penamatacaitorobinë.

63 Jesús itsiata moya. Nexata bajaraponë icatsia jumaitsi Jesúsjavabelia:

—Caitorobatsi caecuenia tanenavajunupaebinexamë nexaniajajumeta. Itsjame, Diosojavabelia naneconitsianame. Panenavajunupaebare xaniavetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

64 Nexata Jesús jumaitsi:

—Jājā, xanē rabaja pacuenia nejumaitsimē. Nexata icatsia pacajumait-sitsi. Paxamē raja panetaename xanē, Daxitajivi Pematapijinēnē, taecae-
java Dioso pecujanenia, daxitajamatabēcuene pecajējēpaenētsi. Panetaena-
menua tanajetarucaejava athēbēvetsica itarērēbota, jai Jesús.

⁶⁵ Bajarapacuenia Jesús pejumaitsijava itsa jumatane, sacerdotevi pepo
penamatacaitorobinē penaxatatsijava aneaya titinaxuaba. Bajarapacuenia
titinaxuaba pianaepanaexae Jesús pejumaitsijava yabara. Nexata sacer-
dotevi pepo penamatacaitorobinē jumaitsi daxita penacaetuatsivijavabelia:

—Mara ponē Dioso apo pejitsipacuenia cuaicuajijaije. Dioso bapexēnato
nataeya cuaicuajiai. Pijacuata rabaja naneconita bajarapacuenia
pecuaicuajiaixae. Pematatsēnēa baja apo namatavenonaetsi itsamonae
vajanacatsipaebinexa paneconi yabara maponēje naneconitsiaexanaejitsi-
atsi. Paxamē rabaja pajumetaneme maponēje Dioso apo pejitsipacuenia
pecuaicuajijajava.

⁶⁶ ;Detsa nexata paxamē pajamatabēitsimē? jai sacerdotevi pepo penamat-
acaitorobinē daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai
bajarapamonae Jesús yabara.

⁶⁷ Nexata bajarapamonae Jesús itabarasuabatsi. Bajaraxuacujinae
papaēbērēpanata itaxutocētatsi. Pitaxutocētsicujinaetsi itabarat-
saquibabeponatsi pecobethaitonēta. Itsamonae itabarapacabiauxuababi-
abātsi.

⁶⁸ Nexata bajarapamonae jumai tsaponae Jesúsjavabelia:

—¡Xamē raja itsa Cristomē, athēbēvetsica Dioso itsa pecaitorobinētsica jivi
necapanepaenexa, nexata vēnējonare ponē caitabarapacabiauxuaba! jai
tsaponae bajarapamonae.

*Pacuenia Pedro nayavajunuaxaina Jesús pijajivitonēcuene yabara pelivaisi
(Mr 14.66-72; Lc 22.56-62; Jn 18.15-18, 25-27)*

⁶⁹ Itsa abaxē Jesús sacerdotevi pepo penamatacaitorobinē pijabo
ēnētuaajēalia yanijobaponatsi xua yabara naneconitsiaexanaejitsiatsi,
Pedro naitaxutocaevetsiaya naeca bopanabota. Nexata bajarapabota
penacuenebiva Pedro kujirenatsi. Bajarapova jumaitsi Pedrojavabelia:

—Xamē ata rabaja naponaponame Jesúsata, Galilea nacuapijinēta, jai.

⁷⁰ Nexata Pedro itsiata nayavajunuaxaina Jesús pijajivitonēcuene. Daxita
bajarajota penubenaevi pitabarata Pedro jumaitsi:

—Xanē cajena apo yapētaenē pacuene yabara nejumaitsimē, jai.

⁷¹ Sacerdotevi pepo penamatacaitorobinē pijabo matatoyorotsia
yacaranata ibopanaxanetonē mataropotsia pefaratsijavaxanetoneta. Nexata
bajarapayacaranatsijavaxaneto baupajavabelia Pedro natixilia. Nuca
bajarapabaupa muxuneneta. Bajarajota icatsia itsava, bajarapabota
penacuenebiva, Pedro taenutatsi. Nexata bajarapova ata Pedro yabara
icatsia jumaitsi bajarajota penubenaevijavabelia:

—Mara ponē ata naponapona Jesúsataje, Nazaret tomarapijinēta, jai bajara-
pova.

⁷² Nexata icatsia Pedro nayavajunuaxaina Jesús pijajivitonēcuene. Pedro
jumaitsi:

—Xaniajanē. Dioso pitabarata cajumaitsitsi. Apo yapētaenē cajena bajara-
ponē, jai.

⁷³ Bajaraxuacujinae icatsia, caeepatoyocujinae, bajarajota penubenaevi
cujibarēcēpaliatsi Pedro. Jumaitsi bajarapamonae:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacupijivi penatsipaebicuenia natsipaebame, jai bajarapamonae Pedrojavabelia.

⁷⁴ Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba.

⁷⁵ Nexata bajarajota Pedro najamatabënapitajaraba Pedrojavabelia Jesús pejumaitsijava mapacueniaje: “Ajena rabaja, pameravi, vacara pefiabi-vajënaeya, javavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Pinijicuenia Pedro nua.

27

Pacuenia Jesús caponaliatsi Pilatojavabelia yabara pelivaisi
(Mr 15.1; Lc 23.1-2; Jn 18.28-32)

¹ Ajena baja matababi tsarucaponae, sacerdotevi penamatacaitorobivi, judíovi pijaancianovi yajava, najamatabëjépa pacuenia exanaeijtsia Jesús pebeyaxuabiaexanaenexatsi.

² Nexata Jesús cobecëtsiaya caponaliatsi nacuaevetsinë Poncio Pilotojavabelia.

Pacuenia Judas nabeyaxuaba yabara pelivaisi

³ Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebeyaxuabinexatsi, nexata bitso najamatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamatamotsinëanë. Tocanaviatsijitsia sacerdotevi penamatacaitorobivijavabelia, judíovi pijaancianovijavabelia ata.

⁴ Judas jumaitsi bajarapamonaejavabelia:

—Pibisiacueña baja rovia exanajë. Bajaraponë itsacueñejavayo ata apo exanaeñejeva, panecobeyabelia baja canajetaxuabajë, jai Judas.

Nexata bajarapamonae jumaitsi Judasjavabelia:

—¡Paxanë raja patajamatabëcueneta apo naneconitsimë tsane! ¡Xamë raja nijacuata naneconitame! jai bajarapamonae Judasjavabelia.

⁵ Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëtoxanetota, athëbëvetsica jirevica irabetsica penacuibosi catarërëtarabaxuabinexa. Bajarapacuenia pijacuata Judas nabeyaxuaba.

⁶ Nexata sacerdotevi penamatacaitorobivi caetuata Judas piothotajara-betsipalatanëanë. Najumaitsi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapalata pejamatabëcueneta jivitonë beyaxuabijitsiatsi, najai bajarapamonae.

⁷ Nexata bajarapamonae najamatabëjépa bajarapapalatanëanëta pecomuatsinexa ira. Nexata bajarapamonae bajarapapalatanëanëta comuata

canalitonë pefaratabiabinë pijairami. Bajarapamonae comuata bajara-paira, itsanacuaverena pepatsivi itsa tēpa Jerusalén tomarata, bajarapairata peméthetabiabinexa.

⁸ Bajaraxuata mapamatacabijavaberena ataje vënëruba bajarapaira mapejumaitsivënēje: “Papalata pejamatabëcueneta jivitonë beyaxuabatsi, bajarapapalatata pecomuatsiira,” pejaivënē vënëruba.

⁹ Bajarapacuenia itsa comuata bajarapaira, copiapata jane baja pacuenia Diosojumepaebinēmi profeta Jeremiaspijinë bajayata tajëvelia vajunupaeba bajarapapalata. Profeta Jeremiaspijinë baja cajena bajarapapalata yabara tajëvelia jumaitsi mapacueniaje: “Israelnacua pevetsivi rajutsiana jivitonë pecanajetsinējavabelia treinta ponēbeje, pepo platananitota pexanaenēanē. Bajarapapalatanēanē icatsia bajarapamonae pitsiana.

¹⁰ Nexata bajarapapalatanēanēta bajarapamonae comuatsiana canalitonë pefaratabiabinë pijairami, pacuenia Dioso tajëvelia nejumaitsi,” jai bajayata profeta Jeremiaspijinë tajëvelia pevajunupaebijavata Jesús pematamopitsi-palatanexatsi.

Pacuenia Jesús nutatsi Pilato pitabarata yabara pelivaisi
(Mr 15.2-5; Lc 23.3-5; Jn 18.33-38)

¹¹ Jesús nutatsi nacuaevetsinē Pilato pitabarata. Nexata Pilato jumaitsi Jesúsjavabelia:

—¿Xamē tsaja judíovi pepo nevetsinē? jai Pilato.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

¹² Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi.

¹³ Nexata Pilato jumaitsi Jesúsjavabelia:

—¿Apo jumetaemē tsaja pacuenia mapamonae caneconitaponaje? jai.

¹⁴ Jesús neconitsi atatsi, itsiata apo jumepitsi. Bajaraxuata Pilato jamatabëcuenenabenajaca. Apo yapētae pacuenia Pilato exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi yabara pelivaisi
(Mr 15.6-20; Lc 23.13-25; Jn 18.38-19.16)

¹⁵ Nacuaevetsinē Pilato xaina pijacujirucuenē. Caevai canacujitsia, pascua fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pajivi yabara jivi vajëtabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenē copatabiaba jivi pesivajamatabëcuene xanepanaenexatsi.

¹⁶ Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaponapona jivibenē, Barrabásvënēnē. Bajaraponē bitso piacujirubejenēcuene yapētanetsi daxitajivi.

¹⁷ Nexata daxita Jerusalén tomarapijivi penacaetuatsijavata Pilato jumaitsi:

—¿Detsa ponē pajitsipame patacatocapitsapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponē yabara jivi jumaitsi: “Cristo raja athëbëvetsica Dioso pitorobinëtsitsica jivi pecapanepaenexa,” jaitsi? jai Pilato bajarapamonaejavabelia.

¹⁸ Pilato jamatabëjumaitsi:

—Xua Jesús exanaponapona, sacerdotevi penamatacaitorobivi cueneitoyatsi. Bajaraxuata netocaparena, jamatabējai.

19 Pilato abaxē eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitsirena mapacueniaje: “Copare bajaraponē, ponē itsacueneneconiyō ata apo penaneconitsinē. Ajena raja, meravī, amajitsinae-bejenē bajaraponē yabara,” jaitsirena Pilato pijava. Nexata picani Pilato jamatabēcopata Jesús.

20 Itsiata baitsi jane bajarapaepatota sacerdotevi penamatacaitorobivi, judiōvi pijaancianovi yajava, jivijavabelia muxubijiapenetsia jumai tsaponae:

—Pavajētsianame Barrabás pecapitsapaenexatsi. Pavajētsianame Jesús pebeyaxuabinoxatsi, jai tsaponae bajarapamonae.

21 Nexata nacuaevecsiniē Pilato icatsia yanijoba jivijavabelia:

—¿Detsa ponē nexata pajitsipame patacatocapitsapaenexa? jai Pilato.

Nexata bajarapamonae jumaitsi:

—Panetocapitsapare Barrabás, jai.

22 Pilato nexata jumaitsi bajarapamonaejavabelia:

—¿Detsa nexata xua exanaenajē Jesúsjavabelia, ponē yabara: “Cristo, ponē Dioso athēbēvecsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonae.

23 Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajē cruzajavabelia? jai Pilato Jesús yabara.

Itsiata bajarapamonae icatsia pinijjumeta vavajai.

—¡Cruzajavabelia cobematabiabarutsiaexanare! jai tsaponae.

24 Pilato tane piajumesaējava bajarapamonae. Muxujiobi ata, apo jumecovēnētsitsi. Bitsoyo biji caranata bajarapamonae jamatabēnanaecajematapona bajarapatomarata. Nexata Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonae peyapētaenexa Jesús apo penaneconitsiaexanaecuene. Pilato jumaitsi bajarapamonaejavabelia:

—Xanē raja tajamatabēcueneta apo beyaxuabiaexanaenē tsane maponēje, pianeconijibinē. Paxamē panejamatabēcueneta pabeyaxuabiaexanaename, jai Pilato.

25 Nexata daxita bajarapamonae jumaitsi:

—¡Itsa bajaraponē pianeconijibinē Diosojavabelia, nexata bajaraponē patabeyaxuabineconi jema panetsijumajopaena, pataxi yajava! jai bajarapamonae Pilatojavabelia.

26 Nexata baja Pilato tocopata Barrabás pepitsapaenexa penaneconitsivi pejebabiabibovecua. Itorobanua vajabitsaēvi ayaicuenia Jesús pejumatitabbenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaēvi pecobematabiabarutsinexatsi cruzajavabelia.

27 Nexata baja Pilato pijajivi, vajabitsaēvi, Jesús caponaliatsi nacuaevecsiniē Pilato pijaboxanetojavabelia. Nexata bajarajota Jesús matatoyorotsia nacaetuafatsi daxita vajabitsaēvi.

²⁸ Jesús penaxatatsijava vajabitsaëvi vejumajonotatsi saicayajava pexatatsinexatsi. Nexata jane baja vajabitsaëvi Jesús quenetsiataeya xatatatsi petsobijava benacuaevevtsinëcuenia petaenexatsi.

²⁹ Becoronacuenia pemataxatatsinexatsi, peejuvityoroto tsmataexanatsi. Bajarapatoyoroto Jesús mataxatatsi. Tticoberutatsinua naebo pecujanenia benacuaevevtsinëcuenia petaenexatsi. Nexata bepeyaiyataecueniatsi bajarapamonae pematabacabëta tonubenatsi Jesús pitabarata. Quenetsiataeya jumai tsaponaeysi:

—¡Bajaco, judíovi pepo pevetsinë! jai tsaponaeysi bajarapamonae.

³⁰ Suabaponatsi. Vecuapitatsi naebo. Bajarapanaebota mataconita-jarabiabatsi.

³¹ Bajarapacuenia quenetsiataeya pecapocaponaecejinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mr 15.21-32; Lc 23.26-43; Jn 19.17-27)

³² Vajabitsaëvi Jesús itsa caponaliatsi tomaravecua, namutota caxitajaraba Simónvënëñë, Cirene tomarapijinë. Nexata vajabitsaëvi Simón itorobatsi, pacruzajavabelia Jesús cobematabiabarutsijitsiatsi, peyavenonaeyacaponaeixa.

³³ Jesús caponaliatsi Gólgotavënë tsutojavabelia, bajarapatsutojumata pecobematabiabarutsinexatsi cruzajavabelia. “Gólgota,” itsa jai hebreojumeta, mapajumetaje pejumaitisijume: “Jvivimatasipatsuto,” pejaijume.

³⁴ Bajarajota picani Jesús rajutatsi vinora, pematajerëbaira piatsaxarata. Jesús picani rajutatsi bitso penavixaetaeyaniva pecobematabiabarutsijavatsi cruzajavabelia. Jesús pajane bajarapora. Itsiata apo apae.

³⁵ Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami. Bajarapacuenia vajabitsaëvi itsa natsicobetsana Jesús penaxatatsijavami, tocopiapatatsi jane baja pacuenia Diosojumepaebinëmi profetanë bajayata tajëvelia vajunupaeba Jesús penaxatatsijava. Jesús penaxatatsijava yabara, profetanëmi bajayata tajëvelia jumaitsi mapacueniaje: “Natsicobetsanaena penaxatatsijava. Canamuxusitsiana beibotoxi peyapëtaenexa ponë pitaponaejitsia,” jai profetanëmi.

³⁶ Bajaraxuacujinae vajabitsaëvi bajarajota evetena penaitaxuto-caevetsinexatsi Jesús.

³⁷ Bajarajota Jesús pematabocoto matatsënëyo cruzajavata, yaquinaruta tablapayota itsamonae ata peyapëtaenexa pajamatabëcuene yabara naneconitsiaexanatsi Jesús. Jumai tsarutsi peyaquinaeitane cruzajavata mapacueniaje: “Mara ponë Jesúsje, judíovi pepo pevetsinë,” jai tsarutsi Jesús yabara.

³⁸ Anijanëbeje penacobetoxotsinëbeje Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenonenia rutatsi.

39 Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi.

40 Jumai tsabiabi bajarapamonae:

—Xamë raja imata jumaitsimë: “Xuabianicajë templobo. Acueyabi matacabita icatsia veretetsianajë itsabo,” jamë. Nacapanepare jane baja nijacuta. Itsa xaniajai Dioso pexënatomë, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

41 Bajara pijinia pacuenia sacerdotevi penamatacaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Ëpamonae najumaitsi:

42 —Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa apo caëjëpaetsi. Itsa xaniajai Israel nacuapijivi pepo pevetsinë, nexata aeconoxae cruzajavavetsica runaenica vajataenexa. Nexata jane baja jumecovënëtsianatsi Cristonëcuene.

43 Bajaraponë pina najamatabëcuenecopata Diosojavabelia peyavenon-aenexatsi. “Xanë raja Dioso pexënatonë,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeya Jesús yabara.

44 Ponëbeje penacobetoxotsinëbeje Jesús yajavacobematabiabarutatsi, bajaraponëbeje ata Jesús bijataerucatsibeje bajarapacuenia.

Pacuenia baja Jesús tēpa yabara pelivaisi

(Mr 15.33-41; Lc 23.44-49; Jn 19.28-30)

45 Jesús baja itsa tēpaejitsia, ajena matonejejitsia, daxita nacuanëjava aitaquri tsajuni. Matapania caniviyojavabelia, bejamatabëcuene a las tres, nacia napebeta icatsia.

46 Nexata paepatota icatsia nacia napebeta, bajarapaepatota pinijicuenia Jesús aëjai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsi-jume: “TajaDioso, tajaDioso, ¿detsa xuaajitsia baja tajaepato necopatame?” pejaijume.

47 Nexata itsamonae bajarajota penubenaevi bijiaya jumetane bajarapacuenia Jesús pejumaitsijava. Nexata saya jamatabëcuenenavëxaniabiaya jumaitsi bajarapamonae:

—Mara ponë junata profeta Elíaspijinëmi, Diosojumepaebinëmi, jai bajarapamonae.

48 Nexata bajarapamonaeyajuvënënë bepijia cujinaelia pecarenanexa esponjavënëjava. Nexata esponjavënëjava jabutaba piajatuvivorayalia. Bajaraxuacujinae esponjavënëjava naeboupita cëtaruta. Toyotsiatsi Jesús pet-sutsuninexa picani bajaraxua.

49 Itsiata itsamonae jumaitsi:

—Copare abaxë. Taenatsi Elíaspijinë itsa najetaruca pecapanepaenexatsi, jai bajarapamonae capocaponaeya.

50 Icatsia Jesús pinijicuenia aëjai. Bajaraxuacujinae jane baja Jesús tēpanajereca.

51 Paepatota Jesús tēpanajereca, bajarapaepatota templobo ënëtuatujëalia peyatuuutarutsipana, ayaipapaëbërëpanaxaneto, titititica tuatujëareca, athëbëvetsicacujinae irabereca. Ira najëaba. Ibotoxanetonë ata sarapajunujunua.

52-53 Ayaibitsaëto Dioso pepua pejumecovënëtsivi petëpaevimi pemëthëanë ata napananubena. Nexata Jesús acueyabi maticabita icatsia itsa asaë petëpaeucujinae, pamonaë pemëthëanë napananubena, bajarapamonae ata cotocaevi asaë. Nexata pitsapa mëthëvetsina. Nexata bajarapamonae pona Jerusalén tomarabelia. Bajarajotalia naitajëbapona jivi ayaibitsaëtojavabelia.

54 Jesús cruzata petëpaejavata vajabitsaëvi pijacapitán, pijajivi yajava, nuca. Taenubena Jesús petëpaejava. Jesús petëpaejavata ira najëaba. Nexata bajarapamonae itsa tane ira penajëabijava, itsajavanë ata itsa taepona, bajarapamonae bitso junava. Jumaitsi:

—Matsaena ponë tãpaje, pepacuene baja rovia Dioso pexënato, jai bajarapamonae.

55 Bajarajota petiriavibitsaëtoxaneto tajiyoverena taenubena Jesús petëpaejava. Bajarapapetiriavi Jesús pepëta napona Galilea nacuaverena, Jesús peyavenonaevimitsi.

56 Bajara papetiriavibitsaëtoxaneto tuatuajëta nanubena mapamatabëxëyoje. Itsava Mariävënëva, Magdala tomarapijiva. Itsava icatsia Mariävënëva. Bajarapova Santiagobeje Josébeje pena. Itsava pijinia Salomévänevã. Bajarapova pijinia Santiagobeje Juanbeje pena. Bajarapova Salomévänevã, Zebedeo pijava.

Pacuenia Jesús petëpaenë mëthëtatsi yabara pelivaisi

(Mr 15.42-47; Lc 23.50-56; Jn 19.38-42)

57 Itsa baja caniviyotsia, José, Arimatea tomarapijinë, pona nacuaevevtsinë Pilatojavabelia. Bajaraponë José bitso pexainaenë pexinaejava. José jumecovënëtaponapona Jesús Cristocuene.

58 Nexata José itsa pata nacuaevevtsinë Pilatojavabelia, vajëta petocopatsinexatsi pemëthëtsinexa Jesús petëpaenë. Nexata Pilato itoroba pijajivi petocopatsinexatsi.

59 Nexata José cruzajavavetsica pitsica Jesús petëpaenë. Mataquion-aeya daxitanëreca maticacëba pexaniaviria piapiasábanapanata, piaxuirajibipanata.

60 Bajaraponë José, pamatacabi tãpa pemëthëtsinexatsi picani, iboitapajanitovavata pinijiibovaju toexanabuatatsi cajena. Nexata bajarapaibovajulia José buata Jesús petëpaenë. Nexata bajaraxuacujinae pinijiibopanaxaneto José tixirena. Yavajuvëpaacatabuata. Nexata baja José naviata pijaboyabelia.

61 Bajarajota ibovaju itapajavata eecabeje anijavabeje ëMariävënëvabeje. Itsava María, Magdala tomarapijiva.

Pacuenia vajabitsaëvi Jesús pemëthë evetavanapa yabara pelivaisi

62 Pascuafiesta pejonematacabinexa pevajënaeya pamatacabi, judíovi baja banacuenevereta penacuenebijava. Nexata baja pamatacabi judíovi banacuenevereta penacuenebijava, bitso baja itsa caniviyotsia, sacerdotevi penamatacatorobivi, fariseovi ata, ponalia Pilatojavabelia.

63 Nexata bajarapamonae jumaitsi Pilatojavabelia Jesús yabara:

—Pamatacabi abaxë bajaraponë asaë tsaponaponae bitso najumetsënëtabiaba. Jumai tsabiabi: “Tatëpaeucujinae, acueyabi maticabita, icatsia asaënë tsane,” jai tsabiabi. Bajarapejumaitsijava paxanë apo panacofënëtsinë.

64 Nexata nijajivi itorobare bajaraponë pemëthë xaniavaetsia pevetsinexa. Nexata nijajivi bajaraponë pemëthë xaniavaetsia evetsiana acueyabi maticabijavabelia, bajaraponë pecapaebimaticabijavabelia.

Nexata acuenebi tsane pijajivi meravi pejutsinexatsi mēthēvecua. “Namatacota rabaja Jesús,” pejaijava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsēnētsipa copiaya Jesús penajumetsēnētsijava matatoxenetsia. Nexata bajarapacuenia yamaxēitorobijitsipa jivi ayaibitsaētoanaxeto, jai bajarapamonae Pilatojavabelia.

⁶⁵ Pilato nexata jumaitsi bajarapamonaejavabelia:

—Mapamonae tajajivi, vajabitsaēvije, payajavaponare. Nexata paitorobare bajarapamonae Jesús pemēthē pevetsinexa xaniavaetsia, jai.

⁶⁶ Nexata bajarapamonae vajabitsaēvi barēponalia Jesús pemēthējavabelia. Bajarapamonae pemaētoupi catsataruta Jesús pebuatsiibovajutsi pevēpaacatsiibopanajumata. Itsaupi pijinia catsata ibotapajanitovabelia. Bajarapacuenia exana peyapētaenexa petixitsijava muetsia Jesús peyavajuvēpa acatabuatsiibopanatsi. Bajaraxuacujinae itoroba vajabitsaēvi Jesús pemēthēvēpa pevetaavanapaenexa.

28

Pacuenia Jesús petēpaecujinae icatsia asaē yabara pelivaisi
(Mr 16.1-8; Lc 24.1-12; Jn 20.1-10)

¹ Judīovi baja penacueraevetsimatacabi ita verevereca, meravia pitsijavata, bajayacunua, ajena matacabi tsarucaponae, María, Magdala tomara-pijiva, itsaMaría yajava, taeyojopaliabeje Jesús pebuatsiibovajutsijavabelia.

² Jemata ira najēaba. Tsipaji Dioso pijaängel runaica athēbēvetsica. Angel ita pata Jesús pebuatsiibovajutsijavata, tixita Jesús peyavajuvēpa acatsiibopanaxanetomi. Bajaraxuacujinae ángel eca bajarapaibopanajumata.

³ Bajaraponē ángel naitayota. Pacuenia yamaxēcotia itsi, bajara cotiaitsi ángel. Penaxatatsijava niojai daxita peniojaijava matatoxenetsia.

⁴ Vajabitsaē, pamonae evetanubena Jesús pebuatsiibovajutsivēpa, ita tane ángel, neconecojai pecajunavi. Bobenajunua bepetēpaevi.

⁵ Nexata ángel jumaitsi petirivabejejavabelia:

—Pētsa pajunavamebeje. Yapētaniji xua yabara paponamebeje. Jesús pecobematabiabarutsinēmitsi cruzajavabelia, pajaitamebeje.

⁶ Ajibi raja tsarucae majotaje. Asaē rabaja icatsia pacuenia baja cajena tajēvelia jumaitsi. Parenamērebeje panetaenexabeje itsajota picani buatatsi.

⁷ Bajaraxuacujinae paliamēbeje tsane bepijia. Pijajivijavabelia patsipaebianamebeje mapacueniaje: “Petēpaenēmi rabaja icatsia asaē. Panevajēnaeyabelia pina pona Galilea nacuayabelia. Baja pina jotalia pacaxitajarabianame,” pajamēbeje tsane pijajivijavabelia. Bajarapalivaisiyo xainajē patacatsipaebinxabeje, jai ángel bajarapovabejejavabelia.

⁸ Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barēyabeje bitso. Cujinaetabajiravabeje petsipaebinxabeje Jesús pijajivijavabelia.

⁹ Bajarapovabeje namutualia pecujinaejinaenajetarucaejavatabeje, Jesús jemata tsitanaitajētatsibeje. Nexata bajarapovabeje kujitabaliabeje Jesúsjavabelia. Bajacobatsibeje. Nexata pematabacabēta nucajunuabeje. Sitacaliabeje yayiatoya Jesús pecopiapitsinexabeje bajarapacuenia.

¹⁰ Jesús nexata jumaitsi bajarapovabejejavabelia:

—Pētsa pajunavamebeje. Paliamērebeje tajajivijavabelia. Pajumaitsimēbeje tsane tajajivijavabelia: “Jesús raja jumaitsi. Paponaremelia pina

Galilea nacuyabelia. Baja pina jotalia pacacaxitarabiana Jesús,” pajamēbeje tsane tajajivijavabelia, jai Jesús.

Pacuenia vajabitsaēvi navajunupaeba yabara pelivaisi

¹¹ Paepatota ēMariāvenēvabeje naviatabeje Jesús pebuatsiibovajutsi-javavelia, vajabitsaēvi, Jesús pemēthē pevetsiviya-juvēnēvi, pona tomara-belia. Bajarapamonae tsipaeba sacerdotēvi penamatacaitorobivijavabelia pacuenia tanē bajarapamonae.

¹² Nexata sacerdotēvi penamatacaitorobivi pona judío-¹vi pijaancianovijavabelia penabarēcuaiacuajainexa penajamatabējēpaenexa pacuenia exanaejitsia. Nexata jane baja bajarapamonae najamatabēcuenejēpa. Nexata bajarapamonae rajuta ayaijava palata vajabitsaēvijavabelia.

¹³ Bajarapamonae jumaitsi vajabitsaēvijavabelia:

–Jivijavabelia pajumaitsimē tsane: “Meravi pataitamajitsita, Jesús pijajivi pata. Nexata bajarapamonae juta Jesús petēpaenē,” pajamē tsane.

¹⁴ Nexata nacuae-¹vetsinē Pilato itsa jumetaena mapajumeje, paxanē itsiata pacayavenonaenatsi itsacuene papecaexanaeyaniva, jai bajarapamonae vajabitsaēvijavabelia.

¹⁵ Nexata vajabitsaēvi jejai. Nota bajarapapalata. Nexata jane baja vajabitsaēvi pona najumetsēnētsiaya jivijavabelia pejumaitsinexa pacuenia itorobatsi. Nexata vajabitsaēvi najumetsēnētsiaya jumai tsaponae jivijavabelia:

–Meravi pataitamajitsita, Jesús pijajivi pata. Nexata Jesús pijajivi petēpaenē jutatsi, jai tsaponae jivijavabelia.

Bajarapacuenia vajabitsaēvi pepaebixae, judío-¹vi juya bajarapacuenia natsipaebapona. Nexata mapamatacabijavaberena ataje judío-¹vi jumai tsabiabi:

–Jesús pijajivi petēpaenē jutatsi, jai tsabiabi.

Pacuenia Jesús petēpaecujinae icatsia itsa asaē, pijajivi itoroba pejumelivaisi jivi petotsipaebanajetarubenaenexatsi daxitanacuanējava yabara pelivaisi
(Mr 16.14-18; Lc 24.36-49; Jn 20.19-23)

¹⁶ Jesús pijajivi once ponēbeje pona Galilea nacuyabelia. Jesús pijajivi pona petsutojumabelia, patsutojumatalia Jesús caxitajarabiapabatsi.

¹⁷ Nexata bajarapatsutojumata Jesús pijajivi itsa taenuta Jesús, yaiyataeya pitabarata pematabacabēta tonubena. Itsiata itsamonae Jesús pijajiviya-juvēnēvi jamatabēcuenenavēxaniabiaya jamatabējumaitsi:

–Apo Jesús meta, jamatabējai.

¹⁸ Nexata Jesús pijajivi kujirena. Jumaitsi pijajivijavabelia:

–Dioso baja cajena nevētsiaexana daxitacuene athēbētatsia, daxita mapanacuajava ataje, taevetsinexa.

¹⁹ Nexata pacaitorobatsi. Paponare daxitanacuanējava daxitanacuanēpijivi tajumelivaisi patanetotsipaebinexamē tanejume-covēnētsinexa. Bajarapamonae pabautisabaponaename taxa pevēnēta, xanē ata pexēnatonē tavēnēta, Espiritu Santo ata pevēnēta.

²⁰ Bajarapamonae patsipaebaponaename pejumecovēnētavanapaenexa daxita pacuenia pacaitorobatsi. Pētsa panacofēnētame daxitamatacabi patacayavaponaponaenajava. Nacua peverevereacejavabelianexa ata pacayavaponaponaenatsi, jai Jesús pijajivijavabelia.

Pexanialivaisi Jesucristo pelivaisi, San Marcos peyaquinaelivaisi

Pacuenia Juan jivibautisabinë jivi livaisi tsipaeba petusato nacuata yabara pelivaisi

(Mt 3.1-12; Lc 3.1-9, 15-17; Jn 1.19-25)

¹ Mara pacuenia taxuxuaba pexanialivaisi, Jesucristo Dioso pexënato pelivaisije.

² Bajayata Diosojumepaebinëmi, profeta Isaíaspijinë, tajëvelia yaquina Dioso pejumaisijava pexënatojavabelia. Dioso jumaitsi pexënatojavabelia mapacueniaje:

Itorobianajë nevajënaeyabelia tanejumulivaisipaebinënexa. Catsi-vajënaexanebijitsia nijanamuto.

³ Nexata tanejumulivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejitsia petuxanenë. Batoroviaexananua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya paxamëjavaberena,” jai tsane tanejumulivaisipaebinë xamë yabara, jai bajayata tajëvelia Dioso pexënatojavabelia pejumaisijava Juan jivibautisabinë jivijavabelia Dioso pejumelivaisi petsipaebanajetarucaejavanexa yabara.

⁴ Bajaraxuata nexata Juan jivibautisabinë Dioso pejumelivaisipaebinë najetaruca petusato nacujava Jesús pevajënaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava. Panajamatabëcuenepënëyorore Diosojavabelia. Bajaraxuacujinae pacabautisabianatsi. Nexata Dioso pacavecuajibiaexanaena panijaneconimi, jai tsaponae Juan jivijavabelia.

⁵ Nexata ayaibitsaëtöxaneto Judea nacuapijivi, Jerusalén tomarapijivina, muxunaponabiabatsi Juan petsipaebilivaisi penamuxunaevetabiabinexatsi. Nexata bajarapamonae pibisiacuene pexanaejavami, roviaalia Diosojavabelia navecuapaebapona. Bajaraxuacujinae Juan bautisabapona bajarapamonae Jordán meneta.

⁶ Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava.

⁷ Juan Jesús pelivaisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bajaraponë daxitacuene pexanaenexa pecaëjëpaenëtsi tsane. Xanë raja saya beveliajamatabëcuenenënë bajaraponëvecua. Nexata vecuaauranë bajaraponë beprijavitonënë tanataenexa. Nexata auranë pijazapato ata tataxujonötsinexa.

⁸ Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabëjoneyaexanaponaena Espiritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetarucaejavanexa.

Pacuenia Juan bautisaba Jesús yabara pelivaisi
(Mt 3.13-17; Lc 3.21-22)

⁹ Jesús najetaruca Nazaret tomaraverena, Galilea nacuata pecaetomaraverena. Nexata Juan bautisaba Jesús Jordán meneta.

¹⁰ Jesús pebautisabicujinaetsi menevetsina penonotajunaejavata, tane itaboxo penapatsijava. Bajarajota Jesús tane Espiritu Santo ata perunaaja-savisa pematatsenëatsica beucucuto.

¹¹ Jesús jumetanenua athëbëvetsica Dioso pejumaitsijavatsi: “Xamë raja taxënatomé, bitso tacaasivanë. Bitso casivajamatabëcuenebarëyatsi,” pejaijavatsi.

Pacuenia Jesús jamatabëcuenejëbatsi dovathi yabara pelivaisi
(Mt 4.1-11; Lc 4.1-13)

¹² Jesús Juan pebautisabicujinaetsi, bepijiayo Espiritu Santo ponaeyaexanatsi petusato nacuyabelia.

¹³ Bajarajotalia daxitacueneviria unupijivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatacabianëta dovathi picani Jesús jamatabëcuenejëbatsi pibisiacuene pexanaenexa. Bajaraxuacujinae ángelevi runaica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsi-paebijava yabara pelivaisi
(Mt 12.12-17; Lc 4.14-15)

¹⁴ Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacujavaberena. Jesús jivi tsipaebaponarena pexanialivaisi. Tsipaebaponarena daxita Dioso pijajivi pevetsijavanexa.

¹⁵ Jesús jumai tsaponae jivijavabelia mapacueniaje:

—Imoxoyo rabaja pevajënae pecopiapatsinexa Dioso papecaevetsimatacabinexa. Nexata pacopabare pibisiacuene paneexanabiabijava. Panajamatabëcuenepeñëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamatajucabiabivi yabara pelivaisi
(Mt 4.18-22; Lc 5.1-11)

¹⁶ Jesús najetaruca Galilea pucaxaneto itapaya. Nexata Galileapuca itapata Jesús taenuta anijanëbeje nacaebananëbeje, Simónbeje Andrésbeje. Bajaraponëbeje daxitamatacabi canacujitsia dujuai yamatajucabiababeje.

¹⁷ Nexata Jesús jumaisi bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivínexa, jai Jesús bajaraponëbejejavabelia.

¹⁸ Nexata bajaraponëbeje dujuai peyamatajucabiabijavamibeje bajarajota puenetabuatabeje. Nexata baja naponabeje Jesús pepëta.

¹⁹ Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaraponëbeje pijajeraënëta xanebanucabeje dujuai peyamatajucaejavabeje.

²⁰ Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanubeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

Pacuenia pebi dovathi peyajavaponaponaeñe Jesús jamatejemayaexana yabara pelivaisi
(Lc 4.31-37)

²¹ Nexata Jesús, pijajivi yajava, pata Capernaum tomarabelia. Judíovi penacuaetatabiabiboyalía. Nexata bajarajota Jesús jivi livaisi tsipaeba.

²² Nexata Jesús pejumetaevitsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsipaebabiaba.

²³ Bajarajota pebi dovathi peyajavaponaponaeñe naeca. Nexata bajaraponë Jesúsjavabelia vavajai tsaxuabi. Jumaitsi:

²⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponaeñe Jesúsjavabelia.

²⁵ Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

²⁶ Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jivitonëvecua.

²⁷ Nexata daxitajivi bajarapacuenene itsa tane, bitso jamatabëcuenenabenajaca. Najumaitsi bajarapamonae:

—¿Detsa mapitsicueneneje? ¿Detsa mapitsipejanacujarubicueneneje? ¡Maponëje Jesús, beDioso pitorobinëtsitsica! ¡Dovathi ata jumečovënëtsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

²⁸ Nexata daxita Galilea nacuapijivi bepíjia Jesús vënëlvivaisitanetsi Dioso pesaëta pinijicuenene pexanaponaejava.

Pacuenia Simón Pedro pijava pena Jesús tojamatejemayaexana yabara pelivaisi
(Mt 8.14-15; Lc 4.38-39)

²⁹ Jesús baja pitsapa judíovi penacuaetatabiabibovecua. Nexata Santiagobeje Juanbeje Jesús yajavapona. Jesúsbana napona Simónbeje Andrésbeje pijaboyabelia.

³⁰ Nexata Simón pijabota Simón pijava pena Jesúsbana pevajënae romaebanucatsi camata. Nexata itsamonae bepíjia Jesús tsipaebarecëpatsi bajarapova peromaebanucaejavatsi.

³¹ Nexata Jesús imoxoyotabalia peromaebanucaevatsi. Cobeyotsiaya matacota. Nexata bajarajota peromaebanucaevatsi vecuajibi tsanajetsitsireca baja domae. Nexata bajarapova Jesúsbana pexaejava toexanatsi.

Pacuenia ayaibitsaëto jivi piavitanevi Jesús jamatejemayaexana yabara pelivaisi
(Mt 8.16-17; Lc 4.40-41)

³² Itsa baja ajena meravitsia, Jesúsjavaberena tocatpatatsi daxita piavitanevi. Tocapatatsinua dovathi peyajavajinavanapaevinua.

³³ Daxita tomarapijivi Jesús pepatsibota baupajavaberena nacaetuata.

³⁴ Nexata Jesús jamatejemayaexana ayaibitsaëto daxitacuenevitane pexainavimi. Vecuacapitsapanua dovathi peyajavajinavanapaevi. Jesús apo tocopatsi dovathi pecuaicuajinexa jivijavabelia pevajunupaebiyativatsi. Tsipaji dovathi xaniavaetsia Jesús yapëtanetsi Dioso pexënatocuene.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

(Lc 4.42-44)

³⁵ Pepo bajayacunua, abaxë itsa apo napebetsi matakabi, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta matakabi baja.

³⁶ Itsa baja matakabi, Simónbana Jesús pëjaitaponalia.

³⁷ Itsa baja bajarapamonae Jesús caxitajaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

³⁸ Nexata Jesús jumaitsi:

—Ponatsi baja imoxoyo penaetomaraxijavabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajë, jai Jesús.

³⁹ Nexata daxita Galilea nacujava Jesús jivi tsipaeba pona Dioso pitorobilivaisi judiövi penacactuatabibonëjava. Jesús jivi dovathi vecuacapit-sapapanua.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

(Mt 8.1-4; Lc 5.12-16)

⁴⁰ Jesús imoxoyorenatsi bajayajebi bitso peperabëtsabanaenë. Nexata bajaraponë pematabacabëta nucajunua Jesús pitabarata. Bajaraponë pini-jicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaexamë. Itsa jitsipame, nejamatejemayaexanare mapavitanevecuaje, jai peperabëtsabanaenë Jesúsjavabelia.

⁴¹ Nexata Jesús bajaraponë itaxutobejiobiatane. Pecobeta perabëjayalia. Jumaitsi:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

⁴² Bajarapacuenia Jesús pejumaitsijavata peperabëtsabanaenëmi baja perabëxanepananajereca. Jamatejema baja. Peperabëtsabanaejavami baja ajibi.

⁴³ Nexata baja Jesús naviatsiaexana bajaraponë. Pini-jicuenia Jesús muxujioba bajaraponë penaviatsivajënaeya. Jesús jumaitsi:

⁴⁴ —Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenebinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacue baja pecavecuajibijava niavitanejavami, jai picani Jesús bajayajebi bitso peperabëtsabanaenëmijavabelia.

⁴⁵ Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaibitsaëtoxaneto pematoyoronaeyanivatsi. Jesús saya ponapona tomanë piajibijava. Itsiata cajena daxita nacuanëjavaverena jivi muxunapatabiabatsi Jesús.

2

Pacuenia Jesús jamatejemayaexana petabusipacuenabinëtsi yabara pelivaisi

(Mt 9.1-8; Lc 5.17-26)

¹ Itsamatacabi icatsia Jesús naviarena Capernaum tomaraberena. Nexata jivi yapètane pabota Jesús patajopa.

² Nexata jivibitsaëttoxaneto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi.

³ Nexata cuatro ponëbeje parena, camayota peyavëtacaranajetarubenaevi petabusipacuenebinëtsi.

⁴ Nexata petabusipacuenabinëtsi acuenebi bajarapamonae pecapatsijava Jesús pitabarayabelia. Tsipaji bo ënëtuatujjë bitso jivi yavënëca. Nexata petabusipacuenabinëtsi pecapatsivi, bomatatu javavetsica vojoexana Jesús pecanacujitsiatsica. Nexata bajarapavojotuatsica camayota yacopatsi petabusipacuenebinëtsi. ⁵ Jesús jamatabëcueneypëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjajjavatsi Jesús jamatabëcueneypëtane. Bajaraxuata petabusipacuenebinëtsijavabelia Jesús jumaiti mapacueniaje:

—Tajabanänë, pibisiacuene rabaja nexanaeconimi cavecuaajibiaexanatsi, jai Jesús.

⁶ Bajarajota judíovi pecujarubiviyajuvënëvi naena. Bajarapamonae itsa jumetaeyena bajarapacuenia Jesús pejumaitisijava, nexata jamatabëcuenenavëxaniabiaya bëpënëa jamatabëjumai tsenae mapacueniaje:

⁷ —Maponëje Jesús Dioso apo pejitsipaecuenia cuaicuajiai. Itsanë ata cajena apo caëjëpaetsi itsajivi pibisiacuene pexanaeconimi pevecuaajibiaexanaenexa. Caenë Dioso caëjëpatsi pevecuaajibiaexanaenexa bajarapacueni, jamatabëjai tsenae bajarapamonae.

⁸ Jesús jamatabëcueneypëtane bajarapamonae jamatabëcuenenavëxaniabiaya bajarapacuenia pesivanajamatabëxainaejavatsi. Nexata Jesús jumaiti bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeconimi tavecuaajibiaexanaenexa.

⁹ Paxamë apo pacacaëjëpae ata itsajivi pibisiacuene pexanaeconimi panvecuaajibiaexanaenexa, pacacaëjëpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeconimi,” panejainexa. Tsipaji itsajivi ata apo yapëtae tsipae saya jema panejumaitisijava. Itsiata baitsi jane itsa apo pacacaëjëpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecaëjëpaeacuene panejamatejemayaexanaenexa, jai nexata Jesús judíovi pecujarubivijavabelia.

¹⁰ Icatsia Jesús jumaiti bajarapamonaejavabelia:

—Xanë, Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacuene pexanaeconimi ata pacuenia baja exanajë maponëjavabeliaje. Nexata patanecueneyapëtaexanamë tanecaëjëpaeacuene tavecuaajibiaexanaenexa itsajivi pibisiacuene pexanaeconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaiti petabusipacuenebinëtsijavabelia:

11 –Xamë cajumaitsitsi. Nonotapunare. Nijacamayo pire. Nijaboyabelia baja ponare, jai Jesús.

12 Nexata bajarapacuenia Jesús pejumlahitsijavata petabusi-pacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuenie, jamatabëcuenenabenajaquena. Bajarapamonae jumai tsenae mapacueniaje:

–Dioso cajena bitso ayaijamatabëcuenenë. Caeto ata abaxë mapitsicuenie pexanaejava apo taetsije, jai tsenae bajarapamonae.

Pacuenia Jesús pijajivitonënexa junata Levívënëñë yabara pelivaisi
(Mt 9.9-13; Lc 5.27-32)

13 Jesús pona pucaxaneto itapajavabelia. Nexata jivi ayaibitsaëtoxaneto pënapatatsi bajarabelia. Nexata Dioso pejumlahivaisi Jesús tsipaeba bajarapamonaejavabelia.

14 Bajaraxuacujinae penajetarucæjavata Jesús taeyeta Levívënëñë, Alfeo pexënato. Leví eca pabota gobierno pejamatabëcuenie jivijavabelia matamoy-anijobabiaba impuestomatamo. Nexata Jesús jumaitsi Levíjavabelia:

–Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

15 Nexata Leví junata Jesús pebarënanabinexa pijabota. Nexata Leví pijabota Jesús pexaejava naxane. Leví pijabota ayaibitsaëto naena gobierno pejamatabëcuenie jivijavabelia impuestomatamo pematamoyanijobabiabivi. Itsamonae ata nanabane pijamatabëcueniebejevi. Nexata Jesús pijajivi nabarëca bajarapamonaejavata.

16 Nexata fariseovi, judíovi pecujarubivina, Jesús taeyetatsi daxita bajarapamonaejavata pijajivi penabarënanabancæejava. Nexata bajarapamonae jamatabëcuenenavëxaniabiaya jumaitsi Jesús pijajivijavabelia:

–Papecacujarubinë Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobabiabivijavata, pijamatabëcueniebejevijavatanua, naxaeyeca pexaejava, jai bajarapamonae Jesús pijajivijavabelia.

17 Itsa Jesús jumetane mapajumeje, nexata jumaitsi bajarapamonaejavabelia:

–Pevaëbinë raja apo vaëbi pejamatejemavi. Pevaëbinë raja pivitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuenie pexanaejava penajamatabëcuenepëñëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëtapona Diosojavabelia pexaejava apo pexaeyabiabixae yabara pelivaisi
(Mt 9.14-17; Lc 5.33-39)

18 Itsamatacabi Juan pijajivi, fariseovi pijajivina, pexaejava apo xaevanapae pamatacabibeje Diosojavabelia vajëcapona. Nexata itsamonae Jesúsjavaberena pata. Yanijobatsi pexaejava piatsobicuenie yabara. Jumaitsi mapacueniaje:

–Juan pijajivi, fariseovi pijajivina, pexaejava apo xaeabiabi pamatacabibeje Diosojavabelia vajëtapona. ¿Detsa xuajitsia itsiata xamë nijajivi pexaejava xaeabiaba pamatacabibeje Diosojavabelia vajëtapona? jai Jesús peyanijobivitsi.

19 Nexata Jesús jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo at-sobi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamonae.

²⁰ Itsiata baitsi jane itsa pejananacasabinë tsimaxëpatsipatsi pevecuacaponanexatsi itsjavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaxaetsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtaona. Itsiata pamatacabi xanë necaponae baja bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaxae, jai Jesús peyanijobivitsijavabelia.

²¹ Nexata bajarapamonae perujumatabëcuene baja pecopabinexa, Jesús livaisi tsipaeba comparacióncuenia bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijajamatabëcuenebeje pexainaejaniva perujumatabëcuene baja pecopabinexa, Jesús livaisi tsipaeba comparacióncuenia. Perujumatabëcuene yabara Jesús jumaisi bajarapamonaejavabelia mapacueniaje:

—Itsjivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa.

²² Itsjivi ata pijinia apo epacae pejanavinoranë perujubocodoruanëjavabelia bajajajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanijobivitsijavabelia bajarapamonae pejumecovënëtsinexa ëpejanalivaisi, Jesús petsipaebilivaisi, perujumatabëcuene baja penacopabinexa.

*Pacuenia Jesús pijajivi namutua siricanajetarubena trigoxu penacuer-
aevetsimatcabita yabara pelivaisi
(Mt 12.1-8; Lc 6.1-5)*

²³ Judiovi penacueraevetsimatcabita Jesús, pijajivi yajava, najetaruca namutua trigo pabianëjava. Nexata Jesús pijajivi piajanixae, trigoxu siricanajetarubena. Xuxaeyabuataona.

²⁴ Nexata fariseovi jumaisi Jesúsjavabelia:

—¡Taema mapacuneje! Dioso Moiséspijinëta pejumecopatsilivaisita vanacaitavetsicuene, nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatcabixae, nijajivi apo bexanae mapacuneje, jai fariseovi Jesúsjavabelia.

²⁵ Nexata Jesús jumaisi fariseovijavabelia:

—Ajena, penacueraevetsimatcabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piajani?

²⁶ Davidpijinë joneya Dioso pijatemploboyalia pamatacabi Abiatarpijinë daxita sacerdotevi penamatacaitorobinë tsaponapona. Nexata Dioso pijatemploënetä, mesajumata, bobena Diosonexa ofrendacuenia petojebipañëanë. Bajarapapanëanë itsjivi ata apo tocopatsitsi pexaenexa

penaneconitsiyaniva Diosojavabelia. Ësacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanbeanë pijajivi barë, itsiata apo vënananeconitsi Diosojavabelia, jai Jesús fariseovijavabelia.

²⁷ Icatsia Jesús jumaitsi fariseovijavabelia:

—Dioso raja tocopata caematacabi jivi penacueraevetsinexa. Tspaji Dioso yapëtane pacuenia jivi namatavenona penacueraevetsinexa. Dioso apo exanae jivi saya jema peyaiyataenexa penacueraevetsimatacabianë.

²⁸ Nexata xanë, Daxitajivi Pematapijinënë, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús fariseovijavabelia.

3

Pacuenia Jesús jamatejemayaexana pebi pecobetsaquenaenë yabara pelivaisi

(Mt 12.9-14; Lc 6.6-11)

¹ Penacueraevetsimatacabita Jesús joneya judiovi penacaetuatabiabiboyalia. Nexata bajarajota pebi naeca pecobetsaquenaenë.

² Nexata Jesús naitaxutocaevetatsi fariseovi petaenexatsi pecobetsaquenaenë pejamatejemayaexanaejava penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja naneconita Diosojavabelia. Tspaji penacueraevetsimatacabita nacuenëba,” pejainexa bajarapamonae.

³ Nexata Jesús jumaitsi pecobetsaquenaenëjavabelia:

—Nonotapunare. Nucare mapamonae pitabarataje, jai.

⁴ Nexata Jesús jumaitsi fariseovijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi.

⁵ Nexata Jesús anaeya naëcota bajarapamonae. Bajaraxuacujinae Jesús bejamatabëjireca. Tspaji yapëtane piagamatabëcuenetajajava fariseovi. Nexata Jesús jumaitsi pecobetsaquenaenëjavabelia:

—Namaxërovire, jai.

Nexata pecobetsaquenaenë namaxërovita. Bajarajota cobexanepanajereca baja. Pecobetsaquenaejavami ajibi.

⁶ Nexata fariseovi itsa tane Jesús pecobexanepanaeayaexanaejava pecobetsaquenaenë, fariseovi anaepana. Nexata bajarapabovecua pitsapa. Pona penabarëcuaicuaijainexa nacuaevetsinë Herodes pijajivijavabelia. Bajarapamonae najumejaita Jesús pebeyaxuabinexatsi.

Pacuenia jivi nacaetuata Galilea pucaxaneto itapata yabara pelivaisi

⁷ Jesús, pijajivi yajava, pona Galilea pucaxaneto itapayabelia. Nexata Jesús pënaponaliatsi ayaibitsaëtöxaneto Galilea nacuapijivi.

⁸ Nexata Jesús pënaponaliatsi Judea nacuapijivinua, Jerusalén tomarapijivinua, Idumea nacuapijivinua, Jordánmene itsapanaverenapijivinua, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamonae Jesús pënaponaliatsi tspaji Jesús vënëlivaisitanetsi Dioso pesaëta pinijicue pexanaponaejava.

⁹ Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaëtöxaneto Jesús bitso matacënënaponatsi, nexata bajarapamo ënëabereca Jesús perunaenexareca.

¹⁰ Jesús baja ayaibitsaëto piavitanevi jamatejemayaexana. Bajaraxuata itsamonae, piavitanevi, Jesúsjavabelia natorotaponabiaba pejayatsinexatsi.

¹¹ Dovathi peyajavajinavanapaevi Jesús ita taeyabiabatsi, bajarapamonae irata othopabiaba Jesús pitabarata. Bajarapamonae aëjai tsabiabi.

—Xamë tsaena Dioso pexënatomë, jai tsabiabi dovathi peyajavajinavana-paevi.

¹² Nexata Jesús jumeitaveta bajarapamonae. Jumaitsi:

—“Dioso raja pexënato,” pajamë pëtsa xanë yabara itsajivijavabelia, jai Jesús bajarapamonaejavabelia.

Pacuenia Jesús pijajivi ayaibitsaëto xanetoyajuvënëvi itapeta saya doce ponëbeje apóstolevinexa yabara pelivaisi

(Mt 10.1-4; Lc 6.12-16)

¹³ Jesús pijajivi ayaibitsaëto xanetoyajuvënëvi, doce saya ponëbeje, itapeta apóstolevinexa. Jesús pitapetsivajënae apóstolevinexa, junaya petsutojumabetsia. Bjaravetsica Jesús junatanuca ponëbeje jamatabëitapeta apóstolevinexa. Nexata pamonaevi Jesús itapeta apóstolevinexa, junaya petsutojumabetsia, Jesúsjavabetsia.

¹⁴ Nexata Jesús caetuata caebitsaëtoyo, doce ponëbeje pijajivi, pepënjajinavanapaevinexatsi. Jesús itorobijitsianua bajarapamonae daxitanacuanëjava jivi petsipaebanajetarubenaenexa Dioso pitorobilivaisi.

¹⁵ Jesús pijajivi jamatabëcuenecaëjëpaeyaexana Dioso pesaëta pejamatejemayaexanaponaeenexa piavitanevi. Jamatabëcuenecaëjëpaeyaxananua Dioso pesaëta dovathi jivi pevecuacapisaponaenexa.

¹⁶ Jesús pijaapóstolevi, doce ponëbeje, mapevënëanëje. Copiaya ponë pevënë Simón. Bjaraponë Jesús vënëruba itsavënë, Pedro.

¹⁷ Itsanë Santiago. Itsanë Juan. Santiagobeje Juanbeje nacaebananëbeje, Zebedeo pexënatobeje. Bjaraponëbeje Jesús vënëruba Boanerges. “Boanerges,” ita jai, bajarapamonae pijajumeta mapajumetaje pejumaitsijume: “Yamaxë pexënatobeje,” pejaijume.

¹⁸ Itsanë pevënë Andrés. Itsanë Felipe. Itsanë Bartolomé. Itsanë Mateo. Itsanë Tomás. Itsanë Santiago, Alfeo pexënato. Itsanë Tadeo. Itsanë Simón, celotenë.

¹⁹ Itsanë Judas Iscariote. Bjaraponë bexëjavabelia Jesús canajetsijitsiatsi pijavajabitsaë pecobeyabelia pebeyaxuabinexatsi.

Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta, Jesús dovathi jivivecua capisapona,” jai yabara pelivaisi

(Mt 12.22-32; Lc 11.14-23; 12.10)

²⁰ Jesús boya joneya pijajivi yajava. Icatsia jivibitsaëto xaneto nacaetuata. Nexata acuenebi Jesús pijajivi pebarënananijava.

²¹ Itsamonae Jesús yabara jumaitsi: “Jesús raja matajemabatsi,” jai. Nexata bajarapacuenia itsamonae Jesús yabara pejumaitsijava, Jesús pijamonae vënëlvivaisitanetsi. Nexata Jesús pijamonae ponarena Jesúsjavaberena pebarëponaenexatsilia picani.

²² Judíovi pecujarubivi, Jerusalén tomaraverena peponaevi, jamatabëcuenenavëxaniabiaya Jesús yabara jumaitsi:

—Mara ponë Jesúsje, Beelzebú yajavaponapona. Beelzebú raja daxita dovathivi pevetsinë. Bjaraxuata Jesús Beelzebú pesaëta dovathi jivivecua

capitsapapona, jai judíovi pecujarubivi jamatabëcuenenavëxaniabiaya Jesús yabara.

²³ Nexata Jesús junata bajarapamonae jamatabëcuenenavëxaniabiaya peju-maitsijava pecanaëjëtsinexa. Nexata bajarapamonaejavabelia Jesús jumaiti mapacueniaje:

—Beelzebú raja dovathivi jivivecua apo capitsapapona tsipae. Tsipaji Beelzebú dovathi jivivecua ita capitsapaponaejitsipa, nexata Beelzebú bepíjavajabitsaë taejitsipa pijajivi.

²⁴ Pacanaëjère mapacuenaje. Nacaenacuapijivi ata ita navecuanat-sanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata.

²⁵ Bajara pijinia nacaemonae ata itsipae. Itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaemonae ata.

²⁶ Bajara pijinia itsipae dovathi ata. Dovathi jivivecua ita capitsapaponaejitsipa pijajivi dovathivi, nexata bepíjavajabitsaë taejitsipatsi pijajivi. Nexata apo sivaajamatabëcuenesaë tsipae pexanaponaejavanexa. Nacopi-arucaeyaexanaejitsipa dovathi, jai Jesús judíovi pecujarubivijavabelia.

²⁷ Bajarapamonae pecanaëjëtsinexa Jesús bitso piasaëñëcuene dovathi matatoxenetsia, Jesús icatsia jumaiti bajarapamonaejavabelia mapacueniaje:

—Itsajivi ata apo caëjëpaetsi pejonenexa bitso piasaëñë pijaboyalia peyajërëtsinexa xua xaina pijabota. Itsiata ita patsipa bajaraponë matatoxenetsia bitso piasaëñë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota. Bajara pijinia pacuenia xanë ata bitso tasaëñë dovathi matatoxenetsia. Bajaraxuata necaëjëpa jivivecua tacapitsapaenexa dovathivi.

²⁸ Xaniajanë pacuenia pacatsipaebatsi. Dioso cajena caëjëpatsi daxitajivi pibisiacuene pexanaeoneconí pevecuaajibiaexanaenexa. Pibisiacuena jivi Dioso baracuaicuaijai ata, bajarapaneconí ata Dioso caëjëpatsi pevecuaajibiaexanaenexa.

²⁹ Itsiata baitsi jane pajivi pibisiacuena baracuaicuaijai Espíritu Santo, bajarapajivi Dioso apo vecuaajibiaexanae tsane bajarapaneconí. Bajarapajivi naneconitsiana daxita matacabijavabelianexa, jai Jesús bajarapamonaejavabelia.

³⁰ Bajarapacuenia Jesús jumaiti tsipaji Jesús Espíritu Santo yajavapona atatsi, judíovi pecujarubivi jumaiti Jesús yabara: “Jesús raja Beelzebú yajavapona,” jai. Nexata bajaraxuata bajarapamonae naneconita Espíritu Santojavabelia.

Pacuenia Jesús pejuyapijivi, pena yajava, nubena bojumavelia yabara pelivaisi

(Mt 12.46-50; Lc 8.19-21)

³¹ Jesús pejuyapijivi, pena yajava, pata Jesúsjavaberenena. Itsiata bajarapamonae boyalia apo jonelia Jesús penucaeboyalia. Nexata bajarapamonae junatsiaexana Jesús pejumetaeyenaevitsijavabelia.

³² Nexata pamonae Jesús petsipaebilivaisi matatoyorotsia jumetaeyenatsi, Jesúsjavabelia jumaiti:

—Patajatuxanenë, ena raja, nejuyapijivi yajava, nuca patapëñeverena. Cajaita raja xamë, jai bajarapamonae Jesúsjavabelia.

³³ Nexata Jesús jumaiti bajarapamonaejavabelia:

—¿Detsa pitsijamatabëcuenevi taena, tajuyapijivinua? jai Jesús.

³⁴ Bajaraxuacujinae Jesús naëcota pematatoyorotsiaenaevitsi. Jumaitsi bajarapamonaejavabelia:

–Mara jota pamonae xanëjavata penaevije, bajarapamonae jane taenajivi, tajuyapijivina.

³⁵ Tsipaji raja pamonae exana pacuenia Dioso itorobatsi, bajarapamonae jane baja tajuyapijivi, taenajivina, jai Jesús bajarapamonaejavabelia.

4

Pacuenia Jesús jivi livaisi tsipaeba peubinë pelivaisicuenia yabara pelivaisi (Mt 13.1-9; Lc 8.4-8)

¹ Icatsia Jesús taxuxuaba livaisi petsipaebijava Galilea pucaxaneto itapjavata. Nexata jivi ayaibitsaëtozaneto nacaetuata itsajota Jesús livaisi tsipaebanua. Nexata Jesús runareca jera ënëabereca. Ecareca jera ënëtareca. Daxita jivibitsaëtozaneto tajetabovelia nubena.

² Nexata Jesús daxitacuenë livaisianë tsipaeba jivijavabelia. Jesús jumai tsaponae bajarapamonaejavabelia mapacueniaje:

³ –Panenamuxunaeverë mapalivaisije. Peubinë pona pabiabelia peubineca. Nexata itsa pata pabita, peubixu pexucayabajabarabicuenia ubanajetaruca.

⁴ Nexata pexucayabajabarabijavata itsaxu othopa pabi tuatujëjava, pena-jetarucaenamutojumata. Nexata bajarajota pata baratsui. Xane bajarapaxumi juvinejeva.

⁵ Itsaxu pijinia othopa ibopananëjumata, itsajota bitso ira apo aitayaë.

⁶ Nexata icotia bitso itsa ataju, nexata bajarapaxu juvi ata, tsaquenapona. Tsjipaji irabereca bitso apo atabunepepiareca.

⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë maticënënatsi peubijavami. Nexata peubijava apo xainae pecuai.

⁸ Itsaxu pijinia othopa pexaniairata. Nexata juva. Xaniavaetsia vitsabapanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabelia.

⁹ Nexata icatsia Jesús jumaitsi jivibitsaëtozanetojavabelia:

–Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús.

Pacuenë yabara Jesús jivijavabelia livaisi tsipaeba ëcomparacióncuenia yabara pelivaisi

(Mt 13.10-17; Lc 8.9-10)

¹⁰ Jesús livaisi petsipaebicujinae, jivibitsaëtozaneto baja Jesús vecuanavia-batsi. Nexata Jesús pijaepato barënacopata doce ponëbeje pijajivi, itsamonae itsiata yajava. Nexata bajarapamonae Jesús yanijobatsi. Bajarapamonaë jumaitsi Jesúsjavabelia:

–Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai bajarapamonaë Jesúsjavabelia.

¹¹ Nexata Jesús jumaitsi bajarapamonaëjavabelia:

–Paxamë rabaja xaniavaetsia Dioso pacayapëtaeyaxana Dioso papija-jivimë papecaevetsijava. Bajarapacuenë abaxë daxitajivi apo yapëtae. Baitsi ra saicaya pamonaë apo tajajivi, tsipaebajë livaisianë ëcomparacióncuenia.

¹² Bajaraxuata nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Nenamuxunaeveitsi ata tatsipaebilivaisi, itsiata apo jumeypëtae pajamatabëcuene xaina tatsipaebilivaisi. Bajarapacuenia apo jumeypëtae penajamatabëcuene copatsiyaniva Dioso javabelia pibisiacuene pexanae neconimi Dioso pevecuaajibiaexanaeyanivatsi, jai Jesús.

Pacuenia Jesús yapëtaeyaxana pijajivi, itsamonae yajava, pajamatabëcuene xaina palivaisi tsipaeba peubinë pelivaisicuenia yabara pelivaisi (Mt 13.18-23; Lc 8.11-15)

¹³ Jesús icatsia jumaitsi pijajivijavabelia:

—Itsa apo pajumeypëtaemë pajamatabëcuene xaina palivaisi pacatsipae-batsi peubinë pelivaisicuenia, ¿detsa nexata pacuenia pajumeypëtaename daxita palivaisianë pacatsipaebijitsiatsi comparacióncuenia? jai Jesús pijajivijavabelia.

¹⁴ Nexata icatsia Jesús jumaitsi pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi.

¹⁵ Pacuenia itsi pabita peubixu, paxu othopa pabi tuatuajëjava penajetarucaenamutojumata, bajara tsijamatabëcuene itsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonae javaberena. Nexata bajarapamonae tsijamatabëjvinejevatsi, dovathi vecuapitatsi bajarapalivaisimi, petsijamatabëubilivaisimitsi.

¹⁶ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcuene itsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovëneta.

¹⁷ Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcuene itsi bajarapamonae Dioso pitorobilivaisi. Tsipaji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuentsi, itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepijia copaba. Pevajënaeyabelia apo jumecovënëtanapae.

¹⁸ Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcuene itsi itsamonae Dioso pitorobilivaisi. Jumetane picani bajarapamonae Dioso pitorobilivaisi.

¹⁹ Itsiata baitsi jane bitso jamatabëcuene enatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcuene yamaxëitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovtisabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae.

²⁰ Pacuenia pijinia itsi paxu othopa pexaniairata, bajara tsijamatabëcuene itsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabëjnuatsi. Nexata tsijamatabëcuene vitsabaponatsi Dioso pitorobilivaisi. Nexata pacuenia peubijava capitsapa itsabotonë treinta paxutobeje tsaponae, itsabotonë

sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia Jesús pijajivi livaisi tsipaeba lámparabë pelivaisicuenia yabara pelivaisi

(Lc 8.16-18)

²¹ Jesús icatsia jumaitsi doce ponëbeje pijajivijavabelia, itsamonaejavabelia ata:

—Itsajivi ata lámparabë pitanojotsicujinae apo etsi cajoniënëalia. Apo etsi cama bëxëpanalia ata. Jume baja cajena. Biji rajane athëbëyo etsia daxitaboënë pitayotecaenexa.

²² Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëjavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë.

²³ Pajivi jamatabënejumeyapëtae patacatsipaebilivaisi, xaniavaetsia nenumuxunaevetsi, jai Jesús pijajivijavabelia.

²⁴ Icatsia Jesús jumaitsi bajarapamonaejavabelia:

—Panejumecanaëjere patacatsipaebilivaisi. Itsamonae ata itsa pacatsipae-biana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto pajumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena.

²⁵ Pajivi xaniavaetsia nejumeyapëtae patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtae, nacofënëtsiana, jai Jesús.

Pacuenia peubixu pejuvicujinae, Dioso pesaëta vitsaba yabara pelivaisi

²⁶ Jesús icatsia jivi comparacióncuenia livaisi tsipaeba Dioso pijajivi pevetsicue yabara. Jumaitsi mapacueniaje:

—Pacuenia peubixu pejuvicujinae, Dioso pesaëta vitsaba, bajara pijinia pacuenia Dioso pijajivi ata Dioso pesaëta jinavanapa. Peubinë pabita peubixu xucayajabajarabanajetaruca.

²⁷ Peubinë peubicujinae vemaxëmajitabiaba meravi canacujitsia. Naëcotabiaba matacabita. Bajarapacuenia panepapona matacabianë. Nexata pijinia peubixu pabita juva. Vitsabapona. Itsiata baitsi jane peubinë apo yapëtae pacuenia peubixu pijacuata juva.

²⁸ Ira raja pejamatabëcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta.

²⁹ Itsa baja yaniona peubijava, penotsivi pona penotsinexa. Tsipaji baja penotsimatacabinexa tocopiapatatsi, jai Jesús jivijavabelia.

Pacuenia mostazaxutoyo pejuvicujinae, mostazanae bepimia vitsaba yabara pelivaisi

(Mt 13.31-32; Lc 13.18-19)

³⁰⁻³¹ Jesús icatsia jumaitsi doce ponëbeje pijajivijavabelia, itsamonaejavabelia ata:

—¿De meta xua pelivaisi jëpa Dioso pijajivi bepimia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepimia

Dioso pijajivi penaexanaejavanexa, mostazaxutoyo meta pelivaisicuenia tsipaebianajë. Jumaitsinë meta tsane: “Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaëtoxaneto naexanaena. Mostazaxu raja bitso tsiquirixutoxi daxita peubixuvecua.

³² Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata baratsui ata pematapenanë exana mostazanaemaxërananëjavata. Bajara pijinia itsane jivi ata. Bepijia ayaibitsaëto Dioso pijajivi naexanaena,” janë meta tsane mapacueniaje, jai Jesús pijajivijavabelia, itsamonaejavabelia ata.

Pacuenia Jesús jivi livaisi tsipaebabiaba ëcomparacióncuenia yabara pelivaisi (Mt 13.34-35)

³³ Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ëcomparacióncuenia. Pacuenia baja jivi caëjëpatsi pejumeyapëtaenexa, bajarapacuenia Jesús tsipaebabiaba.

³⁴ Jesús ëcomparacióncuenia livaisi tsipaebabiaba bajarapamonaejavabelia. Itsiata saicaya Jesús ëpijajivijavabelia xaniavaetsia yapëtaeyaexanabiaba pajamatabëcuene xaina daxita bajarapalivaisianë.

Pacuenia Jesús itaveta joviboxaneto, malataca yajava, piyaijavami yabara pelivaisi (Mt 8.23-27; Lc 8.22-25)

³⁵ Dioso pitorobilivaisi Jesús tsipaeba jivijavabelia. Bajarapamatacabi Jesús petsipaebicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

³⁶ Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonaë pënaponatsi itsajeranëta.

³⁷ Nexata pinijijoviboxaneto jemata najetaruca. Nexata malataca jera ënëaberena mera epabajarabapona. Nexata baja jera ënëaberena mera vënëcapona.

³⁸ Jesús itsiata majitanuca jamatejema jeratabufejavavetsina. Namatabëxëyaëtanuca penamatabëxëyaëtabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! ¿Apo jamatabëcuenebëjamë tsaja? jai Jesús pijajivi.

³⁹ Nexata Jesús pemajitanucaenëmi naëcotapuna. Pinijijumeta itavetaxuaba jovibo. Jesús jumaitsi pucajavabelia, jovibojavabelia ata:

—¡Vainae ecare baja! jai.

Bajarapacuenia Jesús pejumaitisjavata jovibo baja ajibi tsaxuabi. Daxitapuca baja nexata vainae ecaxuaba.

⁴⁰ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús.

⁴¹ Nexata Jesús pijajivi najunaviaca bajarapacuenie petaexae. Ëpamonae najumaitsi:

—¿De meta tsipaji maponëje? ¡Itaveta jovibo, malataca ata! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

5

Pacuenia pebi, dovathivi peyajavaponaponaeñ, Jesús vecuacapitsapa Gerasa nacuata yabara pelivaisi

(Mt 8.28-34; Lc 8.26-39)

¹ Jesús pijajivi barëpata pucaxaneto itsapanabelia, Gerasa nacuayabelia.

² Nexata Jesús jerajavavetsina nonotajuna. Pebi dovathivi peyajavaponaponaeñ, cujitararenatsi jivimëthëañjavaverena.

³ Bajaraponë ponaponabiaba jivimëthëañjavata. Itsajivi ata apo caëjëpaetsi pecëtsinexa bajaraponë cadenamaëtota ata.

⁴ Cadenamaëttonëta picani taxucëtabiabatsi anijatonë. Cobecëtabiabatsi picani yajava. Itsiata cajena pecobecëtsicadenamaëtotsi ucutarababiaba pesaëta. Bajaraxuacujinae petaxucëtsicadenamaëtotsi pecobeta tsaquibiaxubabiaba. Nexata cadenamaëtomi tsiquirijavaxi exanapenetabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitso asaë.

⁵ Bajaraponë petsutonëjava, jivi petëpaevi pemëthëcaejava, matakabi-jebi, meravijebi yajava, ponaponabiaba. Vavajai tsabiabaponaponae. Ibotonëjavabelia natsaquibajarababiabaponaponae.

⁶ Bajaraponë itsa taetaba Jesús penajetarucaejava, nexata tajëverena cujinaeponarena Jesúsjavaberena. Jesús pitabarata pematatabacabëta nucajunua.

⁷ Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexënatomë. ¿Detsa xua jaitame xanëjavaberena? Pexaniacuene bitso cavajëtatsi Dioso pitabarata. Nejamatabëcuenebejiohitsipame, jai dovathivi peyajavaponaponaeñ Jesúsjavabelia.

⁸ Bajarapacuenia jumaitsi dovathivi peyajavaponaponaeñ tsipaji Jesús jerajavavetsina penonotajunaejavata, dovathivi peyajavaponaponaeñ pematanaeñjavatatsi, Jesús itaveta dovathivi. Jesús jumaitsi dovathivijavabelia mapacueniajaje:

—¡Dovathivi, bajaraponë baja pavecuapitsapare! jai Jesús.

⁹ Nexata Jesús jumaitsi bajaraponëjavabelia:

—¿Detsa pavënëmë? jai.

Nexata dovathivi peyajavaponaponaeñ navënëpaeba.

—Tavënë raja León. Tsipaji raja bitso paayaibitsaëttoxanetonë, jai dovathivi peyajavaponaponaeñ.

¹⁰ Nexata dovathivi pinijicuenia vajëta Jesúsjavabelia itsairabelia pejut-siyanivatsi bajarapairaveca.

¹¹ Nexata bajarajota, imoxoyo petsutojavata, marranobitsaëttoxaneto xaevanapa.

¹² Dovathivi bitso vajëca Jesúsjavabelia.

—Paneitorobare marranobitsaëttoxanetojavabelia. Panetocopare patajonenexa bajara pamarranobitsaëttoxanetojavabelia, jai dovathivi.

¹³ Nexata Jesús tocopata pacuenia dovathivi vajëcatsi. Dovathivi baja pebi vecuapitsapecatsi. Nexata baja marranobitsaëttoxanetojavabelia dovathivi junua. Bajara pamarranobitsaëttoxaneto jinavanapa anijamilbeje ponëbeje. Nexata daxita marranobitsaëttoxanetomi cujinaeyeca. Pucaxaneto itapanituareca othopareca. Nexata daxita marranobitsaëttoxanetomi meneta bubuna.

¹⁴ Bajara pamarranobitsaëttoxanetomi pevetavanapaevi rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata. Nexata jivi ponarena petanenaxa bajarapacueni.

15 Nexata dovathivi peyajavaponaponaenëmi bajarapamonae taeyeta Jesús pemuxuneneta. Bajaraponë penaxatatsijava baja naxatateca. Jamatejema baja. Xaniavaetsia eca. Nexata bajarapamonae cujunavatsi Jesús.

16 Pamonae cuenetanetsi Jesús pejamatejemayaexanaejava dovathivi peyajavaponaponaenëmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobit-saëtoxanetojavabelia.

17 Nexata Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

18 Jesús baja itsa runareca jera ënëabereca, ponë dovathivi peyajavaponaponaenëmi, bitso picani navajëca Jesús pepëta penaponaenexa.

19 Itsiata Jesús apo jejai. Jumaitsi bajaraponëjavabelia:

—Ponare nijaboyabelia. Nijamonae tsipaebare papinijicuene Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyajavaponaponaenëmijavabelia.

20 Nexata baja dovathivi peyajavaponaponaenëmi pona. Taxuxuaba penavajunupaebijava papinijicuene Jesús exanatsi. Bajaraponë navajunupaebapona Decápolisvënë nacuajava. Decápolisvënë nacuata eca diez patomarabeje. Daxitajivi jamatabëcuenenabenajaca itsa jumetanetsi bajaraponë penavajunupaebaponaejava.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

(Mt 9.18-26; Lc 8.40-56)

21 Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxaneto Jesús matatoyoronatsi.

22 Nexata bajarajota napatajopa Jairovënë. Bajaraponë judiövi penacae-tuatabiabiho pevetsiviyajuvënë. Jairo itsa taetaba Jesús, nexata Jairo pematabacabëta yaiyataeya Jesús pitabarata nucajunua.

23 Pinijicuenia Jairo vajëta Jesúsjavabelia. Jumaitsi:

—Taxënatoyo raja netobitso. Najumalipeneta rabaja petëpaenexa. Pexaniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

24 Jejai Jesús. Jesús nexata napona Jairo pepëta. Nexata jivibitsaëtoxaneto Jesús pepënaponaevitsi matatoyorotsia cënënanajetarubenatsi.

25 Bajarapajivibitsaëtoxaneto tuatujëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina.

26 Bitso nexata bajarapova bejiobi pexainacuene yabara pevaëbivitsi pejamatabëcueneta. Tsipaji belia daxita pexainaejavaximi navecuavereta pematamobaponaeta pevaëbivitsi. Itsiata apo caevi piavitaneuene. Biji caranata pevajënaeyabelia capunaponatsi piavitaneuene.

27 Nexata bajarapova jumetane itsamonae pecuaicuaijajava Jesús piavitanevi pejamatejemayaexanaponaejava yabara. Nexata bajarapova ponataba Jesús pepënëvelia, jivibitsaëtoxaneto tuatujëalia. Nexata bajarapova tojayataba Jesús penaxatatsijava.

28 Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitanëjavami nevecuaajibi tsane,” jamatabëjai.

²⁹ Nexata bajarapova itsa tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecae-vijavareca, nayapètane.

³⁰ Jesús ata nayapètane pesaëta pejamatejemayaexanaejava pepenëyabelia. Nexata pejayatabijavatatsi Jesús napenëyorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

³¹ Nexata Jesús pijajivi jumaittsitsi:

—Taneme rabaja jivibitsaëtoxaneto pecacënënanajetarubenaejava. ¿Detsa xua-jitsia: “¿Jipatsa tanaxatatsijava netojayataba?” jamë? jaitsi Jesús pijajivi.

³² Jesús naëcobaruta daxitajivijava petaenexa pajivi tojayatabatsi penax-atatsijava.

³³ Nexata bajarapova neconecoja tsanucae pecajunavi penayapëtaexae Jesús pejamatejemayaexanaejavatsi. Nexata bajarapova najetabarena Jesús pitabarayaberena. Pematatabacabëta nucajunua. Nexata daxita pacuene exana, bajarapova tsipaeba Jesúsjavabelia.

³⁴ Nexata Jesús jumaittsi bajarapovajavabelia:

—Xamë nesivajamatabëjumaittsimë: “Jesús penaxatatsijava itsa tojayatabi-anajë, tavitanejavami nevecuaajibi tsane,” nesivajamatabëjamë. Bajaraxu-ata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

³⁵ Bajarapacuenia Jesús pejumaittsanuaejavata namutoepatota, Jairo pi-jaboverena peponaevi mataenenatsi. Bajarapamonae jumaittsi Jairojavabelia:

—Jairo, nexënatoyo rabaja tëpa. Pëtsa baja matavëjëa ja-matabëitonotaponame Jesús, jai bajarapamonae Jairojavabelia.

³⁶ Jesús jumetae ata bajarapajume, itsiata jumaittsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena nexënatovayo pecatoasaënexa, jai Jesús Jairojavabelia.

³⁷ Nexata Jesús, pajivibitsaëtoxaneto pënanajetarubenatsi, pueneta bajara-jota. Jesús pona Jairo pijaboyabelia. Jesús saya yajavalia mapamatabëxëyoje: Pedro, Juan, Santiago, Jairo jane baja. Juanbeje Santiagobeje nacaebananëbeje.

³⁸ Itsa baja Jesús palia Jairo pijaboyabelia, tane jivibitsaëto pinijijumeta pemataneuyabijava petëpaevayo.

³⁹ Jesús itsa joneya boyalia, jumaittsi bajarapamonaejavabelia:

—Pëtsa bitso pmataneuyabame. Pejanava raja apo tëpae. Saya raja maji-tanuca, jai Jesús tsipaji yapètane Jesús piasaëyaexanaejavanexa bajarapovayo.

⁴⁰ Bajarapacuenia Jesús pejumaittsijava, bajarapamonae saya jumecapoc-aponatsi. Nexata daxita Jesús bovecua pitsapaeyaexana. Itsaxuay-olia petëpaevayo boca, Jesús barëjoneya caejiviyobeje saya. Jesús saya barëjoneya mapamatabëxëyoje: petëpaevayo paxa, pena, Jesús pijajivi, acueyabi ponëbeje. Bajarapamatabëxëyo saya Jesús barëjoneya.

⁴¹ Nexata Jesús petëpaevayo cobepita. Jesús pijajumeta jumaittsi:

—Talita cumi, jai, mapajumetaje pejumaittsijume: “Pejanava, nonota-punare,” pejaijume.

⁴² Bajarapacuenia Jesús pejumaittsijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyajava-jonevilia pinijicuenia jamatabëcuenenabenajaca bajarapacuenia itsa tane.

⁴³ Nexata Jesús pinijicuenia jumaittsi:

- Pëtsa itsajivi ata patsipaebame mapacueneye, jai Jesús.
 Bajaraxuacujinae Jesús jumaitsi pejanavayo penajavabelia:
 –Nexënatovayo pexaejava rajure, jai.

6

Pacuenia Jesús naviata pijanacuayabelia, Nazaret tomarabelia, yabara pelivaisi

(Mt 13.53-58; Lc 4.16-30)

¹ Jesús baja, pijajivi yajava, pona Capernaum tomaravecu. Naviata pijanacuayabelia, pevitsabitomarabelia.

² Judíovi penacueraevetsimatacabita Jesús taxuxuaba jivi livaisi petsipaebijava judíovi penacaetuatabiabibota. Ayaibitsaëtoxaneto pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneabiatanetsi. Bajarapamonae Jesús yabara najumaitsi mapacueniaje:

–¿Detsa meta verena maponë capitsapa mapajamatabëcuenelivaisije? ¿Detsa pacuenia meta yapëtane daxita mapacueneye? ¡Pitsipinijiucene maponë exanaje, vaxaitsi abaxë caeto ata apo taetsi! ¡Matapania matanetsije!

³ Maponëje vaxaitsiyajuvënënë. Carpinteronë. María pexë nato. Bajaronë pejuyapijivi Santiago, José, Judas, Simón. Papetiriavi ata vajatamarata jinavanapa, bajaraponë pejuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi.

⁴ Nexata Jesús jumaitsi bajarapamonaejavabelia:

–Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijaviriavi, pijamonae ata, apo yaiyataeyabiabitsi, jai Jesús.

⁵ Nexata Jesús bajarajota jivi ayaibitsaëtojavabelia pinijicuene pexanaejava apo tsitaexanae. Tsipaji apo jumecovënëtsitsi. Saya caejiviyobeje piavitanevi pecobeta jayata. Jamatejemaya exana.

⁶ Nexata Jesús bitso najamatabëxaina. Tsipaji jivi apo jumecovënëtsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaebanajetaruca.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Lc 9.1-6)

⁷ Jesús junata pijajivi doce ponëbeje penacaetuatsinexa. Nexata Jesús pijajivi itoroba anijanëbeje tsaponae. Jesús pijajivi pecaëjëpaejamatabëcuenetsi jamatabëcuenecaëjëpaeyaexana dovathi peyajavajinavanapaevi pevecuacapisaponaenexa.

⁸ Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

–Pëtsa itsacueneyava ata pacaponame panijanamutonexa. Pëtsa pacaponame panemarue ata, dorota, palata ata. Ènaeboyota saya pacaponare.

⁹ Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame.

¹⁰ Itsajota papatabiabianame, caebota pamajitabibianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecu papitsapaenname.

11 Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponae name bajarapatomaravecuā. Paneponae vajēnae bajarapatomarata panataxuatsapērēvarēbianame, bajarapacuenia itsa panataxuatsapērēvarēbianame, bajarapatomarapijivi yapētaena Diosojavabelia penaneconitsicuene apo papacacopiapitsixae papecanamuxunaevetsinexa panetsipaebilivaisi. Xaniajanē pacuenia pacatsipaebijitsiatsi. Pamatacabi Dioso jivi naneconitsiaexanaena, bajarapamatacabi Dioso bitso naneconitsiaexanaenatsi patomara-pijivi apo pacacopiapitsi tsane. Paneconivajētota bajayata Dioso naneconitsiaexana Sodomā tomarapijivimi, Gomorra tomarapijivimi ata, bajara-paneconivajēto matatoxenetsia Dioso naneconitsiaexanaenatsi patomara-pijivi apo pacacopiapitsi tsane, jai Jesús pijajivijavabelia.

12 Nexata jane baja Jesús pijajivi naropoba Dioso pitorobilivaisi jivi pet-sipaebanajetarubenaenexa. Jesús pijajivi naropoba anijanēbeje tsaponae. Nexata Jesús pijajivi jumai tsaponae jivijavabelia:

—Pacopabare baja pibisiacuene paneexanabiabijava. Panajamatabēcuenepēnēyorore Diosojavabelia, jai tsaponae.

13 Jesús pijajivi dovathi peyavajinavanapaevi vecuacapitsapapona. Pivitanevi ata mataexabapona aceteranēta. Bajarapacuenia Jesús pijajivi jamatejemayaexanapona piavitanevi.

Pacuenia bajayata Juanpijinē jivibautisabinēmi beyaxuabatsi yabara pelivaisi

(Mt 14.1-12; Lc 9.7-9)

14 Herodes, Galileanacia pevetsinē. Nexata Herodes jumetane itsamonaē jamatabēcuenenavēxaniabiaya pejumaitisijava Jesús yabara: “Juanpijinē raeta jivibautisabinēmi icatsia asaē petēpaecujinae. Bajaraxuata caējēpatsi Dioso pesaēta pinijicuene pexanaenexa,” pejaijiva itsamonae jamatabēcuenenavēxaniabiaya Jesús yabara, Herodes jumetane.

15 Itsamonae pijinia jumai tsaponae Jesús yabara:

—Bajayata raeta ponēmi ponapona, profeta Eliaspijinēmi, baja raeta ponē, jai tsaponae itsamonae.

Itsamonae pijinia jumai tsaponae Jesús yabara:

—Diosojumepaebinē profeta raja. Tsipaji rabaja pacuenia bajayata profetavi jinavanapa, bajara icatsia maponē itsije, jai tsaponae itsamonae.

16 Bajarapacuenia itsamonae jamatabēcuenenavēxaniabiaya pejumaitisaponaējava Jesús yabara, Herodes itsa jumetane, Herodes ata jamatabēcuenenavēxaniabiaya jumaitis Jesús yabara:

—Maraeta Juanpijinēmije, ponēmi bajayata xanē tajajivi vēsiucutaxuabiaexanajē. Icatsia raeta asaē petēpaecujinae, jai Herodes jamatabēcuenenavēxaniabiaya Jesús yabara.

17 Bajarapacuenia Herodes jumaitis tsipaji abaxē Juanpijinē itsa asaē, Herodes pijajivi, vajabitsaēvi, itoroba Juanpijinē pevaetabinexatsi. Nexata vajabitsaēvi Juanpijinē cobecētsiaya caponatsi penaneconitsivi pejebabiabiyolia. Bajarapacuenia Herodes pijajivi itoroba Herodes pijava, Herodiasva, pejamatabēcueneta. Herodiasva picani copiatā pita Felipe, Herodes pejuyapijinē. Nexata Herodes pejuyapijinē pijava yacajērēta.

18 Nexata Herodes pejuyapijinē pijava peyacajērētsixae, Juanpijinē abaxē itsa apo vaetabitsi, muxujioba Herodes. Juanpijinē jumaitis Herodesjavabelia:

—Acuenebi raja nejuyapijinē pijava nepitsijava,” jai Juanpijinē Herodesjavabelia.

19 Nexata bajarapacuenia Juanpijinē pejumaitsixae, itoyatsi Herodíasva. Nexata abaxē Juanpijinē itsa ponapona penaneconitsivi pejebabiabib-ota, bajarapova picani Juanpijinē jamatabēbeyaxuabiaexanatsi. Itsiata apo caējēpaetsi.

20 Tspaji Herodes yapētane Juanpijinē bitso pejamatabēxanepanaenēcuene. Nexata Herodes yaiyatane Juanpijinē. Bajaraxuata Herodes apo tocopatsi pijava pejamatabēcueneta pebeyaxuabinoxatsi Juanpijinē. Juanpijinē itsa cuaicuaijai tsabiabi Herodesjavabelia, nexata picani Herodes jamatabēbējai tsabiabi pijaneconi yabara. Itsiata Herodes xaniavaetsia namuxunaevetabi-aba.

21 Nexata pamatacabi Herodes najamatabēnapita penaexanaematacabi, najamatabēxaina pexaniafiesta pexanaenexa. Bajarapafiestajava Herodes junata pijaboyaberena jivi ayaibitsaētoxaneto penabaninexa. Junata Herodes pijajivi, pamonaē tovetatsi pijairanē. Junata vajabitsaēvi pevetsivinua. Junata petuxanevinua, Galilea nacuata pejinavanapaevi. Nexata bajarapafiestajavata Herodíasva toyapēxanepanatsi Juanpijinē pebeyaxuabiaexanaenexatsi.

22 Herodíasva toyapēxanepanatsi tspaji pexēnatoyo joneya Herodes pejunatsivi pebarēnabanecaējavalia pijacujirucuenia caevayo peyava-jibinexa. Nexata Herodes pejunatsivi bitso barēitajitsipa pejionēyo peyavajibijava. Nexata Herodes najumecapanepaeya pexaniajajumeta jumaitsi pejionēyojavabelia:

—Nevajēre xua jitsipame. Carajutsianatsi raja.

23 Pacuenejava nevajētsianame, carajutsianatsi. Itsa nevajētsianame ta-neevetsiaexanaenacua ata, tuatuaējējava carajutsianatsi, jai Herodes najumecapanepaeya pejionēyojavabelia.

24 Nexata bajarapovayo pitsatabalia. Jumaitsi penajavabelia:

—¿Detsamē ra xua vajētsianajē? jai penajavabelia.

Nexata Herodíasva pexēnatoyojavabelia jumaitsi:

—Juan jivibautisabinē pematabocoto vajēre, jai.

25 Nexata bepijia bajarapovayo jopajoneya Herodes peecaējavabelia. Jumaitsi Herodesjavabelia:

—Jitsipajē cajena tanerajutsinexamē platota Juan jivibautisabinē pe-matabocoto, jai bajarapovayo Herodesjavabelia.

26 Nexata Herodes pinijicuenia bejamatabējiobi tsanajetsireca. Herodes nexata acuenebi: “Jume,” pejaijava. Tspaji baja Herodes najumeca-panepaeya jumaitsi pejionēyojavabelia pexaniajajumeta daxita pejunatsivi pitabarata.

27 Nexata Herodes bepijia itoroba vajabitsaēnē petocarenanexatsi Juan pematabocoto.

28 Vajabitsaēnē nexata pona penaneconitsivi pejebabiabiboyabelia. Juanpijinēmi vēsiucutaxuabatsi. Juanpijinēmi pematabocoto vajabitsaēnē carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapētane capanepaeya baja Juanpijinē pebeyaxuabi-javatsi.

29 Nexata Juanpijinē pijajivi itsa vēnētanetsi pebeyaxuabijavatsi, bajarapa-monaē ponarena Juanpijinē pebocaejavaberena. Pitatsi petēpaenē. Pepit-sicujinaetsi Juanpijinē pijajivi mēthētatsi.

Pacuenia Jesús pexaejava rajuta cinco mil ponēbeje yabara pelivaisi (Mt 14.13-21; Lc 9.10-17; Jn 6.1-14)

³⁰ Jesús pitorobivi, apóstolevi, naviabanajetarubena Jesúsjavaberena. Nexata bajarapamonae Jesúsjavabelia navajunupaeba daxita pacuene exananapa, pacuenia ata jivi livaisi tsipaebavanapa.

³¹ Nexata Jesús jumaitsi bajarapamonaejavabelia:

—Naxantsia. Ponatsi pesajinaejavabelia. Nacueraevetsianatsi caepatoyo, jai Jesús.

Bajarapacuenia Jesús jumaitsi pijajivijavabelia tsipaji jivibitsaëtoxanetonë topatabiabatsi. Itsamonae naviabaponabiaba. Itsamonae juya patabiaba. Nexata Jesús pijajivi pebarënanabinexa, apo cuenecaëjêpabiabitsi.

³² Nexata Jesús ëpijajivi jerata yajavapona itsabelia jivi ajibi.

³³ Itsiata jivi ayaibitsaëtoxaneto pëtanetsi Jesús peponaejava. Nexata itsabelia Jesús pona, matatsënëa pënacujinaerubenatsi daxita tomaranëpijivi. Caranata Jesús pevajënaeyabelia pata bajarapamonae.

³⁴ Itsa baja Jesús'bana nonobajunaya jeravecua, Jesús tane jivibitsaëtoxaneto. Nexata Jesús bajarapamonae itaxutobejobiatane. Nexata Jesús bajarapamonae sivajamatabëjumaitsi mapacueniaje:

—Pacuenia baitsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajarapamonaejavabelia.

³⁵ Itsa baja bitso caniviyotsia, Jesús pijajivi cujibarenatsi. Jumaitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xainae.

³⁶ Itorobare baja jivi peponaenexa imoxoyo penaetomaranëjavabelia pecomuacaenexa pexaejava, jaitsi Jesús pijajivi.

³⁷ Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponaenajë tsaja tomarabelia patacomuatsinexa pan doscientos denarota bajarapamonae pexaenexa? jai Jesús pijajivi.

³⁸ Jesús icsia jumaitsi pijajivijavabelia:

—¿Detsa papanbëbeje paxainame paxamë? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai Jesús pijajivi.

³⁹ Nexata Jesús itoroba daxitajivi penaenexa ponajavata.

⁴⁰ Nexata bajarapamonae pepobitsaëtonë natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajarapacuenia caebitsaëto canacujitsia enapona.

⁴¹ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoxaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Dujuaijavaxi ata tsicobetsana jivijavabelia. ⁴² Daxita xaniavaetsia nabane.

⁴³ Bajaraxuacujinae Jesús pijajivi caetuata pan, dujuai yajava, jivi peyajuvenëcopabejibijanë. Nexata vënëba doce xuabeje bemapirecuenia pexanaejavanë.

⁴⁴ Pamona pexaejava xane, ayaibitsaëtoxaneto. Itsiata ëpebijivi namatajëtatsi cinco mil ponëbeje.

Pacuenia Jesús mene itaboxoya najetaruca yabara pelivaisi
(Mt 14.22-27; Jn 6.16-21)

⁴⁵ Jesús jivi ayaibitsaëtofaneto pexaejava perajutsicujinae, Jesús pijajivi bepíjia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxë caenë nacopatanuca bajarajota.

⁴⁶ Itsa baja jivi napëvereta penaviabijava, Jesús junaya petsutojumabetsia pevajëtsinexa Diosojavabelia.

⁴⁷ Itsa baja bitso meravi, Jesús pijajivi pucaxaneto itapavecua tajë baja yanajetarubenalia. Jesús abaxë bajarapaepatota caenë nacopatanucarena pucaxanetoitapatarena.

⁴⁸ Nexata Jesús tane pijajivi petoayapëbejejavatsi pevaetsijava. Tspíjia bitso joviboxaneto ayai pevajënaeverena. Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. Kovia picani xenetsijitsia.

⁴⁹ Jesús pijajivi itsa tanetsi mene itaboxoya penajetarucaejava, Jesús píjajivi jamatabëjumaitsi:

—íPetëpaenëmi raeta pejumape najetaruca! jamatabëjai.

Nexata Jesús pijajivi vavajai tsaxuabi ayaijumeta.

⁵⁰ Tspíjia daxita Jesús pijajivi tane bajarapacuenia penajetarucaejava. Nexata Jesús píjajivi jamatabëcuenenajunaviaca. Nexata Jesús bepíjiayo jumaitsi píjajivijavabelia:

—Xanë raja. Pëtsa panecujunavame. Pajamatejemamëre saya, jai Jesús píjajivijavabelia.

⁵¹ Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús píjajivi pinijicuenia jamatabëcuenenajunaviaca. Tspíjia tane jovibo, malataca yajava, Jesús píjajibiaexanaejava.

⁵² Jesús baja picani píjajivi copiaya tane, pan tsiquirijavayomi ata, jivibitsaëtofanetojavabelia Jesús perajutsijava. Itsiata Jesús píjajivi apo jamatabëcueneyapëtae Jesús pecaëjëpaenëcuenetsi pinijicuenene pexanaenexa. Abaxë bajarapamonae ajamatabëcuenetaja.

Pacuenia Jesús jamatejemayaexana piavitanevi Genesaret nacuata yabara pelivaisi

(Mt 14.34-36)

⁵³ Jesús píjajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta.

⁵⁴ Nexata Jesús, píjajivi yajava, nonotajunaya jeravecua. Bajarajota bepíjia jivi yapëtanetsi Jesúsucuenë.

⁵⁵ Nexata Jesús pepatsijava penatsipaebinexa, navajunucacujinaejinaruta daxita bonëjava. Nexata piavitanevi píjacamaxita yavëtarapatatsi itsajota jivi jumetane Jesús pepatsijava.

⁵⁶ Jesús pata tsiquiritomaraxijava, pinijitomaranëjava ata, tomarapënëya penaebonëjava ata. Daxitajava, itsa patomarata Jesús patabiaba, bajarapatomaranëjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuenë bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonaë Jesús penaxatatsijavacopia tojayataponatsi, jamatejema baja tsaponae piavitanejavamivecua.

7

*Pacuenia Jesús tsipaeba xua jivi jamatabëcuenebijanatsi yabara pelivaisi
(Mt 15.1-20)*

1-4 Daxita judíovi catsiteca pijasalinaivimi pijacuene. Judíoviyajuvënëvi, pamonaë fariseovi naexana, bajarapamonaë bitso catsiteca pijasalinaivimi pijacuene daxita judíovi matatoxenetsia. Jamatabëcuenenavëxaniabiaya jamatabëjumai tsabiabi:

—Itsa catsitecäjë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonaë pijasalinaicuenia anijatonë xaniavaetsia itsa apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviaba pecomuacaecujinaë, bajarapamonaë pijasalinaicuenia xaniavaetsia itsa apo napënanacobequiatsi, pexaejava apo xaeyabiabi. Bajarapamonaë pematatsënëa navitsia itsacujiruxi ata, pijasalinaivimi pijacujiru, catsiteca. Bajarapamonaë tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalën tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonaë tane Jesús pijajivi judíovi pijasalinaicuenia anijatonë napënanacobequiatsinejeva penabanijava. Bajaraxuata bajarapamonaë jumaitsi Jesúsjavabelia:

—Jesús, nijajivi naneconita Diosojavabelia.

5 Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonaë Jesúsjavabelia.

6 Jesús nexata jumaitsi bajarapamonaëjavabelia:

—¡Paxamë saya jivi paneyamaxëitojorobivi! Diosojumelivaisipaëbinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara profeta Isaíaspijinë peyaquinaelivaisita jumaitsi mapacueniaje: Bajarapamonaë nejitsipaena saya pijumeta. Itsiata pepo tanejitsipaëjamatabëcuene nevecuatäjë tsane.

7 Saya baitsi bajarapamonaë pijajumaitsita tsane: “Pacajitsipatsi,” nejai itajara tsane. Itsiata apo xaniajai tsane. Bajarapamonaë saya jivi tsipaëbaponaena pejamatabëcuenepejilivaisi. Pepo taitorobilivaisi apo tsipaëbi tsane, jai tajëvelia Dioso pejumaitsijava paxamë yabara Isaíaspijinë peyaquinaelivaisita, jai Jesús bajarapamonaëjavabelia.

8 Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuene pacatsitecame. Nexata vajasalinaivi pijacuenia xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame.

9 Apo pajumecovënëtsimë Dioso pitorobilivaisi vajasalinaivi pijacuene panecatsitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitsimë tsabiabi: “Pexaniacuene raja exanjë,” pajamatabëjamë tsabiabi.

10 Bajayata Dioso najumecopata Moiséspijinëta. Bajarapalivaisi jumaitsi: “Axa yayataema. Ena ata yayataema. Pajivi pibisiacuenia bijatane paxa,

pena ata, bajarapajivi pabeyaxuare,” jai Dioso Moiséspijinëta penajumeco-patsilivaisi.

¹¹⁻¹² Itsiata baitsi jane paxamë jivi pamuxubijipenetabiabame peyaiy-ataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia.

¹³ Nexata caranata Dioso pejumaitisijume: “Axa yaiyataema. Ena ata yaiy-ataema,” pejaijume, paxamë jivi pacopabiaexanaponame. Tspaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

¹⁴ Nexata icatsia Jesús junata jivi. Jumaitis jivijavabelia:

—Daxita paxamë panenamuxunaevere xaniavaetsia patane-jumeyapëtaenexamë.

¹⁵ Xua jivi pecuibota xane, pexaevajëna napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtovetsina, xua ata pibisiacuenia cuaicuaijai, bajara baitsi jane xua jivi bajamatabëcuenebijianatsi.

¹⁶ Pajivi jamatabënejumeyapëtane patacatsipaebilivaisi, nenamuxu-naevetsi xaniavaetsia, jai Jesús.

¹⁷ Itsa baja Jesús jivivecua natixita, boya joneya. Nexata boyalia pijajivi anijobatsi bajarapalivaisi.

¹⁸ Nexata Jesús jumaitis pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijianaetsi. Diosojavabelia apo vënananeconitsi.

¹⁹ Tspaji raja jivi pexaejava apo tsijamatabëëthëjonetsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaitis pijajivi peyapëtaeyaxanaenexa pacuenia daxitacuene jivi pexaejava xae ata, apo pibisiacueni.

²⁰ Icatsia Jesús jumaitis:

—Baitsi rajane jivi pejamatabëëthëtöjavavetsina, papibisiajamatabëcuene pitsapa, bajara baitsi jane xua jivi jamatabëcuenebijianatsi.

²¹ Tspaji rabaja jivi pejamatabëëthëtöjavavetsina pitsapa pibisiacueni penajamatabëxainaenexa. Pitsapa pebi pijava pevecunamatayajitsi jamatabëcuenenexa. Pitsapa petriavijavabelia pebi penaperabëquenetsiatae jamatabëcuenenexa. Pitsapa jivitonë pebeyaxuabijamatabëcuenenexa.

²² Pitsapa penacobetoxotsijamatabëcuenenexa. Pitsapa itsa-monae pecobecovë penaxainaeyabijamatabëcuenenexa. Pitsapa piacujirubejejamatabëcuenenexa. Pitsapa itsamonaejavabelia peyamaxëitöjorobijamatabëcuenenexa. Pitsapa itsamonae pexainaecueni pecobecaëbijamatabëcuenenexa. Pitsapa itsajivi pibisiacuenia pebaracuaicuaijai jamatabëcuenenexa. Pitsapa ayaijamatabëcuenejivi penataejamatabëcuenenexa. Pitsapa saya jema peponaponaejamatabëcuenenexa.

²³ Daxita bajarapajamatabëcuene jivi pejamatabëëthëtöjavavetsina pitsapa. Nexata bajarapacueni jivi jamatabëcuenebijianatsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi

(Mt 15.21-28)

²⁴ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsiata acuenebi muetsia pepatsijava.

²⁵ Nexata bepijia petiriva vënëlivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yayyataeya Jesús pitabarata pematabacabëta nucajunua. Bajarapova pexënatoyo dovathi yajavapon-apon.

²⁶ Bajarapova sirofeniciaviriava, apo judíova. Nexata Jesúsjavabelia jumaiitsi:

—Pexaniacuene bitso netoexanare. Taxënatovayo netovecuacapitsapare dovathi, jai bajarapova.

²⁷ Nexata Jesús jumaiitsi bajarapovajavabelia:

—Copiaya abaxë veyavenonajë tajanacuapijivi, judíovi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁸ Itsiata baitsi jane bajarapova ajumesaë tsaponae. Icatsia jumaiitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca, banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁹ Nexata icatsia Jesús jumaiitsi bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

³⁰ Itsa baja bajarapova pijaboyabelia pata, pexënatovayo taeyabuata jamatejema baja pebocaejava camata. Nexata yapëtane pexënatovayo baja petovecuapitsapaejavatsi dovathi.

Pacuenia Jesús jamatejemayaexana bitso siyanë, apo pejumetaenë, piajumecëcënë, yabara pelivaisi

³¹ Jesús baja naropota Tiro nacuavecua. Najetaruca Sidón nacuajava. Bajaraxuacujinae najetaruca Decápolis nacuajava. Bajaraxuacujinae patajopa Galilea pucaxanetojavabelia.

³² Bajarajota jivi tocapatatsi siyanë, bitso apo pejumetaenë, piajumecëcënë. Nexata bajarapamonae jumaiitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuacuajainexanua, jai bajarapamonae.

³³ Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata.

³⁴ Nexata Jesús athëbëa benaëcotsia. Jesús athëbë venajumalixuabica. Nexata Jesús pijajumeta jumaiitsi bajaraponëjavabelia:

—¡Efata! jai.

“Efata,” pejaijume Jesús pijajumeta, mapajumetaje pejumaiitsijume: “¡Muxuvojorucaremelia!” pejaijume.

³⁵ Bajarapacuenia Jesús pejumaitsijavata, bajaraponë muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia.

³⁶ Nexata Jesús jumaitsi bajaraponë petocapatsivitsijavabelia:
—Pëtsa papaebame itsamonaejavabelia pacuene exanajë maponëjavabeliaje, jai picani Jesús asaëyata.

Itsiata bajarapamonae jumeitavetsi atatsi, bitso tsipaebapona jivijavabelia.

³⁷ Nexata pamonaë jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenëvitane pexainaevi ata xaniavaetapona. Siyavi ata, bitso apo pejumetaevimi ata, jumetaeayexanapona. Apo pecaëjëpaevitsi ata pecuaicuajijajava, cuaicuajijaiyaxanapona xaniavaetsia, jai bajarapamonae Jesús yabara.

8

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi
(Mt 15.32-39)

¹ Itsamatacabi Jesús jivibitsaëtoxaneto muxunanacætuatatsi. Nexata bajarapamonae penabaninexa, bajarajota pexaejava apo xainae. Nexata Jesús junata pijajivi. Jesús jumaitsi pijajivijavabelia mapacueniaje:

² —Netsitabejiobi baja rovia mapamonaeje. Tsipaji baja ajena acueyabi pamatacabiibeje xaina xanëjavata pejinavanapaecujinae. Pemarue baja tovereverecatsi.

³ Itsa meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsipaji raja itsamonae pata tajëverena, jai Jesús pijajivijavabelia.

⁴ Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xainae, jai Jesús pijajivi.

⁵ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

⁶ Nexata Jesús itoroba daxitajivi penaenexa irata. Nexata Jesús pita siete papanbëbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan. Nexata Jesús pepatsicaeapan rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa.

⁷ Djuuainëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadujuainëxi.

⁸ Daxitajivibitsaëtoxaneto nabane xaniavaetsia. Nexata peyajuvenëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë.

⁹ Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia.

¹⁰ Bajaraxuacujinae Jesús, pijajivi yajava, runareca jera enëabereca. Jesús pijajivi barëpona Dalmanuta nacuyabelia.

Pacuenia fariseovi Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

(Mt 16.1-4; Lc 12.54-56)

¹¹ Fariseovi Jesúsjavabereca pata. Bajarapamonae jamatabëcueneëjëbiaya jumenotaponatsi. Nexata bajarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

¹² Nexata bajarapamonae yabara Jesús bitso jamatabëcuenebëjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame pinijicuene patacatsitaexanaenexa pataneyapëtaenexamë pepacuene Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

¹³ Nexata baja Jesús bajarapamonae vecuapona. Icatsia runareca jera enëabereca. Pucaxaneto itsapanabelia baja Jesús pona.

Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi

(Mt 16.5-12)

¹⁴ Jesús pijajivi nacofënëta pamarue. Nexata saya caepanbëyo capona jerata.

¹⁵ Nexata Jesús pijajivi muxujioba pejumecovënëtsiyaniva fariseovi itsa tsipaebatsi saicayacuenia Dioso pejumelivaisivecua. Jesús jumaitsi pijajivi-yababelia mapacueniaje:

—Panejumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebilivaisi, nacuaeavetsinë ata, Herodes, petsipaebilivaisi, Jesús pijajivi pejumecovënëtsiyaniva.

¹⁶ Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuaijai bajarapacuenia Jesús pejumaitsijume yabara. Jesús pijajivi najumaitsi:

—Jesús nacajumaitsi: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaitsi pan apo vajacaponaeaxae, najai Jesús pijajivi.

¹⁷ Jesús pijajivi jamatabëcueneypëtane bajarapacuenia jamatabëcuenenavëxaniabiaya penajumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaeaxae,” panajamë? Paxamë abaxë apo panejumeyapëtaemë xua yabara pacajumaitsitsi. Pajamatabëcuenetajamë bitso.

¹⁸ Pan yabara raja apo pacajumaitsitsi. Pan itsa namatavenonaejitsipatsi, necaëjëpa taexanaenexa. ¿Apo panajamatabënapitsimë tsipaji pacuenia exanajë pamatacabi pan namatavenonatsi?

¹⁹ Pacujinae epatsicacajë cinco papanbëmibeje panetsicobetsanaenexa cinco mil ponëbejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavënëtajë, jai.

²⁰ Jesús icatsia jumaitsi:

—Pacujinae epatsicacajë siete papanëmibeje panetsicobetsanaenexa cuatro mil pajivibejevavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús.

Nexata Jesús pijajivi jumaitsi:

—Siete xuabeje pavënëtajë, jai.

²¹ Nexata Jesús jumaitsi pijajivijavabelia:

—¿Panejumeyapëtaneme tsabaja pan yabara apo patacajumaitsijava? Xanë pacajumaitsitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsitsi panejumecovënëtsiyaniva fariseovi petsipaebilivaisi, panejumecovënëtsiyaniva nacuaevetsinë ata Herodes. Tspaji bajarapamonae pacatsipaebiana saicayacuenia Dioso pejumelivaisivécua, jai Jesús pijajivijavabelia.

Pacuenia Jesús itaxutoxaniavaeta bitso pitaxutotsëcënaenë, apo petaenë tsiquirijavayo ata, yabara pelivaisi

²² Jesús, pijajivi yajava, patajopa Betsaida tomarata. Nexata Jesús tocana-jetarubenatsi bitso pitaxutotsëcënaenë, apo petaenë. Pinijicuenia vajëcatsi Jesús pitaxutojayatsinexa bajaraponë pitaxutoxanepanaenexa.

²³ Nexata Jesús cobepita. Barëpona pesaicaeyojavabelia, tomarapënëyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanijoba.

—¿Cacaëjëpa tsabaja netaejava? jai Jesús.

²⁴ Nexata bajaraponë naëcota. Jumaitsi:

—Taniji pebijivi pejinavanapaejava. Itsiata saya benetsita naejavanë, jai bajaraponë.

²⁵ Nexata icatsia Jesús itaxutojayata. Bajara jane xaniavaetsia naitaxutobatsiaya naëcota. Itaxutoxanepana jane baja. Xaniavaetsia baja tane.

²⁶ Nexata Jesús jumaitsi bajaraponëjavabelia:

—Naviare nijaboyabelia. Pëtsa abaxë poname tomarabelia. Pëtsa paebame itsajivijavabelia ata pacuene caexanatsi, jai Jesús.

Pacuenia Pedro jumaitsi Jesúsjavabelia: “¡Xamë raja Cristomë! jai yabara pelivaisi

(Mt 16.13-20; Lc 9.18-21)

²⁷ Jesús, pijajivi yajava, najetaruca. Pona pepatsinexa Cesarea de Filipovënë tomarajumaverena penaetomaraxijavabelia. Namutua abaxë penajetarubenaejavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

²⁸ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënënë icatsia asaë,” jai tsabiabi xamë yabara, jai Jesús pijajivi.

²⁹ Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso peccatorobinëtsica jivi necapanepaenexa, jai Pedro Jesúsjavabelia.

³⁰ Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papaebame. “Cristo raja,” pajamë pëtsa xanë yabara, jai Jesús.

Pacuenia Jesús tajëvelia navajunupaeba pebeyaxuabijavanexatsi yabara pelivaisi

(Mt 16.21-28; Lc 9.22-27)

³¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovënëtsi tsane Cristonëcuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matacabita, icatsia asaenë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

³² Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuajiamë netëpaejavanexa yabara, jai Pedro Jesúsjavabelia.

³³ Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanuca Pedrojavabelia:

—iDovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ëjivi pacuenia jitsipa taexanaenexa, jitsipame, jai Jesús.

³⁴ Nexata Jesús junata pijajivi, daxita jivibitsaëto yajava. Jumaitsi bajaramonaejavabelia:

—Pajivi jitsipa tanepënaponaejava, bajarapajivi copatsi pejitsipaecuenia pexanaenexa penajamatabëxainabiabijavami. Exanaponaponae taitorobicuenia. Najamatabëcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piagamatabëcuenesaë tsaponaponenexa. Nexata jane baja xuacujinae nepënaponaena.

³⁵ Pajivi exanaponapona penatojitsipaecuenia, apo xainae tsane matacabi apo pevereverecejava. Pajivi xanë tajamatabëcueneta copata penatojitsipaecuenia pexanabiabijavami, jivi tacapanepaelivaisitanexa pejamatabëcuenetanua, bajarapajivi xainaena matacabi apo pevereverecejava.

³⁶ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueje, itsiata nacuerata. Tsipaji pexainaecuene apo capanepae tsanetsi Diosojavabelia.

³⁷ Tsipaji acuenebi tsane itsajivi ata pematamotsinexa penaxuabiyaniava Diosovecua.

³⁸ Pajivi tajajivitonë ata, Dioso apo pejumecovënëtsivi tuatuajëta, pibisiacuene pexanaevi tuatuajëta ata, navënëlivaisicaura tsane xanë tajajivitonëcuene, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia patsianicajë. Baitsi pamatacabi xanë, Daxitajivi Pematapijinënë, ángelevi yajava, patsianicajë, pamatacabi yajavapatsianicajëna taxa Dioso pijapenivenivenaectotia, jai Jesús pijajivijavabelia.

9

¹ Icatsia Jesús jumaitsi jivijavabelia:

—Xaniajanê pacuenia pacatsipaebijitsiatsi. Daxita paxamê patêpaenejevamê, Dioso taxuxuabiana pijajivi pevetsijava mapanacuataje. Nexata paxamêyajuvênêvi pepuatae tsane Dioso petaxuxuabijava pijajivi pevetsijava mapanacuataje, têpaena. Dioso raja pijajivi evetsiana pinijijamatabêcuenesaêta, jai Jesús jivijavabelia.

*Pacuenia Jesús caeepatoyo perabênivenivenataba yabara pelivaisi
(Mt 17.1-13; Lc 9.28-36)*

² Jesús petêpaejavanexa tajêvelia penavajunupaebicujinae, seis pamatacabibejecujinae, Jesús pijajivi, acueyabi ponêbeje, barêpona pinijitsutoxanetojumabetsia. Jesús barêjunaya mapamatabêxêyoje: Pedro, Santiago, Juan. Bajarapamatabêxêyo Jesús barêjunaya pinijitsutoxanetojumabetsia. Nexata petsutojumatatsia Jesús perabênivenivena bajarapamonae pitabarata.

³ Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caêjêpaetsi bajarapacuenia peniojaiyaexanaenexa.

⁴ Jesús pijajivi bajarajota tane jemata penaitajêtsijava bajayata petêpaenêmibeje, Elíaspijinêbeje Moiséspijinêbeje. Jesús barêcuaicuajaitsi bajaraponêbeje. ⁵ Nexata Pedro jumaitsi Jesúsjavabelia mapacueniaje:

—¡Patajatuxanenê, pijacuaxae panebarêponame! Pacatoexanaenatsi acueyabi pabobêrêtobeje. Itsabobêrêto xamênexa tsane. Itsabobêrêto Moisésnexa tsane. Itsabobêrêto Elíasnexa tsane, jai Pedro Jesúsjavabelia.

⁶ Bajarapacuenia Pedro jumaitsi Jesúsjavabelia canaêjêtsinejeva. Tspajji bitso bajarapamonae najunaviaca. Nexata apo yapêtae pacuenia jumaitsijitsia.

⁷ Nexata daxita bajarapamonae pematatsênêvetsica itarêrêbo mataacataxuabatsi. Nexata bajarapamonae jumetane bajarapaitarêrêbojavavetsica Dioso pejumajitsijava.

—Mara ponê taxênato, tasivanêje. Panamuxunaevere bajaraponê, jaitsica Dioso Jesús pijajivijavabelia.

⁸ Bajarajota bajarapamonae itsa naêcobarêcêpalia Jesúsjavabelia, ajibi baja bajaraponêbeje. Caenê baja Jesús nuca.

⁹ Nexata Jesús pijajivi itsa barêrunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pêtsa patsipaebame itsajivi ata pacuene pataneme. Matapania xanê, Daxitajivi Pematapijinênê, icatsia asaênê tsane tatêpaecujinae, nexata jane baja matapania patsipaebianame, jai Jesús pijajivijavabelia.

¹⁰ Bajarapamonae, acueyabi ponêbeje, jumecovênêta pejumajitsicueniatsi. Itsiata êpamonae nayanijobabiaba.

—Jesús jumai tsabiabi: “Tatêpaecujinae icatsia asaênê tsane,” jai tsabiabi. ¿De tsamêra pajamatabêcuene xaina bajarapalivaisi? najai tsabiabi bajarapamonae.

¹¹ Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenê, ¿detsa xuajitsia judíovi pecujarubivi jumai tsabiabi: “Bajayata ponêmi ponapona, Elíaspijinê, petêpaecujinae icatsia asaê tsane. Bajaraponê copiata patsiana. Bajaraxuacujinae patsiana Cristo, ponê Dioso athêbêvetsica itorobijitsiatsica pepo vajanacacapanepaenênexa jane baja,” jai tsabiabi? jai Jesús pijajivi Jesúsjavabelia.

¹² Nexata Jesús jumaitsi pijajivijavabelia:

—“Copiata Eliaspjinē patsiana. Nexata bajaraponē jamatabēcuenexanetsiana daxitajivi,” itsa jai, Juanpijinēmi jivibautis-abinēmi yabara jumaitsi. Nexata baja xaniajai pacuenia judiōvi pecujarubivi jumaitsi. Tsipaji baja Juanpijinē tavajēnaeya jivi jamatabēcuenexanetaruca. Xanē, Daxitajivi Pematapijinēnē, athēbēvetsica Dioso nitoroba jivi tacapanepaenexa. Nexata xanē yabara tajēvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanē yabara tajēvelia Dioso pejumelivaisibaxutota, jai Jesús pijajivijavabelia.

13 Jesús icatsia jumaitsi pijajivijavabelia Juanpijinēmi yabara:

—Xaniajanē pacuenia pacatsipaebijitsiatsi. Eliaspjinē rabaja patajopa. Pepatsicujinae baja exanatsi daxita pacuenia jamatabēexanatsi. Nexata exanatsi pacuenia baja cajena Dioso pejumelivaisibaxutota tajēvelia jumaitsi bajaraponēmi yabara, jai Jesús pijajivijavabelia Juanpijinēmi yabara.

Pacuenia Jesús jamatejemayaexana pejevaxinē, dovathi peyajavaponaponaenē, yabara pelivaisi

(Mt 17.14-21; Lc 9.37-43)

14 Jesús pijajivi, acueyabi ponēbeje, petsutojumabetsia pebarēponaecujinae, icatsia barēnaviatsica. Itsamonae Jesús pijajivi pepuenetsivijavabetsica, barēnaviatsica. Nexata Jesús tane pijajivi jivibitsaētoxaneto pevājēnae pemata-toyironaejavatsi. Jesús tanenua judiōvi pecujarubivi anaeya pejumenotsija-vatsi Jesús pijajivi.

15 Nexata bajarapamonae itsa taerēcēpa Jesús, daxita jamatabēcuenēbarēyaya cujinaeyeca Jesúsjavabelia pebajacobinexatsi Jesús.

16 Nexata Jesús jumaitsi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

17 Caenē bajarapajivi bitsaētoxanetoyajuvēnēnē jumaitsi Jesúsjavabelia:

—Jesús, mara picani taxēnatonēyo, dovathi peyajavaponaponaenēyo, cato-canajetarucatsije. Maponēyoje dovathi apo netonatsipaebiaexanaetsi.

18 Itsa raja dovathi vaetababiabatsi, irata xuababiabatsi. Nexata bajarajota pecuibothamu tsabiabi. Vonoquiraquirajainua tsabiabi. Daxitanēyo aperabēbaba tsatababiabireca. Picani raja nijajivijavabelia jumaitsinē: “Panetovecuacapsapare dovathi,” janē. Itsiata bajarapamonae apo caējēpaetsi tanetovecuacapsapaenexa, jai bajaraponē Jesúsjavabelia.

19 Jesús nexata jumaitsi pijajivijavabelia:

—¡Paxamē baja rovia apo pajumecovēnētsimē Dioso papecayavenonaēja-vanexa! Bajaraxuata apo pacajamatabēcuenecaējēpae pejevaxinē paneve-cuacapsapaenexa dovathi. ¿Detsa paepatojebi abaxē paxamējavata ponaponaenajē? ¿Detsa paepatojebi abaxē paxamējavabelia ajamatabēcuenesaenē tsaponaponaē tsane patanejumecovēnētsinexamē? Panetocarenamēre pejevaxinē, jai Jesús pijajivijavabelia.

20 Nexata tocarenatsi Jesús pejevaxinē. Dovathi itsa tanetsi Jesús, nexata icatsia bajarajota dovathi pejevaxinē tēpajoneyaexanatsi. Irata xuabatsi pejevaxinē. Nexata pejevaxinē natorenaba irata. Pethamu pitsapa pecuibutsina.

21 Nexata Jesús yanijoba pejevaxinē paxajavabelia.

—¿Detsa pamatacabibeje xaina petaxuxuabicujinaetsi mapacuenēje? jai Jesús.

Nexata pejevaxinē paxa jumaitsi:

—Penacuetojavaveliacujinae cajena taxuxuabatsi.

²² Bajayajebi picani isotojavalía dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamē itsa cacajēpa itsacuenia ata taneyavenonaenexamē, ¡nitaxutotsoniataema! ¡Neyavenonare! jai pejevaxinē paxa Jesúsjavabelia.

²³ Nexata Jesús jumaitsi pejevaxinē paxajavabelia:

—Pajivi jumecovēnēta Dioso peyavenonaevanexatsi, bajarapajivi Dioso yavenonatsi daxita xua namatavenona, jai Jesús.

²⁴ Nexata pejevaxinē paxa aējai. Jumaitsi:

—¡Jumecovēnētajē baja cajena! ¡Neyavenonare bitso orijibia tajumecovēnētsinexa! jai bajaraponē Jesúsjavabelia.

²⁵ Nexata Jesús itsa tane jivibitsaētōxaneto penacaetuataponaejava Jesúsjavaberena, nexata Jesús itaveta dovathi. Jumaitsi:

—Dovathi, xamē pejevaxinē apo nenatsipaebiaexanaenē. Apo ne-jumetaeayaexanaenēnua. Xanē caitavetatsi. Pitsapare mapapejevaxinēvecuaje. Pētsa baja icatsia junuame matavējēa maponēyojavaberena, jai Jesús dovathijavabelia.

²⁶ Nexata dovathi pejevaxinē icatsia aējaiyaexanatsi. Tēpajoneyaexanatsi. Vecuapitsapatsi jane baja. Puenetabuatatsi bepetēpaenēyo. Nexata itsamonae bajarajota jumaitsi:

—Pejevaxinē rabaja tēpa, jai bajarapamonae.

²⁷ Nexata Jesús cobepita pejevaxinē. Cobevaetabiaya yotsina. Nexata pejevaxinē nonotabapuna.

²⁸ Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanē apo panecaējēpae patavecuacapit-sapaenexa dovathi? jai Jesús pijajivi.

²⁹ Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemē tsipae panevajētsinexa asaēyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi

(Mt 17.22-23; Lc 9.43-45)

³⁰ Jesús pejevaxinē dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacua-
java. Jesús jitsipa pijajivi pebarēnajarucaenexa bajaraxuayo itsajivi ata yapētaenejevatsi.

³¹ Tsipaji Jesús pebeyaxuabijavanexatsi, tajēvelia navajunupaeba pona pijajivijavabelia. Jumi tsonae Jesús pijajivijavabelia mapacueniaje:

—Xanē, Daxitajivi Pematapijinēnē, necanajetsiana itsamonae pecobeyabelia. Bajarapamonae nebeyaxuabiana. Itsiata baitsi jane tanebeyaxuabijajinae, acueyabi matacabita, icatsia asaēnē tsane, jai tsonae Jesús pijajivijavabelia.

³² Itsiata pijajivi apo jumeyapētaetsi. Bajarapamonae ajumeura Jesúsjavabelia peyanijobinexa bajarapalivaisi yabara.

*Pacuenia Jesús pijajivi: “¿Detsa ponē vaxaitsiyajuvēnēnē nacavecuayaiajama-
tabācuenēnē bitso?” najai tsanajetarubenaē yabara pelivaisi*

(Mt 18.1-5; Lc 9.46-48)

³³ Jesús pijajivi barēpata Capernaum tomarata. Jesús pijajivi pebarēpatsicujinae, boyalia itsa barējoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubename? jai Jesús.

³⁴ Nexata Jesús pijajivi moya. Tsipaji Jesús pijajivi namutua najumaitsi tsanajetarubename:

—¿Detsa ponë vaxaitsiyajuvënënë nacavecuaayaijamatabëcuenenë bitso? najai tsanajetarubename Jesús pijajivi.

³⁵ Nexata Jesús eca. Junata pijajivi, doce ponëbeje. Jumaitsi pijajivijavabelia:

—Pajivi jitsipa ayaijamatabëcuenejivi penaexanaenexa daxitajivi mata-taxonetsia, bajarapajivi beveliajamatabëcuenejivi natae peyavenonaenexa daitajivi, jai Jesús pijajivijavabelia.

³⁶ Bajaraxuacujinae Jesús cobepita pejevaxinëyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

³⁷ —Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, éxanë apo necopiapitsi. Ponë nitoroba, neyajavacopiapita, jai Jesús pijajivijavabelia.

Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi (Mt 10.42; Lc 9.49-50)

³⁸ Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaejava, jai Juan.

³⁹ Nexata Jesús jumaitsi Juanjavabelia:

—Pëtsa paitavetame bajaraponë. Tsipaji raja pajivi pinijicuene pexanaejava exana tavënëta, bajaraxuacujinae acuenëbi bajarapajivi tanebaranatsipaebinexa pibisiacuena.

⁴⁰ Tsipaji raja pajivi pibisiacuene apo najamatabëxainae vaxaitsiyavberena, bajarapajivi nacajamatabëcuene yavenona. Bajarapajivi bevaxaitsijamatabëcuenejivi.

⁴¹ Xaniajanë pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemë, bajarapajivi pepacuene Dioso matamotsianatsi mera pepecarajutsimatamo, jai Jesús Juanjavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi (Mt 18.6-9; Lc 17.1-2)

⁴² Icatsia Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuena naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovënëtsiviyajuvënëvi.

⁴³ Bajaraxuata panecobeta pibisiacuene itsa paexaname, panacobecacure. Itsiata xanepana panejonexa cobemataxuaeya apo pevereverecaenacuajavabelia. Biji rajane apo xanepanae tsipae panejonexa infiernojavabelia anijacobebeje yajava, itsajota isotocotia apo itaxupae caeto ata.

⁴⁴ Bajarajota apo tēpae oro, jivivixaevi. Isotocotia ata apo itaxupae caeto ata.

⁴⁵ Itsa panetaxuta ata pibisiacuene paexaname, panataxucaucure. Itsiata xanepana panejonenexa taxumataxucaeja apo pevereverecaenacuajavabelia. Biji apo xanepanae tsipae panejonenexa infernojavabelia anijataxubeje yajava.

⁴⁶ Bajarajota apo tēpae oro, jivivixaevi. Isotocotia ata apo itaxupae caeto ata.

⁴⁷ Paneitaxutota ata panetaejava yabara pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimē apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infernojavabelia.

⁴⁸ Bajarajota apo tēpae oro, jivivixaevi. Isotocotia ata apo itaxupae caeto ata.

⁴⁹ Dajubinē jivi itsa beyaxuaba Diosojavabelia ofrendacuena pevi perajutsinexa, viexaba yajota pevixanepanaenexa. Bajara pijinia pacuenia pejamatabēcuenexanepanaenexa, daxita Dioso pijajivi ata jamatabēcueneējēbianatsi mapanacuataje.

⁵⁰ Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenejavayonexa ata. Bajara pijinia pacuenia paxamē ata pajamatabēcueneitsimē tsipae Diosojavabelia, itsa apo pavecuapanepaemē tsipae papecajamatabēcuene ējētaponaejava. Nexata pajamatabēcuensaēmēre panejamatabēcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniva.

10

Pacuenia Jesús jivi livaisi tsipaeba penacojobinē pijava pexuabiyanima yabara pelivaisi

(Mt 19.1-12; Lc 16.18)

¹ Jesús baja pona Capernaum tomaravecua. Pona Judea nacuyabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaētoxaneto pata Jesúsjavaberenā. Nexata icatsia Jesús livaisi tsipaeba bajarapamonaē. Tsipaji baja cajena Jesús livaisi petsipaebanajetarucaenē.

² Nexata fariseovi Jesús cujibarenatsi petsipaebilivaisi yabara jamatabēcueneējēbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojobinē pijava pexuabinexa? jai.

³ Jesús nexata jumaitsi fariseovijavabelia:

—¿Detsa pacuenia bajayata Moiséspijinē pacaitoroba panijavajivi panexuabiyanima? jai Jesús.

⁴ Nexata fariseovi jumaitsi Jesúsjavabelia:

—Moiséspijinē tocopata, ponē pijava jamatabēxuaba, pexuabinexa. Itsiata baitsi jane Moiséspijinē tocopata, ponē pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponē pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponē pijava jamatabēxuaba, Moiséspijinē tocopata, jai fariseovi Jesúsjavabelia.

⁵ Nexata Jesús jumaitsi fariseovijavabelia:

—Moiséspijinē raja bajarapacuenia pacatocopata paneajamatabēcuenelivaisitajaxae.

⁶ Pamatacabi Dioso taxuxuaba nacua pexanaejava, bajarapamatacabita Dioso exana pebi, pijava yajava.

⁷ Bajaraxuata pebi itsa nacojioba pijavajavabelia, banatsata paxavecua, pena atavecua.

⁸ Nexata Dioso tane anijajivimibeje becaejivi. Nexata Dioso apo tae beanijajivibeje. Becaejivi saya tane Dioso.

⁹ Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

¹⁰ Bajaraxucujinae Jesús pijajivi pijaepato itsa barēnacopata bota, nexata Jesús pijajivi yanijobatsi bajarapacuenē yabara.

¹¹ Nexata Jesús jumaitsi pijajivijavabelia:

—Ponē pijava pexuabicujinae, itsava icatsia itsa pita, bajaraponē pibisiacuenē exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxē bajaraponē pexuabiva pepo pijavacuenia totanetsi.

¹² Bajara pijinia itsi petiriva ata pamona pevecuanaviatsicujinae, itsanē icatsia itsa pitatsi. Bajarapova pibisiacuenē exana pevitota. Nexata naneconita Diosojavabelia. Tsipaji itsanē jaita pepo pamonavecua, ponē abaxē Dioso totanetsi pamonacuenia, jai Jesús pijajivijavabelia.

Pacuenia Jesús jumaitsi pejevaxijivixijavabelia yabara pelivaisi
(Mt 19.13-15; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pejayataponae exa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pētsa patocapataponame panexi Jesúsjavaberena, jai.

¹⁴ Nexata Jesús itsa tane bajarapacuenia pijajivi pejumaitsijava, Jesús jamatabēcuenē anaepanaxuareca. Jumaitsi pijajivijavabelia:

—Pētsa paitavetame. Pacopare pejevaxijivixi pepatsinexa xanējavaberena. Mapitsipejevaxijivixije jumeaebinejeva, xaniavaetsia bajumecovēnēta palivaisi tsipaebatsi. Nexata pamonae jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovēnēta Dioso pejumelivaisi.

¹⁵ Xaniajanē pacuenia pacatsipaebijitsiatsi. Mapitsipejevaxijivixije itsa jumecovēnēta palivaisi tsipaebatsi, bajumecovēnēta xaniavaetsia jumeaebinejeva. Bajara pijinia pacuenia jumeaebinejeva, xaniavaetsia bejumecovēnēta Dioso pejumelivaisi pamonae jitsipa pejonejava Dioso pijanacuayabetsia, jai Jesús pijajivijavabelia.

¹⁶ Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponae:

—Dioso xaniavaetsia caevetsiana, jai tsaponae.

Pacuenia pevējēato, bitso pexainaenē, cuaicuajai Jesúsjavabelia yabara pelivaisi

(Mt 19.16-30; Lc 18.18-30)

¹⁷ Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaejitsia. Nexata baja Jesús itsa naropotsijitsia, pevējēato cujinaerucarena Jesúsjavaberena. Jesús pitabarata pematabacabēta nucajunua. Jumaitsi pevējēato Jesúsjavabelia:

—Petuxanenē, pexaniajamatabēcuenenēmē. ¿Detsa pitsicuene hexanajē taxainaenexa matakabi apo pevereverecejava? jai pevėjēato.

¹⁸ Nexata Jesús jumaitsi pevėjēatojavabelia:

—¿Detsa xuajitsia: “Pexaniajamatabēcuenenēmē,” nejamē? Ajibi raja itsapebi ata pexaniajamatabēcuenenē. Caenē rabaja Dioso pexaniajamatabēcuenenē.

¹⁹ Xamē baja yapētaneme pacuenia Dioso pejumelivaisita itoroba jivi pejumecovēnētšinexa. Jumaitsi mapacueniaje: “Pētsa jaitame itsava nijavavecua. Pētsa beyaxuabame jivitonē. Pētsa nacobetoxotame. Pētsa itsamonae pexanaejava yabara najumetsēnētšiaya paebame. Pētsa yamaxēitojorobiaya vecuapitame itsajivi pexinaejava. Axa yaiyataema. Ena ata yaiyataema,” jai Dioso pejumelivaisita. Xamē baja yapētaneme bajarapalivaisi, jai Jesús pevėjēatojavabelia.

²⁰ Nexata pevėjēato jumaitsi Jesúsjavabelia:

—Petuxanenē, daxita rabaja bajarapalivaisianē jumecovēnētajē pejevaxinējavaveliacujinaenē, jai pevėjēato.

²¹ Nexata Jesús asivaya tane pevėjēato. Jumaitsi:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaecue ne Dioso pijanacuatsia. Nexata najamatabēcue neverere, cabejiobiaexanae ata, cabeyaxuabijitsia atanua tajumelivaisi yabara, niajamatabēcuenesaē tsaponaponaenexa. Nexata jane baja xuacujinae nepēnaponaename, jai Jesús pevėjēatojavabelia.

²² Nexata pevėjēato itsa jumetane bajarapacuenia Jesús pejumaitsijava, najamatabēxainaeya baja vecuapona Jesús. Tsipaji pevėjēato daxitacuene bitso pexainaenē. Nexata pevėjēato apo jamatabējumecovēnētši palivaisi Jesús tsipaeba.

²³ Nexata pevėjēato pecovēta Jesús pijajivi matatoyorotsia naēcota. Jumaitsi:

—iPamonae bitso daxitacuene pexinaeivi, tsiayapēbejetsi penajamatabēcuenecopatsinexa Diosojavabelia pecapanepaenexatsi Dioso pijanacuayabetsia! jai Jesús pijajivijavabelia.

²⁴ Nexata Jesús pijajivi jamatabēcuenenabenajaca itsa jumetane bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamonae, pamonae bitso ēpexinaejavanexa najamatabēxaina, bajarapamonae bitso tsiayapēbejetsi tsane pejonenexa taxa Dioso pijanacuayabetsia.

²⁵ Pacuenia camello ayainēxae, acuenebi pejonejava palutaetoitaxutovototalia, bajara pijinja pacuenia bitso pexainaenē acuenebi tsane pejonejava Dioso pijatomarabetsia. Tsipaji najamatabēxaina bitso ayajiva pexainaenexa, jai Jesús pijajivijavabelia.

²⁶ Jesús pijajivi itsa jumetane bajarapacuenia Jesús pejumaitsijava, bitso jamatabēcuenenabenajaca. Nexata bajarapamonae jumaitsi Jesúsjavabelia:

—¿Detsa nexata pitsivo panepaena Diosojavabelia bitso pexinaeivi ata itsa apo panepae tsanē Diosojavabelia? jai.

²⁷ Nexata Jesús asaēya naēcota pijajivijavabelia. Jumaitsi pijajivijavabelia:

—Jivi raja apo caējēpaetsi pijacuata penacapanepaenexa Diosojavabelia. Caenē Dioso caējēpatsi jivi pecapanepaenexa. Dioso raja caējēpatsi daxitacuene pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenē, paxanē rabaja pacopatajē daxitacuene pataxainaejavami. Nexata baja pacapēnajanavanapatsi, jai Pedro.

²⁹ Nexata Jesús jumaitsi:

—Xaniajanē pacuenia pacatsipaebijitsiatsi. Pajivi xanē tajamatabēcueneta, jivi tacapanepaelivaitsitanexa pejamatabēcuenetanua, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianē ata, nexata bajarapajivi bitso ayaijava Dioso rajutsianatsi pepuenetsijavanēmi matatoxenetsia.

³⁰ Caejavayomijamatabēcueneta tsaponae, rajutsianatsi mapanacuataje cien xuabeje tsaponae pevajēnaeyabelia. Bajarapajivi icatsia xainaena bonē, pematapijivi ata, pejuyapijivi ata, pena ata, pexi ata, pabianē ata. Itsiata bajarapajivi itoya tsanetsi mapanacuapijivije. Bejiobiaexanabiabianatsinua. Itsiata baitsi jane bexēajavabelia xainaena matababi apo peverevereaejava.

³¹ Pamonaē aeconoxae mapamatacabitaje ayaijamatabēcuenēni tanetsi, bajarapamonae Dioso beveliajamatabēcuenēni exanaenatsi. Pamonaē pijinia mapamatacabitaje beveliajamatabēcuenēni tanetsi, bajarapamonae Dioso ayaijamatabēcuenēni exanaenatsi, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi

(Mt 20.17-19; Lc 18.31-34)

³² Jesús, pijajivi yajava, najetaruca namutua. Pona Jerusalén tomarebelia. Jesús pijajivi, pepēnaponaevitsi, jamatabēcuenenabenajaca. Tsipaji Jesús apo junavi bajarabelia peponaejava, yapētae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponēbeje, pesaicaeyojavabelia. Navajunupaeba tajēvelia pacuenia exanaejitsiatsi Jerusalén tomarata.

³³ Jumaitsi Jesús tajēvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanē, Daxitajivi Pematapijinēnē, sacerdotēni penamatacaitorobivi, judiōvi pecujarubivinua, pecobeyabelia necanajetsiana tanevaetabinexa. Nexata xanē neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia.

³⁴ Bajarapamonae necanecaponaena. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi mat-acabita, icatsia asaēnē tsane, jai tajēvelia pijajivijavabelia Jesús penavajunupaebijavata pebeyaxuabijavanexatsi.

Pacuenia Santiagobeje Juanbeje vajētabeje Jesúsjavabelia pexaniacuene petoexanaenexatsibeje yabara pelivaisi

(Mt 20.20-28)

³⁵ Zebedeo pexēnatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenē, pacuenia pacavajētsijitsiatsibeje, bajarapacuenia pajitsipajēbeje patanetoexanaenexamēbeje, jaiibeje Santiagobeje Juanbeje Jesúsjavabelia.

³⁶ Nexata Jesús jumaitsi:

—¿Detsa pitsicuene pajitsipamebeje patacatoexanaenexabeje? jai.

³⁷ Nexata Santiagobeje Juanbeje jumaitsibeje:

—Pamatacabi daxitacuene evetsianame, panetocopatsianamebeje patanaecaenexabeje nemuxuneneta vajanajuavevetsinexa. Itsanē naecaena necujanenia. Itsanē naecaena netsavenonēni, jaiibeje.

³⁸ Nexata Jesús jumaitsi:

—Paxamēbeje apo payapētaemēbeje xua panevajētamebeje. ¿Pacacaējēpabeje tsaja panenacaevetsinexabeje papecabějiobiaexanaenexabeje pacuenia xanē nacaevetsianajē tanebejiobiaexanaenexa? ¿Pacacaējēpabeje tsaja panenacaevetsinexabeje papecabeyaxuabinexabeje pacuenia xanē nacaevetsianajē tanebeyaxuabinexa? jai Jesús pijajivitonēbejejavabelia.

³⁹ Nexata Santiagobeje Juanbeje jumaitsibeje:

—Jājā, panecaējēpabeje cajena, jaiibeje.

Nexata icatsia Jesús jumaitsi Santiagobeje Juanbejejavabelia:

—Paxamēbeje pacabejiobiaexanaenabeje pacuenia xanē nebejiobiaexanaena. Pacabeyaxuabinaxenua pacuenia xanē nebeyaxuabiana.

⁴⁰ Itsiata baitsi jane xua panevajētamebeje panenaecaenexabeje, itsanē tacujuanenia, itsanē tatsavenononia, bajaraxua Dioso apo netocopatsi patacatocopatsinexabeje. Tspaji raja taxa Dioso ēpitapetsivinexa abaxē bajaraxua toxaniavaeta, jai Jesús Santiagobeje Juanbejejavabelia.

⁴¹ Diez ponēbeje, Jesús pijajivi, itsa vēnētane pepēya bajaraxua Santiagobeje Juanbeje Jesúsjavabelia pevājēcaejavabeje, nexata bajarapamonae jamatabēcuenearaanaepana Santiagobeje Juanbejejavabelia.

⁴² Nexata Jesús daxita pijajivi junata. Jesús jumaitsi pijajivijavabelia:

—Payapētaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaē jinavanapa pevetsinacuanējā. Nexata bajarapanacuanē pevetsivi ayaijamatabēcuenevi nataeyabiaba. Xua jamatabēitoroba pevetsinacuanējā pejinavanapaevi petoexanaenexatsi, ajumesaēya itorobabiaba petoexanaenexatsi.

⁴³ Pētsa paxamē bajarapamonae cuenejēpaeya bajarapacuenia paexaname itsamonaejavabelia. Biji rajane ponē paxamēyajuvēnēnē jitsipa ayaijamatabēcuenenē penaexanaenexa daxita paxamēvecua, bajaraponē daxita paxamē bepanijajivitonēcuenia bepacayavenonabiaba.

⁴⁴ Ponē paxamēyajuvēnēnē jitsipa penaexanaenexa papecanamataitorobinēnē, bajaraponē daxita paxamē bepanijajivitonēcuenia bepacayavenonabiaba.

⁴⁵ Tspaji rabaja xanē ata, Daxitajivi Pematapijinē atanē, apo patajopaenē jivi taneyavenonaenexa. Biji rajane xanē patajopajē tayavenonaenexa daxitajivi. Patajopajē tasivatēpaenexa jivi ayaibitsaētoخانeto pibisiacuene pexanaeneconimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaeyaexana Bartimeo, bitso pitaxutotsēcēnaenē, apo petaenē, yabara pelivaisi

(Mt 20.29-34; Lc 18.35-43)

⁴⁶ Jesús, pijajivi yajava, pata Jericó tomarabelia. Jesús icatsia, pijajivi yajava, itsamonaenua ayaibitsaētoخانeto yajava, pitsapa Jericó tomaravecua. Nexata Bartimeovēnēnē, Timeo pexēnato, eca namuto muxuneneta. Bartimeo, bitso pitaxutotsēcēnaenē, apo petaenē. Jivijavabelia amoneya palata pevājēcabiabinē.

⁴⁷ Nexata Bartimeo itsa jumetane Nazaret tomarapijinē Jesús imoxoyo penajetaruaejā, vavajai tsecae.

—Jesús, Davidpijinē pemomomē, nitaxutotsoniataema! jai tsecae Bartimeo.

⁴⁸ Nexata picani itsamonaē jumeitavetatsi Bartimeo pemoyanexa. Itsiata bitsoyo orijibia vavajai tsecae.

—Davidpijinē pemomomē, nitaxutotsoniataema! jai tsecae Jesúsjavabelia.

⁴⁹ Nexata Jesús muxunanucojopa. Jumaitsi jivijavabelia:

—Pajunaremena bajaraponë, jai.

Nexata bajarapamonae junarena Bartimeo. Pejunatsivirena jumaitsi Bartimeojavabelia:

—Najamatabësaëtaxuare. Nonotapunare. Jesús raja cajunarena, jai bajarapamonae.

⁵⁰ Nexata Bartimeo penajumaxuabipana xuabapuna. Bepijia najetabarena Jesúsjavaberena.

⁵¹ Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitso pitaxutotsëcënaenë, jumaitsi Jesúsjavabelia:

—Jesús, jitsipajë taitaxutoxanepanaejava, jai.

⁵² Nexata Jesús jumaitsi:

—Ponare baja. Nesivajamatabëjumaitsimë: “Jesús nitaxutoxanepanaeyaexanaena,” nesivajamatabëjamë. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaisijavata, Bartimeo baja xaniavaetsia tane. Nexata baja bajaraponë Jesús pepëta napona.

11

Pacuenia Jesús pata Jerusalén tomarata yabara pelivaisi (Mt 21.1-11; Lc 19.28-40; Jn 12.12-19)

¹ Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenë, bajarajota Jesús barëpata. Bajarajota pebarëpatsicujinae Jesús itoroba anijanëbeje pijajivitonëbeje.

² Jesús jumaitsi pijajivitonëbejejavabelia mapacueniaje:

—Paponarebeje mapatomarayo ecaliajejavabelia. Ajena papatsiaremeliabeje, pataenutsianamebeje burro, pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane.

³ “¿Detsa xuajitsia paisinamebeje burro?” ita pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aecoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

⁴ Nexata Jesús pijajivitonëbeje liabeje. Caxitarabanutabeje burro baupa muxuneneta. Cëtanutatsi burro namuto muxuneneta. Nexata bajaraponëbeje burro isinabeje.

⁵ Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

⁶ Nexata bajaraponëbeje jumaitsibeje pacuenia baja Jesús itorobatsibeje. Nexata tocopatatsibeje pecaponaenexabeje.

⁷ Nexata jane baja burro capatabeje Jesúsjavaberena. Nexata Jesús pijajivi pijacamisajumavelia penaxatabijavanë burro tsijumajeba. Bajarapajumata Jesús ecaya.

⁸ Jesús penajetarucaenamutojavarena jivi ayaibitsaëtoxaneto pijacamisajumavelia penaxatabijavanë namutua tsivajënaeyerequejebaponatsi. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yayiataeya Jesús pecopiapitsinexatsi.

⁹ Jesús penajetarucaejavata jivi ayaibitsaëtoxaneto Jesús pevajënaeya namataxainaea najetarubena. Itsabitsaëtoxaneto Jesús pecovëya cotocaevanajetarubena. Daxita bajarapamonae vavajai tsanajetarubena. Jumai tsanajetarubena:

—Dioso yavenonaenatsi maponë najetarucaje! ¡Vajatuxanenë pejamatabëcueneta najetaruca!

¹⁰ ¡Dioso yavenonaenatsi maponë najetarucaje nacua pevetsinënexa! ¡Pacuenia bajayata vajasalinainëmi Davidpijinëmi nacua eveta, bajarapacuenia evetsijitsia! ¡Nexata vaxaitsi pexaniajatabëcuene rajutatsi Diosojavabelia! jai tsanajetarubena bajarapamonae.

¹¹ Nexata jane baja Jesús patajopa Jerusalén tomarata. Templobojavalía joneya. Nexata Jesús templobota naitaxutocaeveeta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxë Betania tomarabelia pijajivi, doce ponëbeje, yajava. Tsipaji baja caniviyotsia.

Pacuenia Jesús bijataenuta higeranae piacuaijibixae yabara pelivaisi (Mt 21.18-19)

¹² Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucaejavata, piajani.

¹³ Jesús namutovecua tajiyotalia higeranae yabaxua taenuta. Nexata Jesús taeyojopalia bajarapona pecuai perubenaeyava. Itsa Jesús pata bajaraponaeyavabelia, ëpebaxu saya tsanuca. Tsipaji cajena abaxë apo penacuaitsimatacabi.

¹⁴ Nexata Jesús jumaitsi higeranaeyavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitsijava higeranaeyavabelia.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivina, yabara pelivaisi (Mt 21.12-17; Lc 19.45-48; Jn 2.13-22)

¹⁵ Jesús, pijajivi yajava, pata Jerusalén tomarata. Nexata Jesús joneya temploboyalía. Nexata templobota Jesús tane pecanajetabiabivi, pecomuacaevinua. Nexata daxita bajarapamonae Jesús pitsapaeyaexana templobovecua. Palata pecambiababiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba. ¹⁶ Jesús apo tocopatsi itsajivi ata itsacuenejava pecaponaenexa templobojava.

¹⁷ Jesús livaisi tsipaeba. Jumaitsi bajarajota pepatsivijavabelia:

—Dioso baja cajena pejumelivaisibaxutóta mapatemplobo yabara tajëvelia jumaitsi mapacueniaje: “Tajabo raja daxitanacuanëpijivi xanëjavaberena penavajëcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁸ Sacerdotevi penamatacaitorobivi, judíovi pecujarubivina, jumetane daxita pacuenia Jesús exana jivijavabelia templobota. Nexata bajarapamonae najumejaita pacuenia Jesús beyaxuabijitsiatsi. Bajarapamonae cunjavatsi Jesús. Tsipaji daxitajivi jamatabëcuenenabenajaca Jesús petsipaebilivaisi yabara.

¹⁹ Ajena baja meravitsia, Jesús yajavapona pijajivi Jerusalén tomaravecua.

Pacuenia higeranae tēpanuca yabara pelivaisi
(Mt 21.20-22)

²⁰ Jesús pijajivi barēmajita Betania tomarata. Nexata bajayacunua Jesús icatsia, pijajivi yajava, najetaruca pecovēnamutua. Bajarapamonae taenuta higeranae baja petēpanucaejava daxita yatabutopaya.

²¹ Nexata Pedro najamatabēnapita higeranae Jesús pebijataenutsijava. Nexata Pedro jumaitsi Jesúsjavabelia:

—Tajatuxanenē, jica, taema. Pona higeranae bijataenutame, tēpanuca baja. ¿Detsa meta pacuenia tēpa baja? jai Pedro.

²² Nexata Jesús jumaitsi pijajivijavabelia:

—Paxamē bitso pajumecovēnēre Dioso papecatoexanaenexa pacuenia pavajētame.

²³ Xaniajanē pacuenia pacatsipaebijitsiatsi. Itsa pajamatabējumaitsimē tsipae Dioso yabara: “Dioso nejumecovēnētsiana xua vajētsianajē Diosojavabelia,” itsa pajamatabējamē tsipae, pacajumecovēnētsipa mapatsuto ataje. Nexata itsa pajumaitsimē tsipae mapatsutojavabeliaje: “Natixire majotavecuaje. Pucaxanetojavabelia jopare,” itsa pajamē tsipae, pacajumecovēnētsipa. Nexata mapatsuto ataje paneitorobicuenia, pacajumecovēnētsipa. Itsa pajumecovēnētsianame Dioso papecatoexanaejavanexa, itsa panajamatabēxaināenamenua Dioso ēpapecajumecovēnētsijavanexa, xua pavajētsianame Diosojavabelia, Dioso pacajumecovēnētsiana.

²⁴ Bjaraxuata pacajumaitsi. Daxita xua pavajētsianame Diosojavabelia, pasivajamatabējumaitsimē tsane: “Xua vajētajē Diosojavabelia, pepacuenē Dioso nejumecovēnētsiana,” pasivajamatabējamēre. Nexata xua pavajētsianame Diosojavabelia, Dioso pacajumecovēnētsiana.

²⁵ Itsjivi pibisiacuene papecaexanaejava, pajamatabēcuenecaevare panevajētsijavata Diosojavabelia. Nexata pabarajamatabēcuenexanepanare bajarapajivi. Nexata pijinia paneaxa, athēbētatsia peecaenē, jamatabēcuenecaeviana paxamē ata pitabarata pibisiacuene paneexanaejava.

²⁶ Paxamē itsa apo pajamatabēcuenecaevimē tsane itsanē pibisiacuene papecaexanaejava, itsa apo pabarajamatabēcuenexanepanaemēnu tsane, nexata pijinia paneaxa, athēbētatsia peecaenē, apo jamatabēcuenecaevi tsane paxamē pitabarata pibisiacuene paneexanaejava. Apo pacabarajamatabēcuenexanepanaenua tsane, jai Jesús pijajivijavabelia.

Pacuenia Jesús caējēpatsi daxitacuene pexanaenexa yabara pelivaisi
(Mt 21.23-27; Lc 20.1-8)

²⁷ Jesús, pijajivi yajava, pata Jerusalén tomarata. Jesús itsa ponapona tem-plobota, nexata sacerdotevi penamatacaitorobivi, judíovi pecujarubivina, judíovi pijaancianovina, parena Jesúsjavaberena.

²⁸ Nexata bajarapamonae jumaitsi Jesúsjavabelia:

—¿Jipatsa pejamatabēcueneta pecanajetabiabivi, pecomuacaevinua, capit-sapame mapatemplobovecuaje? jai bajarapamonae Jesúsjavabelia.

²⁹ Nexata Jesús jumaitsi bajarapamonaejavabelia:

—Xanē copiaya caejumeyo pacayanijobianatsi. Itsa paxamē panejume-caviatsianame, nexata xanē juya pacatsipaebianatsi ponē nitoroba taexanaenexa bajarapacuene.

³⁰ ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? Panejumecanaviare baitsi jane, jai Jesús bajarapamonaejavabelia.

³¹ Nexata ēpamonae nabarēcuacuajai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebillivaisi?” nacajai tsipae.

³² “Jivi raja saya pejamatabëcueneta Juanpijinë jivi bautisabaponapona,” acuenebi vajajajava. Tsipaji mapatomarapijivije ayaibitsaëtoخانeto Juanpijinë yabara sivajamatabëjumaitsi: “Juanpijinë raja pepacuenene Diosojumepaebinëmi,” sivajamatabëjai. Nexata bajarapamonae nacabeyejehijitsipa, najai Jesús peyanijobivitsi.

³³ Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuenene, jai Jesús.

12

Pacuenia exana pijamatabëcuenenebejivi, itsanë pijauvabacabo petoetsivivi, yabara pelivaisi

(Mt 21.33-46; Lc 20.9-19)

¹ Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata. Jumaitsi mapacueniaje:

—Pijaira pexainaenë pijairata uba ayaibacaboxaneto uvavënëjava. Bajaraxuacujinae pijaira matatoyorotsia ibopanaxanetonë mataropotsia pefaratsijavata yacarana. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabijavanexa. Bajaraxuacujinae pijauvabacabo tuatuajëta exananuta piapiabotsia, penacuaitsimatacabi itsa tonaveretatsi, athëbëyo pevetabiabecaenexa pijauvabacabo. Nexata bajaraponë itsamonae evetsiaexana pijauvabacabo. Uvabacabo pexainaenë jumaitsi petoetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoetsivitsijavabelia. Nexata uvabacabo pexainaenë tajë nacuyabelia pona.

² Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoetsivitsijavabelia petsicobetsatsinexatsi.

³ Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi.

⁴ Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobiaxuabatsi. Pibisiacuenia tobijatanetsi.

⁵ Itsiata icatsia uvabacabo pexainaenë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonae yajuvënëvi itsamonae totsajiqababiatsi. Itsamonae tobeyejebatsi.

⁶ Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaitsi: “Tajauvabacabo

tanetoevetsivi tajajivi apo netoyaiyatae ata, itsiata meta taxënato netoyaiyataena,” jamatabējai uvabacabo pexainaenē.

⁷ Itsiata uvabacabo petoevetsivitsi uvabacabo pexainaenē pexënato ata, apo toyaiyataetsi. Itsa tane uvabacabo pexainaenē pexënato, bajarapamonae najumaitsi: “Mara poneje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsanē,” najai uvabacabo petoevetsivitsi.

⁸ Nexata icatsia uvabacabo pexainaenē pexënato ata tovaetabatsi. Icatsia pexënato ata tobeyaxuabatsi. Petëpaenē xuabatsi bajarapauvabacabo pënëyabelia, jai Jesús sacerdotevi penamatacaitorobivijavabelia, judiövi pecujarubivijavabelia ata, judiövi pijaancianovijavabelia ata.

⁹ Icatsia Jesús jumaitsi bajarapamonaejavabelia:

—¿De meta nexata xua exanaena uvabacabo pexainaenē pijauvabacabo petoevetsivitsijavabelia? Uvabacabo raja pexainaenē patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

¹⁰ Icatsia Jesús jumaitsi:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia.

¹¹ Vajatuxanenē Dioso raja exanaena bajarapacuene. Nexata nacatsita pexaniacuene bitso tsane bajarapacuene, jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaitsi, paxamē apo patanejumecovënëtsijavanexamē yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavabelia.

¹² Bajarapamonae picani Jesús jamatabëvaetabatsi. Tsipaji bajarapamonae jumeyapëtanetsi Jesús pejumaitisijava bajarapamonae yabara. Itsiata abaxē apo vaetabitsi. Tsipaji cujunava jivi. Nexata baja Jesús bajarapamonae vecuapona.

Pacuenia Jesús jamatabëcueneējëbiaya yanijobatsi impuestomatamo pematamotsijava yabara pelivaisi

(Mt 22.15-22; Lc 20.20-26)

¹³ Fariseoviyajuvënëvi, Herodes pijajiviyajuvënëvinua, najetarubena Jesúsjavaberena. Bajarapamonae pevetsivitsi itorobatsi livaisi peyanijobinexatsi Jesús. Nexata Jesús bajarapamonae bijiaya itsa jumecanaviata, peneconitsinexatsi picani nacuaevevsinëjavabelia.

¹⁴ Nexata bajarapamonae paxa Jesúsjavaberena. Bajarapamonae jamatabëcueneējëbiaya jumaitsi Jesúsjavabelia:

—Jesús, payapëtaniji cajena nexaniajaicuene, xua yabara tsipaebabiabame livaisianē. Petuxanevi ata xamē apo cujunavimē. Apo auramē livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneējëbiaya Jesúsjavabelia.

15 Itsiata baints jane Jesús jamatabëcueneyapëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia jamatabëcueneëjëbiaya paneyanijobame? Panetocarenamëre palatanëyo. Taejitsianë, jai Jesús.

16 Nexata bajarapamonae Jesús tocaponarenatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënuu, ruca mapapalatanëyotaje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënuu, jai.

17 Nexata Jesús jumaitsi bajarapamonaejavabelia:

—Nexata parajutabianame Romanonacua pepo pevetsinë pijajava. Parajutabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacuenia, bajarapamonae jamatabëcuenenabenajaca bajarapacuenia Jesús pejumaitsijavata. Nexata bajarapamonae jamatabëjumaitsi:

—¡Xaniavaetsia baja rovia Jesús panejumecanaviata! jamatabëjai.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

(Mt 22.23-33; Lc 20.27-40)

18 Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi jumaitsi Jesúsjavabelia mapacueniaje:

19 —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata Jesús itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi.

20 Nexata jinavanapa ënacaemonae siete ponëbeje. Pepo matapijinë copiaya nacojioba. Nexata bajaraponë pijava vecuatëpa pexi xainaenejeva.

21 Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatujëmatapijinë pita bajarapova. Bajaraponë ata icatsia tëpa pexi xainaenejeva bajarapovajavabelia.

22 Bajarapacuenia tëpa daxita siete ponëmibeje nacaemonae, bajarapova pepitaponaevi. Itsiata itsanë ata pexi apo xinae bajarapovajavabelia. Bajaraxuacujinae belia bajarapova ata tëpa baja.

23 “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapamonaeayjuvënënë, pijava tsane bajarapova bajarapomatacabi? Daxita pamonae siete ponëmibeje, nacaemonae, pitapona picani bajarapovami, jai saduceovi Jesúsjavabelia.

24 Nexata Jesús jumaitsi saduceovijavabelia:

—Paxamë saya pajamatabëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemënuu pacuenia Dioso caëjëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë.

²⁵ Pamatacabi raja petēpaevimi Dioso icatsia asaēyaexanaenatsi, apo nacojibi baja tsane. Bajarapamatacabita itsajivi ata pexēnatoyo apo canajetsi tsane pebijavabelia petonacojobinexatsi. Bajarapamonae nacojobinejeva, jinavanapaena athēbētatsia pacuenia ángelevi jinavanapa.

²⁶ Itsa pepacuene paxamē paneyanijobame Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Moiséspijinē peyaquinaebaxutota jumaitsi. Bajarapabaxutota jumaitsi pacuenia Moiséspijinē Dioso barēcuaicuajaitsi tsiquirinaemēyo petajueyecaecotiajavaverena. Abraham baja pepuatēpae, Isaac ata baja pepuatēpae, Jacob ata baja pepuatēpae, bajarapamonae yabara bajayata Dioso jumaitsi Moiséspijinējavabelia mapacueniaje: “Xanē rabaja abaxē Abraham pijaDiosonē, Isaac ata pijaDiosonē, Jacob ata pijaDiosonē,” jai Dioso Moiséspijinējavabelia bajayata petēpaevimi yabara.

²⁷ Bajarapacuenia Dioso pejumaitsixae, nayapētane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athēbētatsia. Nexata paxamē itsa pajumaitsimē: “Petēpaevi rabaja petēpaecujinae, icatsia apo asaē tsane,” itsa pajamē, pinijicuenia pajamatabēcuenenavēxaniabame, jai Jesús saduceovijavabelia.

Palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia yabara palivaisi

(Mt 22.34-40)

²⁸ Judíovi pecujarubinē pata Jesúsjavaberena. Nexata bajaraponē Jesús jumatansiti xaniavaetsia pejumecanaviataponaejava saduceovijavabelia. Nexata judíovi pecujarubinē jumaitsi Jesúsjavabelia:

—¿Detsa palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia? jai.

²⁹ Jesús nexata jumaitsi judíovi pecujarubinējavabelia:

—Palivaisi bitso jivi bejumecovēnēta, daxita Dioso pitorobilivaisianē pejumecovēnētsijava matatoxenetsia jumaitsi mapacueniaje: “Paxamē, Israelpijinē papemomoximē, pajumetaema. Vajatuxanenē rabaja caenē Dioso.

³⁰ Bajaraponē panijatuxanenē, panijaDioso, daxita panejamatabēethētojavavetsina pasivamēre. Pasivamēre daxita panejamatabēcueneta ata, daxita panenajamatabēxainaesaēta ata, daxita panesaēta ata,” pejailivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia.

³¹ Bajaraxuacujinae pecotocaevilivaisi, palivaisi bitso jivi bejumecovēnēta, jumaitsi icatsia mapacueniaje: “Pasivamēre itsajivi ata pacuenia paxamē panijacuata panaasivamē,” jai. Bajarapalivaisi ata jivi bitso bejumecovēnēta. Ajibi rabaja itsalivaisi pematatsēnēa, Dioso pitorobilivaisi, palivaisi bitso jivi bejumecovēnēta,” jai Jesús judíovi pecujarubinējavabelia.

³² Nexata icatsia judíovi pecujarubinē jumaitsi Jesúsjavabelia:

—Jesús, xaniajamē rabaja pacuenia jumaitsimē. Caenē tsaena Dioso ponapona. Ajibi tsaena pematatsēnēa itsanē Dioso.

³³ Bejumecovēnētatsi Dioso daxita vajajamatabēethētojavavetsina, daxita vajanajamatabēxainaesaēta ata, daxita vajasaēta ata. Biasivatsi itsajivi

ata pacuenia vaxaitsi vajacuata nasivatsi. Daxita bajaraxua itsa jume-covënëtsi, bitso nacatonamatamota Diosojavabelia. Bajaraxua bitso naca-tonamatamota ofrenda Diosojavabelia vajarajutabiabijava matatoxenetsia. Baitsi xua Diononexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubinë Jesúsjavabelia.

³⁴ Jesús itsa jümetane judíovi pecujarubinë xaniavaetsia pejumecanaviat-sijavatsi, nexata Jesús jumaitsi judíovi pecujarubinëjavabelia:

—Tsiquirirjavayo catoxaica Diosojavabelia nenajamatabëcuenecopatsinexa nijatuxanenë Dioso nexanaenexa, jai Jesús judíovi pecujarubinëjavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabëcuenëjëbiaya livaisi apo yanijobitsi.

Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi

(Mt 22.41-46; Lc 20.41-44)

³⁵ Jesús livaisi tsipaeba templobota. Jesús pijacuata nayabarajumaitsi:

—¿Detsa xuajitsia judíovi pecujarubivi apo jumecovënëtsi Cristo Dioso pexënatocuene, ponë athëbëvetsica Dioso itorobijitsiatsica jivi pecapanepaenexa? Bajarapamonae saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijinë pemomo tsane,” jai tsabiabi.

³⁶ Davidpijinë bajayata Espíritu Santo pejamatabëcueneta tajëvelia jumaitsi Cristo yabara mapacueniaje:

Dioso jumaitsi tajatuxanenëjavabelia: “Ecare abaxë tacujanenia. Vecat-sivajënae jumecovënëtsiaexanaenatsi abaxë copiaya nijavajabitsaë ni-torobicuenianexa,” jai Dioso tajatuxanenëjavabelia,

jai bajayata tajëvelia Davidpijinë mapacueniaje Cristo yabara.

³⁷ Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivi pecanaëjëtsinexa Cristo Dioso pexënatocuene.

Nexata jivibitsaëtoxaneto Jesús pejumetaevitsi jumebarëyatanetsi.

Pacuenia Jesús jumaitsi jivijavabelia: “Judíovi pecujarubivi bitso pinijicue-nia Dioso naneconitsiaexanaenatsi,” jai yabara pelivaisi

(Mt 23.1-36; Lc 11.37-54; 20.45-47)

³⁸ Jesús jivi ayabitsaëtoxanetojavabelia, pijajivijavabelia ata, livaisi tsi-paeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaebaona, panejumecovënëtsianiva. Bajarapamonae jitsipabiaba tomara tuatuajëjava piapiajavanë penaxatababiabavanapaenexa jivi peyayataenexatsi. Jitsi-pabiabanua bitso yayiyataeya pebajacobinexatsi callejava.

³⁹ Bajarapamonae itsa najoneyabiaba judíovi penacetuatabiabilonëjava, jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyayataevitsi pe-nanenexa petsinubijavanëta.

⁴⁰ Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajaijamatabëcueneta apo vajëcabiabi. Bajarapacuenia vajëcabiaba saya jivi petanexatsi Dioso itajara

bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovënëtsivi, jai Jesús judíovi pecujarubivi yabara.

Pacuenia ofrenda rajuta Diosojavabelia pamona pevecuatëpaevatsi yabara pelivaisi

(Lc 21.1-4)

⁴¹ Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaevi, caejivi canacujitsia, ayaijava palata jepona.

⁴² Bajarajota napata pamona pevecuatëpaevatsi, bepejibiva. Nexata bajarapova najia anijapalatanëyobeje piamatamobinëyobeje.

⁴³ Nexata Jesús junata pijajivi. Jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenebarëya daxita xua itsamonae jia bajarapacajonita matatoxenetsia.

⁴⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejibiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

13

Pacuenia Jesús pijajivitonëjavabelia tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi

(Mt 24.1-2; Lc 21.5-6)

¹ Itsa baja Jesús, pijajivi yajava, pitsaparena templobovecua, Jesús pijajivitonë jumaitsi Jesúsjavabelia:

—jTajatuxanenë, jica, nataema mapaibotoxanetonëje, mapaboxanetonë ataje! jai Jesús pijajivitonë.

² Nexata Jesús tajëvelia jumaitsi pijajivitonëjavabelia:

—Daxita raja mapaboxanetonë tanemeje, bajarapaboxanetonëmi itsamatacabi itsanacuapijivi penetsianica irabetsica. Nexata mapaibotoxanetonëmije itsaiboto ata pejumavereca apo bocae tsane, jai Jesús tajëvelia pijajivitonëjavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

(Mt 24.3-28; Lc 21.7-24; 17.22-24)

³ Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabëxëyo pijaepatojavata Jesúsjavabelia jumaitsi:

⁴ —Patajatuxanenë, pajitsipajë patanetsipaebinxamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaitsimë templobo yabara? jai bajarapamonae Jesúsjavabelia.

⁵ Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecaya-maxëitojorobinexa.

⁶ Tsipaji raja peyamaxëitojorobivinxä ayaibitsaëto patsiana hexanë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaibitsaëto yamaxëitojorobiana.

⁷ Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaeväjënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane.

⁸ Mapanacujave pevereverecaeväjënae peneta copiaya itsaviriavi nabena itsaviriavijavabelia. Itsanacuanëpiviji pijinia nabena itsanacuanëpivijavabelia. Ira najëabiana ayaicuenia nacuanëjava. Ayaianiboxaneto najetarucaena nacuanëjava. Ayaicuenia bitso jivi bejiobi tsane nacuanëjava. Daxita bajarapacuenie itsa pataename, saya abaxë taxuxuabaponaena piayaicuenie, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaiitsi pijajivijavabelia mapacueniaje:

–Nexata paxamë xania panayajivitaename. Tsipaji raja xanë patajajivixaemë, tomara pevetsivijavabelia pacacaponabiabiana. Bajarapamonae pacajumaconibabeyabiabiana judíovi penacaetuatabiabibonëta. Paxamë patajajivixaemë pacanubiana nacuaevevetsivi pitabarata, presidentevi ata pitabarata. Nexata bajarajota bajarapamonaejavabelia patsipaebianame xanë talivaisi.

¹⁰ Nexata daxitanacuanëpivijivava patsipaebanajetarubenaename pecanepaelivaisinexatsi.

¹¹ Itsa pacatacaena papecaneconitsinexa nacuaevevetsivijavabelia, pëtsa pajamatabëcuenebëjamë panenayajivicuaicuaijainexa bajarapamonaejavabelia. Palivaisi panejamatabëcuenevetsina pacatonaitajëtsiana, patsipaebianame bajarapamonaejavabelia. Tsipaji raja bajarapaepatota Espiritu Santo pacacuaicuaijayaexanaena. Paxamë baitsi panejamatabëcueneta apo pacuaicuaijamë tsane.

¹² Bajarapamatacabi patajajivixaemë, panacaemonae atamë, itsajivi panijamonaevivi ata pacacanajetsiana nacuaevevetsivijavabelia papecabeyaxuabinexa. Paneaxa ata, paneena ata, pacacanajetsiana nacuaevevetsivijavabelia papecabeyaxuabinexa. Panexi ata pacacanajetsiana nacuaevevetsivijavabelia papecabeyaxuabinexa.

¹³ Daxitajivi pacaitoya tsane patajajivixaemë. Itsiata pajivi ajamatabëcuenesaë tsane Dioso pejumecovënëtsijava nacua pecopiarucaejavabelianexa, bajarapajivi Dioso capanepaenatsi, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁴ Icatsia Jesús tajëvelia vajunupaeba papiayaicuenie itsamatacabi copiapatsijitsia Jerusalén tomarata. Jesús jumaiitsi pijajivijavabelia mapacueniaje: –Diosojumepaebinëmi, profeta Danielpijinë, tajëvelia Dioso pitorobicueniatsi piayaicuenie pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuenie vajunupaeba mapalivaisitaje.) Nexata paxamë pataename bajarapapiayaicuenie penucaejava templobota, itsajota picani apo benucae. Nexata Judea nacuata pejinavanapaevi itsa vënëlivaisitaena bajarapapiayaicuenie penucaejava templobota, pëtsa nubena. Naxanitsiayo bajarapamonae rëcëpecaena ibotsutonëjavabelia.

15 Pajivi pijabojumata athëbëyo ecaya, itsa vënëlivaisitaena bajarapapi-ayaicuene penucaejava templobota, bajarapajivi perunaecujinaetsica bepija najetabajiraviana. Pëtsa joneya pijaboyaliala pejutsinexa pecobecovë.

16 Pajivi pijinia nacuenebaponapona pijapabita, itsa vënëlivaisitaena bajarapapiayaicuene penucaejava templobota, bepijia najetabajiraviana. Pëtsa naviatu pijaboyabeliala pejutsinexa penaxatabijava.

17 ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi!

18 Bajaraxuata tajëvelia Diosojavabeliala pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejiobitsiaya paneponaeyaniva.

19 Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tsiapaji Dioso epatua yatuucutsiana jivi bitso nabejiobitsiaya pejinavanapaematacabianëminexa, bitso jivi nabejiobitsia pejinavanapaeyaniva.

20 Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabeliala tajëvelia pevajunupaebijavata papiayaicuene itsamatacabi copiapatsijitsia Jerusalén tomarata.

21 Icatsia Jesús tajëvelia vajunupaeba pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi. Jesús jumaitsi pijajivijavabeliala mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame.

22 Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepacuene Dioso pijajivi, Dioso pitapetsivitsi, bajarapamonae apo yamaxëitojorobi tsanetsi.

23 ¡Xania baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabeliala tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

(Mt 24.29-35, 42, 44; Lc 21.25-36)

24 Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabeliala mapacueniaje:

—Xanë tapatsivajënaetsica, jivi taena pecujunavicuene. Jivi nabejiobitsiaya jinavanapaena. Nexata jivi nabejiobitsiaya pejinavanapaematacabicujinae matababipijijuumeto aitaquiri tsane. Meravipijijuumeto ata aitaquiri tsane.

²⁵ Tulupu ata othopaenica irabetsica. Daxitacuene, xua rubena athëbëtsia, najëabiana. Xaniavaetsia apo rubenae tsane.

²⁶ Nexata bajarapapatota xanë, Daxitajivi Pematapijinënë, jivi ne-taena athëbëvetsica itarërebota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajë.

²⁷ Bajaraxuacujinae ángelevi itorobianajë, pamona tajajivi, Dioso pitapetsivitsi, daxitanacuanëjavaverena tanetocaetuatsinexa xanëjavaberena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁸ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

–Pacanaëjere pacuenia itsi higuerae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa.

²⁹ Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaename imoxoyo baja tavajënae tsane tapatsijavanexatsica.

³⁰ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitajë jinavanapa, bajarapitsijamatabëcuenevi abaxë, bexëjyavabelia ata, apo vereverecae tsane. Matapania xua yabara pacatsipaebatsi, itsa baja copiapatsiana, bajarapamonae jane baja vereverecaena.

³¹ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamona, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Jesús icatsia jumaitsi pijajivijavabelia:

–Itsajivi ata apo yapëtae pamatacabita, paepatota ata, copiapatsijitsia daxita xua yabara tajëvelia pacatsipaebatsi. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia.

³³ Icatsia Jesús jumaitsi pijajivijavabelia:

–Xania baja tsane. Daxitamatacabi saya panecopiaevetavanapaename. Tsipaji raja apo payapëtaemë tsane paepatota patsijitsianëtsica.

³⁴ Nexata pacuenia bo pexainaenë, pijabo evetsiaexana pijajivi, bajara xanë itsinë tsane. Bo pexainaenë itsa ponaejitsia tajënacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaejavanexatsi pecovëta. Nexata pijajiviyajuvënë itoroba baupa pevetsinënexa petoetabiabinexatsi pijabobaupa. Bo pexainaenë jumaitsi bajaraponëjavabelia: “Xaniavaetsia netoetabiabianame baupa matapania tapatsimatacabijavabelianexa,” jai bo pexainaenë.

³⁵ Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsijitsianëtsica. Ajena meravi, caecanivia, patsipajë. Meravi tuatuajëta ata patsipajë. Matacabivëpata ata patsipajë. Bajayacunua ata patsipajë.

³⁶ Bajaraxuata xania baja tsane. Daxitamatacabi saya panecopiaevetavanapaename. Jemata itsa patsipajë, paepatota apo panecopiaevetsimë, pacacaxitarabijitsipatsi panemajitsijavata.

³⁷ Palivaisi pacatsipaebatsi paxamējavabelia, daxitajivinexa jumaitsinē. ¡Daxitamatacabi saya panecopiaevetavanapaename! jai Jesús pijajivijavabelia.

14

Pacuenia picani Jesús pijavajabitsaē jamatabēvaetabatsi yabara pelivaisi
(Mt 26.1-5; Lc 22.1-2; Jn 11.45-53)

¹ Anijamatacabibeje abaxē ajibi pejonenexa pascuafiesta, itsafiestanua, pafiestajava judíoivi baxane levadurata matajērēbinejeva pexanaepan. Nexata bajarapafiestabejevājēnaeya, sacerdotevi penamatacaitorobivi, judíoivi pecujarubivinuua, najumejaita picani bajarapafiestajava pevaetabinexatsi Jesús. Penajumetsēnētsilivaisita picani jamatabēvaetabatsi Jesús pebeyaxuabinexatsi.

² Itsiata bajarapamonae najumaitsi:

—Fiestajava meta abaxē apo vaetabi tsanetsi jivi vajanacaitsacueni-abiyaniiva, najai bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi
(Mt 26.6-13; Jn 12.1-8)

³ Jesús ponapona Betania tomarata, Simón pijabota. Simón bajayajebi bitso peperabētsabanaenēmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovēnēra, alabastrobotellabēta pejeaceitera. Bajarapora bitso penamatamotsira. Nexata bajarapova yavētōxobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera.

⁴ Bajarajota itsamonae penaenaevi itsa taeyena Jesús petsimataepanaejevatsitsica, bajarapamonae jamatabēanaepanareca. Nexata epamonae najumai tsenae:

—¿Detsa xuajitsia saya xuaba bajarapacuenia maporaje?

⁵ Canajetsipa rajane. Nexata matamopitsipa trescientos padenariobeje matatōxenetsia. Bajarapapalata rajutsipa bepejiobivi bajarapacuenia peyavenonaenexa, najai tsenae epamonae.

Bajarapamonae anaepana bajarapovajavabelia.

⁶ Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimē bajarapova pexanaejava yabara? Mara povaje pexaniacuene nexanaje.

⁷ Daxitamatacabi raja bepejiobivi jinavanapa itsaxuayo pajinavanapame. Pamatacabi pajitsipame pexaniacuene panetoexanaenexa bepejiobivijavabelia, nexata patoexanaename. Itsiata baitsi jane xanē daxitamatacabi apo ponaponaenē tsane paxamējavata.

⁸ Mara papetirivaje pexaniacuene netoexana pacuenia baja cuenecaējēpatsi. Itsamonae petēpaejivi batsiperabēepana petuxujuviaceitera peperabēxaniavaetsinexa pemēthētsivājēnae. Bajara pijinia pacuenia mapovaje netsimataepana petuxujuviaceitera, abaxē apo tēpae atanē. Nexata baja bajarapova neperabēxaniavaeta itsamonae tanemēthētsivājēnae.

⁹ Xaniajanē pacuenia pacatsipaebijitsiatsi. Daxitanacuanējava tajajivi itsa paebanajetarubenaena pexanialivaisi jivi tacapanepaelivaisinexa, vajuupaebabiananua pacuenia exana xanējavaberena mapapetirivaje, jai Jesús pijajivijavabelia.

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

(Mt 26.14-16; Lc 22.3-6)

¹⁰ Jesús pijajivi doce ponëbejeyajuvënënevënë Judas. Itsavënë Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia.

¹¹ Nexata sacerdotevi penamatacaitorobivi itsa tane bajarapacuenene, barëya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxutocaevetaponaponatsi. Nexata paepatota Judas toyapëxanepanatsi, perajutsinexa jane baja bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mt 26.17-29; Lc 22.7-23; Jn 13.21-30; 1 Co 11.23-26)

¹² Junua jane baja fiesta, pafiestajava judíovi baxane levadurata matajërëabinejeva pexanaepan. Bajarapamatacabi ovejaji babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponanajë patacamitsaexanaenexa pascua fiestamatacabi pexaejava nexaenexa? jai Jesús pijajivi.

¹³ Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajarajotalia pacaxitajarabianamebeje mera canalito pecanajetaruaenë. Bajaraponë papënanajetaruaenamebeje.

¹⁴ Pabota bajaraponë joneyojopaena, bajarapabo pexainaenëjavabelia pajumaitsimëbeje tsane: “Vajanacacujarubinë raja jumaitsi: ‘¿Detsa jota pënëyatuucutsibo eca, pabota tajajivi barëxajetsianë xua jivi baxane pascua fiestamatacabi?’ jai raja vajanacacujarubinë,” pajamëbeje tsane bajarapabo pexainaenëjavabelia.

¹⁵ Nexata athëbëabetsia anijairabeje pënëyatuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatujë tsane. Daxitacuenen bajarajota xainaena. Nexata vajaxaejavanexa bajarajotatsia paexanaenamebeje, jai Jesús pijajivitonëbejejavabelia.

¹⁶ Nexata jane baja ponabeje Jesús pijajivitonëbeje. Patabeje baja tomarabelia. Caxitajarababeje daxita pacuenia Jesús jumaitsitsibeje. Nexata xua jivi baxane pascua fiestamatacabi daxita Jesús pijajivi pebarëxaenexa, bajaraponëbeje exanabeje jane baja.

¹⁷ Itsa baja meravitsia, Jesús patajopa bajarajota pijajivi, doce ponëbeje, yajava.

¹⁸ Daxita mesata pexaeyenaejavata, Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënevënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

¹⁹ Nexata Jesús pijajivi bejamatabëjibireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

²⁰ Nexata Jesús jumaitsi pijajivijavabelia:

—Doce paponëmëbejeyajuvënënevënë raja. Ponëbeje peneta caecuenia panajua-cajabutsianajëbeje panbë platojavabelia, bajaraponë tsane.

²¹ Nexata xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijucuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

²² Nexata pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²³ Bajaraxuacujinae icatsia Jesús copavënëjavata yapita pijajivi pebarëapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajara-
pora apa.

²⁴ Jesús pijajivijavabelia jumaitsi:

—Tajana raja othopaena jivi ayaiBITSaëtoXaneto pecapanepaenexatsi. Nexata tatëpaejava pejamatabëcueneta, jivi yapëtaena pepacuenia xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi.

²⁵ Xaniajanë pacuenia pacatsipaebijitsiatsi. Xanë rabaja matavëjëa apo apaenë tsane uvacuaira mapanacutaje, matapania icatsia apaenajë Dioso pijanacutatsia pejanauvacuaira, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaname tajajivitonëcuenemë,” jai, yabara pelvaisi (Mt 26.30-35; Lc 22.31-34; Jn 13.36-38)

²⁶ Jesús pijajivi barënaXëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona.

²⁷ Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename.

²⁸ Itsiata baitsi jane tatëpaecujinae icatsia asaënë tsane. Nexata paxamë panevajënaeyabelia copiata ponaenajë Galilea nacuayabelia, jai Jesús pijajivijavabelia.

²⁹ Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁰ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, naniaaevëpata, anijajumebeje vacara pefiabivajënaeya, nayavajunuaxainaname tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³¹ Itsiata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanivënëjavata yabara pelivaisi (Mt 26.36-46; Lc 22.39-46)

³² Jesús, pijajivi yajava, pata Getsemanivënëjavata. Bajarajota Jesús jumaitsi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

³³ Nexata Pedro, Santiago, Juan, bajara saya pamatabëxëyo. Jesús barëpona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjiobireca.

³⁴ Nexata Jesús jumaitsi pijajivi acueyabi ponëbejevavabelia:

—Xanë bitso pinijicuenia najamatabëxainajë. Nexata tanajamatabëxainajava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejevavabelia.

³⁵ Nexata Jesús, caenë, pevajënaeyabelia icatsia tsiquirijavayo ponataba. Tsipaji Jesús tajëvelia yapëtane pacuenia Dioso tocopatatsi bitso ayaicuenia pebejiobiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejiobitsiaya pebeyaxuabiyanivatsi.

³⁶ Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabinexa betajiobicueneta. Daxitacuene raja cacajëpa nexanaenexa. Nexata necapanepare bajarapabejiobicuenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

³⁷ Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacajëpae tsabaja rovia caeepatoyo ata paneaitavatsenaenexa?

³⁸ Pëtsa pamajitame. Paitavamëre. Pavajëre Diosojavabelia pibisiacuene paneexanaeyaniva. Tsipaji raja dovathi pacajamatabëcuenejëbiana. Paxamë picani panejamatabëcueneta pexaniacuene jamatabëpaxanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

³⁹ Nexata icatsia Jesús pona pecovëyabelia pevajëtsinexa icatsia Diosojavabelia. Bajara icatsia pacuenia Jesús vajëta Diosojavabelia pacuenia vajëta copiata.

⁴⁰ Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapëtae pacuenia jumecanaviatsijitsia Jesúsjavabelia.

⁴¹ Icatsia abaxë Jesús naviata pecovëyabelia pevajëtsinexa icatsia Diosojavabelia. Bajaraxuacujinae, acueyabi baja xuabeje pevajëtsicujinae, Jesús icatsia rena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Ajibi rabaja. Copiapata rabaja paepatota xanë, Daxitajivi Pematapijinënë, necanajetsijitsia pibisi-acuene pexanaevi pecobeyabelia.

⁴² Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi
(Mt 26.47-56; Lc 22.47-53; Jn 18.2-11)

⁴³ Jesús pijavajabitsaë pevaetabijavataneaxtsi, cuaicuajiai tsanucae pija-jivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubenatsi jivi ayaibitsaëtoxaneto. Bajarapamonaeajuvënëvi itsamonae canajetarubena espadanë. Itsamonae canajetarubena naebonë yajava. Bajarapamonae itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata.

⁴⁴ Judas pebarërenavajënae bajarapamonae, copiaya baja cajena Judas tsipaeba pacuenia bajarapamonae yapëtaejitsia Jesús cuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsianame xaniavaetsia. Nexata panecobecëtsinë pacaponaeremena, jai baja cajena Judas pematacanajetarucaevijavabelia pebarërenavajënae.

⁴⁵ Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesús cuene.

⁴⁶ Nexata jane baja Jesús pijavajabitsaë vaetabatsi. Cobecëtsi xaniavaetsia.

⁴⁷ Bajarajota Jesús pijajivijavajuvënënë pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinë pija-jivitonë.

⁴⁸ Nexata Jesús jumaitsi pevaetabivitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabineexamë pacuenia pavaetababiabame penacobetoxotsinë.

⁴⁹ Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia jumaitsi xanë yabara, jai Jesús pevaetabivitsijavabelia.

⁵⁰ Nexata jane baja Jesús pijavajabitsaë pevaetabijavatatsi, daxita Jesús pijajivi xubarëcëpecatsi pacuenia baja cajena Jesús jumaitsi tajëvelia pijajivijavabelia.

Pacuenia pevëjëato najetabajirava yabara pelivaisi

⁵¹ Pevëjëato pënanajetaruca Jesús pecaponaevitsi. Sábanata namataquinana-jetaruca. Nexata pevëjëato bajarapamonae yasábanavaetabatsi.

⁵² Nexata pevëjëato sábaná naisinaxuaba. Najetabajirava jumasánë.

Pacuenia Jesús nutatsi judíovi penamatacaitorobivi pitabarata yabara pelivaisi

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesús caponaliatsi sacerdotevi pepo penamatacaitorobinē pijaboyabelia. Nacaetuata bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava.

⁵⁴ Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinē pijabo matatoyorotsia yacaranata ibopanaxanetonē, mataropotsia pefaratsijavaxanetota. Nexata bajarapayacaranatsijavaxaneto baupā, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinē pijabopanabota, Pedro nanonopeca isoto muxuneneta temlopipijolicíavita.

⁵⁵ Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuaijai. Bajarapamonae nayanijoba.

—¿Ijipatsa yapëtanë Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi.

⁵⁶ Itsamonae saya penajumetsënëtsilivaisi paeba Jesús yabara. Itsiata caelivaisi najupaebi ata, najumejëpaeya apo paebi bajarapamonae.

⁵⁷ Itsamonae nonobapuna. Penajumetsënëtsilivaisi paeba Jesús yabara. Penonobapunaeviyajuvënënë jumaitsi mapacueniaje:

⁵⁸ —Paxanë raja, pamatabëxëyo panubenajë majotaje, pajumetaniji Jesús pejumaitsijava. Bajaraponë jumaitsi: “Xanë raja xuabianicajë mapatemploboje, jivi pexanaebo. Acueyabi matababita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënënë.

⁵⁹ Itsiata daxita bajarapamonae najumejëpaeya apo paebi.

⁶⁰ Nexata jane baja sacerdotevi pepo penamatacaitorobinē nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia mapamonae caneconitsiajumaitsije? jai Jesúsjavabelia sacerdotevi pepo penamatacaitorobinē.

⁶¹ Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinē jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi necapanepaenexa? ¿Xamë tsaja, Dioso pexënatomë? jai.

⁶² Nexata Jesús jumaitsi bajaraponëjavabelia:

—Jājā, xanë rabaja. Paxamë raja panetaename, Daxitajivi Pematapijinënë, taecaejava Dioso pecujanenia, daxitajamatabëcuene pecajëpaenëtsi. Panetaenamenua tanajetarucaejava athëbëvetsica itarërebota, jai Jesús.

⁶³ Bajarapacuenia Jesús pejumaitsijava itsa jumetane, sacerdotevi pepo penamatacaitorobinē penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinē jumaitsi daxita penaetauatsivijavabelia: —Pijacuata rabaja pejumaitsijumeta naneconita. Pematatsënëa apo namatavenonaetsi itsamonae vajanacatsipaebinexa paneconi yabara maponëje naneconitsiaexanaejitsiatsi.

⁶⁴ Paxamë rabaja pajumetaneme maponëje Dioso apo pejitsipaecuenia pecuaicuaijajava. Tspaji Dioso bepexënato nataeya cuaicuaijai. ¿Detsa nexata paxamë pajamatabëtsimë? jai sacerdotevi pepo penamatacaitorobinē daxita penaetauatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁵ Nexata bajarapamonaeyajuvënëvi Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtsicujinaetsi itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—jVënëjonare ponë caitabaratsaquibabepona! jai tsaponae bajarapamonae.

Bajaraxuacujinae templobopijipolicíavi itabarapacabiaxuabatsi Jesús.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.69-75; Lc 22.56-62; Jn 18.15-18, 25-29)

⁶⁶ Itsa abaxë Jesús sacerdotevi pepo penamatacaitorobinë pijabo ënëtuatujëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinë pijabota penacuenebiva.

⁶⁷ Bajarapova Pedro taeyetatsi penanonopecaejavata. Nexata bajarapova naitaxutobabatsia asaëya taenucatsi Pedro. Jumaitsitsi:

—Xamë ata rabaja naponaponame Jesússta, Nazaret tomarapijinëta, jaitsi.

⁶⁸ Nexata Pedro itsiata nayavajunuaxaina Jesús pijajivitonëcuene. Nexata Pedro jumaitsi bajarapovajavabelia:

—Jume raja. Apo yapëtaenë cajena bajaraponë. Apo yapëtaenë pacuene yabara nejumaitsimë, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba.

⁶⁹ Icatsia bajarapova Pedro tanetsi. Nexata pamonae bajarajota nubena, bajarapamonaejavabelia bajarapova jumaitsi:

—Mara ponëje Jesús pijajiviyajuvënënenëje, jai bajarapova Pedro yabara.

⁷⁰ Icatsia nexata Pedro jumaitsi:

—Jume raja. Apo yapëtaenë cajena bajaraponë, jai.

Bajaraxuacujinae, icatsia caeepatoyocujinae, bajarajota penubenaevi Pedro jumaitsitsi:

—Xaniajai raeta baja cajena. Xamë Jesús pijajiviyajuvënënenëmë. Tsi-paji rabaja Galilea nacuapijinëmë. Galilea nacuapijivi pecuaicuaijaicuenia caucuaijamë, jaitsi.

⁷¹ Nexata Pedro pejumexaniataenexatsi, ajumesaëya jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena ponë yabara panejumaitsimë, jai Pedro.

⁷² Itsa baja Pedro najumevereta bajarapacuenia pejumaitsijava, vacara icatsia fiaba. Nexata bajarajota Pedro najamatabënapitajaraba pacuenia Jesús jumaitsitsi: “Anijajumebeje vacara pefiabivajënaeya, nayavajunuaxainae-name tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijavatsi Jesús, Pedro najaaraba. Nexata bajarajota Pedro bitso najamatabëxaina Jesús pejumaitsijumetsi yabara. Pedro nexata nua.

15

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Lc 23.1-5; Jn 18.28-38)

¹ Ajena baja matababi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacae-tuata. Icatsia pematatsénëa itsamonae bajarapitsijamatabëcuenevi yajavanacaeuata penabarëcuaicuajainexa. Bajaraxuacujinae bajarapamonae Jesús cobecëtsiaya caponaliatsi nacuaevevtsinë Pilatojavabelia.

² Nexata Pilato yanijobatsi Jesús.

—¿Xamë tsaja judíovi pepo nevetsinë? jaitsi.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

³ Sacerdotevi penama itsamonae bajarapitsijamatabëcuenevi yajtacaitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

⁴ Nexata icatsia Pilato yanijobatsi Jesús.

—¿Itsalivaisiyo ata tsaja apo yapëtaemë nejumecanaviatsinexa? ¿Apo jumetaemë mapacuenia pecaneconitsijavaje? jaitsi.

⁵ Itsiata Jesús matavëjëa apo jumepitsi Pilatojavabelia. Bajaraxuata Pilato apo yapëtae pacuenia exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi yabara pelivaisi (Mt 27.15-31; Lc 23.13-25; Jn 18.38-19.16)

⁶ Nacuaevevtsinë Pilato xaina pijacujirucene. Caevai canacujitsia, pascua fiestamatababi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajëcabiaba, Pilato nexata copatabiaba bajarapajivi pascua fiestamatababi. Bajarapacuenia Pilato caenë copatabiaba jivi pesivajamatabëcuene xanepanaenexatsi.

⁷ Pamatababi Jesús naneconitsiaexanatsi, bajarapamatababi Barrabásvënënë jivi pebarëbevi barënananeconitsiaponapona penaneconitsivi pejebabiabibota. Barrabás, itsamonae yajava, barënabia picani gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota.

⁸ Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatababi copatabiabame caenë pepitsapaenexa penaneconitsivi pejebabiabibovecua, bajarapacuenia panetocopare caenë pepitsapaenexa penaneconitsivi pejebabiabibovecua, jai bajarapamonae Pilatojavabelia.

⁹ Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pajudíovimë pepo papecaevetsinë? jai Pilato.

¹⁰ Bajarapacuenia Pilato jumaitsi tsipaji yapëtane pajamatabëcuene yabara sacerdotevi penamatacaitorobivi tocaponarenatsi Jesús. Pilato jamatabëcuene yapëtane sacerdotevi penamatacaitorobivi Jesús pecueneitoxaxaetsi petocaponaejavatsirena.

¹¹ Nexata bajarapamonae asaëya vajëca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijiapenetsia jumaitsi jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

12 Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponējavabeliaje: “Judíovitsi pepo vajanacaevetsinē,” paneyabarajainējavabelia? jai Pilato judíovijavabelia Jesús yabara.

13 Nexata bajarapamonae vavajai pinijijumeta.

—¡Cruzajavabelia cobematabiabarutsiaexanare! jai Pilatojavabelia.

14 Nexata Pilato jumaiti bajarapamonaejavabelia:

—¿Detsa pitsineconi yabara nexata cobematabiabarutsiaexanaejitsipajē? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

15 Nexata baja Pilato tocopata Barrabás pepitsapaenexa penaneconitsivi pejebabiabibovecua jivi barajamatabēcuenexanepanaeya petaenexatsi. Nexata Pilato pijajivi, vajabitsaēvi, itoroba copiaya Jesús ayaicuenia pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaēvi pecobematabiabarutsinexatsi cruzajavabelia.

16 Nexata baja vajabitsaēvi Jesús caponaliatsi nacuaevevtsinē Pilato pi-jaboxanetojavabelia. Nexata bajarajota nacaetuata daxita vajabitsaēvi.

17 Bajaraxuacujinae Jesús quenetsiataeya xatatatsi peraēnaetsautsaucaejava. Xua nacuaevevtsinē banaxatata, bajaraxua xatatatsi benacuaevevtsinēcuenia petaenexatsi. Coronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi.

18 Bajaraxuacujinae quenetsiataeya bajacobaponatsi.

—¡Bajaco, judíovi pepo pevetsinē! jai tsaponae bajarapamonae Jesúsjavabelia.

19 Bajarapamonae caenē canacujitsia mataconibiaxuabaponatsi naebota. Suabaponatsinua. Beyaiyataeya itajara pematatabacabēta tonubena-joneyabiabatsi Jesús pitabarata.

20 Jesús quenetsiataeya pecapocaponaecujinaetsi, vejumajonotatsi baja xua xatatatsi, peraēnaetsautsaucaejava. Jesús baja icatsia xatatatsi penaxatat-sijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Lc 23.26-43; Jn 19.17-27)

21 Alejandrobeje Rufobeje paxa, Simónvñēnē, Cirene tomarapijinē. Nexata Simón najetaruca vayafotusatojavaverena. Nexata vajabitsaēvi Simón junatatsi, pacruzajavabelia Jesús cobematabiabarutsijitsiatsi, peyavenon-aeayacaponaenexa.

22 Caponaliatsi Jesús Gólgotavēnē tsutojavabelia. “Gólgota,” itsa jai hebreo-jumeta, mapajumetaje pejumaitisijume: “Jivimatasipatsuto,” pejaijume.

23 Bajarajota picani Jesús rajutatsi vinora piapaenexa, pematajērēabira mirravēnējavata, bitso penavixaetaeyaniva pecobematabiabi-javatatsi cruzajavabelia. Itsiata Jesús apo apae.

24 Nexata jane baja Jesús vajabitsaēvi cobematabiabarutatsi cruzajavabelia. Bajaraxuacujinae vajabitsaēvi bajarajota canamuxusita beibotoxi. Bajarapacuenia canamuxusita peyapētaenexa ponē pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaēvi natsicobetsana Jesús penaxatatsijavami.

²⁵ Bajayacunuaepatota, a las nueve, Jesús cobematabiabarutatsi cruzajavabelia.

²⁶ Bajarajota Jesús pematobocoto matatsēnēyo yaquinaruta tablapayota itsamonae ata peyapētaenexa pajamatabēcuene yabara Jesús cobematabiabarutatsi cruzajavabelia. Jumai tsarutsi peyaquinarutitsitane cruzajavata mapacueniaje: “Mara ponēje judíovi pepo pevetsinēje,” jai tsarutsi Jesús yabara.

²⁷ Anijanēbeje penacobetoxotsinēbeje, Jesús yajavacobematabiabarutatsi. Caenē canacujitsia pijacruzata rubatsi. Bajaraponēbeje Jesús pemuxuneneta rutatsibeje. Itsanē Jesús pecujuanenia rutatsi. Itsanē Jesús petsavenonenia rutatsi.

²⁸ Bajarapacuenia Jesús itsa yajavacobematabiabarutatsi penacobetoxotsinēbeje, nexata Jesús tocopiapatatsi pacuenia baja cajena Dioso pejumelivaisibaxutota tajēvelia jumaitsi Jesús yabara. Dioso pejumelivaisibaxutota tajēvelia jumaitsi Jesús yabara mapacueniaje: “Naneconitsiaexanaenatsi bepibisiacuene pexanaenēcuena,” jai baja cajena tajēvelia Dioso pejumelivaisibaxutota Jesús yabara.

²⁹ Jesús pecobematabiabarutatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. Jumai tsabiabi bajarapamonae:

—Yiara jane maitsimēje. Xamē raja imata jumaitsimē: “Xuabianicajē templo. Acueyabi matababita icatsia veretetsianajē itsabo,” jamē.

³⁰ Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

³¹ Bajara pijinia pacuenia sacerdotevi penamatacaitorobivi, judíovi pecujarubivi ata, capocaponatsi Jesús. Ēpamonae najumaitsi:

—Maponēje itsamonae yabara jumai tsabiabi: “Capanepaenajē jivi,” jai tsabiabi. Caranata pijacuata penacapanepaenexa, apo caējēpaetsi.

³² Itsa xaniajai pepacuenie Cristo, athēbēvetsica Dioso pitorobinētsica jivi pecapanepaenexa, Israel nacuapijivi pepo pevetsinēnēxanua, aeconoxae runaenica cruzajavavetsica vajataenexa. Nexata jane baja jumecovēnētsianatsi Cristonēcuene, najai bajarapamonae capocaponaeya Jesús yabara.

Ponēbeje ata Jesús yajavacobematabiabarutatsi, bajaraponēbeje ata, Jesús bijataerucatsibeje.

*Pacuenia baja Jesús tēpa yabara pelivaisi
(Mt 27.45-56; Lc 23.44-49; Jn 19.28-30)*

³³ Jesús baja itsa tēpaejitsia, ajena matonejejjitsia, daxita nacujava aitaquiri tsajuni. Matapania caniviyojavabelia, bejamatabēcuene a las tres, nacua napebeta icatsia.

³⁴ Nexata icatsia paepatota nacua napebeta, bajarapaepatota pinijicuenia Jesús aējai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “TajaDioso, tajaDioso, ¿detsa xuajitsia baja tajaepato necopatame?” pejjajume.

³⁵ Nexata itsamonae bajarajota penubenaevi bijiaya jumetane bajarapacuenia Jesús pejumaitsijava. Nexata saya jamatabēcuenenavēxaniabiaya jumaitsi bajarapamonae:

–Jica, pajumetaema. Mara ponë junata profeta Elíaspijinëmije, Diosojumepaebinëmi, jai bajarapamonae.

³⁶ Nexata bajarapamonaeyajuvënënë piajatuvinorayalia bepijia jabu-taxuaba esponjavënëjava. Bajaraxuacujinae esponjavënëjava naeboupita cëtaruta. Toyotsiatsi picani Jesús petsutsuninexa bajaraxua. Ponë picani Jesús toyotsiatsi bajaraxua petsutsuninexa, bajaraponë jumaitsi penaju-
nubenaevijavabelia:

–Bajarapacuenia abaxë copatarutatsi Jesús. Taenatsi Elíaspijinë itsa nataruca cruzavecua penutsinexatsitsica Jesús, jai bajaraponë capocapon-
aeya.

³⁷ Jesús icatsia pinijicuenia aëjai. Bajaraxuacujinae jane baja Jesús tēpanajereca.

³⁸ Paepatota Jesús tēpanajereca, bajarapaepatota templobo enētuaatujälia peyatuucutarutsipana, ayaipapaëbërēpanaxaneto, titititica tuatuajäreca, athëbëvetsicacujinae irabereca. ³⁹ Nexata paepatota Jesús tēpanajereca, vajabitsaëvi pijacapitán Jesús pitabara canacujitsialia nuca. Nexata bajaraponë taenuca Jesús pinijicuenia peaëjajava. Taenucanua Jesús petēpanajetsijavareca. Nexata vajabitsaëvi pijacapitán jumaitsi:

–Matsaena ponë tēpaje, pepacuenie baja rovia Dioso pexënato, jai.

⁴⁰ Bajarajota petiriavibitsaëtōxaneto tajiyoverena taenubena Jesús petēpaejava. Bajarapapetiriavi tuatuajëta nanubena mapamatabëxëyoje. Itsava Mariävënëva, Magdala tomarapijiva. Itsava Salomévenëva. Itsava icatsia Mariävënëva. Bajarapova Santiagobeje Josébeje pena. Bajaraponë Santiago, pevëjëato abaxë itsanë Santiagovënënevëcuca.

⁴¹ Pamatacabi abaxë Jesús ponapona Galilea nacuata, bajarapapetiriavi Jesús pēnajanavanapatsi peyavenonaenexatsi. Papetiriavibitsaëtōjavata Mariábana nanubena, bajarapapetiriavi ata Mariábana Jesús najuapēnaponarena Galilea nacuaeverena Jerusalén tomaraberena.

Pacuenia Jesús petēpaenë mēthētatsi yabara pelivaisi

(Mt 27.57-61; Lc 23.50-56; Jn 19.38-42)

⁴²⁻⁴³ José Arimatea tomarapijinë, judíovi pevetsinë, peyaiyataenëtsi. Bajaraponë José copiaevetaponapona pecopiapatsijava pamatacabi caenë Dioso evetsijitsia daxita pijajivi mapanacuataje. Judíovi baja penacuer-
aevetsimatocabinexa pevajënaeya pamatacabi, caniviyotsia baja. Bajarapa-
matacabi judíovi banacuenevereta baja penacuenebijava. Nexata bajara-
paepatota José acueneura ata, najamatabësaëta. Nexata lia nacuaevetsinë
Pilatojavabelia. Nexata José vajëta Pilatojavabelia petocopatsinexatsi Jesús
petēpaenë pemēthëtsinexa.

⁴⁴ Nexata Pilato jamatabëjumaitsi:

–Xaniajai tsamë rabaja Jesús tēpa, jamatabëjai tsipaji abaxë bajayajebi
Jesús apo rucae cruzajavabelia pecobematabiabarutsicujinaetsi.

Nexata Pilato junata vajabitsaëvi pijacapitán. Nexata Pilato yanijoba
vajabitsaëvi pijacapitánjavabelia, Jesús petēpaecuenie Pilato peyapëtaenexa.

⁴⁵ Nexata vajabitsaëvi pijacapitán tsipaeba Pilatojavabelia.

–Jesús rabaja capanepaeya tēpa, jai.

Nexata jane baja Pilato José tocopatatsi cruzajavavetsica pepitsinexa Jesús
petēpaenë.

⁴⁶ Nexata José comuata pexaniaviriasábana. Bajaraxuacujinae José jane
baja cruzajavavetsica pitsica Jesús petēpaenë. Daxitanëreca mataquionaeya

matacäcëba pexaniaviria piapiasábanapanata. Bajaraxuacujinae itsajota cajena José iboitapajanitovavata pinijiibovaju exanaeyaexanabuata petëpaevi pebuataponaenexa, bajarapaibovajualia José buata Jesús petëpaenë. Bajaraxuacujinae pinijiibopanaxaneto José tixirena. Yavajuvëpaacatabuata.

⁴⁷ María Magdala tomarapijiva, itsava pijinia María, José pena, bajarapovabeje tanebeje itsajota Jesús buatasti petëpaenë.

16

Pacuenia Jesús petëpaeujinae icatsia asaë yabara pelivaisi
(Mt 28.1-10; Lc 24.1-12; Jn 20.1-10)

¹ Judíovi baja penacueraevetsimatacabi itsa verevereca, acueyabi povamaxëto comuata petuxujuvira. Itsava Mariävënëva, Magdala tomarapijiva. Itsava Salomëvënëva. Itsava icatsia Mariävënëva. Bajarapova Santiago pena. Bajarapamonae petuxujuvira comuata peperabëexabinexa picani Jesús petëpaenë.

² Nexata baja judíovi penacueraevetsimatacabi itsa verevereca, meravia pitsijavata, ajena baja matacabi tsarucaponae, bajarapamonae ponalia Jesús pebuatsiibovajutsijavabelia.

³ Nexata bajarapamonae namutualia najumaitsi tsanajetarubena:

—¿Jipatsa meta nacatotixitsiana Jesús peyavajuvëpa acatabuatsiibopanaxanetotsi? najai tsanajetarubena bajarapamonae.

⁴ Nexata bajarapamonae itsa imoxoyotabatapona, naëcobarëcëpalia ibovajavabelia. Nexata taeyabuata ibopanaxanetomi petixitabuatsijavalia ibovajuvëpavecua. Bajarapaibopana bitso pinijiibopanaxaneto.

⁵ Nexata petiriavi itsa joneya Jesús pebuatsiibovajutsijavalia, taeyeta pecujanenia pevëjëato. Bajaraponë naxatateca piapiajava penioponaejava. Nexata petiriavi najunaviaca.

⁶ Nexata pevëjëato jumaitsi petiriavijavabelia:

—Pëtsa panajunaviacame. Paxamë picani pajaitame Jesús, Nazaret tomarapijinë, ponë cobematabiabarutatsi cruzajavabelia. Asaë rabaja icatsia bajaraponë petëpaeujinae. Ajibi rabaja tsarucacae majotaje. Pataema jane itsajota picani buatasti.

⁷ Paponare baja. Patsipaebianame pijajivijavabelia, Pedrojavabelia ata. Pajumaitsimë tsane bajarapomonaejavabelia: “Jesús pina panevajënaeyabelia pona Galilea nacuayabelia. Baja pina jotalia pacaxitarabianame Jesús pacuenia baja pacajumaitsi,” pajamë tsane pijajivijavabelia, jai pevëjëato petiriavijavabelia.

⁸ Nexata saya bajarapapetiriavi rëcëpeca Jesús pebuatsiibovajutsivecua. Neconecojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

Pacuenia Jesús petëpaeujinae, icatsia itsa asaë, tsitanaitajëta María Magdala tomarapijivajavabelia yabara pelivaisi
(Jn 20.11-18)

⁹ Judíovi baja penacueraevetsimatacabi itsa verevereca, meravia pitsijavata, ajena baja matacabi tsarucaponae, Jesús icatsia asaë petëpaeujinae. Bajarapamatacabi copiata Jesús tsitanaitajëta María, Magdala tomarapijivajavabelia. Bajarapova cajena copiaya Jesús vecuacapitsapa siete padovathibeje itsa abaxë Jesús apo beyaxuabitsi.

¹⁰ Nexata María, Magdala tomarapijiva, Jesús petsitanaitajëtsicujinaetsi, pona Jesús pijajivijavabelia. Nexata María pevajënae Jesús pijajivi abaxë

vënueyena Jesús. Nexata María ita pata Jesús pijajivijavabelia, tsipaeba pacuena María tane Jesús.

¹¹ María jumaiti Jesús pijajivijavabelia:

—Jesús rabaja icatsia asaë petëpaecujinae. Taniji rabaja tajacuata, jai. Itsiata Jesús pijajivi apo jumexaniataetsi María.

Pacuenia Jesús petëpaecujinae icatsia ita asaë, tsitanaitajëta pijajivitonëbejejavabelia yabara pelivaisi

(Lc 24.13-35)

¹² Jesús pijajivitonëbeje najetarucabeje namutua. Nexata Jesús pijajivitonëbeje namutua penajetarucavejavatabeje, Jesús tsitanaitajëta beitsanëcuenia pijajivitonëbejejavabelia.

¹³ Nexata Jesús pijajivitonëbeje ita tanebeje Jesús, naviatecabeje. Nexata pacuena tanebeje Jesús, tsipaebabeje itsamonae Jesús pijajivijavabelia. Itsiata bajarapamonae apo jumexaniataetsibeje.

Pacuenia Jesús petëpaecujinae, icatsia ita asaë, pijajivi itoroba pexanialivaisi jivi petsipaebanajetarubenaenexa daxitanacuanëjava yabara pelivaisi
(Mt 28.16-20; Lc 24.36-49; Jn 20.19-23)

¹⁴ Bexëjavabelia icatsia Jesús tsitanaitajëta pijajivi once ponëbejejavabelia penabanenaejavata mesata. Nexata Jesús pinijicuenia muxujioba pijajivi pijajimatabëcuenetajaxae. Muxujiobanua apo pejumecovënëtsixae petsipaebijavatsi pamona tane Jesús icatsia piasaëjava petëpaecujinae.

¹⁵ Nexata Jesús jumaiti pijajivijavabelia:

—Paponare daxitanacuanëjava daxitajivi panetsipaebanajetarubenaenexa pexanialivaisi pecapanepaelivaisinexatsi.

¹⁶ Pajivi jumecovënëtsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovënëtsi tsane bajarapalivaisi, daxitamatacabijavabelianexa nanëconitsiana Diosojavabelia.

¹⁷ Pamona peneta jumecovënëtsiana bajarapalivaisi, mapacuenia exanavanapaenaje. Tavënëta jivivecua capitsaponaena dovathi. Itsaviriajumetanua, apo penatsipaebijumemi ata, jemata natsipaebiana.

¹⁸ Bajarapamonae jomo pecobeta pitsi ata tsane, apae atanua tsane jivi petëpaeyaexanaera, itsiata apo tēpae tsane. Bajarapamonae ita nacobebuatsiana piavitanejivi pematatsënëvereca, pejayatsijivi jamatejema tsane piavitanejavavecua, jai Jesús pijajivijavabelia.

Pacuenia Jesús petëpaecujinae, icatsia ita asaë, naviatu baja athëbëabetsia yabara pelivaisi
(Lc 24.50-53)

¹⁹ Vajatuxanenë Jesús livaisi petsipaebicujinae pijajivijavabelia, Dioso baja pesaëta catsiatsi athëbëabetsia. Nexata athëbëtatsia Jesús eca Dioso pecujanenia penajuaevetsinexabeje daxitacuenë. ²⁰ Nexata jane baja Jesús pijajivi daxitanacuanëjava jivi tsipaebanajetarubena bajarapapexanialivaisi. Nexata daxita pamona jumetaeyabiabatsi, jumecovënëtabiabatsi pexaniajailivaisi petsipaebicuenë. Tsipaji Jesús pijajivi jamatabëcueneyavenonabiaba Jesús pijajivi pinijicuenë pexanaenexa jivijavabelia livaisi petsipaebabiabijavata.

Pexanialivaisi Jesucristo pelivaisi, San Lucas peyaquinaelivaisi

Pacuenia Lucas taxuxuaba mapabaxutotaje Jesucristo pelivaisi, petoyaquinaejava Teófilovēnējavabelia, yabara pelivaisi

¹⁻² Pamatacabi abaxē Jesús ponapona mapanacuataje, jivi ayaibitsaētoxaneto tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranējava Jesús pelivaisi, pexanialivaisi. Nexata tomaranējava Jesús pelivaisi pejumetaevi, ayaibitsaēto, baja cajena yaquina juya mataropotsia petsipaebinexa itsamonaejavabelia. Pacuenia Jesús petaevitsi vajunupaebatsi, bajarapamonae yaquina baja cajena Jesucristo pelivaisi.

³ Nexata xanē ata mapamatacabitaje yanijobaponajē bajarapalivaisi daxita peyapētaevijavabelia. Yanijobaponajē xaniavaetsia tayapētaenexa pacuenia Jesús exanaponapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xanē ata xaniavaetsia neyapētaenexa daxita bajarapalivaisi, Jesucristo pelivaisi. Netsitaxanepana tacatoyaquinaenexa daxita bajarapalivaisi neyapētaenexa pacuenia jumai tsaponae caelivaisi canacujitsia Jesús pexanaponaejavanē yabara, caejaya canacujitsia.

⁴ Copiaya baja picani itsamonaē catsipaeba bajarapalivaisi. Itsiata icatsia xanē catoyaquinatsi neyapētaenexa jane baja xaniavaetsia bajarapalivaisi pexaniajailivaisicuene.

Pacuenia ángel tajēvelia jumaitsi Zacaríasjavabelia: “Nexēnatonēyo raja xainae-name,” jai yabara pelivaisi

⁵ Pamatacabi abaxē Herodes eveta Judeanacua, bajarapamatacabi ponapona sacerdotenē Zacarías. Bajaraponē sacerdotevi Abíasvēnēviyajuvēnēnē. Zacarías pijava pevēnē Elisabet. Bajarapova sacerdotenēmi Aarōnpijinē pemomoxiyajuvēnēva.

⁶ Bajarapajivibeje xaniavaetsia aneconijibia Dioso pitabarata toponapona-beje. Dioso jumecovēnēsiaya ponaponabeje pacuenia Dioso itorobatsi judiōvi xaniavaetsia pejinavanapaenexa.

⁷ Itsiata bajarapajivibeje pexi apo xainaebeje. Tsipaji Elisabet mavecova. Nexata bajarapajivibeje bitso baja perujujiviyobeje.

⁸ Nexata itsamatacabi Zacarías templobota nanacuenebijitsia sacerdotevi penacuenebicuene Dioso pitabarata. Pasemanata daxita sacerdotevi, Abíasvēnēvi, nacobenavetsijitsia templobo, bajarapasemana Zacarías daxitsemana nanacuenebijitsia templobota.

⁹ Nexata abaxē sacerdotevi petaxuxuabivajēnaeya penacuenebijava, pijacujirucuenia exana penayapētaeponaenexa xua caenē canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa Zacarías xua caenē canacujitsia nacuenebijitsia templobota, nexata Bajarías tocopatatsi temploboēnēalia petajuitsinexa inciensovēnējava, petuxujuvijava. Bajaraxuata Zacarías joneya temploboyalía petajuitsinexa jane baja inciensovēnējava temploboēnēalia.

10 Paepatota Zacarías tajuitanuca inciensovënëjava temploboënëalia, jivi ayaibitsaëtöxaneto templobojumavelia vajëcanubena Diosojavabelia.

11 Nexata Zacarías temploboënëalia, altarpvënëjava muxuneneta, tsitanaitajëtatsi ángel. Paaltarpvënëjavajumata incienso tajuitabiaba Diosonexa, bajarapaaltarpvënëjava pecujanenia pamuxunenejavata, Zacarías taenuta ángel.

12 Nexata Zacarías itsa taenuta ángel, apo yapëtae pacuenia exanaejitsia Zacarías. Bitso jamatabëcuenenajunaviaca.

13 Nexata ángel jumaitsi Zacaríasjavabelia:

—Zacarías, pëtsa junavame. Dioso baja cajena cajumetane nevajëtsijava. Nexata nijava Elisabet catonacoxitsiana. Nexënatonëyo baja xainaename. Vënërubianame bajaraponëyo Juan.

14 Pinijicuenia, jivi ayaibitsaëto yajava, barëyamë tsane bajaraponëyo itsa catonaexanaena.

15 Tshipaji bajaraponëyo ayaijamatabëcuenenë tsane Dioso pitabarata. Apo apae tsane piataneranë. Vinora ata apo apae tsane. Penaexanaejavaveliacujinae tsijamatabëvënëcaenatsi Espiritu Santo. Nexata Espiritu Santo pitorobicueniatsi, exanabiabiana.

16 Bajaraponë, Juan, Israel nacuapijivi najamatabëcuenecopatsiaexanaena Diosojavabelia.

17 Bajayata Diosojumepaebinëmi, profeta Elíaspijinë, ayaijamatabëcuenenëmi, Dioso pesaë yajavaponapona. Espiritu Santo ata pitorobicueniatsi, exanaponapona. Bajara icatsia itsane Juan ata. Bajaraponë pejamatabëcueneta, penacoxiitoyavimi ata, icatsia nacoxiasiva tsane. Bajaraponë pejamatabëcueneta, itsamonae pijinia pibisijamatabëcuene pexainaevi ata, jamatabëcuene xanepanaeyaexanaena pexaniajamatabëcuene pexainaenexa. Bajarapacuenia bajaraponë jivi jamatabëcuene xanepanaeyaexanaena pepo petuxanenë penajetarucaevajënaeya. Nexata bajarapamonae xaniavaetsia copiapitsiana pepo petuxanenë pamatacabi najetarucaena, jai ángel Zacaríasjavabelia.

18 Zacarías nexata yanijoba ángeljavabelia. Jumaitsi:

—Itsa taxënato xainaejitsianë, ¿detsa peneta pitsicuene taenajë tayapëtaenexa? Tshipaji rabaja xanë perujunënë. Tajava ata baja perujuva, jai Zacarías.

19 Nexata ángel jumaitsi Zacaríasjavabelia:

—Xanë raja Gabrielnë, Dioso pijajivitonënë. Dioso baja cajena nitoroba tacatsipaebinexa mapapexanialivaisije.

20 Xamë saya nejumeaebame, xaniavaetsia catsipaebi atatsi xua pepacuenecacopijapaejitsia. Nexata baja aeconoxae apo cacaëjëpae tsane necuaicuajijajava. Matapania jane baja pamatacabi catocopijopae xua yabara najumecapanepaeya catsipaebatsi, natsipaebianame icatsia, jai ángel Zacaríasjavabelia.

21 Bajarapaepatota jivi templobo jumavelia evetanubenatsi Zacarías pepit-sapaejavarena. Najumaitsi bajarapamonae:

—¿De meta xuajitsia Zacarías bepijia apo pitsapaerena templobovecua? najai bajarapamonae.

22 Itsa jane baja Zacarías pitsaparena templobovecua, apo caëjëpaetsi pecuaicuajijajava. Nexata pamonaevetanubenatsi templobo jumavelia, najumaitsi:

—Zacarías raeta bemajitsinaebota temploboënëlia itsacuene tane, najai.

Nexata Zacarías apo pecaējēpaexaetsi pecuaicuaijajava, pecobeta tsipaeba besiyanēcuenia jivi peypātaeyaexanaenexa.

²³ Itsa baja Zacarías vereta penacuenebijava templobota pamatacabibeje itorobatsi penacuenebinexa, naviata baja pijaboyabelia.

²⁴ Bajaraxuacujinae Zacarías pijava, Elisabet, nacoxita jane baja. Nexata bajarapova penacoxitsijava itsa yapētane, cinco pajuametobejecuenia itsavabelia pijabovetua apo ponaponae.

²⁵ Elisabet jamatabējumaitsi:

—Dioso raja taneitaxutotsoniataexae, neyavenona tanacoxitsinexa mapacueniaje. Nexata baja apo auranē tsane tacoxibijava yabara, jamatabējai Elisabet.

Pacuenia ángel tajēvelia jumaitsi Maríjavabelia yabara pelivaisi

²⁶ Elisabet baja seis pajuametobeje pepuaxainae penacoxitsicujinae, Dioso icatsia itoroba pijaángel Gabriel. Pijaángel itoroba Nazaret tomarabelia, Galilea nacuata peetaetomarabelia. ²⁷ Dioso itoroba ángel petsipaebinexa Maríjavabelia. María abaxē pebi apo pequenetsiataevatsi. Ángel pepatsivajēnaeya Maríjavabelia, Maríabeje baja cajena Josébeje nabarēcuaijaijeje penapitsinexabeje. Nacuaeveitsinēmi Davidpijinē pemomoxiyajuvēnēnē José.

²⁸ Ángel nexata joneya María peponaponaebota. Ángel jumaitsi Maríjavabelia:

—María, cabajacobatsi. Pexaniajamatabēcuenia Dioso pecataeva. Dioso cayajavaponaena. Bitso cayavenonaena xamē daxita nevēna petiriavi matatoxenetsia, jai ángel.

²⁹ Nexata María itsa jumetane bajarapacuenia ángel pejumaitsijavatsi, María jamatabējumaitsi:

—¿Detsa meta pitsijamatabēcuenē yabara nejumaitsi ángel mapacueniaje? jamatabējai María.

³⁰ Icatsia ángel tajēvelia jumaitsi Maríjavabelia:

—María, pētsa junavame. Tsipaji raja Dioso pexaniajamatabēcuenia catane.

³¹ Xamē raja nacoxitsianame. Cavecuanaexanaena raja pebinēyo. Bajaraponeyo vēnērubianame Jesús.

³² Bajaraponeyo ayaijamatabēcuenenē tsane. “PinijiDioso, athēbētatsia peacaenē, mapexēnatoje,” jaitsi tsane jivi. Nexata vajatuxanenē Dioso nacuaeveitsinē exanaenatsi. Pacuenia pijasalinainēmi Davidpijinē bajayata nacuaeveitsinēmi, bajara icatsia itsane.

³³ Bajarapone ēvetsiana Israel nacuapijivi daxita matababijavabelianexa, jai ángel tajēvelia Maríjavabelia.

³⁴ Nexata María jumaitsi ángeljavabelia:

—¿Detsa pacuenia nacoxitsipajē? Xanē raja tamona apo xainanē, jai María ángeljavabelia.

³⁵ Ángel nexata tajēvelia jumaitsi Maríjavabelia:

—Espíritu Santo raja patsianica xamējavabetsica. Nexata Espíritu Santo Dioso pesaēta caevetsiana. Bajaraxuata panacuetonēyo cavecuanaexanaena, tsatsianatsi Diosonexa. “Dioso ra mapexēnatoje,” jaitsi tsane jivi.

³⁶ Nijamonaeva ata Elisabet, perujuva ata, exanaena penacuetonēyo. “Mavecova raja,” jai atatsi jivi, itsiata baja penacoxitsicujinae xaina baja seis pajuametobeje.

37 Dioso raja caējēpatsi daxitacuene pexanaenexa, jai ángel tajēvelia Maríajavabelia.

38 Nexata María jumaitsi ángeljavabelia:

—Xanē raja Dioso pijajivitovanē. Pacuena nejumaitsimē, bajarapacuenia Dioso xanējavaberena exanaena, jai María.

Nexata baja María vecuaponatsi ángel.

Pacuena María sivaxaina Elisabetjavabelia yabara pelivaisi

39 María penacoxitsijavanexa petsipaebicujinaetsi ángel, caemat-acabibejucujinae, María pona petsutonēnacuata peecaetomarabelia. Bajaratomara eca Judea nacuata.

40 Nexata María joneya Zacarías pijaboyalia. Bajacobanuta pijamonaeva Elisabet.

41 María itsa bajacobanuta Elisabet, nexata Elisabet peyacotajinae-nacuetoyo tsicotonayucutajarabatsi. Nexata jane baja Elisabet tsijamatabēvēnēcatsi Espíritu Santo.

42 Nexata Elisabet Espíritu Santo itorobatsi pinijijumeta Maríajavabelia pejumaitsinexa mapacueniaje:

—Dioso cajena bitso cayavenona daxita petiriavi matatoxenetsia. Pacuetonēyo ata exanaename, bajarapanacuetonēyo Dioso bitso peyavenonabinētsi tsane.

43 Xamē tajatuxanenē penamē tsane. ¿Detsa xuajitsia beveliajamatabēcueneva atanē, nesivaxainamerē?

44 Itsa nebajacobanutame, tayacotajinaenacuetoyo nayucutajaraba pe-barēyaxae.

45 Barēyamē Dioso pecajumaitsicuenia nejumecovēnēsiva. Tsipaji pepacuene catocopiapatsiana daxita pacuenia vajatuxanenē Dioso pitorobinētsica ángel tajēvelia catsipaeba, jai Elisabet Maríajavabelia.

46 Nexata María jumaitsi Elisabetjavabelia:

Tajamatabēthētojavavetsina jumaitsinē Diosojavabelia: “Ayaijamatabēcuenenēmē bitso,” janē.

47 Sivajamatabēcuenebarēyanē Dioso tanecapanepaenēnexa.

48 Sivajamatabēcuenebarēyanē. Tsipaji pijajivitovanē, beveliajamatabēcueneva atanē, Dioso nitapeta. Tatēpaecujinae ata tsane, tavēnamuto, pevājēnaeyabelia daxitajivi xanē yabara jumai tsabiabi tsane: “Dioso bitso peyavenonaevamitsi,” jai tsabiabi tsane.

49 Bajarapacuenia daxitajivi jumai tsabiabi tsane xanē yabara. Tsipaji ayaijamatabēcuenenē Dioso netoexanabiabiana ayacuene pexanaejavanē. Dioso raja apo pejitsipaenē jivi pibisiacuene pexanaejava.

50 Daxita pamonaē Dioso yaiyataena, bajarapamonaē juya Dioso itaxutotsoniataeyabiabiana.

51 Dioso raja pecaējēpaenētsi pinijicuene ata pexanaenexa pecobeta. Pamonaē jamatabējumaitsi tsavanapae: “Vaxaitsi cajena ayaijamatabēcuenevitsi,” jamatabējai tsavanapae, bajarapamonaē Dioso nacayajatsiaexana baja.

52 Pinijinacuanē pevetsivimi ata, bajarapanacuanē pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana bajarapanacuanē beveliajamatabēcuenevimi ata.

53 Pamonaē pijinia bitso pijajani, bajarapamonaē Dioso rajuta pexaniana-banijava. Pamonaē pijinia bitso pexainaevi mapanacuapijicuene, bajarapamonaē Dioso apo pejumecovēnēsixaē, bajarapamonaē Dioso apo rajutsi.

⁵⁴ Dioso yavenona pijajivi, Israel nacuapijivi. Apo nacofënëtsi cajena. Dioso itaxutotsoniataeyabiaba Israel nacuapijivi.

⁵⁵ Bajarapacuenia Dioso pijajivi itaxutotsoniataeyabiaba daxitamatacabi-javabelianexa. Tsipaji baja cajena bajarapacuenia Dioso najumeca-panepeaya jumaitsi vajasalinainëmi Abrahampijinëjavabelia, daxita pemomoxijavabelianexa ata pitaxutotsoniataeyabiabijavanexa yabara, jai María Elisabetjavabelia.

⁵⁶ Nexata María acueyabi pajuametobeje naponapona Elisabet pijabota. Bajaraxuacujinae María baja naviaata pijaboyabelia.

Pacuenia Juan naexana jivibautisabinënexa yabara pelivaisi

⁵⁷ Juameto baja ecaica, pajuametota Elisabet penacuetu vecuanaexanae-jitsiatsi. Penacuetonëyo jane baja vecuanaexanatsi.

⁵⁸ Itsa Elisabet yapëtane Dioso pitaxutotsoniataecuenetsi, bitso Elisabet jamatabëcuenebarëya. Daxita pamonaeta ena imoxoyo, pijabo muxuneneta, bajarapova pijamonaeyajuvënëvi ata, sivajamatabëcuenebarëyatsi.

⁵⁹ Itsa baja penacuetonëyo caesemana xaineca penaexanaecujinae, Elisabetbeje Zacaríasbeje pexënatonëyo perabëcaucutsiaexanabeje judiovicuenia. Baitsi boupiperabëcaucutsiaexanabeje. Nexata daxita bajarapamonaeta pata Elisabetbeje Zacaríasbejejavaberenata. Bajarajota picani penacuetonëyo tovënërubijsiatsibeje paxa pevënëcuenia paxa picani pevënëxainaenexa.

⁶⁰ Itsiata Elisabet jumaitsi pamonaejavabelia picani tovënërubijsiatsibeje: —Jume. Pevënë raja tsane Juan, jai Elisabet bajarapamonaejavabelia.

⁶¹ Nexata bajarapamonaeta jumaitsi:

—¿Detsa xuajitsia jitsipame bajarapavënë? Itsanë ata cajena nijamonaeya-juvënë apo xainae bajarapavënë, jai bajarapamonaeta Elisabetjavabelia.

⁶² Nexata bajarapamonaeta penacuetonëyo jane baja paxa junata. Pecobeta yanijoba pavënë Zacarías jitsipa petovënërubinexatsi.

⁶³ Nexata Zacarías vajëta tablapayo peyaquinaenexa. Nexata yaquinaruta: “Juan rabaja pevënë,” pejaiitane. Nexata daxita bajarapamonaeta jamatabëcuenenabenajaca.

⁶⁴ Bajarajota jemata icatsia Zacarías cuaicuajiai baja. Nexata jivi pitabarata Zacarías jumai taponae Diosojavabelia:

—Diosomë, ayaijamatabëcuenenëmë bitso, jai taponae.

⁶⁵ Daxita pamonaeta bajarapatomarata imoxoyo penaevi, itsa jumetane pacuenia Zacarías Dioso yavenonaponatsi, pinijicuenia jamatabëcuenenabenajaca. Itsamonae bajarapanacuata petsutonëjava penaevi ata, daxita bajarapamonaeta ata, vënëlivaisitane bajarapacueneta yabara.

⁶⁶ Daxita pamonaeta jumetane bajarapacueneta yabara, apo nacofënëtsi. Jamatabënjajinavanapabiaba bajarapacueneta. Nexata bajarapamonaeta nayanijobabiaba.

—¿De meta jamatabëcuenetsi tsane bajarapanacuetonëyo itsa vitsabiana? najai tsabiabi bajarapamonaeta.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonëyo.

Pacuenia Zacarías tajëvelia jumaitsi yabara pelivaisi

⁶⁷ Zacarías, Juan jivibautisabinënexa paxa, tsijamatabëvënëcatsi Espiritu Santo. Nexata Zacarías Espiritu Santo itorobatsi jivijavabelia pejumaitsinexa mapacueniaje:

68 Pexaniajamatabëcuene rajutatsi vaxaitsi pepo vajatuxanenëjavabelia, Israel nacuapijivitsi vajaDiosojavabelia. Tsipaji pijajivitsi nacatoitorobianica vajanacacapanepaenënexa vajaneconivecua.

69 Dioso cajena nacatoitorobianica pinijicuene pexanaejava pecaëjëpaenëtsi vajanacacapanepaexa. Bajaraponë Dioso pijajivitonëmi Davidpijinë pemoxiyajuvënënë tsane.

70 Bajayata Diosojumepaebivimi profetavi, Dioso pitorobicueniatsi pejinavanapaevi, tajëvelia najumecapanepaeya jumaitsi bajaraponë vajanacacapanepaejavanexa yabara.

71 Tajëvelia profetavimi najumecapanepaeya jumaitsi bajaraponë vajanacacapanepaejavanexa vajavajabitsaëvivecua, daxita vajanacaitoyavi atavecua.

72 Dioso nacaitaxutotsoniataena pacuenia tajëvelia najumecapanepaeya jumaitsi vajasalinaivimijavabelia. Dioso cajena apo nacofënëtsi pacuenia najumecapanepaeya jumaitsi vajasalinaivimijavabelia.

73 Bajayata copiaya bajarapacuene yabara Dioso najumecapanepaeya jumaitsi vajasalinainëmi Abrahampijinëjavabelia.

74 Dioso baja najumecapanepaeya jumaitsi vajanacacapanepaenexa vajavajabitsaëvecua. Bajarapacuenia Dioso nacacapanepaena ajunavijibia vajatonacuenebavanapaenexa.

75 Nexata bajarapacuenia Dioso itsa tonacuenebavanapaenatsi, jinavanapaenatsi pibisiacuene exanaenejevatsi Dioso pitabarata vajasaaëtsavanapaepato abaxë mapanacuataje,

jai Zacarias jivijavabelia tajëvelia pevajunupaebijavata Jesús Dioso pitorobivanexatsitsica vajanacacapanepaenexa.

76 Icatisa Zacarias jumaitsi pexënatonëyojavabelia mapacueniaje:

Taxënatonëyo, xamë yabara itsamonae jumai tsabiabi tsane: “Mara ponëje pinijiDioso, athëbëtsatsia peecaenë, pijaprofetanëje,” jai tsabiabi tsane. Xamë raja itsaxuayo pepo petuxanenë najetarucaejitsia, pevajënaeya jivi tsipaebanajetarucaename pesivanajamatabëcueneconpatsinexa bajaraponëjavabelia pamatacabi bajaraponë najetarucaena.

77 Tsipaebanajetarucaename jivijavabelia pacuenia Dioso bajarapamonae capanepaejitsiatsi. Tsipaji bajarapamonae pibisiacuene pexanaeneconimi Dioso vecuaajibiaexanaenatsi.

78 Dioso vajanacaitaxutotsoniataexae, nexata nacayapëtaeyaexanaena vajanacacapanepaenënexa athëbëvetsica pepatsijavanexatsica.

79 Nexata bajaraponë jivijavabelia itsa tsipaebanajetarucaena pexaniajailivaisi, jamatabëcueneitayotsiana daxita pijamatabëcueneitaquirivimi. Baitsi pamonaë picani cujunava petëpaejava, bajaraponë petsipaebilivaisi pejamatabëcueneta, bajarapamonae yapëtaena jamatabëcuenexanepanaeya pejinavanapaenexa,

jai Zacarias pexënatonëyojavabelia tajëvelia pevajunupaebijavata Jesús jivijavabelia Dioso pejumelivaisi petsipaebanajetarucaejavanexa.

80 Nexata jane baja xuacujinae Juan jivibautisabinënexa vitsabanajetaruca. Yajavaajamatabëcuenesaë baja cajena tsanajetarucaë Dioso pejumelivaisi yabara. Nexata baja Juan itsa penaveretsinë, ponapona petusato nacuata. Matapania itsa taxuxuabijitsia jivi petsipaebinxia Jesús pelivaisi, naitajëta jivijavabelia pevënëlivaisitaenexatsi daxita Israel nacuapijivi.

2

*Pacuenia Jesús naexana yabara pelivaisi
(Mt 1.18-25)*

¹ Imoxoyo baja pevajēnae Jesús penaexanaejavanexa. Nexata bajarapamatacabijava Romanonacua pepo pevetsinē, Augusto, taxuxuaba pijajivi pitorobijava jivi petonamataējētsinexatsi. Jumaitsi pijajivijavabelia:

—Daxitajivi, pamonaē taevetsinacuanējava jinavanapa, panetonamataējētsianame, jai.

² Bajarapamatacabi pijinia nacuaevetsinē Cireniovēnēnē saicaya itsanacua eveta, Siriavēnēnacua.

³ Nexata nacuaevetsinē Augusto pevetsinacuanējava penaetomaranēta pejinavanapaēvi, apo jinavanapae ēpijatomaranējava. Itsamonae najinavanapa itsatomaranējava. Bajaraxuata pamonaē najinavanapa itsatomaranējava, caejivi canacujitsia, pijasalinaivimi pijatomaranējavabelia pona. Bajarapamonae pona penamataējētsinexatsi pijasalinaivimi pijatomaranējava.

⁴ Bajaraxuata José ata barēpona Belén tomarabelia. José barēnaropota Nazaret tomarata, Galilea nacuaata peecaetomarata. José barēpona Belén tomarabelia, Judea nacuaata peecaetomarabelia. Tsipaji baja cajena José pijasalinainēmi, Davidpijinē, bajayata Belén tomarata ponapona.

⁵ José barēpona María, pova pita pijavanexa. Bajarapova yacotapona itsa baja imoxoyo pevajēnae penacueto pevecuanaexanaenexatsi.

⁶⁻⁷ Nexata baja itsa patabeje Belén tomarata, ponaponabeje dajubi pevetaibiabibota. Tsipaji baja pabota jivi patabiaba, pevajēnaeje baja jivi yavēnēca. Nexata apo nayacaējēpaetsibeje bajarapabota penaecaenexabeje. Bajaraxuata patabeje dajubi pevetaibiabibota. Nexata dajubi pevetaibiabibota María jane baja vecuanaexanatsi penacuetonēyo, copiaya penacoxitsinacueto. Barēca dajubi pevetaibiabibota. Jumaquioneta papaēbērēpanaxita. Buateta dajubi pexaejavanexa pemitsaothocabiabimoēnēta.

Pacuenia ángelevi patsica Jesús penaexanaelivaisi petsipaebinexa oveja pevetsivijavabelia yabara pelivaisi

⁸ Belén tomarajumaverena imoxoyovayafota, oveja pevetsivi evetavanapa. Bajarapamonae meravi nacobenaevetabiaba pijaovejabitsaētonē.

⁹ Jemata oveja pevetsivi tsitanaitajētatsi Dioso pijaángel. Nexata Dioso pijapenivenivenaecotia oveja pevetsivi matatoyorotsia itayotatsi. Najunaviaca bajarapamonae pinijicuenia.

¹⁰ Nexata ángel jumaitsi oveja pevetsivijavabelia:

—Pētsa panajunaviacame. Pexanialivaisi raja pacatocanajetarucatsi pesivabarēyanexa daxitajivi.

¹¹ Ajena rabaja, mapameravitaje, naexana baja daxitajivi pecapanepaenēnēna. Naexana Belén tomarata, patomarata bajayata nacuaevetsinēmi Davidpijinēmi ponapona. Ponē naexana, bajaraponē pepo petuxanēni Cristo, Dioso athēbēvetsica pitorobinētsitsica jivi pecapanepaenēna.

¹² Paneyapētaenexa pacuenia pacatsipaebatsi, penacuetonēyo pataeyabu-atetsianame mapacueniaje. Penacuetonēyo pataeyabuatetsianame papaēbērēpanaxita pejumaquionaenacuetonēyotsi. Boquecaena dajubi pexaejava pemitsaothocabiabimoēnēta, jai ángel oveja pevetsivijavabelia.

¹³ Bajara saya jota jemata oveja pevetsivi tsitanaitajētatsi ayaibitsaētoxaneto ángelevi, copiaya petsipaebiángelnētsijavata. Bajarapamonae ángelevi pexaniajamatabēcuene rajuta Diosojavabelia. Penaxēanaejavata ángelevi jumaitsi mapacueniaje:

14 ꞑDioso, athëbëatsia peecaenë, pinijicuene rabaja exana! Pamonae Dioso jumecovënëta, Dioso sivajamatabëcuenebarëyatsi. Daxita bajarapamonae jamatabëcuenexanepanaeya jinavanapaeyaexanaena Dioso, jai ángelevi penaxëanaejavata.

15 Itsa baja ángelevi naviaba athëbëabetsia, oveja pevetsivi ángelevi pecovëta najumaitsi:

—Ponaliatsi Belén tomarabelia. Taenatsi pecopiapatsijava pacuene yabara vajatuxanenë Dioso pitorobiángelnëtsica nacatsipaeba, najai oveja pevetsivi ángelevi pecovëta.

16 Nexata bajarapamonae bepijiayo ponalia Belén tomarabelia. Pata itsajota Mariábeje Josébeje barëecabeje penacuetonëyo. Penacuetonëyo boqueca dajubi pexaejava pemitsaothocabiabimoënëta. 17 Oveja pevetsivi itsa taeyabuata penacuetonëyo pacuenia baja cajena ángelnë tsipaebatsi, nexata pona petsipaebaponaenexa daxitajivijava pacuenia bajarapanacuetonëyo taeyabuata.

18 Nexata daxita pamonae jumetane oveja pevetsivi pepaebilivaisi, jamatabëcuenenabenajaca.

19 María baja cajena pejamatabëëthëtota yapëtaeponapona daxita bajarapacuene yabara.

20 Oveja baja pevetsivi naviabaponalia. Oveja pevetsivi namutualia jumai tsanajetarubenaë Diosojavabelia:

—Diosomë, bitso ayaijamatabëcuenenëmë. Pexaniajamatabëcuene pacarajutatsi patanetoexanaexemë pexaniacuene, jai tsaponaelia oveja pevetsivi.

Bajarapacuenia jumaitsi tsipaji baja tane daxita pacuenia ángelnë tsipaebatsi.

Pacuenia Jesúsñëyo caponaliatsi temploboyabelia yabara pelivaisi

21 Jesúsñexa penaexanaecujinae, ocho matacabita, perabëcaucutatsi judíovicuenia. Baitsi bou Piperabëcaucutatsi. Vënërubatsinua jane baja pevënë pexainaenexa. Vënërubatsi “Jesús,” pejaivënëta. Tsipaji baja cajena abaxë María nacoxitsinejeva Jesúsñexa, tajëvelia ángel jumaitsi Mariájavabelia: “Bajaraponëyo vënërubianame Jesús,” jai.

22 Nexata jane baja tocopiajopatsibeje Josébeje Mariábeje pexanaenexabeje pacuenia bajayata Dioso Moiséspijinëta penajumecopatsilivaisi itorobatsi daxita judíovi pexanaenexa penacuetonëyo itsa tonaexanatsi. Nexata Jerusalén tomarabelia barëponabeje penacuetonëyo. Nexata Jerusalén tomarata, templobota, María ofrenda rajuta Diosojavabelia penajamatabëcuene xaniavaetsinexa Diosojavabelia. Rajutabejenua penacuetonëyo Diosojavabelia pijajivitonënexa petonacuenebinexa itsa penaveretsinë.

23 Bajarapacuenia Josébeje Mariábeje exanabeje tsipaji Dioso Moiséspijinëta penajumecopatsilivaisi jumaitsi: “Penacasabijivibeje pexi itsa xainabeje, nexata copiaya panacuetonëyo xainabeje, totsatsibeje Dioso pijajivitonënexa,” jai.

24 Josébeje Mariábeje rajutabeje ofrenda Diosojavabelia pacuenia Dioso Moiséspijinëta penajumecopatsilivaisi itorobatsibeje. Rajutabeje tsiquiriviria ucucutoyobeje. Itsa jume, rajutabeje meta pinijiyoviria ucucutoyobeje.

²⁵ Bajarapamatacabi ponapona Jerusalén tomarata Simeónvñenēnē. Bajaraponē jumecovēñetsiaponapona pacuenia Dioso pejumelivaisibaxutota jumaitsi. Nexata bajarapamatacabi Israelnacua eveta Romano nacuaverena epepatsivi. Nexata Romano nacuaverena pepatsivi pevetsixae Israelnacua, bejiobiaexanabiabatsi Israel nacuapijivi. Bajaraxuata Simeón copiaevetaponapona Dioso pejamatabēcueneta petovecuajutsinexatsi Israelnacua pevetsivi. Nexata baja Romano nacuaverena pepatsivi, pevecuapit-sapaenexa Israelnacua pevetsicue. Espiritu Santo yajavaponaponatsi Simeón.

²⁶ Nexata Espiritu Santo pejamatabēcueneta Simeón tajjēvelia yapētaeyaexanatsi pacuenia Simeón petēpaevajēnae taejitsia Cristo, ponē Dioso athēbēvetsica itorobiapaebica jivi pecapanepaenexa.

²⁷ Nexata Espiritu Santo pejamatabēcueneta Simeón joneyaexanatsi temploboyabelia. Bajaraxuata Simeón tane Mariabeje Josébeje pebarējonejavatabeje Jesúsñeyo temploboyarena pexanaenexabeje pacuenia Dioso Moiséspijnēta penajumecopatsilivaisi itorobatsibeje.

²⁸ Nexata Simeón isapita Jesúsñeyo. Pexaniajamatabēcueneta rajuta Diosojavabelia. Pexaniajamatabēcueneta Simeón perajutsijavata Diosojavabelia, Simeón jumaitsi mapacueniaje:

²⁹ Tajatuxanenē, baja rajane netocopatsianame nijajivitonēnē jamatabēcuenexanepanaeya tatēpaenexa. Tsipaji baja netaeyaexaname pacuenia baja cajena tajjēvelia najumecapanepaeya nejumaitsimē.

³⁰ Taitaxutota rabaja taniji maponēje, ponē itorobimica jivi pecapanepaenēnexa xamējavabelia.

³¹ Ponē itorobimica jivi pecapanepaenēnexa, daxitajivi taenatsi.

³² Maponēje petsipaebilivaisita, pamonaē apo judíovi ata, jamatabēcueneta yotsiana. Yapētaeyaexanaena pacuenia jamatabēcuenetsimē. Nexata maponēje pejamatabēcueneta apo judíovi yayiataena nijajivi judíovi, jai Simeón templobota Diosojavabelia pexaniajamatabēcueneta perajutsijavata Jesúsñeyo yabara.

³³ Nexata Josébeje Mariabeje ita jumetanebeje bajarapacuenia Simeón pejumaitsiyava Jesúsñeyo yabara, jamatabēcuenenabenajacabeje.

³⁴⁻³⁵ Bajaraxuacujinae Simeón tovajēta Diosojavabelia peyavenonaenexatsibeje Josébeje Mariabeje, Jesúsñeyo yajava. Bajaraxuacujinae Simeón jumaitsi Marijavabelia:

—Mapanacuetonēyoje, Dioso itapetatsi. Maponēje petsipaebilivaisi jivi ayaibitsaētoxaneto apo jumecovēñetsi tsanetsi. Nexata jivi ayaibitsaētoxaneto naxuabiana, Israel nacuapijivi. Ayaibitsaētoxaneto pijinia jumecovēñetsianatsi. Nexata pijinia ayaibitsaētoxaneto capanepaena. Maponēje Dioso pesaēta pinijicue pexanaejava, tsitaexanaena jivi peyapētaenexa Dioso pitorobinētsitsica. Maponēje itajjēsiana pacuenia jivi ayaibitsaētoxaneto, caejivi canacujitsia, bēpēnēa pibisiyamatabēcueneta najamatabēxainabiaba. Jivi ayaibitsaētoxaneto apo jumecovēñetsi tsanetsi. Pibisiacuenia saya baranatsipaebianatsi. María, xamē nexata pepo nejamatabēēthētojavavetsina bitso sivajamatabēcuenebējamē tsane ita yapētaenema pacuenia exanaejitsiatsi, jai Simeón Marijavabelia Jesús yabara tajjēvelia pevajunupaebijavata pacuenia Jesús exanaejitsiatsi.

³⁶⁻³⁷ Bajara pijinia pamatacabi templobota ponapona Diosojumepaebiva profetava, Anavēnēva. Bajarapova Fanuelpijinē pexēnatoyo, Aserpijinē pemomoxiyajuvēnēva. Bajarapova bitso baja perujuva. Ochenta y cuatro baja

pavaibeje xaina. Nacasaba picani abaxë itsa pejanava. Penacasabicujinae siete pavaibeje pepuaxainae pamonajavabelia, vecuatëpatsi pamona. Itsa-javabelia apo vecuaponabiabi templobo. Matacabijebi, meravijebi yajava, Dioso tonacuenebabiaba templobota. Itsajavata pexaejava apo xaeyabiabi pamatacabibeje vajëcabiaba Diosojavabelia.

³⁸ Nexata bajarapova ata pata itsajota Josébeje Mariabeje nucabeje templobota. Simeón pisanucaejavata Jesúsnyëo, isataenuta bajarapova. Nexata bajarapova pexaniajamatabëcuene rajuta Diosojavabelia Jesúsnyëo yabara. Romano nacuaverena pepatsivi Israelnacua pevetsixae, Israel nacuapijivi copiaevetavanapa Dioso pejamatabëcueneta petovecuajutsinexatsi, nexata baja Romano nacuaverena pepatsivi pevecuapitsapaenexa Israelnacua pevetsicuene. Nexata daxita pamonaecopiaevetavanapa Dioso pejamatabëcueneta petovecuajutsinexatsi Israelnacua pevetsivi, daxita bajarapamonaecjavabelia, bajarapova tsipaebabiaba Jesúsnyëo pelivaisi.

Pacuenia Jesús ponapona Nazaret tomarata pebarënaviatsicujinaetsi templobojavaverena yabara pelivaisi

³⁹ Josébeje Mariabeje Jerusalén tomarata templobota exanaeveretabeje baja daxita pacuenia Dioso Moiséspijinëta penajumecopatsilivaisi itorobatsibeje. Nexata baja pijatomarabelia Jesúsnyëo barënaviatabeje, Nazaret tomarabelia, Galilea nacuata peecaetomarabelia.

⁴⁰ Nexata jane baja Jesúsnyëo vitsaba Nazaret tomarata. Ajamatabëcuenesaë tsaponae Dioso pijacuene yabara. Jamatabëcuenevitsabaponanua. Dioso yavenonaponatsi ayaicuenia.

Pacuenia Jesúsnyëo templobota barëcuaicuajiai judíovi pecujarubivijavabelia yabara pelivaisi

⁴¹ Caevai canacujitsia Josébeje Mariabeje ponabiababeje Jerusalén tomarabelia. Ponabiababeje pascuavënëfiesta penataeyabiabinexabeje.

⁴² Nexata baja Jesúsnyëo doce pavaibeje itsa xaina, barëponabeje icatsia Jerusalén tomarabelia pascuafiesta penataenexa.

⁴³ Itsa baja copiaruca pascuafiesta, daxita baja penataevi bajarapafiesta, naviaba baja pijabonëjavabelia. Nexata Jesúsnyëo nacopatanucalia Jerusalén tomaratalia. Mariabeje Josébeje abaxë apo yapëtaebeje Jesúsnyëo pevecuana-copatsijavatsiliabeje.

⁴⁴ Jamatabëjumaitsibeje saya:

—Jesúsnyëo raeta nanajetaruca vajanajuaponaevita, jamatabëjaibeje.

Bajaraxuata caematacabi baja pepuaponaebeje namutua, itaxanabeje Jesúsnyëo. Nexata yanijobabeje pijamonaecjavabelia, peyapëtaevitsibejejavabelia ata.

⁴⁵ Itsiata apo caxitajarabibeje. Nexata naviatecabeje Jerusalén tomarabelia pejaitsinexabeje Jesúsnyëo.

⁴⁶ Acueyabi matacabita caxitajarababeje templobota. Jesúsnyëo naeca judíovi pecujarubivi tuatujëta. Jumetaeyeca bajarapamonae penabarëcuaicuajailivaisi. Nexata Jesúsnyëo yanijobapona bajarapamonae penabarëcuaicuajailivaisi yabara.

⁴⁷ Nexata daxita Jesúsnyëo pejumetaeyenaevitsi, taeyena Jesúsnyëo xaniavaetsia pejumeyapëtaejava judíovi pecujarubivi penabarëcuaicuajailivaisi. Taeyenanua xaniavaetsia pejumecanaviataponaejava, abaxë tsiquirinëyovajëto ata. Bajaraxuata jamatabëcuenenabenajaquena bajarapamonae.

⁴⁸ Josébeje Mariabeje itsa tanebeje bajarajota Jesúsnëyo penaecaejava, nexata jamatabëcuenenabenajacabeje. María nexata jumaitsi:

—Taxënato, ¿detsa xuajitsia panevëpënacoparemenabeje? Paxanëbeje pataca-jaitarutsijavatabeje, bitso pacaitaxanatsibeje, jai María.

⁴⁹ Nexata Jesúsnëyo jumaitsi penajavabelia:

—¿Detsa xuajitsia bajarapacuenia panejaitarutamebeje? Panejaitsipamebeje raja mapabotaje. Tsipaji raja xanë taxa Dioso pijacuene taexanaenexa mapabotaje, nejamatabëcuenenabiaba, jai Jesúsnëyo.

⁵⁰ Itsiata bajarapajivibeje apo jumeyapëtaebeje pajamatabëcuene yabara jumaitsi Jesúsnëyo.

⁵¹ María baja cajena pejamatabëëthëtota yapëtaeponapona daxita bajara-pacuenie yabara. Nexata baja bajarapajivibeje pepëta Jesúsnëyo napona baja Nazaret tomarabelia. Nazaret tomarata Jesúsnëyo xaniavaetsia jume-covënëtsiaponapona pacuenia Josébeje Mariabeje itorobabiababeje.

⁵² Jesús abaxë vitsabanajetaruca. Jamatabëcuene vitsabanajetarucanua. Nexata Dioso pexaniajamatabëcuenia tanetsi. Daxita pamonaie Jesúsnëyo yapëtanetsi, pexaniajamatabëcuenia tanetsi.

3

Pacuenia Juan jivibautisabinë jivi livaisi tsipaeba petusato nacuata yabara pelivaisi

(Mt 3.1-12; Mr 1.1-8; Jn 1.19-28)

¹ Pamatacabi pepo nacuaevevtsinë Tiberiovënënë xaina quince pavaibeje pevetsicujinae Romanonacua, bajara pijinia pamatacabi itsanacuanë eveta itsamonae. Bajarapamatacabi nacuaevevtsinë Poncio Pilato eveta Judeanacua. Bajara pijinia pamatacabi nacuaevevtsinë Herodes eveta Galileanacua. Bajara pijinia pamatacabi Herodes pejuuyapijinë, nacuaevevtsinë Felipe, eveta Itureanacua, Traconitenacua yajava. Bajara pijinia pamatacabi nacuaevevtsinë Lisaniae eveta Abilininacua.

² Bajara pijinia pamatacabi Anásbeje Caifásbeje Israel nacuata sacerdotevi pepo penamatacaitorobinëbeje tsaponaponaie. Bajara pijinia pamatacabi Juan, Zacariás pexënato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi.

³ Nexata Juan jivi tsipaebanajetaruca Dioso pitorobilivaisi daxita Jordánmene imoxoyo penaenacuanëta pejinavanapaevijava. Juan jumai tsanajetarucaie jivijavabelia:

—Panajamatabëcuenevënëyorore Diosojavabelia. Pacopabare pibisiacuene paneexanabiabijava. Nexata pacabautisabianatsi Dioso papecavecuajib-iaexanaenexa pibisiacuene paneexanaeconimi, jai tsanajetarucaie Juan jivijavabelia.

⁴ Bajarapacuenia Juan jivi itsa tsipaebanajetaruca, copiajopa jane baja pacuenia Diosojumepaebinëmi profeta Isaíaspijinë bajayata tajëvelia yaquina Juan yabara. Juan jivibautisabinë Dioso pitorobilivaisi jivijavabelia petsipaebanajetarucaejavanexa yabara, yaquina. Profeta Isaíaspijinë peyaquinaelivaisita tajëvelia jumaitsi mapacueniaje:

Tanejumelivaisipaebinë vavajai tsane petusato nacuata. Jumai tsane jivijavabelia: “Jivi baxaneba panamutoverena najetarucaejitsia petuxanenë. Batoroviaexananua namuto.

⁵ Daxita namutua pafotonë rubena, atsa baothoca penamatajëpaeyaexanaenexa namuto. Daxita petsutonëmi, pinijibot-sutoxanetonëmi ata, banamatajëpaeyaexana. Baroviayaexananua

penatoxorotsinamutomi ata. Banamatajēpayaexananua namutua pebobenaemēthēanēmi ata. Bajara pijinia pacuenia paxamē ata panajamatabēcuenexaniavaere pepo petuxanenē pepatsivajēnaeya paxamējavaberena.

⁶ Nexata daxitanacuanēpijivi yapētaena Dioso pecapanepaejavanexatsi pi-janeconivecua.”

jai baja cajena profeta Isaíaspijinē bajayata peyaquinaelivaisita, Dioso pitorobilivaisi, Juan jivi petsipaebanajetaruaejavanexa yabara.

⁷ Jivi ayaibitsaētoxaneto pata Juanjavaberena Juan picani pebautisabinexa bajarapamonae. Bajarapamonae apo jumecovēñetsi ata Dioso pitorobilivaisi, jamatabēcuenenavēxaniabiaya jamatabējumaitsi:

—Juan itsa nacabautisabiana, Dioso nacacapanepaena, jamatabējai.

Nexata Juan jumaitsi bajarapamonaejavabelia:

—¡Panejatabēcuenenavēxaniabivi! Pacuenia jomo rēcēpeca itsa tane isoto petajuenajetaruaejava, bajara saya paitsimē. Dioso rabaja papecananeconitsia exanaematacabinexa pacaimoxoyotapona. Itsiata acunebi tsane panevecupanepaenexa Dioso papecananeconitsia exanaematacabinexavecua.

⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovēñetsiainavanapare. Nexata daxitajivi pacayapētaena pepacuene baja panecopabijava pibisiacuene paneexanabiabijavami. Pacayapētaenanua panenajamatabēcuene pēñeyorotsijava Diosojavabelia. Jamatabēcuenenavēxaniabiaya pētsa panajumaitsimē: “Vaxaitsi cajena Abrahampijinē pemomoxitsi. Nexata Dioso nacacapanepaena,” panajamē pētsa. Abrahampijinē picani papemomoxi atamē, itsiata pibisiacuene itsa paexanavanapame, nexata bajarapacuene apo pacatonamatamotsi tsipae papecacapanepaenexa Diosojavabelia. Dioso baja cajena caējēpatsi jivi pexanaenexa mapaibotonēmi ataje, Abrahampijinē bepemomoxi Dioso petaenexa. Nexata bajarapamonae ata Dioso itsa apo jumecovēñetsi, Dioso apo capanepae tsipae. Nexata pacopabare pibisiacuene paneexanabiabijavami papecacapanepaenexa Dioso.

⁹ Peubinaenē pexainaenē itsa apo tonacuaitsitsi pexaniacuai, nicata sipalita daxita ponaenē apo tonacuaitsitsi pexaniacuai. Nexata baja penicatsicujinae, itsa niona bajaraponaenē, caetuata. Xuaba isotojavabelia. Nexata bajaraponaenēmi tajuatsi. Bajara pijinia pacuenia paxamē ata Dioso pacaxuabiana infiernojavabelia papecatajuenexa, Dioso apo panejumecovēñetsivi, jai Juan bajarapamonaejavabelia.

¹⁰ Nexata bajarapamonae jumaitsi Juanjavabelia:

—¿Detsa nexata pacuene paexanaenajē daxitajivi pataneyapētaenexa pepacuene patacopabijava pibisiacuene pataexanabiabijavami? jai bajarapamonae.

¹¹ Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xinae camisa. Pajivi pexaejava xaina, tsicobetsatsi pajiviyojavabelia apo xinae pexaejava, jai Juan.

¹² Gobierno pejamatabēcuene impuestomatamo pematamoyanijobabiabivi ata, pata Juanjavaberena Juan picani pebautisabinexa bajarapamonae. Nexata bajarapamonae ata jumaitsi Juanjavabelia:

—Juan, ¿detsa pacuene paexanaenajē daxitajivi pataneyapētaenexa pepacuene patacopabijava pibisiacuene pataexanabiabijavami? jai bajarapamonae.

¹³ Nexata Juan jumaitsi bajarapamonaejavabelia:

—Itsa pamatamoyanijobabiabame impuestomatamo, pamatamoyanijobabiabare pamatamota papecaitorobivi pacatocopata paneyanijobabiabinexa. Pëtsa matatoxenetsia bajarapamatamovecua yamaxëitojrobiaya payanijobabiabame paxamë saya panepitsinexa bajarapapalata, jai Juan bajarapamonaejavabelia.

¹⁴ Nexata icatsia vajabitsaë ata jumaitsi Juanjavabelia:

—Juan, ¿jica paxanë tsane? ¿Detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai vajabitsaë.

Nexata Juan jumaitsi vajabitsaëjavabelia:

—Pëtsa panejumesaëta itsajivi ata palata payacajërëtime. Pëtsa najumetsënëtsiaya itsajivi ata pananeconitsiaexaname saya palata papecarajutsinexa pecajunavi. Saya pasivabarëyamëre pacueneta pacamatamotapona papecaitorobivi, jai Juan vajabitsaëjavabelia.

¹⁵ Jivi itsatsacajinaeya copiaevetavanapa Cristo, ponë Dioso athëbëvetsica itorobijitsia pepatsijavatsica jivi pecapanepaenexa. Nexata bajarapamonae Juan itsa tanetsi, bajarapamonae jamatabëcuenenavëxaniabiaya jamatabëjumaitsi Juan yabara:

—Baja raeta jane maCristoje, daxitajivi pecapanepaenënexa, jamatabëjai bajarapamonae Juan yabara.

¹⁶ Nexata Juan jumaitsi daxita bajarapamonaejavabelia:

—Xanë raja saya pacabautisabatsi merata. Itsiata baitsi jane itsanë tacovëverena najetarucaena. Bajara jane ponë pacatsijamatabëjoneyaexanaena Espiritu Santo, pitarunutsicotia yajava. Xanë raja saya beveliajamatabëcuenenënë bajaraponëvecua. Nexata bajaraponë vecuaauranë pijazapato ata tataxujonotsinexa beprijavitonëcuenianë.

¹⁷ Arrozxainanë baja itsa vereta arroz penotsijava, jëba arroz pejëabijavata ëpexu pepitsinexa. Nexata pijaarroz pejëabijavata, tsatapona saicaya ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata, Dioso pejumecovënëtsivivecua Dioso pacatsatsiana papecaxuabinexa infernojavabelia panenaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo peverevereacaisotojavabelia, jai Juan daxita bajarapamonaejavabelia.

¹⁸ Bajarapacuenia ayailvaisianëta Juan muxujibapona jivi. Tsipaebanajetaruca pexanalivaisi pecapanepaelivaisinexatsi Diosojavabelia.

¹⁹ Bajaraxuacujinaë icatsia Juan itaveta nacuaevetsinë Herodes. Tsipaji Herodes pejuyupijinë pijava yacajërëta, Herodiasvënëva. Daxita Herodes pibisiacuene pexanaejavanë ata, itaveta Juan.

²⁰ Itsiata baitsi jane Juan Herodes apo jumecovënëtsitsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinexatsi, penaneconitsivi pejëbabiabibota peetsinexatsi.

*Pacuenia Juan bautisaba Jesús yabara pelivaisi
(Mt 3.13-17; Mr 1.9-11)*

²¹ Juan pevaetabivajënaetsi penaneconitsivi pejëbabiabibota peetsinexatsi, jivi bautisabaponapona. Bajarapamatacabi Juan bautisaba Jesús ata. Jesús pebautisabicujinaetsi itsa vajëta Diosojavabelia, athëbëtatsia itaboxo napatsia.

²² Athëbëvetsica Espiritu Santo naitajëtsiaya Jesús tsimatarunaicatsi beucucuto. Nexata Jesús jumetane athëbëvetsica Dioso pejumaitisjavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

Jesucristo pijasalinaivimi pevënëanë yabara pelivaisi
(Mt 1.1-17)

²³ Itsa baja Jesús xaina bejamatabëcuene treinta pavaibeje, taxuxuaba jane baja jivi Dioso pitorobilivaisi petsipaebijava. Jivi tanetsi Jesús beJosé pexënato. José paxapijinë pevënë Elí.

²⁴ Elí paxapijinë pevënë Matat. Matat paxapijinë pevënë Leví. Leví paxapijinë pevënë Melqui. Melqui paxapijinë pevënë Jana. Jana paxapijinë pevënë José.

²⁵ José paxapijinë pevënë Matatías. Matatías paxapijinë pevënë Amós. Amós paxapijinë pevënë Nahum. Nahum paxapijinë pevënë Esli. Esli paxapijinë pevënë Nagai.

²⁶ Nagai paxapijinë pevënë Maat. Maat paxapijinë pevënë Matatías. Matatías paxapijinë pevënë Semei. Semei paxapijinë pevënë Josec. Josec paxapijinë pevënë Judá.

²⁷ Judá paxapijinë pevënë Joanán. Joanán paxapijinë pevënë Resa. Resa paxapijinë pevënë Zorobabel. Zorobabel paxapijinë pevënë Salatiel. Salatiel paxapijinë pevënë Neri.

²⁸ Neri paxapijinë pevënë Melqui. Melqui paxapijinë pevënë Adi. Adi paxapijinë pevënë Cosam. Cosam paxapijinë pevënë Elmadam. Elmadam paxapijinë pevënë Er.

²⁹ Er paxapijinë pevënë Josué. Josué paxapijinë pevënë Eliezer. Eliezer paxapijinë pevënë Jorim. Jorim paxapijinë pevënë Matat.

³⁰ Matat paxapijinë pevënë Leví. Leví paxapijinë pevënë Simeón. Simeón paxapijinë pevënë Judá. Judá paxapijinë pevënë José. José paxapijinë pevënë Jonam. Jonam paxapijinë pevënë Eliaquim.

³¹ Eliaquim paxapijinë pevënë Melea. Melea paxapijinë pevënë Mena. Mena paxapijinë pevënë Matata. Matata paxapijinë pevënë Natán.

³² Natán paxapijinë pevënë David. David paxapijinë pevënë Isaí. Isaí paxapijinë pevënë Obed. Obed paxapijinë pevënë Booz. Booz paxapijinë pevënë Sala. Sala paxapijinë pevënë Naasón.

³³ Naasón paxapijinë pevënë Aminadab. Aminadab paxapijinë pevënë Admin. Admin paxapijinë pevënë Arni. Arni paxapijinë pevënë Esrom. Esrom paxapijinë pevënë Fares. Fares paxapijinë pevënë Judá.

³⁴ Judá paxapijinë pevënë Jacob. Jacob paxapijinë pevënë Isaac. Isaac paxapijinë pevënë Abraham. Abraham paxapijinë pevënë Taré. Taré paxapijinë pevënë Nacor.

³⁵ Nacor paxapijinë pevënë Serug. Serug paxapijinë pevënë Ragau. Ragau paxapijinë pevënë Peleg. Peleg paxapijinë pevënë Heber. Heber paxapijinë pevënë Sala.

³⁶ Sala paxapijinë pevënë Cainán. Cainán paxapijinë pevënë Arfaxad. Arfaxad paxapijinë pevënë Sem. Sem paxapijinë pevënë Noé. Noé paxapijinë pevënë Lamec.

³⁷ Lamec paxapijinë pevënë Musalén. Musalén paxapijinë pevënë Enoc. Enoc paxapijinë pevënë Jared. Jared paxapijinë pevënë Mahalaleel. Mahalaleel paxapijinë pevënë Cainán.

³⁸ Cainán paxapijinē pevēnē Enós. Enós paxapijinē pevēnē Set. Set paxapijinē pevēnē Adán. Adánpijinē Dioso pexanaenētsi.

4

Pacuenia picani Jesús jamatabēcuenejēbatsi dovathi yabara pelivaisi

(Mt 4.1-11; Mr 1.12-13)

¹ Jesús baja naviarena Jordán meneverena Juan pebautisabicujinaetsi. Tsijamatabēvēnēcatsi bitso Espiritu Santo. Nexata Espiritu Santo ponaeyaexanatsi petusato nacuyabelia.

² Bajarajotalia Jesús ponapona cuarenta pamatacabibeje. Bajara pijinia pamatacabibeje Jesús pexaejava apo xae. Jesús nexata bitso piajani. Dovathi nexata jamatabēcuenejēbatsi pibisiacuene picani pexanaenexa.

³ Dovathi jumaitsi Jesúsjavabelia:

—Itsa pepacuene Dioso pexēnatomē, itorobare mapaibotoyoje penaexanaenexa panbē, jai dovathi Jesúsjavabelia.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae épexaejava pexaenexa. Jivi raja namatavenona daxita Dioso pejumelivaisi ata pejumecovēnētsinexa pexainaenexa matababi apo peverevereaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barēliatsi dovathi pinijitsutoxanetojavabelia. Barējunayatsi bajarapatsutojumabetsia. Nexata bajarapatsutojumavetsica dovathi Jesús tsitajētatsi bepimia daxitanacuanē.

⁶ Nexata icatsia dovathi jumaitsi Jesúsjavabelia:

—Xanē raja carajutsianatsi daxita mapanacuanēje nevetsinexa. Daxita bajarapanacuanēta paitabēcuene taneme, cayajavarajutsianatsi. Nexata bitso nexainaenē tsane nexinaejava. Daxita tanerajutsijavanēmi, necaējēpa juya tarajutsinexa pajivijavabelia jamatabērajutajē.

⁷ Ayaijamatabēcuenenēnē netaeya taitabarata nematabacabēta itsa netonucajunuame, nexata daxita mapanacuanēje nijanacuanē tsane, jai dovathi Jesúsjavabelia.

⁸ Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajēcae pematabacabēta caenē, pepo petuxanenē Diosojavabelia. Tonacuenebinua bajaraēponēnexa,” jai raja Dioso pejumelivaisibaxutota, jai Jesús dovathijavabelia.

⁹ Bajaraxuacujinae abaxē icatsia Jesús barēliatsi dovathi Jerusalén tomabilia. Jerusalén tomarata barējunayatsi temploboxaneto matatuyabetsia. Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexēnatomē, jirevaremea irabereca.

¹⁰ Bajarapacuenia jirevaremea irabereca. Tsipaji xamē peitsacueneyaniva pecaevecsineca, Dioso pejumelivaisibaxutota jumaitsi mapacueniaje:

Dioso itorobianica pijaángelevi pecaevecsineca.

¹¹ Nexata ángelevi pecobeta cayotsiana pecataxutsaquitsianiva ibotonējavabelia, jai Dioso pejumelivaisibaxutota xamē pecaevecsineca ángelevi, jai dovathi Jesúsjavabelia.

¹² Jesús nexata icatsia jumaitsi dovathijavabelia:

–Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcuenejëtsianajë. Nexata natoexanaenajë pacuene bitso netsiyayi tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

¹³ Bajaraxuacujinae itsa baja dovathi daxitacuene Jesús jamatabëcuenejëbiveretatsi pibisiacuene picani Jesús pexanaenexa, nexata abaxë yatucompatatsi itsamatacabijavabelia icatsia pejamatabëcuenejëtsinexatsi.

Pacuenia Jesús Galilea nacuata taxxuaba Dioso pitorobilivaisi jivi petsipaebijava yabara pelivaisi

(Mt 4.12-17; Mr 1.14-15)

¹⁴ Jesús baja itsa naviata petusato nacuaverena, Galilea nacuyaberena, Espiritu Santo pesaë yajavaponapona. Nexata daxita Galilea nacupijivi vënëlivaisitanetsi Jesús.

¹⁵ Judíovi penacaetuatabibonëjava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: “Maponëje bitso ayaijamatabëcueneñë,” jai tsabiabi.

Pacuenia Jesús naviata pijatomarabelia, Nazaret tomarabelia, yabara pelivaisi

(Mt 13.53-58; Mr 6.1-6)

¹⁶ Nexata Jesús naviata pevitsabitomarabelia, Nazaret tomarabelia. Nexata pepatsicujinae Nazaret tomarata, judíovi penacueraevetsimatacabita Jesús najoneya judíovi penacaetuatabiboyalia. Tsipaji baja cajena Jesús bajarapacuenia exanabiaba. Nexata judíovi penacaetuatabibibota Jesús nonotapuna Dioso pejumelivaisibaxuto petsimuxulebinexa daxita bajara-jota penaevi pejumetaenexa.

¹⁷ Nexata Jesús tsicoberutatsi profeta Isaíaspijinë bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajara-jota penaevi pejumetaenexa, Jesús tsimuxuleba itsajota bajarapabaxutota tajëvelia Jesús yabara jumaitsi mapacueniaje:

¹⁸ Dioso pijaEspiritu Santo netsijamatabëeca. Tsipaji Dioso nitapeta tatsipaebinexa pexanialivaisi pibisiacuene pexanabiabijava bepeyajamatabëcuenejibovijavabelia. Nitorobanua tajamatabëcuenexaniavaetsinexa bajarapamonaë pibisiacuene pexanabiabineconi yabara bepeyajamatabëcuenejibijavavecu. Nitorobanua tajamatabëcuenejiaetsinexa pamonaë pijamatabëcueneitaquirivi, pamonaë abaxë apo yapëtaë pexaniajailivaisi. Nitorobanua tacapanepaenexa pamonaë jamatabëcuenebejibotabiabatsi pijavajabitsaë.

¹⁹ Nitorobanua tatsipaebinexa pacuenia baja Dioso najamatabëcuenevereta pecapanepaenexa pijajivi, pejaiitanejavata tajëvelia Jesús yabara Isaíaspijinë peyaquinaebaxutota Jesús tsimuxulebanuca daxita bajarajota penaevi pejumetaenexa.

²⁰ Bajaraxuacujinae Jesús baja bajarapabaxuto baxuacata. Tocanaviata baja judíovi penacaetuatabibibota penacuenebinëjavabelia. Bajaraxuacujinae Jesús baja icatsia ecareca. Daxita pamonaë judíovi penacaetuatabibibota ena, Jesús asaëyata taeyenatsi.

21 Nexata icatsia Jesús jumaiti bajarapamonaejavabelia:

—Aeconoxae Dioso pejumelivaisibaxuto pacatsimumxulebiveretatsi. Xua yabara bajarapabaxutota jumaiti, bajaraxua baja aeconoxae mapamatacabitaje copiapata baja, jai Jesús bajarapamonaejavabelia.

22 Nexata daxitajivi pexaniajamatabëcuenia Jesús yabara cuaicuajjai. Jamatabëcuenenabenajaca pexanialivaisi Jesús petsipaebixae. Nexata bajarapamonaee Jesús jamatabëcueneaebiatanetsi. Nexata bajarapamonaee janijobena. Najumaiti:

—¿Matsa baja ponë Josépijinë apo pexë natoje? najai tsenae bajarapamonaee Jesús yabara.

Tsipaji saya bajarapamonaee jamatabëjumai tsenae:

—Josépijinë raja pexë nato, jamatabëjai tsenae.

23 Nexata Jesús jamatabëcueneypëtane pacuenia sivanajamatabëxainatsi bajarapamonaee. Nexata Jesús jumaiti bajarapamonaejavabelia:

—Xaniajanë cajena pacuenia pacatsipaebijitsiatsi. Pacuenia pajumaitisimë tsabiabi pajiviyojavabelia pajamatabëcueneaebiataneme, bajara pijinia pacuenia xanëjavaberena ata panejumaitisimë tsane patanejamatabëcueneaebiataexaemë. Panejumaitisimë tsane mapacueniajaje: “Pacuenia pacavënëlivaisitanetsi Dioso pesaëta pinijicuene nexanaejava Capernaum tomarata, bajara icatsia pitsicuene exanare majotaje nevitsabitomarata,” panejamë tsane, jai Jesús judíovi penacaeuatabiabibota penaevijavabelia.

24 Icatsia Jesús jumaiti bajarapamonaejavabelia:

—Xaniajanë cajena pacuenia pacatsipaebijitsiatsi. Itsanë ata Dioso-jumepabinëmi profetanë pijanacuapijivi apo jumecovënëtsitsi petsipaebilivaisi. Jamatabëcuene aebiataeyabiabatsi pijanacuapijivi.

25 Bajayata profetanëmibeje pinijicuene exanae atabeje, pinijicuene apo exanaebeje pijanacuata. Bajara pijinia pacuenia xanë ata pinijicuene apo exanaenë tsane tavitsabitomarata. Bajayata, abaxë pamatacabi profeta Elíaspijinë ponapona Israel nacuata, bajarapamatacabi, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanëjava bitso janibo. Bajarapamatacabi janibovajënaeya pamonajivi pevecuatëpaevanëtsi ayaibitsaëto jinavanapa Israel nacuata. Bitso bejiobi tsavanapae.

26 Itsiata Elíaspijinë Dioso apo itorobitsi peyavenonaenexa bajarapamonaeyajuvënëva. Elíaspijinë Dioso itorobatsi peponaenexa Sarepta tomarapijivijavabelia, Sarepta tomarata pamona pevecuatëpaevatsi Elíaspijinë peyavenonaenexa. Sareptatomara eca Sidón nacuata.

27 Bajayata, Elíaspijinë pevënamuto, profeta Eliseopijinë ponapona Israel nacuata. Bajayajebi bitso peperabëtsabanaevi, ayaibitsaëto picani jinavanapa Israel nacuata. Itsiata bajarapamatacabi profeta Eliseopijinë caenë ata pijanacuapijinë, bajayajebi bitso peperabëtsabanaeviyajuvënënenë, apo jamatejemayaexanae. Caenë bajayajebi bitso peperabëtsabanaenë Naamán, Siria nacuverena pepatsinë, jamatejemayaexana, jai Jesús judíovi penacaeuatabiabibota penaevijavabelia.

28 Nexata bajarapamonaee itsa jumetane bajarapacuenia Jesús pejumaitisijava, bitso Jesús baraanaepanatsi bajarapamonaee.

29 Bajarapamonaee nonobapuna. Vaetabatsi Jesús. Caponaliatsi tomaramjababelia. Patsutoyenepanata eca Nazarettomara, bajarapatsutojumabetsia Jesús caponayatsi pexuabinexatsireca picani bajarapatsuto itapajanitovjavareca.

³⁰ Itsiata bairi jani Jesúš bajarapamonae tuatuaŷeta najetaruae ata, pētaenejevatsi vecuapona baja Capernaum tomarabelia. Nexata baja Jesúš vecuapanepa bajarapamonae.

Pacuenia pebi, dovathi peyjavaponaponaenē, Jesúš jamatejemayaexana yabara pelivaisi

(Mr 1.21-28)

³¹ Jesúš pata Capernaum tomarata. Capernaum tomara eca Galilea nacuata. Nexata Capernaum tomarata Jesúš jivi livaisi tsipaeba judíovi penacueraevetsimatacabita.

³² Itsa bajarapamonae jumetane palivaisi Jesúš tsipaeba, jamatabēcuenenabenajaca. Tsipaji xaniavaetsia tsipaeba Dioso pitorobinētsicuenia.

³³ Bajarajota judíovi penacuatuatabiabibota pebi, dovathi peyjavaponaponaenē, naeca. Nexata bajaraponē Jesúšjavabelia vavajai tsaxuabi. Jumaitsi:

³⁴ —¡Jesúš, Nazaret tomarapijinēmē, panevecuaponare baja! ¿Detsa xua paneexanaejitsiamē? ¿Najetarucame tsaja pataneveretsinexamē? Xanē cajena cayapētanetsi. Xamē raja Dioso pexēnatomē, pepo pexaniajamatabēcuenenēmē, jai dovathi peyjavaponaponaenē Jesúšjavabelia.

³⁵ Jesúš nexata jumeitaveta dovathi. Jumaitsi:

—¡Moyamēre! ¡Vecuapitsapare baja maponēje! jai Jesúš.

Nexata dovathi pebi xuabatsi irata daxita bajarapamonae pitabarata. Dovathi baja pebi vecuapitsapatsi itsiata itsacuenē exanaenejevatsi.

³⁶ Nexata daxitajivi bajarapacuenē ita tane, bitso jamatabēcuenenabenajaca. Najumaitsi bajarapamonae:

—¿De meta pacuenia maponē caējēpatsi pijumeta pexanaenexa mapacueniaje? ¡Maponēje Jesúš, beDioso pitorobinētsisica! ¡Itaveta dovathi pepit-sapaenexa jivivecua! ¡Nexata baja dovathi pitsapa jivivecua! najai bajarapamonae.

³⁷ Nexata Jesúš vēnēlivaisitanetsi daxita bajarapanacuapijivi.

Pacuenia Simón Pedro pijava pena Jesúš tojamatejemayaexana yabara pelivaisi

(Mt 8.14-15; Mr 1.29-31)

³⁸ Judíovi penacuatuatabiabibo pevecuapitsapaecujinae, Jesúš joneya Simón Pedro pijaboyalía. Nexata bajarajota Jesúš pevajēnae, Simón pijava pena bitso romaebanucatsi. Nexata bajarajota itsamonae Jesúš tsipaebarecēpatsi bajarapova peromaebanucaejavatsi.

³⁹ Jesúš nexata cujilia peromaebanucaevatsi. Vecuaitaveta peromae-bijavatsi. Nexata bajarajota peromaebanucaevatsi domae baja vecuajibi tsanajetsisireca. Bajarapova baja jamatejema. Nexata bajarapova Jesúšbana pexaejavanexa toexanatsi.

Pacuenia ayaibitsaēto jivi, piavitanevi, Jesúš jamatejemayaexana yabara pelivaisi

(Mt 8.16-17; Mr 1.32-34)

⁴⁰ Itsa baja ajena meravitsia, jivi piavitanevi, daxitavirivitanē pexa-inaevi, tocapatatsi Jesúšjavaberena. Jesúš nexata perabējayatapona caejivi canacujitsia, piavitanevi. Bajarapacuenia Jesúš jamatejemayaexana daxita piavitanevi.

⁴¹ Itsamonae ayaibitsaëto, dovathi peyajavajinavanapaevi, Jesús vecuacapsapapona. Nexata dovathi itsa pitsapa, vavajai tsabiabi Jesúsjavabelia.
—Xamê raja Dioso pexênatomê, jai tsabiabi.

Nexata Jesús jumeitavetabiaba dovathi. Apo tocopatabiabi pecuaicuaijainexa petsipaebiyaniya itsamonaejavabelia. Tsipaji dovathi xaniavaetsia yapêtanetsi Cristo athêbêvetsica Dioso pitorobijavatsi jivi pecapanepaenexa.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

(Mr 1.35-39)

⁴² Bajayacunua, ajena baja matacabi tsarucaponae, Jesús pitsapa tomaravecua. Pona pesaicaeyojavabelia. Nexata jivi pêjaitatsi. Yapênapatatsi itsajota Jesús eca. Asivatsi bajarapamonae Jesús pevecuaponaeyaniya itsajavabelia.

⁴³ Nexata Jesús jumaiti bajarapamonaejavabelia:
—Itsatamaranêjava ata raja tsipaebijitsianê pexanialivaisi pacuenia Dioso evetsijitsia pijajivi mapanacuataje. Bajarapalivaisi tatsipaebinexa jivi, Dioso baja cajena nitoroba, jai Jesús bajarapamonaejavabelia.

⁴⁴ Bajarapacuenia Jesús Judea nacujava livaisi jivi tsipaebanajetaruca judíovi penacaetuatabiabibonêjava.

5

Pacuenia dujuai bitso ayaijavaxaneto juta peyamatajucaejavata yabara pelivaisi

(Mt 4.18-22; Mr 1.16-20)

¹ Itsamatacabi Jesús nuca Genesaret pucaxaneto itapata. Nexata jivi ayaibitsaëtoxaneto cênênaponatsi imoxoyo pejumetaenexatsi Jesús petsipaebilivaisi, Dioso pitorobilivaisi.

² Nexata Jesús anijajerabeje taeruta bajarajota pucaitapata. Bajarapamobeje dujuai peyamatajucaeivi Simónbana vecuanonobajunarêcêpa. Nexata bajarajota imoxoyo Simónbana quiatanubena dujuai peyamatajucaejava.

³ Nexata Jesús runareca jera ênêabereca, Simón pijajera ênêabereca. Jesús itoroba Simón jera peyatorotsinexatsilia tsiquirijavayo puca tuatujêyojavabelia. Jesús eca jeraênêta. Nexata Jesús jera ênêjavaverena livaisi tsipaebeca bajarapajivi bitsaëtoxanetojavabelia.

⁴ Itsa baja Jesús copata jivi livaisi petsipaebijava, nexata jumaiti Simónjavabelia:

—Pavaeremelia jera piavajubujavabelia. Pacoparemeca dujuai paneyamatajucaejava. Payamatajutsianame dujuai, jai Jesús Simónjavabelia.

⁵ Nexata Simón jumaiti Jesúsjavabelia:

—Jesús, payamatajucajê rabaja picani meravijebi. Itsiata apo payamatajutsinê caenêyo ata. Itsiata pacuenia paneitorobame, pacopatsiarecajê dujuai patayamatajucaejava, jai Simón Jesúsjavabelia.

⁶ Nexata copareca pitorobicueniatsi. Itsa jutsina dujuai peyamatajucaejava, ayaijavaxaneto bitso dujuai yajutsina. Nexata dujuai peyamatajucaejava imoxo peyamaêucuucuae.

⁷ Nexata itacovaebarena penajuayamatajucaeivi peponaenexarena itsamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vênêta bajarapamobeje dujuai. Imoxo dujuai peyabubunae bajarapamobeje.

⁸ Nexata Simón Pedro itsa tane bajarapacuenae, pematabacabêta tonuca Jesús pitabarata. Jumaitsi Jesúsjavabelia:

–Tajatuxanenê, nevecuanatixire. Tsipaji xanê pibisiacuenae taexanaenê, jai Simón Jesúsjavabelia.

⁹ Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vêncuenia Simón jumaitsi tsipaji penajuayamatajucaevi yajava bitso jamatabêcuenenabenajaca, bitso ayaijavaxaneto dujuai peyamatajutsixae.

¹⁰ Ponêbeje Simón yanatatsi, Santiagobeje Juanbeje. Bajaraponêbeje Zebedeo pexênatobeje. Bajaraponêbeje ata jamatabêcuenenabenajacabeje. Nexata Jesús jumaitsi Simónjavabelia:

–Pêtsa najunaviacame. Cacujarubianatsi jivi nejucaenexa. Nexata pacuenia dujuai jucabiabame, bajarapacuenia jivi jucaename Dioso pijajivinxexa, jai Jesús Simónjavabelia.

¹¹ Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavanapaejavaximi rajuta itsamonaejavabelia. Bajaraxuacujinae pênapona baja Jesús.

Pacuenia Jesús jamatejemayaexana bajayajebi bitso peperabêtsabanaenê yabara pelivaisi

(Mt 8.1-4; Mr 1.40-45)

¹² Jesús itsa ponapona tomarata, nexata bajarajota patajopa pebi, bajayajebi bitso peperabêtsabanaenê. Itsa bajaraponê tane Jesús, pematabacabêta irataeya bocajunua Jesús pitabarata. Vajêta pinijicuenia Jesúsjavabelia. Jumaitsi:

–Tajatuxanenê, cacaêjêpa raja tanejamatejemayaexanaenexamê mapavitanevecuaje. Itsa jitsipame, nejamatejemayaexanare mapavitanevecuaje, jai bitso peperabêtsabanaenê Jesúsjavabelia.

¹³ Nexata Jesús pecobeta perabêjayalia bitso peperabêtsabanaenê. Jumaitsi bajaraponêjavabelia:

–Jājā, jitsipajê cajena. Jamatejemamê rabaja, jai Jesús peperabêtsabanaenêjavabelia.

Bajarapacuenia Jesús pejumaitsijavata peperabêtsabanaenêmi baja perabêxanepananajereca.

¹⁴ Nexata Jesús jumeitaveta bajayajebi bitso peperabêtsabanaenêmi petsipaebiyaniya itsajiviyojavabelia ata pacuenia Jesús jamatejemayaexana bajaraponê. Jesús jumaitsi:

–Naitajêremelia jane sacerdotenêjavabelia, templobota penacuenebinêjavabelia. Nexata sacerdotenê cataena pecavecuajibijava baja niavitanejavami. Diosonexa rajuremelia ofrenda sacerdotenêjavabelia pecavecuajibixae niavitanejavami. Bajara tsipaji pacuenia bajayata vajasalinainêmi Moiséspijinê nacaitoroba. Nexata jivi yapêtaena pecacuene baja pecavecuajibijava niavitanejavami, jai picani Jesús bajayajebi bitso peperabêtsabanaenêmijavabelia jivi ayaibitsaêto pevênêlivaisitaeyanivatsi.

¹⁵ Itsiata Jesús vênêlivaisitanetsi daxita bajarapanacuapijivi. Nexata Jesús jivi itsa vênêlivaistanetsi, ayaibitsaêtoxfaneto patapona Jesúsjavaberena penamuxunaevetsinexatsi petsipaebilivaisi. Bajarapamonae pata Jesús pejamatejemayaexanaenexanu piavitanejavavueca.

¹⁶ Itsiata Jesús itsajavata jiviveuca natixitabiaba pesaicaeyojavabelia. Barajajota vajêtabiaba Diosojavabelia.

*Pacuenia Jesús jamatejemayaexana petabusipacuenabinëtsi yabara peliv-
aïsi*

(Mt 9.1-8; Mr 2.1-12)

¹⁷ Itsamatacabi Jesús jivi livaisi tsipaeba. Bajarajota naena fariseovi. Naenanua judíovi pecujarubivi ata. Bajarapamonae pata Galilea nacua-
ata penaetomaranëjavaverena, Judea nacuaata penaetomaranëjavaverena ata,
Jerusalén tomaraverena ata. Nexata bajarapamatacabi Jesús Dioso pesaëta
caëjëpaeyaexanatsi jivi pejamatejemayaexanaenexa piavitanejavavecua.

¹⁸ Nexata bajarajota Jesúsjavaverena pebijivi camayota yavëtaraparena
petabusipacuenabinëtsi. Bajarapamonae picani bajaraponë boyalia
yavëtarajonejitsialia peyabuatsinexa Jesús pitabarata.

¹⁹ Itsiata acuenebi boyalia pecajonejava. Tsipaji bitso jivi bajarapabo
yavënëca. Nexata bajarapamonae petabusipacuenabinëtsi bojumabetsia
cajunaya. Bomatatu javavetsica vojoexana. Nexata bajarapavojotuatsica
petabusipacuenabinëtsi camayota yacopatsicatsi jivi tuatajëatsica Jesús
pitabarayatsica. ²⁰ Jesús jamatabëcuenyapëtane pacuenia bajarapamonae
sivanajamatabëxainatsi. “Nacatojamatejemayaexanaenatsi cajena,” pesi-
vajamatabëjajivatsi Jesús jamatabëcuenyapëtane. Bajaraxuata petabusi-
pacuenabinëtsijavabelia Jesús jumaitsi mapacueniajaje:

—Pibisiacuene rabaja nexanaeneconimi cavecuajibiaexanatsi, jai Jesús
bajaraponëjavabelia.

²¹ Nexata judíovi pecujarubivi, fariseovinua, itsa jumetaeyona Jesús peju-
maitsijava bajarapacuenia, najamatabëxainena bëpënëa mapacueniajaje:

—¿De meta maponëje? Maponëje Dioso apo pejitsipaecuenia cuaicuai-
jai. Itsanë ata cajena apo caëjëpaetsi itsajivi pibisiacuene pexanaenecon-
imi pevecuaajibiaexanaenexa. Caenë Dioso caëjëpatsi itsajivi pibisiacuene
pexanaeneconimi pevecuaajibiaexanaenexa, jamatabëjai tsenae bajarapa-
monae bëpënëa Jesús yabara.

²² Nexata Jesús jamatabëcuenyapëtane bajarapamonae bëpënëa pesivana-
jamatabëxainenaajava bajarapacuenia. Nexata Jesús jumaitsi bajarapamonae-
ajavabelia:

—Pëtsa bajarapacuenia panesivanajamatabëxainame. Tsipaji cajena xanë
necaëjëpa jivi pibisiacuene pexanaeneconi tavecuajibiaexanaenexa.

²³ Paxamë apo pacacaëjëpae ata itsajivi pibisiacuene pexanaeneconi pan-
evacuajibiaexanaenexa, pacacaëjëpa picani saya jema panejumaitsinexa
pejamatejemavijavabelia mapacueniajaje: “Cavecuajibiaexanatsi rabaja
pibisiacuene nexanaeneconimi,” panejainexa. Tsipaji itsajivi ata apo
yapëtae tsipae saya jema panejumaitsijava. Itsiata baitsi jane itsa pepacuene
apo pacacaëjëpae panejamatejemayaexanaenexa petabusipacuenabinëtsi,
nexata acuenebi panejumaitsinexa bajaraponëjavabelia mapacueniajaje:
“Nonotapunare. Ponare baja,” panejainexa. Tsipaji bajarapacuenia
pajumaitsimë ata, itsa apo jamatejema tsipae bajaraponë, nexata daxitajivi
pacayapëtaejitsipa apo papecacaëjëpaeacuene panejamatejemayaexanaenexa
bajaraponë, jai nexata Jesús bajarapamonaejavabelia.

²⁴ Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaëjëpa tavecuaj-
ibiaexanaenexa itsajivi pibisiacuene pexanaeneconimi ata pacuenia
baja exanajë maponëjavabeliajaje. Nexata patanecuenyapëtaenexamë
tanecaëjëpaejava tavecuajibiaexanaenexa itsajivi pibisiacuene
pexanaeneconimi ata, pataema pacuenia jamatejemayaexanaejitsianë
maponëje, jai Jesús bajarapamonaejavabelia.

Nexata icatsia Jesús jumaitsi petabusipacuenebinëtsijavabelia:

—Xamë cajumaitsitsi. Nonotapunare. Nijacamayo pire. Nijaboyabelia baja ponare, jai Jesús.

²⁵ Nexata bajarapacuenia Jesús pejumaitsijavata, petabusipacuenebinëmitsi nonotabapuna baja daxitajivi pitabarata. Pebo-caecamayo pita. Pona baja pijaboyabelia. Penajetarucaejavata namutua, Diosojavabelia jumai tsanajetaruca: “Diosomë, pexaniacuene netoexaname,” jai tsanajetarucae bajaraponë.

²⁶ Nexata daxita pamonaë tane petabusipacuenabinëmitsi baja pejamatejemajava, pinijicuenia jamatabëcuenenabenajaca. Nexata bajarapamonae jumaitsi Diosojavabelia:

—Diosomë, pexaniacuene bitso nexanaenë, jai Diosojavabelia.

Daxitajivi itsa tane bajaraponë pejamatejemajava, pejamatabëcueneta bëpënëa bitso junava. Nexata bajarapamonae najumaitsi:

—Ajena, mapamatacabitaje, tanetsi Dioso pinijicuenë pexanaejava, najai bajarapamonae.

Pacuenia Jesús pijajivitonënexa junata Levivënënë yabara pelivaisi

(Mt 9.9-13; Mr 2.13-17)

²⁷ Jesús baja vecuapona pabota jamatejemayaexana petabusipacuenabinëtsi. Nexata Jesús penajetarucaejavata taeyeta Levivënënë. Bajaraponë pematamoyanijobinë impuestomatamo gobierno pejamatabëcuenë. Pabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaitsi Levíjavabelia:

—Leví, nepënaponare, jai Jesús.

²⁸ Jejai Leví. Nexata nonotapuna. Copata baja daxita pacuene bajarajota nacuenëbabiaba. Pënapona Jesús.

²⁹ Bajaraxuacujinaë Leví pijabota napata Jesús. Nexata Leví pinijifiesta toexana Jesúsnexa. Tspijai Leví jamatabëcuenëbarëya Jesús pejunatsixaetsi pijajivitonënexa. Nexata Leví pijabota naena ayaibitsaëto jivijavabelia impuestomatamo pematamoyanijobivi gobierno pejamatabëcuenë. Itsamonae ata Leví pijabota naena media muxuneneta.

³⁰ Nexata fariseovi, judíovi pecujarubavinua, Leví pijabo jumapënëvelia penubenaevi, jamatabëcuenenavëxaniabiaya baracuaicuajaitsi Jesús pijajivijavabelia. Bajarapamonae Jesús yabara jumaitsi:

—Jesús rabaja naneconita Diosojavabelia. Tspijai gobierno pejamatabëcuenë impuestomatamo pematamoyanijobabiabivijavata, piagamatabëcuenëbejevijavatanua, naxaeyeca pexaejaya, jai bajarapamonae jamatabëcuenenavëxaniabiaya Jesús pijajivijavabelia.

³¹ Jesús itsa jumetane fariseovi, judíovi pecujarubavinua, pebaracuaicuajaijavatsi, nexata Jesús jumaitsi bajarapamonaejavabelia mapacueniaje:

—Pevaëbinë raja apo vaëbi pejamatejemavi. Pevaëbinë raja piavitanevi vaëba.

³² Bajara pijinia xanë ata itsinë. Apo sivapatajopaenë tajunatsinexa pamonaë baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava, penajamatabëcuenepënëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëtapona Diosojavabelia pexaejaya apo pexaeyabiabixae yabara pelivaisi

(Mt 9.14-17; Mr 2.18-22)

³³ Fariseovi, judíovi pecujarubavinua, jumaitsi Jesúsjavabelia:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëcapona. ¿Detsa xuajitsia xamë nijajivi pexaejava xaeyabiaba Diosojavabelia pevajëcaematacabianë ata? jai bajarapamonae.

³⁴ Jesús nexata comparaciõncuenia jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atso bi pexaejava itsa abaxë yajavaecatsi pejananacasabinë.

³⁵ Itsiata baitsi jane itsa pejananacasabinë tsimaxëpatsipatsi pijavajabit-saë pevecuacaponanexatsi itsajavabelia, nexata pecovëta bajarapamonae apo xae tsipae pexaejava. Tsipaji bitso najamatabëxainaejitsipa. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëta. Itsiata pamatacabi xanë necaponae baja bajarapomonaevëcua, nexata jane baja bajarapamatacabi pexaejava apo xae tsane bitso tanesivanajamatabëxainae, jai Jesús peyanijobivitsijavabelia.

³⁶ Nexata bajarapamonae perujumatabëcuene baja penavecuacopatsinexa, Jesús livaisi tsipaeba comparaciõncuenia, bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijajumatabëcuenebeje pexainaejaniva, perujumatabëcuene baja penavecuacopabinexa, Jesús livaisi tsipaeba comparaciõncuenia. Perujumatabëcuene yabara Jesús jumaitsi bajarapomonaejavabelia mapacueniaje:

—Itsajivi ata apo caucutsi pejananaxatatsijava pejanapana pecatsatarutsinexa perujunaxatatsiesetojavabelia. Itsa caucutsipa pecatsatarutsinexa pejanapana perujunaxatatsiesetojavabelia, nexata bijianaejitsipa pejananaxatatsijava. Apo itajitsipaenua tsipae pejanapana peruaejava perujunaxatatsiesetojavabelia.

³⁷ Itsajivi ata pijinia apo epacae pejanavinoranë perujubocodoranëjavabelia bajayajebi peyajebinexa. Pejanavinoranë itsa epacaejitsipa perujubocodoranëjavabelia, nexata pejanavinoranë yatititibia tsipae. Tsipaji perujubocodoranë apo yanayeretsi tsipae xaniavaetsia. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi.

³⁸ Bajaraxuata bepaca pejanavinoranë pejanabocodoranëjavabelia.

³⁹ Itsajivi perujuvinora piapaecujinae, apo jitsipae piapaenexa pejanavinora. Tsipaji jamatabëjumaitsi: “Perujuvinora bitso xanepana pejanavinora matatoxenetsia,” jamatabëjai, jai Jesús bajarapomonaejavabelia comparaciõncuenia. Bajarapacuenia Jesús jumaitsi comparaciõncuenia tsipaji bajarapomonae catsiteca perujumatabëcuene. Nexata Jesús jitsipa bajarapomonae pejumecovënëtsinexa ëpejanalivaisi, palivaisi Jesús tsipaeba.

6

Pacuenia Jesús pijajivi namutua siricanajetarubena trigoxu judíovi penacueraevetsimatacabita yabara pelivaisi

(Mt 12.1-8; Mr 2.23-28)

¹ Judíovi penacueraevetsimatacabita Jesús, pijajivi yajava, najetaruca namutua trigo pbianëjava. Nexata Jesús pijajivi piajanixae, trigoruanë siricanajetarubena. Xunacobenacaquiatanajetarubena. Xuxaeyabuatapona.

² Nexata fariseoviyajuvënëvi jumaitsi Jesús pijajivijavabelia:

—Paxamë raja paexaname Dioso Moiséspijinëta penajumecopatsilivaisi vajanacaitavetsicuene. Apo nacaitavetsi ata trigoxu vajaxaeyaniva, itsiata

ajena penacueraevetsimatacabixae, apo bepaexanaemë mapacueniaje, jai fariseovi Jesús pijajivijavabelia.

³ Jesús nexata jumaiti fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacue. Tsipaji bitso piajani. ¿Apo palebimë tsiapaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabita bitso piajani?

⁴ Bajaraponë Davidpijinë joneya Dioso pijatemploboyalia. Nexata Dioso pijatemploboënëta, mesajumata bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyani Diosojavabelia. Ësacerdotevi picani pexaenexa tocopatsi. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia, jai Jesús fariseovijavabelia.

⁵ Icatsia pematatsënëa Jesús jumaiti fariseovijavabelia:

—Xanë, Daxitajivi Pematapijinënë, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús.

Pacuenia Jesús jamatejemayaexana pebi pecobetsaquenaenë yabara pelivaisi

(Mt 12.9-14; Mr 3.1-6)

⁶ Itsamatacabita Jesús joneya judíovi penacaetuatabiboyalia judíovi penacueraevetsimatacabita. Nexata bajarajota Jesús jivi livaisi tsipaeba. Bajarajota pebi pecujanenia pecobetsaquenaenë, naeca.

⁷ Nexata Jesús naitaxutocaevetenatsi judíovi pecujarubivi, fariseovinua, petaenexatsi Jesús pejamatejemayaexanaejava pecobetsaquenaenë judíovi penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja pibisiacue exana,” pejainexa bajarapamonae.

⁸ Nexata Jesús yapëtane pacuenia bajarapamonae sivanajamatabëxainatsi. Nexata Jesús jumaiti pecobetsaquenaenëjavabelia:

—Nonotapunare. Nucare majotaje mapamonae pitabarataje, jai Jesús.

Nexata pecobetsaquenaenë nonotapuna. Nuca bajarapamonae pitabarata.

⁹ Nexata Jesús jumaiti penaitaxutocaevetenaevitsijavabelia:

—Penacueraevetsimatacabita ata xanepana vajaexanaenexa pexaniacue. Xanepana vajajamatejemayaexanaenexa piavitanevi, jai Jesús penaitaxutocaevetenaevitsijavabelia.

¹⁰ Jesús matatoyorotsia naëcoba daxita pamonae ena bajarajota. Jesús jumaiti pecobetsaquenaenëjavabelia bajarapamonae pitabënejeva:

—Namaxërovire, jai Jesús.

Nexata baja pecobetsaquenaenë namaxërovita. Bajarajota cobexanepananajereca baja. Pecobetsaquenaejavami ajibi.

¹¹ Nexata judíovi pecujarubivi, fariseovinua, itsa tane Jesús pecobexanepanaeyaexanaejava pecobetsaquenaenë, bitso anaepana. Nexata jane baja najumejaita pacuenia Jesús beyaxuabijitsiatsi.

Pacuenia Jesús pijajivi ayaibitsaëttoxanetoyajuvënëvi itapeta saya doce ponëbeje apóstolevinexa yabara pelivaisi

(Mt 10.1-4; Mr 3.13-19)

¹² Jesús pijajivi ayaibitsaëtoxanetoyajuvënëvi, doce saya ponëbeje, itapeta apóstolevinexa. Jesús pitapetsivajënaeya apóstolevinexa, junaya petsutojumabetsia pevajëtsinexa Diosojavabelia. Nexata Jesús meravijebi bajarapatsutojumatatsia vajëta pona Diosojavabelia.

¹³ Bajayacunua, ajena baja matacabi tsarucapona, Jesús junata daxita pijajivibitsaëtoxaneto bajaraponëjavabelia. Nexata bajarajota itapeta pijajivibitsaëtoxanetoyajuvënëvi, doce saya ponëbeje. Bajarapamonae Jesús vënëruba apóstolevi.

¹⁴ Pamonae Jesús itapeta apóstolevinexa mapevënëanëje. Copiaya ponë, pevënë Simón. Bajaraponë Jesús vënëruba itsavënë, Pedro. Itsanë Andrës, Simón Pedro jane baja pejuyapijinë. Itsanë Santiago. Itsanë Juan. Itsanë Felipe. Itsanë Bartolomé.

¹⁵ Itsanë Mateo. Itsanë Tomás. Itsanë Santiago, Alfeo pexënato. Itsanë Simón, celotenë.

¹⁶ Itsanë Judas, Santiago pejuyapijinë. Itsanë Judas Iscariote. Bajaraponë bexëjavabelia Jesús canajetsijitsiatsi pijavajabitsaë pecobeyabelia pebeyaxuabinexatsi.

Pacuenia Jesús jivi ayaibitsaëtoxaneto livaisi tsipaeba yabara pelivaisi
(Mt 4.23-25)

¹⁷ Jesús baja, pijajivi ayaibitsaëtoxaneto yajava, runaica petsutojumavetsica. Nexata eputua petsutoyenepanajavata, itsajota ira namatajëpa, Jesús yajavanuca pijajivi ayaibitsaëtoxaneto. Bajarajota nexata jivi nacaetuata ayaibitsaëtoxaneto. Bajarapamonae Judea nacuapijivi, itsamonae Jerusalén tomarapijivi, itsamonae Tiro tomarapijivi, itsamonae Sidón tomarapijivi. Tiro tomarabeje Sidón tomarabeje, manuameneitapata ecabeje. Daxita bajarapatomaranëpijivi nacaetuata pejumetaenexa Jesús petsipaebilivaisi. Bajarapamonae patanua Jesús pejamatejemayaexanaenexa piavitanejavavecua.

¹⁸ Bajarapamonaeyajuvënëvi itsajamatabëcuene tsabiabi dovathi pejamatabëcueneta. Bajarapamonaenua Jesús jamatejemayaexana.

¹⁹ Daxita pamonae bajarajota nacaetuata, Jesús picani jamatabëjayabatsi. Tsipaji Jesús daxitajivi piavitanejavavecua jamatejemayaexanapona pecajëpaejamatabëcuenetatsi.

Pacuenia Jesús pijajivi tsipaeba Jesús pijajivi pejamatabëcuenebarëyajavanexa, apo pejamatabëcuenebarëyajavanexanua, yabara pelivaisi
(Mt 5.1-12)

²⁰ Jesús pijajivi naëcota asaëya. Jumaitsi bajarapamonaejavabelia:

—Panajamatabëcuene copabame baja Diosojavabelia paneponaenexa Dioso pijatomarabetsia. Bajaraxuata paxamë bepanejamatabëcuenejiovivimi panijaneconi yabara, aeconoxae baja pajamatabëcuenebarëyamë Diosojavabelia.

²¹ Pajitsipame Dioso pijacuene. Pajamatabëcuenebarëyamë baja. Tsipaji Dioso athëbëtsia pacarajutsiana daxitacuene xua panamatavenoname.

‘Paneyanuevimi pibisiacuene paneexanaeconi yabara, pacavecuaajibiaexana baja bajarapaneconi. Bajaraxuata itsamatacabi pajamatabëcuenebarëyamë tsanë.

²² ‘Xanë, Daxitajivi Pematapijinënë, patajajivixamë, itsa pacaitoya tsane jivi, itsiata pasivajamatabëcuenebarëyamë tsane. Bajarapamonae pacanavecuaitavetsi ata tsane, itsiata pasivajamatabëcuenebarëyamë tsane. Pibisiacuena pacabijatae ata tsane, pibisiacuena pacabaracuaicuajai ata tsane, itsiata pasivajamatabëcuenebarëyamë tsane.

23 Bajarapacuenia pacaexanae ata tsane, itsiata pasivajamatabëcuenebarëyamë tsane. Tshipaji raja Dioso athëbëtatsia pacarajutsiana bitso pexaniacuene jivi papecaitojajamatabëcuene. Pamonaë pacaitoya tsane, bajarapamonaë pijasalinaivimi bajayata itoya Diosojumepaëbivimi profetavi. Nexata bajarapamonaë pijasalinaivimi bajayata bejiobiaexanapona Diosojumepaëbivimi profetavi. Bajarapamonaë aeconoxae ata pijasalinaivimi cuenejëpavanapa. Bajaraxuata paxamë ata icatsia bajarapamonaë pacaitoya tsane pijasalinaivimi pecuenejëpavanapaxae.

24 'Daxitacuene mapanacuata panexainaevi, Dioso bitso ayaicuenia pacabejiobiaexanaena. Tshipaji pacabarëyamë tsavanapae ëpanexainaejava mapanacuataje.

25 'Bitso bepajamatabëcuenejibimë tsane daxitacuene mapanacuata panenatojitsipaëcuene panexainaevi. Pasivajamatabëcuenebarëyamë picani tsavanapae panexainaejava. Itsiata baitsi jane itsamatacabi itsa patëpaename, panetëpaecujinae panajamatabëxainaname ayaicuenia.

'Bepajamatabëcuenejibimë tsane panejëajëajaitsabiabivi sivabarëyaya mapanacuapijicueneje. Paneasaëtsavanapaeepato abaxë mapanacuataje panesivajamatabëcuenebarëya tsabiabixae bajarapacueni, panetëpaecujinae bitso payanueni pibisiacuene paneexanaeneconi.

26 'Mapanacuapijivi pexaniacuena pacabaracuaicuajai tsabiabi saicayacuenia Dioso pejumelivaisivecua panetsipaebabiabixae. Itsiata baitsi jane pamatacabi Dioso pacananeconitsiaexanaena, bitso bepajamatabëcuenejibimë tsane. Tshipaji pacuenejëpame bajayata pamonaemi jinavanapa. Bajarapamonaemi bajayata jivi tsipaebabiaba saicayacuenia Dioso pejumelivaisivecua. Nexata bajarapamonaemi pexaniacuena baracuaicuajaitsi tsabiabi mapanacuapijivije, jai Jesús pijajivi ayaibitsaëtoxanetojavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi

(Mt 5.38-48; 7.12)

27 Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pacatsipaëbijitsiatsi icatsia patanenamuxunaevetsivimë. Pasivamëre papecaitojavi ata. Pexaniacuene patoexanare pamonaë pacaitoya.

28 Payavenonare pamonaë pacabijatane pibisiacuena. Pamonaë pacabaracuaicuajai pibisiacuena, patovajëre Diosojavabelia peyavenonaenexatsi.

29 Itsajivi itsa pacaitabarapacabiaxuaba anaeya, nexata icatsia itsanenia ata patonaitabaracaevere papecaitarapacabiaxuabinexa. Itsajivi itsa pacayacajërëta panijacamisajumavelia panenaxatatsijava, nexata patocopare panijacamisa ata papecayacajërëtsinexa.

30 Pajivi itsacuenejavayo amoneya pacavajëta, parajure. Itsajivi itsa pacayacajërëta itsacuenejavayo, pëtsa payanijobame papecatocanavitsinexa.

31 Xua pexaniacuene, paxamë pajitsipame itsamonaë papecatoexanaenexa, copiaya paxamë bajarapapexaniacuene patoexanare bajarapamonaëjavabelia, jai Jesús pijajivi ayaibitsaëtoxanetojavabelia.

32 Icatsia Jesús jumaitsi pijajivijavabelia:

—Itsa pasivamë tsipae ëpapecaasivivi, nexata pexaniacuene apo paxainaemë tsipae Diosojavabelia. Tshipaji pijajimatabëcuenebejevi ata, pamonaë asivatsi, banamataenetsianasiva.

33 Pexaniacuene itsa patoexanaejitsipame pexaniacuene ëpapecatoexanaevijavabelia, nexata apo paxainaemë tsipae pexaniacuene Diosojavabelia. Tshipaji piamatabëcuenebejevi ata, pexaniacuene batoexana penajamatabëcuenejëpaevijavabelia.

34 Itsa patsicopatsipame ëpanejamatabëcuene yapëtaevijavabelia baja, papecatocanaviatsinexa pacuenia patsicopatame, nexata apo paxainaemë tsipae pexaniacuene Diosojavabelia. Tshipaji piamatabëcuenebejevi ata, batsicopata penajamatabëcuenejëpaevijavabelia, pamonaë jamatabëcueneyapëtane baja petocanaviatsinexatsi.

35 Nexata pasivamëre panijavajabitsäe ata. Bajarapamonaëjavabelia pexaniacuene patoexanare. Bajarapamonaë patsicopare panajamatabëxainaenejevamë papecatocanaviatsinexa panetsicopatsicuenia. Bajarapacuenia bitso paxainaename pexaniacuene Diosojavabelia papecarajutsinexa athëbëtatsia. Bajarapacuenia itsa paexananapanaename, Dioso, athëbëtatsia peecaenë, pexicuenia pacaexanaena. Tshipaji Dioso pitaxutotsoniataenë piamatabëcuenebejevi ata. Itsamonae Dioso yavenonae atatsi, itsiata apo canaëjëtsi Dioso peyavenonaejavatsi. Bajarapamonaë apo canaëjëtsi ata Dioso peyavenonaejavatsi, itsiata tsiteca Dioso itaxutotsoniataeyabiaba.

36 Pacuenia Dioso daxitajivi itaxutotsoniataeyabiaba, bajarapacuenia paxamë ata itsamonae ata paitaxutotsoniataename, jai Jesús pijajivi ayaibitsäetoxanetojavabelia.

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonaë ata Dioso itaxutotsoniatanetsi, yabara pelivaisi (Mt 7.1-5)

37 Icatsia Jesús jumaitsi pijajivi ayaibitsäetoxanetojavabelia petsutoyenepanajavata:

—Pëtsa panataneme pepacuene bepeneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsipibisiacuene pexanaevi, Dioso bitso ayaiacuenia naneconitsiaexanaenatsi,” pajamë pëtsa. Nexata paxamë ata juya bajarapacuenia itsamonae apo pacabaracuaicuaijai tsane pibisiacuene paneexanaejava yabara. Itsamonae pibisiacuene pacaexanae ata, pajamatabëcuenecaevare. Pabarajamatabëcuenexanepanarenua. Nexata pijinia Dioso pitabarata pibisiacuene paneexanaejava Dioso jamatabëcueneceaviana. Pacabarajamatabëcuenexanepanaenanua.

38 Parajutaponare itsamonaejavabelia penamatavenonaejavaxi. Nexata juya paxamë Dioso pacarajutaponaena pacuenia jitsipa papecarajutsinexa. Pacarajutsiana xuavajëto itsamonae parajutame matatoxenetsia, jai Jesús daxitajivijavabelia petsutoyenepanajavata.

39 Jesús icatsia comparacióncuenia tsipaeba bajarapamonaëjavabelia malpalivaisije:

—Ponë bitso itaxutotsëcëna, apo caëjëpaetsi pematacaponaenexa itsanë, ponë pijinia bitso itaxutotsëcëna. Itsa matacaponaëjitsipa, nexata najua-jopaejitsiparecabeje bajaraponëbeje caemëthëxanetojavareca.

40 Itsajivi pijinia itsa nacujaruba, yapëtae ata baja penacujarubijava, apo jamatabëcuenematatoxenetsi pecujarubinëtsi. Itsa baja penacujarubijivi vereta xaniavaetsia penacujarubijava, nexata saya najamatabëcuenejëpabeje pecujarubinëtsibeje, jai Jesús pijajivijavabelia.

41 Jesús pijajiviyajuvënëvi pepacuene bepianeconijibivi natane. Nexata itsa cujirutane itsamonae itsacuenejavayo pexanaejava, jumai tsabiabi:

“Mapitsicuene pexanaevi Dioso bitso ayaicuenia naneconitsiaexanaenatsi,” jai tsabiabi. Nexata bajarapacuenia pejumaittsabiabixae, Jesús pijajivi piurainexa jumaitsi mapacueniaje:

—Pëtsa paxamë pepacuene bepeneconijibivi nataeya pamuxujiobame itsajivi pijaneconi yabara. Tsipaji raja apo payapëtaemë paxamë ata pijinia paneconivajëto paxainame.

⁴² Nexata paxamë ata ayaineconixaneto itsa paxainame, nexata itsanëjavabelia apo bepajumaitsimë: “Tajabananë, papibisiacuene exaname, copare,” apo bepajamë. Yamaxëitojorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava penavecuacopatsinexa, jai Jesús pijajivijavabelia.

Pacuenia peubinaenë itsa nacuita, nayapëthane pavirianaecuene yabara pelivaisi

(Mt 7.17-20; 12.34-35)

⁴³ Icatsia Jesús jumaitsi pijajivi ayaibitsaëtoxanetojavabelia petsu-toyeneapanajavata:

—Pexaniavirianaenë itsa ubatsi, nacuita pijinia pexaniacuai. Apo nacuita pibisiacuai. Ponaë pijinia pibisianaë, apo nacuita pexaniacuai.

⁴⁴ Caevirianaë canacujitsia yapëtanetsi itsa nacuita. Higovëneucuito apo paucutsimë cucunanaeta. Uvaru pijinia apo paucutsimë saya pejuvënëbotota.

⁴⁵ Bajara pijinia itsi jivi ata. Pexaniajamatabëcuenenë pexaniacuene yabara cuaicuaijai. Tsipaji pexaniajamatabëcuene xaina pejamatabëëthëto. Pibisiajamatabëcuenenë pijinia pibisiacuene yabara cuaicuaijai. Tsipaji pibisiajamatabëcuene najamatabëxaina pejamatabëëthëto. Nexata pacuene yabara pebi pecuaibovojotota cuaicuaijai, bajarapacuenie pitsapa pejamatabëëthëtojavavetsina, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

(Mt 7.24-27)

⁴⁶ Icatsia Jesús jumaitsi pijajivi ayaibitsaëtoxanetojavabelia petsu-toyeneapanajavata:

—¿Detsa xuajitsia: “Tajatuxanenë,” panejamë tsabiabi ata, itsiata apo panejumecovënëtsimë patacaitorobicuenia?

⁴⁷⁻⁴⁸ Pajivi xanëjavabereña pata tanenamuxunaevetsinexa, tanejumecovënëtsinexana, bajarapajivi apo nacueratsi tsane. Bajarapajivi piatajairata bo bepexanaenë tsane. Bajarapajivi yabara pacatsipaebianatsi. Bo pexanaenënexa, peyapëtaexae itsajota pijabo exanaejitsia pebubutsijavanexa, nexata naesituru atajaya xaniavaetsia mëthëca piatajairata. Nexata pijabo toyabubutsi ata, petojopaeyanivatsi. Bajaraxuacujinae bo baja vereteta. Itsa baba mene avajubuatsica, pijabo toyabubutatsi. Mera asaëtsica bojavabetsica. Itsiata pijabo apo tonanequetsitsi. Tsipaji naesituru xaniavaetsia mëthëca piatajairata. Nexata bajaraponë apo nacueratsi bo pexanaejava.

⁴⁹ Pajivi nejumetae ata tsane tatsipaebilivaisi, itsiata itsa apo nejumecovënëtsi tsane tatsipaebilivaisi, nacueratsiana. Bajarapajivi tajetabota bo bepexanaenë tsane. Ponë tajetabota pijabo exaneta, yapëtae ata emarapae

pecopiapatsijavanexa, bajaraponë nacuerata bo pexanaejava. Tsipaji bo peveretetsicujinae, mene avajubuatsica. Nexata pijabo toyabubutatsi. Bo nexata jopaica. Pepacuene baja nexata abeje, jai Jesús pijajivijavabelia.

7

Pacuenia vajabitsaë pijacapitán pijabota petonacuenebaponaponaenëtsi, Jesús tojamatejemayaexana yabara pelivaisi (Mt 8.5-13)

¹ Jesús baja itsa najumevereta pijajivi ayaibitsaëtoxaneto livaisi petsipaebi-
java petsutoyenepanajavata, pona baja Jesús Capernaum tomarabelia.

² Capernaum tomarata ponapona Romano nacuapijinë, vajabitsaë
pijacapitán. Bajaraponë pijajivitonë, bitso piasivanë, toavitanetsi.
Totëpaejitsiatsi baja.

³ Bajaraponë capitán vënëlivaisitanetsi Jesús pejamatejemayaexanapona-
java piavitanevi. Nexata capitán jumaitsi judíovi pijaancianovijavabelia:

—Panetøjunaremelia Jesús. Pabarëpatsiaremena tajaboyaberena tanetøj-
amatejemayaexanaenexa tajajivitonë, jai capitán judíovi pijaancianovijav-
abelia.

⁴ Nexata bajarapamonae pona Jesúsjavabelia. Itsa pata Jesúsjavabelia, pini-
jicuenia junata. Jumaitsi Jesúsjavabelia:

—Bajaraponë capitán bitso pexaniajamatabëcuenenë. Nexata tojamateje-
mayaexanaename pijajivitonë.

⁵ Tsipaji raja bajaraponë nacaasiva vaxaitsi judíovitsi. Matamota cajena pi-
japalatata vajanacatoexanetsinexa vajanacaetuatabibonexa, jai judíovi
pijaancianovi Jesúsjavabelia.

⁶ Nexata Jesús nalia bajarapamonae pepëta. Itsa baja imoxoyotanaje-
tarubena capitán pijabo, nexata capitán icatsia peyapëtaevitsi itoroba Jesús
pemataenenaenexatsi. Capitán peyapëtaevitsi itoroba Jesúsjavabelia peju-
maitsinexa mapacueniaje:

—Petuxanenë, pëtsa paremena tajaboyaberena. Apo caquenetsiataejitsi-
paetsi. Beveliajamatabëcuenenënë raja saya xanë xamëvecua. Nexata apo
xanepanae tsipae nenajonejava tajaboyaberena.

⁷ Apo nejamatabëcuenecaëjëpaenua taponaejava xamëjavabelia ata. Saya
bajaraverena itorobare ënijume. Nexata tajajivitonë netojamatejema tsane.

⁸ Xanë ata xainajë taneitorobabiabivi taneitorobicuenia tajume-
covënëtabiabinexa. Xanë ata juya xainajë vajabitsaë, tajajivi, taitorobicuenia
tanetoexanabiabinexa. Nexata itsa itorobajë caenë vajabitsaëne
peponaenexa, bajaraponë ponabiaba. Itsa junarenajë itsanë
vajabitsaëne pepatsinexa maberenaje, bajaraponë patabiabarena.
Itsa itorobajë tajajivitonë tanetoexanaenexa itsacuenjavayo, nexata
netoexanabiaba. Bajara pijinia pacuenia xamë ata nexanaenexa,
cacaëjëpa. Nexata saya bajaraverena ënijume itorobare saya ënijumeta
tajajivitonë tanetøjamatejemayaexanaenexamë, jai capitán mapacueniaje
petonajumeitorobijume Jesúsjavabelia.

⁹ Jesús itsa jumetane bajarapacuenia capitán petonajumeitorobijumetsi,
jamatabëcuenenabenajaca capitán petonajumeitorobijumetsi yabara. Nexata
napënëyorotaxuaba Jesús. Jumaitsi pepënanajetarubenaevitsijavabelia:

—Xaniajanë pacuenia pacatsipaebijitsiatsi. Caeto ata cajena Israel
nacuapijinë apo caxitajarabaxuabinë xanëjavaberena bitso tanesivanaja-
matabëcuenecopatsinë pacuenia mapacapitán nesivajamatabëcuenecopatsiaya
jumaitsiye, jai Jesús capitán yabara.

¹⁰ Nexata baja pamonae capitán itorobalia Jesús petsipaebinexatsi capitán penajumeitorobilivaisi, naviabarena baja capitán pijaboyaberena. Itsa baja pata boyaberena, caxitajaraba baja capitán pijajivitonë pejamatejemanë.

Pacuenia pamona pevecuatëpaevatsi pexënato Jesús toasäyæaxana, petëpaenëmi, yabara pelivaisi

¹¹ Jesús pona Naín tomarabelia. Nexata yanatatsi pijajivi, itsamonae yajava, ayaihitsaëttoxaneto.

¹² Itsa baja Jesús patanajetaruca Naín tomara imoxoyojavata, nexata camataenensatsi petëpaenë pecanajetarubenaevi. Bajarapamona petëpaenë tomaravelia capitsapa pemëthëtsinexa tomarapënyëvabelia. Ponë tëpa, bajaraponëmi pamona pevecuatëpaevatsi pexënato, pepo cainë. Nexata pamona pevecuatëpaevatsi pexënato, petëpaenë, itsa caponaliatsi pemëthëtsinexatsi, tomaraverena jivi ayaihitsaëttoxaneto pënaponatsi.

¹³ Nexata Jesús itsa tane bajarapova, tsitabejiobitsi bitso. Nexata Jesús jumaitsi bajarapovajavabelia:

—Matanueyabijitsipame, jai Jesús.

¹⁴ Nexata Jesús cujitabalia petëpaenë peyacajoniacanajetarubenaevi. Pecobeta jayata cajoni. Nexata petëpaenë peyacajoniacanajetarubenaevi, nubenaothopa. Nexata Jesús jumaitsi petëpaenëjavabelia:

—Pevjëato, xanë raja cajumaitsitsi. Namatacore, jai Jesús.

¹⁵ Nexata baja petëpaenëmi namatacota. Cuaicuaijai. Jesús baja tocanavita piasaënë penajavabelia.

¹⁶ Nexata daxita petaevitsi jamatabëcuenenabenajaca. Najumaitsi bajarapamonae:

—Dioso bitso ayaijamatabëcuenenë. Pinijijamatabëcuene pexainaenë, profeta, nacatsitanajamatabëcueneitajëta. Dioso pinijicueene pexanaejava ata nacatsitajëta vajataenexa, najai bajarapamonae Jesús yabara.

¹⁷ Daxita Judea nacupijivi, imoxoyo nacuanëjava ata pejinavanapevi, Jesús vënëlivaisitanetsi xua exana.

Pacuenia Juan jivibautisabinë itoroba pijajivitonëbeje Jesúsjavabelia yabara pelivaisi

(Mt 11.2-19)

¹⁸ Juan jivibautisabinë naneconitsia ponapona penaneconitsivi pejebabi-abibota. Nexata pijajivi tsipaebatsi daxita Jesús pexanaponaejava yabara. Nexata Juan junata anijanëbeje pijajivitonëbeje pitorobinexa Jesúsjavabelia.

¹⁹ Juan pitorobivajënae pijajivitonëbeje, jumaitsi bajaraponëbejejavabelia:

—Pajumaitsimëbeje tsane Jesúsjavabelia: “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë athëbëvetsica Dioso pitorobinexatsicatsi jivi pecapanepaenexa?” jai raja Juan,” pajamëbeje tsane Jesúsjavabelia, jai Juan pijajivitonëbejejavabelia.

²⁰ Nexata Juan pijajivitonëbeje itsa patabeje Jesúsjavabelia, Juan pijajivitonëbeje jumaitsibeje Jesúsjavabelia:

—Juan raja jivibautisabinë paneitorobabeje patacayanijobinexabeje. “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsijavanexatsica?” jai raja Juan, jaibeje jane baja Jesúsjavabelia.

²¹ Nexata bajaraponëbeje pitabëta Jesús jamatejemayaexanapona ayabit-saëtoxaneto piavitanevi. Dovathi peyajavajinavanapaevi ata vecuacapitsapa dovathi. Itaxutoxanepanaeyaexananua pamonaë bitso itaxutotsëcëna.

²² Nexata Jesús jumaitsi Juan pijajivitonëbejejavabelia:

–Paponarebeje baja. Patsipaebianamebeje Juanjavabelia pacuenia baja patanemebeje taexanaponaëjava. Patsipaebianamebejenua pacuenia baja pajumetanemebeje tatsipaebilivaisi jivijavabelia. Apo petævimi ata itaxutoxaniavætaaponajë xaniavaetsia petæenexa. Petabusipacuen-abivitsinua daxita jinavanapaeyaexanaponajë. Bajayajebi bitso peper-abëtsabanaevinua vecuajibiaexanaponajë baja. Bitso pemuxusipanaev-inua jumetaeyaexanaponajë baja xaniavaetsia pejumetaenexa. Petëpævimi ata icatsia asaëyaexanaponajë. Pexanialivaisinua pecapanepaelivaisinex-atsi pibisiacuene pexanaeconimivecua, tsipaebaponajë bepejibivijavabelia. Daxita bajaraxua taexanaponaëjava patanetaejavamëbeje, patsipaebianamebeje Juanjavabelia.

²³ Pajumaitsimëbejenua tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca nejumecovënëta xanë Dioso pexënatocuenenë,’ jai raja Jesús,” pajamëbeje tsane Juanjavabelia, jai Jesús Juan pijajivitonëbejejavabelia.

²⁴ Itsa baja Juan pijajivitonëbeje navitabeje, nexata bajaraponëbeje pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia:

–Itsa paponame petusato nacuyabelia pamatacabi Juan ponapona petusato nacuata, ¿detsa pitsicuene pajamatabënaponaremelia panætaenexa bajarajotalia? ¿Paponaremelia tsaja saya panætaenexa musuli penajëabijava jovibota?

²⁵ Itsa apo paponamëlia panætaenexa musuli penajëabijava jovibota, ¿detsa nexata pitsicuene panætaenexa paponaremelia? ¿Paponaremelia tsaja saya panætaenexa naitabëtsiaya pexaniajava penaxatatsinë? Paxamë rabaja payapëtaneme mapacueneje. Pamonaë naitabëtsiaya pexaniajava naxatababiaba, pamonaë ata nabanebiaba pexanianabanijavanë, bajaraponaë jinavanapa nacuanë pevetsivi pijabonëjava.

²⁶ ¿Detsa nexata xua pajamatabënaponaremelia panætaenexa petusato nacuyabelia? Paponaremelia raja panætaenexa Diosojumepæbinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja pepo profetanë, Diosojumepæbinë, pataneme. Nexata saya bevelia profetanë apo pataemë.

²⁷ Juan pexanaejavanexa, bajayata tajëvelia Dioso pejumelivaisibaxutota vajunupaëba. Dioso tanejumaitsijava ata xanëjavaberena, Dioso pejumelivaisibaxutota jumaitsi mapacuenaie:

Itorobianajë nevajënaeyabelia tanejumelivaisipaëbinënexa jivi pecatsivajënaë najamatabëcuenexaniavaetsinexa, jai bajayata Dioso pejumelivaisibaxutota athëbëvetsica tapatsivajënaeysica Juan tanelivaisi paëbanajetaruaejavanexa yabara.

²⁸ Juan ayajamatabëcuenenë mapanacuataje. Nexata bajayata Juan pevajënaeya paprofetavimi jinavanapa, itsanë ata Juan apo jamatabëcuenematatoxenetsiatsi. Itsiata baiitsi jane pajivi beveliajamatabëcuenejivi ata, itsa najamatabëcopata baja Diosojavabelia pijatuxanenë pexanaenexa, bajarapajivi juya Dioso ayajamatabëcuenejivi exanaenatsi Juan matatoxenetsia, jai Jesús Juan jivibautisabinë yabara.

²⁹ Juan vënëlvivaisitanetsi daxitajivi. Impuestomatamo pematamoyanijobivi ata gobierno pejamatabëcuene, vënëlvivaisitanetsi. Bajarapamonae jume-covënëta palivaisi Dioso najumecopata Juanjavabelia. Nexata Juan bautisaba bajarapamonae.

³⁰ Itsiata fariseovi, judïovi pecujarubivina, namuxujemata bajarapalivaisi. Nexata picani pacuenia Dioso tojitsipatsi bajarapamonae pexanaenexa, apo exanae. Nexata Juan apo bautisabi bajarapamonae.

³¹ Jesús icatsia jumaitsi jivijavabelia:

—ÿDetsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje:

³² “Bajarapamonae abaxë saya bepejevaxijivixi, pajivixi tomara tuatu-ajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. Pevavajajavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëanecatsi picani panemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonaë aeconoxae jinavanapa mapanacuataje,” janë meta tsane paxamë yabara.

³³ Juan jivibautisabinë Dioso pitorobilivaisi jivi tsipaebanjetaruca. Pexaejava itsajavata apo xaeyabiabi pamatacabibejë Diosojavabelia vajëta. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya.

³⁴ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayajava xaeyabiaba. Ayaira matavëjëa apaeyabiabanua piaitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonaë ata piagamatabëcuenebejevi, barënajamatabëcuenejëpa,” pajamë tsabiabi xanë yabara.

³⁵ Itsiata baitsi jane itsamonae xaniavaetsia yapëtaena paxanëbeje Juanbeje Dioso pejamatabëcueneta bitso pataneyapëtaeyaexanaejavabeje. Nexata daxita bajarapamonae yapëtaena pacuenia Dioso paneyapëtaeyaexanabeje pepacuene pepo pexaniaajamatabëcuene, jai Jesús mapacueniaje jivijavabelia.

Pacuenia Jesús exanatsi Simón pijabota yabara pelivaisi

³⁶ Fariseonë, Simónvënë, pijabota Jesús penanabaninexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabaninexa.

³⁷ Bajarapatomarata ponapona petiriva, pibisiacuene pexanabiabiva pevitota palata pepsinexa. Bajarapova itsa jumetane penanabanijavanexa Jesús Simón pijabota, nexata bajarapova capata alabastrovënë ibotota pexanaebotellabë. Pevënëcaebë pexaniapetuxujuviaceitera. Bajarapova capata bajarapaaceitera Jesús petsitaxuepacaenexa.

³⁸ Nexata bajarapova Jesús petaxusalibënena, pematatababëta nucajunua petsitaxuepacaenexa jane baja bajarapaaceitera. Nexata saya bajarajota itacarajeta bajarapova nua. Tshipaji pibisiacuene pexanabiabineconi bitso yanajamatabëxaina. Nexata bajarapova pitaxutobarëmene othopa Jesús

petaxujavabereca. Nexata bajarapova pematnata taxuiquica. Bajaraxu-
acujinae yaiyataeya taxutsutsune. Tsitaxuepaca jane baja petuxujuviaceit-
era.

³⁹ Nexata Simón, ponë Jesús junatatsi, itsa tane pacuenia petiriva exana
Jesúsjavabelia, nexata Simón jamatabëjumaitsi mapacueniaje:

—Itsa peneta pepacuenie maponë Jesús, pepo profetanë tsipaeje, nexata
yapëtaejitsipa pitsijamatabëcueneva taxujayabatsi. Yapëtaejitsipa bajarapova
pibisiacuene pexanabiabivacuene. Nexata apo tocopatsi tsipae petaxu-
jayabinexatsi, jamatabëjai Simón Jesús yabara.

⁴⁰ Nexata Jesús jumaitsi Simónjavabelia:

—Simón, xainajë livaisiyo tacatsipaebinexa, jai Jesús.

Simón nexata jumaitsi:

—Jesús, netsipaebare, jai.

⁴¹ Nexata Jesús jumaitsi Simónjavabelia comparacióncuenia:

—Palata petsicopababiabinë amoneyabatsi anijanëbeje. Caenë amoneya-
batsi quinientos padenariobeje. Itsanë amoneyabatsi saya cincuenta
padenariobeje.

⁴² Nexata bajaraponëbeje apo xainabeje juya petocanaviatsinexabeje
petsicopatsimatamotsibeje. Nexata palata petsicopatsinë jumaitsi baja-
raponëbejejavabelia: “Iquinajë baja bajaraxuami pataniamoneyabijavamëbeje.
Naxuabi baja jema,” jai. ¿Detsa nexata ponë bitso sivajamatabëcuenearëya
palata petsicopatsinëtsibejejavabelia? jai Jesús Simónjavabelia.

⁴³ Simón nexata jumaitsi Jesúsjavabelia:

—Ponë meta picani ayaijava amoneyaba, sivajamatabëcuenearëya palata
petsicopatsinëtsijavabelia, jai Simón.

Nexata Jesús jumaitsi:

—Xaniajamë rabaja, jai Jesús Simónjavabelia.

⁴⁴ Jesús napënëyorota petirivajavabelia. Nexata jumaitsi Simónjavabelia:

—Simón, ¿taneme tsabaja pacuenia exana xanëjavaberena mapovaje? Xanë
junuajë nijaboyaberena. Itsiata yaiyataeya xaniavaetsia apo necopiapit-
simë. Apo nerajutsimë mera ata tanataxuquiatsinexa. Mapovaje netax-
uquiata baja pitaxutobarëmeneta. Netaxuiquicanua pematnata.

⁴⁵ Xamë nijabota patsi atanë, apo nitabaratsutsunimë tanecopiapitsinex-
amë xaniavaetsia. Mapovaje tapatsicujinae apo copatsi cajena yaiyataeya
tanetaxutsutsuneponaejava.

⁴⁶ Xamë xaniavaetsia tanecopiapitsinexamë, apo netsimataepanaemë
aceitera. Mapovaje netsitaxuepaca pexaniapetuxujuviaceitera.

⁴⁷ Nexata catsipaebatsi neyapëtaenexa mapacuenieje. Mapovaje pinijicue-
nia nesivajamatabëcuenearëya. Tsipaji ayaineconi ata pibisiacuene pex-
anaeconimi, vecuaajibiaexanajë. Pajivi saya tsiquirineconiyo vecuaajib-
iaexanajë, pibisiacuene pexanaeconi, nayapëtane. Tsipaji saya bajarapa-
jivi tsiquirijavayo nesivajamatabëcuenearëya, jai Jesús Simónjavabelia.

⁴⁸ Nexata Jesús jumaitsi petirivajavabelia:

—Pibisiacuene rabaja nexanaeconimi cavecuaajibiaexanatsi, jai Jesús.

⁴⁹ Itsamonae ata, pamonaë Simón junata penanabaninexa Simón pijabota,
naena mesa muxuneneta. Nexata bajarapamonae najumai tsenae Jesús
yabara:

—¿Detsa meta maponëje? Jamatabëcuenenavëxaniabiaya natane bepeja-
matabëcuenecaëjipænëtsi jivi pibisiacuene pexanaeconi pevecuaajibiaex-
anaenexa, najai tsenae bajarapamonae.

⁵⁰ Nexata Jesús jumaitsi petirivajavabelia:

–Dioso pecacapanepaeva tsané pibisiacuene nexanaeneconimivecua. Tsiপাজি নেসিবানাজামাতাবেঁচুেনেচোপাতামে খান্‌এজাবেরেনা. জামতেজমা বাজা পোনাৰে. চাবেচুাএজিৰাএখানতসি ৰাজা পিৰিসিঅুেনে নেক্সানােনেকনিমি, জাই জেসুস পেতিৰিৱাজাবেলিয়া.

8

Pacuenia Jesús, pijajivi, pebijivi, petirivinuia, yajavanajetaruca yabara pelivaisi

¹ Simón pijabota Jesús penanabanicujinae, najetaruca pinijitomaranëjava, tsiquiritomaxijava ata. Tsiপােবানাজেতাৰুচা পাকুেনিয়া ডিওসো পিাজিৱি এভে-সিইত্সিয়া. জেসুস, পিাজিৱি ডোচে পোনেঁবেজে, অপোঁতলেৱি, ৱাজাৱানাজেতাৰুচা.

² Jesús yajavanajetaruca petirivinuia, papetiriavi dovathi vecuacapsapa yajuvënëvi. Papatiriavi ata piavitanejavavecua Jesús jamatejemaya exana yajuvënëvi, Jesús yajavanajetaruca. Bajaraপাপেতিৰিৱিৱ্যাজুৱেনেৱা, চােৱা পেৱেনে ৱাৰিয়া, ৱাগ্দালা তোৱাৰপিজিৱা. ৰাজাৰাপোৱা জেসুস ৱেচুঅাচাপিচাপা সিতে পোনেঁবেজে দোৱাথিৱি. ৰাজাৰাপাদোৱাথিৱি জেসুস পেৱেচুঅাচাপিচাপােচুজিনাে, ৱাৰিয়া পেনাপোনাতি.

³ Itsava pevenë Juana, Cuzavënënë pijava. Bajaraপোনেঁ ৱুজাৱেনেঁ, নাকুঅেৱেভসিনেঁ ৱেৰোদে পিাজিৱিটোনেঁ. Itsava পেৱেনেঁ ৱুসানা. ৰাজাৰাপেতিৰি-ৱি পেমাতসেনেঁ, itsাপেতিৰিৱি, অ্যািৰিচােঁ, ৱাজাৱানাজেতাৰুচা জেসুস. ৰাজাৰা-পাপেতিৰিৱি পেখানােপালাতয়াজুৱেনেঁৱা, ৰাজুতা জেসুসজাবেলিয়া. Nexata xuaxi Jesús pijajivi barënamatavenona pebarëcomuatsinexa bajarapapalatata.

Pacuenia Jesús jivi livaisi tsipaeba peubinë pelivaisicuenia yabara pelivaisi (Mt 13.1-9; Mr 4.1-9)

⁴ Jivi naropoba tomanëjavaverena. Pata Jesúsjavaberena petaenexatsi. Itsa baja ayaibitsaëtoxaneto nacaetuata Jesúsjavaberena, nexata Jesús livaisi tsipaeba peubinë pelivaisicuenia. Jesús jumaitsi mapacueniaje:

⁵ –Peubinë pona pabiabelia peubinexa. Nexata itsa pata pabita, peubixu pexucayabajabarabicuenia ubanajetaruca. Nexata itsaxu othopa pabi tuatuajëjava penajetarucaenamutojumata. Bajarapaxu jivi taxunanonoba. Nexata bajarapaxumi juvinejeva barsatsui xane.

⁶ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu juvi ata, tsaquenapona. Tsiপাজি ৱা ত্বেৱা.

⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënënatsi peubijavami.

⁸ Itsaxu pijinia othopa pexaniaairata. Bajarapaxu itsa juva, vitsaba. Nexata xaniavaetsia nacuaia. Itsabotonë capsapa cien paxutoyobeje ata, jai Jesús jivi ayaibitsaëtoxanetojavabelia.

Itsa Jesús tsipaeba bajarapalivaisi, pinijijumeta jumaitsi:

–Pajivi jamatabëjumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

Pacuenia yabara Jesús jivijavabelia livaisi tsipaeba ëcomparacióncuenia yabara pelivaisi

(Mt 13.10-17; Mr 4.10-12)

⁹ Nexata Jesús pijajivi yanijobatsi. Jesús pijajivi jumaitsi Jesúsjavabelia:

–Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai Jesús pijajivi Jesúsjavabelia.

¹⁰ Jesús nexata jumaitsi pijajivijavabelia:

–Paxamē rabaja xaniavaetsia Dioso pacayapētaeayaexana Dioso papijajivimē papecaevetsijava. Bajarapacuene abaxē daxitajivi apo yapētae. Bajaraxuata bajarapamonae itsa tsipaebajē livaisi, ēcomparacióncuenia tsi-paebaponajē. Nexata bajarapamonae tae ata Dioso pesaēta piniñicue-ne taexanaejava, itsiata apo yapētae pajamatabēcuene yabara exanajē piniñicue-ne taexanaejava. Namuxunaevetsi ata tatsipaebilivaisi, itsiata apo jumeyapētae pajamatabēcuene xaina tatsipaebilivaisi, jai Jesús pijajivijavabelia.

Pacuenia Jesús yapētaeayaexana pijajivi pajamatabēcuene xaina palivaisi tsi-paeba peubinē pelivaisicuenia yabara pelivaisi
(Mt 13.18-23; Mr 4.13-20)

¹¹ Icatsia Jesús jumaitsi pijajivijavabelia:

–Mara pajamatabēcuenelivaisi xainaje, palivaisi pacatsipaebatsi pabita peubinē pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi jivi pejamatabēthēta. Dioso pitorobilivaisi jivi itsa tsipaebatsi, tsijamatabēubatsi Dioso pitorobilivaisi.

¹² Nexata pacuenia itsi pabita peubixu, paxu othopa pabi tuatujajējava penajetarucaenamutojumata, bajara tsijamatabēcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabēubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabējuvinejevatsi, petsijamatabēubilivaisitsi dovathi baja vecuapitatsi bajarapalivaisimi. Vecuapitatsi pevājēnaeyabelia Dioso pejumecovēñētsiyaniva, Dioso pecapanepaeyanivatsi pibisiacuene pexanaeneconivecua.

¹³ Pacuenia pijinia itsi paxu othopa ibopananējumata, itsajota bitso ira apo aitayaē, bajara tsijamatabēcueneitsitsi itsamonae Dioso pitorobilivaisi. Bajarapamonae Dioso pitorobilivaisi jumetane. Nexata picani bajarapalivaisi barēyaya jumecovēñēta. Itsiata baitsi jane pacuenia irabereca apo atabunepiāreca paxu othopa ibopananējumata, nexata nabijiana, bajara tsijamatabēcueneitsitsi bajarapamonae Dioso pitorobilivaisi. Tsi-paji saya caeepatoyo jumecovēñēta bajarapalivaisi. Nexata paepatota dovathi jamatabēcueneējētatsi, copaba baja bajarapalivaisi pejumecovēñētsijavami.

¹⁴ Pacuenia pijinia paxu othopa xanēebacabomijavata, itsa juva, bitso matacēñēnatsi xanēebotonē, bajara tsijamatabēcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabēcueneenatsi mapanacuapijicue-ne yabaraje. Tsi-paji najamatabēxaina ayaijjava palata pexainaenexa. Najamatabēxainanua pexanaenexa pacuene mapanacuapijivi exana saya jema pebarēyanexa. Bajaraxuata Dioso pitorobilivaisi apo tovitsabitsi pejamatabēthēta. Nexata pacuenia itsi pabita piacuajibibotonē, bajara itsi bajarapamonae. Tsi-paji Dioso xaniavaetsia apo tojinavanapae.

¹⁵ Pacuenia pijinia itsi paxu othopa pexaniairata, bajara tsijamatabēcueneitsitsi itsamonae Dioso pitorobilivaisi. Bajarapamonae ajamatabēcuenexuirajibi. Ēpexaniajamatabēcuene najamatabēxaina. Casaē tsavanapae pevājēnaeyabelia Dioso pejumelivaisi pejumecovēñētsijava. Nexata Dioso pejumelivaisi tsijamatabēcuenevitsabaponatsi pevājēnaeyabelia. Tsi-paji exanavanapa Dioso pitorobicueniatsi, jai Jesús pijajivijavabelia

itsa tsipaeba peyapëtaeyaxanaenexa palivaisi jivijavabelia tsipaeba pabita peubinë pelivaisicuenia.

Pacuenia Jesús pijajivijavabelia livaisi tsipaeba lámparabë pelivaisicuenia yabara pelivaisi

(Mr 4.21-25)

¹⁶ Icatsia Jesús jumaitsi pijajivijavabelia:

—Itsajivi ata lámparabë pitanojotsicujinae, apo matacatetsi itsacuenaja-vata. Cama bëxëpanalia ata apo etsi. Biji rajane athëbëyo etsia jivi boyaberena pejonevi petsivajënaeitayotecaenexa.

¹⁷ Bajara pijinia itsi palivaisianë tsipaebaponajë comparacióncuenia dax-itajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bëxëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Panjumecanaëjère patacatsipaebilivaisi. Itsamonae ata itsa pacat-sipaebiana, bajarapamonae ata pajumecanaëjëtsianame papecatsipaebili-vaisi. Palivaisivajëto panejumecanaëjëtsianame, nexata bajarapalivaisi-vajëto panejumeyapëtaenae. Itsiata icatsia pematatsënëa bajarapitsilivaisi-vajëto Dioso pacayapëtaeyaxanaena. Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaxanaenatsi. Itsiata pajivi apo jitsipae pematatsënëa pe-jumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús pijajivijavabelia.

Pacuenia Jesús pejuyapijivi, pena yajava, nubena bojumavelia yabara peli-vaisi

(Mt 12.46-50; Mr 3.31-35)

¹⁹ Jesús pejuyapijivi, pena yajava, pata Jesúsjavaberena. Itsiata acuenebi bajarapamonae pimoxoyotsijava Jesús. Tshipaji bitso jivi ayaibitsaëto Jesús matatoyorotsia vënëcatsi.

²⁰ Nexata pamonae Jesús petsipaebilivaisi matatoyorotsia jumetaeyenatsi, jumaitsi Jesúsjavabelia:

—Patajatuxanenë, ena raja, nejuyapijivi yajava, nuca patapënëverena. Ba-jarapamonae pina jitsipa pecataejava, jai Jesúsjavabelia.

²¹ Nexata Jesús jumaitsi daxita bajarapamonaejavabelia:

—Pamonae jumetane Dioso pejumelivaisi, jumecovënëtanua pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

Pacuenia Jesús itaveta joviboxaneto, malataca yajava, piayaijavami yabara pelivaisi

(Mt 8.23-27; Mr 4.35-41)

²² Itsamatacabi Galilea nacuata Jesús, pijajivi yajava, runareca jera ënëabereca. Jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

²³ Itsa baja naropobalia, Jesús majitanuca. Nexata pinijijoviboxaneto jemata najetaruca. Malataca nexata bitso ayai. Nexata malataca jera ënëaberena mera epabajarabapona. Mera nexata vënëcapona jera ënëaberena. Bubunaejitsia baja bajarapamo. ²⁴ Nexata Jesús pemajitanucaenë pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! jai Jesús pijajivi.

Nexata Jesús pemajitanucaenëmi naëcotapuna. Pinijijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuaba.

²⁵ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús pijajivi itsa tane Jesús pitavetsijava jovibo, malataca yajava, Jesús pijajivi jamatabëcuenenajunaviaca bëpënëa. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Nexata jumecovënëtatsi! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia pebi, dovathivi peyajavaponaponaenë, Jesús vecuacapitsapa Gerasa nacuata yabara pelivaisi (Mt 8.28-34; Mr 5.1-20)

²⁶ Jesús pijajivi barëyaëta pucaxaneto itsapanabelia, Gerasa nacuyabelia. Gerasanacua boca puca itsapanaverena, Galileanacua pecanacujitsialia.

²⁷ Itsa Jesús jeravecua nonotajunaya, mataenenarenatsi bajarapanacuapijinë, dovathivi peyajavaponaponaenë. Bajaraponë bajayajebi baja jumasa ponaponabiaba. Pijabota apo ponapona. Jivimëthëanëjavata saya ponaponabiaba.

²⁸ Nexata bajaraponë itsa pata Jesúsjavaberena, pematabacabëta nucajunua Jesús pitabarata. Pinijijumeta aëjai.

—Jesús, Dioso athëbëtatsia peacaenë pexënatomë. ¿Detsa xua jaitame xanëjavaberena? Pexaniacue bitso cavajëtatsi. Nejamatabëcuenëbejiobitsipame, jai dovathivi peyajavaponaponaenë Jesúsjavabelia.

²⁹ Bajarapacuenia jumaitsi dovathivi peyajavaponaponaenë tsipaji Jesús jerajavavetsina penotajunaejavata, dovathivi peyajavaponaponaenë pemataenaejavatatsi, Jesús itaveta dovathivi. Jesús jumaitsi dovathivijavabelia mapacueniaje: “¡Dovathivi, bajaraponë baja pavecuapitsapare!” jai. Bajaraponë anijatonë dovathivi vaetababiabatsi. Jivi picani bajaraponë cadenamaëtonëta cobecëtabiabatsi. Yajavataxucëtabiabatsi cadenamaëtonëta xaniavaetsia picani peacaenëta. Itsiata baitsi dovathivi peyajavaponaponaenë ucubabiaba cadenamaëtonëmi. Dovathivi pejamatabëcueneta najetabajiravabiaba petusatuabelia.

³⁰ Nexata Jesús jumaitsi bajaraponëjavabelia:

—¿Detsa pavënëmë? jai Jesús.

Nexata bajaraponë navënëpaeba.

—Tavënë raja Legión, jai.

Bajarapacuenia navënëpaeba tsipaji dovathivi ayaiBITSaëtoXaneto tsijamatabëjinavanapatsi.

³¹ Bajarapadovathivi vajëta Jesúsjavabelia infiernojavabelia Jesús pitorobianiva.

³² Nexata bajarajota, imoxoyo petsutojavata, marranobitsaëtoXaneto xaevanapa. Dovathivi bitso vajëta Jesúsjavabelia.

—Panetocopare patajonexa marranobitsaëtoXanetojavabelia, jai dovathivi.

Jesús nexata pevajëtsicueniatsi tocopata.

33 Nexata dovathivi pebi vecuapitsapecatsi. Nexata marranobit-saëtoxanetojavabelia baja junua dovathivi. Nexata daxita bajarapamarra-nobitsaëtoxanetomi cujinaeyeca. Pucaxaneto itapajaniituareca othopareca. Bajarajota daxita marranobitsaëtoxanetomi meneta bubuna.

34 Marrano pevetsivi itsa tane bajarapacue, rëcëpeca. Pona, pacuene tane, petsipaebinxata tomarapijivijavabelia, petsipaebinxata vayafotusatojava penaevijavabelia ata.

35 Nexata jivi ponarena petaenexa bajarapacue. Jivi itsa parena Jesúsjavaberena, taeyeta dovathivi peyjavaponaponaenëmi peeceajava Jesús pemuxuneneta. Penaxatatsijava baja bajaraponë naxatateca. Jamatejema baja. Xaniyaetsia eca. Nexata bajarapamonae cujunavatsi Jesús.

36 Pamonaë cuenetanetsi Jesús pejamatejemayaexanaejava dovathivi peyjavaponaponaenëmi, bajarapamonae paeba pepatsivijavabelia daxita pacuenia tane.

37 Bajarapamonae bitso cujunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacue pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

Nexata baja Jesús runareca jera ënëabereca. Ponaejitsia baja.

38 Nexata dovathivi peyjavaponaponaenëmi bitso picani navajëca Jesúsjavabelia penaponaenexa picani Jesús pepëta.

—Petuxanenë, netocopare tanaponaenexa nepëta, jai picani Jesúsjavabelia.

Itsiata Jesús apo jejai. Jumaitsi bajaraponëjavabelia:

39 —Ponare nijamonaejavabelia. Tsipaebiname pacuenia ayaicue ni-jatuxanenë Dioso catoexana, jai Jesús.

Nexata baja bajaraponë pona. Tsipaebapona daxita pijatomarapijivijavabelia pacuenia Jesús jamatejemayaexanatsi.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi tosaëyaexana Jairo pexënatovayo, petëpaevayomi, yabara pelivaisi

(Mt 9.18-26; Mr 5.21-43)

40 Jesús icatsia pecovëyaberena naviarena jerata pucaxaneto itsapanaverena. Nexata jivi ayabitsaëtoxaneto copiapitatsi barëyaya. Tsipaji baja cajena copiaevetavanapatsi pepatsijavarena.

41 Nexata bajarajota napatajopa Jairovënënë. Bajaraponë judíovi penacae-tuatabibibo pevetsinë. Jairo pematatabacabëta yaityataeya Jesús pitabarata nucajunua. Piniijucenia junata. Jumaitsi Jesúsjavabelia:

—Tapëta ponare tajaboyabelia, jai.

42 Bajarapacuenia Jairo jumaitsi Jesúsjavabelia tsipaji caevayo pexënatovayo totëpaejitsiatsi. Bajarapovayo xaina doce pavaibeje. Itsa Jesús napona Jairo pepëta, jivibitsaëtoxaneto Jesús pepënaponaevitsi matatoyorotsia cëñenanajetarubenatsi.

43 Bajarapajivibitsaëtoxaneto tuatujëta, itsava pijanacue pecapunaevatsi nanajetaruca. Bajarapova pijanacue pecapunaecujinaetsi, doce baja pavaibeje xaina. Beyajiobi tsabiabi bajarapajana. Daxita pexinaejavaximi navecuavereta pematamobita pevaëbivitsi. Itsiata baitsi jane itsanë ata pevaëbivitsi apo jamatejemayaexanaetsi bajarapavitanevecua.

44 Nexata bajarapova ponataba Jesús pepënevëlia, jivibitsaëtoxaneto tuat-uajëalia. Nexata bajarapova tojayataba Jesús penaxatatsijavacopia. Nexata bajarapaepatota pijanacuenemi vecuaajibitsi baja.

⁴⁵ Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanë cajena apo cajayatabitsi, jai.

Nexata Pedrobana jumaitsi:

—Patajatuxanenë, jivibitsaëtoxaneto raja camatatoyorotsia cënënanajetarubena. Apo becaajayatsijibi. ¿Detsa xuajitsia: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrobana.

⁴⁶ Nexata Jesús jumaitsi:

—Itsajiviyo baja cajena tanaxatatsijava netojayataba. Yapëtaniji bajarapajiviyo tajamatejemayaexanaejava tasaëta, jai Jesús.

⁴⁷ Nexata petiriva jamatabëjumaitsi:

—Jesús baja yapëtane tanejamatejemayaexanaejava, jamatabëjai.

Nexata bajarapova najetabarena Jesús pitabarayaberena. Neconecojai pecajunavi. Pematabacabëta tonucajunua Jesús pitabarata. Bajarapova nexata navajunupaeba daxitajivi tuatuajëta pacuene yabara tojayataba Jesús penaxatatsijava. Navajunupaebanua pacuena jamatejemayaexantsi pejayatabijavata.

⁴⁸ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabi-anajë, tavitanejavami nevecuaajibi tsane,” nesivajamatabëjamë. Bajaraxu-ata jamatejemamë baja. Ponare baja jamatejema, jai Jesús bajarapovajavabelia.

⁴⁹ Bajarapacuenia Jesús pejumaitšanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajaraponë Jairojavabelia.

⁵⁰ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena. Nexënatovayo raja jamatejema tsane, jai Jesús Jairojavabelia.

⁵¹ Itsa Jesús pata Jairo pijabota, apo tocopatsi ayaiBITSaëto penajonenexa Jesús pepëta petëpaevayo pebocaejavabelia. Tocopata saya penajonenexa mapamatabëxëyoje. Pedro, Santiago, Juan, petëpaevayo paxa, pena, bajara saya pamatabëxëyo tocopata penajonenexa Jesús pepëta. Pamonae Jesús pevajënae ena Jairo pijabota, bajarapamonae Jesús pitsapaeyaexana.

⁵² Daxitajivi pinijicuenia matanueyaba petëpanucaevayo. Nexata Jesús jumaitsi:

—Pëtsa pamatanueyabame. Pejanava raja apo tëpae. Saya raja majitanuca, jai Jesús bajarapamonaejavabelia tsipaji yapëtane Jesús piasaëyaexanaejavanexa bajarapovayo.

⁵³ Bajarapacuenia Jesús pejumaitssijava, bajarapamonae saya Jesús jumecapocaponatsi. Tsipaji bajarapamonae yapëtane bajarapovayo baja picani pepacuene petëpaejavaya.

⁵⁴ Nexata Jesús petëpaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

⁵⁵ Nexata bajarapacuenia Jesús pejumaitssijavata, petëpanucaevayomi nonotabapuna. Asaë baja icatsia petëpaevayomi. Nexata Jesús jumaitsi pejanavayo penajavabelia:

—Nexënatovayo pexaejava rajure, jai Jesús.

⁵⁶ Nexata pejanavayo paxa, pena ata, bitso jamatabëcuenenabenajacabeje. Nexata Jesús jumaitsi bajarapajivibejejavabelia:

—Pëtsa papaebamebeje itsajivijavabelia ata pacuene pacatoexanatsibeje, jai Jesús.

9

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Mr 6.7-13)

¹ Jesús junata pijajivi, doce ponëbeje, penacaetuatsinexa. Nexata Jesús jumaitsi bajarapamonaejavabelia mapacueniaje:

—Pacajamatabëcuene caëjÿpaeyaexanatsi rabaja papeca-caëjÿpaejamatabëcuene dovathi peyavajinavanapaevi ata panevecuacapit-sapaponaenexa. Pacajamatabëcuene caëjÿpaeyaexanatsinua piavitanevi ata panejamatejemayaexanaponaenexa.

² Patsipaebanajetarubenaename daxitajivijava pacuenia Dioso pijajivi evetsijitsia. Piavitanevi ata pajamatejemayaexanaponaename, jai Jesús pijajivijavabelia.

³ Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame naebo, doro ata, panemarue ata, palata ata. Caejava saya panenaxatat-sijava pajumaponare. Pëtsa anijacamisabeje pacaponame.

⁴ Itsa papatabiabianame tomarata, caebota pamajitabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaname.

⁵ Patomarata apo pacacopiapitsi tsane pexanialivaisi panetsipaebinexa, nexata pavecuaponaename bajarapatomara. Panevecuaponaevajënae bajarapatomara, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, yapëtaena bajarapatomarapijivi Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi, jai Jesús pijajivijavabelia.

⁶ Bajaraxuacujinae Jesús pijajivi naropoba jane baja. Najetarubena daxitatomaraxijava. Tsipaebanajetarubena jane baja pexanialivaisi jivi pecapanepaelivaisinexatsi pibisiacuene pexanaeneconimivecua. Jamatejemayaexanaponanua piavitanevi daxitajava.

Pacuenia Juanpijinë jivibautisabinëmi beyaxuabatsi yabara pelivaisi

(Mt 14.1-12; Mr 6.14-29)

⁷ Herodes, Galileanacua pevetsinë, vënëlivaisitanetsi daxita Jesús pinijicuene pexanaponaejava. Nexata Herodes najamatabëcueneepatajërërëcaeya najamatabëxaina Jesús yabara. Tsipaji itsamonae jamatabëcuenenavëxaniabiaya Jesús yabara jumai tsaponae: “Juanpijinë raeta jivibautisabinëmi petëpaecujinae icatsia asaë,” jai tsaponae Jesús yabara. Nexata bajarapacuenia itsamonae pejumaitsaponaejava Herodes pejumetaexae, najamatabëcueneepatajërërëcaeya najamatabëxaina Jesús yabara.

⁸ Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Eliaspijinëmi, icatsia asaë, jai tsaponae itsamonae.

Itsamonae pijinia jumai tsaponae Jesús yabara:

–Bajayata raeta pamonaemi jinavanapa, profetavimiyajuvënë, icatsia asaë, jai tsaponae itsamonae Jesús yabara.

Bajarapacuenia itsamonae jamatabëcuenenavëxaniabiaya pejumaitsapona-
ejava Jesús yabara, Herodes jumetane.

⁹ Nexata Herodes jamatabëjumaitsi:

–Xanë bajayata tajajivi itorobajë Juanpijinë jivibautisabinëmi pebeyaxu-
abinexa. Nexata baja tajajivi Juanpijinëmi vësiucutaxuaba. Beyaxuaba baja.
¿De tsaeta nexata ponë pinijicuene pexanaponaejava, vënëlivaisitaeyabiabajë?
jamatabëjai Herodes Jesús yabara.

Bajaraxuata Herodes bitso jamatabëtane Jesús.

*Pacuenia Jesús pexaejava rajuta cinco mil ponëbeje yabara pelivaisi
(Mt 14.13-21; Mr 6.30-44; Jn 6.1-14)*

¹⁰ Jesús pitorobivi, apóstolevi, jivi pexanialivaisi petsipaebanajetarube-
naecujinae, naviabanajetarubena baja Jesúsjavaberena. Nexata bajarapa-
monae pepatsicujinae Jesúsjavaberena, navajunupaeba Jesúsjavabelia daxita
pacuenia exanavanapa. Nexata Jesús barëpona pijajivi pesajinaejavabelia,
Betsaidatomara imoxoyojavabelia.

¹¹ Itsiata baitsi jane jivi ayaibitsaëttoxaneto pëtanetsi. Nexata bajara-
pamonae Jesús pecovëvelia pëjaitatsi. Nexata bajarapamonae itsa pata
Jesúsjavata, Jesús copiapita xaniavaetsia. Nexata Jesús tsipaeba bajarapa-
monaejavabelia pacuenia Dioso eveta pijajivi mapanacuataje. Jesús jamate-
jemayaexananua piavitanevi.

¹² Itsa baja caniviyo tsaponae, Jesús pijajivi doce ponëbeje cujibarenatsi.
Jumaitsi:

–Itorobaremelia baja jivi peponaenexa imoxoyo penaetomaraxijav-
abelia, imoxoyo penaebonëjavabelia ata. Bajarabelia bajarapamonae nama-
jitsiana. Pexaejavanua namitsavajëtsiana. Majotaje ajibi pexaejava. Tsipaji
itsajivi ata pijabo apo xinae majotaje, jai Jesús pijajivi.

¹³ Nexata Jesús jumaitsi pijajivijavabelia:

–Paxamë parajure pexaejava, jai Jesús.

Nexata Jesús pijajivi jumaitsi:

–Paxainajë saya cinco papanbëbeje, anijanëyobeje dujuainëyobeje yajava.
¿Jitsipame tsaja patacomuacaenexa pexaejava daxita mapamonae penax-
aenexaje? jai Jesús pijajivi.

¹⁴ Bajarapajivibitsaëttoxaneto bejamatabëcuene cinco mil ponëbeje. Nexata
Jesús jumaitsi pijajivijavabelia:

–Paeneyaexanare pepobitsaëtonë, bejamatabëcuene cincuenta ponëbeje
tsaponae caebitsaëtota, jai Jesús pijajivijavabelia.

¹⁵ Nexata Jesús pijajivi bajarapacuenia exana. Enaeyaexana jane baja
daxita jivibitsaëttoxaneto.

¹⁶ Nexata Jesús pita cinco papanbëbeje, anijanëyobeje dujuainëyobeje ya-
java. Athëbëa benaëcotsia. Jumaitsi Diosojavabelia:

–Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona, dujuainëyobeje yajava.
Pepatsicacaejava pijajivijavabelia rajutapona petsicobetsanaenexa
daxitajivi.

¹⁷ Daxita xaniavaetsia nabane. Bajaraxuacujinae jivi peya-
juvënëcopabejebijavanë, Jesús pijajivi vënëba doce xuabeje bemapirecuenia
pexanaejavanë.

Pacuenia Pedro jumaitsi Jesúsjavabela: “¡Xamē raja Cristomē!” jai yabara pelivaisi

(Mt 16.13-19; Mr 8.27-29)

¹⁸ Itsamatacabi Jesús caenē vajēta Diosojavabela pijajivi pitabēta. Nexata xuacujinae Jesús jumaitsi pijajivijavabela:

—¿Detsa jivi jumai tsabiabi xanē yabara? ¿De tsaeta xanē ponēnē? jai Jesús pijajivijavabela.

¹⁹ Nexata Jesús pijajivi jumaitsi:

—Itsamonae xamē yabara jumai tsabiabi: “Juanpijinē raeta jivibautis-abinēmi icatsia asaē,” jai tsabiabi. Itsamonae pijinia jumai tsabiabi: “Diosojumepaebinēmi raeta. Profeta Elíaspijinē, ponēmi bajayata ponapona, icatsia asaē,” jai tsabiabi. Itsamonae pijinia jumai tsabiabi: “Bajayata raeta Diosojumepabivimi profetavimiyajuvēnēnē icatsia asaē,” jai tsabiabi xamē yabara, jai Jesús pijajivi.

²⁰ Nexata icatsia Jesús jumaitsi pijajivijavabela:

—¿Detsa nexata paxamē pajamatabēitsimē xanē yabara? ¿Detsa xanē ponēnē? jai Jesús pijajivijavabela.

Nexata Pedro jumaitsi Jesúsjavabela:

—Xamē raja cajena Cristomē, athēbēvetsica Dioso peccatorobinētsica jivi necapanapaenexa. Xamē cajena Dioso pexēnatomē, jai Pedro Jesúsjavabela.

Pacuenia Jesús tajēvelia navajunupaeba pebeyaxuabijavanexatsi yabara pelivaisi

(Mt 16.20-28; Mr 8.30-9.1)

²¹ Jesús jumeitaveta pijajivi. Jumaitsi mapacueniaje:

—Pētsa pajumaitsimē jivijavabela: “Jesús raja Dioso pexēnato,” pajamē pētsa, jai Jesús.

²² Nexata Jesús pebeyaxuabijavanexatsi, tajēvelia navajunupaeba. Jumaitsi pijajivijavabela mapacueniaje:

—Xanē, Daxitajivi Pematapijinēnē, pinijicuenia bejiobinē tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovēnētsi tsane xanē Cristonēcuenenē. Nexata bitso nebejibiaexanaena. Bajaraxuacujinae nebeyaxuabiana. Itsiata baitsi jane tatēpacujinae, acueyabi matacabita, icatsia asaēnē tsane, jai Jesús pijajivijavabela tajēvelia penavajunupaebijavata pebeyaxuabijavanexatsi.

²³ Bajaraxuacujinae Jesús jumaitsi daxitajivijavabela:

—Pajivi jitsipa tanepēnaponaejava, bajarapajivi copatsi penatojitsipaecuenia pexanaenexa penajamatabēxainabiabijavami. Exanaponapona taitorobicuenia. Bajarapajivi caematacabi canacujitsia najamatabēcueneveretsina, bejibiaexanaejitsia atatsi, beyaxuabijitsia atatsina, Dioso pejumelivaisi yabara pijamatabēcuenesaē tsaponaponaenexa. Nexata jane baja xuacujinae nepēnaponaena.

²⁴ Pajivi exanaponapona penatojitsipaecuenia, apo xinae tsane matacabi apo pevereverecejava. Pajivi xanē tajamatabēcueneta copata penatojitsipaecuenia pexanaejavami, bajarapajivi xainaena matacabi apo pevereverecejava.

²⁵ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuenē xinae ata mapanacuapijicuenēje, itsiata nacuerata. Tsipaji pexainaecuenē apo capanepae tsanētsi Diosojavabela.

²⁶ Pajivi tajajivitonē ata, navēnēlivaissäura tsane jivijavabela xanē tajajivitonēcuenē, tanejumecovēnētsijava ata yabara, nexata juya xanē,

Daxitajivi Pematapijinënë, bajarapajivi tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia patsianicajë taxa Dioso pijapenivenivenaecotia ysjava, tananeconitsiaexanaenexa daxita pijaneconi pexainaevi. Yajavapatsianicajënuua Dioso pijaängelevi.

²⁷ Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana daxita pijajivi pevetsicuene mapanacuataje. Nexata paxamëyajuvënëvi pepuatae tsane Dioso petaxuxuabijava daxita pijajivi pevetsicuene mapanacuataje, tēpaena, jai Jesús bajarapamonaejavabelia.

*Pacuenia Jesús caepatoyo perabēnivenivenataba yabara pelivaisi
(Mt 17.1-8; Mr 9.2-8)*

²⁸ Jesús petēpaejavanexa tajēvelia penayajunupaebicujinae, beja-matabēcuene ocho pamatacabibejecujinae, Jesús pijajivi, acueyabi ponēbeje, barējunaya petsutojumabetsia. Barējunaya mapamatabēxēyoje: Pedro, Santiago, Juan. Bajarapamatabēxēyo Jesús barējunaya petsutojumabetsia pevajētsinexa Diosojavabelia.

²⁹ Diosojavabelia pevajētsijavata, Jesús itabaranivenivena. Penaxatatsijava ata bitso nivenivenaeya niojai.

³⁰ Bajarajota jemata naitajēta anijanēbeje, ponēmibeje bajayata tēpa. Bajaraponēbeje Jesús barēcuaicuaijaitsi. Bajaraponēbeje tsaena Moiséspijinēbeje Elíaspijinēbeje.

³¹ Bajaraponēbeje matatoyorotsia nivenivenabeje. Jesús bana nabarēcuaicuaijai Jesús petēpaejavanexa yabara. Pacuenia Jesús bejiobiaexanaejitsiatsi Jerusalén tomarata, bajarapacuene yabara nabarēcuaicuaijai.

³² Pedrobana penajuajinavanapaevi bitso itamajitsipanae ata, itsiata naēcotavanapa. Nexata bajarapamonae tane Jesús matatoyorotsia penivenivenaeyajava. Tanenua Moisésbeje Elíasbeje pebarēcuaicuaijavatsi Jesús.

³³ Itsa baja Moisésbeje Elíasbeje Jesúsvecua ponaejitsiatsibeje, nexata bajara-paepatota Pedro jumai tsaxuabi Jesúsjavabelia:

—¡Patajatuxanenë, pijacuaxae panebarēponame! Pacatoexanaenatsi acueyabi pabobērētobeje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro.

 Pedro xaniavaetsia najamatabēxainanejeva, bajarapacuenia jumaitsi.

³⁴ Pedro abaxë itsa cuaicuaijai tsanucuae, itarērēbo mataacataxuabatsi daxita bajarapamonae. Jesús pijajivi najunaviaca itsa mataacataxuabatsi itarērēbo.

³⁵ Nexata bajarapaitarērēbojavavetsica Dioso jumaitssica:

—Mara ponë taxēnato, tasivanēje. Bajaraponë panamuxunaevere, jaitsica Dioso itarērēbojavavetsica Jesús pijajivijavabelia.

³⁶ Itsa baja Dioso najumevereta bajarapacuenia pejumaitssijavatsica, Jesús pijajivi tane caenë baja Jesús penucaeyava bajarajota. Jesús pijajivi tae ata bajarapacuene, moya saya jinavanapa. Bajarapamonae abaxë apo tsipaebi itsamonaejavabelia, tae ata bajarapacuene.

*Pacuenia Jesús jamatejemayaexana pejevaxinë, dovathi peyajavapon-
aponaenë, yabara pelivaisi
(Mt 17.14-21; Mr 9.14-29)*

³⁷ Jesús pebarëcuaicuajiaicujinae Moisésbeje Elíasbeje, pijajivi acueyabi ponëbeje yajava, naviatsica petsutojumavetsica. Nexata mataenenatsi jivi ayaibitsaëtoxaneto.

³⁸ Nexata caenë bajarapajivi bitsaëtoxanetoyajuvënënë pinijijumeta jumaiti Jesúsjavabelia:

—Jesús, nitaxutotsoniataema. Netotaema taxënatonëyo. Caenëyo rabaja tsipaji xainajë.

³⁹ Dovathi vaetababiabatsi. Nexata jemata aëjai tsabiabi. Tëpajoneyaexanabiabatsi. Daxitanë neconecojaiya aperabëbaba tsatabiabiireca. Nexata bajarajota pecuibothamu tsabiabi. Bitso bejiobiaexanabiabatsi. Dovathi abaxë apo jamatabëcopatsitsi.

⁴⁰ Picani raja nijajivijavabelia jumaitsinë: “Panetovecuacapitsapare dovathi,” janë. Itsiata apo caëjëpaetsi tanetovecuacapitsapaxenaxa, jai bajaraponë Jesúsjavabelia.

⁴¹ Nexata Jesús jumaiti daxita pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanaxa! Bajaraxuata apo pacajamatabëcuenecaëjëpae pejevaxinë panevecuacapitsapaxenaxa dovathi. ¡Paneajamatabëcuenetajavi baja rovia! ¿Detsa paepatojebi abaxë paxamëjavabelia ajamatabëcuenesaënë tsaponaponae tsane patanejumecovënëtsinexamë? jai Jesús daxita pijajivijavabelia.

Nexata Jesús jumaiti pejevaxinë paxajavabelia:

—Barërenamëre nexënatonëyo, jai Jesús.

⁴² Ajena pejevaxinë imoxoyotabarena Jesúsjavabarena, dovathi icatsia irata xuabatsi pejevaxinë. Daxitanë aperabëbaba tsatabireca. Nexata Jesús itaveta dovathi pejevaxinë pevecuapitsapaxenaxatsi. Nexata baja Jesús jamatejemayaexana pejevaxinë. Tocanaviata baja pejamatejemanë paxajavabelia.

⁴³ Daxitajivi bitso jamatabëcuenenabenajaca Dioso pesaëta Jesús pevecuacapitsapaxae dovathi bajaraponëyo.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mt 17.22-23; Mr 9.30-32)

Jivibitsaëtoxaneto Jesús jamatabëcuenenabarëyaya tanetsi daxita Jesús pexanaejava yabara. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaiti mapacueniaje:

⁴⁴—Xaniavaetsia panenamuxunaevere. Pëtsa panacofënëtame. Xanë, Daxitajivi Pematapijinënë, necanajetsiana itsamonae pecobeyabelia, jai Jesús pijajivijavabelia tajëvelia penavajunupaebijavata pebeyaxuabijavanexatsi.

⁴⁵ Itsiata baitsi jane Jesús pijajivi apo jumeyapëtae xua yabara Jesús jumaiti. Baitsi bajarapamonae Dioso apo tocopatsitsi pejumeyapëtaeyaniva xua yabara Jesús jumaiti. Bajarapamonae ajumeura Jesúsjavabelia peyanijobijava xua yabara Jesús jumaiti.

Pacuenia Jesús pijajivi: “¿Detsa ponë vaxaitsiyajuvënënë nacavecuayajiamatabëcuenenë bitso?” najai tsanajetarubenaë namutua yabara pelivaisi

(Mt 18.1-5; Mr 9.33-37)

⁴⁶ Jesús pijajivi anaeya namutua najumenotsiaya nalivaisitanajetarubena. Najumaiti tsanajetarubenaë bajarapamonae:

—¿Detsa ponë vaxaitsiyajuvënënë nacavecuayajiamatabëcuenenë bitso? najai tsanajetarubenaë Jesús pijajivi.

⁴⁷ Nexata Jesús pijajivi jamatabëcueneyapëtane pacuenia najamatabëxaina. Nexata Jesús cobepita pejevaxinëyo. Pemuxuneneta nuteta.

⁴⁸ Jumaitsi pijajivijavabelia:

—Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyajavocopiapita. Nexata pëtsa bepaayajamatabëcuenemë panataneme. Tsipaji ponë paxamëyajuvënënë beveliajamatabëcuenenë natane paxamëvecua, bajaraponë bitso ayajamatabëcuenenë taenatsi Dioso daxita paxamë matatoxenetsia, jai Jesús pijajivijavabelia.

Pacuenia Jesús jumaitsi pijajivijavabelia itsa vënëlvaisitane itsanë dovathi jivivecua pecapitsapaejava Jesús pevënëta yabara pelivaisi (Mr 9.38-40)

⁴⁹ Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaejava, jai Juan.

⁵⁰ Nexata Jesús jumaitsi Juanjavabelia:

—Pajivi pibisiajamatabëcuenë apo najamatabëxainae vaxaitsijaberena, bajarapajivi nacajamatabëcueneyavenona. Bajarapajivi bevaxaitsijamatabëcuenëjivi. Bajaraxuata pëtsa baja paitavetame bajaraponë xanë tavënëta jivivecua dovathi itsa capitsapapona, jai Jesús Juanjavabelia.

Pacuenia Jesús jumeitaveta Santiagobeje Juanbeje yabara pelivaisi

⁵¹ Itsa baja imoxoyo pevajënae pamatacabi Jesús athëbëabetsia Dioso caponaejitsiatsi, ajamatabëcuenesaë baja peponaenexa Jerusalén tomarabelia.

⁵² Jesús nexata pevajënaeyabelia pijajivitonëbeje natsivajënaeitoroba, Santiagobeje Juanbeje. Bajaraponëbeje ponabeje Samaria nacuata peecae-tomarajavabelia petocovaetsinexabeje pabota picani Jesús patsijitsia.

⁵³ Itsiata baitsi jane Samaria nacuapijivi apo jamatabëcopiapitsitsi Jesús. Tsipaji baja bajarapamonae yapëtane Jesús peponaejavanexa Jerusalén tomarabelia.

⁵⁴ Nexata Jesús pijajivitonëbeje itsa yapëtanebeje Samaria nacuapijivi Jesús apo pecopiapitsijavanexatsi, nexata jumaitsibeje Jesúsjavabelia:

—Patajatuxanenë, bajayata profeta Elíasipjinë vajëta Diosojavabelia Dioso pitorobinexatsica isotocotia peverebiabinexa piamatabëcuenëbejevi. ¿Baja tsaja pitsicune jitsipame patavajëtsinexa Diosojavabelia peveriapaenexatsi pamonaë apo jitsipae pecacopiapitsijava? jaibeje Jesús pijajivitonëbeje.

⁵⁵ Nexata Jesús naëcota pijajivitonëbejejavabelia. Jumeitaveta pijajivitonëbeje. Jesús jumaitsi:

—Paxamëbeje apo pajamatabëcueneyapëtaemëbeje Espíritu Santo, ponë pacayajavaponabeje.

⁵⁶ Xanë, Daxitajivi Pematapijinënë, apo patsinëtsica taverebiabinexa jivi. Biji rajane patsicajë tacapanepaenexa jivi pibisiacuenë pexanaeconeivecua, jai Jesús pijajivitonëbejejavabelia.

Nexata baja Jesús, pijajivi yajava, pona itsatomarabelia.

Pacuenia picani itsamonae Jesús jamatabëpënaponatsi yabara pelivaisi (Mt 8.19-22)

⁵⁷ Jesús pijajivi namutua peyajavanajetarucaejavata, judíovi pecujarubinē jumaitsi Jesúsjavabelia:

—Jesús, itsabelia poname, capēnaponaenatsi cajena, jai judíovi pecujarubinē.

⁵⁸ Nexata Jesús jumaitsi bajaraponējavabelia:

—Itsa nepēnaponaejitsipame, apo napatabiabimē tsipae tajabota nenacuer-aevetabiabinexa. Tsipaji tajabo apo xainenē. Namo pijamēthēanē xaina pepatabiabinexa pemajitabiabinexanua. Baratsui ata pematapenanē xaina. Itsiata baitsi jane xanē, Daxitajivi Pematapijinēnē, itsajavabelia ata apo xainanē, itsajota nacueraevetabiabijitsianē, jai Jesús.

⁵⁹ Bajaraxuacujinae Jesús jumaitsi icatsia itsanējavabelia:

—Nepēnaponare, jai Jesús.

Nexata bajaraponē jumaitsi:

—Tajatuxanenē, caepatoyo abaxē necopare tamēthēsinexa taxa petēpaenē, jai bajaraponē Jesúsjavabelia.

⁶⁰ Jesús nexata jumaitsi bajaraponējavabelia:

—Copare matababi apo pevereverecaejava apo pexainaevinexa pemēthēcaenexatsi nijamonaemi itsa tēpa. Xamē saicaya nepēnaponare jivi netsipaebinxaxa pacuenia Dioso evetsijitsia daxita pijajivi mapanacuataje, jai Jesús bajaraponējavabelia.

⁶¹ Bajaraxuacujinae icatsia itsanē jumaitsi Jesúsjavabelia:

—Tajatuxanenē, jitsipajē tacapēnaponaejava. Itsiata abaxē caepatoyo necopare tanapējiobinxaxa tajabota pejinavanapaevijavabelia, jai bajaraponē.

⁶² Nexata Jesús jumaitsi bajaraponējavabelia:

—Pajivi Dioso tonacuenebi ata, itsiata jamatabēnainabiaba pijaperujamatabēcuene, xua exanabiaba, bajarapajivi apo caējēpaetsi xaniavaetsia Dioso petonacuenebinexa pitorobicueniatsi. Tsipaji najamatabēcueneepatajērērēcaeya nacueneba, jai Jesús bajaraponējavabelia.

10

Pacuenia Jesús pijajivi itoroba, setenta ponēbeje, Dioso pejumelivaisi jivi petsipaebanajetarubenaenexa yabara pelivaisi

¹ Jesús icatsia itsamonae itapeta pijajivinexa, setenta ponēbeje. Bajarapamonae Jesús itoroba anijanēbeje tsaponae Jesús pevājēnaeya Dioso pejumelivaisi jivi petsipaebanajetarubenaenexa. Itoroba petsipaebanajetarubenaenexa daxita tomanējava, tsiquiritomaraxijava ata, itsaxuayo Jesús najetarucaejitsia.

² Jesús pijajivi penaropobivajēnae, Jesús jumaitsi pijajivijavabelia mapacueniaje:

—Xaniajanē pacuenia pacatsipaebijitsiatsi. Ayaipabi pexainanē cae-cuenia uba ayajava peubijava. Nexata baja itsa tonaveretatsi peubi-
java, caejiviyobeje tonotatsi. Nexata notsi ata, abaxē bitso ayajava to-sajinatsi penotsinexa. Bajara pijinia itsi jivi ata Diosojavabelia pena-
jamatabēcuene-copabivinexa. Abaxē sajina ayaibitsaētoxaneto. Itsiata baitsi
jane paxamē Dioso panetonacuenebivi pacaējiviyomēbeje saya. Bajaraxu-
ata Diosojavabelia pavajēre icatsia Dioso pijajivi pematatsēnēa itsamonae
pitorobinxaxa papecayavenonaenexa.

³ Paponare baja Dioso pejumelivaisi jivi panetsipaebanajetarubenaenexa. Panayajivitaeyajinavanapaename. Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiayaitsi itsa jinavanapa pianaepanaevi nevêthê tuatuajêata, bajarapaitsimê tsane.

⁴ Pêtsa pacaponaeme itsacuenejava ata, dorô ata, palata ata, zapato ata. Itsa pabajacobianame itsajivi namutoepatota, pêtsa bajayajebi pabarêcuaicuajamê tsanunubenaen panenajematsiyanima.

⁵ Itsa pajonejtsiamê itsamonae pijaboyalia, panejonevajênaelia copiaya pajumaitsimê tsane Diosojavabelia: “Dioso, yavenonare mapabopijivije jamatabêcuenexanepanaeya pejinavanapaenexa,” pajamê tsane copiaya Diosojavabelia.

⁶ Bajarapabo pexainaenê itsa jitsipaena pejamatabêcuene xanepanaeyaexanaenexatsi Dioso, nexata bajaraponê jamatabêcuene xanepanaeyaexanaenatsi Dioso. Itsa apo muxujitsipae tsane bajarapacuenia panejumaitsijava, nexata Dioso apo jamatabêcuene xanepanaeyaexanae tsanetsi bajaraponê.

⁷ Itsajota papatabiabianame, caebota pamajitabiabianame. Pêtsa panatixitaponaeme itsaboxijavabelia. Aurajibia paxaeyabiabianamenua xua pacaabata bajarapabota. Pêtsa pauramê panexaejava papecarajutsijava yabara. Tspijaji panetsipaebixae patacaitorobilivaisi, pacarajutsiana panexaejava. Tspijaji itsajivi itsa tonacueneba itsanêjavabelia, barajutatsi pexaejava.

⁸ Itsa papatabiabianame tomarata, itsa pabota bajarapatomarapijivi xaniavaetsia pacacopiapita, nexata panaxaename xua pacaabata.

⁹ Bajarapatomarata pajamatejemayaexanaename piavitanevi. Pajumaitsimê tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajênae pecopiapatsinexa,” pajamê tsane.

¹⁰ Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaename. Pajumaitsimê tsane bajarapatomarapijivijavabelia mapacueniaje:

¹¹ “Panijatomarapijiatsapêrê patataxuta rubena. Nexata panavetaxuvarêbajê. Bajarapacuenia panavetaxuvarêbajê panenayapêtaenexa Diosojavabelia panenaniconitsijava. Pananeconitame Diosojavabelia. Tspijaji apo panecopiapitsimê patanenamuxunaevetsinexamê palivaisi picani pacatsipaebijitsiatsi. Itsiata panenamuxunaevere paneyapêtaenexa mapalivaisije. Dioso daxita pijajivi pevetsimatacabinexa, imoxoyo baja pevajênae pecopiapatsinexa,” pajamê tsane.

¹² Xaniajanê pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaena patomarapijivi apo pacacopiapitsi tsane. Paneconivajêtotâ bajayata Dioso naneconitsiaexana Sodoma tomarapijivimi, bajarapaneconivajêto matatoxenetsia Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia, setenta ponêbejijavabelia.

Pacuenia Jesús jumaitsi patomarabejepijivi Dioso xuabijitsia infiernojavabelia apo pejumecovênêtsixaetsi yabara pelivaisi (Mt 11.20-24)

¹³ Icatsia Jesús jumaitsi pijajivijavabelia, setenta ponêbejijavabelia:

—¡Bitso bejiobi tsane Corazîn tomarapijivi! ¡Bitso bejiobi tsane Betsaida tomarapijivi ata! Pinijicuene Dioso pesaêta taexanaejavanê, xua itsajivi ata apo caêjêpaetsi pexanaenexa, bajarapatomarabejepijivi tae ata, itsiata apo nejumecovênêtsi. Apo copabi pibisiacuene pexanabiabijava. Apo najamatabêcuenepênêyorotsi Diosojavabelia. Bajayata Tiro tomarapijivimi,

Sidón tomarapijivimi ata, petuatuaajëta bajarapitsipiniijcuene itsa tsitaex-
anaejitsipajë, nexata bajarapamonaemi copabijitsipa pibisiacuene pex-
anaejava. Najamatabëcuenepeñëyorotsipa Diosojavabelia. Bajarapamon-
aemi nexata pibisiacuene pexanaebiabineconi bitso yajamatabëcuenebëjai
tsipae. Nexata Diosojavabelia petsitanajamatabëcueneitajëtsinexa peyaja-
matabëcuenebëjajjava pibisiacuene pexanabiabineconi, naxatabijitsipa piay-
opapaëbërëjavanë. Enaejitsipa irata. Ipumana ata natsimataothocaejitsipa
bitso peyajamatabëcuenebëjaixae pibisiacuene pexanabiabineconi.

14 Itsiata baitsi jane Corazín tomarapijivi, Betsaida tomarapijivi ata,
tae ata pinijcuene Dioso pesaëta taexanaejavanë, apo nejumecovënëtsi.
Nexata pamatacabi Dioso naneconitsiaexanaena daxita pijaneconi pex-
ainaevi, bajarapamatacabi bitso ayaicuenia Dioso naneconitsiaexanae-
natsi. Paneconivajëtota bajayata Dioso naneconitsiaexana Tiro tomara-
pijivimi, Sidón tomarapijivimi ata, bajarapaneconivajëto matatoxenetsia
Dioso bitso ayaicuenia naneconitsiaexanaena Corazín tomarapijivi, Bet-
saida tomarapijivi ata.

15 Capernaum tomarapijivi picani najamatabëxaina Dioso
pecaponaejavatsi athëbëabetsia. Itsiata baitsi jane bajarapamonaë apo
tanejumecovënëtsixae, Dioso xubianatsi infernojavabelia, jai Jesús Corazín
tomarabeje Betsaida tomarabejipijivi yabara.

16 Icatsia Jesús jumaitsi pijajivijavabelia, setenta ponëbejjavabelia:

—Pajivi pacanamuxunaevetsiana, bajarapajivi taenajë xanë tanenamux-
unaevetsijava. Pajivi pacanayajiviitavetsiana, bajarapajivi taenajë xanë
tanenayajiviitavetsijava. Bajarapajivi Dioso ata taenatsi Dioso penaya-
jiviitavetsijava. Bajarapacuenia Dioso ata taenatsi penayajiviitavetsijava
tsipaji xanë Dioso nitoroba, jai Jesús pijajivijavabelia Jesús pijajivi setenta
ponëbeje pitorobivajënaeya.

Nexata jane baja Jesús pijajivi naropoba. Dioso pejumelivaisi jivi tsi-
paebanajetarubena daxita tomaranëjava. Saicaya navecuanajetarubena
anijanëbeje tsaponae.

*Pacuenia Jesús pijajivi, setenta ponëbeje, naviabanajetarubena, Dioso pe-
jumelivaisi jivi daxitanacuanëjava petsipaebanajetarubenaecujinae, yabara
pelivaisi*

17 Jesús pijajivi, setenta ponëbeje, Dioso pejumelivaisi jivi
daxitanacuanëjava petsipaebanajetarubenaecujinae, barëyaya naviabana-
jedarubena Jesúsjavaberena. Nexata pepatsicujinae bajarapamonae jumaitsi
Jesúsjavabelia:

—Tajatuxanenë, dovathivi baja cajena itsa paitavetaponajë nevënëta,
panejumecovënëtabiaba, jai bajarapamonaë Jesúsjavabelia.

18 Jesús nexata jumaitsi pijajivijavabelia:

—Xanë baja cajena taniji dovathi athëbëvetsica pejopaejavatsica pacuenia
yamaxë bajopaica.

19 Xanë baja cajena pacajamatabëcuene caëjëpaeyaexanatsi
papecacaëjëpaejamatabëcuene panejamatabëcuene matatoxenetsinexa
vajavajabitsaënë dovathi. Nexata jomo pacuetsacuetsanae atamë tsane,
aqueto ata pacuetsacuetsanae atamë tsanë, apo pacaitsacueniabi tsane.

20 Itsiata pëtsa bitso pasivajamatabëcuenebarëyamë dovathi itsa paitave-
tame papecajumecovënëtsijava. Bitso jane pasivajamatabëcuenebarëyamëre
tsavanapae Dioso papijajivixaemë Dioso papecavënëyaquinarubijava
athëbëtatsia, jai Jesús pijajivijavabelia, setenta ponëbejjavabelia.

*Pacuenia Jesús jamatabëcuenebarëya yabara pelivaisi
(Mt 11.25-27; 13.16-17)*

²¹ Jesús bitso jamatabëcuenebarëyayaexanatsi Espíritu Santo. Nexata Jesús jumaitsi paxa Diosojavabelia:

—Axa, nevetsinë athëbëatsia. Nevetsinë mapanacuajava ataje. “Ayaijamatabëcuenenëmë bitso,” cajiatsi. Tspijavi pamonaë bitso apo penacujarubivi ata, yapëtaeyaxaname pacuenia itsamatacabi daxita nijajivi evetsijitsiamë mapanacuataje. Bajarapamonaë yapëtaeyaxanaename pexanialivaisi, xanë talivaisi, palivaisi vecumatayatame bitso peyapëtaevi mapanacuapijilivaisije. Bajarapalivaisi vecumatayatame bitso penacujarubivi ata mapanacuapijicue ne yabaraje. Bajarapacuenia exaname tspijavi baja exaname nejitsipaecuenia, jai Jesús paxa Diosojavabelia pevajëtsijavata.

²² Icatsia Jesús jumaitsi pijajivijavabelia, jivijavabelia ata:

—Taxa Dioso baja cajena netocopata tayapëtaenexa daxitacue. It-sajivi ata apo nejamatabëcueneypëtae pacuenia xanë jamatabëcueneitsinë, Dioso pexënatonë. Caenë, taxa Dioso, nejamatabëcueneypëtane. It-sajivi ata apo jamatabëcueneypëtae pacuenia taxa Dioso jamatabëcueneitsi. Caenënë, xanë pexënatonë, jamatabëcueneypëtaniji pacuenia taxa Dioso jamatabëcueneitsi. Pamonaë tojitsipajë tayapëtaeyaxanaenexa pacuenia taxa Dioso jamatabëcueneitsi, bajarapamonaë ata yapëtaeyaxanaenajë, jai Jesús pijajivijavabelia, jivijavabelia ata.

²³ Nexata Jesús napënëyorota. Ëpijajivijavabelia jumaitsi:

—Paxamë baja pajamatabëcuenebarëyamë panetaexae pacuene baja pataepo name.

²⁴ Xaniajanë pacuenia pacatsipaebijitsiatsi. Bajayata ayaibitsaëto profetavimi necopiaevetavanapa picani tanetaenexa tapatsijavatsica. Nacuae vetsivimi ata necopiaevetavanapa picani tanetaenexa tapatsijavatsica. Itsiata netaenejeva tapatsijavatsica, bajarapamonaemi tēpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisinë, bajarapamonaemi tēpa baja, jai Jesús pijajivijavabelia.

*Pacuenia pexaniajamatabëcuenenë, Samaria nacuapijinë, yavenona itsanë
yabara pelivaisi*

²⁵ Itsamatacabi Jesús livaisi tsipaebanuca pijajivijavabelia. Nexata bajarajota judíovi pecujarubinë nonotapuna. Bajaraponë Jesúsjavabelia jamatabëcueneëjëbiaya jumaitsi:

—Jesús, ¿detsa xua exanaenajë Dioso tanerajutsinexa matacabi apo peveverecaajava? jai judíovi pecujarubinë.

²⁶ Nexata Jesús jumaitsi judíovi pecujarubinëjavabelia:

—¿Detsa jane jumaitsi bajarapacue ne yabara bajayata Dioso Moiséspijinëta penajumecopatsilivaisi jivi pejumecovënëtsinexa? jai Jesús.

²⁷ Nexata judíovi pecujarubinë jumaitsi Jesúsjavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Daxita panejamatabëethëtojavavetsina, daxita panejamatabëcueneta ata, daxita panesaëta ata, daxita panenajamatabëxainaesaëta ata, pasivamëre panijatuxanenë panijaDioso. Pasivamëre itsajivi ata pacuenia paxamë panijacuata panasivamë,” jai bajayata Dioso Moiséspijinëta penajumecopatsilivaisi, jai judíovi pecujarubinë Jesúsjavabelia.

²⁸ Nexata icatsia Jesús jumaitsi judíovi pecujarubinëjavabelia:

—Xaniavaetsia nejumecanaviatame. Bajarapacuenia exanapononare. Nexata pepacuene xainaename matacabi apo pevereverecaejava, jai Jesús.

²⁹ Itsiata baitsi jane judíovi pecujarubinē bijiaya jumecovēnēta bajarapali-vaisi. Asivaya apo tae itsamonae ata. Bajaraxuata judíovi pecujarubinē matavējēa jumaitsi Jesúsjavabelia:

—¿Detsa nexata pitsijivi asivanē tsane? jai judíovi pecujarubinē.

³⁰ Nexata icatsia Jesús jumaitsi judíovi pecujarubinējavabelia mapacueni-aje:

—Pebi namutua najetaruca Jerusalén tomaraverena. Naropota pepatsinexa Jericó tomaraberena. Nexata jivi pecaponaejava peyacajērēbabiabivi, bajaraponē eputua vaetabatsi. Daxita pecobecovē yacajērētatsi. Penaxatabijavanēmi ata yacajērētatsi. Nexata pinijicuenia conibabiatsi. Puenetabuatsi picani petēpanucaenexa bajarajota.

³¹ Nexata bajarapanamutua sacerdotenē najetaruca, templobota penacuenebabiabinē. Nexata sacerdotenē bajaraponē itsa taeyabuata, matavaquetanucapona. Pona baja rovia.

³² Bajaraxuacujinae icatsia bajarapanamutua itsanē, templobota penacuenebabiabinē, najetaruca. Bajaraponē taenucajopa. Bajaraxuacujinae matavaquetanucapona. Pona baja icatsia rovia bajaraponē ata.

³³ Bajaraxuacujinae icatsia bajarapanamutua Samaria nacuapijinē najetaruca. Nexata bajaraponē itsa taeyabuata, tsitabejiobitsi bitso.

³⁴ Nexata bajaraponē cujilia. Vajēnēvaēba aceiterata, vinorata yajava. Vajēnēcēba papaēbērēpanaxita. Bajaraxuacujinae Samaria nacuapijinē pijaburrojumata buatsia. Nexata bajaraponē capona jivi pepatabiabiboyabelia. Bajarajota Samaria nacuapijinē eveta xaniavaetsia.

³⁵ Meravia pitsijavata Samaria nacuapijinē itsa baja ponaejitsia itsabelia najetaruca, juta anijapalatanēbeje, bitso penamatamotsinēbeje. Matamota bajarapabo pexainaenē. Jumaitsi bajaraponējavabelia: “Netoovetsianame maponēje. Itsa matamovereverecaena, pematatsēnēa nevetsimatamo, bajarapapalata icatsia caevēarena camatamotsianatsi,” jai Samaria nacuapijinē bo pexainaenējavabelia, jai Jesús mapacueniaje judíovi pecujarubinējavabelia.

³⁶ Bajaraxuacujinae judíovi pecujarubinējavabelia Jesús yanijoba bajarapalivaisi yabara. Jumaitsi mapacueniaje:

—Pamonae, acueyabi ponēmaxēto, taeyabuata pecobecovē peyacajērētšinētsi. ¿Detsa ponē bajarapamonaejavuvēnēnē asivaya tane bajaraponē? jai Jesús.

³⁷ Nexata judíovi pecujarubinē jumaitsi Jesúsjavabelia:

—Ponē pitaxutotsoniataexae yavenona, bajaraponē asivaya tane, jai judíovi pecujarubinē Jesúsjavabelia.

Nexata Jesús jumaitsi judíovi pecujarubinējavabelia:

—Ponare baja. Xamē ata bajarapacuenia asivaya itaxutotsoniataeyabiabi-aname itsamonae ata, jai Jesús judíovi pecujarubinējavabelia.

Pacuenia Jesús jumaitsi Martabeje Maríabeje pijabota yabara pelivaisi

³⁸ Jesús, pijajivi yajava, najetaruca pevājēnaeyabelia. Nexata tomarayota pata. Bajarapatomarayota Jesús xaniavaetsia copiapitatsi petiriva, Martavēnēva. Nexata Marta pijabota Jesús napata.

³⁹ Marta pejuyapijiva xaina, Maríavēnēva. Nexata María eca Jesús pitabarata penamuxunaeveteacaenexa Jesús petsipaebilivaisi.

⁴⁰ Nexata Marta bitso jamatabëcueneenatsi penacuenabijava, Jesús pexaejavanexa ata pemitsoaxanaenexa. Nexata Marta cujilia Jesús. Jumaitsi:

–Tajatuxanenë, tajuyapijiva netocopata caevanë taexanaenexa daxita xua exanaejitsianë. Itorobare taneyavenonaenexa, jai Marta Jesúsjavabelia.

⁴¹ Nexata Jesús jumaitsi Martajavabelia:

–Marta, xamë bitso cajamatabëcueneena nexanaenexa daxita xuanë jamatabëexaname.

⁴² Caejava bitso xanepana nexanaenexa, tanenamuxunaevetsinexamë. María baja cajena tanenamuxunaevetecaexae tatsipaebilivaisi, catsuitapeta pexaniacuene daxitacuene matatoxenetsia. Nexata acuenebi itsajivi ata peyacajërëtsijavatsi tatsipaebilivaisi pejumetaejava, jai Jesús Martajavabelia.

11

Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi
(Mt 6.9-15; 7.7-11)

¹ Jesús vajëtabiaba Diosojavabelia. Nexata itsamatacabi, itsa baja Jesús najumevereta pevajëtsijava Diosojavabelia, Jesús pijajiviyajuvënënë jumaitsi Jesúsjavabelia:

–Patajatuxanenë, panejumecujarubare pacuenia pavajëtabiabijitsianë Diosojavabelia. Pacuenia Juanpijinë jivibautisabinëmi jumecujarubabiaba pijajivi pacuenia vajëtabiabijitsia Diosojavabelia, bajara pijinia pacuenia xamë ata panejumecujarubare pavajëtabiabijitsianë Diosojavabelia, jai Jesús pijajiviyajuvënënë.

² Jesús nexata jumaitsi pijajivijavabelia mapacueniaje:

–Itsa pavajëtabiabianame Diosojavabelia, pajumaitsimë tsabiabi tsane:

Taxamë, athëbëtatsia neecaenë, jitsipajë pecayaiyataejava daxitajivi. Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia peatoexanabiabijava, pacuenia baja athëbëtatsia nijajivi nejitsipaecuenia catoexanabiaba, bajarapacuenia peatoexanavanapaenexa mapanacuapijivi ataje.

³ Caematacabi canacujitsia panerajure pataxaejavanexa pacuenia panamatavenonajë.

⁴ Panebarajamatabëcuene xanepanarena nitabarata pibisiacuene pataexanaejava. Nexata panevecuaajibiaexanare pibisiacuene pataexanaeneoni. Tsipaji paxanë ata itsamonae paxanëjavaberena pibisiacuene patanexanaejava pajamatabëcuene caevajë. Nexata pabarajamatabëcuene xanepanajë. Panevecuatsare dovathi patanejamatabëcuene ejëbivaniva. Panecapanepare jane pibisiacuenevecua, pajamë tsane mapacueniaje itsa pavajëtabiabianame Diosojavabelia, jai Jesús pijajivijavabelia.

⁵ Icatsia Jesús pijajivijavabelia jumaitsi comparacióncuenia Jesús pijajivi peyapëtaenexa pacuenia vajëcabiabijitsia Diosojavabelia:

–Paxamëyajuvënënë meravi tuatuajëta ponaejitsipa bitso peyapëtaenëtsi pijaboyabelia. Nexata jumai tsipae: “Cacovaetatsi acueyabi papanbëyobeje.

⁶ Itsanë raja, taneyapëtaenë, tajëverena peponaenë, aeconoxae tajabota netopata. Nexata bitso piajani. Itsiata xanë apo xainaenë itsacuejavayava ata pexaejava tarajutsinexa,” jai tsipae paxamëyajuvënënë meravi tuatuajëta peyapëtaenëtsijavabelia.

⁷ Nexata bo enëverena bajaraponë jumepitsipatsi. Jumaitsi tsipae: “Nematabëitonotsipame. Baupa rabaja xaniävaetsia xatatanutajë. Taxi raja barëmajitanucajë caecamata. Nexata acuenebi tanonotapunaejava tacarajutsinexa xua nevajëtime. Itsa nonotapunaejitsipajë, yaitavabijitsipajë taxi,” jai tsipae peyapëtaenëtsi. Itsiata baitsi jane bajaraponë perajutsinexatsi ajumesaëya vajëcaponaejitsipa.

⁸ Xaniajanë pacuenia pacatsipaebijitsiatsi. Bajaraponë apo jamatabënonotapunaë ata, itsiata nonotapunaejitsipa perajutsinexa pecovaebijavatsi. Itsiata peyapëtaenëxaetsi, bajarapacuenia apo rajutsi tsipae. Biji rajane rajutsipa daxita pacuenia namatavenona ajumesaëya pevajëcaponaëxaetsi.

⁹ Xaniajanë pacuenia pacatsipaebijitsiatsi. Itsacuenejavayo ita pacatonaxuabijitsipa, nexata bajayajebi ata pajaitsipame matapania panecaxitajarabijavabelianexa. Bajara pijinia pacuenia bajayajebi ata pavajëtabiabianame Diosojavabelia papecajumecovënëtsinexa. Bo ata ita baupa xatatanuta, nexata asaëyata pabaupadocodocotsipame matapania papecatobaupatsijavabelianexa. Bajara pijinia pacuenia asaëyata pavajëtabiabianame Diosojavabelia papecajumecovënëtsinexa.

¹⁰ Bajarapacuenia asaëyata pavajëtabiabianame Diosojavabelia. Tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi, jai Jesús pijajivijavabelia comparacióncuenia.

¹¹⁻¹² Icatsia Jesús jumaitsi pijajivijavabelia:

—Paxamë pabebijivimë, panexi panexinaevi. Panexënatonëyo ita pacavajëta panbë, apo panacoxirajutsimë tsipae iboto. Itsa pacavajëta dujuainëyo, apo panacoxirajutsimë tsipae jomo. Itsa pacavajëta vacaratobëto, apo panacoxirajutsimë tsipae aqueto.

¹³ Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniaamatabëcuenenë paxamë matatoxenetsia. Bajaraponë pacarajutsiana pexaniacuenë ita pavajëtime. Bajaraponë rajutsiana Espiritu Santo daxita pamonaë vajëtatsi, jai Jesús pijajivijavabelia.

Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta Jesús dovathi jivivecua capitsapapona,” jai yabara pelivaisi

(Mt 12.22-30; Mr 3.20-27)

¹⁴ Pebi ponapona, dovathi pejamatabëcueneta apo penatsipaebinë. Nexata bajaraponë Jesús dovathi vecuacapitsapa. Pebi baja dovathi Jesús ita vecuacapitsapa, natsipaeba baja. Jivibitsaëtoxaneto petaevi bajarapacuenë, bitso jamatabëcuenenabenajaca.

¹⁵ Itsiata baitsi jane itsamonae fariseovi Jesús baracuaicuaijaitsi pibisiacuenia.

—Maponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pepo penamatacaitorobinë, jai fariseovi jamatabëcuenenavëxaniabiaya Jesús yabara.

¹⁶ Itsamonae icatsia fariseovi Jesús picani jamatabëcuenëjëbiaya itorobatsi pinijicuenë Dioso pesaëta pexanaejava Jesús petsitaexanaenexa. Bajara-pacuenia picani itorobatsi fariseovi peyapëtaenexa pepacuenë Jesús Dioso pitorobinëcuenetsitsica.

¹⁷ Itsiata Jesús jamatabëcueneyapëtanë pacuenia fariseovi sivanajamatabëxainatsi. Nexata fariseovijavabelia Jesús jumaitsi mapacueniaje:

—Nacaenacuapijivi ata itsa navecuanatsanaejitsipa penasivanavajabit-saëtsinexa, nexata namataenetsia naverebiabijitsipa daxita bajarapamonae. Bajara pijinia pacuenia nacaemonae ata itsipae. Itsa navecuanatsanaejit-sipa penasivanavajabitsaëtsinexa, nexata namataenetsia naverebiabijitsipa nacaemonae ata.

¹⁸ Bajara pijinia itsipae dovathi ata. Dovathi jivivecua itsa capitsapa-ponaeijitsipa pijajivi, dovathivi, nexata bepijavajabitsaë taejitsipa pijajivi. Itsajamatabëcuene vecuaxainaejitsipa pijajivi. Pesaë ata apo xainaponae tsipae. Mapacuenia pacatsipaebatsije tsipaji paxamë xanë yabara apo pacanaëjëtsinejevamë jamatabëcuenenavëxaniabiaya pajumaitsimë: “Jesús raja dovathi jivivecua capitsapabiaba Beelzebú pesaëta,” pajamë xanë yabara.

¹⁹ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitsijava xanë yabara.

²⁰ Espíritu Santo pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatujëta, jai Jesús fariseovijavabelia.

²¹ Fariseovi pecanaëjëtsinexa Jesús bitso piasaënëcuene dovathi matatox-enetsia, Jesús icatsia comparacióncuenia jumaitsi fariseovijavabelia mapacueniaje:

—Ponë bitso piasaënë, aitatsacaya pijanae cobenaevetabiabijitsipa pijabo, itsamonae peycarëjëtsiyaniavatsi pecobecovë. Nexata daxita pecobecovë xaniavaetsia tobobenaejitsipatsi, jai Jesús dovathi pijajivi pevetsijava yabara.

²² Icatsia Jesús pijacuata nayabarajumaitsi mapacueniaje:

—Itsiata baitsi jane itsa najetarucaejitsipa itsanë bitso piasaënë box-ainaenë matatoxenetsia, nexata cueneamoneyabijitsipatsi. Aitatsacaya pi-janae cobenaevetabiabi ata tsipae, itsiata vecuapitsipatsi pijanae, daxita pecobecovëjavaxi yajava, nayabarajai Jesús pijacuata comparacióncuenia dovathi pejamatabëcueneamoneyabijava yabara.

²³ Icatsia Jesús jumaitsi fariseovijavabelia:

—Pajivi apo neyavenonaeyacaetuatsi jivi Dioso pijajivinexa, bajarapajivi betajavajabitsaëjivi. Tsipaji apo taneyavenonaeyacaetuatsixae, jivi neve-cuanacayajata Dioso picani pejumecovënëtsiviminexa, jai Jesús fariseovijav-abelia.

Pacuenia dovathi jivitonë pevejamatabëpitsapaecujinaetsi, icatsia naviarena pecovëyabereneta petsijamatabëcaenexatsi icatsia yabara pelivaisi (Mt 12.43-45)

²⁴ Icatsia Jesús jumaitsi fariseovijavabelia:

—Dovathi itsa vejamatabëpitsapa jivitonë, nexata dovathi jinaruta pet-seviiranëjava. Jaitapona itsanëjavabelia petsijamatabëjonenexa dovathi pe-nacuraevetsinexa bajaraponëjavata. Itsa apo caxitajarabi, ponëjavabelia tsijamatabëjonejitsia, nexata dovathi jamatabëjumaitsi: “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonenexatsi.

²⁵ Dovathi baja caevëa itsa naviarena, caxitajaraba peyajavaponapon-aenëmitsi. Nexata peyajavaponaponanëmitsi pejamatabëéthëto, dovathi tane bepëñësjinecaebo, bepëñëxaniavaetetsibo, bepiracajuetsibio.

²⁶ Nexata dovathi icatsia sivapona peyajavapatsinexarena itsadovathivi, siete ponëbeje. Bajarapadovathivi bitso piacuñirubejevi copiaya padovathi

matatoxenetsia. Daxita bajarapadovathivi pebi tsijamatabëjunuatsi peyavajaponaponaenexa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabëecatsi pacuenia bejiobiaexanabiabatsi, matatoxenetsia bejiobiaexanatsi, jai Jesús fariseovijavabelia.

Pacuenia Jesús tsipaeba xua yabara jivi jamatabëcuenebarëya yabara pelivaisi

²⁷ Itsa abaxë Jesús livaisi tsipaeba fariseovijavabelia, petiriva bajarapajivi bitsaëtoخانetoyajuvënëva pinijijumeta vavajai tsaxuabi. Jumaitsi Jesúsjavabelia:

—Jamatabëcuenebarëya baja cajena ena, pecanavitaniabiva, pecavitsatsiva! jai petiriva Jesúsjavabelia.

²⁸ Nexata Jesús jumaitsi bajarapovajavabelia:

—Xaniajamë rabaja. Itsiata baitsi jane pamonaë jumetane Dioso pejumelivaisi, nexata itsa jumecovënëta bajarapalivaisi, bajarapamonaë jane bitso jamatabëcuenebarëya tsavanapae taena matatoxenetsia, jai Jesús petirivajavabelia.

Pacuenia pibisiajamatabëcuenevi Jesús picani itorobatsi Dioso pesaëta pini-juciene pexanaejava petsitaexanaenexa yabara pelivaisi

(Mt 12.38-42; Mr 8.12)

²⁹ Jivi ayaibitsaëtoخانeto Jesús itsa matatoyorotsia nacaetuatatsi, nexata Jesús jumaitsi:

—Pamonaë aeconoxae jinavanapa, bitso pibisiajamatabëcuenevi. Bajarapamonaë picani nitoroba Dioso pesaëta pinijicue ne taexanaejava tatsitaexanaenexa, taneyapëtaenexa Dioso pepacue ne athëbëvetsica taneitorobinëcuenetsica. Itsiata baitsi jane Dioso pesaëta pinijicue ne taexanaejava, apo tsitaexanaenë tsane. Bajayata pacuenia Diosojumepaëbinëmi profeta Jonáspijinë exanatsi, bajara ëpitsicue ne taexanaejava, tsitajëtsianajë.

³⁰ Bajayata daxita Nínive tomarapijivi yapëtane profeta Jonáspijinë Dioso pitorobinëcuenetsi. Tspiji ayaicue ne exanatsi Dioso. Bajara pijinia pacuenia xanë ata, Daxitajivi Pematapijijnë, pinijicue ne Dioso nexanaena. Nexata daxita pamonaë aeconoxae jinavanapa, neyapëtaena pepacue ne Dioso athëbëvetsica taneitorobinëcuenetsica.

³¹ Itsamatacabi copiapatsiana Dioso penaneconitsiaexanaematacabinexa daxita pijaneconi pexainaevi. Bajarapamonaë nubianatsi Dioso pitabarata. Nexata bajarapamatacabi bajayata povami ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonaë aeconoxae jinavanapa, Dioso apo pejumecovënëtsivi. Bajarapova neconitsiana tspiji bajayata bajarapovami tajë nacuataverena ata muxunanajetaruca pejumetaenexa Salomónpijinë, bitso daxitalivaisi peyapëtaenëmi, petsipaëbilivaisi. Xanë raja majotaje ponaponajë, bitso ayaijamatabëcueneenëne Salómonpijinëmi matatoxenetsia. Itsiata baitsi jane pamonaë aeconoxae jinavanapa mapanacuataje, apo nenamuxunaevetsi. Bajaraxuata ayaineconi xaina Diosojavabelia, jai Jesús.

³² Icatsia Jesús jumaitsi jivi ayaibitsaëtoخانetoyavabelia:

—Bajayata Nínive tomarapijivi itsa jumetane Dioso pitorobilivaisi, Jonáspijinë petsipaëbilivaisi, copaba pibisiae cuene pexanaejava. Najamatabëcuenepeñëyoro ta Diosojavabelia. Pamatacabi copiapatsiana Dioso penaneconitsiaexanaematacabinexa daxita pijaneconi pexainaevi, bajarapamatacabi Nínive tomarapijivimi ata nonobapunaena Diosojavabelia peneconitsinexa pamonaë aeconoxae jinavanapa,

Dioso apo pejumecovënetsivi. Tspipaji xanë majota ponaponajë bitso ayaijamatabëcuenenënë Jonáspijinëmi matatoxenetsia. Itsiata baitsi jane pamonae aeconoxae jinavanapa mapanacuataje, tsipaebi atanë Dioso pejumelivaisi, apo najamatabëcuenepënëyorotsi pibisiacuene pexanae-javavecu. Bajaraxuata Dioso naneconitsiaexanaenatsi bajarapamonae, jai Jesús jivi ayaibitsaëtoxanetojavabelia tajëvelia pevajunupaebijavata itsamatacabi Dioso jivi penaneconitsiaexanaejavanexa.

Pacuenia vajaitaxuto belámparabë yabara pelivaisi

(Mt 5.15; 6.22-23)

³³ Icatsia Jesús jumaitsi jivibitsaëtoxanetojavabelia:

–Itsajivi ata lámparabë pitanojotsicujinae, apo mataacatetsi itsacuenejavata. Cajoniënëalia ata apo etsi lámparabë. Biji rajane athëbëyo etsia. Jivi boyaberena pejonevi tsivajënaeitayotecaejitsia.

³⁴ Lámparabë boënëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae, xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename panexainabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava épaxamënexa, nexata bitso pajamatabëcueneitacquirimë tsipae.

³⁵ Panayajivitaema xua panajamatabëxainabiabame, papecajamatabëcuene aitaquiriyaexanaeyaniva.

³⁶ Itsa paexananapananame pacuenia Dioso pacaitoroba, nexata pacajamatabëcueneitayotsiana Dioso. Tsiquirijavayo ata apo aitaquiri tsane panejamatabëcuene. Nexata pacuenia lámparabë daxita boënë xaniavaetsia itayoteca pecotiata, bajara pijinia pacuenia paxamë ata pacajamatabëcueneitayotsiana Dioso, jai Jesús jivi ayaibitsaëtoxanetojavabelia.

Pacuenia Jesús tsipaeba fariseovijavabelia, judíovi pecujarubivijavabelia ata, pacuenia bajarapamonae naneconita Diosojavabelia yabara pelivaisi

(Mt 23.1-36; Mr 12.38-40; Lc 20.45-47)

³⁷ Itsa baja Jesús najumevereta livaisi petsipaebijava, nexata fariseonë junatatsi Jesús penanabaninexa fariseonë pijabota. Jesús nexata najoneya fariseonë pijaboyalía. Naeca mesa muxuneneta penanabaninexa.

³⁸ Fariseonë itsa tane Jesús penabanijava anijatonë nacobequiatsinejeva, fariseonë jamatabëcuenenabenajaca. Pacuenia daxita judíovi pijacuena anijatonë nacobequiatabiaba penabanivajënae, apo itsi Jesús.

³⁹ Nexata Jesús jumaitsi fariseovijavabelia:

–Paxamë pafariseovimë panexaxaevajënae plato, taza ata, naniavelia bapaquiatame xaniavaetsia panijacuena. Tspipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Bajarapacuenia paquiatabiabi atamë xaniavaetsia panexaxaejavanënexa papecajamatabëcuene bijianaeyaniva picani, itsiata pananeconitaponame Diosojavabelia. Tspipaji bajarapacuenia paquiatabiabi atamë, caranata panejamatabëéthëtota panajamatabëxainabiabame pibisiacuene. Panajamatabëxainabiabame itsanë pecobcovë paneyacajërëtsinexa. Panajamatabëxainabiabamenua paneexanaexa pibisiacuene ata.

⁴⁰ ¡Apo paneyapëtaevi baja rovia! Dioso cajena pexanaenë daxitacuene. Dioso baja cajena pacaperabëexana. Pacajamatabëéthëxananua.

41 Pejanajamatabëcuene itsa paxainaejitsipame, nexata pexaniacuene patoexanabiabijitsipame itsamonaejavabelia. Daxita xua ata papecajamatabëcuene bijianaeyaniva, pajanijunavame panexaeyaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavabelia.

42 Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata diez xuabejeyajuvënëjava, caejavayo, parajutabiabame ofrendacuenia Diosojavabelia. Xanepana baja picani bajarapacuenia panerajutabiabijava Diosojavabelia. Itsiata bajarapacuenia parajutabiabi atamë, pepacuene apo pajitsipaemë Dioso. Bajaraxuata pananeconitame Diosojavabelia. Pananeconitamenua Diosojavabelia tsipaji pacuene ata picani xanepana panetoexanabiabinexa itsamonaejavabelia, apo pasivanajamatabëxainaemë. Bajaraxua picani paxamë bepanajamatabëxainame panetoexanabiabinexa itsamonaejavabelia, jai Jesús fariseovijavabelia.

43 Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! ¡Tsi-paji bepaayaijamatabëcuenevimë panataeyabiabame! Judíovi penaetautabiabibonëjava itsa panajoneyabiabame, pajitsipabiabame paneenaenexa peyayataevitsi penaenexa petsinubijavanëta. Pajitsipabiabamenua jivi papecabajacobinexa callejava bitso yayataeya, jai Jesús fariseovijavabelia.

44 Icatsia Jesús jumaitsi judíovi pecujarubivijavabelia, fariseovijavabelia ata:

—¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Paxamë itajara jivi bepatsita pexaniajamatabëcuenevimë tsabiabi pibisijamatabëcuene panexainaevi ata. Pacuenia itsamonaepona jivi pemëthëané matatsënëna apo peyapëtaexae xua xaina bëpënëareca, bajara pijinia itsi pamonaepacayaiyatane apo peyapëtaexae pacuenia pajamatabëcuenebejemë bëpënëa. Bajarapamonae pacayaiyatane tsipaji apo yapëtae bajarapamonae bëpënëa paneajamatabëcuenebejejava, jai Jesús judíovi pecujarubivijavabelia, fariseovijavabelia ata.

45 Nexata bajarapacuenia Jesús pejumaitsijavata, judíovi pecujarubiviayajuvënëne jumaitsi Jesúsjavabelia:

—Jesús, itsa mapacuenia jumaitsimëje, paxanë yabara ata pibisiacuenia jumaitsimë, jai Jesúsjavabelia judíovi pecujarubiviayajuvënëne.

46 Jesús nexata jumaitsi judíovi pecujarubinëjavabelia:

—¡Paxamë ata, judíovi panecujarubivi, ayaineconi panatsixainame Diosojavabelia! Palivaisianë ayapëbeje itsajivi ata pejumecovënëtsinexa, bajarapalivaisianë jivi patsipaebabiabame pejumecovënëtsinexa. Bajarapalivaisianë patsipaebabiabi atamë itsamonaepelumecovënëtsinexa, paxamë itsiata apo panajamatabëxainaemë paneexanaenexa bajarapacuenia, jai Jesús judíovi pecujarubinëjavabelia.

47 Icatsia Jesús jumaitsi judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! Bajayata pamatacabi jinavanapa panijasalainavimi, beyaxuababiaba Diosojumepaebivimi profetavi. Nexata juya paxamë bajarapaprofetavimi pemëthëanéjumaverca bonë paexanajebame, jivi itsa tane bajarapabonë, penajamatabënapitabiabinexa bajarapaprofetavimi.

⁴⁸ Bajarapacuenia paneexanaexae, pacuenejëpame bajayata panijasalinaivimi pexanaecuene. Panijasalinaivi bajayata beyaxuababiaba profetavimi. Nexata juya paxamë bonë paexanajebame bajarapaprotetavimi pemëthëanëjumavereca, jai Jesús judíovi pecujarubivijavabelia.

⁴⁹ Icatsia Jesús jumaitsi judíovi pecujarubivijavabelia:

—Bajarapacuenia paneexanaejavanexa yabara, daxitacuene Dioso peypapëtaenëxae, bajayata tajëvelia jumaitsi paxamë yabara mapacueniaje: “Bajarapamonaejavabelia toitorobianajë profetavi. Toitorobianajënuu apóstolevi ata. Bajarapamonae itsiata beyaxuababiabiana tatoitorobiviyajuvënëvi. Bejiobiaexanabiabiananua tatoitorobiviyajuvënëvi,” jai baja cajena bajayata tajëvelia Dioso bajarapacuenia paxamë paneexanaejavanexa yabara.

⁵⁰ Dioso baja cajena nacua pexanaejavaveliacujinae, panijasalinaivimi beyaxuabapona profetavimi. Nexata bajarapaneconi yajava paxamë pananeconitame Diosojavabelia. Nexata bajarapaneconi yajava Dioso pacananeconitsiaexanaena, paxamë aeconoxae mapamatacabitaje panejinavanapaevi.

⁵¹ Panijasalinaivimi profetavimi pebeyaxuabaponaejava, taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsaprotetavimi ata. Nexata bexëajavaberena ata icatsia panijasalinaivimi beyaxuaba Zacariáspijinëmi. Zacariáspijinëmi panijasalinaivimi beyaxuaba templobopanabota, baitsi templobobeje altarvënëjavabeje petuatujëta. Xaniajanë pacuenia pacatsipaebijitsiatsi. Nexata bajarapaneconi yajava Dioso pacananeconitsiaexanaena paxamë, aeconoxae mapamatacabitaje panejinavanapaevi, jai Jesús judíovi pecujarubivijavabelia.

⁵² Icatsia Jesús jumaitsi judíovi pecujarubivijavabelia:

—jPaxamë judíovi panecujarubivi, ayaineconi panatsixainame Diosojavabelia! “Vaxaitsi xaniavaetsia Dioso pejumelivaisi yapëtanetsi,” pajamatabëjamë tsabiabi picani. Itsiata baitsi jane apo payapëtaemë. Saicayalivaisi Dioso pejumelivaisivecua jivi patsipaebabiabame. Pacuenia bo baupaxatata jivi pejoneyaniva, bajara saya pacuenia paxamë paexaname jivijavabelia. Nexata itsamonae jitsipae ata pejonejava picani Dioso pijanacuayabetsia, paxamë saicayalivaisi panetsipaebabiabixae, apo pacopatsimë pejonenexa Dioso pijanacuayabetsia. Paxamë ata apo pajitsipaemë panejonenexa Dioso pijanacuayabetsia, jai Jesús judíovi pecujarubivijavabelia.

⁵³⁻⁵⁴ Bajarapacuenia Jesús pejumaitsicujinae, pitsapa baja bovecua. Bajaraxuacujinae judíovi pecujarubivi, fariseovi yajava, Jesús itoyatsi. Nexata jamatabëitonotabiabatsi. Jamatabëcuenejëbiaya livaisi yanijobabiabatsi. Nexata Jesús bijiaya itsa jumecanaviata, bajarapalivaisi yabara peneconitsinexatsi picani nacuaevetsinëjavabelia.

12

Pacuenia Jesús tsipaeba jivi pejumecovënëtsianiva fariseovi petsipaebilivaisitsi yabara pelivaisi

¹ Penacaetuataponaejavata jivi pepo ayaibitsaëtoxaneto cajena tsaponae, baitsi miles pajivibeje. Nexata jivi nataxucuetsabatxubapona. Nexata Jesús pijajivijavabelia copiaya tsipaeba livaisi, pejumecovënëtsianiva fariseovi itsa tsipaebatsi saicayalivaisi Dioso pejumelivaisivecua. Jesús pijajivijavabelia jumaitsi mapacueniaje:

—Xania panayajivitaema fariseovi pijalevadurayaniva. “Levadura,” itsa janë, peyamaxëitojorobilivaisi yabara pacajumaitsitsi. Fariseovi raja bepacatsita pexaniajamatabëcuenevi itajara tsane, pibisiajamatabëcuene pexainaevi ata.

² Daxita abaxë palivaisianë jivi aeconoxae apo yapëtae, bajarapalivaisianë itsamatacabi daxitajivi yapëtaeponaena xaniavaetsia. Pibisiacuene muetsia itsajivi pexanaejava ata, itsamatacabi xaniavaetsia yapëtaena daxitajivi.

³ Xua ata muetsia pavajunupaebame meravi, bajaraxua ata, itsamatacabi itsajivi vajunupaebiana matacabita daxitajivjavata. Xua ata pënëyatuucutsiboënëta baupa xatatsiaya muetsia vëpaxapaxajaiya pavajunupaebame, bajaraxua ata itsamatacabi itsajivi pinijijumeta vajunupaebiana jivi penacaetuatsijavata, jai Jesús pijajivjavabelia.

Pacuenia Jesús tsipaeba pijajivi pecujunaviyaniva jivivevi yabara pelivaisi (Mt 10.26-31)

⁴ Icatsia Jesús jumaitsi pijajivjavabelia:

—Tajamonae, pacatsipaebijitsiatsi. Pëtsa pacujunavame jivivevi ata. Bajarapamonae pacabeyaxuabi ata tsipae, acuenebi matavëjëa papecaitsacueniabinxä.

⁵ Biji rajane pacatsipaebijitsiatsi panecujunavinexa Dioso. Tsipaji Dioso caëjëpatsi papecaxabinxä infiernojavabelia papecabeyaxuabicujinae, jai Jesús pijajivjavabelia.

⁶ Icatsia Jesús jumaitsi pijajivjavabelia:

—Cinco ponëbeje barsui saya namatamota anijapalatanëyobeje. Tsipaji amatamobi. Bajarapacuenia amatamobi ata, itsiata caenëyo ata Dioso apo nacofënëtsi bajarapabaratsuiyajuvënë.

⁷ Paxamë rabiji bitso Dioso pacaasiva barsui matatoxenetsia. Tsipaji panamatamotame barsui matatoxenetsia. Dioso bitso papecaasivaxae, panematanatoxi ata, caematanatoyo canacujitsia, Dioso baja cajena namatajëta. Bajaraxuata pëtsa pacujunavame itsacuenejava ata, jai Jesús pijajivjavabelia.

Pacuenia Jesús pijajivi apo benayavajunuaxinae Jesús pijajivicuene yabara pelivaisi

(Mt 10.32-33; 12.32; 10.19-20)

⁸ Icatsia Jesús jumaitsi pijajivjavabelia:

—Pacatsipaebijitsiatsi raja. Daxita pamonae tajajivi, jivi pitabarata navajunupaebiana tajajivicuene. Bajarapamonae juya xanë, Daxitajivi Pematapijinë, vajunupaebianajë tajajivicuene Dioso pijaängelevi pitabarata.

⁹ Pamonae jumai tsane itsamonaejavabelia: “Xanë cajena Jesús apo pijajivitonë,” jai tsane, bajarapamonae yabara juya xanë, jumaitsinë tsane: “Mara pamonae cajena apo tajajivije,” janë tsane Dioso pijaängelevi pitabarata, jai Jesús pijajivjavabelia.

¹⁰ Icatsia Jesús jumaitsi pijajivjavabelia:

—Pajivi pibisiacuena nebaracuaicuaijai ata, xanë, Daxitajivi Pematapijinë, bajarapaneconi yabara itsa navajëta Diosojavabelia, itsiata vecuaajibiaexanaenatsi Dioso. Itsiata baitsi jane pajivi pibisiacuena baracuaicuaijai Espiritu Santo, bajarapajivi bajarapaneconi Dioso apo vecuaajibiaexanaetsi tsane, jai Jesús pijajivjavabelia.

¹¹ Icatsia Jesús jumaitsi pijajivjavabelia:

—Itsa pacacaponaelia tomaraevetsivjavabelia, judiövi penacaetuatabi-abibojavabelia ata, papecayanijobinxä, pëtsa pajamatabëcuenebëjamë panayajivicaicuaijijavanexa yabara.

¹² Tsipaji raja bajarapaepatota, Espiritu Santo pacacuaicuajiyaxanaena pacuenia panayajivicuajiamëjitsia, jai Jesús pijajivijavabelia.

Pacuenia Jesús jivi livaisi tsipaeba bitso pesivanajamatabëxainayanaiva ayaijava pexainajava pexainanexa yabara pelivaisi

¹³ Jivi ayaibitsaëtöxanetoyajuvënënë jumaitsi Jesúsjavabelia:

—Jesús, taxapijinë picani petëpaevajënae netocopata pevënamuto tapitsinexa pecobecovëyajuvënëjavanë. Nexata tamatapijinë pita bajaraxuanë. Nexata itorobare tamatapijinë tanerajutsinexa taxapijinë tanerajutsiapaebijavanë, jai bajaraponë Jesúsjavabelia.

¹⁴ Jesús nexata jumaitsi bajaraponëjavabelia:

—Itsajivi ata cajena apo nitorobi jueznëxanë, tananeconitsiaexanaenexa ponë naneconita. Itsajivi ata cajena apo nitorobi axapijinë pecobecovë patacatsicobetsatsinexabeje, jai Jesús.

¹⁵ Nexata icatsia Jesús jumaitsi daxitajivijavabelia:

—Xania pataema. Pëtsa bitso panajamatabëxainame ëpaxamënexa ayaijava panexainanexa. Tsipaji jivi pexainajava ayaijava xainae ata tsipae, bajarapamonae pexainajava yabara jamatabëcuenexanepanaeya apo jinavanapae tsipae, jai Jesús.

¹⁶ Nexata Jesús tsipaeba livaisi bajarapamonaejavabelia mapacueniaje:

—Ponapon bitso riconë. Pijapabianë tocapitsapabiabatsi ayaijava pexainacuenë.

¹⁷ Riconë nexata jamatabëjumaitsi: “¿De meta pacuenia exanaenajë? Ne-toajibi baja rovia taetaponaejavabelianexa taubijava,” jamatabëjai riconë.

¹⁸ Riconë nexata icatsia jamatabëjumaitsi: “Yapëtaniji rajane baja pacuenia exanaejitsianë. Paboxita jebabiabajë taubijava, penetsianicajë taexanaenexa icatsia ayaiboxanetonë bajarapacovëta. Bajarapaboxanetonëta jane baja jebianajë daxita taubijava, daxita tacobecovë yajava.

¹⁹ Nexata baja xainanajë bajayajebinexa daxitacuene xua namatavenonajë. Nexata jane baja xuacujinae nacueraevetsianajë. Pexaniacuenë nabanebiabianajë. Pexaniaviriranënuu matavëjëa apaeyabiabianajë taitajibinexa. Nexata barëyanë tsabiabi tsane,” jamatabëjai riconë.

²⁰ Nexata bajarapaepatota Dioso jumaitsi riconëjavabelia: “Apo neyapëtaenë baja rovia xamë. Ajena baja, mapameravitaje, tëpaename. ¿Jipatsa nexata nevënamuto pitsiana daxita nexaniavaetejebijavanëmi?” jai Dioso riconëjavabelia, jai Jesús mapalivaisije daxitajivijavabelia.

²¹ Icatsia Jesús jumaitsi bajarapamonaejavabelia:

—Bajara pijinia pacuenia paxamëyajuvënëvi ata tocopiapatsianatsi pamonae ayaijava natocaetuatapona ëpamonae pexainanexa. Bajarapamonae itsiata pepacuene bepejiobivi tsane Diosojavabelia, jai Jesús bajarapamonaejavabelia.

Pacuenia Dioso pijajivi eveta mapanacuataje yabara pelivaisi (Mt 6.25-34)

²² Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Pëtsa pasivana-jamatabëxainame ëpanexajava panevënajinavanapaenexa. Pëtsa pasivanajamatabëxainamenua ëpananaxatabijavanexa ata.

²³ Apo jinavanapaetsi cajena ëvajaxaejavanexa. Apo jinavanapaetsinua ëvajapanerabëxatabinexa.

²⁴ Pacanaëjëre pacuenia baratsui apo ubi pexaejavanexa. Apo notsinua penaveretaponaejava. Apo xainanua penaveretaponaejava peetsibonexa.

Itsiata Dioso rajutabiabatsi pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa pasivanajamatabëxainame ëpanexaejavanexa, ëpanenaxatabijavanexa ata.

²⁵ ¿Detsa jane ponë paxamëyajuvënënë cajëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta. Nexata saya najamatabëcuenecueratsipa pejamatabëcuenebëjjajava penavitsabiaexanaejavanexa. Tsipaji apo tonamatamotsitsi bajaraxua.

²⁶ Bajara pijinia pacatoitsi paxamë ata daxita xua pasivajamatabëcuenebëjamë. Apo pacatonamatamotsi. Bajaraxuata apo bepajamatabëcuenebëjamë itsacuenëjavayo ata yabara, jai Jesús pijajivijavabelia.

²⁷ Icatsia Jesús jumaitsi pijajivijavabelia:

—Pacanaëjere pacuenia bitso pexaniamatono pitsapa, mapamatonoje. Bajarapamatono apo natsijumanacuenebi. Penaxatatsijavanexa ata apo natoexanae. Bajayata nacuaevetsinë Salomónpijinë bitso pexainaeñemi. Naitabëtsiaya naxatabiaba bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso aitaë mapamatonotoxije.

²⁸ Paxamë, bevelia Dioso panejumecovënëtsivi, asaëya bepajumecovënërame Dioso papecaevetsijava. Ajena pitsijavata vayafota tanetsi pexaniaponamatanoxi. Bajaraxuacujinae, caematacabibejecujinae, tajuatsi baja bajarapaponamatanoximimi. Pacuenia Dioso aitaëyaexana ponamatanoxi, bajara pijinia pacuenia paxamë ata itsamatacabi Dioso pacaxatabiana piaitabëjjava.

²⁹ Bajaraxuata pëtsa pasivanajamatabëxainavanapame ëpanexaejavanexa, ëpanematavëjëapaajavanexa ata. Biji rajane pajumecovënëtavapanare Dioso.

³⁰ Pamonae Dioso apo pejumecovënëtsivi, bitso sivanajamatabëxainabiaba ëpexaejavanexa, ëpanaxatabijavanexa ata. Itsiata baitsi jane paneaxa Dioso paxainame. Bajaraponë yapëthane daxita xua panamatavenoname.

³¹ Bajaraxuata, daxita xua panamatavenoname, matatoxenetsia Dioso pijacuenie bitso pasivanajamatabëxainabiabianame Dioso pijacuenie panetoexanavanapænexa. Nexata Dioso pacarajutsiana daxita xua panamatavenoname, jai Jesús pijajivijavabelia.

Pacuenia Jesús tsipaeba pijajivi xaniavaetsia Dioso petonacuenebavapanæna itsamatacabi ayaijava pexainænexa athëbëtsia yabara pelivaisi (Mt 6.19-21)

³² Icatsia Jesús jumaitsi pijajivijavabelia:

—Tajamonae, paxamë patajajivimë pacaeviyiomëbeje ata, pëtsa pajunavame. Tsipaji paneaxa pacaitapeta panecobenaevetsinexa pamatacabi bajaraponë evetsiana daxitacupe.

³³ Pacanajere panexainaeyajuvënëjjava, bitso paneasivajava ata. Nexata bajarapapalata parajutsianame bitso bepejiobivijavabelia. Nexata juya Dioso athëbëtsia pacarajutsiana bitso penamatamotsijava, apo pevererecaejava. Bajarajotatsia acuenie pejonajava penacobetoxotsivi papeyayacajërëtsinexa. Itsanë ata ajibi papecatoucubaxaenënexa.

³⁴ Panacuatatsia pacatoxaniavaeta panexainaejavanexa, bajarapanacua panejamatabëëthëtovetsina pajamatabënajinavanapænename, jai Jesús pijajivijavabelia.

Pacuenia Jesús pijajivi tsipaeba pacujinae icatsia patsijitsiatsica najamatabêcuenexaniavaetsiaya pevajënae pijajivi pecopiaevetavanapaenexatsi yabara pelivaisi

³⁵ Jesús icatsia pepatsijavanexatsica tajëvelia navajunupaeba. Jesús jumaiti pijajivijavabelia mapacueniaje:

—Icatsia raja jemata patsianicajë. Nexata najamatabêcuenexaniavaetsiaya panecopiaevetavanapaename.

³⁶ Payapëtaneme rabaja mapacuenije. Petuxanenë itsa pona penacasabifiestajavabelia, pijajivi tonajumecopata meravijebi ata pecopiaevetavanapaenexatsi pepatsijavarena. Nexata petuxanenë pijajivi meravi ata copiavetavanapatsi. Nexata petuxanenë jemata meravi najetaruae ata, baupa itsa docodocota, nexata bajarapamonae bepijia tobaupata pijatuxanenë.

³⁷ Bajarapamonae barëya pijatuxanenë naëcotsiaya pecopiaevetavanapaejavata pepatsixae. Xaniajanë pacuenia pacatsipaebijitsiatsi. Nexata petuxanenë pijajivi caeuenia petobaupatsixaetsi, petuxanenë pijajivi sivajamatabêcuenebarëya. Nexata petuxanenë pepatsicujinae xaniavaeta mesa. Enaeyaexanaena pijajivi. Nexata caranata petuxanenë bajarapamonae bepijajivitonë nataeya rajuta pexaejava pijajivi.

³⁸ Meravi tuatuajëta petuxanenë patsi ata, itsa jume, matabivëpata patsi ata, nexata petuxanenë pijajivi naëcotsiaya pecopiaevetavanapaejavata pijatuxanenë pecaxitarabixaetsi, petuxanenë pijajivi barëya.

³⁹ Pacanaëjère mapacuenije. Bo pexainanë itsa yapëtaejitsipa paepatota meravi pijabojavaberena patsijitsia pecobecovë petonacobetoxotsinënexatsi, nexata apo majitsi tsipae. Vajënaeevetecaejitsipa meravijebi. Apo copatsi tsipae pijaboyaberena petojoneyanivatsi penacobetoxotsinënexa.

⁴⁰ Bajara pijinia pacuenia paxamë ata najamatabêcuenexaniavaetsiaya panecopiaevetavanapaename tapatsijavatsica. Tshipaji xanë, Daxitajivi Pematapijinënë, paepatota apo panejamatabënjajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús pijajivijavabelia livaisi tsipaeba, petuxanenë pijajivitonëbeje pelivaisicuenia, yabara pelivaisi

(Mt 24.45-51)

⁴¹ Pedro jumaiti Jesúsjavabelia:

—Tajatuxanenë, çpalivaisi aeconoxae panetsipaebame, baja tsaja palivaisi ëpaxanë panijajivinehanë? Itsa jume, çitsamonaenexa ata tsaja yajava? jai Pedro.

⁴² Jesús nexata jumaiti Pedrojavabelia:

—Mara pejamatabêcuenetsivinexa yabara pacatsipaebatsije. Petuxanenë pijajivitonë, ponë xaniavaetsia pijatuxanenë pecovëta tonacuenebaponapona pijacuene, maitisije. Petuxanenë pijajivitonë itsajamatabêcuene xainaenejeva, copiaevetaponapona pijatuxanenë pepatsimatabebijavabelianexa. Bajaraponë pijatuxanenë pijajivi pecovëta toevetaponapona xaniavaetsia. Toabataponapona pexaejava caematacabi canacujitsia pacuenia itorobatsi pijatuxanenë.

⁴³ Bajaraponë bitso barëya pamatacabi pijatuxanenë pata xaniavaetsia pijajivi pecovëta petoevetaponaponaexae.

⁴⁴ Xaniajanë pacuenia pacatsipaebijitsiatsi. Ponë bajarapacuenia xaniavaetsia tonacueneba pijatuxanenë pecovëta, bajaraponë icatsia evetsiaexanatsi daxita xua xaina pijatuxanenë.

⁴⁵ Petuxanenē pijajivitonē itsa piamatabēcuenebejenē tsipae, nexata bajaraponē pijatuxanenē pecovēta jamatabējumai tsipae: “Tajatuxanenē ajibi tsarucae tsane bajayajebi,” jamatabējai tsipae. Nexata pijatuxanenē pijajivi, pamonaē evetsiaexanatsi xaniavaetsia picani petoevetsinexa, toconibabeyabiijitsipa. Conibabeyabiijitsipa pebijivi, petiriavi ata. Bajaronē ayajava pexaejava xaeyabiabijitsipa. Aitajibinua tsabiabi tsipae.

⁴⁶ Nexata itsajota apo jamatabēnajinae tsipae pijatuxanenē pepatsijavanexa, bajarapaepatota jemata patsipa pijatuxanenē. Nexata bajaraponē pijatuxanenē pinijicuenia naneconitsiaexanaejitsipatsi. Bajara pininia pacuenia Dioso ata itsamatacabi pinijicuenia naneconitsiaexanaena pamonaē Dioso apo pejumecovēnētsivi, jai Jesús Pedrojavabelia.

⁴⁷ Icatsia Jesús jumaitsi pijajivijavabelia:

—Ponē itsanē pijajivitonē, yapētae ata picani pacuenia itorobatsi pijatuxanenē petoexanaenexa, itsiata itsa apo toexanaē pijatuxanenē pitorobicueniatsi, bajaraponē pinijicuenia jumaconibabejitsipatsi ayaicuerobocotota.

⁴⁸ Ponē ata pininia itsanē pijajivitonē, itsa apo jumeyapētae xaniavaetsia petoexanaenexa pacuenia pijatuxanenē itorobatsi, nexata pijatuxanenē pitorobicueniatsi saicayacuenia itsa toexana, bajaraponē ata jumaconibabejitsipatsi. Itsiata pinijicuenia apo jumaconibabe tsipaetsi. Pajivi pininia ayajava rajutatsi, bajarapajivi yabara vaxaitsi basivajamatabējumaitsi: “Juya meta mapajivije ayajava rajutabiabiana itsamonaējavabelia,” basivajamatabējaitsi. Pajivi pininia evetsiaexanatsi ayajava, bajarapajivi pevet-siaexanaenētsi sivajamatabējumaitsi: “Itsa netocanacuenebiana taevetsiaexanaejava, ayajava netopitsapaena,” sivajamatabējaitsi pevet-siaexanaenētsi, jai Jesús pijajivijavabelia.

Pacuenia Jesús apo penajuajumecovēnētsixae, nacaemonaē ata apo najamatabēcuenejēpae tsane yabara pelivaisi (Mt 10.34-36)

⁴⁹ Icatsia Jesús jumaitsi pijajivijavabelia:

—Xanē raja patajopajē daxitanacuapijivi pibisiacuene pexanaeneconi yabara tasivatēpaenexa. Nexata bajarapamonaeyajuvēnēvi itsamonae nejumecovēnētsiana. Nexata nacaemonaē ata apo najamatabēcuenejēpae tsane. Itsa baja capanepaeya cruzata daxitajivi sivatēpaejitsipajē, jamatabēcuenebarēyanē baja tsipae.

⁵⁰ Itsiata baitsi jane abaxē netosajina bajaraxua yabara tanejamatabēcuenejētsinexa tanebeyaxuabijavata. ¡Bitso baja rovia najamatabēxainajē! ¡Matapania nebeyaxuabiana, jamatabēcuenecaevianajē!

⁵¹ Pētsa panesivajamatabējumaitsimē mapacueniaje: “Jesús rabaja patsica mapanacuayabetsica daxitajivi mapanacuataje najamatabēcuenejēpaeya pejinavanapaeyaexanaenexa,” panesivajamatabējamejē pētsa. Bajaraxuanexa apo patsinētsica. Biji rajane xanē tapatsixaetsica mapanacuayabetsicaje, jivi itsa nejumecovēnētsiana, apo najamatabēcuenejēpae tsane pamonaējavabelia apo nejumecovēnētsi, nacaemonaē ata. Itsamonae napijavajabit-saē tsane. Nexata apo najamatabēcuenejēpae tsane.

⁵² Ajena mapamatacabijavaveliacujinaeje jivi apo najamatabēcuenejēpae tsane. Cinco pajivibeje, nacaemonaē ata, caebota pejinavanapaevi ata, apo najamatabēcuenejēpae tsane xanē apo tanenajuajumecovēnētsixaebeje. Pamonaē cinco pajivibeje nacaemonaē, bajarapamonaeyajuvēnēvi, acueyabi pajivibeje, nejumecovēnētsiana. Anijajivibeje apo nejumecovēnētsi tsane. Itsa jume, anijajivibeje nejumecovēnētsiana. Acueyabi pajivibeje apo nejumecovēnētsi tsane.

⁵³ Bajarapabopijivi, paxabeje pexēnatobeje, apo najamatabēcuenejēpaebeje tsane xanē apo tanenajuajumecovēnētsixaabeje. Petirivabeje pijinia, penabeje pexēnatoyobeje ata, apo najamatabēcuenejēpaebeje tsane xanē apo tanenajuajumecovēnētsixaabeje. Pamebeje pecopenabeje ata apo najamatabēcuenejēpaebeje tsane xanē apo tanenajuajumecovēnētsixaabeje, jai Jesús pijajivijavabelia.

Pacuenia Jesús asaēya jivi muxujioba apo pecanaējētsixae Jesús Dioso pexēnatocuene yabara pelivaisi
(Mt 16.1-4; Mr 8.11-13)

⁵⁴ Jesús icatsia jumaitsi jivi ayaibitsaētoxanetojavabelia:

—Itsa pataneme vaēvetsica itarērēbo pepitsapaejava, nexata pajumaitsimē tsabiabi: “Ajena raja emajitsia,” pajamē tsabiabi. Nexata bajarapamatacabi ema jopabiaba.

⁵⁵ Itsa pataneme jovibo pepitsapaejava epatajērētsiarena la surverena, pajumaitsimē tsabiabi: “Ajena raja icotia ataju tsane,” pajamē tsabiabi. Nexata bajarapamatacabi icotia ataju tsabiabi.

⁵⁶ Nexata itsamonae pacatane bepatsita pexaniajamatabēcuenevimē itajara, papibisijamatabēcuenevi atamē. Payapētaeyabiabame pacuenia matacabi itsijitsia itarērēbo pepitsapaejava panetaeyabiabixae. Bajarapacuenia picani payapētaeyabiabame. Itsiata baitsi jane patae atamē daxita xua Juanpijinēmi jivibautisabinēmi exanapona, patae atamēnua daxita xua xanē ata exanaponajē, caranata xanē apo paneyapētaemē Dioso athēvētsica taneitorobinēcuenetsica, jai Jesús jivi ayaibitsaētoxanetojavabelia.

Pacuenia penaneconitsijivi xaniavaetsia bebarēcuaijai pajivijavabelia naneconita penasivajamatabēxanepanaenexabeje, peneconitsiyanivatsi jueznējavabelia, yabara pelivaisi
(Mt 5.25-26)

⁵⁷ Jesús icatsia jumaitsi jivi ayaibitsaētoxanetojavabelia:

—Pacanaējere panijacuata paneexanaenexa pacuene xanepana.

⁵⁸ Itsa pananeconitame itsajivijavabelia, nexata itsa pacapona bajarapajivi jueznējavabelia papecaneconitsinexa, namutua xaniavaetsia panabarēcuaijaijamērebeje panenasivajamatabē xanepanaenexabeje xua yabara pacaneconitsijitsia. Bajarapacuenia xaniavaetsia panabarēcuaijaijamērebeje papecanutsiyaniva jueznē pitabarata. Tsipaji raja jueznē itorobijitsipa policiavi panijaneconi yabara papecacaponaenexa penaneconitsivi pejebabiabiboyabelia. Nexata policiavi pacananeconitsiaexanetsipa penaneconitsivi pejebabiabibota.

⁵⁹ Xanijanjē pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemē tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús jivi ayaibitsaētoxanetojavabelia.

13

Pacuenia jivi benajamatabēcuenepēnēyorota pibisiacuene pexanabiabi javavecu yabara pelivaisi

¹ Itsamonae jumaitsi Jesúsjavabelia:

—Galilea nacuaverena pepatsivi, baca beyaxuaba Jerusalén tomarata templobota. Bajarapamonae baca beyaxuaba ofrendacuena pevi perajutsinexa Diosojavabelia. Nexata bajarapaepatota nacuaeveltinē Pilato

pibisiacuene exana. Itoroba vajabitsaë Galilea nacuapijivimi pebeyejebinexatsi templobota. Itsajota Galilea nacuapijivimi baca beyaxuababuata, bajarapacovëta icatsia beyejebatsi bajarapamonaemi. Nexata bajarapamonaemi pijana namatajërëata bacajana yajava, jai itsamonaë Jesúsjavabelia.

² Jesús nexata jumaitsi bajarapamonaëjavabelia:

–“Pamonaemi bajarapacuenia beyejebatsi, bitso meta pibisiacuene pexanaevimi daxita pijanacuapijivi matatoxenetsia. Bajaraxuata beyejebatsi penaxuabinexa Diosovecua,” ¿pajamatabëjamë tsaja?

³ Jume baja cajena. Bajarapamonaemi ata picani bitso pibisiacuene apo exanaë pijanacuapijivi matatoxenetsia. Itsiata Dioso tocopatatsi bajarapamonaemi pebeyejebinexatsi, penacopabivi pecanaëjëtsinexa Diosojavabelia penaneconitsijava. Paxamë ata itsa apo pacopabimë tsane pibisiacuene penexanabiabijava, itsa apo panajamatabëcuenepënëyorotsimë tsane Diosojavabelia, nexata bajarapacuenia paxamë ata panaxuabianame Diosovecua itsa patëpaename.

⁴ Pamatacabi ata jemata Jerusalén tomarata jopanucaya athëbëabetsia piapiabotsia, Torre de Siloévnëbo, dieciocho pajivibeje matacënëbatsi. Nexata baja tëpa bajarapamonaemi. “Pamonaemi matacënëbatsi, pibisiacuene meta bitso pexanaevimi daxita Jerusalén tomarapijivi matatoxenetsia. Bajaraxuata matacënëbatsi penaxuabinexa Diosovecua,” ¿pajamatabëjamë tsaja?

⁵ Jume baja cajena. Bajarapamonaemi ata picani bitso pibisiacuene apo exanaë pijatomarapijivi matatoxenetsia. Paxamë ata itsa apo pacopabinë tsane pibisiacuene paneexanaëjava, itsa apo panajamatabëcuenepënëyorotsimë tsane Diosojavabelia, nexata daxita paxamë ata bajarapacuenia panaxuabianame Diosovecua itsa patëpaename, jai Jesús bajarapamonaëjavabelia.

Pacuenia Jesús jivi livaisi tsipaëba piacuaijibihigueranae pelivaisicuenia yabara pelivaisi

⁶ Jesús jivi livaisi tsipaëba piacuaijibihigueranae pelivaisicuenia. Jesús jivi piacuaijibihigueranae pelivaisicuenia petsipaëbijavata, pijaperujujamatatabëcuene apo penavecuacopatsivi yabara Jesús jumaitsi mapacueniaje:

–Pebi pijapabi tuatuajëta caënaë peubinaë xainanuta, higeravënënaë. Nexata picani taeyojopalia bajaraponaë penacuaitsijava. Itsiata baitsi jane apo nacuaitsi.

⁷ Nexata jumaitsi pijapabi petoevetsinëtsijavabelia: “Taëma maponaëje. Acueyabi picani pavaibeje taeyopajë tacuainotabiabinexa maponaëcuaie. Itsiata acuaijibi tsabiabi. Nexata baja netonicataxuaë. Apo becopatantitsi bajaraponaë. Ira caranatanuca saya,” jai pijapabi pexainaënë.

⁸ Itsiata baitsi jane pijapabi petoevetsinëtsi jumaitsi: “Copatanutsianatsibeje abaxë mapavaije. Nexata bacatuirabianajë bacatasitoxita.

⁹ Baja raeta xuacujinaë xanëpanaëna. Nexata aëconoxaë pavai nacuaitsiana. Nexata aëconoxaë pavai ata itsa apo nacuaitsi tsane, nexata jane baja caticataxuanatsi,” jai pijapabi petoevetsinëtsi, jai Jesús.

Bajarapacuenia Jesús jumaitsi tsipaji Dioso xuabijitsia pamonaë pijaperujujamatatabëcuene apo pecopatsivi.

Pacuenia Jesús jamatejemayaëxana judiövi penacueraevetsimatacabita penajumafurutsivami yabara pelivaisi

¹⁰ Itsamatacabi judiövi penacueraevetsimatacabita, Jesús jivi livaisi tsipaëba judiövi penacatuatabibibota.

11 Bajarajota naeca petiriva. Dovathi pejamatabëcueneta bajarapova dieciocho pavaibeje xaina penajumafurutsicujinae. Nexata apo caëjêpaetsi tsiquirijavayo ata penaepasirovitsijava.

12 Itsa Jesús taeyeta bajarapova, nexata junarena. Jesús jumaitsi bajarapovajavabelia:

—Niatanejavami rabaja cavecuaajibi, jai Jesús bajarapovajavabelia.

13 Jesús tsimatanacobeuata bajarapova. Nexata bajarajota petiriva naepasirovitsixanepana baja. Nexata bajarapova jumai tsaponae Diosojavabelia:

—¡Diosomë, bitso pexaniacue ne toexaname ayajamatabëcuenenëxaemë! jai tsaponae bajarapova Diosojavabelia.

14 Itsiata baitsi jane judíovi penacaetuatabiabibo pevetsinë Jesús baraanaepanatsi judíovi penacueraevetsimatacabita Jesús pejamatejemayaexanaexae penajumafurutsiva. Tsipaji judíovi apo jitsipae itsajivi ata itsacuenenjavayo pexanaenexa penacueraevetsimatacabita. Nexata judíovi penacaetuatabiabibo pevetsinë jamatabëjumaitsi:

—Jesús nacueneba penacueraevetsimatacabita. Jesús apo jumecovënëtsi patajasalinaivi patanitavetsicuene, jamatabëjai.

Nexata judíovi penacaetuatabiabibo pevetsinë najumejematsiaya jumaitsi jivijavabelia:

—Caesemana canacujitsia xainaponatsi seis pamatacabibeje vajanacuenebinexa. Bajarapamatacabijava bepatatsi vajanacajamatejemayaexanaenexa. Nexata abaxë penacueraevetsimatacabita apo bepatsitsi vajanacajamatejemayaexanaenexa, jai judíovi penacaetuatabiabibo pevetsinë najumejematsiaya jivijavabelia.

15 Nexata Jesús jumaitsi judíovi penacaetuatabiabibo pevetsinëjavabelia:

—Paxamë saya jivi paneyamaxëitojorobivi. Bepatsita pexaniajamatabëcuenevimë itajara itsamonae, papibisiajamatabëcuenevi atamë. Paxamë ata panacuenebabiabame penacueraevetsimatacabita ata. Paxamë penacueraevetsimatacabita ata panijabaca, burro ata, paisinabiabame panecaponaenexa merajavabelia mera piapaenexa.

16 Mapovaje Abrahampijinë pemomoxiyajuvënëva jamatejemayaexanajë. Tsipaji bajarapova namatamota Dioso pitabarata dajubinë matatoxenetsia. Dovathi pejamatabëcueneta penajumafurutsicujinae, xaina baja dieciocho pavaibeje. Bajaraxuata penacueraevetsimatacabita ata jamatejemayaexanajë piatanecuenevecua, jai Jesús judíovi penacaetuatabiabibo pevetsinëjavabelia.

17 Bajarapacuenia Jesús itsa jumaitsi, nexata daxita pecueneitoyavitsi moya ena. Aura tsenae bajarapamonae. Itsamonae pijinia Jesús sivajamatabëcuenebarëyatsi pinijicuene Dioso pesaëta pexanaponaejavanë yabara.

Pacuenia mostazaxutoyo pejuvicujinae, mostazanae bepijia vitsaba yabara pelivaisi

(Mt 13.31-32; Mr 4.30-32)

18 Jesús jumaitsi jivijavabelia:

—¿De meta xua pelivaisi jêpa Dioso pijajivi bepijia ayaibitsaëttoxaneto penaexanaejavanexa? Jivi meta peyapëtaenexa ayaibitsaëttoxaneto bepijia Dioso pijajivi penaexanaejavanexa, mostazaxutoyo meta pelivaisicuenia tsipaebianajë.

19 Pebi capona mostazaxutoyo peubinexa pijapabita. Nexata baja mostazaxutoyo pebi itsa uba pijapabita, bajarajota mostazanae bepijia vitsaba. Bepijia baja mostazanae pinijinae naexana. Baratsui ata exana

pematapenanë bajaraponaemaxëranaxijava. Bajara pijinia pacuenia Dioso pijajivi ata itsane. Bepijia ayaibitsaëtoخانeto naexanaena Dioso pijajivi, jai Jesús jivijavabelia.

Pacuenia pan pexanaematabënexa, levaduravënëjjava fufunaeyaexana yabara pelivaisi
(Mt 13.33)

²⁰ Icatsia Jesús jumaitsi jivijavabelia:

—¿De meta palivaisi jëpa pecacajëpaejjava Dioso pijajivi pevetsicuene daxitanacuanëjjava? ¿De meta pacuenia jivi livaisi tsipaebianajë peyapëtaenexa Dioso pijajivi pevetsicuene peyacaajëpaejjava daxitanacuanëjjava?

²¹ Levaduravënëjjava meta pelivaisicuenia tsipaebianajë. Petiriva pan pexanaenexa, acueyabi patarrobeje trigobenonë matajërëba levaduravënëjjavata. Nexata pan pexanaematabënexa, ayaimatabë.

Tsiquiribaupayo epatajërëtsialia yabara pelivaisi
(Mt 7.13-14, 21-23)

²² Jesús jivi livaisi tsipaebanajetaruca pinijitomaranëjjava, tsiquiritomaxijava ata, pepatsinexa Jerusalén tomarabelia.

²³ Nexata Jesús jivi livaisi petsipaebijavata, itsanë yanijobatsi Jesús. Bararaponë jumaitsi Jesúsjavabelia:

—Jesús, ¿Dioso tsaja capanepaena caebitsaëtoyo saya? jai.

Nexata Jesús jumaitsi daxita jivijavabelia:

²⁴ —Xaniajanë pacuenia pacatsipaebijitsiatsi. Pajamatabëcuenesaëmëre bitso panevajënaeyabelia itsamatacabi athëbëtatsia panejonenexa tsiquiribaupayojavalia. Jivi picani itsamatacabi athëbëtatsia ayaibitsaëtoخانeto jamatabëjonena tsiquiribaupayojavalia. Itsiata apo caejëpaetsi tsane pejonenexa.

²⁵ Bo pexainanë itsa nonotapunaena baupa pexatatsinexa, paxamë bo jumapënëvelia panubenaename. Nexata picani panejonenexa pabau-padocodocotsianame. Pajumaitsimë tsane: “Tajatuxanenë, panetobau-pare,” pajamë tsane. Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë,” pacajai tsane.

²⁶ Nexata paxamë pajumaitsimë tsane: “Xamë baja cajena panebarënanabame. Panebarëmatavëjëaapamenua. Patajatomaranëjjava ata baja cajena jivi livaisi tsipaebabiabame,” pajamë tsane.

²⁷ Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë. Pibisiacuene paneexanabi-abi, panevecuaponarë baja,” pacajai tsane.

²⁸ Dioso pijanacuatatsia pataename Abrahampijinë, Isaacpijinë ata, Jacobpijinë ata, daxita Diosojumepaebivimi profetavi ata. Daxita bajarapamonae penajuajinavanapaejjava Dioso pijanacuatatsia pataename. Nexata paxamë bajarajota pinijicuenia panatsinuename. Panavonosinianamenua bitso paneanaepanaexae. Tsipaji paxamë Dioso pijanacuavecua pananaxu-abinexa pacaxuabiana infernojavabelia.

²⁹ Itsavirijamevi patsiana daxitanacuanëjavaverena. Nexata daxita bajarapamonae naenaena penabaninexa Dioso pijanacuatatsia.

³⁰ Pamonaē aeconoxae mapamatacabitaje ayaijamatabēcuenevi tanetsi, bajarapamonaeyajuvēnēvi, ayaiBITSaētoXaneto, itsamatacabi Dioso beveliajamatabēcuenevi exanaenatsi. Pamonaē pijinia mapamatacabitaje beveliajamatabēcuenevi tanetsi, bajarapamonaeyajuvēnēvi, ayaiBITSaētoXaneto, itsamatacabi Dioso ayaijamatabēcuenevi exanaenatsi, jai Jesús daxitajivijavabelia.

Pacuenia Jesús najamatabēxainaeya sivanua Jerusalén tomarapijivi yabara pelivaisi

(Mt 23.37-39)

³¹ Itsa baja Jesús najumevereta jivi livaisi petsipaebijava, fariseovi pata Jesúsjavaberena. Nexata fariseovi jumaitsi Jesúsjavabelia:

–Jesús, mapatomara baja vecuaponareje. NacuaeVetsinē raja Herodes cabeyaxuabiapaeba, jai fariseovi.

³² Jesús nexata jumaitsi fariseovijavabelia:

–Paponaremelia. Bajaraponē Herodes, jivi peyamaxēitojorobabiabinējavabelia, pajumaitsimē tsane mapacueniaje: “Jesús raja jumaitsi: ‘Ajena raja abaxē, meravia ata icatsia, vecuacapitsapaponaenajē dovathi peyajavajinavanapaevi. Piavitanevi ata jamatejemayaexanaponaenajē. Nexata abaxē pameravia bajarapacuenia taexanaejava copatsianajē,’ jai raja Jesús,” pajamē tsane Herodesjavabelia.

³³ Diosojumepaebivimi profetavimi beyejababatsi Jerusalén tomarata. Tsipaji profetavi acuenebi saicayatamarata petēpaejava Jerusalén tomaravecua. Bajaraxuata xanē ata ponaenajē tavajēnaeyabelia Jerusalén tomarabelia. Nexata ponaenajē ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

³⁴ Nexata Jesús najamatabēxainaeya sivanua Jerusalén tomarapijivi. Jerusalén tomarapijivi Jesús najamatabēxainaeya pesivanuejavata, jumaitsi mapacueniaje:

–¡PaJerusalén tomarapijivimē, pabeyajebabiabame Diosojumepaebivimi profetavi! ¡Ibotonēta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamējavaberena! ¡Pacuenia vacara banacoxicaetuata pecorofetobēxēpanaberena, bajara pijinia pacuenia xanē ata picani bitso jitsipabiabajē patacacaetuatsinexa, patacapanepaenexa picani panijaneconivecua! ¡Itsiata baitsi jane paxamē apo pajejamē cajena!

³⁵ Panejumetaema. Dioso rabaja pacacopata papecaevetiabijavami. Nexata baja panijatemplobota Dioso apo ponaponaē. Xaniajanē pacuenia pacatsipaebijitsiatsi. Paxamē baja apo panetaemē tsane mataVējēa. Matapania itsa panejumecovēnētame Cristonēcuenenē, Dioso taneitorobinētsica, icatsia panetaename. Itsa panesivajamatabējumaitsimēnua tsane: “Dioso, bitso yavenonare maponē najetarucaje. Bajaraponē nejamatabēcueneta najetaruca,” itsa panesivajamatabējamē tsane, nexata jane baja icatsia panetaename itsa patsianicajē, jai Jesús mapacueniaje najamatabēxainaeya pesivanuejavata Jerusalén tomarapijivi.

14

Pacuenia Jesús jamatejemayaexana pebi, bitso daxitanē peyajinaenē, yabara pelivaisi

¹ Itsamatacabi, judiõvi penacueraevetsimatacabita, Jesús pona fariseovi penamatacaitorobinè pijaboyabelia penanabaninexa. Nexata bajarapabota itsamonae fariseovi Jesús naitaxutocaevetatsi.

² Nexata Jesús pitabarata eca pebi, daxitanè peyajinaenè.

³ Jesús nexata jumaitsi judiõvi pecujarubivijavabelia, fariseovijavabelia ata:

—¿Penacueraevetsimatacabita ata tsaja piavitanevi vajajamatejemayaex-anaenexa, Dioso nacatocopata? Jume. ¿Apo nacatocopatsi tsaja? jai Jesús judiõvi pecujarubivijavabelia, fariseovijavabelia ata.

⁴ Itsiata bajarapamonae moya ena. Nexata Jesús cobepita peyajinaenè. Jamejemayaexana baja. Itoroba baja peponaenexa bajarapabovecua.

⁵ Jesús nexata jumaitsi judiõvi pecujarubivijavabelia, fariseovijavabelia ata:

—Itsa panijaburro, panijabaca ata, pacatopaejitsipareca meramèthèareca, nexata penacueraevetsimatacabita ata, bepìjia pajutarècèpaejitsipame. ¿Baja tsabaitsi jane? jai Jesús judiõvi pecujarubivijavabelia, fariseovijavabelia ata.

⁶ Nexata bajarapamonae acuenebi pejumecanaviatsijava Jesúsjavabelia.

Pacuenia Jesús jivi muxujioba peyaiyataevitsi penaenexa petsinubijavanèta penaenexa penatsiitapetsiyaniva yabara pelivaisi

⁷ Fariseonè pijabota Jesús tane fariseonè pejunatsivi. Bajarapamonae natsiitapeta peyaiyataevitsi penaenexa petsinubijavanèta penaenexa mesa muxuneneta. Nexata Jesús muxujioba bajarapamonae beveliajamatabècuenevi penataenexa. Jesús jumaitsi daxitajivijavabelia mapacueniaje:

⁸ —Itsa pacajunata panenanabaninexa penacasabifiestajavabelia, pètsa panatsiitapetame paneenaenexa peyaiyataevitsi penaenexa petsinubijavanèta. Tsipaji itsanè ayaijamatabècuenenè paxamè matatoxentsia itsa najunatsi, napatsipa.

⁹ Nexata papecajunatsinè pacacujitsiparena. Nexata pacajumai tsipae: “Tocopare bajaraxua maponè peecaenexaje,” pacajai tsipae. Nexata paxamè pauramè tsipae itsa pacanatixitsiaexana paneecaenexa beveliajamatabècuenevi penaenexa petsinubijavanèta.

¹⁰ Itsa pacajunata, paenaename beveliajamatabècuenevi penaenexa petsinubijavanèta. Matapania papecajunatsinè itsa pacajumai tsane: “Natixiremena. Peyaiyataevitsi penaenexa tatsinubijavanèta ecare,” itsa pacajai tsane, paenaename bajaraxuanèta. Nexata bajarapacuenia daxita mesa muxuneneta panenajuaenaevi pacataena papecayiyataejava papecajunatsinè.

¹¹ Pajivi ayaijamatabècuenejivi natane, bajarapajivi beveliajamatabècuenejivi taenatsi Dioso. Pajivi pijinia beveliajamatabècuenejivi natane, bajarapajivi ayaijamatabècuenejivi taenatsi Dioso, jai Jesús judiõvi pecujarubivijavabelia, fariseovijavabelia ata.

¹² Nexata Jesús icatsia jumaitsi pejunatsifariseonètsijavabelia:

—Itsa junatame itsamonae nebarènanabaninexa nijabota matonejepijijava, itsa jume, caniviyopijijava ata, pètsa junatame èneyapètaevi. Pètsa junatame nebarènanabaninexa ènijamonae. Pètsa junatame ènijamonaeviriavi ata. Pètsa junatame èricovi, pamonaè nijabo muxuneneta jinavanapa. Tsipaji bajarapamonae juya canamatamojunatsipa pijabota pecabarènanabaninexa. Nexata bajarapacuenia canamatamotsipa bajarapamonae.

13 Itsa junatame itsamonae fiesta nebarëexanaenexa, junatsianame bepejio-bivi, penabejenaevi ata, pejayujayunaevi ata, bitso pitaxutotsëcënaevi ata.

14 Nexata bajarapacuenia pepacuenie jamatabëcuenebarëyamë tsane. Tsi-paji bajarapitsivi acuenebi juya pecanamatamojunatsijava tsane. Nexata nijamatamo xainaename pamatacabi icatsia Dioso asaëyaexanaena pamonae tëpa, pexaniajamatabëcuenevimi, jai Jesús pejunatsifariseonëtsijavabelia.

Pacuenia Jesús jivi livaisi tsipaeba pinijifesta pexanaenë pelivaisicuenia yabara pelivaisi
(Mt 22.1-10)

15 Daxita mesa muxuneneta penaevi jumetane Jesús petsipaebilivaisi. Nexata fariseoviyajuvënënë jumaitsi Jesúsjavabelia:

—Jamatabëcuenebarëya tsane pajivi nanabaniana Dioso pijanacuatsia, jai fariseoviyajuvënënë.

16 Nexata fariseovi peyapëtaenexa itsamonae Dioso apo pejume-covënëtsijava, junatsi atatsi, Jesús jumaitsi comparacióncuenia mapacueniaje:

—Fiesta pexanaenë pijajivi itoroba ayaijava pexaejava pexanaenexa. Nex-ata tajëvelia junatsiaexana jivi ayaibitsaëtoxaneto petopatsinexatsi.

17 Bajaraxuacujinae pexaejava baja itsa vereta, fiesta pexanaenë itoroba pijajivitonë peponaenexa pejunatsivijavabelia: “Naxanitsia baja. Pexaejava rabaja vereta,” pejainexa.

18 Itsiata baitsi jane daxita pejunatsivi apo topatsitsirena. Itsanë saya pe-ponaeyaniva, pijajivitonëta tonajumeitorobarenatsi pejumaitsilivaisi ma-pacueniaje: “Xanë aeconoxaeta comuatabajë ira. Nexata ponaejitsianë bajarabelia tataenexa bajarapaira. Pexaniacuenie netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobare-natsi pijajivitonëta.

19 Itsanë pijinia saya peponaeyaniva, pijajivitonëta tonajumeitorobare-natsi pejumaitsilivaisi mapacueniaje: “Xanë comuatajë diez ponëbeje bueyu tanetoroborobocaevinexa. Nexata ponaejitsianë taëjësinexa bajara-pabueyu. Pexaniacuenie netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta.

20 Itsanë pijinia saya peponaeyaniva, pijajivitonëta tonajumeitorobare-natsi pejumaitsilivaisi mapacueniaje: “Xanë raja aeconoxaeta nacasabajë. Bajaraxuata acuenebi taponaejava,” pejailivaisi tonajumeitorobarenatsi pijajivitonëta. Bajarapacuenia daxita pamonae picani fiesta pexanaenë junata, peponaeyaniva saya tonajumeitorobarenatsi pijajivitonëta.

21 Nexata fiesta pexanaenë pijajivitonë naviarena pijatuxanenëjavaberena. Tsipaeba pijatuxanenëjavabelia daxita pacuenia najumerubatsi. Nexata fiesta pexanaenë anaepana. Jumaitsi pijajivitonëjavabelia: “Naxanitsiayo liamëre tomarabelia. Junatanajetarucaename jivi pinijicallexanetonëjava, tsiquiricallexijava ata. Junatsianame bepejiobivi, penabejenaevi ata, pe-jayujayunaevi ata, bitso pitaxutotsëcënaevi ata, penabaninexa tajabota,” jai fiesta pexanaenë pijajivitonëjavabelia. Nexata baja pijajivitonë pona pejunatsinexa jivi.

22 Jivi pebarëpatsicujinaerena, jumaitsi pijatuxanenëjavabelia: “Tajatuxa-nenë, exanjë rabaja taneitorobicueniamë. Itsiata abaxë sajinanubena itsamesanë itsamonaenexa,” jai bajaraponë pijatuxanenëjavabelia.

23 Nexata petuxanenë icatsia jumaitsi pijajivitonëjavabelia: “Liamëre icat-sia carreteranëjavabelia, namutonëjavabelia ata. Junatanajetarucaename

asaëyata carreterajava peponaevi, namutojaya ata peponaevi, penanabaninexa tajabota pevënëcaenexa tajabo.

²⁴ Pamonae picani copiata junatajë penanabaninexa, caenë ata bajarapamonaeyajuvënë, apo naxae tsane bajarapapexaejava,” jai petuxanenë pijajivitonëjavabelia, jai Jesús fariseoviyajuvënëjavabelia jivi peyapëtaenexa itsamonae Dioso apo pejumecovënëtsijava, junatsi atatsi.

Pacuenia Jesús tsipaeba jivijavabelia, pajivi Jesús jamatabëpënaponatsi, copiaya penajamatabëcueneveretsinexa Jesús pepënaponaejavënaeyatsi yabara pelivaisi (Mt 10.37-38)

²⁵ Jivibitsaëtoxaneto Jesús pënjajinavanapatsi. Nexata Jesús napënëyorota bajarapamonaejavabelia. Jesús jumaiti mapacueniaje:

²⁶ —Ponë xanëjavaberena patsi ata, itsiata itsa apo niasiva tsane daxita pijamona matatoxenetsia, nexata bajaraponë apo tajajivitonë tsane. Bajaraponë itsa apo niasiva tsane paxa, pena ata, pematapijivi ata, pejuyapijivi ata, piäsivajava matatoxenetsia, nexata apo tajajivitonë tsane. Bajaraponë itsa apo niasiva tsane pijava, pexi ata, pijacuata penaasivajava ata, matatoxenetsia, nexata bajaraponë apo tajajivitonë tsane.

²⁷ Ponë xanë yabara itsamonae jamatabëpebeyaxuabixaetsi, jamatabëpebejibiaexanaexaetsinua, nexata pecajunavi itsa apo nepënaponae tsane, bajaraponë apo tajajivitonë tsane.

²⁸ Paxamëyajuvënë itsa jamatabëexana bo, athëbëabetsia piapiaboxanetsia, nexata copiaya najamatabëcueneveretsipa pacuenia exanaejitsia. “¿Necoaëjêpa tsmëra baja tajapalatata taveretsinexa tajabo?” jamatabëjai tsipae copiaya.

²⁹ Itsa apo najamatabëcueneveretsi tsipae copiaya, nexata bo pexanaejava taxuxuabi ata, apo veretsi tsipae itsa apo tocaëjêpaetsi pijapalata. Nexata pijabo petotaevitsi, capocaponaejitsipatsi.

³⁰ Baracuaicuaijaiti tsipae: “Bajaraponë picani taxuxuaba pijabo pexanaejava. Itsiata apo tocaëjêpaetsi pijapalata peveretsinexa pijabo,” jaiti tsipae capocaponaeya petotaevitsi.

³¹ Nacuaevetsinë pijinia, itsanacuaverena itsa sivanavajabitsaëtsijitsiatsi, nexata copiaya najamatabëxainaejitsipa. Jamatabëjumaiti tsipae mapacueniaje: “Tajajivi saya diez mil ponëbeje. Tanebarëtsimaxëponaevinexa, veinte mil ponëbeje. ¿Baja tsmëra tajajivi nebarëcueneceäjêpaena tabarëbenexa tajavajabitsaënë pijajivi, veinte mil ponëbejejavabelia?” jamatabëjai tsipae copiaya.

³² Nexata bajarapacuenia penajamatabëxainaeucujinae, bajaraponë yapëtaejitsipa apo pebarëcueneceäjêpaejavatsi pebarëbenexa pijavajabitsaënë pijajivijavabelia. Itsa abaxë tajë pevajënae pepatsijavarena pijavajabitsaënë, nexata najumexuabijitsipalia pijajivita penabarajamatabëcuene xanepanaenexabeje vajabitsaëcuene pexanaeyanivabeje.

³³ Bajara pijinia pacuenia paxamëyajuvënëvi ata itsa apo najamatabëcueneveretsi copiaya penajamatabëcuenepeñëyorotsinexa daxita pexainaejavavecu, nexata acuenebi tajajivi taexanaenexa, jai Jesús jivi yaibitsaëtoxanetojavabelia.

Pacuenia Jesús jivi livaisi tsipaeba comparacióncuenia pacuenia jamatabëcueneitsi tsipae Jesús pijajivitonë itsa copatsipa Jesús pejumecovënëtsijavami yabara pelivaisi (Mt 5.13; Mr 9.50)

³⁴ Jesús icatsia comparacióncuenia jumaitsi jivi ayailbitsaëtoxanetojavabelia mapacueniaje:

—Yajo abaxè itsa xaica, xanepana. Itsiata yajo pexaicaejavami itsa ajibi tsipae, ¿detsa pacuenia icatsia naxaicaeyaexanaejitsipa? Acuenebi.

³⁵ Itsacuenejavayonexa ata baja apo xanepanae tsipae. Nexata peubijava petsibacathocaenexa ata, apo xanepanae tsipae. Tsipaji pacuenia peubijava petsibacathocaebeno, itsa tsibacathoca, peubijava naxaniabiaexana, bajara apo itsi tsipae bajarapayajomi. Pacuenia bacatasi ata itsa tsibacathoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús comparacióncuenia bajarapamonaejavabelia.

Bajarapacuenia Jesús jumaitsi comparacióncuenia jivi peyapëtaenexa pacuenia jamatabëcueneitsipae Jesús pijajivitonè itsa copatsipa Jesús pejumecovènëtsijavami. Nexata Diosovecua naxuabijitsipa.

15

Pacuenia Jesús jivi livaisi tsipaeba oveja penaxuabinë pelivaisicuenia yabara pelivaisi
(Mt 18.10-14)

¹ Gobierno pejamatabëcuene impuestomatamo pematamoyanijobabiabivi, pata Jesúsjavaberena. Yajavaparenanua piamatabëcuenebejevi. Bajarapamonaepata penamuxunaevetsinexa Jesús petsipaebilivaisi.

² Nexata fariseovibeje judíovi pecujarubivibeje itsa tane gobierno pejamatabëcuene impuestomatamo pematamoyanijobabiabivi pepatsijava Jesúsjavaberena, itsa tanenua piamatabëcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesús baracuaicuaijaitsi. Bajarapamonaenajumaitsi mapacueniaje:

—Mara ponëje naneconita Diosojavabelia. Tsipaji copiapitabiaba piamatabëcuenebejevi ata. Naxaeyabiabanua pexaejava bajarapamonaeta, najai fariseovibeje judíovi pecujarubivibeje Jesús yabara jamatabëcuenenavëxaniabiaya.

³ Nexata Jesús pebaracuaicuaijaixetsi, Jesús bajarapamonaejavabelia livaisi tsipaeba mapacueniaje:

⁴ —Paxamëyajuvënënë xainaejitsipa cien ponëbeje oveja. Nexata itsa toyajuvënëxauabijitsipatsi caenë, oveja pexainanë petusatota puenetsipa noventa y nueve ponëbeje. Nexata jaitsipa petonaxuabinëtsi matapania pexcitajarabijavabelianexa.

⁵ Nexata oveja pexainanë itsa baja caxitajarabijitsipa petonaxuabinëmitsi, barëyataejitsipa. Boyaberena vétacarapatsipa petonaxuabinëmitsi.

⁶ Nexata oveja pexainanë petonaxuabinëmitsi itsa capatsipa boyaberena, junatsipa peyapëtaevitsi. Junatsipa pijabo muxuneneta imoxoyo penaevi ata. Nexata oveja pexainanë jumaitsi tsipae bajarapamonaejavabelia: “Panecobenabarëyamëre. Tsipaji tajaovejayo, tanetonaxuabinëyomi picani, caxitajarabajë baja,” jai tsipae oveja pexainanë bajarapamonaejavabelia.

⁷ Xaniajanë pacuenia pacatsipaebijitsiatsi. Mapanacuataje Dioso pitabarata pijaneconi pexainaejivi ata, itsa copatsiana pibisicuaene pexanabiabijava, itsa najamatabëcuenepënëyorota Diosojavabelia, bajara pijinia pacuenia sivabarëyatsi tsane athëbëtatsia pejinavanapaevi. Bajarapajivi, athëbëtatsia pejinavanapaevi, sivabarëyatsi tsane noventa y nueve pajivibeje Dioso pitabarata pianeconijibitsavanapaevi

pesivabarëyatsabiabijava matatoxenetsia, jai Jesús fariseovijavabelia, judíovi pecujarubivijavabelia ata.

Pacuenia Jesús livaisi tsipaeba penaxuabipalatanëyo pelivaisicuenia yabara pelivaisi

⁸ Icatsia Jesús jumaitsi fariseovijavabelia, judíovi pecujarubivijavabelia ata:

–Petiriva xainaejitsipa diez ponëbeje palatanëanë, bitso penamata-motsinëanë. Nexata itsa toyajuvënëanaxuabijitsipatsi caenë, itanojotsipa lámpara. Bo ira cajuetsipa xaniavaetsia pejaitsinexa. Matapania itsa pitabuatsipa petonaxuabipalatanëtsi, copatsipa pejaitsijava.

⁹ Itsa baja caxitajarabijitsipa petonaxuabipalatanëmitsi, nexata junatsipa peyapëtaevitsi. Junatsipa pijabo muxuneneta imoxoyo penaevi ata. Bajarapova nexata jumai tsipae bajarapamonaejavabelia: “Panecobenabarëyamëre. Tsipaji tajapalatanëyo, tanetonaxuabinëyomi picani, caxitajarabajë baja,” jai tsipae petiriva bajarapamonaejavabelia.

¹⁰ Xaniajanë pacuenia pacatsipaebijitsiatsi. Pajivi copatsiana pibisi-acuene pexanabiabijavamì, itsa najamatabëcuenepënëyorotsiananua Diosojavabelia, bajara pijinia pacuenia athëbëtatsia ángelevi sivabarëyatsi tsane, jai Jesús fariseovijavabelia, judíovi pecujarubivijavabelia ata.

Pacuenia picani juyapijinë paxavecu naxuabaponapona yabara pelivaisi

¹¹ Icatsia Jesús livaisi tsipaeba fariseovijavabelia, judíovi pecujarubivijavabelia ata. Jesús jumaitsi mapacueniaje:

–Pebi xaina anijanëbeje pexënatobeje.

¹² Nexata juyapijinë jumaitsi paxajavabelia: “Axa, xuanë picani neto-copatame tapitsinexa nevënamuto, bajaraxuanë abaxë apo tēpae atamë, nerajure baja tajajavanexa,” jai juyapijinë. Nexata pexënatobeje pexainanë pexënatobejejavabelia rajuta daxita pexainaejavanëmi.

¹³ Nexata paxa perajutsicujinaetsibeje, caematacabibejecujinae, juyapijinë canajeta daxita pexainaejavanëmi pecaetuatinsixa palata. Bajarax-uacujinae jane baja pona tajënacuyabelia. Bajarajotalia pibisiacuene exanaponapona. Nexata vereta daxita paxa perajutsijavanëmitsi.

¹⁴ Nexata daxita bajarapanacuapijivi janibocuene tsipatatsi. Bajaraponë peveretsicujinae daxita pijapalatami, bitso namatavenona pexaejava.

¹⁵ Nexata jaita penacuenebinexa bajarapanacuata peecaenëjavabelia. Bajaraponë itorobatsi pijairanëjava petoetevataponaponaenexa pijamarrano.

¹⁶ Nexata bajaraponë bitso pijanixae, pepenenexa picani ayajava jamatabëxayabiaba bopocuai, marrano pexayabiabijava. Bajarajota itsajivi ata apo rajutsitsi pexaejavanexa. ¹⁷ Nexata belia bajaraponë xaniavaetsia najamatabëxaina. Jamatabëjumaitsi mapacueniaje: “Taxa pijabota pexaejava ayajava xaina pijajivi ayaiBITSaëto piabatsinexa. Tonacopatabiabatsi ayai-ava pexaejava. Itsiata xanë majotaje tēpaejitsianë baja tajani.

¹⁸ Nexata taxajavabelia naviatstianajë. Jumaitsinë meta tsane taxajavabelia: ‘Axa, pibisiacuene exanajë Diosojavabelia, xamëjavabelia ata.

¹⁹ Abejenë raja. Auranë baja rovia xamëjavabelia: “Taxënato,” tanejamëjava. Nexata saya nijajivitonënë nexanare,’ janë meta tsane taxajavabelia,” jamatabëjai juyapijinë.

²⁰ Nexata baja naviaata paxajavabelia.

‘Itsa abaxë tajëverena najetaruca, pexënato pexainanë copiatane. Nexata bajaraponë pexënato itaxutobejobiatane. Mataenetsia kujinaejinalia

pexēnato. Nacoxivaetabarucapona. Copiapitsiaya itabaratsutsunexuaba pexēnato.

²¹ Nexata bajaraponē jumaitsi paxajavabelia: “Axa, pibisiacuene raja exanajē Diosojavabelia, xamējavabelia ata. Abejenē raja. Nexata baja rovia auranē xamējavabelia: ‘Taxēnato,’ tanejamējjava,” jai paxajavabelia.

²² Itsiata baitsi jane pexēnato pexainaenē bajarajota jumaitsi pijajivijavabelia: “Naxanitsia. Bepijiayo taxēnato patocaponaremena daxita matatoxenetsia pexaniapana, penajumaxuabipana. Pajumaacare bajarapapanata. Anillonua pacobesixatare. Zapatonua pataxuxatare.

²³ Penasitsinē becerro papiremelia. Pabeyaxuabianame vajaxaenexa. ¡Fiesta exanaenatsi vajabarēyanexa!

²⁴ Tspiji raja maponē taxēnatoje: ‘Tēpa meta baja,’ sivajamatabējanē picani. Itsiata tsaena ponapona. ‘Naxuaba meta baja,’ sivajamatabējanē picani. Itsiata baja icatsia patajopa,” jai pexēnato pexainaenē pijajivijavabelia. Nexata taxuxuaba fiesta pexanaejava.

²⁵ Bajaramatatacabi matapijinē pabiabelia nacuenebaponapona. Nexata penaviatsinē bo itsa imoxoyotanajetaruca, jumetane música. Jumetanenua peyavajibijava.

²⁶ Nexata bajaraponē junata paxa pijajiviyajuvēnēnē. Jumaitsi: “¿Detsa pitsicuene yabara fiesta paexaname?” jai matapijinē.

²⁷ Nexata paxa pijajivitonē jumaitsi: “Nejuyapijinē baitsi patajopa. Axa nexata paneitoroba patabeyaxuabinexa becerro, penasitsinē. Jamatejema tsaena ponapona nejuyapijinē,” jai bajaraponē matapijinējavabelia.

²⁸ Nexata matapijinē bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaitsi pexēnatojavabelia: “Naxanitsia. Najonemeya,” jai pexēnatojavabelia.

²⁹ Nexata matapijinē jumaitsi paxajavabelia: “Jume. Bajayajebi baja rovia catonacuenebaponaponatsi xanē. Caeto ata cajena apo cajumeapa-jejaitsi. Itsiata baitsi jane caeto ata apo nerajutsimē chivoyo ata fiesta tabarēexanaenexa tayapētaevi.

³⁰ Itsiata aeconoxae patajopa baja nexēnato, ponē vereta nijapalatami petiriavijavabelia. Nexata tobeyaxuabame becerro, penasitsinē,” jai matapijinē paxajavabelia.

³¹ Nexata bajaraponē jumaitsi pexēnatojavabelia: “Taxēnato, xamē cajena xanējavata ponaponame daxitamatacabi. Nexata daxita xua taxainaejava nijajava baja cajena.

³² Itsiata aeconoxae namatavenonatsi vajabarēyanexa. Tspiji nejuyapijinē: ‘Tēpa meta baja,’ tasivajamatabējainēmi, itsiata tsaena asaē. Penaxuabaponaponaenēmi icatsia baja patajopa,” jai bajaraponē pexēnatojavabelia, jai Jesús mapalivaisije fariseovijavabelia, judiōvi pecujarubivijavabelia ata.

16

Pacuenia pijatuxanenē pecobecovē petoevetsinē toveretapona pevetsiaexanaejavanētsi yabara pelivaisi

¹ Jesús pijajivijavabelia livaisi tsipaeba. Jumaitsi mapacueniaje:

—Petuxanenē, bitso pexainaenē, ponapona. Bajaraponē xaina pijajivitonē petoevetsinexatsi pecobecovē. Itsiata pepēya pijajivitonē pecobecovē toveretaponatsi. Nexata itsamonae tsipaebatsi pepēya pijajivitonē pecobecovē petoveretaponaejavatsi.

² Nexata petuxanenē pijajivitonē junata. Jumaitsi pijajivitonējavabelia: “Xamē pina tapēya netoveretaponame tacaevetsiaexanaejava. Pabaxutojavabelia matamoyaquinarubame xuanē canajetaponame tacobecovē, xuanēnua netocomuataponame, bajarapabaxuto netocanaviatsianame. Nextata baja itsa netocanaviatsianame bajarapabaxuto, matavējēa apo netoebet-simē tsane tacobecovē,” jai petuxanenē pijajivitonējavabelia.

³ Nexata pijajivitonē sivapona bajarapabaxuto petocanaviatsinexa pijatuxanenē. Nexata bajarapabaxuto petocanaviatsivajēnae jamatabējumaitsi: “¿De tsaeta xua exanaenajē? Tajatuxanenē baja necapitsapaejitsia pecobecovē tatoevetaponaponaejavavecu. Apo necaējēpae tsane tanacuenebinexa pabi tajacuata tanaevetsinexa. Bitso auranēnua tsipae itsamonaejavabelia amoneya tavajētaponaeenexa palata tanamitsacomuatabiabinexa taxaejava.

⁴ Taneamoneyabivi meta abaxē, xua niamoneyaba, bevelia tovēnējonaponaenajē. Nexata tajatuxanenē tanecapitsapaeujinae, bajarapamonae pijaboyabelia itsa ponaenajē, xaniavaetsia necopiapitsiana. Nexata bajarapamonaejavata naponaponaenajē,” jamatabējai bajaraponē.

⁵ Nexata bajaraponē junata daxita pamonae abaxē amoneyabatsi. Nextata pamonae amoneyabatsi, bajarapamonae, caenē canacujitsia, patapona bajaraponējavaberena. Nexata bajaraponē copiaya petopatsinētsijavabelia jumaitsi: “¿Detsa pacuenia niamoneyabame abaxē, xua tajatuxanenē pijajava catsicopatatsi? jai bajaraponē.

⁶ Nexata ponē amoneyabatsi, jumaitsi: “Camoneyabatsi abaxē tacarajutsinexa aceiteranē ochocientos pagalónbeje,” jai. Nexata bajaraponē jumaitsi piamoneyabinētsijavabelia: “Bevelia saya catocopatsianēsi. Mara picani pacuenia niamoneyabameje, tanetoitanerubibaxutotamēje. Pire cajena. Icatsia itsabaxutojavabelia saya cuatrocientos pagalónbejenexa bepijia yaquinarure. Nexata saya bajarapacuenia tajatuxanenē rajutsianame,” jai bajaraponē piamoneyabinētsijavabelia.

⁷ Bajaraxuacujinae icatsia itsanē topatatsi. Nexata icatsia jumaitsi bajaraponējavabelia: “¿Jica xamē? ¿Detsa pacuenia niamoneyabame?” jai. Nexata bajaraponē jumaitsi: “Camoneyabatsi abaxē tacarajutsinexa cien pabultobeje trigoxubultonē,” jai. Nexata bajaraponē jumaitsi piamoneyabinētsijavabelia: “Mara picani pacuenia niamoneyabameje, tanetoitanerubibaxutotamēje. Pire cajena. Icatsia itsabaxutojavabelia saya ochenta pabultobenexa yaquinarure. Nexata saya bajarapacuenia tajatuxanenē rajutsianame,” jai bajaraponē piamoneyabinētsijavabelia. Bajarapacuenia exanapona daxita piamoneyabivitsijavabelia pesivajamatabēcuene xanepanaenexatsi, xaniavaetsia pecopiapitsinexatsi pijabota penaponaponaenexa, pijatuxanenē itsa navecuacapitsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitanetarutaponae baxutonētsi.

⁸ Bajaraxuacujinae pijatuxanenējavabelia pona perajutsinexa jane baja bajarapabaxutonē. Nexata pijatuxanenē jumaitsi: “Xamē baja rovia pibisiacuene exaname. Itsiata baitsi jane niaitatsacaxae, exaname pacuenia catoxanepanaejitsia nevajēnaeyabelia,” jaitsi pijatuxanenē. Nexata pacuenia pijatuxanenē pepēya pecobecovē petocanaxetabiabinē ajamatabēcueneitatsaca, bajara pijinia pacuenia Dioso apo pejumecovēnētsivi ajamatabēcueneitatsaca Dioso pejumecovēnētsivi matatoxenetsia mapanacuapijicuene yabaraje, jai Jesús pijajivijavabelia.

⁹ Icatsia Jesús jumaitsi pijajivijavabelia:

–Pacamuxujiobatsi xaniavaetsia. Mapanacuapijipalatata payavenonare itsamonaē. Nexata pacuenia pijatuxanenē pecobecovē petoevetsinē, pe-sivajamatabēcuene xanepanaevitsi xaina, xaniavaetsia pecociapitsinexatsi pijabota penaponaponaenexa pijatuxanenē pecapitsapaecujinaetsi, bajara pijinia pacuenia paxamē ata athēbētatsia paxainaeneme papecasivajamatabēcuene xanepaenaevi. Nexata pamatacabi patēpame, itsajota apo panamatavenonaemē palata, Dioso pacacopiapitsiana apo pevereverecaebonējavatatsia, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

–Pajivi xaniavaetsia toeveta tsiquirijavayo ata itsanē pecobecovē, bajara-pajivi xaniavaetsia toevetsipa ayaijava ata. Pajivi bijiaya toeveta tsiquirijavayo ata itsanē pecobecovē, bajarapajivi bijiaya toevetsipa ayaijava ata.

¹¹ Itsanē pecobecovē, mapanacuapijicueje, palata ata, xaniavaetsia itsa apo patoevetsimē tsipae, nexata itsajivi ata apo pacaevetsiaexanae tsipae Dioso pijacuene, xua bitso namatamota mapanacuapijicueje matatoxenetsiaje.

¹² Itsa xaniavaetsia apo patoevetsimē tsipae itsanē pecobecovē, nexata pitsijava picani pacaevetsiaexana, bajarapitsijava itsajivi ata apo pacarajutsi tsipae pepo panijajavanexa, jai Jesús pijajivijavabelia.

¹³ Icatsia Jesús jumaitsi pijajivijavabelia:

–Itsajivi ata acuenebi caecuenia petonacuenebijava anijanēbeje pijatuxanenēbeje. Caenējavabelia jitsipaejitsipa petonacuenebijava. Itsanējavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

¹⁴ Fariseovi, bitso palata pejitsipaevi, jumetaeyena Jesús petsipaebilivaisi pijajivijavabelia. Nexata fariseovi jumecapocaponatsi Jesús.

¹⁵ Jesús nexata jumaitsi fariseovijavabelia:

–Paxamē pajitsipabiabame jivi pejumaitsinexa paxamē yabara: “Fariseovi raja pexaniajamatabēcuenevi,” pejainexa. Itsiata baitsi jane Dioso pacajamatabēcuenyapētane pexaniajamatabēcuene apo panexainaevicuene. Pacuene bitso jivi tsitapexaniacuenetsi, bajarapacuene Dioso apo tsitapexaniacuenetsi, jai Jesús fariseovijavabelia.

Pacuenia Jesús tsipaeba fariseovijavabelia bajayata Dioso Moiséspijinēta penajumecopatsilivaisi, pacuenia ata Dioso pijajivi evetsijitsia, yabara pelivaisi

¹⁶ Icatsia Jesús jumaitsi fariseovijavabelia:

–Juanpijinē jivibautisabinēmi pepatsivajēnaeya, jivi xaina Dioso Moiséspijinēta penajumecopatsilivaisi pejumecovēnētsinexa. Bajayata Diosojumepaebivi profetavi ata petsipaebilivaisianē ata, xaina jivi pejumecovēnētsinexa. Itsiata Juanpijinē pepatsicujinae, pexanialivaisi tsipaebaponajē. Tsipaebaponajē Dioso pijajivi pevetsijavanexa. Nexata daxitajivi bitso jitsipa penajonenexa Dioso pijanacuayabetsia, jai Jesús fariseovijavabelia.

¹⁷ Icatsia Jesús jumaitsi fariseovijavabelia:

–Mapanacuaje, itaboxo yajava, jemata vereverecaena. Itsiata baitsi jane palivaisi Dioso Moiséspijinēta najumecopata, bajarapacuenia apo vereverecae tsane. Nexata daxita pacuene yabara tajēvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

Pacuenia Jesús livaisi tsipaeba penacojobinē pijava pexuabiyaniya yabara pelivaisi

(Mt 19.1-12; Mr 10.1-12)

¹⁸ Icatsia Jesús jumaitsi fariseovijavabelia:

—Ponē pijava xuaba, nexata icatsia itsava itsa pita, bajaraponē pibisiacuene exana pevitota. Nexata naneconita Diosojavabelia. Tšipaji pepo pijavavecuja jaita itsava. Dioso cajena abaxē bajaraponē pexuabiva pepo pijavacuenia totanetsi. Ponē ata itsanē pexuabiva pita, bajaraponē ata pibisiacuene exana pevitota. Nexata naneconita Diosojavabelia. Tšipaji itsanē pijava yacajērēta, pova abaxē Dioso tanetsi itsanē pepo pijavacuenia, jai Jesús fariseovijavabelia.

Bitso riconē Lázaroje yabara pelivaisi

¹⁹ Icatsia Jesús livaisi tsipaeba fariseovijavabelia. Jesús jumaitsi mapacueniaje:

—Bitso pexainaenē, riconē, ponapona. Daxitamatacabi naxatababiaba bitso pexaniavirijavanē. Pexaejava, pexaniavirijava, xaeyabiaba.

²⁰ Riconē pijabo matatoyorotsia yacaranata ibopanaxanetonē mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejiojinē, Lázarovēnēnē, boquecabiaba. Lázaro daxitanē perabētsabana.

²¹ Lázaro picani jamatabēxaeyabiaba riconē pexaeyabiabijavata piothopaepērē mesa bēxēpanareca. Avirixi ata patabiaba itsajota Lázaro bocabiaba. Petsabanaejavā raebabiabatsi.

²² Nexata baja belia Lázaro tēpa. Petēpaecujinae Lázaro ángelevi caponayatsi Dioso pijanacuayabetsia, itsabetsia Abrahampijinjē petēpaecujinae ponapona. Bajaraxuacujinae riconē ata tēpa. Mēthētatsi.

²³ Riconēmi petēpaecujinae pata petēpaevi pepatabiabinacuayabelia. Nexata bajarapanacuata riconēmi bitso navixaetaeya bejiobi tšaponapona. Nexata riconēmi athēbēa benaēcotsia. Tajētatsia taenuta Abraham penucajava. Lázaro nucaya Abraham pemuxunenetatsia.

²⁴ Nexata riconēmi vavajai. Jumaitsi Abrahamjavabelia: “Amo Abraham, nitaxutotsoniataema. Netoitorobimica Lázaro. Nacobeupijabutsi merata neebarētocainejebiaexanaejitsia. Bitso jamatabēfaenajē mapatajutaje,” jai riconēmi.

²⁵ Nexata Abraham jumaitsi riconēmijavabelia: “Tamomo, najamatabēnapire. Pamatacabi pinaena abaxē asaēmē tšaponaponaenaxanaeirata, ēpexaniacuene picani xainame. Lázaro pijinja pamatacabi abaxē asaē tšaponapona, bitso picani bejiobi. Itsiata juya mapamatacabije pexaniacuenia majotaje catsuponapona. Xamē biji navixaetaeya ponaponame.

²⁶ Itsajivi jamatabēponae ata bajarabereca, acuenebi itsiata pepanepaenexa bajarabereca. Tšipaji bitso ayaiitapajanitoxanetoreca. Bajaraxuata paxamē ata apo pacacājēpae panepanepaenexa mabetsinaje,” jai Abraham.

²⁷ Nexata icatsia riconēmi jumaitsi Abrahamjavabelia: “Amo Abraham, pexaniacuene cavajētatsi. Tonajumeitorobianame Lázarota taxa pijaboyabelia.

²⁸ Bajarajotalia xainajē cinco ponēbeje tajuyapijivi. Xaniavaetsia Lázaro tsipaebiana. Muxujiojiana bajarapamonae ata peponaeyaniva mapanavixaetaeyabiabinacuaya berenaje,” jai riconēmi Abrahamjavabelia.

²⁹ Nexata icatsia Abraham jumaitsi riconēmijavabelia: “Bajarapamonae baja xaina Moiséspijinē peyaquinaelivaisianē. Diosojumepaebivimi profetavi ata peyaquinaelivaisianē ata, xaina baja. Nexata nejuyapijivi itsa apo jitsipae tsane peponaenexa bajarapanacuayabelia, nexata nejuyapijivi jumecovēnētsiana bajarapamonaemi peyaquinaelivaisianē,” jai Abraham riconēmijavabelia.

³⁰ Riconēmi icatsia jumaitsi Abrahamjavabelia: “Jume raja. Apo jumecovēnētsi tsane cajena bajarapalivaisianē. Itsiata itsajivi itsa asaē tsane petēpaecujinae penaviatsinexa pecovēyabelia, tsipaebiana tajuyapijivijavabelia. Nexata tajuyapijivi copabiana pibisiacuene pexanabiabijava. Najamatabēcuenepēnēyorotsiana Diosojavabelia,” jai riconēmi Abrahamjavabelia.

³¹ Nexata icatsia Abraham jumaitsi riconēmijavabelia: “Nejuyapijivi itsa apo jumecovēnētsi Moiséspijinē peyaquinaelivaisianē, Diosojumepaebivimi profetavi peyaquinaelivaisi ata, nexata pajivi asaē petēpaecujinae, mavelia ponae ata tsipaeje petsipaebinexa nejuyapijivijavabelia, itsiata nejuyapijivi apo jumecovēnētsi tsipae bajarapajivi ata,” jai Abraham riconēmijavabelia, jai Jesús fariseovijavabelia.

17

Pacuenia Dioso pijajivixae, itsamonae jamatabēcuenējēbjijitsiatsi pibisiacuene pexanaenexa yabara pelivaisi

(Mt 18.6-7, 21-22; Mr 9.42)

¹ Jesús jumaitsi pijajivijavabelia:

—Xanē tajajivixae, itsamonae jamatabēcuenējēbbiabianatsi pibisiacuene pexanaenexa. Nexata itsamonae pejamatabēcueneta tajajivi pibisiacuene exanaena. Nexata pajivi pejamatabēcueneta tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pini-jicuenia Dioso naneconitsiaexanaenatsi.

² Itsamonae Dioso pejumecovēnētsivi, abaxē bepejevaxijamatabēcuenē xaina Dioso pejumecovēnētsijava yabara. Nexata apo ajamatabēcuenesaē. Nexata pajivi tajajivijavabelia pibisiacuene jamatabēcuxanaeyaexana, abaxē tajajivijavabelia pibisiacuene exanaeyaexanaejeva, bajarapajivi bevēsicētatsi ibotoxanetojavabelia. Nexata bajarapajivi yamaēya, ibotoxaneto yajava, bexuarecatsi pucaxaneto tuatuajēareca. Bajarapacuenia bexuarecatsi, tajajivijavabelia pibisiacuene itsa exanaeyaexana bitso penaneconitsiyaniva Diosojavabelia.

³ Nexata xania. Panayajivitaema pibisiacuene, jai Jesús pijajivijavabelia.

—Icacia Jesús jumaitsi pijajivijavabelia:

—Itsanē Dioso panenajuajumecovēnētsivi pibisiacuene itsa pacaexanaena paxamējavaberena, bajaraponē xaniavaetsia paitavetsianame. Nexata baja itsa aura tsane pibisiacuene papecaexanaejava yabara, nexata pexaniajajijumeta itsa pacanavajunupaebiana pecopatsijavanexa bajarapacuenē, pajamatabēcuenecaevianame pibisiacuene papecaexanaejava. Pabarajamatabēcuenexanepanaename bajaraponē.

⁴ Caematacabita siete xuabeje pibisiacuene pacaexanae ata tsane, itsiata siete xuabeje itsa aura tsane pibisiacuene papecaexanaejava yabara, nexata pexaniajajijumeta itsa pacanavajunupaebiana pecopatsijavanexa bajarapacuenē, itsiata pajamatabēcuenecaevianame. Pabarajamatabēcuenexanepanaename bajaraponē, jai Jesús pijajivijavabelia.

Pacuenia Jesús jumaitsi pijaapóstolevijavabelia yabara pelivaisi

⁵ Jesús pijaapóstolevi jumaitsi Jesúsjavabelia:

—Patajatuxanenē, paneyavenonare: “Xanē cajena necaējēpa daxitacuene taexanaenexa,” nejaitsabiabijava orijibia patacajumecovēnētsinexa, jai Jesús pijaapóstolevi.

⁶ Nexata Jesús jumaiti pijaapóstolevijavabelia:

—Tsiquirijavayo ata xanē yabara ita pajamatabējumaitsimē tsipae: “Xaniajai cajena. Jesús caējēpatsi daxitacuene pexanaenexa,” ita pajamatabējamē tsipae, nexata paxamē ata pacacaējēpaejitsipa ayaiacuene paneexanaenexa. Nexata ita pajumaitsimē tsipae mapanaejavaxanetojavabeliaje: “Yatabutopaya natixire. Nucaename pucaxaneto tuatuajētalía,” ita pajamē tsipae, nexata naejava ata pacajumecovēnētsipa cajena, jai Jesús pijaapóstolevijavabelia.

Pacuenia itsajivi pijatuxanenē pitorobicueniatsi toexanabiaba yabara pelivaisi

⁷ Jesús icatsia jumaiti pijaapóstolevijavabelia:

—Paxamēyajuvēnēnē xainaejitsipa pijajivitonē. Nexata itorobijitsipa petonacuenebaponaponaenexatsi. Nexata bajaraponē pijatuxanenē ira petocueponaponaecujinae, patsipa pijatuxanenē pijaboyaberena. Itsa jume, bāca petoevetaponaponaecujinae patsipa. Nexata paxamēyajuvēnēnē petuxanenēxae, pijajivitonējavabelia apo jumai tsipae: “Jonemena baja. Ecare nexaejava tacarajutsinexa,” apo jai tsipae pijajivitonējavabelia.

⁸ Jume baja cajena. Biji rajane jumai tsipae pijajivitonējavabelia: “Netoexanare taxaejavanexa. Nexata abaxē nevetanucaename tanabanijavata. Bajaraxuacujinae xamē nabanianame,” jai tsipae pijajivitonējavabelia.

⁹ “Xanepana rabaja. Pexaniaacuene bitso netoexaname,” apo jai tsabiabinua pijajivitonējavabelia petonacuenebabiabijavatsi yabara. Bajarapacuenia apo jumai tsabiabi tsipae tsipaji saya pijajivitonē tšaponapona. Nexata pacuenia pijatuxanenē itorobatsi, bajaraponē exanabiabijitsipa.

¹⁰ Bajarapacuenia paxamē ata patoexanare Dioso papecaitorobicuenia. Itsa patoveretsianame Dioso papecaitorobicuenia panetoexanavanapaejava, nexata saya namatānētsiā panajumaitsimē tsane: “Vaxaitsi saya vajatuxanenē pijajivitsi. Nexata vajanacaitorobicuenia toexanavanapatsi,” panajamē tsane. Pētsa panajumaitsimē: “Itsajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamē pētsa, jai Jesús pijaapóstolevijavabelia.

Pacuenia Jesús jamatejemaya exana diez ponēbeje, bajayajebi bitso peperabētsabanaevi, yabara pelivaisi

¹¹ Jesús pona Jerusalēn tomarabelia. Itsajota Samaria nacuabeje Galilea nacuabeje namuxulenecaxitajarababeje, bajaraxuayo Jesús najetaruca.

¹² Itsa baja Jesús patsijitsia tsiquiritomaroyojavabelia, mataenenatsi diez ponēbeje bajayajebi bitso peperabētsabanaevi. Itsiata tajiyo bajarapamonae vecuanubenaothopatsi.

¹³ Bajarapamonae ayaijumeta jumaiti Jesúsjavabelia:

—Jesús, paneitaxutotsoniataema! jai.

¹⁴ Nexata Jesús ita tane bajarapamonae, Jesús jumaiti bajarapamonaejavabelia:

—Panaitajētsianame sacerdotevijavabelia papecaperabētaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaevavata pepatsinexa sacerdotevijavabelia, namutua baja perabēxanepananajetarubena.

15 Daxita bajarapamonaē peperabēxanepanaejava itsa tane, nexata caenē saya bajarapamonaeyajuvēnēnē naviateca Jesúsjavabelia. Bajaraponē namutua ayaijumeta Diosojavabelia jumai tsanajetaruaē: “¡Diosomē, bitso ayaijamatabēcuenenēmē! ¡Tavitanejavami baja vecua, nejamatejemayaexaname!” jai tsanajetaruaē bajaraponē Diosojavabelia.

16 Bajaraponē itsa pata Jesúsjavabelia, pematatabacabēta irataeya bocajunua Jesús pitabarata.

—Pexaniacuene netoexaname. Nejamatejemayaexaname baja tavitanejavamivecua, jai Jesúsjavabelia.

Bajaraponē Samaria nacuapijinē.

17 Nexata Jesús jumaitsi bajarajota penubenaevijavabelia:

—Diez ponēbeje bitso peperabētsabanaevi jamatejemayaexanjē. ¿Detsa meta xuajitsia daxita apo najuapatsi?

18 Maponēje caenē saicaya nacuapijinē, apo judionē ata, naviateca Diosojavabelia pejumaitsinexa: “¡Diosomē, bitso ayaijamatabēcuenenēmē! ¡Tavitanejavami baja vecua, nejamatejemayaexaname!” pejainexa Diosojavabelia, jai Jesús bajarajota penubenaevijavabelia Samaria nacuapijinē yabara.

19 Nexata Samaria nacuapijinējavabelia Jesús jumaitsi:

—Nonotapunare. Ponare baja. Jamatejemamē rabaja tanejume-covēnētsixaemē tacajamatejemayaexanaejavanexa, jai Jesús.

Pacuenia Jesús tsipaeba pijajivijavabelia, fariseovijavabelia ata, pecopiapatsijava baja Dioso pijajivi pevetsijava mapanacuataje yabara pelivaisi (Mt 24.23-28, 36-41)

20 Fariseovi jumaitsi Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaitsi fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajaitaxutota.

21 Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotaliaje Dioso pijajivi pevetsijava mapanacuataje,” apo jainua tsane. Dioso rabaja capanepaeya aeconoxae evetapona pijajivi paxamē tuatujēta, jai Jesús fariseovijavabelia.

22 Nexata Jesús itsamatacabi mapanacuaje pevetsijavanexa, tajēvelia navajunupaeba pijajivijavabelia. Jesús jumaitsi mapacueniaje:

—Itsamatacabi xanē, Daxitajivi Pematapijinēnē, mapanacuaje taevetsinē tsane. Nexata paxamē picani bitso pajitsipaeneme patanetaenexamē mapanacuaje taevetsicuene. Itsiata baitsi jane apo pataemē tsane mapanacuaje taevetsicuene.

23 Nexata itsamonaē pacajumai tsane: “Bajarajotalia eca mapanacua pepo pevetsinēje,” pacajai tsane xanē yabara. Itsa jume, pacajumai tsane: “Majota ecaje, mapanacua pepo pevetsinēje,” pacajai tsane xanē yabara. Itsiata pētsa paponame. Pētsa pamuxunaponamenua bajarapamonaē pepēta.

24 Pacuenia yamaxē itsa nivejai tsajuni athēbēvetsica, caecuenia jivi cotiatane daxitajava, bajara pijinia pacuenia daxitanacuanēpijivi caecuenia netaena pamatacabi patsianicajē xanē, Daxitajivi Pematapijinēnē.

²⁵ Itsiata copiaya ayaicuenia navixaetaeya bejiobinē tsane. Mapanacuate pejinavanapaevi apo nejumecovēnētsinua tsane Dioso athēbēvetsica taneitorobinēcuenetsica.

²⁶ Pacuenia bajayata jemata itsi pamatacabi Noépijinē ponapona, bajara icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē.

²⁷ Bajayata pamatacabi Noépijinē ponapona, jivi picani xaniavaetsia jamatejema pexaejava xaevanapa. Apaevanapanua. Nacojobapona itsamonae. Itsamonae pexēnatoyonē pebijavabelia canajetapona petonacojobinexatsi. Bajarapamonae jamatejema saya jinavanapa. Nexata bajarapamatacabi Noépijinē ēpijamonae pinijibarcojavabelia barējunua. Nexata daxitajivi merata bubuna jemata ira itsa bubuta.

²⁸ Bajara pijinia itsi bajayata pamatacabi Lotpijinē ponapona. Jivi saya jamatejema jinavanapa. Pexaejava xaevanapa. Apaevanapanua. Comuacapon. Canajetapona. Ubapona pijapabianē. Pijabonē ata exanapona.

²⁹ Itsiata baitsi jane pamatacabi Lotpijinē Sodomatomara vecuapitsapa, jemata athēbēvetsica pinijicuenia isotonē othopaica. Othopaica pitarutsi-ibotonēnuu. Nexata daxita Sodoma tomarapijivimi tajuatsti. Nexata baja verebiabatsi.

³⁰ Bajara pijinia pacuenia icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē, jai Jesús pijajivijavabelia tajēvelia penavajunupaebijavata icatsia pepatsijavanexatsica.

³¹ Icatsia Jesús jumaitsti pijajivijavabelia:

—Pamatacabi xanē jemata patsianicajē, itsajivi ata pētsa sivanajamatabēxaina mapanacuapijicueneye. Nexata pajivi athēbēyo bojumatatsia ecaya, perunaecujinaetsica, pētsa sivanajamatabēxaina pijaboēnēalia pebobenaejavanē pejutsinexa. Pajivi pijinia pijapabita nacuenebaponapona, pētsa najamatabēxaina penaviatsinexa pijaboyabelia.

³² Panajamatabēnapire pacuenia bajayata Lotpijinē pijavami exanatsi. Lotpijinē pijavami pesivanajamatabēxainaexae mapanacuapijicuenē, napijivitaeyojopa. Nexata baja tēpa.

³³ Pajivi exanaponapona penatojitsipacuenia, apo xinae tsane matacabi apo peverevereaejava. Itsiata baitsi jane pajivi xanē tajamatabēcueneta copatsiana penatojitsipacuenia pexanabiabijavami, bajarapajivi xainaena matacabi apo peverevereaejava, jai Jesús pijajivijavabelia.

³⁴ Icatsia Jesús jumaitsti tajēvelia pijajivijavabelia:

—Xaniajanē pacuenia pacatsipaebijitsiatsi. Pamatacabi patsianicajē, bajarapameravi anijanēbeje majitanucaenabeje caecamata. Itsanē tanejumecovēnētsinē tsane. Itsanē apo tanejumecovēnētsinē tsane. Nexata tanejumecovēnētsinē pitsianatsi āngelnē. Apo tanejumecovēnētsinē copatabuat-sianatsi.

³⁵ Anijavabeje pijinia najuacuabanucaenabeje caejavata. Nexata tanejumecovēnētsiva pitsianatsi. Apo tanejumecovēnētsiva copatanutsianatsi.

³⁶ Anijanēbeje pijinia najuanacuenebanucaenabeje pabita. Nexata tanejumecovēnētsinē pitsianatsi. Apo tanejumecovēnētsinē copatanutsianatsi, jai Jesús tajēvelia pijajivijavabelia.

³⁷ Jesús nexata pijajivi itsa jumetane bajarapacuenia Jesús pejumaitsijava, bajarapamonae jumaitsti Jesúsjavabelia:

—Patajatuxanenē, ¿detsa jota bajarapacuenia yajuvēnēpitsianatsi? jai Jesús pijajivi.

Nexata Jesús jumaitsti tajēvelia pijajivijavabelia:

—Pacuenia quequeremonae bepijia yapētane itsajota petuxutsaebinē boca bajarajota penacaetuatsinexa, bajara pijinia pacuenia daxita tajajivi bepijia yapētaena tapatsijavatsica penacaetuatsinexa xanējavaberena, jai Jesús pija-jivijavabelia.

18

Pacuenia Jesús pijajivijavabelia livaisi tsipaeba jueznē pelivaisicuenia yabara pelivaisi

¹ Jesús pijajivi livaisi tsipaeba mapacueniaje Jesús pijajivi jamatabēcuenequeranaenejeva pevajētabiabinexa Diosojavabelia.

² Nexata Jesús jumaitsi pijajivijavabelia:

—Tomarata ponapona jueznē. Bajaraponē pevetsinē jivi penaneconitsiaexanaecuenē. Bajaraponē Dioso apo cjunavi. Jivi ata apo cjunavi.

³ Bajarapatomarata ponapona pamona pevecuatēpaevatsi. Bajarapova ponabiaba jueznējavabelia pejumaitsabiabinexa: “Naneconitsiaexanare ponē xanējavaberena naneconita. Naneconitsiaexanare pacuenia caitoroba nijatuxanenē bajarapitsivi nenaneconitsiaexanaenexa,” pejaitsabiabinexa, bajarapova ponabiaba jueznējavabelia.

⁴ Itsiata abaxē bajayajebi jueznē apo jamatabēcuene yavenonae bajarapova. Belia baja bexēa jueznē jejai. Nexata jueznē jamatabējumaitsi: “Dioso picani apo cjunavinē. Jivi ata picani apo cjunavinē.

⁵ Itsiata mapovaje tanejamatabēitonotabiabixae, yavenonaenajē pacuenia nitorobabiaba. Nexata baja bajarapova matavējēa apo patabiabiarena tsane xanējavaberena tanecueranaeyaexanaenexa,” jamatabējai jueznē, jai Jesús pijajivijavabelia.

⁶ Jesús icatsia jumaitsi pijajivijavabelia:

—Bajara jamatabēcueneitsi jueznē, pibisiajamatabēcueneē ata. Yavenona bajarapova asaēya pevajēcabiabixae.

⁷ Bajara pijinia pacuenia Dioso ata pijajivi yavenonaena itsamonae pibisiacuenē itsa exanatsi. Bajarapacuenia Dioso pijajivi yavenonaena bajarapomonae itsa vajētabiabiana Diosojavabelia matacabijebi, meravi yajava. Dioso cajena apo cuenenajematsi tsane itsa yavenonaena pijajivi.

⁸ Xaniajanē pacuenia pacatsipaebijitsiatsi. Dioso apo cuenenajematsi tsane itsa yavenonaena pijajivi itsamonae pibisiacuenē pexanaeyanivatsi. Pamatacabi xanē, Daxitajivi Pematapijinēnē, icatsia patsianicajē, ¿caxitajarianajē tsaja abaxē tanecopiaevetavanapaevi? jai Jesús pijajivijavabelia.

Pacuenia itsanē fariseonē, itsanē impuestomatamo gobierno pejamatabēcuene pematamoyanijobinē, vajētabeje Diosojavabelia yabara pelivaisi

⁹ Itsajota Jesús pijajivijavabelia livaisi tsipaeba, bajarajota nubena itsamonae. Bajarapomonae jamatabējumai tsabiabi: “Vaxaitsi cajena pexaniajamatabēcuenevitsi itsamonaevēcua. Itsamonae bitso nacavecuapibisiajamatabēcuenevi,” jamatabējai tsabiabi. Nexata bajarapomonaejavabelia Jesús livaisi tsipaeba. Jumaitsi mapacueniaje:

¹⁰ —Anijanēbeje tsiabeje templojavabetsia pevajētsinexabeje Diosojavabelia. Caenē fariseonē. Itsanē gobierno pejamatabēcuene impuestomatamo pematamoyanijobabiabinē.

¹¹ Nexata fariseonē nuca. Fariseonē pevajētsijavata Diosojavabelia, bitso bepexaniajamatabēcuene netaeya jumaitsi mapacueniaje: “Diosomē, pexaniajamatabēcuene carajutatsi. Tsiapai pacuenia

itsamonaē jamatabēcueneitsi tsenae, bajara xanē apo jamatabēcueneitsinē. Yamaxēitojorobiaya jivi apo tavecuanacobetoxotsinē. Apo tacujirubejenē cajena. Apo tajaitsinē itsava tajavavecua. Pacuenia maponēje gobierno pejamatabēcuene impuestomatamo pematamoyanijobabiabinē jamatabēcueneitsije, bajara xanē apo jamatabēcueneitsinē.

¹² Caesemana canacujitsia, anijamatacabibeje, najamatabēcuenexaniavaetsiaya ponaponabiabajē xaenejevanē taxaejava tacavajētsinexa xamējavabelia. Daxita pacuene nacanabajē, diez xuabejeyajuvēnējava, caejava, xamējavabelia carajutabiabatsi ofrendacuena,” jai mapacueniaje fariseonē templobota pevajētsijavata Diosojavabelia.

¹³ Nexata ponē gobierno pejamatabēcuene impuestomatamo pematamoyanijobabiabinē, pevajētsijavata Diosojavabelia tajiyo nucalia piauraxae. Athēbēabetsia ata penavēyotsijava cjunava. Namēpabēbenuca pecobeta pejamatabēbējaixae pibisiacuene pexanaeconi yabara. Nexata bajaraponē Diosojavabelia pevajētsijavata jumaitsi mapacueniaje: “¡Diosomē, nitaxutotsoniataema! ¡Pibisiacuene cajena bitso xanē exanabiabajē!” jai bajaraponē templobota pevajētsijavata Diosojavabelia, jai Jesús mapacueniaje beplexaniamatabēcuenevi penataevijavabelia.

¹⁴ Icatsia Jesús jumaitsi bajarapamonaejavabelia:

—Xaniajanē pacuenia pacatsipaebijitsiatsi. Ponē gobierno pejamatabēcuene impuestomatamo pematamoyanijobabiabinē, bajarapacuenia pevajētsixae Diosojavabelia, Dioso baja vecuaajibiaexanatsi pibisiacuene pexanaeconimi. Nexata baja bajaraponē naviaata pijaboyabelia planeconijibinē. Ponē fariseonē, navajētsi ata Diosojavabelia, itsiata pijaneconi yajava naviaata pijaboyabelia. Tsipaji beayajamatabēcueneenē natane pevajētsijavata Diosojavabelia. Bajaraxuata pajivi beayajamatabēcuenejivi natane itsamonaevēcua, bajarapajivi beveliajamatabēcuenejivi exanaenatsi Dioso. Pajivi saya beveliajamatabēcuenejivi exanaenatsi Dioso, jai Jesús beplexaniamatabēcuenevi penataevijavabelia.

Pacuenia Jesús jumaitsi pejevaxijivixijavabelia yabara pelivaisi (Mt 19.13-15; Mr 10.13-16)

¹⁵ Itsamonaē pejevaxijivixi tocapataponatsi Jesús pecobeta pejayatapon-aenexa. Nexata Jesús pijajivi itsa tane bajarapacueni, Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pētsa patocapataponame panexi Jesúsjavabelia, jai.

¹⁶ Nexata Jesús jumaitsi pijajivijavabelia:

—Pētsa paitavetame. Pacopare pejevaxijivixi pepatsinexa xanējavaberena. Mapitsipejevaxijivixije jumeaebinejeva xaniavaetsia bajumecovēnēta palivaisi tsipaebatsi. Nexata pamonaē jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovēnēta Dioso pejumelivaisi.

¹⁷ Xaniajanē pacuenia pacatsipaebijitsiatsi. Mapitsipejevaxijivixije itsa jumecovēnēta palivaisi tsipaebatsi, bajumecovēnēta xaniavaetsia jumeaebinejeva. Nexata pamonaē jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovēnēta Dioso pejumelivaisi. Nexata pamonaē jumeaebinejeva xaniavaetsia jumecovēnētsiana Dioso pejumelivaisi, bajarapamonae jonena Dioso pijanacuayabetsia. Itsiata bailsi jane pamonaē Dioso pejumelivaisi jumeaebinejeva xaniavaetsia apo jumecovēnētsi tsane, apo jone tsane Dioso pijanacuayabetsia, jai Jesús pijajivijavabelia.

Pacuenia pevëjëato, bitso pexainaenë, cuaicuajjai Jesúsjavabelia yabara pelivaisi

(Mt 19.16-30; Mr 10.17-31)

¹⁸ Pevëjëato, judiövi pevetsinë, yanijoba Jesúsjavabelia. Pevëjëato jumaitsi mapacueniaje:

—Petuxanenë, pexaniajamatabëcuenenëmë, ¿detsa pitsicuene exanaenajë taxainaenexa matacabi apo peverevereceajava? jai pevëjëato.

¹⁹ Nexata Jesús jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë.

²⁰ Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsapetiriva nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Axa yayiataema. Ena ata yayiataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

²¹ Nexata pevëjëato jumaitsi Jesúsjavabelia:

—Daxita rabaja bajarapalivaisianë jumecovënëtajë pejevaxinënëjavaveliacujinae, jai pevëjëato.

²² Itsa Jesús jumetane bajarapacuenia pejumecanaviatsijavatsi, nexata icatsia jumaitsi pevëjëatojavabelia:

—Abaxë raja catosaica caejava nexanaenexa. Canajere daxita nexainaejavami. Bajarapamatamomi tsicobetsanaenename bepejiobivi. Bajaraxuacujinae nepënaponaenename. Nexata bajarapacuenia xainaname bitso nexainae-cuene Dioso pijanacuatatsia, jai Jesús pevëjëatojavabelia.

²³ Bajarapacuenia Jesús itsa jumaitsi pevëjëatojavabelia, nexata pevëjëato bitso bejamatabëjiobi tsanajetsireca. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba.

²⁴ Itsa Jesús tane pevëjëato bepejamatabëjiobi tsanajetsijavareca, nexata pevëjëato pecovëta jumaitsi pijajivijavabelia:

—iPamonae bitso daxitacuene pexinaeivi, tsiyapëbejetsi bitso penajamatabëcuenecopatsinexa Diosojavabelia pecapanepaenexatsi Dioso pijanacuayabetsia!

²⁵ Pacuenia camello acuenebi pejonejava palutaetoitaxutovojojualia, bajaran pijinia pacuenia bitso pexainaenë acuenebi tsane pejonejava Dioso pijatomarabetsia, jai Jesús pijajivijavabelia.

²⁶ Nexata Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia, bitso pexinaeivi ata, itsa apo panepae tsane Diosojavabelia? jai Jesús pijajivi.

²⁷ Jesús nexata jumaitsi pijajivijavabelia:

—Pacuene jivi apo caëjëpaetsi pexanaenexa, bajarapacuene Dioso caëjëpatsi pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënjajinavanapatsi, jai Pedro.

²⁹⁻³⁰ Jesús nexata jumaitsi:

—Xaniajanë pacuenia pacatsipaebijitsiatsi. Pajivi Dioso pijacuene petonacuenebinexa pueneta pijabomi, paxa ata, pena ata, pematapijivi ata, pejuyapijivi ata, pijava ata, pexi ata, nexata bajarapajivi mapanacuataje

pepuenetsijavami matatoxenetsia Dioso rajutsianatsi. Nexata bajarapajivi bexëajavabelia petëpaecujinae ata Dioso rajutsianatsi matababi apo pev-
ereverecaajava, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mt 20.17-19; Mr 10.32-34)

³¹ Jesús itsamonaevectua ëpijajivi, doce ponëbeje, junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

—Panejumetaema. Mara Jerusalén tomarabelia ponatsije. Bajayata Diosojumepaebivimi profetavi, xanë, Daxitajivi Pematapijinë, talivaisi tajëvelia yaquina. Pacuenia nexanaejitsia, daxita bajarapalivaisi bajayata profetavimi tajëvelia yaquina. Nexata daxita pacuenia xanë talivaisi bajayata tajëvelia profetavimi yaquina, daxita jane baja bajarapacueene Jerusalén tomaratalia netocopiapatsiana.

³² Itsanacuaverena pepatsivi pecobeyabelia necanajetsiana tanebeyaxuabinexa. Bajarapamonae necanecaponaena. Nebijataena pibisiacuenia. Nesuabiana.

³³ Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana. Itsiata baitsi jane tanebeyaxuabicujinae, acueyabi matababita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

³⁴ Itsiata Jesús pijajivi apo jumeyapëtae pajamatabëcuene yabara Jesús jumaitsi.

Pacuenia Jesús itaxutoxanepanaeyaexana bitso pitaxutotsëcënaenë, Jericó tomarapijinë, yabara pelivaisi

(Mt 20.29-34; Mr 10.46-52)

³⁵ Jesús imoxoyotanjataruca Jericótomara. Nexata namuto muxuneneta eca bitso pitaxutotsëcënaenë, apo petäenë. Bajaraponë amoneya palata vajëcabiabeca jivijavabelia.

³⁶ Nexata bitso pitaxutotsëcënaenë itsa jumetane jivibitsaëtoxaneto pecuaicuaijai tsanajetarubenaajava namutua, bajaraponë epajunateca.

—¿Detsa xua pajaitame? jai tsecae bajaraponë.

³⁷ Nexata jivi jumaitsi bajaraponëjavabelia:

—Jesús raja, Nazaret tomarapijinë, maxuayo najetaruceje, jai jivi.

³⁸ Nexata pitaxutotsëcënaenë vavajai tsecae.

—Jesús, Davidpijinë pemomomë, nitaxutotsoniataema! jai tsecae bajaraponë.

³⁹ Nexata picani itsamona, Jesús pevajënaeya penajetarubenaevi, jumeitaveta bajaraponë pemoyanexa. Itsiata biji bitsoyo orijibia vavajai tsecae.

—¿Davidpijinë pemomomë, nitaxutotsoniataema! jai tsecae pitaxutotsëcënaenë.

⁴⁰ Nexata Jesús muxunanucojopa. Jumaitsi pijajivijavabelia:

—Panetocomacaponaremema pitaxutotsëcënaenë, jai Jesús.

Itsa baja imoxoyo tocanajetarubenatsi, Jesús jumaitsi pitaxutotsëcënaenëjavabelia:

⁴¹ —¿Detsa xua jitsipame tacaexanaenexa? jai Jesús.

Nexata bitso pitaxutotsëcënaenë jumaitsi Jesúsjavabelia:

—Jesús, jitsipajë taitaxutoxanepanaejava, jai pitaxutotsëcënaenë.

⁴² Jesús nexata jumaitsi pitaxutotsēcēnaenējavabelia:

—Itaxutoxanepaname rabaja. Tspaji nesivajamatabējumaitsimē mapacueniaje: “Jesús nitaxutoxanepanaeayaxanaena,” nesivajamatabējamē, jai Jesús pitaxutotsēcēnaenējavabelia.

⁴³ Bajarapacuenia Jesús pejumaitsijavata, bitso pitaxutotsēcēnaenēmi xaniavaetsia baja tane. Nexata bajaraponē napona baja Jesús pepēta. Bajaraponē namutua jumai tsanajetarucaē Diosojavabelia:

—¡Diosomē, bitso pexaniacuene netoexaname! jai tsanajetarucaē bajaraponē.

Pamonae ata tane bajaraponē pitaxutoxanepanaejava baja, daxita bajarapamonae ata Diosojavabelia jumai tsanajetarubenaē:

—¡Diosomē, bitso ayaijamatabēcuenenēmē! jai tsanajetarubenaē Diosojavabelia.

19

Pacuenia nabarēcuaicuajaiabeje Jesúsbeje Zaqueobeje yabara pelivaisi

¹ Jesús najetaruca Jericó tomarajava.

² Jericó tomarata ponapona Zaqueovēnēnē. Bajaraponē gobierno pejamatabēcuenē impuestomatāmo pematamoyanijobabiabivi penamatacaitorobinē. Zaqueo bitso pexainaenē pexainaejava.

³ Nexata Zaqueo jamatabētane Jesús. Itsiata apo caējēpaetsi petaejava. Tspaji Zaqueo petoyaecaenēyo. Jivibitsaētōxaneto matatoyorotsia nubenatsi Jesús Zaqueo pevājēnae.

⁴ Nexata Zaqueo kujinaeponalia jivibitsaētōxaneto pevājēnaeyabelia Jesús peponaenamutuabelianexa. Junaya naejavatsia athēbēvetsica petaenucaenexa Jesús penajetarucaejava.

⁵ Nexata Jesús namutua itsa imoxoyotanajetaruca, itsa ponaeta Zaqueo athēbēyo nucaya, bajaraponaejavatsia Jesús naēcotsia. Nexata Jesús taenutisia Zaqueo. Jesús nexata jumaitsi Zaqueojavabelia:

—Zaqueo, naxanitsiayo runaimica. Nijaboyabelia raja patsijitsianē, jai Jesús.

⁶ Nexata Zaqueo naxanitsiayo runajopaica. Barēyaya copiapita pijaboyabelia pebarēponaenexa Jesús.

⁷ Daxita pamonae Jesús matatoyorotsia najetarubensatsi, itsa tane bajarapacuenē, Jesús baracuaicuajaitsi tsanajetarubenaē. Ēpamonae najumaitsi tsanajetarubenaē Jesús yabara:

—Jesús raja naponaponaejitsia Zaqueo pijabota, caranata pibisiacuene pexanaenē pijabota, najai tsanajetarubenaē bajarapamonae Jesús yabara.

⁸ Nexata Zaqueo pijabota Jesús eca mesa muxuneneta. Bajarajota Jesús pitabarata Zaqueo nonotapuna. Jumaitsi Jesúsjavabelia:

—Tajatuxanenē nejumetaema. Tsatsianejē namatajēpaeya taxainaijava tarajutsinexa bepejiojobijavabelia. Pamonae yamaxēitojorobiaya vecuanotajē tamatamoyanijobijavata impuestomatāmo, bajarapamonae tocanaviabianajē. Nexata tayamaxēitojorobijamatabēcuenē bajarapamonae rajutsianajē juya cuatro xuabeje tsaponai caijavayomijamatabēcuenē, jai Zaqueo Jesúsjavabelia.;

⁹ Nexata Jesús jumaitsi Zaqueojavabelia:

—Zaqueo, ajena rabaja pamatacabi, caxitajarabame, nijamonae yajava, nijaneconivecua pecacapanepaejavanexa Diosojavabelia. Tspaji baja nijamonae barējumecovēnētame Dioso. Zaqueo, xamē Abrahampijinē pemomo

atamē, abaxē picani Dioso apo catae Abrahampijinē pemomomēcuenia. Itsiata baitsi jane ajena baja Diosojavabelia nenajamatabēcuenecopatsixae, Dioso jane baja catane pepacuene Abrahampijinē pemomomēcuenia.

¹⁰ Xanē, Daxitajivi Pematapijinēnē, sivapatajopajē tajaitsinexa Diosovecua penaxuabivi tacapanepaenexa pijaneconivecua, jai Jesús Zaqueojavabelia.

Oro palatanēanē, diez ponēbeje, yabara pelivaisi

(Mt 25.14-30)

¹¹ Zaqueo pijabota itsamonae namuxunaevetena Jesús pet-sipaebilivaisi Zaqueojavabelia. Pamonae namuxunaevetena, jamatabēcuenenavēxaniabiaya jamatabējumai tsenae: “Imoxoyo rabaja ecalia Jerusaléntomara. Nexata Jesús itsa patsialia Jerusalén tomarabelia, copiajopaena jane baja daxita Dioso pijajivi pevetsijava,” jamatabējai tsenae bajarapamonae. Bajarapacuenia jamatabējumai tsenae tsipaji baja Jerusaléntomara imoxoyo ecalia Jesús pepatsinexa.

¹² Bajaraxuata Jesús livaisi tsipaeba bajarapamonaevjavabelia. Jesús jumaimatabēcuenenavēxaniabiaya jamatabējumai tsenae: “Imoxoyo rabaja ecaliatsi mapacueniaje:

—Petuxanenē ponapona pijanacuata. Nexata pepo nacuaevevtsinē tonajumeitorobarenatsi tajēnacuaeverena. Petonajumeitorobijumetsirena jumaitsirena mapacueniaje: “Ponaename maberenaje nacua nevetsinēnexa tacaexanaenexa nijanacua nevetsinexa. Bajaraxuacujinae naviatsiaremelia nijanacua jane baja nevetsinexa,” jaitsirena petonajumeitorobijumetsirena.

¹³ Nexata petuxanenē peponaevajēnae, junata pijajivi, diez ponēbeje. Nexata petuxanenē pijajivi evetsiaexana pijapalatanēanē, oronēanē, bitso penamatamotsinēanē. Caenē canacujitsia caepalatanē evetsiaexanapona. Nexata petuxanenē pijajivi jumaitsi pijajivijavabelia: “Bajarapapalatata pacomuataponaename. Xua pacomuataponaename, icatsia pacanajetapon-aename. Nexata bajarapacuenia netoayajava tsaponae tsane tajapalata,” jai petuxanenē pijajivijavabelia. Bajaraxuacujinae pona jane baja.

¹⁴ Itsiata baitsi jane pevetsinacuataneja pejinavanapaevi, bitso itoyatsi petuxanenē. Nexata bajarapamonae petuxanenē pecovēvelia itsamonae itorobalia, itsajotalia petuxanenē nacua pevetsinēnexa exanaejitsiatsi, bajarajotalia pejumaitsinexa: “Apo pajitsipaenē bajaraponē patan-evetsinēnexa patajanacuata,” pejinexa petuxanenē yabara.

¹⁵ Itsiata baitsi jane petuxanenē pijanacua baja pevetsinēnexa exanatsi. Nexata baja naviarena pijanacuayaberena pevetsinexa jane baja pijanacua. Nexata baja parena. Nexata petuxanenē pepatsicujinaerena, junata icatsia pijajivi peyapētaenexa jane baja pacuenia caenē canacujitsia pijapalatanēanē pijajivi tocanacuenebatsi pecovēta.

¹⁶ Copiaya pepatsinē jumaitsi pijatuxanenējavabelia: “Tajatuxanenē, nijapalatanē, taneevetsiaexanaenēmē, catopitsapa baja diez ponēbeje. Nexata baja daxitata once ponēbeje,” jai.

¹⁷ Nacuaevevtsinē nexata jumaitsi pijajivitonējavabelia: “Xanepana rabaja. Xaniavaetsia netoebetaponaponame. Tsiquirijavayo ata xaniavaetsia neto-ebetame. Nexata icatsia diez patomarabeje netoebetaponaponame,” jai nacuaevevtsinē pijajivitonējavabelia.

¹⁸ Icatsia itsanē pijatuxanenē pijapalatanē petoevetsinē pata. Nexata bajaraponē jumaitsi: “Tajatuxanenē, nijapalatanē, taneevetsiaexanaenēmē, catopitsapa baja cinco ponēbeje pematatsēna,” jai.

19 Nacuaevevtsinē nexata jumaitsi pijajivitonējavabelia: “Xamē icatsia cinco patomarabeje netoebetaponaponaename,” jai nacuaevevtsinē pijajivitonējavabelia.

20 Nexata icatsia itsanē pijatuxanenē pijapalatanē petoevevtsinē pata. Jumaitsi pijatuxanenējavabelia: “Tajatuxanenē, mara nijapalatanēje, taneevetsiaexanaenēmē. Pañuelopanayota yamatacētsiaya catoevetatsi.

21 Bajarapacuenia catoevetatsi tsipaji cacujunavatsi. Nijajamatabēcuenesaēnē. Xamē apo itaxutobejiobiataeyabiabimē nijajivi, pamonae catoeveta nijajava. Itorobabiabame nijajivi pecatopitsinexa apo nijajava ata. Itorobabiabamenua pecatonotsinexa apo neubiaexanaejava ata,” jai pijatuxanenē pijapalatanē petoevevtsinē.

22 Nexata nacuaevevtsinē jumaitsi pijajivitonējavabelia: “¡Acujirubemē xamē! Bijiaya netoebetame. Naneconitame bajarapacuenia tanejumaitsijavamē yabara. Xamē baja cajena yapētaneme tajamatabēcuenesaēnējavatajavaya yabara. Pacuenia itorobabiabajā tajajivi tanetopitsinexa apo taja- java ata, yapētaneme baja. Pacuenia ata itorobabiabajā tanetonotsinexa apo taubiaexanaejava ata, yapētaneme baja.

23 Xanepanaeijtsipa xamē banco pevetsivi itsa netocanacuenebiaexanae- jitsipame tajapalatanē. Nexata banco pevetsivi aeconoxae tajapalatanē netocanaviatsipa. Nexata pecacovaetsijamatabēcuene itsajava palata netoy- ajavacanaviatsipa,” jai nacuaevevtsinē pijajivitonējavabelia.

24 Nexata nacuaevevtsinē jumaitsi pijajivijavabelia: “Tajapalatanē pane- tovecuapire maponēje. Nexata juya parajure ponē xaniavaetsia netoeveta tajapalatanē. Bajaraponē xaniavaetsia netocanacueneba. Nexata baja pematatsēnēa diez papalatanēbeje netopitsapaeyaexana. Nexata taevetsi- aexanaenēta once ponēbeje,” jai nacuaevevtsinē.

25 Nexata nacuaevevtsinē pijajivi jumaitsi pijatuxanenējavabelia: “Pata- jatuxanenē, bajaraponē xaina baja ayaijava. ¿Detsa xuajitsia rajutsijitsiamē pematatsēnēa?” jai pijajivi.

26 Nexata nacuaevevtsinē jumaitsi pijajivijavabelia: “Pacatsipaebatsi rabaja. Pajivi baja ayaijava xaina, pematatsēnēa icatsia itsajava rajut- sianatsi. Itsiata pajivi tsiquirijavayo xaina, bajarapajivi pijatsiquirijavay- omi vecuapitsianatsi.

27 Tajavajabitsaē, pamonae picani apo jitsipae mapanacua taevetsijavaje, bajarapamonae pacaponaremena maberenaje patanevecuaverebiabinex- amē taitabēta,” jai nacuaevevtsinē pijajivijavabelia, jai Jesús livaisi petsipae- bijavata Zaqueo pijabota.

*Pacuenia Jesús pata Jerusalén tomarata yabara pelivaisi
(Mt 21.1-11; Mr 11.1-11; Jn 12.12-19)*

28 Jesús baja itsa najumevereta livaisi petsipaebijava Zaqueo pijabota, pona baja Jerusalén tomarabelia.

29 Jerusalén tomaravecuia imoxoyo eca petsuto. Bajarapatsutojumata nubena olivonaenē. Bajarapatsuto canacujitsita anijatomarayobeje ecabeje, Betfagé tomarayobeje Betania tomarayobeje. Jesús itsa imoxoyotanajetaruca bajarapatomarayobeje, nexata itoroba pijajivitonēbeje bajarapatomarayobejejavabelia.

30 Jesús jumaitsi pijajivitonēbejejavabelia:

—Paponarebeje mapatomarayo ecaliajejavabelia. Itsa rabaja papatsiaremeliabeje, pataenutsianamebeje burro pecētanutsinētsi. Bajarapaburro itsajivi ata abaxē apo jumaponae. Paisinaenamebeje. Payamaēcarenamēbeje tsane.

31 “¿Detsa xuajitsia paisinamebeje burro?” ita pacajaibeje tsane itsajivi, nexata pajumaitsimébeje tsane: “Vajatuxanenë raja namatavenona,” pajamébeje tsane, jai Jesús pijajivitonëbejevavabelia.

32 Nexata Jesús pijajivitonëbeje liabeje. Pacuenia Jesús jumaitsi, bajarapacuenia caxitajarabanucabeje burro.

33 Nexata ita isinabeje, burro pexainaevi jumaitsitsibeje:

—¿Detsa xuajitsia paisinamebeje burro? jaitsibeje.

34 Nexata Jesús pijajivitonëbeje jumaitsibeje burro pexainaevijavabelia:

—Vajatuxanenë raja namatavenona. Bajaraxuata paisinajëbeje, jai beje.

35 Nexata jane baja burro capatabeje Jesúsjavaberena. Nexata Jesús pijajivi burro tsijumajeba pijacamisajumavelia penaxatabijavanë. Jesús baja bajarapaburrojumata ecaya.

36 Jesús ita yanajetaruca burrota, panamutovelia Jesús patsijitsia Jerusalén tomarabelia, bajarapanamutua jivi pijacamisajumavelia penaxatabijavanë namutua tsivajënaeyerequejebaponatsi yaiyataeya pecopiapitsinexatsi.

37 Patsutojumata olivonaenë nubena, bajarapatsutojavatsica namuto namatonocarucaica. Nexata bajarapanamutuatsica Jesús imoxoyotana-jetaruca pepatsinexa Jerusalén tomarata. Nexata jivi ayaibitsaëtöxaneto, Jesús pijajivi yajava, vavajai tsanajetarubena. Sivabarëyaya vavajai Diosojavabelia:

—¡Diosomë, bitso ayaijamatabëcuenenëmë! jai tsanajetarubena bajarapamonae.

Bajarapacuenia vavajai tsanajetarubena tsipaji bajarapamonae kujirutaeyabiaba Jesús Dioso pesaëta ayaicuene pexanaponaejavanë.

38 Bajarapamonae jumai tsanajetarubena Jesús yabara:

—¡Maponë najetarucaje, bitso ayaijamatabëcuenenë Dioso pejamatabëcueneta najetaruca jivi pevetsinënexa! ¡Jamatabëcuenexanepanaeya jinavanapa daxita pamonae athëbëtatsia jinavanapa! ¡Pinijicuene rabaja exana Dioso! jai tsanajetarubena namutua daxita Jesús pijajivi.

39 Nexata fariseovi najetarubena bajarapajivibitsaëtöxaneto tuatujëta. Nexata fariseovi jumaitsi Jesúsjavabelia:

—Jesús, jumeitavere baja nijajivi bajarapacuenia pejumaitsiyaniva xamë yabara, jai fariseovi.

40 Nexata Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Mapamonaeje moya ita najetarubenaëjitsipa, nexata juya ibotonë vavajai tsenae tsipae, jai Jesús fariseovijavabelia.

41 Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi.

42 Jesús pesivanuejavata Jerusalén tomarapijivi, Jesús jumaitsi Jerusalén tomarapijivi yabara mapacueniaje:

—¡Bitso picani jitsipajë Jerusalén tomarapijivi mapamatacabitaje peyapëtaenexa pacuenia Dioso pepacune jamatabëcuenexanepanaeyaexanaëjitsipatsi, ita nejumecovënëtsipa! Abaxë raja aeconoxae Dioso apotocopatsi peyapëtaeyaniva bajarapacuenie.

43 Nexata tocopiapatsianatsi pibisiamatacabi. Pijavajabitsaë tsimaxëpatsianatsi. Nexata pijatomara matatoyorotsia foto yacaranatsia cuerutsianatsi petsimaxënubenaenexatsi bajarapafotota. Pijatomara

matatoyorotsia peyacaranatsiibopanaxanetopēnēya, pijavajabitsaē foto matatoyorotsia cuenatsi. Bajarapacuenia yacaranatsianatsi pijavajabitsaē.

⁴⁴ Nexata irabetsica topenetsianatsi pijabonēmi. Nexata daxita Jerusalén tomarapijivi benatsi. Pijatomara matatoyorotsia peyacaranatsiibopanaxanetomi ata tosarababenatsi. Nexata itsaibopana ata apo bocae tsane itsaibopana jumavereca. Bajarapacuenia itsane tsipaji xanē apo neyapētae Dioso athēbēvetsica taneitorobinētsica, Daxitajivi Pematapijinēnē, jai Jesús pesivanuejavata Jerusalén tomarapijivi.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi (Mt 21.12-17; Mr 11.15-19; Jn 2.13-22)

⁴⁵ Jesús pepatsicujinae Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacabiabivinua. Nexata daxita bajarapamonae Jesús pitsapaeyaexana templobovecua.

⁴⁶ Jesús jumaitsi bajarapamonaejavabelia:
—Dioso baja cajena pejumelivaisibaxutota mapatemplobo yabara tajēvelia jumaitsi mapacueniaje: “Tajabo raja jivi xanējavaberena penavajēcaebo tsane,” jai Dioso pejumelivaisibaxutota. Itsiata baitsi jane paxamē yamaxēitojorobiaya panenacobetoxotsinexa, panacaetuatabiame mapabotaje, jai Jesús templobota pecanajetabiabivijavelia.

⁴⁷ Bajaraxuacujinae caematacabi canacujitsia Jesús jivi livaisi tsipaebabiaba bajarapatemplobota. Nexata sacerdotevi penamatacaitorobivi, judiōvi pecujarubivinua, tomaraevetsivinua, najumejaita picani Jesús pebeyaxuabinexatsi.

⁴⁸ Itsiata acuenebi Jesús pebeyaxuabijavatsi. Tsipaji Jesús itsacueneneconi ata apo xainae. Daxitajivi yaiyatanetsi. Jesús jivi petsipaebilivaisianē xaniavaetsia namuxunaevetabiabatsi.

20

Pacuenia Jesús caējēpatsi daxitacuene pexanaenexa yabara pelivaisi (Mt 21.23-27; Mr 11.27-33)

¹ Itsamatacabi Jesús templobota jivi livaisi tsipaeba. Tsipaeba pexanialivaisi jivi pecapanepaelivaisinexatsi pibisiacuene pexanaeneconivecua. Nexata bajarajota pata sacerdotevi penamatacaitorobivi, judiōvi pecujarubivinua, judiōvi pijaancianovinua.

² Nexata bajarapamonae jumaitsi Jesúsjavabelia:
—Panetsipaebare cajena. ¿Jipatsa pejamatabēcueneta pecanajetabiabivi, pecomuacabiabivinua, capitsapame mapatemplobovecuaaje? jai.

³ Jesús nexata jumaitsi bajarapamonaejavabelia:
—Xanē copiaya caejumeyo pacayanijobianatsi patanejumecanaviatsinexamē.

⁴ ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? jai Jesús bajarapamonaejavabelia.

⁵ Nexata epamonae nabarēcuaicuajjai. Najumaitsi:
—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovēnētsimē Juanpijinē pepaebilivaisianē?” nacajai tsipae.

⁶ “Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata daxitajivi anaeya ibotonëta nacatseconaejitsipa vajanacabejehebinea. Bajarapacuenia nacabejehebijitsipa tsipaji daxitajivi Juanpijinë yabara sivajamatabëjumaiti: “Juanpijinë raja pepacue Dioso-jumepaebinëmi,” sivajamatabëjai, najai sacerdotevi penamatacaitorobivi, judíovi pecujarubivina, judíovi pijaancianovinua.

⁷ Nexata saya bajarapamonae jumaiti Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

⁸ Nexata Jesús jumaiti bajarapamonaejavabelia:

—Nexata xanë ata apo pacatsipaebi tsanetsi ponë nitoroba tacapit-sapaenexa bajarapamonae templobovecua, jai Jesús.

Pacuenia exana piamatabëcuenebejevi, itsanë pijauvacababo petoetsivivi yabara pelivaisi

(Mt 21.33-44; Mr 12.1-11)

⁹ Jesús taxuxuaba livaisi petsipaebijava jivijavabelia. Jumaiti mapacue-niaje:

—Pijaira pexainaenë pijairata uba ayaibacaboxaneto uvavënëjava. Baraxuacujinae itsamonae evetsiaexana pijauvacababo. Jumaiti bajarapamonaejavabelia: “Pamatacabi cuainaveretsiana, natsicobetsanaenatsi. Pamatacabi raja cuainaveretsiana, tajajivitonë itorobiarenajë xua panetsatsianame tanetopitsinexa,” jai uvabacabo pexainaenë petoetsivitsi-javabelia. Nexata uvabacabo pexainaenë tajënacuyabelia pona bajayajebi pijabitsarucaenexa.

¹⁰ Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoetsivitsijavabelia petsicobetsatsinexatsi. Nexata uvabacabo pexainaenë pijajivitonë tovaetabatsi. Toconibabiatsi. Petoconibacujinaetsi cobesa naviatxiaexanalitsi.

¹¹ Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia pibisiacuenia tobijatanetsi. Toconibabiatsi. Peconibacujinaetsi cobesa naviatxiaexanalitsi.

¹² Itsiata uvabacabo pexainaenë icatsia itoroba itsanë pijajivitonë. Icatsia bajaraponë ata tomatajorobabiatsi. Uvabacabopënëyabelia xuabatsi.

¹³ Nexata uvabacabo pexainaenë jamatabëjumaiti: “¿Detsa nexata xua exanaenajë? Itorobianajë cajena taxë nato, tasivanë. Itsa raeta itorobianajë taxë nato, bajarapamonae netoyaiyataena,” jamatabëjai uvabacabo pexainaenë.

¹⁴ Itsiata baiatsi jane uvabacabo petoetsivitsi, uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonae najumaiti: “Mara ponëje itsamatacabi paxa pevënamuto paxa pijauvacababo pitsipaje. Naxanitsia. Beyaxuabatsi. Nexata raja vaxaitsi vajauvacababo tsane,” najai uvabacabo petoetsivitsi.

¹⁵ Nexata uvabacabo pexainaenë pexënato ata tovaetabatsi. Caponaliatsi bajarapauvacababo pepënëyabelia. Bajarapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipaebivijavabelia. Jumaiti:

—¿De meta nexata xua exanaena uvabacabo pexainaenë pijauvacababo petoetsivitsijavabelia?

¹⁶ Uvabacabo raja pexainanē, patsiarena. Verebiabiana daxita bajarapamonae. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

Jesús penamuxunaevetsivitsi itsa jumetane bajarapacuenia Jesús pejumaitisjiva, bajarapamonae jumaitis:

—¡Dioso pētsa copata bajarapacuenia pexanaenexa paxanējavabereña! jai bajarapamonae.

¹⁷ Nexata Jesús asaēyata naēcota bajarapamonaejavabelia. Jumaitis bajarapamonaejavabelia:

—Payapētaneme rabaja pacuenia Dioso pejumelivaisibaxutota tajēvelia jumaitis xanē yabara. Iboto pelivaisicuenia Dioso pejumelivaisibaxutota jumaitis xanē yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanē pītsiana. Nexata bajarapaibotota xaniavaetsia nayaētsiana botabu daxita itsaibo matatoxenetsia, jai tajēvelia Dioso pejumelivaisibaxutota xanē yabara.

Bajarapacuenia tajēvelia Dioso pejumelivaisibaxutota itsa jumaitis, judíovi penamatacaitorobivi apo tanejumecovēnētsijavanexa yabara jumaitis. Dioso taneitapetsijava daxitajivi tacapanepaenēnexa yabara ata jumaitis, jai Jesús.

¹⁸ Icatsia Jesús jumaitis mapacueniaje:

—Pamonae apo nejumecovēnētsi Dioso pexēnatocuenenē, bajarapamonae bitso bejamatabējiovi tsane apo tanejumecovēnētsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonae naneconitsiaexanaenajē, bajarapamonae pepacuenie naxuabiana daxitamatacabijavabelianexa. Pacuenia iboto pematacēnēbinētsi apo asaē, bajara itsane, jai Jesús bajarapamonaejavabelia.

Pacuenia Jesús jamatabēcueneējēbiaya yanijobatsi impuestomatamo pe-matamotsijava yabara pelivaisi

(Mt 22.15-22; Mr 12.13-17)

¹⁹ Palivaisi Jesús tsipaeba templobota, bajarapalivaisi sacerdotevi penamatacaitorobivi, judíovi pecujarubivi ata, jumeyapētane. Nexata bajarapamonae najumaitis:

—Vaxaitsi raja Jesús nacajai, najai.

Nexata picani bajarajota bajarapamonae Jesús jamatabēvaetabatsi. Itsiata bajarapamonae abaxē apo vaetabatsi. Tsipaji cujunava jivi.

²⁰ Nexata itsamatacabi bajarapamonae itorobarena pijajivi yaenebiaya petonamuxunaevetsinexatsi Jesús. Nexata bajarapamonae pijajivi bepexaniajamatabēcuenevi itajara jinavanapa Jesúsjavata. Bajarapamonae namuxunaevetena Jesús jivi livaisi petsipaebijavata. Bijiaya Jesús jivi livaisi itsa tsipaeba, bajarapalivaisi yabara picani Jesús pecaponaenexatsi nacuaevevetsinējavabelia peneconitsinexatsi.

²¹ Nexata bajarapamonae jamatabēcueneējēbiaya jumaitis Jesúsjavabelia mapacueniaje:

—Jesús, pacayapētanetsi jivi pepacuenie pexaniajailivaisi netsipaebijava. Daxitajivi, ricovi ata, bepejiobivi ata, najēpaeya yayataeya pexaniajailivaisi tsipaebabiabame bajarapamonae pejinavanapaenexa pacuenia Dioso jitsipa.

²² Panetsipaebare. ¿Xanepana tsaja vajamatamotsinexa impuestomatamo Romanonacua pepo pevetsinējavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabēcueneējēbiaya Jesúsjavabelia.

23 Itsiata bairi jani Jesú jamatabëcueneypëtane bajarapamonae jamatabëcuenejëbiaya peyanijobijavatsi peneconitsinexatsi picani. Nexata Jesú jumaiti bajarapamonaejavabelia:

—¿Detsa xuajitsia panejamatabëcuenejëbame?

24 Panetsitajëre palatanëyo, jai Jesú.

Nexata bajarapamonae tsitajëtatsi palatanëyo. Nexata Jesú jumaiti bajarapamonaejavabelia:

—¿Jipatsa mapitabaraje, pevënëna, ruca mapapalatanëyomataje? jai Jesú.

Nexata bajarapamonae jumaiti Jesújavabelia:

—Romanonacua raja pepo pevetsinë pitabara, pevënëna, jai.

25 Nexata Jesú jumaiti bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesú.

26 Nexata bajarapamonae ajibi Jesú peyabaravaetabijavatsi jivijavabelia livaisi petsipaebijava yabara. Tsipaji xaniavaetsia Jesú jumecanaviata bajarapamonae jamatabëcuenejëbiaya peyanijobijavatsi. Caranata bajarapamonae jamatabëcuenenabenajaca xaniavaetsia Jesú pejumecanaviatsixae bajarapamonaejavabelia. Moya baja nexata ena bajarapamonae.

Pacuenia Jesú tsipaeba jivi petëpaecujinae icatsia piasaëjavanexa yabara pelivaisi

(Mt 22.23-33; Mr 12.18-27)

27 Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, apo asaë icatsia tsane,” jai tsabiabi. Nexata saduceovi imoxoyobatsi Jesú. Saduceovi jumaiti Jesújavabelia mapacueniaje:

28 —Jesú, Moiséspijinë bajayata vajanacatoyaquinaelivaisi, jumaiti mapacueniaje: “Ponë pematapijinë pepua penacojiobinë baja, itsa tëpa pexi xainaenejeva, nexata juyapijinë bepita pematapijinëmi pijavami. Bajarpacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi.

29 Nexata jinavanapa ënacaemonae, siete ponëbeje. Pepo matapijinë copiata nacojioba. Nexata bajaraponë pijava vecuatëpa pexi xainaenejeva.

30 Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia.

31 Nexata icatsia itsanë tuatajëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bajarpacuenia daxita baja siete ponëbeje, nacaemonaemi, pitaponae ata bajarapova, itsiata itsanë ata pexi apo xinae bajarapovajavabelia. Bajarpacuenia daxita siete ponëmibeje tëpa. Verevereca baja.

32 Belia baja bajarapova ata tëpa.

33 “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapomonaeyajuvënëne, pijava tsane bajarapova bajarapamatacabi? Daxita pamona siete ponëmibeje, nacaemonaemi, pitapona picani bajarapovami, jai saduceovi Jesújavabelia.

34 Nexata Jesú jumaiti saduceovijavabelia:

—Aeconoxae mapanacuataje pebijivi, petriavi ata, nacojiobapona. Itamonae pexënatoyonë pexinaevi pebijavabelia canajetapona petonacojiobinexatsi.

³⁵ Itsiata baitsi jane pamonaē Dioso itapetatsi, apo pevereverecaē-nacuātatsia jinavanapaena. Bajarapamonaē petēpaecujinaē, Dioso icatsia asaēyaexanaenatsi. Bajarapamonaē bajarapanacuātatsia apo nacojiobi baja tsane. Bajarajotatsia itsajivi ata pexēnatoyo apo canajetsi tsane pebijavabelia petonacojiobinexatsi.

³⁶ Bajarapamonaē acuenebi tsane petēpaejava. Tshipaji bajarapamonaē jinavanapaena athēbētatsia pacuenia āngelevi jinavanapa. Bajarapamonaē baja Dioso pexi tsane. Tshipaji baja petēpaecujinaē Dioso icatsia asaēyaexanaenatsi.

³⁷ Moisésipjinē bajayata yaquina pacuenia Dioso tsipaebatsi tsiquiri-naēmēyo petajueyecaecotiajavaverena. Nexata Moisésipjinē peyaquinaelivaisita, jumaiti pacuenia Dioso icatsia asaēyaexanaejitsi petēpaevimi. Nexata Moisésipjinē nacayapētaēyaexana Dioso icatsia piasaēyaexanaejavanexa petēpaevimi. Tshipaji baja Abraham peputēpae, Isaac ata baja peputēpae, Jacob ata baja peputēpae, bajarapamonaē yabara bajayata Moisésipjinē peyaquinaelivaisita jumaiti mapacueniaje: “Xanē rabaja Abraham pija-Diosonē, Isaac ata pijaDiosonē, Jacob ata pijaDiosonē,” jai baja cajena Dioso bajayata Moisésipjinējavabelia.

³⁸ Bajarapacuenia Dioso pejumaitisixae, nayapētane bajarapamonaē bajayata tēpae ata, Diosovecua apo penaxuabijava. Aeconoxae ata bajarapamonaē Dioso yavavajinavanapa athēbētatsia. Daxita petēpaevi Dioso cajena apo tsitatēpaetsi, jai Jesús saduceovijavabelia.

³⁹ Nexata judíovi pecujarubivi jumaiti Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

⁴⁰ Bajaraxuacujinaē saduceovi cjunava baja icatsia peyanijobijava Jesúsjavabelia.

Pacuenia Jesucristo yabara Davidpjinē bajayata tajēvelia: “Tajatuxanenē,” jai yabara pelivaisi

(Mt 22.41-46; Mr 12.35-37)

⁴¹ Jesús pijacuata nayabarajumaiti judíovi pecujarubivijavabelia mapacueniaje:

—¿Detsa xuajitsia jivi apo canaējētsi Cristo Dioso pexēnatocuene? Jivi saya jamatabēcuenenavēxaniabiaya jumai tsabiabi Cristo yabara: “Cristo raja itsa patsiana, saya Davidpjinē pemomo tsane,” jai tsabiabi.

⁴² Davidpjinē bajayata tajēvelia pejumaitisijava Cristo yabara Salmosvēnēbaxutota, jumaiti mapacueniaje: Dioso jumaiti tajatuxanenējavabelia: “Ecare abaxē tacujuanenia.

⁴³ Vecatsivājēnaē jumecovēnētsiaexanatsi abaxē copiaya nijavajabitsaē nitorobicuenianexa,” jai Dioso tajatuxanenējavabelia, jai Salmosvēnēbaxutota Davidpjinē bajayata pejumaitisijava Cristo yabara.

⁴⁴ Nexata Davidpjinē bajayata Cristo yabara: “Tajatuxanenē,” itsa jai, nexata Cristo Davidpjinē apo pemomo. Tshipaji baja cajena Cristo saicaya Dioso pexēnato, nayabarajai Jesús judíovi pecujarubivijavabelia, judíovi pecujarubivi pecanaējētsinexa Cristo Dioso pexēnatocuene.

Pacuenia Jesús tsipaeba pijajivijavabelia judíovi pecujarubivi penaneconit-sijava Diosojavabelia yabara pelivaisi

(Mt 23.1-36; Mr 12.38-40; Lc 11.37-54)

⁴⁵ Itsa abaxē daxitajivi namuxunaēvetatsi Jesús petsipaebilivaisi, Jesús jumaiti pijajivijavabelia:

⁴⁶ —Xania, panayajivitaema palivaisi judíovi pecujarubivi tsipaebaona panejumecovênétsiyani. Bajarapamonaе jitsipabiaba tomara tuatujéjava piapijavané penaxatababiabavanapae nexa jivi peyaiyataenexatsi. Jitsipabiabanua bitso yayiataeya pebacobinexatsi callejava. Bajarapamonaе itsa najoneyabiaba judíovi penacatuatabiabinéjava, jitsipabiaba penaenexa pexaniavirijavanéta. Nexata natsiitapetabiaba penaenexa peyaiyataevitsi penaenexa petsinubijavanéta. Bajarapamonaе itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanéta.

⁴⁷ Bajarapamonaе yamaxéitorobiaya vecuanotabiabanua pamonajivi pevecuatépaevanétsi pecobecovéjavaxi. Bajarapamonaе itajara pinijicuenia vajécabiaba Diosojavabelia. Itsiata pepo pexaniajaijamatabécueneta apo vajécabiabi. Bajarapacuenia vajécabiaba saya jivi petaenexatsi Dioso itajara bitso bepejumecovênétsivi. Nexata bajarapamonaе bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonaе Dioso apo pejumecovênétsivi, jai Jesús pijajivijavabelia judíovi pecujarubivi yabara.

21

Pacuenia ofrenda rajuta Diosojavabelia pamona pevecuatépaevatsi yabara pelivaisi

(Mr 12.41-44)

¹ Templobota Jesús cobetane bitso pexainaevi ayaijava palata pejeponaеjava cajonijavabelia. Bajarajota jivi palata jeyabiaba ofrendacuenia perajutsijava Diosojavabelia.

² Bajarajota Jesús cobetanenua pamona pevecuatépaevatsi, bepejiobiva, penajejava anijapalanényobeje. Bajarapova najia anijapalanényobeje piamatamobinényobeje. ³ Jesús nexata jumaitsi pijajivijavabelia:

—Xaniajané pacuenia pacatsipaebijitsiatsi. Mapovaje pamona pevecuatépaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabécuenearéya daxita xua itsamonae jia bajarapacajonita matatoxenetsia.

⁴ Tsipaji rabaja xua bajarapamonaе apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

Pacuenia Jesús tajévelia tsipaeba pijajivi itsamatacabi itsanacuapijivi pexubijavanexatsica templobo yabara pelivaisi

(Mt 24.1-2; Mr 13.1-2)

⁵ Jerusalén tomarata templobo itabétsiaya exaneta pexaniaviriaibotonéta. Jivi Diosojavabelia ofrendacuenia perajutsijavané ata, templobota itabétsiaya ruba templobo pitaitabétsecanexa. Nexata Jesús pijajiviyajuvénévi nabarécuaicuijai tsaponae templobo pitabétetsijava yabara. Nexata Jesús tajévelia vajunupaeba pacuenia itsamatacabi itsanacuapijivi xuabijitsiatsica templobo, daxita bajarapaaitabécuene yajava. Jesús jumaitsi pijajivijavabelia mapacueniaje:

⁶ —Itsamatacabi itsanacuapijivi xuabianica mapatemplobomije. Nexata daxita xua pataneme, pitabécuene yajava, penetsianica. Nexata templobopi-jiibotoné caiboto ata pejumavereca apo bocaе tsane, jai Jesús pijajivijavabelia.

18 Itsiata baitsi jane pepo panejamatabëcuenelivaisi bajarapamonae apo itsacueniabi tsane.

19 Itsa pajamatabëcuenesaëmë tsavanapae tsane, nexata matabacabi apo peverevereceaeva paxainaename, jai Jesús pijajivijavabelia tajëvelia pevahunupaebijavata pacuenia itsamatabacabi itsijitsia mapanacuataje.

20 Icatsia Jesús tajëvelia vajunupaeba papiayaicuene itsamatabacabi copiapatsijitsia Jerusalén tomarata, Jesús jumaitsi pijajivijavabelia mapacueniaje:

—Itsa pataename vajabitsaë, itsanacuaverena pepatsivi, Jerusaléntomara matatoyorotsia peyacaranatsijavatsi, nexata pajamatabëitsimë tsane: “Imoxoyo rabaja pevajënae Jerusaléntomara peverevereceaenexa,” pajamatabëjamë tsane.

21 Nexata bajarapamatabacabi Judea nacuata pejinavanapaevi, itsa tane bajarapacuene, berëcëpeca cajena ibotsutonëjavabelia. Jerusalén tomarapijivi ata berëcëpeca pijatomaravecu. Itsamonae pijinia, Jerusalén tomarapijivi, bajarapamatabacabi Jerusalén tomarapënyabelia itsa jinavanapa, apo benavi-abirena pijaboyaberena.

22 Bajarapacuena Jerusalén tomarapijivi itsa tocopiajopaenatsi, tocopiajopaenatsi jane baja Dioso penaneconitsiaexanaematabacabitsi. Nexata jane baja tocopiajopaenatsi daxita pacuenia baja cajena pepo bajayatami tajëvelia vajunupaeba Diosojumelivaisibaxutota.

23 Bajarapavajabitsaëmatabacabi bitso ayaicuenia bejiobi tsane mapanacuapijivije. ¡Papetiriavi penacueti yacotajinavanapa, bitso bejiobi tsane bajarapamatabacabi bitso nabejiobitsiaya peponaexae tsane! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatabacabi! Bajarapacuena daxita mapanacuapijivije pinijicuenia Dioso naneconitsiaexanaenatsi.

24 Bajarapavajabitsaëmatabacabi itsanacuaverena Jerusalén tomarapijivi vajabitsaë tsimaxëpatsianatsi. Nexata itsabitsaëtomi, Jerusalén tomarapijivimi, beyejebianatsi. Itsabitsaëtomi pijinia, Jerusalén tomarapijivimi, caponaenatsi itsanacuanëjavabelia. Nexata bajarax-uacujinae itsanacuanëpijivi patsiana Jerusalén tomarata. Nexata juya bajarapamonae jinavanapaena Jerusalén tomarata. Nexata itsanacuaverena pepatsivi evetsiana Jerusaléntomara. Matapania daxita itsanacuaverena pepatsivi vecuapitsapaena Jerusaléntomara, copatsiana baja bajarapamonae pevetsijava Jerusaléntomara, jai Jesús pijajivijavabelia tajëvelia pevahunupaebijavata papiayaicuene itsamatabacabi copiapatsijitsia Jerusalén tomarata.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

(Mt 24.29-35, 42-44; Mr 13.24-37)

25 Jesús tajëvelia navajunupaeba itsamatabacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Matabacipijijumetotatsia, xua naitajëtsiana, meravipijijumetotatsia ata, xua naitajëtsiana, tulupujavatatsia ata, xua naitajëtsiana, bajaraxuanë jivi bitso cjunaviana. Daxita nacuanëpijivi bitso najunaviacaena itsa jumetaena manuaneneta pinijimalataca bitso penajumetsijava.

26 Daxitanacuanëjava bitso jivi najamatabëxainaena itsa taena piayaicuene petocopiajopaevavatsi. Nexata daxita nacuanëjava jivi tēpajoneyabiabiana pecajunavi. Daxita xua athëbëtatsia rubena, najëabiana. Xaniavaetsia apo rubenae tsane.

²⁷ Nexata bajarapaepatota jivi netaena, Daxitajivi Pematapijinënë, athëbëvetsica itarërëbota tanajetaruaejava. Patsianicajë daxitacuene taevetsinexa. Tanivenivenaecotia yajavapatsianicajë.

²⁸ Itsa pataename pecopiapaejava bajarapacueni, nexata panajamatabëcuenesaëtsianame. Tspaji rabaja imoxoyo pevajënae tsane papecapanepaenexa jivi papecabejibia exanaebiabijavamivecua, jai Jesús pijavivijavabelia tajëvelia penavajunupaebijavata itsamatacabi icatsia pepatsijavonexatsica.

²⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijavivijavabelia mapacueniaje:

—Pacanaëjere pacuenia itsi higeranae, itsavirianaenë ata.

³⁰ Itsa baja imoxoyo pevajënae tsaponae vai pejonejavanexa, bajaraponenë pejanabaxu juva. Nexata bajarapacuenia payapëtaneme vai baja imoxoyo pevajënae pejonejavanexa.

³¹ Bajara pijinia pacuenia peneta itsa pataename pecopiapatsijava xua yabara pacatsipaebatsi, nexata payapëtaename imoxoyo baja pevajënae pecopiapatsijavanexa tsane pamatacabi daxita Dioso pijajivi evetsijitsia mapanacuataje, jai Jesús pijavivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Icatsia Jesús jumaitsi pijavivijavabelia:

—Xaniajanë pacuenia pacatsipaebijitsiatsi. Pitsijamatabëcueni aeconoxae mapamatacabitaje jinavanapa, bajarapitsijamatabëcueni abaxë, bexëajavabelia ata, apo vereverecae tsane. Matapania xua yabara pacatsipaebatsi ita baja copiapatsiana, bajarapamonae jane baja vereverecaena.

³³ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamona, itsiata jamatabëcuenenavëxaniabiana. Tspaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijavivijavabelia.

³⁴ Icatsia Jesús jumaitsi pijavivijavabelia:

—Nayajivitaeya pajinavanapaename. Pëtsa panajamatabëxainame pibisiacuene paneexanaenexa, paneaitajibinexa ata. Pëtsa pasivana-jamatabëxainame maëpanacuapijijamatabëcuenije. Belia bajarapacuenia paneexanavanapaejavata, jemata copiapatsipa tapatsimatacabinexatsica.

³⁵ Pacuenia dujuai peyamatajucaejava, meniareca jemata jivi xuareca dujuai peyamatajutsinexa, bajara pijinia pacuenia xanë tapatsimatacabinexatsica, jemata daxitanacuanëjava copiapatsiana.

³⁶ Bajaraxuata nayajivitaeya pajinavanapaename. Daxitamatacabi canacujitsia panayajivivajëcabiabianame Diosojavabelia paneajamatabëcuenesaë tsaponanexa, panevecuapanepaponaenexa daxita papibisiacuene pacatocopiapataponana. Daxita bajarapapibisiacuene panevecuapanepaecujinae ata, pavajëcabiabianame Diosojavabelia. Nexata pamatacabi xanë, Daxitajivi Pematapijinënë, patsianicajë, papeca-cäëjëpaenexa panenubenaëjava taitabarata, jai Jesús pijavivijavabelia.

³⁷ Caematacabi canacujitsia Jesús livaisi tsipaebabiaba templobota. Nexata icatsia caemervi canacujitsia Jesús tomaravecua pitsapabiaba pema-jitabiabinexa petsutojumabelia. Nexata patsutojumata olivonaenë nubena, bajarapatsutojumata Jesús majitabiaba.

³⁸ Daxita bajayacunua canacujitsia jivi patabiaba templobota penamuxu-naevetabiabinexatsi Jesús petsipaebilivaisi.

22

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

(Mt 26.1-5, 14-16; Mr 14.1-2, 10-11; Jn 11.45-53)

¹ Imoxoyo baja pevajënae pejonenexa pascuavënëfiesta. Bajarapafiesta-matacabi jivi baxane levadurata matajërëabinejeva pexanaepan.

² Sacerdotevi penamatacaitorobivi, judïovi pecujarubivinua, najumejaita pacuenia picani bajarapamonae Jesús beyaxuabijitsiatsi. Itsiata abaxë bajarapamonae Jesús apo beyaxuabitsi. Tspaji bajarapamonae jivi cjunava.

³ Nexata dovathi tsijamatabëjunuatsi Judas. Judas, ponë vënërubatsi it-savënë, Iscariote. Bajaraponë Jesús pijajivi, doce ponëbejeyajuvënë.

⁴ Judas yapëtane itsajota nacaetuata sacerdotevi penamatacaitorobivi, templobopijipolicïavi penamatacaitorobivi yajava. Nexata bajarabelia Judas pona pebarëcuaiquaijainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia.

⁵ Nexata bajarapamonae barëya. Rajutsiapaebatsi palata.

⁶ Jejai Judas. Nexata Judas Jesús naitaxutocaevetsia ponapona. Paepatota Judas toyapëxanepanatsi, perajutsinexa jane baja Jesús bajarapamonae pecobeyabelia. Bajarapacuenia Judas najamatabëxaina pexanaenexa itsajota bitso jivi apo navitsi.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Junua jane baja pascuavënëfiesta, pafiestamatacabi jivi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi.

⁸ Nexata Jesús itoroba pijajivitonëbeje, Pedrobeje Juanbeje. Jesús jumaitsi pijajivitonëbejejavabelia:

—Paponarebeje paneexanaenexabeje vajaxaejavanexa. Xua jivi baxane pascua fiestamatacabi, bajaraxua vajaxaenexa paexanaenamebeje, jai Jesús pijajivitonëbejejavabelia.

⁹ Nexata Pedrobeje Juanbeje jumaitsibeje Jesúsjavabelia:

—¿Detsa jota jitsipame bajaraxua pataexanaenexabeje? ¿Detsajota bajaraxua xaenatsi? jaibeje.

¹⁰ Jesús nexata jumaitsi pijajivitonëbejejavabelia:

—Tomarabelia itsa papatsianamebeje, pacaxitajarabianamebeje mera canalito pecanajetarucaenë. Bajaraponë papënanajetarucaenamebeje. Pabota bajaraponë joneyojopaena, bajarapabota panapatsianamebeje.

¹¹ Nexata pajumaitsimëbeje tsane bajarapabo pexainaenëjavabelia: “Vajanacacujarubinë raja Jesús jumaitsi: ‘¿Detsa jota pënëyatuuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja Jesús,” pajamëbeje tsane bajarapabo pexainaenëjavabelia.

¹² Nexata athëbëabetsia anijairabeje pexainaenëbojavata, pacatsitajëtsianabeje. Bajarapaboënëta, athëbëyotsia paira, ayaiënëtuatujë tsane. Daxitacuene bajarajota xainaena. Nexata xua jivi baxane pascua fiestamatacabi, bajarajota paexanaenamebeje vajaxaenexa, jai Jesús pijajivitonëbejejavabelia.

¹³ Nexata jane baja bajaraponëbeje ponabeje. Caxitajarababeje daxita pacuenia Jesús jumaitsi. Nexata xua jivibaxane pascua fiestamatacabi, daxita Jesús pijajivi pebarëxaenexa, bajaraponëbeje exanabeje jane baja.

¹⁴ Itsa baja copiajopa pexaeapatotanexa, Jesús, pijajivi doce ponëbeje, apóstolevi, yajava, eca mesa muxuneneta.

¹⁵ Nexata Jesús jumaitsi pijajivijavabelia:

–Tatëpaevajënae bitso jiitsipajë patacayajavaxaejava mapapascua fiesta-matacabi pexaejavaje.

¹⁶ Xaniajanë pacuenia pacatsipaebijitsiatsi. Matavëjëa rabaja mapanacuataje apo xaenë tsane pascua fiestamatacabi pexaejava. Matapania daxita patajajivimë Dioso itsa pacacapanepaena panijaneconivecua, bajara jane icatsia matapania taxa Dioso pijanacuatatsia xaenajë pascua fiestamatacabi pexaejava, jai Jesús pijajivijavabelia.

¹⁷ Nexata Jesús copavënëjavata yapita pijajivi pebarëapaeranexa. Jesús jumaitsi Diosojavabelia:

–Pexaniacuene panetoexaname. Panerajutame maporaje, jai Jesús.

Bajaraxuacujinae pijajivijavabelia jumaitsi:

–Maporaje payapire. Papaema padaxitamë mapacopataje.

¹⁸ Xaniajanë pacuenia pacatsipaebijitsiatsi. Matavëjëa rabaja mapanacuataje apo apaenë tsane uvacuirra. Matapania itsa copiajopaena daxita Dioso pijajivi pevetsimatacabi, apaenajë icatsia, jai Jesús pijajivijavabelia.

¹⁹ Bajaraxuacujinae Jesús pita panbë. Jesús jumaitsi Diosojavabelia:

–Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

–Paxaema. Mara tavitoje, patacasivatëpaejava paxamënexa. Tatëpaecujinae mapacuenia paexanabiabianameje patanenajamatabënapitabiabinexamë, jai Jesús pijajivijavabelia.

²⁰ Nexata jane baja daxita Jesús pijajivi barë nabane. Penabanicujinae Jesús icatsia yapita pijajivi pebarëapaeranexa. Jesús jumaitsi pijajivijavabelia:

–Dioso baja cajena najumecapanepaeya jumaitsi pejanalivaisi papecacapanepaenexa bajaraponëjavabelia. Bajarapacuenia pacacapanepaena tajana pejamatabëcueneta. Tajana raja runaena papecacomuatsinexa pibisiacuene paneexanaeconimivecua. Mapacapaejavataje padaxitamë papaema panenajamatabënapitabiabinexa pacuenia Dioso bajarapapejanalivaisita najumecapanepaeya jumaitsi papecacapanepaenexa bajaraponëjavabelia, jai Jesús pijajivijavabelia.

²¹ Icatsia Jesús jumaitsi pijajivijavabelia:

Panejumetaema. Ponë necanajetsijitsia tajavajabitsaë pecobeyabelia, bajaraponë naeca mapamesa muxunenetaje.

²² Xanë, Daxitajivi Pematapijinënë, tēpaenajë pacuenia tajëvelia Dioso necotopata. Itsiata baitsi jane ponë necanajetsiana tajavajabitsaë pecobeyabelia, bitso bejiobi tsane, jai Jesús.

²³ Nexata Jesús pijajivi najumai tsenae:

–¿De meta ponë vaxaitsiyajuvënënenë, canajetsiana Jesús pijavajabitsaë pecobeyabelia? najai tsenae Jesús pijajivi.

Pacuenia Jesús pijajivi: “¿Detsa ponë vaxaitsiyajuvënënenë nacavecuaayajamatabëcuenënë bitso?” najai yabara pelivaisi

²⁴ Jesús pijajivi anaeya najumenotsiaya nalivaisita. Najumaitsi:

—¿Detsa ponë vaxaitsiyajuvënënë nacavecuayajamatabëcuenenë? najai Jesús pijajivi.

²⁵ Nexata Jesús jumaitsi pijajivijavabelia:

—Nacuaeveitsivi pacuenia jamatabëpacaitoroba panetoexanaenexa, ajume-saëya pacaitorobabiaba papijajivimë, bajarapamonae pevetsinacuanëjava panejinavanapaevi. Itsiata baitsi jane bajarapacuenia pacabejiobiaexanabiabi ata, bajarapamonae jitsipabiaba paxamë bajarapamonae yabara panejumaitsinexa: “Bajaraponë vajanacayanacuaeveitsinë, bitso pexanicuene nacatoexanabiaba,” panejainexa.

²⁶ Pëtsa paxamë bajarapamonae cuenejëpaeya bepaayajamatabëcuenevimë panataneme. Ponë raja peneta paxamëyajuvënënë daxita paxamë pacavecuayajamatabëcuenenë, bajaraponë peneta daxitajivi beprijavitonëcuenia yavenonaena.

²⁷ Mapanacuata petuxanenë itsa xaeyeca mesata, petuxanenë jamatabëcuenevetatsi pijajivitonë. Tsipaji petuxanenë ayajamatabëcuenenë pijajivitonë matatoxenetsia. Itsiata xanë bajarapitsijamatabëcuene apo xainaenë. Ponaponajë paxamëjavata daxita paxamë bepanijajivitonëncuenia patacayavenonaenexa, jai Jesús.

²⁸ Icatsia Jesús jumaitsi pijajivijavabelia:

—Pacuenia jivi nitoya, nebejiobiaexananua, bajarapacuenia paxamë ata patajajivixaemë, pacaexana. Bajarapacuenia pacaexanae ata tsane, itsiata apo panenavecuacopabimë tsane. Tsitecaeya paneyajavajinavanapame.

²⁹ Bajaraxuata nexata pacuenia taxa Dioso nitoroba jivi taevetsinexa, bajara pijinia pacuenia juya xanë ata paxamë pacaitorobatsi jivi paneevetsivinexa.

³⁰ Nexata paxamë pacajamatabëcuenecajëpaena taevetsinacuatatsia tamesata panenanabaninexa, panenamatavejëaapaenexanua. Paenaename jueznëcuenia panenaneconitsiaexanaenexa pijaneconi pexainaevi. Nexata pananeconitsiaexanaename Israelpijinjëmi pexi, doce ponëmibeje, pemoxiyajuvënëvi, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi (Mt 26.31-35; Mr 14.27-31; Jn 13.36-38)

³¹ Jesús jumaitsi Pedrojavabelia:

—Simón, dovathi baja cajena jamatabëcapita xanëvecua. Bitso cajamatabëcuenejëbiana tanenavecuacopatsinexamë. Pacuenia arroxainaenë arrozxu jëba pesi pevexuabinexa, bajara pijinia pacuenia pecaxuabinexa xanëvecua cajamatabëcuenejëbiana dovathi.

³² Itsiata baitsi jane catovajëtatsi Diosojavabelia necopatsiyaniava tanejumecovënëtsijavamë. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabëcuene babataponapon-aename Dioso pejumecovënëtsivi, jai Jesús Pedrojavabelia.

³³ Pedro nexata jumaitsi Jesúsjavabelia:

—Tajatuxanenë, najamatabëcueneveretajë baja. Penaneconitsivi pejebabiabibota caetsi ata, tanaponaponenexa xamëta. Najamatabëcueneveretajë baja tacayajavatëpaenexanua, jai Pedro Jesúsjavabelia.

³⁴ Nexata icatsia Jesús jumaitsi:

—Pedro, xaniajanë pacuenia catsipaebijitsiatsi. Ajena, mapameravitate, vacara pefiabivajënaeya nayavajunuaxainaename tajajivitonëcuenemë. “Xanë cajena apo yapëtaenë bajaraponë,” jamë tsane acueyabi xuabeje xanë yabara, jai Jesús Pedrojavabelia.

Pacuenia baja itsa imoxoyo pevajēnae Jesús pebeyaxuabinexatsi, tsipaeba pijajivijavabelia yabara pelivaisi

³⁵ Jesús yanijoba pijajivijavabelia. Jesús jumaitsi mapacueniaje:

—Imata panamuto itsa pacaitorobatsi Dioso pejumelivaisi jivi daxitanacuanējava panetsipaebanajetarubenaenexa, pacaitavetatsi panecaponaeayaniva doru, palata ata, zapato ata. ¿Bajarapamatacabi panamatavenoname tsaja itsacuenejava? jai Jesús pijajivijavabelia.

Nexata Jesús pijajivi jumaitsi:

—Jume. Apo panamatavenonaenē cajena itsacuenejava ata bajarapamatcabi, jai.

³⁶ Jesús nexata jumaitsi:

—Baja rajane aeconoxae panamuto, pajivi doru xaina, bajarapajivi caponae pijadoro. Palata ata caponae. Pajivi espada apo xinae, bajarapajivi penajumaxuabipana canajetsi. Comuatsi espada.

³⁷ Xaniajanē pacuenia pacatsipaebijitsiatsi. Pacuenia xanē yabara Diosojumelivaisibaxutota tajēvelia jumaitsi, bajarapacuenia netocopiapatsiana. Dioso pejumelivaisibaxutota tajēvelia xanē yabara jumaitsi mapacueniaje: “Naneconitsiaexanaenatsi bepibisiacuene pexanaenēcuenia,” jai tajēvelia xanē yabara Diosojumelivaisibaxutota. Nexata bajarapacuenie imoxoyo baja pevajēnae tanetocopiapatsinexa, jai Jesús pijajivijavabelia.

³⁸ Nexata Jesús pijajivi jumaitsi:

—Tajatuxanenē, mara anijaespadabejeje, jai Jesús pijajivi.

Nexata Jesús jumaitsi pijajivijavabelia:

—Xanepana rabaja, jai Jesús.

Pacuenia Jesús vajēta Diosojavabelia Getsemanivēnējavata yabara pelivaisi (Mt 26.36-46; Mr 14.32-42)

³⁹ Jesús pitsapa vecueva. Pacuenia ponabiaba, bajarapacuenia icatsia pona petsutojumabelia. Patsutojumata olivonaenē apaaxayo, bajarapatsutojumabelia pona. Nexata Jesús pijajivi pēnaponatsi.

⁴⁰ Jesús pijajivi itsa barēpata bajarapatsutojumabelia, Jesús jumaitsi pijajivijavabelia:

—Pacajamatabēcueneējēbiana raja dovathi pejamatabēcueneta. Pavajētaponare aeconoxae Diosojavabelia paneajamatabēcuenesaēnexa panecopabiyaniya patanejumecovēnētsijavamē, jai Jesús.

⁴¹ Nexata Jesús pijajivi vecuanatixilia bejamatabēcuene treinta metro. Jesús nucajunua pematabacabēta pevajētaponaeenexa Diosojavabelia.

⁴² Jesús pevajētsijavata jumai tsaponae Diosojavabelia:

—Taxa Diosomē, netocopatame picani tanebeyaxuabinexa betajio-bicueneta. Itsa jitsipame, necapanepare bajarapabejio-bicuenevēcua. Itsiata xanē apo tajitsipaecuene ata, pacuenia xamē jitsipame, netocopatsianame, jai Jesús pevajētsijavata Diosojavabelia.

⁴³ Nexata Jesús athēbēpijāngel tsitanaitajētatsi pejamatabēcuene asaēyaexanaenexatsi.

⁴⁴ Jesús pebeyaxuabijavanexatsi yabara, bitso natsinajamatabēxaina. Nexata Jesús bitso orijibia asaēyata vajēta pona Diosojavabelia. Jesús bitso janetatsi. Pacuenia itsi pijana, bajara itsi Jesús pejanetsibarēmenetsi. Topitopijai irabereca.

⁴⁵ Jesús pevajētsicujinae itsa nonotapuna, lia pijajivijavabelia. Nexata Jesús pijajivi caxitajaraba pemajitanubenaevi. Tsipaji Jesús pijajivi bitso penajamatabēxainaējava, cuerana.

⁴⁶ Nexata Jesús jumaitsi pijajivijavabelia:

—¿Detsa xuajitsia pamajitanubename? Panonobapunare. Pavajëta ponare Diosojavabelia, dovathi pejamatabëcueneta pacajamatabëcueneëjebi ata paneajamatabëcuenesaënexa, jai Jesús pijajivijavabelia.

Pacuenia Jesús vaetabatsi pijavajabitsaë yabara pelivaisi
(Mt 26.47-56; Mr 14.43-50; Jn 18.2-11)

⁴⁷ Jesús pijavajabitsaë pevaetabijavatanexatsi, cuaicuaijai tsanucæe pija-jivijavabelia. Nexata bajarapaepatota jivi ayailbitsaëtöxaneto, Jesús petsi-maxëponaevitsi, najetarubena. Ponë vënërubatsi Judas, Jesús pijajivi doce ponëbejeyajuvënënëmi, matacanajetaruca bajarapamonæ. Nexata Judas najetabilia Jesúsjavabelia. Itabaratsutsuniaya bajacobatsi.

⁴⁸ Nexata Jesús bajarajota jumaiti Judasjavabelia.

—Judas, ¿matsa pacuenia nitabaratsutsuniaya nebajacobame xanë, Daxita-jivi Pematapijinënë, tanecanajetsinexamë tajavajabitsaë pecobeyabeliaje? jai Jesús.

⁴⁹ Jesús pijajivi ita tane pacuenia Jesús exanaejitsiatsi, nexata bajarapa-monæ jumaiti Jesúsjavabelia:

—Tajatuxanenë, ¿namaxëvanitsianatsi tsaja espadata? jai Jesús pijajivi.

⁵⁰ Nexata caenë Jesús pijajiviyajuvënënë namaxëvanita. Sacerdotevi pepo penamatacaitorobinë pijajivitonë muxuyoropaebiaxuaba pecujanenia pamuxuyoroto.

⁵¹ Nexata Jesús jumaiti pijajivitonëjavabelia:

—Copabare baja, jai Jesús.

Nexata Jesús bajaraponë muxuyoroyataba. Jesús baja muxuyororuta icatsia bajaraponë.

⁵² Pamonaë Jesús tsimaxëpatatsi, itsamonaë sacerdotevi penamatacaitoro-bivi, itsamonaë templobopijipolicíavi penamatacaitorobivi, itsamonaë judíovi pijaancianovi. Bajarapamonæ caponaejitsiatsilia Jesús. Nexata Jesús jumaiti bajarapamonæjavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë.

⁵³ Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Nexata mapaepatotaje panetsimaxëpatame dovathi, jivi pijaamatabëcuene itaquiriyaexanaenë, papecaitorobixæ, jai Jesús petsimaxëpatsivitsijavabelia.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jesús pevaetabicujinaetsi, caponaliatsi sacerdotevi pepo penamata-caitorobinë pijaboyabelia. Nexata Pedro bajarapamonæ pecovëvelia tajiyo pënanajetaruca.

⁵⁵ Nexata pabota Jesús capatatsi, bajarajota, panabo tuatuajëta, vajabitsaë isoto itajuruteta. Bajarapamonæ isoto matatoyorotsia ena. Pedro nexata naitaxutocaevetsiaya naeca bajarapamonæjavata.

⁵⁶ Nexata bajarapabota penacuenebiva, Pedro ita taeyetatsi penanonpecaejavata isoto muxuneneta, naitaxutobabatsia asaëya taenucatsi. Nexata itsamonaëjavabelia bajarapova jumaiti Pedro yabara:

—Mara ponë ata Jesús pijajivitonëje, jai bajarapova.

⁵⁷ Nexata Pedro jumaiti bajarapovajavabelia:

—Jume raja. Xanë cajena apo yapëtaenë bajaraponë, jai Pedro bajarapova-javabelia Jesús yabara.

⁵⁸ Bajaraxuacujinae icatsia itsajivi Pedro taeyetatsi. Bajarapajivi ata icatsia jumaiti Pedrojavabelia:

—Xamë ata rabaja cajena Jesús pijajiviyajuvënënëmë, jai.

Nexata Pedro jumaiti bajarapajivijavabelia:

—Jume raja. Xanë raja cajena apo Jesús pijajiviyajuvënënënë, jai Pedro.

⁵⁹ Bejamatabëcuene caehoracujinae, icatsia itsanë jumaiti:

—Xaniajai rabaja cajena. Maponëje Jesússta naponaponaje. Tsipaji rabaja bajaraponë ata Galilea nacupijjinë, jai bajaraponë Pedro yabara.

⁶⁰ Nexata Pedro nayajumetane. Pedro nexata jumaiti bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaitisjavata, vacara baja fiaba.

⁶¹ Nexata Jesús boverena namuxufeta Pedrojavaberena. Taeyerenatsi Pedro. Nexata bajarapaepatota Pedro najamatabënapitajaraba Jesús pe-jumaitisjavatsi: “Pedro, ajena, mapameravitaje, vacara pefiabivajënaeya nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijavatsi Jesús, najamatabënapitajaraba Pedro.

⁶² Nexata baja Pedro pitsapalia bopanabovecua. Pinijicuenia nua.

Pacuenia Jesús pijavajabitsaë capocaponatsi yabara pelivaisi
(Mt 26.67-68; Mr 14.65)

⁶³ Pamonae Jesús vaetabatsi, capocaponatsi. Itabaratsaquibabeponatsi pecobethaitonëta.

⁶⁴ Papaëbërëpanata itaxutocëtatsi. Pitaxutocëtsicujinaetsi icatsia itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—¡Vënëjonare ponë caitabaratsaquibaba! jai tsaponae.

⁶⁵ Pibisiacuenianua bajarapamonae jumai tsaponae Jesúsjavabelia.

Pacuenia Jesús nutatsi judíovi penamatacitorobivi pitabarata yabara pelivaisi

(Mt 26.59-66; Mr 14.55-64; Jn 18.19-24)

⁶⁶ Ajena baja matacabi tsarucaponae, nacaetuata judíovi pijaancianovi, sacerdotevi penamatacitorobivi yajava, judíovi pecujarubivi yajava. Nexata Jesús caponarenatsi bajarapamonae penacaetuatsijavaberena. Bajara-jota bajarapamonae jumaiti Jesúsjavabelia:

⁶⁷ —Panetsipaebare. ¿Xamë tsabaja rovia Cristomë, athëbëvetsica Dioso pecaitorobinëtsica jivi necapanepaenënexa? jai bajarapamonae.

Nexata Jesús jumaiti bajarapamonaejavabelia:

—“Xanë rabaja Cristonë, athëbëvetsica Dioso taneitorobinëtsica jivi tacapanepaenexa,” pacajai atatsi tsipae, itsiata apo panejumecovënëtsimë tsipae.

⁶⁸ Itsalivaisiyo pacayanijobi atatsi tsipae, itsiata apo panejumecanaviat-simë tsipae. Apo panecopatsimënuu tsipae.

⁶⁹ Itsiata baitsi jane tavajënaeyabelia xanë, Daxitajivi Pematapijinënë, ecae-najë taxa Dioso pecujuanenia patanajuaevetsinexabeje daxitacuene. Bajaraponë pecajëpænëtsi daxitajamatabëcuene, jai Jesús bajarapamonaejavabelia.

⁷⁰ Nexata daxita bajarapamonae jumaiti Jesúsjavabelia:

—¿Xamë tsabaja Dioso pexënatomë? jai bajarapamonae.

Nexata Jesús jumaitsi bajarapamonaejavabelia:

—Jājā, xanē rabaja pacuenia panejumaitsimē. Bajaraponēnē, jai Jesús.

⁷¹ Nexata bajarapamonaē najumaitsi:

—Ajibi rabaja abaxē vajeavetaponaējava jivi neconitsiaya vajanacatsipae-baponaenexa pacuene yabara naneconitsiaexanaejitsiatsi maponēje. Vaxaitsi rabaja vajacuata jumetanetsi pacuenia maponēje cuacuajjai Dioso apo pejisipaecuenia. Tshipaji beDioso pexēnato natane, najai bajarapamonaē.

23

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Mr 15.1-5; Jn 18.28-38)

¹ Daxita judiovi pijaancianovi nonobapuna. Sacerdotevi penamatacaitorobivi ata nonobapuna. Judiovi pecujarubivi ata nonobapuna. Nexata bajarapamonaē Jesús caponaliatsi itsaboyabelia, Judeanacua pevetsinē Pilato pijaboyabelia.

² Bajarajota Pilato pitabarata bajarapamonaē neconitsiaya jumaitsi Jesús yabara:

—Mara ponēje naneconita. Tshipaji muxubijiapenetapona jivi pianaepanaenexa nacuaevetsivijavabelia. Paneitavetaponanua patamatamotsiyaniwa Romanonacua pepo pevetsinē pejamatabēcueneta impuestomatamo pataneyanijobijava. Jumai tsaponaenua: “Xanē raja Cristonē, nacua taevetsinē,” jai tsaponaē maponēje, jai bajarapamonaē Jesús yabara neconitsiaya Pilatojavabelia.

³ Nexata Pilato jumaitsi Jesúsjavabelia:

—¿Xamē tsaja judiovi pepo nevetsinē? jai.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

⁴ Pilato nexata jumaitsi sacerdotevi penamatacaitorobivijavabelia, jivi ayaibitsaētoxanetojavabelia ata:

—Apo caxitajarabinē cajena itsacujiruneconi ata pexinaejava maponēje, paneconi yabara naneconitsijitsia, jai Pilato.

⁵ Itsiata bajarapamonaē ajumesaē. Orijibia neconitsia jumaitsi Jesús yabara:

—Bajaraponē daxita Judea nacuapijivi muxubijiapenetapona bajarapamonaē pianaepanaenexa Judeanacua pevetsivijavabelia. Taxuxuaba cajena bajaraponē bajarapacuenia pexanaejava Galilea nacuata. Nexata maberena ataje bajarapacuenia icatsia exanapona, jai bajarapamonaē Jesús yabara Pilatojavabelia.

Pacuenia Jesús nutatsi Herodes pitabarata yabara pelivaisi

⁶ Pilato itsa jumetane bajarapamonaē peneconitsijavatsi Jesús, nexata Pilato jumaitsi bajarapamonaejavabelia:

—¿Matsa ponēje Jesús, Galilea nacuapijinēje? jai Pilato.

⁷ Nexata bajarapamonaē tsipaeba Pilatojavabelia Jesús Galilea nacuapijinēcuene. Nexata Pilato itoroba pijajivi Jesús pecaponaenexatsilia Herodesjavabelia. Tshipaji Herodes Galileanacua pevetsinē. Bajarapamatacabi Herodes ponapona Jerusalén tomarata.

⁸ Nexata Herodes itsa tane Jesús, barēya. Tshipaji Herodes vēnēlivaisitaeyabiaba Dioso pesaēta Jesús pinijicuene pexanaponaejavanē. Nexata Jesús pinijicuene pexanaejava Dioso pesaēta jamatabētane Herodes.

⁹ Nexata Herodes ayaicuenia yanijobapona Jesúsjavabelia. Itsiata Jesús apo jumepitsi caejumeyo ata.

¹⁰ Bajarajota nubena sacerdotevi penamatacaitorobivi, judíovi pecujarubivi yajava. Bajarapamonae ayaijumeta neconitaponatsi Jesús Herodesjavabelia.

¹¹ Nexata Herodes, pijajivi yajava, Jesús capocaponatsi. Bitso pexaniajava, xua nacuaevevsinē banaxatata, bajaraxua Jesús quenetsiataeya xatatatsi. Bajarapacuenia Jesús quenetsiataeya xatatatsi pepo nacuaevevsinēcuenia petaenexatsi. Bajaraxuacujinae icatsia canaviabarenatsi Pilatojavaberena.

¹² Pilatobeje Herodesbeje naitoyabeje picani. Itsiata bajarapamatacabi nabarajamatabēcuenexanepabeje. Naxaniababeje baja.

Pacuenia baja Pilato tocopata Jesús pebeyaxuabinexatsi yabara pelivaisi (Mt 27.15-26; Mr 15.6-15; Jn 18.39-19.16)

¹³ Pilato junata penacaetuatsinexa sacerdotevi penamatacaitorobivi. Junata penacaetuatsinexa bajarapatomarata pejinavanapaevi ata.

¹⁴ Nexata Pilato jumaitsi bajarapamonaejavabelia Jesús yabara:

—Paxamē panetocapatame maponēje. “Mara ponēje naneconita. Tsi-paji muxubijiapeneta pona jivi pianaepanaenexa nacuaevevsivijavabelia,” panejamē. Itsiata baitsi jane xanē picani tajacuata yanijobajē xaniavaetsia paneitabēta. Nexata xua yabara paneconitame, ajibi picani. Maponēje itsacujiruneconi ata apo xainae, paneconi yabara naneconitsijitsia.

¹⁵ Herodes ata apo naneconitsiaexanaetsi. Saya icatsia nacatocanaviarena. Pataneme rabaja. Itsacujiruneconi ata apo xainae maponēje, paneconi yabara beyaxuabijitsiatsi.

¹⁶ Nexata tajajivi itorobianajē bajaraponē saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajē, jai Pilato bajarapamonaejavabelia.

¹⁷ Caevai canacujitsia, pascuavēnē fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pilato copatabiaba ponē jivi vajētatsi pecopatsinexa. Nexata bajarapacuenia copatabiaba jivi pesivajamatabēcuene xanepanaenexatsi.

¹⁸ Nexata bajarapamonae itsa jumetane Pilato picani Jesús pecopatsia-paebijava, nexata daxita bajarapamonae caecuenia vavajai Jesús yabara. Bajarapamonae pevavajaijavata, Jesús yabara jumaitsi Pilatojavabelia macaenijaje:

—¡Majane ponē beyaxuareje! ¡Barrabás jane panetocapitsapare! jai bajarapamonae.

¹⁹ Bajaraponē Barrabás Jesús pevajēnaeya bajarapatomarata barēnabia go-bierno pijajivijavabelia. Nexata Barrabás jivitonē beyaxuaba. Bajaraxuata naneconitsiaponapona penaneconitsivi pejebabiabibota.

²⁰ Pilato picani jamatabēcopata Jesús. Bajaraxuata picani icatsia Pilato tsipaebijitsia jivijavabelia Jesús baja pecopatsinexa.

²¹ Itsiata baitsi jane bajarapamonae orijibia vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

²² Icatsia Pilato jumaitsi bajarapamonaejavabelia:

—¿Detsa xuajitsia? ¿Detsa papibisiacuenē exana maponēje? Apo caxitarabinē cajena itsacujiruneconi ata, paneconi yabara beyaxuabijitsiatsi. Nexata tajajivi itorobianajē bajaraponē saya tajajivi pejumaconibabenexa

penaneconitsivi pejumaconibabeyabiabimacata. Bajaraxuacujinae copat-sianajë peponaenexa baja, jai Pilato.

²³ Itsiata bajarapamonae ajumesaë. Vavajai tsaponae.

—¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

Nexata bajarapamonae, sacerdotevi penamatacaitorobivi yajava, bitso pevavajaitsaponaexae, belia baja Pilato jejai.

²⁴ Nexata baja Pilato tocopata pacuenia bajarapamonae vajëtatsi.

²⁵ Nexata Pilato itoroba pijajivi Barrabás, ponë jivitonë beyaxuaba, pecapitsapaenexatsi pepitsapaenexa baja penaneconitsivi pejëbabiabibovecua. Caranata Jesús, pianeconijibinë, pebeyaxuabinexatsi Pilato itoroba pijajivi.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Mr 15.21-32; Jn 19.17-27)

²⁶ Vajabitsaë ita caponaliatsi Jesús cruzajavabelia pecobematabiabarutsinexatsi, Simón pijinia najetaruca vayafoverena. Nexata vajabitsaë vaetabatsi Simón. Simón Cirene tomarapijinë. Nexata Simón vajabitsaë itorobatsi, pacruzajavabelia Jesús cobematabiabaruttsijitsiatsi, petocaponaenexa. Nexata bajarapacruza Simón tovëtarananajetaruca Jesús pecovëya.

²⁷ Jesús pënanajetarubenatsi, jivi ayaibitsaëtoxaneto. Bajarapamonaeayajuvënëvi, petiriavi ayaibitsaëto, Jesús bitso pënueyababuataponatsi ayaijumeta.

²⁸ Nexata Jesús napënyërota. Jumaitsi bajarapapetirivijavabelia:

—Paxamë petiriavi, paJerusalén tomarapijivimë, pëtsa panepënueyabame xanë. Paxamë jane panatsinuema. Panexi ata patsinuema.

²⁹ Itsa copiajopaena piayaimatacabi, jivi bitso bejiobi tsane. Nexata jivi jumai tsane: “Mavecovi itsiata bevelia nacatsunabejiobitane pexi apo pexainaexae,” jai tsane jivi bajarapamatacabi mavecovi yabara.

³⁰ Nexata bajarapamatacabi jivi bitso ita nabejiobitaena, belia jitsipaena petëpaejava. Nexata jivi najumai tsane: “Vajatëpaenexa, nacatoxanepanaejit-sipa pinijibotsutonë ita nacamatacënëbajarabijitsipa,” najai tsane jivi.

³¹ Xanë itsacujiruneconi apo xainae atanë, nebejiobiaexanaena ita necobematabiabaruttsiana cruzajavabelia. Nexata pamonaë pibisiacuene pexanaevi bitso xanë matatoxenetsia, bejiobiaexanaenaenatsi ita tocopiapatsianatsi piayaimatacabi, jai Jesús bajarapapetirivijavabelia.

³² Itsabelia vajabitsaë Jesús caponatsi, bajarabelia anijanëbeje penaneconitsinëbeje, Jesús yajava, caponatsi. Bajaraponëbeje pijamatabëcuenebejenëbeje vajabitsaë caponatsibeje Jesús peyajavabeyaxuabinexatsibeje.

³³ Itsa baja capaliatsi Jivimatasipavënë tsojojavabelia, nexata cruzajavabelia Jesús yajavacobematabiabarutatsi bajaraponëbeje. Itsanë rutatsi itsacruzata Jesús pecujanenia. Itsanë rutatsi itsacruzata Jesús petsavenone-nia.

³⁴ Jesús baja cruzajavabelia pepuacobematabiabaruttsi, jumaitsi paxa Diosojavabelia:

—Axa, mapamonaeje itaxutotsoniataema. Vecuaxuare paneconi xaina pibisiacuene taneexanaexae mapacueniaje. Tsipaji raja apo yapëtae. Bajaraxuata mapacuenia nexanaje, jai Jesús paxa Diosojavabelia.

Nexata vajabitsaë, pamonae Jesús cobematabiabarutatsi cruzajavabelia, bajarajota namuxusifa. Penamuxusitsijavaxi irata natsipenepeneta. Bajarapacuenia vajabitsaë penamuxusitsijavaxi canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona.

³⁵ Bajarajota daxitajivi taenubena. Judíovi pevetsivi Jesús capocaponatsi. Bajarapamonae capocaponaeya jumaitsi Jesús yabara:

—Èitsamonae yabara jumai tsabiabi: “Capanepaenajë jivi,” jai tsabiabi. Baja rajane pijacuata nacapanepae itsa xaniajai pepacueno Cristo, Dioso athëbëvetsica pitorobinëtsitsica jivi pecapanepaenexa, jai judíovi pevetsivi Jesús yabara.

³⁶ Vajabitsaë ata Jesús capocaponatsi. Nexata capocaponaeya cujibarenatsi. Rajutsijitsiatsi piijatuvinora piapaenexa Jesús.

³⁷ Nexata vajabitsaë jumaitsi Jesúsjavabelia:

—Itsa xamë judíovi pepo nevetsinë, nexata nacapanepare nijacuata, jai vajabitsaë Jesúsjavabelia.

³⁸ Bajarajota Jesús pematabocoto matatsënëyo tablapajumata, Pilato pijajivi yaquinaruta acueyabi paviriavibeje pijajumeta. Itsaitane yaquinaruta griegojumeta. Itsaitane yaquinaruta latinjumeta. Itsaitane yaquinaruta hebreojumeta. Peyaquinarubiitane jumai tsarubi mapacueniaje: “Mara ponëje judíovi pepo pevetsinëje,” jai tsarubi Jesús yabara.

³⁹ Itsanë pijamatabëcuenebejenë cruzajavabelia pecobematabiabarutsinëtsi, Jesús anaeya bijataerucatsi.

—Itsa xamë Cristomë, athëbëvetsica Dioso pecaitorobinëtsica jivi necapanepaenexa, nijacuata nacapanepare. Paxanëbeje ata panecapaneparebeje, jai tsaruae Jesúsjavabelia.

⁴⁰ Itsanë pijinia itsacruzajavabelia pecobematabiabarutsinëtsi, jumeitavetaruca. Jumai tsaruae penajuananeconitsinëbejejavabelia:

—¿Dioso tsaja apo cjunavimë netëpaenexa, cacobematabiabi ata nijaneconi yabara mapacueniaje?

⁴¹ Vaxaibeje rabiji vajaneconi xainatsibeje vajatëpaenexabeje. Nacarutabeje mapacueniaje pibisiacuene vaxaexanaexabeje. Mabiji ponëje caeto ata pibisiacuene apo exanae, jai tsaruae bajaraponë jumeitavetsiaya penajuananeconitsinëbejejavabelia.

⁴² Icatsia xuacujinae bajaraponë jumaitsi Jesúsjavabelia:

—Jesús, xanë nenajamatabënapitsianame pamatacabi xamë evetsianame mapanacuaje, jai bajaraponë Jesúsjavabelia.

⁴³ Nexata Jesús jumaitsi bajaraponëjavabelia:

—Xaniajanë pacuenia catsipaebijitsiatsi. Ajena, pamatacabi, neyavaponaponaename paraísojavatatsia, jai Jesús bajaraponëjavabelia.

Pacuenia baja Jesús tëpa yabara pelivaisi

(Mt 27.45-56; Mr 15.33-41; Jn 19.28-30)

⁴⁴ Jesús baja itsa tëpaejitsia, matonejeepatota, daxita nacuanëjava aitaquiri tsajini. Matapania acueyabi pahorabejecujinae, caniviyojavabelia, nacua napebeta icatsia.

⁴⁵ Paepatota Jesús tëpanajereca, bajarapaepatota templobo ënëtuatuajëalia pënëyatuucutarutsipana, ayaipapaëbërëpana, tuatuajëatsica titititicaica.

⁴⁶ Nexata Jesús ayaijumeta jumaitsi Diosojavabelia:

—Axa, xamëjavabelia daxita tajamatabëcuene carajutatsi, jai Jesús.

Itsa baja Jesús najumevereta bajarapajume, tēpanajereca jane baja.

⁴⁷ Nexata Romano nacuapijinē, vajabitsaē pijacapitán, itsa tane daxita bajarapacuene, bajaraponē Diosojavabelia jumaitsi:

—Diosomē, bitso ayaijamatabēcuenenēmē. Xaniajai tsaena baja. Maponē tēpaje, planeconijibinē, jai vajabitsaē pijacapitán.

⁴⁸ Daxita pajivibitsaētoخانeto taenubena pacuenia Jesús jumaliverevereca, bajarapamonae bitso najamatabēxainaeya naviaba pijabonējavabelia.

⁴⁹ Daxita pamonaē Jesús peyapētaevitsi, pebijivi, petiriavi ata, pamonaē Galilea nacuaverena pēnaponatsi, tajijojavaverena taenubena, petaenexa Jesús pebeyaxuabijavatsi.

Pacuenia Jesús petēpaenē vaatatsi ibovajualia yabara pelivaisi

(Mt 27.57-61; Mr 15.42-47; Jn 19.38-42)

⁵⁰ Jerusalén tomarata ponapona José, Arimatea tomarapijinē. Bajaraponē pexaniajamatabēcuenenē, xaniavaetsia peponaponaenē Dioso pitabarata. Bajaraponē judíovi pevetsinē.

⁵¹ José copiaevetaponapona pecopiajopaejava pamatacabi caenē Dioso evetsijitsia daxita pijajivi mapanacuataje. Nexata José apo jamatabēcuenējēpae pacuenia judíovi exana Jesúsjavabelia.

⁵² José nexata lia nacuaevetsinē Pilatojavabelia. Vajēta petocopatsinexatsi pemēthētsinexa petēpaenē Jesús.

⁵³ Bajaraxuacujinae José cruzajavavetsica pitsica Jesús petēpaenē. Daxitanēreca mataquionaeya matakacēba pexaniaviria piapiasābanapanata. Nexata cajena itsajota José iboitapajanitovavata pinijibovaju toexanabuatatsi petēpaevi pebutaponaenexa, bajarapaibovajualia buata Jesús petēpaenē. Bajarapavajualia abaxē itsajiviyo ata petēpaejiviyo José apo buatsi.

⁵⁴ Pamatacabi José bajarapacuenia vajēta Pilatojavabelia Jesús petēpaenē pemēthētsinexa, bajarapamatacabi judíovi penacuenebijava banacuenevereta baja pecopiajonevajēnaeya penacueraevetsimatacabinexa. Nexata paepatota José ibovajualia buata Jesús petēpaenē, bajarapaepatota José baja tocopiaapataponatsi penacueraevetsimatacabinexa.

⁵⁵ Papetiriavi Jesús pēnaponatsi Galilea nacuaverena, bajarapapetiriavi tajijo José pecovēya najetarubena. Nexata bajarapapetiriavi tane Jesús petēpaenē José pebuatsijava bajarapaibovajualia.

⁵⁶ Bajaraxuacujinae bajarapapetiriavi naviaba baja pijaboyabelia. Nexata pepatsicujinae pijaboyabelia, bajarapapetiriavi xaniavaeta pexaniapetuxujivira, pexaniapetuxujivitsapato yajava, Jesús petēpaenē peperabēexabinexa. Nexata abaxē bajarapapetiriavi nacueraeveta judíovi penacueraevetsimatacabita pacuenia itorobatsi Dioso Moiséspijinēta bajayata penajumecopatsilivaisi.

24

Pacuenia Jesús petēpaecujinae icatsia asaē yabara pelivaisi

(Mt 28.1-10; Mr 16.1-8; Jn 20.1-10)

¹ Judíovi baja penacueraevetsimatacabi verevereca. Nexata meravia pitsiavavata, ajena juameto pitsapaina, papetiriavi xaniavaeta pexaniapetuxujivijava, icatsia ponalia Jesús petēpaenē pebuatsiibovajutsijavabelia. Patuxujuvijava xaniavaeta Jesús petēpaenē peperabēexabinexa, caponalia Jesús petēpaenē peperabēexabinexa jane baja picani. Itsapetiriavi yajava ponalia peyanabinexatsi.

² Itsa baja palia, nexata bajarapapetiriavi tane Jesús petēpaenē pebuatsiibovajutsi peyavēpaacatsiibopanaxanetomi petixitanutsijavalia.

³ Bajarapamonae joneya picani Jesús pebuatsiibovajutsijavalia. Itsiata baitsi jane apo caxitajarababuatsi petēpaenē, pepo petuxanenē Jesús.

⁴ Nexata bajarapapetiriavi bitso jamatabēcuenenajunaviaca. Apo yapētae pacuenia exanaejitsia. Bajarajota nexata bajarapapetiriavi taenuta anijanēbeje ángelnēbeje. Bajaraponēbeje penaxatatsijavabeje nivenivena bitso.

⁵ Bajarapapetiriavi bitso cujunava bajarapaángelnēbeje. Nexata pecajunavi pematabacabēta irataeya bobena. Nexata bajarapaángelnēbeje jumaitsi petiriavijavabelia:

—¿Detsa xuajitsia petēpaenē pebuatsijavatatsi, pajaitame? Bajaraponē asaē baja icatsia.

⁶ Bajaraponē majotaje ajibi baja tsarucae. Dioso rabaja icatsia asaēyaexanatsi. Panajamatabēnapire pacuenia pacatsipaeba Galilea nacuata pamatacabi abaxē asaē tsaponaponae.

⁷ Bajaraponē baja cajena tajēvelia pacajumaitsi: “Xanē, Daxitajivi Pematapijinēnē, necanajetsiana pibisijamatabēcuenēvi pecobeyabelia. Nexata bajarapamonae cruzajavabelia necobematabiabarutsiana tanebeyaxuabinexa. Itsiata baitsi jane tanebeyaxuabicujinae, acueyabi matababita, icatsia asaēnē tsane,” pacajai baja cajena tajēvelia Jesús itsa abaxē pamatacabi pacayavaponapona, jai ángelnēbeje petiriavijavabelia.

⁸ Nexata bajarapapetiriavi najamatabēnapita pacuenia Jesús tajēvelia jumaitsi.

⁹ Nexata baja bajarapapetiriavi naviabarena Jesús petēpaenē pebuatsiibovajutsijavaverena. Nexata bajarapapetiriavi tsipaeba daxita bajarapacuenē yabara once ponēbeje, Jesús pijaapóstolevijavabelia. Tsipaebanua daxita itsamonae Jesús pijajivijavabelia ata.

¹⁰ Bajarapapetiriavijavuvēnēvi itsava Mariávēnēva. Bajarapova Magdala tomarapijiva. Itsava pijinia Juanavēnēva. Itsava pijinia icatsia Mariávēnēva. Bajarapova Santiago pena. Itsapetiriavi yajava tsipaeba bajarapacuenē yabara apóstolevijavabelia.

¹¹ Bajarapapetiriavi apóstolevijavabelia tsipaebi ata bajarapacuenē yabara, itsiata apóstolevi apo jumexaniataetsi. Apóstolevi saya bajarapalivaisi yabara jamatabējumaitsi: “Saya meta bajarapapetiriavi pijacuata exana bajarapalivaisi,” jamatabējai apóstolevi.

¹² Itsiata baitsi jane Pedro pitsapalia bovecua. Nexata cujinaejinalia Jesús petēpaenē pebuatsiibovajutsijavabelia. Nexata Pedro bajarapaibovaujalia itsa naēcolia, taeyejeba pebobenaejava bajarajota daxitanēreca Jesús mataquionaeya pematacacēbipanamitsireca. Nexata baja Pedro naviaata boyaberena. Najamatabēxaina bajarapacuenē yabara.

Pacuenia Jesús petēpaecujinae icatsia itsa asaē, pijajivitonēbeje pēcaxitajarabaxuaba, Emaús tomarabelia peponaenēbeje, yabara pelivaisi (Mr 16.12-13)

¹³ Pamatacabi bajarapapetiriavi tane ángelnēbeje, bajarapamatacabi Jesús pijajivitonēbeje Jerusalén tomaravelia naropotabeje. Ponabeje Emaús tomarabelia. Bajarapatomara eca once pakilómetrobeje Jerusalén tomaravecua.

¹⁴ Bajaraponēbeje baracuaicuajibeje tsanajetarucae daxita pacuenē copiapata.

15 Itsa abaxë bajarapalivaisi cuaicuaijai tsanucaponaebeje, Jesús pëcaxitajarabilia. Nexata Jesús muxunenianajetaruca bajaraponëbeje.

16 Bajaraponëbeje tae atabeje Jesús, itsiata apo yapëtaebeje Jesúscuene.

17 Nexata Jesús yanijoba bajaraponëbejejavabelia. Jesús jumaitsi:

—¿Detsa pitsicuene pabaracuaicuaijamëbeje tsanucaponae namutua? ¿Detsa xuajitsia bepajamatabëcuenejibimëbeje? jai Jesús bajaraponëbejejavabelia.

18 Bajaraponëbeje itsanë pevënë Cleofas. Nexata Cleofas jumaitsi Jesúsjavabelia:

—Daxitajivi baja cajena yapëtane pacuene copiapata Jerusalén tomarata mapamatacabitaje. ¿Xamë tsaja caenëmë apo nijanayapëtae bajarapacuene, naponaponae atamë bajarapatomarata? jai Cleofas caranata Jesúsjavabelia.

19 Nexata Jesús jumaitsi bajaraponëbejejavabelia:

—¿Detsa pitsicuene copiapata? jai.

Nexata icatsia bajaraponëbeje jumaitsi Jesúsjavabelia:

—Jesúspijinë raja, Nazaret tomarapijinëmi, profetanëmi. Pinijicuene exanapona Dioso pesaëta. Bitso xaniavaetsia jivi pexanialivaisi tsipaebapona. Nexata daxitajivi sivajamatabëcuenebarëya bajaraponëmi. Dioso ata sivajamatabëcuenebarëyatsi.

20 Nexata sacerdotevi penamatacaitorobivi, vajanacaevetsivi yajava, canajetatsi Jesúspijinëmi. Canajetaxuabatsi Jesúspijinë cruzajavabelia pecobematabiabarutsinexatsi pebeyaxuabinexatsi.

21 Paxanë picani bajaraponëmi yabara pajamatabëjumaitsinë: “Bajaraponë nacavecuacapitsapaena itsanacuaverena pepatsivi, pamonaë apo judíovi, vajanacayanacuaevetsijavavecua pepitsapaenexa,” pajamatabëjanë tsavanapae picani Jesúspijinë yabara. Nexata Jesúspijinë pebeyaxuabicuji-naetsi, ajena baja xaina acueyabi pamatacabibeje.

22 Paxanëyajuvënëvi, petiriavi, ajena, bajayacunua, panenabenajacaeyaexana. Bajarapamonae bajayacunua, ajena juameto pitsapaina, ponalia Jesús petëpaenë pebuatsiibovajutsijavabelia.

23 Itsiata apo caxitajarababuatsi bajarajota Jesús petëpaenë. Nexata bajarapapetiriavi naviabarena. Bajarapamonae panetsipaeba pacuenia bemajitsinaebota tane ángelnëbeje. Ángelnëbeje pina nexata jumaitsibeje petiriavijavabelia: “Jesús rabaja asaë tsaponaponae icatsia,” jai pina.

24 Nexata itsamonae paxanëjувënëvi pona Jesús petëpaenë pebuatsiibovajutsijavabelia. Nexata tane pacuenia baja petiriavi panetsipaeba. Jesús itsiata petëpaenë apo taeyabuatsi, jaibeje Jesúsjavabelia Emaús tomarabelia peponaenëbeje.

25 Nexata Jesús jumaitsi bajaraponëbejejavabelia:

—¡Paxamëbeje saya paneajamatabëcuenetajanëbeje! Apo pajumecovënëtsimëbeje daxita profetavi peyaquinaelivaisianë.

26 Nexata apo payapëtaemëbeje pacuenia Cristo, Dioso athëbëvetsica pitorobinëtsitsica jivi pecapanepaenexa, copiaya bitso bejiobiaexanaejitsiatsi peponaevajënaeya paxa Diosojavabetsia athëbëtatsia paxa pemuxuneneta peecaenexa, nayabarajai Jesús bajaraponëbejejavabelia.

27 Nexata Jesús xaniavaetsia navajunupaeba bajaraponëbejejavabelia daxita pacuenia Dioso pejumelivaisibaxutota tajëvelia jumaitsi Jesús yabara. Taxuxuaba jane baja penavajunupaebijava pacuenia Moisésjinë peyaquinaebaxutota tajëvelia jumaitsi Jesús yabara.

Bajaraxuacujinae icatsia navajunupaeba pacuenia daxita itsaprofetavi peyaquinaebaxutonëta ata jumaiti Jesús yabara.

²⁸ Itsa baja imoxoyotanajetarubena patomarata bajaraponëbeje patsijitsiabeje, Jesús itajara rovia bepeponaejitsia bajaraponëbejevecua.

²⁹ Nexata bajaraponëbeje bitso asivabeje Jesús penajuamajitsinexa bajara-patomarata. Jumaitisibeje bajaraponëbeje Jesúsjavabelia:

—Namajire abaxë mapatomarataje. Caniviyo rabaja bitso. Meravijitsia rabaja, jaiibeje bajaraponëbeje Jesúsjavabelia.

Nexata baja Jesús najoneya pabota bajaraponëbeje patabeje.

³⁰ Itsa bajaraponëbeje yajavaecabeje mesa muxuneneta, Jesús pita panbë. Jumaiti paxa Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba panbë. Rajutatsi bajaraponëbeje.

³¹ Bajarajota matapania bajaraponëbeje yapëtanebeje Jesúscuene. Itsiata baiti jane bajarajota vecuacaevatsibeje Jesús. Apo taebeje baja matavëjëa.

³² Nexata bajaraponëbeje najumaitisibeje:

—Namutua vajanacavanajunu paebanuaponaejavatabeje pacuenia jumaiti Diosojumelivaisibaxutota, bitso muxunajamatabëcuenebarëyatsibeje, najaiibeje bajaraponëbeje.

³³ Nexata bajarajota bepijia naropotabeje Emaús tomaravecu. Naviatabeje baja Jerusalén tomarabelia. Nexata Jerusalén tomarabelia itsa patabeje, caxitajarababeje penacaetuatsijavata once ponëbeje apóstolevi, itsamonaë yajava Jesús pijajivi.

³⁴ Nexata penacaetuatsivi jumaiti bajaraponëbejejavabelia:

—Xaniajai baja cajena. Vajatuxanenë icatsia asaë tsaponaponae. Simón baja tsitanaitajëtatsi, jai bajarapamonae.

³⁵ Nexata ponëbeje Emaús tomaraverena patabeje, tsipaebabeje bajara-pamonaëjavabelia pacuenia namutoepatualia pëcaxinatsibeje Jesús. Tsi-paebabebenua pacuenia matapania yapëtanebeje Jesúscuene, pitabëta itsa epatsënëquejeba panbë.

Pacuenia Jesús petëpaecujinae tsitanaitajëta pijajivijavabelia yabara pelivaisi

(Mt 28.16-20; Mr 16.14-18; Jn 20.19-23)

³⁶ Ponëbeje Emaús tomaraverena patabeje, tsipaebabeje Jesús pijajivijavabelia pacuenia tanebeje Jesús Emaús tomaratalia. Nexata bajarapaepatota Jesús tsitanaitajëta pijajivijavabelia. Jesús jemata nuca pijajivi tuatujëta. Jesús bajacoba pijajivi.

³⁷ Nexata Jesús pijajivi bitso nabenajaca.

—Petëpaenëmi raeta pejumape maje, jamatabëjai bajarapamonae Jesús yabara.

³⁸ Nexata Jesús jumaiti pijajivijavabelia:

—¿Detsa xuajitsia pajunavame? ¿Detsa xuajitsia panejamatabëëthëtota pajumeaebame icatsia tasaëjava?

³⁹ Panecobetaema. Tataxubeje ata pataema. Xanë rabaja maje. Panejayabare. Paneyorobarenua xaniavaetsia. Petëpaenëmi raja peneta pejumape avijibi. Asijibinua. Apo perabëitsi cajena pacuenia xanë perabëitsinë, jai Jesús pijajivijavabelia.

⁴⁰ Jesús itsa jumaiti mapacueniaje, nacobeitajëta pijajivijavabelia. Nataxuitajëta yajava.

⁴¹ Jesús pijajivi bitso tsitapexaniacuenetsi. Itsiata baitsi jane Jesús pijajivi abaxë apo jumexaniatae xaniavaetsia Jesús cuene. Jesús nexata jumaitsi pijajivijavabelia:

—¿Paxainame tsabaja itsacuenejavayo patanerajutsinexamë taxaenexa? jai Jesús.

⁴² Nexata Jesús pijajivi rajutatsi pesebidujaijavayo, jabëperiyo yajava.

⁴³ Pita baja Jesús. Nexata Jesús pijajivi pitabarata xane.

⁴⁴ Nexata Jesús jumaitsi pijajivijavabelia:

—Mapacuene taneexanaejavanexa yabaraje, pacatsipaebabiabatsi baja cajena tajëvelia pamatacabi abaxë pacayajavaponaponatsi. “Pacuenia bajayata tajëvelia xanë yabara jumaitsi Moiséspijinë peyaquinaebaxutota, Diosojumepaebivimi profetavi peyaquinaebaxutota ata, Salmosvënëbaxutota ata, bajarapacuenia netocopiapatsiana,” pacajaitsi tsabiabi baja cajena pamatacabi abaxë pacayajavaponaponatsi. Daxita rabaja bajarapacuenie netocopiapata jane baja, jai Jesús pijajivijavabelia.

⁴⁵ Nexata Jesús pijajivi jamatabëcuene caëjëpaeyaexana Jesús pijajivi xaniavaetsia pejumeyapëtaenexa pacuenia Dioso pejumelivaisibaxutota tajëvelia jumaitsi Jesús yabara.

⁴⁶ Jesús jumaitsi pijajivijavabelia mapacueniaje:

—Dioso pejumelivaisibaxutota tajëvelia jumaitsi pacuenia xanë, Cristonë, athëbëvetsica Dioso taneitorobinëtsica jivi tacapanepaenexa, nebejiobitsiaya nebeyaxuabijitsia. Jumaitsinua pacuenia tatëpaecujinae, acueyabi matacabita, icatsia Dioso niasaëyaexanaejitsia tatëpaejavavecua.

⁴⁷ Jumaitsinua pacuenia patajajivimë tajumelivaisi patsipaebaponaejitsiamë daxitajivijavabelia. Nexata tajumelivaisi patsipaebaponaenane daxitajivi penajamatabëcuene pënëyorotsinexa Diosojavabelia, pibisiacuenie pexanae neconimi pevecuaajibiaexanaenexatsi Dioso. Copiaya Jerusalén tomarata pataxuxuabianame panetsipaebijava. Bajaraxuacujinae patsipaebanajetarubenaenane daxitanacuanëjava.

⁴⁸ Paxamë rabaja pataneme daxita pacuene netocopiapata. Nexata jivi patsipaebaponaenane daxita bajarapacuenie yabara.

⁴⁹ Espiritu Santo, ponë taxa Dioso najumecapanepaeya pacarajutsiapaeba, pacatoitorobianicatsi papecatsijamatabëjonenexa. Abaxë pajinavanapae name majotaje Jerusalén tomarata. Matapania Dioso athëbëvetsica pacajamatabëcuene caëjëpaeyaexanaena pinijicuenie paneexanaponaenexa, paponae name jane baja tajumelivaisi jivi panetsipaebanajetarubenaenexa daxitanacuanëjava, jai Jesús pijajivijavabelia.

Pacuenia Jesús petëpaecujinae icatsia itsa asaë, tsia baja athëbëabetsia yabara pelivaisi

(Mr 16.19-20)

⁵⁰ Jesús pijajivi matalalia Betania tomarabelia. Jesús nacobeyotsiaya pijajivi tovajëcanuca Diosojavabelia Jesús pijajivi peyavenonaenexatsi Dioso.

⁵¹ Nexata saya bajarajota Jesús pijajivi athëbëabetsia baja vecuapona. Jesús baja Dioso caponatsi athëbëabetsia.

⁵² Jesús pijajivi jamatabëjumaitsi:

—¡Vajatuxanenë bitso ayaijamatabëcuenenë! jamatabëjai.

Bajaraxuacujinae Jesús pijajivi barëyaya naviaba Jerusalén tomarabelia.

⁵³ Templobojavabelia Jesús pijajivi joneyabiaba pevajëcabiabinexa Diosojavabelia. Jesús pijajivi pexaniajamatabëcuene rajutabiaba Diosojavabelia.

Pexanialivaisi Jesucristo pelivaisi, San Juan peyaquinaelivaisi

Pacuenia vaxaitsi banaexanatsi mapanacuataje, bajarapacuenia Cristo penaexanaejava mapanacuataje paxa Dioso pejamatabëcuenelivaisi itajëtsinexa yabara pelivaisi

¹ Itsa abaxë ajibi itsacuenejavayo ata mapanacuataje, Cristo baja cajena ponapona athëbëtatsia. Cristo raja paxa Dioso pejamatabëcuenelivaisiitajëtsinë jivijavabelia. Cristobeje paxa Diosobeje najuaponaponabeje. Cristo ata rabaja Dioso baja cajena.

² Daxitacune baja cajena pexanaejava petaxuxuabivajënaeya ata, Cristobeje paxa Diosobeje najuaponaponabeje.

³ Cristo baja cajena daxitacune mapanacuapijicueneje exana. Exana athëbëpijicuene ata. Bajarapacune exanaeyaexanatsi paxa Dioso. Bajaraxuata itsacuenejavayo ata apo vecuaexanaetsi itsanë ata.

⁴ Cristo baja cajena rajuta piasaëjumali daxitacueneviria mapanacuataje. Cristo baja cajena bepecotia picani. Nexata jivi jamatabëcueneyotota pexaniajailivaisita.

⁵ Pacuenia pecotia itayota piitaquirijavata, bajarapacuenia Cristo petsipaebilivaisita jivi jamatabëcueneyotota. Nexata dovathi, jivi piagamatabëcuene itaquiriyaexanaenë, apo caëjëpaetsi pevereverecaeyaexanaenexa bajarapalivaisi.

⁶ Nexata Dioso itoroba caenë pebi. Bajaraponë pevenë Juan.

⁷ Nexata Juan pona petsipaebinexa jivijavabelia Cristo pelivaisi. Nexata Juan tsipaeba daxitajivi pejumetaenexa Cristo pelivaisi, pejumecovënëtsinexana.

⁸ Juan raja jivi apo pejamatabëcueneyototsinë. Juan raja pona saya jivi petsipaebanajetarucaenexa xaniavaetsia Cristo pelivaisi.

⁹ Bajaraponë Cristo jamatabëcueneyototsiana daxitajivi. Bajaraponë xaniajai jivi pejamatabëcueneyototsinë. Bajaraponë Cristo patsica baja mapanacuayabetsicaje.

¹⁰ Cristo, ponë paxa Dioso jamatabëcuenelivaisiitajëta jivijavabelia, ponapona baja mapanacuataje. Itsiata baitsi jane mapanacuapijivi apo yapëtae bajaraponë mapanacua pexanaenëcueneje.

¹¹ Cristo patsica pexanaenacuayabetsica. Itsiata baitsi jane mapanacuapijivi apo jumecovënëtsitsi Dioso pexënatocuene.

¹² Itsiata itsamonae jumecovënëtsi. Nexata Cristo tocopata bajarapamonae paxa Dioso pexi pexanaenexatsi.

¹³ Bajarapamonae penaexanaematacabi, abaxë Dioso pexicuenia apo taetsi. Pebi petiriva pepitsicujinae, pexi itsa jamatabëxainabeje, pexi xainabeje. Itsiata bajarapamonae itsa naexana, abaxë Dioso apo pexi. Matapania pacuenia Dioso tojitsipatsi, bajarapamonae itsa jumecovënëta Cristo Dioso pexënatocuene, Dioso pexi exanatsi.

¹⁴ Cristo, paxa Dioso pejamatabëcuenelivaisi itajëtsinënexa jivijavabelia, itsa patsica mapanacuayabetsicaje, naexana pacuenia vaxaitsi baexanatsi

mapanacuataje. Nexata bajarapacuenia Cristo ponapona vaxaitsi tuat-uajëta. Bajaraponë vënërubatsi Jesús. Paxanë payapëtaniji Cristo ayaijamatabëcuenenëcuene. Tsipaji pataniji pinijicuene pexanaejavanë. Bajaraponë Cristo, pepo caenë Dioso pexënato. Pinijicuenia asiva mapanacuapijivije. Cuaicuaijai ëpexaniajailivaisi.

¹⁵ Bajaraxuata Juan, Jesús itsa vajunupaebanajetaruca jivijavabelia, jumai tsanajetarucæ mapacueniaje:

—Baja rajane maponë yabara pacajumaitsitsije: “Ponë tacovëverena pat-siana, bajaraponë bitso xanë nevecuaayajamatabëcuenenë. Tsipaji baja cajena tanaexanaevajënaeya ata bajaraponë ponapona,” jai tsanajetarucæ Juan jivijavabelia Jesús yabara.

¹⁶ Bajaraponë Jesús cajena pepo pexaniajamatabëcuenenë. Pexaniacuene nacatoexanabiaba. Nacayavenonabiaba.

¹⁷ Bajayatami baja cajena picani Dioso Moiséspijinëta najumecopata jivi pejumecovënëtsinexa. Itsiata baitsi jane mapamatacabita Jesucristo patajopaica mapanacuayabetsicaje vajanacatsipaebinexa paxa Dioso vajanacaasivajava, vajanacatsipaebinexanua pexaniajailivaisi.

¹⁸ Itsajivi ata vaxaitsiyajuvënëjivi Dioso apo tae. Bajaraxuata apo yapëtaetsi pacuenia Dioso jamatabëcuenelivaisiitsi. Itsiata caenë Dioso pexënato, ponëbeje najuaponaponabeje, bajaraponë nacayapëtaeyaexanaica pacuenia jamatabëcuenelivaisiitsi paxa Dioso.

Pacuenia Juan jivibautisabinë Jesucristo pelivaisi xaniavaetsia tsipaebanajetaruca jivijavabelia yabara pelivaisi
(Mt 3.11-12; Mr 1.7-8; Lc 3.15-17)

¹⁹ Judiovi, Jerusalën tomarapijivi, Juanjavabelia itoroba sacerdotevi, itsamonae templobo pevetsivi yajava, bajarapamonae peyanijobinexa Juanjavabelia. Nexata bajarapamonae itsa pata Juanjavabelia, yanijoba Juanjavabelia. Jumaitsi:

—¿Jipatsamë xamë? ¿Xamë tsaja Dioso pecaitapetsinë? jai bajarapamonae Juanjavabelia.

²⁰ Juan nexata bajarapamonaejavabelia xaniavaetsia roviaalia nava-junupaeba. Jumaitsi:

—Xanë ra apo Cristonë, ponë Dioso athëbëvetsica itorobijitsiatsica jivi pecapanepaenexa, jai Juan.

²¹ Nexata icatsia matavëjëa yanijobatsi.

—¿Detsa nexata ponëmë? ¿Xamë tsaja profeta Eliáspijinëmë, ponëmi bajayata ponapona? jai bajarapamonae Juanjavabelia.

Nexata Juan jumaitsi:

—Jume raja. Xanë raja bajara apo ponënë, jai Juan.

Nexata icatsia yanijobatsi matavëjëa.

—¿Xamë tsabaja nexata profetanëmë? ¿Xamë tsabaja pacacopiaevetavana-patsi nepatsijavanexatsica? jai bajarapamonae Juanjavabelia.

Nexata icatsia Juan jumaitsi:

—Jume raja. Xanë raja apo bajaraponënë, jai.

²² Nexata bajarapamonae jumaitsi:

—¿Detsa nexata ponëmë? Pajitsipajë patanenavajunupaebinexamë xani-avaetsia patayapëtaenexa ponëcuenëmë patatsipaebinexa patanitorobivijavabelia. ¿Detsa nexata pacuenia navajunupaebianame? jai bajarapamonae Juanjavabelia.

²³ Juan nexata jumaitsi bajarapamonaejavabelia:

—Xanë raja saya petusato nacuata itsa jumelivaisipaebajë, tavavajainë: “Panajamatabëcuenexaniavaere pepo petuxanenë pepatsivajënaeyarena,” tajainë. Bajarapacuenia tajumaitsijavanexa, bajayatami tajëvelia yaquina profeta Isaíaspijinë, jai Juan.

²⁴ Nexata fariseovi pitorobivitsi icatsia yanijobatsi Juan.

²⁵ —Itsa xamë apo Cristomë, apo Eliáspijinëmënu, apo profetanëmënu, ponë pacopiaevetavanapajë pepatsijavanexatsica, ¿detsa nexata xuajitsia xamë jivi bautisabaponame? jaitsi bajarapamonae.

²⁶ Juan nexata jumaitsi:

—Xanë saya bautisabaponajë ëmerata. Itsiata paxamë tuatujëta ponapona ponë apo payapëtaemë.

²⁷ Bajaraponë tacovëverena jane baja pata. Itsiata xanë bajaraponëvecua beveliajamatabëcuenenënë. Nexata acobeuranë tatoisinaenexa ata pijazapatomaëto tataxujonotsinexa pijazapato, jai Juan bajarapamonaejavabelia Jesús yabara.

²⁸ Bajarapacuenia Juan yanijobatsi Jordánmene itsapanatalia, Betaniavënë tomarajavata, Juan jivi itsa bautisabaponapona.

Pacuenia Jesús beovejayo tanetsi yabara pelivaisi

²⁹ Fariseovi pijajivi Juan peyanijobicujinaetsi peyapëtaenexatsi ponëcuene, meravia pitsijavata, Juan taetaba Jesús penajetarucaejava Juanjavaberena. Nexata Juan jumaitsi jivijavabelia:

—Pataema, mara ponëje, Dioso athëbëvetsica pitorobinëtsitsicaje. Bajaraponë Dioso bepijaovejayo tsane. Pacuenia jivi ovejayo babeyaxuaba pevi ofrendacuenia perajutsinexa Diosojavabelia, bajara itsanetsi maponëje. Nacaevetsiana pebeyaxuabinexatsi. Nexata bajarapacuenia matamotsiana daxita nacuanëpijivi pibisiacuene pexanaeconimi.

³⁰ Baja rajane maponë yabara itsa pacatsipaebatsi, pacajumaitsitsi tsabiabi mapacueniaje: “Tacovëverena patsiana itsanë. Bajaraponë nevecuaayajamatabëcuenenë bitso. Tsipaji baja cajena tanaexanaevajënaeya ata, bajaraponë ponapona,” pacajaitsi tsabiabi.

³¹ Apo yapëtaenë picani bajaraponë. Itsiata apo yapëtae atanë, pacabautisabanajetarucatsi merata palsrael nacuapijivimë. Ponë yabara pacatsipaebatsi, bajara jane maponë najetarucaje, jai Juan jivijavabelia Jesús penajetarucaejavata.

³² Icatsia Juan jumaitsi jivijavabelia Jesús yabara:

—Xanë taniji Espiritu Santo perunaejavatsica athëbëvetsica beucucuto. Nexata tsmatanacopatsicatsi bajaraponë.

³³ Xanë abaxë itsiata apo yapëtaenë bajaraponë Cristocuene. Itsiata Dioso, taneitorobinë merata jivi tabautisabaponaenexa, nejumaitsi baja cajena copiata: “Papebi pematatsënëatsica taename Espiritu Santo perunaejavatsitsica petsijamatabëcaenexatsi, bajaraponë jane baja jivi tsijamatabëjoneyaexanaena Espiritu Santo,” nejai baja cajena copiata Dioso.

³⁴ Pacuenia baja cajena taniji, pacatsipaebatsi. Bajaraponë baja cajena Dioso pexënato, jai Juan jivijavabelia Jesús yabara.

Pamonae copiaya Jesús yajavaponapona yabara pelivaisi

³⁵ Juan jivijavabelia petsipaebicujinae Jesús Dioso pexënatocuene, meravia pitsijavata, Juan yajavaponapona anijanëbeje pijajivitonëbeje.

³⁶ Itsa Juan tane Jesús pexenetanajetarucaejavatsi, nexata Juan jumaitsi pijajivitonëbejevabelia:

—Pataemabeje. Mara ponë najetarucaje, Dioso bepijaovejayo tsane, jai Juan pijajivitonëbejejavabelia Jesús pebeyaxuabijavanexatsi yabara, tsipaji Jesús tocopiapatsijitsiatsi pacuenia Dioso tocopatatsi.

³⁷ Nexata Juan pijajivitonëbeje itsa jumetanebeje bajarapacuenia Juan pejumaitisijava, Juan pijajivitonëmibeje pënaponabeje Jesús.

³⁸ Jesús napënëyorofojopa. Taenucajopa. Yanijoba bajaraponëbejejavabelia.

—¿Detsa xua pajaitamebeje? jai Jesús.

Nexata bajaraponëbeje jumaitisibeje:

—Petuxanenë, ¿detsa jota ecame? jai beje Jesúsjavabelia.

³⁹ Jesús nexata jumaitis bajaraponëbejejavabelia:

—Naxanitsia. Panataenamebeje itsajota ponaponajë, jai Jesús.

Nexata bajaraponëbeje naponabeje baja Jesús pepëta caniviyoeapatota.

Nexata baja tanebeje itsajota ponapona Jesús. Nexata bajarapamatacabi nayacaniviyobeje tsaponapona Jesúsjavata.

⁴⁰ Bajaraponëbejeyajuvënënenë itsanë pevënë Andrés. Andrés raja Simón Pedro pejuyapijinë.

⁴¹ Andrés nexata bepimia pona pematapijinë Simón pejaitsinexa. Itsa baja Andrés pematapijinë caxitajaraba, jumaitis pematapijinëjavabelia:

—Pacaxitajarabajë rabaja Mesías, jai Andrés pematapijinëjavabelia.

Bajarapamona pejajumeta: “Mesías,” itsa jai, mapajumetaje pejumaitisijume: “Cristo, ponë athëbëvetsica Dioso itorobijitsiatsica jivi pecapanepaenexa,” pejaijume.

⁴² Nexata Andrés barëlia pematapijinë Simón Jesúsjavabelia. Itsa Jesús tane Simón, nexata Jesús jumaitis Simónjavabelia:

—Simón, xamë raja Jonás pexënatomë. Cavënërubianatsi Cefas, jai Jesús Simónjavabelia.

“Cefas,” itsa jai, bajarapamona pejajumeta mapajumetaje pejumaitisijume: “Pedro,” pejaijume.

Pacuenia Jesús junata Felipebeje Natanaelbeje Jesús pijajivitonëbejenexa yabara pelivaisi

⁴³ Jesús baja ponaejitsia Galilea nacuyabelia. Jesús nexata peponaejavënae, caxitajarabaxuaba Felipe. Nexata Jesús jumaitis Felipejavabelia:

—Nepënaponaename, jai Jesús.

⁴⁴ Bajaraponë Felipe Betsaida tomarapijinë. Andrésbeje Pedrobeje ata Betsaida tomarapijinëbeje.

⁴⁵ Felipe nexata pona pejaitsinexa Natanael. Itsa baja Felipe caxitajaraba, jumaitis Natanaeljavabelia:

—Pacaxitajarabajë rabaja ponë pelivaisi bajayatami tajëvelia Moiséspijinë yaquina. Dioso penajumecopatsilivaisi jivi pejumecovënëtsinexa bajayata Moiséspijinë itsa yaquina, yaquinanua bajaraponë ata pelivaisi. Bajaraponë pelivaisi bajayata profetavi ata tajëvelia yaquina. Bajaraponë Jesús Nazaret tomarapijinë, Josépijinë pexënato, jai Felipe Natanaeljavabelia.

⁴⁶ Nexata Natanael jumaitis:

—Itsanë ata cajena pexaniajamatabëcuenenë Nazaret tomarata apo ponapona, jai Natanael.

—Felipe nexata jumaitis Natanaeljavabelia:

—Naxanitsia. Nataename jane, jai Felipe.

⁴⁷ Jesús itsa tane Natanael pecujitanajetarucaejavatsi, nexata Jesús Natanael yabara jumaitis pijajivijavabelia:

—Mara ponë najetarucaje, Israelpijinë pemomo, Dioso pitabarata xaniavaetsia peponaponaenë. Apo peyamaxëitojorobinë itsajivi ata, jai Jesús pijajivijavabelia Natanael yabara.

⁴⁸ Nexata Natanael jumaitsi Jesúsjavabelia:

—¿Detsa pacuenia nejamatabëcueneyapëtaneme? jai Natanael.

Nexata Jesús jumaitsi Natanaeljavabelia:

—Felipe cajena pecajunatsivajënaeya, catanetsi neecaejava higueraanae bëxëpanata. Nexata cajamatabëcueneyapëtanetsi, jai Jesús.

⁴⁹ Natanael nexata jumaitsi Jesúsjavabelia:

—Petuxanenë, xamë rabaja Dioso pexënatomë. Israelnacia pepo nevetsinë, jai Natanael Jesúsjavabelia.

⁵⁰ Jesús nexata jumaitsi:

—“Catanetsi cajena neecaejava higueraanae bëxëpanata,” tacajaixae, jamatabëjumaitsimë xanë yabara: “Maponëje Dioso cajena pexënato,” jamatabëjamë. Xamë taename bajarapacueni matatoxenetsia Dioso pesaëta pinijicuene taexanaejavanë, jivi apo pexanaecapanepaejavanë. Nexata bajaraxuanë taexanaejava itsa taenamë, pepacueni jane baja neyapëtaename Dioso pexënatocuenenë, jai Jesús Natanaeljavabelia.

⁵¹ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pataename itaboxo penapatsijava. Pataenamenua Dioso pijaängelevi pejunaejavatsia athëbëabetsia. Pataenamenua perunaejavatsica ata xanëjavabetsica, Daxitajivi Pematapijinëjavabetsica, jai Jesús pijajivijavabelia.

2

Pacuenia Jesús exana Caná tomarata pamatacabi Caná tomarapijinë nacasaba yabara pelivaisi

¹ Jesús pebarëcuaicuaicujajicujinae Natanael, acueyabi pamatacabibejucujinae, Caná tomarapijinë exana penacasabifiestanexa. Galilea nacuada eca Canátomara. Jesús pena naponapona fiesta pexanaejavata.

² Nexata Jesús pijajivi nabarëjunatatsi penacasabifiestajavabelia. Jesús nexata pijajivi nabarëpata penacasabifiestajavabelia.

³ Fiesta pexanaenë itsa baja tovereverecatsi vinora, Jesús pena jumaitsi:

—Vinora rabaja tovereverecatsi, jai pexënatovjavabelia.

⁴ Jesús nexata jumaitsi penajavabelia:

—Ena, ¿detsa xuajitsia netsipaebame bajarapacueni? Abaxë raja apo netocopiapatsi paepatota exanaejitsianë bajaraxua, jai Jesús penajavabelia.

⁵ Nexata Jesús pena jumaitsi mesa pevetsivijavabelia:

—Daxita pacuenia taxënato aeconoxae pacaitorobiana, paexanaename, jai.

⁶ Nexata bajarajota nubena seis pacanalitobeje, ibocanalitonë. Caecanalitota mera caëjëpaponi bejamatabëcuene quince pagalónbeje. Nexata bajarapacanalitonëta peyaenaemeranëta, judíovi pijacuenia anijatonë xaniavaetsia nacobequiatabiaba penabanivajënae.

⁷ Jesús nexata jumaitsi mesa pevetsivijavabelia:

—Pavënbare mera mapacanalitonë nubenaje, jai Jesús.

Nexata mesa pevetsivi xaniavaetsia mera vënëba bajarapacanalitonë. Piiyoro toxijava copabapona.

⁸ Nexata Jesús jumaitsi bajarapamonaejavabelia:

—Papuare tsiquirirayo. Patocaponaremelia fiesta pevetsinē pepajainexa, jai Jesús.

Nexata baja mesa pevetsivi tocaponalia.

⁹Nexata jane baja fiesta pevetsinē pajane bajarapora, merami pexanaevinora. Bajarapone abaxē apo yapētae itsaverena capitsapa bajarapavinora. Itsiata mesa pevetsivi yapētane mera pevēnēbixae bajarapacanalitonēta. Pepajanicujinae vinora, fiesta pevetsinē junata fiesta pexanaenē, ponē pejananacasabinē.

¹⁰Nexata fiesta pevetsinē jumaitsi pejananacasabinējavabelia:

—Mapavinoraje bitso xanepana. Daxita pamonae fiesta pexanaevi, copiyaya batsanaeyaexana pexaniavinora. Nexata baja fiesta pexanaenē pejunatsivi itsa apa ayajjava, cotocaevi batsanaeyaexana bevelia penamatamotivinoranē. Tsipaji baja ayajjava piapaexae, cotocaevi apae ata beveliar, apo yapētae beveliaracuene. Itsiata baitsi jane xamē bajarapacuenia apo exanaemē. Evetame abaxē cotocaevi patanerajutsinexamē pexaniavinora, jai fiesta pevetsinē pejananacasabinējavabelia.

¹¹Bajarapapinijuene Dioso pesaēta Jesús exana Caná tomarata. Canátomara eca Galilea nacuata. Caná tomarata Jesús jane baja taxuxuaba Dioso pesaēta pinijicuene pexanaponaejava. Bajarajota jane baja Jesús najamatabēcueneitajēta Dioso pesaēta ayaiacuene pexanaejava pecaējēpaenēcuenetsi. Nexata pijajivi orijibia sivanajamatabēcuene copabapontsi. Jesús pijajivi jamatabējumaitsi:

—Xaniajai rabaja. Pepacuene Cristo, ponē copiaevetavanapatsi pepatsijavatsica vajanacacapanepaenexa, jamatabējai.

¹²Bajaraxuacujinae Jesús baja pona Capernaum tomarabelia. Yajavapona pena, pejuyapijivinua, pijajivinua. Capernaum tomarata caematacabibeje jinavanapa.

Pacuenia Jesús Jerusalén tomarata templobovecua pitsapaeyaexana pecanajetsivi, pecomuacaevinua, yabara pelivaisi
(Mt 21.12-13; Mr 11.15-18; Lc 19.45-46)

¹³Judíovi baja pijafiesta pexanaenexa, toimoxoyotsi pascuavēnēfiesta. Bajaraxuata Jesús pona Jerusalén tomarabelia.

¹⁴Nexata Jerusalén tomarata, templobota, Jesús caxitajarabaxuaba pecanajetanubenaevi baca, oveja ata, ucucu ata. Tane palata pecambiabenaevinua.

¹⁵Jesús itsa tane bajarapacuene, nexata quiobataba peyorotsimacanexa. Nexata Jesús daxitajivibitsaēto capitsaparena temploboēnēverena. Bajarapamonae pijaoveja yajava, pijabaca yajava, Jesús capitsaparena. Nexata palata pecambiabenaevi pijapalata irabelia tocayajabajaraba. Pijamesaxi ata topēnēyorobajaraba.

¹⁶Nexata ucucu pecanajetanubenaevijavabelia Jesús jumaitsi:

—Mapaucuje pacapitsaparemelia. ¡Pētsa pacanajetame mapaboēnētaje, taxajavabelia jivi penavajēcaebota! jai Jesús.

¹⁷Nexata Jesús pijajivi itsa jumetane bajarapacuenia Jesús pejumaitsijava, jumenajamatabēnapita pacuenia Dioso pejumelivaisibaxutota jumaitsi. Bajarapacuenia Jesús pexanaponaejavanexa yabara, tajēvelia Dioso pejumelivaisibaxutota jumaitsi mapacueniaje: “Neyabarabexuabijitsia ata tsane, jitsipajē Dioso pijabo petoyaiyataejavatsi,” jai Dioso pejumelivaisibaxutota.

¹⁸Nexata judíovi itsa tane Jesús jivi pecapitsapaejava temploboēnēverena, judíovi jumaitsi Jesúsjavabelia:

—¿Dioso tsaja caitoroba nejutsinexa bajarapamonae temploboënēvecua? Itsa caitoroba Dioso bajarapacuenia nexanaenexa, nexata pinijicuene ata exanare Dioso pesaëta patacayapëtaenexa Dioso pecaitorobinēcuene, jai judíovi Jesúsjavabelia.

¹⁹ Nexata Jesús jumaitsi judíovijavabelia:

—Itsa paxuabimica mapatemploboje, nexata icatsia veretetsianajē acueyabi matababita, nayabarajai Jesús judíovijavabelia petëpaecujinae icatsia Jesús piasaëjavanexa yabara.

²⁰ Nexata judíovi apo jumeyapëtae xua yabara Jesús jumaitsi. Bajaraxuata judíovi jumaitsi mapacueniaje:

—Xamē acueyabi matababita apo matabotsimē tsipae. Itsamonae baja cajena mapatemploboxanetoje peveretsinexa, nacueneba cuarenta y seis pavaijebe, jai judíovi.

²¹ Itsiata baitsi jane Jesús peperabëto yabara: “Mapatemploboje,” jai saya.

²² Bajaraxuata icatsia Jesús itsa asaë petëpaecujinae, Jesús pijajivi jumenajamatabēnapitatsi. Jesús pijajivi jumenajamatabēnapitatsi tajëvelia Jesús penavajunupaebijava mapacueniaje: “Itsiata baitsi jane tatëpaecujinae, acueyabi matababita, icatsia asaënē tsane,” pejaijava, Jesús pijajivi jumenajamatabēnapitatsi. Nexata Jesús pijajivi jumecovënëta pacuenia Dioso pejumelivaisibaxutota jumaitsi. Jesús ata pacuenia jumaitsi, jumecovënëta.

Pacuenia Jesús jamatabëcueneyapëtae daxitajivi yabara pelivaisi

²³ Pamatababi pascuafiesta exana, Jesús ponapona Jerusalén tomarata. Nexata Jerusalén tomarata jivi ayaibitsaëtoxaneto jumecovënëta Cristocuene. Tsipaji bajarapamonae Jesús cuenetanetsi Dioso pesaëta pinijicuene pexanaejavanë, jivi apo pexanaecapanepaejavanë. Itsiata baitsi jane bajarapamonae pepacuenë xaniavaetsia apo jumecovënëtsi.

²⁴ Bajaraxuata Jesús apo yajavaponaponae bajarapamonae. Tsipaji Jesús jamatabëcueneyapëtae bajarapamonae xaniavaetsia apo pejumecovënëtsijavatsi.

²⁵ Jesús apo namatavenonae itsajivi petsipaebinxatsi peyapëtaenexa pacuenia jamatabëcuenetsi jivi. Tsipaji Jesús pejamatabëcueneyapëtaenë pacuenia daxitajivi jamatabëcuenetsi.

3

Pacuenia Jesús barëcuaicuaijai Nicodemo yabara pelivaisi

¹ Nicodemo fariseonë. Nexata catsitecaponapona fariseovi pijacuene. Nicodemo judíovi pevetsiviyajuvënënë.

² Nexata Nicodemo meravi pona Jesúsjavabelia. Nexata itsa pata, Jesúsjavabelia Nicodemo jumaitsi:

—Petuxanenë, pacayapëtanetsi baja cajena athëbëvetsica Dioso pecaitorobinëcuenetsica patanetsipaebaponaenexamë Dioso pejumelivaisi. Itsa Dioso apo cayajavaponaponae tsipae, nexata apo exanaemë tsipae pinijicuene nexanaejavanë, xuanë baja exanapona, jai Nicodemo Jesúsjavabelia.

³ Nexata Jesús jumaitsi Nicodemojavabelia:

—Xaniajanë pacuenia catsipaebijitsiatsi. Pajivi Dioso pejamatabëcueneta apo naexanae tsane icatsia bepejananaexanaejiviyo, bajarapajivi Dioso apo pijajivitonë tsane, jai.

⁴ Nexata Nicodemo jumaitsi Jesúsjavabelia:

—¿Detsa jane pacuenia penaveretsijivi baja icatsia naexanaejitsipa bepejananaexanaejiviyo? ¡Apo caějēpaetsi rabaja icatsia pejonenexa pena pecototalia penaexanaenexa icatsia bepejananaexanaejiviyo! jai Nicodemo Jesúsjavabelia.

5-6 Jesús nexata jumaitsi Nicodemojavabelia:

—Xaniajanē pacuenia catsipaebijitsiatsi. Pajivi pena pecototoverena naexana, yaperabēanaexana baja cajena. Pajivi pijinia Espiritu Santo pejamatabēcueneta naexana bepejananaexanaejiviyo, bajarapajivi Diosojavabelia ajamatabēcuenesaēyaexanatsi, Espiritu Santo petsijamatabēcaexaetsi. Pajivi Dioso pejamatabēcueneta jamatabēnaexana icatsia bepejananaexanaejiviyo, bajarapajivi xanepana pebautisabinexatsi merata. Nexata bajarapajivi Espiritu Santo rajutsianatsi pejanajamatabēcueneta. Nexata bajarapajivi Dioso pijajivitonēcuenia evetsianatsi.

7 “Xamē ata baja cajena icatsia benaexaname bepejananaexanaejiviyo-cuenia,” tacajajava yabara, pētsa jamatabēcuenenabenajacame.

8 Jovibo banajetaruca itsabelia jamatabēnajaruca. Jumetaneme saya ēpijume. Itsiata apo yapētaemē itsaverena pona, itsabelia ata pona. Bajara pijinia pacuenia apo yapētaemē pacuenia jivi Espiritu Santo pejamatabēcueneta naexanaeayaexanatsi bepejanaexanaejivicuenia, jai Jesús Nicodemojavabelia.

9 Nexata icatsia Nicodemo jumaitsi Jesúsjavabelia:

—¿Detsa pacuenia itsipae bajaraxua? jai Nicodemo.

10 Jesús nexata jumaitsi:

—Xamē picani Israel nacuapijivi necujarubinē. ¿Itsiata tsaja apo jumeyapētaemē palivaisi catsipaebatsi?

11 Xaniajanē pacuenia catsipaebijitsiatsi. Juan jivibautisabinē. Bajaronēbeje patayapētaelivaisibeje, jivi patsipaebaponajēbeje. Xua pepacuene patanijibeje, bajaraxua ata jivijavabelia patsipaebaponajēbeje. Itsiata baitsi jane patatsipaebilivaisianēbeje, apo panejumecovēnētsimē.

12 Catsipaebi atatsi xua Dioso exanapona mapanacutaje, itsiata apo nejumecovēnētsimē. ¿Detsa nexata pacuenia nejumecovēnētsianame itsa catsipaebianatsi xua Dioso exanapona athēbētatsia? jai Jesús.

13 Icatsia Jesús pijacuata nayabarajumaitsi Nicodemojavabelia:

—Itsajivi ata cajena apo ponae Dioso pijanacuayabetsia icatsia pepatsinexatsica mapanacuayabetsicaje petsipaebinexa jivijavabelia pacuenia itsi athēbētatsia. Caenē, Daxitajivi Pematapijinē, caějēpatsi jivi petsipaebinexa pacuenia itsi athēbētatsia. Tsipaji baja cajena bajaraponē athēbēvetsica pepatsinē. Tsipaji baja cajena athēbētatsia peponaponaenē.

14 Bajayata petusato nacuata jivi ayaibitsaēto yatēpapona jomo pesinijavatsi. Nexata bajarapaepatota Moiséspijinē jomo jumapecataeaya pexanaenē, naejavata athēbēyo ruta. Nexata jomo pesinivitsi peyatēpaeviminexa, itsa taepona bajaraponē, asaē tsaponae. Bajara pijinia pacuenia, Daxitajivi Pematapijinē ata, athēbēyo rutsianatsi cruzajavabelia. Bajarapacuenia rutsianatsi cruzata petēpaenexa.

15 Nexata pajivi bajaraponējavabelia sivanajamatabēcopata, apo naxuabi tsane. Bajarapajivi xainaena matacabi apo pevereverecaejava, nayabarajai Jesús pijacuata Nicodemojavabelia.

Pacuenia Dioso exana piasivaxae mapanacuapijivije yabara pelivaisi

16 Icatsia Jesús pijacuata nayabarajumaitsi Nicodemojavabelia:

—Piniijicuenia Dioso asiva mapanacuapijivije. Bajaraxuata itorobica pepo caenë pexênato mapanacuayabetsicaje mapanacuapijivije Diosovecua pexaxuabianiva. Pamonaë sivanajamatabëcopata Dioso pexênatojavabelia, apo naxuabi tsane. Bajarapamonaë matakabi apo pevereverecejava, Dioso rajutsianatsi.

¹⁷ Dioso apo itorobitsica pexênato mapanacuayabetsicaje mapanacuapijivije pijaneconi yabara penaneconitsiaexanaenexa. Biji rajane Dioso itorobica pexênato, pejamatabëcueneta Dioso pecapanepaenexa mapanacuapijivije pibisiacuene pexanaeneconimivecua, nayabarajai Jesús pijacuata Nicodemojavabelia.

¹⁸ Icatsia Jesús pijacuata nayabarajumaitsi Nicodemojavabelia:

—Pajivi sivanajamatabëcopata Daxitajivi Pematapijinëjavabelia, bajarapajivi Dioso apo naneconitsiaexanaetsi tsane pibisiacuene pexanaeneconimi yabara. Pajivi apo sivanajamatabëcopatsi Daxitajivi Pematapijinëjavabelia, bajarapajivi baja naneconita Diosojavabelia. Nexata Dioso naneconitsiaexanaenatsi. Tspaji apo sivanajamatabëcopatsi pepo caenë Dioso pexênatojavabelia.

¹⁹ Ponë Daxitajivi Pematapijinë, bepecotia picani. Tspaji jivi tsi-paebapona pexaniajailivaisi jivi pejamatabëcueneyatsinexa. Itsiata mapanacuapijivi apo jitsipae pejamatabëcueneyatsinexatsi. Jitsipa saya pi-aitaquirijamatabëcuene. Tspaji bajarapamonaë pibisiacuene exanavanapa. Bajaraxuata bajarapamonaë naneconitsiaexanaenatsi Dioso.

²⁰ Daxita pamonaë pibisiacuene pexanavanapaevi, apo jitsipae Daxitajivi Pematapijinë pejamatabëcueneyatsinexatsi. Bajaraxuata Daxitajivi Pematapijinëjavabelia apo patsi. Tspaji cjunava peyapëtaeyaxanaeyanivatsi penaneconitsijava Diosojavabelia pibisiacuene pexanaeneconi yabara.

²¹ Pamonaë jumecovënëta Dioso pexaniajailivaisi, bajarapamonaë apo cjunavi. Bajarapamonaë pata Daxitajivi Pematapijinëjavabelia pejamatabëcueneyatsinexatsi. Bajarapamonaë jitsipa daxitajivi peyapëtaenexatsi Dioso peyavenonaponaejavatsi xua exanavanapa, nayabarajai Jesús pijacuata Nicodemojavabelia.

Pacuenia Juan jivibautisabinë vajunupaeba Jesús yabara pelivaisi

²² Jesúsbeje Nicodemobeje pecuaicuaijucujinaebeje, Jesús baja, pijajivi yajava, pona Judea nacuyabelia. Nexata Judea nacuata bajayajebi Jesús pijajivi barëponapona. Bajarapamonaë bautisabapona jivi.

²³ Juan pijinia itsamonaë bautisabaponapona Enón tomarata. Enóntomara eca Salimtomara imoxoyojavata. Bajarajota Juan jivi bautisabaponapona tspaji ayaimera. Juan jivi topataponatsi pebautisabinexa. Nexata pepataponaevi, Juan bautisabapona.

²⁴ Bajarapacuenia Juan jivi bautisabaponapona abaxë itsa apo etsitsi penaneconitsivi pejebabiabibota.

²⁵ Nexata Juan pijajiviyajuvënëvi anaeya najumenotsiaya cuaicuaijai judiónëjavabelia. Juan pijajivi jumaitsi:

—¿De meta ponë itsa nacabautisaba, nacajamatabëcuenexaniavaetsiana Dioso vajanacabarajamatabëcuene xanepanaenexa? jai Juan pijajivi judiónëjavabelia.

²⁶ Nexata Juan pijajivi pona Juanjavabelia. Nexata bajarapamonaë Juanjavabelia jumaitsi Jesús yabara:

—Ponë caxitajarabame Jordánmene itsapanatalia, ponë vajunupaebame paxanëjavabereña, bajaraponë ata aeconoxae jivi bautisabapona. Nexata daxitajivi bajaraponëjavabelia pona, jai Juan pijajivi.

²⁷ Nexata Juan jumaitsi pijajivijavabelia:

—Xuavajëto xaina caejivi canacujitsia, Dioso perajutsixaetsi xaina.

²⁸ Pamatacabi jumaitsinë tsabiabi jivijavabelia: “Xanë raja apo Cristonë, ponë Dioso athëbëvetsica itorobijitsiatsica jivi pecapanepaenexa. Saya raja taneitorobinë Cristo pevajënaeya, talivaisipaebanajetarucaenënexa,” itsa janë, paxamë ata panejumetaeyabiabame.

²⁹ Ponë pita petiriva pijavanexa, nacasaba. Nexata pejananacasabinë peyapëtaenëtsi, namuxunaevetanuca imoxoyo. Bajaraponë ata nabarëya itsa jumetane pejananacasabinë pebarëyajava. Bajara pijinia pacuenia xanë ata aeconoxae bitso jamatabëcuenebarëyanë, itsa vënëlvaisitaniji jivi peponaeva Jesúsjavabelia.

³⁰ Pevajënaeyabelia jivi ayaibitsaëtoxaneto Jesús pënaponaenatsi. Xanë nexata tanepënaponaevi bevelia tsaponae tsane, jai Juan pijajivijavabelia.

Pacuenia Juan tsipaeba pijajivijavabelia Jesús athëbëvetsica pepatsijava yabara pelivaisi

³¹ Icatsia Juan jumaitsi pijajivijavabelia:

—Athëbëvetsica pepatsinë, bitso cajena ayaijamatabëcuenenë daxitajivi matatoxenetsia. Pamonae naexana mapanacuataje, bajarapamonae saya mapanacuapijivije. Nexata saya cuaicuaijai ëmapanacuapijicuene yabaraje. Itsiata baitsi jane ponë athëbëvetsica pepatsinë, bajaraponë daxitajivi mata-toxenetsia bitso ayaijamatabëcuenenë.

³² Bajaraponë picani tsipaeba jivijavabelia pacuene tane athëbëtatsia. Tsipaebanua picani palivaisi ata jumetane athëbëtatsia. Itsiata baitsi jane daxitajivi jumeaebatsi pepsiaebilivaisianë.

³³ Pajivi jumecovënëta athëbëvetsica pepatsinë pepaebilivaisi, bajarapajivi Dioso ata yabara jamatabëjumaitsi: “Dioso cajena pexaniajailivaisi pepaebinë,” jamatabëjai.

³⁴ Ponë Dioso itorobatsi, bajaraponë tsipaeba jivijavabelia Dioso pitorobilivaisi. Tsipaji Dioso rajutatsi Espiritu Santo. Yajavaponaponaeyaexanatsinua Espiritu Santo ayaicuenia.

³⁵ Dioso bitso asiva pexënatō. Tocopata daxitacuene pevetsinexa, pitorobinexanua.

³⁶ Pajivi najamatabëcopata Dioso pexënatōjavabelia, xainaena matakabi apo pevereverecaejava. Pajivi apo najamatabëcopatsi Dioso pexënatōjavabelia, matakabi apo pevereverecaejava apo xinae tsane. Bajarapajivi Dioso naneconitsiaexanaenatsi daxita matakabijavabelianexa, jai Juan pijajivijavabelia.

4

Pacuenia Jesús barëcuaijai Samaria nacuapijiva yabara pelivaisi

¹ Fariseovi jumetane jivi pejumaitsijava: “Jesús baja pijajivi ayaibit-saëtoxaneto xainaponapona. Bautisabaponanua jivi ayaibitsaëto Juan mata-toxenetsia,” pejajava.

² Itsiata Jesús pecobeta apo bautisabi caejivi ata. Jesús rajane pijajivi bautisabapona jivi.

³ Nexata Jesús itsa yapëtane fariseovi pevënëlvaisitaejavatsi pacuenia jivi baracuaijaijaisi, nexata naviata Judea nacuaverena. Pona Galilea nacuyabelia.

⁴ Nexata Galilea nacuyabelia peponaenë, Jesús, pijajivi yajava, patanajetaruca Samaria nacujava. Tsipaji bajaraxuayo namuto najetaruca.

⁵ Nexata Jesús ecojopa Samaria nacuata peecaetomarata, Sicarvënë tomarata. Sicar tomaravecua imoxoyo boca pairayo Jacobpijinë bajayata rajuta pexënato Josépijinë.

⁶ Bajarapairayota eca meramëthë, pamëthë Jacobpijinë bajayata cueyeta. Jesús sicuerana peponaejava namuto. Nexata Jesús ecojopa meramëthë muxuneneta. Matonejeepatota Jesús ecojopa.

⁷⁻⁸ Jesús caenë eca meramëthëjavata. Tsipaji Jesús pijajivi tomarabelia pona pecomuacaenexa pexaejava. Nexata bajaraberena Samaria nacuapijiva rena pepuatsinexa mera bajarapamëthëta. Nexata Jesús jumaiti Samaria nacuapijivajavabelia:

—Mera nerajure, jai Jesús.

⁹ Nexata Samaria nacuapijiva jumaiti:

—¿Detsa xuajitsia mera nevajëtae niapaenexa? Xamë judiónëmë. Xanë saicaya Samaria nacuapijivanë, jai bajarapova Samaria nacuapijiva Jesúsjavabelia.

Bajarapacuenia Samaria nacuapijiva jumaiti Jesúsjavabelia tsipaji judíovibeje Samaria nacuapijivibeje naitajitsibiaya nanaëcotabiaba.

¹⁰ Nexata Jesús jumaiti Samaria nacuapijivajavabelia:

—Pajamatabëcuene Dioso jitsipa pecarajutsinexa, apo yapëtaemë. Xanë ata mera tacavajëtsinë apo nejamatabëcuenyapëtaemë. Itsa nejamatabëcuenyapëtaejitsipame, nexata xanëjavaberena copiaya mera nevajëtsipame tacarajutsinexa. Nexata carajutsipatsi plaitavamera, jivi pejamatabëcueneasaëyaexanaemera daxitamatacabijavabelianexa, jai Jesús Samaria nacuapijivajavabelia.

¹¹ Nexata Samaria nacuapijiva jumaiti Jesúsjavabelia:

—Xamë apo caponaemë nijavaxiyo mera nepuatsinexa. Meramëthë raja tajëreca bitso. ¿Detsa jota pitsipame nexata plaitavamera tanerajutsinexamë?

¹² Vajasalinainëmi Jacobpijinë ayaijamatabëcuenenëmi. Bajayata nacatocopata mapameramëthëje. Bajaraponëmi, pexi ata, pijadajubi ata, mera apa mapamëthëtaje. ¿Xamë tsaja nexata Jacobpijinëmi matatoxenetsia bitso ayaijamatabëcuenenëmë? jai Samaria nacuapijiva Jesúsjavabelia.

¹³ Jesús nexata jumaiti:

—Jivi apaeyabiabi ata mapamëthëpijimeraje, itsiata mera pejitsipaejava apo tovereverecabiabitsi.

¹⁴ Pajivi apaena xanë tarajutsimera, bajarapajivi xainaena matababi apo pevereverecaejava. Nexata pacuenia meramëthë eca daxitamatacabijavabelianexa, bajara itsi tsane bajarapajivi, jai Jesús.

¹⁵ Nexata Samaria nacuapijiva jumaiti Jesúsjavabelia:

—Bajarapamera nerajure icatsia mera tanamatavenonaponaeyaniva. Nexata baja mera apo puanabiabinë tsane mapamëthëberenaje, jai Samaria nacuapijiva.

¹⁶ Jesús nexata jumaiti Samaria nacuapijivajavabelia:

—Amona junaremelia. Yajavarenamë tsane, jai Jesús.

¹⁷ Nexata Samaria nacuapijiva jumaiti:

—Apo xainaenë raja tamona, jai.

Nexata Jesús jumaiti:

—“Apo xainaenë raja tamona,” itsa jamë, apo najumetsënëtsimë cajena.

18 Xainame picani amonajivi cinco ponëbeje. Ponë aeconoxae xainame, apo amona cajena. Tsipaji saya nijajara. Bajaraxuata xaniavaetsia netsipae-bame, jai Jesús Samaria nacuapijivajavabelia.

19 Nexata Samaria nacuapijiva itsa jumetane bajarapacuenia Jesús peju-maitsijava, nexata Samaria nacuapijiva jumaitsi Jesúsjavabelia:

—¿Xamë tsabaja Diosojumepaebinëmë profetanëmë?

20 Patajasalinaivimi baja cajena navajëcabiaba Diosojavabelia mapatsuto-jumataliaje. Itsiata baitsi jane pajudíovimë pajumaitsimë tsabiabi: “Jivi itsa navajëca Diosojavabelia, benavajëcabiaba Jerusalén tomarata Dioso pejumecovënëtsinexatsi,” pajamë tsabiabi, jai Samaria nacuapijiva.

21 Jesús nexata jumaitsi:

—Nejumecovënëtsianame pacuenia catsipaebijitsiatsi. Imoxoyo rabaja pevajënae papecatocopiapatsinexa Diosojavabelia panevajëcabiabinexa, paponaeenjevamë mapatsutojavabeliaje, paponaeenjevamë Jerusalén tomara-belia ata.

22 PaSamaria nacuapijivimë, pavajëcabiabi atamë Diosojavabelia, xaniavaetsia apo payapëtaemë Dioso. Paxanë rajane pajudíovinë xaniavaetsia papapëtaniji Dioso, ponëjavabelia pavajëcabiabajë. Tsipaji xanë daxitajivi tacapanepaenë tsane, judíoviyajuvënënë.

23 Ajena mapamatacabijavaveliacujinaeje, pevajënaeyabelia ata tsaponae, daxita pamonaе jamatabëvajëta Diosojavabelia, bajarapamonae xaniavaetsia vajëtsiana daxita pejamatabëthëtojavavetsina. Pepo pexaniajaijamatabëcueneta vajëtsiana Diosojavabelia. Bajarapitsivi Dioso jitsipa pevajëtsijavatsi.

24 Dioso cajena apo vajataenë. Pamonaе vajëta Diosojavabelia, xaniavaet-sia pexaniajaijamatabëcueneta bevajëta, pepo pejamatabëthëtojavavetsina, jai Jesús Samaria nacuapijivajavabelia.

25 Nexata Samaria nacuapijiva jumaitsi:

—Yapëtaniji rabaja pepatsijavanexatsica Mesías, ponë Cristo, baitsi ponë athëbëvetsica Dioso itorobijitsiatsica jivi pecapanepaenexa. Itsa bajaraponë patsianica, nacatsipaebiana daxitacuenelivaianë, jai Samaria nacuapijiva Jesúsjavabelia.

26 Jesús nexata jumaitsi Samaria nacuapijivajavabelia:

—Xanë rabaja Cristonë, jai.

27 Nexata bajarapaepatota tomaraverena parena Jesús pijajivi. Bajara-pamonae jamatabëcuenenabenajaca Jesús pecuaicuajitaisanucaexae Samaria nacuapijivajavabelia. Itsiata itsanë ata: “¿Detsa xua jitsipame?” apo jai Samaria nacuapijivajavabelia. Jesúsjavabelia ata apo yanijobi: “¿Detsa xua-jitsia bajarapova barëcuaicuajiamë?” apo jai itsanë ata.

28 Nexata bajarajota Samaria nacuapijiva pueneteta pijacanalito. Navialia pijatomarabelia. Tsipaebalia jivi. Nexata jumaitsi Jesús yabara:

29 —Panataemelia ponë netsipaeba daxita pacuenia exanajë. ¿Baja tsamëra jane apo Cristo, ponë athëbëvetsica Dioso itorobijitsiatsica jivi pecapanepaenexa? jai Samaria nacuapijiva.

30 Nexata bajarapamonae pijatomaravelia ponalia. Taeothopalia Jesús.

31 Itsa abaxë bajarapamonae apo patsilia Jesúsjavabelia, Jesús pijajivi ju-maitsi:

—Patajatuxanenë, naxaema itsajavayo, jai.

32 Nexata Jesús jumaitsi pijajivajavabelia:

—Xainajë raja saicaya taxaejavanexa paxamë apo paneyapëtaejava, jai Jesús.

³³ Nexata Jesús pijajivi, ëpamonae, nayanijoba.

—¿Itsanë tsamëra tsipaji vajacovëta Jesús pexaejava tocapatatsi penabaninexa? najai Jesús pijajivi.

³⁴ Nexata Jesús jumaitsi:

—Pacuenia taneitorobinëtsica nitoroba, jitsipajë taexanaenexa. Jitsipajë baja tanacueneveretsinexa xua nitoroba. Bajara jane xua betaxaejava taniji.

³⁵ Paxamë pajumaitsimë tsabiabi peubijava yabara: “Saica raja abaxë cuatro pajuametobeje peubijava penaveretsinexa,” pajamë tsabiabi. Itsiata xanë pacatsipaebianatsi jivi yabara. Pataema mapamonae najetarubenaje. Pacuenia baja peubijava navereta penotsinexatsi, bajara itsi mapamonaeje. Mapamonaeje jumecovënëtsiana itsa tsipaebianatsi Dioso pejumelivaisi.

³⁶ Pajivi tsipaebiana tajumelivaisi jivi pejumecovënëtsiaexanaenexa, matabi apo pevereverecaejava jivi pexainanexa, bajarapajivi sivajamatabëcuenebarëya tsane ayaibitsaëto itsa jumecovënëtsianatsi. Itsamonae baja picani namataxainaeaya tsipaeba bajarapamonaejavabelia Dioso pejumelivaisi. Itsiata baitsi jane apo jumecovënëtsi. Nexata bajarapamonae ata itsa vënëlivaisitaena pejumecovënëtsijava tajumelivaisi, bajarapamonae ata sivajamatabëcuenebarëya tsane.

³⁷ Jivi bajumaitsi peubijava yabara mapacueniaje: “Copiaya itsanë uba. Itsa baja navereta peubijava, saicaya icatsia itsanë nota,” bajai.

³⁸ Nexata baja itsaxuayo itsamonae copiaya Dioso pejumelivaisi asaëyata tsipaebapona, bajara icatsia xuayo paxamë ata talivaisi panetsipaebinexa, pacaitorobatsi. Nexata pamonae copiaya Dioso pejumelivaisi tsijamatabëubatsi, ayaibitsaëto bajarapamonae najamatabëcuene copaba baja Disojavabelia panetsipaebixae talivaisi, jai Jesús pijajivijavabelia.

³⁹ Samaria nacupijivi, pova Jesús barëcuaicuajai mera mëthëjavata, pijatomarapijivijavabelia tsipaeba ayaibitsaëtoxanetjavabelia Jesús yabara. Nexata Samaria nacuata pejinavanapaevi, Sicar tomarapijivi, ayaibitsaëtoxaneto jumecovënëta Cristocuene. Jumecovënëta Cristocuene penavajunupaebixae bajarapova bajarapatomarapijivijavabelia: “Daxita pacuene exanajë, Jesús netsipaeba,” pejaxaexa.

⁴⁰ Nexata Samaria nacupijivi itsa parena Jesúsjavaberena, bajarapamonae Jesús asivatsi penaponaponaenexa bajarapamonaejavata. Nexata Jesús bajarapamonaejavata naponapona anijamatabibeje.

⁴¹ Itsa bajarapamonae pijacuata jumetane Jesús petsipaebilivaisi, nexata icatsia ayaibitsaëtoxaneto jumecovënëta Cristocuene.

⁴² Nexata bajarapamonae jumaitsi penavajunupaebivajavabelia:

—Pajumecovënëtajë apo ëpatanetsipaebijumemë yabara. Biji rajane pajumecovënëtajë tsipaji baja patajacuata ata pajumetaniji Jesús vajanacatsipaebilivaisi. Payapëtaniji baja cajena bajaraponë pexaniajajava Cristocuene. Payapëtaniji bajaraponë mapanacupijivije pecapanepaejavanexa, pibisiacuene pexanae neconimivecua, jai bajarapamonae penavajunupaebivajavabelia.

Pacuenia Jesús tojamatejemayaexana gobierno pijajivitonë pexënatonëyo yabara pelivaisi

⁴³ Samaria nacuata anijamatabibeje Jesús peponaponaecujinae, vecuapona baja Samarianacua. Nexata jane baja pona Galilea nacuyavelia.

⁴⁴ Jesús jumai tsabiabi pijajivijavabelia:

—Pajivi Dioso jumepaebabiaba, bajarapajivi apo yaiyataetsi pijanacuapijivi, jai tsabiabi Jesús.

⁴⁵ Itsa baja Jesús palia Galilea nacuyabelia, bajarapanacuapijivi xaniavaetsia copiapitatsi. Tsipaji baja cajena bajarapamonae ata Jerusalén tomarata pascua fiestamatacabi Jesús tanetsi. Nexata Jesús ayaicuene Dioso pesaëta pexanaejava bajarapamonae kujirutanetsi fiestamatacabi.

⁴⁶ Nexata icatsia Jesús naviata Caná tomaraberena. Canátomara eca Galilea nacuata. Bajarapatomarata Jesús copiaya merami exana vinora. Caná tomarata ponapona gobierno pijajivitoné, ayaijamatabëcuenenë. Bajaroné pexënatonëyo toavitane tsanucaetsi Capernaum tomaratalia.

⁴⁷ Nexata gobierno pijajivitoné vënëlivaisitanetsi Jesús Judea nacujavaverena pepatsijava, Galilea nacuyaberena. Nexata bajaraponé lia Jesúsjavabelia. Pinijicuenia junata pijaboyabelia pebarëponaenexa Jesús petojamatejemayaexanaenexatsi pexënatonëyo. Tsipaji baja gobierno pijajivitoné pexënatonëyo totëpaejitsiatsi.

⁴⁸ Nexata Jesús jumaitsi bajaraponëjavabelia:

—Paxamë cajena apo panejumecovënëtsimë. Matapania itsa pataneme ayaicuene Dioso pesaëta taexanaejava, jivi apo pexanaecapanepaejava, panejumecovënëtsianame, jai Jesús.

⁴⁹ Nexata gobierno pijajivitoné jumaitsi:

—Jesús, naxanitsiayo tapëta ponare taxënatonëyo abaxë petëpaevajënaeya, jai.

⁵⁰ Jesús nexata jumaitsi bajaraponëjavabelia:

—Naviaremelia nexënatonëyojavabelia. Nexënatonëyo rabaja icatsia catojamatejema, jai Jesús.

Bajaraponë jumecovënëta pacuenia Jesús jumaitsi. Nexata baja lia pijaboyabelia.

⁵¹ Itsa bajaraponë patanajetarucalia, nexata pijajivi mataenenarenatsi. Nexata pijajivi jumaitsitsi:

—Nexënatonëyo rabaja icatsia jamatejema tsecae, jaitsi.

⁵² Nexata bajaraponë yanijoba pijajivijavabelia.

—¿Detsa xuayota juameto itsa ruca, jamatejema baja? jai tsapatsi bajaraponë.

Nexata pijajivi jumaitsi:

—Canivi, matonejeepatota, vecuaajibitsi baja peromaebijavatsi, jai pijajivi.

⁵³ Nexata bajaraponë jamatabëjumaitsi:

—Bajarapaepatota canivi Jesús nejumaitsi: “Nexënatonëyo rabaja icatsia catojamatejema,” nejai, jamatabëjai.

Bajaraxuata bajaraponë, pijamonae yajava, jumecovënëta Jesús Cristonëcuene.

⁵⁴ Jesús penaviatsicujinae Judea nacujavaverena, Galilea nacujavaberena, cotocævi bajarapapinijicuenene Dioso pesaëta exana Galilea nacuata.

5

Pacuenia Betzatavënë pucayojavata Jesús jamatejemayaexana petabusi-pacuenabinëtsi yabara pelivaisi

¹ Judíovi fiesta exana Jerusalén tomarata. Nexata Jesús nalia.

² Jerusalén tomarata, ovejaxi pecajoneyabiabibaupa imoxoyojavata, pecueyetsipucayo eca. Bajarapapucayo hebreojumeta pevënë Betzata. Bajarapapucayo matatoyorotsia cinco pabobërètobeje eca.

³ Bajarapabobërëtonëjavata piavitanevi ayaibitsaëtoxaneto bobena. Itsamonae bitso pitaxutotsëcënaevi. Itsamonae pejayujayunaevi. Itsamonae peperabëcuenabivitsi. Daxita bajarapamonae evetanubena pucayo pemenenacujirubijava.

⁴ Athëbëvetsica ángel jemata runabiabica pucayojavabetsica. Nexata pucayo menenacujirubabiaba. Pemenenacujirubijavata, pajivi copiaya runareca pucayojavabereca, bajarapajivi pavitanecuene capunatsi, vecuaa-jibiaexanabiabatsi.

⁵ Bajarajota naboca treinta y ocho pavaibeje piavitanetsanucaenë, petabusipacuenabinëtsi.

⁶ Itsa Jesús taeyabuata bajaraponë, nexata yapëtaeyabuata bajayajebi piavitanevitsuene. Nexata Jesús jumaitsi bajaraponëjavabelia:

—¿Jitsipame tsaja nejamatejemajava? jai Jesús.

⁷ Nexata bajaraponë jumaitsi:

—Itsajivi ata apo xainaenë tanecopatsinexareca pucayojavabereca itsa mene nacujiruba. Ajena narunabiabijitsianëreca, bajarapaepatota itsajivi netsurunabiabareca copiaya, jai piavitanetsanucaenë.

⁸ Jesús nexata jumaitsi piavitanetsanucaenëjavabelia:

—Namatacore. Pire nijapanayo. Ponare baja, jai Jesús.

⁹ Bajarapacuenia Jesús pejumaitsijavata, jamatejema baja piavitanetsanucaenëmi. Pita baja pijapanayo. Ponaexanepana baja. Bajarapacuenia petabusipacuenabinëtsi Jesús jamatejemayaexana judíovi penacueraevetsimatacabita.

¹⁰ Nexata judíovi jamatabëcuenenavëxaniabiaya jumaitsi petabusipacuenabinëmitsijavabelia:

—Ajena raja vajanacueraevetsimatacabi. Nexata apo xanepanae necaponaponaenexa nijapanayo, jai judíovi, tsipaji bajarapamonae apo jitsipae itsajivi ata pexanaenexa itsacuenëjavayo ata penacueraevetsimatacabita.

¹¹ Nexata petabusipacuenëbinëmitsi jumaitsi judíovijavabelia:

—Tanejamatejemayaexanaenë raja nejumaitsi: “Nijapanayo pire. Ponare baja,” nejai, jai petabusipacuenabinëmitsi judíovijavabelia.

¹² Nexata icatsia judíovi jumaitsi:

—¿Jipatsa nexata cajumaitsi: “Nijapanayo pire. Ponare baja,” cajai? jai.

¹³ Itsiata baitsi jane bajaraponë apo vënëyapëtae pavënëne jamatejemayaexanatsi. Apo vënëyapëtae Jesús. Tsipaji bitso jivi ayaibitsaëtoxaneto bajarajota jinavanapa. Jesús baja cajena pepuaponae itsajavabelia, yanijobatsi.

¹⁴ Bajaraxuacujinae icatsia Jesús caxitajarabaxuaba bajaraponë templobota. Nexata Jesús jumaitsi bajaraponëjavabelia:

—Taema. Aeconoxae baja jamatejemamë. Icatsia pëtsa baja matavëjéa exaname pibisiacuene. Icatsia raja itsa exaname, bitsomë tsipae, jai Jesús bajaraponëjavabelia.

¹⁵ Nexata bajaraponë pona baja. Tsipaeba judíovijavabelia.

—Jesús tsaena raja nejamatejemayaexana, jai judíovijavabelia.

¹⁶ Bajaraxuata nexata judíovi Jesús jamatabëitonotatsi. Jamatabëbeyaxuabatsinua. Tsipaji jamatejemayaexana piavitanevi judíovi penacueraevetsimatacabita.

¹⁷ Nexata Jesús jumaitsi judíovijavabelia:

—Taxa Dioso raja piavitanevi jamatejemayaexanabiaba daxitamatacabi. Bajaraxuata xanë ata piavitanevi jamatejemayaexanjë daxitamatacabi, jai Jesús judíovijavabelia.

¹⁸ Bajarapacuenia Jesús penalivaisipaebixae judíovijavabelia, itoyatsi bitso. Bajarapamonae jamatabëbeyaxuabatsi. Tsipaji Jesús jamatejemayaexana piavitanevi judíovi penacueraevetsimatacabita. Orijibia Jesús jumaitsi: “Taxa raja Dioso,” jai. Bajarapacuenia Jesús pejumaitsixae, nexata judíovi bitso jamatabëbeyaxuabatsi.

Pacuenia Dioso pexë nato jamatabëcuenecaëjëpatsi daxitacuene pexanaenexa yabara pelivaisi

¹⁹ Jesús jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Dioso pexë natonë, it-sacuenejavayo ata apo exanaenë exanë tajamatabëcueneta. Pacuenia taniiji taxa pexanaejava, bajarapacuenia xanë ata exanjë.

²⁰ Taxa niasiva. Nexata neyapëtaeayaexana daxita pacuene taxa yapëtane. Tavajënaeyabelia neyapëtaeayaexanaponaena bajarapacuenie matatoxenetsia ayaicune taexanaponaenexa. Nexata exanaenajë ayaicune taexanaejavanë. Paxamë itsa pataename ayaicune taexanaejavanë, pajamatabëcuenenabenajacaname.

²¹ Taxa petëpaevimi ata icatsia asaëyaexana. Xanë ata necaëjëpa tasaëyaexanaenexa petëpaejivi ata, pajivi jamatabëasaëyaexanjë.

²² Taxa raja apo naneconitsiaexanae tsane itsajivi ata. Xanë raja, pexë natonë, nitoroba tananeconitsiaexanaenexa pibisiacune pexanaevi.

²³ Bajarapacuenia nitoroba tananeconitsiaexanaenexa taneyaiyataenexa daxitajivi pacuenia bajarapamonae yayiatane taxa. Pajivi apo neyaiyatae, Dioso pexë natonë, bajarapajivi taxa ata apo yayiyatae, jai Jesús judíovijavabelia.

²⁴ Icatsia Jesús jumaitsi judíovijavabelia:

—Xaniajanë pacuenia pacatsipaebijitsiatsi. Pajivi nenamuxu-naeveta tapaebilivaisi, itsa jumecovëñetanua Dioso athëbëvetsica taneitorobinëcuenetsica, nexata bajarapajivi xainaena matacabi apo pevereverecejava. Nexata bajarapajivi apo naneconitsiaexanaenë tsane pibisiacune pexanaeneconi yabara. Bajarapajivi tēpae ata tsane, capanepaenatsi Diosojavabelia.

²⁵ Xaniajanë pacuenia pacatsipaebijitsiatsi. Pamonae apo xinae matacabi apo pevereverecejava, pijamatacabi baja tocopiapatatsi tanejumetaenexa, xanë Dioso pexë natonë, tatsipaebilivaisi. Nexata pajivi nesivanajamatabëcopata, xainaena matacabi apo pevereverecejava.

²⁶ Taxa raja caëjëpatsi jivijavabelia perajutsinexa matacabi apo pevereverecejava. Nexata xanë ata taxa necaëjëpaeyaexana jivi tarajutsinexa matacabi apo pevereverecejava.

²⁷ Nitorobanua tananeconitsiaexanaenexa pibisiacune pexanaevi. Tsi-paji xanë, Daxitajivi Pematapijinë.

²⁸ Pëtsa pajamatabëcuenenabenajacame patacatsipaebilivaisi yabara. It-samatacabi nejumetaena daxita petëpaevimi ata tatsipaebilivaisi.

²⁹ Nexata bajarapamonae pemëthëanëmi vecuapitsapaena. Pamonae pexaniacune pexanaevimi, Dioso icatsia asaëyaexanaenatsi. Nexata bajarapamonae xainaena matacabi apo pevereverecejava. Pamonae pibisiacune pexanaevimi, icatsia Dioso asaëyaexanae atatsi tsane, bajarapa-

monae naneconitsiaya jinavanapaena daxitamatabijavabelianexa, jai Jesús judíovijavabelia.

Pacuenia Jesús jivi tsitanajamatabëcueneitajëta pecaëjëpaenëcuenetsi daxitacuenepexanaenexa yabara pelivaisi

³⁰ Icatsia Jesús jumaitsi judíovijavabelia:

—Xanë tajamatabëcueneta apo exanaenë tsane itsacuenejavayo ata. Taneitorobinëtsica taneitorobicuenia, pijaneconi pexainaevi naneconitsiaya jinavanapaeyaexanaenajë. Nexata saya itaxutojema apo naneconitsiaexanaenë tsane. Itsa naneconitsiaexanaenajë jivi, paneconivajëto xaina caejivi canacujitsia, bajarapaneconivajëtotata caejivi canacujitsia naneconitsiaexanaenajë. Apo exanaenë tsane pacuenia jamatabëexanajë tajacuata. Pacuenia jitsipa taxa taneitorobinëtsica, bajarapacuenia exanaenajë.

³¹ Itsa navënëlivaisipaebijitsipajë, “Xanë rabaja ayaijamatabëcuenenënë,” itsa janë tsipae, itsiata itsamonae saya nejumeaebijitsipa.

³² Itsiata baja Juanpijinë jivibautisabinëmi nevajunupaeba xaniavaetsia. Yapëtaniji bajaraponë tanevajunupaebijava pexaniajajamatabëcueneta.

³³ Paxamë itsamonae paitorobame tanevënëlivaisiyanijobinexa Juan jivibautisabinëmijavabelia. Nexata Juanpijinë xanë talivaisi, pexaniajailivaisi, tsipaeba paneitorobivijavabelia.

³⁴⁻³⁶ Pacanajamatabënapitsiaexanatsi pacuenia Juanpijinë nevënëlivaisipaeba panejumecovënëtsinexa patacacapanepaejavanexa taxa Diosojavabelia. Juanpijinë abaxë itsa ponapona mapanacuataje, belámparabë picani. Pacajamatabëcueneitayota. Caepatoyo picani pasivajamatabëcuenebarëyamë papecatsipaebilivaisi. Juanpijinë itsa nevënëlivaisipaeba, pacayapëtaeyaexana baja cajena pexaniajailivaisi tapaebinëcuene. Itsiata baitsi jane Juanpijinë bajarapacuenia apo pacatsipaebi ata tsipae, xanë xainajë itsanë tanevënëlivaisipaebinëxexa. Bajaraponë bitso ayaijamatabëcuenenë Juanpijinëmi matatoxenetsia. Bajaraponë taxa. Taxa netocopata pinijicune taexanaenexa. Nexata pinijicune exanajë daxitajivi tanesivajamatabëjumaitsinexa: “Xaniajai tsaena. Maponëje pepacuenene Dioso athëbëvetsica pitorobinëtsicsicaje.” tanesivajamatabëjainexa.

³⁷ Taxa, ponë nitorobica, tajëvelia baja cajena nevënëlivaisi yaquinaeyaexana pejumelivaisibaxutota. Caeto ata taxa livaisi papecatsipaebijava, apo pajumetaemë. Apo pataemënuu.

³⁸ Nexata pejumelivaisi apo pacatsijamatabëjone. Tsipaji apo panejumecovënëtsimë taxa athëbëvetsica taneitorobinëtsica.

³⁹ Paxamë picani xaniavaetsia palebabiabame Dioso pejumelivaisibaxuto. Bajarapacuenia palebabiabame tsipaji jamatabëcuenenavëxaniabiaya pajamatabëjumaitsimë tsabiabi: “Xaniavaetsia itsa lebajë Dioso pejumelivaisi, nexata Dioso nerajutsiana matababi apo pevereverecejava,” pajamatabëjamë tsabiabi. Itsa palebabiabame Dioso pejumelivaisibaxuto, ponë yabara palebabiabame, xanë rabaja cajena.

⁴⁰ Paxamë itsiata apo panejumecovënëtsimë panexainaenexa matababi apo pevereverecejava, jai Jesús judíovijavabelia.

⁴¹ Icatsia Jesús jumaitsi judíovijavabelia:

—Apo exanaenë ayaicune taexanaejava saya jivi tanesivajamatabëjumaitsinexa: “Jesús raja ayaijamatabëcuenenënë,” tanesivajamatabëjainexa.

42 Pacajamatabëcueneyapëtanetsi. Yapëtaniji cajena apo panejitsipaejava Dioso.

43 Xanë athëbëvetsica patsicajë mapanacuayabetsicaje taxa Dioso taneitorobixaetsica. Itsiata apo panejumecovënëtsimë. Itsanë itsa pacatopatsiana saya bajaraponë pejamatabëcuenepijilivaisi papecatsipaebinxexa, nexata pajumecovënëtsianame.

44 Paxamë pajitsipame mapanacuata ëjivi papecasivabarëyanexa, papecaiyayataenexanua. Apo panajamatabëxainamë cajena Dioso papecasivabarëyanexa. Bajaraxuata apo pacacaëjëpae panejumecovënëtsinexa Dioso pejumelivaisi.

45 “Mara ponëje nacaneconitsijitsia Diosojavabelia,” panesivajamatabëjamë pëtsa. Xanë raja apo pacaneconitsi tsanetsi. Paxamë jamatabëcuenenavëxaniabiaya pajamatabëjumaitsimë tsabiabi: “Bajayata Dioso Moisésipjinëta najumecopata jivi pejumecovënëtsinexa. Bajarapalivaisi baja jumecovënëtsijainavanapatsi. Bajaraxuata nacacapanepaena Dioso,” pajamatabëjamë tsabiabi jamatabëcuenenavëxaniabiaya. Itsiata bajarapalivaisivecua saya pajinavanapame. Nexata bajarapalivaisi pacaneconitsiana Diosojavabelia.

46 Itsa pepacuene pajumecovënëtsipame Dioso Moisésipjinëta penajumecopatsilivaisi, nexata xanë ata panejumecovënëtsipame. Tsipaji cajena bajayatami tajëvelia nevajunupaeba Moisésipjinë peyaquinaebaxutota.

47 Apo pajumecovënëtsimë Moisésipjinë peyaquinaelivaisi. Bajaraxuata nexata apo panejumecovënëtsimë xanë patacatsipaebilivaisi, jai Jesús judíovijavabelia.

6

Pacuenia Jesús pexaejava rajuta cinco mil ponëbeje yabara pelivaisi

(Mt 14.13-21; Mr 6.30-44; Lc 9.10-17)

1-4 Bitso baja imoxoyo pevajënae pejonenexa judíovi pijafieta, pascuavënëfieta. Bajarapamatacabi Jesús pona Galilea pucaxaneto itsapanabelia. Bajarapapuca itsavënë Tiberiaspuca. Nexata jivi ayaibitsaëtoxaneto Jesús pënaponatsi. Tsipaji Dioso pesaëta Jesús ayaicuene exanapona. Piavitanevi jamatejemayaexana pona. Nexata Jesús junaya petsutojumabetsia. Jesús, pijajivi yajava, ecaya petsutojumatatsia.

5 Itsa Jesús tane jivibitsaëtoxaneto pecujibijavatsirena, Jesús jumaitsi Felipejavabelia:

—¿Detsa belia comuatsianatsi pexaejava pexaenexa mapabitsaëtoxanetoje? jai Jesús.

6 Bajarapacuenia Jesús jumaitsi tsipaji jamatabëyapëtane pacuenia Felipe jumecanaviatsijitsiatsi. Jesús baja cajena picani yapëtane pacuenia pexaejava mitsaexanaejitsia bajarapajivibitsaëtoxaneto.

7 Nexata Felipe jumaitsi Jesúsjavabelia:

—Doscientos denariocuenia comuatsi atatsi tsipae pan, apo yacaëjëpaetsi tsipae pexaenexa daxita mapajivibitsaëtoxanetoje, jai Felipe.

8 Itsanë Jesús pijajivitonë Andrés, Simón Pedro pejuyapijinë, jumaitsi Jesúsjavabelia:

9 —Majotaje napatajopa pejevaxinëyo. Xaina bajaraponëyo cinco panbëbeje, cebadavënëbenota pexanaepanbëanë. Xaina anijanëyobeje dujuainëyobeje yajava. Bajaraxuaxi apo caëjëpae tsipae cajena vajarajutsinexa mapajivibitsaëtoxanetoje, jai Andrés.

¹⁰ Nexata Jesús jumaitsi pijajivijavabelia:

—Daxita bajarapamonae paenaeyaexanare, jai Jesús.

Nexata Jesús pijajivi itoroba jivi penaenexa ponajumavereca. Bajarapajivibitsaëtóxaneto bejamatabëcuene cinco mil meta ponëbeje.

¹¹ Nexata Jesús pita panbëxi. Bajaraxuacujinae pexaenexa vajëta Diosojavabelia.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae Jesús pan rajuta pijajivijavabelia. Nexata juya Jesús pijajivi tsicobetsana daxita penaevibitsaëtóxanetojavabelia. Bajara icatsia pacuenia Jesús vajëta Diosojavabelia dujuainëyobeje pexaenexa.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae icatsia dujuaijavaxi tsicobetsana daxita penaevibitsaëtóxanetojavabelia. Daxita bajarapamonae xaniavaetsia nabane.

¹² Itsa baja bajarapamonae penia, Jesús jumaitsi pijajivijavabelia:

—Pacaetuae baja peyajuvënënacopabenaevanë penaxuabenaeyaniva, jai Jesús pijajivijavabelia.

¹³ Nexata Jesús pijajivi caetuata peyajuvënënacopabenaevanë. Vënëba doce xuabeje bemapirecuenia pexanaevanë. Cinco papanbëmibeje picani cebadavënëbenota pexanaepanbëanë. ¹⁴ Nexata bajarapajivibitsaëtóxaneto itsa tane Jesús ayaicuene Dioso pesaëta pexanaejava, najumaitsi Jesús yabara:

—Diosojumepaebinë profeta, ponë vaxaitsi copiaevetavanapatsi pepatsi-javanexatsica, bajara jane maponëje.

¹⁵ Vaetabianatsi maponëje. Vajanacayanacuaevetsinë exanaenatsi bajara-ponë, najai picani bajarapamonae.

Nexata Jesús jamatabëcuenyapëtane bajarapacuenia pesivanajamatabëxainaejavatsi. Bajaraxuata Jesús baja vecuapona. Najetaruca pinijitsutonëjava caenë.

Pacuenia Jesús mene itaboxoya najetaruca yabara pelivaisi
(Mt 14.22-27; Mr 6.45-52)

¹⁶ Itsa baja meravi, Jesús pijajivi puca itapayabereca pona.

¹⁷ Jesús abaxë patsinejeva pijajivijavata, aitaquiri baja. Nexata pijajivi runareca jera ënëabereca. Nicabijitsia Capernaum tomarabelia.

¹⁸ Jesús baja pijajivi pepuaponae jerata, taxuxuaba jovibo pebubujaijava. Nexata malataca bitso ayai.

¹⁹ Pavëpata Jesús pijajivi naropoba, bajarapavëpa baja bejamatabëcuene cinco pakilómetrobeje, seis pakilómetrobeje ata, pepuavecuanaejatarubenaelia, Jesús pijajivi cujitanajetaruca. Jesús najetaruca mene itaboxoya. Nexata Jesús pijajivi tanetsi. Jesús pijajivi cujunavatsi.

²⁰ Nexata Jesús jumaitsi pijajivijavabelia:

—¡Xanë raja najetarucajè! ¡Pëtsa panecujunavame! jai Jesús pijajivijavabelia.

²¹ Nexata Jesús pijajivi jamatabëcuenebarëya. Jesús baja nexata nonorena jera ënëaberena. Nexata bajarapaepatota Jesús baja, pijajivi yajava, pata Capernaum tomarabelia.

Pacuenia Jesús pëjaitatsi jivi yabara pelivaisi

²² Pamonae Jesús pexaejava rajuta, abaxë nacopabalia puca itsapanatalia. Nexata meravia pitsijavata bajarapamonae najumaitsi:

—Canivi caejera perucaejava, tanetsi majotaje. ËJesus pijajivi runareca penicabinexalia. Nexata Jesús nacopatanuca majotaje, najai bajarapamonae.

²³ Bajara saya paepatota itsamonae jeranë yaparena Tiberias tomaraverena. Itsajota Jesús pevajëtsicujinae Diosojavabelia pexaejava rajuta jivi ayabitsaëtoxaneto, bajarajota vecuaimoxoyo yaëba.

²⁴ Nexata pamonaë Jesús pexaejava rajuta, bajarapamonae tane Jesús pijajivi pebarëajibitsarucaejava bajarajota. Nexata bajarapamonae runareca jera ënëabereca penicabinexalia Capernaum tomarabelia. Bajarapatomarabelia pona pepëjaitsinexatsi Jesús.

Pacuenia Jesús bepitavapan yabara pelivaisi

²⁵ Jesús pepëjaitshivitsi itsa pata Capernaum tomarabelia, caxitajarabatsi Jesús. Nexata bajarapamonae jumaitsi Jesúsjavabelia:

—Jesús, ¿detsa pacujinae patame baja maberenaje? jai.

²⁶ Jesús nexata jumaitsi bajarapamonaejavabelia:

—Xaniajanë pacuenia pacatsipaebijitsiatsi. Paxamë panejaitame tsi-paji xaniavaetsia panabaneme xanëjavata. Apo panejaitsimë panejumecovënëtsinexamë Cristocuenenë, Dioso taneitorobinëtsica. Patae atamë ayaiucene Dioso pesaëta taexanaejava, apo panejumecovënëtsimë.

²⁷ Pëtsa pacajamatabëcueneena ëpevereverecejava yabara. Pacuenia panexaejava baverevereca, bajarapitsijava. Biji rajane pacajamatabëcueneena apo pevereverecejava yabara. Nexata xanë, Daxitajivi Pematapijinë, pacarajutsianatsi matacabi apo pevereverecejava. Taxa Dioso baja cajena nitoroba patacarajutsinexa matacabi apo pevereverecejava, jai Jesús bajarapamonaejavabelia.

²⁸ Nexata bajarapamonae jumaitsi Jesúsjavabelia:

—¿Detsa nexata xua bepaexanajë Dioso pejitsipaecuene? jai bajarapamonae.

²⁹ Nexata Jesús jumaitsi bajarapamonaejavabelia:

—Mara pacuene Dioso jitsipa paneexanaenexaje. Panejumecovënëre xanë Dioso taneitorobicuenetsica, jai Jesús.

³⁰ Nexata icatsia bajarapamonae jumaitsi Jesúsjavabelia:

—¿Detsa nexata xua pinijicuene Dioso pesaëta nexanaejava panetsitaexanaename patacajumecovënëtsinexa Dioso pecaitorobicuenetsica?

³¹ Vajasalinaivimi pina bajayata baxaevanapa manávënëjava petusato nacuata pacuenia baja Dioso pejumelivaisibaxutota jumaitsi. Dioso baja cajena pejumelivaisibaxutota jumaitsi mapacueniaje: “Bajarapamonae rajutabiabatsi pexaejava athëbëpijijava,” jai Dioso pejumelivaisibaxutota vajasalinaivimi yabara, jai bajarapamonae Jesúsjavabelia.

³² Jesús nexata bajarapamonaejavabelia jumaitsi:

—Xaniajanë pacuenia pacatsipaebijitsiatsi. Moiséspijinë petusato nacuata vajasalinaivimi pexaejava apo rajutsi athëbëpijijava. Taxa Dioso raja rajutabiaba bajarapamonae pexaejavanexa. Nexata pijinia aeconoxae paxamë ata Dioso pacarajutsiana athëbëpijipan, pepacuene pexaniajaipan.

³³ Ponë athëbëvetsica pepatsinë, Dioso rabaja pijapan. Bajaraponë mapanacuapijivijavabeliaje rajutsiana matacabi apo pevereverecejava, nayabarajai Jesús pijacuata bajarapamonaejavabelia.

³⁴ Nexata bajarapamonae jumaitsi:

—Jesús, bajarapapan panerajutaponaenename daxitamatacabi canacujitsia, jai.

³⁵ Nexata Jesús jumaitsi bajarapamonaejavabelia:

—Papan jivi rajutsianatsi matacabi apo peverevereaejava, xanë rabaja bajarapapannë. Pajivi xanëjavaberena pata, apo piajani cajena tsane pejamatabëëthëtota. Pajivi nesivanajamatabëcopata xanëjavaberena, apo jitsipae tsane icatsia mera.

³⁶ Paxamë apo panejumecovënëtsimë, patae atamë Dioso pesaëta pini-jicue ne taexanaejava.

³⁷ Daxita pamonaë taxa tanerajutsivi, patsiana xanëjavaberena. Pajivi patsiana xanëjavaberena, apo navecuaitavetsinë tsane.

³⁸ Xanë apo patsinëtsica athëbëvetsica taexanaenexa ëtajamatabëcujirupijijava. Biji rajane patsicajë taexanaenexa pacuenia nitoroba taneitorobinëtsica.

³⁹ Mara pacuene taxa Dioso jitsipa tatoexanaenexaje. Apo jitsipae cajena tatoxabijava caejivi ata tanerajutsiviyajuvënëvi. Pamatacabi icatsia patsianicajë, daxita bajarapamonaë toasaëyaexanaenajë icatsia petëpaejavamivecua.

⁴⁰ Mara pacuene taxa Dioso jitsipaje. Daxita pamonaë tanetaevi Dioso pexënatonë, nexata itsa nesivanajamatabëcopata, bajarapamonaë xainaena matacabi apo peverevereaejava. Bajarapamonaë icatsia asaëyaexanaenajë petëpaejavamivecua pamatacabi icatsia patsianicajë, jai Jesús bajarapamonaejavabelia.

⁴¹ “Xanë rabaja athëbëvetsica tapatsipan,” penayabarajaijava Jesús jivijavabelia, judíovi baracuaicuaijaiti pepënëvelia.

⁴² Nexata judíovi najumaitsi:

—Mara ponë Jesús, Josépijinë pexënatoje. Vaxaitsi baja cajena yapëtanetsi paxapijinë, pena ata. Nexata bajaraponë acuenebi pejumaitsijava: “Athëbëvetsica tapatsinë,” pejaijava, najai judíovi Jesús yabara.

⁴³ Nexata Jesús jumaitsi bajarapamonaejavabelia:

—Jamatabëcuenenavëxaniabiaya pëtsa panebaracuaicuaijamë tapënëverena.

⁴⁴ Itsajivi ata raja apo caëjëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaeyaexanaenatsi, nesivanajamatabëcopatsiana. Pajivi nesivanajamatabëcopatsiana, asaëyaexanaenajë petëpaejavamivecua pamatacabi icatsia patsianicajë.

⁴⁵ Bajayata Diosojumepaëbivimi peyaquinaelivaisi jumaitsi mapacueni-aje: “Dioso cajena yapëtaeyaexanaena daxitajivi pexaniajailivaisi,” jai. Nexata pajivi jumecovënëta taxa peyapëtaeyaexanaelivaisi, bajarapajivi xanë ata nesivanajamatabëcuenecopatsiana, jai Jesús judíovijavabelia.

⁴⁶ Icatsia Jesús jumaitsi judíovijavabelia:

—Itsajivi ata cajena taxa apo tae. Xanë raja caenënë taxa Dioso taniji. Tsipaji bajaravetsica tapatsinë.

⁴⁷ Xaniajanë pacuenia pacatsipaëbijitsiatsi. Pajivi nesivanajamatabëcopatsiana, xainaena matacabi apo peverevereaejava.

⁴⁸ Xanë rabaja pitavapannënë. Nexata jivi rajutsianajë matacabi apo peverevereaejava.

⁴⁹ Bajayata panijasalinaivimi xaevanapa picani manávënëjava petusato nacuata. Itsiata baiti jane bajarapamonaë bajayajebi bajaraxua xaevanapae ata, tēpa itsiata.

⁵⁰ Xanë raja pacanavajunupaëbatsi athëbëvetsica tapatsinë. Pajivi nesivanajamatabëcuenecopatsiana, pepacuene apo tēpae tsane.

51 Xanë rabaja cajena pitavapannënë, athëbëvetsica tapatsinë. Pajivi jumecovënëtsiana tasivatëpaejava pijaneconi yabara, jamatabëcueneaitava tsaponaponae tsane daxitamatacabijavabelianexa. Papan rajutsianajë tanejumecovënëtsivi, tavito rabaja tsane. Navirajutsianajë daxitanacuapijivi pexainaenexa matababi apo pevevererecaejava, nayabarajai Jesús judíovijavabelia.

52 Nexata judíovi najumeanaenota ëpamonae bajarapacuenia Jesús pejumaitsijava yabara. Najumaitsi bajarapamonae:

—¿Detsa pacuenia maponë nacanavirajutsipa vajavixaenexaje? Acuenebi raja vajanacanavirajutsijava vajavixaenexa, najai judíovi.

53 Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Daxitajivi Pematapijinënë. Itsa paxamë apo panevixaemë tsane, apo panejanaapaemënu tsane, nexata matababi apo pevevererecaejava, apo paxainaemë tsane.

54 Pajivi nevixaena, nejanaapaenanua, xainaena matababi pevevererecaejava. Pamatababi icatsia patsianicajë, bajarapajivi icatsia asaëyaexanaenajë petëpaejavamivecua.

55 Tavito rabaja cajena pepo pexaniajajava jivi pexaenexa. Tajana rabaja pijinia pepo pexaniajajava jivi piapaenexa.

56 Pajivi nevixaena, nejanaapaenanua, bajarapajivi yajavaponaponae-najë. Bajarapajivi ata pijinia neyjavaponaponae.

57 Taxa, ponë nitorobica, bajaraponë pejamatabëcueneta xanë ata daxitamatacabijavabelianexa asaënë tsaponaponae. Nexata pajivi nevixaena, bajarapajivi pijinia tamatabëcueneta asaë tsaponaponae tsane daxitamatacabijavabelianexa.

58 Athëbëvetsica pepatsipan, xua yabara baja pacatsipaebatsi, bajarapapan apo jëpae papan bajayata panijasalinaivimi xaevanapa. Bajarapapanmi bajayajebi xaevanapae ata, bajarapamonae mi itsiata tēpa baja cajena. Biji rajane pajivi xanë nevixaena, ponaponae daxitamatacabijavabelianexa, jai Jesús judíovijavabelia.

59 Bajarapacuenia Jesús jumaitsi judíovijavabelia livaisi petsipaebijavata Capernaum tomarata, judíovi penacaetuatabibota.

Matababi apo pevevererecaejava yabara pelivaisi

60 AyaiBITSaëto, pamonae Jesús pepëta najinavanapa, itsa jumetane Jesús petsipaebilivaisi, apo jumexaniatae. Najumaitsi ëpamonae:

—Penajumetsënëtsilivaisi saya nacatsipaeba. ¿Jipatsa jumecovënëtsiana? Ajibi cajena, najai ëpamonae.

61 Nexata Jesús jamatabëcueneyapëtane pacuenia pepënëvelia baracuaicuaijaisi. Nexata Jesús yanijoba pepënaponaevitsijavabelia. Jumaitsi:

—¿Apo bepexaniajailivaisi tsaja pajumetaneme patacatsipaebilivaisi?

62 Xanë Daxitajivi Pematapijinënë. ¿Detsa paitsimë tsipae itsa pataejitsipame tatsiajava athëbëabetsia taponaponaeacuamijavabetsia?

63 Espíritu Santo baja cajena pejamatabëcueneta jivi xaina matababi apo pevevererecaejava. Ëjivi raja pejamatabëcueneta apo caëjēpaetsi pexainaenexa matababi apo pevevererecaejava. Patacatsipaebilivaisi baja cajena papecatsijamatabëjonenexa picani, panexainaenexa matababi apo pevevererecaejava.

64 Itsiata baitsi jane paxamëyajuvënëvi abaxë apo nejumecovënëtsi, jai Jesús.

Jesús bajarapalivaisi petsipaebivajēnae ata, jamatabēcueneyapētane pamonae apo jumecovēnētsijitsiatsi. Jamatabēcueneyapētanenua tajēvelia ponē canajetsijitsiatsi pijavajabitsaē pecobeyabelia.

⁶⁵ Nexata Jesús icatsia jumaitsi pepēnaponaeivitsijavabelia:

—Bajaraxuata cajena pacajumaitsi: “Itsajivi ata raja apo caējēpaetsi pijacuata xanējavabereana tanesivanajamatabēcopsinexa. Matapania taxa Dioso, taneitorobinētsica, itsa caējēpaeyaexanaenatsi, nesivanajamatabēcopsiana,” pacajaitsi, jai Jesús pepēnaponaeivitsijavabelia.

⁶⁶ Bajara nexata jota ayaibitsaēto Jesús pepēnaponaeivitsi vepēnaviabatsi baja. Nexata bajarapamonae pematatsēnēa baja apo pēnaponaeitsi Jesús.

⁶⁷ Nexata Jesús yanijoba doce ponēbeje pijajivijavabelia. Jumaitsi:

—¿Paxamē ata tsabaja pajamatabēnaviabame? jai Jesús.

⁶⁸ Nexata Simón Pedro jumaitsi Jesúsjavabelia:

—Tajatuxanenē, itsa panaviabajē, ¿jipatsa nexata papēnaponaeivitsipajē xamēvecua? Xamē rabaja caenēmē panetsipaebame matacabi apo pev-
ereverecaevaja pataxainaenexa.

⁶⁹ Paxanē rabaja pacajumecovēnētatsi patanetsipaebilivaisimē. Pacayapētanetsinua baja cajena Cristocuenemē, Dioso piasaētsaponaponaeñē daxitamatacabijavabelianexa pexēnatomē, jai Simón Pedro Jesúsjavabelia.

⁷⁰ Jesús nexata jumaitsi pijajivijavabelia:

—Xanē rabaja pacaitapetatsi doce paponēmēbeje. Itsiata baitsi jane pax-
amēyajuvēnēnē, itsanē, dovathi pijajivitonē tsaponaponae, jai Jesús.

⁷¹ Bajarapacuenia Jesús itsa jumaitsi, Judas Iscariote, Simón pexēnato, yabara jumaitsi. Judas Jesús canajetsijitsiatsi pijavajabitsaē pecobeyabelia. Judas rabaja picani Jesús pijajivitonē, doce ponēbejeyajuvēnēnē.

7

Pacuenia Jesús pejuyapijivi apo jumecovēnētsitsi yabara pelivaisi

¹ Jesús ponapona Galilea nacujava. Apo jitsipae peponaponaejava Judea nacujava. Tsipaji bajarajota judíoivi jamatabēbeyaxuabatsi.

² Imoxoyo baja pevajēnae pejonenexa fiesta, pafiestamatacabi judíoivi bobērētonē exanabiaba. Nexata judíoivi bajarapabobērētonēta jinavanapabi-
aba bajarapafiestamatacabi.

³ Nexata Jesús pejuyapijivi junatatsi penaponaeenexa bajarapafiestajav-
abelia. Jesús pejuyapijivi jumaitsi:

—Pētsa nacopatame majotaje. Judea nacujavabelia liamēre. Bajarajo-
talia pijinia Dioso pesaēta pinijicuene nexanaponaejava nijajivi tsitaexanae-
name.

⁴ Pajivi pexanaejava yabara jitsipa pevēnēlvivaisitaenexatsi daxitanacuapi-
jivi, bajarapajivi pexanaejava muetsia apo exanae. Nexata pepacuene
Dioso pesaēta pinijicuene itsa exanapona, nexata icatsia pinijicuene tsi-
taexanaename fiestajavata daxitanacuapijivi pitabarata. Nexata daxitajivi
cayapētaena, jaitsi Jesús pejuyapijivi.

⁵ Jesús pejuyapijivi ata apo jamatabējumecovēnētsi Cristocuene. Bajaraxu-
ata bajarapacuenia pejuyapijivi ata jumaitsi.

⁶ Nexata Jesús jumaitsi pejuyapijivijavabelia:

—Abaxē raja tajamatacabi apo netocopiapatsi tanaitajētsinexa daxitajivi-
javabelia. Itsiata paxamē apo paitsimē. Paepatota jamatabēpaponame,
pacatoxanepana paneponaenexa.

⁷Mapanacuapijivi cajena acuenebi paxamë papecaitoayajava. Itsiata baitsi jane xanë nitoya. Tsipaji itavetaponajë pibisiacuene pexanavanapaejaya.

⁸Paxamë baja paponare fiestajavabelia. Xanë ra abaxë apo ponaenë. Tsipaji abaxë apo netocopiapatsi paepatota ponaejitsianë, jai Jesús pejuyapijivijavabelia.

⁹Bajarapacuenia Jesús pejumaitscujinae, abaxë Jesús nacopatanuca Galilea nacuata pecofocaevinexa.

Pacuenia Jesús napona fiestajavabelia yabara pelivaisi

¹⁰Jesús pejuyapijivi fiestajavabelia pepuaponae, Jesús ata cotocaevi napona fiestajavabelia. Jesús nexata jivibitsaëto tuatuajëta apo naponae muetsia pepatsinexa.

¹¹Jesús picani jaitatsi judíovi pevetsivi fiestajava. Najumaitsi judíovi pevetsivi:

—¿Detsa xania jota ponapona bajaraponë? najai judíovi pevetsivi Jesús yabara.

¹²AyaiBITSaëto jivi vëpaxapaxajaiya baracuaicuaijaisi Jesús. Itsamonae jumaitsi Jesús yabara:

—Pexaniajamatabëcuenenë raja, jai itsamonae.

Itsamonae pijinia jumaitsi:

—Apo pexaniajamatabëcuenenë raja Jesús. Peyamaxëitojorobinë ra saya jivi, jai Jesús yabara.

¹³Itsajivi ata apo cuaicuaijai ayaijumeta Jesús yabara. Tsipaji jumejunava judíovi pevetsivi pejumetaeyanivatsi.

¹⁴Itsa baja fiesta epatua tsaponae pevereverecaenexa, nexata Jesús joneya temploboyalia. Taxuxuaba jene baja livaisi petsipaebijava.

¹⁵Judíovi pevetsivi jamatabëcuenenabenajaca itsa jumetane Jesús pepaebilivaisi. Nexata judíovi pevetsivi najumaitsi:

—Maponëje bitso livaisi yapëtane. Picani livaisi apo nacujarubi pacuenia vaxaitsi nacujarubatsi, najai tsanubenaë judíovi pevetsivi Jesús yabara.

¹⁶Jesús nexata jumaitsi judíovi pevetsivijavabelia:

—Tatsipaebilivaisi raja apo tajamatabëcuenepijilivaisi. Dioso raja, ponë nitorobica, bajaraponë pejumelivaisi tsipaebaponajë.

¹⁷Pajivi jamatabëxana Dioso pejitsipaecuenia, bajarapajivi yapëtaena pepacuenie Dioso pejumelivaisi tatsipaebijava. Nexata yapëtaenanua tajamatabëcuenepijilivaisi itsa tsipaebajë.

¹⁸Pajivi tsipaeba ëpejamatabëcuenepijilivaisi, tsipaeba saya jivi peyaiyataenexatsi. Itsiata baitsi jane pajivi tsipaeba jivi peyaiyataenexa Dioso, bajarapajivi cajena tsipaeba pexaniajaillivaisi. Bajarapajivi apo yamaxëitojorobi jivi. Tsipaji pacuenia Dioso itorobatsi, tsipaeba, jai Jesús judíovi pevetsivijavabelia.

¹⁹Jesús icatsia jumaitsi judíovijavabelia:

—Moiséspjijnë baja cajena bajayata yaquina Dioso penajumecopatsilivaisi jivi pejumecovënëtsinexa. Itsiata baitsi jane paxamëyajuvënëjivi, caejivi ata, apo jumecovënëtsi bajarapalivaisi. Bajarapalivaisi pacaitavetsi ata jivi panebeyaxuabiyaniya, ¿detsa xuajitsia itsiata xanë jamatabëpanebeyaxuabame? jai Jesús judíovijavabelia.

²⁰Nexata judíovi jumaitsi Jesúsjavabelia:

—Dovathi baja cajena yajavaponaponame. Itsajivi ata raja apo jamatabëcabeyaxuabi, jai judíovi.

²¹Jesús nexata jumaitsi bajarapamonaejavabelia:

—Caejavayo Dioso pesaëta pinijicuene taexanaejava exanajë penacuer-
aevetsimatacabita. Nexata itsa pataneme bajarapacuene, daxita paxamë
pajamatabëcuenenabenajacame penacueraevetsimatacabita taexanaexae ba-
jarapacuene.

²² Paxamë ata penacueraevetsimatacabita ata panacuenebabiabame. Tsi-
paji penacuetonëyo paperabëcaucutabiabame penacueraevetsimatacabita ata
ocho pamatacabibeje itsa xaina penaexanaecujinae. Baitsi paboupiper-
abëcaucutabiabame, Moiséspijinë baja cajena papecaitorobicuene. (Itsi-
ata Moiséspijinë apo taxuxuabi bajarapacuene. Bajaraponëmi cajena pe-
vajënaeya ata, panijasalinaivimi taxuxuaba bajarapacuene.)

²³ Bajarapacuenia penacuetonëyo paperabëcaucutabiabame
penacueraevetsimatacabita ata, panejumecovënëtsinexa Moiséspijinë
pitorobicuenia. ¿Detsa nexata xuajitsia xanë panebaraanaepaname
penacueraevetsimatacabita pebi tajamatejemayaexanaejava yabara?

²⁴ Xaniavaetsia abaxë payapëtaejevamë itsajivi pibisiacuene
pexanaejava, pëtsa abaxë pananeconitsiaexaname. Matapania xaniavaetsia
payapëtaename, payanijobianamenua, itsa baja xaniajai naneconita, baja
rajane pananeconitsiaexanaename, jai Jesús judíovijavabelia.

Pacuenia Jesús navajunupaeba itsaverena pata yabara pelivaisi

²⁵ Itsamonae Jerusalén tomarata pejinavanapaevi najumaitsi Jesús
yabara:

—¿Matsa ponë apo jaitarutsitsi pebeyaxuabinexatsije?

²⁶ ¡Pataema! Bajaraponë cuaicuaijai tsanucae daxitajivi pitabarata. Itsi-
ata itsajivi ata apo jumeitavetsi. Vajanacaevetsivi ata meta jumecovënëta
bajaraponë pepacuene Dioso athëbëvetsica pitorobijavatsitsica jivi peca-
panepaenexa. Bajaraxuata bajarapamonae apo jumeitavetsi.

²⁷ Vaxaitsi cajena yapëtanetsi itsaverena pata maponëje. Nexata acuenebi
pijacuata: “Cristonë raja,” pejaijava. Tsipaji Cristo yabara tajëvelia jumaitsi
mapacueniaje: “Itsajivi ata apo yapëtae tsane itsaverena patsijitsia Cristo,”
jai, najai Jerusalén tomarapijivi Jesús yabara.

²⁸ Nexata Jesús livaisi petsipaebijavata templobota, jumetane bajarapa-
monae pebaracuaicuaijajavatsi. Nexata Jesús ayaijumeta jumaitsi bajara-
pamonaejavabelia:

—Xanë yabara pajumaitsimë: “Yapëtanetsi bajaraponë. Yapëtanetsinua
itsaverena pata bajaraponë,” pajamë. Itsiata baitsi jane apo patsinë taja-
matabëcueneta. Biji rajane taneitorobinëtsica ponapona athëbëtatsia. Pax-
amë cajena apo payapëtaemë bajaraponë.

²⁹ Xanë yapëtaniji bajaraponë. Tsipaji athëbëvetsica tapatsinë. Bajaraponë
baja cajena nitorobica mapanacuayabetsicaje, jai Jesús bajarapamonaejav-
abelia.

³⁰ Nexata picani Jesús bajarapamonae jamatabëvaetabatsi penaneconitsi-
aexanaenexatsi. Itsiata abaxë itsajivi ata apo vaetabitsi. Tsipaji abaxë Jesús
apo tocopiapatsitsi pijamatacabipi pevaetabinexatsi.

³¹ Itsiata baitsi jane bajarapamonaeayajuvënëvi yaubitsaëto jumecovënëta
Cristocuene. Nexata bajarapamonae najumaitsi:

—Itsa pina Cristo patsianica, Dioso pesaëta pinijicuene pexanaejava ex-
anaena. Bajara maponë pepacuene Cristoje, ponë Dioso athëbëvetsica itoro-
bijitsiatsica jivi pecapanepaenexa. Tsipaji nacatsitajëta pesaë. Pinijicuene
pexanaejava exana Dioso pesaëta. Tsipaji cajena itsanë ata mapanacuata
apo caëjëpaetsi bajarapitsipinijicuene pexanaenexa, najai bajarapamonae
Jesús yabara.

Pacuenia fariseovi itoroba policíavi Jesús pevaetabinexatsi yabara pelivaisi

³² Fariseovi jumetane jivi pejumaitisijava: “Pepacuenen rabaja maponë Cristoje,” pejajjava Jesús yabara. Nexata fariseovibeje judíovi penamat-acaitorobivibeje najamatabëcuenejëpabeje pitorobinexa policíavi. Nexata policíavi pona templobojavavelia pevaetabinexatsi picani Jesús. Itsiata abaxë Jesús apo vaetabitsi.

³³ Jesús nexata templobota jumaitis judíovijavavelia:

—Abaxë raja bajayapo itsiata pacayajavaponaponaenatsi. Bajaraxuacujinae jane baja naviatsianiajë taneitorobinëtsicajavabetsia.

³⁴ Paxamë picani panejaitisiane. Itsiata apo panecaxitajarabimë tsane. Tspiji apo pacacajëpae tsane paneponaenexa itsabetsia ponaejitsianë, jai Jesús judíovijavavelia.

³⁵ Nexata judíovi nayanijoba ëpamonae.

—¿De tsaeta belia maponë pijaponaejitsiaje peponaenexa, itsajota vaxaitsi apo caxitajarabijitsiatsi? Ponaejitsia raeta griegovu pijatomaranëjavavelia, itsavelia judíovi jinavanapa. Griegovu raeta livaisi tsipaebijitsia Jesús.

³⁶ Jesús nacajumaitis: “Paxamë picani panejaitisiane. Itsiata apo panecaxitajarabimë tsane. Tspiji apo pacacajëpae tsane paneponaenexa itsabetsia ponaejitsianë,” nacajai. ¿De tsaeta pitsijamatabëcuene yabara bajarapacuenia Jesús nacajumaitis? najai judíovi.

Apo pevereverecaemera yabara pelivaisi

³⁷ Pafestamatacabi judíovi bobërëtonë exanabiaba, pecopiarucaematacabi, jivi bitso najamatabëcueneruviabiaya bajinavanapa. Nexata bajarapamatacabi jivi ayaibitsaëto pitabarata Jesús nonotabapuna. Ayaijumeta Jesús jumai tsanucae:

—Pajivi mera jitsipa, xanëjavaberena pona piapaenexa.

³⁸ Dioso pejumelivaisibaxutota jumaitis mapacueniaje: “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparucaemera. Baitis bajarapajivi asivaya taeyabiabiana itsamonae ata. Nexata jamatabëcuenyavenonabiabiana itsamonae ata tane-sivanajamatabëcuene copatsinexa, bajarapamonae ata pexainaenexa matacabi apo pevereverecaejava,” jai Jesús judíovijavavelia.

³⁹ “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparucaemera,” itsa jai Jesús, jumaitis Espíritu Santo yabara. Baitis pajivi jumecovënëta Jesús petsipaebilivaisi, tsijamatabëcaenatsi Espíritu Santo. Itsiata baitis jane abaxë Espíritu Santo apo patsitsica. Tspiji abaxë Jesús apo ponaë athëbëabetsia.

Pacuenia daxitajivi Jesús yabara apo najamatabëcuenejëpae yabara pelivaisi

⁴⁰ “Pajivi nesivanajamatabëcopatsiana, bajarapajivi pejamatabëëthëtota xainaena daxitamatacabi pepitsaparucaemera,” pejajjava Jesús, jivi itsa jumetane, itsamonae jumaitis:

—Xaniajai rabaja. Maponë Diosojumepaëbinë profetanëje, ponë copiaevetavanapatsi pepatsijavanexatsica, jai bajarapamonae.

⁴¹ Itsamonae pijinia jumaitis:

—Jume raja. Bajara maponë Cristoje, ponë Dioso athëbëvetsica itorobijitsiatsica jivi pecapanepaenexa, jai itsamonae.

Itsiata itsamonae jumaitis:

—¡Apo Cristo raja! Tspiji Cristo Galilea nacuaverena apo patsi tsipae.

⁴² Dioso baja cajena pejumelivaisibaxutota jumaitsi pacuenia Davidpijinē pemomoxiyajuvēnēnē naexanaejitsia Cristo. Bajaraponē peneta naexanaena Belén tomarata, patomarata Davidpijinē bajayata ponapona, jai bajarapamonae.

⁴³ Bajarapacuenia nexata jivi ayaibitsaēto apo najamatabēcuenejēpae Jesús yabara.

⁴⁴ Itsamonae picani Jesús jamatabēvaetabatsi penaneconitsiaexanaenexatsi. Itsiata itsajivi ata apo vaetabitsi.

Pacuenia Jesús yabara judíovi pevetsivi apo jumecovēnētsi Cristonēcuene yabara pelivaisi

⁴⁵ Papoliciavi picani fariseovibeje judíovi penamatacaitorobivibeje itorobalia Jesús pevaetabinexatsi, itsiata apo vaetabitsi. Naviabalia baja cobesa. Nexata fariseovibeje judíovi penamatacaitorobivibeje jumaitsi policiavijavabelia Jesús yabara:

—¿Detsa xuajitsia apo pacaponaemērena bajaraponē? jai fariseovibeje judíovi penamatacaitorobivibeje.

⁴⁶ Nexata policiavi jumaitsi:

—Bajaraponē Dioso pitorobicueniatsi, xaniavaetsia jivi livaisi tsipaeba, itsajivi ata apo pepaebicuenia. Bajaraxuata apo pavaetabinē patacaponaenexarena, jai policiavi.

⁴⁷ Nexata fariseovi jumaitsi:

—¿Paxamē ata tsabaja pacayamaxēitojoroba bajaraponē?

⁴⁸ Caenē ata vajanacaevetsiviyajuvēnēnē, fariseoviyajuvēnēnē ata, apo jumecovēnētsi baja cajena bajaraponē Cristonēcuene.

⁴⁹ Pamonae jumecovēnēta bajaraponē Cristonēcuene, apo yapētae pacuenia bajayata Dioso Moiséspijinēta penajumecopatsilivaisi jumaitsi jivi pejumecovēnētsinexa. Nexata bajarapamonae apo pepapētaexae bajarapalivaisi, naneconita Diosojavabelia. Nexata Dioso naneconitsiaexanaenatsi, jai fariseovi policiavijavabelia Jesús Cristonēcuene pejumecovēnētsivi yabara.

⁵⁰ Nicodemo, ponē copiaya Jesús taeyojopalia meravī, bajaraponē naeca bajarajota. Bajaraponē Nicodemo fariseoviyajuvēnēnē. Nicodemo nexata jumaitsi pevēna fariseovijavabelia:

⁵¹ —Vajalivaisi cajena nacaitaveta itsajivi ata vajananeconitsiaexanaeyaniva, abaxē copiaya xaniavaetsia navajunupaebinejeva paneconi xaina bajarapajivi, jai Nicodemo.

⁵² Nexata bajarapamonae jumaitsi Nicodemojavabelia:

—¿Xamē ata tsabaja Galilea nacuapijinēmē necajumecovēnētsi bajaraponē Cristonēcuene? Lebare Dioso pejumelivaisibaxuto. Yapētaename pacuenia jumaitsi. Caenē ata cajena Diosojumepaebinē profeta apo patsi Galilea nacujavaverena, jai bajarapamonae.

Petiriva pibisiacuene pexanaeva pamona pepēya yabara pelivaisi

⁵³ Fariseovibeje judíovi penamatacaitorobivibeje pebijataecujinae policiavi, fariseovi baja caenē canacujitsia naviaba pijabonējavabelia.

8

¹ Jesús pona Olivovēnē tsojavabelia.

² Nexata meravia pitsijavata, bajayacunua, Jesús icatsia naviarena temploboyaberena. Nexata daxitajivi itaxutuanacaetuanatsi. Nexata Jesús ecojopa templobota. Livaisi tsipaeba bajarapamonaejavabelia.

³ Nexata temploboyaberena judíovi pecujarubivi, fariseovi yajava, carenta petiriva Jesúsjavaberena. Bajarapamonae petiriva vaetaba pamona pepëya itsanëjavabelia pevitota pibisiacuene pexanaponaponaejavata. Nexata petiriva nutatsi daxitajivi pitabarata.

⁴ Nexata judíovi pecujarubivi, fariseovi yajava, jumaiti Jesúsjavabelia:
—Jesús, mara povaje pavaetabajë pamona pepëya itsanëjavabelia pibisiacuene pexanaponaponaejavata.

⁵ Dioso Moiséspijinëta penajumecopatsilivaisi nacaitoroba baja cajena vajatseconaenexa ibotonëta bajarapitsiva vajabeyaxuabinexa bajarapacuenia. ¿Detsa paitsinë tsane mapovaje? jai bajarapamonae Jesúsjavabelia.

⁶ Bajarapamonae jumaiti bajarapacuenia Jesús saya pejamatabëcuenejëtsinexatsi. Nexata Dioso Moiséspijinëta penajumecopatsilivaisivecua, saicayacuenia, Jesús itsa jumecanaviata, bajarapamonae neconitsijitsiatsi picani. Itsiata Jesús jamatabëcueneyapëthane pacuenia bajarapamonae sivanajamatabëxainatsi. Nexata Jesús ira taeyecaxuaba. Pecobësitota ira yaquineca.

⁷ Bajarapamonae bitso yanijobapona Jesúsjavabelia. Nexata jane baja Jesús nonotapuna. Jumaiti bajarapamonaejavabelia:

—Ponë paxamëyajuvënëne pibisiacuene apo pexanaenë, bajaraponë copiata iboto bixanae bajarapovajavabelia, jai Jesús.

⁸ Nexata icatsia Jesús ecareca. Ira taeyeca icatsia. Ira yaquineca icatsia.

⁹ Nexata bajarapamonae itsa jumentane bajarapacuenia Jesús pejumaitisijava, bajarapamonae namatabënapita, caenë canacujitsia, pibisiacuene pexanavanapaejava. Nexata bajarapamonae, caenë canacujitsia, templobovecua pitsapapona. Copiava perujuvi pitsapa. Bajaraxuacujinae pevëjëavi pitsapa. Itsa baja daxita pitsapa, caenë Jesús templobota nacopecta petiriva yajava. Bajarapova abaxë nuca bajarajota.

¹⁰ Nexata Jesús itsa nonotapuna, caeva taenuta. Nexata Jesús jumaiti petirivajavabelia:

—¿Detsa belia pona pamona caneconita picani? ¿Itsanë ata tsaja apo cabixanae ibotota nijaneconi yabara pecananeconitsiaexanaenexa? jai Jesús petirivajavabelia.

¹¹ Nexata bajarapova jumaiti:

—Jume raja. Caenë ata apo nebixanae ibotota, jai bajarapova.

Nexata Jesús jumaiti:

—Xanë ata apo cananeconitsiaexanaetsi. Ponare baja. Pëtsa baja icatsia pibisiacuene exaname, jai Jesús bajarapovajavabelia.

Jesús mapanacuapijivije pexaniajailivaisita pejamatabëcueneitayotsinë yabara pelivaisi

¹² Jesús icatsia templobota jumaiti jivijavabelia:

—Xanë raja pexaniajailivaisita daxitanacuapijivi jamatabëcueneitayotsianajë. Pajivi nepënaponaena, bajarapajivi jamatabëcueneitayotsianajë. Nexata xainaena matababi apo peverevere-caejava. Bajarapajivi itsamatababijavabelia ata apo ajamatabëcueneitaquiri tsane, jai Jesús jivijavabelia.

¹³ Nexata fariseovi jumaiti Jesúsjavabelia:

—Xamë saya nijacuata namatabëcuenelivaisipaebame. Nexata apo payapëtaenë nexaniajaicuene. Bajaraxuata apo pacajumecovënëtsitsi, jai fariseovi.

¹⁴ Jesús nexata jumaiti fariseovijavabelia:

—Najamatabëcuenelivaisipaebi atanë tajacuata, itsiata cajena xaniajanë. Tspají xanë yapëtaniji itsaverena patajê. Itsabelia ata ponaejitsianë, yapëtaniji. Itsiata paxamë apo payapëtaemë itsaverena patajê. Itsabelia ata ponaejitsianë, apo payapëtaemë.

15 Paxamë paexanabiabame pacuenia baexana mapanacuapijivije. Itaxutojema jivi pananeconitsiaexanabiabame payapëtaenejevamë pepacuenepaneconivajêto xaina. Xanë abaxë apo naneconitsiaexanaenë itsajivi ata.

16 Itsiata itsamatacabi, itsa naneconitsiaexanaenajê Diosojavabelia pijaneconi pexainaevi, naneconitsiaexanaenajê paneconivajêtota xaina. Tspají caenë apo naneconitsiaexanaenë tsane. Taxa Dioso, ponë nitorobica, bajaraponë neyajava tsane jivi tananeconitsiaexanaematacabi.

17 Dioso Moiséspijinêta penajumecopatsilivaisi peyaquinaebaxutota jumaitsi mapacueniaje: “Palivaisi anijajivibeje najumejêpaeya paebabeje, bajarapalivaisi bepajumecovënêtame,” jai.

18 Xanë baja cajena najamatabëcuenelivaisipaebajê. Taxa ata, ponë nitorobica, nevajunupaeba. Nexata baja panijanênêbeje najumejêpaeya pacatsipaebatsibeje xanë talivaisi, jai Jesús fariseovijavabelia.

19 Nexata fariseovi jumaitsi:

—¿Detsa jota nexata ponapona axa? jai.

Nexata Jesús jumaitsi fariseovijavabelia:

—Paxamë ra cajena apo paneyapëtaemë. Taxa ata apo payapëtaemë. Itsa paneyapëtaejitsipame, nexata taxa ata payapëtaejitsipame, jai Jesús fariseovijavabelia.

20 Bajarapacuenia Jesús jumaitsi livaisi petsipaebijavata templobota. Itsajota ofrendacuenia palata pejebabiabicajonianë bobena, bajarajota Jesús livaisi tsipaebanuca. Itsiata abaxë itsajivi ata Jesús apo vaetabitsi pananeconitsiaexanaenexatsi. Tspají abaxë pijamatacabi apo tocopiapatitsi pevaetabinexatsi.

Pacuenia Jesús tajêvelia jumaitsi: “Paxamë apo pacacaëjêpae tsane paneponaenexa itsabelia ponaejitsianë,” jai yabara pelivaisi

21 Jesús icatsia templobota tajêvelia jumaitsi fariseovijavabelia:

—Xanë pacavecuaponaenatsi. Nexata paxamë panejaitsianame. Paxamë pibisiacuenepaneexanaeneconi, Dioso apo pacavecuajibiaexanae tsane. Nexata panijaneconi payajavatêpaename. Bajaraxuata paxamë apo pacacaëjêpae tsane paneponaenexa itsabelia ponaejitsianë, jai Jesús fariseovijavabelia.

22 Nexata judíovi jamatabëcuenenavëxaniabiaya najumaitsi Jesús yabara:

—Covë nabeyaxuabijitsia. Bajaraxuata nacajumaitsi: “Apo pacacaëjêpae tsane paxamë paneponaenexa itsabelia ponaejitsianë,” nacajai, najai judíovi.

23 Nexata Jesús jumaitsi judíovijavabelia:

—Paxamë baja cajena mapanacuapijivimêje. Xanë saicaya athëbëvetsica tapatsinë. Paxamë mapanacuata panejinavanapaevije. Xanë raja maapo panacuapijinênêje.

24 Bajaraxuata pacajumaitsi: “Paxamë pibisiacuenepaneexanaeneconi, Dioso apo pacavecuajibiaexanae tsane. Nexata panijaneconi payajavatêpaename,” pacajaitsi. Nexata paxamë panijaneconi payajavatêpaename itsa apo panejumecovënêtsimë patacavecuajibiaexanaejavanexa pibisiacuenepaneexanaeneconi, jai Jesús fariseovijavabelia.

25 Nexata fariseovi jumaitsi Jesúsjavabelia:

—¿Detsa xamē ponēmē? jai.

Jesús nexata jumaitsi:

—Pacanavajunupaebatsi rabaja. Tataxuxuabijavaveliacujinae livaisi patcatsipaebijava, pacanavajunupaebaponatsi baja cajena.

26 Paxamē bitso pibisiacuene paexanabiabame. Nexata ayailivaisi xainajē itsamonaejavabelia patacavajunupaebinexa pibisiacuene paneexanaejava. Nexata pibisiacuene paneexanaēneconi yabara, necaējēpa picani patacananeconitsiaexanaenexa. Itsiata baitsi jane ponē nitorobica, petsipaebinē pexaniajailivaisi. Pacuenia bajaraponē netsipaeba xanējavaberena, bajarapacuenia juya xanē tsipaebajē mapanacuapijivijavabeliaje, jai Jesús fariseovijavabelia.

27 Itsiata baitsi jane fariseovi apo jumeyapētae bajarapacuenia Jesús petsipaebijava paxa Dioso yabara.

28 Bajaraxuata Jesús jumaitsi bajarapamonaejavabelia:

—Itsa xanē, Daxitajivi Pematapijinēnē, paneyotarutsiaexanaename cruzajavabelia patanebeyaxuabiaexanaenamē, nexata matapania bajarapamatacabi paneyapētaename ponēcuenenē. Nexata bajarapamat-acabi payapētaenamenua patacatsipaebijava apo tajamatabēcuenepijilivaisi. Biji rajane pacuenia taxa copiata netsipaeba, bajarapacuenia juya patcatsipaebatsi paxamējavabelia.

29 Taxa, ponē nitorobica, neyjavaponapona baja cajena. Tajaepato apo neponaponaeyaexanae. Tsipaji exanabiabajē pacuene yabara taxa nesivajamatabēcuenebarēyajitsia, jai Jesús bajarapamonaejavabelia.

30 Itsa Jesús jumaitsi bajarapacuenia, ayaibitsaētoxaneto judíovi jumecovēnētatsi Cristonēcuene: “Xaniajai cajena. Maponēje Dioso itorobicatsi,” jamatabējai judíovi Jesús yabara.

Dioso pexi yabara pelivaisi, dovathi ata pexi yabara pelivaisi

31 Pajudíovi jumecovēnēta Cristonēcuene, bajarapajudíovijavabelia Jesús jumaitsi:

—Itsa paxamē tsiteca pajumecovēnētavanapaename patacatsipaebilivaisi, nexata baja pepacuene patajajivimē tsane.

32 Nexata palivaisi pacatsipaebatsi, payapētaename baja pexaniajailivaisicuene. Nexata baja itsa payapētaename bajarapapexaniajailivaisi, pacopabianame baja itsanē papecaitorobicuenia panetoexanabiabijavami, jai Jesús bajarapajudíovijavabelia.

33 Nexata pajudíovi apo jumecovēnētatsi Cristonēcuene, jumaitsi Jesúsjavabelia:

—Paxanē rabaja cajena Abrahampijinē papemomoxinē. Paxanē dajubicuena apo panecanajetsi itsanējavabelia amoneya patatonacuenebabibinexa. “Pacopabianame baja itsanē papecaitorobicuenia panetoexanabiabijavami,” itsa panejamē, ¿detsa pitsilivaisi yabara panejumaitsimē? jai Jesúsjavabelia pajudíovi apo jumecovēnētatsi Cristonēcuene.

34 Jesús nexata jumaitsi bajarapajudíovijavabelia:

—Xaniajanē pacuenia pacatsipaebijitsiatsi. Daxita pamonaē pibisiacuene pexanaevi, jamatabēcueneitorobiababatsi dovathi pejamatabēcueneta.

35 Ponē itsanē pijajivitonē naexana, bajaraponē itsiata pijatuxanenē apo pexiyajuvēnēnē. Ponē petuxanenē pexiyajuvēnēnē, daxitamatacabijavabelianexa petuxanenē pexēnato tsaponaponaē.

³⁶ Nexata pijinia xanë, Dioso pexënatonë, itsa copiarucaeyaexanaenajë dovathi papecaitorobabiabijavami, copiarucaeyaexanaenajë daxitamatabijavabelianexa. Nexata baja dovathi apo pacaitorobabiabi tsane matavëjëa pibisiacuene paneaxanaenexa.

³⁷ Yapëtaniji cajena Abrahampijinë papemomoxicuenemë. Itsiata baitsi jane jamatabëpanebeyaxuabame. Tsipaji apo panejumecovënëtsimë patacatsi-paebilivaisi.

³⁸ Xanë rabaja pacuenia taxa netsitajëta, jivi tsipaebabiabajë. Paxamë ata paexanabiabame pacuenia paneaxajivi pacaitoroba, jai Jesús judíovijavabelia.

³⁹ Nexata judíovi jumaitsi:

—Pataxajivi baja cajena pexaniajamatabëcuenevi. Abrahampijinë rabaja cajena patamopijinëmi, patajasalinainëmi, jai judíovi.

Jesús nexata jumaitsi bajarapamonaejavabelia:

—Itsa pepacuene paxamë Abrahampijinë papemomoximë tsipae, paexanaejitsipame peneta pacuenia exanabiaba Abrahampijinëmi.

⁴⁰ Pacatsipaebi atatsi pexaniajailivaisi, pacuenia taxa Dioso netsipaeba, itsiata paxamë jamatabëpanebeyaxuabame. ¡Abrahampijinë cajena caeto ata apo exanae bajarapitsicuene!

⁴¹ Paxamë paexanabiabame pacuenia itsanë paneaxa pacaitorobabiaba, jai Jesús judíovijavabelia dovathi yabara.

Nexata judíovi jumaitsi:

—Paxanë cajena mapanacuataje pataenajivi apo panenacoxitsi itsanëjavabelia pataxajivivecua pibisiacuene pexanaecujinae. Paxainajë caenë pataxa, athëbëpijinë. Pataxa rabaja Dioso, jai bajarapamonae.

⁴² Nexata Jesús jumaitsi bajarapamonaejavabelia:

—Itsa pepacuene Dioso paneaxa tsipae, nexata paxamë asivaya panetaejitsipame. Tsipaji Diosojavavetsica tapatsinë. Majotaja nonaponajë. Xanë raja saya tajamatabëcueneta apo patsinëtsica. Dioso raja nitorobica.

⁴³ ¿Detsa xuajitsia paxamë apo panejumeyapëtaemë patacatsipaebilivaisi? Apo pajitsipaemë patanenamuxunaevetsinexamë bajarapalivaisi.

⁴⁴ Paxamë rabaja cajena paneaxa dovathi. Papijajivimë. Pejitsipacuena jamatabëpatoexanabiabame. Dovathi rabaja cajena jivibenë Dioso nacua pexanaejava petaxuxuabijavaveliacujinae. Pexaniajailivaisi apo najamatabëxainae. Caeto ata cajena pexaniajailivaisi apo paebi. Itsa najumetsënëta, bajaraponë pijacujiru baja cajena. Tsipaji penajumetsënëtsinë. Jivi ata najumetsënëtsiaexanabiaba.

⁴⁵ Xanë baja cajena pexaniajailivaisi pacatsipaebatsi. Itsiata apo panejumecovënëtsimë.

⁴⁶ ¿Jipatsa paxamëyajuvenënë netane pibisiacuene taexanaejava? Ajibi cajena. Itsacuenejavayo ata, xua pibisiacuene, apo exanaenë. Pexaniajailivaisi pacatsipaebabiabi atatsi, ¿detsa xuajitsia itsiata apo panejumecovënëtsimë?

⁴⁷ Pajivi Dioso pijajivitonë, bajarapajivi namuxunaeveta Dioso pejumelivaisi. Itsiata baitsi jane paxamë Dioso apo papijajivimë. Bajaraxuata apo pajitsipaemë patanenamuxunaevetsinexamë Dioso pejumelivaisi, jai Jesús judíovijavabelia.

Pacuenia Cristo, ponë Dioso itorobica, ponapona baja cajena Abrahampijinë pevajënaeya ata yabara pelivaisi

⁴⁸ Judíovi jumaitsi Jesúsjavabelia:

—Paxanē itsa pacajumaitsitsi: “Xamē raja Samaria nacuapijinēmē, dovathi neyjavaponaponanē,” itsa pacajaitsi, paxaniajanē cajena, jai judíovi Jesúsjavabelia.

49 Jesús nexata jumaitsi judíovijavabelia:

—Xanē cajena dovathi apo yjavaponaponanē. Xanē taxa Dioso yaiyataeya ponaponajē. Itsiata paxamē apo paneyaiyataemē.

50 Xanē raja xua exanaponajē, apo exanaenē jivi saya taneyaiyataenexa. Itsiata baitsi jane taxa netojitsipa jivi taneyaiyataenexa. Bajaraponē naneconitsiaexanaena pamonaē apo neyaiyatae.

51 Xaniajanē pacuenia pacatsipaebijitsiatsi. Pajivi jumecovēnētsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatabijavabelianexa. Nexata xainaena matabi apo pevereverecejava, jai Jesús judíovijavabelia.

52 Nexata judíovi jumaitsi:

—Aeconoxae pepacuenē dovathi pecayjavaponaponaejava, payapētaniji. Tspaji Abrahampijinēmi tēpa. Daxita Diosojumepaebivimi profetavi ata, tēpa. Itsiata xamē jumaitsimē tsaponae: “Pajivi jumecovēnētsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatabijavabelianexa,” jamē tsaponae.

53 Vamopijinēmi Abrahampijinē, ayaijamatābēcuenenēmi ata, bajayata tēpa. Daxita Diosojumepaebivimi profetavi ata tēpa. ¿Xamē tsaja Abrahampijinēmi matatoxenetsia beayaijamatābēcuenenēmē nataneme? ¿Detsa beponēmē nataneme? jai judíovi.

54 Jesús nexata jumaitsi judíovijavabelia:

—Itsa xanē tajacuata najumaitšinē tsipae: “Xanē bitso ayaijamatābēcuenenēnē,” itsa janē tsipae, nexata ajumematamobinē tsipae. Itsiata baitsi jane taxa Dioso, ponē yabara paxamē ata: “PatajaDioso raja,” pajamē, bajaraponē neyaiyatane.

55 Itsiata paxamē apo payapētaemē bajaraponē. Xanē cajena yapētaniji. Nexata xanē Dioso yapētae atanē, itsa yavajunuaxainaejitsipajē, “Apo yapētaenē cajena bajaraponē,” itsa janē tsipae Dioso yabara, najumetsēnētsipajē pacuenia paxamē panajumetsēnētābiabame. Itsiata xanē pepacuenē Dioso yapētaniji. Jumecovēnētājēnua pacuenia Dioso nitorobabiaba.

56 Bajayata Abrahampijinē panijasalinainēmi jamatabēcuenēbarēya. Tspaji tajēvelia yapētane mapanacuayabetsicaje tapatsijavanexatsica. Nexata Abrahampijinēmi nesivajamatābēcuenēbarēya baja cajena, jai Jesús judíovijavabelia.

57 Nexata judíovi jumaitsi Jesúsjavabelia:

—Abaxē raja xamē apo xainaemē cincuenta pavaibeje ata. ¿Detsa pacuenia nexata taejitsipame Abrahampijinē? Abrahampijinē baja cajena pepo bajayatami tēpa, jai judíovi Jesúsjavabelia jumeaebiaya.

58 Jesús nexata jumaitsi judíovijavabelia:

—Xaniajanē pacuenia pacatsipaebijitsiatsi. Xanē raja cajena ponaponajē Abrahampijinē pevājēnaeya ata, jai Jesús judíovijavabelia.

59 Nexata bajarapacuenia Jesús itsa jumaitsi judíovijavabelia, judíovi nota ibotonē. Tseconaejitsiatsi picani Jesús ibotonēta. Itsiata baitsi jane Jesús namatayatsia pitsapa templovecua bajarapamonae petuatuajēalia. Jesús baja nexata judíovi itsajavabelia vecuapona.

9

Pacuenia Jesús itaxutoxanepanaeyaexana ecēnaenē yabara pelivaisi

¹ Jesús najetaruca namutua. Nexata tane penaexanaejavaveliacujinae bitso pitaxutotsēcēnaenē.

² Nexata Jesús pijajivi jumaitsi Jesúsjavabelia:

—Patajatuxanenē, ¿detsa meta xuajitsia maponē naexana bitso pitaxutotsēcēnaenēje? ¿Paxa tsaeta pibisiacuene pexanaejamatabēcuene? Itsa jume, ¿pena tsaeta pibisiacuene pexanaejamatabēcuene maponē itaxutotsēcēnaje? Itsa jume, ¿baja tsaeta ponē pijacuata pibisiacuene natoexana? jai Jesús pijajivi.

³ Jesús nexata jumaitsi pijajivijavabelia:

—Jume raja. Mara ponēje paxa, pena ata, pibisiacuene pexanaejamatabēcuene, apo itaxutotsēcēnaeje. Naexana bitso pitaxutotsēcēnaenē saya daxitajivi petaenexatsi Dioso icatsia pitaxutoxanepanaeyaexanaejavatsi.

⁴ Payapētaneme rabaja mapacueneje. Maticabita xanepana vajanacuenebinexa. Itsa baja meravi, acuenebi vajanacuenebinexa. Bajara pijinia itsinē xanē ata. Taponaponaematacabi xanepana tatonacuenebinexa ponē nitorobica. Itsa pamatacabi nebexuabiana, acuenebi tsane tatonacuenebinexa.

⁵ Abaxē paepatojebi ponaponaenajē mapanacuataje, daxitajivi jamatabēcueneitayotsianajē pexaniajailivaisita, jai Jesús pijajivijavabelia.

⁶ Bajarapacuenia Jesús pejumaitsicujinae irabelia suabaxuaba. Peionitota tsorobojavayo exana. Nexata itaxutoexaba bitso pitaxutotsēcēnaenē.

⁷ Nexata Jesús jumaitsi bitso pitaxutotsēcēnaenējavabelia:

—Ponare baja. Naitaxutoquiaremelia pecueyetsipucayojavabelia, Siloévēnē pucayojavabelia, jai Jesús.

“Siloé,” itsa jai bajarapamonae pijajumeta, mapajumeta pejumaitsijume: “Pitorobinētsitsica,” pejaijume.

Nexata bitso pitaxutotsēcēnaenē lia baja. Naitaxutoquiatojopalia. Naviarena baja pitaxutoxanepanaenē.

⁸ Nexata itsajota ponapona bitso pitaxutotsēcēnaenēmi, imoxoyo penaevi, pamonaeta taeyabiabatsi, daxita bajarapamonae nayanijoba.

—¿Matsa ponē palata amoneya pevajēcabiabeaenēmije? najai bajarapamonae.

⁹ Nexata itsamonae jumaitsi:

—Jājā, bajara covē ponē, jai.

Itsiata itsamonae jumaitsi:

—Apo ponē raja. Bajara saya itsiata beponē, jai.

Nexata pitaxutotsēcēnaenēmi pijacuata jumaitsi:

—Jājā, xanē rabaja, jai bajaraponē.

¹⁰ Nexata bajarapamonae jumaitsi pitaxutotsēcēnaenēmijavabelia:

—¿Detsa nexata pacuenia taneme baja? jai.

¹¹ Nexata pitaxutotsēcēnaenēmi jumaitsi:

—Ponē raja Jesúsvenēnē, exana tsorobojavayo. Nitaxutoexaba. Nexata nejumaitsi: “Liamēre pecueyetsipucayojavabelia, Siloévēnē pucayojavabelia. Naitaxutoquiaremelia,” nejai Jesús. Nexata baja lianē. Itsa naitaxutoquiatajē bajarapapucayota, taniji baja, jai pitaxutotsēcēnaenēmi.

¹² Nexata bajarapamonae jumaitsi:

—¿Detsa jota bajaraponē ponapona? jai.

Nexata icatsia pitaxutotsēcēnaenēmi jumaitsi:

—Apo yapētaenē itsajota ponapona, jai.

Pacuenia bitso pitaxutotsēcēnaenēmi caponaliatsi fariseovijavabelia peyanijobinexatsi yabara pelivaisi

¹³ Pitaxutotsēcēnaenēmi pitaxutoxanepanaejava jivi itsa tane, yanijobatsi peyapētaenexa pacuenia itaxutoxanepana. Pamonaē yanijobaponatsi, bajarapamonaē pitaxutotsēcēnaenēmi caponaliatsi fariseovijavabelia.

¹⁴ Pamatacabi Jesús exana tsorobojavayo pitaxutoxanepanaeayaexanaenexa bitso pitaxutotsēcēnaenēmi, bajarapamatacabi judíovi penacueraevetsimatacabi.

¹⁵ Nexata jane baja fariseovi yanijoba pitaxutotsēcēnaenēmijavabelia.

—¿Detsa pacuenia nexata itaxutoxanepaname? jai fariseovi.

Nexata pitaxutotsēcēnaenēmi jumaitsi:

—Nitaxutoexaba raja tsorobojavayota. Bajaraxuacujinae naitaxutoquiatajē. Nexata aeconoxae taniji baja, jai pitaxutotsēcēnaenēmi fariseovijavabelia.

¹⁶ Nexata fariseovi najumaitsi:

—Ponē bajarapacuene exana, Dioso apo pitorobinētsi cajena. Tsipaji apo yaiyatae penacueraevetsimatacabi, najai fariseovi.

Itsiata bajarapamonaeyajuvēnēvi itsamonaē najumaitsi:

—Itsa pibisiacuene pexanaenē tsipae, apo caējēpae tsipaetsi bajarapitsipinijicuene pexanaenexa, najai itsamonaē.

Nexata daxita fariseovi apo najamatabēcuenejēpae.

¹⁷ Nexata icatsia fariseovi yanijoba pitaxutotsēcēnaenēmijavabelia.

—¿Detsa jane xamē bejamatabēitsimē ponē caitaxutoxanepanaeayaexana yabara? jai fariseovi.

Nexata pitaxutotsēcēnaenēmi jumaitsi:

—Bajaraponē cajena Diosojumepaebinē profeta, jai.

¹⁸ Judíovi apo jumexaniatae pitaxutoxanepanaeayaexanaejavatsi yabara. Nexata bajarapamonaē junata pitaxutotsēcēnaenēmi paxa, pena yajava.

¹⁹ Judíovi jane baja yanijoba pitaxutotsēcēnaenēmi paxabeje penabejējavabelia. Jumaitsi:

—¿Baja tsa maponē panexēnatobejeje, ponē penaexanaejavaveliacujinae pitaxutotsēcēnaenēmije? ¿Detsa pacuenia aeconoxae baja tane? jai judíovi.

²⁰ Nexata pitaxutotsēcēnaenēmi paxabeje penabeje jumaitsibeje:

—Maponēje pataxēnatobeje payapētanijibeje cajena. Payapētanijibejenua penaexanaejavaveliacujinae pitaxutotsēcēnaejava.

²¹ Itsiata baitsi jane aeconoxae apo payapētaenēbeje pacuenia baja itaxutoxanepana. Apo payapētaenēbejenua ponē itaxutoxanepanaeayaexanatsi. Bajaraponē taxēnato payanijobare. Penaveretsinē rabaja. Pijacuata pacatsipaebiana, jai pitaxutotsēcēnaenēmi paxabeje penabeje judíovijavabelia.

²² Judíovi baja cajena najamatabēcuenejēpa pevājēnaeitavetsinexa penajoneyaniva judíovi penacatuatabibibojavaberena pajivi jumaitsi: “Jesús rabaja cajena Cristo, ponē Dioso athēbēvetsica itorobijitsiatsica jivi pecapanepaenexa,” pejaijivi. Bajaraxuata pitaxutotsēcēnaenēmi paxabeje penabeje bajarapacuenia jumecanaviatabeje pecujanavixaebeje judíovi.

²³ Bajaraxuata bajarapajivibeje jumaitsibeje: “Taxēnatojavabelia payanijobare. Penaveretsinē rabaja,” jaiibeje.

²⁴ Nexata judíovi icatsia junata pitaxutotsēcēnaenēmi. Jumaitsi bajaraponējavabelia:

—Panetsipaebare xaniavaetsia Dioso pitabarata. Paxanë baja cajena payapëtaniji bajaraponë pibisiacuene pexanaenëcuene, jai judíovi Jesús yabara.

²⁵ Nexata pitaxutotsëcënaenëmi jumaitsi:

—Pibisiacuene meta pexanaenë. Xanë apo yapëtaenë. Itsiata baitsi jane nitaxutoxanepanaeyaexana taitaxutotsëcënaenëmi, jai pitaxutotsëcënaenëmi.

²⁶ Nexata icatsia judíovi jumaitsi:

—¿Detsa pacuenia catoexana netaenexa? jai judíovi.

²⁷ Nexata pitaxutotsëcënaenëmi jumaitsi judíovijavabelia:

—Pacatsipaebatsi rabaja picani xaniavaetsia. Itsiata apo panejume-covënëtsimë. ¿Detsa xuajitsia pajitsipame patacatsipaebaponaenexa icatsia? ¿Paxamë ata tsaja pajitsipame panejume-covënëtsinexa bajaraponë papija-jivinxamë? jai pitaxutotsëcënaenëmi judíovijavabelia.

²⁸ Nexata judíovi bijatanetsi pitaxutotsëcënaenëmi. Jumaitsitsi:

—Xamë raeta baja cajena bajaraponë pijajivitonëmë. Paxanë raja saicaya Moiséspijinë petsipaebilivaisi pajumecovënëtanapajë.

²⁹ Paxanë baja cajena payapëtaniji pepacuene Dioso pebarëcuaicuajijavatsi Moiséspijinë. Itsiata baitsi jane ponë cabarëcuaicuajiai, apo payapëtaenë itsaverena pata, jai judíovi.

³⁰ Nexata pitaxutotsëcënaenëmi jumaitsi judíovijavabelia:

—¿Detsa xuajitsia nitaxutoxanepanaeyaexanae ata, apo payapëtaemë itsaverena pata bajaraponë?

³¹ Yapëtanetsi baja cajena mapacueneje. Diosojavabelia vajëtsi ata pamonae pibisiacuene pexanaevi, Dioso baja cajena apo namuxunaevetsi. Dioso baja cajena banamuxunaveta itsa vajëtatsi pejitsipaecuenia yaiy-ataeya petojinavanapaveitsi.

³² Caeto ata mapanacuapijivi apo vënëlivaisitaetsi ponë caëjëpatsi pitaxutoxanepanaeyaexanaenexa penaexanaejavaveliacujinae bitso pitaxutotsëcënaenë.

³³ Peneta bajaraponë itsa apo patsi tsipae Diosojavavetsica, nexata apo caëjëpaetsi tsipae pexanaenexa Dioso pesaëta pinijicuene pexanaejava, jai pitaxutotsëcënaenëmi judíovijavabelia.

³⁴ Nexata judíovi jumaitsi:

—Xamë cajena pibisiacuene exaname nenaexanaejavaveliacujinae. ¿Itsiata tsaja caranata pibisiacuene nexanaenë jamatabëpanemuxujiobame? jai judíovi pitaxutotsëcënaenëmijavabelia.

Nexata torotajarabaxuabatsi judíovi penacaetuatabiabibo pevecuapit-sapaenexa.

Pacuenia Dioso apo pejumecovënëtsivi jamatabëcueneaitaquiri tsavanapae yabara pelivaisi

³⁵ Jesús vënëlivaisitane pitaxutoxanepanaeyaexanaenë judíovi petorobarababijavatsi judíovi penacaetuatabiabibo pevecuapitsapaenexa. Nexata Jesús itsa caxitajaraba pitaxutoxanepanaeyaexanaenë, Jesús jumaitsi pitaxutoxanepanaeya exanaenëjavabelia:

—¿Najamatabëcopatame tsabaja Dioso pexënatovjavelia? nayabarajai Jesús.

³⁶ Nexata ponë Jesús itaxutoxanepanaeyaexana, jumaitsi:

—¿Detsa ponë Dioso pexënato tanajamatabëcopatsinexa bajaraponëjavabelia? jai.

³⁷ Jesús nexata pijacuata nayabarajumaitsi:

—Ponë rabaja cabarëcuaicuajiai, Dioso rabaja pexënato, nayabarajai Jesús.

³⁸ Nexata ponë Jesús itaxutoxanepanaeyaexana, pematatabacabëta nuca Jesús pitabarata. Jumaitsi Jesúsjavabelia:

—Tajatusanenë, casivanajamatabëcopatatsi baja cajena, jai.

³⁹ Nexata Jesús jumaitsi pitaxutoxanepanaeya exanaenëjavabelia:

—Xanë patajë mapanacuayabetsicaje jivi penayapëtaenexa pijaneconi pexaniaejava. Nexata pamonaë pexaniajailivaisi tatsipaebijavata najamatabëcueneyapëtaena piamatababëcuenetaquirijava, bajarapamonae jamatabëcuenetayotsianajë pexaniajailivaisita. Pamonaë jemajai. Apo yapëtae ata pexaniajailivaisi, jamatabëjumaitsi: “Vaxaitsi rabaja yapëtanetsi pexaniajailivaisi,” jamatabëjai, bajarapamonae apo jamatabëcuenetayotsinë tsane, jai Jesús.

⁴⁰ Nexata fariseovi, bajarajota penubenaevi, jumetane bajarapacuenia Jesús pejumaisijava. Nexata fariseovi jumaitsi Jesúsjavabelia.

—¿Paxanë ata tsabaja pajamatabëcuenetaquirinë tsavanapae? jai.

⁴¹ Jesús nexata jumaitsi fariseovijavabelia:

—Jājā, bitso pajamatabëcuenetaquirimë tsavanapae. Tsipaji jamatabëcuenenavëxaniabiaya pajamatabëjumaisimë tsabiabi: “Vaxaitsi rabaja jumecovënëtsi Dioso,” pajamatabëjamë tsabiabi. Nexata Dioso pejumelivaisi payapëtae atamë, itsiata pibisiacuene paexanabiabame. Nexata bitso pananeconitame Diosojavabelia. Paxamë Dioso pejumelivaisi apo paneyapëtaexae, itsa pajamatabëcuenetaquirimë tsipae, nexata bitso apo pananeconitsimë tsipae Diosojavabelia, jai Jesús fariseovijavabelia.

10

Oveja pecajoneyabiabicalcorral yabara pelivaisi

¹ Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Oveja pecajoneyabiabicalcorral enëabelia saicayanë pejonenexa, apo jone corral baupajava. Junaya saya peyenepanatsia pejonexalia. Bajaraponë penacobetoxotsinëxexa oveja.

² Ponë peneta joneya corral baupayalia, bajaraponë cajena oveja pevetsinë.

³ Nexata corral baupa pevetsinë tobaupatatatsi pijaoveja pecapitsapaenexa. Itsa baja pijaoveja capitsapa corralvecua, pijaoveja jumeyapëtanetsi. Tsipaji junataponä pijaoveja caenë canacujitsia pevënëta.

⁴ Pecapitsapaecujinae daxita pijaoveja, bajaraponë oveja pevajënaeya namataxainanajetaruca. Nexata pijaoveja pënaponatsi. Tsipaji jumeyapëtanetsi pijaoveja.

⁵ Oveja apo pënaponaë tsipae saicayanë. Tsipaji apo jumeyapëtae. Vecuarëcëpecaejitsipa saya, nayabarájai Jesús fariseovijavabelia.

⁶ Bajarapacuenia Jesús oveja pevetsinëcuenia nataeya comparacióncuenia nalivaisipaeba fariseovijavabelia. Itsiata fariseovi apo jumeyapëtaetsi Jesús comparacióncuenia penalivaisipaebijava.

Pacuenia Jesús xaniavaetsia eveta pijajivi yabara pelivaisi

⁷ Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Pacuenia oveja junua corral baupajava, pepanepaenexa corral enëaberena, bajara xanë itsinë jivi pejonexa xanëjava, pepanepaenexa Dioso pijatomarabetsia.

⁸ Itsamonae xanë tavajënaeya penajumetsënëtsilivaisi jivi tsipaebapona. Bajarapamonae oveja bepenacobetoxotsivi. Jamatabëneyacajërëta tajajivi. Itsiata baitsi jane tajajivi apo jumecovënëtsi bajarapamonae.

⁹ Xanë rabaja cajena baupanë. Pajivi nesivanajamatabëcopatsiana, jona xanëjava pepatsinexa Dioso pijatomarabetsia. Bajarapajivi capanepaenatsi Diosojavabelia. Pijaoveja xaniavaetsia pevetsinë, caebajayacunua canacujitsia capitsapa corralvecua oveja pexaëjava pejaitsinexa. Icatsia caecaniviyo canacujitsia cajunua corraljavaberena. Bajara pijinia pacuenia xanë ata xaniavaetsia evetsianajë pajivi nesivanajamatabëcopatsiana, jai Jesús fariseovijavabelia.

¹⁰ Icatsia Jesús jumaitsi fariseovijavabelia:

—Penacobetoxotsinë bapata oveja penacobetoxotsinexa, pebeyaxuababinexanua. Bajarapacuenia oveja peveretaponaenexa bapata. Bajara pijinia jamatabëcueneitsi pamonaepata penajumetsënësilivaisi jivi petsipae-baponaenexa. Itsiata baitsi jane xanë patajopaicajë mapanacuayabetsicaje xanë tajamatabëcueneta jivi pexainaenexa matakabi apo pevereverecaëjava, bitso jamatabëcuenebarëyaya pejinavanapenexanua.

¹¹ Pacuenia itsi xaniavaetsia pevetsinë pijaoveja, bajara pijinia xanë itsinë taevetsinexa tajajivi. Xaniavaetsia pevetsinë pijaoveja jamatabëjumaitsi: “Itsanë netobeyaxuabijitsia ata tsane tajaoveja, apo copatsinë tsane tanetoyajuvënëbeyaxuabianiva tajaoveja. Nexata xanë tajaoveja yapijivinacaevetsianajë tanebeyaxuabinexa,” jamatabëjai. Bajara pijinia xanë ata jamatabëitsinë tajajivi yabara.

¹² Itsiata ponë saya toevetsipa itsanë pijaoveja, bajaraponë apo xainae tsipae bajarapaovejabitsaëto. Saya toevetaponaponaëjitsipa pematamotsinexatsi. Nexata nevëthë oveja itsa tsimaxënëjatarucaejitsipa, bajaraponë xuabatabajiravijitsipa ovejabitsaëto. Nexata oveja nevëthë itsa yajuvënëvaetabijitsipatsi, nacayajatecaejitsipa ovejabitsaëto.

¹³ Oveja pevetsinë najetabajiravijitsipa. Tsipaji saya pematamotsinexatsi nacuenabaponaponaëjitsipa. Nexata apo jamatabëbëjai tsipae oveja yabara, jai Jesús fariseovijavabelia.

¹⁴⁻¹⁵ Icatsia Jesús jumaitsi:

—Pacuenia itsi xaniavaetsia pevetsinë pijaoveja, bajara pijinia itsinë xanë ata taevetsinexa tajajivi, pamonaë taniji beovejacuenia. Pacuenia taxa neyapëtane, bajara pijinia pacuenia xanë ata yapëtaniji taxa. Pacuenia pijinia xaniavaetsia yapëtaniji tajajivi, bajara pijinia pacuenia tajajivi ata neyapëtane. Xanë sivatëpaenajë tajajivi.

¹⁶ Xainajë baja itsabitsaëto tajajivi. Itsiata abaxë bajarapamonae apo yajavajinavanapae mapabitsaëtojavataje. Itsiata itsamatakabi capatsianajë bajarapamonae mapabitsaëtojavaberenaje. Nexata daxita bajarapamonae nejumecovënëtsiana taitorobicuenia. Caebitsaëtoخانeto jane baja tajajivi netonaexanaena. Bajarapamonae xanë caenënë evetsianajë, jai Jesús.

¹⁷ Icatsia Jesús jumaitsi:

—Taxa niasiva. Tsipaji tajajivi yabara nacaevetsianajë tanebeyaxuabinexa. Itsiata icatsia tatëpaecujinae asaënë tsane.

¹⁸ Itsa apo nacaevetsinë tsipae tanebeyaxuabinexa, itsajivi ata apo caëjëpaetsi tsipae tanebeyaxuabinexa. Itsiata tajacuata nacaevetsianajë tanebeyaxuabinexa. Necaëjëpa tatëpaenexa. Necaëjëpanua icatsia tasaënexa tatëpaecujinae. Bajarapacuenia taxa netocopata, jai Jesús.

¹⁹ Judíovi itsa jumetane bajarapacuenia Jesús pejumaitsijava, judíovi apo najamatabëcuenejëpae.

²⁰ Judíovi ayaibitsaëto najumaitsi Jesús yabara:

—Dovathi raja bajaraponë yajavaponaponatsi. Matajemabatsi ra saya. ¿Detsa xuajitsia bajaraponë panamuxunaevetame? najai bajarapamonae.

21 Itsiata bajarapamonaeyajuvēnēvi itsamonae najumaitsi:

—Ponē dovathi yajavaponaponatsi, apo caējēpaetsi tsipae cajena pecuaicuaijainexa mapacueniaje. Apo caējēpaetsinua tsipae pitaxutoxanepanaeyaexanaenexa bitso pitaxutotsēcēnaenēmi, najai bajarapamonaeyajuvēnēvi Jesús yabara.

Pacuenia Jesús judíovi navecuaitavetatsi yabara pelivaisi

22 Emarapaeta Jerusalén tomarata fiesta exana. Bajarapafiesta exana judíovi penajamatabēnapitsinexa bajayata judíovi pijasalinaivi templobo pexanebetsijava.

23 Nexata pamatacabi fiesta exana, Jesús ponapona bajarapatemplobojavata, Portal de Salomónvēnējavata.

24 Nexata Jesús judíovi matatoyorotsia nacaetuatatsi. Judíovi jumaitsi Jesúsjavabelia:

—Apo payapētaenē pacuenia panajamatabēxainaejitsianē xamē yabara. ¿Detsa pacujinae paneyapētaeyaexanaename patacayapētaenexa pepacuene ponēmē? Itsa pepacuene Cristomē, Dioso athēbēvetsica pecaitorobinētsica jivi necapanepaenexa, panetsipaebare cajena rovalia, jai judíovi.

25 Jesús nexata jumaitsi judíovijavabelia:

—Pacatsipaebatsi rabaja picani rovalia. Itsiata apo panejumecovēnētšimē. Taxa Dioso pesaēta pinijicuene exanajē. Bajara papinijicuene exanajē taxa taneitorobicuenia. Nexata itsa exanajē bajarapapinijicuene, pacatsitaexanatsi picani taxa taneitorobicuene.

26 Itsiata baitsi jane apo panejumecovēnētšimē Cristonēcuenenē. Tsipaji paxamē apo patajajivimē.

27 Tajajivi, pamonaē taniji beovejacuenia, bajarapamonaē nejumeyapētane. Bajarapamonaē pijinia yapētaniji. Nexata nepēnapona.

28 Bajarapamonaē rajutsianajē matacabi apo peverevereaejava. Bajara-pamonaē taxa Diosovecua apo naxuabi tsanē. Itsajivi ata apo neyacajērētsi tsane tajajivi.

29 Taxa bja cajena ayaijamatabēcuenenē daxitajivi matatoxenetsia. Bjaraponē nerajuta bajarapamonaē. Nexata itsajivi ata apo caējēpaetsi tsane taxa pecobevecua pepitsinexa bajarapamonaē.

30 Taxa, xanē, caenē rabaja panaexanajēbeje, jai Jesús judíovijavabelia.

31 Nexata picani bajarajota judíovi jamatabēbeyaxuabatsi Jesús. Judíovi nota ibotonē Jesús picani petseconaenexatsi ibotonēta.

32 Jesús nexata jumaitsi judíovijavabelia:

—Ayajava pexaniacuene taxa Dioso pesaēta exanaponajē paxamē paneitabarata. ¿Detsa nexata pitsineconi yabara panetseconaejitsiamē ibotonēta? jai Jesús judíovijavabelia.

33 Judíovi nexata jumaitsi:

—Pexaniacuene raja nexanaejava yabara apo pacatseconaejitsiatsi. Pacatseconaejitsiatsi raja nenaneconitsixae Diosojavabelia. Tsipaji pibisiacuēnia, Dioso apo pejitsipaecuēnia, cuaicuaijamē. Xamē saya jivitonē atamē, beDiosonēmē nataneme, jai judíovi Jesúsjavabelia.

34 Jesús nexata jumaitsi judíovijavabelia:

—Dioso pejumaisijava, Dioso pejumelivaisibaxutota jumaitsi mapacueniaje: “Paxamē ata rabaja padiosovimē,” jai Dioso pejumelivaisibaxutota Dioso pejumecovēnētšivi yabara.

³⁵ Nexata Dioso pejumelivaisibaxutota bajarapacuenia itsa jumaitsi Dioso pejumecovënëtsivi yabara, acuenebi bajarapamonae yabara vajaju-maitsinexa: “Bajarapamonae apo diosovi,” vajajainexa.

³⁶ Dioso cajena nitapeta. Nexata nitorobica mapanacuayabetsicaje. ¿Detsa nexata xuajitsia panejumaitsimë: “Xanë raja naneconitame Diosojavabelia. Pibisiacuenia cuaicuaijamë Dioso apo pejitsipaecuenia. Tsipaji jumaitsimë: ‘Xanë raja Dioso pexënatonë,’ jamë,” panejamë.

³⁷ Itsa apo exanaenë tsipae pacuenia taxa nitoroba, nexata acuenebi tsipae patanesivanajamatabëcopatsinexamë.

³⁸ Itsiata baitsi jane exanaponajë pacuenia taxa nitoroba. Nexata apo panesivanajamatabëcopatsi atamë, itsiata bepajumecovënëtame Dioso pesaëta taexanaejava, pacuene baja exanaponajë. Itsa pajumecovënëtsianame bajarapacuenie Dioso pesaëta taexanaponaejava, nexata payapëtaename taxa Dioso tanejayavaponaponaejava. Payapëtaenamenua xanë ata pininia taxa Dioso tayajavaponaponaejava, jai Jesús judíovijavabelia.

³⁹ Bajarapacuenia Jesús jumaitsi ata, itsiata judíovi jamatabëvaetabatsi penaneconitsiaexanaenexatsi. Itsiata Jesús vecuapanepa.

⁴⁰ Nexata Jesús navialia Jordánmene itsapanabelia, panacuatalia copiaya Juanpijinë jivi bautisababiaba. Bajarajotalia Jesús ponapona.

⁴¹ Jivi ayaibitsaëtoxaneto ponalia petaenexatsi Jesús. Nexata bajarapamonae jumaitsi:

—Juanpijinë Dioso pesaëta pinijicuene apo exanaponae ata, itsiata daxita pacuenia tajëvelia vajunupaeba maponë yabaraje, xaniajai cajena, jai bajarapamonae Jesús yabara.

⁴² Nexata jane baja bajarajota jivi ayaibitsaëtoxaneto jumecovënëta Jesús Dioso athëbëvetsica pitorobinëcuenetsi.

11

Pacuenia baja Lázaro tēpa yabara pelivaisi

¹ Lázaro, Betania tomarapijinë, avitane tsanucae Betania tomarata. Bajara-patomarata ponaponabeje pematapijivabeje, Mariabeje Martabeje.

² Bajarapova María itsamatacabi Jesús tsitaxuepanaena petuxujuvira. Daxitarayomi tsitaxuepanaena. Bajaraxuacujinae bajarapova pematánata taxuiquicaenanua.

³ Nexata pamatacabi Lázaro avitane tsanucae, Mariabeje Martabeje tonajumeitorobaliabeje Jesús. Jumaitsibeje:

—Tajatuxanenë, niasivanë raja Lázaro catovitane, jaiabeje.

⁴ Jesús itsa jumetane bajarapovabeje petonajumeitorobijumetsi, nexata Jesús jumaitsi pijajivijavabelia:

—Mapavitane taja Lázaro apo tēpae tsane daxitamatacabijavabelianexa. Biji rajane bajarapavitane pejamatabëcueneta jivi yapëtaena Dioso pinijicuene pexanaenëxa pecaëjēpaenëcuenetsi. Yapëtaenanua xanë ata, Dioso pexënatonë, pinijicuene taexanaenëxa tanecaëjēpaenëcuenë, jai Jesús pijajivijavabelia.

⁵ Jesús bitso asivaya taeyabiaba Martabana, Mariabana, Lázarobana.

⁶ Jesús vënëlvaisitae ata Lázaro bitso piavitanejava, itsiata abaxë apo ponae Betania tomarabelia. Anijamatacabibeje abaxë ponapona Jordánmene itsapanatalia.

⁷ Bajaraxuacujinae Jesús jumaitsi pijajivijavabelia:

—Ponaliatsi icatsia Judea nacuyabelia, jai Jesús.

⁸ Jesús nexata pijajivi jumaitsi:

—Patajatuxanenē, canivita saya judíovi bajarajotalia jamatabēcatsecona picani ibotonēta. ¿Itsiata tsabaja icatsia ponaeliatsi bajarabelia? jai pijajivi.

⁹ Jesús nexata jumaitsi pijajivijavabelia:

—Matacabi raja xaina doce pahorabeje. Nexata pajivi matabacaba ponapona, apo firapecae. Tsipaji icotiata napebeta xaniavaetsia.

¹⁰ Itsiata pajivi meravi ponapona, firapecae. Tsipaji meravi apo napebetsi xaniavaetsia. Bajara pijinia xanē ata itsinē. Ponae ata tsanetsi Betania tomarabelia, itsiata apo nitsacueniabi tsane. Tsipaji abaxē tajamatacabi apo netocopiapatsi, jai Jesús pijajivijavabelia petēpaejavanexa yabara.

¹¹ Bajaraxuacujinae Jesús peponaevajēnae jumaitsi pijajivijavabelia:

—Vajayapētaenē rabaja Lázaro majitanuca. Nexata baja ponajē. Itavabijitsianē Lázaro, jai Jesús.

¹² Nexata pijajivi jumaitsi:

—Patajatuxanenē, itsa raeta saya Lázaro majitanuca, itsiata jamatejema tsane, jai Jesús pijajivi.

¹³ “Vajayapētaenē rabaja Lázaro majitanuca,” itsa jai Jesús, Jesús picani pejumaitsijume, “Lázaro rabaja tēpa,” pejaijume. Itsiata Jesús pijajivi apo jumeyapētaetsi. Bajarapamonae Jesús pijajivi jamatabēcuenenavēxaniabiaya jamatabējumaitsi: “Lázaro meta saya majitanuca pacuenia majitanucabiaba meravi,” jamatabējai.

¹⁴ Bajaraxuata nexata Jesús rovalia jumaitsi pijajivijavabelia:

—Lázaro rabaja tēpa.

¹⁵ Paepatota Lázaro tēpa, bajarajotalia apo ponaponaenē. Bajaraxuata barēyanē paxamē yabara. Barēyanē tsipaji Lázaro petēpaexae, xaniavaetsia panejumecovēnētsianame. Baja nexata ponatsi, jai Jesús pijajivijavabelia.

¹⁶ Jesús pijajiviyajuvēnēnē, Tomás, ponē icatsia itsavēnē vēnērubatsi Sapalanē. Bajaraponē jumaitsi penajuaponaevijavabelia:

—Naponatsi Jesús pepēta. Ibotonēta itsa tseconatsi, vajayajavatēpaenexa bajaraponē, jai Tomás.

Pacuenia Jesús caējēpatsi petēpaevi ata icatsia piasaēyaxanaenexa yabara pelivaisi

¹⁷ Pepuaxinae baja cuatro pamatacabibeje Lázaropijinē pemēthētsicujinaetsi, Jesús matapania patajopa Betania tomarata.

¹⁸ Betaniamara eca imoxoyo Jerusalén tomaravecuca. Bejamatabēcuene anijakilómetrobeje epatua navecuacabeje bajarapatomarabeje.

¹⁹ Jesús pepatsivajēnaeya Betania tomarata, ayaibitsaētoxaneto judíovi pata Martabeje Maríabejevaberena Lázaro petēpaexae. Bajarapamonae jumaitsi bajarapovabejevabelia:

—Paxanē itsiata pacayanabatsi. Panajamatabēxainajē paxanē ata pavecavecuatēpaexabeje panejuyapijinēbeje, Lázaro, jai bajarapamonae.

²⁰ Itsa Marta vēnēlivaisitane Jesús penajetarucaejava, pitsapa pijabovecuca pemataenenaenexa Jesús. María itsiata bota nacopateca.

²¹ Nexata Marta itsa mataenenatsi Jesús, Marta jumaitsi Jesúsjavabelia:

—Tajatuxanenē, itsa majota ponaponaejitsipameje, apo tēpae tsipae tajuyapijinē.

²² Itsiata yapētaniji aeconoxae ata Dioso carajutsiana daxita pacuene vajētame Diosojavabelia, jai Marta.

²³ Nexata Jesús jumaitsi Martajavabelia:

–Nejuyapijinë raja itsiata icatsia asaë tsaponaponae tsane, jai Jesús.

²⁴ Nexata Marta apo jumeyapëtae Jesús piasaëyaexanaejavanexa Lázaro. Bajaraxuata Marta jumaiti Jesúsjavabelia mapacueniaje:

–Yapëtaniji rabaja pacuenia icatsia Lázaro Dioso asaëyaexanaejitsiatsi pamatacabita icatsia asaëyaexanaenatsi daxita petëpaevimi, jai Marta.

²⁵ Nexata Jesús jumaiti Martajavabelia:

–Xanë rabaja petëpaevi ata icatsia tasaëyaexanaenë, tarajutsinë matacabi apo pevereverecejava. Pajivi nejumecovënëtsiana Cristonëcuenenë, bajarapajivi tēpae ata, itsiata icatsia asaë tsane.

²⁶ Pajivi abaxë pamatacabi asaë tsaponaponae mapanacuataje, itsa nejumecovënëtsiana Cristonëcuenenë, bajarapajivi tēpae ata, xainaena matacabi apo pevereverecejava. ¿Xamë tsabaja bajarapalivaisi jumecovënëtame? jai Jesús Martajavabelia.

²⁷ Marta nexata jumaiti:

–Tajatuxanenë, jumecovënëtajë rabaja. Xamë rabaja cajena Cristomë, Dioso pexënatomë, ponë pacopiaevetavanapajë athëbëvetsica pepatsijavanexatsica mapanacuayabetsicaje jivi pecapanepaenexa, jai Marta.

Pacuenia Jesús vënu Lázaro pemëthëjavata yabara pelivaisi

²⁸ Itsa baja Marta najumelivaisivereta bajarapalivaisi, naviata pijaboyabelia pejunatsinexa pejuyapijiva María. Nexata Marta muetsia jumaiti Marijajavabelia:

–Vajanacacujarubinë rabaja pata. Cajunalia raja bajaraponë, jai Marta.

²⁹ Caejumetae María Jesús pejunatsijavatsilia, nonotabapuna. Pona Jesúsjavabelia petaenexa.

³⁰ Jesús abaxë apo patsi Betania tomaraberena. Ecojopa abaxë itsajotalia Marta mataenenatsi.

³¹ Pajudíovi bajarapovabeje pijabota pata peyanabinexatsibeje Lázaro petëpaexae, bajarapamonae tane María penonotabapunaejava bepijia pepit-satabijavalia bovecua. Nexata bajarapamonae María pënaponatsi. Tsipaji bajarapamonae jamatabëjumaiti:

–María raeta pejuyapijinëmi pemëthëjavabelia pona pemataneyabinexa, jamatabëjai:

³² Itsa María palia, itsajotalia Jesús ecojopa, nexata María pematabacabëta nucajunua Jesús pitabarata. Jumaiti:

–Tajatuxanenë, itsa majota ponaponaejitsipameje, apo tēpae tsipae tajuyapijinë Lázaro, jai María Jesúsjavabelia.

³³ Jesús itsa tane María penueyaxuabijava, judíovi ata María peyajavapat-sivi penuejava itsa tane, Jesús nexata bitso najamatabëxainaxuaba.

³⁴ Nexata Jesús jumaiti bajarapamonaejavabelia:

–¿Detsa jota pamëthëtame Lázaro? jai Jesús.

Nexata bajarapamonae jumaiti Jesúsjavabelia:

–Naxanitsia. Taename itsajota pamëthëtajë Lázaro, jai.

³⁵ Jesús nexata vënu Lázaro.

³⁶ Nexata judíovi najumaiti:

–Pataema Jesús penuejava. Jesús picani bitso asiva petëpaenëmi, najai judíovi.

³⁷ Itsamonae judíovi najumaiti Jesús yabara:

—Mara ponëje itaxutoxaniavaeta bitso pitaxutotsëcënaenëmi ataje xaniavaetsia petaenexa. ¿Apo caëjëpaetsi tsamëra tsipae Lázaro pijinë pejamatejemaayaexanaenexa petëpaeyaniva? najai bajarapamonae.

Pacuenia Lázaro petëpaecujinae Jesús icatsia asaëyaexana yabara pelivaisi

³⁸ Jesús bitso sivanajamatabëxaina Lázaro pijinë. Nexata Jesús cujilia Lázaro pijinë pemëthëtsiibovajutsijavabelia. Iboanaxanetota Lázaro yamëthëvëpa acatabuatatsi.

³⁹ Jesús nexata jumaitsi bajarajota penapatsivijavabelia:

—Pavecuatixiremëlia mapaibopanaxanetoje, jai Jesús.

Nexata Marta, petëpaenë pematapijiva, jumaitsi:

—Tajatuxanenë, tuxutsaeba raeta baja bitso Lázaro. Tsipaji rabaja petëpaecujinae, ajena baja cuatro pamatacabibeje xaina, jai Marta Jesúsjavabelia.

⁴⁰ Jesús nexata jumaitsi Martajavabelia:

—Catsipaebatsi rabaja pacuenia taejitsiamë Dioso ayaicuene pexanaejava itsa jumecovënëtamë Dioso, jai Jesús.

⁴¹ Nexata bajarapamonae Lázaro pijinë pemëthëvëpavecuata tixilia ibopanaxaneto. Jesús itaboxo naëcotsiaya jumaitsi:

—Taxa, pexaniajamatabëcuene carajutatsi tanejumetaexaemë.

⁴² Yapëtaniji cajena tanenamuxunaevetabiabijavamë. Itsiata icatsia cavajëtatsi mapamonaeje ayaibitsaëtoxaneto pejumecovënëtsinexa taneitorobinëcuenemëtsica, jai Jesús Diosojavabelia.

⁴³ Bajarapacuenia Jesús pejumaitsicujinae, ayaijumeta jumaitsi Lázaro pebuatsiibovajutsijavabelia:

—¡Lázaro, bajara jane mëthëvecua pitsaparemena! jai Jesús.

⁴⁴ Nexata baja Lázaro petëpaenëmi pitsaparena mëthëvecua. Piapiasábanata daxitanëreca mataquionaeya pematacacëbicujinaetsireca abaxë, pitsaparena. Pitabaraacatsipapaëbërëpanatsi abaxë tsiteca itabaraacatatsi. Jesús nexata jumaitsi bajarapamonaejavabelia:

—Pavecuaisinare bajarapana. Pacopare peponaenexa pijaboyabelia, jai Jesús.

Pacuenia picani Jesús pijavajabitsaë jamatabëvaetabatsi yabara pelivaisi (Mt 26.1-5; Mr 14.1-2; Lc 22.1-2)

⁴⁵ Judíovi, pamonae María yanabatsi, tane Lázaro petëpaenëmi Jesús piasaëyaexanaejava. Nexata bajarapamonaeayajuvënëvi ayaibitsaëto jumecovënëta Jesús Dioso pexënatocuene.

⁴⁶ Itsiata itsamonae bajarapamonaeayajuvënëvi pona fariseovijavabelia. Nexata tsipaeba pacuenia Jesús Lázaro petëpaenëmi asaëyaexana.

⁴⁷ Nexata fariseovi, sacerdotevi penamatacaitorobivi yajava, nacaetuata. Nexata bajarapamonae junata penacaetuatsinexa judíovi pijaancianovi, judíovi pecujarubivi ata yajava. Nexata bajarapamonae najumaitsi:

—¿Detsa meta vaxaitsi itsanetsi? Bajaraponë Dioso pesaëta pinijicuene pexanaejava exanapona.

⁴⁸ Itsa vaxaitsi cuenecopatsipatsi bajarapacueni pexanaponaejava, daxitajivi jumecovënëtaponaëjitsipa bajaraponë. Apo jumecovënëtsi tsipae Romanonacua pevetsivi. Nexata Romanonacua pevetsivi anaepanaëjitsipa. Itorobijitsiparena pijajivi, vajabitsaë. Nexata vajabitsaë itsa patsiparena, vajatemplöbo nacatöxabijitsipaica. Nacaverebiabijitsipanua, najai bajarapamonae.

49 Bajarapamonaeyajuvënënë pevënë Caifás. Bajarapamatacabi bajaronë Caifás, sacerdotevi pepo penamatacaitorobinë tsaponaponae. Nexata Caifás jumaiti penajuanacaetuatsivijavabelia:

—Paxamë raja apo payapëtaemë.

50 Nexata Romanonacua pevetsivi vajabitsaë itsa itorobarena, vajanacaverebiabiyaniya, bepanajamatabëxainame mapacueniaje. Bajaronë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane, jai Caifás Jesús yabara.

51 Itsiata baiti jane Caifás apo jumaiti bajarapacuenia pijacuata penajamatabëxainaecuenia. Biji rajane bajarapamatacabi Caifás daxita sacerdotevi pepo penamatacaitorobinëxae, Dioso bajarapacuenia jumaitsiayaexanatsi. Bajarapacuenia Caifás tajëvelia jumaiti tsipaji Jesús sivatëpaejitsia daxita judíovi.

52 Itsiata Jesús apo sivatëpae tsane ëjudíovi. Daxitanacuanëjava, pamonaenacayajataruta Dioso pexi, bajarapamonaenata pecaetuatsinexa, sivatëpaena Jesús.

53 Bajarapacuenia bajara pamatacabijavaveliacujinae cajena judíovi pevetsivi najamatabëveretapona pacuenia bajarapamonaenata Jesús beyaxuabijitsiatsi.

54 Bajaraxuata Jesús apo ponabiabi baja itsabelia judíovi nacaetuatabiaba. Nexata Judea nacuavecua pitsapa. Jesús baja nexata pona petusatonacua imoxoyojavabelia, Efraínvënë tomarajavabelia. Nexata bajarapatomarata Jesús ponapona pijajivi yajava.

55 Imoxoyo baja pevajënae judíovi pijafiesta pejonematacabinexa, pascuavënëfiesta. Nexata jivi ayaibitsaëtöxaneto pona Jerusalén tomarabelia. Pona pexanaenexa pacuenia exanabiaba fiestavajënaeya penajamatabëcuene xaniavaetsinexa Diosojavabelia. Bajarapamonaenata naropoba tsiquiritomaraxijavaverena.

56 Nexata bajarapamonaenata jaitarutatsi Jesús. Itsa bajarapamonaenata nacaetutata templobota, nayanijoba. Najumaiti:

—¿Detsa xamë jamatabëitsimë? ¿Jesús tsamëra patsiana mapafiestajavaje? Jume. Apo patsi tsamëra tsane, najai ëpamonaenata.

57 Nexata fariseovibeje sacerdotevi penamatacaitorobivibeje najumecopata jivijavabelia petonaitaxutocavetsinexatsi Jesús. Nexata pajivi yapëtane itsajota Jesús ponapona, petsipaebinexa bajarapamonaenjavabelia. Nexata fariseovibeje sacerdotevi penamatacaitorobivibeje itsa yapëtane itsajota Jesús ponapona, pevaetabinexatsi Jesús penaneconitsiaexanaenexatsi.

12

Pacuenia Jesús petiriva tsitaxuepanatsi petuxujuviaceitera yabara pelivaisi

(Mt 26.6-13; Mr 14.3-9)

1 Pejonenexa baja pascuavënëfiesta, saica seis pamatacabibeje. Nexata bajarapamatacabi Jesús baja pona Betania tomarabelia. Bajaratomarata ponapona Lázaro, ponë Jesús asaëyaexana petëpaenëmi.

2 Bajarajota Jesús pexaejava toexanatsi caniviyopijijava. Bajarajota Marta pexaejava tsanaponapona. Lázaro nanabaneca pamesata Jesús nabaneca.

³ Nexata María carena epatuabotellabëyota petuxujuviaceitera, nar-dovënëra. Bajarapora bitso penamatamotsira. Nexata bajarapaaceitera María tsitaxuepana Jesús. Bajaraxuacujinae icatsia pematnata taxuiquica. Daxita bo tuatuajë tuxudereecaruta.

⁴ Nexata Jesús pijajiviyajuvënë, Judas Iscariote, Simón pexënato, ponë itsamatacabi Jesús canajetsijitsiatsi pijavajabitsaë pecobeyabelia, jumaitsi:

⁵ —¿Detsa xuajitsia apo canajetsi bajarapatuxujuvira. Matamopitsipa trescientos denario. Bajarapapalata rajutsipa bepejiobivi bajarapacuenia peyavenonaenexa, jai Judas Iscariote.

⁶ Itsiata bajarapacuenia Judas apo jumaitsi pesivanajamatabëxainaxae bepejiobivi. Judas raja penacobetoxotsinë. Jesús bana pijapalatadoro pevetsixanaenëxaetsi, Judas nacobetoxotabiaba bajarapapalatayajuvënëjava.

⁷ Nexata Jesús jumaitsi Judasjavabelia petiriva yabara:

—Copare bajarapova xanëjavaberena pexanaenexa bajarapacuenia. Itsamonae petëpaejivi batsiperabëepana petuxujuviaceitera peper-abëxaniavaetsinexa pemëthëtsivajënae. Bajara pijinia pacuenia mapovaje xaniavaeta bajarapora tanetsiperabëepanaenexa, apo tëpae atanë, taneperabëxaniavaetsinexa itsamonae tanemëthëtsivajënae. Tsipaji baja imoxoyo tavajënae tanemëthëtsinexa.

⁸ Daxitamatacabi raja bepejiobivi jinavanapa itsaxuayo pajinavanapame paneyavenonaenexa. Itsiata baitsi jane xanë daxitamatacabi apo ponapon-aenë tsane paxamëjavata, jai Jesús Judasjavabelia.

Pacuenia judíovi najamatabëxaina pebeyaxuabinexatsi Lázaro yabara peliv-aisi

⁹ Ayaibitsaëtoخانeto judíovi vënëlivaisitanetsi Jesús pepatsijava Betania tomarata. Judíovi nexata ponalia Betania tomarabelia petaenexatsi Jesús. Itsiata bajarapamonae apo ponaelia petaenexa ë Jesús. Ponalia petaenexanua Lázaro, ponë Jesús asaëyaexana, petëpaenëmi.

¹⁰ Nexata sacerdotevi penamatacaitorobivi daxita baja sivanajamatabëjëpa pebeyaxuabinexatsi Lázaro, Jesús yajava.

¹¹ Bajarapamonae najamatabëjëpa pebeyaxuabinexatsi Lázaro. Tsipaji judíovi ayaibitsaëto natsanapona sacerdotevivecua petaexae Lázaro piasaëtsaponaponaenexa petëpaecujinae. Nexata bajarapajudíovi jumecovënëtapona Jesús Dioso pexënatocuene.

Pacuenia Jesús pata Jerusalén tomarata yabara pelivaisi (Mt 21.1-11; Mr 11.1-11; Lc 19.28-40)

¹² Jivi ayaibitsaëtoخانeto pata Jerusalén tomarata pascuafiesta petaenexa. Nexata bajarapamonae Jesús vënëlivaisitanetsi pepatsijavanexa Jerusalén tomarata. Jesús naropota Betania tomaraverena.

¹³ Nexata bajarapamonae Jesús pevajënae baxuucubaba benaxarebobax-utonë. Bajarapamonae pona baja pecopiapitsinexa Jesús. Itsa panamu-toverena Jesús najetaruca, bajarapanamutuabelia bajarapamonae pona. Itsa baja bajarapamonae Jesús copiapita, bajarapamonae vavajai tsabuat-aponae.

—¡Dioso yavenonaenatsi! ¡Maponë najetarucaje, vajatuxanenë peja-matabëcueneta najetaruca Israel nacupijivi pepo pevetsinënexa! jai tsana-jetarubena bajarapamonae Jesús yabara.

14 Nexata Jesús caxitajarabaxuaba burro. Bajarapaburro Jesús jumaponatsi pepatsinexa Jerusalén tomarata. Jesús burrojumata pepatana-jetarucaejavanexa Jerusalén tomarata, Dioso pejumelivaisibaxutota tajëvelia jumaiti mapacueniaje:

15 PaJerusalén tomarapijivimë, pëtsa pajunavame. Pataename pepo papecaevtsinënexa penajetarucajava. Pejanaburroyota yapatana-jetarucaena,

jai tajëvelia Dioso pejumelivaisibaxuto Jesús burrojumata pepatana-jetarucaejavanexa Jerusalén tomarata.

16 Itsa bajarapacuenia Jesús pata Jerusalén tomarata, copiapata jane baja pacuenia Dioso pejumelivaisibaxutota tajëvelia jumaiti Jesús yabara. Bajarapamatacabi Jesús pijajivi tae ata bajarapacueni, itsiata abaxë apo yapëtae pecopiapatsijava bajarapacueni. Matapania baja Jesús pepuaponae athëbëabetsia, Jesús pijajivi yapëtane pecopiapatsijava baja pacuenia Dioso pejumelivaisibaxutota tajëvelia jumaiti Jesús yabara.

17-18 Pamonaë tane pamatacabi Jesús Lázaro asaëyaexana petëpaenëmi, bajarapamonaë tsipaeba Jerusalén tomarapijivijavabelia. Tsipaeba pacuenia bajarapamonaë tane Jesús Lázaro piasaëyaexanaejavata petëpaenëmi. Bajaraxuata jivi ayaiBITSaëto pitsapa tomaravelia pecopiapitsinexatsi Jesús.

19 Nexata fariseovi ita tane bajarapacueni, najumaiti:

—Pataema. Daxitajivi pënaponatsi Jesús. Vaxaitsi baja nexata acuenebi vajaexanaejava Jesús jivi pepënaponaejavatsi yabara, najai fariseovi.

Pacuenia Grecia nacuapijivi Jesús jamatabëtanetsi yabara pelivaisi

20 AyaiBITSaëto jivi pata Jerusalén tomarata Diosojavabelia pevajëtsinexa pascuavënë fiestamatacabita. Bajarapamonaeyajuvënëvi itsamonae Grecia nacuapijivi.

21 Nexata Grecia nacuapijivi cujibaliatsi Felipe. Felipe Betsaida tomara-pijinë. Betsaidatomara eca Galilea nacuata. Nexata Grecia nacuapijivi jumaiti Felipejavabelia:

—Felipe, pajamatabëtaniji raja Jesús, jai.

22 Felipe nexata pona Andrésjavabelia petsipaebinexa pacuenia Grecia nacuapijivi jumaiti. Nexata Felipebeje Andrésbeje ponabeje petsipaebinexabeje Jesúsjavabelia.

23 Nexata Jesús jumaiti bajaraponëbejejavabelia:

—Xanë, Daxitajivi Pematapijinënë, tajamatacabi baja netocopiapata tanaviatsinexa baja athëbëabetsia ayaijamatabëcuenenënë Dioso taneexanaexa.

24 Xaniajanë pacuenia pacatsipaebijitsiatsi. Trigoxuto ita apo ubitsi irabelia, saya tsitecanuca caexutoyo. Itsiata ita ubatsi, pejuvicujinae xutsabana vajuabixutoyomi penacopatsinexa pejanaboto. Nexata ita nacuaita bajarapaboto, ayajava pexu capitsapa.

25 Bajara pijinia ita jivi ata. Pajivi jamatabëjumaiti ata tsane petëpaeyaniva: “Xanë nayajivitaeyaponaponaenajë tanebejiobiaexanaeyaniva, tanebeyaxuabiyaniva ata,” jamatabëjai ata tsane, itsiata tēpaena. Nexata Diosovecua naxuabiana. Biji rajane pajivi nesivanajamatabëcopatsiaya jamatabëjumaiti tsane: “Jema nebejiobiaexanaena. Jema nebeyaxuabianana Jesús pijajivitonëxaenë,” jamatabëjai tsane, bajarapajivi xainaena matacabi apo pevereverexajava.

26 Pajivi jamatabënetonacueneba, bajarapajivi nepënaponaena. Nexata pajivi netonacuenebiana, neyjavaponaponaena itsajota ponaponaenajë. Pajivi

netonacuenebiana, bajarapajivi yabara taxa Dioso jumaitsi tsane: “Bajarapajivi sivajamatabëcuenebarëyanë,” jai tsane, jai Jesús Felipebeje Andrésbejevavelia.

Pacuenia Jesús tajëvelia navajunupaeba pacuenia beyaxuabijitsiatsi yabara pelivaisi

²⁷ Jesús bëpënëa jamatabëjumaitsi:

—Aeconoxae bitso najamatabëxainajë. ¿Detsa meta jumaitsinë tsane taxajavavelia? Jumaitsinë meta tsane: “Taxa, betajiobicuenia tanebeyaxuabijavaminexa, vecuanecapanepaename,” janë meta tsane taxajavavelia. Jume raja. Bajarapacuenia meta apo vajëtsinë tsane. Tshipaji betajiobicuenia tanebeyaxuabinexa, patajë mapanacuayabetsicaje, jamatabëjai Jesús.

²⁸ Nexata Jesús Diosojavavelia jumaitsi:

—Taxa, pacuenia jitsipame nexanaenexa jivi pecayaiyataenexa, exanare, jai Jesús.

Nexata bajarajota Jesús jumetane athëbëvetsica ayaijume. Jumaitssica mapacueniaje:

—Jivi rabaja cajena neyaiyatane. Itsiata matavëjëa neyaiyataena, jaitsica.

²⁹ Jivibitsaëto bajarajota penubenaevi jumetane bajarapajume. Nexata bajarapamonae jumaitsi:

—Yamaxë raeta najumeta, jai.

Itsamonae pijinia jumaitsi:

—Angel raeta barëcuaijaijaitsi Jesús, jai.

³⁰ Nexata Jesús jumaitsi bajarapamonaejavavelia:

—Xanë raja tajumetaenexa bajarapajume apo jumaitssica. Paxamë raja panejumetaenexa jumaitssica.

³¹ Aeconoxae rabaja copiapatsiana Dioso penaneconitsiaexanaematacabinexa daxita pijaneconi pexainaeivi. Vecuaxuabianua dovathi, ponë mapanacuta jivi itorobabiaba pibisiacue pexanaenexa.

³² Itsa neyotarutsiana cruzajavavelia tanebeyaxuabinexa, nexata daxitajivi jitsipaeyaexanaenajë xanë tanesivanajamatabëcuene copatsinexa, jai Jesús.

³³ Bajarapacuenia Jesús tajëvelia jumaitsi jivijavavelia jivi peyapëtaenexa pacuenia Jesús tëpaejitsia.

³⁴ Nexata bajarapamonae jumaitsi Jesúsjavavelia:

—Dioso Moiséspijinëta penajumecopatsilivaisi tajëvelia jumaitsi mapacueniaje: “Cristo, ponë athëbëvetsica Dioso itorobijitsiatsica jivi pecapanepaenexa, asaë tsaponaponae tsane daxitamatacabijavabelianexa pevetsinexa mapanacuaje,” jai. Itsiata xamë Cristo atamë, jumaitsimë: “Xanë, Daxitajivi Pematapijinënë, neyotarutsiana cruzajavavelia tanebeyaxuabinexa,” jamë. ¿Detsa nexata ponë Cristo daxita matacabijavabelianexa asaë tsaponaponae tsane? jai bajarapamonae Jesúsjavavelia.

³⁵ Nexata Jesús jumaitsi bajarapamonaejavavelia:

—Imoxoyo rabaja pevajënae taponamatacabinexa. Abaxë raja itsiata taponaponamatacabibeje, pacatsipaebianatsi pexaniajailivaisi patacajamatabëcueneitayotsinexa. Nexata itsa pacatsipaebianatsi pexaniajailivaisi, panejumecovënëtsianame paneajamatabëcueneitaquiriyana. Pajivi ajamatabëcueneitaquiri, apo xinae tsane matacabi apo pevereverecejava.

³⁶ Xanë rabaja pexaniajailivaisita pacajamatabëcueneitayotsianatsi. Taponaponaematacabibeje abaxë mapanacuataje, panesivanajamatabëcopatsianame. Bajarapacuenia nexata jamatabëcuenenaitayotsiaya pajinavanapaename, jai Jesús bajarapamonaejavabelia.

Bajarapacuenia pejumaitsicujinae, Jesús baja pona pevecuanamatayabinexa bajarapamonae.

Pacuenia judíovi jamatabëjumaitsi Jesús yabara: “Maponëje apo Cristo, ponë copiaevetavanapatsi vajanacacapanepaenexa,” jamatabëjai yabara pelivaisi

³⁷ Jesús ayaiacuene pexanaejava Dioso pesaëta judíovi pitabarata exanapona. Judíovi tae ata bajarapacuenia, itsiata apo jumecovënëtsi Cristocuene.

³⁸ Nexata judíovi itsa apo jumecovënëtsi Cristocuene, copiapata jane baja pacuenia bajayata tajëvelia yaquina Diosojumepaebinëmi, profeta Isaíaspijinë. Judíovi Cristocuene apo pejumecovënëtsijavanexa yabara, bajayata Isaíaspijinë peyaquinaelivaisita tajëvelia jumaitsi mapacueniaje:

Dioso, patatsipaebilivaisi cajena jivi apo panejumecovënëtsi tsane. Bajarapamonae apo panejumecovënëtsi tsane,

tae ata nesaëta piniijicuene pataexanaejava, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

³⁹ Bajaraxuata Cristo patsi ata, judíovi apn jumecovënëtsi Cristocuene. Isaíaspijinë peyaquinaelivaisita, judíovi yabara icatsia tajëvelia jumaitsi mapacueniaje:

⁴⁰ Bajarapamonae Dioso itaxutotsëcënaeyaexanaena. Ajamatabëcuenetajaya exanaenanua. Bajarapacuenia Dioso exanaena bajarapamonaejavabelia. Nexata bajarapamonae tae ata tsane piniijicuene Dioso pesaëta pexanaejava, itsiata bajarapamonae apo yapëtae tsane pajamatabëcueneilivaisi xaina petaejava. Nexata bajarapamonae Diosojavabelia apo najamatabëcuenepënyorotsi tsane perujujamatabëcuenevecuca. Nexata apo jamatabëcuenexaniavaetsinë tsane, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

⁴¹ Bajarapacuenia Isaíaspijinë yaquina tsipaji bajayata Isaíaspijinë bema-jitsinaebota tane Jesús ayaijamatabëcuene pexainaenëcuene. Bajaraxuata bajayata Isaíaspijinë bajarapacuenia Jesús vajunupaeba baja cajena.

⁴² Itsiata judíoviyajuvënëvi ayaiabitsaëto jumecovënëta Cristocuene. Judíovi pevetsivi ata jumecovënëta Cristocuene. Bajarapamonae judíovi pevetsivixae, apo navajunupaebi pejumecovënëtsijava Cristocuene. Tsipaji cujuna fariseovi. Bajarapamonae bëpënëa jamatabëjumaitsi:

—Apo navajunupaebinë tsane tajumecovënëtsijava Cristocuene tanecapitsapaeyaniva fariseovi judíovi penacatuatabiabibovecuca, jamatabëjai bëpënëa bajarapamonae.

⁴³ Tsipaji bajarapamonae jitsipa penajuaevevtsivi pesivabarëyajavatsi Dioso pesivabarëyajavatsi matatoxenetsia.

Pacuenia jivi naneconitsijitsia Diosojavabelia itsa apo jumecovënëtsi Jesús petsipaebilivaisi yabara pelivaisi

⁴⁴ Jesús jumaitsi ayaijumeta jivijavabelia:

—Pajivi jumecovënëtsiana Cristocuenenë, bajarapajivi ëxanë yabara apo jumecovënëtsi tsane. Taxa, ponë nitorobica, bajaraponë yabara ata jumecovënëtsiana.

⁴⁵ Pajivi necueneyapëtaena, bajarapajivi taneitorobinëtsica ata cueneyapëtaena.

⁴⁶ Xanë rabaja pexaniajailivaisita jamatabëcueneitayotsianajë mapanacuapijivije. Nexata pajivi jumecovënëtsiana Cristocuenenë, apo ajamatabëcueneitaquiri tsane.

⁴⁷ Pajivi jumeyapëtae ata tsane tatsipaebilivaisi, itsiata itsa apo jumecovënëtsi tsane bajarapalivaisi, bajarapajivi naneconitsiana Diosojavabelia. Itsiata xanë bajarapajivi apo naneconitsiaexanaenë tsane. Tsipaji xanë apo patsinëtsica tananeconitsiaexanaenexa mapanacuapijivije. Bijl rajane xanë patsicajë tacapanepaenexa mapanacuapijivije.

⁴⁸ Pajivi nenayajiviitavetsiana, apo nejumecovënëtsinua tsane tatsipaebilivaisi ata, bajarapajivi taxa Dioso naneconitsiaexanaenatsi. Bajarapajivi taxa Dioso naneconitsiaexanaena pamatacabi naneconitsiaexanaena daxita pijaneconi pexainaevi tatsipaebilivaisi apo pejumecovënëtsixae.

⁴⁹ Tsipaji xanë tamatabëcueneta apo paebinë bajarapalivaisi. Taxa raja, ponë nitorobica, nitoroba bajarapalivaisi jivi tatsipaebinxea.

⁵⁰ Yapëtaniji baja cajena jivi pexainaejavanexa matacabi apo peverevereceajava itsa jumecovënëta taxa pitorobilivaisi. Nexata bajarapalivaisi itsa tsipaebaponajë jivijavabelia, tsipaebaponajë pacuenia taxa Dioso nitoroba tatsipaebinxea, jai Jesús jivijavabelia.

13

Pacuenia Jesús beveliajamatabëcuenenë nataeya taxuquiatapona pijajivi, caenë canacujitsia, yabara pelivaisi

¹ Caematacabi baja saica pejonenexa pascuavënëfiesta. Jesús nexata yapëtane pamatacabita pijavajabitsaë beyaxuabijitsiatsi. Yapëtanenua peponaejavanexa paxa Diosojavabetsia. Jesús bitso asiva pijajivi, mapanacuapijivije. Jesús nexata bajarapamatacabi pijajivi tsitanajamatabëcueneitajëta piasivacuene.

² Jesús pijajivi barënbane caniviyopijijava. Nexata Judas Iscariote, Simón pexënato, dovathi pejamatabëcueneta najamatabëxainaejaexanatsi. Nexata Judas najamatabëxaina Jesús pecanajetsinexa pijavajabitsaë pecobeyabelia.

³ Jesús yapëtane paxa Dioso perajutsijavatsi daxitacuene pevetsinexa. Yapëtanenua paxa Diosojavavetsica pepatsijava. Icatsia pacuenia ata navitsijitsia paxa Diosojavabetsia, yapëtane.

⁴ Nexata Jesús pijajivi pebarënananijavata, Jesús nonotapuna mesajavata. Najumajonota penaxatatsijava. Nexata toalla naepacëta.

⁵ Jesús mera epata penacobequiatsinëjavabelia petaxuquiatsinexa pijajivi. Jesús nexata beveliajamatabëcuenenë nataeya taxuquiatapona pijajivi, caenë canacujitsia. Taxuquicapona icatsia pijatoallata penaepacëtsipanata.

⁶ Itsa Jesús taxuquiatsijitsia Simón Pedro, nexata Simón Pedro jumaitsi:
—Tajatuxanenë, apo jitsipænë tanetaxuquiatsijavamë. Tsipaji ayaijamatabëcuenenëmë, jai Simón Pedro Jesúsjavabelia.

⁷ Jesús nexata jumaitsi:
—Aeconoxae abaxë apo yapëtaemë pajamatabëcuene yabara cataxuquiat-sijitsiatsi. Itsiata baitsi jane bexëjavabelia yapëtaename, jai Jesús.

⁸ Nexata Pedro jumaitsi:
—Apo catonataxucopatsi tsanetsi tanetaxuquiatsinexamë, jai Pedro.

Jesús nexata jumaitsi:

—Itsa apo cataxuquiatsi tsanetsi, nexata apo tajajivitonëmë tsane, jai Jesús Pedrojavabelia.

⁹ Simón Pedro nexata jumaitsi:

—Tajatuxanenë, ëtataxu nexata apo netoquiatsimë tsane. Tacobe ata, matatabocoto ata, netoquiatsianamë, jai Pedro.

¹⁰ Jesús nexata jumaitsi Pedrojavabelia:

—Pajivi baja navane, apo namatavenonae baja pequiatsinexatsi daxitanë. Saya namatavenona ëpetaxuquiatsinexatsi. Tshipaji baja daxitanë axuirajibi. Paxamë rabaja pajamatabëcuenexuirajibimë. Itsiata baitsi jane apo padaxitamë, jai Jesús Pedrojavabelia.

¹¹ “Pajamatabëcuenexuirajibimë. Itsiata baitsi jane apo padaxitamë,” jai Jesús. Tshipaji yapëtanë tajëvelia ponë canajetsijitsiatsi pijavajabitsaë pecobeyabelia.

¹² Petaxuquiatsicujinae pijajivi, Jesús baja icatsia penaxatatsijava naxatata. Eca icatsia mesa muxuneneta. Jumaitsi pijajivijavabelia:

—¿Payapëtaneme tsabaja paxamë pajamatabëcuene yabara pacataxuquiatsi?

¹³ “Vajanacacujarubinë,” pajamë tsabiabi itsa panabarëcuaicuaijamë xanë yabara. Itsajavata: “Vajatuxanenë,” pajamë tsabiabi. Paxaniajamë rabaja cajena. Bajara tshipaji taitsinë.

¹⁴ Xanë, patacacujarubinë ata, panijatuxanenë atanënuua, beveliajamatabëcuenenënë nataeya pacataxuquiatsi bepanijajivitonënëcuenia. Nexata bajarapacuenia paxamë ata beveliajamatabëcuenevi nataeya panataxuquiatabiabianame namataenetsia.

¹⁵ Pacatsitaexanatsi bajarapacuenia paxamë ata bajarapacuenia namataenetsia panenatoexanaenexa.

¹⁶ Xaniajanë pacuenia pacatsipaebijitsiatsi. Paxamë cajena apo panejamatabëcuene matatoxenetsimë. Tshipaji itsanë ata apo jamatabëcuenematatoxenetsi pitorobinëtsi.

¹⁷ Payapëtaneme rabaja pajamatabëcuene yabara panijatuxanenë atanë, beveliajamatabëcuenenënë nataeya pacataxuquiatsi. Nexata pijinia paxamë ata bajarapacuenia beveliajamatabëcuenevi nataeya namataenetsia nasivaya itsa panayavenonabianame, pajamatabëcuenebarëyamë tsavanapae tsane, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Daxita raja itsiata apo pajamatabëcuenebarëyamë tsavanapae tsane. Tshipaji caenë paxamëyajuvënënë, ponë naxaena xanëta, bajaraponë necanajetsiana tajavajabitsaë pecobeyabelia pacuenia tajëvelia jumaitsi Dioso pejumelivaisibaxutota. Yapëtaniji ponë necanajetsijitsia. Tshipaji xanë patacaitapetsivi patajajivinexamë, pacajamatabëcueneyapëtanetsi pacanenëmë canacujitsia. Nexata pacuenia tajëvelia Dioso pejumelivaisibaxutota jumaitsi xanë yabara, bajarapacuenia netocopiapatsiana.

¹⁹ Pacatsipaebatsi bajarapacuenia taneexanaevajënaeya. Nexata itsa nebeyaxuabiana, panejumecovënëtsianame xanë Cristocuenenë pacuenia baja cajena pacatsipaebatsi.

²⁰ Xaniajanë pacuenia pacatsipaebijitsiatsi. Pajivi copiapitsiana taitorobinë, xanë neyjavacopiapitsiana. Pajivi necopiapitsiana, bajarapajivi neyjavacopiapitsiana taxa Dioso, ponë nitorobica, jai Jesús pijajivijavabelia.

Pacuenia Jesús navajunupaeba Judas pecanajetsijavanexatsi pijavajabit-saë pecobeyabelia yabara pelivaisi

(Mt 26.20-25; Mr 14.17-21; Lc 22.21-23)

²¹ Jesús pejamatabëthëtota bëpënëa bitso natsinajamatabëxaina. Nexata roviafia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia.

²² Nexata Jesús pijajivi nataeyena. Tsipaji apo yapëtae ponë yabara Jesús jumaitsi.

²³ Jesús pijajiviyajuvënënë, caenë bitso asivaya tane. Bajaraponëbeje Jesúsbeje namuxunenixaeyecabeje.

²⁴ Nexata bajaraponë Jesúsjavabelia petoyanijobinexatsi, Simón Pedro pecobeta itorobeca.

—Yanijobare ponë yabara Jesús jumaitsi, jai tsecae Simón Pedro pecobeta.

²⁵ Nexata bajaraponë natixireca. Eca bitso Jesús pemuxuneneta peyani-jobinexa Jesúsjavabelia.

—Tajatuxanenë, çjipatsa yabara jumaitsimë? jai bajaraponë Jesúsjavabelia.

²⁶ Nexata Jesús jumaitsi pijajivitonëjavabelia, bitso piasivanëjavabelia:

—Ponë ra peneta panjavayo tocajabutsianajë, bajaraponë tsane, jai Jesús pijajivitonëjavabelia, bitso piasivanëjavabelia.

Nexata Jesús panjavayo pita. Cajabuta. Nexata jane baja rajuteta Judas Iscariote, Simón pexënatojavabelia.

²⁷ Judas itsa pita pan, nexata bajarajota Judas dovathi tsijamatabëjunuatsi. Nexata Jesús jumaitsi Judasjavabelia:

—Xua baja exanaejitsiamë, naxanitsiayo baja exanare, jai Jesús.

²⁸ Itsiata baitsi jane pamonaë najuaxaeyena bajarapamesata, apo jumeyapëtae xua yabara Jesús jumaitsi Judasjavabelia.

²⁹ Judas tovetabiaba bajarapamonae pijapalatadoro. Bajaraxuata Judas yabara Jesús pijajivi jamatabëjumaitsi:

—Jesús raeta itoroba Judas pecomuatsinexa vajaxaejavanexa fiestajavata. Itsa jume, itoroba meta perajutsinexa itsacuenejavaxi bepejiobivijavabelia, jamatabëjai Jesús pijajivi.

³⁰ Itsa baja Judas pan pita, bovecua pitsapalia vayafuabelia, meravi baja.

Pacuenia Jesús pijajivi itoroba namataenetsia penaasivatsavanapaenexa yabara pelivaisi

³¹ Pabota Jesús pijajivi barënacaetuata, bajarapabovecua Judas pitsapalia. Nexata Judas pepitsapaecujinaelia Jesús jumaitsi pijajivijavabelia:

—Aeconoxae rabaja xanë, Daxitajivi Pematapijinënë, najamatabëcueneitajëtsianajë ayaijamatabëcuene taxinaejava. Taxa Dioso ata bajarajota yajavajamatabëcueneitajëtsianajë ayaijamatabëcuene pexinaejava.

³² Nexata taxa Dioso juya nejamatabëcueneitajëtsiana ayaijamatabëcuene taxinaejava. Bajarapacuenë baja naxanitsiayo taxa Dioso exanaena.

³³ Bepataximë patacataevi. Bajara maapo pacayajavaponaponaetsi tsane bajayajebije. Paxamë panejaittsianame. Pacuenia jumaitsinë itsamonae judïovijavabelia, bajarapacuenia paxamëjavabelia ata pacajumaitsijitsiatsi. Apo pacacajëpae tsane paneponaenexa itsabelia ponaejitsianë.

³⁴ Pacatsipaebijitsiatsi icatsia pejanalivaisi. Paexanavanapaenename mapacueniaje. Pasivamë tsavanapae tsane itsamonae ata. Pacuenia xanë

pacaasivatsi, bajarapacuenia namataenetsia panaasivamë tsavanapae tsane.

³⁵ Namataenetsia itsa panaasivamë tsavanapae tsane, nexata daxitanacuanëpijivi pacayapëtaena patajajivicuenemë, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë nayavajunuaxainaname tajajivitonëcuenemë,” jai yabara pelivaisi (Mt 26.31-35; Mr 14.27-31; Lc 22.31-34)

³⁶ Simón Pedro yanijoba Jesúsjavabelia.

–Tajatuxanenë, ¿detsa belia ponaejitsiamë? jai Pedro.

Nexata Jesús jumaitsi Pedrojavabelia:

–Itsa belia ponaejitsianë, aeconoxae apo cacaëjëpae tanepënaponaenamë. Itsiata baitsi jane itsamatacabi nepënaponaename, jai Jesús Pedrojavabelia.

³⁷ Nexata Pedro jumaitsi Jesúsjavabelia:

–Tajatuxanenë, ¿detsa xuajitsia apo necaëjëpae aeconoxae tacapënaponaenexa? Daxita pacuenia nitorobame, catonexanaejitsipatsi. Nebeyaxuabijitsia ata tsipae xamë yabara, apo cacopatsi tsipaetsi, jai Pedro Jesúsjavabelia.

³⁸ Jesús nexata jumaitsi Pedrojavabelia:

–¿Xaniajamë tsaja? ¿Nacaevetsipame pecabeyaxuabinexa taneasivaxaemë? Xaniajanë pacuenia catsipaebijitsiatsi. Vacara raja pefiavajënaeya, nayavajunuaxainaname tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

14

Pacuenia Jesús benamuto paxa Diosojavabetsia yabara pelivaisi

¹ Jesús jumaitsi pijajivijavabelia:

–Pëtsa bitso panajamatabëxainame patacavecuaponaejavanexa yabara. Panajamatabëcuenecopare Diosojavabelia, xanëjavaberena ata.

² Taxajavatatsia pexaniabobitsaëtonë xaina panejinavanapænexa. Itsa bajara apo itsipae, apo pacatsipaebi tsipaetsi. Nexata bajarabetsia ponaejitsianë patacatsivajënaexaniavaetsinexa itsajota papatsijitsiamë.

³ Xanë taponaeucujinae mavetsiaje, itsa baja veretsianajë patacatsivajënaexaniavaetsijava itsajota papatsijitsiamë, icatsia patsianicajë patacaponænexatsia jane baja. Nexata bajarajotatsia pacayajavaecaenatsi, itsajota ecaenajë.

⁴ Paxamë baja payapëtaneme itsabelia ponaejitsianë. Payapëtanemenua baja panepatsinexa itsajotatsia ecaeijitsianë, jai Jesús pijajivijavabelia.

⁵ Nexata Tomás, Jesús pijajivitonë, jumaitsi:

–Tajatuxanenë, apo payapëtaenë cajena itsabelia ponaejitsiamë. ¿Detsa nexata pacuenia payapëtaenajë namuto pataponaenexa itsabelia ponaejitsiamë? jai Tomás Jesúsjavabelia.

⁶ Jesús nexata jumaitsi:

–Xanë rabaja benamutonë. Tsipaji xanë tajamatabëcueneta jivi panepaena athëbëbetsia. Xanë rabaja pepo pexaniajailivaisi jivi tatsipaebaponaenë. Xanë rabaja xainajë matacabi apo peverevereceajava tarajutsinexa pamonaë nesivanajamatabëcopata. Itsajivi ata apo patsicapaneapae tsane taxajavabetsia xanë itsa apo nejumecovënëtsi.

⁷ Paxamë picani bajayata apo paneyapëtaemë. Nexata picani taxa ata apo payapëtaemë. Aeconoxae rabaja paneyapëtaneme. Nexata baja taxa ata payapëtaneme. Patanemenua baja, jai Jesús.

⁸ Nexata Felipe jumaitsi Jesúsjavabelia:

—Tajatuxanenë, panetsitajëre axa. Pajitsipajë baja cajena bitso axa patataenexa, jai Felipe Jesúsjavabelia.

⁹ Jesús nexata jumaitsi:

—Felipe, bajajajebi rabaja pacayajavaponaponatsi. ¿Itsiata tsaja abaxë xaniavaetsia apo paneyapëtaemë? Pajivi netane, bajarapajivi taxa ata tane. ¿Detsa xuajitsia nexata nevajëcame taxa netaenexa?

¹⁰ Taxa baja cajena neyajavaponapona. Xanë ata taxa yajavaponaponajë. ¿Abaxë tsaja apo jumecovënëtsimë? Palivaisi pacatsipaebatsi, tajamatabëcueneta baja cajena bajarapalivaisi apo pacatsipaebitsi. Taxa raja, ponë neyajavaponapona, bajaraponë pejamatabëcueneta bajarapalivaisi neyapëtaeyaxana. Nexata bajarapalivaisi pacatsipaebatsi.

¹¹ Panejumecovënëre taxa tayajavaponaponaejava. Panejumecovënërenua taxa ata taneyajavaponaponaejava. Patacatsipaebilivaisianë apo panejumecovënëtsi atamë, itsiata ayaicuene Dioso pesaëta taexanaexae, panejumecovënëre taxa tayajavaponaponaejava.

¹² Xaniajanë pacuenia pacatsipaebijitsiatsi. Pajivi nejumecovënëtsiana, bajarapajivi exanaena pacuenia xanë exanajë. Ayaicuene taexanaejava matatoxenetsia bajarapajivi exanaena. Tsipaji xanë naviatsianiajë taxajavabetsia.

¹³⁻¹⁴ Daxita xua xanë tavënëta pavajëtsianame taxajavabelia, pacatoexanaenatsi cajena. Xanë, Dioso pexënatonë, bajarapacuenia pacatoexanaenatsi taxajavabelia panejamatabëcuenëbarëyanexa, jai Jesús pijajivijavabelia.

Pacuenia Jesús najumecapanepaeya jumaitsi pitorobinexatsica Espiritu Santo jivijavabetsica yabara pelivaisi

¹⁵ Icatsia Jesús jumaitsi pijajivijavabelia:

—Itsa paneasivamë, paexanabianame pacuenia pacaitorobatsi.

¹⁶ Vajëtsianajë taxajavabelia itsanë juya papecatoitorobinexatsica pacayavenyanaenënexa daxitamatabijavabelianexa. Bajaraponë Espiritu Santo.

¹⁷ Espiritu Santo cajena pepo pexaniajailivaisi jivi peyapëtaeyaxanaenë. Bajaraponë mapanacuapijivi abaxë apo tsijamatabëecaetsi. Tsipaji bajaramonae apo nejumecovënëtsi. Nexata apo yapëtae ponë Espiritu Santo. Apo yapëtaenua cajena Espiritu peponaponaejava ata. Itsiata baitsi jane paxamë Espiritu Santo payapëtaneme baja. Tsipaji baja bajaraponë pacayajavaponapona. Espiritu Santo cajena pacatsijamatabëecaena daxitamatabijavabelianexa.

¹⁸ Ponae atanë tsane taxajavabetsia, itsiata apo pacaxuabi tsanetsi. Icatsia raja patsianicajë patacayajavaponaponaenexa.

¹⁹ Caematacabibejecujinae baja jivi apo netae tsane. Itsiata icatsia paxamë pantaeneme. Paxamë paxainaname matabacabi apo pevereverecaejaya. Tsipaji tatëpaecujinae icatsia asaënë tsauponapoe tsane.

²⁰ Pamatacabi Espiritu Santo patsianica paxamëjavabetsica, bajarapamatacabi payapëtaeneme taxa tayajavaponaponaejavanexa. Payapëtaenamenua pataneyajavajinavanapaejavanexamë. Payapëtaenamenua xanë ata patacayajavaponaponaejavanexa.

²¹ Pajivi nyapëtae, taitorobicuenia nejumecovënëtanua, bajarapajivi niasiva. Pajivi niasiva, bajarapajivi taxa juya asivatsi. Xanë ata bajarapajivi asivanë. Tsitanaaitajëtsianajë bajarapajivijavabelia, jai Jesús pijajivijavabelia.

²² Itsanë Judasvënëne, itsiata apo Judas Iscariote, jumaitsi Jesúsjavabelia:

—Tajatuxanenë, ¿detsa xuajitsia ëpaxanë panetsitanaitajëtsianame? ¿Detsa xuajitsia apo tsitanaitajëtsimë tsane itsamonaejavabelia? jai Judas Jesúsjavabelia.

²³ Jesús nexata jumaitsi Judasjavabelia:

—Pajivi niasiva tsane, nejumecovënëtsiananua tatsipaebilivaisi, bajarapajivi juya taxa asiva tsanetsi. Nexata paxanëbeje, taxabeje, bajarapajivi payajavaponaenajëbeje.

²⁴ Pajivi apo niasiva tsane, bajarapajivi apo nejumecovënëtsinua tsane tatsipaebilivaisi. Xanë palivaisi pacatsipaebaponatsi, xanë raja apo tajumelivaisi. Taxa raja, ponë nitorobica, pejumelivaisi, jai Jesús Judasjavabelia.

²⁵ Icatsia Jesús jumaitsi pijajivijavabelia:

—Abaxë patacayajavaponaepato pacatsipaebijitsiatsi mapacueniaje.

²⁶ Taxa tajamatabëcueneta, Espíritu Santo pacatoitorobianica papecayavenonabiabinexa. Nexata Espíritu Santo pacayapëtaeyaexanaena daxitacuene. Pacanajamatabënapitsiaexanaenana daxita palivaisi pacatsipaebaponatsi, jai Jesús.

²⁷ Icatsia Jesús jumaitsi pijajivijavabelia:

—Pacanapëjibatsi jamatabëcuenexanepanaeya. Pacajamatabëcuene barëyayaexanaenatsi. Bajarapajamatabëcuenebarëyajava, apo jëpae mapanacuata pebarëyajava. Nexata bepíjia apo vereverecae tsane paxamë panejamatabëcuenebarëyajava. Pëtsa pajamatabëcuenebëjamë. Pëtsa pacujunavamenua itsacuene ata.

²⁸ Panejumetaneme rabaja patacajumaitsijava mapacueniaje: “Xanë baja ponaenajë taxajavabetsia. Itsiata baitsi jane icatsia pacasivapatsianicatsi,” patacajibajava. Itsa bitso panejitsipaejitsipame, nexata pasivajamatabëcuenebarëyamë tsipae taponaejavanexa taxajavabetsia. Tsipaji taxa nevecuaayajamatabëcuenenë.

²⁹ Bajarapacuenia pacajumaitsi taponaejavënëaeya. Nexata itsa copiapatsiana patacajumaitscovëya, panejumecovënëtsianame Dioso pexënatocuenenë, jai Jesús pijajivijavabelia.

³⁰ Icatsia Jesús jumaitsi pijajivijavabelia:

—Apo necuenecaëjëpae rabaja pematatsënëa livaisi patacatsipaebaponaeenexa. Tsipaji rabaja imoxoyo dovathi najetaruca, ponë mapanacuapijivi pijatuxanenë. Itsiata baitsi jane bajaraponë apo caëjëpaetsi xanë taneitorobinexa tatoexanaenexa pacuenia picani bajaraponë jitsipa. Apo caëjëpaetsinua taneitsacueniabinexa.

³¹ Biji rajane pacuenia taxa nitoroba tatoexanaenexa, bajarapacuenia exanaenajë. Nexata daxita mapanacuapijivije yapëtaena taxa tasivajava. Panonobapunare. Ponatsi baja mapacovëvecuaje, jai Jesús pijajivijavabelia.

15

Pacuenia Jesús bepeubinae yabara pelivaisi

¹⁻² Jesús jumaitsi comparaciöncuenia pijajivijavabelia:

—Xanë rabaja bepevaniaviriauvanaenë. Nexata paxamë patajajivimë, bepatamaxëranamë. Pacuenia peubijava pevetsinë xaniavaetsia eveta, bajara pijinia pacuenia taxa nacaeveta. Nexata pacuenia peubijava pevetsinë vecuacacuba pibisiamaxëranaxi, penacopatsinexa ëpexaniamaxëranë, bajara itsi taxa. Nexata pacuene taxa apo pacatojitsipae, pacavecuaaajibiaexanaponaena. Nexata pacuenia taxa Dioso pacatojitsipa, panejavënëaeyabelia paexanavanapaeneme.

³ Paxamē rabaja panejumecovēnētame patacatsipaebilivaisi. Bajaruaxuata taxa baja pacavecuaxuaba pibisiajamatabēcuenemi.

⁴ Paxamē paneyajavajinavanapaename. Nexata xanē ata pacayajavaponaponaenatsi. Pamaxērana apo tabunucae tsipae pepo naejavabelia, apo nacuaitsi tsipae. Bajara pijinia pacuenia taxamē ata paitsimē tsipae itsa apo paneyajavajinavanapaemē tsipae. Xaniavaetsia apo pajinavanapaemē tsipae, jai Jesús pijajivijavabelia.

⁵ Icatsia Jesús jumaitsi pijajivijavabelia:

—Xanē rabaja beuvanaenē. Paxamē nexata bepatamaxērananēmē. Nexata pajivi neyajavaponaponaena, xanē ata pijinia bajarapajivi yajavaponaponaenajē. Bajarapajivi exanabiabiana bitso Dioso pejitsipacuenia. Itsa apo paneyajavajinavanapaemē tsipae, nexata apo pacacājēpae tsipae panijacuta pexaniacuenē paneexanaenexa.

⁶ Peubijava pevetsinē, piabejemaxēranaxi caucuba penacopatsinexa ēpexaniamaxērananē. Bajaruaxuacujinae bajarapamaxēranaxi xuaba. Nexata baja itsa niona bajarapamaxēranaxi, caetuata pexuabinexa isotojavabelia. Bajara pijinia pacuenia taxa Dioso exanaenatsi pamonaē apo neyajavajinavanapae tsane, jai Jesús pijajivijavabelia.

⁷ Icatsia Jesús jumaitsi:

—Itsa paxamē tsitecaeya panejumecovēnētavanapaename, nexata apo panacofēnētšimē tsane patacatsipaebilivaisi. Nexata panevajētābianame xua pajitsipame. Nexata pacarajutsianatsi xua panevajētame.

⁸ Itsa paxamē jivi patsitaexanavanapaename taxa Dioso pejitsipacuenia, jivi yaiyataenatsi taxa. Nexata daxitajivi paxamē yabara jumai tsane: “Xaniajai rabaja. Bajarapamonae pepacuenē Jesús pijajivi,” jai tsane.

⁹ Pacuenia taxa niasiva, bajara pijinia pacuenia xanē ata pacaasivatsi. Tsiteca paexanavanapaename xua pacaitorobatsi. Tspaji bitso pacaasivatsi.

¹⁰ Taxa niasiva. Tspaji baja jumecovēnētājē taneitorobicuenia. Nexata yapētāniji taxa taneasivajava. Bajara pijinia pacuenia paxamē ata itsa panejumecovēnētavanapaename pacuenia pacaitorobatsi, nexata payapētaename patacasivajava, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Xanē bitso jamatabēcuenēbarēyanē. Nexata pacatsipaebatsi paxamē ata panejamatabēcuenēbarēyanexa pacuenia xanē jamatabēcuenēbarēyanē. Pacaitjitsipatsi bitso panejamatabēcuenēbarēya tsavanapaenexa.

¹² Mapacuenia paexanavanapaenameje. Pacuenia xanē pacaasivatsi, bajara pijinia pacuenia paxamē ata namataenetsia panaasivamē tsavanapae tsane pacaenēmē canacujitsia.

¹³ Pajivi peyapētaejivitsi bitso asiva, jamatabēcuenē yavenonabiabijitsipa daxitacuenē yabara. Peyapētaejivitsi pijaneconi yabara ata, yapijivinabeyaxuabiaexanaejitsipa. Nexata bajarapacuenia daxitajivi yapētaejitsipa pepacujiru bajarapajivi bitso piasivajava peyapētaejivitsi. Bajarapacuenia yapijivinabeyaxuabia exanaejitsipa bitso piasivaxae peyapētaejivitsi. Nexata baja pematatsēnēa itsajivi ata apo caējēpaetsi bajarapacuenia pexanaejivi matatoxenetsia piasivanexa peyapētaejivitsi.

¹⁴ Itsa paexanavanapaename patacaitorobicuenia, nexata baja patajamonaemē tsane.

¹⁵ Aeconoxae baja cajena saya bepatajajivicueniamē apo pacataetsi. Bepatajamonaemē baja bitso pacatanetsi. Tspaji baja pacayapētaeyaxanatsi

daxita pacuenia taxa nitoroba taexanaenexa. Tshipaji mapanacuata petuxanenē pijajivi apo yapētaeayaexanae daxita pacuenia petuxanenē exanaejitsia.

¹⁶ Paxamē raja apo panejunatsimē. Biji rajane xanē pacajunatatsi patanepēnaponaenexamē. Nexata xanē pacaitorobatsi paneexanavanapaenexa Dioso pejitsipaecuenia. Nexata xua paexanavanapaename, apo pevereverecaejavanexa tsane. Daxita pacuene favēnēta pavajētsianame taxa Diosojavabelia, pacarajutsiana cajena.

¹⁷ Mara pacuene paneexanaenexa pacaitorobatsije. Namataenetsia panaasivamē tsavanapae tsane pacaenēmē canacujitsia, jai Jesús pijajivijavabelia.

Pacuenia Jesús pijajivi mapanacuapijivi itoyajitsiatsi yabara pelivaisi

¹⁸ Jesús icatsia tajēvelia jumaitsi pijajivijavabelia:

—Mapanacuapijivi, Dioso apo pejumecovēnētsivi, ita pacaitoya tsane, panajamatabēnapitsianame xanē copiaya taneitoyajava bajarapamonae.

¹⁹ Mapanacuapijivi, pamonaē Dioso apo pejumecovēnētsivi, namataenetsia nasiva tsavanapae. Paxamē ata bajarapamonae ita pajamatabēcuenejēpa vanapaejitsipame, nexata paxamē ata bajarapamonae pacaasiva tshipae. Itsiata baitsi jane xanē baja pacajunatatsi bajarapamonaevecua. Nexata baja paxamē apo pajamatabēcuenejēpaemē bajarapamonae. Bajaraxuata pacaitoya tsane bajarapamonae.

²⁰ Panajamatabēnapitabiabianame najumecapanepaeya patacajumait-sijava: “Itsanē ata apo jamatabēcuenematoxenetsi pijatuxanenē,” patacajajava. Nebejiobiaexana itsamonae. Nexata paxamē ata itsamonae pacabejiobiaexanaena. Itsamonae nejumecovēnēta tatsipaebilivaisi. Nexata pijinja paxamē ata itsamonae pacajumecovēnētsiana panetsipaebilivaisi.

²¹ Bajarapacuenia pacaexanaena mapanacuapijivije xanē patajajivix-aemē. Tshipaji bajarapamonae apo yapētae Dioso, ponē nitorobica, jai Jesús tajēvelia pijajivijavabelia.

²² Icatsia Jesús jumaitsi pijajivijavabelia:

—Xanē ita apo patsinētsica tshipae mapanacuayabetsicaje, mapanacuapijivi apo naneconitsi tshipae Diosojavabelia. Tshipaji bajarapamonae Dioso apo peyapētaexae, pibisiacuene exanaejitsipa. Nexata xanē tapatsixaetsica mapanacuayabetsicaje, bajarapamonae yapētane baja Dioso. Nexata bajarapamonae yapētae ata Dioso, pibisiacuene pexanaexae, nexata naneconita Diosojavabelia. Nexata acuenebi bajarapamonae pejumaitsiyava pibisiacuene pexanaejava yabara: “Apo tayapētaexae Dioso, pibisiacuene exanajē,” pejajava.

²³ Nexata pamonaē nitoya, bajarapamonae taxa ata itoya.

²⁴ Bajarapamonaejavata Dioso pesaēta pinijicuene taexanaejava exanabi-abajē. Bajaraxua itsajivi ata apo exanae mapanacuata. Bajarapamonaejavata pinijicuene taexanaejava ita apo exanaenē tshipae, apo naneconitsi tshipae Diosojavabelia. Tshipaji bajarapamonae apo yapētae tshipae Dioso. Bajarapamonae tae ata Dioso pesaēta pinijicuene taexanaejava, itsiata apo nejumecovēnētsi. Bajarapamonae nitoya. Taxa ata itoya. Nexata naneconita Diosojavabelia.

²⁵ Bajarapacuenia nitoya tshipaji baja cajena bajayata tajēvelia bajarapamonae taneitoyajavanexa yabara, Dioso pejumelivaisibaxutota jumaitsi mapacueniaje: “Nitoya tsane bajarapamonae, ajibi taneyabaraitoyajava ata,” jai tajēvelia Dioso pejumelivaisibaxutota xanē yabara, jai Jesús pijajivijavabelia.

²⁶ Icatsia Jesús jumaitsi pijajivijavabelia:

—Vajëtsianajë taxajavabelia pitorobinexatsica Espiritu Santo, pexaniajailivaisi pepaebinëexa. Itsa patsianica Espiritu Santo taxajavavetsica, nexata pacayavenonaena. Pacajamatabëcuene asaëyaexanaenanua. Espiritu Santo xanë nevajunupaebiana xaniavaetsia.

²⁷ Paxamë baja cajena tataxuxuabijavaveliacujinae jivi livaisi tatsipae-bijava, paneyajavajinavanapame. Bajaraxuata paxamë ata xaniavaetsia panevajunupaebianame, jai Jesús pijajivijavabelia.

16

¹ Icatsia Jesús jumaitsi pijajivijavabelia:

—Bajarapacuenia pacatsipaebatsi panecopabiyanima patanejume-covënëtsilivaisimë.

² Paxamë papecaitoiyavi, pacacapitsapabiabiana judiövi penacactuatabi-abibovecua. Belia jane baja itsamatacabijavabelia pacabeyejebiana. Nexata pamona pacabeyejebiana, jamatabëcuenenavëxaniabiaya jumaitsi tsane: “Dioso pejitsipaecuenia tobeyejebajë mapamonaë,” jai tsane.

³ Bajarapamonae xanë apo neyapëtae. Apo yapëtae cajena taxa ata. Bajaraxuata bajarapacuenia pacaexanaena.

⁴ Bajarapacuenia tajëvelia pacatsipaebatsi baja cajena. Nexata jane baja pamatacabi pacatsipatsiana bajarapacuenia, panajamatabënapitsianame pacuenia baja cajena tajëvelia pacatsipaebatsi, jai Jesús pijajivijavabelia.

Pacuenia Espiritu Santo exanaejitsia jivijavabelia yabara pelivaisi

Icatsia Jesús jumaitsi pijajivijavabelia:

—Tataxuxuabijavaveliacujinae jivi livaisi tatsipaebijava, abaxë apo pacat-sipaebitsi mapacuene yabaraje. Bajarapacuenia apo pacatsipaebitsi tsipaji abaxë pacayajavaponaponatsi.

⁵ Itsiata baitsi jane aeconoxae baja payapëtae atamë tanaviatsijavanexa taneitorobinëjavabetsia, itsanë ata paxamëyajuvënënë apo neyanijobi. “¿Detsa belia ponaejitsiamë?” apo nejai.

⁶ Pacanavajunupaebatsi baja cajena tanaviatsijavanexa. Bajaraxuata bitso panajamatabëxainame.

⁷ Palivaisi aeconoxae pacatsipaebijitsiatsi, pexaniajailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaet-sipaetsi, apo pacatopatsitsica tsipae Espiritu Santo papecayajavaponaponaenexa. Espiritu Santo pacayavenonabiabiana. Pacajamatabëcuene asaëyaexanaenanua. Itsa ponaenajë taxajavabetsia, nexata Espiritu Santo pacatoitorobianicatsi.

⁸ Nexata Espiritu Santo patsianica. Nexata Espiritu Santo pejamatabëcuenetjailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaet tsipae Espiritu Santo papecayajavaponaponaenexa. Espiritu Santo pacayavenonabiabiana. Pacajamatabëcuene asaëyaexanaenanua. Itsa ponaenajë taxajavabetsia, nexata Espiritu Santo pacatoitorobianicatsi.

⁹ Espiritu Santo pejamatabëcueneta, bajarapamonae nacueneyapëtaena pibisiacuene pexanaevicuene. Tsipaji xanë bajarapamonae apo nejume-covënëtsi pibisiacuene pexanaeneconi tavecuajibiaexanaejavanexa.

¹⁰ Nexata Espiritu Santo pejamatabëcueneta, bajarapamonae yapëtaena pacuene xanepana pexanavanapaenexa Dioso pitabarata. Tsipaji baja xanë navitsianajë taxajavabetsia. Nexata baja bajarapamonae pematatsënëa apo netae tsane.

11 Bajarapamonae Espírítu Santo pejamatabëcueneta, yapëtaena pacuenia Dioso naneconitsiaexanaejitsia daxita pamonae pibisiacuene pexanaevi dovathi pejamatabëcueneta. Tsipaji Dioso naneconitsiaexanaena dovathi, ponë mapanacuapijivi itorobabiaba pibisiacuene pexanaenexa, jai Jesús pijajivijavabelia.

12 Icatsia Jesús jumaitsi pijajivijavabelia:

—Ayailivaisi picani abaxë xainajë patacatsipaebinea. Itsiata baitsi jane abaxë apo pacajamatabëcuenecaëjêpae bajarapalivaisi panejumeyapëtaenexa.

13 Matapania pamatacabi patsianica Espírítu Santo, ponë pexaniajailivaisi pepaebinë, bajaraponë pacayapëtaeyaexanaena daxita pexaniajailivaisi. Espírítu Santo raja apo pacayapëtaeyaexanae tsane saicaya pejamatabëcuenepijilivaisi. Daxita raja pacuenia taxa Dioso jumaitsi, juya Espírítu Santo pacayapëtaeyaexanaena. Nexata tajëvelia Espírítu Santo pacayapëtaeyaexanaena pacuene pevajënaeyabelia copiapataponaejitsia.

14 Espírítu Santo pejamatabëcueneta jivi neyaiyataena. Tsipaji xanë tali-vaisi, pexaniajailivaisi, Espírítu Santo pacayapëtaeyaexanaena.

15 Daxita taxa pexainaejava, xanë ata rabaja tajajava. Bajaraxuata pacajumaitsitsi: “Xanë talivaisi, pexaniajailivaisi, Espírítu Santo pacayapëtaeyaexanaena,” pacajaitsi, jai Jesús pijajivijavabelia.

Pacuenia bepejamatabëcuenejiovimi jamatabëcuenearëyajitsia yabara pelivaisi

16 Icatsia Jesús jumaitsi pijajivijavabelia:

—Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia, jai Jesús.

17 Nexata pijajiviyajuvënëvi nayanijoba ëpamonae.

—¿Detsa majumaitsi pajumeje? Jesús nacajumaitsi: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia,” nacajai.

18 ¿De tsaeta pejumaitsijume: “Caematacabibejecujinae rabaja apo pane-taemë tsane. Itsiata icatsia itsamatacabibejecujinae panetaename,” nacajai? Apo jumeyapëtaetsi cajena xua yabara nacajumaitsi, najai Jesús pijajivi.

19 Jesús jamatabëcueneyapëtane pacuenia picani pijajivi jamatabëyanijobatsi. Nexata Jesús tajëvelia jumaitsi pijajivijavabelia:

—Pacajumaitsitsi mapacueniaje: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” pacajaitsi. ¿Baja tsa pajume yabara panayanijobame?

20 Xaniajanë pacuenia pacatsipaebijitsiatsi. Xanë itsa tēpaenajë, paxamë panuename. Bitso xanëjitsia panajamatabëxainaname. Itsiata baitsi jane pamonae apo nejumecovënëtsi, barëya tsane tatëpaejava yabara. Itsiata baitsi jane xuacujinae paxamë icatsia bitso panesivajamatabëcuenearëyamë tsane itsa panetaename icatsia.

21 Pamatacabi petiriva vixae notatsi penacueto pevecuanaexanaenexatsi, bitso bayanajamatabëxaina. Itsiata penacueto pevecuanaexanaecujinaetsi, pevixae apo najamatabënapitsi. Panacueto baja vecuanaexanatsi, sivajamatabëcuenearëya.

²² Bajara pijinia pacuenia paxamē ata bitso panajamatabēxainaname itsa tēpaenajē. Itsiata icatsia itsa panetaename, bitso panesivajamatabēcuenebarēyamē tsane. Nexata itsajivi ata apo caējēpaetsi tsane papecavecuajibiaexanaenexa panejamatabēcuenebarējajava, jai Jesús pijajivijavabelia.

²³ Icatsia Jesús jumaitsi pijajivijavabelia:

—Pamamatacabi icatsia panetaename, apo paneyanijobimē baja tsane itsacuenejavayo ata. Tshipaji baja Espiritu Santo pacayapētaeyaxanaena daxitacuene. Xaniajanē pacuenia patsipaebijitsiatsi. Taxa pacarajutsiana daxita xua tavēnēta pavajētabiabianame taxajavabelia.

²⁴ Abaxē tavēnēta taxajavabelia apo pavajētšimē itsacuenejavayo ata. Aeconoxae rajane baja tavēnēta taxajavabelia pavajētabiabianame. Nexata taxa itsa pacarajutsiana xua pavajētšianame, bitso pajamatabēcuenebarēyamē tsane taxajavabelia, jai Jesús pijajivijavabelia.

Pacuenia Jesús jamatabēcueneamoneyaba dovathi, ponē itorobabiaba mapanacuapijivije pibisiacuene pexanaenexa, yabara pelivaisi

²⁵ Icatsia Jesús jumaitsi pijajivijavabelia:

—Palivaisi baja pacatsipaebabiabatsi, najumematayatsiaya pacatsipaebabiabatsi. Itsiata itsamatacabi livaisi apo pacatsipaebi tsanetsi najumematayatsiaya. Biji rajane pacatsipaebianatsi jumenapebetsiaya taxa pelivaisi.

²⁶ Bajarapamatacabi paxamē baja taxajavabelia pavajētabiabianame tavēnēta. Nexata baja xanē apo patacatovajētabiabi tsanetsi taxajavabelia.

²⁷ Paxamē paneasivamē. Panejumecovēnētamenua taxa taneitorobinēcuenetsica. Bajaraxuata paxamē taxa pacaasiva. Nexata panijacuata taxajavabelia itsa pavajētabiabianame, taxa pacajumetaena.

²⁸ Xanē baja cajena ponaponajē taxajavatatsia. Nexata taxajavavetsica ponajē tapatsinexa mapanacuayabetsicaje. Nexata icatsia ponaenajē mapanacuavecuaje. Naviatsianiajē baja taxajavabetsia, jai Jesús pijajivijavabelia.

²⁹ Nexata Jesús pijajivi jumaitsi:

—Baja rajane jumenapebetsiaya panetsipaebame. Najumematayatsia baja apo panetsipaebimē.

³⁰ Nexata baja pacajamatabēcueneyapētanetsi daxitacuene neyapētaenēcuene. Xamē panejamatabēcueneyapētaneme palivaisi picani jamatabēpacayanijobatsi. Bajaraxuata pacajumecovēnētatsi baja Dioso athēbēvetsica pecaitorobinēcuenetsica, jai Jesús pijajivi.

³¹ Jesús nexata jumaitsi pijajivijavabelia:

—¿Nexata tsabaja aeconoxae panejumecovēnētame taxa Dioso athēbēvetsica taneitorobinēcuenetsica?

³² Imoxoyo rabaja pevajēnae panenacayatsinexa panenaviabinexa panijabonējavabelia. Paxamē panexuabanutsianame caenēnē. Itsiata baitsi jane apo caenēnē tsane. Tshipaji taxa yajavaponaponajē.

³³ Bajarapacuene tajēvelia paneyapētaenexa, pacatsipaebabiabatsi baja cajena. Nexata xanējavaberena panenajamatabēcuenecopatsixae, ajunavijibia pajinavanapaename. Mapanacuata panejinavanapaepato mapanacuapijivije pacabejiobiaexanabiabiana. Itsiata pajamatabēcuenesaēmē tsavana-pae tsane. Xanē rabaja jamatabēcueneamoneyabājē dovathi, ponē itorobabiaba mapanacuapijivije pibisiacuene pexanaenexa, jai Jesús pijajivijavabelia.

17

Pacuenia Jesús pijajivi tovajëta paxa Diosojavabelia yabara pelivaisi

¹ Jesús dovathi pejamatabëcueneamoneyabijava pijajivijavabelia petsipae-bicujinae, Jesús athëbëa benaëcotsia. Nexata jumaitsi paxa Diosojavabelia:

–Taxa, netocopiapata rajane baja daxita pacuenia netocopatame. Tsi-tajëre jivi pacuenia xanë nexënatoxaenë, bitso ayaijamatabëcuenenë. Ba-jarapacuenia itsa tsitajëtsianame, nexata jivi yapëtaena pacuenia xamë Dio-somë bitso ayaijamatabëcuenenëmë.

² Xamë rabaja netocopatame daxitajivi taevetsinexa. Nexata necaëjëpa tarajutsinexa matakabi apo peverevereaejava daxita pamonae neraju-tame.

³ Matakabi apo peverevereaejava pexainaevinexa, cayapëtane baja caenëmë pepo Diosonëcuenenëmë. Bajarapamonae neyapëtanenua baja Jesu-ristonë athëbëvetsica taneitorobinëmëtsica, jai Jesús paxa Diosojavabelia.

⁴ Icatsia Jesús jumaitsi paxa Diosojavabelia:

–Xanë rabaja mapanacuapijivijavabeliaje, apo pecajume-covënëtsivijavabelia, cajamatabëcueneitajëtatsi bitso ayaijamatabëcuene nexainaejava. Veretajënuu baja daxita xua nitorobame tacatoexanaenexa.

⁵ Taxa, pamatacabi abaxë ajibi mapanacuae, itsa cayajavaponaponatsi, necotia yajavapononajë ayaijamatabëcuenenëxaenë. Bajarapacuenia icat-sia aeconoxae ata netocopatsianame vajanajuaevetaponaponanexabeje daxitacuene, jai Jesús paxa Diosojavabelia.

⁶ Icatsia Jesús jumaitsi paxa Diosojavabelia:

–Xamë itapetame itsamonae mapanacuataje tanesivanaja-matabëcopatsinexa. Xanë nexata yapëtaeyaxanajë bajarapamonae pacuenia jamatabëcueneitsimë. Bajarapamonae nijajivi nerajutame. Xaniavaetsia cajumecovënëta nijumelivaisi.

⁷ Aeconoxae baja bajarapamonae nijajivi yapëtane xamë nejamatabëcueneta taexanaponaejava daxita xuanë exanaponajë.

⁸ Daxita palivaisi netsipaebame, xanë juya bajarapalivaisi tsipaebajë ba-jarapamonae. Nexata nejumecovënëta. Nexata yapëtane bajarapamonae pepacuene tapatsijava xamëjavavetsica. Nejumecovënëta xamë athëbëvetsica taneitorobinëcueneitajëtatsi, jai Jesús paxa Diosojavabelia.

⁹ Icatsia Jesús jumaitsi paxa Diosojavabelia:

–Cavajëtatsi bajarapamonaenexa. Apo cavajëtatsi raja apo pecajume-covënëtsivinexa. Cavajëtatsi raja tanerajutsivimënexa.

¹⁰ Daxita pamonae nijajivi, bajarapamonae xanë ata tajajivi. Daxita pamonae tajajivi, bajarapamonae xamë ata nijajivi. Daxitajivi neyapëtane ayaijamatabëcuene taxainaejava. Tsipaji tajajivi xaniavaetsia netojina-vaupa, jai Jesús paxa Diosojavabelia.

¹¹ Icatsia Jesús jumaitsi paxa Diosojavabelia:

–Xanë baja apo ponaponanë tsane mapanacuataje. Tsipaji baja pon-aejitsianë xamëjavabetsia. Itsiata baitsi jane tajajivi jinavanapaena abaxë mapanacuataje. Taxamë, bitso nianeconijibinë. Tanerajutsivimë nesaëta evetsianame pibisiacuenevecu. Vaxaitsibeje caejamatabëcuene xainat-sibeje. Nexata bajarapamonae ata tojitsipajë caejamatabëcuene pex-ainaenexa. Pacuenia vaxaitsibeje jamatabëcueneitsibeje, bajara peja-matabëcueneitsinexa.

¹² Itsa abaxë yajavapononajë bajarapamonae mapanacuataje, nesaëta evetapononajë. Nexata apo nevecuanaxuabi daxita. Caenë saya nevecuanaxuabiana. Bajaraponë nevecuanaxuabiana tsipaji tocopiapatsianatsi

pacuenia baja cajena tajëvelia jumaitsi nijumelivaisibaxutota bajaraponë yabara, jai Jesús paxa Diosojavabelia Judas yabara.

¹³ Icatsia Jesús jumaitsi paxa Diosojavabelia mapacueniaje:

—Aeconoxae baja ponaenajë xamëjavabetsia. Itsiata abaxë taponaponatabiepatoyo mapanacuataje, cavajëtatsi. Bajarapacuenia cavajëtatsi tajajivi bitso pejamatabëcuenebarëyanexa pacuenia xanë bitso jamatabëcuenebarëyanë.

¹⁴ Xanë baja tajajivi tsipaebajë nijumelivaisi. Pacuenia mapanacuapijivije, apo pecajumecovënëtsivi, jamatabëcueneitsi, xanë apo jamatabëcueneitsinë. Bajaraxuata tajajivi ata itoyatsi mapanacuapijivije. Tsipaji apo jamatabëcuenejëpae.

¹⁵ Apo cavajëtsitsi raja nejuitsinexa tajajivi mapanacuapijivivecuaje. Cavajëtatsi raja nevetabiabinexa tajajivi dovathivecua.

¹⁶ Pacuenia xanë apo jamatabëcuenejëpaenë mapanacuapijivije, bajara pijinia pacuenia tajajivi ata apo jamatabëcuenejëpae mapanacuapijivije.

¹⁷ Nijumelivaisi cajena pexaniajailivaisi. Bajaraxuata tanejumecovënëtsivi baja yavenonaename penatsatsinexa dovathi pejamatabëcuenevecua. Nexata bajarapamonae exanavanapaena xamë netojitsipaecuenia nijumelivaisi baja petsijamatabëcaexaetsi.

¹⁸ Pacuenia xamë nitorobame pexaniajailivaisi tatsipaebinexa mapanacuapijivijavabeliaje, bajara pijinia pacuenia juya xanë ata itorobajë tajajivi pexaniajailivaisi petsipaebinexa mapanacuapijivijavabeliaje.

¹⁹ Pacuenia xamë netojitsipame, tajajivi yapijivinacaevetsianajë xanë tanebeyaxuabinexa. Nexata bajarapamonae pacuenia xamë tojitsipame, catoexanavanapaena. Tsipaji baja bajarapamonae yapëtane nijumelivaisi pexaniajailivaisicue, jai Jesús paxa Diosojavabelia.

²⁰ Icatsia Jesús jumaitsi paxa Diosojavabelia mapacueniaje:

—Itsiata apo cavajëtsitsi ëtajajivinexa. Cavajëtatsi raja bexëajavabelia tanejumecovënëtsivinexa ata. Tajajivi itsamatacabi bajarapamonaejavabelia itsa tsipaebaponaena tajumelivaisi, nexata bexëajavabelia bajarapamonae nejumecovënëtsiana.

²¹ Nexata cavajëtatsi daxita bajarapamonae penajamatabëcuenejëpaenexa. Xamë neyjavaponaponame. Xanë ata pijinia cayjavaponaponatsi. Bajara pijinia pacuenia tojitsipajë daxita bajarapamonae ata vajanacuyajavajinavanapaenexabeje. Tojitsipajë bajarapamonae penajamatabëcuenejëpaenexa. Nexata bajarapamonae najamatabëcuenejëpaeya pejinavanapaejava, itsa tane daxita mapanacuapijivije, pejumecovënëtsinexa xamë athëbëvetsica taneitorobinëcuenemëtsica.

²² Pacuenia xamë yapëtaeyaexaname tajajivijavabelia xanë bitso ayaijamatabëcuene taxinaejava, bajara pijinia pacuenia xanë ata bajarapamonaejavabelia yapëtaeyaexanajë baja bajarapamonae ata ayaijamatabëcuenevi baja penaexanaejava tanejumecovënëtsixae. Nexata bajarapamonae tanejumecovënëtsixae, najamatabëcuenejëpa baja pacuenia vaxaitsibeje najamatabëcuenejëpatsibeje.

²³ Tajajivi javavaponaponajë. Xamë pijinia neyjavavaponaponame. Nexata tajajivi caejamatabëcuene xainaena. Nexata daxita mapanacuapijivije itsa taena tajajivi najamatabëcuenejëpaeya pejinavanapaejava, yapëtaena xamë athëbëvetsica taneitorobinëcuenemëtsica. Yapëtaenanua bajarapamonae niasivajava pacuenia xanë ata niasivamë, jai Jesús paxa Diosojavabelia.

²⁴ Icatsia Jesús jumaitsi paxa Diosojavabelia:

—Taxa, bajarapamonae xamë nerajutame. Nexata jitsipajë bajarapamonae ata penajinavanapaenexa itsabelia ponaejitsianë. Jitsipajë bajarapamonae taneyajavajinavanapaenexa, taneyapëtaenexa bitso ayaijamatabëcuene taxainajava. Tsipaji nacua nexanaevajënaeya ata, xamë niasivamë. Bajaraxuata ayaijamatabëcuenenënë nexaname.

²⁵ Taxa, itsaneconi ata apo nexainaenë. Mapanacuapijivi, pamonae apo cajumecovënëtsi, apo cayapëtae. Itsiata xanë cayapëtanetsi. Mapamonaeje, tajajivi, yapëtane baja xamë athëbëvetsica taneitorobijavamëtsica.

²⁶ Xanë tajajivi yapëtaeyaexanajë pecayapëtaenexa. Abaxë itsiata pevajënaeyabelia pecayapëtaeponaenexa, yapëtaeyaexanaponaenajë. Pacuenia xanë niasivamë, bajara pijinia pacuenia bajarapamonae ata namataenetsia penaasivanexa, yapëtaeyaexanaponaenajë. Xanë bajarapamonae yajavaponaponaenajë, jai Jesús paxa Diosojavelia.

18

Pacuenia Jesús pijavajabitsaë vaetabatsi pebeyaxuabinexatsi jane baja yabara pelivaisi

(Mt 26.47-56; Mr 14.43-50; Lc 22.47-53)

¹ Jesús pevajëtsicujinae paxa Diosojavelia, pijajivi barëpona Cedrónvënënajato itsapanabelia. Nexata bajarajotalia peubinaenë bacabobëxëpanata, Jesús pijajivi barëpata.

² Bajarajota cajena Jesús pijajivi barënacaetuatabiaba. Bajaraxuata Judas, Jesús pijajivitonë ata, ponë canajetsijitsiatsi pijavajabitsaë pecobeyabelia, yapëtane itsajota Jesús pijajivi barënacaetuatabiaba.

³ Nexata Judas peyapëtaexae, bajarajota barëpata vajabitsaë. Barëpatanua templobopijipolicíavi. Bajarapamonae itorobatsi sacerdotevi penamatacaitorobivibeje fariseovibeje. Judas pematacaponaevi capona espadanë, naebonë yajava. Lámparabëanënu capona. Beisotabuqueranënu capona penatsivajënaeitayotsinexa.

⁴ Nexata baja Jesús yapëtane daxita pacuenia exanaejitsiatsi bajarapamonae. Nexata Jesús najetabilia. Jumaitsi bajarapamonaejavavelia:

—¿Jipatsa pajaitame? jai Jesús.

⁵ Nexata bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

Jesús nexata jumaitsi:

—Xanë rabaja maje, jai.

Judas, ponë Jesús pijavajabitsaë pecobeyabelia canajetatsi, nanuca bajarapamonaejavata.

⁶ “Xanë rabaja maje,” pejaijavata Jesús, bajarapamonae pematabëxëpa toquequenaponalia. Othopa irata.

⁷ Nexata icatsia Jesús jumaitsi:

—¿Jipatsa nexata pajaitame? jai.

Nexata icatsia bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

⁸ Nexata Jesús jumaitsi bajarapamonaejavavelia:

—“Xanë rabaja maje,” pacajaitsi rabaja. Xanë itsa panejaitame, pacopat-sianame mapamonaeje peponaenexa, jai Jesús pijajivi yabara.

⁹ Bajarapacuenia Jesús itsa jumaitsi, copiajopa jane baja pacuenia tajëvelia jumaitsi Jesús. Jesús baja cajena pijajivi yabara tajëvelia jumaitsi mapacueniaje: “Pamonae taxa nerajuta, itsanë ata apo nevecuanaxuabi tsane,” jai cajena Jesús tajëvelia pijajivi yabara. Bajarapacuenia jane baja copiajopa.

¹⁰ Nexata Jesús pijajivitonë, Simón Pedro, namaracëtaaponapona espada. Nexata Simón Pedro espada navemarajonotaxuabina. Pecujanenia pamuxuyorotomi, muxuyoropaebiaxuaba sacerdotevi pepo penamatacaitorobinë pijajivitonë. Ponë Simón Pedro muxuyoropaebiaxuaba, pevënë Malco.

¹¹ Nexata Jesús jumaitsi Pedrojavabelia:

—Nijaespada baja pevënojojavareca xataremeca. Taxa baja cajena netocopata tanebejiobiaexanaenexa. Bajaraxuata nacaevetsianajë tanebejiobiaexanaenexa, jai Jesús Pedrojavabelia.

Pacuenia Jesús nutatsi sacerdot. Pecujanenia pamuxuyorotomi, muxuyoropaebiaxuaba sacerdotevi pepo penamatacaevia pepo penamatacaitorobinë pitabarata yabara pelivaisi

(Mt 26.57-58; Mr 14.53-54; Lc 22.54)

¹² Vajabitsaëvi pijacapitán, pijajivi yajava, judíovi pijapolicíavinua, nacobenaetaabatsi Jesús. Nexata cobecëtatsi.

¹³ Caponatsi baja Anásvënë pijaboyabelia. Anás paxuyo Caifás. Bajaramatacabi Caifás sacerdotevi pepo penamatacaitorobinë tsaponapona.

¹⁴ Bajaraponë Caifás jumaitsi baja cajena copiaya judíovijavabelia Jesús yabara: “Bajaraponë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane,” jai.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.69-70; Mr 14.66-68; Lc 22.55-57)

¹⁵ Itsa baja Jesús caponaliatsi sacerdotevi pepo penamatacaitorobinë pijaboyabelia, Simón Pedrobeje, itsanëbeje, Jesús pijajivitonëbeje, tajíyo pënanajetarucabeje. Ponë Simón Pedro yanatatsi, bajaraponë yapëtanatsi sacerdotevi pepo penamatacaitorobinë. Sacerdotevi pepo penamatacaitorobinë pijabó matatoyorotsia yacaranata ibopanaxanetonë, mataropotsia pefaratsijavaxanetota. Nexata ponë Pedro yanatatsi, bajarapayacaranatsijavaxaneto baupa najoneya. Nexata panepa bopanaboyavabelia, itabelia Jesús cajunuatsi.

¹⁶ Nexata Pedro nucojopa sacerdotevi pepo penamatacaitorobinë pijabó matatoyorotsia peyacaranatsijavaxaneto baupa jumavelia. Nexata ponë Pedro yanatatsi, caevëa pitsaparena. Nexata bajaraponë cuaicuaijai baupa pevetsivajavabelia Pedro ata penajonenexalia. Nexata baja Pedro ata tocopatatsi bopanaboyavabelia penajonenexalia. Nexata baja Pedro ata najoneya bopanaboyavabelia.

¹⁷ Nexata baupa pevetsiva jumaitsi Pedrojavabelia:

—¿Xamë ata tsabaja Jesús apo pijajivitonëmë? jai.

Pedro nexata jumaitsi:

—Jume raja. Xanë raja Jesús apo pijajivitonënë, jai Pedro.

¹⁸ Bajarapaepatota bitso bajarapameravi cainejeba. Nexata bajarapabota penacuenibivi, policíavi yajava, isoto itajuruteta bopanabota. Bajaramonae nononabena. Nexata Pedro nanuca bajarapamonaejavata. Nanonpanuca.

Pacuenia sacerdotevi pepo penamatacaitorobinē Jesús yanijobatsi yabara pelivaisi

(Mt 26.59-66; Mr 14.55-64; Lc 22.66-71)

19 Anás jane baja sacerdotevi pepo penamatacaitorobinē jumaitsi Jesúsjavabelia:

—¿Detsa pamatabëxëyo nijajivi? ¿Detsa palivaisi tsipaebabiabame nijajivi? jai.

20 Jesús nexata jumaitsi Anásjavabelia:

—Xanë daxitajivi pexanialivaisi tsipaebabiabajë itsajota nacaetuatabiaba. Tsipaebabiabajë penacaetuatsibonëjava, templobota ata. Muetsia cajena itsamatacabi ata apo tsipaebinë.

21 ¿Detsa xuajitsia nexata neyanijobame? Yanijobare pamonaëjavabelia tsipaebabiabajë. Nexata bajarapamonae catsipaebiana pacuenia nejumetaeyabiaba. Bajarapamonae yapëthane xua yabara pexanialivaisi tsipaebabiabajë, jai Jesús sacerdotevi pepo penamatacaitorobinëjavabelia.

22 Itsa bajarapacuenia Jesús jumaitsi, nexata bajarajota penucaenë templobopijipolicianë itabarapacataxuabatsi. Policianë jumaitsi Jesúsjavabelia:

—Pëtsa bajarapacuenia cuaicuajiamë sacerdotevi pepo penamatacaitorobinëjavabelia, jai.

23 Jesús nexata jumaitsi policianëjavabelia:

—Itsa pibisiacuenia cuaicuajianë, netsipaebare papibisiacuenë yabara cuaicuajianë. ¿Detsa xuajitsia saya xaniavaetsia tajumaitsiyava yabara, nebiame? jai Jesús.

24 Nexata Anás itoroba Jesús cobecëtsiaya tsiteca pecaponaenexatsi Caifásjavabelia, ponë sacerdotevi pepo penamatacaitorobinëjavabelia.

Pacuenia icatsia Pedro nayavajunuaxaina Jesús pijajivitonëcuene yabara pelivaisi

(Mt 26.71-75; Mr 14.69-72; Lc 22.58-62)

25 Pedro abaxë nanonopanuca isotojavata. Nexata bajarajota penube-naevi jumaitsi:

—¿Xamë ata tsabaja Jesús apo pijajivitonëmë? jaitsi.

Pedro nexata nayavajunuaxainaeya jumaitsi:

—Jume raja. Xanë raja Jesús apo pijajivitonënë, jai Pedro.

26 Nexata icatsia bajarajota sacerdotevi pepo penamatacaitorobinë pija-jivitonë, ponë Pedro muxuyoropaebiaxuaba pijamonaenë, jumaitsi:

—Xamë cajena covë catanetsi Jesúsjavata, peubinaenë bacabojavata, jai.

27 Pedro icatsia nayavajunuaxainaeya jumaitsi:

—Jume raja. Xanë cajena apo yapëtaenë Jesús, jai Pedro.

Itsa baja Pedro najumeveretaba bajarapacuenia pejumaitsiyava, vacara baja fiaba.

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Mr 15.1-5; Lc 23.1-5)

28 Itsa baja ajena matacabi tsina, Jesús capitsapatsi Caifás pijabovëcua. Nexata Jesús caponaliatsi nacuaevetsinë Pilato pijaboyabelia. Judíovi, pamonaë najetarubena Jesús peneconitsinexatsi, apo najonelia nacuaevetsinë Pilato pijaboyalia. Tsipaji Pilato apo judíonë. Judíovi apo joneyabiabi apo judíonë pijaboyalia. Bajarapamonae itsa jonejitsipa Pilato pijaboyalia, bajarapamonae judíovixae, jamatabëjumai tsipae: “Najamatabëcuenebïjianajë Dioso pitabarata apo judíonë pijaboyalia tanajonexae. Nexata tavëna judíovi

apo netocopatsi tsane tanaxaenexa pascua fiestamatacabi pexaejava,” jamatabējai tsipae bajarapamonaē.

²⁹ Nexata Pilato pitsaparena. Jumaitsi judíovijavabelia:

—¿Detsa pitsineconi yabara pacapatame maponėje? jai Pilato judíovijavabelia.

³⁰ Nexata judíovi jumaitsi:

—Itsa raja pibisiacuene apo pexanaenē tsipae, apo pacatocapatsi tsipaetsi maberenaje, jai judíovi.

³¹ Nexata icatsia Pilato jumaitsi:

—Paca ponaremelia caevēalia. Pananeconitsiaexanaename panijacuata pacuenia panijalivaisi pacaitoroba paneexanaenexa, jai Pilato judíovijavabelia.

Nexata judíovi icatsia jumaitsi:

—Paxamē baitsi jane apo panetocopatsimē patabeyaxuabinexa itsanē ata pijaneconi yabara, jai judíovi.

³² Bajarapacuenia Jesús tocopiapatatsi pacuenia baja cajena tajēvelia pija-jivijavabelia navajunupaebapona pebeyaxuabijavanexatsi.

³³ Nexata Pilato icatsia joneya pijaboyalia. Jumaitsi Jesúsjavabelia:

—¿Xamē tsaja judíovi pepo nevetsinē? jai.

³⁴ Jesús nexata jumaitsi Pilatojavabelia:

—¿Xamē tsaja nejamatabēcueneta neyanijobame? Jume. ¿Catsipaeba tsaja itsamonaē xanē judíovi pepo taevetsinēcuenē? jai Jesús.

³⁵ Pilato nexata jumaitsi:

—Xanē raja apo judionēnē. Bajarapacuenia apo tacasivanajamatabēxainaeta. Judíovi raja, caranata nijanacuapijivi, sacerdotevi penamatacaitorobivi yajava, cacapata maberenaje pecaneconitsinexa xanējavaberenā. ¿Detsa jane xua exaname? jai Pilato Jesúsjavabelia.

³⁶ Nexata Jesús jumaitsi Pilatojavabelia:

—Mara panacua xanē apo taevetsinėje. Itsa ra peneta mapanacua taevetsinē tsipaeje, nexata paepatota judíovi nevaetaba, daxita tajajivi neyapijivinamaxēvanitsipa tapanepaenexa. Xanē raja mapanacua apo taevetsinėje, jai Jesús Pilatojavabelia.

³⁷ Nexata Pilato jumaitsi:

—¿Xamē tsaja nexata jivi nevetsinē? jai.

Jesús nexata jumaitsi:

—Jājā, xanē raja jivi taevetsinē pacuenia nejumaitsimē. Bajaraxuata patajē mapanacuayabetsicaje tatsipaebinexa jivi pexaniajailivaisi. Daxita pamonaē jitsipa pexaniajailivaisi, nenamuxunaevetabiaba bajarapalivaisi, jai Jesús Pilatojavabelia.

³⁸ Nexata Pilato jumaitsi Jesúsjavabelia:

—¿Detsa pacuenia nayapētane pexaniajailivaisicuene? jai.

Pacuenia baja Pilato tocopata Jesús pebeyaxuabinexatsi yabara pelivaisi (Mt 27.15-31; Mr 15.6-20; Lc 23.13-25)

Pilato peyanijobicujinaē Jesúsjavabelia, Pilato icatsia pitsapalia. Nexata Pilato jumaitsi judíovijavabelia:

—Apo caxitajarabinē cajena itsacujiruneconi ata pexanaejava, paneconi yabara bajaraponē naneconitsijitsia.

³⁹ Penaneconitsivi pejebabiabibota naneconitsia peponaponaenë pepit-sapaenexa itsa panevajëtime, nexata pascua fiestamatacabi caenë pacato-capitsapabiabatsi. ¿Pajitsipame tsaja patacatocapitsapaenexa penaneconitsivi pejebabiabibovecua pepitsapaenexa pajudíovimë papecaevetsinë? jai Pilato judíovijavabelia Jesús yabara.

⁴⁰ Nexata bajarajota daxitajudíovi vavajai.

—¡Pëtsa abaxë copatame bajaraponë! ¡Panetocapitsapaename jane Barrabás! jai judíovi.

Bajaraponë Barrabás bitso penacobetoxotsinë. Bajaraxuata penaneconitsivi pejebabiabibota, naneconitsiaponapona.

19

¹ Pilato pijajivi itoroba Jesús pejumatitibabenexatsi penaneconitsivi pejumaconitabiabimacata.

² Nexata pejumatitibacujinaetsi vajabitsaë Jesús becoronacuenia tsmataexanatsi peejuvitoyoroto. Mataxatatatsi bajarapaejuvitoyoroto. Bajaraxuacujinae quenetsiataeya benacuaeveetsinëcuenia xatatatsi peraënaeyatsautsaucaejava.

³ Nexata vajabitsaë imoxoyoliatsi Jesús. Vajabitsaë capocaponaeya jumaitsi tsabuataponaë Jesúsjavabelia:

—¡Bajaco, judíovi pepo pevetsinë! jai tsabuataponaë.

Vajabitsaë pecobeta Jesús itabarapacababeyabuataponatsi.

⁴ Pilato nexata icatsia pitsapalia. Jumaitsi judíovijavabelia:

—Pacatocanaviarenatsi icatsia maberenaje paneyapëtaenexa. Apo caxitarabinë itsacujiruneconi ata pexanaejava, paneconi yabara naneconitsijitsia maponëje, jai Pilato Jesús yabara.

⁵ Nexata peejuvitoyoroto Jesús namataxatatsiaya pitsaparena. Naxatata peraënaeyatsautsaucaejava. Nexata Pilato jumaitsi judíovijavabelia:

—¡Baja rajane nuca maponëje! jai Pilato.

⁶ Nexata sacerdotevi penamatacaitorobivi, policíavi yajava, itsa tanetsi Jesús, nexata bajarapamonae vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai bajarapamonae Jesús yabara.

Pilato nexata jumaitsi bajarapamonaejavabelia:

—Paxanë pacaponaremelia. Cruzajavabelia pacobematabiabarut-sianame. Tsipaji raja xanë apo caxitajarabinë itsacujiruneconi ata pexanaejava, jai Pilato.

⁷ Nexata judíovi jumaitsi Pilatojavabelia:

—Mara ponë Dioso apo pejitsipaecuenia jumaitsiye: “Xanë raja Dioso pexënatonë,” jai. Paxanë pajudíovinë patajalivaisita itaveta bajarapacuenia pejumaitsiyaniva itsajivi ata. Bajaraxuata bajaraponë baja bebeyaxuabatsi, jai judíovi Jesús yabara.

⁸ Pilato itsa jumetane bajarapamonae pejumaitsiyava: “Mara ponë Dioso apo pejitsipaecuenia jumaitsiye: ‘Xanë raja Dioso pexënatonë,’ jai,” pejaijava Jesús yabara, nexata bitso Pilato junava.

⁹ Nexata icatsia Pilato pijaboyalia barëjoneya Jesús. Yanijoba icatsia Jesúsjavabelia.

—¿Detsa nexata verena neponaenë? jai Pilato.

Itsiata Jesús apo jumepitsi.

¹⁰ Nexata Pilato jumaitsi:

—¿Detsa xuajitsia apo nejumepitsimë? ¿Apo yapëtaemë tsipaji mapanacua taevetsinëcueneje? Nejamatabëcuenecaëjëpa raja taitorobinexa tajivi cruzajavabelia pecacobematabiabarutsinexa. Nejamatabëcaëjëpanua taitorobinexa pecacopatsinexa ata, jai Pilato.

¹¹ Jesús nexata jumaitsi:

—Itsa Dioso apo catocopatsi tsipae mapanacua nevetsinexaje, nexata xanëjavaberena ata apo cacaëjëpae tsipae taneitsacueniabinxamë. Itsiata baitsi jane ponë necanajeta xamë necobeyabelia, bitso naneconita Diosojavabelia xamë matatoxenetsia, jai Jesús Pilatojavabelia.

¹² Itsa bajarapacuenia Jesús jumaitsi, nexata picani Pilato jamatabëcopatatsi Jesús.

Itsiata baitsi jane judíovi vavajai Jesús pecopatsiyanivatsi. Jumaitsi:

—¡Itsamonaë raja paxanëyajuvënëvi jitsipa maponëje pevetsinënexatsi! ¡Nexata itsa copatsianame maponëje, naneconitsianame nijatuxanenëjavabelia, Romanonacua pepo pevetsinëjavabelia, pepo vajanacayanacuaevetsinëjavabelia jane baja! ¡Nexata maponëbeje nijatuxanenëbeje naitoyabeje tsane! jai judíovi Pilatojavabelia.

¹³ Nexata Pilato itsa jumetane bajarapacuenia judíovi pejumaitsijava, Pilato eca tribunalvënëjavata, xuata Pilato ecabiaba jivi itsa naneconitsiaexanaejitsia. Xuata Pilato ecabiaba jivi itsa naneconitsiaexanaejitsia, hebreojumeta pevënë Gabata. Bajarajota pirafaratsiira. Nexata Pilato itorobeca pijajivi pecapitsapaenexatsi Jesús Pilato pijabovecua.

¹⁴ Pascuavënëfiesta pejonematacabinexa pevajënaeya pamatacabi, matoneje, bajarapacuenia Jesús exanatsi. Nexata Pilato jumai tsecae judíovijavabelia:

—¡Mara jota nucaje papecaevetsinëje! jai Pilato Jesús yabara.

¹⁵ Itsiata saya bajarapamonae vavajai.

—¡Beyaxuabiaexanare! ¡Jema tëpae! ¡Cruzajavabelia cobematabiabarutsiaexanare! jai judíovi.

Pilato nexata jumaitsi:

—¿Pajitsipame tsaja cruzajavabelia tacobematabiabarutsiaexanaejava papecaevetsinëmi? jai Pilato.

Nexata sacerdotevi penamatacaitorobivi jumaitsi Pilatojavabelia:

—Caenë raja Romanonacua pevetsinë paxainajë pepo patanevetsinë. Paxanë raja apo paxainaenë itsanë pematatsënëa pepo patanevetsinë, jai sacerdotevi penamatacaitorobivi.

¹⁶ Nexata baja Pilato rajuta judíovi pecobeyabelia Jesús pecobematabiabarutsinexatsi cruzajavabelia. Itsiata Pilato pijajivi itoroba Jesús pecapon-aenexatsilia petsutojumabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Mr 15.21-32; Lc 23.26-43)

¹⁷ Jesús nexata vajabitsaë itsa caponaliatsi, caponaeyaexanatsi cruza, pacruzajavabelia Jesús cobematabiabarutatsijitsiatsi. Caponaliatsi jivimatasipavënë tsutojavabelia. Hebreojumeta bajarapatsuto pevënë Gólgota. ¹⁸ Bajarapatsutojumata Jesús cruzajavabelia cobematabiabarutatsi. Anijanëbeje yajavacobematabiabarutatsi. Caenë canacujitsia pijacruzata rubatsi. Itsanë Jesús pecujanenia ruca. Itsanë Jesús petsavenonenia ruca.

¹⁹ Pilato pijajivi itoroba petoyaquinaenexatsi tablapayojumata. Nexata Pilato pijajivi itoroba bajarapatablapayo petomatabiabarutsinexatsi Jesús

perucaecruzaupita. Jumai tsarucae bajarapaitane mapacueniaje: “Mara ponėje Jesús, Nazaret tomarapijinėje, judíovi pepo pevetsinē,” jai tsarucae bajarapaitane.

²⁰ Pajumatsutota Jesús cobematabiabarutatsi cruzajavabelia, bajarapajumatsuto eca tomaravecua imoxoyo. Bajaraxuata judíovi ayaibitsaëtoxaneto tomarapijivi leba bajarapaitane. Bajarapaitane yaquinaruta acueyabi paviriavibeje pijajumeta. Yaquinaruta hebreojumeta, griegojumetanua, latínjumetanua.

²¹ Nexata sacerdotevi penamatacaitorobivi jumaitsi Pilatojavabelia:

—Apo xanepanae raja neyaquinarutsiaexanaenexa mapejumaitsiitaneje, “Mara ponėje, judíovi pepo pevetsinėje,” pejaitane. Biji rajane icatsia yaquinarutsiaexanare pejumaitsiitane mapacueniaje: “Mara ponē jumait-sije: ‘Xanē raja judíovi pepo taevetsinē,’ jai,” pejaitane icatsia yaquinarutsiaexanare, jai sacerdotevi penamatacaitorobivi Pilatojavabelia.

²² Nexata Pilato jumaitsi sacerdotevi penamatacaitorobivijavabelia:

—Pacuenia baja yaquinarutsiaexanajē, bajarapacuenia jema rucae, jai Pilato sacerdotevi penamatacaitorobivijavabelia.

²³ Vajabitsaē Jesús pecobematabiabarutscujinaetsi cruzajavabelia, Jesús penaxatatsijavami, xua jumaponapona, vajabitsaē nota. Cuatro xuabeje tsanaeya jeba. Caenē canacujitsia natsicobetsanaejitsia. Saicaya tsatabuata itsajava, xua Jesús naxatatabiaba piapijavareca. Bajaraxua apo xainae pecaucutsiajoronaejava. Pecuejava saya caepanacujinae.

²⁴ Nexata vajabitsaē najumaitsi:

—Apo titicae tsanetsi bajaraxua. Canamuxusitsianatsi beibotoxi vajayapētaenexa ponē pitsijitsia bajaraxua, najai vajabitsaē.

Bajarapacuenia vajabitsaē itsa exana, Jesús jane baja tocopiapatatsi pacuenia baja cajena Dioso pejumelivaisibaxutota, tajēvelia jumaitsi Jesús penaxatatsijava yabara. Dioso baja cajena pejumelivaisibaxutota, tajēvelia jumaitsi Jesús penaxatatsijava yabara mapacueniaje: “Natsicobetsanaena tanaxatatsijava. Canamuxusitsiana beibotoxi peyapētaenexa ponē pitsijitsia,” jai baja cajena tajēvelia Dioso pejumelivaisibaxutota Jesús penaxatatsijava yabara. Nexata vajabitsaē canamuxusita beibotoxi peyapētaenexa ponē pitsijitsia piapijavareca, Jesús penaxatatsijavami.

²⁵ Pacujinae abaxē Jesús athēbēyo ruca cruzata, cruza bēxēpanata nubena acueyabi povamaxēto ēMariavēnēvanē. Itsava Jesús pena. Itsava Jesús penava, Cleofas pijava. Itsava María, Magdala tomarapijiva.

²⁶ Nexata Jesús itsa taerucaica, taenutsica pena, pijajivitonē bitso piasivanē yajava. Jesús pena pemuxuneneta nuca bajaraponē. Jesús nexata jumaitsi penajavabelia:

—Ena, maponē nuca nemuxunenetaje, benexēnatocuenia taename, jai Jesús penajavabelia.

²⁷ Bajaraxuacujinae icatsia Jesús jumaitsi pijajivitonējavabelia:

—Mapovaje beenacuenia taename, jai Jesús.

Bajaraxuacujinae Jesús pijajivitonē pijaboyabelia barēpona Jesús pena, Jesús pena penaecaenexa bajaraponē pijabota.

Pacuenia baja Jesús tēpa yabara pelivaisi

(Mt 27.45-56; Mr 15.33-41; Lc 23.44-49)

²⁸ Jesús baja yapētane petocopiarucaejavatsi daxita pacuenia tajēvelia vajunupaebatsi Dioso pejumelivaisibaxutota. Nexata jane baja Jesús pecopiarutsinexa daxita abaxē xua tosaicatsi, Jesús jumaitsi:

—Mera bitso jitsipajë, jai Jesús.

²⁹ Nexata bajarajota vaxi eca. Vënëqueca piajatuvinora. Nexata vajabitsaenë esponjavënëjava jabuta bajaraporayalia. Bajaraxuacujinae naeboupita ruta bajarapaesponjavënëjava. Toyotsiatsi Jesús. Tsiuiborutatsi Jesús petsutsuninexa.

³⁰ Jesús nexata tsutsune bajaraxua. Bajaraxuacujinae Jesús jumaitsi:

—Daxita rajane baja taexanaejava, veretajë, jai Jesús.

Nexata irataeya tēpanajereca.

Pacuenia Jesús becuerebota yenecacuatatsi yabara pelivaisi

³¹ Pascuavënë fiesta junua. Nexata abaxë caematacabi sajina pejonenexa judíovi penacueraevetsimatacabinexa. Bajaraxuata judíovi apo jitsipae Jesúsana baja matavëjëa perubenaеjava cruzata. Tsipaji pascuavënë fiesta-matacabi ita junua judíovi penacueraevetsimatacabinexa, judíovi bitso banajamatabëcuenereviaba daxita penacueraevetsimatacabanë matatoxenetsia. Bajaraxuata judíovi vajëta Pilatojavabelia Pilato vajabitsaë pitorobinexa pethaëepatsicababenexatsi Jesúsana, cruzata perubenaеvi, bepíjia bajarapamonae petēpaenexa. Itsa baja bajarapamonae tēparubena, penotsinexatsitsica cruzavecua pecaponaenexatsi itsajavabelia.

³² Nexata vajabitsaë ita ponalia, Jesús peyajava cobematabi-abarutsinëtsibeje asaëbeje abaxë tsarucae. Bajaraxuata copiaya itsanë thaëepatsicabiabatsi. Bajaraxuacujinae icatsia itsanë thaëepatsicabiabatsi.

³³ Nexata Jesús vajabitsaë ita cujibaliatsi, taerutatsi baja Jesús petēpaenë. Bajaraxuata Jesús apo thaëepatsicabiabitsi.

³⁴ Itsiata baitsi jane vajabitsaëvivyajuvënëne becuerebota Jesús yenecacuatatsi. Bajarapavajënëyarena pitsapa pijana, mera yajava.

³⁵ Xanë raja, Juannë, pacatoyaquinatsi mapalivaisije. Tataenë bajarapacuenë. Nexata xanë yapētaniji bajarapacuenë pexaniajaicuenë. Nexata bajarapalivaisi pacatoyaquinatsi panejumecovënëtsinexa paxamë ata.

³⁶ Bajarapacuenia Jesús apo thaëepatsicabiabitsi petocopiapatsixaetsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso baja cajena pejumelivaisibaxutota Jesús yabara tajëvelia jumaitsi mapacueniaje: “Apo siepatsicabiabi tsanetsi itsiata caesitoyo ata,” jai baja cajena tajëvelia Dioso pejumelivaisibaxutota Jesús yabara.

³⁷ Itsabaxutota pijinia tajëvelia jumaitsi Jesús yabara mapacueniaje: “Bajarapamonae taena pecacuatsivajënëtsi,” jai baja cajena itsabaxutota Jesús peyenecacuatsijavanexatsi yabara.

Pacuenia Jesús petēpaenë mëthëtatsi yabara pelivaisi

(Mt 27.57-61; Mr 15.42-47; Lc 23.50-56)

³⁸ José, Arimatea tomarapijinë. Bajaraponë judíovi pevetsiviyajuvënëne. Nexata José jumecovënëtaponapona Jesús Cristocuene. Itsiata apo najamatabëcueneitajëtsi pejumecovënëtsijava Jesús Cristocuene. Tsiipaji cujunava penajuaevetsivi judíovi. Nexata baja Jesús ita tēpa, José itsiata najamatabëcueneitajëta. José vajëta Pilatojavabelia Jesús petēpaenë pepitsinexatsica cruzajavavetsica pemëthëttsinexa. Nexata baja tocopatatsi. Nexata José lia Jesús perucaejavabelia pecaponaenexa Jesús petēpaenë.

³⁹ Nicodemo, ponë meravi pona pebarëcuaiicuiainexa Jesús, bajaraponë ata judíovi pevetsiviyajuvënëne. Nexata Nicodemo Joséta nalia. Caponabeje treinta pakilobeje petuxujuvibenonë, pematajërëabibenonë petuxujuvijavata.

⁴⁰ Nexata Josébeje Nicodemobeje cruzajavavetsica pitsicabeje Jesús petēpaenē. Petsiothocaecujinaebeje petuxujuvibenonē, pexaniaviria piapiasábanapanata mataquionaeya daxitanēreca matacacēbabeje. Bajarpacuenia exanabeje tsipaji judíovi baxaniavaeta petēpaejiviyo pemēthētsinexa bajarapacuenia.

⁴¹ Itsajota Jesús cruzajavabelia cobematabiabarutatsi, bajarajota imoxoyo peubinaenē ayaiabacoboxaneto eca. Bajarpabacabojavata Jesús petēpaevajēnaeya, José cajena exanaeyaexanabuata iboitapajanitojavata pinijiihovaju. José pijamonaejivi itsa totēpatsi, pebuatsinexa bajarapaibovajulia. José ata itsa tēpa, pebuatsinexatsi bajarapaibovajulia. Nexata bajarapaibovajulia abaxē itsajiviyo ata petēpaejiviyo apo buatsitsi.

⁴² Nexata bajarapaibovajulia Josébeje Nicodemobeje Jesús petēpaenē buatabeje. Tsipaji bajarapaibovaju boca imoxoyo. Judíovi ata baja penacuer-aevetsimatacabinexa, bitso baja imoxoyo pejonenexa. Bajaraxuata bajarapaibovajulia Jesús petēpaenē buatatsi.

20

Pacuenia Jesús petēpaeujinae icatsia asaē yabara pelivaisi (Mt 28.1-10; Mr 16.1-8; Lc 24.1-12)

¹ Judíovi baja penacueravetsimatacabi verevereca. Nexata meravia pitsijavata, bajayacunua, ajena matacabi tsarucaponae, itsiata abaxē itsa aitaquiri, María Magdala tomarapijiva pona Jesús petēpaenē pebuatsiibovajutsijavabelia. Nexata María tane ibopanaxanetomi petixitanutsijavalia ibovajuvēpavecua.

² Nexata María cujinaejinarena itsaberena Simón Pedro ponapona. Bajarajota Simón Pedro yajavaponapona itsanē Jesús pijajivitonē, ponē bitso asiva Jesús. Nexata María jumaitsi bajaraponēbejejavabelia:

—Vajatuxanenēmi ra covē jutatsi pebuatsiibovajutsivecua. Apo payapētaenē raja itsabelia icatsia buatatsi, jai María.

³ Nexata Pedrobeje Jesús pijajivitonēbeje ponabeje Jesús pebuatsiibovajutsijavabelia.

⁴ Najuacujinaejinaliabeje. Itsiata itsanē Jesús pijajivitonē bitsojinaeya cujinaejina Pedro matatoxenetsia. Bajaraponē copiaya palia Jesús pebuatsiibovajutsijavabelia.

⁵ Itsa bajaraponē nabēxētsutsiaya naēcolia ibovaju bēxēpanalia, nexata taeyabualia Jesús daxitanē pematacacēbipanamitsireca pebocaejava bajarapaibovajulia. Bajaraponē itsiata abaxē apo jonelia.

⁶ Bajaraxuacujinae Simón Pedro cotocaevi pata. Nexata ibovajulia Pedro joneya. Pedro ata tane Jesús pematacacēbipanamitsireca pebocaejava bajarajota.

⁷ Papanata Jesús saicaya matacētatsi, apo yajavabocae bajarajota. Saicayajavata xaniavaetsia quionabuata.

⁸ Nexata ponē copiaya pata Jesús pebuatsiibovajutsijavata, najoneya jane baja. Tane pacuenia Jesús vecuapitsapa bajarapaibovaju. Nexata jane baja bajaraponē jumecovēnēta xaniavaetsia Jesús icatsia piasaējava petēpaeujinae.

⁹ Abaxē picani bajaraponē apo jumeyapētae pacuenia Dioso pejumelivais-ibaxutota jumaitsi Jesús petēpaeujinae icatsia piasaējavanexa yabara.

¹⁰ Bajaraxuacujinae Jesús pijajivitonēbeje naviatabeje baja pijaboyabelia.

Pacuenia Jesús petēpaecujinae tsitanaitajēta María Magdala tomarapijivajavabelia yabara pelivaisi
(Mr 16.9-11)

¹¹ María nuenuca Jesús petēpaenē pebuatsiibovajutsijumavelia. Nexata María yaitaxutonueya nabēxētsutsiaya naēcolia ibovaju bēxēpanalia.

¹² Nexata María taeyelia anijanēbeje ángelnēbeje, penioponaejava penaxatatsinēbeje. Ecabeje itsajota picani Jesús petēpaenē buatatsi. Itsanē eca Jesús pematabocotomijavavereca. Itsanē eca Jesús petaxumijavatsina.

¹³ Nexata ángelnēbeje jumaitisibeje Marijajavabelia:

—¿Detsa xuajitsia nuame? jaiibeje.

María nexata jumaitsi:

—Tsipaji covē itsamonae jutatsi tajatuxanenēmi. Nexata apo yapētaenē itsabelia icatsia buatatsi, jai María ángelnēbejejavabelia.

¹⁴ María ajena najumeveretanajelia bajarapacuenia pejumaitsijava, napēnēyorotsiaya naēcolia. Taenuta Jesús penucaejava bajarajota. Itsiata abaxē María apo yapētae Jesús cuene.

¹⁵ Nexata Jesús jumaitsi Marijajavabelia:

—¿Detsa xuajitsia nuame? ¿Jipatsa jaitame? jai Jesús.

María nexata Jesús yabara saya jamatabējumaitsi:

—Matsamēra ponē mapaunubacabo pevetsinēje, jamatabējai María.

Bajaraxuata María caranata Jesúsjavabelia jumaitsi mapacueniaje:

—Xamē itsa jutame Jesús petēpaenē, netsipaebare itsajota buatame. Pitsi-jitsianē tacaponaenexa, jai María.

¹⁶ Jesús nexata junataxuaba María pevēnēta.

—¡María! jai Jesús.

María nexata napēnēyorolia Jesúsjavabelia. Judíovi pijajumeta María jumaitsi Jesúsjavabelia:

—¡Rabuni! jai. “Rabuni,” itsa jai hebreojumeta, mapajumetaje pejumaitsi-jume: “Xamē tanecujarubinēmē,” pejaijume.

¹⁷ Jesús nexata icatsia jumaitsi Marijajavabelia:

—Pētsa nejayaremena. Tsipaji raja abaxē apo ponaenē taxa peecaejavabetsia. Ponare jane tajajivijavabelia. Tsipaebianame tajajivijavabelia taponaejavanexa taxajavabetsia. Taxa rabaja, paxamē ata paneaxa. Ponē tajaDioso, bajaraponē paxamē ata panijaDioso, jai Jesús Marijajavabelia.

¹⁸ Nexata María Magdala tomarapijiva pona baja petsipaebinexa Jesús pijajivijavabelia. Pona baja petsipaebinexa pacuenia tane pepo petuxanenē Jesús. Nexata María Jesús pijajivijavabelia tsipaebanua daxita pacuenia Jesús jumaitsi.

Pacuenia Jesús petēpaecujinae tsitanaitajēta pijajivijavabelia yabara pelivaisi
(Mt 28.16-20; Mr 16.14-18; Lc 24.36-49)

¹⁹ Pamatacabi María tane Jesús, icatsia itsa asaē petēpaecujinae, bajara-pameravi nacaetuata daxita Jesús pijajivi. Daxita baupanē xaniavaetsia nayabaupaxataba. Tsipaji Jesús pijajivi judíovi cjunava. Jesús itsiata joneya. Jemata nuca pijajivi tuatujēta. Jesús jumaitsi pijajivijavabelia:

—¡Paxamē saya pajamatabējemamēre! ¡Pētsa pajunavame! jai Jesús.

²⁰ Bajarapacuenia Jesús pejumaitsicujinae, pijajivijavabelia tsitajēta pecobevajēnēbeje. Nayenevājēnitajētanua pijajivijavabelia. Bajarajota Jesús pijajivi bitso barēya icatsia petaxae pijatuxanenē.

21 Nexata Jesús icatsia jumaitsi:

—¡Paxamë saya pajamatabëjemamëre! ¡Pëtsa pajunavame! Pacuenia taxa nitoroba, bajarapacuenia juya pacaitorobatsi jivijavabelia pexanialivaisi panetsipaebaponaenexa, jai Jesús pijajivijavabelia.

22 Nexata Jesús uxunelia asaëyata pijajivi pematatsënëalia. Jumaitsi pija-jivijavabelia:

—Espíritu Santo pacopiapire panejamatabëëthëtota papecatsija-matabëecaenexa.

23 Nexata itsamonae pibisiacuene pexanaeoneconi itsa pavecuaajibiaex-anaename, nexata baja pibisiacuene pexanaeoneconi pepacue vecuaa-jibitsi tsane. Itsa apo pavecuaajibiaexanaemë tsane itsamonae pibisi-acuene pexanaeoneconi, nexata pibisiacuene pexanaeoneconi apo vecuaa-jibitsi tsane, jai Jesús pijajivijavabelia.

Pacuenia Tomás Jesús tane Dioso piasaëyaexanaecujinaetsi petëpaecujinae yabara pelivaisi

24 Jesús pijajiviyajuvënënë, pevënë Tomás, ponë vënërubatsi itsavënë, Sapalanë. Bajaraponë piajibitsarucaejavata, Jesús pijajivijavabelia tsi-tanaitajëta.

25 Nexata Tomás itsa pata, Jesús pijajivi jumaitsi Tomásjavabelia:

—Pacatsutanetsi rabaja necovëta vajatuxanenë, jai Jesús pijajivi.

Nexata Tomás jumeaebiaya jumaitsi:

—Itsa pepacue taenajë cruzajavabelia clavota pecobematabiabarut-sivajënëtsibeje, nacobesibëtsianajë pecobevajënëyalia. Nacobesibëtsianajë peyenevajënëyalia ata. Nexata jane baja matapania jumecovënëtsianajë Jesús icatsia piasaëjava petëpaecujinae, jai Tomás Jesús yabara.

26 Bajaraxuacujinae, ocho pamatacabibejecujinae, Jesús pijajivi icatsia bota nacaetuata. Tomás ata jane baja naponapona. Nexata daxita baupanë icatsia xaniavaetsia nayabaupaxataba. Jesús itsiata joneya. Jemata nuca pijajivi tuatuajëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

27 Bajaraxuacujinae Jesús jumaitsi Tomásjavabelia:

—Tomás, taema rajane baja tacobevajënëbeje. Nacobesibëtsiaremelia jane baja tacobevajënëyalia. Nacobesirovire jane baja tayenevajënëyalia nebëtsinexa. Pëtsa baja xuacujinae jumeaebame. Jumecovënëre jane baja icatsia tasaëjava tatëpaecujinae, jai Jesús Tomásjavabelia.

28 Nexata Tomás jumaitsi Jesúsjavabelia:

—¡Tajatuxanenë, tajaDioso! jai Tomás.

29 Jesús nexata icatsia jumaitsi:

—Tomás, aeconoxae rajane baja jumecovënëtame icatsia tasaëjava tatëpaecujinae. Tspaji baja nijacuata netaneme. Xamë matatoxenetsia bitso nesivajamatabëcuenebarëya tsane pamona apo netae ata, itsiata jumecovënëta icatsia tasaëjava tatëpaecujinae, jai Jesús Tomásjavabelia.

Pajamatabëcuene yabara yaquina mapacuyalatoje yabara pelivaisi

30 Jesús pijajivi pitabëta exanapona orijibia itsajavanë pinijicuene Dioso pesaëta pexanaejavanë. Itsiata bajaraxuanë pelivaisi apo yajavayaquinaenë mapacuyalatoje.

31 Itsiata mapalivaisi pacatoyaquinatsije panejumecovënëtsinexa Jesús athëbëvetsica Dioso pitorobijavatsica vajanacacapanepaenexa, panejumecovënëtsinexanua Jesús Dioso pexënatocuene. Nexata itsa

pajumecovënëtsianame mapalivaisije, paxainaename matacabi apo pevereverecejava Jesús pejamatabëcueneta.

21

Pacuenia Jesús petëpaecujinae icatsia itsa asaë, tsitanaitajëta pijajivijavabelia, siete ponëbejejavabelia, yabara pelivaisi

¹ Jesús petëpaecujinae icatsia itsa asaë, tsitanaitajëta pijajivijavabelia Tiberiasvënë pucaxanetoitapata. Jesús icatsia pijajivi itsa tsitanaitajëta, maitsije.

² Caejavata Jesús pijajivi najuajinavanapa mapamatabëxëyoje. Najuaponaponabeje Simón Pedrobeje Tomásbeje, ponë vënërubatsi itsavënë, Sapalanë. Najuaponaponabeje pijinia anijanëbeje, Zebedeo ëpëxënatobeje. Najuaponaponabeje pijinia itsanëbeje icatsia pematatsënëa. Natanael ata naponapona bajarajota. Canávënë tomarapijinë Natanael. Canátomara eca Galilea nacuata.

³ Nexata Simón Pedro jumaiti penajuajinavanapaevijavabelia:

—Dujuai raja yamatajucaejsianë, jai Pedro.

Nexata penajuajinavanapaevi jumaiti:

—Paxanë ata panaponaenajë xamëta, jai.

Nexata pucaxanetovjavabelia pona. Bajarajotalia jerata naropoba. Itsiata bajarapameravi caenë ata dujuainë bajarapamonae apo yamatajutsi.

⁴ Ajena baja matacabi tsina, Jesús pijajivi tsitanaitajëta Tiberiaspuca itapata. Itsiata Jesús pijajivi apo yapëtaetsi Jesúsucene.

⁵ Nexata Jesús jumaiti pijajivijavabelia:

—¿Jica? ¿Dujuainë apo payamatajutsimë caenë ata? jai Jesús.

Nexata Jesús pijajivi jumaiti:

—Ajibi cajena, jai.

⁶ Nexata icatsia Jesús jumaiti pijajivijavabelia:

—Dujuai paneyamatajucaejava, panecujuanenia pamuxunene, pacoparemea jerayenepanareca. Bajarapacuenia payamatajutsianame dujuai, jai Jesús pijajivijavabelia.

Nexata Jesús pijajivi dujuai peyamatajucaejava bajarapacuenia copareca. Bajaraxuacujinae pejutsinexatsina menevecua apo cajëpaetsi. Tsipaji bitso ayajjava dujuai tojuuatsi.

⁷ Nexata Jesús pijajivitonë, ponë Jesús bitso asiva, bajaraponë jumaiti Pedrojavabelia:

—¡Vajatuxanenë tsaena rabaja maje! jai Pedrojavabelia.

Nexata Simón Pedro caejumetaetabi bajarapacuenia pejumaitisijava Jesús yabara, jumasa penucaenë, naxatataxuaba penaxatatsijava. Jopanucalia menialia naxanitsiayo pepatabinexa Jesúsjavabelia.

⁸ Jesús pijajivi meneitapavecua tajë apo yarubenaë. Cien metrocuenia saya yarubenalialia. Nexata itsamonae Pedrohana penajuajinavanapaevi jerata pata tajetabuabelia. Robobocabuatapona dujuai peyamatajucaejava. Tovënëcatsi cajena dujuai.

⁹ Bajarapamonae itsa nonobajunalia tajetabuabelia, taeyeta isotoitaire. Bajara paisotoitairejumavereca taeyabuata dujuainë, panbéanë yajava.

¹⁰ Nexata Jesús jumaiti pijajivijavabelia:

—Aeconoxae dujuai itsa payajutsiaremena, pacaponaenimina panexaniavaetsinexa, jai Jesús pijajivijavabelia.

¹¹ Pedro nexata jeraënëa berunareca tajetabuaberena peyarobobo-caenexarena dujuai peyamatajucaejava. Nexata bajaraxua dujuai

vënēca pinijidujuainēanē. Ciento cincuenta y tres ponēbeje. Itsiata dujuai peyamatajucaejava, dujuai ayaijava ata, apo yaucucucuae.

¹² Nexata Jesús jumaitsi pijajivijavabelia:

–Naxanitsia. Vepanabanianame, jai Jesús pijajivijavabelia.

Itsanē ata Jesús pijajivitonē apo yanijobi Jesúsjavabelia. “¿Jipatsamē?” apo jai. Tsipaji baja bajarapamonae yapētane pijatuxanenē Jesúsucue.

¹³ Jesús nexata cujilia bajarapaisoto. Pita baja panbēanē. Tsicobetsana pijajivi. Bajarapacuenia icatsia Jesús dujuaijavanē ata tsicobetsana pijajivi.

¹⁴ Bajarapacuenia Jesús pijajivijavabelia acueyabijava tsitanaitajēta, petēpaecujinae icatsia itsa asaē.

Pacuenia Jesús petēpaecujinae itsa naitajēta cuaicuaijai Simón Pedrojavabelia yabara pelivaisi

¹⁵ Penabaniveretsicujinae Jesús jumaitsi Simón Pedrojavabelia:

–Simón, Jonás pexēnatomē, ¿xamē tsaja bitso niasivamē mapamonae taneasivajava matatoxenetsiaje? jai Jesús.

Pedro nexata jumaitsi:

–Jājā. Xamē rabaja nejamatabēcueneyapētaneme tacaasivajava, jai Pedro Jesúsjavabelia.

Jesús nexata jumaitsi Pedrojavabelia:

–Nexata pacuenia pijaoveja pevetsinē xaniavaetsia baeveta pijaoveja, bajara pijinia pacuenia xamē xaniavaetsia netoebetabianame tajajivi, pamonae tanepejanajumecovēnētsivi. Bajarapamonae taniji betajaovejaxi-cuenia, jai Jesús.

¹⁶ Nexata icatsia Jesús jumaitsi Pedrojavabelia:

–Simón, Jonás pexēnatomē, ¿xamē tsaja niasivamē? jai.

Pedro nexata icatsia jumaitsi:

–Jājā. Xamē rabaja nejamatabēcueneyapētaneme tacaasivajava, jai Pedro Jesúsjavabelia.

Jesús nexata icatsia jumaitsi:

–Nexata xamē netoevetsianame tajajivi, pamonae nesivanajamatabēcopata xanējavaberena. Bajarapamonae taniji betajaovejacuenia, jai Jesús.

¹⁷ Icatsia matavējēa Jesús jumaitsi Pedrojavabelia:

–Simón, Jonás pexēnatomē, ¿xamē tsaja niasivamē? jai icatsia.

Pedro nexata bejamatabējibireca matavējēa peyanijobaponaexaetsi Jesús piasivajava yabara. Nexata Pedro jumaitsi Jesúsjavabelia:

–Xamē baja cajena yapētaneme daxitacue. Nexata baja nejamatabēcueneyapētaneme bitso tacaasivajava, jai Pedro.

Jesús nexata tajēvelia jumaitsi Pedrojavabelia:

–Nexata xamē netoevetsianame tajajivi, pamonae taniji betajaovejacuenia.

¹⁸ Xaniajanē pacuenia catsipaebijitsiatsi. Itsa abaxē pamatacabi pevējēatomē, naxatatabiabame nenaxatatsijava nijacuata. Nexata nejitsipaejavabelia ponabiabame. Itsa pamatacabi perujunēmē tsane, pacuenia bitso perujunēyo banamaxēcaeveta itsajivi pijacamisa pexatatsinexatsi, bajarapacuenia namaxēcaevetsianame itsamonae pecacobecētsinexa pecacaponanexa itsabelia picani apo jitsipaemē tsane neponaejava, j Xaniajanē pacuenia catsipaebijitsiatsi. Itsa abaxē pamatacabi pevējēatomē, naxatai Jesús tajēvelia Pedrojavabelia.

19 Bajarapacuenia Jesús jumaitsi Pedrojavabelia Pedro tajëvelia peyapëtaenexa pacuenia beyaxuabijitsiatsi Dioso pejumelivaisi pejumecovënëtsixae. Itsa baja Jesús najumevereta bajarapacuenia pejumaitsijava, Jesús jumaitsi Pedrojavabelia:

—Pedro, naxanitsia. Nepënaponare, jai Jesús.

Nexata baja Pedrobeje Jesúsbeje ponatababeje pesaicaeyojavabelia.

Jesús pijajivitonë, ponë bitso Jesús asiva, penavajunupaebijava yabara pelivaisi

20 Xanë Juannë, Jesús pijajivitonënë, bitso taneasivanë. Pamatacabi caniviyopijijava panabaniji Jesús pebeyaxuabivajënaetsi, xanë Jesús pemuxuneneta ecajë. Nexata bajarajota yanijobecajë. “Tajatuxanenë, ¿jipatsa cacanajetsiana nijavajabitsaë pecobeyabelia?” janë Jesúsjavabelia. Nexata Jesús pebeyaxuabicujinaetsi, icatsia itsa asaë, panetsitanaitajëta. Nexata bajarapamatacabi Jesúsbeje Pedrobeje pesaicaeyojavabelia ponatababeje. Nexata xanë pecovëvelia cotocaevajë. Nexata Pedro Jesús pecovëya najetaruca. Pedro itsa napënëyorotaba caevëarena, netaetaba bajaraponëbeje pecovëya tanajetarucaejava.

21 Nexata Pedro itsa netane, xanë tatëpaejavanexa yabara, yanijoba Jesúsjavabelia.

—Tajatuxanenë, ¿detsa pacuenia tēpaena maponëje? jai Pedro Jesúsjavabelia.

22 Jesús nexata jumaitsi Pedrojavabelia xanë yabara:

—Itsa xanë tojitsipaejitsipajë bajaraponë piasaëtsaponaponaenexa, asaë tsaponaponaë tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae. Nexata xamë saicaya caasaëmë tsaponaponaë tsane nexanaejava, pacuene caitorobatsi, jai Jesús Pedrojavabelia.

23 Bajaraxuata patanajuajinavanapaevi, Jesús pijajivi, xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Itsiata baitsi jane Jesús apo jumaitsi: “Juan raja apo tēpae tsane.” apo jai. Jumaitsi rajane mapacueniaje: “Itsa xanë tojitsipaejitsipajë bajaraponë piasaëtsaponaponaenexa, asaë tsaponaponaë tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae,” jai Jesús xanë yabara Pedrojavabelia.

24 Xanë Jesús pijajivitonënë. Patanajuajinavanapaevi xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Bajarapacuenia tanesivajamatabëjumaitsinë, Juannë, yaquinajë daxita mapalivaisije. Yapëtanetsi baja cajena palivaisianë Jesús nacatsipaeba, pexaniajailivaisianë.

25 Jesús pinijicue ne pexanaejavanë Dioso pesaëta, ayaijava exana mapanacuataje. Itsajavanë ata exana pematatsënëa. Nexata bajaraxuanë, caejavayo canacujitsia pelivaisi, itsamonae itsa yaquinaejitsipa, bajaraxuanë pelivaisibaxutonë bitso ayaijava tsipae. Nexata meta bajarapalivaisibaxutonë vënëcaejitsipa mapanacuaje.

Pacuenia exanavanapa Jesús pitorobivi, apóstolevi

Pacuenia Jesús tajëvelia vajunupaeba Espiritu Santo pepatsijavanexatsica mapanacuayabetsicaje yabara pelivaisi

¹ Teófilo, xanë Lucasnë, catoyaquinatsi mapabaxutoje. Copiaya baja cajena catoyaquinatsi itsabaxutota daxita Jesús pexanaejavanë pelivaisi. Nexata copiayapijibaxutota catoyaquinatsi xuamaxëto Jesús exana petaxuubijavaveliacujinae pexanaejava. Daxita bajaraxuanë pelivaisi, catoyaquinatsi. Pacuenia ata Jesús pexanialivaisi jivi tsipaebaponapona, abaxë itsa ponapona mapanacuataje, bajarapalivaisi ata catoyaquinatsi.

² Matapania pamatacabi Jesús athëbëabetsia Dioso caponatsi, bajarajota Jesús baja copiaruta pexanaejava. Nexata baja itsajota Jesús copiaruta pexanaejava, bajarajota pijinia copiarutajë copiayapijibaxutota tacatoyaquinaejava, Jesús pexanaejavanë pelivaisi. Athëbëabetsia Jesús Dioso pecaponaevajënaetsi, Jesús itapeta pijajiviyajuvënëvi apóstolevinexa. Nexata Jesús itoroba pijajivi, apóstolevi, jivi pexanialivaisi petsipaebanajetarubenaenexa daxitanacuanëjava. Espiritu Santo pejamatabëcueneta Jesús yapëtaeyaexanatsi pacuenia itorobijitsia pijajivi, apóstolevi.

³ Bajaraxuacujinae Jesús pijavajabitsaë beyaxuabatsi. Jesús petëpaecujinae icatsia itsa asaë, anijatonë tsitanaitajëtabiaba pijajivijavabelia. Cuarenta baja pamatacabibeje itsa panepa Jesús icatsia piasaëcujinae, pona jane baja athëbëabetsia. Bajarapacuenia anijatonë Jesús pijajivi petsitanaitajësixae petëpaecujinae, nexata pijajivi yapëtanetsi Jesús icatsia piasaëjava petëpaecujinae. Jesús pijajivi itsa tsitanaitajëtabiaba, Jesús pijajivi tsipaebabiaba Dioso pijajivi pevetsijavanexa.

⁴ Nexata Jesús pijajivi itsa tsitanaitajëta Jerusalén tomarata, Jesús jumaiti pijajivijavabelia mapacueniaje:

—Pëtsa abaxë paponame mapatomaravecuaje. Pacopiaevetavanapae-name abaxë Espiritu Santo. Bajaraponë yabara taxa Dioso najumeca-panepaeya jumaiti papecatoitorobinexatsica. Xanë ata bajaraponë yabara pacatsipaebatsi baja cajena panecopiaevetavanapaenexa.

⁵ Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espiritu Santo, jai Jesús pijajivijavabelia.

Pacuenia Jesús petëpaecujinae icatsia itsa asaë, athëbëabetsia baja pona yabara pelivaisi

⁶ Jesús petëpaecujinae icatsia itsa asaë, tsitanaitajëta pijajivijavabelia. Nexata Jesús pijajivi penacatuatsijavata, Jesús pijajivi yanijobatsi. Jesús pijajivi jumaiti mapacueniaje:

—Patajatuxanenë, ¿xaniajai tsabaja? ¿Itsanacuapijivi pevetsijava mapanacuaje pecopatsinexa, xamë vecuapitsapaeyaexanaename mapamatacabitaje? ¿Nexata tsaja vajaviriavi judíovi juya evetsiaexanaename vajanacayanacuaeveetsinexa? jai Jesús pijajivi.

⁷ Nexata Jesús jumaiti pijajivijavabelia:

—Xua yabara paneyanijobame, paneyapëtaenexa, taxa Dioso apo pacatocopatsi. Apo pacatocopatsi paneyapëtaenexa pamatacabita, paepatota ata, taxa

Dioso pexanaejava, copiapatsijitsia. Caenë taxa Dioso yapëtane pamatacabi bajaraxua copiapatsijitsia.

⁸ Itsiata baitsi jane paxamë ajumejunavijibia papaebianame xanë talivaisi Espiritu Santo ita pacatsijamatabëpatsianica paxamëjavabetsica. Nexata pan-elivaisipaebanajetarubenaename Jerusalén tomarajava, Judea nacuaajava ata, Samaria nacuaajava ata, tajënacuatubujava ata, jai Jesús pijajivijavabelia.

⁹ Bajarapacuenia Jesús pejumaitsicujinae pijajivijavabelia, Jesús baja pijajivi pitabënejeva, athëbëabetsia Dioso caponatsi. Itarërëbo baja Jesús pëcaevaya. Nexata baja Jesús pijajivi acuenebi matavëjëa petaejaya.

¹⁰ Nexata Jesús pijajivi pëtaenubena athëbëabetsia Jesús pepëcaevijavatsia. Nexata ángelnëbeje, penioponaejava penaxatatsinëbeje, Jesús pijajivi jemata bajarajota tsitanaitajëtatsi.

¹¹ Nexata ángelnëbeje jumaitsibeje Jesús pijajivijavabelia:

–PaGalilea nacuapijivimë, ¿detsa xuajitsia athëbëabetsia pataenubename? Bajaraponë Jesús paxamëjavavetsia Dioso pacavecuacaponatsi athëbëabetsia. Bajaraponë icatsia itsamatacabi patsianica. Pacuenia pataneme petsiajaya, bajara icatsia pacuenia patsianica, jai ángelnëbeje Jesús pijajivijavabelia.

Pacuenia Jesús pijajivi natsicueyaitapeta Matíasvënëñë apóstolenënexa yabara pelivaisi

¹² Jesús baja peponaecujinae athëbëabetsia, Jesús pijajivi, apóstolevi, naviaba Jerusalén tomaraberena. Naviaba olivonaenë penubenaetsutojavaverena. Bajarapatsuto eca caekilómetrocuenia Jerusalén tomaravecuca.

¹³ Nexata Jesús pijajivi pata Jerusalén tomarata. Nexata pabota Jesús pijajivi najinavanapa, athëbëyo pexanaeirajavabetsia junaya. Tsipaji baja cajena tsicopatatsi bajarapairatatsia pejinavanapaenexa. Pamonae Jesús pijajivi apóstolevi, mapevënëanëje. Itsanë pevënë Pedro. Itsanë Santiago. Itsanë Juan. Itsanë Andrés. Itsanë Felipe. Itsanë Bartolomé. Itsanë Mateo. Itsanë Santiago, Alfeo pexënato. Itsanë Simón. Bajaraponë celotenë. Itsanë pevënë Judas, Santiago pejuyapijinë.

¹⁴⁻¹⁵ Pabota Jesús pijajivi apóstolevi najinavanapa, athëbëyo pexanaeirajavatatsia, nacaetuatabiaba caejavata pevajëtabiabinexa Diosojavabelia. Jesús pena María, Jesús pejuyapijivi ata, itsapetiriavi ata yajava, nacaetuatabiaba pevajëtabiabinexa Diosojavabelia. Bajarapajivibitsaëto ciento veinte pajivibeje. Nexata penacaetuatsijavata bajarapamonae tuatujëta Pedro nonotapuna. Pedro nexata jumaitsi penacaetuatsivijavabelia:

¹⁶ –Tajamonae, copiapata rajane baja pacuenia baja cajena tajëvelia jumaitsi Dioso pejumelivaisibaxutota. Pacuenia bajayata Davidpijinë Espiritu Santo pejamatabëcueneta tajëvelia vajunupaebiaexanatsi Judaspijinë pexanaejavanexa, copiapata jane baja. Tsipaji Judaspijinë ita matacapona pamonae Jesús vaetabijitsiatsi, Judaspijinë tocopiapatatsi baja pacuenia Davidpijinë tajëvelia jumaitsi.

¹⁷ Judaspijinë picani paxanëyajuvënëñëmi. Jesús picani bajaraponëmi itapeta penanacuenebinexa paxanëta.

¹⁸ Judaspijinë ira comuata pibisiacuene pexanaematamopalatata. Bajaraponëmi pijacuata nabeyaxuaba. Nexata penabeyaxuabicujinae, pe-matonono ira bejopaica. Nexata cototititicajunua. Daxita pënëmi pitsata-jarabarena.

¹⁹ Daxita Jerusalén tomarapijivi vënëlivaisitanetsi daxita xua tocopiapatatsi Judaspijinëmi. Nexata Judaspijinëmi pecomuatsiira, Jerusalén tomarapijivi

vënëruba Acéldama. “Acéldama,” itsa jai bajarapamonae pijajumeta, mapajumetaje pejumaitsijume: “Papalata pejamatabëcueneta jivitonë beyaxuabatsi, bajarapapalatata pecomuatsiira,” pejaijume, jai Pedro penacaetuatsivijavabelia.

²⁰ Icatsia Pedro jumaiti penacaetuatsivijavabelia:

—Salmosvënëbaxutota tajëvelia Judaspijinë yabara comparacióncuenia jumaiti mapacueniaje:

Pijabo jivinebo xuabetsiana. Itsajivi ata apo ponaponae tsane bajarapabota, jai tajëvelia Salmosvënëbaxutota Judaspijinë apóstolenë penaexanaejavavecua pepitsapaejavanexa yabara.

Itsajavata Salmosvënëbaxutota icatsia tajëvelia jumaiti Judaspijinë yabara mapacueniaje:

Bajaraponëmi penacuenebijavami, itsanë pitsiana,

jai itsajavata Salmosvënëbaxutota itsanë icatsia apóstolenë penaexanaejavanexa yabara Judaspijinë pepitsapaejamatabëcuene, jai Pedro penacaetuatsivijavabelia.

²¹ Icatsia Pedro jumaiti:

—Caenë panetsicueyaajibi doce paponëbejenexanë Jesús petëpacujinae Dioso icatsia piasaëyaexanaejavatsi patataejava patanajuapaebinea. Bajaraxuata bitapetatsi itsanë pataneyabinexa. Paxamë tuatujëta ena patanajuapënjavanapaevi vajatuxanenë Jesús pamatacabi abaxë ponona mapanacuataje.

²² Juanpijinë raja bautisaba Jesús. Bajara pamatacabijavaveliacujinae, panajuapënjavanapajë Jesús, matapania athëbëabetsia Dioso patanevecua caponaematacabitsijavabelia. Nexata bajarapitsinë bitapetatsi Jesús petëpacujinae Dioso icatsia piasaëyaexanaejavatsi patataejava patanajuapaebinea, jai Pedro penacaetuatsivijavabelia.

²³ Nexata pamonae nacaetuata, Dioso pejumecovënëtsivi, anijanëbeje itapeta, Pedrobana jane baja Jesús penajuapënjavanapaevi. Bajaraponëbejeyajuvënënë caenë acueyabi pavënëbeje xaina. Itsavënë José. Itsavënë Barsabás. Itsavënë Justo. Itsanë caevënë xaina. Bajaraponë pevënë Matías.

²⁴ Bajaraxuacujinae bajarapamonae najumaiti:

—Vajëtsianatsi Diosojavabelia vajanacayapëtaeyaexanaenexa, najai.

Nexata jane baja bajarapamonae peyapëtaenexa, ponë Dioso itapetsijitsiatsi apóstolenëxa, vajëta Diosojavabelia. Bajarapamonae pevajëtsijavata Diosojavabelia, jumaiti mapacueniaje:

—Patajatuxanenë, daxitajivi nejamatabëcueneyapëtaenë. Maponëbejeyajuvënënëje, ponë itapetame apóstolenëxa, panetsitajëre.

²⁵ Nexata ponë itapetame, pitsiana xua Judaspijinë vecuapitsapa. Bajaraxua Judaspijinë vecuapitsapa peponaexae infiernojavabelia, jai bajarapamonae pevajëtsijavata Diosojavabelia.

²⁶ Bajaraxuacujinae bajarapamonae pijacuenecujirua exana peyapëtaenexa jane baja ponë apóstolenëxa. Nexata bajarapamonae yapëthane Matías apóstolenëxa. Nexata baja Matías najunua once ponëbeje Jesús pijajivi apóstolevijavabelia. Nexata baja apóstolevi doce ponëbeje.

2

Pacuenia jane baja athëbëvetsica Espiritu Santo patsica Jesús pijajivi petsijamatabëjonexatsi yabara pelivaisi

¹ Itsa baja panepa cincuenta pamatacabibeje pascuavēnēfiesta pev-
ereverecaecujinae, icatsia junua Pentecostēsvenēfiesta. Nexata bajarapa-
matacabi daxita Jesús pijajivi nacaetuata caejavata.

² Nexata bajarapamatacabi athēbēvetsica jemata najumeta bepinijjovi-
boxaneto. Nexata pabota Pedrohana nacaetuata, daxitabo najumeteca.

³ Bajarapamonae tane athēbēvetsica perunaejavatsica bepinarunetsico-
tia. Nexata bajarapamonae caejivi canacujitsia bajarapacofia tsmatanat-
sanaeyarunaicatsi. ⁴ Nexata daxita bajarapamonae tsijamatabēvenēcatsi
Espíritu Santo. Nexata bajarapamonae jemata taxuxuaba penatsipaebijava
itsavirijumenēta, apo penatsipaebijumemi picani. Espíritu Santo saya
pejamatabēcueneta bajarapacuenia itsavirijumenēta natsipaebiaexanatsi.

⁵ Bajarapamatacabita Jerusalén tomarata jinavanapa ayaibitsaētohaneto
judíovi. Bajarapamonae saicaya daxitanacuanējava penaexanaevi.
Bajarapamonae saya napata Jerusalén tomarata penataenexa
Pentecostēsvenēfiesta. Bajarapamonae bitso pejumecovēnētsivi Dioso.

⁶ Nexata bajarapamonae ita jumetane bepinijjoviboxaneto athēbēvetsica
penajumetsijava, nexata pabota Jesús pijajivi nacaetuata, bajarapabota
muxunanacaetuana ayaibitsaētohaneto bajarapamonae. Pavirijumenēta
Jesús pijajivi Espíritu Santo pejamatabēcueneta natsipaebiaexanatsi, bajara-
pamonae pijajumenē. Nexata bajarapamonae xaniavaetsia jumetane xua
yabara Jesús pijajivi tsipaebapona. Bajaraxuata bajarapamonae bitso ja-
matabēcuenenabenajaca. Tspijajivi bajarapamonae caenacuapijivi canacujit-
sia xaniavaetsia jumetaepona pepo pijajumeta Jesús pijajivi petsipaebili-
vaisianē.

⁷ Athēbēvetsica bepinijjoviboxaneto penajumetsijava pemuxunanacaetu-
anaevi, pinijicuenia najamatabēxainaeya jamatabēcuenenabenajaca. Nexata
bajarapamonae najumatsi:

–Daxita mapamonae nacatsipaebanubenaje, Galilea nacuapijivi. Apo
penatsipaebiví picani vajajumenē.

⁸ Vaxaitsi itsaverena patatsi, caenacuapijivitsi canacujitsia saicaya
xainatsi vajajumenē, apo penatsipaebijumenē mapamonaeje.
¿Detsa pacuenia itsiata vaxaitsi, caenacuapijivitsi canacujitsia,
vajanaexanaejavaveliacujinae vajansipaebijumenēta caējēpatsi
penatsipaebinexa mapamonaeje?

⁹ Vaxaitsiyajuvēnēvi raja itsamonae Partia nacuapijivi. Itsamonae Media
nacuapijivi. Itsamonae Elam nacuapijivi. Itsamonae Mesopotamia nacuapi-
jivi. Itsamonae Judea nacuapijivi. Itsamonae Capadocia nacuapijivi. Itsa-
monae Ponto nacuapijivi. Itsamonae Asiavēnē nacuapijivi.

¹⁰ Itsamonae Frigia nacuapijivi. Itsamonae Panfilia nacuapijivi.
Itsamonae Egipto nacuapijivi. Itsamonae Africa nacuapijivi, Cirene
tomarapēnēverenapijivi. Itsamonae vaxaitsiyajuvēnēvi judíovi, Roma
tomarapijivi. Itsamonae apo judíovi, Roma tomarapijivi. Bajarapamonae
apo judíovi ata, Dioso jumecovēnētavanapa pacuenia vaxaitsi judíovitsi
jumecovēnētavanapatsi Dioso.

¹¹ Itsamonae vaxaitsiyajuvēnēvi Creta nacuapijivi. Itsamonae Ara-
bia nacuapijivi. Itsiata daxitatsi jumetanetsi xaniavaetsia Jesús pija-
jivi vajanacatsipaebilivaisianē vajajumenēta. Caejivi canacujitsia baja-
rapamonae Dioso pinijicuenē pexanaejava yabara nacatsipaebapona, na-
jai athēbēvetsica bepinijjoviboxaneto penajumetsijava pemuxunanacaetu-
anaevi.

¹² Nexata daxita bajarapamonae jamatabëcuenenajunaviacanubena. Nexata bajarapamonae najumaitsi:

—¿Detsa meta mapitsijamatabëcuene yabara itsije? najai.

¹³ Itsamonae saya jumecaponaeya jumaitsi Jesús pijajivi yabara:

—Aitajibi ra saya mapamonaeje, jai.

*Pacuenia Pedro tsipaeba athëbëvetsica bepinijijoviboxaneto penajumetsi-
java pemuxunanacaetuanavevijavabelia yabara pelivaisi*

¹⁴ Apóstolenë Pedro nonotapuna once ponëbeje apóstolevi yajava. Nexata Pedro pinijijumeta jumaitsi athëbëvetsica bepinijijoviboxaneto penajumetsi-
sijava pemuxunanacaetuanavevijavabelia:

—Tajamonae judíovi, Jerusalén tomarata panenapatsivi, panenamuxunae-
vere. Paxamë ata Jerusalén tomarata paneenaevi, xaniavaetsia panena-
muxunaevere paneyapëtaenexa xua yabara pacatsipaebijitsiatsi.

¹⁵ Paxamë mapamonae yabaraje pajumaitsimë: “Aitajibi ra saya mapa-
monaeje,” pajamë. Mara pamonaepo apo aitajibije. Bajayacunuaeepato raja
abaxë maje. Bajarapaepatota jivi apo aitajibi tsabiabi.

¹⁶ Mara pamonaepaxamë panijajumenëta Espiritu Santo peja-
matabëcueneta natsipaebiaexanatsije pecopiapatsixae baja xua bajayata
tajëvelia Joelpijinë Diosojumepaebinëmi vajunupaeba. Bajaraxua yabara
Dioso pejumaitsiyava Joelpijinë bajayata tajëvelia jumaitsi mapacueniaje:
Dioso jumaitsi:

¹⁷ “Itsa baja imoxoyo pevajënae tsane mapanacua pevereverecaenexaje,
itorobianicajë Espiritu Santo daxitanacuapijivi, pamonaepotajajivi petsija-
matabëjonexatsi. Daxita panexi, pebijivi, petüriavi, paebiana palivaisi
Espiritu Santo paebiaexanaenatsi, xanë talivaisi. Pevëjëavi pebijivi taena xua
tsitajëtsianajë bemajitsinaebocuenia. Perujuvi pebijivi piamajitsinaejavata
tsipaebianajë.

¹⁸ Nexata daxita pamonaepanetonacuenebivi, pebijivi, petüriavi ata, bajara-
pamatacabi Espiritu Santo toitorobianicajë petsijamatabëjonexatsi. Nexata
bajarapamonae paebiana xanë talivaisi.

¹⁹ Tsitajëtsianajë itaboxotatsia pinijicuene taexanaejava. Daxita mapanacua-
java ata pinijicuene taexanaejava tsitajëtsianajë. Ayai tsane pijana. Ayai
tsane isotocotia. Ayai tsane petsëxë mapanacuataje.

²⁰ Nexata matocabipijijumameto aitaquiri tsane. Meravipijijumameto bepijana
itatsobia tsane. Bajara itsane mapanacuataje itsa baja peneta imoxoyo
pevajënae tsane icatsia pepatsimatacabinexatsica pepo petuxanenë. Ba-
jarapamatacabi bajaraponë pinijicuene pexanaejava pecaëjëpaenëcuenetsi,
tsitajëtsiana daxitajivijavabelia.

²¹ Nexata pajivi navajëtsiana pepo petuxanenëjavabelia, bajarapajivi ca-
panepaenatsi,” jai Dioso,
jai bajayata tajëvelia Joelpijinë Diosojumepaebinëmi Dioso pejumaitsiyava
bajaraxua yabara, jai Pedro athëbëvetsica bepinijijoviboxaneto penajumet-
sijava pemuxunanacaetuanavevijavabelia.

²² Icatsia Pedro jumaitsi bajarapamonaejavabelia:

—Tajamonae judíovi, panenamuxunaevere paneyapëtaenexa xua
yabara pacatsipaebijitsiatsi. Jesús, Nazaret tomarapijinë, Dioso pesaëta
pinijicuene pexanaejava exanapona paxamë tuatuajëta. Nexata Jesús
pacayapëtaeyaexana Dioso ayaicuene pexanaejava pecaëjëpaenëcuenetsi.
Bajarapacuenia paxamë baja payapëtaneme Jesús Dioso pitorobinëcuenetsi.

Xaniavaetsia rabaja payapëtaneme paxamëjavata Jesús pexanaejava bajarapapiniujuene.

²³ Bajaraponë Jesús paxamë panecobeyabelia canajetatsi. Nexata paxamë pabeyaxuabame. Tshipaji patocopatame piagamatabëcuenebejevi Jesús cruzajavabelia pecobematabiabarutsinexatsi. Bajarapacuenia Jesús pabeyaxuabame tshipaji baja cajena Dioso tajëvelia najamatabëxaina bajarapacuenia Jesús panebeyaxuabinexa.

²⁴ Itsiata baitsi jane Jesús petëpaecujinae Dioso icatsia asaëyaexanatsi. Dioso capanepatsi petëpaejavavecu. Tshipaji Jesús Dioso pexënatoxae, acuenebi pematatoxenetsjavatsi petëpaejava.

²⁵ Bajayata Davidpijinë tajëvelia yaquina Dioso pejumelivaisibaxutota Jesús icatsia piasaëjavanexa petëpaecujinae. Davidpijinë itsa yaquina Jesús pejumaitsijava Diosojavabelia icatsia piasaëjavanexa petëpaecujinae, yaquina majumaitsiitaneje:

Yapëtaniji Dioso taneyajavaponaponaejava. Tamuxuneneta ponapona, tacu-juanenia. Bajaraxuata apo junavinë tsane.

²⁶ Bajaraxuata jamatabëcuenebarëyanë tsane. Nexata jivijavabelia tsipae-bianajë tajamatabëcuenebarëyajava. Bajaraxuata yapëtaniji tatëpaecujinae icatsia tasaëjavanexa.

²⁷ Xamë, Diosomë, apo necopatsimë tsane petëpaevi peponaenacuayabelia. Apo necopatsimënu tsane taperabëtsabanaenexa nexënatonë.

²⁸ Netsitajëtime baja cajena taponanmutonexa taxainanexa maticabi apo pevereverecejava. Nejamatabëcuenebarëyaexaname itsa neyjavaponapona,

pejaiitane bajayata Davidpijinë yaquina Dioso pejumelivaisibaxutota Jesús pejumaitsijava Diosojavabelia, jai Pedro athëbëvetsica bepinijijoviboxaneto penajumetsijava pemuxunanacatuanaevijavabelia.

²⁹ Icatsia Pedro jumaitsi bajarapamonaejavabelia:

—Tajamonae, jumenapebetsiaya pacatsipaebianatsi vajasalinainëmi Davidpijinë yabara. Bajayata baja tëpa Davidpijinëmi. Nexata mëthëtatsi. Yapëtanetsi itsajota mëthëtatsi.

³⁰ Davidpijinëmi raja Diosojumepaebinëmi profetanëmi. Davidpijinëmi baja cajena yapëtane pacuenia Dioso pexaniajaijumeta najumecapanepaeya jumaitsi. Davidpijinëmijavabelia Dioso najumecapanepaeya jumaitsi mapacueniaje: “Pacuenia xamë evetame Israelnacua, bajara icatsia pacuenia bexëajavabelia caenë nemomoxiyajuvënëne evetsiana nevetsinacumi, Israelnacua,” jai Dioso najumecapanepaeya mapacueniaje Davidpijinëmijavabelia Jesús yabara.

³¹ Davidpijinë baja cajena tajëvelia yapëtane Jesús athëbëvetsica Dioso pitorobijavanexatsi jivi pecapanepaenexa. Tajëvelia yapëtanenua Jesús petëpaecujinae Dioso icatsia piasaëyaexanaejavanexatsi. Bajaraxuata bajayata Davidpijinë tajëvelia cajena vajunupaeba Jesús petëpaecujinae Dioso icatsia piasaëyaexanaejavanexatsi. Davidpijinëmi peyaquinaebaxutota tajëvelia Jesús yabara jumaitsi mapacueniaje: “Nexata apo copatsi tsanetsi petëpaevi peponaenacuayabelia. Apo copatsi tsanetsinua peperabëtsabanaenexa,” jai baja cajena Davidpijinë peyaquinaebaxutota Jesús yabara.

³² Bajaraxuata Jesús baja icatsia Dioso asaëyaexanatsi petëpaecujinae. Jesús Dioso piasaëyaexanaejavatsi, daxita baja paxanë pataniji. Bajaraxuata pacatsipaebatsi.

³³ Jesús caponatsi athëbëabetsia Dioso pecujanenia peecaenexa. Nexata baja paxa Dioso rajutatsi Espíritu Santo pacuenia baja cajena najumecapanepaeya Dioso jumaitsi. Nexata bajaraxuacujinae Jesús juya itorbica Espíritu Santo paxanëjavabetsica. Nexata xua pinijicuene pexanaejava, aeconoxae pataenubename, pajumetanemenua, palivaisianë mapamonae panijajumenëta pacatsipaebaje, bajaraxua Espíritu Santo pejamatabëcueneta exana.

³⁴ Itsiata baitsi jane ponë athëbëabetsia Dioso caponatsi, apo Davidpijinë. Davidpijinë bajayata tajëvelia Jesús yabara jumaitsi mapacueniaje:

Dioso jumaitsi tajatuxanenëjavabelia: “Evetecare abaxë tacujanenia.

³⁵ Vecatsivajënae jumecovënëtsiaexanaenatsi abaxë copiaya nijavajabitsaë nitorbicuenianexa,” jai Dioso tajatuxanenëjavabelia, jai bajayata tajëvelia Davidpijinë Jesús yabara.

³⁶ Bajaraxuata daxita Israel nacuapijivi xaniavaetsia beyapëtane Jesús pelivaisi, ponë paxamë pacobematabiabarutame cruzajavabelia. Bajara-ponë Jesús, Dioso exanatsi pepo petuxanenë. Bajara-ponë Jesús, Cristo cajena, ponë Dioso itorbica vajanacacapanepaenexa, jai Pedro athëbëvetsica bepiniijoviboxaneto penajumetsijava pemuxunanaeavijavabelia.

³⁷ Itsa bajarapamonae jumetane Pedro bajarapacuenia pejumaitsijava, nexata bajarapamonae bejamatabëjiobireca pinijicuenia. Nexata bajarapamonae yanijoba Pedrojavabelia, itsamonae Jesús pijajivi apóstolevijavabelia ata.

—Tajamonae, ¿detsa nexata pitsicuene paexanaenajë patajaneconi yabara? jai nexata bajarapamonae Pedrobanajavabelia.

³⁸ Pedro nexata jumaitsi bajarapamonaejavabelia:

—Daxita paxamë pibisiacuene panexanaejava pacopabare. Panajamatabëcuenepënëyorore Diosojavabelia. Nexata pacabautisabiana Jesucristo pejamatabëcueneta papecavecuajibiaexanaenexa daxita pibisiacuene paneexanaeneconi. Bajara jane xuacujinae Dioso pacarajutsiana Espíritu Santo papecatsijamatabëjonexa.

³⁹ Dioso raja cajena jitsipa papecarajutsinexa Espíritu Santo. Dioso raja jitsipa panexijavabelia ata perajutsinexa Espíritu Santo. Dioso raja jitsipa it-sanacuanëpijivi, tajënacuanëjava pejinavanapaevi ata, perajutsinexa Espíritu Santo. Daxita pamonaë Dioso junatsiana pijajivinexa, tsijamatabëjonenatsi Espíritu Santo, jai Pedro bajarapamonaejavabelia.

⁴⁰ Bajarapacuenia Pedro itsa tsipaeba, itsalivaisi pematatsënëa tsipaeba bajarapamonaejavabelia. Pedro pinijicuenia muxujioba bajarapamonae. Pedro jumaitsi mapacueniaje:

—Pamonae Jesús beyaxuaba, pibisiacuene pexanaevi, bajarapamonae naxuabiana. Nexata paxamë ata bajarapamonae paneyajavanaxuabiyaniva, pavecuanaejamatabëcuenepënëyorore Diosojavabelia, jai Pedro.

⁴¹ Nexata Pedro petsipaebilivaisi bajarapamatacabi jumecovënëtatsi tres mil pajvimaxëto. Nexata daxita bajarapamonae Jesús pijajivi bautisaba. Nexata bajarapamonae najunua baja Jesús pijajivijavabelia.

⁴² Nexata bajarapamonae jumecovënëta palivaisi Jesús pijajivi apóstolevi tsipaebapona. Daxita bajarapamonae Jesús pijajivi yajava, apóstolevinua yajava, najamatabëcuenepëpaeya jinavanapa. Daxita nacaetuatabiaba pevajëcabinexa Diosojavabelia. Nacaetuatabiabanua caejavata pexaenexa, penajamatabënapitabibinexa xua yabara Jesús sivatëpatsi.

Pacuenia jinavanapa pamonaē copiaya Jesús pelivaisi jumecovēnēta yabara pelivaisi

⁴³ Daxitajivi cujanava Dioso. Tsi paji Dioso yavenonabiaba apóstolevi. Nexata apóstolevi Dioso pesaēta pinijicuene pexanaejava, exanabiaba.

⁴⁴ Daxita pamonaē jumecovēnēta Jesús pelivaisi, nacaetuatabiaba namatabecuenejēpaeya. Bajarapamonaē daxita pexainaejava nacobenaxainaeya evetabiaba.

⁴⁵ Paepatota itsajivi bitso namatavenona, peyavenonaenexa bajarapamonaeyajuvēnēvi pexainaejava canajetapona. Pijairanē ata canajetapona. Pijabonē ata canajetapona. Pacuenejavaxi xaina, canajetapona. Nexata bajaraxuamatamopalata, daxita bajarapamatamo, natsicobetsanabiaba pacuenia caejivi canacujitsia namatavenona.

⁴⁶ Bajarapamonaē caematacabi canacujitsia nacaetuatabiaba templobota. Daxita bajarapamonaē pijabonējava jamatabēcuenearēyaya xaeyabiaba pexaejava namatabēcuenejēpaeya.

⁴⁷ Nexata bajarapamonaē jumai tsabiabi Diosojavabelia: “Diosomē, bitso ayaijamatabēcuenēmē. Paneyavenonabiabame,” jai tsabiabi. Nexata daxita Jerusalén tomarapijivi, bajarapamonaē pexaniacuenia yaiyataeyabiabatsi. Nexata itsamonae ata, caematacabi canacujitsia Jesús pelivaisi jumecovēnētapona pecapanepaenexatsi pibisiacuene pexanaeconivecua. Bajarapamonaē najonepona Jesús pelivaisi pejumecovēnēsivijavabelia.

3

Pacuenia apóstolenēbeje Jesús pejamatabēcueneta xanepanaeyaexanabeje apo pecaējēpaenētsi peponaponaejava yabara pelivaisi

¹ Judiovi caniviyoeapatota, bejamatabēcuenē a las tres, templobota vajēcabiaba Diosojavabelia. Nexata itsamatacabi, bajarapaepatota, Pedrobeje Juanbeje naponabeje templobojavabelia.

² Ponē apo pecaējēpaenētsi peponaponaejava penaexanaejavabeliacujinae, capatabiabatsi pijamonae peetabiabinexatsi templobobaupa muxuneneta. Bajarapabaupa pevēnē Pexaniabaupa. Caematacabi canacujitsia bajarapabaupa muxuneneta bajaraponē etabiabatsi pijamonae. Nexata bajaraponē amoneya palata vajēcabiabeca bajarapabaupajava pejoneponaevita templobojavaberena.

³ Nexata itsa bajaraponē taeyeca Pedrobeje Juanbeje pejonenajetarucavabeje templobojavaberena, vajēqueca palata.

⁴ Nexata Pedrobeje Juanbeje naēcotabeje bajaraponējavabelia. Nexata Pedro jumaitsi bajaraponējavabelia:

—Panetaemabeje, jai Pedro.

⁵ Nexata bajaraponē naitaxutocaevetsiaya jamatabējumai tsecae:

—Nerajutsianabeje tsamē raja itsacuenējavayo, jamatabējai tsecae bajaraponē.

⁶ Pedro nexata jumaitsi bajaraponējavabelia:

—Palata raja apo xainaenē. Itsiata baitsi jane xua xainajē, carajutsianatsi. Jesucristo, Nazaret tomarapijinē, pecaxanepanaeyaexanaexae baja, nonotapunare. Ponaponare baja, jai Pedro.

⁷ Nexata bajaraponē pecujanenia pacobe, Pedro cobevaetabiyotsia. Bajarajota bajaraponē daxitaneniabeje asisaēreca baja.

⁸ Nexata bajaraponē jirevajunua. Petaxuta nuca. Ponapona baja. Nexata bajaraponē templobo enēabelia najoneya Pedrobeje Juanbeje pepēta. Bajaraponē jirevanajetaruca. Jumai tsanajetaruca Diosojavabelia:

—Diosomë, ¡bitso ayaijamatabëcuenenëmë! ¡Tsipaji baja nexanepanaeyaexaname! jai tsanajetaruae Diosojavabelia.

⁹ Nexata daxitajivi tanetsi peponaponaejava. Jumetanetsinua pexaniajamatabëcuene perajutsijava Diosojavabelia.

¹⁰ Bajarapamonae ita tanetsi, yapëtanetsi palata pevajëcabiabecaenëmi templobaupa muxuneneta, Pexaniabaupavënë muxuneneta. Nexata daxita bajarapamonae ita tane bajaraponë baja pexanepanaejava, bitso jamatabëcuenenajunaviaca.

Pacuenia Jesús pelivaisi Pedro jivi tsipaeba templobo ënëtuatujëta, Portal de Salomónvënëjavata, yabara pelivaisi

¹¹ Ponë penaexanaejavaveliacujinae apo peponaponaeenëmi, Pedro pexanepanaeyaexanaecujinae, Pedrobeje Juanbeje apo copatsitsibeje. Nexata templobo ënëtuatujëta, Portal de Salomónvënëjavata, ponë Pedro xanepanaeyaexana, Pedrobeje Juanbeje najamaxëvaetabanucatsibeje. Nexata jivi ayaiBITSaëto itaxutuathopatsi. Jamatabëcuenenabenajaca bajarapamonae.

¹² Nexata Pedro ita tane bajarapamonae pejamatabëcuenenabenajacaejava, nexata Pedro jumaisi bajarapamonaejavabelia:

—Tajamonae judíovi, ¿detsa xuajitsia pajamatabëcuenenabenajacame maponë yabaraje? ¿Detsa xuajitsia bitso panenaëcobamebeje mapacueniaje? Paxanëbeje yabara meta pajamatabëjumaisimë mapacueniaje: “Maponëbeje xanepanaeyaexanabeje apo pecaëjëpaenëmitsi peponaponaejava. Tsipaji baja caëjëpatsibeje bajarapacueni pexanaenexabeje. Bajarapacueni caëjëpatsibeje tsipaji meta Dioso pitabarata aneconijibia ponaponabeje,” pajamatabëjamë meta paxanëbeje yabara. Paxanëbeje raja patajamatabëcuenetabeje apo paexanaenëbeje bajarapacueni. Jesús raja exana bajarapacueni.

¹³ Vajasalinaivi baja cajena Abrahampijinë, Isaacpijinë, Jacobpijinë. Bajarapamonae pijaDioso pexënato Jesús. Nexata Dioso jivi yapëtaeyaexana Jesús bitso ayaijamatabëcuene pexainaeenëcuene. Bajaraponë Jesús paxamë parajutame vajanacayanacuaevevtsivi pecobeyabelia. Vajanacayanacuaevevtsinë Pilato copatsijitsia ata Jesús, itsiata paxamë pajumesaëmë. Apo pajitsipaemë Pilato pecopatsijava Jesús.

¹⁴ Apo pavajëcaemë Pilatojavabelia pecopatsinexatsi Jesús, itsacueneneconioyo apo pexainaeenë, pepo pianeconijibinë. Caranata biji pibisiacueni pexanaenë, jivibenë, pecopatsinexatsi, pajumesaëmë. Pavajëcama Pilatojavabelia jivibenë pepitsapaenexa penaneconitsivi pejebabiabibovecua.

¹⁵ Ponë Dioso itorobica vajanacarajutsinexa matakabi apo peverevere-caejava, bajaraponë caranata pabeyaxuabame. Itsiata baitsi jane Jesús petëpaecujinae, Dioso icatsia asaëyaexanatsi. Bajarapacueni patataexae, pacatsipaebatsi.

¹⁶ Bajaraponë Jesús pejamatabëcueneta xanepanaeyaexanatsi baja maponëbeje, apo pecaëjëpaenëmitsi peponaponaejava. Maponëbeje najamatabëcuenecopata Jesúsjavabelia. Bajaraxuata maponëbeje Jesús baja xanepanaeyaexanatsi paneitabarata, panetaeyabiabinë, paneyapëtaenë, jai Pedro bajarapamonaejavabelia Portal de Salomónvënëjavata.

¹⁷ Icatsia Pedro jumaisi bajarapamonaejavabelia:

—Tajamonae, yapëtaniji pacuene pacabarëexana itsamonae, papecaevet-sivi yajava. Tsipaji apo payapëtaemë xaniavaetsia. Bajaraxuata pabeyaxu-abame Jesús.

¹⁸ Bajayata Diosojumepaebivimi profetavi tajëvelia vajunupaeba Jesús athëbëvetsica Dioso pitorobijavanexatsi jivi pecapanepaenexa. Profetavimi tajëvelia vajunupaebanua Jesús bitso pebejiobiaexanaejavanexatsi daxi-tajivi pijaneconi yabara. Bajarapacuee Jesús baja tocopiapatatsi itsa pabeyaxuabame. Tsipaji baja Dioso bajarapacuenia tocopatatsi.

¹⁹ Nexata baja aeconoxae paneyapëtaexae Jesús petëpaejava daxitajivi pijaneconi yabara, pacopabare baja panijaperujamatabëcuenemi. Panajamatabëcuenepënëyorore baja Diosojavabelia. Nexata pibisiacuene panexanaeconimi, Dioso pacavecuajibiaexanaena. Nexata pacajamatabëcuene asaëyaexanaena Dioso.

²⁰ Tsipaji raja icatsia itsamatacabi Dioso athëbëvetsica itorobianica Jesús, ponë bajayata Dioso itapeta papecayavenonaenexa.

²¹ Jesús raja abaxë ecaya athëbëtatsia. Matapania pamatacabi Dioso xanebijitsia daxitacuene, icatsia patsianica Jesús. Bajarapacuenia Jesús pepatsijavanexatsica, Diosojumepaebivimi profetavi bajayata tajëvelia vajunupaeba.

²² Vajasalinaivimijavabelia baja cajena bajayata tajëvelia profeta Moiséspijinë Jesús yabara jumaitsi mapacueniaje: “Pacuenia nitoroba xanë profetanënexanë, bajarapacuenia icatsia vajatuxanenë Dioso itorobiana itsanë profetanë, paxamë panemomoxiyajuvënënë tsane. Nexata pacuene yabara bajaraponë profeta pacatsipaebiana, pajumecovënëtsianame xaniavaetsia.

²³ Tsipaji daxita pamonaë apo jumecovënëtsi tsane bajaraponë profeta petsipaebilivaisi, pepacuee Dioso pijajivivecua tsatsiana. Nexata bajarapamonaë Dioso verebabena,” jai baja cajena bajayata tajëvelia Moiséspijinë vajasalinaivimijavabelia Jesús pepatsijavanexatsica yabara, jai Pedro bajarapamonaëjavabelia Portal de Salomónvënëjavata.

²⁴ Icatsia Pedro jumaitsi bajarapamonaëjavabelia:

—Xua baja aeconoxae mapamatacabitaje copiapataponä, bajayata tajëvelia profeta Samuelpijinë copiaya vajunupaeba. Bajara icatsia xuacujinae cotocaevi paprofetavimi ata bajarapacuenia tajëvelia vajunupaebapona bajaraxua.

²⁵ Paxamë rabaja profetavimi papemomoximë. Nexata xua Dioso najumecapanepaeya jumaitsi perajutsinexa panijasalinaivimijavabelia, bajaraxua paxamë Dioso pacarajutsiana. Bajayata tajëvelia Dioso jumaitsi vajasalinainëmi Abrahampijjinëjavabelia Jesús yabara: “Caenë nemomoxiyajuvënënë itorobianajë jivi peyavenonaenexa. Nexata nemomoxiyajuvënënë yavenonaena caenacuapijivi canacujitsia, mapanacuata pejinavanapaevi,” jai Dioso tajëvelia Abrahampijjinëmijavabelia Jesús yabara.

²⁶ Nexata baja copiaya paxamëjavabetsica Dioso pexënato pacatoitorobica. Bajarapacuenia Dioso pexënato pacatoitorobica paxamë pacaëjivimë canacujitsia papecayavenonaenexa panenajamatabëcuene pënëyorotsinexa pibisiacuene panexanaejavavecua, jai Pedro bajarapamonaëjavabelia Portal de Salomónvënëjavata.

Pacuenia Pedrobeje Juanbeje Jesús pelivaisi tsipaebabeje tomaraevetsivi javabelia yabara pelivaisi

¹ Pedrobeje Juanbeje abaxë Jesús pelivaisi tsipaebabeje bajarapamonae javabelia Portal de Salomónvënëjavata. Nexata bajaraberena jemata patanajetarubena sacerdotevi. Patanajetarubena saduceovinua. Pematatsënëa patanajetaruca itsané capitán. Bajaraponë capitán templobopijipolicíavi pevetsinë.

² Daxita bajarapamonae baranaeapanatsibeje Pedrobeje Juanbeje. Tsipaji Pedrobeje Juanbeje Jesús pelivaisi petsipaebijavatabeje, jumai tsaponaebeje:

—Jivi tēpae ata tsane, icatsia asaë tsane petēpaecujinae. Bajarapalivaisi cajena pexaniajailivaisi. Tsipaji baja icatsia Jesús asaëyaexanatsi petēpaecujinae, jaiibeje tsaponae.

³ Nexata bajarapamonae vaetabatsibeje. Caponaliatsibeje peetsinexatsibeje penaneconitsivi pejebabiabibota. Meravia pitsijavata jutsijitsiatsibeje. Tsipaji baja bitso caniviyo.

⁴ Itsiata baihsi jave baja jivibitsaëtoxanetonë capanepaeya jumecovënëatsibeje pevaetabivajënaeysibeje. Nexata daxita pamonaë jumecovënëta Jesús pelivaisi, ëpebijivi namataëjëtatsi cinco mil ponëbeje.

⁵ Nexata meravia pitsijavata nacaetuata judíovi pevetsivi. Nacaetuata judíovi pijaancianovinua. Nacaetuata judíovi pecujarubivinua. Daxita bajarapamonae nacaetuata Jerusalén tomarata.

⁶ Nexata bajarajota napata sacerdotenë Anás. Bajaraponë Anás sacerdotevi pepo penamatacaitorobinëmi. Napata Caifás ata. Napata Juan ata. Napata Alejandro ata. Napata itsamonae ata, Anás pijamonae.

⁷ Nexata Pedrobeje Juanbeje nutatsibeje daxita bajarapamonae pitabarata. Nexata bajarapamonae jumaiti Pedrobeje Juanbejejavabelia:

—Jipatsa pejamatabëcueneta paxanepanaeayaexanamebeje apo pecaëjēpaenëmitsi peponaponaejava? jai bajarapamonae Pedrobeje Juanbejejavabelia.

⁸⁻⁹ Nexata Pedro Espíritu Santo bitso jamatabëcueneyavenonatsi. Nexata Pedro jumaiti bajarapamonaejavabelia:

—Paxamë judíovi paneevetsivi, paxamë ata pijinia paancianovimë, paneyanijobamebeje paneyapëtaenexa ponë pejamatabëcueneta paxanepanaeayaexanajëbeje apo pecaëjēpaenëmitsi peponaponaejava. Paneyanijobamebejenua paneyapëtaenexa pacuenia paxanepanaeayaexanajëbeje bajaraponë.

¹⁰ Nexata pacatsipaebianatsi daxita paxamë paneyapëtaenexa daxita Israel nacuapijivi ata peyapëtaenexa. Jesús, Nazaret tomarapijinë, ponë paxamë pacobematabiabarutame cruzajavabelia, bajaraponë icatsia Dioso asaëyaexanatsi petēpaecujinae. Bajaraponë Jesús pejamatabëcueneta maponë paneitabarata nucaje, xanepanaeayaexanatsi, jai Pedro.

¹¹ Icatsia Pedro jumaiti bajarapamonaejavabelia:

—Bajaraponë Jesús yabara Dioso pejumelivaisibaxutota bajayata tajëvelia jumaiti comparacióncuenia mapacueniaje:

Paiboto itsamonae boexanaevì naitaxutojematabuatsiana petsitaabejexaetsi itajara, bajarapaiboto itsané pitsiana. Nexata bajarapaibotota xaniavaetsia yaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota.

Bajarapacuenia Dioso pejumelivaisibaxutota comparacióncuenia itsa jumaiti Jesús yabara, judíovi penamatacaitorobivi Jesús apo

pejumecovënëtsijavanexa yabara, jumaitsi. Dioso pitapetsijavatsi Jesús daxitajivi pecapanepaenexa yabara ata jumaitsi.

¹² Caenë Jesús caējēpatsi vajanacapanepaenexa pibisiacuene vajaex-anaeneconivecua. Bajaraxuata Dioso itorobica Jesús. Tsipaji baja ajibi pematatsenëa mapanacuataje itsanë ata pejamatabēcueneta vajanacapanepaenexa Diosojavabelia, jai Pedro bajarapamonaejavabelia.

¹³ Bajarapamonaē yapētane Pedrobeje Juanbeje ajumejunavijibia Jesús pelivaisi petsipaebijavabeje bajarapamonaējavabelia. Bajarapamonaē yapētanenua bajaraponēbeje bajayajebi apo penacujarubinēbeje peyaquinaejava. Itsiata bitso yapētanebeje pexanialivaisi. Saya bajaraponēbeje penacuenebinēbeje. Nexata judiōvi pevetsivi jamatabēcuenenabenajaca. Bajarapamonaē nexata jamatabējumaitsi Pedrobeje Juanbeje yabara:

—Bajaraponēbeje cajena penaponaponaenēbeje Jesúsata. Bajaraxuata bitso baja yapētanebeje bajarapalivaisi, jamatabējai.

¹⁴ Bajarapamonaē tane apo pecaējēpaenēmitsi peponaponaējava penanucaejava Pedrobeje Juanbejejavata. Nexata bajarapamonaē acuenebi pejumatsijava: “Jume raja. Jesús raja pejamatabēcueneta apo xanepanaē maponēje,” acuenebi pejaijava. Tsipaji apo pecaējēpaenēmitsi peponaponaējava Jesús pejamatabēcueneta ponapona baja.

¹⁵ Nexata bajarapamonaē Pedrobeje Juanbeje caepatoyo navecuacapit-sapatsibeje pecovēta epamonaē penabarēcuaijaijinxa.

¹⁶ Nexata Pedrobeje Juanbeje pecovēta caepatoyo penavecuacapsapaejavatatsibeje, bajarapamonaē najumaitsi:

—¿Detsamē raja pacuene exanaenatsi bajaraponēbejejavabelia? Daxita Jerusalén tomarapijivi xaniavaetsia yapētane bajaraponēbeje pexanepanaeyaexanaejavabeje apo pecaējēpaenēmitsi peponaponaējava. Nexata acuenebi jivijavabelia vajajumaitsijava: “Apo xanepanaeyaexanae-beje raja bajaraponēbeje,” vajajaijava.

¹⁷ Pinijicuenia vaxaitsi bajaraponēbeje itavetsianatsi petsipaebiyani-abeje matavējēa Jesús pelivaisi itsajiviyojavabelia ata. Nexata bajarapacue-nia apo tsipaebibeje baja tsane itsamonaējavabelia Jesús pelivaisi, najai bajarapamonaē Pedrobeje Juanbeje pecovēta caepatoyo penavecuacapit-sapaejavatatsibeje.

¹⁸ Nexata icatsia Pedrobeje Juanbeje caevēalia pejonexaliabeje, junaliatsibeje. Nexata jane baja bajarapamonaē jumaitsi Pedrobeje Juanbejejavabelia:

—Pētsa baja icatsia matavējēa jivi patsipaebaponaēbeje Jesús pelivaisi. Pacoparebeje baja jivi panetsipaebaponaējavabeje Jesús pelivaisi, jai bajarapamonaē.

¹⁹ Nexata Pedrobeje Juanbeje jumaitsibeje bajarapamonaējavabelia:

—Paxamē panijacuata panajamatabēxainare pacuene xanepana pataexanaponaenexabeje Dioso pitabarata. Itsa pacajumecovënëtsipatsibeje paxamē patanitavetsijavamēbeje, nexata apo pajumecovënëtsinēbeje tsipae Dioso patanitorobijavabeje.

²⁰ Acuenebi cajena patacopatsijavabeje jivi patatsipaebaponaējavabeje xua patanijibeje, palivaisi ata pajumetanijibeje, jaibeje Pedrobeje Juanbeje bajarapamonaējavabelia.

²¹ Icatsia judiōvi pevetsivi orijibia itavetatsibeje jivi petsipaebaponaēyaniavabeje Jesús pelivaisi. Bajaraxuacujinae copatatsibeje baja peponaenexabeje. Ajibi peyabarananeconitsia exanaejavanexatsibeje. Tsipaji daxitajivi jumai tsaponaē Diosojavabelia:

—Diosomē, bitso ayaijamatabēcuenenēmē, jai tsaponae.

Bajarapacuenia daxitajivi pexaniajamatabēcuene rajuta Diosojavabelia Pedrobeje Juanbeje pexanepanaeyaexanaexaebeje apo pecaējēpaenēmits peponaponaejava.

²² Ponē xanepanaeyaexanatsi Dioso pesaēta pinijicuene pexanaejavata, bajaraponē penaexanaecujinae xaina baja cuarenta pavaibeje pematatsēnēa.

Pacuenia Dioso pejumecovēnētsivi vajēca Diosojavabelia pecaējēpaeyaexanaenexatsi Jesús pelivaisi ajumejunavijibia jivi pepaebapon-aenexa yabara pelivaisi

²³ Itsa baja Pedrobeje Juanbeje judíovi pevetsivi copatatsibeje peponaenexabeje, navialiaabeje baja itsabelia jinavanapa Dioso pejumecovēnētsivi. Nexata Pedrobeje Juanbeje Jesús pelivaisi jivi petsipaebaponaeyanivabeje sacerdotevi penamatacaitorobivi pitavetsijavatsibeje, navajunupaebabeje Dioso pejumecovēnētsivijavabelia. Navajunupaebabejenua judíovi pijaancianovi ata pitavetsijavatsibeje.

²⁴ Nexata Dioso pejumecovēnētsivi itsa jumetane Pedrobeje Juanbeje pe navajunupaebijavabeje, nexata daxita Dioso pejumecovēnētsivi Pedrohana najamatabēcuenejēpaeya vajēca Diosojavabelia. Daxita bajarapamonae pevajēcaejavata Diosojavabelia, jumaitsi mapacueniaje:

—Xamē pinijiDiosomē, nexanaenē cajena itaboxo. Nexanaenē daxita itaboxopijicuene ata. Nexanaenē ira ata. Nexanaenē daxita irapijicuene ata. Nexanaenē manuamene ata. Nexanaenē daxita manuamenepijicuene ata.

²⁵ Xamē Diosomē, bajayata Espíritu Santo pejamatabēcueneta tajēvelia yapētaeyaexaname patajasalinainēmi Davidpijinē. Nexata nijajivitonē Davidpijinē tajēvelia nexēnato Jesús yabara jumaitsi mapacueniaje:

Itsanacuanēpijivi, pamonae apo judíovi, bitso anaepanabiabiana. Saya jema najamatabēxainabiabiana pexanaenexa picani xua apo caējēpaetsi pexanaenexa.

²⁶ Pinijinacuanē pevetsivi nacaetuatsiana. Tomaranē pevetsivi ata nacaetuatsiana. Bajarapamonae najamatabēxainaena, xamē Diosomē, nijacuene peocatobijianaenexa. Najamatabēxainaenanua pebejioiaexanaenexa Cristo, ponē itorobianimica jivi pecapanepaenexa, jai bajayata tajēvelia Davidpijinē Espíritu Santo pejamatabēcueneta, Jesús pebejioiaexanaejavanexatsi yabara, jai Pedrohana pevajēcaejavata Diosojavabelia.

²⁷ Icatsia Pedrohana jumaitsi pevajēcaejavata Diosojavabelia:

—Mapatomarataje Herodesbeje, Poncio Pilatobeje, barēnacaetuatabeje it-sanacuanēpijivi. Barēnacaetuatabeje apo judíovi. Barēnacaetuatabeje judíovi ata yajava. Bajarapamonae nacaetuata penajumejaitsinexa pacuenia beyaxu-abijitsiatsi nexēnato Jesús, ponē athēbēvetsica itorobimica. Bajarapacuenia itsa barēnacaetuatabeje, copiapata jane baja xua bajayata tajēvelia Davidpijinē vajunupaeba.

²⁸ Bajarapamonae nacaetuata pexanaenexatsi daxita pacuenia baja cajena bajayata nexēnato tocopatame pexanaenexatsi.

²⁹ Patajatuxanenē, yapētaneme judíovi pevetsivi patanitavetsijava jivi patatsipaebaponaeyaniva nexēnato pelivaisi. Paxanē panijajivinē. Nexata panerajutsianame patanecaējēpaejamatabēcuene ajumejunavijibia jivi patatsipaebaponenexa nexēnato pelivaisi.

³⁰ Itsa patomarata patsipaebianajē nexēnato pelivaisi, jamatejemaexanaename piavitanēvi. Pinijicuene nexanaejava exanaename

jivi peypapëtaenexa bitso ayaijamatãbëcuene nexainaenëcuene. Bajarapapinijiucene exanaename nexënato Jesús pejamatabëcueneta, jai Pedrobana pevãjëcaejavata Diosojavabelia.

³¹ Itsa baja bajarapamonae vereta pevãjëcaejava Diosojavabelia, bajarajota ira nanequetajaraba. Daxita bajarapamonae Espiritu Santo tsijamatãbëvënëcatsi. Nexata bajarapamonae Espiritu Santo petsijamatãbëvënëcaexaetsi, ajumejunavijibia jane baja jivi tsipaebapona Jesús pelivaisi.

Pacuenia Dioso pejumecovënëtsivi, xua xaina, daxita nacobenax-ainaeyaveta yabara pelivaisi

³² Ayabitsaëtöxaneto Dioso pejumecovënëtsivi najamatãbëjëpaeya jina- vanapa. Bajarapamonae xua xaina, apo najamatãbëxainae caejivi pex- ainaenexa. Nexata daxita bajarapamonae xua xaina, nacobenaxaina daxita.

³³ Nexata apóstolevi asaëya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaëyaexanatsi vajatuxanenë Jesús petëpaecujinae. Dioso bitso yavenonabiabatsi daxita bajarapamonae.

³⁴ Nexata bajarapamonae Dioso pejumecovënëtsivi caenë ata apo yã- juvënëbejiobi pexainaejava yabara. Tsipaji pamonae bitso xaina iranë, bonë ata, canajetabiaba. Nexata bajarapamonae xua canajeta, bajarapamata- mopalata capatabiaba.

³⁵ Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajuajinavanapaevijavabelia pacuenia baja caejivi canacujitsia namatavenonapona.

³⁶ Bajarapamonaejavuvënënë itsanë pevënë José, Chiprevënë tunaetota penaexanaenë. Bajaraponë Levípijinë pemomoxiyãjuvënënë. Bajaraponë apóstolevi vënërubatsi itsavënë, Bernabé. Bajarapavënë hebreojumeta peju- maitsijume: “Jivi pejamatabëcuenebarëyayaexanaenë,” peajijume.

³⁷ Nexata José ata pijaira canajeta. Bajaraxuacujinae José capata pijaira- matamopalata. Nexata bajarapapalata rajuta apóstolevijavabelia.

5

Pacuenia tãpabeje Ananíasbeje pijava Safirabeje, penajumetsënëtsixabeje apóstolenë Pedro pitabarata yabara pelivaisi

¹ José pijaira pecanajetsicujinae, Ananías ata pijava Safirabeje ya- juvënëcanajetabeje pijaira.

² Nexata Ananíasbeje pijavabeje pijairamatamoyãjuvënëpalata muetsia copatabeje. Bajaraxuacujinae Ananías peyãjuvënëcopatsipalata calia apóstolevijavabelia. Nexata Ananías jumaitsi apóstolevijavabelia:

—Tajaira yãjuvënëcanajetãjë. Nexata pacarajutatsi daxita bajarapaira- matamopalata panetsicobetsanaenexa vajanajuajinavanapaevijavabelia, jai.

³ Nexata Pedro jumaitsi Ananíasjavabelia:

—Ananías, ¿detsa xuajitsia jumecovënëtame dovathi pecaya- maxëitorobijava nenajumetsënëtsinexa Espiritu Santojavabelia? Xamë baja rovia nijairamatamopalata yãjuvënëcopatame.

⁴ Nijairami necanajetsivãjënãeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia

neyamaxëitojorobijava najamatabëxainameje? Ëpaxanëjavaberena baja cajena apo najumetsënëtsimë. Najumetsënëtame baja cajena Diosojavabelia ata, jai Pedro.

⁵ Ananías itsa jumetane bajarapacuenia Pedro pejumaitisijava, Ananías petëpaenë irata jopa. Nexata daxita pamonaë vënëlvaisitane bajarapacuenia Ananías petëpaejava, pinijicuenia jamatabëcuenenajunaviaca.

⁶ Nexata pabota Ananías petëpaenë boca, bajarapaboyarena pevëjëavi jonena. Mataquiona petëpaenë. Bajaraxuacujinae capitsapalia pemëthëtsinexa.

⁷ Bajaraxuacujinae bexëa, acueyabi pahorabejecujinae, Ananíaspijinë pi-java jonena. Bajarapova abaxë apo yapëtae pamona pevecatëpaejavatsi.

⁸ Pedro icatsia yanijoba bajarapovajavabelia. Jumaitsi:

—Netsipaebare. ¿Xaniajai tsabaja? ¿Mapamatamotaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bajarapacuenia pacanajetajëbeje, jai bajarapova.

⁹ Nexata Pedro jumaitsi bajarapovajavabelia:

—¿Detsa xuajitsia amonabeje panajamatabëcuenenjëpamebeje panenamumetsënëtsinexabeje Espíritu Santojavabelia? Namuxunaevere. Jumia naviabanajetarubena rabaja amonami pemëthëcaevilia. Bajarapamonae icatsia xamë ata cacaponaelia pecamëthëtsinexa, jai Pedro.

¹⁰ Nexata bajarajota Pedro pitabarata bajarapova ata icatsia petëpaeava irata jopa. Itsa jonena pevëjëavi penaviabanajetarubenaevi, Ananíaspijinë pemëthëcaevilia, caxitajarababuata petëpanucaeva. Nexata icatsia bajarapamonae capitsapalia bajarapova pemëthëtsinexa pamonami pemëthë muxuneneta.

¹¹ Nexata daxita Dioso pejumecovënëtsivi, itsamonae ata, pamonaë bajarapajivibeje petëpaejava vënëlvaisitanetsi, bitso junava.

Pacuenia apóstolevi pinijicuene pexanaejavanë exanapona Dioso pesaëta yabara pelivaisi

¹² Apóstolevi Dioso pesaëta exanapona pinijicuene pexanaejavanë Jerusalén tomarapijivi pitabarata. Daxita Dioso pejumecovënëtsivi nacatuatiabiata templobo ënëtuatuajëta, Portal de Salomónvënëjavata.

¹³ Itsamonae, pamonaë Dioso apo pejumecovënëtsivi, junava penanacatuatsijava bajarapomonaeta. Itsiata daxita Jerusalén tomarapijivi pexaniacuenia yaiyataeyabiabiata Dioso pejumecovënëtsivijavabelia.

¹⁴ Pevajënaeyabelia jivibitsaëtoxaneto jumecovënëta pona Jesús pelivaisi, pebijivi, petiriavi ata. Nexata daxita bajarapamonae nanacatuatiabiabiata Dioso pejumecovënëtsivijavabelia.

¹⁵ Apóstolevi Dioso pesaëta pinijicuene pexanaponaexae, itsamonae tocapatabiabatitsi piavitanevi callejavaberena. Nexata piavitanevi tojebabiabatitsi callejavata camata. Itsamonae tulimanëta tojebabiabatitsi. Nexata Pedro itsa najetaruca callejava, piavitanevi jitsipabiabiata Pedro pitacaënae ata pet-sijopaejavatsi pejamatejemanexa bajarapamonae piavitanejavavecua.

¹⁶ Nexata jivibitsaëtoxanetonë patabiabiata Jerusalén tomaraberena imoxoyo penaetomaraxijavaverena penaropobivi. Bajarapamonae Pedro tocapatabiabatitsi piavitanevi. Tocapatabiabatitsinua bitso dovathi peyjavajinavanapaevi. Nexata Pedro daxita bajarapamonae jamatejemayaexanabiabiata.

Pacuenia apóstolevi taicatsi penanconitsiaexanaenexatsi yabara pelivaisi

17 Sacerdotevi pepo penamatacaitorobinē yajavaponapona saduceovi. Nexata daxita bajarapamonae pinijicuenia anaepana apóstolevijavabelia. Tsi-paji cuenecaëbatsi.

18 Bajaraxuata taicatsi apóstolevi. Jebatsi penaneconitsivi pejebabiabibota.

19 Itsiata baitsi jane bajarapameravi Dioso pijaángel apóstolevi tobau-panatsi penaneconitsivi pejebabiabibo baupanē. Nexata ángel apóstolevi matacapitsapaliatsi. Angel jumaitsi apóstolevijavabelia:

20—Paponare templobojavabelia. Patsipaebianame jivijavabelia mapape-janalivaisi, Dioso vajanacayajavaponaponaevaja, jai ángel apóstolevijavabelia.

21 Apóstolevi itsa jumetane bajarapacuenia ángel pejumaitsijava, nexata ajena matacabi tsina, apóstolevi ponalia templobojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinē peyajavaponaponaevi barēnacaetuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecu-jarubivi. Nexata bajarapamonae jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarēpatsiaremena maberenaje, jai.

22 Nexata templobopijipolicíavi itsa ponalia, apo caxitajarabi apóstolevi penaneconitsivi pejebabiabibota. Nexata apo pecaxitajarabixae, navibarena cobesa petsipaebinxexa penacaetuatsivijavabelia.

23 Nexata templobopijipolicíavi jumaitsi bajarapamonaejavabelia:

—Itsa papaliajē penaneconitsivi pejebabiabibojavabelia, daxitabaupanē xaniavaetsia nabaupaxatabanubena. Bajarajota nubena picani pevetanubenaevi baupanē. Itsiata baitsi jane itsa pabaupatajē, caenē ata apo ecae bajarapabo ēnētuatuaejēalia, jai policíavi.

24 Nexata templobopijipolicíavi pijacapitán, sacerdotevi penamatacaitorobivina, itsa jumetane bajarapacuenia policíavi pejumaitsijava, bajarapamonae jamatabējumaitsi:

—¿Detsamēra nexata itsi apóstolevi? jamatabējai bajarapamonae.

25 Nexata bajarapaepatota itsanē pebi parena, templobojavaverena peponaenē. Jumaitsi bajaraponē bajarapomonaejavabelia:

—¡Panejumetaema! Pamona pacajunuame penaneconitsivi pejebabiabibota, bajarapamonae cajena nubena templobotalia. Jivijavabelia tsipaebanubena Jesús pelivaisi, jai bajaraponē.

26 Nexata templobopijipolicíavi pijacapitán barēlia pijajivi. Nexata policíavi apóstolevi xaniavaetsia saya caponarenatsi. Tsi-paji jamatabējumaitsi:

—Anaeya itsa taicaejitsipatsi apóstolevi, nexata jivi nacabaraanaepanaejitsipa. Nexata natatseconaejitsipa ibotonēta, jamatabējai policíavi.

27 Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pijaancianovinua pitabarata, judíovi pecu-jarubivina pitabarata. Nexata bajarajota sacerdotevi pepo penamatacaitorobinē jumaitsi apóstolevijavabelia:

28—Paxanē baja cajena pacajumaitsi: “Pētsa baja matavējēa jivi patsipaebame Jesús pelivaisi,” pacajaitsi. ¿Itsiata tsabaja rovia apo panejumecovēnētismē? Pataema jane pacuenia Jerusalén tomarata yacaējēpaponapanetsipaebilivaisi. Paxamē jamatabēpaneconitame Jesús pebeyaxuabijavatsi yabara, jai sacerdotevi pepo penamatacaitorobinē apóstolevijavabelia.

²⁹ Nexata sacerdotevi pepo penamatacaitorobinē bajarapacuenia peju maitsixae, Pedro, itsaapóstolevi yajava, jumaitsi bajarapamonaejavabelia:

—Namatavenonatsi vajajumecovēnētsinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi itsa nacaitoroba, apo bejumecovēnētsitsi.

³⁰ Paxamē Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaēyaexanatsi petēpaecujinae.

³¹ Nexata Dioso jumaitsi Jesúsjavabelia: “Ecare tacujanenia. Xamē rabaja ayaijamatābēcuenenēmē. Jivi nevetsinē tsane. Necapanepaenēnua tsane,” jai Dioso Jesúsjavabelia. Bajarapacuenia Dioso jumaitsi Jesúsjavabelia vaxaitsi judíovitsi bibisiacuene vajaexanabiabijava vajacopabijavanexa yabara jumaitsi. Vajanajamatābēcuenē pēnēyorotsijavanexa ata Diosojavabelia yabara jumaitsi. Tsipaji Dioso jitsipa Jesús pejamatabēcueneta daxitajivi aneconi jibia petaenexa.

³² Nexata bajarapacuenē yabara jivijavabelia itsa patsipaebaponajē, Espíritu Santo paneyajava tsabiabi. Dioso cajena rajutapona Espíritu Santo pamonaē jumecovēnēta Dioso, jai Pedro, itsaapóstolevi yajava, daxita bajarapamonaejavabelia.

³³ Nexata daxita bajarapamonae itsa jumetane bajarapacuenia Pedrobana pejumaitsijava, nexata bitso anaepana. Jamatabēbeyejebatsi picani apóstolevi.

³⁴ Itsiata apo beyejebitsi. Tsipaji bajarapamonae yajuvēnēnē judíovi pecujarubinē, Gamalielvēnēnē, notapuna daxita penajuavi pitabarata. Bajaronē fariseonē, Dioso Moiséspijinēta penajumecopatsilivaisi pecujarubinē. Daxitajivi peyayataenētsi. Nexata Gamaliel itoroba apóstolevi caepatoyo pepitsapaenexalía.

³⁵ Nexata apóstolevi caepatoyo pepitsapaejavatalia, pecovēta, Gamaliel jumaitsi penajuavijavabelia:

—Tajamonae judíovi, panajamatābēxainare xaniavaetsia. Pētsa paexaname pacuenia panajamatābēxainame mapamonaejavabeliaje.

³⁶ Panajamatābēnapire pacuenia Teudasvēnēnēmi bajayata exanatsi. Bajaraponēmi picani nacua pevetsinēnēxa, ayaijamatābēcuenenē bitso jamatabēnaexana. Nexata picani pijajivinēxa pēnājinavanapatsi cuatrocientos ponēbeje. Itsiata Teudaspijinēmi beyaxuabatsi. Bajaraponēmi pepēnājinavanapaevitsi, pamonaē pijajivinēxa picani, daxita nacayateca. Nexata copiaruca baja bajarapacuenemi.

³⁷ Bajaraxuacujinae icatsia pamatacabí gobiernu pejamatabēcueneta daxitajivi namataējētsi, Judasvēnēnēmi, Galilea nacuapijinēmi, bajarapacuenia pijinia jivi ayaibitsaētoxaneto pēnājinavanapatsi. Bajaraponēmi ata beyaxuabatsi. Nexata daxita pepēnājinavanapaevitsi nacayateca. Nexata baja copiaruca bajarapacuenemi.

³⁸ Bajaraxuata nexata mapamonaeje apóstolevi yabara pacatsipaebijitsiatsi. Pētsa paitsacueniabame bajarapamonae. Itsa bajarapamonae saya mapanacuapijivi pejamatabēcueneta tsipaebavanapaje, bepíjia peneta bajarapamonae petsipaebilivaisi vereverecaena.

³⁹ Itsa jume, Dioso pejamatabēcueneta bajarapamonae bajarapalivaisi jivi itsa tsipaebavanapa, nexata acuenēbi tsipae paxamē bajarapacuenē panevereverecaēyaexanaejava. Belia ayaineconi panatsixanaejitsipame Diosojavabelia, jai Gamaliel daxita penajuavijavabelia.

⁴⁰ Nexata daxita bajarapamonae jumecovënētatsi Gamaliel. Apóstolevi icatsia caevëlia pejonenexalia junaliatsi. Bajaraxuacujinae apóstolevi, caenë canacujitsia, ayaicuenia jumattitibabeponatsi penaneconitsivi pejumaconitabiamicata. Itavetatsi icatsia matavëjêa jivi petsipaebiyaniwa Jesús pelivaisi. Bajaraxuacujinae copabatsi jane baja peponaenexa.

⁴¹ Apóstolevi nexata pitsaparena bajarapabovecua. Barëyaya ponalia apóstolevi. Tsipaji Dioso tocopatatsi bajarapacuenia bepejiobiaexanapon-aenexatsi Jesús pijajivixae.

⁴² Nexata caematacabi canacujitsia templobota, bonëjava ata, apóstolevi asaëya Jesús pelivaisi tsipaebapona jivijavabelia. Apóstolevi jivijavabelia tsipaebapona pexanialivaisi, Jesucristo, ponë Dioso itorobica jivi peca-panepaenexa, pelivaisi.

6

Pacuenia itapetatsi siete ponëbeje diaconovinxaxabara pelivaisi

¹ Jesús pelivaisi pejumecovënëtaponaevi, pevajënaeyabelia ayaibit-saëtoxanetonë tsaponae. Bajarapamatacabi Jesús pelivaisi jumecovënëtapona griegovi, judíovi ata. Nexata pamonajivi pevecuatëpaevanëtsi, pamona bitso bejiobi, bajarapamonaejavabelia apóstolevi rajutabiaba penamatavenonaejavanë. Nexata Jesús pelivaisi penajuajumecovënëtsivi, pamona griegovi, jumaitsi judíovijavabelia:

–Caematacabi canacujitsia apóstolevi pamonajivi pevecuatëpaevanëtsijavabelia, tsicobetsanabiaba pexaejavanexa. Nexata xuavajëtonë panjavirivijavabelia rajutabiaba, bajaraxuavajëtonë patajavirivijavabelia apo rajutabiabi, jai griegovi judíovijavabelia.

² Doce ponëbeje, apóstolevi, najamatabëcuenejëpa pacuenia exanaejitsia judíovibeje griegovibeje penacobecaëbabiabixae. Nexata apóstolevi junata penacaetuatsinexa daxita pamona Jesús pelivaisi pejumecovënëtsivi. Nexata baja itsa nacaetuata daxita bajarapamonae, apóstolevi jumaitsi bajarapamonaejavabelia:

–Tajamonae, paxanë itsa patsicobetsanabiabijitsipajë pexaejava bitso penamatavenonaevijavabelia, nexata apo panecuenecaëjëpabiabi tsipae jivi patatsipaebinexa Dioso pitorobilivaisi.

³ Nexata paitapetsianame siete ponëbeje, paxamëyajuvënëvi. Paitapetsianame papebijivi caejamatabëcuene pexainaevi, bitso petsijamatabëvënëcaevitsi Espíritu Santo, bitso peyapëtaeyaexanaevitsi Espíritu Santo pejamatabëcuene. Bajarapamonae paitorobianame bepejiobivijavabelia patsicobetsanabiabinexa penamatavenonaecuenë.

⁴ Nexata paxanë saicaya patsitecavanapaenajë patavajëcabiabijava Diosojavabelia. Patsipaebabiabianajënuua Dioso pitorobilivaisi jivijavabelia, jai apóstolevi penacaetuatsijavata daxita Jesús pelivaisi pejumecovënëtsivijavabelia.

⁵ Nexata daxita pamona nacaetuata, itsa jumetane bajarapacuenia apóstolevi pejumajitsijava, tsitanapanatsi. Nexata bajarapamonae itapeta mapamatabëxëyoje. Itapeta Estebanvënënë, ponë bitso Dioso pejumecovënëtsinë, Espíritu Santo petsijamatabëvënëcaenëtsi. Itapeta Felipevënënë. Itapeta Prócorovënënë. Itapeta Nicanorvënënë. Itapeta Timónvënënë. Itapeta Parmenasvënënë. Itapeta Nicolásvënënë. Nicolás itsanacuapijinë, Antioquía tomarapijinë. Bajaraponë apo judíonë. Itsiata judíovicuenia Dioso najumecovënëtaponapona.

⁶ Daxita bajarapamatabēxēyo pitapetsicujinaetsi, nubatsi apóstolevi pitabarata. Nexata pamonaē itapetatsi, caenē canacujitsia pematabocotojumavereca apóstolevi nacobebuatanubena Diosojavabelia petovajētsijavata.

⁷ Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibitsaēto xaneto tsaponae Jesús pelivaisi pejumecovēnētsivi. Sacerdotevi ata ayaibitsaēto jumecovēnētapona Jesús pelivaisi.

Pacuenia Esteban vaetabatsi penaneconitsiaexanaenexatsi yabara pelivaisi

⁸ Dioso bitso yavenonabiabatsi Esteban. Nexata Esteban Dioso pesaēta pinijicuene pexanaejava, exanabiaba. Daxitajivi pitabarata Dioso pesaēta pinijicuene pexanaejava, Esteban exanapona.

⁹ Nexata itsamonae Esteban anaeya jumenotatsi. Bajarapamonae nacaetuatabiaba judíovi penacaetuatabiabibota. Bajarapabo pevēnē Esclavos Libertados. Bajarapamonae caenacuaverena apo pepatsivi. Itsamonae Cirene nacuaverena pepatsivi. Itsamonae Alejandría tomaraverena pepatsivi. Itsamonae Cilicia nacuaverena pepatsivi. Itsamonae Asiavēnē nacuaverena pepatsivi. Bajarapamonae yajunēnēvi Esteban anaeya jumenotatsi.

¹⁰ Nexata bajarapamonae yajuvēnēvi Esteban anaeya itsa jumenotatsi, Espíritu Santo yavenonatsi pejumecanaviatsijavata bajarapamonaejavabelia. Bajaraxuata nexata daxita bajarapamonae Esteban apo jumecanaviatsicapanepaetsi juya.

¹¹ Nexata pamonaē Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamonaē matamotatsi penajumetsēnētsinexa Esteban yabara, najumetsēnētsia jane baja jumaiti jivijavabelia:

—Pajumetaniji pibisiacuenia Esteban pebaracuaicuaijaitisabiabijava Moiséspijinē. Pajumetanijnua pibisiacuenia pebaracuaicuaijaitisabiabijava Dioso ata, jai bajarapamonae Esteban yabara.

¹² Bajarapacuenia bajarapamonae pejumaitsixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Estebanjavabelia. Nexata daxita bajarapamonae Esteban cujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata.

¹³ Nexata icatsia bajarapamonae junata pamonaē jane baja matamota najumetsēnētsiaya peneconitsinexatsi Esteban. Nexata bajarapamonae itsa pata, jumaiti Esteban yabara:

—Mara ponēje Esteban apo cueranae Dioso apo pejitsipacuenia pebaracuaicuaijaitisabiabijava templobo. Apo cueranaenua Dioso Moiséspijinēta penajumecopatsilivaisi ata pebaracuaicuaijaitisabiabijava.

¹⁴ Pajumetaniji maponēje pejumaitisijava: “Jesús, Nazaret tomarapijinē, xuabianica mapatemploboje. Dioso Moiséspijinēta penajumecopatsilivaisi ata vajajumecovēnētsijava, nacacopabiaexanaena Jesús,” jai maponēje, jai najumetsēnētsiaya Esteban yabara pamonaē matamotatsi.

¹⁵ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, naēcobarēcēpatsi Esteban. Nexata bajarapamonae Esteban pitabaranaēcobarēcēpaejavatatsi, betsita ángelnēitabara tsarucae Esteban.

7

Pacuenia Esteban jumecanaviata sacerdotevi pepo penamatacaitorobinē yabara pelivaisi

¹ Sacerdotevi pepo penamatacaitorobinē jumaitsi Estebanjavabelia:

—¿Xaniajai tsabaja? ¿Jumaitsimē tsabiabi pacuenia mapamonae caneconit-siajumaitsije? jai sacerdotevi pepo penamatacaitorobinē.

² Nexata sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata, Esteban jumaitsi mapacueniaje:

—Tajamonae, patanevetsivimē, panenamuxunaevere. VajaDioso bitso ayaijamatabēcuenenē. Tsitanaitajēta baja cajena bajayata vajasalinainē Abrahampijjinējavabelia. VajaDioso tsitanaitajēta Abrahampijjinējavabelia abaxē Abrahampijjinē itsa ponapona Mesopotamia nacuata. Bajarapanacuata Abrahampijjinē ponapona pevarapaevajēnaeya Harán nacuyavabelia.

³ Dioso jumaitsi Abrahampijjinējavabelia: “Nijairavecua ponare. Daxita nijamonae ata vecuaponare. Ponare pairajavabelia catsitajētsianatsi,” jai Dioso Abrahampijjinējavabelia.

⁴ Bajaraxuata Abrahampijjinē Caldea nacujavaverena pona. Nexata pata Harán nacuyaberena. Bajarapanacuata Abrahampijjinē itsa ponapona, nexata paxapijjinēmi Harán nacuata vecuatēpatsi. Paxapijjinēmi pevecuatēpaecujinaetsi, Dioso icatsia Abrahampijjinē varapaeyaexanatsi mapairajavaberenaje, itsajota vaxaitsi aeconoxae jinavanapatsi.

⁵ Itsiata Abrahampijjinē Dioso apo rajutsitsi itsairayo ata pepo pijairanexa. Jume cajena. Tsiquiriirayo ata apo rajutsitsi. Itsiata tajēvelia Dioso najumecapanepaeya jumaitsi Abrahampijjinējavabelia: “Carajutsianatsi nijairanexa daxita mapaira tanemeje. Nevēnamuto nexi bajarapaira xainaena,” jai Dioso. Abaxē Abrahampijjinē pexi itsa apo xinae, bajarapacuenia Dioso najumecapanepaeya jumaitsi Abrahampijjinējavabelia.

⁶ Icatsia Dioso tajēvelia jumaitsi Abrahampijjinējavabelia: “Itsamatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi itsanacuaverena pepatsivixae tsane, bajarapanacuapijivi pijajivi exanaenatsi. Bepejiobicuenia nacuenebiaexanabianatsi. Cuatrocientos pavaibeje nemomoxi bepejiobicuenia jinavanapaena bajarapanacuatalia.

⁷ Xanē nexata naneconitsiaexanaenajē panacuapijivi nemomoxi pijajivi exanaenatsi. Bajaraxuacujinae nemomoxi bajarapanacuavecua pitsapaena. Nexata icatsia mapanacuayaberenaje patsiana. Nexata mapanacuataje xanējavaberenaja namatabēcuenecopatsiaya navajēcabiabiana,” jai baja cajena tajēvelia Dioso Abrahampijjinējavabelia.

⁸ Nexata Abrahampijjinē Dioso itorobatsi peperabēcaucutaponaenexa daxita papebinacuetoxi naexana Abrahampijjinē pijabota, baitsi peboupiperabēcaucutaponaenexa. Bajarapacuenia Abrahampijjinē pexanaenexa Dioso itorobatsi Abrahampijjinē penajamatabēnapitabiabinexa Dioso pexavenon-aeypaebijavatsi. Nexata Abrahampijjinē pijava vecuanaexanatsi pebinēyo. Bajaraponēyo pevēnē Isaac. Nexata baja penacuetonēyo penaexanaecujinae, ocho pamatacabibeje itsa xaina, Abrahampijjinē boupiperabēcaucuta pexēnatonēyo pacuenia Dioso itorobatsi. Bajaraxuacujinae icatsia juya Isaacpijinē pexēnato xaina. Isaacpijinē pexēnato pevēnē Jacob. Bajara icatsia pacuenia Isaacpijinē ata boupiperabēcaucuta pexēnatonēyo. Bajaraxuacujinae icatsia Jacobpijinē pexi xaina doce ponēbeje. Bajara icatsia pacuenia Jacobpijinē ata boupiperabēcaucuba pexi. Bajarapadoce ponēbejejavaverena

penaexanaponaevi doce pabitsaëtobeje naexana, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁹ Icatsia Esteban jumaitsi bajarapamonaejavabelia:

—Nexata Jacobpijiné pexi, ponébeje nacaemonaemi, vaxaitsi vajasalinaivi. Bajarapamonaemi pejuyapijiné Josépijiné. Nexata Josépijiné cuenecaëbatsi pematapijivi. Bajaraxuata Josépijiné pecaponaenexatsi Egipto nacuayabelia, canajetaxuabatsi pematapijivi. Itsiata Josépijiné Dioso yajavaponaponatsi.

¹⁰ Nexata Josépijiné bepejiobiaexanaejavaminexatsi Egipto nacuata, vecuapanepaponapona. Dioso daxitacuené Josépijiné Egipto nacuata yapêtaeyaxanaponatsi. Bajaraxuata Egiptonacua pevetsinëmi, Josépijiné pexaniajamatabëcuenia tanetsi. Nexata Egiptonacua pevetsinëmi tocopatatsi Josépijiné pecobenaevetsinexa Egiptonacua. Egiptonacua pevetsinëmi pijabo ata petoevetsinexa, Josépijiné tocopatatsi, jai Esteban bajarapamonaejavabelia.

¹¹ Icatsia Esteban jumaitsi bajarapamonaejavabelia:

—Nexata piniijaniboxaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuata vajasalinaivi jane baja apo xinae pexaejava.

¹² Itsiata Egipto nacuata janibovajënaeya, Josépijiné pecomuaquejebijava ayaijava xaniavaetejeba trigoxu. Nexata Jacobpijiné vënëtane Egipto nacuata pexaejava pexinaejava trigoxu. Nexata Jacobpijiné pexi itoroba Egipto nacujavabelia pesivaponaenexalia pexaejava. Bajarapanamuto ponalia, copiaya jane baja pexaejava pesivaponaenamutolia Jacobpijiné pexi, pamonaevetsinëmi jane baja vajasalinaivi. Itsiata Jacobpijiné pexi pejuyapijinëjavata comuacae ata, apo yapêtae pejuyapijinëcuene.

¹³ Bajaraxuacujinae vajasalinaivi icatsia cotocaevi panamuto itsa sivaponalia pexaejava, nexata Josépijiné jumaitsi pematapijivijavabelia: “Xanë raja Josénë panejuyapijinëné,” jai Josépijiné. Bajaraxuata nexata Egipto nacuaevetsinëmi yapëtane bajarapamonaevetsinë Josépijiné pijamonaecuené.

¹⁴⁻¹⁵ Nexata Josépijiné tonajumexuaba paxa Jacobpijiné penavarapaenexa Egipto nacujavabelia. Nexata Jacobpijiné daxita pexi, pemomoxi yajava, varapa Egipto nacujavabelia. Nexata Jacobpijiné, daxita pexi, pemomoxi yajava, itsa pata Egipto nacuata pejinavanapaenexa, nanamataëjeta setenta y cinco pajivibeje. Bajaraxuacujinae Egipto nacuata Jacobpijiné tēpa. Pexi ata vajasalinaivimi jane baja bajarapanacuata icatsia tēpa.

¹⁶ Bexëajavabelia vajasalinaivimi jane baja petēpaevimi pesijebinxatsi ibovajuta, Siquem tomarata, sicaponatsi Siquem tomarabelia. Bajarapaibovajuta cajena jivi petēpaevi, jebabiaba. Abrahampijiné abaxé itsa asaë vajasalinaivimi pevajënaeya, comuata bajarapaibovaju. Hamorpijiné pexita comuata bajarapaibovaju, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

¹⁷ Icatsia Esteban jumaitsi bajarapamonaejavabelia:

—Nexata baja itsa panepapona bejamatabëcuene trescientos veinte pavaiibeje vajasalinaivimi pejinavanapaecujinae Egipto nacuata, nexata Abrahampijiné pemomoxi, vajasalinaivimi jane baja, ayaibitsaëttoxaneto tsaponae Egipto nacuata. Nexata jane baja pijinia imoxoyo pevajënae tsaponae pecopiapatsinexa pacuenia Dioso pexaniajajumeta najumecapanepaeya jumaitsi Abrahampijinëjavabelia, baitsi jane baja Dioso

pejamatabëcueneta vajasalinaivimi pejutsinexatsi Egipto nacuaverena pejinavanapaenexa Canaán nacuata.

¹⁸ Nexata bajarapamatacabi itsanë junua pevetsinexa Egiptonacua. Ponë Egiptonacua pejanaevetsinë, bajaraponë apo yapëtae Josépjinë Egiptonacua pevetsinëmicuene. Tsipaji baja bajayata, bajaraponë pevajënaeya, tēpa baja Josépjinë.

¹⁹ Nexata Egiptonacua pejanaevetsinë, vajasalinaivimi apo itaxutotsoniataetsi. Ayaicuenia nacuenebiaexanabiabatsi. Bejiobiaexanabiabatsinua. Vajasalinaivi pexi pebinëyo itsa tonaexanatsi, nacuaevevtsinë pejamatabëcueneta penetsiaexanabiabatsi bajarapacuenia petēpaenexa pebinacuetoxi.

²⁰ Bajarapamatacabi naexana Moisésjinë. Moisésjinë bitso pexani-anacuetonëyo. Dioso barëya tanetsi. Nexata Moisésjinë penaexanaecujinae, paxabeje penabeje muetsia evetatsi bota acueyabi pajauametobeje.

²¹ Bajaraxuacujinae Moisésjinë paxabeje penabeje xuabatsi baja. Nexata nacuaevevtsinë pexënatoyo Moisésjinë pitatsi nacoxiyabijitsiatsi. Nexata nacuaevevtsinë pexënatoyo Moisésjinë vitsatatsi pexënatonëyocuenia.

²² Nexata Moisésjinë cujarubatsi daxitacuen, xua Egipto nacuapijivi yapëtane. Nexata Moisésjinë bitso yapëtane livaisi petsipaebinexa jivijavabelia. Pexanaejava ata pecobeta bitso yapëtane, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

²³ Icatsia Esteban jumaitsi bajarapamonaejavabelia:

—Itsa baja Moisésjinë cuarenta pavaibeje xaina penaexanaecujinae, sivanajamatabëxaina petaenexa pijamonaenë itsajota jinavanapa.

²⁴ Nexata baja Moisésjinë pona petaenexa pijamonaenë. Nexata baja Moisésjinë itsa ponapona panacuata pijamonaenë jinavanapa, Moisésjinë pitabëta Egipto nacuapijinë tobejiobiaexanatsi pijamonaenë. Nexata Moisésjinë bajarajota pijamonaenë yamatamobeyaxuaba Egipto nacuapijinë.

²⁵ Moisésjinë nexata jamatabëjumaitsi: “Daxita tajamonaenë, Israelpijinë pemomoxi, nesivajamatabëjumaitsi tsane: ‘Moisés cajena nacayavenonaena vajavecuapitsapaenexa Egiptonacua,’ nesivajamatabëjai tsane,” jamatabëjai picani Moisésjinë. Itsiata baitsi jane Moisésjinë pijamonaenë bajarapacuenia apo sivajamatabëjumaitsi.

²⁶ Moisésjinë pebeyaxuabicujinae Egipto nacuapijinë, icatsia meravia pitsijavata, Moisésjinë caxitajaraba anijanëbeje penabejavatabeje. Bajaraponëbeje Moisésjinë epijamonaenëbeje, Israelpijinë pemomobeje. Nexata Moisésjinë xaniavaetsia itaveta penabeyanivabeje matavëjëa. Jumaitsi: “¡Panabejitsipamebeje! Panapijamonaenëmebeje raja. ¿Detsa xuajitsia panabiamebeje?” jai Moisésjinë.

²⁷ Nexata ponë matapita penabejavabeje, torotajarabatsi Moisésjinë. Bajaraponë jumaitsi Moisésjinëjavabelia: “¿Jipatsa catocopata patanevtsinënexamë? ¿Jipatsa catocopata, pibisiacuene itsa paexanjë, patanevtsiaexanabiabinexamënuu?”

²⁸ ¿Nebeyaxuabijitsiamë tsaja icatsia xanë ata pacuenia canivi beyaxuabame Egipto nacuapijinë?” jaitsi Moisésjinë pijamonaenë.

²⁹ Nexata Moisésjinë itsa jumetane bajarapacuenia pejumaitsijavatsi pijamonaenë, nexata Moisésjinë najetabajirava Madián nacuyabelia. Ba-

jarapanacuatalia ponapona. Nexata bajarapanacuatalia Moiséspijinē na-cojioba. Xaina anijanēbeje pexēnatobeje, jai Esteban sacerdotevi penamat-acaitorobivijavabelia, judíovi pijaancianovijavabelia ata, judíovi pecujaru-bivijavabelia ata.

³⁰ Icatsia Esteban jumaitsi bajarapamonaejavabelia:

–Bjaraxuacujinae icatsia cuarenta baja pavaibeje itsa panepa Moiséspijinē peponaponaecujinae Madián nacuata, Dioso tsitanaitajētatsi beāngelnēcuenia. Bajarapacuenia tsitanaitajētatsi petusato nacuata, Sinaivēnētsuto canacujitsita. Tsiquirinaemēyo petajueyecaecotia tuatua-jēta, tsitanaitajētsitsi Dioso Moiséspijinē. Itsiata tsiquirinaemēyo apo veriajavitsi.

³¹ Moiséspijinē itsa tane, jamatabēcuenenabenajaca. Nexata cujitabalia xaniavaetsia imoxoyo petaenexa tsiquirinaemēyo petajueyecaecotia. Nexata bajarapacotiajavaverena Dioso jumaitsi Moiséspijinējavabelia:

³² “Xanē raja nijasalinaivimi pijaDiosonē. Abrahampijjinē, Isaacpijinē ata, Jacobpijinē ata, pijaDiosonē,” jai Dioso. Nexata bajarajota Moiséspijinē neconecojai pecajunavi. Apo naēcotsilia baja icatsia matavējēa.

³³ Nexata icatsia bajarapacotiajavaverena Dioso jumaitsi Moiséspijinējavabelia: “Nataxujonore nijazapato. Tsipaji raja taitabarata nucame.

³⁴ Taniji rabaja tajajivi nijamonae Egipto nacuata bitso bepejiobicue-nia pejinavanapaejava. Jumetaniji bajarapamonae penatsinueyabiabi-ja. Nexata runaica-jē bajarapamonae tajutsinexa Egipto nacuaverena. Naxanitsia. Caitorobijitsiatsi Egipto nacuyabelia,” jai Dioso Moiséspijinējavabelia tsiquirinaemēyo petajueyecaecotiajavaverena, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁵ Icatsia Esteban jumaitsi bajarapamonaejavabelia:

–Nexata Moiséspijinē Dioso itorobatsi peponaenexa Egipto nacuyabelia, vajasalinaivimi Egipto nacuata bepejiobiaexanabiabijavatsivecua pejutsinexa Egipto nacuaverena. Moiséspijinē peponaevajēnaeya Egipto nacuyabelia, pamatacabi abaxē Moiséspijinē ponapona panacuata vajasali-naivimi jinavanapa, bajarapamatacabi vajasalinaivimi Moiséspijinē nave-cuitavetatsi. Vajasalinaivimi jumaitsi Moiséspijinējavabelia: “¿Jipatsa catocopa-ta patanevetsinēnexamē? ¿Jipatsa catocopata, pibisiacuene itsa paexanajē, pataneconitsiaexanabiabinexamēnua?” jai vajasalinaivimi. Bajarapacue-nia vajasalinaivimi navecuitavetsi ata, itsiata Dioso itorobatsi Moiséspijinē peponaenexa vajasalinaivimijavabelia.

³⁶ Moiséspijinē nexata pona Egipto nacuyabelia. Nexata Egipto nacu-ata Moiséspijinē Dioso pesaēta pinijicuene pexanaejava, exanapona. Ba-jaraxuacujinae Moiséspijinē Egipto nacuaverena vajasalinaivimi jane baja matacanajetaruca. Nexata Moiséspijinē epatuarena Rojovēnē manuamene maxēranajavata, Dioso pesaēta pinijicuene pexanaejava exana. Bjaraxu-acujinae cuarenta pavaibeje itsa jinavanapa petusato nacuata, itsajavanē icatsia Dioso pesaēta pinijicuene pexanaejavanē, Moiséspijinē exanapona.

³⁷ Bajarapamatacabi cajena Moiséspijinē jumaitsi vajasalinaivimijavabelia: “Pacuenia xanē Dioso nitoroba Diosojumelivaisi jivi tatsipae-binēnexa profetanēnexamē, bajarapacuenia Dioso pacatoitorobianica itsanē profetanē Diosojumelivaisi papecatsipaebinēnexa. Bajaraponē paxamēyajuvēnēnē tsane. Bajaraponē pajumecovēnētsianame,” jai cajena Moiséspijinē bajayata tajēvelia vajasalinaivimijavabelia Jesús yabara.

38 Moisésþijinë barënacaeuata vajasalinaivimi petusato nacuata, Sinaívenë tsutomuxuneneta. Nexata Sinaívenë tsutojumabetsia caenë Moisésþijinë junaya. Nexata Sinaívenë tsutojumatatsia Moisésþijinë ángeljavelia tocaicuajai vajasalinaivimi. Nexata Moisésþijinëta Dioso penajumecopatsilivaisi jivi pejumecovënëtsinexa, Sinaívenë tsutojumatatsia tonajumecopatatsi. Bajarapalivaisi Dioso najumecopata Moisésþijinëta vaxaitsi ata bajarapalivaisi vajaxainaenexa mapamatacabijavaberenaje, jai Esteban sacerdotevi penamatacaitorobivijavelia, judíovi pijaancianovijavelia ata, judíovi pecujarubivijavelia ata.

39 Icatsia Esteban jumaitsi bajarapamonaejavelia:

–Vajasalinaivimi apo jamatabëjumecovënëtsi Moisésþijinë. Apo jitsipae cajena matavëjêa penamatacaitorobinënexatsi. Vajasalinaivimi picani najamatabëxaina epatua Moisésþijinë pepepënaviabinexatsi Egipto nacuayavelia.

40 Moisésþijinë bajayajebi ponaponaya Sinaívenë tsutojumatatsia. Nexata Moisésþijinë pecovëta vajasalinaivimi jumaitsi Aarónþijinëjavavelia: “Exanare diosovi vajanacamatacaponaenexa. Apo yapëtaetsi rabaja pacuenia exanatsi Moisés vajanacamatacaponaenë Egipto nacuaverena,” jai.

41 Nexata vajasalinaivimi becerro jumapecataeya exana oronë. Nexata bajarapajumapenëjavavelia pevi perajutsinexa, ofrendacuenia tobia dajubi. Bajaraxuacujinae vajasalinaivimi jamatabëcuenebarëyaya fiesta exana pecobeta pexanaexae oronë. Tsipaji bajarapajumapenë vajasalinaivimi bepija-diosonë tane.

42 Bajaraxuata Dioso baja copata peyavenonaeyava vajasalinaivimi. Nexata baja Dioso tocopata vajasalinaivimi najamatabëcuenecopatsiaya penavajëcabiabinexa itaboxopijitulupujavelia. Diosojumepaebinë profeta peyaquinaebaxutota, Dioso pejumaitsijava vajasalinaivimi yabara jumaitsi mapacueniaje:

Israelpijinë papemomoximë, pamatacabi abaxë pajinavanapame cuarenta pavaibeje petusato nacuatalla, pabeyabiabi atamë baca, oveja yajava, bajarapavi xanë apo panerajutabiabimë ofrendacuenia.

43 Bajarapavi parajutabiabame ofrendacuenia panenatoexanaediosovijavelia. Tsipaji bajarapamatacabi pacajinavanapame carpabo bepanijadiosonë panetaenë Molocvënëdiosonë pijabonexa. Pacajinavanapamenua tuluputo, jumapecataeya panenatoexanaetuluputo, Renfánvënëtuluputo. Nexata bajarapatuluputo pataneme bepanijadioso. Panecobeta saya paneexanaediosovi, pacajinavanapame najamatabëcuenecopatsiaya bajarapadiosovijavelia panenavajëcabiabinexa. Bajaraxuata panijanacuavecua pacacoponaeyaexanaenatsi Babilonianacua pënëyavelia pairajavelia, jai Dioso pejumaitsijava mapacueniaje profetanë peyaquinaebaxutota vajasalinaivimi yabara, jai Esteban sacerdotevi penamatacaitorobivijavelia, judíovi pijaancianovijavelia ata, judíovi pecujarubivijavelia ata.

44 Icatsia Esteban jumaitsi bajarapamonaejavelia:

–Bajayata vajasalinaivimi itsa jinavanapa petusato nacuata, cajinavanapa Dioso pijacarpaboxaneto, bajarapabota Diosojavelia pevajëtabiabinexa. Nexata Dioso Moisésþijinëta penajumecopatsilivaisi, Dioso peyaquinaeibopanayobeje, vajasalinaivimi xaniavaetabuatabiaba bajarapacarpabo ënëtuatujêta. Copiaya Moisésþijinë jumapecataeya Dioso tsitajëtatsi pacuenia bajarapacarpabo exanetsijitsia. Nexata juya Moisésþijinë itoroba vajasalinaivijavelia. Nexata vajasalinaivimi exaneta bajarapacarpabo pacuenia Dioso cuenecataeya tsitajëtatsi Moisésþijinë.

⁴⁵ Bajaraxuacujinae bajarapacarpabo rajutatsi vajasalinaivimi pecajinavanapaenexa. Nexata vajasalinaivimi itsabelia varapa, caponabiaba bajarapacarpabo. Moiséspijinē baja itsa tēpa, Josuépijinē juya matabapona vajasalinaivimi. Josuépijinē nexata pamatacabi vajasalinaivimi matabanajetaruca, caparena bajarapacarpabo mapanacuayaberenaje. Nexata vajasalinaivimi vajabitsaē exana mapanacuataje pejinavanapaevimijavabelia. Nexata vajasalinaivimi mapairaje yacajērēta. Pamatacabi Josuépijinē vajasalinaivimi matabanajetaruca mapanacuayaberenaje, Dioso rēcēpecaeyaexanatsi mapanacuapijivimije Josuébana pevajēnaetarena. Nexata bexēajavaberenena ata, pamatacabi Davidpijinē mapanacua evetaje, vajasalinaivimi abaxē cajinavanapa bajarapacarpabo.

⁴⁶ Nexata Dioso pexaniajamatabēcuenia tanetsi Davidpijinē, mapanacuaje pevetsinēmi. Nexata picani Davidpijinē bitso jitsipa Dioso pijabonexa templo pexanaeyaexanaenexa. Baitsi paDioso bajayata Jacobpijinē jumecovēnēta, Davidpijinē jane baja pamopijinēmi.

⁴⁷ Itsiata baitsi jane Davidpijinē Dioso apo tocopatsitsi templo pexanaeyaexanaenexa. Davidpijinē pexēnato, Salomónpijinē, Dioso pijabonexa templo exanaeyaexana, Davidpijinē baja pepuatēpae.

⁴⁸ Pepo Dioso athēbētatsia peecaenē, bajaraponē apo ponaponae bota, jivi pexanaebota. Diosojumepaebinē profetanē bajayata jumaitsi mapacueni-aje Dioso pejumaitsijava:

⁴⁹ Athēbētatsia daxitacuene taevetsinē. Mapanacuajava ata taevetsinē. ¿Detsa nexata xuajitsia bo panetoexanetsipame? Apo namatavenon-aeñē cajena bo tanacueraevetsinexa.

⁵⁰ Xanē daxitacuene taexanaenē, jai profeta bajayata Dioso pejumaitsijava, jai Esteban sacerdotevi penamat-acaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁵¹ Icatsia Esteban jumaitsi bajarapamonaejavabelia:

—Paneajamatabēcuenetajavi. Paneamatabocotajavinua. Apo pajumecovēñetsimē Dioso pejumelivaisi. Apo pacopatsimē Espiritu Santo papecat-sijamatabējonexa. Pacuenia panijasalinaivimi bajayata itsi, bajara saya icatsia paxamē paitsimē.

⁵² Diosojumepaebivi profetavi tajēvelia vajunupaebaona Cristo, pepo planeconijibinē pepatsijavanexatsica. Nexata panijasalinaivimi daxita bajarapapofetavimi bejiobiaexanabiaba. Beyejebabiabanua. Nexata jane baja Cristo itsa patsica, paxamē pijavajabitsaē pecobeyabelia pacanajetaxu-abame. Bajarapacuenia Cristo pabeyaxuabame.

⁵³ Angelevi pacarajutsi ata Dioso Moiséspijinēta penajumecopatsilivaisi jivi pejumecovēñetsinexa, itsiata paxamē apo pajumecovēñetsimē bajarapali-vaisi, jai Esteban sacerdotevi penamatacaitorobivijavabelia, judíovi pijaan-cianovijavabelia ata, judíovi pecujarubivijavabelia ata.

Pacuenia Esteban beyaxuabatsi yabara pelivaisi

⁵⁴ Sacerdotevi penamatacaitorobivi, judíovi pijaancianovi ata, judíovi pecujarubivi ata, itsa jumetanē Esteban petsipaebilivaisi, anaepana bitso Estebanjavabelia. Nexata bajarapamonae pecaanae, navonoquiarabaxane.

⁵⁵ Itsiata Esteban bitso jamatabēcuenēvēñēca Espiritu Santo. Esteban athēbēa benaēcotsia. Nexata tane Dioso pijapenivenivenaecotia. Taenut-sianua Jesús penucaejava paxa Dioso pemuxuneneta, pecujanenia.

⁵⁶ Nexata Esteban jumaitsi daxita bajarapamonaejavabelia:

—¡Panataema! Taniji itaboxo penapatsijavatsia. Daxitajivi Pematapijinē, ponē naexana mapanacuataje, pacuenia vaxaitsi banaexanatsi, nucaya paxa Dioso pemuxuneneta, pecujanenia, jai Esteban.

⁵⁷ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, pecobenēta namuxuvojoacaba. Bajarapamonae vajajai pinijicuenia. Daxita caecuenia cujibarenatsi Esteban pevatabinexatsi.

⁵⁸ Bajarapamonae Esteban caponaliatsi tomarapēñeyabelia. Nexata tomarapēñetalia Esteban tseconatsi ibotonēta. Nexata daxita pamonae jumetane Esteban petsipaebilivaisi, najumajonejeba pijacamisajumavelia penaxatabijavanē. Nexata Esteban petseconaevajēnaetsi ibotonēta, bajarapamonae penajumajonejebijavanē pevejēato Saulovēnēnē evetsiaexanatsi.

⁵⁹ Petseconanubenaevajatatsi ibotonēta, Esteban vajēta Diosojavabelia. Jumaitsi:

—Tajatuxanenē Jesús, daxita pepo tajamatabēcuene pire, jai Esteban.

⁶⁰ Bajaraxuacujinae Esteban pematatabacabēta nuca. Aējai pinijijumeta.

—Tajatuxanenē, itaxutobejiobiataema mapamonaaje. Vecuajibiaexanare paneconi natsixana xamējavabelia tanebejiobiaexanaexae mapacueniaje, jai Esteban.

Bajaraxuacujinae Esteban tēpanajereca baja.

8

Pacuenia Saulo jaita Jesús pelivaisi pejumecovēñetsivi penaneconitsiaexanaenexa yabara pelivaisi

¹⁻³ Sacerdotevi penamatacaitorobivi, judíovi pijaancianovi ata, judíovi pecujarubivi ata, Estebanpijinē baja itsa beyaxuabatsi, Saulo tsitaxanepanatsi. Nexata pebijivi, pamonae Dioso bitso jumecovēñeta, bajarapamonae Estebanpijinē mēthētatsi. Matanueyabatsi bitso.

Bajarapamatacabi jane baja sacerdotevi penamatacaitorobivi, judíovi pijaancianovi ata, judíovi pecujarubivi ata, taxxuaba pebejiobiaexanaponaejava Jesús pelivaisi pejumecovēñetsivi Jerusalén tomarata. Saulo jane baja jaitaruta Jesús pelivaisi pejumecovēñetsivi Jerusalén tomarata. Caebo canacujitsia jonepona. Nexata taicapona pebejivi, petiriavi ata, pamonae Jesús pelivaisi pejumecovēñetsivi. Penaneconitsivi pejebabiabiboyabelia Saulo cajonepona bajarapamonae. Nexata ayaibitsaētoxaneto Jesús pelivaisi pejumecovēñetsivi, Jerusalén tomarapijivi, rēcēpeca itsatomaranējavabelia. Itsamonae rēcēpeca Samaria nacuyabelia. Itsiata apóstolevi nacopaba Jerusalén tomarata.

Pacuenia pexanialivaisi, Jesús pelivaisi, pejumecovēñetsivi, tsipaebapona Samaria nacuyajava yabara pelivaisi

⁴ Pamonaes Jesús pelivaisi pejumecovēñetsivi, rēcēpeca Jerusalén tomaravecua. Nexata itsaxuayo bajarapamonae najetarubena, jivi tsipaebanajetarubena pexanialivaisi, Jesucristo pelivaisi.

⁵ Pamonaes rēcēpeca yajuvēñēnē, pevēñē Felipe. Bajaraponē lia Samaria nacuata peecaetomarajavabelia. Bajarapatomarapijivijavabelia Felipe tsipaeba Jesús pelivaisi. Jumaitsi:

—Jesús raja Cristo, ponē Dioso itorobica jivi pecapanepaenexa, jai tsaponae Felipe Samaria nacuata peecaetomarapijivijavabelia.

6 Itsa patomarata Felipe Jesús pelivaisi tsipaebabiaba, jivi ayaitbit-saëtoxaneto nacaetuatabiaba. Daxita bajarapamonae xaniavaetsia namuxunaevetabiaba Felipe itsa tsipaebabiaba Jesús pelivaisi. Bajarapamonae tane Felipe Dioso pesaëta pinijicuene pexanaejavanë.

7 Pamonaë dovathi peyajavajinavanapaevi, Felipe vecuacapitsapabiaba. Dovathi pinijijumeta aëjai tsabiabi itsa vecuacapitsapabiaba Felipe. Nexata dovathi peyajavajinavanapaevimi, jamatejema baja tsabiabi. Pamonaë ata petabusipacuenabivitsi, pejayujayunaevi ata, jamatejemayaexanapona Felipe.

8 Bajaraxuata daxita bajarapatomarapijivi jamatabëcuenabarëya.

9 Bajarapatomarata Simónvënënë ponapona. Bajaraponë jivi pejorobiabinë. Bajayajebi daxita Samaria nacuapijivi yamaxëitojorobaponapona. Simón jumai tsabiabi bajarapatomarapijivijavabelia:

—Xanë bitso jivi taxaniavaetsinë, jai tsabiabi.

10 Daxitajivi, petuxanevi ata, Simón pejumaitsijava namuxunaevetabiat-batsi. Bajarapamonae nexata Simón yabara jumai tsabiabi:

—Maponëje Simón pinijicuene pexanaejava caëjëpatsi. Dioso raeta yavenonatsi, jai tsabiabi bajarapamonae Simón yabara.

11 Bajarapacuenia Samaria nacuapijivi xaniavaetsia jumecovënëtabiaba tsipaji Simón pejorobicueneeta bajayajebi jivi yamaxëitojorobabiaba.

12 Nexata Felipe Samaria nacuapijivijavabelia tsipaeba Dioso pijajivi pevetsijavanexa. Jesucristo pelivaisi ata tsipaeba. Nexata Samaria nacuapijivi jumecovënëta Felipe petsipaebilivaisi. Bajarapamonae pebijivi, petiriavi ata, Felipe bautisaba.

13 Nexata jane baja Simón jivi pejorobiabinë ata jumecovënëta Felipe petsipaebilivaisi. Nexata baja Simón ata Felipe bautisaba. Bajaraxuacujinae Felipe pepëta naponapona Simón. Nexata Simón jamatabëcuenenabenajacabiaba itsa taeyabiaba Dioso pesaëta Felipe pinijicuene pexanaponaejavanë.

14 Nexata apóstolevi Jerusalén tomarata pejinavanapaevi, vënëlivaisitane Samaria nacuapijivi Dioso pitorobilivaisi pejumecovënëtsijava. Nexata apóstolevi jumaitsi peyajuvënënebejejavabelia:

—Pedro, paxamëbeje Juanbeje, pataemeliabeje Samaria nacuapijivi, pejumecovënëtsivi Dioso pitorobilivaisi, jai apóstolevi.

Nexata Pedrobeje Juanbeje ponabeje.

15 Itsa bajaraponëbeje patabeje Samaria nacuayabelia, tovajëtabeje Diosojavabelia Espíritu Santo petsijamatabëpatsinexatsitsica Samaria nacuapijivi, Dioso pitorobilivaisi pejumecovënëtsivi.

16 Bajarapacuenia tovajëtabeje tsipaji abaxë Samaria nacuapijivi Espíritu Santo apo tsijamatabëpatsitsitsica. Abaxë saya bautisabatsi bajarapamonae Jesús pevënëta.

17 Nexata Pedrobeje Juanbeje petovajëtsijavatabeje Diosojavabelia, tsi-matanacobeuatabeje Samaria nacuapijivi. Nexata jane baja Samaria nacuapijivi Espíritu Santo tsijamatabëpatsicatsi.

18 Nexata Simón itsa tane Samaria nacuapijivi Espíritu Santo petsi-matarunaevjavatsitsica apóstolenëbeje Samaria nacuapijivi tsi-matanacobe-buatsiaya petovajëtsijavatabeje Diosojavabelia, nexata Simón palata tsipaeba apóstolenëbejejavabelia.

19 Simón jumaitsi:

—Panerajurebeje mapacaējēpaejamatabēcuenēje. Pajivi tsimatanacobebugatajē tatovajētsijavata Diosojavabelia, bajarapajivi petsimatarunaenexatsit-sica Espiritu Santo, jai Simón apóstolenēbejevabelia.

²⁰ Nexata Pedro jumaitsi Simónjavabelia:

—Xamē cajena Dioso caxuabiana infernojavabelia. Nexata verevere-caename nijapalata yajava. Tsipaji najamatabēxainame necomuatsinexa ēpalatata Dioso amoneya jivi perajutsijavatsica.

²¹ Tsipaji pepacuene apo najamatabēcuenecopatsimē xaniavaetsia Diosojavabelia. Nexata Dioso patajumecovēnētsivita, apo nanacuenebimē tsane.

²² Copare baja papibisiacuene najamatabēxainame. Najamatabēcuenepēnēyorore Diosojavabelia. Vajēre Diosojavabelia pecavecuaajibiaexanaenexa papibisiacuene najamatabēxainame.

²³ Xanē cajena yapētāniji necueneēbįjāva Jesús pelivaisi pejumecovēnētsivi. Yapētānįnua pecajamatabēcuenecēnēnaejāva pibisiacuene nexanaenēconi, jai Pedro.

²⁴ Nexata Simón jumaitsi:

—Panetovajērebeje Diosojavabelia tanevecuaajibiaexanaenexa paneconi xainajē Dioso tanexuabįyaniva infernojavabelia pacuenia panejumait-simēbeje, jai Simón.

²⁵ Bajaraxuacujinae Pedrobeje Juanbeje bajarapatomarapįjįvįjavabelia tsipaebabeje pacuenia tanebeje Dioso pexanaejāva. Tsipaebabejenua Dioso pįtorobilivaisi. Bajaraxuacujinae Pedrobeje Juanbeje itsa navialiarabeje Jerusalén tomarabelia, Samaria nacuata penaetomaranējāva tsipaebanaje-tarucabeje pexanialivaisi, Jesús pelivaisi.

Pacuenia Felipe bautisaba Etiopía nacuapįjinē yabara pelivaisi

²⁶ Dioso pįjāāngel jumaitsi Felipejavabelia:

—Nonotapunare. Maxuayolia rovalia liamēreje. Panamuto Jerusalén tomaraverena naropota pepatsinexa Gaza tomarabelia, bajarapanamutualia liamēre, jai āngel Felipejavabelia.

Bajarapanamuto petusato nacujāva rucalia pepatsinexa Gaza tomara-belia.

²⁷ Nexata Felipe xaniavaeta pijājavaxi peponaenexa baja. Bajaraxuacujinae naropolia jane baja. Nexata bajarapanamutualia Felipe caxitajaraba Etiopía nacuapįjinē. Bajaraponē palata pevetsinē. Etiopíanacua pevetsiva pijapalata tovetabiaba. Bajaraponē, Etiopía nacuapįjinē, Jerusalén tomara-javabelia pona najamatabēcuenecopatsiaya pevajētsinexa Diosojavabelia tem-plobota.

²⁸ Nexata baja Etiopía nacuapįjinē Jerusalén tomaraverena naviatanaje-taruca. Navialia baja pijānacujāvabelia. Pįjamoyota, carrozavēnēmoyota, yanajetaruca. Nexata lebanajetaruca Diosojumelivaisipaebinē profeta Isaiąpįjinē bajayata peyaquinaebaxuto.

²⁹ Nexata Espiritu Santo jumaitsi Felipejavabelia:

—Bitsojınāremelia. Pēcaxinaeremelia mapamoje. Imoxoyo pemuxunenia nucaponaename, jai Espiritu Santo.

³⁰ Felipe nexata cujinaejinalia. Nexata baja Felipe pēcaxinalia Etiopía nacuapįjinē. Nexata Felipe jumetane Etiopía nacuapįjinē pelebenajetaruc-aejāva profeta Isaiąpįjinē peyaquinaebaxuto. Nexata Felipe jumaitsi Etiopía nacuapįjinējavabelia:

—¿Xamē tsaja pepacuene jumeyapētāneme palivaisi lebanajetarucame? jai Felipe.

³¹ Nexata Etiopía nacuapijinē jumaitsi:

—¿Detsa pacuenia jumeyapētaejitsipajē itsa apo netsipaebi xaniavaetsia itsanē ata? jai.

Nexata Etiopía nacuapijinē junatatsi Felipe carrozavēnēmoyo ēnēabetsia Felipe penajanaenexatsia penamuxuneniaecaenexabeje.

³² Profeta Isaíaspijinē peyaquinaebaxutota, palivaisi Etiopía nacuapijinē lebanajetaruca, tajēvelia Jesús yabara jumaitsi mapacueniaje:

Pacuenia oveja moya, caponae atatsilia pebeyaxuabinexatsi, bajara pijinia pacuenia bajaraponē ata moya tsane, caponae atatsilia pebeyaxuabinexatsi. Pacuenia ovejajo naxunae atatsi, moya, bajara pijinia pacuenia bajaraponē ata moya tsane, yapētae ata pebejiobiaexanae-javanexatsi.

³³ Bejiobiaexanaenatsi. Pibisiacuene apo exanae ata, naneconitsiaexanatsi. Itsajivi ata bajaraponē yabara apo jumaitsi tsane: “Mara pamonaeye bajaraponēmi pemoxije,” apo jai tsane. Tsipaji beyaxuabianatsi, jai tajēvelia mapacueniaje Isaíaspijinē peyaquinaebaxutota Jesús yabara, palivaisi Etiopía nacuapijinē lebanajetaruca.

³⁴ Nexata Etiopía nacuapijinē jumaitsi Felipejavabelia:

—Pexaniacuene netoexanare. Netsipaebare ponē yabara yaquina profeta Isaíaspijinē mapacueniaje. ¿Baja tsa ponē pijacuata nayabarajumaitsi? Itsa jume, ¿itsanē yabara tsaja jumaitsi? jai Etiopía nacuapijinē Felipejavabelia.

³⁵ Nexata palivaisi Etiopía nacuapijinē lebanajetaruca, bajarapalivaisi Jesús yabara pejumaitsijava copiaya Felipe yapētaeyaexana. Bajaraxuacujinae icatsia tsipaeba pexanialivaisi, Jesús pelivaisi.

³⁶ Penajetarucaejavatabeje bajarapanamutua, patabeje itsajota merayo eca. Nexata Etiopía nacuapijinē jumaitsi Felipejavabelia:

—Mara jota meraje. Jitsipajē picani xanē tanebautisabinexamē. Itsiata baitsi jane yapētaneme xua yabara apo xanepanae tanebautisabinexamē, jai Etiopía nacuapijinē Felipejavabelia.

³⁷ Nexata Felipe jumaitsi:

—Itsa jumecovēnētame xaniavaetsia daxita nejamatabēēthētojavaverena, nexata necaējēpa tacabautisabinexa, jai Felipe.

Nexata bajaraponē jumaitsi:

—Jumecovēnētajē rabaja. Jesucristo raja xaniajai Dioso pexēnato, jai Etiopía nacuapijinē Felipejavabelia.

³⁸ Nexata bajaraponē pijamo nucojopaeyaexana. Bajaraponēbeje Felipebeje runarecabeje merajavabereca. Felipe bautisaba Etiopía nacuapijinē.

³⁹ Nexata penonotajunaecujinaetsinabeje, Espiritu Santo pitatsi Felipe Etiopía nacuapijinē pitabarata. Itsiata Etiopía nacuapijinē apo tae pacuenia Felipe pitatsi Espiritu Santo. Bajaraxuacujinae Etiopía nacuapijinē apo taetsi baja Felipe matavējēa. Itsiata Etiopía nacuapijinē pona baja barēyaya pijanacuayabelia.

⁴⁰ Felipe Espiritu Santo caliatsi Azoto tomarabelia. Felipe nexata daxita tomanējēva tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

9

*Pacuenia Saulo jumecovēnēta Jesús yabara pelivaisi
(Hch 22.6-16; 26.12-18)*

1 Saulo cajena Jerusalén tomarata apo copatsi petaicaponaejava daxita pamonae Jesús pelivaisi jumecovënëta pebeyejebiaexanaenexa. Bajaraxuata Saulo pona daxita sacerdotevi pepo penamatacaitorobinëjavabelia.

2 Nexata Saulo sacerdotevi pepo penamatacaitorobinëjavabelia jumaitsi:

—Netsicobeyaquinare cuyalatobaxutonë tacaponaejava Damasco tomarabelia. Damasco tomaratalia judíovi penacaeuatabiabibonë pevetsivi tarajutsinexa. Nexata bajarapamonae itsa tane neyaquinaebaxutonë, tane-copatsinexa daxita Jesús pelivaisi pejumecovënëtsivi tataicaenexa. Nexata itsa taicajë pebijivi, petiriavi ata, tacapatsinexa mapatomaraberenaje penaconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinë jejai. Nexata cuyalatobaxutonë tsicobeyaquinatsi Saulo pecaponaejava Damasco tomarabelia.

3 Bajaraxuacujinae Saulo jane baja pona Damasco tomarabelia. Nexata ajena Saulo imoxoyotanjataruca Damascotomara, jemata Saulo penajetarucaejavata namutua matatoyorotsia naitayotatsi athëbëvetsica.

4 Nexata Saulo irataeya bocajunua irata. Jumetaenuca athëbëvetsica pejumaitsijava Jesús. Jumaitsi mapacueniaje:

—Saulo, Saulo, ¿detsa xuajitsia tajajivi netobejiobiaexanaponame? jai Jesús.

5 Nexata Saulo jumaitsi:

—Tajatuxanenë, ¿detsa ponëmë? jai.

Nexata icatsia athëbëvetsica Jesús jumaitsi Saulojavabelia:

—Xanë raja Jesúsne. Tajajivi netobejiobiaexanaponame. ¿Detsa xuajitsia apo tajticipaecuenia exanaponame? Xamë nijacuata najamatabëcuenebijanaponame, jai Jesús athëbëvetsica.

6 Saulo nexata neconecojai pecajunavi. Nexata jumaitsi:

—Tajatuxanenë, ¿detsa xua nexata jitsipame taexanaenexa? jai.

Nexata Jesús jumaitsi:

—Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë, jai Jesús.

7 Nexata papebijivi Saulo yajavanajetaruca, najunaviacanubena. Nexata moya nubena. Tshipaji jumetane pajume athëbëvetsica jumaitsi Saulojavabelia. Bajarapajume jumetae ata, itsiata bajarapamonae apo tae jivitonë.

8 Nexata Saulo, irata pebocaenëmi, nonotapuna. Naëcobaruta picani. Itsiata apo naëcotsixanepanae. Tshipaji itaxutomeravibatsi. Nexata papebijivi Saulo yajavanajetaruca, bajarapapebijivi saya Saulo comacaponaliatsi Damasco tomarabelia.

9 Nexata Saulo natsivajënaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

10 Damasco tomarata ponapona Ananías, Dioso pejumecovënëtsinë. Nexata Jesús bemajitsinaebocuenia tsitanaitajëta Ananíasjavabelia. Nexata Jesús junataxuaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenë, canamuxunaevetatsi rabaja, jai Ananías.

11 Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vënëruba Peroviacalle. Bajarajotalia Judas pijabota vënëyanijobianame Saulovënëne, Tarso tomarapijinë. Bajaraponë Saulo maparuceaje xanëjavaberena navajëqueca.

12 Bajaraponë Saulo bemajitsinaebocuenia tsitajëtajë pacuenia exanaejitsiamë bajaraponëjavabelia. Nexata Saulo bemajitsinaebota catane pacuenia

nejonecujinaelia bajaraponë tsmatanacobeuatsijitsiamë petaenexa icatsia xaniavaetsia, jai Jesús Ananíasjavabelia.

¹³ Nexata Ananías itsa jumetane bajarapacuenia Jesús pejumaitsijava, nexata Ananías jumaitsi Jesúsjavabelia:

–Tajatuxanenë, anijatonë vënëlivaisitaniji pacuenia bajaraponë Saulo exanaponona. Vënëlivaisitaniji bajaraponë pebejiobiaexanaponaejava Jerusalén tomarata daxita pecajumecovënëtsivi.

¹⁴ Maberena ataje icatsia itorobatsi sacerdotevi penamatacaitorobinë petotaicaenexa daxita pamonae pecajumecovënëtsivi jinavanapa mapatomarataje, jai Ananías Jesúsjavabelia.

¹⁵ Nexata Jesús jumaitsi Ananíasjavabelia:

–Ponare baja. Tsipaji bajaraponë Saulo itapetajë baja tanelivaisipaebinxana itsanacuanëprijivijavabelia, tanelivaisipaebinxanua bajarapanacuanë pevetsivijavabelia ata, tanelivaisipaebinxanua Israel nacuaprijivijavabelia.

¹⁶ Xanë Saulo tsitajëtsianajë pacuenia itsamatacabi Saulo itsamonae bejiobiaexanaejitsiatsi. Bajaraponë bitso bejiobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanaitajëtsijavata.

¹⁷ Bajaraxuacujinae Ananías jane baja lia. Joneya pabota Saulo ponapona. Ananías nexata nacobeuata Saulo pematobocotojumavereca. Ananías jumaitsi Saulojavabelia:

–Tajabananë Saulo, pepo petuxanenë raja Jesús, ponë catsitanaitajëta namutua nenajetarucaejavata, bajaraponë nitoroba. Bajaraponë nitoroba tacatsimatnacobeuatsinexa pecavecuajibinxana baja pecaitaxutomerav-
ibijava icatsia baja netaenexa xaniavaetsia. Nitorobanua tacatsimatnacobeuatsinexa pecatsijamatabëvënëcaenexa Espíritu Santo, jai Ananías Saulojavabelia.

¹⁸ Bajarapacuenia Ananías pejumaitsijavata Saulojavabelia, Saulo veitaxutoothopatsi xua itaxutocaranatatsi, bedujuaitseboco. Nexata jane baja icatsia Saulo xaniavaetsia tane. Saulo nexata nonotapuna. Bajaraxuacujinae bautisabatsi baja.

¹⁹ Bajaraxuacujinae pexaejava baja xane. Nexata baja icatsia Saulo aperabësaereca. Saulo nexata Damasco tomarata caematacabibeje naponapona Dioso pejumecovënëtsivita.

Pacuenia Saulo paeba Jesús pelivaisi Damasco tomarata yabara pelivaisi

²⁰ Saulo pejumecovënëtsicujinae Jesús Dioso pexënatocuene, bepijiayo Saulo taxuxuaba jivi petsipaebijava Jesús pelivaisi judíovi penacatuatabiabi-bonëjava. Saulo jivi itsa tsipaebapona Jesús pelivaisi, jumai tsaponae.

–Pepacuenie raja Dioso pexënato Jesús, jai tsaponae Saulo.

²¹ Nexata daxita pamonae jumetane Saulo petsipaebilivaisi, jamatabëcuenenabenajaca. Najumaitsi bajarapamonae Saulo yabara:

–Mara ponëje bejiobiaexanapona Jerusalén tomaratalia daxita pamonae jumecovënëta Jesús pelivaisi. Icatsia picani pata mapatomaraberenaje petaicaenexa daxita pamonae jumecovënëta Jesús pelivaisi. Nexata itsa taica, pecaponaeenexa picani Jerusalén tomarabelia, sacerdotevi penamat-
caitorobivijavabelia, najai bajarapamonae Saulo yabara.

²² Itsiata Saulo ajumejunavijibia bitso asaëyata tsipaebapona Jesús pelivaisi. Nexata Saulo xaniavaetsia jivi yapëtaeyaexana xaniajai Jesús Dioso pitorobinëtsitsica jivi pecapanepaenexa. Nexata judíovi Damasco tomarata penaevi moya. Apo yapëtae pacuenia jumecanaviatsijitsiatsi Saulo.

Pacuenia Saulo vecuapanepa judíovi yabara pelivaisi

²³ Saulo Damasco tomarata petaxuxuabicujinae Jesús pelivaisi jivi pet-sipaebaponaejava, bexëajavabelia judíovi sivanajamatabëcueneyanabatsi pe-beyaxuabinexatsi Saulo.

²⁴ Nexata caematacabi canacujitsia, caemeravi canacujitsia ata, Saulo judíovi vajënaeetabiabatsi pebeyaxuabinexatsi picani. Pabaupaxaneto-javalia jivi pitsapabiaba Damasco tomaravelia penaropobivi, bajarapabau-paxaneto muxuneneta Saulo judíovi vajënaeetabiabatsi pebeyaxuabinexatsi picani. Itsiata Saulo nayalivaisiajumetane judíovi pebeyaxuabiapaebijavatsi. Bajaraxuata Saulo bajarapabau-paxanetojavalia apo pitsapaelia.

²⁵ Damascotomara matatoyorotsia yacaranata piaitayaëibopanaxanetota. Bajarapayacaranatsijavaxaneto athëbëabetsia apia, pacuenia pinijinaejavaxaneto apia. Bajarapayacaranatsijavaxaneto ibopananë mataropotsia catsanaeya farata. Nexata Dioso pejumecovënëtsivi, Saulo pepënaponaevitsi, itsa baja meravi, Saulo ecaeyaexanatsi bemapirecuenia pexanaejavaxanetoënëta. Nexata Damasco tomara matatoyorotsia peyacaranatsiibopanaxaneto yenepanata athëbëyo perucaeventanavojotualia, Saulo yacoparecatsi irabereca Damasco tomarapënëyabelia. Bajarapacuenia Saulo Damasco tomarata judíovivecua panepa pebeyaxuabiyavatsi.

Pacuenia Saulo Jerusalén tomarata copiapitatsi yabara pelivaisi

²⁶ Saulo itsa patajopa Jerusalén tomarata, Saulo picani jitsipa penapon-aponaejava Jesús pelivaisi pejumecovënëtsivijavata. Itsiata daxita bajara-pamonae Saulo cujanavatsi. Tsipaji apo jumexaniataetsi Saulo pejumecovënëtsijava Jesús pelivaisi.

²⁷ Itsiata Bernabé barëlia apóstolevijavabelia apóstolevi peyapëtaenexatsi Saulo. Nexata Bernabé tsipaeba apóstolevijavabelia pacuenia Saulo namutua penajetarucaejavata tane Jesús bemajitsinaebota. Pacuenia ata Saulo Jesús barëcuaicuajitsi, Bernabé tsipaeba apóstolevijavabelia. Pacuenia ata Saulo ajumejunavijibia tsipaebapona Damasco tomarata Jesús pelivaisi, Bernabé tsipaeba apóstolevijavabelia.

²⁸ Nexata baja Saulo ponapona Jerusalén tomarata. Naponapona apóstolevijavata.

²⁹ Saulo tsipaebapona ajumejunavijibia Jesús pelivaisi. Saulo barëcuaicuajitsi tsabiabi judíovi, griegojume penatsipaebivi. Barënajumenotabiaba bajarapamonae. Itsiata baitsi jane bajarapamonae najamatabëxaina pacuenia beyaxuabijitsiatsi Saulo.

³⁰ Jesús pelivaisi pejumecovënëtsivi, jumetane Saulo pebeyaxuabiapaebi-javatsi. Nexata Jesús pelivaisi pejumecovënëtsivi, Saulo pënaxuabatsi Cesarea tomarabelia. Bajarajotacujinae Saulo itorobatsi pevajënaeyabelia penaje-tarucaenexa pepatsinexa Tarso tomarabelia.

³¹ Bajaraxuacujinae nexata daxitajava, itsaxuayo Jesús pelivaisi pejumecovënëtsivi jinavanapa, xaniavaetsia baja jinavanapa. Cópabatsi baja pe-bejiobiaexanabiabijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecovënëtsivi caebitsaëto canacu-jitsia xaniavaetsia jinavanapa. Nexata daxita jamatabëcueneyitsabapona Jesús pelivaisi pejumecovënëtsijava. Bajarapamonae xaniavaetsia jumecovënëtavanapa Jesús pelivaisi pibisiacuene pexanaeyaniva. Espíritu Santo yavenonaponatsi. Nexata itsamonae ata Jesús pelivaisi apo pejumecovënëtsivimi, ayaibitsaëtoxaneto jumecovënëtaponna Jesús pelivaisi.

Pacuenia Jesucristo pejamatabēcueneta Pedro jamatejemayaexana Eneasvënënë yabara pelivaisi

³² Pedro najetaruca daxitatomaranējjava pesivaxainaenexa Dioso pejumecovënëtsivi. Nexata najetaruca Lida tomarajava ata pesivaxainaenexa Lida tomarata pejinavanapaevi, Dioso pejumecovënëtsivi.

³³ Nexata Pedro Lida tomarata taeyabuata Eneasvënënë. Bajaraponë ocho pavaibeje xaina camata pebocaecujinae. Tsipaji tabusipacuenabatsi.

³⁴ Pedro nexata jumaitsi bajaraponējjavabelia:

—Eneas, cajamatejemayaexana rabaja Jesucristo. Nonotapunare. Xanebare nijacama, jai Pedro.

Nexata Eneas bajarajota nonotapuna.

³⁵ Nexata daxita Lida tomarapijivi, Sarón nacuapijivi ata, tanetsi Eneas pejamatejemajava. Bajarapamonae nexata pijaperujujamatabēcueneta pecat-sitecaejavami, copaba baja. Najamatabēcuenecopaba baja Jesucristojavabelia.

Pacuenia Pedro Dorcasvënëva petēpaecujinae icatsia asaēyaexana yabara pelivaisi

³⁶ Jope tomarata ponapona Dioso pejumecovënëtsiva, Tabitavënëva. Bajarapova pevënë griegojumeta Dorcas. Dorcas daxita matacabi canacujitsia pexaniacueneta toexanabiaba itsamonaejavabelia. Bepejiobivijavabelia rajutabiaba penamatavenonaevaxi bajarapacuenia peyavenonaenexa.

³⁷ Pamatacabi Pedro ponapona Lida tomarata, Dorcas avitane Jope tomarata. Nexata baja Dorcas tēpa Jope tomarata. Peperabēquiatsicujinaetsi petēpaeva buatasti anijairabeje pexainaebō enētuaatujēta. Athēbēyo pairatsia, bajarapaenētuaatujētatsia buatasti.

³⁸ Jopetomara eca imoxoyo Lida tomaravecua. Dioso pejumecovënëtsivi vënēlivaisitanetsi Pedro peponaponaevajava Lida tomarata. Nexata Dioso pejumecovënëtsivi itoroba anijanēbeje pejumaitsinexabeje Pedrojavabelia: “Pedro, naxanitsia. Liamēre Jope tomarabelia,” pejainexabeje Pedrojavabelia. Nexata bajaraponēbeje Lida tomarabelia sivaliabeje Pedro.

³⁹ Nexata Pedro narena bajaraponēbeje pepēta. Pedro itsa napata pabota petēpaeva boca, tsitajētatsi itsajota petēpaeva boca. Nexata pamonajivi pevecuatēpaevanētsi, Dorcaspijiva pevēnuevitsi, Pedro matatoyorotsia itaxutuanuenubenatsi. Bajarapamonae Pedro tsitajēbatsi Dorcaspijiva pejorocaejavanē, penaxatabijavanē, penajumaacabipananē ata, xuanē Dorcaspijiva rajuta bajarapamonaejavabelia pamatacabi abaxē asaē saponapona.

⁴⁰ Nexata paenētuaatujēta petēpaeva boca, bajarapaenētuaatujēvecua Pedro daxita bajarapamonae pitsapaeyaexana. Bajarapamonae itsa pitsapalia, Pedro pematabacabēta nuca pevajētsinexa Diosojavabelia. Nexata Pedro pevajētsicujinae Diosojavabelia, napēnēyorota petēpaevajavabelia. Pedro jumaitsi petēpaevajavabelia:

—Tabita, nonotapunare, jai Pedro.

Nexata petēpaevami naēcota. Itsa tanetsi Pedro, bajarapova namatacota.

⁴¹ Pedro nexata bajarapova cobevaetabiaya nonotapunaeyaexana. Nexata Pedro junarena daxita Dioso pejumecovënëtsivi, pamonajivi pevecuatēpaevanētsi ata. Nexata tsitajēta bajarapamonaejavabelia petēpaevami icatsia piasaējjava.

⁴² Nexata Dioso pesaēta bajarapapinjicueneta Pedro pexanaevajava, daxita Jope tomarapijivi yapētane. Nexata jivibitsaētōxaneto jumecovënēta Jesús Dioso pexēnatocuene.

⁴³Nexata Pedro bajayajebi ponapona Jope tomarata. Simón bacabocotonë peyacueyacuecaeyaexanaenë, pijabota Pedro naponapona.

10

Pacuenia Pedro barëcuaicuajai Corneliovënënë yabara pelivaisi

¹Cesarea tomarata ponapona Corneliovënënë. Apo judíonë. Bajaraponë Italia nacuaverena pepatsivi vajabitsaëvi pijacapítan.

²Cornelio pijabopijivi barëjumecovënënaponapona Dioso. Dioso bitso yaiyataeya Cornelio ponapona. Cornelio palata ayaijava rajutabiaba judíovijavabelia peyavenonaenexa judíovi bepejiobivi. Cornelio vajëtabiaba Diosojavabelia.

³Itsamatacabi caniviyopatota, bejamatabëcuene a las tres, Cornelio bemajitsinaebota tane Dioso pijaángel pejonejavarena pijaboyarena. Nexata junataxuabatsi.

—¡Cornelio! jaitsi.

⁴Cornelio nexata naëcota ángeljavabelia. Bitso cujunava. Nexata Cornelio jumaitsi ángeljavabelia:

—¿Detsa xua jitsipame? jai.

Nexata ángel jumaitsi:

—Nevajëtabibijava Diosojavabelia, nerajutabiabijava ata penamatavenon-
aecuene bepejiobivijavabelia, daxita bajaraxua Dioso tsitaxanepanatsi.
Dioso nexata apo nacofënëtsi bajaraxua.

⁵Itorobare nijajivi Jope tomarabelia pecatojunatsinexa Simón, ponë it-
savënë vënërubatsi, Pedro.

⁶Bajaraponë Simón naponapona Jope tomarata, itsanë Simón, bacabocotonë peyacueyacuecaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaeijtsiamë, jai ángel Corneliojavabelia bemajitsinaebota.

⁷Bajarapacuenia ángel bemajitsinaebota pejumaitsicujinae Corneliojavabelia, ángel baja pona. Nexata Cornelio junata anijanëbeje pijabota petonacuenebaponaponaenëtsibeje. Pematatsënëa junata caenë vajabitsaënë. Bajaraponë vajabitsaënë Dioso peyaiyataenë. Bajaraponë Cornelio yavenonabiabatsi.

⁸Nexata Cornelio copiata tsipaeba bajarapamonaejavabelia daxita pacuenia tsipaebatsi ángel. Bajaraxuacujinae Cornelio itoroba bajarapamonae peponaenexa jane baja Jope tomarabelia, Simón pesivaponaenexa. Nexata baja bajarapamonae naropoba.

⁹Meravia pitsijavata, matonejeepatota, bajarapamonae Jope tomara imoxoyotanajetarubena. Bajara pijinia paepatota Pedro pabota naponapona, bajarapabo jumabetsia junaya. Bajarapabo pejumanamatajëpaebo. Pedro junaya bajarapabojumatatsia pevajëtsinexa Diosojavabelia.

¹⁰Pedro bitso piajani. Jamatabënabane picani. Itsiata pexaejava pexanaevi abaxë apo veretsi pexaejava. Nexata Pedro bemajitsinaebota tane.

¹¹Pedro tane itaboxo penapatsijava. Nexata athëbëvetsica runaica irabet-sica yaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsi upicëta. Bajarapacuenia yamaëya copatsica.

¹²Bajarapapanaxaneto tuatujëta nubena daxitacueniviria. Nubena daxitaviria cuatro pataxutabeje pejinavanapaevi. Bobena daxitaviria pecotobëxëta pejinavanapaevi. Nubena daxitaviria pepunaevi.

13 Nexata Pedro jumetane athëbëvetsica pejumaitsijava: “Pedro, nonotapunare. Beyaxuare daxita mapamonaeye nexaenexa,” pejaijava athëbëvetsica, Pedro jumetane.

14 Nexata Pedro jumaiti:

—Jume raja. Caeto ata raja xanë apo xanë bajarapavirianëxi tanejamatabëcuenebijianaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva, jai Pedro.

15 Icatsia athëbëvetsica jumaiti Pedrojavabelia:

—Pavirianëxi caitorobatsi nexaenexa, xaema. Pëtsa jumaitsimë: “Apo xanë raja bajarapavirianëxi tanejamatabëcuenebijianaeyaniva,” jamë pëtsa, jai athëbëvetsica.

16 Acueyabi xuabeje bajarapacuenia athëbëvetsica napëna jumaiti Pedrojavabelia. Bajaraxuacujinae bajarapapanaxaneto athëbëabetsia baja icatsia yapëcaevaya.

17 Pedro nexata najamatabëxainaeja jamatabëjumaiti tsecae:

—¿Detsa meta pitsijamatabëcuene yabara netsitajëta bajaraxua? jamatabëjai tsecae Pedro.

Pedro abaxë itsa najamatabëxaineca bajarapacuenia, Cornelio pijajivi pata. Pabota Pedro naponapona, bajarapabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa muxuneneta nubena bajarapamona. Bajarapamona namutuarena yanijobanajetarubena jivijavabelia peyapëtaenexa itsajota eca Simón, bacabocotonë peyacueyacuecaeyaexanaenë, pijabo.

18 Nexata bajarapamona peptarëcëpaecujinae, baupa pënëvelia ayaijumeta yanijoba. Jumaiti:

—¿Baja tsa mapabota Simón naponaponaje, ponë vënërubatsi itsavënë, Pedro? jai bajarapamona.

19 Pedro abaxë bojumatatsia athëbëyo najamatabëxainecaya bemajitsinaebota petaejava yabara. Nexata Espíritu Santo jumaiti Pedrojavabelia:

—Taema. Acueyabi ponëbeje casivaparena.

20 Nexata nonotapunare. Runaremecca baja nenaponaenexa bajarapamona pepëta. Jamatejema saya ajamatabëcueneconvëbia naponaname. Tsipaji raja xanë itorobarenajë bajarapamona, jai Espíritu Santo Pedrojavabelia.

21 Nexata baja Pedro runareca Cornelio pijajivijavabereca. Pedro jumaiti bajarapamonaejavabelia:

—Ponë pajaitame, xanë rabaja maje. ¿Detsa xuajitsia panesivaparemena? jai Pedro.

22 Nexata Cornelio pijajivi jumaiti Pedrojavabelia:

—Vajabitsaëvi raja pijacapitán Cornelio pejamatabëcuene panajetarubena. Bajaraponë pexaniajamatabëcuene. Dioso bitso pejumecovënëtsinë. Nexata bajaraponë Diosojavabelia vajëcabiaba. Daxita judíovi yaiyatanetsi. Nexata judíovi jumai tsabiabi bajaraponë yabara: “Pexaniajamatabëcuene raja Cornelio,” jai tsabiabi. Dioso raja pijaángel itorobatsi Cornelio pecajunatsinexa. Bajaraxuata paxanë pacasivaponarenatsi Cornelio pijaboyabelia nenaponaenexa. Cornelio cajumetaejitsia palivaisi tsipaebijitsiamë bajaraponëjavabelia, jai Cornelio pijajivi Pedrojavabelia.

23 Nexata Pedro copiapita boyaberena pejonenexa bajarapamona. Bajarapamona abaxë namajita bajarapabota. Bajayacunua jane baja Pedro

napona bajarapamonae pepëta. Pedro pëyanatatsi itsamonae Jope tomarapijivi, Dioso pejumecovënëtsivi. Itsiata abaxë bajarapamatacabi apo patsilia. Epatua abaxë majitaothopa.

²⁴ Nexata meravia pitsijavata Pedrobana jane baja palia Cesarea tomarebelia. Cornelio nexata pijabota yajavanuca pejunatsivi, pijamonaeviriavi. Yajavanucanua itsamonae, pamona bitso Cornelio peyapëtaevitsi. Pedro jane baja barëvājēnaeevetanucatsi.

²⁵ Pedro itsa patanajetaruca Cornelio pijabopanabota, Cornelio copiapitatsi. Nexata Cornelio pematabacabëta nucajunua Pedro pitabarata. Tsipaji bitso yayiataeya copiapitsijitsia picani.

²⁶ Nexata Pedro apo jitsipae bajarapacuenia bitso yayiataeya pecopiapitsijavatsi. Nexata Pedro mǎxëvaetaba. Nonotapunaeyaexana. Nexata Pedro jumaitsi Corneliojavabelia:

—Nonotapunare. Tsipaji saya pacuenia xamë jamatabëcuenëitsimë, bajara saya xanë ata jamatabëcuenëitsinë, jai Pedro.

²⁷ Nexata Pedro Cornelio barëcuaicuaijai tsanucaponae panabojavarena. Pedro itsa najoneya Cornelio pijaboyalialia, tane jivibitsaëtoخانeto Cornelio pijabota penacaetuatsivi.

²⁸ Nexata Pedro jumaitsi Cornelio pijabota penacaetuatsivijavabelia:

—Paxamë baja cajena xaniavaetsia payapëtaneme mapacueneye. Paxanë pajudiovinë patajasalinaivimi apo panetocopatsi patayajavajinavana-paenexa apo judiovi. Bijiaya pataeyabiabajë apo judiovi. Apo panetocopatsinua patajonenexa apo judiovi pijaboyalialia. Itsiata baitsi jane aeconoxaeta baja Dioso nitaveta tacopatsinexa baja bajarapajamatabëcuene. Nexata Dioso netocopata tayajavaponaponaenexa apo judiovi ata. Netocopatanua tanajonenexa apo judiovi ata pijaboyalialia.

²⁹ Bajaraxuata itsa nejunata taponanexa maberenaje, narenanë bepji-ajamatabëcuenecovëbia. Nexata jamatabëypapëtaniji xua yabara panejunatame, jai Pedro Cornelio pijabota penacaetuatsivijavabelia.

³⁰ Nexata bajarajota Cornelio jumaitsi Pedrojavabelia:

—Xanë imata, caniviyoeapatota, bejamatabëcuene a las tres, vajëtajë Diosojavabelia. Nexata bajarapaepatota jemata taitabarata netsitanaitajëta ángel. Ajena baja cuatro pamatacabibeje xaina bajarapacuenetaataecujinae. Angel penaxatatsijava nivenivena.

³¹ Nexata ángel nejumaitsi: “Cornelio, Dioso rabaja cajumetane nevajëtsijava. Yapëthane baja nerajutabiabijava bepejibivijavabelia penamatavenonaecueneta.

³² Nexata nijajivi itorobare Jope tomarajavabelia pecatojunatsinexa Simón, ponë vënërübatsi itsavënë, Pedro. Bajaraponë naponapona itsanë Simón, bacabocotonë peyacueyacuueyaexanaenë, pijabota. Bajaraponë Simón pijabo eca manumene itapata. Nexata Simón, ponë itsavënë vënërübatsi, Pedro, itsa patsiarena, catsipaebiana pacuenia exanaejitsiamë,” nejai ángel.

³³ Bajaraxuata bepjiyayo casivaponaeyaexanatsi. Xamë baja nexata pexaniajamatabëcuenia netopatame. Bajaraxuata nevajënae daxita paxanë panacaetuatajë Dioso pitabarata. Pacaevetatsi patacajumetaenexa daxita palivaisi Dioso caitoroba patanetsipaebinxamë, jai Cornelio Pedrojavabelia.

Pacuenia Pedro livaisi tsipaeba Cornelio pijabota yabara pelivaisi

³⁴ Pedro jane baja taxuxuaba livaisi petsipaebijava. Jumaitsi:

—Matapania rajane baja yapētaniji. Najēpaeya tsaena Dioso nacajitsipa daxitaviriavitsi.

³⁵ Caenacuapijivi canacujitsia, pamonaē Dioso yayiataeyajinavanapa, jumecovēnētsiajinavanapanua pacuenia Dioso itorobatsi, bajarapamonae Dioso jitsipa.

³⁶ Dioso cajena pexanialivaisi, Jesucristo pelivaisi, tonajumecopata Israel nacuapijivijavabelia. Nexata bajarapalivaisi tsipaebatsi Israel nacuapijivi pibisiacuene pexanaeneconivecua Jesucristo pejamatabēcueneta pecapanepaenexatsi Dioso. Jesucristo raja daxitajivi pijatuxanenē.

³⁷ Payapētaneme rabaja mapacueneje. Juanpijinē jivibautisabinēmi jivi livaisi petsipaebanajetarucaecujinae, pebautisabaponaecujinaenua, Jesús cotocaevi tsipaebanajetaruca Galilea nacuajava, Judea nacuajava ata.

³⁸ Payapētaneme rabaja mapacueneje. Jesús, Nazaret tomarapijinē, Dioso rajuta Espiritu Santo. Nexata Espiritu Santo pejamatabēcueneta Jesús caējēpatsi daxitacuene pexanaenexa. Nexata Jesús jamatejemayaexanapona daxita pamonaē dovathi pejamatabēcueneta avitane. Bajarapacuenia Jesús exanapona tsipaji Dioso yajavaponaponatsi.

³⁹ Paxanē baja cajena pataniji daxita xua Jesús exanapona Judea nacuaata, Jerusalén tomarata ata. Itsamonae beyaxuabatsi Jesús. Cobematabiabarutatsi cruzajavabelia.

⁴⁰ Itsiata baitsi jane Jesús pemēthētsicujinaetsi, acueyabi matababita, Dioso icatsia asaēyaexanatsi. Dioso Jesús caējēpaeyaexanatsi patanetsitanaitajētabiabinexa paxanējavaberena.

⁴¹ Itsiata Jesús apo tsitanaitajētsi daxitajivijavabelia. Ēpaxanējavaberena saya panetsitanaitajētabiaba. Tajēvelia baja cajena Dioso paneitapeta patataevinexa Jesús petēpaecujinae icatsia itsa asaē. Bajaraxuata Jesús petēpaecujinae icatsia itsa asaē, panetsitanaitajētabiaba. Nexata panebarēmabane. Panebarēmatavējēaaapanua.

⁴² Nexata Jesús paneitoroba patatsipaebaponaenexa daxitajivijavabelia pexanialivaisi, Jesús pelivaisi. Paneitorobanua patatsipaebaponaenexa Dioso pejamatabēcueneta itsamatacabi Jesús penaneconitsiaexanaejavanexa daxita pijaneconi pexinaevi. Itsamatacabi Jesús naneconitsiaexanaena piasaēvi, petēpaevimi ata.

⁴³ Athēbēvetsica Jesús pepatsivajēnaetsica, bajayata jinavanapa Dioso-jumepaebivimi profetavi. Nexata profetavimi tajēvelia vajunupaebapona Jesús pejamatabēcueneta Dioso pevecuaajibiaexanaejavanexa pibisiacuene pexanaeneconimi, pajiviyo jumecovēnēta Jesús pelivaisi, jai Pedro Cornelio pijabota penacaetuatsivijavabelia.

Pacuenia Espiritu Santo tsijamatabējunuatsi apo judíovi ata yabara pelivaisi

⁴⁴ Pedro abaxē livaisi petsipaebanuacejavata Cornelio banajavabelia, Espiritu Santo tsijamatabējunuatsi daxita pamonaē jumetaeyena Pedro pet-sipaebilivaisi.

⁴⁵ Nexata judíovi Dioso pejumecovēnētsivi, Pedro peyajavapatsivi, itsa tane bajarapacuenē, jamatabēcuenenabenajacanubena. Jamatabēcuenenabenajaca tsipaji apo judíovi ata Espiritu Santo tsijamatabējunuatsi.

⁴⁶ Nexata Pedro peyajavapatsivi yapētane Espiritu Santo petsijamatabējonejavatsi Cornelio bana. Tsipaji Cornelio bana cuaicuajjai itsaviriajumenēta, apo penatsipaebijumenēmi. Cornelio bana jumai tsaponaē Dioso javabelia:

—Diosomē, bitso ayaijamatabēcuenenēmē, jai tsaponaē.

⁴⁷ Bajaraxuata Pedro jumaitsi peyajavapatsivijavabelia:

—Pacuenia vaxaitsi Dioso nacarajuta Espíritu Santo, bajara pijinia pacuenia mapamonaе ataje Dioso rajutatsi Espíritu Santo. Bajaraxuata itsajivi ata acuenebi pejumaitsijava bajarapamonaе yabara: “Pětsa mapamonaеje pabautisabame merata,” pejaijava, jai Pedro.

⁴⁸ Nexata Jesucristo pevěněta Pedro bautisaba Corneliobana. Pedro pebautisabicujinae Corneliobana, asivatsi abaxě Pedro penaponaponaenexa bajarajota caematacabibeje.

11

Pacuenia Pedro navajunupaeba Dioso pejumecověnětsivijavabelia Jerusalén tomarata yabara pelivaisi

¹ Apóstolevi věnělivaisitane apo judíovi ata Corneliobana pejumecověnětsijava Jesús pelivaisi. Judea nacuata pejinavanapaevi ata, pamonaе jumecověněta Jesús pelivaisi, věnělivaisitane apo judíovi ata Corneliobana pejumecověnětsijava Jesús pelivaisi.

² Nexata pamatacabi Pedro pata Jerusalén tomarata, judíovi, pamonaе jumecověněta Jesús pelivaisi, jumaitsi Pedrojavabelia:

³ —¿Detsa xuajitsia Cesarea tomarata naponaponaе apo judíovi pijabota? ¿Detsa xuajitsia nanabaneme apo judíovita? jai judíovi Pedrojavabelia.

⁴ Nexata Pedro tsipaeba judíovijavabelia pacuenia taxuxuaba bajara-pacueña yabara. Pedro jumaitsi judíovijavabelia:

⁵ —Pamatacabi naponaponaě Jope tomarata Simón, bacabocotoně pey-acueyacuеaеyaxanaeně, pijabota, vajětajě Diosojavabelia. Nexata Diosojavabelia tavajětsijavata bemajitsinaebota taniji athěběvetsica perunaеjavatsica ayaipanaxaneto, besábanapanaxaneto. Bajarapapanaxaneto cuatro pamaětotabeje namataenetsia upicěta. Nexata bajarapapanaxaneto xanějavabetsica yamaěya copatsica.

⁶ Itsa naitaxutobabatsia naěcotajě xaniavaetsia tataenexa xua yajavana-jetaruca bajarapapanaxaneto tuatuajěta, nexata taniji cuatro pataxutabeje pejinavanapaevi. Taniji unupijivinua, pianapanaevi. Taniji pecotoběxěta pejinavanapaevinua. Taniji pepunaevinua.

⁷ Nexata jumetaniji athěběvetsica tanejumaitsijava: “Pedro, nonota-punare. Beyaxuare daxita mapamonaеje nexaenexa,” nejai.

⁸ Nexata jumaitsině: “Jume raja. Caeto ata raja xaně apo xaně bajarapavirianěxi tanejumataběcuenebijiñayaniva. Tsipaji Dioso Moiséspijiněta patanetonajumecopatsilivaisi, paneitaveta bajarapavirianěxi pataxayaniva,” janě.

⁹ Nexata athěběvetsica icatsia nejumaitsi: “Pavirianěxi caitorobatsi nexaenexa, xaema. Pětsa jumaitsimě: ‘Apo xaně raja bajarapavirianěxi tanejumataběcuenebijiñayaniva,’ jamě pětsa,” nejai athěběvetsica.

¹⁰ Acueyabi xuabeje bajarapacuenia athěběvetsica napěna nejumaitsi. Bajaraxuacujinae bajarapapanaxaneto daxita bajarapamonaе athěběabetsia baja icatsia yapěcaevaya.

¹¹ Bajarapaepatota jane baja acueyabi poněbeje nesivapata pabota naponaponaě. Bajarapamonaе itorobatsi Cesarea tomararena.

¹² Nexata Espíritu Santo nitoroba bajarapamonaе pepěta ajamataběcuenečověbia tanaponaenexa Cesarea tomarabelia. Mapamonaеje vajamonaе, seis poněbeje Dioso pejumecověnětsivi, nepěyanata Cesarea

tomarabelia. Nexata panajoneyajë Cornelio, vajabitsaëvi pijacapitán, pijaboyalía.

¹³ Nexata Cornelio panetsipaeba pijabota petsitanaitajëtsijavatsi ángel. Angel pina jumaitsi Corneliojavabelia: “Itorobare nijajivi Jope tomarabelia pecatjunatsinexa Simón, ponë vënërubatsi itsavënë, Pedro.

¹⁴ Bajaraponë itsa patsiarena, catsipaebiana pacuenia exanaejitsiamë Dioso pecavecuaajibiaexanaenexa daxita pibisiacuene nexanaeneconimi, daxita nijabopijivi yajava,” jai pina ángel Corneliojavabelia.

¹⁵ Nexata jane baja itsa taxuxuabajë livaisi tatsipaebijava Corneliobananajavabelia, Espiritu Santo tsijamatabëpatsicatsi Corneliobanana. Pacuenia vaxaitsi copiaya nacatsijamatabëpatsica Espiritu Santo, bajara pijinia pacuenia bajarapamonae ata tsijamatabëpatsicatsi Espiritu Santo.

¹⁶ Nexata najamatabënapitajë Jesús patanejumaitsijava mapacueniajæ: “Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espiritu Santo,” patanejaijava Jesús, najamatabënapitajë.

¹⁷ Xaniajai baja cajena. Dioso rajutapona Espiritu Santo apo judíovi ata pacuenia vaxaitsi nacarajuta Espiritu Santo vajajumecovënëtsixæ vajatuxanenë Jesucristo. Nexata acuenebi tacaranatsijava Dioso perajutsijava Espiritu Santo apo judíovi ata, jai Pedro judíovijavabelia, Jesús pelivaisi pejumecovënëtsivijavabelia.

¹⁸ Nexata judíovi itsa jumetane bajarapacuenia Pedro pejumaitsijava, moya baja. Nexata judíovi jamatabëcuenebarëya Diosojavabelia. Nexata Dioso yabara jumaitsi:

—Xaniajai rabaja. Dioso bajarapacuenia exana apo judíovi ata matababi apo peverevercaejava pexainaenexa, itsa copaba pibisiacuene pexanabiabijava penajamatabëcuenepeñëyorotsinexa Diosojavabelia, jai judíovi.

Pacuenia Dioso pejumecovënëtsivi Antioquía tomarata jinavanapa yabara pelivaisi

¹⁹ Pamatacabi Estebanpijinë beyaxuabatsi, Dioso pejumecovënëtanapaevi Jerusalén tomarata rëcëpeca daxitanacuanëjæva. Bajarapacuenia rëcëpeca tsipaji bitso bejiobiaexanaponatsi. Jesús pelivaisi pejumecovënëtsixæ, itoyatsi. Itsamonae tajëbelia rëcëpeca Fenicia tomarabelia. Itsamonae rëcëpeca Chipre tunaetota peecaetomarabelia. Itsamonae rëcëpeca Antioquía tomarajavabelia. Nexata bajarapamonae Jesús pelivaisi tsipaebapona bajarapatomaranëjæva ëjudíovijavabelia. Itsaviriavijavabelia apo tsipaebapona.

²⁰ Itsamonae Jesús pelivaisi pejumecovënëtsivi, Chipre tunaetota peecae-tomarapijivi, Cirene tomarapijivi ata, pona Antioquía tomarabelia. Bajarapamonae pijinia Antioquía tomarata apo judíovijavabelia tsipaebapona pexanialivaisi, Jesús pelivaisi.

²¹ Pamonae apo judíovijavabelia tsipaeba Jesús pelivaisi, Dioso yavenonatsi. Nexata apo judíovi ayabitsaëtoxaneto jumecovënëta Jesús pelivaisi. Najamatabëcuenepeñëyorota Diosojavabelia pibisiacuene pexanabiabijavavecu.

²² Jerusalén tomarata pejinavanapaevi, Jesús pelivaisi pejumecovënëtsivi, vënëlivaisitane apo judíovi ata Antioquía tomarapijivi Jesús pelivaisi pejumecovënëtsijæva. Nexata bajarapamonae Bernabé itorobaliatsi Antioquía tomarabelia petanenexa apo judíovi ata Jesús pelivaisi pejumecovënëtsijæva.

²³ Nexata Bernabé itsa pata Antioquía tomarabelia, tane apo judíovi ata Dioso peyavenonaejavatsi. Nexata Bernabé sivajamatabêcuenebarêya apo judíovi ata. Nexata Bernabé muxujioba apo judíovi ata daxita bajaramonae pejamatabêêthêtovetsina ajamatabêcuenesaêya peyajavajinavana-paenexa Dioso.

²⁴ Bernabé bitso pexaniajamatabêcuenenê. Jamatabêcuenevênêca Espíritu Santo. Nexata exanabiaba Espíritu Santo pitorobicueniatsi. Dioso bitso pejumecovênêtsinë Bernabé. Bajaraxuata nexata jivibitsaêtoxfaneto jumecovênêta Dioso.

²⁵ Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé itsa caxitajaraba Saulo, barêrena Saulo Antioquía tomaraberena.

²⁶ Nexata Antioquía tomarata caevai naponaponabeje Dioso pejumecovênêtsivijavata. Jivi ayaibitsaêtoxfaneto livaisi tsipaebabiababeje. Antioquía tomarata daxita pamonae Jesús pelivaisi jumecovênêtavanapa, bajarapamonae pijatomarapijivi pepo copiaya jane baja vênêrubatsi Cristianovi.

²⁷ Pamatacabi abaxê Bernabébeje Saulobeje ponaponabeje Antioquía tomarata, Diosojumepaebivi profetavi, Jerusalén tomaraverena penaropobivi, pata Antioquía tomarata.

²⁸ Bajarapaprofetaviyajuvênênê pevênê Agabo. Nexata Agabo nonotapuna Dioso pejumecovênêtsivi penacaetuatsijavata. Nexata Agabo tajêvelia vajunupaeba ayaijaniboxaneto pecopiapatsijavanexa tajêvelia Espíritu Santo peyapêtaeyaexanaexaetsi. Agabo jumaitsi mapacueniaje:

—Ayaijaniboxaneto raja copiapatsiana daxitanacuanêjava, jai tajêvelia Agabo.

Bajarapajaniboxaneto bexêa copiapata Agabo pejumaitsicuenia pamatacabi nacuaevetsinë Claudio evetaponapona Romanonacua.

²⁹ Bajaraxuata cajena janibovajênaeya, Antioquía tomarapijivi daxita Dioso pejumecovênêtsivi najamatabêcuenejêpa peyavenonaenexa Judea nacuapijivi Dioso pejumecovênêtsivi. Nexata Antioquía tomarapijivi, caenê canacujitsia, najamatabêcuenevereta Judea nacuapijivijavabelia perajutsinexa palata pacuenia cuenecaêjêpatsi.

³⁰ Nexata baja Antioquía tomarapijivi itsa tocaetuatsivereta, bajarapamonae itorobatsibeje Bernabébeje Saulobeje petocaponanexabeje bajarapapalata Judea nacuapijivijavabelia, Dioso pejumecovênêtsivi pijaancianovijavabelia. Nexata ancianovi petsicobetsanaenexa bepejibovijavabelia.

12

Pacuenia Pedro etatsi penaneconitsivi pejebabiabibota yabara pelivaisi

¹ Nacuaevetsinë Herodes bejiobiaexanapona Jesús pelivaisi pejumecovênêtsivi.

² Herodes pijajivi itoroba espadata pebeyaxuabinexatsi Santiago, Juan pematapijinêmi.

³ Herodes itsa tane judíovi petsitaxanepanaejavatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabinexatsi. Bajarapacuenia Herodes exana fiestamatacabi, pafiestamatacabi judíovi baxanê levadurata matajêrêabinejeva pexanaepan.

⁴ Pedro pevaetabicujinaetsi, penaneconitsivi pejebabiabibota etatsi. Bajarapabota cuatro pabitsaêtoheje vajabitsaêvi Pedro nacobenaevetabiabatsi.

Itsabitsaëto itsa pitsapa, juya itsabitsaëto evetabiabatsi. Caebitsaëtota jina-
vanapa vajabitsaëvi cuatro ponëbeje tsaponae. Nexata picani Herodes naja-
matabëxaina Pedro penutsinexatsi daxita judíovi pitabarata pascuavënëfiesta
pevereverecaecujinae.

⁵ Nexata Pedro eca penaneconitsivi pejebabiabibota. Vajabitsaë xa-
niavaetsia Pedro yabaupaevetabiabatsi bajarapabovecua Pedro pepit-
sapaeyaniva. Itsiata baiñsi jane daxita Dioso pejumecovënëtsivi, asaëyata
Diosojavabelia tovajëtaponatsi Pedro.

*Pacuenia Dioso pejamatabëcueneta Pedro capanepatsi penaneconitsivi pe-
jebabiabibovecua yabara pelivaisi*

⁶ Pamatacabi picani Herodes Pedro nutsijitsiatsi daxita judíovi
pitabarata, bajarapamatacabivajënaeya pameravi, penaneconitsivi
pejebabiabibo ënëtuatuajëta Pedro majitanuca anijanëbeje vajabitsaënëbeje,
pevetsinëtsibeje, petuatuajëta. Vajabitsaënëbeje Pedro yamaëcabocatsibeje
anijacadenamaëtotabeje. Itsanëbeje pijinia yabaupaevetatsi.

⁷ Jemata Dioso pijaängel naitajëta Pedrojavata. Nexata penaneconitsivi
pejebabiabibo ënëtuatuajëta naitayota. Pedro pemajitanucaenë ángel yene-
jayatabatsi Pedro penaëcotsinexa. Ángel jumaitsi Pedrojavabelia:

—Naxanitsiayo nonotapunare, jai ángel.

Nexata Pedro pecobecëtsicadenamaëtotsibeje vecobejoparecatsi baja.

⁸ Nexata icatsia ángel jumaitsi Pedrojavabelia:

—Nijacorrea xaniavaetsia naepacatarërëre. Nataxuxatare baja nijazap-
ato, jai ángel.

Pedro nexata xaniavaetsia naepacatarërëtaxuaba pijacorrea. Nataxux-
atataxuaba pijazapato. Nexata icatsia ángel jumaitsi:

—Naxatare nijacamisajumavelia nenaxatatabiajibava. Nepënaponare, jai
ángel Pedrojavabelia.

⁹ Pedro nexata napona ángel pepëta. Itsiata Pedro xaniavaetsia apo
najamatabëcueneyapëtae. Nexata Pedro xaniavaetsia apo yapëtae pepacuenene
ángel pebarëponaejavatsi. Nexata saya Pedro jamatabëjumaitsi:

—Amajitsinaenë meta, jamatabëjai.

¹⁰ Itsiata baiñsi jane xenetsiabeje penamataxainae ënëtuatuajëtareca
peyabaupaevetecaevajabitsaënëtsi. Icatsia xenetabeje pecotocaevi
ënëtuatuajëtatsina peyabaupaevetecaevajabitsaënëtsi. Bajaraxuacujinae
pepitsapaenexabeje callejavabelia, nucojopabeje pepo baupaxanetojavata
jane baja. Bajarapabaupaxaneto hierrobaupaxaneto. Nexata
bajarapabaupaxaneto tonabaupatatsibeje pijacuata. Pitsatabaliabeje jane
baja callejavabelia. Nexata callejavareca penajetarucaejavatabeje, ángel
jemata ajibi tsojopae.

¹¹ Pedro jane baja xaniavaetsia najamatabëcueneyapëtane. Nexata Pedro
jamatabëjumaitsi:

—Baja rajane matapania aeconoxae xaniavaetsia naja-
matabëcueneyapëtaniji. Dioso tsaena itorobica pijaängel tanecapanepaenexa
Herodes pecobevecua. Nexata baja judíovi apo netae tsane Herodes pijajivi
tanebeyaxuajibava, jamatabëjai Pedro.

¹² Pedro najamatabëxaina pacuenia exanaejitsia. Nexata lia María pi-
jaboyabelia. Bajarapova María, Juan pena, ponë vënërubatsi itsavënë, Mar-
cos. María pijabota ayaibitsaëtoxaneto Dioso pejumecovënëtsivi nacaetuata
Diosojavabelia petovajëcaenexatsi Pedro.

13 María pijabo matatoyorotsia yacaranata ibopanaxanetonë mataropot-sia pefaratsijavaxanetota. Nexata bajarapayacaranatsijavaxaneto baupa, Pedro docodocota petobaupatsinexatsi. Nexata bajarapabota penacuenebi-vayo, Rode, pitsaparena petaenexa ponë baupa docodocotanunuca.

14 Nexata Rode itsa jumeyapëtane Pedrocuene, nexata abaxë apo tobau-patsi. Rode kujinaelia boyabelia pejamatabëcuenebarëyatsajonexae. Nexata Rode tsipaeba María pijabota penacaetuatsivijavabelia. Jumaitsi:

—¡Pedro rajane baja nucalia baupa pënëverena! jai Rode.

15 Nexata bajarapamonae jumaitsi:

—¡Camatajemaba raja saya! jai.

Itsiata icatsia Rode jumaitsi:

—¡Xaniajanë raja pepacuene! Pedro raja nucalia baupa pënëverena, jai Rode.

Bajarapamonae nexata jumaitsi:

—Apo Pedro raeta. Pevetsiángeltsi raeta, jai bajarapamonae.

16 Nexata bajarapamonae pecuaicuaijajavata, Pedro tsiteca baupa docodocotanunuca. Nexata jäne baja bajarapamonae tobaupata Pedro pejonexarena. Bajarapamonae itsa tanetsi Pedro, bajarapamonae jamatabëcuenenajunaviaca.

17 Nexata Pedro nacobeyota bajarapamonae pemoyanexa. Pedro tsipaeba pacuenia Dioso pejamatabëcueneta capanepatsi penaneconitsivi pejebabi-bibovecua. Pedro jumaitsi:

—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovënëtsivijavabelia, jai Pedro.

Bajaraxuacujinae Pedro pitsapalia. Itsajavabelia icatsia pona.

18 Itsa baja matacabi tsina, vajabitsaëvi, pamonae Pedro evetabiabatsi pananeconitsivi pejebabiabibota, bitso jamatabëcuenebëjai. Tsipaji bajara-pamonae apo yapëtae itsabelia Pedro pona.

19 Nexata Herodes itoroba bajarapamonae pejaitsinexatsi Pedro. Itsiata bajarapamonae Pedro apo caxitajarabitsi. Nexata picani Herodes xani-avaetsia yanijoba pamonae Pedro evetabiabatsi penaneconitsivi pejebabi-abibota. Nexata baja bajarapamonae Pedro pevecuapanepaexae, Herodes anaepana. Nexata Herodes itsamonae vajabitsaëvi itoroba bajarapamonae pebeyejebinexatsi Pedro bajarapamonae pevecuapanepaexae. Nexata baja beyejebatsi. Bajaraxuacujinae nacuaevevtsinë Herodes Judea nacuaevecua pona. Pona Cesarea tomarabelia peponaponanexa Cesarea tomarata.

Pacuenia tēpa nacuaevevtsinë Herodes yabara pelivaisi

20 Nacuaevevtsinë Herodes itsa ponapona Cesarea tomarata, baraanaepana bitso Tiro tomarapijivijavabelia, Sidón tomarapijivijavabelia ata. Nexata Herodes pebaraanaepanaexae, bajara patomarabejepi-jivijavabelia copatsiaexana pexaejava petocaponabiabijava bajara patomarabejepijivijavabelia. Nexata bajarapatomarabejepijivi sivana-jamatabëcuenyanaba xaniavaetsia pebarëcuaiicuaijainexa nacuaevevtsinë Herodesjavabelia. Tsipaji bajarapatomarabejepijivi jitsipa icatsia pexaejava petocapatabinexatsi pijatomarabejavaverena Herodes pevetsinacuajavaverena. Nacuaevevtsinë Herodes pijabo petoevetsinëtsi pevënë Blasto. Nexata Tiro tomarapijivibeje Sidón tomarapijivibeje copiaya cuaiicuaijai Blastojavabelia Blasto pexaniajamatabëcuene petoxainaenexa petocuaicuaijainexa Herodesjavabelia. Nexata Blasto jejai. Tocuaiicuaijai Herodesjavabelia Herodes icatsia pebarajamatabëxanepanaenexa bajara patomarabejepijivijavabelia.

²¹ Nexata Herodes tocaëjêta pamatacabi patsijitsia bajarapatomarabejepi-
jivi Herodes pijaboyabelia. Nexata pamatacabi Herodes tocaëjêta ba-
jarapamonae pepatsinexa, Herodes naitabêtsia naxatata nacuaevevtsinë
penaxatatsicuenia. Nexata jane baja bajarapatomarabejepijivi pata pe-
barêcuaicuajainexa Herodes. Nexata daxita bajarapamonae pifabarata
nacuaevevtsinë peecaejavata, Herodes eca. Nexata Herodes xaniavaetsia
barêcuaicuajai bajara patomarabejepijivijavabelia.

²² Nexata bajarapatomarabejepijivi Herodes yabara pinijijumeta ya-
maxêitojorobiaya jumai tsaponae pebarajamatabêxanepanaenexatsi:

—¡Maponêje nacabarêcuaicuajaije, apo jivitonê! ¡Diosonê tsaena! jai
tsaponae bajarapatomarabejepijivi Herodes yabara.

²³ Bajarapacuenia pejumaitsjava bajarapatomarabejepijivi Herodes apo
pejumeitavetsixae, Dioso pijaángel naneconitsiaexanatsi Herodes. Avita-
niayaexanatsi. Herodes nexata oro ênêverenetsi. Herodes nexata oro
pênêverenijavatsi yatêpa.

²⁴ Nexata Dioso pejumecovênêtsivi, daxitanacuanêjava tsipaebapona Dioso
pitorobilivaisi. Nexata Dioso pitorobilivaisi pejumecovênêtsivi ayaibit-
saêtoxaneto tsaponae.

²⁵ Itsa baja Bernabêbeje Saulobeje palata petocaponaevijavabelia livaisi
petsipaebijavabeje najumeveretabeje, naviatabeje baja Jerusalén tomar-
averena. Navialiabeje baja Antioquía tomarabelia. Barêliabeje Juan, ponê
vênêrubatsi itsavênê, Marcos.

13

*Pacuenia Bernabêbeje Saulobeje junatatsibeje Dioso pitorobilivaisi jivi pet-
sipaebaponaenexabeje daxitanacuanêjava yabara pelivaisi*

¹ Antioquía tomarata Dioso pejumecovênêtsivijavata, jinavanapa mapa-
matabêxêyoje. Itsanê Bernabê. Itsanê Simón, ponê vênêrubatsi itsavênê,
Negro. Itsanê Lucio. Bajaraponê Cirene tomarapijinê. Itsanê Saulo. Itsanê
Manaén. Bajarapamonae cajena profetavi, Dioso pejumecovênêtsivijavabelia
livaisi petsipaebabiabivinua. Herodes Galileanacua pevetsinë. Herodesbeje
Manaénbeje penajuavitsabinêbeje.

² Itsamatacabi daxita bajarapapofetavi, Dioso pejumecovênêtsivi ya-
java, culto pexanaevajênaeya, pexaejava apo xae japasa Diosojavabelia pe-
vajêcaenexa. Nexata bajarajota Espiritu Santo jumaitsi daxita bajarapamonae-
javabelia:

—Panetotsare saicaya Bernabêbeje Saulobeje. Xua yabara junatajêbeje,
bajaraxua jane baja tanetonacuenebinexabeje, jai Espiritu Santo.

³ Nexata jane baja daxita bajarapamonae japasa vajêca Diosojavabelia.
Bajaraxuacujinae Bernabêbeje Saulobeje bajarapamonae tsmatanacobe-
butatsibeje. Tovajêtatsibeje Diosojavabelia. Nexata jane baja copatatsibeje
peponaenexabeje jivi daxitanacuanêjava petsipaebaponaenexabeje Dioso
pitorobilivaisi.

*Pacuenia apóstolenêbeje Dioso pitorobilivaisi jivi tsipaebabeje Chipre tuna-
etoxanetota penaetomaranêjava yabara pelivaisi*

⁴ Bernabêbeje Saulobeje Espiritu Santo pejamatabêcueneta itorobatsibeje.
Nexata baja ponabeje Seleucia tomarabelia. Nexata Seleucia tomarata
naropotabeje. Naponabeje velapanata peponaebarcota. Nanicababeje
Chipre tunaetoxanetojavabelia. ⁵ Nexata napaliabeje Salamina tomarata.

Bajarapatomarata tsipaebaponabeje Dioso pitorobilivaisi judíovi penacaet-uatabibonëjava. Juan napona Bernabébeje Saulobeje pepëta peyavenon-abiabinea.

⁶ Nexata bajarapamonae Chipre tunaetoxaneto matatuverelia. Nexata pata Pafos tomarata. Bjarapatomarata bajarapamonae caxitajaraba judionë, Barjesúsvenënë. Bjaraponë jivi pejorobinë. Bjaraponë jivi yamaxëitorobiaya jumai tsabiabi: “Xanë raja tsipaebabiabajë Dioso taneitorobicuenia,” jai tsabiabi.

⁷ Nexata Barjesúsbeje najuaponaponabiababeje Sergio Paulobeje. Sergio Paulo Chipre tunaetoxaneto pevetsinë. Sergio Paulo cajena bitso bepíjia peyapëtaenë palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tsipaji Sergio Paulo bitso jamatabëjumetane Dioso pitorobilivaisi.

⁸ Itsiata baitsi jane Barjesús, jivi pejorobinë, ponë venërubatsi itsavënë, Elimas, najamatabëcuene epatajërërëcaeyaexana Sergio Paulo Bernabébeje Saulobeje petsipaebaponaelivaisibeje yabara. Bjarapacuenia Barjesús najamatabëcuene epatajërërëcaeyaexana Sergio Paulo pejumecovënëtsiyaniva Dioso pitorobilivaisi.

⁹ Nexata Saulo, ponë venërubatsi itsavënë, Pablo, tsijamatabëvenëcatsi Espíritu Santo. Nexata Pablo naëcota asaëyata Barjesúsjavabelia.

¹⁰ Pablo jumaitsi Barjesúsjavabelia:

—Xanë jivi neyamaxëitorobinë, pibisiacuene nexanaenë, dovathi pijajivitonëmë, pexaniajatabëcuene pexanaejava nitoyanë! Apo jamatabëcopatsimë nenajumëtsinëtsijava pejumecovënëtsiyaniva pamonaepicani jamatabëjumecovënëta Dioso pijapexaniajalivaisi.

¹¹ Dioso raja aeconoxae cananeconitsiaexanaena. Nexata apo natsivajënaetaemë tsane. Matapania anijajuametonë panepaena, icatsia natsivajënaetaename, jai Pablo Barjesúsjavabelia.

Nexata bajarajota Barjesús itaxutomeravibajunuatsi. Bitso itaxutoaitaquiri. Nexata saya Barjesús nacobenajayaruta itsanë pecobevaetabinexatsi pecomacaponaxatsi pijaboyabelia.

¹² Sergio Paulo itsa tane bajarapacuenia, nexata jumecovënëta Jesús pelivaisi. Sergio Paulo bitso jamatabëcuenenajunaviaca itsa jumetane Jesús pelivaisi Bernabébeje Pablobeje petsipaebijavatabeje.

Pacuenia Pablobeje Bernabébeje ponaponabeje Antioquía tomarata, Pisidia nacuata pecaetomarata, yabara pelivaisi

¹³ Pablobana Chipre tunaetota Jesús pelivaisi petsipaebavanapaecujinae, Pafos tomarata nanaropoba velapanata peponaebarcoxanetota. Nicaba Panfilia nacuyabelia. Nexata Panfilia nacuatatia pata Perge tomarata. Juan baja Perge tomarata itsajamatabëcuene najamatabëxaina. Nexata baja naviateca Jerusalén tomarabelia.

¹⁴ Nexata Pablobeje Bernabébeje icatsia nanaropotabeje Perge tomarata. Nexata icatsia patabeje Antioquía tomarabelia, Pisidia nacuata pecaetomarabelia. Judíovi penacueraevetsimatacabita Pablobeje Bernabébeje najunuabeje judíovi penacaetuatabibota. Bjarajota naecabeje.

¹⁵ Nexata daxita bajarapabota pejonevi, namuxunaeveta Dioso Moiséspijinëta penajumecopatsilivaisi. Namuxunaevetanua Diosojumepae-bivimi profetavi bajayata peyaquinaelivaisi ata. Bjaraxuacujinae judíovi

penacaetuatabiabibo pevetsivi, pijajivitonë itoroba. Nexata bajaraponë jumaitsi Pablobeje Bernabëbejjavabelia:

—Tajabananëbeje, itsa payapëtanemebeje itsalivaisiyo panetsipaebinexabeje, aeconoxae patsipaebianamebeje jivi piajamatabëcuenesaënexa Diosojavabelia, jai bajaraponë Pablobeje Bernabëbejjavabelia.

¹⁶ Nexata jane baja Pablo nonotapuna. Nacobeyota jivi pemoyanexa. Pablo nexata jumaitsi:

—Tajamonae judíovi, panenamuxunaevere. Tajamonae, paxamë ata apo pajudíovimë, Dioso panejitsipaevi, abaxë panenamuxunaevere pacuenia jumaitsinëjitsia.

¹⁷ PaDioso aeconoxae judíovitsi vajaDioso, bajarapaDioso bajayata baja cajena itapetatsi vajasalinaivimi pijajivinexa. Nexata Dioso pejamatabëcueneta vajasalinaivimi pexi ayaibitsaëttoxaneto xainapona. Nexata vajasalinaivimi ayaibitsaëttoxaneto tsaponae pamatacabi jinavanapa Egipto nacuata. Nexata Dioso pesaëta vajasalinaivimi matacaponatsi Egipto nacuaverena.

¹⁸ Vajasalinaivimi Dioso pejitsipaecuenia apo exanabiabi ata, itsiata Dioso curenta pavaibeje xaniavaetsia evetatsi petusato nacuata.

¹⁹ Dioso cajena verebiaba siete panacuabejepijivi, Canaánvënë nacuata pejinavanapaevimi. Nexata baja Dioso vajasalinaivimi totsatsi bajarapanacuanëjava juya pejinavanapaenexa.

²⁰ Bajaraxuacujinae Dioso itoroba vajasalinaiviyajuvënënevü juezmonae penaexanaponaenexa, vajasalinaivimi pevetsivinexatsi. Juezmonae nexata penaexanaponaevi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijinë evetatsi vajasalinaivimi, copata baja juezmonae pevetsijavatsi. Tsipaji baja profeta Samuelpijinë pecotocavijueznë.

²¹ Nexata vajasalinaivimi jumaitsi profeta Samuelpijinëjavabelia: “Pajitsipajë nitorobjava vajayajuvënënevü penaexanaenexa vajanacayanacuaevetsinënexa,” jai. Nexata profeta Samuelpijinë Dioso pejamatabëcueneta itoroba Saúlpjinë vajasalinaivimi curenta pavaibeje peyanacuaevetaponaponaenexatsi. Bajaraponëmi Saúlpjinë, Cispjinë pexënato, vajasalinainëmi Benjamínpijinë pemomoxiyajunënënevü.

²² Bajaraxuacujinae Saúlpjinë Dioso copatsiaexanatsi pecopatsinexa baja vajasalinaivimi peyanacuaevetsijavatsi. Nexata juya Dioso itoroba Davidpijinë vajasalinaivimi peyanacuaevetsinexatsi. Dioso jumaitsi Davidpijinë yabara mapacueniaje: “Isaí pexënato, David, jamatabëcueneyapëtaniji. Bajarapitsinë jitsipajë. Bajaraponë David daxita pacuenia jitsipajë, netoexanaena,” jai Dioso Davidpijinë yabara.

²³ Davidpijinë raja pemomoyota naexana Jesús. Dioso cajena itorobica Jesús Israel nacuapijivitsi vajanacacapanepaenexa pacuenia Dioso tajëvelia najumecapanepaeya jumaitsi vajasalinaivimijavabelia.

²⁴ Jesús petaxuxuabivajënaeya jivi livaisi petsipaebaponaejava, copiaya Juanpijinë jivibautisabinëmi tsipaebanajetaruca daxita Israel nacuapijivijava. Jumai tsanajetarucacae Juanpijinë: “Pacopabare baja daxita pibisiacuenepaneexanabiabijava. Panajamatabëcuenepënëvorore Diosojavabelia. Bajaraxuacujinae pacabautisabianatsi,” jai tsanajetarucacae Juanpijinë.

²⁵ Juanpijinë abaxë itsa apo beyaxuabitsi, jumai tsaponae jivijavabelia: “Ponë pacopiaevetavanapame, xanë raja apo bajaraponënë. Xanëcujinae rajane bajaraponë najetarucaena. Xanë raja saya beveliajamatabëcuenenënë

bajaraponēvecua. Nexata bajaraponē bepijavitonēnēcuenia ata tataxujonotsinexa pijazapato, vecuaauranē,” jai tsaponae Juanpijinē Jesús yabara, jai Pablo judíovijavabelia judíovi penacaetuatabiabibota.

²⁶ Icatsia Pablo jumaitsi judíovijavabelia judíovi penacaetuatabiabibota:

–Tajamonae Abrahampijinē papemomoximē, Dioso paneyaiyataevi. Dioso raja nacatoitoroba mapalivaisije vajanacacapanepaenexa Diosojavabelia.

²⁷ Itsiata Jerusalén tomarapijivi apo yapētae Jesús pecapanepaejavanexatsi. Jerusaléntomara pevetsivi ata apo yapētae Jesús pecapanepaejavanexatsi. Bajarapamonae apo jumeyapētaenua pacuenia jumaitsi Jesús yabara bajayata profetavi peyaquinaebaxutota. Penacueraevetsimatacabinanē canacujitsia lebabibi ata bajarapabaxuto judíovi penacaetuatabiabibota, itsiata bajarapamonae apo jumeyapētae. Bajarapamonae itsa neonita Jesús pebeyaxuabinexatsi, nexata judíovi exana pacuenia baja cajena Dioso jumepaebivi profetavi tajēvelia vajunupaeba Jesús pexanaejavanexatsi.

²⁸ Judíovi apo caxitajarabi ata Jesús itsacueneneconi pexainaejava, itsiata bajarapamonae vajēta nacuaevetsinē Pilatojavabelia Jesús pebeyaxuabinexatsi.

²⁹ Nexata jane baja Jesús itsa beyaxuabatsi, copiapata jane baja daxita pacuenia Jesús yabara tajēvelia jumaitsi Dioso pejumelivaisibaxutota. Bajaraxuacujinae Jesús petēpaenē pitsicatsi cruzajavavetsica. Bajaraxuacujinae mēthētatsi.

³⁰ Itsiata baitsi jane Dioso icatsia asaēyaexanatsi Jesús petēpaecujinae.

³¹ Jesús petēpaecujinae Dioso icatsia itsa asaēyaexanatsi, bajayajebi anijatonē tsitanaitajētabiaba pijajivjavabelia, pamonae yanatatsi pamatacabi Jesús pona Galilea nacujavaverena Jerusalén tomaraberena. Bajarapamonae nexata maparucaje tsipaebaona jivjavabelia Jesús pelivaisi, jai Pablo bajarapamonaejavabelia judíovi penacaetuatabiabibota.

³² Icatsia Pablo jumaitsi bajarapamonaejavabelia judíovi penacaetuatabiabibota:

–Nexata pacatsipaebianatsi pexanialivaisi. Dioso cajena vajasalinaivimijavabelia tajēvelia najumecapanepaeya jumaitsi pacuenia Dioso toexanaejitsia vajasalinaivijavabelia.

³³ Vaxaitsi rabaja cajena bajarapamonaemi pemomoxitsi. Nexata pacuenia Dioso tajēvelia najumecapanepaeya jumaitsi vajasalinaivimijavabelia, nacamocopiapata jane baja. Tsipaji baja Jesús Dioso icatsia asaēyaexanatsi petēpaecujinae pacuenia baja cajena jumaitsi Salmosbaxutota. Dioso pejumaitsijava Jesúsjavabelia, Salmosbaxutota jumaitsi mapacueniaje: “Ajena raja, pamatacabi, canutatsi daxitajivi pitabarata pecayapētaenexaxanē taxēnatocuenemē,” jai cajena Salmosbaxutota Dioso pejumaitsijava Jesúsjavabelia.

³⁴ Dioso baja asaēyaexanatsi Jesús petēpaejavavecua. Jesús baja nexata icatsia apo tēpae tsane itsamatacabijavabelia ata. Bajarapacuenie yabara baja cajena vaxaitsi yapētanetsi. Tsipaji Dioso pejumelivaisibaxutota tajēvelia jumaitsi mapacueniaje: “Caexanaenatsi pacuenia baja cajena najumecapanepaeya jumaitsinē Davidpijinējavabelia,” jai Dioso pejumelivaisibaxutota bajayata Dioso pejumaitsijava Jesúsjavabelia.

³⁵ Bajaraxo yabara Jesús pejumaitsijava Diosojavabelia Salmosbaxutota icatsia jumaitsi mapacueniaje: “Nexēnatonē apo necopatsimē tsane taperabētsabanaejavabelia,” jai Salmosbaxutota.

³⁶ Davidpijinē abaxē itsa asaē tsaponaponae, jumecovēnētsiaponapona pacuenia Dioso itorobatsi. Bajaraxuacujinae Davidpijinē tēpa baja. Nexata Davidpijinē mēthētatsi pamojivimi pemēthēanē muxuneneta. Nexata Davidpijinē mēthēabelia perabētsabana baja.

³⁷ Itsiata baitsi jane Jesús, ponē Dioso icatsia asaēyaxanatsi, petēpacujinae bajaraponē apo perabētsabanae cajena mēthēabelia.

³⁸ Tajamonae, bepayaētēneme ponē yabara pacatsipaebatsi. Jesús raja pejamatabēcueneta Dioso baja pacavēcuaajibiaexana pibisiacuene paneaxanaeconimi.

³⁹ Pajivi Jesús jumecovēnētsiana, bajarapajivi daxita pibisiacuene pexanaecononi Dioso vecuaajibiaexanaenatsi Jesús pejamatabēcueneta. Pajivi apo jumecovēnētsicapānēpaē ata Dioso Moiséspijinēta penajumecopatsilivaisi, jamatabējumaitsi: “Xanē baja jumecovēnētājē Dioso Moiséspijinēta penajumecopatsilivaisi. Nexata pibisiacuene taexanaecononi Dioso nevecuaajibiaexanaena,” jamatabējai, itsiata bajarapajivi pibisiacuene pexanaecononi Dioso apo vecuaajibiaexanaetsi tsane. Tsiapai Dioso Moiséspijinēta penajumecopatsilivaisi itsajivi ata apo jumecovēnētsicapānēpaē.

⁴⁰ Xania baja tsane. Xaniavaetsia pajinavanapaename papecatocopiapatsiyaniva pacuenia Diosojumepaebivi profetavi peyaquinaebaxutota tajēvelia jumaitsi. Tsiapai raja profetavi peyaquinaebaxutota, tajēvelia jumaitsi mapacueniaje:

⁴¹ Panecapocaponaevi, i xania baja pataename! Panajunaviacaename raja. Tsiapai raja panevecuanaxuabianame. Panejinavanapaepatotaxanē, Diosonē, exanaenajē ayaicuene taexanaejavanē. Nexata taexanaejavanē pelivaisi, itsamonae xaniavaetsia pacatsipaebi ata tsane, itsiata apo pajumecovēnētšimē tsane,

jai Diosojumepaebivi profetavi peyaquinaebaxutota Dioso penaneconitsiaexanaejavanexa yabara pamonaē Dioso apo pejumecovēnētšivi, jai Pablo bajarapamonaejavabelia judiōvi penacaetuatabiabibota.

⁴² Pablobeje baja Bernabēbeje pitsapaejitsiabeje judiōvi penacaetuatabiabibovecua. Nexata bajarajota pamonaē apo judiōvi, junatatsibeje icatsia itsamatacabi judiōvi penacueraevetsimatacabita petsipaebinxabeje bajarapalivaisi.

⁴³ Penacaetuatsivi baja naviaba judiōvi penacaetuatabiabibovecua. Nexata Pablobeje Bernabēbeje judiōvi penacaetuatabiabibovecua itsa pitsapabeje, jivi ayaibitsaēto pēnaponatsibeje. Bajarapamonaeyajuvēnēvi itsamonae judiōvi, itsamonae apo judiōvi. Pamonaē apo judiōvi, bajarapamonaē catsiteca judiōvicuenia Dioso pejumecovēnētšijava. Nexata Pablobeje Bernabēbeje muxujiobabeje bajarapamonaē pevājēnaeyabelia ajamatabēcuenesaēya pejumecovēnētavanapaenexa Dioso pitaxutotsoniataejavatsi.

⁴⁴ Bajara jane xuacujinae icatsia judiōvi penacueraevetsimatacabita, bajarapatomarapijivi muxunanacaetuatsibeje ayaibitsaēto xanetonē Dioso pitorobilivaisi penamuxunaevetsinxatsibeje.

⁴⁵ Nexata judiōvi itsa tane bajarapajivibitsaēto xanetonē Pablobeje Bernabēbeje pemuxunanacaetuatsijavatsibeje, judiōvi bitso cuenecaēbatsi. Nexata judiōvi jumaitsi jivijavabelia pejumecovēnētšiyāniva bajarapalivaisi:

—Pacuenia Pablo pacatsipaeba, apo xaniajai cajena, jai judiōvi Pablo petsipaebilivaisi yabara.

Judiōvi bitso pibisiacuēnia baracuacuajitsi Pablo.

⁴⁶ Itsiata Pablobeje Bernabébeje ajumejunavijibia tsipaebaponabeje Dioso pitorobilivaisi. Jumaitsibeje tsaponae mapacueniaje:

—Copiaya baja picani pacatsipaebatsibeje Dioso pitorobilivaisi paxamē pajudíovimējavabelia. Itsiata apo pajitsipaemē bajarapalivaisi panejume-covēñetsinexa. Tspaji apo pajitsipaemē panexainaenexa maticabi apo pe-verevereceajava. Paxanēbeje baja nexata pacavecuponatsibeje patatsipae-binexabeje bajarapalivaisi apo judíovijavabelia.

⁴⁷ Bajarapacuenia pacavecuponatsibeje tspaji baja pepo petuxanenē bajarapacuenia paneitorobabeje. Dioso cajena pejumelivaisibaxutota tajēvelia jumaitis mapacueniaje:

Caitorobianatsi nejamatabēcueneitayotsinexa pamonaē apo judíovi. Baitsi jane tsipaebanajetarucaenae tajumelivaisi daxitanacuanējava, nacuatubujava ata pejinavanapaevi, pecapanepaenexatsi pibisiacuene pexanaeconivecua, jai Dioso pejumelivaisibaxutota, jai Pablo judíovijavabelia.

⁴⁸ Apo judíovi itsa jumetane bajarapacuenia Pablo pejumaitisjava, nexata apo judíovi jamatabēcuenebarēya. Nexata apo judíovi jumaitis:

—Dioso cajena pitorobilivaisi pexanialivaisi bitso, jai.

Nexata jane baja apo judíovi ata jumecovēñeta Dioso, pamonaē baja cajena tajēvelia Dioso itapeta maticabi apo peverevereceajava pexainaenexa.

⁴⁹ Nexata jane baja daxita bajarapanacuata pejinavanapaevi jumetane Dioso pitorobilivaisi.

⁵⁰ Itsiata baitsi jane pajudíovi Pablobeje Bernabébeje cueneitoyatsibeje, muxubijipenetsiaya barēcuaicuajjai tomaraevetsivijavabelia, petuxanevi pijavajivijavabelia ata. Nexata bajarapamonaē anaepana Pablobeje Bernabébejevavabelia. Nexata baja Pablobeje Bernabébeje capitsapatsibeje bajarapanacuavecua.

⁵¹ Nexata Pablobeje Bernabébeje bajarapatomarata nataxuatapērēvarēbabeje. Bajarapacuenia nataxuatapērēvarēbabeje bajarapatomarapijivi peyapētaenexa penaeconitsijava Diosojavabelia, apo pejumecovēñetsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje.

⁵² Itsiata daxita pamonaē Dioso pejumecovēñetsivi, Antioquía tomarata pejinavanapaevi, jamatabēcuenebarēya. Espiritu Santonua jamatabēcuenevēñecavanapa. Nexata exanabiaba pacuenia Espiritu Santo itorobatsi.

14

Pacuenia Pablobeje Bernabébeje ponaponabeje Iconio tomarata yabara pelivaisi

¹ Iconio tomarata Pablobeje Bernabébeje judíovi penacaetuatabiabibota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaētoxaneto judíovi, apo judíovi ata, jumecovēñeta Jesús pelivaisi.

² Itsiata baitsi jane itsamonaē judíovi, Dioso apo pejumecovēñetsivi, itoroba apo judíovi pianaepanaenexa Jesús pelivaisi pejumecovēñetsivijavabelia.

³ Bajarapacuenia peyapētaexabeje, Pablobeje Bernabébeje bajayajebi ponaponabeje bajarajota. Tspaebabababeje ajumejunavijibia Jesús pelivaisi. Tspaji yapētanebeje Dioso peyavaponaponaejavatsibeje. Nexata daxitajivi yapētaeyaexanaponabeje Dioso pitaxutotsoniatavejavatsi bajarapamonaē. Nexata daxita bajarapamonaē yapētane Jesús pelivaisi pexaniajailivaisicuene.

Tsipaji bajaraponēbeje ayaicuene pexanaejava Dioso pesaēta exanaponabeje.

⁴ Itsiata bajarapatomarapijivi apo najamatabēcuenejēpae. Itsamonae jitsipa pejumecovēnētsinexa judiōvi petsipaebilivaisi. Itsamonae jitsipa pejumecovēnētsinexa apōstolenēbeje petsipaebilivaisi.

⁵ Nexata judiōvi, apo judiōvinua, tomara pevetsivinua, jamatabēbijatanetsibeje Pablobeje Bernabēbeje. Jamatabētseconatsibejenua ibotonēta.

⁶ Nexata Pablobeje Bernabēbeje nayajumetanebeje pacuenia exanaejitsiatsibeje. Nexata vecuanajetabajiravabeje Listra tomarabelia, Derbe tomarabelia ata. Bajarapatomarabeje ecabeje Licaonia nacuata. Bajarapatomarabeje pepēnēya penaetomaraxijava ata najetarucabeje.

⁷ Daxita bajaraxuayo tsipaebanajetarucabeje pexanialivaisi, Jesús pelivaisi.

Pacuenia Pablo ibotonēta tseconatsi Listra tomarata yabara pelivaisi

⁸ Listra tomarata naeca petaxucuenabinētsi. Penaexanaejavaveliacujinae apo ponaponae caeto ata.

⁹ Bajaraponē najumetaeyeca Pablo petsipaebilivaisi. Nexata Pablo naitaxutobabatsiaya naēcota bajaraponējavabelia. Nexata Pablo jamatabēcueneyapētane petaxucuenabinētsi pejamatabējumaitsijava: “Dioso pepacuene caējēpatsi tanetaxuxanepanaeyaexanaenexa,” pejamatabējaijava.

¹⁰ Nexata Pablo pinijijumeta jumaitsi petaxucuenabinētsijavabelia:

—Nonotapunare. Ponaponare baja, jai Pablo.

Nexata bajaraponē jirevapuna. Ponapona baja.

¹¹ Jivibitsaētoxanetonē itsa tane Pablo petaxuxanepanaeyaexanaejava petaxucuenabinēmitsi, nexata bajarapamonae pijajumeta, Licaoniajumeta, pinijijumeta jumaitsi mapacueniaje:

—¡Diosonēbeje cajena! ¡Bevaxaitsi jivitonēbejecuenia patsica vaxaitsijavabetsica! jai bajarapamonae.

¹² Bajarapanacuapijivi xaina pijadiosovi. Itsiata apo pepo diosovi. Nexata Bernabē tanetsi beZeusvēnēdiosonē. Pablo pijinia tanetsi be-Hermesvēnēdiosonē. Tsipaji Pablo penamatacanajetarucaenē. Nexata jivi barēcuaiquajai tsabiabi.

¹³ Zeusvēnēdiosonē pijatemplobo eca Listratomara jumaverena, Listra tomarabelia pejonebaupa imoxoyovecua. Nexata sacerdotenē, Zeusvēnēdiosonē pijatemplobota penacuenebabiabinē, capata torobitsaēto Listra tomarabelia pejonebaupajavaberena. Bajarapatorobitsaēto matabocolitabētsiaya tsmataruba pematono. Nexata sacerdotenē, Listra tomarapijivi yajava, tobejitsiatsibeje picani bajarapatorobitsaēto Pablobeje Bernabēbeje ofrendacuenia bajarapavi petotajuitsinexatsibeje. Bajarapacuenia picani totajuitsijitsiatsibeje tsipaji bediosonēbeje tanetsibeje.

¹⁴ Nexata Bernabēbeje Pablobeje itsa jumetanebeje bajarapacuenie petoexanaejavanexatsibeje, apo jitsipaebeje. Nexata penaxatatsijavabeje mēpabētītinaxuabarecabeje. Tsipaji Dioso apo pejitsipacuenia bajarapamonae toexanaejitsiatsibeje. Nexata cujinaejinaliabeje jivibitsaētoxanetonē penaetuanajavabelia. Nexata bajarapajivibitsaētoxanetonē tuatuajēta nucabeje. Pinijijumeta Pablo jumaitsi:

15 —¿Detsa xuajitsia bajarapacuene panetoexanaejitsiamë? Paxanëbeje ata raja saya pajivitonënebeje. Pacuenia paxamë pajamatabëcueneitsimë, bajara saya paxanëbeje ata patajamatabëcueneitsinëbeje. Papatajopajëbeje patacatsipaebinegabeje pexanialivaisi. Panajamatabëcuenepeñëyorore bajarapacuenia paneexanabiabijavavecua panejumecovënëtsinexa pepo Dioso apo peyamatacabiaeverevercaenë. Dioso raja daxitacuene pexanaenë. Exana mapanacuaeje, mapanacuapijicuene yajava. Exana itaboxo ata, itaboxopijicuene yajava. Exana manuamene ata, manuamenepijicuene yajava.

16 Dioso copata vajavajënaeya daxitanacuapijivi pejinavanapaenexa picuata penatojitsipacuena.

17 Nexata Dioso daxitacuene pexanaejava, nacobecovëtaeyaexanabiaba daxitajivijavabelia. Nexata picani bajarapamonae becanaëjëta Dioso peponaponaejava. Tsipaji Dioso pexaniacuene toexanabiaba bajarapamonaemijavabelia. Bajara icatsia pacuenia vaxaitsijavaberena ata pexaniacuene Dioso nacatoexana. Ema nacatorunaeyaexanabiabica. Nexata vajuabijava nacaonaxaniabiabaexanabiaba. Nexata bajarapacuenia vajaxaejava nacarajutabiaba. Nacajamatabëcuenebarëyayaexananua, jai Pablo pamonaejavabelia picani torobitsaëto tobejitsiatsibeje.

18 Bajarapacuenia Pablo jumaitsi ata, itsiata picani bajarapamonae jamatabëtobiatsibeje torobitsaëto petotajuitsinexatsibeje bajarapavi ofrendacuenia Pablobeje Bernabëbejenexa. Itsiata baja belia copatsiaexanabeje.

19 Nexata judíovi, Dioso apo pejumecovënëtsivi, parena Antioquia tomaraverena, Iconio tomaraverena ata. Bajarapajudíovi Listra tomarapijivijavabelia najumetsënëtsiaya neconitatsibeje Pablobeje Bernabëbeje pebaraanaepanaenexatsibeje. Nexata Listra tomarapijivi ibotonëta tseconatsi Pablo. Bajaraxuacujinae tomarapënyabelia robobocaliatsi. Tsipaji baja bepetëpaenë taeyabuatsi.

20 Itsiata baitsi jane Dioso pejumecovënëtsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevëa jonena Listra tomaraberena. Meravia pitsijavata Pablobeje Bernabëbeje ponabeje baja Derbe tomarabelia.

21 Nexata Derbe tomarata tsipaebaponabeje pexanialivaisi, Jesús pelivaisi. Nexata jumecovënëtsibeje jivibitsaëtoxaneto. Bajaraxuacujinae icatsia naviatanajetarucabeje Listra tomarajava, Iconio tomarajava ata, Antioquia tomarajava ata.

22 Bajarapatomaranëjava Jesús pelivaisi tsipaebanajetarucabeje pejamatabëcuene asaëyaexanaponaenexabeje Dioso pejumecovënëtsivi. Muxujibaponabeje bajarapamonae pevajënaeyabelia ajamatabëcuenesaëya pecatsitecaenexa Dioso pejumecovënëtsijava. Pablobeje Bernabëbeje jumai tsaponaebeje Dioso pejumecovënëtsivijavabelia:

—Dovathi pejamatabëcueneta, pinijicuenia nacajamatabëcuenejëtaponae na daxita vajajonevinexa Dioso pijanacuayabetsia, jai beje tsaponae Dioso pejumecovënëtsivijavabelia.

23 Jaibetsaëto canacujitsia, Dioso pejumecovënëtsivijava, toitapetaponabejenua ancianovinexa, Dioso pejumecovënëtsivi pevetsivinexa. Nexata itsa pabitsaëtojavata toitapetsijitsiabeje, penacaetuatsivajënaeya apo xaeyabiabiabeje pexaejava. Nexata penacaetuatsijavata itsa toitapetabeje, japasa tovajëtabiabeje Diosojavabelia bajarapamonae peyavenonaenexatsi Dioso. Jumai tsabiabiabeje Diosojavabelia:

—Diosomë, xaniavaetsia yavenonaename mapaancianovije xaniavaetsia pecatoevetsinexa nijajivi, jai beje tsabiabi Diosojavabelia.

Pacuenia Pablobeje Bernabébeje naviatabeje Antioquía tomarabelia, Siria nacuata peecaetomarabelia, yabara pelivaisi

²⁴ Pablobeje Bernabébeje Pisidianacua pexenetsicujinaebeje, patabeje Panfilia nacuayabelia.

²⁵ Nexata Panfilia nacuata, Perge tomarata, Dioso pitorobilivaisi jivi tsi-paebabeje. Bajaraxuacujinae icatsia patabeje Atalia tomarata.

²⁶ Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquía tomarabelia. Tsipaji baja cajena pamatacabi taxuxuabijitsiabeje Dioso pitorobilivaisi jivi petsipaebanajetaruaenexabeje, naropotabeje Antioquía tomarata. Nexata pamatacabi naropotabeje Antioquía tomarata, penaropotsivajënaeyabeje, Dioso pejumecovënëtsivi tsmatanacobeuatatsibeje Dioso peyavenonaponaejavatsibeje jivi petsipaebanajetaruaejavatabeje Dioso pitorobilivaisi. Pablobeje Bernabébeje Antioquía tomarata patabeje. Tsipaji baja toveretabeje daxita pacuenia Dioso itorobatsibeje.

²⁷ Itsa baja Antioquía tomarata patabeje, junatabeje penacaetuatsinexa daxita Dioso pejumecovënëtsivi. Nexata bajarapamonaejavabelia tsi-paebabeje daxita Dioso peyavenonaponaejavatsibeje. Tsi-paebabejenua apo judíovi ata pejumecovënëtsijava Dioso pitorobilivaisi. Tsipaji baja cajena Dioso tocopata apo judíovi ata pejumecovënëtsinexa bajarapalivaisi.

²⁸ Pablobeje Bernabébeje Antioquía tomarata bajayajebi naponaponabeje Dioso pejumecovënëtsivijavata.

15

Pacuenia apóstolevi, ancianovi yajava, nacaetuata Jerusalén tomarata yabara pelivaisi

¹ Pamatacabi Pablobeje Bernabébeje ponaponabeje Antioquía tomarata, judíovi, Judea nacuaverena peponaevi, pata Antioquía tomarata. Nexata bajarapamonae Dioso pejumecovënëtsivijavabelia livaisi tsi-paeba. Petsipaebijavata bajarapamonae jamatabëcuenuenavëxaniabiaya jumaitsi mapacueniaje:

—Panamatavenoname paxamë ata papecaperabëcaucubinexa pacuenia Dioso Moiséspijinëta najumecopata. Itsa jume, nexata acuenebi tsane papecacapanepaejava Diosojavabelia, jai tsaponae judíovi, pepatsivi Judea nacuaverena.

² Bajarapacuenia pejumaitsaponaexae, nexata Pablobeje Bernabébeje pinijicuenia namataenetsia barënajumenotabeje pajudíovi pata Judea nacuaverena. Nexata Antioquía tomarapijivi Dioso pejumecovënëtsivi, Pablobeje Bernabébeje itapetsibeje pitorobinexatsibeje Jerusalén tomarabelia. Nexata Pablobeje Bernabébeje yjavaponabeje Dioso pejumecovënëtsiviyajuvënevi. Itorobatsibeje peyanijobinexabeje peperabëcaucubicuene yabara apóstolevijavabelia ata, Jerusalén tomarata pejinavanapaevijavabelia.

³ Itorobatsibeje Dioso pejumecovënëtsivi. Nexata Pablobana itsa pona, najetarubena Fenicia nacuajava, Samaria nacuajava ata. Bajaraxuayo Dioso pejumecovënëtsivijavabelia tsi-paeba-pona apo judíovi ata pijaperujujamatabëcuene pecopabijava, pejumecovënëtsinexa Dioso. Nexata daxita Dioso pejumecovënëtsivi jamatabëcuenebarëya itsa jumetane bajarapalivaisi.

⁴ Pablobana itsa pata Jerusalén tomarabelia, Dioso pejumecovënëtsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsi-paebabeje daxita Dioso

peyavenonaponaejavatsibeje pamatacabi Dioso pitorobilivaisi jivi tsipaebanajetarucabeje.

⁵ Nexata fariseovi, Dioso pejumecovënëtsivi, nonobapuna. Fariseovi jumaitsi mapacueniaje:

—Dioso pejumecovënëtsivi apo judíovi ata, namatavenona peperabëcaucubinexatsi. Namatavenonana bajarapamonae pejumecovënëtsinexa Dioso Moiséspijinëta penajumecopatsilivaisi, jai fariseovi Dioso pejumecovënëtsivi.

⁶ Nexata nacaetuata apóstolevi, ancianovi yajava, apo judíovi ata peperabëcaucubijavatsi yabara penabarëcuaicuajainexa.

⁷ Bajayajebi baja namataenetsi penabarëcuaicuajaicujinae, nexata Pedro nonotapuna. Jumaitsi:

—Tajamonae, payapëtaneme rabaja mapacueneye. Xanë baja cajena bajaya Dioso nitapeta, paxamëyajuvënënë, apo judíovijavabelia tatsipaebinexa pexanialivaisi, Jesús pelivaisi. Nexata apo judíovi ata Dioso pecapanepaenexatsi Jesús pelivaisi itsa jumecovënëta.

⁸ Dioso cajena daxitajivi pejamatabëcueneyapëtaenë. Yapëtanetsi Dioso aneconijibia petaejava apo judíovi ata. Yapëtanetsi bajarapacuenet sipaji apo judíovi ata Dioso rajuta Espíritu Santo. Pacuenia vaxaitsi judíovitsi Dioso nacarajuta Espíritu Santo, bajara pijinia pacuenia Dioso rajuta Espíritu Santo apo judíovi ata.

⁹ Pacuenia vaxaitsi judíovitsi Dioso nacajitsipa, bajara pijinia pacuenia Dioso jitsipa apo judíovi ata. Bajaraxuata apo judíovi ata pibisiacuene pexanaeconimi Dioso vecuajibiaexanatsi Jesús pelivaisi pejumecovënëtsixae.

¹⁰ Pëtsa pajumeaebame Dioso aneconijibia petaejava apo judíovi ata. Pëtsa bajarapamonae paitorobame pejumecovënëtsinexa playapëbejelivaisi, Dioso Moiséspijinëta penajumecopatsilivaisi. Tsipaji bajarapalivaisi vaxaitsi ata apo nacacajëpaevajajumecovënëtsinexa. Vajasalinaivimi ata apo cacajëpaetsi pejumecovënëtsinexa bajarapalivaisi.

¹¹ Vaxaitsi baja jumecovënëtatsi Jesús pelivaisi. Nexata vajatuxanenë Jesucristo pejamatabëcueneta Dioso vajanacaitaxutotsoniataexae, nacapanepaena pibisiacuene vajaexanaeconivecua. Bajara pijinia pacuenia apo judíovi ata Jesucristo pejamatabëcueneta Dioso capanepaenatsi pibisiacuene pexanaeconivecua, jai Pedro apóstolevijavabelia, ancianovijavabelia ata.

¹² Dioso pitorobilivaisi Bernabébeje Pablobeje apo judíovijava itsa tsipaebanajetarucabeje, Dioso pesaëta pinijicuene pexanaejavanë exanaponabeje. Nexata bajaraxua Bernabébeje Pablobeje itsa navajunupaebabeje, daxita apóstolevi, ancianovi ata, moya ena. Xaniavaetsia namuxunaevetena.

¹³ Itsa baja Pablobeje Bernabébeje najumeveretabeje petsipaebijavabeje, nexata Santiago jumaitsi apóstolevijavabelia, ancianovijavabelia ata:

—Tajamonae, panenamuxunaevere.

¹⁴ Simón Pedro raja nacatsipaeba Dioso aneconijibia petaejava apo judíovi ata pecapanepaenexa pibisiacuene pexanaeconivecua Jesús pelivaisi itsa jumecovënëta.

¹⁵ Bajarapacuenia apo judíovi ata aneconijibia Dioso petaejavanexa yabara, bajayata tajëvelia Diosojumepaebivi profetavi peyaquinaelivaisita vajunupaeba baja cajena. Dioso pejumaitsijava apo judíovi yabara Dioso pejumelivaisibaxutota jumaitsi mapacueniaje:

16 “Bajayata abaxë pamatacabi Davidpijinë evetaponapona Israelnacua, xaniavaetsia jivi nejumecovënëtanapanapa. Bajara icatsia pacuenia jivi xaniavaetsia tanejumecovënëtanapanapenexa, yavenonaenajë.

17 Nexata apo judíovi ata, daxita pamonaë junatsianajë tajajivinexa, bajarapamonae ata jitsipaena tanejumecovënëtsinexa,” jai bajayata Dioso mapacueniaje.

18 Dioso baja cajena tajëvelia yapëtaeyaxana daxita mapacuene yabaraje, jai profetavi peyaquinaelvaisita, jai Santiago apóstolevijavabelia, ancianovijavabelia ata.

19 Icatsia Santiago jumaitsi apóstolevijavabelia, ancianovijavabelia ata:

—Nexata xanë jamatabëitsinë mapacueniaje. Apo jamatabëitonotsi tsanetsi baja matavëjëa apo judíovi, pamonaë baja najamatabëcuenepënëyorota Dioso javabelia.

20 Itsiata baitsi jane caelivaisiyobeje toyaquinaenatsi cuyalatobaxutota vajayapëtaeyaxanaenexa bajarapamonae. Itsamonae xaina pecobeta saya jumapecataeya pexanaenëanë bepjadiosovi petaenexa. Nexata bajaraxuanëjavabelia ofrendacuenia pevi perajutsinexa, tobeyabiaba baca, oveja ata. Toyaquinaenatsi bajarapayajuvënëvi pexaeyaniva. Toyaquinaenatsinua daxita pebijivi peyapëtaenexa, daxita petiriavi ata peyapëtaenexa. Papebijivi baja nacojioba, pematayajibianivatsi itsavajavabelia pijavavecua. Papebijivi pijinia abaxë apo nacojiobi, pematayajibianivatsi petirivajavabelia. Bajara pijinia pacuenia petiriavi ata. Papetiriavi baja nacojioba, pematayajibianivatsi itsanëjavabelia pamonavecua. Papetiriavi pijinia abaxë apo nacojiobi pematayajibianivatsi pebijavabelia. Toyaquinaenatsinua bajarapamonae pexaeyaniva cuibocueetsacaeya pebeyaxuabinë pevi, pexaeyaniva peja ata. Bajarapacuenia toyaquinaenatsi apo judíovi ata Dioso pejumecovënëtsivi peyapëtaenexa xua vaxaitsi judíovitsi cjunavatsi. Nexata itsamatacabijavabelia ata apo judíovi pejamatabëcuenebijianaeyaniva judiovijavabelia.

21 Tspaji bajarapalivaisi Dioso Moiséspijinëta penajumecopatsijavaveliacujinae, vajasalinaivimi caetomara canacujitsia itavetabiabatsi bajarapacuenie. Itavetabiabatsi bajarapacuenie penacueraevetsimatacabianë canacujitsia penacaetuatabiabilonëjava, jai Santiago apóstolevijavabelia, ancianovijavabelia ata.

22 Nexata daxita apóstolevi, ancianovinua, daxita Dioso pejumecovënëtsivinua, najamatabëjëpa penaitapetsinexa bajarapamonaeajuvënëvi pitorobinexa Antioquia tomarabelia Pablobeje Bernabébeje pepëta. Nexata itapetatsibeje Silasbeje Judasbeje. Judas vënërubatsi itsavënë, Barsabás. Bajaraponëbeje Dioso pejumecovënëtsivi penamatacaitorobivi yajuvënënebeje.

23 Pacuyalatobaxuto bajaraponëbeje tocaponaejitsiabeje Antioquia tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaitsi mapacueniaje:

—Tajamonae, paxanë paapóstolevinë, pacajamatabënajinaliatsi. Vajamonae ancianovi ata pacajamatabënajinalia. Pacajamatabënajinaliatsi daxita apo pajudovimë, Antioquia tomarata panejinavanapaevi. Paxamë ata Siria nacuata panejinavanapaevi, pacajamatabënajinaliatsi. Paxamë ata Cilicia nacuata panejinavanapaevi, pacajamatabënajinaliatsi.

24 Pavënëlivaisitaniji pacuenia pacajumaitsi paxanëyajuvënëvi papecasivaxainaevelia. Bajarapamonae pina nexata pacanajamatabëcuene epatajërërecaeyaxanapona. Tspaji pina bajarapamonae pacajumaitsi:

“Panamatavenoname paxamē ata papecaperabēcaucubinexa. Panamatavenonamenua panejumecovēnētsinexa Dioso Moiséspijinēta penajumecopatsilivaisi,” pacajai pina. Pamonae pacajumaitsi bajarapacuenia, paxanē cajena apo paitorobinē paxamējavabelia.

²⁵ Nexata paxanē patanacaetuatsijavata, panajamatabēcuenējēpajē pataitapetsinexa ponēbeje paitorobijitsianē paxamējavabelia pecapon-aenexabeje patacatoyaquinaelivaisi. Bajaraponēbeje naliabeje Bernabēbeje Pablobeje pepēta.

²⁶ Vajabananēbeje, Bernabēbeje Pablobeje, bitso vaxaitsi asivatsi. Bajaraponēbeje vajatuxanenē Jesucristo pejumelivaisi yabara itsamonae jamatabēbeyaxuababiabi atatsibeje, itsiata ajamatabēcuenesaēbeje tsaponaponae.

²⁷ Nexata bajaraponēbeje pepēta pacatoitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota.

²⁸ Itsa panacaetuatajē Espiritu Santo paneyavenona patayapētaenexa peyapēxanepanaelivaisi patacatoitobinexa panejumecovēnētsinexa. Nexata baja apo panamatavenonaemē panejumecovēnētsinexa piayapēbejelivaisi, palivaisi daxita pajudiovinē pajumecovēnētajē. Pacaitorobatsi palivaisi bitso panamatavenoname panejumecovēnētsinexa.

²⁹ Pecobeta saya jumapecataeya pexanaenēanējavabelia ofrendacuenia pevi perajutsinexa itsamonae itsa tobia baca, oveja ata, pētsa paxaneme bajarapayajuvēnēvi. Pētsa paxaneme peja. Pētsa paxaneme cuibocuet-sacaeya pebeyaxuabinē pevi. Papebijivi baja nacojioba, pētsa matayajibatsi itsavajavabelia pijavavecu. Papebijivi pijinia abaxē apo nacojiobi, pētsa matayajibatsi petirivajavabelia. Bajara pijinia pacuenia petiriavi ata. Papeiriavi baja nacojioba, pētsa matayajibatsi itsanējavabelia pamonavecu. Papeiriavi pijinia abaxē apo nacojiobi, pētsa matayajibatsi pebijavabelia. Itsa pajumecovēnētame bajarapalivaisi, nexata xaniavaetsia pajinavanapae-name. Bajara saya palivaisiyo pacatoyaquinatsi, jai apóstolevi, ancianovi vajava, apo judiovijavabelia petoyaquinaebaxutota Jerusalén tomaravelia.

³⁰ Nexata jane baja bajarapacuyalatobaxuto petocaponenexabeje apo judiovijavabelia, Judasbeje Silasbeje itorobatsibeje penaponenexabeje Pablobeje Bernabēbeje pepēta. Nexata baja naponabeje. Bajarapamonae pata Antioquia tomaravelia. Nexata Antioquia tomarapijivi junata daxita Dioso pejumecovēnētsivi penacaetuatsinexa. Nexata penacaetuatsijavata rajutabeje bajarapacuyalatobaxuto.

³¹ Antioquia tomarapijivi itsa leba bajarapacuyalatobaxuto, bajarapamonae bitso jamatabēcuenēbarēya.

³² Judasbeje Silasbeje Diosojumepaebinēbeje profetanēbeje. Nexata ayailivaisi tsipaebabeje Antioquia tomarapijivijavabelia. Nexata baja bajarapamonae ajamatabēcuenesaē Diosojavabelia pejumetaexae palivaisi tsipaebabeje Judasbeje Silasbeje bajarapamonaejavabelia.

³³ Bajayajebi baja Antioquia tomarata Judasbeje Silasbeje naponaponabeje. Bajaraxuacujinae Dioso pejumecovēnētsivijavabelia xaniavaetsia napējiobabeje penaviatsinexabeje baja pitorobivitsijavabelia.

³⁴ Pepuanapējiobibeje baja, Silasbeje abaxē itsiata icatsia nacopatabeje bajarajota.

³⁵ Pablobeje Bernabēbeje ata abaxē ponaponabeje Antioquia tomarata. Dioso pitorobilivaisi tsipaebaponaponabeje. Itsamonae Dioso pejume-

covënëtsivi yajavaponaponabeje Dioso pitorobilivaisi penajuatsipaebabiabinexa.

Pacuenia icatsia Pablo cotocaevi panamuto pona jivi icatsia petsipaebinexa Dioso pitorobilivaisi yabara pelivaisi

³⁶ Antioquia tomarata Pablobeje Bernabébeje bajayajebi ponaponabeje. Pablo jumaitsi Bernabéjavabelia:

—Ponatsibeje icatsia vajataenexabeje vajamonae Dioso pejumecovënëtsivi. Daxita tomaranēja, itsaxuayo baja imata tsipaebanajetarucatsibeje Dioso pitorobilivaisi, bajaraxuayo icatsia najetarucaenatsibeje. Taenajetarucaenatsibeje pacuenia jinavanapa bajarapamonae, jai Pablo Bernabéjavabelia.

³⁷ Bernabé nexata bitso jitsipa pebarëponaenexabeje icatsia Juan, ponë vënërubatsi itsavënë, Marcos.

³⁸ Itsiata baitsi jane Pablo apo jitsipae baja icatsia Marcos pebarëponaenexabeje. Tsipaji imata copiaya panamuto barëponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipaebaponaejava.

³⁹ Nexata Pablobeje Bernabébeje apo najamatabëcuenejëpaebeje Marcos pebarëponaejavabejenexa yabara. Nexata baja Pablobeje Bernabébeje navecuantsatabeje. Bernabé jane baja nexata Marcos barëpona. Velapanata peponaebarcota Bernabébeje Marcosbeje naponabeje. Nexata nicababeje Chipretunaeto nacuyabelia.

⁴⁰ Nexata pijinia Pablo itapeta Silas peyanatsinexatsi. Dioso pejumecovënëtsivi tovajëtatsibeje Diosojavabelia peyavenonaponaenexatsibeje penajetarucaejavabeje.

⁴¹ Nexata Pablobeje Silasbeje Siria nacujava, Cilicia nacujava ata, Dioso pitorobilivaisi jivi tsipaebanajetarucabeje. Nexata bajarapanacuanëpijivi Dioso pejumecovënëtsivi, caebitsaëto canacujitsia, Diosojavabelia ajamatabëcuenesaë tsaponae.

16

Pacuenia Timoteo Listra tomarata nanaropota Pablobeje Silasbeje pepëta yabara pelivaisi

¹ Pablobeje Silasbeje patabeje Derbe tomarata. Patabeje Listra tomarata ata. Listra tomarata caxitajarababeje Dioso pejumecovënëtsinë, Timoteo. Timoteo pena judíova, Dioso pejumecovënëtsiva. Itsiata baitsi jane Timoteo paxapijinë griegonë.

² Daxita Dioso pejumecovënëtsivi, Listra tomarapijivi, Iconio tomarapijivi ata, Timoteo yabara jumai tsabiabi:

—Timoteo raja xaniavaetsia Dioso jumecovënëtapona, jai tsabiabi.

³ Pablo jitsipa Timoteo pebarëponaejava. Nexata Pablo Timoteo pebarëponaevajënae, judíovi pijacuenia perabëcaucutsiaexana. Baitsi boupiperabëcaucutsiaexana. Bajarapacuenia Pablo perabëcaucutsiaexana pebaraanaepanaeyanivatsi pevëna judíovi. Tsipaji itsaxuayo barënajetarucaejitsia, judíovi penaperabëcaucubivi jinavanapa. Nexata judíovi apo jitsipae peyajavajinavanapaejava apo peperabëcaucutsinëtsi. Nexata Pablo Timoteo perabëcaucutsiaexanaenejeva itsa barënajetarucaejitsipa bajarapamonaejava, yapëtaejitsipatsi Timoteo, apo peperabëcaucutsijavatsi. Tsipaji Timoteo paxapijinë griegonë, apo peperabëcaucutsinëtsi.

⁴ Pablobana tomaranēja ita najetarubena, caetomarapijivi canacujitsia, tsipaebapona Dioso pejumecovēnētsivijavabelia palivaisi toyaquinatsi Jerusalén tomaraverena. Tsipaebanajetarubena caetomarapijivi canacujitsia pejumecovēnētsinexa pacuenia apóstolevi, ancianovi ata, itorobatsi Jerusalén tomaraverena.

⁵ Bajaraxuata Dioso pejumecovēnētsivi, caebitsaēto canacujitsia, bitso ajamatabēcuenesaē tsaponae Diosojavabelia. Caematacabi canacujitsia Dioso pitorobilivaisi ayaiBITSaēto jumecovēnētaponā.

Pacuenia Pablo bemajitsinaebota tane Macedonia nacuapijinē yabara pelivaisi

⁶ Espiritu Santo apo tocopatsitsi Pablobana petsipaebinexa Dioso pitorobilivaisi Asiavēnē nacuata. Bajaraxuata Pablobana najetarubena Frigia nacuajava, Galacia nacuajava ata.

⁷ Pablobana ita najetarubena Misianacua muxubērēa, jamatabēpata picani Bitinia nacuajava. Itsiata baitsi jane Espiritu Santo apo tocopatsitsi pepatsinexa Bitinia nacuajava.

⁸ Nexata Misianacua canacujitsialia roviaalia ponalia. Pata Troas tomarella.

⁹ Nexata Troas tomarata meravi Pablo bemajitsinaebota taenuta Macedonia nacuapijinē. Macedonia nacuapijinē asaēyata jumaitsi Pablojavabelia:

—Naxanitsia. Macedonia nacuyabelia ponare. Paneyavenonaename, jai Macedonia nacuapijinē.

¹⁰ Pablo bemajitsinaebota petaenutsicujinae Macedonia nacuapijinē, bepijia paxaniavaetajē patajajavaxi patanicabinexalia Macedonia nacuyabelia. Nexata panajumaitsinē:

—Xaniajai cajena. Dioso nacaitoroba Macedonia nacuapijivijavabelia vajatsipaebinexa pexanialivaisi, Jesús pelivaisi, panajanē.

Pacuenia Pablobeje Silasbeje ponaponabeje Filipos tomarata yabara pelivaisi

¹¹ Troas tomarata panaropobajē. Panaponajē barcota. Roviaalia panayanicabaliajē patapatsinexa Samotraciatunaeto nacuyabelia. Troas tomarata patanaropobicujinae, meravia pitsijavata, panapatajē Neápolis tomarabelia.

¹² Bajaraxuacujinae matatsēnēa paponajē Filipos tomarabelia. Filipos-tomara Macedonia nacuata eca. Filipostomara daxita tomaranēvecua ayaitomaraxaneto. Filipos tomarata najinavanapa ayaiBITSaēto xaneto Roma tomaraverena pepatsivi. Bajarapatomarata panajinavanapajē caematacabimaxēto.

¹³ Nexata abaxē ita panajinavanapajē Filipos tomarata, judíovi penacuer-aevet simatacabita papitsapajē tomarapēnēyabelia. Paponajē mene itapayavelia patajaitsinexa itsajota nacaetuatabiaba judíovi pevajēcabiabinexa Diosojavabelia. Nexata mene itapaya ita pajaitanajetarubenajē, petiriavi penacaetuatenaevi mene itapata, patayejebajē. Nexata pajamatabējumaitsinē:

—Bajara macovē jotaje judíovi nacaetuatabiaba pevajēcabiabinexa Diosojavabelia, pajamatabējanē.

Nexata bajarajota panaenajē. Nexata bajarajota Dioso pitorobilivaisi patsipaebajē petiriavijavabelia.

¹⁴ Bajarapapetiriavijavuvēnēva pevēnē Lidia. Bajarapova Tiatira tomarapijiva, penamatamotsipapaēbērē, perajejaipapaēbērē, pecanajetabiabiva.

Dioso bitso pejumecovënëtsiva. Bajarapova panenamuxunaeveta xaniavaetsia. Dioso jamatabëcueneyavenonatsi. Nexata bajarapova jumecovënëta Pablo petsipaebilivaisi.

15 Bajaraxuacujinae bajarapova, pijabopijivi yajava, itsa bautisabatsi baja, bajarapova panejumaitsi:

—Itsa paxamë panetaneme pepacuene Dioso tajumecovënëtsivacuene, nexata tajabota abaxë panajinavanapaename, panejai bajarapova.

Bitso bajarapova asaëyata panejunata patanajinavanapaenexa pijabota. Nexata panaponajë bajarapova pijaboyabelia bajarapova pijabota patanajinavanapaenexa.

16 Paponabiabajë mene itapayabelia Dioso pitorobilivaisi patatsipaebabiabinexa itsajota judíovi nacaetuanabiaba. Belia itsanamutota panemataenena petiriva, dovathi peyajavaponaponaeva. Bajarapadovathi pejamatabëcueneta tajëvelia petiriva yapëtaeyabiaba itsacuenejavaxi yabara. Bajarapova pijamonae pecanajetsivatsi pijatuxanevi amoneya petonacuenebabiabinexa. Nexata bajarapova pijumata pijatuxanevi ayajava palata pitabiaba. Tsipaji itsajivi itsa yanijoba bajarapovajavelia itsacuenejavayo yabara, bajarapova tajëvelia xaniavaetsia tsipaebabiaba. Nexata pacuenia bajarapova tajëvelia jumai tsabiabi itsajivijavabelia, xaniajai tsabiabi. Nexata papalata matamotabiabatsi petsipaebabiabijamatabëcuene, pijatuxanevi pitabiaba.

17 Bajarapova nexata panepënanajetarucabiaba. Bajarapova pinijijumeta jumai tsanajetarucabiabi paxanë yabara:

—Mapapelijivije, athëbëtsatia peecaenë Dioso pijajivi. Pacatsipaebapona papecacapanepaelivaisinexa pibisiacuene paneexanaeneconivecua, jai tsanajetarucabiabi petiriva paxanë yabara.

18 Bajarapacuenia najuamatacabianë jumai tsanajetarucabiabi itsa panepënanajetarucabiaba. Nexata bitso Pablo pejamatabëitonotabiabixaetsi, belia napënyorotaxuaba bajarapovajavelia. Jumaitsi:

—Dovathi, caitavetatsi Jesucristo pevënëta. Vecuapitsapare baja mapovaje, jai Pablo.

Bajarapacuenia Pablo pejumaitisjavata dovathi baja petiriva vecuapitsapatsi.

19 Nexata bajarapova pijatuxanevi yapëtane baja pecopiarucaejava bajarapova pijumata palata penotabiabijava. Nexata bajarapova pijatuxanevi vaetabatsibeje Pablobeje Silasbeje. Robobocaponaliatsibeje tomara tuatujjëabelia. Caponatsibeje tomara pevetsivijavabelia.

20 Jivi penaneconitsiaexanabiabivi, juezmonae, pitabarata nutatsibeje. Pamonaë Pablobeje Silasbeje vaetabatsibeje, najumetsënëtsiaya jumaitsi juezmonaejavabelia Pablobeje Silasbeje yabara:

—Mara papebibeje judíonëbeje. Anaepanaeyaexanaponabeje vajatomarapijivi.

21 Tsipaebaponabeje vajanacuapijivi pejumecovënëtsinexa palivaisi vaxaitsi Romano nacuapijivitsi apo nacatocopatsi vajajumecovënëtsinexa, jai najumetsënëtsiaya bajarapamonae Pablobeje Silasbeje yabara.

22 Nexata jivi ayaibitsaëtoxaneto baranaepanatsibeje Pablobeje Silasbeje. Nexata juezmonae itoroba vajabitsaë Pablobeje Silasbeje penaxatsijavabeje pevejumajonotsinexatsibeje. Bajaraxuacujinae itoroba ayaicuenia pejumaconibabenexatsibeje naebota.

23 Ayaicuenia pejumaconibabecujinaetsibeje, juezmonae icatsia itoroba vajabitsaē Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia juezmonae itoroba penaneconitsivi pejebabiabibo pevetsinē Pablobeje Silasbeje xaniavaetsia pevetsinexatsibeje penaneconitsivi pejebabiabibo ēnētuaatujēta.

24 Penaneconitsivi pejebabiabibo pevetsinē juezmonae pitorobixaetsi xaniavaetsia pevetsinexa, nexata penaneconitsivi pejebabiabibo pēñeyatuucubijavanē, pecopiarucaejavatareca, Pablobeje Silasbeje etatsibeje. Peponaonaeyanivabeje penaitabarataeyaexanaetablapabeje tusatualia sixataliatsibeje. Bajaraxuacujinae xaniavaetsia yasicatarērētatsibeje cepovēñjavata.

25 Nexata meravituatujēta Pablobeje Silasbeje vajētabeje Diosojavabelia. Diosojumevajianē naxēanecabeje Diosojavabelia. Itsamonae pijinia penaneconitenaevi bajarapabota, jumetanetsibeje penaxēanecaejavabeje.

26 Nexata jemata bajarapaepatota ira najēabapeneta pinijicuenia. Penaneconitsivi pejebabiabibo, daxitabo, naneguebe. Caecuenia daxita baupanē nabaupana pijacuata. Daxita penaneconitsivi pacadenamaētonēta cobecēbejebatsi, vecobeothopatsi.

27 Penaneconitsivi pejebabiabibo pevetsinē naēcotapuna pemajitecaenēmi. Nexata itsa tane daxita baupanē penabaupanaejava, navemarajonotaxuabina pijaespada penabeyaxuabinexa picani. Tspaji jamatabējumaitsi:

—Daxita meta baja penaneconitsivi rēcēpeca. Nexata bajarapajamatabēcuenē yabara nenaneconitsiaexanaena tomara pevetsivi, jamatabējai.

28 Nexata bajarajota itacarajeta Pablo pinijijumeta jumai tsaxuabi:

—Pētsa nabeyaxuabame. Daxita raja patananeconitsivi panubenañē, jai Pablo.

29 Nexata penaneconitsivi pejebabiabibo pevetsinē itoroba pijajivitonē petocarenanexatsi pitayotabiabijava. Nexata bepijia tocarenatsi. Penaneconitsivi pejebabiabibo pevetsinē bitso neconecojai pecajunavi. Nexata bajaraponē pematabacabēta nucajunua Pablobeje Silasbeje pitabarata.

30 Bajaraxuacujinae penaneconitsivi pejebabiabibo pevetsinē barēpitsapaliatsibeje Pablobeje Silasbeje. Penaneconitsivi pejebabiabibo pevetsinē jumaitsi:

—¿Detsa xua exanaenajē tanecapanepaenexa Diosojavabelia? jai Pablobeje Silasbejejavabelia.

31 Nexata Pablobeje Silasbeje jumaitsideje:

—Najamatabēcuenecopare pepo petuxanenē Jesucristojavabelia pecapanepaenexa Diosojavabelia. Xamē nijabota pejinavanapaevi ata Jesucristojavabelia najamatabēcuenecopatsi pecapanepanexatsi Diosojavabelia, jaiabeje.

32 Nexata Pablobeje Silasbeje tsipaebabeje Dioso pitorobilivaisi bajaraponējavabelia, daxita pijabota pejinavanapaevijavabelia ata.

33 Penaneconitsivi pejebabiabibo pevetsinē bajarapaepatota, meravi, Pablobeje Silasbeje jumavajēñēquiatatsibeje. Nexata bajaraponē, pijabopijivi yajava, bautisababeje Pablobeje Silasbeje.

34 Bajaraxuacujinae penaneconitsivi pejebabiabibo pevetsinē pijaboyabelia Pablobeje Silasbeje barēliatsibeje. Nexata pexaejava rajutatsibeje. Bajaraponē, pijabopijivi yajava, pinijicuenia jamatabēcuenēbarēya Dioso pejumecovēñsixa.

³⁵ Nexata pepo bajayacunua juezmonae itorobalia vajabitsaë penaneconitsivi pejebabiabibo pevetsinëjavabelia pejumaitsinexa: “Capitsapaename pina baja Pablobeje Silasbeje,” pejainexa.

³⁶ Nexata penaneconitsivi pejebabiabibo pevetsinë jumaitsi Pablojavabelia:

—Juezmonae rabaja netonajumeitorobarena patacacapitsapaenexabeje. Paponarebeje baja xaniavaetsia, jai penaneconitsivi pejebabiabibo pevetsinë.

³⁷ Itsiata baitsi jane Pablo jumaitsi juezmonae pitorobivajabitsaëvijavabelia:

—Juezmonae naneconita pijatuxanevijavabelia, paxanëbejejavaberena ata. Tsi-paji abaxë copiata xaniavaetsia yapëtaenejeva paneconi paxainajëbeje, paxanëbeje paRomano nacuapijinë atanëbeje, juezmonae itoroba paxamëyajuvënëvi patanejumaconibabenexabeje daxita tomarapijivi pitabarata. Bajaraxuacujinae paneetabeje mapabotaje. Nexata aeconoxae juezmonae saya paxamë pacaitorobarena pepëya patanecapitsanaenexamëbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaëvijavabelia.

³⁸ Nexata vajabitsaë tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinëbejecuene, bitso jamatabëcuenenajunaviaca.

³⁹ Nexata juezmonae parena. Jumaitsi Pablobeje Silasbejejavabelia:

—Pauranë paxamëbejejavabelia vajabitsaë pataitorobixae pibisiacuene papecaexanaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pejebabiabibovecua capitsapatsibeje. Juezmonae barajamatabëcuenexanepanaeya Pablobeje Silasbeje itorobatsibeje peponaenexabeje baja tomaravecua.

⁴⁰ Pablobeje Silasbeje pecapitsapaecujinaetsibeje, ponabeje baja Lidia pijaboyabelia. Nexata Lidia pijabota itsa tanebeje Dioso pejumecovënëtsivi, muxujiobabeje bajarapamonae pijamatabëcuenesaënexa Diosojavabelia. Bajaraxuacujinae ponabeje baja bajarapatomaravecua.

17

Pacuenia Pablobeje Silasbeje Tesalónica tomarata jaitatsibeje pevaetabinexatsibeje yabara pelivaisi

¹ Pablobeje Silasbeje najetarucabeje Anfípolis tomarajava, Apolonia tomarajava ata. Bajaraxuacujinae patabeje Tesalónica tomarabelia. Nexata Pablobeje Silasbeje Tesalónica tomarata naponaponabeje acueyabi pasemanabeje. Tesalónica tomarata eca judíovi penacaetuatabiabibo.

² Nexata Pablo pijacujirucuenia judíovi penacueraevetsimatacabianë canacujitsia najoneyabiaba bajarapabota. Dioso pitorobilivaisi Pablo tsi-paebabiaba bajarapabota penacaetuatabiavijavabelia. Tsi-paebabiaba pacuenia Dioso pejumelivaisibaxutota jumaitsi.

³ Pablo jumai tsabiabi judíovi penacaetuatabiabibota:

—Dioso baja cajena pejumelivaisibaxutota tajëvelia vajunupaebatsi Cristo, ponë baja Dioso itorobica jivi pecapanepaenexa. Tajëvelia baja cajena Dioso pejumelivaisibaxutota Cristo vajunupaebatsi pijavajabitsaë ayaicuenia pebejiobiaexanaejavanexatsi. Vajunupaebatsinua baja cajena Cristo petëpacujinae icatsia piasaëjavanexa. Bajaraponë raja Jesús, ponë pelivaisi

pacatsipaebatsi. Bajaraponë raja Cristo, ponë Dioso itorobica jivi peca-panepaenexa, jai tsabiabi Pablo itsa tsipaebabiaba Dioso pitorobilivaisi judíovi penacaetuatabihibota.

⁴ Nexata judíoviyajuvënëvi jumecovënëta Pablo petsipaebabiabilivaisi. Ayaibitsaëto griegovi ata, Dioso pejitsipaevi, jumecovënëta Pablo petsipaebabiabilivaisi. Ayaibitsaëto petiriavi ata, petuxanevi pijavajivi, jumecovënëta Pablo petsipaebilivaisi. Nexata daxita bajarapamonae nacaetuatabiaba Pablobeje Silasbejejavata.

⁵ Nexata judíovi, pamonae apo jumecovënëtsi Pablo petsipaebabiabilivaisi, Pablo cuenecaëbatsi. Tsipaji Pablojavabelia jivi ayaibitsaëto jonepona. Nexata bajarapajudíovi junata jivi ayaibitsaëto xaneto pibisijamatabëcuenevi, saya jema pejinavanapaevi tomarapijicallejava. Nexata pejunatsicujinae bajarapajudíovi pejunatsivi jane baja barënacaetuata. Nexata daxita bajarapajudíovi, pejunatsivi jane baja yajava, barënamatabëcueneyanaba. Nexata itoroba bajarapatomarapijivi pianaepanaenexa Dioso pejumecovënëtsivijavabelia. Pablobeje Silasbeje naponaponabeje Jasónvënëñë pijabota. Nexata daxita pamonae anaepana bajarapatomarata, Pablobeje Silasbeje jemata tsimaxëpatatsibeje Jasón pijabota. Vaetabijitsiatsibeje picani penutsinexatsibeje tomara pevetsivi pitabarata.

⁶ Jasón pijabota Pablobeje Silasbeje apo pecaxitajarabixaetsibeje, nexata pamonae anaepana, vaetabatsi Jasón, itsamonae yajava, pamonae Dioso pejumecovënëtsivi. Robobocaponaliatsi Jasónbana tomara pevetsivijavabelia. Nexata pamonae anaepana, tomara pevetsivi pitabarata najumetsënëtsiaya pinijijumeta jumaitsi Pablobeje Silasbeje yabara:

—Pablobeje raja Silasbeje daxitanacuanëjava pejinavanapaevi itorobaponabeje pianaepanaenexa. Nexata jane baja aeconoxae vajatomarajavaberena ata patabeje.

⁷ Nexata Jasón, maponë nucaje, tocopata pijabota penaponaponaenexabeje Pablobeje Silasbeje. Daxita pamonae Jasón mayajavanucaje, Pablobana ata, daxita bajarapamonae, apo jumecovënëtsi cajena Romanonacua pepo pevetsinë pitorobilivaisi. Daxita bajarapamonae jumai tsabiabi: “Romanonacua pepo pevetsinë rabaja apo nacayanacuae vetsi. Itsanë rabaja nacayanacuae veta. Bajaraponë pevënë Jesús,” jai tsabiabi daxita bajarapamonae, jai najumetsënëtsiaya tomara pevetsivijavabelia pamonae anaepana.

⁸ Nexata bajarapacuenia pejumaitsiyava itsa jumetane, daxita tomarapijivi tomara pevetsivinua bitso anaepana.

⁹ Nexata Jasón, Dioso pejumecovënëtsivi yajava, palata matamotsiaexanatsi tomara pevetsivijavabelia, Pablobeje Silasbeje pevécuapitsapaenexabeje bajarapatomara. Tomara pevetsivi jumaitsi:

—Itsa rabaja ponaenabeje bajaraponëbeje mapatomaravecuaje, pacatocanaviabianatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana penaviabinexa pijabonëjavabelia.

Pacuenia Pablobeje Silasbeje ponaponabeje Berea tomarata yabara pelivaisi

¹⁰ Jasónbana tomara pevetsivi pecopabicujinaetsi, bajarapameravi, Dioso pejumecovënëtsivi bepíjia itorobatsi Pablobeje Silasbeje peponaenexabeje, Berea tomarabelia. Pablobeje Silasbeje pepatsicujinaeliabeje Berea tomarata najunuabeje judíovi penacaetuatabihibojavabelia.

11 Ajamatabēcuenetaja pajudíovi jinavanapa Tesalónica tomarata. Nexata apo jumecovēnētsi Dioso pitorobilivaisi. Pajudíovi jinavanapa Berea tomarata, bajarapacuenia apo ajamatabēcuenetaja. Bajarapajudíovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judíovi penacaeuatabiabibota Dioso pitorobilivaisi tsipaebabiaba bajarapajudíovijavabelia. Nexata Pablo itsa copata petsipaebabiabijava, bajarapajudíovi pijacuata Dioso pejumelivaisibaxutota xaniavaetsia nacujarubabiaba peyapētaenexa xaniajai bajarapacuenia itsa jumaitsi Pablo petsipaebabiabilivaisi.

12 Berea tomarapijivi judíovi ayaibitsaēto jumecovēnēta Pablo petsipaebabiabilivaisi. Ayaibitsaēto pijinia griegovi ata jumecovēnēta. Jumecovēnēta pebijivi. Jumecovēnēta petiriavi ata. Bajarapapetiriavi petuxanenēanē pijavajivi.

13 Pajudíovi jinavanapa Tesalónica tomarata, Pablo vēnēlivaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapijivi ayaibitsaēto pianapanaenexa Pablojavabelia.

14 Nexata Berea tomarapijivi, pamonaē jumecovēnēta Pablo petsipaebabiabilivaisi, bajarapamonae Pablo bepijia itorobatsi peponaenexa manamene itapata peecaetomarabelia. Silasbeje abaxē Timoteobeje nacopatabeje Berea tomarata.

15 Pamonaē Pablo yanataponaliatsi, pēnaxuabatsi Atenas tomarabelia. Nexata Atenas tomaraverena bajarapamonaeta Pablo tonajumexuaba Silasbeje Timoteobeje. Jumaitsi:

—Itsa cuencaējēpaenatsibeje, bepijia renabeje tsane tanecaxitajarabinexabeje Atenas tomarata, jai Pablo bajarapamonaējavabelia.

Bajaraxuacujinae pamonaē Pablo pēnaxuabatsi, naviaba baja Berea tomarabelia.

Pacuenia Pablo ponapona Atenas tomarata yabara pelivaisi

16 Pablo abaxē Atenas tomarata evetaponapona Silasbeje Timoteobeje pepatsijavabeje Atenas tomaraberena. Nexata Pablo itsa ponapona Atenas tomarata, tane pecobeta jumapecataeya pexanaenēanē piapaxayojava daxita Atenas tomara tuatujējjava. Nexata Atenas tomarapijivi pematabacabēta nubenabiaba pevajēcabiabinexa bajarapajumapecataevijavabelia. Nexata Pablo itsa tane bajarapacuenē, bejamatabējiobi bitso.

17 Nexata judíovi penacaeuatabiabibota Pablo Dioso pitorobilivaisi yabara barēnajumenotabiaba pevēna judíovi. Barēnajumenotabiabanua apo judíovi ata, pamonaē Dioso pejitsipaevi. Caematacabi canacujitsia barēnajumenotabiabanua pamonaē Pablo caxitajarabatsi tomara tuatujēta.

18 Nexata Pablo caxitjaraba pebijivi, epicúreomonaē pecujarubilivaisi pejumecovēnētavanapaevi. Caxitjarabanua itsapebijivi, estoicosmonae pecujarubilivaisi pejumecovēnētavanapaevi. Bajarapamonae ata Pablo barēnajumenota. Nexata Pablo pebarēnajumenotsijavata, bajarapamonaēyajuvenēvi Pablo yabara muetsia najumaitsi:

—¿Detsa meta pitsilivaisi maponēje namatatsapatsia nacabarēcuaicuaijaije? najai bajarapamonae Pablo yabara.

Itsamonae pijinia Pablo yabara najumaitsi:

—Itsanacuapijivi racovē pijadiosovi pelivaisipaebinē, najai bajarapamonae.

Bajarapacuenia najumaitsi tsipaji Pablo tsipaebaona pexanialivaisi, Jesús pelivaisi. Tsipaebaponua petēpaevimi icatsia itsamatacabi pi-asāējavanexa petēpaecujinae.

¹⁹ Nexata bajarapamonaē Pablo barēponaliatsi Areópagovēnē tsutojavabelia, patsutojavabelia tomara pevetsivi nacaetuatabiaba penabarēcuaiacuaijainexa. Itsa baja palia bajarabelia, bajarapamonaē jumaitsi Pablojavabelia:

—Panetsipaebare patayapētaenexa papejanalivaisi tsipaebaponame.

²⁰ Panetsimuxuaitothia abaxē palivaisi tsipaebaponame. Nexata pajit-sipajā patayapētaenexa pajamatabēcuenelivaisi xaina palivaisi tsipaebaponame, jai Atenas tomarapijivi Pablojavabelia.

²¹ Atenas tomarapijivi, itsanacuaverena pepatsivinua, pamonaē bajara-patamarata najinavanapa, daxita bajarapamonaē jamatabēcuenenabiabatsi pejanalivaisi pejumetaeyabiabinexa. Jamatabēcuenenabiabatsinua petsipae-babiabinexa itsamonajavabelia ata.

²² Nexata Pablo nonotapuna bajarapamonaē tuatujēta Areópagovēnē tsu-tojavata. Jumaitsi:

—PaAtenas tomarapijivimē, pacatanetsi rabaja panijadiosovi bitso papecajamatabēcuenenabiabijava.

²³ Tanajetarucabiabijavata panijatamaracallejava, taeyabiabajā itsaxu-ayo pavajēcabiabame panijadiosovijavabelia. Nexata caxitajarabajā al-tarvēnējava, itsajota jivi vajēcabiaba abaxē apo yapētae ata padiosojavabelia vajēcabiaba. Bajarapaaltarvēnējavata peyaquinarutsitane juma tsarucae mapacueniaje: “Padioso abaxē apo yapētaetsi, bajarapadiosojavabelia vajēcabiabatsi mapaaltarjavataje,” jai tsarucae peyaquinarutsitane. Pa-Dioso yabara yaquinruta bajarapaaltarvēnējavata, nexata bajarapaDioso-javabelia paxamē baja najamatabēcuenecopatsiaya panavajēcabiabame, abaxē apo payapētae atamē bajarapaDioso, bajarapaDioso yabara jane baja ae-conoxae pacatsipaebijitsiatsi, jai Pablo Atenas tomarapijivijavabelia.

²⁴ Icatsia Pablo jumaitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita mapanacuapijicuenē yajava. BajarapaDioso pepo pevetsinē jane baja daxita mapanacuaje. Pevetsinē itaboxo ata. BajarapaDioso cajena apo nonaponaē jivi pexanaetemplota.

²⁵ BajarapaDioso apo namatavenonaē jivi peyavenonaenexatsi. Tsipaji apo namatavenonaē itsacuenējavayo ata. Biji rajane bajaraponē nacāra-juta caeepatoyo vajaasaētšavanapaejumaliyonexa. Nacarajutanua daxita xua namatavenonatsi, jai Pablo pepo Dioso, athēbētatsia peecaenē, yabara.

²⁶ Icatsia Pablo jumaitsi Atenas tomarapijivijavabelia:

—BajarapaDioso abaxē copiaya caenē pebi exana. Bajaraxuacujinaē bajarapabijavaverena naexanapona daxitavirijamevi pijasalinaivimi. Nexata bajarapapebijavaverena penaexanaponaēvi yacāējēpa pejinavana-paejava daxitanacuanējava. Nexata Dioso caevirijamevi canacujitsia tocopatapona pamatacabibeje asāē tsavanapaejitsia. Tocopataponanua pacuanējava jinavapaejitsia.

²⁷ Bajarapacuenia Dioso tocopata mapanacuataje daxita bajarapamonaē Dioso pejitsipaenexa penajamatabēcuenecopatsinexa Diosojavabelia. Dioso cajena tajē apo necavecuponaponaē.

²⁸ Dioso raja pejamatabēcueneta asāē tsavanapaetsi. Bajarapacuenia Dioso pejamatabēcueneta asāē tsavanapaetsi tsipaji baja cajena paxamēyajuvēnēvi bajayata peyaquinaelivaisita jumaitsi: “Vaxaitsi ata rabaja Dioso pexitsi,” jai.

²⁹ Nexata Dioso itsa pexitsi, Dioso yabara jamatabëcuenenavëxaniabiaya apo bejamatabëjumaitssitsi mapacueniaje: “Dioso raja oronanitota, platananitota ata, ibotota ata pexanaenëtsi. Nexata pacuenia bitso pecujanivitsi pecobeta pexanaenëanë pexaniacuenia exana, bajara pitsinë Dioso,” apo bejamatabëjaitssi jamatabëcuenenavëxaniabiaya Dioso yabara.

³⁰ Jivi abaxë bajayata apo yapëtae Dioso peponaponaejava. Nexata bajayata jivi pibisiacuene exanabiabi ata, Dioso abaxë najamatabëcuenecataita. Nexata abaxë Dioso apo naneconitsiaexanae bajarapamonae pibisiacuene pexanabiabijava yabara. Itsiata baitsi jane maparucaeje Dioso itoroba daxitajivi daxitanacuanëjava pejinavanapaevi pibisiacuene pexanabiabijava pecopabinexa baja, penajamatabëcuenepënëyorotsinexa Diosojavabelia.

³¹ Bajarapacuenia Dioso itoroba tsipaji baja Dioso jivi penaneconitsiaexanaematacabinexa tocajëtaruta. Pamatacabi Dioso tocajëtaruta, itsa copiapatsiana, naneconitsiaexanaena daxitanacuanëpijivi. Nexata Dioso jivi itsa naneconitsiaexanaena, caejivi canacujitsia paneconivajëto xainapona, bajarapaneconivajëtota naneconitsiaexanaponaena. Ponë jivi naneconitsiaexanaejitsia, Dioso baja cajena itapeta. Daxitajivi beyapëtane ponë Dioso itapeta. Tsipaji baja bajaraponë Dioso icatsia asaëyaexana petëpaecujinae, jai Pablo Atenas tomarapijivijavabelia Jesús yabara.

³² Nexata Atenas tomarapijivi itsa jumetane bajarapacuenia Pablo pejumaitssijava Jesús petëpaecujinae Dioso icatsia piasaëyaexanaejavatsi yabara, Atenas tomarapijivi Pablo jumecaponatsi. Itsamonae pijinia itsiata jumaitssi Pablojavabelia:

—Icatsia itsamatacabijavabelia pacanamuxunaevetsianatsi bajarapalivaisi, jai itsamonae.

³³ Nexata baja Pablo bajarapamonae vecuapona.

³⁴ Itsamonae itsiata pënaponatsi. Bajarapamonae jumecovënëta Pablo petsipaebilivaisi. Pamonaevetsianatsi jumecovënëta Pablo petsipaebilivaisi yajuvënënë, pevënë Dionisio. Bajaraponë Dionisio, Areópagovënë tsojavata penacaetuatabiabivi pevetsiviyajuvënënë. Petiriva ata, Damarisvënëva, jumecovënëta Pablo petsipaebilivaisi. Itsamonae yajava jumecovënëta.

18

Pacuenia Pablo ponapona Corinto tomarata yabara pelivaisi

¹ Atenas tomarata Pablo jivi petsipaebaponaponaecujinae Dioso pitorobilivaisi, pona baja. Nexata pata Corinto tomarabelia.

² Nexata Corinto tomarata Pablo caxitaraba judionë, Aquilavënënë, Ponto nacuapijinë. Bajaraponë Aquila caematacabibeje abaxë xaina Corinto tomarata pepatsicujinae Italia nacuaverena. Yajavapata pijava Priscilavënëva. Bajarapajivibeje Italia nacuaverena patabeje. Bajaraverena patabeje tsipaji Romanonacua pepo pevetsinë, Claudiovënënë, capitsapona daxita judiovi pepitsapaenexa Roma tomaraveca. Romatomara eca Italia nacuata. Nexata Pablo pona Aquila pijaboyabelia.

³ Nexata Aquila pijabota Pablo naponapona. Nexata carpaponë Pablo nayavenonaeya jorocabiaba Aquila. Pablo nanacueneba tsipaji Pablo ata yapëtane pejorocaejava carpaponë.

⁴ Judiovi penacaetuatabiabitota, penacueraevetsimatacabianë canacujitsia, Pablo judiovi tsipaebabiaba Dioso pitorobilivaisi. Pablo tsipaebabiaba judiovijavabelia, apo judiovijavabelia ata, bajarapamonae pejumecovënëtsinexa palivaisi Pablo tsipaebabiaba.

⁵ Silasbeje Timoteobeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpabonē. Nexata Pablo caematacabi canacujitsia Jesús yabara jumai tsaponae judíovijavabelia:

—Jesús raja pepacuene Cristo, ponē copiaevetavanapatsi pepatsijavatsica vajanacapanepaenexa, jai tsaponae Pablo Jesús yabara.

⁶ Nexata bajarapacuenia Pablo pejumaitssaponaejava Jesús yabara, judíovi baraanaepanatsi. Pablo pibisiacuenia bijatanetsi. Nexata Pablo penaxatatsijava najumajonotaxuaba. Nēnēbabia bajarapamonae peyapētaenexa penaneconitsijava Diosojavabelia. Tsipaji apo jumecovēnētsitsi, Pablo tsi-paebi ata Jesús yabara. Pablo nexata jumaitsi judíovijavabelia:

—Paxamē saya panejamatabēcueneta panaxuabianame Diosovecua. Xanē tajamatabēcueneta apo panaxuabimē tsane. Panijacuata panaxuabianame. Tsipaji cajena pacatsipaebi atatsi Jesús yabara, apo panejumecovēnētsimē. Aeconoxae rabaja copatajē patacatsipaebabiabijava paxamējavabelia bajarapalivaisi. Tavajēnaeyabelia baja ponaenajē tatsipaebaponaenexa bajarapalivaisi apo judíovijava, jai Pablo judíovijavabelia.

⁷ Nexata Pablo judíovi penacaeuatabiabibovecua pitsapa. Nexata pona Justovēnēnē pijaboyabelia. Nexata Justo pijabota Pablo naponapona. Bajaraponē Justo penavajēcabiabinē Diosojavabelia. Pijabo eca judíovi penacaeuatabiabiabo muxuneneta.

⁸ Nexata Crispovēnēnē, judíovi penacaeuatabiabiabo pevetsinē, daxita pijabopijivi barējumecovēnēta Jesús pelivaisi. Ayaibitsaēto Corinto tomarapijivi, pamonaē jumetane Pablo petsipaebabiabilivaisi, jumecovēnēta. Nexata bajarapamonae nabautisaba.

⁹ Nexata meravi bemajitsinaebota Dioso jumaitsi Pablojavabelia:

—Pētsa junavame. Pētsa copatame netsipaebaponaejava tajumelivaisi.

¹⁰ Xanē raja cayajavatsi. Nexata itsajivi ata apo caitsacueniabi tsane. Tsipaebaponaename tajumelivaisi. Tsipaji rabaja tajajivi ayaibitsaēto tsaponae mapatomarataje, jai Dioso.

¹¹ Nexata Pablo ponapona Corinto tomarata dieciocho pajuametobeje. Tsipaebapona Dioso pitorobilivaisi Corinto tomarapijivijavabelia.

¹² Pamatacabi Galiónvēnēnē Acayanacua evetaponapona, judíovi najamatabēcuenejēpaeya tsimaxēnacaetuatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi nacuaevevtsinē Galión pitabarata.

¹³ Nexata judíovi jumaitsi nacuaevevtsinē Galiónjavabelia:

—Mara ponēje jivi livaisi tsipaebapona je pejumecovēnētsinexa Dioso. Itsiata baitsi jane saicayacuenia Dioso pejumelivaisivecua tsipaebapona. Paxanē cajena bajarapacuenia apo panetonajumecopatsi Dioso Moiséspijnēta penajumecopatsilivaisi, jai judíovi nacuaevevtsinē Galiónjavabelia Pablo yabara.

¹⁴ Ajena picani Pablo jumepitsijitsia judíovi, itacarajeta nacuaevevtsinē Galión jumaitsi judíovijavabelia:

—Paxamē pajudíovimē, bepayapētaneme mapacueneye. Itsa maponēje nacobetoxotsipa, jivitonē ata itsa beyaxuabijitsipa, pacajumexaniataejitsipatsi. Nexata naneconitsiaexanaejitsipajē.

¹⁵ Paxamē saya pabarēnajumenotame maponēje papecatsipaebaponaelivaisi yabara. Pabarēnajumenotamenua panijasalinaivi pijalivaisi yabara ata. Nexata saya paxamē panijacuata bajaraxua yabara pabarēcuaiquaijamēre

pacuenia pajitsipame. Xanë raja apo evetsinë bajarapalivaisi, jai nacuaeetsinë Galión judíovijavabelia.

¹⁶ Nexata baja nacuaeetsinë Galión navecuapitsapaeyaexana judíovi.

¹⁷ Nacuaeetsinë Galión judíovi navecuapitsapaeyaexanae ata, caecuenia abaxë judíovi apo ponae pijabonëjavabelia. Nexata griegovi, bajarajota penubenaevi, nacobenavaetaba judíoviyajuvënë, Sóstenesvënë. Bajaraponë Sóstenes judíovi penacaeuatabiabiho pevetsinë. Nexata griegovi Sóstenes conibabia nacuaeetsinë Galión pitabarata, ajibi ata peyabaraconibabejava. Nexata nacuaeetsinë Galión tae ata bajarapacueni, apo itavetsi.

Pacuenia Pablo pepatsicujinae Antioquía tomarata, icatsia naropota acueyabinamutonexa jivi petsipaebaponaenexa Dioso pitorobilivaisi yabara pelivaisi

¹⁸ Pablo abaxë bajayajebi ponapona Corinto tomarata. Bajaraxuacujinae Dioso pejumecovënëtsivita napëjioba. Napona barcota Siria nacuayabelia. Pablo yajavapona Priscilabeje Aquilabeje. Nexata epatua Cencrea tomarata, Pablo mataxunatsi. Daxitamatanami matacasibatsi jivi peyapëtaenexatsi petoveretsijava Dioso petonacuenebijava pacuenia baja cajena Diosojavabelia Pablo najumecapanepaeya jumaitsi.

¹⁹ Pablobana Aquilabana Priscilabana itsa pata Efeso tomarata, Pablo baja vecuanatsata Priscilabeje Aquilabeje. Nexata Pablo Efeso tomarata joneya judíovi penacaeuatabiboyalia. Nexata bajarajota barënalivaisita judíovi.

²⁰ Nexata picani Efeso tomarata Pablo judíovi asivatsi abaxë penaponaponaenexa anijamatacabianë. Itsiata Pablo apo jejai.

²¹ Nexata Pablo itsa napëjioba, bajarapamonaejavabelia jumaitsi:

–Naxanetajë tapatsinexa Jerusalén tomarabelia tataenexa pafiesta baja imoxoyo pevajënae pejonenexa. Itsiata icatsia najetarucaenajë paxamëjavaberena itsa Dioso jitsipa, jai Pablo judíovijavabelia.

Nexata Pablo Efeso tomarata barcota nanaropota.

²² Itsa baja Pablo pata Cesarea tomarabelia, pona icatsia Jerusalén tomarabelia pebajacobinexa daxita Dioso pejumecovënëtsivi. Bajaraxuacujinae icatsia naviatata Antioquía tomarabelia.

²³ Antioquía tomarata bajayajebi ponapona. Bajaraxuacujinae icatsia naropota. Najetaruca daxita tomanëjava. Najetaruca Galacia nacuatata penaetomaranëjava, Frigia nacuatata penaetomaranëjava ata. Bajarapatomaranëjava pejinavanapaevi Dioso pijalivaisita Pablo jamatabëcuene asaëyaexananajetaruca daxita Dioso pejumecovënëtsivi.

Pacuenia Apolos Dioso pitorobilivaisi tsipaeba Efeso tomarapijivijavabelia yabara pelivaisi

²⁴ Judionë Apolosvënëne pata Efeso tomarata, Alejandria tomarapijinë. Bajaraponë xaniavaetsia Dioso pitorobilivaisi jivi tsipaebabiaba. Jumeypatane bitso pacuenia Dioso pejumelivaisibaxutota jumaitsi.

²⁵ Apolos itsamonae epatua tsipaebatsi Jesús pelivaisi. Itsiata baitsi jane xaniavaetsia daxitalivaisi apo tsipaebitsi. Palivaisi Juanpijinë jivijavabelia tsipaebapona, bajarapalivaisi Apolos xaniavaetsia tsipaebatsi. Juanpijinë jivi pebautisabaponaevajava ata Apolos xaniavaetsia tsipaebatsi. Apolos xaniavaetsia Jesús pelivaisi apo tsipaebi atatsi, itsiata ajamatabëcuenesaëya xaniavaetsia tsipaebanajetaruca Jesús pelivaisi.

²⁶ Apolos ajumejunavijibia Dioso pitorobilivaisi jivi tsipaeba judíovi penacaeuatabibibota. Nexata Priscilabeje Aquilabeje itsa jumetanebeje

Apolos petsipaebilivaisi, nexata bajarapajivibeje junatabeje Apolos. Nexata Apolos napona Priscilabeje Aquilabeje pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje Apolosjavabelia xaniavaetsia Apolos peyapëtaenexa Jesús pelivaisi.

²⁷ Itsa baja Apolos naropotsijitsia Efeso tomaravecua peponaenexa Acaya nacuyabelia, Dioso pejumecovënëtsivi, Efeso tomarapijivi, yavenonatsi peponaenexa. Tsicobeyaquinatsi cuyalatobaxuto pecaponaenexa, Dioso pejumecovënëtsivijavabelia perajutsinexa Acaya nacuata. Bajarapacuenia tsicobeyaquinatsi Acaya nacuapijivi, Dioso pejumecovënëtsivi, xaniavaetsia Apolos pecopiapitsinëxatsi. Apolos baja itsa pata Acaya nacuyabelia, Apolos bitso yavenona Acaya nacuapijivi Dioso pejumecovënëtsivi.

²⁸ Daxitajivijavabelia Apolos tsipaebapona Jesús pelivaisi. Nexata pacuenia Dioso pejumelivaisibaxutota jumaitsi Jesús yabara, Apolos tsipaebapona daxitajivijavabelia. Nexata Apolos daxitajivi yapëtaeyaexanapona Jesús pepacuene Dioso athëbëvetsica pitorobijavatsitsica jivi pecapanepaenexa. Nexata baja judiövi moya ena. Tsipaji acuenebi judiövi: “Jume raja,” pejajava Apolos petsipaebilivaisi yabara.

19

Pacuenia Pablo ponapona Efeso tomarata yabara pelivaisi

¹ Pamatacabi abaxë Apolos ponapona Corinto tomarata, bajarapamat-acabi pijinia Pablo ibotsutonë nacujavaverena najetaruca pepatsinexa Efeso tomaraberena. Efeso tomarata Pablo itsa pata, caxitajaraba cae-jivibeje Jesús pelivaisi pejumecovënëtsivi.

² Nexata Pablo yanijoba bajarapamonaejavabelia.

—¿Espiritu Santo tsabaja pacatsijamatabëjunua pamatacabi ajena pajumecovënëtamé Jesús pelivaisi? jai Pablo.

Nexata bajarapamonae jumaitsi:

—Jume. Apo yapapëtaenë patanetsijamatabëjonejava Espiritu Santo. Apo pavënëtaenë cajena Espiritu Santo ata, jai bajarapamonae Pablojavabelia.

³ Nexata Pablo jumaitsi:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamonae jumaitsi:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamonae.

⁴ Pablo nexata jumaitsi bajarapamonaejavabelia:

—Juanpijinë raja bautisabapona pamonaé baja copaba pibisiacuene pexanaejava, pamonaé baja najamatabëcuenepënëyorota Diosojavabelia. Itsiata baitsi jane Juanpijinë jumai tsaponae jivijavabelia: “Panamatavenoname panejumecovënëtsinexa ponë xanë tacovëverena patsiana, baitsi Jesús. Bajaraponë Cristo, ponë Dioso itorobica,” jai tsaponae Juanpijinë jivijavabelia, jai Pablo bajarapamonaejavabelia.

⁵ Bajarapamonae itsa jumecovënëta Jesús pelivaisi, nexata Pablo bautisaba bajarapamonae petuxanenë Jesús pevënëta.

⁶ Nexata Pablo pevajëtsijavata Diosojavabelia, tsmatanacobebuata bajarapamonae. Nexata bajarapamonae Espiritu Santo tsijamatabëjunuatsi. Nexata bajarapamonae itsa cuaicuajai, ajumeitothia pecuaicuajaijava. Tsipaji itsaviriajumenëta, apo penatsipaebijumenëmi, cuaicuajai. Bajaraxuacujinae jane baja bajarapamonae Dioso pitorobilivaisi tsipaebapona jivijavabelia.

⁷ Daxita meta bajarapamonae bejamatabëcuene doce ponëbeje.

⁸ Efeso tomarata Pablo acueyabi pajuametobeje ponapona. Nexata Pablo Efeso tomarata, judíovi penacaeuatabiabibota, judíovijavabelia ajumejunavijibia tsipaebabiaba Dioso pitorobilivaisi. Pablo judíovi barēnajumenotabiaba Dioso pijajivi pevetsijavanexa yabara. Bajarapacuenia Pablo barēnajumenotabiaba judíovi pejumecovēnētsinexa Dioso pijajivi pevetsijavanexa.

⁹ Itsamonae itsiata amatabocotaja. Apo jitsipae pejumecovēnētsijava bajarapalivaisi. Bajarapamonae daxitajivi pitabarata pibisiacuenia baracuaicuajai pexanialivaisi, Jesús pelivaisi. Nexata baja Pablo vecuanatsata bajarapamonae apo pejumecovēnētsixae Jesús pelivaisi. Pablo nexata, Jesús pelivaisi pejumecovēnētsivi yajava, pona Tirannovēnēnē pijaescuelabojavabelia, bajarapabota penacaeuatabiabinexa. Bajarapabota nexata Pablo caematacabi canacujitsia pexanialivaisi, Jesús pelivaisi, jivi tsipaebabiaba.

¹⁰ Bajarapacuenia Pablo tsipaebaponapona anijavaiibeje. Nexata daxita Asiavēnē nacuapijivi, judíovi, apo judíovi ata, jumetane petuxanenē Jesús pelivaisi.

¹¹ Dioso yavenonatsi Pablo Dioso pesaēta pinijicuene pexanaejavanē pexanaponaenexa.

¹² Nexata pamonaē toavitanetsi, pijamonae Pablo penaxatabijavanē, pijapañueloxi ata, daxita xuaxi Pablo naperabēcajayaba, tocaponabiaba pivitanevi peperabēcajayabinexa. Nexata pivitanevi bajaraxua itsa tsiperabēbuatatsi, jamatejema baja tsabiabi. Dovathivi peyajavajinavanapaevi ata vecuapitsapabiabatsi.

¹³⁻¹⁴ Itsamonae judíovi tomaranējava najetarubena. Bajarapamonae Jesús pelivaisi apo jumecovēnētsi ata, itsiata dovathi jivivecua capitsapapona. Pa-judíovi bajarapacuenia dovathi jivivecua capitsapapona, siete ponēbeje tsavanapae. Bajarapamonae Escevavēnēnē, sacerdotevi penamatacaitorobinē, ēpexi tsavanapae. Nexata bajarapamonae vēnētane Jesús. Nexata bajarapamonae najumatsi:

—Dovathi jivivecua capitsapaenatsi petuxanenē Jesús pevēnēta, najai.

Nexata jane baja itsa tane dovathi peyajavaponaponaenē, bajarapamonae jumaitsi:

—Dovathi, pacaitavetatsi, ponē Pablo vajunupaebapona, petuxanenē Jesús pevēnēta. Vecuapitsapare baja maponēje, jai Escevavēnēnē pexi dovathi peyajavaponaponaenējavabelia.

¹⁵ Nexata Esceva pexi itsa itaveta dovathi, dovathi jumaitsi mapacueniaje: —Yapētaniji raja Jesús. Yapētaniji Pablo ata. Itsiata paxamē apo pacayapētaetsi. ¿Detsa jane paxamē papamonaemē? jai dovathi.

¹⁶ Nexata bajarajota dovathi peyajavaponaponaenē, tsimaxējirevarenatsi bajarapamonae. Pinijisaēta dovathi peyajavaponaponaenē biatsi. Nexata amoneyabatsi. Pinijicuenia tsaquibabiatsi. Vejumatitcatsi penaxatabijavanēmi. Nexata bajaraponē pijabovecua bajarapamonae yarēcēpeca pebejavatsi. Jumsa nexata rēcēpeca.

¹⁷ Nexata daxita Efeso tomarapijivi, judíovi, apo judíovi ata, vēnēlivaisitane pacuenia dovathi peyajavaponaponaenē exanatsi Esceva pexi. Nexata Efeso tomarapijivi bitso jamatabēcuenenajunaviaca. Nexata daxita bajarapamonae yayiatane Jesús pevēnē.

¹⁸ Nexata ayalbitsaētoxaneto Dioso pejumecovēnētsivi, patapona Pablobanajavaberena. Nexata bajarapamonae daxitajivi pitabarata navecuapaebapona pibisiacuenie pexanabiabijava.

¹⁹ Nexata ayaibitsaëto penajorobicuene peyapëtaevi, capata pijacuyalato-baxutonë, penajorobicuene yabara pecajinavanapaebaxutonë. Pamatacabi bajarapamonae comuaca bajarapabaxutonë, ayamatamota comuaca. Nexata daxita bajarapamonae bajarapacuyalato-baxutonëmi tajuita isotota daxitajivi pitabarata. Petajuitsicujinae itsa namataëjëta petajuitsibaxutonëmi pematamo, xuaba pina cincuenta mil ponëbeje palatanëanë. Bajarapapalatanëanë bitso penamatamotsinëanë.

²⁰ Nexata bajarapacuenia Dioso pitorobilivaisi yacaëjëpaponae baja daxitanacuanëjava. Nexata ayaibitsaëto tsaponae Dioso pejumecovënëtsivi.

²¹ Bajaraxuacujinae Pablo najamatabëxaina peponaenexa Macedonia nacuajava, Acaya nacuajava ata, petaenajetarucanexa Dioso pejumecovënëtsivi. Bajaraxuacujinae ponaejitsia Jerusalén tomarabelia. Pablo nexata jumaitsi:

—Tapatsicujinae Jerusalén tomarabelia, ponaeñajë icatsia Roma tomarabelia ata, jai Pablo.

²² Nexata Pablo itoroba Macedonia nacua yabelia anijanëbeje pijajivitonëbeje, Timoteobeje Erastobeje. Pablo abaxë bajayajebi ponapona Asiavënë nacuata.

Pacuenia picani Pablo Efeso tomarata jamatabëbeyxuabatsi yabara pelivaisi

²³ Pablo itsa ponapona Asiavënë nacuata, Efeso tomarapijivi bitso anaepana Jesús pelivaisi pejumecovënëtsivijavabelia.

²⁴ Efeso tomarapijivi anaepana Pablobanajavabelia Demetrio pejamatabëcueneta. Demetrio platananita templo jumapecataeya exanabiaba, tsiquiriboxi. Saya pecobeta jumapecataeya pexanaediosova, Artemisavënë diosova, pijatemplo jumapecataeya Demetrio exanabiaba bajarapoboxi. Demetrio templo jumapecataeya itsa exanabiaba, bajarapoboxi pebarënacuenebivi bitso ayaicuenia palata barëpitabiaba bajarapoboximatamo.

²⁵ Nexata Demetrio junata pebarënacaetuatsinexa daxita pebarënacuenebabiabivi bajarapoboxi. Junatanua itsamonae ata, pamonaepijinia jumapecataeya pexanaejavanë nacuenebabiaba. Nexata Demetrio jumaitsi bajarapamonaejavabelia:

—Paxamë rabaja payapëtaneme mapacueneye. Jumapecataeya vajaexanabiabijavanë vajacanajetabiabixae, ayaijava palata xainaponatsi.

²⁶ Pataneme rabaja. Pajumetanemenua baja Pablo pejumaitsaponaenajava mapacueniaje: “Jivi raja pecobeta jumapecataeya pexanaenëanë, apo diosovi cajena,” pejaitsaponaenajava. Nexata jivi ayaibitsaëto-xaneto mapatomarapijivije jumecovënëtapona Pablo bajarapacuenia petsipaebaponaenajava. Itsiata apo ëmapatomarapijivije. Daxita Asiavënë nacuapijivi ata jumecovënëtapona.

²⁷ Bajarapacuenia jivi ayaibitsaëto pejumecovënëtaponaenajava apo nacatoxanepanae. Tsipaji jivi apo nacacomuatsi tsipae Artemisavënë diosova pijacuenae vajanacuenebijava. Pinijijamatabëcuene pexanaediosova Artemisa pijatemplo ata, apo yayatae tsipae. Baitsi padiosova daxita Asiavënë nacuapijivi, daxitanacuanëpjiivi ata, pematatabacabëta tonubenabiaba pevajëcabiabinexa bajarapovajavabelia, vereverecaejitsipa. Nexata baja bajarapovajavabelia jivi apo vajëcabiabi tsipae, jai Demetrio templo jumapecataeya tsiquiriboxi pexanabiabivijavabelia.

²⁸ Nexata bajarapamonae itsa jumetane bajarapacuenia Demetrio pejumaitsijava, nexata bitso bajarapamonae anaepana. Pinijijumeta vavajai tsaponae. Jumaitsi:

—¡Pinijjamatabëcuene raja pexainaediosova Artemisa, Efeso tomarapijivitsi vajadiosova! jai tsaponae bajarapamonae.

²⁹ Nexata daxita Efeso tomarapijivi itsa jumetane, bitso anaepana Pablobanajavabelia. Nexata ponëbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponëbeje Macedonia netoapijinëbeje. Daxitajivi vaetabiaya nacobenacaponatsibeje pinijibox-anetojavabelia, itsabelia baja cajena daxita tomarapijivi nacaetuatabiaba.

³⁰ Pablo picani jumaitsi Dioso pejumecovënëtsivijavabelia:

—Xanë najonejitsianë mapaboyalaje taneyanatsinëbeje tayajivicuaicuai-jainexa penacaetuatsivijavabelia, jai.

Itsiata Dioso pejumecovënëtsivi apo tocopatsitsi Pablo penajonenexalia.

³¹ Asiavënë nacuapijivi pevetsivi, Pablo yapëtanetsi. Nexata bajarapamonae asaëya Pablo tonajumeitorobarenatsi penajoneyaniva bajarapaboyabelia pebeyaxuabiyativatsi.

³² Efeso tomarapijivi penacaetuatsijavata, nalivaisijëpaeya apo cuaicuai-jai. Nexata pevavajaijavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tsipaji jivi ayabitsaëtoxaneto apo yapëtae palivaisi yabara nacaetuata.

³³ Nexata Efeso tomarapijivi penacaetuatsijavata, caejiviyobeje judíovi nanacaetuata. Bajarapajudíovi yapëtane palivaisi yabara jivi ayaibitsaëto nacaetuata. Nexata bajarapajudíovi tsipaeba Alejandrovënënjavabelia Alejandro peyapëtaenexa xua yabara jivi ayabitsaëto nacaetuata. Tsipaji Alejandro ata judionë. Nexata Alejandro pevëna judíovi pënatorobajarabiaya itorobatsi daxitajivi pitabarata penucaenexa. Nexata Alejandro nacobeyota jivi pemoyanexa petsipaebinxexa Efeso tomarapijivi pianaepanaeyaniva daxita judíovijavabelia.

³⁴ Itsiata baitsi jane Efeso tomarajivi apo tocopatsi Alejandro pecuaicuai-jainexa. Itsa daxitajivi yapëtane Alejandro judionëcuene, nexata daxita vavajaiya jumai tsaponae anijahorabejecuenia mapacueniaje:

—¡Pinijjamatabëcuene raja pexainaediosova Artemisa, Efeso nacuapijivitsi vajadiosova! jai tsaponae bajarapamonae.

³⁵ Bajaraxuacujinae nexata tomara jane baja pevetsinë daxitajivi moyaexana. Nexata jumeitavetsiaya jumaitsi:

—PaEfeso tomarapijivimë, daxitanacuanëpijivi baja cajena yapëtane vanacatocopatsijava vajeavetsinexa mapatomarataje peecaebo, pinijjamatabëcuene pexainaediosova Artemisa pijatemplobo. Daxitanacuanëpijivi baja cajena yapëtane diosojumapeibotova, Artemisa, athëbëvetsica pejopaejava mapatomarataje.

³⁶ Nexata bajarapadiosojumapeibotova athëbëvetsica pejopaejava yabara, acuenebi itsajivi ata: “Jume,” pejaijava. Nexata pajamatejemamëre. Pëtsa abaxë itsacuene paexaname copiaya panajamatabëxainaenejevamë xani-avaetsia.

³⁷ Mapapebibeje paxamë pacapatameje, apo penacobetoxotsinëbeje templobopijijava. Bibisiacuenia apo baracuaicuaijabejenua vajadiosova Artemisa, jai Efeso tomara pevetsinë Efeso tomarata penacaetuatsivijavabelia.

³⁸ Icatsia tomara pevetsinë jumaitsi bajarapamonaejavabelia:

—Demetriobana itsa jamatabëneconita itsajivi, nexata neconitsi juezmonae pitabarata, jivi peneconitabiabibota. Bajara saya xua juezmonae evetavanapa.

³⁹ Itsa apo paneconitsijitsiamë jivi, saya itsa panacaetuata me itsacuenelivaisiyo yabara, nexata saya rovalia papaebare xaniavaetsia daxitajivi penacaetuatsijavata, pacuenia gobierno nacaitoroba.

⁴⁰ Xaniajanë pacuenia pacatsipaebijitsiatsi. Ajena, mapamatacabitaje, mapacuenia itsa exanaponaejitsipatsije, nacananeconitsiaexanaejitsipa gobierno. Bajarapacuenia nacananeconitsiaexanaejitsipa tsipaji itsacueneneconi itsajivi xainaenejeva, mapacuenia anaeya nacaetuatsije, jai Efeso tomara pevetsinë penacaetuatsivijavabelia.

⁴¹ Itsa baja Efeso tomara pevetsinë najumevereta bajarapacuenia petsipaebijava, itoroba baja daxitajivi penaviabinexa pijabonëjavabelia.

20

Pacuenia Pablo najetaruca Macedonia nacujava, Grecia nacujava ata, yabara pelivaisi

¹ Itsa baja Efeso tomarapijivi jamatabëcaeva pianapanaejava, nexata Pablo junata penacaetuatsinexa daxita Dioso pejumecovënëtsivi. Nexata Pablo muxujioba Dioso pejumecovënëtsivi pevajënaeyabelia pijamatabëcuenesaë tsavanapaenexa Dioso pejumecovënëtsijava. Pablo nexata pexaniacuenia napëjioba bajarapamonae. Bajaraxuacujinae Pablo baja pona Macedonia nacuyabelia.

² Nexata Pablo itsa pata Macedonia nacuyabelia, pexanialivaisi tsipaebanajetaruca Macedonia nacupijivi Dioso pejumecovënëtsivi pevajënaeyabelia pijamatabëcuenesaë tsavanapaenexa Dioso pejumecovënëtsijava. Bajaraxuacujinae icatsia Pablo pata Grecia nacuyabelia.

³ Nexata Grecia nacuata Pablo ponapona acueyabi pajuametobeje. Bajaraxuacujinae picani Pablo barcota naponaejitsia Siria nacuyabelia. Nexata Pablo nayajumetane Siria nacuata judíovi pevajënaeetsijavatsi pebexuabinexatsi. Bajaraxuata Pablo najamatabëxaina icatsia pecovëya penaviatsinexa matatsënëa Macedonia nacujava.

⁴ Pamonae Pablo yanatatsi, mapevënëanëje. Sópater, Berea tomarapijinë. Aristarcobeje pijinia Segundobeje, Tesalónica tomarapijinëbeje. Gayo pijinia Derbe tomarapijinë. Timoteo pijinia Litra tomarapijinë. Tíquicobeje pijinia Trófimobeje, Asiavënë nacupijinëbeje. Bajarapamonae Pablo yanatatsi. Nexata Pablo itsa barëpata Filipos tomarata, xanë Lucasnë, necaxitajaraba.

⁵ Nexata daxita pamonae Pablo yanatatsi, namataxaineya baja ponalia Troas tomarabelia. Nexata paxanëbeje Pablobeje abaxë panacopatajëbeje Filipos tomarata, Macedonia nacuata peecatamarata. Nexata pamonaenamataxaineya baja ponalia, paneevetavanapabeje Troas tomaratalia.

⁶ Nexata paxanëbeje Filipos tomarata barcota pananaropotajëbeje pepuavererecae baja pafiestamatacabi judíovi baxane levadurata matajërëabinejeva pexanaepan. Panaponajëbeje jane baja Troas tomarabelia. Cinco matacabita panapaliajëbeje Troas tomarabelia. Nexata pamonaenaneevetavanapabeje Troas tomaratalia, papëcaxinajëbeje baja. Nexata abaxë Troas tomarata pajinavanapajë siete pamatacabibeje.

Pacuenia Pablo ponapona Troas tomarata yabara pelivaisi

⁷ Troas tomarata domingomatacabi panacaetuatajë daxita Dioso pejumecovënëtsivi yajava, patanajamatabënapitsinexa xua yabara Cristo sivatëpa. Pablo nexata livaisi tsipaeba. Meravia baja pitsijavata Pablo Mileto tomarabelia naropotsijitsia. Bajaraxuata Pablo livaisi tsipaeba meravijebi.

⁸ Panacaetuatajē athēbēabetsia pēnēyatuucubibota. Nexata athēbēyo paira paenayajē, itsajotatsia pitayotsijavanē ayaijava rubena xaniavaetsia pitayotsinexa.

⁹ Nexata pevejēato ventanajavata eca, Euticovēnēnē. Pablo nexata bajayajebi livaisi tsipaeba. Nexata belia pevejēato bitso itamajitsipaneca. Nexata baja majiteca. Pemajitecaenē nexata pevejēato jopareca acueyabi pairabejējavavereca. Nexata pevejēato itsa sivarunarecatsi, petēpaenē baja pitatsi.

¹⁰ Nexata Pablo sivarunareca. Pematabacabēta ecaeya isapita petēpaenē. Nexata Pablo jumaitsi Dioso pejumecovēnētsivijavabelia:

—Pētsa panajamatabēxainame. Asaē rabaja icatsia pevejēato, jai Pablo.

Nexata pevejēato icatsia asaē.

¹¹ Nexata Pablo icatsia caevēa junaya. Pejunaecujinaetsia epatsēnēca jane baja pan. Tsicobetsana jane baja daxita Dioso pejumecovēnētsivi pexaenexa. Pexaecujinae abaxē icatsia Pablo bajayajebi cuaicuajiai. Pecuaicuajainē belia yamatacabibecatsi. Bajaraxuacujinae Pablo jane baja pona Mileto tomarabelia.

¹² Nexata baja pevejēato piasaēnē barēnaviabatsi pijaboyabelia. Barēya bitso bajarapamonae piasaēxae pevejēato petēpaecujinae.

Pacuenia Pablobana naropoba Troas tomarata pepatsinexa Mileto tomarabelia yabara pelivaisi

¹³ Paxanē Pablo paneitoroba barcota menia namataxainaeya patanapon-aenexa Asón tomarabelia. Bajarapacuenia Pablo paneitoroba tsipaji Pablo matatsēnēa najetaruaejitsia pepatsinexa Asón tomarabelia. Nexata Pablo itsa pata Asón tomarata, bajarapatomarata patayapitsinexa.

¹⁴ Nexata jane baja Pablo itsa pata Asón tomarata, Pablo baja nanonorena barco ēnēaberena. Nexata baja panaponajē Mitilene tomarabelia.

¹⁵ Bajaraxuacujinae icatsia Mitilene tomarata pananaropobajē. Nexata meravia pitsijavata panapatajē Quiotomara canacujitsialia peecaetomarabelia. Bajarapatomarata icatsia patananaropobicujinae, meravia icatsia pitsijavata, panapatajē Samos tunaetota peecaetomarabelia. Bajarapatomarata icatsia patananaropobicujinae, panapatajē icatsia Trogilio tomarabelia. Nexata abaxē Trogilio tomarata panacueraevetajē. Nexata icatsia Trogilio tomarata patananaropobicujinae, caematacabicujinae, icatsia panapatajē jane baja Mileto tomarabelia.

¹⁶ Pablo rovia jamatabēxeneta Efesotomara, Asiavēnē nacuata peecaetomara. Tsipaji apo jamatabēponaponae bajayajebi Asiavēnē nacuata. Pablo bepijia jamatabēpata Jerusalén tomarabelia Pentecostésvenē fiestavajēnaeya.

Pacuenia Pablo Mileto tomarata livaisi tsipaeba Efeso tomaraverena pepatsivi, ancianovijavabelia, yabara pelivaisi

¹⁷ Mileto tomaravelia Pablo tonajumeitoroba Efeso tomarapijivi ancianovi pepatsinexarena Mileto tomaraberena.

¹⁸ Nexata baja ancianovi itsa parena Pablojavaberena, Pablo jumaitsi bajarapaancianovijavabelia:

—Paxamē baja cajena payapētaneme mapacueneje. Asiavēnē nacuata tapatsimatacabijavaveliacujinae, Dioso pitorobilivaisi tsipaebaponaponajē Asiavēnē nacuata. Daxitamatacabi tonacuenebajē Dioso pijacuene.

¹⁹ Dioso pijacuene itsa tonacuenebaponaponajē, apo jamatabējumaitsinē: “Xanē bitso ayaijamatabēcuenenēnē,” apo jamatabējanē. Itsa taeyabiabajē

itsamonaē pecopabijava Dioso pejumecovēnētsijavami, bitso sivanueyabi-abajē. Bitso bejiobinēna tsabiabi tsipaji judíovi jamatabēnebeyaxuababiaba.

²⁰ Daxita Dioso pitorobilivaisi pacatsipaebabiabatsi papecajamatábēcueneyavenonaenexa. Caelivaisi ata apo pacavecuacopatsitsi. Pacatsipaebabiabatsi baja cajena daxitajivi pitabarata. Pacatsipaebabiabatsinua baja cajena panijabonējava ata.

²¹ Asaēya tsipaebabiabajē judíovi, apo judíovi ata, daxita bajarapamonaē pecopabinexa pibisiacuene pexanabiabijava penajamatabēcuenepēnēyorotsinexa Diosojavabelia. Bajaraxuacujinae jane baja pejumecovēnētsinexa vajatuxanenē Jesucristo pelivaisi.

²² Mara jotacujinaeje ponaenajē Jerusalén tomarabelia Espiritu Santo taneitorobixae bajarabelia taponaeenexa. Itsiata xaniavaetsia apo yapētaenē pacuenia nexanaejitsia Jerusalén tomarapijivi.

²³ Itsiata caejavayo yapētanjiji. Caetomara canacujitsia Dioso pitorobilivaisi tatsipaebanajetarucaejavata Espiritu Santo nejumai tsabiabi: “Caetiana raja penaneconitsivi pejebabiabibota. Xamē bitso benejiobicuene taename,” nejai tsabiabi Espiritu Santo.

²⁴ Itsiata baitsi jane cajena apo junavinē bajarapacuene yabara. “Belia nebeyaxuabijitsipa,” apo jamatabējanē cajena. Jamatabēveretajē pacuene vajatuxanenē Jesús nitoroba tatonacuenebinexa daxitajivi tatsipaebanajetarucaenexa pexanialivaisi, Dioso vajanacaitaxutotsoniataejava, jai Pablo ancianovijavabelia.

²⁵ Icatsia Pablo jumaitsi ancianovijavabelia:

—Paxamējava naponaponajē patacatsipaebinxexa Dioso pevetsijavanexa daxita pijajivi. Tajēvelia baja cajena yapētanjiji. Apo panetaemē rabaja tsane matavējea.

²⁶ Bajaraxuata ajena baja pacatsipaebatsi. Itsajivi paxamēyajuvēnjivi itsa naxuabiana Diosovecua, apo naxuabi tsane xanē tajamatabēcueneta.

²⁷ Apo naxuabi tsane xanē tajamatabēcueneta tsipaji baja daxita Dioso pitorobilivaisi xaniavaetsia baja cajena pacatsipaebatsi. Caelivaisiyo ata apo pacavecuacopatsitsi, jai Pablo ancianovijavabelia.

²⁸ Icatsia Pablo jumaitsi ancianovijavabelia:

—Xaniavaetsia nayajivitaeya pajinavanapare pibisiacuene paneexanaeyaniva. Pacuenia oveja pexainaevi xaniavaetsia evetavanapa pijaoveja, bajara pijinia pacuenia xaniavaetsia paevetavanapaename daxita pamonaē Dioso pejumecovēnētsivi. Espiritu Santo raja pacaitoroba panetoevetsinexa vajatuxanenē Jesús pijajivi, pamonaē comuata pijanata.

²⁹ Tajēvelia baja cajena yapētanjiji tacovēya penajetarubenaējavanaxa saicayacuenia Dioso pejumelivaisivecua petsipaebivi. Bajarapamonaē najetarubenaena jivi Dioso pejumecovēnētsijava pevereverecaeyaexanaenexa. Pacuenia nevēthē pianaepanaevi verene oveja, bajara jamatabēcueneitsane bajarapamonaē pevereverecaeyaexanaenexa jivi Dioso pejumecovēnētsijavami.

³⁰ Paxamēyajuvēnēvi ata saicayacuenia Dioso pejumelivaisivecua tsipaebaponaena peyamaxēitojorobinexa Dioso pejumecovēnētsivi. Nexata Dioso pejumecovēnētsivi navecuanatsanaena pepēnaponaenexa bajarapamonaē.

³¹ Bajaraxuata xaniavaetsia paevetavanapare Dioso pejumecovēnētsivi. Panajamatabēnapire mapacueneje. Xanē baja cajena acueyabi pavaibeje, caematacabi canacujitsia, meravi yajava, caeto ata apo copatsinē patacaxumuxujibijava bitso patacaasivaxae. Itsajavata tanuejavata ata pacamuxujibabiabatsi, jai Pablo Efeso tomarapijiancianovijavabelia.

³² Icatsia Pablo jumaitsi bajarapamonaejavabelia:

—Tajamonae, nexata baja pacacopatatsi Dioso pecobeyabelia Dioso pepecaevecsinea. Dioso pejumelivaisi nacatsipaeba Dioso vajanacaasiva-
java. Nexata bajarapalivaisi pacajamatabëcueneyavenonaena. Bajarapalivaisi
cajëpatsi pepecajamatabëcueneta asaëyaexanaexa Diosojavabelia. Dioso
pacacapanepaena pacuenia Dioso capanepaena daxita pamonaë Dioso
aneconijibia tane.

³³ Xanë itsa naponaponajë paxamëjavata, apo najamatabëxainanë tanax-
ainaeyabinexa itsanë pijapalata, penaxatabijava ata.

³⁴ Payapëtaneme baja cajena mapacueneye. Tacobeta nacuenebajë tana-
matavenonaëjavaxi tacomuataponaenexa, tayajavaponaponaevi ata tato-
comuatsinea.

³⁵ Pacatsitanacueneitajëtatsi baja cajena pacuenia paxamë ata
bepanacuenebame. Bepayavenonamenua itsamonae bitso bepejiobivi.
Tsipaji baja cajena vajatuxanenë Jesús jumaitsi mapacueniaje: “Xanepana
bitso itsamonaejavabelia vajarajutabiabijava vaxaitsi itsamonae va-
janacarajutabiabijava matatoxenetsia. Tsipaji bitso jamatabëcuenobarëyatsi
itsa rajutatsi itsamonaejavabelia vajanacarajutsijava matatoxenetsia,” jai
raja Jesús, jai Pablo ancianovijavabelia.

³⁶ Itsa baja Pablo najumevereta bajarapacuenia petsipaebijava, Pablo
daxita ancianovi pematatabacabëta barënuca pebarënavajëtsinea Diosojav-
abelia.

³⁷ Bajaraxuacujinae Pablo baja pona. Nexata ancianovi pënueyabatsi.
Nexata Pablo itsa napëjioba ancianovi, yaitaxutonueya vaetabiaya itabarats-
suneponatsi.

³⁸ Bitso ancianovi najamatabëxaina. Tsipaji Pablo jumaitsi:

—Apo panetaemë rabaja tsane matavëjëa, jai.

Bajaraxuacujinae Pablo barcojavabelia peponaejavata, bajarapamonae
pënxuabaliatsi barcojavabelia.

21

Pacuenia Pablo pona Jerusalén tomarabelia yabara pelivaisi

¹ Itsa baja panapëjiobiveretajë ancianovi, panarunarecajë baja barco
ënëabereca. Pananicabaliajë roviaia patapatsinexalia Cos tomarabelia.
Bajaraxuacujinae, meravia pitsijavata, panapatajë abaxë epatua Rodas
tomarata. Bajaraxuacujinae abaxë icatsia panapatajë Pátara tomarabelia.

² Nexata Pátara tomarata icatsia pacaxitajarabajë itsabarco. Bajara-
pabarco ponejitsia Fenicia nacuayabelia. Nexata icatsia bajarapabarcoata
patanaponaenexa, panarunarecajë bajarapamo ënëabereca. Panaponajë
jane baja.

³ Nexata barcoata patanajetarubenaëjavata, pataeyetajë patatsavenononia
Chipretunaeto. Paxenetanajetarubenaë rovia. Paponajë Siria nacuaya-
belia. Nexata baja papatajë Siria nacuayabelia Tiro tomarata. Nexata Tiro
tomarata juteta barcoënëta pecaponaejava.

⁴ Nexata Tiro tomarata pacaxitajarabajë Dioso pejumecovënëtsivi. Ba-
jarapamonaejavata pajinavanapajë siete pamatacabibeje. Bajarapamonae
tajëvelia Espiritu Santo pejamatabëcueneta yapëtaëyaexanatsi Pablo pebejiobi-
aexanaëjavanexatsi Jerusalén tomarata. Nexata bajarapamonae jumaitsi
Pablojavabelia:

—Pëtsa poname Jerusalén tomarabelia, jai picani bajarapamonae.

⁵ Itsiata baja icatsia siete pamatacabibejecujinae panaropobajë. Nexata Tiro tomarapijivi, daxita Dioso pejumecovënëtsivi, pijavajivi yajava, pexi yajava, patapëta naponalia mene itapayabelia patanepëtaenexa pataponaejava. Nexata mene itapatalia, tajetabota, daxita bajarapamonae yajava, panubenajë patamatabacabëta patavajëtsinexa Diosojavabelia.

⁶ Bajaraxuacujinae panapëjibojajë baja daxita Dioso pejumecovënëtsivi. Icatsia baja panarunarecajë barco ënëaberena. Bajarapamonae baja navialia pijabonëjavabelia.

⁷ Tiro tomarata patananaropobicujinae, panapatajë Tolemaida tomarabelia. Bajarapatomarata pabajacobajë Dioso pejumecovënëtsivi. Bajarapamonaejavata panajinavanapajë caematacabi.

⁸ Meravia icatsia pitsijavata panananaropobajë. Panapatajë icatsia Cesarea tomarabelia. Cesarea tomarata patapatsicujinae, panaponajë Felipe pijaboyabelia. Felipe, Dioso pitorobilivaisi jivi petsipaebinë, siete ponëbeje diáconoviyajuvënë. Bajaraponë pijabota panajinavanapajë.

⁹ Felipe xaina cuatro povabeje pexi. Bajarapapetiriavi abaxë apo nacojiobi. Bajarapamonae tsipaebabiaba jivijavabelia Dioso pitorobilivaisi, palivaisi Espiritu Santo pejamatabëcueneta yapëtaeyaexanatsi.

¹⁰ Itsa baja paxainajë anijamatacabianë Felipe pijabota patanapatsicujinae, Judea nacuaverena pata Diosojumepaebinë profeta, Agabovënë.

¹¹ Bajaraponë pata paxanëjavaberenena Felipe pijabota. Nexata Agabo Pablo pijacorrebocoto veepajonotatsi. Bajarapabocotota Agabo nacobecëtabeje. Nataxucëtabeje yajava. Nexata Agabo jumaitsi:

—Espiritu Santo raja nejumaitsi tajëvelia mapacueniaje: “Jerusalén tomarata pejinavanapaevi, judíovi, mapacuenia cëtsianatsi mapacorrebocoto pexainaenëje. Bajaraxuacujinae canajetsianatsi itsanacuapijivi pecobeyabelia, apo judíovijavabelia,” jai raja tajëvelia Espiritu Santo, jai Agabo Pablo yabara.

¹² Nexata itsa pajumetaniji bajarapacuenia Agabo patanetsipaebijava, nexata paxanë, Cesarea tomarapijivi yajava, panacobenaasivanë picani Pablo peponaeyaniva Jerusalén tomarabelia.

¹³ Nexata Pablo panejumaitsi:

—¿Detsa xuajitsia panuame? ¿Panenajamatabëxainae exanaejitsiamë tsaja? Xanë raja evetajë tanecëtsinexa. Evetajë tanebeyaxuabijava ata Jerusalén tomarata vajatuxanenë Jesús pelivaisi yabara, panejai Pablo.

¹⁴ Pasiva atanë tsabiabi, Pablo itsiata apo najamatabëcopatsi peponaejava Jerusalén tomarabelia. Nexata baja belia pacopatajë pataasivatsabiabijava. Pajumaitsinë nexata:

—Pacuenia Dioso tojitsipatsi pexanaenexatsi, beexanaenatsi baja, pajanë.

¹⁵ Caematacabibejecujinae paxaniavaetajë patacobecovëjavaxi. Nexata jane baja panaropobajë Jerusalén tomarabelia.

¹⁶ Itsamonae Dioso pejumecovënëtsivi, Cesarea tomarapijivi, paneyanalia. Bajarapamonae panëbarëpona Mnasónvënë, Chipretunaeto nacuapijinë, pijaboyabelia. Nexata bajaraponë pijabota panajinavanapajë. Bajaraponë copiaya Dioso pejumecovënëtsiviyajuvënë.

Pacuenia Pablo Jerusalén tomarata Santiago barëcuaicuijai yabara pelivaisi

¹⁷ Itsa papatajë Jerusalén tomarabelia, Dioso pejumecovënëtsivi panecopiata jamatabëcuenëbarëyaya.

¹⁸ Nexata meravia pitsijavata Pablo panebarēsivaxaina Santiagojavabelia. Nexata Santiago pijabota naena ancianovi.

¹⁹ Nexata Pablo bajarapamona bajacoba. Pebajacobicujinae Pablo bajarapamonaejavabelia navajunupaeba daxita pacuene Pablo exanapona apo judíovijava ata Dioso peyavenonaexaetsi.

²⁰ Itsa jumetane bajarapacuenia Pablo penavajunupaebijava, nexata Santiago, ancianovi yajava, jamatabēcuenēbarēya. Nexata daxita bajarapamonaē pejumetaxae bajarapacuenē, pexaniajamatābēcuenē rajuta Diosojavabelia. Nexata Santiagobana jumaiti Pablojavabelia:

—Patajabananē, yapētaneme baja cajena mapacuenēje. Judíovi bitso ayabitāetoxaneto, miles pajivibeje Dioso pejumecovēnētsivi. Yapētanemenua baja mapacuenēje. Daxita bajarapajudíovi jumecovēnētsi ata Jesús pelivaisi, itsiata abaxē tsiteca jumecovēnētavanapa Dioso Moiséspijinēta penajumecopatsilivaisi.

²¹ Pajudíovi apo jumecovēnētsi Jesús pelivaisi, xamē netsipaebaponaelivaisi cayabaranajumetsēnētābiaba. Nexata bajarapajudíovi najumetsēnētsiaya jumai tsabiabi Jesús pelivaisi pejumecovēnētsijudíovijavabelia: “Itsa raja Pablo livaisi tsipaebapona judíovijava, itsanacuanējava pejinavanapaevi, Pablo itavetābiaba judíovi pecopatsinexa Dioso Moiséspijinēta penajumecopatsilivaisi pejumecovēnētsijavami. Itavetābiabanua bajarapamonaē pecopabinexa peperabēcaucubijava pexi. Pablo itavetābiabanua bajarapamonaē pecatsitecaeyaniva vajasalinaivi pijacuene,” jai tsabiabi bajarapamonaē najumetsēnētsiaya xamē yabara Jesús pelivaisi pejumecovēnētsijudíovijavabelia, jai Santiagobana Pablojavabelia.

²² Icatsia Santiagobana jumaiti Pablojavabelia:

—¿Detsa nexata vaxaitsi itsanetsi? Itsa raeta judíovi Jesús pelivaisi pejumecovēnētsivi, cavēnēlivaisitane nepatsijava, nacaetuatsiana penabarēcuaicuajainexa xamē yabara.

²³ Nexata daxitajivi pecayapētaenexa nejumecovēnētsijava Dioso Moiséspijinēta penajumecopatsilivaisi, exanaename pacuenia pacaitorobijitsiatsi. Majotaje cuatro ponēbeje paxanēyajuvēnēvi vereta baja pexanaejava pacuenia baja najumecapanepaeya jumaiti Diosojavabelia. Nexata bajarapamonaē ponaejitsia temploboyabelia ofrenda perajutsinexa Diosojavabelia.

²⁴ Nexata naponae name bajarapamonaeta temploboyabelia. Nexata templobota nanajamatābēcuenexaniavaetsianame nīajamatābēcuenesaēnēxa Diosojavabelia. Pacuenia bajarapamonaē najamatābēcuenexaniavaetsijitsia piajamatābēcuenesaēnēxa Diosojavabelia, bajarapacuenia nanajamatābēcuenexaniavaetsianame. Nexata daxita xua bajarapamonaē notsiana templobota ofrenda perajutsinexa Diosojavabelia, ponējavabelia notsiana, bajaraxua xamē daxita cobecovēmatamotsianame. Bajaraxucujinae bajarapamonaē daxitamatanami matacasibianatsi. Bajarapacuenia itsa exanaename, daxita judíovi cayapētaena nejumecovēnētsijava Dioso Moiséspijinēta penajumecopatsilivaisi. Nexata daxita judíovi yapētaena najumetsēnētsiaya pecabaracuacuajai tsabiabijava pajudíovi apo jumecovēnētsi Jesús pelivaisi.

²⁵ Pamonaē apo judíovi, pijasalinaivi apo itavetsitsi daxita pacuene vaxaitsi judíovime vajasalinaivi nacaitaveta. Nexata pamonaē apo judíovi ata, Dioso pejumecovēnētsivi, pataitavetsinexa, caelivaisiyobeje patoyaquinajē cuyalatota. Itsa patoyaquinajē, pajumaitsinē mapacueniaje: “Pecobeta saya

pexanaenēanējavabelia pevi perajutsinexa ofrendacuenia itsa tobia baca oveja ata, pētsa paxaneme bajarapayajuvēnēvi. Pētsa paxaneme peja. Pētsa paxaneme cuibocuetsacaeya pebeyaxuabinē pevi. Papebijivi baja nacojioba, pētsa matayajibatsi itsavajavabelia pijavavecua. Papebijivi pijinia abaxē apo nacojiobi, pētsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pētsa matayajibatsi itsanējavabelia pamonavecua. Papetiriavi pijinia abaxē apo nacojiobi, pētsa matayajibatsi pebijavabelia,” pajanē itsa patoyaquinajē apo judíovijavabelia, jai Santiagobana Pablojavabelia.

Pacuenia Pablo templobota vaetabatsi penaneconitsivi pejebabiabibota peetsinexatsi yabara pelivaisi

²⁶ Santiagobana Pablo pitorobicujinaetsi, meravia pitsijavata, Pablo napona pebijivi cuatro ponēbeje pepēta pacuenia Santiagobana itorobatsi. Pablo nexata najamatabēcuenexaniavaetapona piamamatabēcuenesaēnexa Diosojavabelia cuatro ponēbeje yajava. Bajaraxuacujinae Pablo temploboyalia joneya sacerdotevijavabelia, petsipaebinexa pamatacabi copiarucaejitsia Pablobana penajamatabēcuenē xaniavaetsijava Diosojavabelia. Bajarapamatacabi cuatro ponēbeje Diosojavabelia ofrenda perajutsijavanēnexa templobota notsijitsia. Nexata picani daxita bajaraxua Pablo cobecovēmatamotsijitsia bajaraxua pecanajetsívijavabelia.

²⁷ Nexata siete pamatacabibejecujinae, pamatacabi jane baja Pablo, cuatro ponēbeje yajava, Diosojavabelia ofrenda rajutsijitsia, Pablo templobota tanetsi judíovi, Asiavēnē nacuaverena pepatsivi. Nexata bajarapajudíovi itoroba daxita Jerusalén tomarapíjivi pianaepanaenexa Pablojavabelia. Nexata Jerusalén tomarapíjivi, Asiavēnē nacuaverena pepatsivi yajava, nacobenavaetabatsi Pablo.

²⁸ Nexata bajarapamonae vavajai pinijijumeta. Najumetsēnētsiaya jumaitsi:

—jTajamonae judíovi, naxanitsia! ¡Paneyavenonare! Maponēje daxitanacuanējava livaisi tsipaebanajetaruca daxitanacuanēpijivi vajanacaitoyanexa vaxaitsi manacuapíjivitsije. Itavetaponanua Dioso Moisésíjinēta penajumecopatsilivaisi jivi pejumecovēnētsiyaniva. Itavetaponanua mapatemplobo ataje jivi peyayataeyaniva. Apo judíovi ata Pablo barējoneyabiaba matemploboyarenaje. Nexata baja Dioso tsitaabejetsi mapatemploboje, Dioso pijatemplobo. Nexata baja Pablo nanekonita Diosojavabelia, jai najumetsēnētsiaya judíovi Pablo yabara Asiavēnē nacuaverena pepatsivi.

²⁹ Bajarapacuenia vavajaiya jumaitsi tsipaji baja copiaya bajarapajudíovi Pablo tanetsi pebarēponaponaejaya Jerusalén tomarata apo judíonē, Trófimovēnēnē, Efeso tomarapíjinē. Nexata jamatabēcuenenavēxaniabiaya bajarapamonae jamatabējumaitsi:

—Pablo raeta apo judíonē barējunua mapatemploboyarenaje, jamatabējai Trófimo yabara.

Pablo cajena Trófimo apo barējone temploboyalia.

³⁰ Nexata Asiavēnē nacuaverena pepatsivi, Pablo yabara penajumetsēnētsilivaisi, daxita Jerusalén tomarapíjivi jumetane. Nexata bitso anaepana. Nexata daxita bajarapamonae cujinaejinarana templobojavaverena. Bajarapamonae vaetabatsi Pablo. Robocatsi vayafuabelia temploboēnēvecua. Nexata templobobaupaxanetonē bepíjia vecuabaupaxatabatsi.

³¹ Bajarapamonae picani Pablo jamatabëbeyaxuabatsi. Nexata bajaraepapatota itsamonae tsipaeba vajabitsaë pepo pevetsinë, comandantejavabelia. Tsipaeba pacuenia daxita Jerusalén tomarapijivi bitso anaepanavanapa.

³² Nexata comandante bepijia barëlia pijajivi vajabitsaëvi, vajabitsaëvi pijacapitánvi yajava. Cujinaejina jivi penacaetuatsijavabelia. Nexata judíovi itsa tane comandante vajabitsaëvi pebarëpatsijava, nexata judíovi copaba pebejavatsi Pablo.

³³ Nexata comandante Pablo cujirenatsi. Vaetabiaexanatsi pijajivi. Comandante itoroba pijajivi Pablo pecëtsinexatsi anijacadenamaëtotabeje. Bajaraxuacujinae yanijoba judíovijavabelia.

—¿Detsa maponëje? ¿Detsa xua exana maponëje? jai comandante.

³⁴ Nexata bajarapajivi bitsaëtoxanetonëyajuvënëvi comandantejavabelia najuatsipaebanubena pinijijumeta. Nexata comandante apo jumetae xaniavaetsia bitso jivi pevavajaixae. Nexata comandante itoroba vajabitsaë Pablo pecaponaenexatsi vajabitsaë pijaboyabelia.

³⁵ Pablo capatatsi vajabitsaë pijaboitapata. Vajabitsaë pijabo pepënëvelia xaina beescaleracuenia pexanaejava. Nexata bajarajota Pablo vajabitsaë nacobenayotsiaya cajunáyatsi vajabitsaë pijaboyalia pecajonenexatsi. Tsipaji icatsia bajarajota Pablo jivi bejitsiatsi bitso pianaepanaexae.

³⁶ Jivibitsaëtoxanetonë Pablo barabocabuataponatsi. Vavajai tsabuataponae bajarapamonae.

—¡Pabeyaxuare! jai tsabuataponae Pablo yabara.

Pacuenia Pablo navajunupaeba jivibitsaëtoxanetonëjavabelia yabara pelivaisi

³⁷ Itsa baja Pablo vajabitsaëvi pijaboyalia cajonejitsiatsi, nexata Pablo griegojumeta jumaitsi comandantejavabelia:

—Netocopare tacatsipaebinexa caejumeyo, jai Pablo.

Nexata comandante jumaitsi:

—¿Xamë tsaja natsipaebame griegojume?

³⁸ ¿Xamë tsaja apo Egipto nacuapijinëmë? ¿Xamë tsaja imata jivi apo itorobimë pianaepanaenexa gobiernojavabelia? ¿Xamë tsaja imata penamaxëvanitsivi cuatro mil ponëmoxëto apo barënajetabajiravimë petusato nacuyabelia? jai comandante Pablojavabelia.

³⁹ Nexata Pablo jumaitsi:

—Jume raja. Xanë raja saicaya judíonënë, Tarso tomarapijinënë. Tarso tomara cajena pinijitomara daxita Cilicia nacuata penaetomaranëvecua. Pexaniacuene netoexanare. Netocopare livaisi tatsipaebinexa mapamonaejavabeliaje, jai Pablo.

⁴⁰ Nexata comandante tocopatatsi livaisi petsipaebinexa. Pablo nuca vajabitsaë pijabo pepënëvelia beescaleracuenia pexanaejavajumeta. Pablo nacobeyota jivi pemoyanexa. Nexata baja jivi itsa moya, Pablo navajunupaeba bajarapamonaejavabelia hebreojumeta.

Pablo jumaitsi:

22

¹ —Tajamonae, panenamuxunaevere. Paxamë ata vajanacua paneevetsivi, panenamuxunaevere. Vepacanavajunupaebatsi daxita xua exanjë, jai Pablo hebreojumeta judíovijavabelia.

² Bajarapajudíovi itsa jumetane palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitsi:

³ —Xanë raja judíonënë. Naexanjë Tarso tomarata, Cilicia nacuata peecaetomarata. Itsiata vitsabajë mapatomarataje, Jerusalén tomarata. Pecujarubinë Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata picani jamatabëjumaitsinë tsabiabi: “Daxita tajamatabëcueneta Dioso pejitsipaecuenia tonacuenebianajë,” jamatabëjanë tsabiabi. Bajarapacuenia aeconoxae daxita paxamë ata pajamatabëitsimë tsavanapae, jai Pablo.

⁴ Pablo icatsia jumaitsi:

—Xanë abaxë picani bajayata barajinabiabajë pamonaë jumecovënëta pexanialivaisi, Jesucristo pelivaisi. Pamonaë jumecovënëta Jesús pelivaisi, taicaponajë pebijivi. Taicaponajë petiriavi ata. Jebaponajë bajarapamonaë penaneconitsivi pejebabiabibota. Jitsipajë picani pebeyejebinxatsi daxita bajarapamonaë.

⁵ Sacerdotevi pepo penamatacaitorobinë, daxita judíovitsi vajaancianovi ata, pacatsipaebijitsipa bajarapacuenia, pacuenia baja xaniavaetsia pacanavajunupaebatsi. Tsipaji bajarapamonaëjavabelia vajëtajë tanetsicobeyaquinaenexa cuyalato tatocaponaenexa pamonaë judíovi jinavanapa Damasco tomaratalia. Nexata bajarapajudíovi itsa yoroba bajarapabaxuto, tanetocopatsinexa picani Jesús pelivaisi pejumecovënëtsivi tatacaenexa. Nexata jane baja picani lianë tatacaenexa daxita pexanialivaisi, Jesús pelivaisi, pejumecovënëtsivi, tacapatsinexa picani maberena je Jerusalén tomaraberena penaneconitsiaexanaenexatsi, jai tsanuaë Pablo judíovijavabelia.

Pacuenia Pablo navajunupaëba pacuenia taxuxuaba Jesús pelivaisi pejumecovënëtsijava yabara pelivaisi
(Hch 9.1-19; 26.12-18)

⁶ Pablo icatsia jumaitsi hebreojumeta judíovijavabelia:

—Nexata jane baja ponajë Damasco tomarabelia. Itsa baja imoxoyotana-jetarucajë Damasco tomara, jemata matonejeepatota pinijicotia nematatoy-orotsia naitayota athëbëvetsica.

⁷ Nexata bajarajota irataëya bocajunuajë irata. Jumetaenucajë athëbëvetsica tanejumaitsijava: “Saulo, Saulo, ¿detsa xuajitsia xanë tajajivi netobejiobiaexanaponame?” tanejaijava.

⁸ Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne, Nazaret tomarapijinënë. Xanë raja tajajivi netobejiobiaexanaponame,” nejai.

⁹ Papebijivi yajavanajetarucajë, tane baja cajena athëbëvetsica penaitayotsicotia. Itsiata baitsi jane apo jumetaë xua yabara nebarëcuaiuaijai athëbëvetsica.

¹⁰ Nexata xanë jumaitsinë: “Tajatuxanenë, ¿detsa xua nexata exanaenajë?” janë. Nexata pepo petuxanenë nejumaitsi: “Nonotapunare baja. Ponaëname baja Damasco tomarabelia. Bajarajotalia catsipaebiana pacuenia exanaëjitsiamë,” nejai.

¹¹ Nexata bajarapacotia tataecujinaë bitso nitaxutomeraviba. Apo necaëjêpae tataëjava. Nexata saya tayajavaponaëvi necomacaponalia Damasco tomarabelia, jai Pablo judíovijavabelia:

¹² Icatsia Pablo jumaitsi judíovijavabelia:

—Bajarajota Damasco tomarata ponapona Ananíasvënënë, bitso pejumecovënëtsinë Dioso Moiséspijinëta penajumecopatsilivaisi. Bajaraponë Ananías yabara daxita judíovi, Damasco tomarapijivi, jumai tsabiabi: “Bitso raja Dioso pejumecovënëtsinë Ananías,” jai tsabiabi.

13 Nexata bajaraponë Ananías xanëjavaberena patajopa tanetaenexa. Nexata nejumai tsanucae: “Tajabananë Saulo, icatsia rabaja itaxutoxanepaname,” nejai. Bajarapacuenia tanejumaitsijavata icatsia baja itaxutoxanepanjë. Nexata baja taniji Ananías.

14 Nexata icatsia Ananías nejumaitsi: “Vamojivimi rabaja pijaDioso caitapeta. Caitapeta baja neyapëtaenexa pacuenia catojitsipa netoexanaenexa. Caitapetanua netaenexa Dioso pitabarata Jesús pepo planeconijibinë. Caitapetanua nejumetaenexa Jesús pecatsipaebilivaisi.

15 Nexata ponaename daxitanacuanëpijivijavabelia netsipaebanajetarucenaenexa pacuenia taneme, pacuenia ata jumetaneme Jesús pelivaisi.

16 ¿Detsa nexata xuajitsia abaxë najamatabëjematsia ponaponame? Nonotapunare. Cabautisabiana. Jesúsjavabelia nenajamatabëcuenecopatsixae, daxita pibisiacuene nexanaeconimi cavecuajibiaexanaena,” nejai Ananías, jai Pablo judíovijavabelia.

Pacuenia Pablo itorobatsi Dioso pitorobilivaisi petsipaebaponaenexa apo judíovijava yabara pelivaisi

17 Pablo icatsia jumaitsi hebreojumeta judíovijavabelia:

—Bajaraxuacujinae Damasco tomaraverena naviarenajë baja Jerusalén tomaraberena. Nexata itsa patajë Jerusalén tomarata, ponajë templobojavabelia tavajëtsinexa Diosojavabelia templobota. Nexata tavajëtsijavata Diosojavabelia, taniji bemajitsinaebota pepo petuxanenë Jesús.

18 Nexata Jesús nejumaitsi: “Naxanitsiayo bepijia vecuaponare Jerusaléntomara. Tspaji raja mapatomarapijivije apo cajumecovënëtsi tsane netsipaebijava xanë talivaisi,” nejai Jesús bemajitsinaebota.

19 Nexata xanë jumaitsinë: “Tajatuxanenë, bajarapamonae judíovi xaniavaetsia baja cajena neyapëtane. Bajarapamonae neyapëtane judíovi penacaetuatabibonëjava tataicaponaejava daxita pamonae cajumecovënëta taconibabeyabiabinexa naebota.

20 Bajarapamonae neyapëtane xanë ata bajarapamonae jamatabëcuenejëpaeya tataenucaejava pamatacabi Estebanpijinë, pecalivaisipaebinëmi, beyaxuabatsi. Bajarapamatacabi, pamonae Estebanpijinë beyaxuabatsi, penajumajonejebijavanë tovetanucajë,” janë pepo petuxanenë Jesúsjavabelia.

21 Nexata pepo petuxanenë nejumaitsi: “Ponare baja Jerusalén tomaravecu. Caitorobijitsiatsi raja itsanacuanëpijivijavabelia, apo judíovijavabelia,” nejai pepo petuxanenë, jai Pablo judíovijavabelia.

Pacuenia Pablo exanatsi vajabitsaë pepo pevetsinë comandante yabara pelivaisi

22 Judíovi namuxunaevetatsi Pablo penavajunupaebijava. Nexata itsa jumetane judíovi pacuenia Pablo navajunupaeba, nexata icatsia judíovi vavajai tsaponae pinijijumeta. Jumai tsaponae:

—¡Maponëje pabeyaxuare! ¡Mara pitsinë apo becopatsitsi peponaponenexa matavëjëaje! jai tsaponae judíovi Pablo yabara.

23 Bajarapamonae pinijijumeta vavajai tsaponae. Pijacamisajumavelia penaxatabijavanë, vebabia bitso pianaepanaexae. Atsabenonë cayajabaraabena Pablojavaberena pebaraanaepanaexaetsi.

24 Nexata vajabitsaë pepo pevetsinë, comandante, pijajivi itoroba Pablo pecajonenexatsi vajabitsaë pijaboyalía. Comandante itoroba pijajivi Pablo

picani pejumatitibabenexatsi penaconitsivi pejumaconitabiabimacata. Bararapacuenia picani Pablo exanaejitsiatsi Pablo petsipaebinexa vajabitsaëjavabelia xua yabara judíovi neconitsiaya pinijicuenia vavajai tsaponae Pablo yabara.

²⁵ Nexata jane baja Pablo itsa cëtetatsi vajabitsaë picani pejumatitibabenexatsi, nexata Pablo jumaitsi bajarajota penucaenë vajabitsaë pijacapitánjavabelia:

—Xanë raja Romano nacuapijinënë. Nexata itsa panejumaconibabejitsipame abaxë coplaya neneconitsinejeva juezmanae pitabarata, nexata panevemaxënaneconitsipame. Tsipaji nijatuxanenë, Romanonacua pepo pevetsinë, pacaitaveta bajarapacuenia paneexanaeyaniva, jai Pablo vajabitsaë pijacapitánjavabelia.

²⁶ Capitán itsa jumetane bajarapacuenia Pablo pejumaitisijava, nexata capitán lia vajabitsaë pepo pevetsinë comandantejavabelia. Capitán jumaitsi comandantejavabelia:

—Xania baja tsane pacuene exanaejitsiamë Pablojavabelia. ¡Maponëje Pablo Romano nacuapijinë baja cajena! jai capitán comandantejavabelia.

²⁷ Nexata comandante rena Pablojavaberena. Jumaitsi Pablojavabelia:

—¿Xaniajai tsabaja? ¿Xamë Romano nacuapijinëmë? jai comandante.

—Jājā, jai Pablo.

²⁸ Nexata comandante jumaitsi Pablojavabelia:

—Xanë ata baja maparucæje Romano nacuapijinënë naexanjë. Tsipaji baja matamotajë ayaimatamota bepepo Romano nacuapijinënë tanaexanaenexa, jai comandante.

Bajarapacuenia jumaitsi tsipaji comandante saicayanacuata penaexanaenë.

Pablo nexata jumaitsi comandantejavabelia:

—Xanë apo matamotsinë. Tsipaji baja cajena pepo Romano nacuapijinënë. Naexanjë cajena Romano nacuata, jai Pablo comandantejavabelia.

²⁹ Nexata picani pavajabitsaë Pablo jumaconibabejitsiatsi, vecuaponatsi baja. Vajabitsaëvi pepo pevetsinë ata, comandante, Pablo cujunavatsi itsa yapëtanetsi Pablo Romano nacuapijinëcuene. Cujunavatsi pecëtsiaexanaexaetsi cadenamaëtonëta.

Pacuenia Pablo navajunupaeba daxita judíovi pevetsivi pitabarata yabara pelivaisi

³⁰ Pablo penavajunupaebicujinae Romano nacuapijinëcuene, meravia pitsijavata, vajabitsaë pepo pevetsinë, comandante, jamatabëyapëtane xaniavaetsia paneconi yabara judíovi neconitsijitsiatsi Pablo. Nexata comandante pijajivi itoroba Pablo pevecuaisinaenexatsi cadenamaëto. Nexata comandante junata sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

23

¹ Pablo naëcota daxita penacaetuatsivi. Nexata Pablo jumaitsi bajarapamonaejavabelia:

—Tajamonae, xaniavaetsia cajena ponaponabiabajë najamatabëcuenebijianaenëjevanë Dioso pitabarata mapamatacabijavaberena ataje, jai Pablo bajarapamonaejavabelia.

² Nexata Ananías, sacerdotevi pepo penamatacaitorobinë, jumaitsi Pablo pimoxoyotanubenaevitsijavabelia:

—Pacuibotsaquibiaxuabare Pablo, jai Ananías, sacerdotevi pepo penamat-
acaitorobinē.

³ Nexata Pablo jumaitsi Ananíasjavabelia:

—¡Dioso rajane juya pepacuene xamē catsaquibiaxuabiana! Xamē
majotaje ecame taneneconitsinexamē. Tsipaji xamē xanē yabara
jamatabēcuenenavēxaniabiaya jamatabējumaitsimē: “Maponēje Pablo
naneconita Diosojavabelia,” jamatabējamē. Nexata xamē nijacuata
naneconitame nijagobiernojavabelia. Tsipaji itorobame mapamonaeje
tanetsaquibiaxuabinexa taaneconijibinē, jai Pablo Ananíasjavabelia.

⁴ Bajarajota penubenaevi jumaitsi Pablojavabelia:

—Xamē raja jumeitavetame Dioso pijajivitonē, sacerdotevi pepo penamat-
acaitorobinē, jai bajarapamonae Pablojavabelia Ananías yabara.

⁵ Nexata Pablo jumaitsi:

—Tajamonae, xanē apo yapētaenē Ananías sacerdotevi pepo penamata-
caitorobinēcuene. Itsa yapētaejitsipajē, apo jumaitsinē tsipae bajarapacue-
nia. Tsipaji Dioso pejumelivaisibaxutota jumaitsi mapacueniaje: “Pētsa
jumeitavetame pecaevetsinē,” jai Dioso pejumelivaisibaxutota, jai Pablo
Ananías yabara.

⁶ Nexata Pablo jamatabēcuenyapētane penacaetuatsivi. Tsipaji penacaetu-
atsivi caelivaisi apo xainae. Jamatabēcuenyapētaneme itsamonae pecatsite-
caejava saduceovi pecujarubicuene. Jamatabēcuenyapētane itsamonae pi-
jinia pecatsitecaejava fariseovi pecujarubicuene. Nexata Pablo pinijjumeta
jumaitsi:

—Tajamonae, xanē raja fariseonēnē. Fariseovi pecujarubicuene jume-
covēnētājē. Taxapijinē baja cajena fariseonē. Tamojivimi ata cajena
fariseovi. Majotaje neneconitsijitsia. Tsipaji jivi petēpaecujinae Dioso icatsia
piasaēyaexanaejavanexa, jumecovēnētājē, jai Pablo.

⁷ Bajarapamonae itsa jumetane bajarapacuenia Pablo pejumaitsiyava,
nexata najumeanaenota fariseovibeje saduceovibeje. Bajarapamonae nex-
ata apo najamatabēcuenejēpae baja. Nexata anaeya bajarajota navecuanat-
sana baja.

⁸ Saduceovi jumeaebabiaba fariseovi pejumecovēnētsilivaisi. Nexata sa-
duceovi jumai tsabiabi:

—Jivi petēpaecujinae, acuenebi icatsia Dioso piasaēyaexanaejava. Ajibi raja
cajena ángelevi. Ajibi raja cajena petēpaeivi ata pejumape, jai tsabiabi sa-
duceovi.

Fariseovi jumecovēnēta jivi petēpaecujinae Dioso icatsia pi-
asaēyaexanaejavanexa. Jumecovēnētanua ángelevi ata pejinavanapaejava.
Jumecovēnētanua petēpaeivi ata pejumape pejinavanapaejava.

⁹ Apo penajamatabēcuenejēpaxae, daxita bajarapamonae bajarajota
pinijjumeta vavajai tsaponae. Nexata pamonae judíovi pecujarubivi,
fariseoviyajuvēnēvi, nonobapuna. Anaeya jumaitsi saduceovijavabelia:

—Itsacune ata cajena pibisiacune apo exanae maponē Pabloje. Xaniajai
meta cajena. Petēpaejivi pejumape tsipaeabatsi. Itsa jume, ángel meta tsipae-
batsi. Paxanē nexata itsacune ata apo paexanaenē tsane Pablojavabelia
Diosojavabelia patananecotsiyanima, jai fariseovi saduceovijavabelia.

¹⁰ Nexata bajarapamonae pinijicuenia nabijataeya najumeanaenotapona.
Nexata vajabitsaē pepo pevetsinē, comandante, belia jamatabējumaitsi:
“Pablo meta baja bajarapamonae beyaxuabianatsi,” jamatabējai. Nexata

comandante junata pijajivi peponaenexa. Pablo baja jutatsi bajarapamonaevecuca. Comandante itoroba pijajivi Pablo pecaponaenexatsi vajabitsaë pijaboyabelia.

11 Nexata bajarapameravi Jesús tsitanaitajëtatsi Pablo. Jesús nuca Pablo pemuxuneneta. Jumaitsi:

—Ajamatabëcuenesaëmëre nevajënaeyabelia. Pacuenia tsipaebame xanë talivaisi majotaje Jerusalén tomarata, bajara icatsia pacuenia tsipaebianame xanë talivaisi Roma tomarata ata, jai Jesús Pablojavabelia.

Pacuenia picani Pablo judíovi jamatabëbeyaxuabatsi yabara pelivaisi

12 Pablo petsitanaitajëtscijinaetsi Jesús, meravia pitsijavata, judíovi nacaeuata. Najamatabëcueneyanaba jane baja picani Pablo pebeyaxuabinexatsi. Nexata picani pebeyaxuabivajënaetsi, bajarapamonae najumecapanepaeya najumaitsi:

—Vaxaitsi apo xae tsanetsi itsacueneyavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaanatsi, najai bajarapamonae.

13 Pamonaë picani Pablo jamatabëbeyaxuabatsi, cuarenta ponëbeje pematatsënëa.

14 Bajaraxuacujinaë bajarapamonae pona sacerdotevi penamatacaitorobivijavabelia. Pona judíovi pijaancianovijavabelia ata. Tsipaji bajarapamonae caejavata nacaetuatenä. Nexata pamonaë cuarenta ponëbeje, pamonaë picani Pablo jamatabëbeyaxuabatsi, jumaitsi sacerdotevi penamatacaitorobivijavabelia, judíovi pijaancianovijavabelia ata:

—Paxanë rajane baja najumecapanepaeya panajumaitsinë: “Vaxaitsi apo xae tsanetsi itsacueneyavayo ata. Matapania baja Pablo beyaxuabianatsi, nabanianatsi,” panajanë.

15 Nexata paxamë sacerdotevi panenamatacaitorobivi, paxamë ata judíovi papijaancianovimë, panacaetuatsianame judíovi pecujarubivi yajava panenabarëcuaiacuajainexa. Nexata daxita paxamë patonajumeitorobianame cuyalatota vajabitsaë pepo pevetsinë, comandantejavabelia. Pavajëtsianame comandantejavabelia papecatocarenanexa Pablo. Pajumaitsimë tsane yamaxëitojorobiaya comandantejavabelia: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” pajamë tsane. Nexata paxanë epatotalia pavajënaeevetsianajë Pablo. Itsa rena, patabeyaxuabinexa patsinejëva maberanaje, jai pamonaë cuarenta ponëbeje, pamonaë picani Pablo jamatabëbeyaxuabatsi.

Nexata sacerdotevi penamatacaitorobivi, judíovi pijaancianovi ata, jejai comandantejavabelia petonajumeitorobinexa Pablo pecarenanexatsi.

16 Itsiata baitsi jane Pablo pematapijiva pexënato jumetane Pablo pevajënaeevetsiapaebijavatsi pebeyaxuabinexatsi picani. Nexata bajaraponë pona vajabitsaë pijaboyabelia. Itsa baja bajaraponë joneya vajabitsaë pijaboyalia, bajarapalivaisi tsipaeba Pablojavabelia.

17 Nexata bajaraxuacujinaë Pablo junata caenë vajabitsaë pijacapitán. Pablo jumaitsi:

—Barëponare mapapevëjëatoje papecanamatacaitorobinë, comandantejavabelia. Itsalivaisiyo xaina petsipaebinexa, jai Pablo.

18 Nexata Pablo piopaxa capitán barëponatsi vajabitsaë pepo pevetsinë, comandantejavabelia. Nexata capitán jumaitsi comandantejavabelia:

—Naneconitsia raja peponaponanë Pablo nejunata. Nexata nitoroba tabarëponaenexa mapapevëjëatoje xamëjavaberena. Tsipaji pina catsipaebijitsia itsalivaisiyo, jai capitán comandantejavabelia.

19 Nexata comandante cobepitatsi pevejëato. Barëliatsi pesaicaeyojavabelia. Comandante nexata jumaiti pevejëatojavabelia:

—¿Detsa pitsilivaisi xainame tanetsipaebinexamë? jai.

20 Nexata pevejëato jumaiti:

—Sacerdotevi penamatacaitorobivibeje, judíovi pijaancianovibeje, najamatabëcueneyanaba pecavajëtsinexa meravia netocalianexa Pablo bajarapamonaevajavelia. Bajarapamonaevajavelia cayamaxëitojorobiaya bajaxuabinoxatsi. “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” cajaiyapaebi bajarapamonaevajavelia.

21 Itsiata pëtsa jumecovënëame bajarapamonaevajavelia. Tsipaji cuarenta ponëbeje pematatsënëa namatayabiaya epatota Pablo vajënaevetsiapaebatsi pebexuabinoxatsi. Bajarapamonaevajavelia daxita najumecapanepaeya najumaiti baja: “Apo xae tsanetsi itsacuenjavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi,” najai baja capanepaeya bajarapamonaevajavelia. Aeconoxae saya bajarapamonaevajavelia Pablo necalijava, jai pevejëato comandantejavavelia.

22 Nexata comandante jumaiti pevejëatojavavelia:

—Pëtsa tsipaebame itsajivi ata tanetsipaebilivaisimë, jai comandante.

Bajaraxuacujinaevajavelia pevejëato baja itorobatsi caevëalia.

Pacuenia Pablo itorobatsi nacuaevetsinë Félixjavavelia yabara pelivaisi

23 Vajabitsaë pepo pevetsinë, comandante, junata anijanëbeje, vajabitsaë pijacapitánbeje. Jumaiti:

—Panaxaniavaetsiaexanarebeje vajabitsaë petaxuta peponaevinexa doscientos ponëmaxëto, setenta pijinia ponëbeje caballojumata peponaevinexa, doscientos pijinia ponëmaxëto becuerereboxanetonë, lanzavënëjavanë, pecaponaevinexa. Panaxaniavaere paneponaenexa Cesarea tomaravelia ajena, mapameravitaje, bejamatabëcuene a las nuevejava.

24 Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaename Pablo nacuaevetsinë Félixjavavelia, jai comandante capitánbejejavavelia.

25 Bajaraxuacujinaevajavelia comandante tsicobeyaquina cuyalatobaxuto pitorobinexa nacuaevetsinë Félixjavavelia. Comandante peyaquinaecuyalatoxutota jumaiti mapacueniajave:

26 “Félix, pecayaiyataenë, nacua nevetsinë. Xanë raja Claudio Lisi-asvënënenë catoyaquinatsi. Cabajacobatsi.

27 Judíovi raja vaetabatsi ponë catoitorobaliatsi, Pablovënënenë. Beyaxuabijitsiatsi picani. Nexata itsa vënëlivaisitaniji Pablo Romano nacupijinëcuene, sivalianë. Tajajivi vajabitsaë taneyavenonaecueneta yacajërëtajë judíovi pecobevecua, ajena baja picani beyaxuabijitsiatsi. Nexata caponaeyaexanajë tajajivi vajabitsaë pijaboyavelia.

28 Bajaraxuacujinaevajavelia sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata, nutsiaexanajë. Bajarapacuenia nutsiaexanajë bajarapamonaevajavelia pitabarata tayapëtaenexa jane baja picani paneconi yabara Pablo judíovi neconitsijitsiatsi.

29 Itsiata baitsi jane Pablo itsacueneneconi ata apo xinaevajavelia, paneconi yabara beyaxuabijitsiatsi, paneconi yabara ata etsijitsiatsi penaneconitsivi

pejebabiabibota. Judíovi saya Pablo neconitsijitsiatsi judíovi pijasalinaivi pijacuene yabara.

³⁰ Nexata itsajivi netsipaeba judíovi namutoepatota Pablo pevajënaevetsiapaebijavatsi pebeyaxuabinexatsi. Bajaraxuata nexata najamatabëxainajë Pablo tacatoitorobinexa xamëjavabelia. Nexata pajudíovi Pablo neconitsijitsiatsi, itorobajë peneconitsinexatsi xamë nitabarata. Bajara masaya daxitajumeyoje,” jai mapacueniaje comandante petoyaquinaebaxutota nacuaevetsinë Félixjavabelia.

³¹ Nexata vajabitsaë exana baja pacuenia itorobatsi comandante. Bajarapameravi vajabitsaë baja Pablo caponaliatsi Antípatris tomarabelia. ³² Nexata meravia pitsijavata bajarapavajabitsaëyajuvënëvi, petaxuta peponaevi, Antípatris tomarata naviabarena baja pijaboyaberena. Pamona caballoyumata peponaevi, pevajënaeyabelia abaxë caponaliatsi Pablo.

³³ Caponaliatsi Cesarea tomarabelia. Nexata Cesarea tomaratalia vajabitsaë rajuta petocaponaecuyalatobaxuto nacuaevetsinë Félixjavabelia. Yajararajutanua Pablo bajaraponë pecobeyabelia.

³⁴ Nexata nacuaevetsinë Félix leba baja petocapatsicuyalatobaxutotsi. Bajaraxuacujinae nacuaevetsinë Félix jumaitsi Pablojavabelia:

—¿Detsa panacuapijinëmë? jai.

Nexata Pablo jumaitsi:

—Xanë raja Cilicia nacuapijinënë, jai.

Nexata yapëtanetsi Pablo Cilicia nacuapijinëcuene.

³⁵ Nexata icatsia nacuaevetsinë Félix jumaitsi Pablojavabelia:

—Cajumetaenatsi abaxë itsa parena judíovi pecaneconitsivinexa, jai nacuaevetsinë Félix.

Bajaraxuacujinae nacuaevetsinë Félix itoroba pijajivi xaniavaetsia pevetsinexatsi Pablo. Nexata Pablo evetatsi Herodespijinë pexanaeyaexanaebota.

24

Pacuenia Pablo navajunupaeba nacuaevetsinë Félix pitabarata yabara pe-livaisi

¹ Pablo Cesarea tomarata penaneconitsiaexanaecujinaetsi, cinco pamatacibibecujinae, Ananías, sacerdotevi pepo penamatacaitorobinë, parena Cesarea tomaraberena. Parena judíovi pijaancianovi yajava, Tértulovënëvi yajava. Tértulo abogadonë, jivi peneconitsicueni peyapëtaenë. Bajaraxuata judíovi junata bajaraponë petocuaicuaijainexatsi nacuaevetsinë Félixjavabelia. Nexata judíovi, Tértulo yajava, nubena nacuaevetsinë Félix pitabarata peneconitsinexatsi jane baja Pablo.

² Itsa caparenatsi Pablo, nexata Tértulo taxuxuaba peneconitsijavatsi Pablo. Tértulo jumaitsi nacuaevetsinë Félixjavabelia mapacueniaje:

—Pecayiyataenë nacua nevetsinë. Xaniavaetsia nevetsixae mapanacujaje, bajayajebi xaniavaetsia pajinavanapajë. Xamë nejamatabëcueneta daxita mapanacuapijicuene, xua abeje picani, xanabiaexanaponame pevajënaeyabelia.

³ Nexata pabarëyanë patanetoexanaejavamë yabara daxita mapanacujavaje. Bajaraxuata pexaniajamatabëcuene pacarajutatsi.

⁴ Caepatoyo saya pacajamatabëitonotatsi. Pexaniacueni panetoexanare. Panenamuxunaevere caejumeyobeje.

⁵ Payapētaniji baja cajena maponėje Pablo bitso piacujirubejenēcuene. Daxitanacuanējava, itsaxuayo judiōvi jinavanapa, itorobapona pianaepanaenexa judiōvi penavecuanatsanaenexa. Mara ponėje Nazaret tomarapijinēmi petsipaebilivaisi pejumecovēnētsivi, penamatacaitorobinėje.

⁶ Mara ponėje Dioso pijatemplobo Jerusalén tomaratalia jamatabēbjiana picani. Tspijai apo judiōvi barējoneya temploboēnēalia. Bajaraxuata pavaetabajē. Nexata pacuenia paneitoroba pajudiōvinē patajalivaisi, jamatabēpabeyaxuabajē picani penaneconitsixae.

⁷ Itsiata baitsi jane itacarajeta vajabitsaē pepo pevetsinē, comandante Lisias, barēpata pijajivi. Pinijisaēta paneyacajērēta Pablo. Nexata comandante Lisias panejumaitsi: “Pajivi jamatabēneconita Pablo, ponae nacuaeavetsinē Félixjavabelia bajaraponē pitabarata peneconitsinexa,” panejai.

⁸ Nexata itsa yanijobianame maponėje Pablo, yapētaename baja daxita pacuenia xaniavaetsia pacatsipaebatsi Pablo pexanaejava yabara, jai Tértulo mapacueniaje nacuaeavetsinē Félixjavabelia.

⁹ Judiōvi bajarajota Tértulo pemuxuneneta penubenaevi ata neconitatsi Pablo. Bajarapajudiōvi jumaitsi nacuaeavetsinē Félixjavabelia:

—Xaniajai rabaja Tértulo. Daxita pacuenia Tértulo cajumaitsi, bajarapacuenia exana Pablo, jai judiōvi nacuaeavetsinējavabelia.

¹⁰ Nacuaeavetsinē Félix nacobeyota juya Pablo pitorobinexatsi Pablo jane baja penavajunupaebinexa nacuaeavetsinē Félix pitabarata. Nexata Pablo jumaitsi nacuaeavetsinē Félixjavabelia:

—Yapētaniji baja cajena xamē bajayajebi mapanacuapijivi nenaneconitsiaexanabiabijava. Bajaraxuata barēyanē tacatsipaebinexa xua exanajē.

¹¹ Nexata taxaniajajumeta catsipaebianatsi. Itsa yanijobijitsipame itsamonaejavabelia ata, nexata catsipaebijitsipa pacuenia aeconoxae catsipaebianatsi. Ajena raja abaxē saya xainajē doce pamatacabibeje tapatsicujinae Jerusalén tomarata. Patajē najamatabēcuene copatsiaya tanavajētsinexa Diosojavabelia templobota.

¹² Bajarapatemplobota judiōvi apo netae tabarēcuai cuaijajava itsajivi ata. Apo netaenua judiōvi penacaeuatabiabibonējava jivi taitorobijava pianaepanaenexa. Apo netaenua tomananējava ata taitorobijava jivi pianaepanaenexa.

¹³ Nexata acuenebi itsajivi ata pejumaitsijava xanē yabara: “Xanē raja pepacuenie taniji xua Pablo exana,” pejajava. Tspijai itsajivi ata apo netae pibisiacuene taexanaejava.

¹⁴ Nexata pacuene yabara catsipaebijitsiatsi, xaniajanē cajena. Patajasalinaivi pijaDioso jumecovēnētsiaponaponajē. Tonacuenebaponaponajē. Pejanajamatabēcueneta Dioso jumecovēnētsiaponaponajē. Baitsi pexanialivaisi, Jesucristo pelivaisi, jumecovēnētsiaponaponajē. Bajara palivaisi yabara judiōvi jumaitsi tsabiabi: “Apo pexaniajailivaisi cajena bajarapalivaisi. Dioso baja cajena apo nacatocopatsi vajajumecovēnētsinexa bajarapalivaisi,” jai tsabiabi judiōvi. Itsiata Jesucristo taneitorobicuenia jumecovēnētsi atanē, Dioso Moiséspijinēta penajumecopatsilivaisi yajava jumecovēnētaaponaponajē. Bajayata Dioso jumepaebivi profetavi peyaquinaelivaisianē ata jumecovēnētajē.

¹⁵ Mapajudíovi nubenaje, jumecovënëta mapacuenia pejumaitsilivaisije: “Dioso icatsia asaëyaexanaena petëpaevimi,” pejailivaisi. Xanë ata bajarapalivaisi jumecovënëtajë. Baitsi daxita pamonaë tëpa, pexaniajamatabëcuenevimi, pibisiajamatabëcuenevimi ata, itsamatacabi icatsia Dioso asaëyaexanaena.

¹⁶ Bajaraxuata bitso jitsipajë xaniavaetsia taponaponaëjava tanajamatabëcuenebijiñanaeyaniva Dioso pitabarata, tanajamatabëcuenebijiñanaeyaniva daxitajivi ata pitabarata, jai Pablo nacuaevetsinë Félixjavabelia.

¹⁷ Icatsia Pablo jumaisi nacuaevetsinë Félixjavabelia:

—Caevaimaxëto baja cajena ajibinë tsarucæ Jerusalén tomaravecua Dioso pitorobilivaisi jivi tatsipaebinea daxitanacuanëjava. Bajaraxuacujinae icatsia naviatajë Jerusalén tomarabelia. Tocapaliajë ofrenda tarajutsinexa bepejiobivi. Patajë picani templobota ofrenda tarajutsinexa Diosojavabelia.

¹⁸ Itsa baja veretajë templobota tanajamatabëcueneñaniavaetsijava Diosojavabelia tajamatabëcuensaënexa, tarajutsinexa picani bajarapaofrenda Diosojavabelia, nexata bajarapaepatota judíovi, Asiavënë nacuapijivi, nexaxitaraba templobota. Nexata nevaetaba tanenaneconitsiaexanaenexa. Itsa nexaxitaraba templobota, apo yajavanucaenë ayailbitsaëto. Daxita templobopijivi yãjiai. Templobopijivi ajumejibia jinavanapa.

¹⁹ Bajara baitsi jane pamonaë judíovi, Asiavënë nacuapijivi, tanetaevi templobota, bepatsirena maberenaë tanenaneconitsinexa jane baja itsa necuene-tane pibisiacuene taexanaëjava.

²⁰ Itsa jume, nexata mapamonaëje, nitabarata penubenaevi, vecæ taitabëta catsipaebi, itsa netane pibisiacuene taexanaëjava pamatacabi nucajë sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata.

²¹ Saya meta caelivaisiyo bajarapamonaë catsipaebiana xanë talivaisi. Tspiji pamatacabi nucajë judíovi pijaancianovi pitabarata, ayaijumeta jumaisinë: “Mapamatacabitaje neneconitsiana. Tspiji jivi petëpaecujinae Dioso icatsia piasaëyaexanaëjavanexa, jumecovënëtajë,” janë. Nexata meta bajarapacuenia tajumaisijava yabara bajarapamonaë jamatabëneneconita xamëjavabelia, jai Pablo nacuaevetsinë Félixjavabelia.

²² Nacuaevetsinë Félix xaniavaetsia yapëtane daxitanacuanëjava jivi pejumecovënëtaponaëjava Jesucristo pelivaisi. Nexata nacuaevetsinë Félix pejumetaecujinae Pablo petsipaebilivaisi, nacuaevetsinë Félix naviabiaexana baja pamonaë picani Pablo neconitsijitsiatsi. Nexata nacuaevetsinë Félix jumaisi Tértulobanajavabelia, Jerusalén tomaraverena pepatsivijavabelia:

—Itsa patsiarena vajabitsaë pepo pevetsinë, comandante Lisias, yapëtaenajë pacuena exanaëjitsianë Pablojavabelia, jai.

²³ Nexata nacuaevetsinë Félix jumaisi vajabitsaë pijacapitánjavabelia:

—Pablo barëevetsianame xaniavaetsia penajetabajiraviyaniva. Itsiata tocopatsianame peponaponaenexa bajarajota pacëtsinejevamë. Tocopat-sianamenua peyapëtaevitsi pesivaxainaenexatsi perajutsinexatsinua penamatavenonaëjavaxi, jai nacuaevetsinë Félix vajabitsaë pijacapitánjavabelia.

²⁴ Bajaraxuacujinae, caematacabibejecujinae, nacuaevetsinë Félix icatsia pata pijava yajava, Drusilavënëva. Drusila judíova. Nexata nacuaevetsinë Félix itoroba pijajivitonë petojunatsinexatsi Pablo. Nexata Pablo itsa pata, Pablo livaisi tsipaeba nacuaevetsinë Félixjavabelia. Pablo tsipaeba jivi penajamatabëcuene copaponaëjava Jesucristo javabelia.

²⁵ Pablo tsipaebanua Dioso pitorobijava jivi pejinavanapaenexa pibisiacuene exanaenejeva Dioso pitabarata. Pablo tsipaebanua jivi xaniavaetsia penavevetsijavanexa pevitota pibisiacuene pexanaeyaniva. Pablo tsipaebanua itsamatacabi Dioso penaneconitsiaexanaejavanexa pibisiacuene pexanaevi. Nexata nacuaevetsinē Félix itsa jumetane bajarapacuenia Pablo petsipaebilivaisi, najunaviaca. Nexata bajarajota nacuaevetsinē Félix jumaitsi Pablojavabelia:

—Pitsapare baja abaxē. Icatsia cajunatsianatsi itsajota cuenesajinajē, jai nacuaevetsinē Félix.

²⁶ Nacuaevetsinē Félix jamatabējumaitsi Pablo yabara:

—Pablo meta nerajutsiana palata tacopatsinexa penaneconitsijavavecua, jamatabējai.

Bajaraxuata Félix anijatōnē pijajivi itorobabiaba Pablo petojunatsinexatsi pebarēcuaiicujainexatsi.

²⁷ Anijavaibeje bajarapacuenia Félix pijajivi itorobabiaba Pablo petojunatabibinexatsi. Belia baja Félix vecuapitsapa nacua pevetsicuene. Nexata juya itsanē, Porcio Festovēnēnē, tocopatatsi bajarapanacua pevetsinexa. Félix baja pitsapae ata, itsiata Félix pejamatabēcueneta Pablo apo tocopatsi pepitsapaenexa penaneconitsijavavecua. Bajarapacuenia Félix exana judiōvi pesivajamatabēcuenē barēyanexatsi.

25

Pacuenia Pablo navajunupaeba pejananacuaevetsinē Festo pitabarata yabara pelivaisi

¹ Festo patajopa Cesarea tomarata pexanaenexatsi nacuaevetsinēnexa. Pepatsicujinae, acueyabi pamatacabibejecujinae, Festo baja pona Cesarea tomaravecua. Pona Jerusalén tomarabelia.

² Nexata Jerusalén tomaratalia sacerdotevi penamatacaitorobivi Pablo neconitatsi pepēya nacuaevetsinē Festojavabelia. Neconitatsinua judiōvi ata, pamonae petuxanevi.

³ Bajarapamonae pinijicuenia vajēta nacuaevetsinē Festojavabelia petocapatsinexatsirena Pablo Jerusalén tomaraberena. Bajarapacuenia vajēta tsipaji baja cajena bajarapamonae najamatabēcuenevereta picani Pablo pebexaxuabiaexanaenexatsi namutoepatota.

⁴ Nexata nacuaevetsinē Festo jumaitsi bajarapamonaejavabelia:

—Pablo raja naneconitsia ponapona Cesarea tomarata. Xanē raja caematcabibejecujinae ponaejitsianē Cesarea tomarabelia.

⁵ Pablo pibisiacuene itsa exana, nexata papecanamatacaitorobivi tapēta naponaeana Cesarea tomarabelia peneconitsinexa Pablo, jai nacuaevetsinē Festo bajarapamonaejavabelia.

⁶ Bajarapacuenia nacuaevetsinē Festo pejumaitsicujinae, nacuaevetsinē Festo abaxē ponapona Jerusalén tomarata ocho pamatacabibeje. Itsa jume, diez meta pamatacabibeje. Bajaraxuacujinae pona jane baja Cesarea tomarabelia. Nexata meravia pitsijavata nacuaevetsinē Festo eca itsajota nacuaevetsinē ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo.

⁷ Pablo itsa joneya, nexata judiōvi, Jerusalén tomaraverena pepatsivi, matatoyorotsia imoxoyotatsi Pablo. Najumetsēnētsiaya neconitatsi beayineconi pexainaenēcuenia. Itsiata baitsi jane xua yabara picani Pablo neconitatsi picani, bajarapamonae apo jumenamatamotsi peneconitsijavatsi.

⁸ Nexata Pablo nayajivijumaitsi peneconitsiyavitsi:

—Itsacuene ata pibisiacuene apo exanaenē. Nexata xanē judiōvi pitorobilivaisijavabelia, templobojavabelia ata, Romanonacua pepo pevetsinējavabelia ata, apo naneconitsinē, jai Pablo nacuaepevetsinē Festojavabelia.

⁹ Nexata nacuaepevetsinē Festo yanijoba Pablojavabelia judiōvi pejamatabēcuenebarēyanexa nacuaepevetsinē Festojavabelia. Nacuaepevetsinē Festo Pablojavabelia jumaitsi mapacueniaje:

—Ĵitsipame tsaja neponaejava Jerusalén tomarabelia bajarajotalia pecaneconitsinexa taitabarata mapacueene yabaraje? jai nacuaepevetsinē Festo Pablojavabelia.

¹⁰ Pablo nexata jumaitsi:

—Nucajē rabaja majotaje xamē nitabarata. Tsipaji nijatuxanenē, Romanonacua pepo pevetsinē, itoroba majotaje peneconitsinexatsi pibisiacuene pexanaevi. Bajaraxuata apo beneitorobimē itsajavabelia taneneconitsinexamē. Itsacuene ata pibisiacuene apo exanaenē judiōvijavabelia. Bajarapacueene xamē xaniavaetsia yapētaneme baja cajena.

¹¹ Itsa pepacueene naneconitsipajē, nexata itsa nebeyaxuabijitsia tajaneconi yabara, nexata apo najamatabēxainaenē tsipae tavecua-panepeaenexa tatēpaejava. Itsiata baitsi jane pacuenia mapamonae neneconitsiajumaitsi, apo xaniajai cajena. Nexata acuenebi itsajivi ata tanecanajetsijava mapamonae pecobeyabeliaje saya aneconijibia tanebeyaxuabinexa. Nexata jane baja xanē cavajētatsi taneitorobinexamē nijatuxanenējavabelia, Romanonacua pepo pevetsinējavabelia, bajaraponē pitabarata taneneconitsinexa, jai Pablo nacuaepevetsinē Festojavabelia.

¹² Nexata nacuaepevetsinē Festo barēcuaicuajai pijajivi, pejamatabēcuene yavenonaevitsi. Bajaraxuacujinae nacuaepevetsinē Festo jumaitsi Pablojavabelia:

—Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacuene itsa exaname. Nexata bajaraponējavabelia ponaname, jai nacuaepevetsinē Festo Pablojavabelia.

Pacuenia Pablo navajunupaeba nacuaepevetsinē Agripajavabelia yabara pe-livaisi

¹³ Pablo pevajētscicujinae nacuaepevetsinē Festojavabelia pitorobinexatsi Romanonacua pepo pevetsinējavabelia, caematacabibejecujinae, nacuaepevetsinē Agripa, pijava Berenicevēnēva yajava, parena Cesarea tomaraberena. Parenabeje pebacabinexabeje nacuaepevetsinē Festo pejanapatsinēxae nacua pevetsinēnexa.

¹⁴ Agripabeje Berenicebeje caematacabibeje ponaponabeje Cesarea tomarata. Nexata nacuaepevetsinē Festo tsipaeba nacuaepevetsinē Agripajavabelia Pablo yabara. Nacuaepevetsinē Festo jumaitsi:

—Majotaje xainajē pebi naneconitsia peponaponanē. Félix abaxē manpanacua itsa evetaje, bajaraponē naneconitsiaexanatsi.

¹⁵ Nexata itsa ponajē Jerusalén tomarabelia, sacerdotevi penamata-caitorobivi, judiōvi pijaancianovinua, neconitatsi Pablo xanējavaberena. Bajarapamonae nevajēta tananeconitsiaexanaenexa Pablo pebeyaxuabinexatsi.

¹⁶ Nexata xanē jumaitsinē bajarapamonaejavabelia: “Romanonacua raja pepo pevetsinē pejamatabēcueneta apo pacopatsinē itsajivi ata pebeyaxuabinexatsi abaxē xaniavaetsia payapētaenejevanē paneconi xaina. Itsajivi

pibisiacuene itsa exana, nexata namatavenona pecuenetaevitsi pitabarata copiaya peneconitsinexatsi. Nexata pajivi naneconita, bajarajota xanepana penayajivicuaicuaijainexa paneconi yabara neconitatsi,” janë bajarapamonaejavabelia, jai nacuaeovetsinë Festo nacuaeovetsinë Agripajavabelia.

17 Icatsia nacuaeovetsinë Festo jumaitsi nacuaeovetsinë Agripajavabelia:

—Nexata bajarapajudíovi maberena pepatsicujinaeje, meravia pitsijavata, copiaya joneyajë taecaenexa itsajota ecabiabajë jivi itsa naneconitsiaexanaejitsianë. Nexata itorobajë tajajivi tanetocapatsinexa Pablo xanëjavaberena. Tspaji jamatabëjumaitsinë: “Pablo meta pibisiacuene pexanaexae, neconitatsi,” jamatabëjanë.

18 Itsiata baitsi jane Pablo itsa pata, peneconitsivitsi apo neconitsitsi pibisiacuene pexanaejava yabara pacuenia picani najamatabëxainajë.

19 Saya judíovi jumeanaenotatsi Pablo Dioso pejumecovënëtsijava yabara. Jumeanaenotatsinua Pablo petsipaebijava Jesús petëpaejava yabara ata. Jesús yabara Pablo jumaitsi: “Jesús raja apo tēpae. Petëpaeujinae baja icatsia Dioso asaëyaexanatsi,” jai Pablo bajarapajudíovijavabelia.

20 Nexata xaniavaetsia apo yapëtaenë pacuenia exanaejitsianë bajara-pacuene yabara. Nexata jumaitsinë Pablojavabelia: “Jitsipame tsaja neponaejava Jerusalén tomarabelia, bajarajotalia icatsia pecaneconitsinexa pamonaecaneconita,” janë picani.

21 Itsiata baitsi jane Pablo nevajëta taitorobinexa picani vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, pibisiacuene itsa exana Pablo. Itsiata abaxë xanë mapatomarataje Pablo naneconitsiaya ponaponaeaxanaxajë. Nexata pamatacabi necuenecaëjēpaena, itorobianajë vajatuxanenëbejejavabelia, jai nacuaeovetsinë Festo nacuaeovetsinë Agripajavabelia.

22 Nexata nacuaeovetsinë Agripa jumaitsi nacuaeovetsinë Festojavabelia:

—Xanë ata jitsipajë tajumetaejava Pablo penavajunupaebijava, jai nacuaeovetsinë Agripa.

Nexata nacuaeovetsinë Festo jumaitsi nacuaeovetsinë Agripajavabelia:

—Meravia rabaja jumetaename Pablo penavajunupaebijava, jai nacuaeovetsinë Festo.

23 Nexata meravia pitsijavata nacuaeovetsinë Agripa pijava Berenicebeje bitso naitabëtabeje. Nexata naponabeje jivi penacaetuatabibiboxanetojavabelia. Pëyanatatsibeje vajabitsaë pepo pevetsivi. Pëyanatatsibeje Cesarea tomarapijipetuxanevi ata. Penacaetuatsiboxanetojavalia barëjoneyabeje. Nexata nacuaeovetsinë Festo pijajivi itoroba petocaponaenexatsirena Pablo.

24 Nexata nacuaeovetsinë Festo jumaitsi nacuaeovetsinë Agripajavabelia, itsamonaejavabelia ata:

—Agripa, nacua neovetsinë, daxita paxamë ata majotaje vajanajuanacaeuatsivi. Pataneme rabaja mapapebi nuca paneitabarataje. Ayaibitsaëto judíovi, Jerusalén tomarapijivi, bajaraponë neconitatsi xanëjavaberena Jerusalén tomaratalia. Bajara icatsia pamonaecapëta naponarena Cesarea tomaraberena. Bajara icatsia pacuenia neconitatsi xanëjavaberena. Bajara-pamonaevavajaiya nejumai tsabiabi: “Pajitsipajë Pablo pebeyaxuabinexatsi,” nejai tsabiabi.

25 Itsiata baitsi jane xanë apo yapëtaenë paneconi yabara beyaxuabijitsiatsi. Maponë nevajëta picani taitorobinexa tajatuxanenëjavabelia, Romanonacua pepo pevetsinëjavabelia, bajaraponë pitabarata peneconitsinexatsi itsa pibisiacuene exana. Bajaraxuata itorobijitsianë Romanonacua pepo pevetsinëjavabelia.

²⁶ Itsiata baitsi jane apo yapëtaenë pacuene yabara toyaquinaejitsianë cuyalatobaxutota tajatuxanenëjavabelia. Bajaraxuata xamë Agripa, nacua nevetšinë, mapamonaë ataje, daxita paxamë paneitabarata Pablo penucaenexa pacatocapatatsi maberenaje. Pacatocapatatsi paneyanijobinexa paneconi yabara naneconita. Nexata meta paneyanijobicujinaë xanë yapëtaenajë paneconi yabara naneconita. Nexata bajarajota yapëtaenajë tajatuxanenëjavabelia tatoyaquinaenexa cuyalatobaxutota paneconi yabara judíovi Pablo neconitsijitsiatsi tajatuxanenëjavabelia.

²⁷ Tsipaji acuenebi taitorobijava maponëje Pablo tajatuxanenëjavabelia toyaquinaenëjevanë cuyalato xaniavaetsia peyapëtaenexa paneconi yabara judíovi neconitsijitsiatsi, jai nacuaevetsinë Festo nacuaevetsinë Agripajavabelia.

26

Pacuenia Pablo navajunupaeba nacuaevetsinë Agripa pitabarata yabara pelivaisi

¹ Nacuaevetsinë Agripa jumaitsi Pablojavabelia:

—Catocopatatsi rabaja nenavajunupaebinexa paneconi yabara judíovi caneconita, jai nacuaevetsinë Agripa Pablojavabelia.

Nexata Pablo yayyataeya bajacoba nacuaevetsinë Agripa. Nexata Pablo jumaitsi nacuaevetsinë Agripajavabelia mapacueniaje:

² —Barëyanë. Tsipaji ajena pamatacabi netocopatame nitabarata tanavajunupaebinexa daxita paneconi yabara judíovi neneconitsijitsia.

³ Aeconoxaeta bitso barëyanë. Tsipaji yapëtaneme xaniavaetsia daxita palivaisi paxainajë pajudíovinë. Yapëtanemenua pajamatabëcuenelivaisi yabara panajumeanaenotabiabajë. Nexata cavajëtatsi ajamatabëcuenesaëya bajayaepato xaniavaetsia tanenamuxunaevetecaenexamë, jai Pablo nacuaevetsinë Agripajavabelia.

Pacuenia Pablo navajunupaeba pacuenia ponapona pamatacabi abaxë apo jumecovënëtsi Jesucristo yabara pelivaisi

⁴ Pablo icatsia jumaitsi nacuaevetsinë Agripajavabelia:

—Daxita judíovi baja cajena neyapëtane pacuenia copiaya ponaponajë bajarapamonaejavata. Bajarapamonae neyapëtane pacuenia ponaponajë patajanacuata tsiquirinëyojavaveliacujinaenë. Neyapëtanenua pacuenia ponaponajë Jerusalén tomarata ata.

⁵ Judíoviyajuvënëvi itsamonaë naexana fariseovi. Nexata bajarapamonae Dioso Moiséspijinëta penajumecopatsilivaisi, bitso jumecovënëtsiajinavanapa itsajudíovivecua. Nexata itsa yanijobijitsipame, daxita judíovi catsipaebijitsipa pacuenia picani pejevaxinëjavaveliacujinaenë catsitecaponaponajë fariseovi pecujarubicuene.

⁶ Bajarapamonae neneconitsijitsia tsipaji baja xanë jumecovënëtajë petëpaevimi itsamatacabi Dioso icatsia piasaëyaexanaejavanexa. Tsipaji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovënëtajë.

⁷ Daxita raja paxanë, Israelpijinëmi pexi doce ponëmibeje papemomoxinë. Pacopiaevetavanapajë Dioso icatsia piasaëyaexanaejavanexa petëpaevimi pacuenia baja cajena tajëvelia Dioso najumecapanepaeya jumaitsi patajasalinaivimijavabelia. Bajaraxuata najamatabëcuenecopatsiaya pavajëtabiabajë Diosojavabelia. Patonacuenebavanapajënu caematacabi canacujitsia, meravi yajava. Agripa, nacua nevetšinë, abaxë

nenamuxunaevere. Dioso icatsia petēpaevimi piasaēyaexanaejavanexa, copiaevetaponaponajē. Bajaraxuata judiōvi neneconitsijitsia.

⁸ Pētsa pajamatabējumaitsimē Dioso yabara: “Dioso raja apo caējēpaetsi petēpaevi icatsia piasaēyaexanaenexa,” pajamatabējamē pētsa, jai Pablo bajarapamonaejavabelia.

Pacuenia Pablo navajunupaeba pētaicaponaejava Jesūs pejumecovēnētsivi pejebinexa penaneconitsivi pejebabiabibota yabara pelivaisi

⁹ Pablo icatsia jumaitsi nacuaevetsinē Agripajavabelia:

—Xanē abaxē Jesūs itsa apo jumecovēnētsinē, jamatabējumaitsinē tsabiabi: “Xanē bejiobiaexanaenajē daxita pamonaē jumecovēnēta Jesūs, Nazaret tomarapijinē, pelivaisi,” jamatabējanē tsabiabi.

¹⁰ Nexata bajarapacuenia exanajē Jerusalén tomarata. Sacerdotevi penamatacaitorobivi taneitorobixae, ayaibitsaēto Jesūs pelivaisi pejumecovēnētsivi jebaponajē penaneconitsivi pejebabiabibota. Itsa bajarapamonae naneconitsiaexanatsi, itsa beyejebatsinua, netsitaxanepana bajarapacuenia pebeyejebijavatsi.

¹¹ Pamonaē Jesūs pelivaisi jumecovēnēta, anijatonē jumaconibabeyaexanabiabajē judiōvi penacaetuatabiabibonējava. Bajarapacuenia picani exanaponajē bajarapamonae pecopabinexa Jesūs pelivaisi pejumecovēnētsijava. Xanē picani cueneitoyanē bajarapamonae. Nexata itsanacuajava penaetomaranējava ata, jaitarutajē Jesūs pelivaisi pejumecovēnētsivi tataicaenexa tajebinexa penaneconitsivi pejebabiabibota, jai Pablo nacuaevetsinē Agripajavabelia.

Pacuenia icatsia Pablo navajunupaeba pacuenia Jesūs pelivaisi jumecovēnēta yabara pelivaisi
(Hch 9.1-19; 22.6-16)

¹² Pablo icatsia jumaitsi nacuaevetsinē Agripajavabelia:

—Bajara picani icatsia pacuenia tataicaenexa Damasco tomarata Jesūs pelivaisi pejumecovēnētsivi, ponajē picani Damasco tomarabelia. Nitoroba sacerdotēvi penamatacaitorobivi. Bajarapamonae pejamatabēcueneta nitoroba tataicaenexa picani Jesūs pelivaisi pejumecovēnētsivi tajebinexa penaneconitsivi pejebabiabibota.

¹³ Agripa, nacua nevetsinē, abaxē nenamuxunaevere. Nexata jane baja ponajē Damasco tomarabelia. Nexata tanajetarucaejavata namutua, taniji matonejeepatota athēbēvetsica pinijicotia tanematatoyorotsianaitayotsijava. Naitayota matocabijijuumetocotia matatoxenetsia. Daxita tayajavaponaevi tayajavanajetarucaejavata, panematatoyorotsia naitayota.

¹⁴ Nexata daxita paxanē irata pabobenajunuajē. Bajarajota irata jumetaenucajē hebreojumeta athēbēvetsica tanejumaitsijava: “Saulo, Saulo, ¿detsa xuajitsia tajajivi netobejiobiaexanaponame? Xamē nijacuata najamatabēcuenebijianaponame,” tanejajava, jumetaenucajē irata.

¹⁵ Nexata xanē jumaitsinē: “Tajatuxanenē, ¿detsa ponēmē?” janē. Nexata icatsia nejumaitsi: “Xanē raja Jesūsne. Xanē raja tajajivi netobejiobiaexanaponame.

¹⁶ Nonotabapunare. Catsitanaitajētatsi raja tacaitapetsinexa tajajivitonēxamē. Xamē nexata tsipaebianame itsajivijavabelia pacuenia aeconoxae netaneme. Tsipaebianamenua pacuenia icatsia catsitanaitajētatsianatsi bexēa itsamatacabijavabelia.

¹⁷ Cacapanepaenatsi raja judíovi pecobevecua pecaitsacueniabiyaniva. Caitorobianatsi apo judíovi pijanacuanëjavabelia. Apo judíovi ata pecobevecua cacapanepaenatsi pecaitsacueniabiyaniva.

¹⁸ Caitorobatsi rabaja netsipaebinexa apo judíovijavabelia pexanilivaisi, xanë talivaisi. Nexata apo judíovi ata najamatabëcuene pënëyorotsiaexanaename Diosojavabelia. Nexata Dioso pexaniajailivaisita apo judíovi ata jamatabëcueneitayotsianatsi piaitaquirijamatabëcuenevecua, dovathi pejamatabëcuene itorobabiabijavatsivecua. Nexata apo judíovi ata talivaisi jumecovënëtsiana. Nexata bajarapamonae pibisiacuene pexanaeconimi, Dioso vecuaajibiaexanaenatsi itsa jumecovënëtsiana talivaisi. Nexata apo judíovi ata pibisiacuene pexanaeconimi, Dioso vecuaajibiaexanaenatsi, pacuenia baja daxita tanejumecovënëtsivi Dioso vecuaajibiaexanatsi pibisiacuene pexanaeconimi,” nejai Jesús mapacueniaje athëbëvetsica, jai Pablo nacuaeavetsinë Agripajavabelia.

Pacuenia Pablo navajunupaeba pacuenia jumecovënëta Jesús pitorobicueniatsi yabara pelivaisi

¹⁹ Icatsia Pablo jumaitsi nacuaeavetsinë Agripajavabelia:

—Agripa, nacua nevetsinë, abaxë nenamuxunaevere. Nexata pacuenia Jesús athëbëvetsica nejumaitsi, jumecovënëtajë baja cajena.

²⁰ Copiata Jesús pelivaisi tsipaebaponajë Damasco tomarapijivijavabelia, Jerusalén tomarapijivijavabelia ata, Judea nacuapijivijavabelia ata. Bajaraxuacujinae icatsia tsipaebaponajë apo judíovijavabelia ata. Nexata itorobajë daxita bajarapamonae pecopabinexa pibisiacuene pexanabiabijava penajamatabëcuene pënëyorotsinexa Diosojavabelia. Nexata itorobajë xaniavaetsia pejinavanapaenexa pibisiacuene pexanaeyaniva. Nexata baja bajarapacuenia itsa jinavanapa, daxitajivi yapëtanetsi pepacueni penajamatabëcuene pënëyorotsijava Diosojavabelia.

²¹ Bajarapalivaisi tatsipaebaponaexae, nevaetaba judíovi pamatacabi ponaponajë templobota. Nevaetaba tanebeyaxuabinexa picani.

²² Itsiata baitsi jane neyajavaponapona Dioso taneyavenonaenexa mapamatacabijavaberena ataje. Bajaraxuata nucajë majotaje tatsipaebinexa Jesús pelivaisi daxitajivijavabelia. Jesús pelivaisi jivi itsa tsipaebabiabajë, tsipaebabiabajë bepejiobivijavabelia, pepo petuxanevijavabelia ata. Nexata daxita bajarapamonae najëpaeya tsipaebabiabajë peyapëtaenexa xua bajayata tajëvelia Diosojumepaebivi profetavi vajunupaeba. Profeta Moiséspijinë ata bajayata tajëvelia vajunupaeba bajaraxua. Pacuenia ata bajayata tajëvelia Diosojumepaebivimi profetavi copiaya jumaitsi, tsipaebabiabajë. Bajayata baja cajena profetavimi Cristo yabara jumaitsi mapacueniaje:

²³ “Pamatacabi Cristo Dioso itorobianicatsi jivi pecapanepaenexa, beyaxuabianatsi. Itsiata baitsi jane pebeyaxuabicujinaetsi Dioso icatsia asaëyaexanaenatsi. Nexata Cristo Dioso itsa asaëyaexanaenatsi petëpaecujinae, namataxainaeasaëyaexanaenatsi daxita petëpaevivecua,” jai bajayata tajëvelia profetavi. Nexata jane baja Cristo Dioso itsa asaëyaexanatsi petëpaecujinae, namataxainaeasaëyaexanatsi daxita petëpaevivecua. Nexata pamona Dioso pepuajumecovënëtsi tēpa, Dioso icatsia cotocaevi asaëyaexanaenatsi petëpaecujinae. Nexata bajarapalivaisi tsipaebaponajë judíovijava, apo judíovijava ata. Daxita bajarapamonae itsa jumecovënëta bajarapalivaisi, pecapanepaenexatsi Diosojavabelia, jai Pablo nacuaeavetsinë Agripajavabelia.

Pacuenia Pablo petsipaebilivaisi pejumetaevitsi, sivanajamatabëxainatsi yabara pelivaisi

²⁴ Pablo penavajunupaebijavata, nacuaevevtsinë Festo jumevabaxuabatsi.

—¡Pablo, xamë raja saya camatajemaba! Camatajemaba bitso nenacujaru-bixae, jai nacuaevevtsinë Festo.

²⁵ Pablo nexata jumaitsi:

—Festo, pecayaiyataenë, nacua nevetsinë. Apo nematajemabi raja xanë. Palivaisi raja pacatsipaebatsi, pepo pexaniajailivaisi.

²⁶ Bajarapalivaisi ajumejunavijibia pacatsipaebatsi tsipaji maponë ecaje, nacua pevetsinë Agripa, xaniavaetsia yapëtane bajarapalivaisi. Agripa xaniavaetsia yapëtane daxita xua Jesús exana. Tsipaji abaxë pamatacabi Jesús ponapona mapanacuataje, daxita xua exana, muetsia apo exanae.

²⁷ Agripa, nacua nevetsinë, xamë baja cajena jumecovënëtamë profetavi bajayata peyaquinaelivaisi. ¿Baja tsabaitsi jane? Cayapëtanetsi baja cajena nejumecovënëtsijava bajarapamonae peyaquinaelivaisi, jai Pablo nacuaevevtsinë Agripajavabelia.

²⁸ Nexata nacuaevevtsinë Agripa jumaitsi Pablojavabelia:

—¿Bepijia tsabaja Jesús pelivaisi jamatabënejumecovënëtsiaexaname? jai nacuaevevtsinë Agripa.

²⁹ Nexata Pablo jumaitsi:

—Vajëtajë Diosojavabelia Jesús pelivaisi bepijia panejumecovënëtsinexa. Itsa jume, beaxayocuenia ata panejumecovënëtsinexa. Daxita paxamë patanejumetaeyenaevimë, jitsipajë panejumecovënëtsijava Jesús pelivaisi. Pacuenia baja xanë jamatabëcueneitsinë, Jesús pelivaisi tajumecovënëtsinë, bajara paxamë ata panejamatabëcueneitsinexa. Itsiata apo pacatojitsipaetsi papecacëbinexa mapitsicadenamaëtonëtaje pacuenia xanë necëtanuta, jai Pablo.

³⁰ Itsa baja Pablo najumevereta bajarapacuenia petsipaebijava, nacuaevevtsinë Festo nonotapuna. Nacuaevevtsinë Agripa ata, pijava Berenice yajava, nonotapuna. Daxita baja penajuanacaetuatsivi ata nonobapuna peponaenexa.

³¹ Pepitsapaecujinaelia bajarapamonae najumaitsi:

—Maponëje Pablo itsacuenë baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara etsijitsiatsi penaneconitsivi pejebabiabibota, najai bajarapamonae Pablo yabara.

³² Nacuaevevtsinë Agripa jumaitsi nacuaevevtsinë Festojavabelia:

—Itsa apo cavajëtsi tsipae nitorobinexa vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, nexata baja picani copatsipatsi pepitsapaenexa penaneconitsivi pejebabiabibovecua, jai nacuaevevtsinë Agripa Pablo yabara.

27

Pacuenia Pablo caponaliatsi Roma tomarabelia yabara pelivaisi

¹ Nacuaevevtsinë Festobana najamatabëcuenevereta baja pitorobinexatsi Pablo Italia nacuyabelia, Romanonacua pepo pevetsinëjavabelia. Nexta Pablo caponaejitsiatsi vajabitsaë pijacapitán, Juliovenënë. Itsamonae naneconitsia pejinavanapaevi, Pablo yajava, caponaejitsiatsi. Ponë Romanonacua pepo pevetsinë, bajaraponë pevënë Augusto. Nexata Augusto

pijavivi vajabitsaë pijacapitánmonaeyajuvënënë Julio. ² Xanë Lucasnë, naponajë Pablota. Adramitio tomaraverena pepatsibarco ënëabereca parunarecajë. Bajarapamo yaëtanajetarucaejitsia manuamene muxubërëa penaetomaranëjava, pepatsinexa Asiavënë nacuayabelia. Payajavaponajëbeje Aristarot, Tesalónica tomarapijinë. Tesalónicatomara eca Macedonia nacuata.

³ Meravia pitsijavata epatua panapatajë Sidón tomarata. Capitán Julio yaiyatanetsi Pablo. Bajaraxuata Sidón tomarata Pablo tocopatatsi penonotajunaenexa barcoënëvecua, penasivaxainaenexa peyapëtaevitsijavabelia, perajutsinexatsinua xua namatavenona Pablo.

⁴ Bajaraxuacujinae icatsia panaropobajë Sidón tomaravecua. Nexata patavajënaeverena jovibo najetaruca. Nexata Chipretunaeto pacujibaliajë bajarapatunaeto muxubërëa patanajetarubenaenexa. Nexata Chipretunaeto patatsavenonenia paxenetanajetarubenajë. Tspijaj bajarapamuxubërëvelia jovibo beyajetayo.

⁵ Cilicia nacuabeje Panfilia nacuabeje canacujitsialia papaliajë. Nexata payaëtajë Mira tomarata. Miratomara eca Licia nacuata.

⁶ Nexata Mira tomarata capitán Julio caxitajaraba barco, Alejandría tomaraverena pepatsimo. Bajarapamo ponaejitsia Italia nacuayabelia. Nexata baja pabarcota pananajetarubenajë, pavecuanonobajunajë. Nexata icatsia capitán Julio panerunaeyaexana Alejandría tomaraverena pepatsibarco ënëabelia.

⁷ Anijamatacabianë bajarapabarcota pananajetarubenajë. Tspijaj beaxayo najetaruca. Pinijicuenecujinae itsiata panajetarubenajë Gnidotomara canacujitsita. Jovibo abaxë tsiteca najetaruca patavajënaeverena. Nexata pamatavaquetajë Cretavënëtunaeto. Panajetarubenajë itsapaitapavelia eca Salmóntomara. Tspijaj bajarapaitapavelia jovibo beyajetayo.

⁸ Piayapëbejecuenia panajetarubenajë manuamene muxubërëa. Nexata papatajë Buenos Puertosvënëjavata, Laseatomara imoxoyojavata.

⁹ Pamatacabianë xanepana menia patanajetarubenaenexa, panevecua-panepapona baja. Nexata baja bitso panetsiayai menia pataponaenexa. Tspijaj bajarapajuametota bitso jovibo ayai tsabiabi. Emarapae ata baja copiajunua. Nexata picani Pablo tsipaeba barcota patanajuaponaevijavabelia.

¹⁰ Pablo picani jumaitis mapacueniaje:

—Xanë raja yapëtaniji nacatsiayai baja bitso menia vajaponaenexa vajavajënaeyabelia. Naxuabijitsipa raeta mapamoje. Naxuabijitsipa raeta mapamoënëtaje pecaponaejava yajava. Vaxaitsi ata meta naxuabijitsipatsi. Nexata abaxë majotaje evetavanapaenatsi emarapae pepanepaejava, jai picani Pablo.

¹¹ Itsiata capitán Julio apo jumecovënëtsi Pablo petsipaebijava. Caranata pacuenia jumaitisibeje barco pexainaenë, barco pecaponaenë ata, capitán Julio jumecovënëta.

¹² Buenos Puertosvënëjavata ayapëbeje barco peruceajava bajayajebi. Nexata acuenebi bajarajota pataevetavanapaenexa emarapae pepanepaejava. Nexata picani daxita bajarapamonae bitso jitsipa patavajënaeyabelia pataponaenexa. Jitsipa picani Cretatunaeto muxubërëa patanajetarubenaenexa, itsa cuenecaëjëpatsi, pepatsinexa picani Fenice tomarata. Bajarapatomarata picani jamatabëyaëta pataevetavanapaenexa emarapae pepanepaejava. Fenicetomara eca Creta tunaetototsotota. Nexata bajarapatotsotota xanepana barco perubenaenexa. Tspijaj bajarapatotsototajava apo joneyabiabi jovibo.

Pacuenia pinijjoviboxaneto barco caponatsi Creta tunaetovecua yabara pelivaisi

13 Itsa pajinavanapajë Buenos Puertosvënëjavata, barco pexainaenë bitso jitsipa peponaenexa pevajënaeyabelia. Nexata bajarapaepatota patacovëverena beaxayo jovibo najetaruca. Nexata bajarapamonae itsa tane bajarapajovibo, jitsipa pevajënaeyabelia peyacaponaenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërea panajetarubenajë.

14 Nexata jemata caepatoyocujinae pinijjoviboxaneto najetaruca Cretatunaeto epatajërëtsiarena barcojavaberena. Bajarapajovibo Nordestevënëjovibo.

15 Bajarapajovibo barco torotaponatsi Cretatunaetovecua. Apo panecaëjëpae barco patamuxufetsinexa jovibo pevajënaevelia. Nexata baja pacopatajë pataneyacaponaenexa jovibo.

16 Paponajë tsiquiritunaetoyo, Claudavënë tunaetoyo, pepënënenia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beyajetayo, pinijcuenia payamaërobobocainajë jera patajutabetsinexa barco ënëabetsina.

17 Bajaraxuacujinae bajarapamonae barco epacëbaponaya pinijbumacaxanetonëta barco pesarasaraëcaeyaniva malatacata. Bajarapamonae junava barco patayayaëyaëcaeyaniva Sirtevënë iratsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae copata baja itsabelia jovibo pona, barco pataneyacaponaenexa jovibota.

18 Meravia abaxë pitsijavata tsiteca pinijjovibo piyajajava. Nexata bajarapamonae barcoënëta pecaponaejavanë, menia yajuvënëpenereca barco pefafanaenexa.

19 Bajaraxuacujinae icatsia meravia pitsijavata bajarapamonae menia penereca barcoënëta pecanacuenebijavanë.

20 Bajayajebi baja cajena apo pataenë matacabipijjuameto, tulupu ata. Tsipaji bajayajebi pinijjovibo, ema yajava, tsifecanuca. Belia pajamatabëjumatsinë: “Apo yapanepaetsi meta baja tsane,” pajamatabëjanë.

21 Pamatacabibeje bajarapacuenë pataniji, bajara pijinia pamatacabibeje apo paxaenë pataxaejava. Nexata Pablo nonotapuna bajarapamonae petuatuajëta. Pablo jumaitsi:

—Itsa paxamë panejumecovënëtsipame pacuenia pacatsipaebatsi, xanepanaejitsipa. Nexata maberena je apo yaponae tsipaetsi Cretatunaetovecua. Apo bejiobitsinua tsipae.

22 Itsiata baitsi jane aeconoxae pëtsa panatsinajamatabëxainame. Itsajivi ata raja paxamëyajuvënëjivi itsiata apo tēpae tsane. Ëbarco rajane baja naxuabiana.

23 Ajena baja cajena, pameravi, netsitanaitajëta ángel, Dioso pitorobinëtsica. BajarapaDioso xanë pijajivitonënë. BajarapaDioso tonacuenebaponaponajë.

24 Nexata ángel nejumaitsi: “Pablo, pëtsa junavame. Itsiata raja apo tēpaemë tsane. Tsipaji raja naitajëtsijitsiamë Romanonacua pepo pevetsinë pitabarata. Xamë raja nejamatabëcueneta Dioso capanepaenatsi petëpaeyaniva daxita pamonaë yajavanajetarucame mapabarcotaje,” nejai ángel.

25 Nexata daxita paxamë panajamatabëcuenesaëre panejamatabëcuenëbjajjavavecua. Najamatabërutajë Diosojavabelia vajanacaca-

panepaenexa Dioso. Yapētaniji Dioso vajanacacapanepaejavanexa pacuenia baja ángel netsipaeba.

²⁶Itsiata baitsi jane cajena jovibo nacayacaponae na itsatunaetojavabelia, jai Pablo.

²⁷Catorce baja pamatacabibeje itsa paxainajë patanaropobicujinae, meravi jovibo toquebiaya paneyacapona Adriavënë manuamenejava. Nexata meravi tuatuajëta barcota penacuenebivi jamatabëjumaitsi:

—Pitapayabelia covë payapataponajë, jamatabëjai.

²⁸Nexata bajarapamonae pemaëtota caëjëta pona xuavajëto mene avajubua irabereca peyapëtaenexa. Nexata treinta y seis pametrobeje xaina mene piavajubuajava irabereca. Bajaraxuacujinae, caepatoyocujinae, icatsia caëjëta. Veintisiete icatsia pametrobeje xaina mene piavajubuajava irabereca.

²⁹Nexata barcota penacuenebivi jamatabëjumaitsi:

—Barco meta payanayaëttojo paenajë ibotojumata, jamatabëjai.

Nexata bajarapamonae barco petabufevetsina, cuatro xuabeje anclavënëjavanë, yamaëya copabareca. Nexata anclavënëjavanë menebëxëpana irabelia itsa vaetaba, barco perucojopaenexa. Bajarapamonae picani bitso jitsipa bepija peyamatacabibijavatsi, penatsivajënae taenajetarubenaenexa.

³⁰Nexata bajarapaepatota bajarapamonae picani bitso jitsipa ëpamonae penonobajunaenexa barcovecua pepanepaenexa. Nexata bajarapamonae penajuaponaevijavabelia yamaxëitojorobiaya jumaitsi:

—Icatsia raja pacopabijitsianëreca itsaanclajavanë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaenexa picani pitapayabelia.

³¹Nexata Pablo itsa tane bajarapamonae jera pexuabijavareca, jumaitsi vajabitsaë pijacapitánjavabelia, capítan pijajivijavabelia ata:

—Mapamonaeje barcota penacuenebivi itsa ponaena mapajerataje, paxamë pavajabitsaëmë panapenetsianame meneta, jai Pablo.

³²Nexata barcota penacuenebivi peponaeyaniva jerata, vajabitsaë caucutaxuaba jera pecëtarutsimaëto. Jera baja nexata pona barcovecua.

³³Ajena baja matabi tsina, Pablo itoroba daxita barcota peponaevi pexaejava pexaenexa. Pablo jumaitsi bajarapamonaejavabelia:

—Catorce baja cajena pamatacabibeje xaniavaetsia apo pamajitsimë. Panexaejava ata apo paxaëmë.

³⁴Bajaraxuata pacaitorobatsi panexaejava panexaenexa, panesaë panexainaenexa panepanepaenexa. Itsiata raja daxita apo paitsacuenemë tsane, jai Pablo bajarapamonaejavabelia.

³⁵Bajarapacuenia Pablo pejumaitsijavata, panbë pita. Panbë yabara Pablo pexaniajamatabëcuene rajuta Diosojavabelia daxita bajarapamonae pitabarata. Bajaraxuacujinae Pablo epatsënëca panbë. Pablo nexata xane pexaejava.

³⁶Daxita nexata bajarajota ajamatabëcuenesaëreca baja. Nexata bajarapamonae ata xane pexaejava.

³⁷Doscientos setenta y seis papajivinëbeje daxitata paponajë bajarapabar-cota.

³⁸Nexata daxita xaniavaetsia penabanicujinae, menia penereca trigoxu sacuanë pefafanaenexa barco.

Pacuenia barco bubuna manuameneta yabara pelivaisi

³⁹ Itsa baja matakabi tsarucaponae, barcota penacuenebivi taeyelia petu-naeto. Itsiata apo yapëtae bajarapatunaeto. Nexata menetotsoto taerulia. Bajarajotalia tajetabo boca. Nexata picani bajarapamonae najamatabëxaina peyaëtsinexa barco bajarapatajetojavabelia.

⁴⁰ Xuanë anclavënëjavanë, yamaëya copabareca, bajaraxuanë irabelia itsa vaetaba, barco patayarucojopaenexa. Bajaraxuanëmi yamaëcaucubapenereca. Sarasaranaeyaexananua barco petabufecajëbanajetarubenaepabeje. Nexata barcoupitsia penucaenaeta velapana upicëtarutsia. Velapana nexata jovibota nayerebajaraba. Barco jane baja imoxoyotanajetaruca tajetabo.

⁴¹ Nexata itacarajeta barco pata itsajota anijamenebeje pesaë namataenetsia patabeje. Barco baja payajumanayaëtajarabajë iratsaubojumata. Nexata bajarajota barcoupi mëthëmëthëcajunua iratsaubojavabelia. Ataja tsanuca. Barco petabufejavavetsina malataca pesaëta tabufesarabajarabatsi.

⁴² Nexata picani vajabitsaë bajarajota beyejebijitsiatsi daxita penaneconitsivi, pevecupanepaeyanivatsi pejuejavata.

⁴³ Itsiata vajabitsaë pijacapidán apo tocopatsi. Tshipaji apo jitsipae Pablo yajava pebeyaxuabijavatsi. Nexata capidán itoroba daxita pamonaë yapëthane pejuejava, copiaya pejuenexa pitapayabelia copiaya pepatsinexa matatsënëabelia.

⁴⁴ Bajaraxuacujinae pamonaë apo yapëtae pejuejava, cotocaevi itoroba tablapanëjumata, barcopanëmijumatanua, pejuenexa. Bajarapacuenia daxita panepa matatsënëabelia.

28

Pacuenia Pablo ponapona Maltavënë tunaetojavata yabara pelivaisi

¹ Itsa baja daxita paxanë xaniavaetsia papanepajë matatsënëabelia, nexata pavënëtaniji bajarapatunaeto. Bajarapatunaeto Malta vënëtunaeto.

² Maltatunaetopijivi bitso paneyavenona. Bajarapamonae pinijiisotoxaneto itajuruteta. Tshipaji bitso ema tsanuca. Nexata bitso cainejeba. Panejunata daxita patanonopaenexa.

³ Nexata Pablo nota petseviiso. Itamataeta bajarapaisoto. Nexata jomo bitso piatanenë, bebula, pitsatabijirava isotojavaverena piatajujavavecu. Nexata Pablo cobesinetsi. Pecobesinijavatatsi tsiteca yajumaruca.

⁴ Maltatunaetopijivi itsa tane Pablo jomo pecobesinerucaejavatsi, nexata najumaitsi bajarapamonae:

—Maraeta ponë jivibenëje. Bajaraxuata manuamene vecuapanepae ata, icatsia Dioso tocopatatsi jomo pesininexatsi. Nexata jivi pebejamatabëcuene, jomo pesinijavatsi peyatëpaenexa, najai Maltatunaetopijivi Pablo yabara.

⁵ Nexata Pablo nacobenënëbiaxuaba jomo pejopaenexa isotojavabelia. Pablo itsiata apo itsacuene.

⁶ Nexata daxita Maltatunaetopijivi jamatabëjumaitsi Pablo yabara:

—Aeconoxae meta Pablo cobeyajinaena. Itsa jume, irata meta petëpaenë jopaena, jamatabëjai.

Nexata bajarapamonae bajayaepato evetanubenaë ata Pablo petaenexatsi jomo pecobesinijavatsi peyaisacuenejava, itsiata Pablo apo itsacuene. Nexata icatsia bajarapamonae itsacuenia najamatabëxaina Pablo yabara. Nexata najumaitsi bajarapamonae:

—jMaraeta papebi diosonëje! najai.

⁷ Maltatunaeto pevetsinē pevēnē Publio. Nexata itsajota panubenajē, imoxoyo bobena Publio pijairanē. Nexata bajaraponē panecopiapita pexaniacuenia. Bajaraponē pijabota panajinavanapajē acueyabi pamatacabibeje.

⁸ Publio paxa avitane tsanucae camata. Romaebanucatsi. Bitso suliabatsi. Nexata Pablo taeyojopalia. Vajēta Diosojavabelia. Bajaraxuacujinae piavitane nē pematabocotojumavereca Pablo nacobebuata. Nexata baja Pablo jamatejemayaexana piavitane nēmi.

⁹ Bajarapacuenē Pablo itsa exana, nexata daxita piavitanevi Maltatunaetopijivi pata Pabljavaberena. Daxita bajarapamonaē ata jamatejemayaexana Pablo.

¹⁰ Maltatunaetopijivi pinijicuenia paneyaiyataeya paneyavenona. Itsa baja icatsia hexēajavabelia itsabarcota panaponajē, nexata Maltatunaetopijivi panerajuta daxita patanamatavenonaējavaxi pataponaejavata.

Pacuenia Pablo pata Roma tomarata yabara pelivaisi

¹¹ Malta vēnētunaetota panajinavanapajē acueyabi pajuametobeje. Bajaraxuacujinae baja icatsia panaponajē barcota. Bajarapabarco patavajēnae pata Alejandría tomaraverena. Bajarapamo Maltatunaetototsotota daxita emarapae ruca. Evetaruca emarapaejuametonē pepanepaejava. Bajarapabarcoupita rucabeje jivi sāya pecobeta jumapecataeya pexanaenēbeje. Cāstorbeje Póluxbeje jumapecataeya jivi pecobeta pexanaenēbeje bediosonēbeje petaenexa.

¹² Bajarapabarcota panaponajē. Nexata jane baja panapatajē Italia nacuyabelia. Panapatajē Siracusa tomarata. Siracusa tomarata abaxē panajinavanapajē acueyabi pamatacabibeje.

¹³ Bajaraxuacujinae icatsia panaropobajē. Paponajē manumene muxubērēa. Nexata icatsia papatajē Regio tomarata. Nexata meravīa pitsijavata patacovēverena pexaniajovibo najetaruca. Nexata bajarapajovibo paneyacaponā patavajēnaeyabelia. Nexata icatsia anijamatacabibejecujinae papatajē Puteoli tomarata.

¹⁴ Puteoli tomarata pacaxitajarabajē Dioso pejumecovēnētsivi. Bajarapamonaē paneasiva caesemana patanajinavanapaenexa bajarapamonaējavata. Bajaraxuacujinae jane baja matatsēnēa paponajē Roma tomarabelia.

¹⁵ Roma tomarapijivi, Dioso pejumecovēnētsivi, patavajēnaelia panevēnlivaisitane patanajetarubenaējava. Nexata bajarapamonaē panecopiājairēna. Nexata penamataxainaebitsaēto panemataenena Foro de Apiovēnējavata. Bajaraxuacujinae icatsia itsabitsaēto panemataenena Tres Tabernasvēnējavatalia. Nexata Pablo itsa tane bajarapamonaē, pexaniajamatabēcuene rajuta Diosojavabelia. Nexata ajamatabēcuenesaēreca Pablo bajarapamonaē petaejavata.

¹⁶ Nexata jane baja papatajē Roma tomarabelia. Nexata Roma tomarata capitán Julio rajuta baja pamonaē naneconitsia capona Cesarea tomaraverena. Rajuta baja penaneconitsivi pejebabiabibo pevetsivi penamatacaitorobinē pecobeyabelia. Itsiata Pablo tocopatatsi saicayabota peponaponaenexa. Caenē vajabitsaēnē evetaponaponatsi Pablo penajetabajiravīyaniva.

Pacuenia Pablo tsipaeba Jesús pelivaisi Roma tomarata yabara pelivaisi

¹⁷ Pablo baja itsa xaina acueyabi pamatacabibeje pepatsicujinae Roma tomarata, tonajumexuaba judiōvi penamatacaitorobivi pepatsinexa Pabljavaberena. Itsa baja nacaetuata judiōvi penamatacaitorobivi, Pablo nexata jumaitsi judiōvi penamatacaitorobivijavabelia:

—Tajamonae, itsacuene apo exanae atanë vajavëna judíovijavabelia, vajasalinaivi pecujarubicuene jumecovënëtsiaponaponae atanë, itsiata vajavëna judíovi nevaetaba Jerusalén tomaratalia. Nexata necanajeta tananeconitsinexa Romano nacuapijivi pecobeyabelia.

¹⁸ Nexata Romano nacuapijivi, jivi penaneconitsicuene pevetsivi, neyani-joba xua yabara vajavëna judíovi neneconita. Nexata baja picani Romano nacuapijivi necopatsijitsia. Tsipaji apo caxitajarabi itsacueneneconi ata taxainaejava, paneconi yabara nebeyaxuabiaexanaejitsia.

¹⁹ Itsiata baitsi jane vajavëna judíovi, pamonaе neneconita, apo jitsipae Romano nacuapijivi tanecopatsinexa. Jitsipa picani tanebeyaxuabinexa. Nexata xanë vajëtajë taneitorobinexa maberenaе Romanonacua pepo pevetsinë pitabarata taneneconitsinexa pibisiacuene itsa exanaјë. Itsiata xanë apo jitsipaenë juya bajarapamonae taneconitsijava tajanacuapijivijavabelia.

²⁰ Bajaraxuata nexata pacajunatatsi patacataenexa patacabarëcuaiucuaijainexanua. Ponë daxita Israel nacuapijivi copiaevetavanapa athëbëvetsica pepatsijavanexatsica, xanë baja yapëtaniji bajaraponë athëbëvetsica pepatsijavatsica. Nexata xanë vajunupaebaponajë bajaraponë athëbëvetsica pepatsijavatsica. Bajaraxuata necobecëtsiaya yamaëya ponaponajë mapacadenamaëtoje, jai Pablo Roma tomarata judíovi penamatacaitorobivijavabelia.

²¹ Nexata judíovi penamatacaitorobivi jumaitsi Pablojavabelia:

—Itsalivaisi ata baja cajena xamë yabara apo panetonajumeitorobi Judea nacuverena. Vajavëna judíovi patsi ata bajaraverena, itsiata apo panetsipaebi pibisiacuene xamë nexanaejava.

²² Itsiata baitsi jane pajitsipajë patanetsipaebinexamë pacuenia Jesús pelivaisi jumecovënëtime. Daxitanacuanëpijivi baja cajena baracuaicuajai tsabiabi bajara papejanapitsapaelivaisi: “Apo pexaniajailivaisi cajena bajarapalivaisi. Dioso cajena apo nacatocopatsi bajarapalivaisi vajajumecovënëtsinexa,” jai tsabiabi daxitanacuanëpijivi, jai judíovi penamatacaitorobivi Pablojavabelia.

²³ Nexata judíovi penamatacaitorobivi caëjëta matacabi icatsia nacaetuatsijitsia pabota Pablo ponapona. Nexata jane baja icatsia itsa nacaetuata, bajarapamonae ayaibitsaëtoxaneto parena pabota Pablo ponapona. Nexata Pablo bajayacunua petaxuxuabicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaejavabelia Dioso pijajivi pevetsijava mapanacuataje. Pablo tsipaebanua bajarapamonaejavabelia pacuenia jumaitsi Dioso Moiséspijinëta penajumecopatsilivaisi Jesús yabara. Pablo tsipaebanua pacuenia jumaitsi Diosojumepaebivi profetavi bajayata peyaquinaelivaisita Jesús yabara. Bajarapacuenia Pablo tsipaeba bajarapamonae pejumecovënëtsinexa Jesús pelivaisi.

²⁴ Itsamonae bajarapamonaeajuvënëvi jumecovënëta baja bajarapacuenia Pablo petsipaebilivaisi. Itsiata itsamonae apo jumecovënëtsi.

²⁵⁻²⁶ Nexata daxita bajarapamonae apo najamatabëcuenejëpae. Nexata bajarapamonae penaviabivajënae Pablo icatsia jumaitsi bajarapamonaejavabelia mapacueniaje:

—Bajayata baja cajena profeta Isaíaspijinë Espíritu Santo pejamatabëcueneta tajëvelia yapëtaeяaxanatsi paxamë apo panejumecovënëtsijavanexa Jesús pelivaisi. Nexata profeta Isaíaspijinë Espíritu Santo itorobatsi petsipaebinexa vajasalinaivimijavabelia mapacueniaje:

Paxamē raja picani pajumetaeyabiabianame palivaisi pacatsipaebabiabi-
ana. Itsiata apo pajumeyapētaemē tsane xua yabara bajarapali-
vaisi pacatsipaebabiabiana. Paxamē raja picani pataeyabiabianame
xua pacatsitaexanabiabiana. Itsiata apo payapētaemē tsane paja-
matabēcuene yabara bajaraxua pacatsitaexanabiabiana,
jai profeta Isaíaspijinē vajasalinaivimijavabelia.

²⁷ Bajarapacuenia jumaitsi profeta Isaíaspijinē tsipaji baja cajena Dioso
tajēvelia jumaitsi paxamē apo panejumecovēnētsijavanexa yabara mapacue-
niaje:

Bajarapamonae ajamatabēcuenetaja tsane. Nexata benamuxuacabiaya
pejinavanapaevi tsane. Benaitaxutotsaquebiaya pejinavanapaevi
tsane. Itsa bajarapacuenia apo itsipae, nexata yapētaejitsipa paja-
matabēcuene yabara tsitaexanatsi xua tane. Jumeyapētaejitsipanua
palivaisi tsipaebatsi. Pejamatabēēthētojavavetsina jumeyapētaejitsipa.
Nexata najamatabēcuene pēnēyorotsipa perujujamatabēcuenevecu.
Nexata xanē jamatabēcuene xanepanaeyaexanaejitsipajē
pibisiacuenevecu,

jai baja cajena Dioso bajayata tajēvelia paxamē apo panejumec-
ovēnētsijavanexa yabara, jai Pablo judíovijavabelia Roma tomarata.

²⁸ Pablo icatsia jumaitsi judíovijavabelia:

—Pajudíovimē, pajumeyapētaema mapalivaisije. Ajena baja mapamata-
cabijavaveliacujinaeje, pevājēnaeyabelia, Dioso jivi pecapanepaelivaisinexa
apo judíovijavabelia ata tsipaebianatsi. Nexata apo judíovi ata xaniavaetsia
namuxunaevetsiana bajarapalivaisi, jai Pablo judíovijavabelia.

²⁹ Itsa baja Pablo najumevereta bajarapacuenia petsipaebijava, nexata
jane baja daxita judíovi naviaba. Nexata bajarapalivaisi yabara bajarapa-
monae namutua nabarēcuaicuaijai tsanajetarubena.

³⁰ Pablo penacovaetsibota anijavaibeje ponapona Roma tomarata. Pablo
matamotapona bo pecovaetsijamatabēcuene. Pablo xaniavaetsia copiap-
itabiaba daxita pamonaē sivaxainabiabatsi.

³¹ Pamonaē Pablo sivaxainabiabatsi, tsipaebabiaba Dioso pijajivi pevetsi-
java mapanacuataje. Tsipaebabiabanua pepo petuxanenē Jesucristo peliv-
aisi. Tsipaebabiaba ajumejunavijibia. Itsajivi ata Pablo apo jumeitavetsitsi
petsipaebabiabilivaisi.

Mapabaxutoje San Pablo toyaquina Roma tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Roma tomarapijivijavabelia, yabara pelivaisi

¹ Xanë Pablonë, Jesucristo pijajivitonënë. Dioso nejunata. Nexata nitoroba apóstolenëxanë tatsipaebaponaenexa jivi pexanialivaisi, Jesucristo pelivaisi, Diosojavabelia pecapanepaelivaisinexatsi.

² Bajayata vajavajënaeya, Dioso bajarapalivaisi tajëvelia yapëtaeyaexana profetavijavabelia. Nexata bajayata Diosojumepaebivi profetavi itsa yaquina Dioso pejumelivaisibaxutonexa, bajarapamonae yaquina pacuenia Dioso tajëvelia yapëtaeyaexanatsi bajarapapexanialivaisi.

³ Bajarapalivaisi vajatuxanenë Jesucristo, Dioso pexënato pelivaisi. Jesucristo itsa naexana mapanacuataje, Davidpijinë pemomoxiyajuvënëvata naexana. Bajaraponë, Davidpijinë, bajayata Israelnacua pepo pevetsinëmi.

⁴ Vajatuxanenë Jesucristo petëpaecujinae, Espiritu Santo icatsia asaëyaexanatsi. Bajarapacuenia piasaëyaexanaexaetsi petëpaecujinae, jivi yapëtanetsi Dioso pexënatoeuene. Yapëtanetsinua piasaënëcuene ata.

⁵ Jesucristo pejamatabëcueneta Dioso paneitoroba saicaya paapóstolevinexanë, Dioso patatonacuenebinexa. Bajarapacuenia Dioso paneitoroba Dioso pejumelivaisi patatsipaebaponaenexa pamonae apo judíovijava, apo judíovi ata pejumecovënëtsinexa Dioso.

⁶ Nexata paxamë ata Roma tomarata panejinavanapaevi pajumecovënëtame baja Dioso. Tsipaji paxamë ata Dioso pacajunata Jesucristo papijajivinxamë.

⁷ Daxita paxamë, Roma tomarata panejinavanapaevi, pacatoyaquinatsi mapabaxutoje. Dioso pacajitsipa. Nexata pacajunata papijajivinxamë. Pacatovajëtatsi vaxa Diosojavabelia, vajatuxanenë Jesucristojavabelia ata, papacaitaxutotsoniataenexa jamatabëcuenexanepanaeya panejinavanapaenexana.

Pacuenia picani Pablo bitso jamatabëtane Roma tomarapijivi yabara pelivaisi

⁸ Namataxainaeya pacatoyaquinarutatsi pacuenia jumaitsinë tsabiabi paxamë yabara Diosojavabelia. Diosojavabelia jumaitsinë tsabiabi mapacueniaje: “Sivajamatabëcuenebarëyanë bitso bajarapamonae Jesucristo pejumecovënëtsixae,” janë tsabiabi Diosojavabelia paxamë yabara. Bajarapacuenia Diosojavabelia jumaitsinë tsabiabi tsipaji daxitanacuanëpijivi pacavajunupaeba xaniavaetsia panejumecovënëtavanapaevaja Dioso.

⁹ Xanë daxita tajamatabëcuenesaëta Dioso pijacune tonacuenebaponajë jivi itsa tsipaebabiabajë pexanialivaisi, Dioso pexënato pelivaisi. Dioso yapëtane patacatovajëtabiabijava itsa pacanajamatabënapitabiabatsi tavajëtsijavata Diosojavabelia.

¹⁰ Vajëtabiabajë Diosojavabelia taponenexa paxamëjavabelia. Nexata Dioso itsa netocopsiansa taponenexa, ponaenajë paxamëjavabelia. Bajayajebi picani bitso jamatabëponabiabajë patacataenexa.

¹¹ Nexata jitsipajë patacataenexa, patacatsipaebinxanua palivaisi Espiritu Santo neyapëtaeyaexana. Bajarapacuenia itsa

pacayapëtaeyaxanaenatsi, pajamatabëcuenesaëmë tsaponae tsane orijibia Diosojavabelia.

¹² Namataenetsia najamatabëcueneyavenonaenatsi Dioso pejumelivaisi vajajumecovënëtsijava. Pacayavenonaenatsi paneajamatabëcuenesaënexa Diosojavabelia. Paxamë ata juya paneyavenonaename bajarapacuenia.

¹³ Tajamonae, pacatojitsipatsi paneyapëtaenexa mapacueneye. Bajayajebi picani bajayajebi jamatabëponabiabajë patacataenexa. Itsiata apo necuenecaëjëpabiabi taponaeenexa. Jitsipajë patacatsipaebinexa Jesucristo pelivaisi paxamëyajuvënëvi, pamonaе abaxë apo jumecovënëtsi, pejumecovënëtsinexa Jesucristo. Pamonaе ata baja jumecovënëta, Jesucristo pijamatabëcuenesaënexa pevajënaeyabelia. Pacuenia apo judíovi ata jumecovënëtapona pevajënaeyabelia itsaxuayo tsipaebanajetarucajë, bajara paneitsinexa paxamë ata.

¹⁴ Dioso nitoroba tatsipaebaponaenexa Dioso pejumelivaisi daxitajivijava. Nexata Dioso pejumelivaisi jivi tsipaebaponajë pinijitomaranëjava, sasavia penaevijava ata. Tsipaebaponajë mapanacuapijilivaisi bitso peyätaevijava ata, apo peyapëtaevijava ata.

¹⁵ Bajaraxuata bitso jitsipajë paxamë, Roma tomarata panejnavanapevi ata, patacatsipaebinexa pexanialivaisi.

Pacuenia pexanialivaisi, Jesucristo pelivaisi, pinijisaë xaina ayaiacuene pexanaenexa yabara pelivaisi

¹⁶ Apo ajumeuranë tsabiabi jivi tatsipaebabiabijava pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Tsipaji bajarapalivaisi pejamatabëcueneta pijaneconi vecuaajibiaexanaenatsi pajivi jumecovënëta bajarapalivaisi. Copiaya patsipaebaponajë bajarapalivaisi judíovi. Bajaraxuacujinae icatsia cotocaevi patsipaebaponajë apo judíovi.

¹⁷ Bajarapalivaisi nacayapëtaeyaxana pacuenia Dioso nacatoexana aneonijibia Dioso vajanacataenexa. Aneonijibia baja Dioso nacatane Jesucristojavabelia vajavajënaeyabelia vajanajamatabëcuene copataponaeaxae. Dioso ra pejumelivaisibaxutota jumaitsi mapacueniaje: “Pajivi jamatabëjumaitsi: ‘Xanë pepacuene Dioso neyavenonaena pacuenia najumecapanepaeya jumaitsi,’ jamatabëjai, bajarapajivi Dioso aneonijibia tanetsi. Bajarapajivi xainaena matababi pevereverecejava,” jai Dioso pejumelivaisibaxutota.

Pacuenia daxitatsi mapanacuapijivitsi naneconitatsi Diosojavabelia yabara pelivaisi

¹⁸ Dioso, athëbëatsia peecaenë, vaxaitsi jamatabëcueneyapëtanetsi. Yapëtanetsi mapacueniaje. Dioso baraanaepanapona daxita pibisiacuene pexanaevijavabelia. Bajarapamonae pevajënaeyabelia pibisiacuene pejamatabëxanaeaxe, apo jitsipae pejumecovënëtsinexa pexaniajailivaisi, Dioso pejumelivaisi.

¹⁹ Bajarapamonae xaniavaetsia beyapëthane picani pacuenia Dioso jamatabëcueneitsi. Tsipaji baja picani Dioso tsitanajamatabëcueneitajëta bajarapamonaejavabelia.

²⁰ Jivi apo caëjëpaetsi pitaxutota petanenexa Dioso. Nexata jivi apo yapëtae pacuenia itsi Dioso. Itsiata baitsi jane picani caëjëpatsi peyapëtaenexa pacuenia Dioso jamatabëcueneitsi. Caëjëpatsi picani peyapëtaenexanua daxitamatabijavabelianexa Dioso bitso piasaëtsaponaponaеjava. Bajaraxua picani jivi caëjëpatsi pijacuata peyapëtaenexa, itsa canaëjëtsipa Dioso pexanaejavanë

mapanacuataje. Nexata bajarapamonae acuenebi pejumaitsinexa: “Apo payapētaenē cajena pacuenia Dioso jamatabēcueneitsi,” pejinexa.

²¹ Bajarapamonae yapētae ata Dioso peponaponaejava, itsiata apo yaiyatae. Caeto ata cajena Diosojavabelia pexaniajamatabēcuene apo ra-
jutsi. “Pexaniacuene rabaja panetoexaname,” apo jai. Biji saya caranata
ēnatsiquejemajava yabara najamatabēxainabiaba. Nexata pevajēnaeyabelia apo
peyapētaexae pexanialivaisi, ajamatabēcueneitaquiri tsaponae.

²² Jamatabēcuenenavēxaniabiaya bajarapamonae jamatabējumai tsabiabi:
“Vaxaitsi cajena bitso vajayapētaevi daxitacuene,” jamatabējai tsabiabi ba-
jarapamonae. Itsiata baitsi jane cajena apo yapētae.

²³ Bajarapamonae apo najamatabēcuenecopabi ayaijamatabēcuenenē
Diosojavabelia, ponē apo petēpaenēnexa daxitamatacabijavabelianexa.
Caranata saya jivi pecobeta jumapecataeya pexanaenēanējavabelia
najamatabēcuenecopaba. Bajarapamonae navajēcabiaba itsamonae
pecobeta jivi jumapecataeya pexanaenēanējavabelia. Navajēcabiabanua
itsamonae pecobeta pepunaevi jumapecataeya pexanaenēanējavabelia
ata. Navajēcabiabanua itsamonae pecobeta jomo jumapecataeya
pexanaenēanējavabelia ata. Navajēcabiabanua itsamonae pecobeta cuatro
pataxutabeje pejinavanapaevi jumapecataeya pexanaenēanējavabelia ata.

²⁴ Bajaraxuata Dioso tocopata bajarapamonae pibisiacuene pexanavana-
paenexa. Nexata pacuenia jamatabēxana, exanavanapa. Nexata bajarapa-
monae pivitota pibisiacuene namataenetsia natoexanabiaba.

²⁵ Bajarapacuenia Dioso tocopata pacuenia bajarapamonae jitsipa pex-
anavanapaenexa tsipaji bajarapamonae Dioso pejumelivaisi, pexaniajaili-
vaisi, apo jamatabējumecovēnētsi. Jumecovēnēta saya caranata pena-
jumetsēnētsilivaisi, jivi pecobeta jumapecataeya pexanaenēanē pelivaisi. Ba-
jarapamonae apo yaiyatae pepo Dioso, ponē daxitacuene exana mapanacu-
ataje. Caranata yaiyataeya navajēcabiaba Dioso pecobecovējavanejavabelia.
Najamatabēcuenecopabanua ēbajaraxuanējavabelia. Bajarapamonae nexata
saya namuxujemata caranata pepo Dioso, ponējavabelia jivi daxitamata-
cabijavabelianexa jumaitsijsitsia: “Diosomē, bitso ayaijamatabēcuenenēmē,”
jaijitsia. Bajara itsi tsane.

²⁶ Bajaraxuata Dioso tocopata bajarapamonae pibisiacuene pexanabi-
abinexa. Pacuenia jamatabēxana, exanavanapa. Mapanacuata picani
Dioso tocopata petiriavi pebi pejitsipaenexa. Itsiata baitsi jane ba-
jarapamonae ēpetiriavi najitsipa. Nexata ēpetiriavi namataenetsia naper-
abēquenetsiataeyabiaba.

²⁷ Bajara pijinia pacuenia Dioso tocopata pebijivi petiriva pejitsipaenexa.
Itsiata baitsi jane bajarapamonae ēpebijivi najitsipa. Nexata ēpebijivi
namataenetsia naperabēquenetsiataeyabiaba. Bajarapacuenia pibisiacuene
penatsixanaexae, Dioso ayaicuenia naneconitsiaexanaponatsi bajarapa-
monae.

²⁸ Bajarapamonae apo jamatabēnajinae Dioso. Pacuenia picani Dioso
tojitsipatsi bajarapamonae pexanaenexa, apo exanae. Bajaraxuata Dioso to-
copata bajarapamonae penajamatabēxainaenexa ēpibisiacuene pexanaejava.

²⁹ Bajarapamonae exanavanapa bitso daxita pibisiacuene. Ēpibisiacuene
yabara najamatabēxainabiaba naperabēquenetsiataenexa. Daxita
pibisiacuene sivanajamatabēxainabiabanua. Jamatabēnaxainaeyababiabanua
itsamonae pecobecovē. Pibisiacuene jamatabēxanabiabanua
itsamonaejavabelia. Cuenecaēbabiabanua itsamonae pexainaenexa.
Jamatabēbeyaxuababiabanua jivi. Namataenetsia nabijataeya

najumeanaenotabiabanua. Bitso cajena jivi yamaxëitojorobabiabanua. Ëpamonae ata bitso naitoya tsabiabinua.

³⁰ Bajarapamonae itsamonae pepëya pibisiacuenia najumetsënëtsia baracuaicuaijai tsabiabinua. Bajarapamonae apo jitsipaenua Dioso. Nexata itoya Dioso pijacuenë. Apo yayataeyabiabinua itsamonae ata. Naitaxutojematsia naëcotabiabanua itsamonae. Bajarapamonae jumaitsi tsabiabi: “Xanë bitso ayajamatabëcuenenënë itsamonae matatoxenetsia,” jai tsabiabi itsamonaejavabelia. Bajarapamonae najamatabëxainabiabanua itsamonae ata pibisiacuenë pexanaeyaexanaenëxa. Bajarapamonae apo jumecovënëtabiabinua paxajivi, penajivi ata.

³¹ Bajarapamonae apo jamatabëjumeyapëtaeyabiabinua caelivaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumaitsicuenia, apo exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacueniabatsi, apo jitsipabiabi pexaniabinëxa icatsia. Bajarapamonae apo itaxutotsoniataeyabiabinua itsajivi ata.

³² Bajarapamonae bitso xaniavaetsia yapëtane picani pacuenia Dioso itorobatsi pexanaenëxa. Yapëtanënuu picani Dioso penavecuaxuabijavanëxa bajarapitsipibisiacuenë pexanaevi. Itsiata baitsi jane bajarapamonae tsiteca pibisiacuenë exanapona. Orijibia sivabarëya tsabiabi itsamonae ata pibisiacuenë itsa exana.

2

Pacuenia itsamatacabi Dioso naneconitsiaexanaejitsia pijaneconi pexainaevi yabara pelivaisi

¹ Paxamë pajudíovimë, pacatsipaebianatsi mapacueniaje. Pajudíovimë pajumaitsimë tsabiabi itsajivi yabara: “Mara pajivi pibisiacuenë exanaje. Nexata Dioso naneconitsiaexanaenatsi,” pajamë tsabiabi. Bajarapacuenia paxamë itsa pajumaitsimë tsabiabi itsajivi yabara, nexata paxamë ata Dioso pacananeconitsiaexanaena. Tsipaji paxamë ata pibisiacuenë paexaname bajarapacuenia itsa pajumaitsimë tsabiabi itsajivi yabara.

² Yapëtanëtsi baja cajena mapacuenëje. Itsamatacabi Dioso naneconitsiaexanaena pibisiacuenë pexanaevi. Itsamatacabi Dioso itsa naneconitsiaexanaena pibisiacuenë pexanaevi, caejivi canacujitsia, paneconivajëto xaina, bajarapaneconivajëtota Dioso naneconitsiaexanaponaena.

³ Bajara pijinia pacuenia paxamë ata pibisiacuenë paexanabiabi atamë, pajumaitsimë tsabiabi itsajivi yabara: “Mara pajivi pibisiacuenë exanaje. Nexata Dioso naneconitsiaexanaenatsi,” pajamë tsabiabi. Bajara pijinia pacuenia paxamë ata bajarapitsipibisiacuenë paneexanabiabixae, pëtsa pajamatabëjumaitsimë tsabiabi: “Vaxaitsi judíovitsi Dioso pijajivixaetsi, apo nacananeconitsiaexanae tsane Dioso,” pajamatabëjamë pëtsa. Tsipaji Dioso naneconitsiaexanaena daxita pibisiacuenë pexanaevi.

⁴ Bepacanaëjëtame xaniavaetsia pacuenia Dioso jamatabëcuenëitsi. Dioso cajena abaxë bepijia apo naneconitsiaexanae pibisiacuenë pexanaevi ata. Dioso raja abaxë jamatabëcuenëvetaponapona pibisiacuenë pexanaevi ata pevajëtsinëxatsi pevecuaajibiaexanaenëxa pijaneconi. Paxamë ata Dioso pacatojitsipa panecopabinëxa pibisiacuenë paneexanabiabijava, panenamatabëcuenë pënëyorotsinëxa Diosojavabelia. Bajaraxuata abaxë Dioso pacaitaxutotsoniatane.

⁵ Itsiata paxamë pajamatabëcuenëtajamë bitso. Apo pajamatabëcopatsimë pibisiacuenë paneexanaejava. Nexata ayaineconi panatoexanapona

panevajënaeyabelia. Nexata ayaičenja Dioso pacananeconitsiaexanaena pamatacabi Dioso naneconitsiaexanaena daxita pijaneconi pexainaeivi.

⁶ Bajarapamatacabi Dioso naneconitsiaexanaponaena caejivi canacujitsia. Paneconivajëto natoexanaponapona itsa abaxë asaë taponaponaenae ma-panacuataje, bajarapaneconivajëtota Dioso caejivi canacujitsia naneconitsiaexanaponaena.

⁷ Itsamonae jamatabëcueneenabiabatsi ëpexaniacuene pexanabiabinexa. Bajarapamonaenae jitsipabiabanua pejinavanapaenexa Dioso pijapenivenivenaenacuatastia. Jitsipabiabanua Dioso pësivajamatabëcuenebarëyanexatsi. Jitsipabiabanua pexainanexa matacabi apo pevereverecejava. Bajarapamonae Dioso rajutsianatsi matacabi apo pevereverecejava.

⁸ Itsamonae natojitsipa daxitacuene pexainaejava ëbajarapamonaenexa. Apo jumecovënëtsinua pexaniajailivaisi. Saya exanavanapa ëpibisiacuene. Bajarapamonae Dioso anaeya ayaičenja naneconitsiaexanaenatsi.

⁹ Daxitajivi pibisiacuene exana, judíovi, apo judíovi ata. Daxita bajarapamonae pibisiacuene pexanaexae, Dioso bejiobiaexanaenatsi. Bitso yanajamatabëxainanuanua pijaneconi.

¹⁰ Itsiata baitsi jane daxita pamonaenae pexaniacuene pexanaevi, judíovi, apo judíovi ata, Dioso pijapenivenivenaenacuatastia jinavanapaena. Dioso sivajamatabëcuenebarëya tsanetsi. Jinavanapaenanua jamatabëcueneexanepanaeya.

¹¹ Dioso itsa naneconitsiaexanaena daxita pijaneconi pexainaeivi, najëpaeya naneconitsiaexanaena. Paneconivajëta xaina caejivi canacujitsia, bajarapaneconivajëtota Dioso naneconitsiaexanaponaena caejivi canacujitsia.

¹² Pamonaenae apo judíovi, yapëtae ata xua pibisiacuene, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi apo judíovi. Pamonaenae judíovi, yapëtae ata pacuenia Dioso Moiséspijinëta penajumecopatsilivaisi jumaitsi pibisiacuene pexanaeyaniva, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi judíovi.

¹³ Dioso raja judíovi aneconijibia apo tae saya jema judíovi peyapëtaejava yabara, palivaisi Dioso tonajumecopata Moiséspijinëta. Dioso raja judíovi aneconijibia tane matapania judíovi itsa exanavanapa pacuenia Dioso itoroba Moiséspijinëta petonajumecopatsilivaisita.

¹⁴ Pamonaenae apo judíovi, apo tsipaebitsi Dioso Moiséspijinëta penajumecopatsilivaisi. Itsiata apo judíovi ata itsajavata exana pacuenia itoroba Dioso Moiséspijinëta penajumecopatsilivaisita. Apo judíovi apo muxujiobi atatsi, yapëtanee pejamatabëëthëtota xua pexaniacuene pexanaenexa. Yapëtanenua xua ata pibisiacuene pexanaeyaniva.

¹⁵ Pamonaenae pexaniacuene exanavanapa tsipaebinejevatsi Dioso Moiséspijinëta penajumecopatsilivaisi, bajarapamonae exanavanapa pejamatabëëthëtota peyapëtaecuena, pacuenia itorobatsi Dioso Moiséspijinëta penajumecopatsilivaisita. Daxita apo judíovi yapëtanee pejamatabëëthëtota pexaniacuene pexanaenexa. Yapëtanenua xua pibisiacuene pexanaeyaniva.

¹⁶ Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa daxitajivi. Nexata Jesucristo daxitajivi naneconitsiaexanaena muetsia daxitajivi pibisiacuene pexanavanapaenaeconi yabara. Naneconitsiaexanaenanua papibisiacuene ata muetsia

daxitajivi najamatabëxainavanapa yabara. Nexata bajarapamatacabi daxitajivi nayapëtaena Dioso penaneconitsiaexanaejavanexatsi muetsia pexanavanapaeneconi yabara. Bajarapacuenia jivi tsipaebaponajë Dioso pitorobilivaisi itsa tsipaebaponajë.

Judíovi yabara, Dioso Moiséspijinëta penajumecopatsilivaisi ata, yabara pelivaisi

¹⁷ Pajudíovimë, pajumaitsimë tsabiabi: “Vaxaitsi raja judíovitsi. Vaxaitsi yapëtanetsi Dioso Moiséspijinëta penajumecopatsilivaisi. Bajaraxuata Dioso nacacapanepaena. Dioso raja ëjudíovitsi vajaDioso,” pajamë tsabiabi.

¹⁸ Payapëtaneme baja cajena xua Dioso pacatojitsipa paneexanaenexa. Payapëtanemenua Dioso Moiséspijinëta penajumecopatsilivaisi. Bajaraxuata payapëtaneme xua pexaniacueni paneitapetsinexa paneexanavana-paenexa.

¹⁹ Pajamatabëjumaitsimënuu tsabiabi: “Vaxaitsi cajena bitso yapëtanetsi Dioso pejumelivaisi, vajatsipaebinexa pamonaë jumetae ata Dioso pejumelivaisi, abaxë apo pejumeyapëtaevi pexaniajailivaisicueni. Vaxaitsi jamatabëcueneitayotsianatsi pamonaë piamatabëcueneitaquirivi, Dioso pejumelivaisivecua saya pejinavanapaevi,” pajamatabëjamënuu tsabiabi.

²⁰ Pajamatabëjumaitsimënuu tsabiabi: “Vaxaitsi cajena nacacajëpa vajayapëtaeyaexanaenexa pamonaë abaxë apo yapëtae pacuenia Dioso jamatabëcueneitsi. Nacacajëpanua vajayapëtaeyaexanaenexa pamonaë ata pejanajumecovënëtsivi Dioso. Nacacajëpa bajarapacuenia vajayapëtaeyaexanaenexa tsipaji yapëtanetsi pacuenia Dioso jumaitsi Moiséspijinëta penajumecopatsilivaisita. Bajarapalivaisi pexaniajailivaisi baja cajena. Yapëtaeyaexana pacuenia jivi exanaejitsia,” pajamatabëjamë tsabiabi.

²¹ Bajarapacuenia paxamë patsipaebabiabi atamë itsamonaejavabelia, itsiata paxamë ata apo paexanaemë bajarapacuenia. “iPëtsa panacobetoxotame,” pajamë tsabiabi itsamonaejavabelia. Itsiata paxamë panacobetoxotabiabame.

²² “Pëtsa panaperabëquenetsiataneme itsavajavabelia panijavajivivecua,” pajamë tsabiabi ata itsamonaejavabelia, itsiata paxamë panaperabëquenetsiataeyabiabame itsavajavabelia panijavajivivecua. Paxamë pajumaitsimë tsabiabi: “Jumapecataya pexanaenëanëjavabelia penavajëcaecuene bitso abeje. Itsa pajonejitsipame jumapecataeya pexanaenëanë penubenaebota, pacajamatabëcuene bijianaejitsipa,” pajamë tsabiabi. Itsiata paxamë pajoneyabiabame jumapecataeya pexanaenëanë penubenaebota penamatamotsijavanë, ofrendacuenia pejebijavanë, panenacobetoxotabiabinexa.

²³ Paxamë pajudíovimë jivi picani patsipaebabiabame Dioso Moiséspijinëta penajumecopatsilivaisi, bitso pexanepanaelivaisi. Itsiata paxamë ata apo pajumecovënëtsimë bajarapalivaisi. Bajaraxuata jivi apo yaiyatae Dioso.

²⁴ Bajara paneitsixae, copiapata jane baja pacuenia baja cajena Dioso pejumelivaisibaxutota tajëvelia pacavajunupaeba. Dioso pejumelivaisibaxutota tajëvelia itsa pacavajunupaeba, jumaitsi paxamë yabara mapacueni-aje: “Pamonaë apo judíovi, pibisiacuenia Dioso baracuaicuajai tsane judíovi xaniavaetsia apo petsitajinavanapaexae,” jai tajëvelia Dioso pejumelivaisibaxutota paxamë Dioso apo panejumecovënëtsijavanexa yabara.

²⁵ Paxamë pajudíovimë papebijivimë, pacaperabëcaucuba itsa abaxë pat-siquirinacuetoximë. Baitsi pacaboupi-perabëcaucuba. Bajarapacuenia

pacaperabēcaucuba panenayapētaenexa Dioso papijajivicuenemē. Bajara-pacuenē pacatonamatamota matapania itsa pajumecovēnētavanapame Dioso Moiséspijinēta penajumecopatsilivaisi. Itsa apo pajumecovēnētismē tsipae Dioso Moiséspijinēta penajumecopatsilivaisi, papecaperabēcaucubivi ata, itsi-ata Dioso apo papijajivimē tsipae.

²⁶ Pamonae apo judíovi ata, apo peperabēcaucubivi atatsi, pejumecovēnētavanapaexae pacuenia Dioso Moiséspijinēta penajumecopatsilivaisi itorobatsi, nexata bajarapamonae ata Dioso pijajivicuenia tanetsi.

²⁷ Pamonae apo judíovi, apo peperabēcaucubivi atatsi, itsiata pejumecovēnētavanapaexae Dioso Moiséspijinēta penajumecopatsilivaisi, bajarapamonae itsamatacabi pacaurabiana Diosojavabelia. Bajarapacuenia pacaurabiana Diosojavabelia tsipaji Dioso Moiséspijinēta penajumecopatsilivaisi payapētae atamē, papecaperabēcaucubivi atanua, itsiata apo pajumecovēnētismē Dioso Moiséspijinēta penajumecopatsilivaisi.

²⁸ Pajivi perabēcaucutsi atatsi penayapētaenexa Dioso pijajivitonēcuene, saya peperabēcaucutsijavatsi yabara Dioso pijajivitonēcuenia apo taetsi.

²⁹ Pajivi pepacuenē Dioso pijajivitonē, bajarapajivi peneta pejamatabēēthetovetsina Dioso jumecovēnēta. Pajivi pepacuenē Dioso pijajivitonē, bajarapajivi saya naniavelia apo perabēcaucutsitsi. Biji rajane pejamatabēējētota pejanajamatabēcuene rajutatsi Espíritu Santo. Bajarapajivi xua exanaponapona, exanaponapona Dioso pesivabarēyanexatsi. Bajaraxua apo exanaponapona saya mapanacuapijivi pesivabarēyanexatsi.

3

¹ ¿Detsa xua judíovi xaina Diosojavabelia, pamonae apo judíovivecua? ¿Detsa xua yabara toxanepanatsi Diosojavabelia ponē peperabēcaucutsinētsi apo peperabēcaucutsinētsivecua?

² Palivaisianē judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitsije. Dioso tonajumelivaisicopatatsi bajarapamonaejavabelia.

³ Itsamonae judíovi apo jumecovēnētsi pacuenia Dioso najumecapanepaeya jumaitsi petoexanaenexatsi. Pētsa bajarapacuenē yabara pajamatabējumaitsimē mapacueniaje: “Dioso meta itsiata apo exanae tsane pacuenia picani najumecapanepaeya jumaitsi pexanaenexa. Tsipaji judíovi apo jumecovēnētsi,” pajamatabējamē pētsa Dioso yabara.

⁴ Dioso cajena apo penajumetsēnētšinē. Jivi rajane banajumetsēnēta. Dioso pexaniajailivaisi jivijavabelia petsipaebabiabijava yabara, tajēvelia Dioso pejumelivaisibaxutota jumaitsi mapacueniaje:

Xamē Diosomē, pexaniajailivaisi jivijavabelia tsipaebabiabame. Jivi cajumeaebi ata, itsiata daxitajivi peyapētaenexa, xamē apo nena-jumetsēnētšinē,

jai Dioso pejumelivaisibaxutota.

⁵ Pibisiacuene vajaexanaejava yabara Dioso nacananeconitsiaexanaena. Nexata Dioso vajanacananeconitsiaexanaejavata, najamatabēcueneitajētsiana daxitajivi peyapētaenexa Dioso apo pejitsipaenēcuene pibisiacuene pexanaejava. Bajaraxuata pamonae naneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinē tsipae: “Dioso pibisiacuene exana itsa naneconitsiaexana pijaneconi pexainaevi,” itsa janē tsipae, nexata jamatabēcuenenavēxaniabiaya jumaitsinē tsipae.

Tsipaji Dioso itsa apo naneconitsiaexanae tsipae pijaneconi pexainaeivi, Dioso apo najamatabëcueneitajëtsi tsipae pibisiacuene pexanaejava apo pejitsipaenëcuene. Nexata pacuenia Dioso apo pejumecovënëtsivi banajamatabëxaina, bajarapacuenia najamatabëxainaejitsipajë.

⁶ Tsipaji Dioso saya jema jivi apo penaneconitsiaexanaenë. Itsa saya jema Dioso jivi naneconitsiaexanaejitsipa, apo naneconitsiaexanae tsipae ëpijaneconi pexainaeivi. Nexata caejivi canacujitsia pibisiacuene pexanaeconi yabara, paneconivajëto xainapona, bajarapaneconivajëtotata Dioso apo naneconitsiaexanapona tsipae.

⁷ Itsamonae meta jamatabëcuenenavëxaniabiaya jumaiti tsane mapacueni-aje: “Daxitajivi pecanaëjëtsinexa Dioso apo penajumetsënëtsinëcuene, vaxaiti yamaxëitojorobiaya jivi livaisi tsipaebabiabianatsi. Bajarapacuenia yamaxëitojorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanae tsane. Tsipaji vaxaiti yamaxëitojorobiaya jivi livaisi vajatsipaebabiabijava pejamatabëcueneta, daxitajivi canaëjëtsiana Dioso bitso pexaniajainëcuene, apo penajumetsënëtsinëcuene. Bajaraxu-ata Dioso apo nacananeconitsiaexanae tsane vajanajumetsënëtabiabi-ajava yabara,” jai meta tsane itsamonae jamatabëcuenenavëxaniabiaya.

⁸ Bajarapacuenia itsa najamatabëxainaena bajarapamonae, nexata meta jamatabëcuenenavëxaniabiaya mataropotsia jumaiti tsane: “Pibisiacuene meta vajaexanaejava ata xanepana. Nexata pibisiacuene exanabiabianatsi. Tsipaji vaxaiti pibisiacuene vajaexanabiabijava pejamatabëcueneta, daxitajivi canaëjëtsiana Dioso pibisiacuene apo pexanaenëcuene,” jai meta tsane bajarapamonae jamatabëcuenenavëxaniabiaya. Bajarapacuenia itsa jumai tsane, nexata pexaniajailivaisi jivijavabelia apo tsipaebabiabi tsane. Itsi-ata baitsi jane itsamonae najumetsënëtsiaya xanë yabara jumai tsabiabi: “Pablo raja itorobapona jivi bajarapacuenia pibisiacuene pexanaenexa,” jai tsabiabi xanë yabara. Bajarapacuenia pejumaitisivi xanë yabara, Dioso naneconitsiaexanaenatsi.

Pacuenia daxitajivi naneconita Diosojavabelia yabara pelivaisi

⁹ ¿Nexata tsaja ëjudïovi saicaya aneconi-ijibia Dioso tane daxita mapanacuapijivi vecuaje? Jume raja. Jumaitsinë baja cajena mapacueni-aje. Daxitatsi mapanacuapijivitsije pibisiacuene ëvajaexanaevi. Judïovi, apo judïovi ata, bajara itsi.

¹⁰ Daxitatsi pibisiacuene vajaexanaejava yabara, Dioso pejumelivaisibax-utota jumaiti mapacueni-aje: Caejivi ata aneconi-ijibia apo ponapona Dioso pitabarata.

¹¹ Ajibi peyapëtaejivi pacuenia Dioso jamatabëcuenetsi. Ajibi pepacune pejamatabëëthëtovetsina pejumecovënëtsijivi Dioso.

¹² Daxita Diosovecua naxuabiaya jinavanapa. Daxita ajamatabëcuenebeje. Ajibi pexaniacuene pexanabiabijivi.

¹³ Pacuenia petëpanë pemëthë tuxutsaeba, bajara itsi bajarapamonae pecuibovojotota pecuaicuaijajava pibisialivaisi. Pijumeta jivi yamaxëitojorobabiaba. Pacuenia jomo pecuibovojotota xaina piatanejava, bajara pijinia itsi bajarapamonae pecuaicuaijajava penajumetsënëtsilivaisi.

¹⁴ Pecuibovojotota cuaicuaijai ëpibisialivaisi pianaepanaexa.

¹⁵ Itsacuene apo exanae atatsi, bepijia jitsipa jivi pebeyaxuabinexa.

¹⁶ Itsabelia jinavanapa, bejiobiaexanabiaba itsamonae.

¹⁷ Bajarapamonae apo yapëtae xaniavaetsia peyjavajinavanapaenexa jivi.

¹⁸ Bajarapamonae apo canaëjëtsi pejunavinexa Diosojavabelia,

jai mapacueniaje Dioso pejumelivaisibaxutota daxitatsi mapanacuapijivitsi yabara.

¹⁹⁻²⁰ Vaxaitsi baja cajena yapētanetsi mapacueneye. Bajayata Dioso pejumelivaisi tonajumecopata ējudíovi picani pejumecovēnētavanapaenexa. Itsiata judíovi apo jumecovēnētsicapanepeae bajarapalivaisi. Bajaraxuata judíoviyajuvēnēnē, caenē ata, acuenebi pejumaitsinexa: “Xanē cajena apo tonaneconitsinē Dioso,” pejainexa. Daxita mapanacuapijivi, judíovi, apo judíovi ata, beyapētane penaneconitsijava Diosojavabelia. Tsipaji itsajivi ata apo caējēpaetsi pejumecovēnētsinexa pacuenia itoroba Dioso penajumecopatsilivaisita. Bajarapalivaisi Dioso najumecopata pibisiacuene vajaexanavanapaejava vajasivajamatabējumaitsinexa mapacueniaje: “Xaniajai rabaja. Xanē ata pibisiacuene taexanaenē,” vajajamatabējainexa bajarapalivaisi pejamatabēcueneta.

Pacuenia Dioso aneconijibia tane pajivi najamatabēcuenecopata Jesucristo-javabelia yabara pelivaisi

²¹ Aeconoxae baja mapamatacabitaje Dioso nacayapētaeayaexana pacuenia nacatoexana aneconijibia vajanacataenexa. Dioso apo jamatabējumaitsi: “Pamonae jumecovēnētsicapanepea Moiséspijinēta tanajumecopatsilivaisi, bajara ēpamonae aneconijibia taenajē,” apo jamatabējai. Pacuenia Dioso capanepeajitsia Dioso pejumecovēnētsivi, bajayata Diosojumepaebivi profetavi tajēvelia yaquina Dioso pejumelivaisibaxutota.

²² Mara pacuenia Dioso jivi aneconijibia taneje. Pajivi jamatabējumaitsi: “Xaniajai. Jesucristo itsa tēpa cruzata, pibisiacuene taexanaeoneconiyabara tēpa,” jamatabējai, bajarapajivi Dioso aneconijibia tanetsi. Dioso aneconijibia taenatsi daxita pamonae jumecovēnēta Jesucristo cruzata pesivatēpaejavatsi pijaneconiyabara. Tsipaji Dioso daxitajivi najēpaeyatane.

²³ Daxitajivi baja cajena pibisiacuene exana. Bajaraxuata caejivi ata aneconijibia Dioso pejitsipacuenia apo toponaponaē. Daxitajivi Diosovecua naxuabiaya jinavanapa.

²⁴ Itsiata baitsi jane Dioso pinijicuenia piasivaxae daxitajivi, aneconijibia tane daxita pamonae jumecovēnēta Jesucristo cruzata pesivatēpaejavatsi pijaneconiyabara. Jivi apo namatavenonaē pijacuata penaneconimatamotsinexa Diosojavabelia. Tsipaji baja aneconijibia tanetsi Jesucristo pecomuatsixaetsi pibisiacuene pexanaeoneconivecua.

²⁵ Dioso copata Jesucristo petēpaenexa cruzata vajanacaneconimatamotsinexa, pibisiacuene vajaexanaeoneconimi. Nexata itsa jumecovēnētatsi Jesucristo cruzata vajanacasivatēpaejava, nacavecuaajibiaexana pibisiacuene vajaexanaeoneconimi. Bajarapacuenia Dioso copata Jesucristo cruzata vajanacasivatēpaenexa mapanacuapijivitsi. Tsipaji Dioso apo jitsipae pibisiacuene vajaexanaejava. Bajaraxuata Dioso aneconijibia nacatane Jesucristo itsa nacaneconimatamota, pibisiacuene vajaexanaeoneconimi. Pepo bajayata pejinavanapaevimiyajuvēnēvi ata, najamatabēcuenecopaba Diosojavabelia. Nexata bajarapamonaemi pibisiacuene exanaē ata, itsiata Dioso apo naneconitsiaexanaetsi. Tsipaji Dioso tajēvelia yapētane Jesucristo pesivatēpaejavanexa bajarapamonaemi ata pibisiacuene pexanaeoneconiyabara.

²⁶ Ajena, mapamatacabitaje, Dioso jivi tsitanajamatabēcueneitajēta jivi pibisiacuene pexanaejava Dioso apo pejitsipaeonecuene. Tsi-tanajamatabēcueneitajētanae aneconijibia petaejavanexa pamonae jumecovēnēta Jesucristo pesivatēpaejavatsi cruzata pijaneconipevecuaajibiaexanaenexatsi.

²⁷ Bajarapacuenia Dioso nacatoexana aneconijibia vajanacataenexa. Dioso aneconijibia apo nacatae vajacuata vajaexanaejava yabara. Biji rajane Dioso aneconijibia nacatane vajajumecovënëtsixae Jesucristo vajanacasivatëpaejava cruzata vajaneconi yabara. Nexata ayaijamatabëcuenejivitsi vajanacataenexa, acuenebi vajajumaitisinxae itsajivijavabelia: “Xanë taexanaejava pejamatabëcueneta, Dioso aneconijibia netane,” vajainexa acuenebi.

²⁸ Vaxaitsi baja cajena yapëtanetsi mapacueneje. Dioso aneconijibia tane pajivi jumecovënëta Jesucristo pesivatëpaejavatsi cruzata pijaneconi yabara. Bajarapajivi apo jumecovënëtsi ata Dioso Moiséspijinëta penajumecopatsilivaisi, Dioso itsiata aneconijibia tanetsi pejumecovënëtsixae Jesucristo pesivatëpaejavatsi cruzata pijaneconi yabara.

²⁹ Dioso raja ëjudïovi apo pijaDioso. Dioso raja apo judïovi ata pijaDioso.

³⁰ Caenë rabaja Dioso. Pematatsënëa baja itsanë Dioso ajibi. Bajara-ponë Dioso judïovi aneconijibia tane, pamonaë jumecovënëta Jesucristo pesivatëpaejavatsi cruzata pijaneconi yabara. Bajara pijinia pacuenia Dioso aneconijibia tane pamonaë apo judïovi ata.

³¹ Vaxaitsi baja xaniavaetsia Jesucristo jumecovënëtatsi vajanacasi-
vatëpaejava cruzata vajaneconi yabara. Nexata Dioso Moiséspijinëta penajumecopatsilivaisi yabara, apo bejamatabëjumaitisitsi: “Dioso Moiséspijinëta penajumecopatsilivaisi tajumecovënëtsijavami, copatajë baja. Tspaji baja jumecovënëtajë Jesucristo tanesivatëpaejava cruzata tajaneconi yabara,” apo bejamatabëjaitsi. Biji rajane Jesucristo vajanacasivatëpaejava cruzata, itsa jumecovënëtatsi, Dioso Moiséspijinëta penajumecopatsilivaisi ata bajarajota yajavajumecovënëtatsi.

4

Pacuenia Abrahampijinë bajayata Dioso aneconijibia tanetsi pejumecovënëtsixae pacuenia Dioso najumecapanepaeya jumaitisitsi yabara pelivaisi

¹ Pacatsipaebijitsiatsi pajamatabëcuenelivaisi yabara Abrahampijinë Dioso aneconijibia tanetsi.

² Abrahampijinë pijacuata ëpexaniacuene itsa exanabiabijitsipa, nexata jumaitis tsipae Diosojavabelia: “Ëpexaniacuene taexanabiabixae, nexata aneconijibia netaneme,” jai tsipae. Itsiata baitsi jane Abrahampijinë Diosojavabelia apo jumaitis bajarapacuenia. Tspaji Abrahampijinë ëpexaniacuene pijacuata exanabiabi ata tsipae, bajaraxua yabara Dioso aneconijibia apo taetsi tsipae.

³ Biji rajane Dioso pejumelivaisibaxutota Abrahampijinë yabara jumaitis mapacueniaje: “Abrahampijinë najamatabëcopatsiaya Diosojavabelia pejamatabëjumaitisabiabixae: ‘Xaniajai. Pepacuene Dioso netoexanaena pacuenia najumecapanepaeya nejumaitis,’ pejamatabëjaitisabiabixae, nexata Dioso aneconijibia tanetsi,” jai Dioso pejumelivaisibaxutota Abrahampijinë yabara.

⁴ Pajivi itsanë pijajava tonacuenebaponapona, bajarapajivi xua rajutatsi, amoneya apo rajutsitsi. Petonacuenebixae matamotatsi.

⁵ Pajivi apo exanaë ata pexaniacuene, itsiata jamatabëjumaitis: “Dioso, ponë penaneconitsivi pijaneconivecua ajibiaexanabiaba, bajaraponë pepacuene necapanepaena pacuenia najumecapanepaeya jumaitis tanecapanepaenexa,” jamatabëjai, bajarapajivi Dioso aneconijibia taenatsi pecapanepaenexatsi pijaneconivecua.

⁶ Pepo bajayata Davidpijinē vajunupaeba pejamatabēcuenebarēyajava pamonaē baja Dioso aneconijibia tanetsi. Bajarapacuenia Dioso aneconijibia tanetsi bajarapamonae pejumecovēnētsixae Dioso najumecapanepaeya pejumaitsicueniatsi. Bajarapamonae Dioso aneconijibia apo taetsi, pijacuata ēpexaniacuene exanabiabi ata.

⁷ Davidpijinē pepo bajayata tajēvelia bajarapamonae yabara jumaitsi mapacueniaje:

Jamatabēcuenebarēya baja tsavanapae pamonaē picani naneconita Dioso javabelia. Barajamatabēcuenexanepanatsi baja Dioso. Tsipaji baja pibisiacuene pexanaeiconimi, vecuaajibiaexanatsi.

⁸ Jamatabēcuenebarēya baja tsaponaponae pajivi pibisiacuene pexanaejivi ata, itsiata Dioso aneconijibia itsa tanetsi, jai mapacueniaje Davidpijinē bajayata.

⁹ Bajarapacuenia Davidpijinē itsa jumaitsi, pejamatabēcuenebarēyatsavanapaevi baja, ējudiōvi, peperabēcaucubivitsi yabara, apo jumaitsi. Pamonaē apo judiōvi, apo peperabēcaucubivi atatsi, yabara jumaitsi. Xaniajanē pacuenia pacatsipaebijitsiatsi. Abrahampijinē bajayata Dioso jumecovēnēta najumecapanepaeya pejumaitsicueniatsi. Nexata baja Abrahampijinē Dioso aneconijibia tanetsi pibisiacuene pexanaeiconimivecua.

¹⁰ ¿Abrahampijinē tsajane baja pepuaperabēcaucutsitsi, Dioso aneconijibia tanetsi? Jume raja. Abaxē apo perabēcaucutsinejeva atatsi, aneconijibia tanetsi pejumecovēnētsixae Dioso najumecapanepaeya pejumaitsicueniatsi.

¹¹ Dioso baja aneconijibia pepuataetsi, Abrahampijinē perabēcaucutatsi. Bajarapacuenia Abrahampijinē perabēcaucutatsi daxitajivi peyapētaenexatsi Dioso aneconijibia petaejavatsi. Bajaraxuata daxita pamonaē apo peperabēcaucubivi atatsi, itsa jamatabējumaitsi: “Xaniajai. Pepacuene Dioso netoexanaena pacuenia najumecapanepaeya jumaitsi,” itsa jamatabējai, bajarapamonae Abrahampijinē bepexi Dioso tanetsi, apo peperabēcaucubivi atatsi. Abrahampijinē abaxē apo perabēcaucutatsi atatsi, Dioso pejumecovēnētsixae, aneconijibia tanetsi.

¹² Xaniajai rabaja. Abrahampijinē bepexi Dioso tanetsi daxita pamonaē peperabēcaucubivitsi. Bajarapamonae Abrahampijinē bepexi Dioso tanetsi apo ēpeperabēcaucubijavatsi yabara. Biji rajane Abrahampijinē bepexi Dioso tanetsi tsipaji bajarapamonae ata abaxē apo perabēcaucubi atatsi, jumecovēnēta pacuenia Dioso najumecapanepaeya jumaitsi.

Pacuenia tocopiapatsi pajivi jumecovēnēta pacuenia Dioso najumecapanepaeya jumaitsi petoexanaenexatsi yabara pelivaisi

¹³ Bajayata Dioso najumecapanepaeya jumaitsi Abrahampijinējavabelia: “Carajutsianatsi daxita mapairaje nijairanexa. Nevēnamuto ata, nexi, nemomoxi ata, pijairanexa,” jai Dioso Abrahampijinējavabelia. Bajarapacuenia Dioso jumaitsi Abrahampijinējavabelia tsipaji Dioso aneconijibia tanetsi Abrahampijinē pejumecovēnētsixae pacuenia Dioso najumecapanepaeya jumaitsi. Nexata acuenebi vajajumaitsinexa: “Abrahampijinē Dioso aneconijibia tanetsi tsipaji jumecovēnēta Dioso Moiséspijinēta penajumecovēnētsilivaisi,” vajajainexa. Tsipaji baja Abrahampijinē pepuatēpae, bexēa Moiséspijinē ponapona.

¹⁴ Dioso najumecapanepaeya itsa jumai tsipae perajutsinexa bajarapaira ēpamonaē jumecovēnēta pona Dioso Moiséspijinēta penajumecopatsilivaisi, nexata bajarapamonae, Abrahampijinē pemomoxi ata, apo rajutsitsi tsipae bajarapaira. Tsipaji itsajivi ata, bajarapamonaeyajuvēnējivi, apo

jumecovënëtsicapanepea Dioso Moiséspijinëta penajumecopatsilivaisi. Bajarapamonaē Dioso pejumecovënëtsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumematamobi tsipaetsi.

¹⁵ Tsipaji daxita pamonaē apo jumecovënëtsi pacuenia Dioso itoroba Moiséspijinëta penajumecopatsilivaisita, bajarapamonaē Dioso naneconitsiaexanaena. Itsiata baitsi jane itsa ajibi tsipae pitavetsilivaisitsi, nexata pijinia ajibi tsipae peyabarananeconitsia exanaejavanexatsi.

¹⁶ Dioso cajena najumecapanepaeya jumaitsi Abrahampijinëjavabelia amoneya perajutsinexa bajarapaira. Perajutsinexa Abrahampijinë pejixjavabelianexa ata, pemomoxijavabelianexa ata. Bajarapaira Abrahampijinë Dioso rajutsiapaebatsi Dioso najumecapanepaeya pejumaitsijavatsi Abrahampijinë pejumecovënëtsixae. Bajarapaira Dioso najumecapanepaeya itsa rajutsiapaeba pamonaē jumecovënëta Dioso Moiséspijinëta penajumecopatsilivaisi, bajara epamonaē itsiata apo rajutsiapaebi. Biji rajane rajutsiapaeba pamonaē ata jumecovënëta pacuenia Dioso najumecapanepaeya jumaitsi, pacuenia bajayata Abrahampijinë jumecovënëta Dioso najumecapanepaeya pejumaitsicueniatsi. Bajaraxuata daxitatsi, Dioso vajajumecovënëtsivi, Dioso nacatane Abrahampijinë bepexitsi.

¹⁷ Bajarapacuenia Abrahampijinë bepexitsi Dioso vajanacataejavanexa yabara, Dioso pejumaitsijava Abrahampijinëjavabelia Dioso pejumelivaisibaxutota tajëvelia jumaitsi mapacueniaje: “Ayaibitsaëttoxaneto jivi bepijasalinainëmë cataeyaexanaenatsi,” jai Dioso pejumelivaisibaxutota tajëvelia Dioso pejumaitsijava Abrahampijinëjavabelia vaxaitsi yabara. Dioso baja cajena icatsia piasaëyaexanaenë petëpaevimi ata. Xua picani abaxë ajibi mapanacutaje, Dioso baja exana pijumeta.

¹⁸ “Abraham raeta baja pexi apo xainae tsane,” sivajamatabëjai atatsi daxitajivi bajayata, itsiata Abrahampijinë Dioso apo jumeaebi. Jumecovënëta Dioso pejumaitsicueniatsi. Evetaponapona jivi ayaibitsaëttoxaneto pamo pexanaenexatsi pacuenia Dioso najumecapanepaeya jumaitsitsi.

¹⁹ Bajarapamatacabi Abrahampijinë imoxo pexainae cien pavaibeje. Bajaraponë pijava Sara, mavecova. Perujuvayo baja pijinia. Pexi picani pexainanexabeje, apo caëjëpaetsibeje. Tsipaji baja bitso perujujivibeje. Bajaraxua Abrahampijinë nacueneyapëtae ata, itsiata jumecovënëta Dioso pacuenia najumecapanepaeya jumaitsitsi petoexanaenexatsi.

²⁰ Apo jumeaebi pacuenia Dioso najumecapanepaeya jumaitsitsi. Bitso biji pevajënaeyabelia jamatabëcueneevetaponapona pacuenia Dioso najumecapanepaeya jumaitsitsi petocopiapatsinexatsi. Nexata Dioso yabara Abrahampijinë jumai tsabiabi: “Dioso cajena bitso ayaijamatabëcuenenë,” jai tsabiabi.

²¹ Abrahampijinë xaniavaetsia yapëtane Dioso pecaëjëpaenëcuenetsi petoexanaenexatsi daxita pacuenia najumecapanepaeya jumaitsitsi.

²² Abrahampijinë Dioso jumecovënëta petoexanaenexatsi pacuenia najumecapanepaeya jumaitsitsi. Bajaraxuata Dioso aneconijibia tanetsi.

²³ Dioso pejumelivaisibaxutota jumaitsi pacuenia Dioso aneconijibia tanetsi Abrahampijinë pejumecovënëtsixae Dioso najumecapanepaeya pejumaitsicueniatsi. Bajarapacuenia Dioso pejumelivaisibaxutota apo jumaitsi saya vajayapëtaenexa Abrahampijinë pelivaisi.

²⁴ Biji rajane nacatoyaquina vaxaitsi ata vajanacamuxujobinexa. Nexata vaxaitsi ata itsa jumecovënëtsi pacuenia Dioso najumecapanepaeya jumaitsi, aneconijibia Dioso nacatane. Bajaraponë Dioso vajatuxanenë Jesucristo icatsia asaëyaexanatsi petëpacujinae.

²⁵ Dioso athëbëvetsica itorobica Jesús vajanacasivatëpaenexa mapanacuataje. Nexata Jesús ita nacasivatëpa, nacaneconimatamota pibisiacuene vajaexanaeneconimi. Bajaraxuacujinae Dioso icatsia asaëyaexanatsi petëpaejavavecua vajanacavecuaajibiaexanaenexa vajaneconimi. Nexata baja Dioso aneconijibia nacatane Jesús pejamatabëcueneta.

5

Pacuenia jamatabëcuenebarëya pajivi Dioso aneconijibiatanetsi yabara pelivaisi

¹ Dioso aneconijibia nacatane vajajumecovënëtsixae pacuenia Dioso najumecapanepaeya jumaitsi. Nexata sivajamatabëcuenebarëyatsi tsavanapae Dioso. Vajatuxanenë Jesucristo vajanacasivatëpaexae vajaneconisi yabara, bajaraponë pejamatabëcueneta nacajamatabëcuenebarëyayaexana.

² Vajajumecovënëtsixae Jesucristo vajanacasivatëpaejava, Dioso nacaitaxutotsoniataeyabiaba. Nexata Dioso sivajamatabëcuenebarëyatsi. Tshipaji yapëtanetsi itsamatacabi Dioso vajayajavajinavanapaejavanexa penivenivenaenacuataatsia.

³ Mapanacuapijivi nacabejiobiaexanabiabi ata, itsiata sivajamatabëcuenebarëyatsi tsabiabi. Tshipaji yapëtanetsi vajanacabejiobiaexanabiabicueneta, nacajamatabëcueneasaëyaexanapona Diosojavabelia. Nexata nacajamatabëcuenecaëjëpa vajanajamatabëcuenesaëtsinexa, daxita pibisiacuene nacatocopiapatsi ata.

⁴ Itsa najamatabëcuenesaëtatsi, nacatocopiapatsi ata pibisiacuene, Dioso pijinia nacasivabarëya. Nexata itsa yapëtanetsi Dioso vajanacasivabarëyajava, nexata jamatabëcuenevetatsi Dioso vajanacatoexanaenexa pacuenia najumecapanepaeya jumaitsi.

⁵ Nexata itsa jamatabëcuenevetatsi Dioso vajanacatoexanaenexa pacuenia najumecapanepaeya jumaitsi, apo nacueratsitsi tsane. Bajarapacuenia apo nacueratsitsi tsane tshipaji baja Dioso nacarajuta Espiritu Santo vajanacatsijamatabëcaenexa. Nexata Espiritu Santo xaniavaetsia nacayapëtaeyaexana Dioso vajanacaasivajava.

⁶ Vaxaitsi bitso ajamatabëcuenesaëjibitsi pibisiajamatabëcuenevixaetsi. Acuenebi vajacuata vajanacapanepaenexa Diosojavabelia vajaneconiyajava. Itsiata baitsi jane Dioso pecaëjëtsimatacabita, Cristo nacasivatëpa pibisiacuene vajaexanaeneconisi yabara.

⁷ Mapanacuataje itsajivi itsa jamatabëcuenevavenona itsanë, nexata itsa beyaxuabiapaebatsi pejamatabëcuenevavenonaexae, pecajunavi baja apo jamatabëcuenevavenonae tsipae. Itsajivi meta itsiata jamatabëcuenevavenonaejitsipa, beyaxuabijitsia atatsi. Bajarapacuenia jamatabëcuenevavenonaejitsipa itsa bitso pexaniajamatabëcuenenë, ponëjavabelia jamatabëcuenevavenonaejitsia.

⁸ Itsiata baitsi jane vaxaitsi Dioso nacayavenona, pibisiacuene vajaexanaevi ata. Nexata Dioso nacatsitanajamatabëcueneitajëta bitso vajanacaasivajava. Dioso pexënato athëbëvetsica itorobica vajanacasivatëpaenexa mapanacuataje.

⁹ Jesucristo vajanacasivatëpaexae, nexata baja maparucaeje Dioso aneconijibia nacatane. Bajaraxuata yapëtanetsi Jesucristo pejamatabëcueneta Dioso vajanacapanepaejavanexa vajanacaneconitsia exanaejavanexamivecua.

¹⁰ Vaxaitsi picani Dioso pijavajabitsaëvitsi. Nexata pexënato vajanacasi-vatëpaexae, Dioso baja nacabarajamatabëcuenexanepana. Bajaraxuata maparuaeje yapëtanetsi Dioso pepacune vajanacacapanepaejavanexa vajanacananeconitsa exanaejavaminexavecua. Tspiji pexënato asaë tsaponaponae vajanacacuaicuaïjainënexa paxajavabella.

¹¹ Orijiibia vaxaitsi bitso sivajamatabëcuenobarëyatsi Dioso vajanacaasivajava. Tspiji vajatuxanenë Jesucristo pejamatabëcueneta Dioso baja nacabarajamatabëcuenexanepana.

Adánpijinë Cristo ata yabara pelivaisi

¹² Copiaya caenë, Adánpijinë, pibisiacuene exana. Nexata mapanacuataje daxitajivi pibisiacuene pexanaejavanexa, taxuxuaba. Taxuxuabanua jivi petëpaejavanexa. Nexata jivi petëpaejava, yacaëjëpa daxitanacuapijivijava. Tspiji daxitanacuapijivi pibisiacuene exana.

¹³ Dioso Moiséspijinëta penajumecopatsilivaisi ata pevajënaeya, mapanacuapijivi pibisiacuene exanavanapa. Itsiata abaxë apo petonajumecopatsixaetsi Dioso pejumelivaisi, itsajivi ata acunenibi pejumaitisijavatsi: “Pananeconitame raja Diosojavabella,” pejaijavatsi pibisiacuene pexanaejava yabara.

¹⁴ Adánpijinë peponaponaejavaveliacujinae, jivi jinavanapa. Bajarapamonaemi jinavanapa Moiséspijinë pevajënaeya. Daxita bajarapamonaemi ata pibisiacuene exana. Nexata tēpaponae. Bajarapamona pibisiacuene itsa exana, itsiata Adánpijinë papibisiacuene exana, cuenejēpaeya apo exanae. Cristo, ponë tajëvelia vajunupaebatsi pepatsijavanexatsica, Adánpijinëbeje, apo najamatabëcuenejēpaebeje. Adánpijinë pejamatabëcueneta, daxitajivi pibisiacuene exanavanapa. Nexata daxitajivi naneconita Diosojavabella. Cristo pijinia pejamatabëcueneta, jivi ayaibitsaëtoxaneto Dioso aneconijibia tanetsi.

¹⁵ Nexata Adánpijinë papibisiacuene exana, apo najēpaebeje papexaniacuene Dioso nacatoexana Jesucristo pejamatabëcueneta. Caenë, Adánpijinë, pibisiacuene pexanaejava pejamatabëcueneta, daxitajivi tēpaponae. Biji rajane Dioso vajanacaitaxutotsoniataejava, bitso pexaniacuene. Tspiji Dioso athëbëvetsica itorobica vajatuxanenë Jesucristo vajanacasivatēpaenexa mapanacuataje, vajanacavecuaajibiaexanaenexa daxita vajaneconimi. Nexata bajarapacuenia caenë, Jesucristo, pexaniacuene exana pecapanepaenexa jivi ayaibitsaëtoxaneto.

¹⁶ Caenë saya picani Adánpijinë. Itsiata pibisiacuene itsa exana, yacaëjëpa daxitajivijava. Nexata daxitajivi pibisiacuene pexanaexae, naneconita Diosojavabella. Itsiata baitsi jane Jesucristo xaniavaeta daxita xua Adánpijinë pejamatabëcueneta bijiana picani. Jesucristo pejamatabëcueneta Dioso aneconijibia tane daxita pamona jumečovënëta Jesucristo pesivatēpaejavatsi pibisiacuene pexanaeneconi yabara.

¹⁷ Caenë Adánpijinë pibisiacuene pexanaexae, daxitajivi tēpaponae bajarapamonae ata pibisiacuene pexanaexae. Itsiata caenë Jesucristo vajanacasivatēpaexae, maparuaeje Dioso baja nacaitaxutotsoniatane. Bajaraxuata itsacunejavayo ata Dioso apo toexanae atatsi, Dioso aneconijibia nacatane. Daxita pamona jumečovënëta Jesucristo pejamatabëcueneta Dioso aneconijibia petaejavatsi, bajarapamonae ajamatabëcuenesaë tsavanapae tsane Dioso jumečovënëtsijava Jesucristo peyavenonabiabixaetsi.

¹⁸ Daxitajivi naneconita Diosojavabella caenë, Adánpijinë, copiaya pibisiacuene pexanaexae. Caenë pijinia, Jesucristo, pexaniacuene pexanaexae, daxita pamona jumečovënëta Jesucristo pesivatēpaejavatsi pibisiacuene

pexanaeneconi yabara, Dioso aneconijibia tanetsi. Nexata bajarapamonae Dioso rajutsianatsi matababi apo peverevereaejava.

¹⁹ Caenë, Adánpijinë, copiaya apo jumecovënëtsi Dioso pitorobicueniatsi. Nexata bajaraponë pejamatabëcueneta, jivi ayaibitsaëtoxaneto pibisiacuene exana. Nexata icatsia bexëa caenë, Jesucristo, xaniavaetsia jumecovënëta Dioso pitorobicueniatsi. Nexata Jesucristo pejamatabëcueneta, jivi ayaibitsaëtoxaneto Dioso aneconijibia tanetsi.

²⁰ Bajayata Dioso Moiséspijinëta najumecopata jivi pejumecovënëtsinexa. Nexata bajarapalivaisi itavetatsi pibisiacuene picani pexanaeyaniva. Itsiata baitsi jane jivi apo caëjëpaetsi penajamatabëcuenesaëtsinexa. Nexata pibisiacuene exanabiaba. Nexata bajarapalivaisi pitavetsixaetsi pibisiacuene picani pexanaeyaniva, itsiata jivi pibisiacuene itsa exana, nacueneyapëtane pibisiacuene pexanaejava. Nexata jivi pevajënaeyabelia pibisiacuene itsa exana, Dioso pijinia pevajënaeyabelia bitso itaxutotsoniataeponatsi.

²¹ Daxitatsi tēpaenatsi. Tsipaji daxitatsi pibisiacuene exanatsi. Bajara pijinia pacuenia daxitatsi Dioso vajanacaitaxutotsoniataexae, Dioso aneconijibia nacatane. Dioso nacarajutsiana matababi apo peverevereaejava vajatuxanenë Jesucristo vajanacasivatēpaexae.

6

Pacuenia Dioso pejumecovënëtsivi pejanajamatabëcuene yajavajinavanapa yabara pelivaisi

¹ Itsajivi meta jamatabëcuenenavëxaniabiaya jamatabëjumaitsi tsane: “Dioso vajanacaitaxutotsoniataexae, aneconijibia nacatane. Nexata icatsia ayaicuenia Dioso vajanacaitaxutotsoniataenexa, vajavajënaeyabelia pibisiacuene exanavanapaenatsi,” jamatabëjai meta tsane jamatabëcuenenavëxaniabiaya.

² Jume raja! Pëtsa baja vaxaitsi pibisiacuene exanatsi pematatsënëa. Petēpaenë baja apo najamatabëxainae pibisiacuene pexanaenexa. Bajara pijinia pacuenia vaxaitsi ata bejamatabëcueneitsitsi pibisiacuene vajaexanaeyaniva.

³ Paxamë bepayapëtaneme pajamatabëcuene yabara nabautisabatsi. Itsa nabautisabatsi, becaeperabëto nacaexana Jesucristojavabelia. Nexata vaxaitsi bejamatabëjumaitsiitsi mapacueniaje: “Jesucristo cruzata itsa tēpa, xanë ata betaneyajavatēpae cruzata,” bejamatabëjaitsi. Bajarapajamatabëcuene yabara nabautisabatsi.

⁴ Itsa Jesucristo bevajanacayajavatēpae, nexata bevajanacayajavamëthëtsitsi. Nexata Jesucristo petēpaecujinae, Dioso pesaëta icatsia itsa asaëyaexanatsi, bevajanacayajavaasaëyaexanaetsi icatsia. Vaxaitsi pejanajamatabëcuene vajayajavajinavanapaenexa, copatatsi baja vajaperujumatabëcuenemi. Bajarapajamatabëcuene yabara nabautisabatsi.

⁵ Becaeperabëto vajanacaexanaexae Jesucristojavabelia, nexata daxitatsi Jesucristo cruzata bevajanacayajavatēpae. Nexata Jesucristo petēpaecujinae, Dioso icatsia itsa asaëyaexanatsi, bevajanacayajavaasaëyaexanaetsi.

⁶ Jesucristo itsa rutatsi cruzata pebeyaxuabinexatsi, vajaperujumatabëcuenemi yajavarutatsi vajanacavecuajibiaexanaenexa pibisiacuene vajanacaexanaeya exanaejamatabëcuenemi. Bajarapacuenia vajanacatoexanaexae, pematatsënëa baja apo hexanaetsi pibisiacuene.

⁷ Pacuenia baja petēpaenë pibisiacuene apo exanae, bajara pijinia vaxaitsi ata bejamatabëcueneitsitsi pibisiacuene vajaexanaeyaniva.

8 Jesucristo cruzata bevajanacayajavatēpaexae, nexata bejamatabējumaitsi mapacueniaje: “Yajavajinavanapaenatsi Jesucristo daxitamatacabijavabelianexa,” bejamatabējaitsi.

9 Yapētanetsi vajatuxanenē Jesucristo Dioso icatsia piasaēyaexanaejavatsi petēpaecujinae. Nexata baja icatsia Cristo pematatsēnēa apo tēpae tsane.

10 Itsa baja Cristo tēpa daxitajivi pibisiacuene pexanaecononi yabara, cae-cuenia copiarutsiaya sivatēpa daxitamatacabijavabelianexa. Nexata baja Cristo icatsia pematatsēnēa apo tēpae tsane. Biji rajane Dioso yajava daxitamatacabijavabelianexa asaē tsaponaponae tsane athēbētatsia, itsajotatsia ajibi petēpaecue.

11 Nexata paxamē panejamatabēēthētota pajamatabējumaitsimēre tsavana-pae: “Tajaperujamatabēcuenemi baja navecuatēpaeyabajāē. Nexata baja pibisiacuene apo exanaenē tsane. Biji rajane asaēnē baja tsaponaponae Dioso taneitorobicuenia tatoexanabiabinexa. Tsipaji baja tajatuxanenē Jesucristo neyjavaponapona,” pajamatabējamēre tsavanapae.

12 Bajaraxuata pētsa baja panajamatabēxainabiabame pibisiacuene paneexanaenexa panijacuata panenatojitsipacuenia.

13 Pētsa panacopatame daxita xua pibisiacuene paneexanaenexa. Tsipaji paxamē bepanetēpaecujinae, Dioso icatsia bepapecaasaēyaexanaevi. Nexata pajumaitsimēre tsabiabi Diosojavabelia: “Tajatuxanenē, catonucatsi majotaje. Cajamatabēcueneevetaponaponaenatsi daxitamatacabijavabelianexa pacuenia xamē jitsipame tacatoexanabiabinexa,” pajamēre tsabiabi Diosojavabelia.

14 Nexata pacacāējēpaena panenajamatabēcuenesaētsinexa icatsia caevēalia paneexanaeyaniva papibisiacuene panijacuata panatojitsipame. Tsipaji Dioso papecaitaxutotsoniataexae, Dioso pacayavenonabiabiana. Nexata baja apo paexanavanapaemē tsane pacuenia pacaitoroba Dioso Moiséspijinēta penajumecopatsilivaisi.

Pacuenia itsane pajivi nacopata ēpibisiacuene pexanaejavabelia yabara pelivaisi

15 Itsajivi meta jamatabēcuenenavēxaniabiaya jamatabējumai tsane: “Dioso vajanacaitaxutotsoniataexae, aneconijibia nacatane. Nexata baja tsiteca apo exanavanapae tsanetsi pacuenia nacaitoroba Dioso Moiséspijinēta penajumecopatsilivaisi. Nexata baja itaxutojema pibisiacuene exanavanapaenatsi,” jamatabējai meta tsane itsajivi jamatabēcuenenavēxaniabiaya. ijume raja! Pibisiacuene apo hexanavanapaetsi.

16 Paxamē rabaja xaniavaetsia payapētaneme mapacuenije. Itsa panacopatsipame itsanē papijajivinexamē, nexata pacuenia bajaraponē pacaitorobabiaba, pajumecovēnētabiabijitsipame. Bajara pijinja paitsimē tsipae itsa panacopatsipame pibisiacuene paneexanabiabinexa. Nexata bajarapapibisiacuene bepapijajivimēcuenia, pacuenia pacajamatabēcuenaitorobabiaba, paexanavanapaejitsipame. Nexata bajarapaneconi pejamatabēcueneta papitsipame panetēpaejavanexa, Diosovecua panenaxuabinexa daxitamatacabijavabelianexa. Itsiata itsa pajumecovēnētavanapaename Dioso, nexata pacuenia Dioso pacatojitsipa, patoexanavanapaename.

17 Bajayajebi picani panacopatame pibisiacuene paneexanavana-paenexa. Nexata pibisiacuene bepapijajivimēcuenia, pacuenia pacajamatabecuenaitorobabiaba, ēpibisiacuene paexanavanapame. Nexata itsiata maparucaeje daxita panejamatabēcueneta pajumecovēnētavanapame baja papexaniajailivaisi itsamonae pacatsipaeba. Bajaraxuata paxamē

yabara Diosojavabelia jumaitsinē tsabiabi: “Xanepana rabaja. Ayaicuenia yavenoname bajarapamonae,” janē tsabiabi.

18 Aeconoxae baja Dioso pacacopatsiaexana pibisiacuene paneexanavanapaejavami. Nexata jane baja panajamatabēxainame ēpexaniacuene paneexanavanapaenexa.

19 Peyapēxanepanaeucenia pacatoyaquinatsi mapalivaisije xaniavaetsia panejumeyapētaenexa xua yabara pacatoyaquinatsi. Bajayajebi picani panacopatame pibisiacuene paneexanavanapaenexa. Nexata bajarapapibisiacuene bepapijajivimēcuenia pacuenia pācājamatabēcueneitorobabiaba, ēpibisiacuene picani paexanavanapame panevajēnaeyabelia. Itsiata baja aeconoxae panajamatabēcuenerajure Diosojavabelia ēpexaniacuene paneexanavanapaenexa panevajēnaeyabelia. Bajarapacuenia Dioso pacatojitsipa paneexanavanapaenexa.

20 Pamatacabi picani abaxē ēpibisiacuene paexanavanapame, Dioso papecatojitsipacuenia apo paexanavanapaemē. Saya jamatejema pajinavanapame.

21 Itsiata apo pacatoxanepanae itsacuenejavayonexa ata daxita papibisiacuene picani paexanavanapame. Payaauramē tsabiabi pibisiacuene paneexanaejava. Pamonae tsiteca pibisiacuene exanavanapa, bajarapamonae Diosovecua naxuabiana daxitamatacabijavabelianexa.

22 Paxamē rabaja Dioso pacacapanepa pibisiacuene paneexanaeneconimivecua. Bajaraxuata Diosojavabelia panajamatabēcuenerajutame baja Dioso papijajivinexamē. Nexata apo panacueratsimē tsane. Dioso papecatojitsipacuenia pajinavanapaename. Panetēpaecujinae paxainaename matacabi apo pevereverecaejava.

23 Pamonae pibisiacuene pexanaevi, Dioso rajutsianatsi petēpaejavanexa, Diosovecua penaxuabinexa daxitamatacabijavabelianexa. Pamonae jumecovēnēta vajatuxanenē Jesucristo pesivatēpaejavatsi pijaneconi yabara, bajarapamonae itsamatacabi Dioso amoneya rajutsianatsi matacabi apo pevereverecaejava.

7

Pacuenia Dioso pejumecovēnētšivi Dioso Moiséspjiinēta penajumecopatsilivaisi apo bejumecovēnētšipeccapanepaenexatsi yabara pelivaisi

1 Tajamonae, payapētaneme rabaja Dioso Moiséspjiinēta penajumecopatsilivaisi. Nexata baja pijinia payapētaneme pacuenia jivi bajarapalivaisi bejumecovēnētavanapa itsa abaxē asaē tsavanapae mapanacuataje. Itsiata baitsi jane itsa baja tēpa, acuenebi baja pematatsēnēa bajarapalivaisi pejumecovēnētavanapaenexa.

2 Pova baja pamona pexainaeva, acuenebi pevecuanaviatsinexa pamona, penacojobinexa icatsia itsanējavabelia. Tsipaji Dioso Moiséspjiinēta penajumecopatsilivaisi itaveta bajarapacuenē. Itsiata baitsi jane pova baja pamona vecuatēpatsi, nexata matapania tocopatatsi penacojobinexa icatsia itsanējavabelia itsa jitsipa penacojobijava.

3 Pova pamona pexainaeva, itsa nacojobijitsipa itsanējavabelia, pamona abaxē itsa asaē tsaponaponae, nexata bajarapova ayaineconi natsiexanaejitsipa Diosojavabelia. Tsipaji pamonavecua itsanējavabelia naperabēquenetsiatea ponaponaejitsipa. Itsiata baitsi jane baja pova baja pamona

vecuatēpatsi, Dioso Moiséspijinēta penajumecopatsilivaisi apo itavetsitsi penacojiobijava itsanējavabelia. Nexata pova baja pamona vecuatēpatsi, nacojiobi ata icatsia itsanējavabelia, ayaineconi apo natsiexanae tsipae Diosojavabelia.

⁴ Tajamonae, bajara pijinia paitsimē paxamē ata. Pacuenia petiriva pamona pitorobabiabicueniatsi, jumecovēnētabiaba, bajara pijinia pacuenia pajumecovēnētabiabame picani Dioso Moiséspijinēta penajumecopatsilivaisi papecaitorobicuenia. Jesucristo bepaneyajavatēpaexae, nexata Dioso Moiséspijinēta penajumecopatsilivaisi bepanevecuatēpae. Nexata baja icatsia apo pajumecovēnētavanapaemē bajarapalivaisi papecaitorobicuenia. Maparucaeje Cristo baja papijajivimē, ponē icatsia Dioso asaēyaexanatsi petēpaecujinae. Cristo icatsia Dioso bepapecayajavaasaēyaexanae pacuenia Dioso pacatojitsipa paneexanavanapaenexa.

⁵ Pamatacabi abaxē Cristo pelivaisi apo jumecovēnētsitsi, pibisiacuene exanavanapatsi vajacuata vajanatojitsipaecuenia. Nexata bajarapamatacabi itsa nacaitaveta Dioso Moiséspijinēta penajumecopatsilivaisi pibisiacuene vajaexanaeyaniva, caranata saya bevajanacaitorobi pibisiacuene vajaexanaenexa. Nexata bitso pibisiacuene exanavanapatsi. Bajaraxua yabara picani Diosovecua naxuabaijinavanapatsi.

⁶ Itsiata baja maparucaeje palivaisi Dioso Moiséspijinēta najumecopata, bajarapalivaisi vajajumecovēnētsijavami, Dioso baja nacacopiaexana Cristo bevajanacayajavatēpaexae. Nexata papexaniacuene aeconoxae exanavanapatsi, apo exanavanapaetsi saya vajanacaitorobixae bajayata peyaquinaelivaisimi, Dioso Moiséspijinēta penajumecopatsilivaisi. Jume baja cajena. Espiritu Santo raja pejanajamatabēcueneta vajanacaitorobixae, exanavanapatsi bajarapapexaniacuene.

Dioso Moiséspijinēta penajumecopatsilivaisi, pacuenia ata Pablo pibisiacuene pexanaenexa najamatabēcaina, penavajunupaebijava, yabara pelivaisi

⁷ Itsajivi meta jamatabēcuenenavēxaniabiaya jamatabējumaitsi tsane: “Dioso Moiséspijinēta penajumecopatsilivaisi, itsacuenejavayonexa ata apo xanepanae,” jamatabējai meta tsane. ¡Jume raja! Itsa ajibi tsipae bajarapalivaisi, nexata apo nacueneyapētaenē tsipae pibisiacuene taexanaejava. Tsipaji Dioso Moiséspijinēta penajumecopatsilivaisita, itsalivaisianē yajava, jumaitsi mapacueniaje: “Pētsa cobecaēbame itsajivi pexainaejava,” jai. Nexata itsa apo yapētaenē tsipae bajarapalivaisi, xanē apo nacueneyapētaenē tsipae pibisiacuene taexanaejava, itsajivi pexainaejava cobecaēbi atanē.

⁸ Dioso Moiséspijinēta penajumecopatsilivaisi, itsa nitaveta itsamonae pexainaejava tacobecaēbivaniva, nexata caranata bitso betanitorobi tacobecaēbinexa itsamonae pexainaejava. Pamatacabi abaxē apo yapētaenē Dioso Moiséspijinēta penajumecopatsilivaisi, apo jitsipaenē picani taexanaenexa bajarapacuenie.

⁹ Bajayata abaxē itsa apo yapētaenē bajarapalivaisi, jamatejemanē saya. Itsiata pamatacabi xaniavaetsia yapētaniji xua yabara Dioso nitaveta, nexata jitsipajē bitso pibisiacuene taexanaenexa. Bitso najamatabēcainajē. Bajarapalivaisi pejamatabēcueneta yapētaniji pibisiacuene taexanaexae, Diosovecua naxuabiaya tatēpaejavanexa picani.

¹⁰ Bajarapalivaisi Dioso najumecopata Moiséspijinēta jivi picani jamatabēcuenebarēyaya xaniavaetsia pejinavanapaenexa. Itsiata xanē bajarapalivaisi pejamatabēcueneta apo jamatabēcuenebarēyanē. Tsipaji

pibisiacuene taexanaexae, bajarapalivaisi pejamatabēcueneta yapētaniĵi Diosovecua tanaxuabijavanexa picani. Nexata bitso najamatabēxainajē.

¹¹ Papibisiajamatabēcueneta xainajē tajamatabēēthētota, pibisiacuene nexanaeyaexanabiaba. Nexata pacuenia jumaitsi bajarapalivaisi, naneconitajē picani Diosovecua tanaxuabinexa.

¹² Palivaisi Dioso Moiséspijinēta najumecopata, pexanialivaisi cajena.

¹³ Nexata bajarapapexanialivaisi pejamatabēcueneta yapētaniĵi Diosovecua tanaxuabijavanexa picani. Tsipaji xanē tajamatabēēthētota papibisiajamatabēcueneta xainajē pejamatabēcueneta, exanabiabajē pibisiacuene. Bajaraxuata Diosovecua naxuabijitsianē picani. Bajarapacuenia daxitajivi bajarapalivaisi pejamatabēcueneta, nacueneyapētaena pibisiacuene pexanaejava. Taexanaexae xua bajarapalivaisita itaveta, naneconitajē Diosojavabelia. Bajarapalivaisi itsa yapētaniĵi, nexata tajamatabēēthētota papibisiajamatabēcueneta xainajē, nitorobapona bitsoyo pibisiacuene taexanaponanexa.

¹⁴ Palivaisi Dioso Moiséspijinēta najumecopata jivi pejumecovēnētsinexa, yapētanetsi bajarapalivaisi Dioso penajumecopatsijava. Bajarapalivaisi jivi pejumecovēnētsinexa, bexaina pejanajamatabēcueneta. Itsiata baitsi jane xanē bajara apo jamatabēcuenetsinē. Tajacuata saya ētanatojitsipacuenia exanaponaponajē. Caranata saya najamatabēxainabiabajē ėpibisiacuene taexanabiabinexa, papibisiajamatabēcueneta tajamatabēēthētota xainajē taneitorobabicuenia.

¹⁵ Xua pexaniacuene, jamatabēexanabiabajē picani. Itsiata bajaraxua apo exanabiabinē. Biji papibisiacuene apo jitsipaanē picani taexanabiabinexa, bajaraxua caranata exanabiabajē. “ĶDe tsaeta xuajitsia bajarapacuenia exanabiabajē?” jamatabējanē belia.

¹⁶ Itsa exanabiabajē papibisiacuene picani apo jitsipaanē taexanabiabinexa, nexata sivajamatabēbējanē tsabiabi. Bajaraxuata yapētaniĵi jane baja Dioso penajumecopatsilivaisi pexanialivaisicuene. Tsipaji Dioso penajumecopatsilivaisi itaveta pibisiacuene pexanaejava.

¹⁷ Bajarapapibisiacuene exanae atanē, itsiata apo betanatsitaexanae itajara. Papibisiajamatabēcueneta abaxē xainajē tajamatabēēthētota, nexanaeyaexanapona bajarapapibisiacuene.

¹⁸ Tajamatabēcueneta cajena bitso abeje. Yapētaniĵi itsacuenejavayonexa ata apo netoxanepanae daxita tajamatabēcueneta. Natojitsipajē picani pexaniacuene taexanabiabinexa. Itsiata apo nejamatabēcuenecaėjēpabiabi pexaniacuene taexanabiabinexa.

¹⁹ Papexaniacuene jitsipajē taexanabiabinexa picani, itsiata apo exanabiabinē. Caranata saya exanabiabajē pibisiacuene, xua picani apo jitsipaanē taexanaenexa.

²⁰ Nexata itsa exanabiabajē xua picani apo jitsipaanē taexanabiabinexa, nexata bajaraxua apo betanatsitaexanae itajara. Tsipaji papibisiajamatabēcueneta abaxē xainajē tajamatabēēthētota, nexanaeyaexanapona bajarapapibisiacuene.

²¹ Nexata jane baja yapētaniĵi pacuenia jamatabēcuenetsinē tsabiabi. Paepatota picani jitsipajē pexaniacuene taexanabiabinexa, itsiata apo exanabiabinē. Tsipaji papibisiajamatabēcueneta xainajē, abaxē yajavaponaponajē.

²² Tajamatabēcueneta jamatabējumaitsinē tsabiabi: “Jitsipajē tajumecovēnētsinexa Dioso pejumelivaisi,” jamatabējanē tsabiabi picani.

²³ Itsiata baitsi jane belia najamatabēcueneyapētaniĵi. Papibisiacuene exanabiabajē, bajarapapibisiacuene picani tajamatabēcueneta apo jitsipaanē

taexanaenexa. Tajamatabëcueneta picani jitsipajë pexaniacuene taexanaenexa, Dioso tanetojitsipaecuenia. Caranata exanabiabajë ëpibisiacuene. Tajaperujujamatabëcuene saya bepijajivitonëncuenia toponaponajë.

²⁴ ¡Xanë bitso bejiojinë! Bajarapapibisiajamatabëcuene yabara Dioso picani nenaneconitsiaexanaejitsia tanaxuabinexa Diosovecua daxitamatacabijavabelianexa. “¿Jipatsa meta nevecuaajibiaexanaena bajarapapibisiajamatabëcuene?” jamatabëjanë belia.

²⁵ Nexata Diosojavabelia jumaitsinë: “Pexaniacuene rabaja netoexaname,” janë. Tsipaji vajatuxanenë Jesucristo jamatabëcuenecaëjëpatsi taneyavenonaenexa. Bjaraxuata ëpibisiacuene jamatabëxanae atanë, jitsipajë daxita tajamatabëcuenevetsina tajumecovënëtsinexa pacuenia Dioso itoroba.

8

Pacuenia Espiritu Santo nacajamatabëcueneyavenona yabara pelivaisi

¹ Pamonaë baja Jesucristo yajavajinavanapa, bajarapamonaë Dioso baja apo naneconitsiaexanaetsi tsane. Bajarapamonaë penatojitsipaecuenia, pibisiacuene apo exanavanapae. Biji rajane exanavanapa pacuenia Espiritu Santo tojitsipatsi.

² Nexata bajarapacuenia xanë ata Jesucristo itsa yajavaponaponajë, nexata Espiritu Santo pesaëta neyavenonabiaba xaniavaetsia taponaponaenexa. Nexata baja apo exanaponaenë pibisiacuene. Papibisiajamatabëcuene picani nenaneconitsiaexanabiaba daxitamatacabijavabelianexa picani tananeconitsiaponaponaenexa, bajarapajamatabëcuenemi Espiritu Santo baja nevecuaajibiaexana.

³ Vaxaitsi vajacuata apo nacajamatabëcuenecaëjëpae vajajumecovënëtsinexa Dioso Moiséspijinëta penajumecopatsilivaisi. Bjaraxuata apo nacacaëjëpae vajacuata vajanacapanepaenexa Diosojavabelia. Itsiata Dioso caëjëpatsi vajanacapanepaenexa. Athëbëvetsica Dioso itorobica pepo caenë pexënat. Nexata mapanacuata Dioso pexënat itsa naexana, nacaperabëjëpa picani pibisiacuene vajaexanaevi. Bjaraponë vaxaitsi pibisiacuene vajaexanaeneconi yabara, nacasivatëpa. Nexata baja nacavecuaajibiaexana papibisiajamatabëcuene picani xainatsi, pajamatabëcuene picani nacaexanaeyaexanabiaba pibisiacuene.

⁴ Bajarapacuenia Dioso nacatoexana vajanacajamatabëcuenecaëjëpaenexa pexaniacuene vajaexanaejava pacuenia Dioso Moiséspijinëta penajumecopatsilivaisi jumaitsi. Nexata nacacaëjëpa vajaexanaenexa pexaniacuene. Tsjipaji apo exanavanapaetsi pacuenia vajacuata natojitsipatsi. Biji rajane exanavanapatsi pacuenia Espiritu Santo nacatojitsipa.

⁵ Pamonaë exanavanapa pijacuata penatojitsipaecuenia, bajarapamonaë jamatabëcuenenabiabatsi ëpibisiacuene pexanaenexa. Pamonaë pijinia exanavanapa Espiritu Santo pejitsipaecuenia, bajarapamonaë jamatabëcuenenabiabatsi Espiritu Santo pejitsipaecuenia pexanavana-paenexa.

⁶ Pamonaë saya exanavanapa pijacuata penatojitsipaecuenia, bajarapamonaë bepejamatabëcuenetëpaevi Dioso pitabarata. Nexata Diosovecua naxuabiaya jinavanapa. Pamonaë pijinia exanavanapa Espiritu Santo pejitsipaecuenia, bajarapamonaë jamatabëcuenebarëyaya jinavanapa Dioso pitabarata. Bjarapamonaë itsamatacabi xainaenana matacabi apo pev-ereverecaëjava.

⁷ Pamonae saya exanavanapa pijacuata penatojitsipaecuena, bajarapamonae itoya Dioso. Tsipaji apo exanae pacuena Dioso penajumecopatsilivaisi itorobatsi. Apo jamatabëcuenecaëjêpaetsi pejumecovënëtsinexa bajarapalivaisi.

⁸ Pamonae saya exanavanapa pijacuata penatojitsipaecuena, bajarapamonae apo jamatabëcuenecaëjêpaetsi pexanaenexa Dioso pejitsipaecuena.

⁹ Maparucaeje paxamë apo paexanavanapaemë pacuena panijacuata panatojitsipame. Espiritu Santo, ponë Cristo itorobica, pepacuene pacatsijamatabëca. Nexata Espiritu Santo pejitsipaecuena, paexanavanapame. Pavivi Espiritu Santo apo tsijamatabëcaetsi, bajarapavivi Cristo apo pijajivitonë.

¹⁰ Paneperabëto tËpaena pibisiacuene paneexanaejamatabëcuene. Itsiata Cristo papijajivixaemë, nexata pepo panejamatabëcuene athëbëtatsia jinavanapaena daxitamatacabijavabelianexa. Tsipaji Dioso aneconijibia pacatane.

¹¹ Dioso asaëyaexanatsi Jesús petëpaecujinae. Nexata paxamë Espiritu Santo itsa pacatsijamatabëca, pacuena Jesús Dioso asaëyaexanatsi petëpaecujinae, bajara pijinia pacuena paxamë ata Dioso pacaasaëyaexanaena panetëpaecujinae. Nexata panetëpaecujinae Dioso pacaperabëasaëyaexanaena Espiritu Santo papecatsijamatabëcaexae.

¹² Tajamonae, bajarapacuena Dioso nacaexanaena. Bajaraxuata xanepana vajaexanavanapaenexa pacuena Dioso nacatojitsipa. Copatatsi baja vajacuata vajanatojitsipaecuena vajaexanabiabijavami.

¹³ Tsipaji pibisiacuene itsa paexanavanapaejitsipame panijacuata panenatojitsipaecuena, nexata itsa patëpame, Diosovecua panaxuabijitsipame daxitamatacabijavabelianexa. Itsiata bailsi jane Espiritu Santo pappecayavenonaejamatabëcueneta itsa pacopatame panijacuata panenatojitsipaecuena pibisiacuene paneexanabiabijavami, nexata itsamatacabipaxainaename matacabi apo pevereverecejava.

¹⁴ Pamonae exanavanapa Espiritu Santo pitorobicueniatsi, bajarapamonae Dioso pexi.

¹⁵ Itsa nacatsijamatabëjunua Espiritu Santo, Dioso pexitsi nacaexana. Saya bepijajivicueniatsi apo nacaexanae cjunaviaya vajatonacuenebinexa. jJume baja cajena! Biji rajane pepacuene Dioso pexitsi nacaexana. Nexata Espiritu Santo pejamatabëcueneta: “¡Axa!” nacajaiyaexana vajavajëtsijavata Diosojavabelia.

¹⁶ Vajajamatabëëthëtota Dioso pijaEspiritu Santo nacayapëtaeyaxana Dioso pexicuenetsi.

¹⁷ Nexata Dioso pexixaetsi, itsamatacabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuena Jesucristo bejiobiaexanatsi, bajara pijinia pacuena vaxaitsi ata itsamonae nacabejiobiaexanaena. Nexata jane baja xucujinae Dioso yajavajinavanapaenatsi Dioso pijapenivenivenaenacuatatsia.

¹⁸ Xaniajai. Maparucaeje itsamonae nacabejiobiaexanapona mapanacuatate. Itsiata bajaraxua yabara apo najamatabëxainaetsi. Tsipaji baja yapëtanetsi itsamatacabi bitso vajajamatabëcuenebarëyajavanexa Dioso pijanacuatatsia.

¹⁹ Daxita mapanacuapijivi itatsacajinaeya vajënaeevetavanapa petocopiapatsinexatsi pamatacabi Dioso nacaitajëtsijitsia bajarapamonaejavabelia Dioso pexitsi vajanacaexanaecuene. Bajarapamonae vajanacayapëtaenexa Dioso pexicuenetsi, Dioso nacaitajëtsijitsia

bajarapamonaejavabelia. Vaxaitsi baja Dioso vajajumecovënëtsivi, Dioso baja nacajamatabëcuenexaniavaeta.

²⁰ Daxitacuene Dioso pexanaejava mapanacuataje pevereverecaponaena. Tspaji bajarapacuenia Dioso copata pevereverecaponaenexa. Bajaraxua apo naneconitsi ata Diosojavabelia, itsiata pevererecaena. Tspaji baja Dioso copata bajarapacuenia daxitacuene pevereverecaponaenexa Adánpijinë pibisiacuene pexanaejava pejamatabëcueneta. Itsiata baitsi jane itsamatacabi Dioso copiarucaeyaexanaena daxitacuene pevereverecaponaejava.

²¹ Dioso pexitsi nacaasaëyaexanaena vajatëpaeujinae, pacuenia copiaya Cristo ata Dioso asaëyaexanatsi. Bajarapamatacabi, daxitacuene Dioso pexanaejava mapanacuataje pevereverecaponaejava, Dioso copiarucaeyaexanaena.

²² Yapëtanetsi baja cajena pacuenia itsi daxitacuene mapanacuataje. Pacuenia itsi unupijivi, pejuvijavanë ata, bejiobi abaxë. Tspaji xaina piavitanecuene, petëpaeuene ata. Nexata abaxë tsitecapona bajarapabejiobicuene mapamatacabijavaberena ataje.

²³ Daxita xua tanetsi mapanacuataje, bajaraëxua bajarapacuenia apo bejiobi piavitanecuene yabara. Vaxaitsi ata cajena bejiobitsi tsavana-pae. Espiritu Santo vajanacatsijamatabëcaexae, yapëtanetsi mapacuneje. Dioso pexixaetsi itsamatacabi nacaperabëitothianaena pacuenia Cristo perabëitothianatsi. Nexata bitso jitsipatsi vajajamatabëëthëtovetsina Dioso vajanacaperabëitothianaenexa vajaperabëevererecaejavavecu.

²⁴ Jumecovënëtsi Jesucristo vajanacasivatëpaejava pibisiacuene vajaexanaeneconi yabara. Nexata yapëtanetsi Dioso vajanacaperabëitothianaejavanexa. Bajarapacune nexata abaxë copiaevetavanapatsi. Itsa baja Dioso nacarajutsipa xua nacarajutsipaeba, nexata baja apo copiaevetavanapaetsi tsipae vajanacarajutsinexa. Tspaji baja ajibi tsipae vajayaracopiaevetavanapaejava itsa baja nacarajutsipa.

²⁵ Nexata abaxë evetavanapatsi xua Dioso nacarajutsipaeba vajanacarajutsinexa. Nexata abaxë copiaevetavanapatsi bajayajebi ata itsajamatabëcuene vecuaxainaenejevatsi.

²⁶ Vajaajamatabëcuenesaëjibixae, Espiritu Santo nacayavenonabiaba mapamatacabi ataje abaxë bajaraxua vajacopiaevetavanapaenexa. Vaxaitsi apo yapëtaetsi xaniavaetsia vajavajëtsinexa Diosojavabelia. Nexata Espiritu Santo bëpënëa bitso nacasivanajamatabëxainaeya nacatovajëtabiaba asaëyata Diosojavabelia. Xua apo vënëjonecapanapaetsi, Espiritu Santo nacatovajëtabiaba.

²⁷ Dioso cajena vajanacajamatabëcueneyapëtaenë pacuenia najamatabëxainatsi. Nexata Dioso yapëtane xua Espiritu Santo nacatovajëtsijitsia. Tspaji Dioso vajanacatojitsipacuena, Espiritu Santo nacatovajëtabiaba Diosojavabelia Dioso pijajivixaetsi.

Pacuenia Dioso pejumecovënëtsijivi daxita pibisiacuene tocopiapatsi atatsi, bejamatabëcuenematatoxeneta daxita bajarapapibisiacuene Jesucristo peyavenonabiabixaetsi yabara pelivaisi

²⁸ Yapëtanetsi mapacuneje. Daxita xua apo vajajitsipacuene, Dioso nacatocopata vajanacatocopiapatabiabinexa. Nexata bajaraxua nacatocopiapatabiaba saya vajanacajamatabëcuenëjëtsinexa. Nexata bajaraxua itsa nacajamatabëcuenëjëta, apo nacatsitapexaniacuene itajara. Itsiata Dioso vajajumecovënëtsivi yapëtanetsi bajaraxua vajanacajamatabëcuenëjëtsijava

pejamatabēcueneta vajanacajamatabēcueneta asaēyaexanaejavanexa Diosojavabelia. Vaxaitsi Dioso nacajunata pexitsi vajanacaexanaenexa pacuenia nacasivanajamatabēxaina.

²⁹ Vajanaexanaevajēnaeya ata, Dioso yapētane pexitsi vajanacaexanaejavanexa. Nexata vjanaexanaevajēnaeya ata, Dioso nacasivanajamatabēcuenevereta vajanacaexanaenexa pacuenia pexēnato jamatabēcuenetsi. Nexata vajanaexanaevajēnaeya ata, Dioso nacasivanajamatabēcuenevereta Dioso pexēnato pejujapijivitsi ayaiBITSaētotsi vajanacaexanaenexa.

³⁰ Bajarapacuenia vajanaexanaevajēnaeya ata, Dioso vjanacasivanajamatabēcueneta veretsixae, najamatabēxaina pexitsi vajanacaexanaenexa. Nexata jane baja mapamatacabitaje nacajunata pexitsi vajanacaexanaenexa. Dioso vjanacajunatsixae, nexata nacavecuajibiaexana pibisiacuene vajaexanaenecanimi. Nexata baja aneconijibia Dioso nacatane. Nexata itsamatabi Dioso yajavajinavanapaenatsi Dioso pijapenivenivenaenacuatsia.

³¹ Nexata Dioso yabara bejumaititsi mapacueniaje: “Dioso cajena vjanacayavenonaenē. Nexata itsajivi ata apo caējēpaetsi vjanacajamatabēcueneta matatoxenetsinexa,” bejaitsi.

³² Dioso baja cajena apo nacavecuasiva pexēnato. Biji rajane copata pexēnato vjanacasivatēpaenexa daxita vaxaitsi vjaneconi yabara. Nexata bajarapacuenia vjanacatoexanaexae, yapētanetsi Dioso vjanacarajutsijavanexa daxita vjanamatavenonaecueneta ata.

³³ Dioso baja cajena nacaitapeta. Nexata vaxaitsi yabara Dioso jumaititsi: “Bajarapamonae baja aneconijibia taniji,” jai Dioso najumecapanepaeya. Nexata cajena itsajivi ata apo caējēpaetsi vjanacanecanitsinexa Diosojavabelia pibisiacuene vajaexanaejava yabara.

³⁴ Itsajivi ata cajena apo caējēpaetsi vjanacanecanitsiaexanaenexa pibisiacuene vajaexanaejava yabara. Tsipaji baja capanepaeya Jesucristo nacasivatēpa vjanacanecanimatamotsinexa. Nexata Cristo petēpaecujinae Dioso icatsia asaēyaexanatsi. Maparucaeje Jesucristo eca athēbētatsia, Dioso pemuxuneneta, pecujanenia. Cristo pijajivitsi Diosojavabelia nacaya-jivicaucuijai.

³⁵ Cristo baja cajena vjanacaasivanē. Nexata itsajivi ata apo caējēpaetsi Cristo vjanacaasivacuene vjanavecuacopiarucaeyaexanaenexa. Nacabejiobiaexanae ata tsipae, piayapēbejecuene nacamotcopiapatsi ata tsipae, itsiata vjanacaasivanē Cristo tsiteca nacaasiva tsipae. Vjanacaitoyaxae, nacabarajinae ata tsipae, vajani tsabiabi ata tsipae, itsiata vjanacaasivanē Cristo tsiteca nacaasiva tsipae. Bitso bejiobi atatsi tsipae, bitso nacatsiyai ata tsipae, nacabeyaxuabiapaebi ata tsipae, daxita bajarapitsicuene nacamotcopiapatsi ata tsipae, itsiata vjanacaasivanē Cristo tsiteca nacaasiva tsipae.

³⁶ Vaxaitsi yabara mapajamatabēcuenelivaisi jēpaje. Bajayata Dioso pijajivi navajunupaeba Diosojavabelia pacuenia itsamonae bejiobiaexanaponatsi. Dioso pejumelivaisibaxutota bajarapamonaemi penavajunupaebijume itanerubena. Jumaititsi mapacueniaje:

Xamē Diosomē, panijajivixanē, daxitamatabi itsamonae jamatabēpanebeyebabiaba picani. Pacuenia oveja pebeyaxuabinexa capona, bajarapacuenia jamatabēpanexanabiaba, jai Dioso pejumelivaisibaxutota.

Bajara pijinia pacuenia vaxaitsi ata aeconoxae nacaexanapona.

³⁷ Nexata daxita xua pibisiacuene, nacatocopiapatabiabiana. Nacabejio-biaexanabiabiana. Nexata itsiata vaxaitsi bajaraxua jamatabëcuene mata-toxentabiabianatsi. Tspaji Cristo vajanacaasivanë, nacayavenonabiabi-ana.

³⁸ Nexata yapëtaniji mapacueneje. Itsacuenejavayo ata apo caëjëpaetsi Cristo vajanacaasivacuene vajanacavecuacopiarucaeya exanaenexa. Vajätëpacuene ata, vajaasaëtsavanapacuene ata, ängelevi ata, dovathivi penamatacaitorobivi ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Piayapëbejucuene, xua baja nacamocopiapata, xua ata abaxë nacatocopiapatsijitsia, daxita bajaraxua ata, apo caëjëpaetsi Cristo vajanacaasivacuene vajanacavecuacopiarucaeya exanaenexa.

³⁹ Athëbëabetsia vajaponaejava ata, ira bëxëpanabereca vajaponaejava ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Dioso pexanaejava, itsacuenejavayo ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Yapëtanetsi Dioso vajanacaasivajava. Tspaji Dioso vajanacaasivaxae, vajatuxanenë Jesucristo athëbëvetsica itorobicatsi vajanacasivatëpaenexa mapanacuataje.

9

Pacuenia Dioso pijajivinexa itapeta judïovi yabara pelivaisi

¹ Najamatabëcuene copatajë Cristojavabelia. Nexata apo najumetsënëtsinë. Pexaniajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapëtaenexa, Espiritu Santo tajamatabëthëtota neyapëtaeyaxana.

² Bitso sivanajamatabëxainajë tavëna judïovi, Israel nacuapijivi. Belia betaajamatabëtane tasivanajamatabëxainaejava bajarapamonae.

³ Bajarapamonae apo pejumecovënëtsixae Cristo, bitso sivanajamatabëxainajë. Bajaraxuata bajarapamonae yabara jamatabëjumaitsinë: “Itsa xanë Dioso netocopatsipa tanaxuabinexa Cristovecua, bajarapamonae juya pecapanepaenexatsi, nexata bajarapacuenia exanaejitsipajë bajarapamonae Dioso pecapanepaenexatsi,” jamatabëjanë belia tavëna judïovi yabara.

⁴ Bajarapamonae judïovi, Israelpijinë pemomoxi. Bajarapamonae pijasalinaivimijavabelia bajayata picani Dioso ayaicuenia yavenonabiaba. Itsiata bajarapamonaemi Dioso apo jumecovënëtsi. Dioso picani itapeta bajarapamonaemi Dioso pexi pexanaenexa. Bajarapamonaemi tanenua baja picani Dioso pijapenivenivenaecotia. Dioso baja picani najumecapanepaeya jumaitsinua bajarapamonaemijavabelia peyavenonabiabinexa. Dioso Moiséspijinëta penajumecopatsilivaisi ata, rajuta picani bajarapamonaemi pejumecovënëtaavanapaenexa. Dioso picani itorobanua bajarapamonaemi pexanaenexa templobo, bajarapabota pevajëcabiabinexa Diosojavabelia. Dioso picani najumecapanepaeya jumaitsinua petoitorobinexatsica Cristo bajarapamonaemi picani pecapanepaenënxatsi pibisiacuene pexanae neconimivëcua.

⁵ Bajarapamonaemi pijasalinaivimi, pevënëjonevimi Dioso pejumecovënëtsijava. Cristo itsa naexana mapanacuataje, judïonëcuenia naexana. Cristo nexata pijamonae judïovi. Bajaraponë Cristo, Diosonë baja cajena, daxitacuene pevetsinë. Nexata bajaraponëjavabelia jivi jumai tsabiabi tsane: “Xamë Cristomë, bitso baja cajena ayaijamatabëcuenenëmë,” jai tsabiabi tsane daxitamatacabijavabelianexa. Bajara itsi tsane.

⁶ Itsiata daxita judíovi apo jumecovënëtsi pacuenia Dioso najumecapanepaeya jumaitsi. Nexata Dioso apo toexanae daxita judíovijavabelia pacuenia Dioso najumecapanepaeya jumaitsi. Nexata Dioso yabara vaxaitsi jamatabëcuenenavëxaniabiaya apo bejumaitsitsi mapacueniaje: “Pacuenia Dioso najumecapanepaeya jumaitsi judíovijavabelia petoexanaenexa, bajarapacuenia itsiata Dioso apo toexanae daxita judíovijavabelia,” apo bejaitsi vaxaitsi jamatabëcuenenavëxaniabiaya Dioso yabara. Bajarapacuenia Dioso yabara vaxaitsi jamatabëcuenenavëxaniabiaya apo bejumaitsitsi. Tspipaji Dioso tajëvelia apo itapetsi daxita judíovi pijajivinexa. Bajaraxuata pacuenia Dioso tajëvelia najumecapanepaeya jumaitsi, apo toexanae daxita judíovijavabelia.

⁷ Tspipaji bajayata Abrahampijinë pemomoxi ayaibitsaëto xainae ata, daxita itsiata Dioso apo totaetsi Abrahampijinë pepe pemomoxicuenia. Dioso tajëvelia jumaitsi Abrahampijinëjavabelia mapacueniaje: “Anijanëbeje nexënatobeje xainae atamë tsane, taitapetsinëxae, caenë nexënato, Isaac, pexi catotaenatsi pepe nemomoxicuenia,” jai Dioso.

⁸ Bajaraxuata yapëtanetsi mapacuenieje. Pajivi naexanae ata Abrahampijinë pemomoxiyajuvënëjivi, itsiata bajarapajivi Dioso apo taetsi Abrahampijinë pepe pemomojivicuenia. Matapania pajivi jumecovënëta pacuenia Dioso najumecapanepaeya jumaitsi, bajarapajivi jane baja Abrahampijinë pepe pemomojivicuenia tanetsi Dioso.

⁹ Dioso tajëvelia najumecapanepaeya jumaitsi Abrahampijinëjavabelia mapacueniaje: “Icatsia caevaicujinae patsianajë. Nexata nijava, Sara, xainaena pexënatonacueto,” jai Dioso Abrahampijinëjavabelia Isaacpijinënexa yabara.

¹⁰ Nexata jane baja xuacujinae Isaacpijinë naexana. Bajaraxuacujinae icatsia bexëa Isaacpijinë baja pepuanacojiobi, Dioso icatsia tajëvelia jumaitsi vajasalinainë Isaacpijinë pijava Rebecapijivjavabelia, Rebecapijiva baja pepuayacotaponaponae sapananëbejenexa.

¹¹⁻¹³ Itsa abaxë bajaraponëbeje apo naexanaebeje, pexaniacuene ata abaxë itsa apo exanaebeje, pibisiacuene ata abaxë itsa apo exanaebeje, bajarapamatacabi Dioso tajëvelia jumaitsi Rebecapijivjavabelia mapacueniaje: “Panacuetonëyo copiyaya cavecuaexanaena, bajaraponëyo jamatabëcueneevetsiana pejuyapijinë pitorobabiabinexatsi pijajivitonëcuenia,” jai Dioso tajëvelia Rebecapijivjavabelia. Bajarapacuenia Dioso pejumait-sijava Rebecapijivjavabelia najumejëpabeje pacuenia jumaitsi Dioso pejumelivaisibaxutota. Rebecapijiva pexënatobeje yabara Dioso pejumelivaisibaxutota jumaitsi mapacueniaje: “Asivanë juyapijinë Jacob, matapijinë Esaú matatoxenetsia,” jai Dioso pejumelivaisibaxutota Dioso pejumait-sijava. Nexata bajaraponëbeje tocopiapatatsibeje pacuenia Dioso tajëvelia jumaitsi pacuenia Dioso itapetsijitsiatsi juyapijinë. Baitsi Jacob Dioso pijajivitonënexa itapetatsi matapijinëvecua. Nexata bajarapacuenia yapëtanetsi mapacuenieje. Dioso cajena baitapeta pajivi jamatabëitapeta pijajivitonënexa. Dioso apo itapetsi bajarapajivi pexaniacuene pexanaejava yabara. Bajarapacuenia Dioso tajëvelia itapeta juyapijinë matapijinëvecua penaexanaevajënaeyabeje ata cajena.

¹⁴ Pajivi Dioso jitsipa pitapetsinexa, nexata itsa itapeta, bajaraxua yabara vaxaitsi apo bejumaitsitsi mapacueniaje: “Dioso baja pacuenia exana, apo xanepanae,” apo bejaitsi vaxaitsi.

¹⁵ Tspipaji cajena Dioso bajayata jumaitsi Moiséspijinëjavabelia: “Pajivi jamatabëitaxutotsoniataniji, itaxutotsoniatanajë,” jai Dioso.

¹⁶ Nexata pajivi Dioso jamatabëitaxutotsoniatane, itaxutotsoniatane. Nexata itsajivi apo jamatabëjumaiti ata: “Jitsipajë xanë Dioso taneitaxutotsoni-

ataejava,” apo jamatabėjai ata, itsiata Dioso itaxutotsoniatanetsi. Bajarapajivi itsacuenejavayo ata Dioso pejisipaecuenia apo exanabiabi ata, itsiata Dioso itaxutotsoniatanetsi.

¹⁷ Palivaisi bajayata Dioso jumaitsi Egiptonacua pevetsinėjavabelia, bajarapalivaisi Dioso pejumelivaisibaxutota ruca. Jumai tsarucae mapacueniaje: “Xanė catocopatatsi nevetsinexa nijaira. Pinijicuene taexanaejava exanaenajė paxamė tuatuajėta. Itsiata baitsi jane apo nejumecovėnėtsimė tsane. Nexata daxita nacuapijivi neyapėtaena tasaėnėcuene,” jai tsarucae Dioso pejumelivaisibaxutota Egiptonacua pevetsinėjavabelia Dioso pejumait sijava.

¹⁸ Nexata pajivi Dioso jamatabėitaxutotsoniatane, itaxutotsoniatane. Pajivi pijinia Dioso jamatabėajamatabėcuenetajayaexana pejumecovėnėtsiyanivatsi, ajamatabėcuenetajayaexana.

¹⁹ Nexata meta Dioso yabara pajumait simė tsane: “Bajarapacuenia Dioso jivi itsa ajamatabėcuenetajayaexana pejumecovėnėtsiyanivatsi, nexata bajarapajivi Dioso apo benaneconitsia exanae. Tsipaji bajarapajivi apo jumecovėnėtsi Dioso pijamatabėcuenetajaya exanaexaetsi” pajamė meta tsane Dioso yabara.

²⁰ Tajamonae, pėtsa bajarapacuenia pajumait simė. Dioso yabara cajena bajarapacuenia apo bepajumait simė. Tsipaji Dioso pacaexana. Canalito itsa caėjėpaejitsipatsi pecuaicuajainexa, itsacanalitovecua saicayacuenia faratsi atatsi, pefaratsivatsijavabelia apo jumait si tsipae: “¿Detsa xuajitsia itsacanalitovecua saicayacuenia nefaratame?” apo jai tsipae pefaratsivatsijavabelia.

²¹ Tsipaji atsananitota canalito pefaratsiva caėjėpatsi canalito pefaratsinexa pacuenia jamatabėfarata. Nexata caėjėpatsi pefaratsinexa copiaya pexaniacanalito bo tuatuajėta itabėtsiaya peetsinexa. Bajaraxuacujinae bajara paatsananitoyajuvėnėjavata caėjėpatsi pefaratsinexa itsacanalito, beveliacanalito, pecajayababiabinexa saya.

²² Bajara pijinia pacuenia Dioso baja exana jivijavabelia pacuenia tsitaxanepanatsi. Ayaicuenia Dioso jamatabėnaneconitsiaexana daxita pamonaenaneconita bajaraponėjavabelia. Jamatabėtsitajėtanua pesaė bajarapamonaejavabelia. Itsiata baitsi jane abaxė bajayajebi Dioso najamatabėcuenecataita peverebiabivijavabelianexa.

²³ Biji rajane pamonaenaneconita Dioso jamatabėcapanepa, bajarapamonae capanepaena. Bajarapacuenia Dioso jamatabėexana vaxaitsi vajanacaitaxutotsoniatavejivaberena, vajanacatsitanajamatabėcuenie itajėtsinexa ayaijamatabėcuenie pexainaejava. Tsipaji baja cajena vajanaxanaevajėnaeya ata, Dioso nacaitapeta vajayajavajinavanapaenexa athėbėtatsia.

²⁴ Vaxaitsi judıoviyajuvėnėvitsi. Itsamonae vaxaitsiyajuvėnėvi apo judıovi. Itsiata Dioso nacajunata daxitatsi pijajivinxatsi.

²⁵ Dioso pejumelivaisibaxutota, bajayata Oseaspijinė peyaquinaebaxutota, Dioso pejumait sijava apo judıovi yabara, tajėvelia jumait si mapacueniaje:

Pamonaenaneconita picani apo tajajivi, bajarapamonae yabara jumait sinė tsane: “Tajajivi raja mapamonaeje,” janė tsane. Bajarapamonae picani apo jitsipaenė. Itsiata bajarapamonae yabara jumait sinė tsane: “Tajajivi raja mapamonaeje, tasivavi,” janė tsane.

²⁶ Panacuapijivijavabelia picani jumait sinė tsane: “Paxamė raja apo patajajivimė,” janė tsane picani, itsiata bajarapanacuapijivi bexėa nejumecovėnėtsiana. Nexata bajarapanacuapijivi yabara itsamonae jumai tsane: “Mara pamonaenaneconita picani piasaėtsaponaponaenė pexije,” jai tsane,

jai Oseaspjijnē bajayata peyaquinaebaxutota, pamonaē apo judíovi ata, Dioso pijajivi pexanaejavanexatsi yabara.

²⁷ Isaiaspjijnē pijinia bajayata tajēvelia judíovi yabara jumaitsi mapacueniaje: “Israelpjijnē pemomoxi bitso ayaibitsaētoخانeto tsane. Pacuenia manuamenepijitajetaboatsapērē itsi, bajara itsane. Itsiata baitsi jane bajarapamonaeyajuvēnēvi, caejiviyobeje saya, Dioso capanepaenatsi.

²⁸ Daxita pamonaē naneconita Diosojavabelia, bajarapamonaē naxanitsi-ayo Dioso naneconitsiaexanaena,” jai Isaiaspjijnē peyaquinaebaxutota.

²⁹ Itsabaxutota pijinia Isaiaspjijnē peyaquinaebaxutota, icatsia jumaitsi mapacueniaje:

Dioso raja āngelevi ayaibitsaētoخانeto penamatacaitorobinē. Bajaraponē Dioso itsa apo nacaitaxutotsoniatae tsipae, nexata daxitatsi vaxaitsi, Israelpjijnē pemomoxitsi, nacaverebiabijitsipa. Nacaverebiabijitsipa pacuenia bajayata verebiabatsi daxita Sodoma tomarapijivimi, Gomorra tomarapijivimi ata, jai Isaiaspjijnē peyaquinaebaxutota.

Pacuenia judíovi apo jumecovēnētsi pexanialivaisi jivi pecapanepaelivaisinexatsi yabara pelivaisi

³⁰ Vaxaitsi yapētanetsi mapacuenieje. Apo judíovi picani apo jumecovēnētsi ata Dioso aneconijibia petaenexatsi, itsiata Dioso aneconijibia tanetsi, pejumecovēnētsixae Jesucristo pesivatēpaejavatsi pibisiacuene pexanaeoneconi yabara.

³¹ Itsiata baitsi jane judíovi jamatabēcuenenavēxaniabiaya jumai tsabiabi: “Itsa jumecovēnētavanapaenatsi Dioso Moiséspijinēta penajumecopatsilivaisi, nexata Dioso aneconijibia nacataena,” jai tsabiabi. Itsiata bajaraxua yabara Dioso aneconijibia apo taetsi. Tsipaji apo caējēpaetsi pejumecovēnētsicapaneapenexa bajarapalivaisi.

³² Apo caējēpaetsi Dioso aneconijibia petaenexatsi. Tsipaji judíovi apo jumecovēnētsi Jesucristo pesivatēpaejavatsi pibisiacuene pexanaeoneconi yabara. Biji rajane jamatabēcuenenavēxaniabiaya jumai tsabiabi. “Itsa jumecovēnētavanapaenatsi Dioso Moiséspijinēta penajumecopatsilivaisi, nexata Dioso aneconijibia nacataena,” jai tsabiabi. Bajaraxuata judíovi Diosovecua naxuabaijinavanapa, Cristo Dioso athēbēvetsica pitorobijavatsitsica, apo pejumecovēnētsixae. Caranata saya anaepanabiaba bajarapalivaisi yabara.

³³ Dioso tajēvelia Cristo yabara pejumaitsijava, Dioso pejumelivaisibaxutota jumaitsi mapacueniaje:

Puenetanutsianajē Jerusalén tomarata ponē itorobijitsianē jivi pecapanepaenexa. Bajaraponē itsamonaē apo jumecovēnētsitsi tsane. Nexata bajarapamonaē nevecuanaxuabiana. Itsiata baitsi jane pajivi jumecovēnētsiana bajaraponē, bajarapajivi apo nacueratsi tsane,

jai tajēvelia Dioso pejumelivaisibaxutota Cristo jivi pesivatēpaejavanexa pibisiacuene pexanaeoneconi yabara.

10

¹ Tajamonaē, jitsipajē bitso tajamatabēēthētovetsina judíovi Dioso pecapanepaenexatsi. Bajaraxuata tovajētabiabajē Diosojavabelia.

² Judíovi picani Dioso ayacuena bitso jamatabētōnacuenebabiaba Dioso pesivabarēyanexatsi. Itsiata baitsi jane apo yapētae pacuenia Dioso tojitsipatsi petoexanavanapaenexa. Judíovi saya jamatabēcuenenavēxaniababiaba.

³ Bajarapamonae apo yapētae pacuenia exanaejitsia Dioso aneconijibia petaenexatsi. Jamatabēcuenenavēxaniabiaya jumai tsabiabi: “Itsa jumečovēntavanapaenatsi Dioso Moiséspijinēta penajumecopatsilivaisi, nexata Dioso aneconijibia nacataena,” jai tsabiabi bajarapamonae. Apo jumečovēntsi pacuenia Dioso itorobatsi pexanavanapaenexa Dioso aneconijibia petaenexatsi.

⁴ Pajivi jumečovēnēta Cristo pesivatēpaejavatsi pibisiacuene pexanaeconi yabara, bajarapajivi Dioso baja aneconijibia tanetsi. Bajaraxuata pematatsēnēa baja apo benajamatabēxainae pejumecovēntsi nexa icatsia Dioso Moiséspijinēta penajumecopatsilivaisi Dioso aneconijibia petaenexatsi.

⁵ Pamonaē jitsipa Dioso aneconijibia petaenexatsi pejumecovēntsi xae Dioso Moiséspijinēta penajumecopatsilivaisi, bajarapamonae yabara Moiséspijinē bajayata peyaquinaelivaisi jumaitsi mapacueniaje: “Pajivi jumečovēntsicapanepaena daxita pacuenia bajarapalivaisita itorobatsi, bajarapajivi matapania Dioso aneconijibia taenatsi,” jai Moiséspijinē bajayata peyaquinaelivaisita.

⁶ Nexata baja pamonaē jumečovēnēta Cristo pesivatēpaejavatsi pibisiacuene pexanaeconi yabara, bajarapamonae pejumeitavetsinexatsi, Dioso jumaitsi mapacueniaje: “Pētsa pajamatabējumaitsimē: ‘¿Jipatsa meta athēbēabetsia ponaena mapanacuayabetsicaje pebarēpatsinexatsica vajanacayavenonaenēnēxa?’ pajamatabējamē pētsa.

⁷ Pētsa pajamatabējumaitsimēnua: ‘¿Jipatsa meta ponaena, itsabereca petēpaevi jinavanapa, piasaēyaexanaenexa petēpaevivecua vajanacayavenonaenēnēxa?’ pajamatabējamē pētsa, jai Dioso jivi pejumeitavetsijava. Nexata itsajivi ata apo bejamatabējumaitsi bajarapacuenia. Tspaji baja Cristo athēbēvetsica patsica vajanacasivatēpaenexa mapanacuataje. Petēpaecujinae ata baja icatsia Cristo asaē petēpaejavavecua vajanacapanepaenexa.

⁸ Dioso aneconijibia vajanacataejavanexa yabara, Dioso pejumelivaisibaxutota jumaitsi mapacueniaje: “Dioso rabaja pejumelivaisi panatoxainame. Bajara palivaisi yabara panabarēcuaicuaijamē tsabiabi. Panejamatabēthētota ata baja bajarapalivaisi yabara panajamatabēxainabiabame,” jai Dioso pejumelivaisibaxutota. Bajarapalivaisibeje nalivaisijēpabeje palivaisi paxanē pacatsipaebatsi panejumecovēntsinexa Cristo papecasivatēpaejava pibisiacuene paneexanaeconi yabara.

⁹ Itsamatacabi Diosojavabelia papecacapanepaevi tsane ita paexanavanapaename mapacueniaje. Panavajunupaebabiabare itsamonaejavabelia panejumecovēntsi xae Jesús Dioso pexēnatocuene. Pajumecovēntsi xae panejamatabēthētojavavetsina Jesús petēpaecujinae icatsia Dioso piasaēyaexanaejavatsi.

¹⁰ Tspaji baja jivi pejamatabēthētota jumečovēnēta Cristo pesivatēpaejavatsi pibisiacuene pexanaeconi yabara. Bajaraxuata Dioso baja aneconijibia tanetsi. Jivi pecuibovojotota navajunupaebiaba pejumecovēntsi xae Jesús Dioso pesivatēpaejavatsi pibisiacuene pexanaeconi yabara. Nexata bajarapacuenia nayapētane bajarapajivi Dioso pepacuene pecapanepaejavanaxatsi.

¹¹ Dioso pejumelivaisibaxutota jumaitsi mapacueniaje: “Pajivi jumečovēntsi xae, bajaraponē apo nacueratsi tsane,” jai Dioso pejumelivaisibaxutota Cristo jivi pesivatēpaejavaxa pibisiacuene pexanaeconi yabara.

¹² Dioso raja jivi najēpaeya tane. Pacuenia tane judiōvi, bajarapacuenia tane apo judiōvi ata. Caenē, Dioso, daxita bajarapamonae pijatuxa-

nenë. Ayaicuenia Dioso itaxutotsoniatane daxita pamonaе vajëta bajara-ponëjavabelia.

¹³ Cristojavabelia jivi penavajëtsijavanexa, Dioso pejumelivaisibaxutota jumaitsi mapacueniaje: “Pajivi pepo petuxanenëjavabelia navajëta peca-panepaenexatsi, bajarapajivi capanepaenatsi,” jai Dioso pejumelivaisibax-utota.

¹⁴ Itsiata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacune pexanaeneconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi.

¹⁵ Dioso pijajivi itsa apo itorobi tsipae daxitajivijava Cristo pelivaisi pet-sipaebaponaenexa, nexata itsajivi ata apo yapëtae tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumeliv-aisibaxutota jumaitsi mapacueniaje: “¡Pexaniacune bitso itsa najetarubena pexanialivaisi jivi petsipaebivinexa!” jai.

¹⁶ Pexanialivaisi tsipaebi atatsi, itsiata daxitajivi apo jitsipae pejumecovënëtsinexa pexanialivaisi pecapanepaelivaisinexatsi picani Diosojav-abelia. Isaíaspijinë ata, bajayata jivi apo jumecovënëtsitsi. Nexata Isaíaspijinë Diosojavabelia jumaitsi mapacueniaje: “Tajatuxanenë, daxitajivi apo ne-jumecovënëtsi tatsipaebilivaisi. Caeviyobeje saya nejumecovënëta,” jai bajayata Isaíaspijinë Diosojavabelia.

¹⁷ Nexata jivi itsa tsipaebatsi Cristo pesivatëpaejavatsi pibisiacune pex-anaeneconi yabara pejumetaexae, jumecovënëta baja.

¹⁸ Judíovi ata baja picani jumetane Cristo pesivatëpaejavatsi pibisiacune pexanaeneconi yabara. Itsiata judíovi apo jumecovënëtsi. Dioso pejumeliv-aisibaxutota jumaitsi mapacueniaje:

Dioso pijajivi Dioso pejumelivaisi tsipaebanajetarubena daxitanacuanëjava.

Nexata baja Dioso pejumelivaisi yacaëjëpa daxitanacuanëjava, jai Dioso pejumelivaisibaxutota.

¹⁹ Judíovi baja picani jumetane Cristo pesivatëpaejavatsi pibisiacune pex-anaeneconi yabara. Itsiata judíovi apo jumecovënëtsi. Moiséspijinë bajayata tajëvelia yaquina judíovi Dioso apo pejumecovënëtsijavanexa. Yaquinanua apo judíovi juya Dioso pejumecovënëtsijavanexa. Judíovijavabelia Dioso tajëvelia pejumaitsijava, bajayata Moiséspijinë yaquina mapacueniaje:

Itsanacuanëpijivi paxamë bijiaya panaëcotabiabame. Bajarapamonae tajajivi exanaenajë. Nexata bajarapamonae pacuenecaëbianame. Bajarapa-monae tajumelivaisi apo jamatabëjumeyapëtae picani. Itsiata tajajivi exanaenajë. Nexata bajarapamonae pacuenecaëbiaanaepanaename, jai Moiséspijinë bajayata peyaquinaebaxutota Dioso tajëvelia pejumaitsijava judíovijavabelia.

²⁰ Isaíaspijinë ata bajayata ajumejunavijibia jumaitsi Dioso tajëvelia peju-maitsijava. Apo judíovi yabara Dioso pejumaitsijava, Isaíaspijinë jumaitsi mapacueniaje:

“Pamonaе picani apo nejitsipae, apo nejumecovënëtsinua, bajarapamonae itsiata itsamatacabaj nejumecovënëtsiana. Nexata baja neyapëtaena. Bajarapamonae apo nevënëlvaisiyanijobi ata, najamatabëcueneitajëtsianajë bajarapamonaejavabelia,” jai Dioso tajëvelia,

jai bajayata Isaíaspijinë.

Bajaraxuata nayapētane tajēvelia Dioso penajamatabēcueneveretsijava pecapanepaenexa apo judíovi ata.

²¹ Biji rajane judíovi yabara Dioso pejumaitsijava, Isaíaspijinē bajayata jumaitis mapacueniaje: “Daxitamatacabi junatabiabajē pamonea apo ne-jumecovēnētsi. Bajarapamonae apo exanae taitorobicuena,” jai bajayata Isaíaspijinē Dioso pejumaitsijava judíovi yabara. Nexata nayapētane mapacuenije. Judíovi junatsi atatsi Dioso, itsiata apo jumecovēnētsi Dioso pecapanepaenexatsi.

11

Pacuenia judíovi, Israel nacuapijiviyajuvēnēvi, Dioso capanepaejitsiatsi yabara pelivaisi

¹ ¿Dioso tsabaja pijajivi judíovi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanē ata raja judíonēnē, Israel nacuapijinēnē. Tajasalinainē cajena Abrahampijinē. Benjamínpijinē ata pemomoxiyajuvēnēnē.

² Bajayata baja cajena vajavajēnaeyami, Dioso pijajivinexa itapeta judíovi, Israel nacuapijivi. Nexata Dioso apo navecuaxuabi tsane bajarapamonae. Payapētaneme rabaja pacuenia Dioso pejumelivaisibaxutota jumaitis profeta Elíaspijinē yabara. Profeta Elíaspijinē pina pevajētsijavata Diosojavabelia, neconitsiaya jumaitis Israel nacuapijivi yabara mapacueniaje:

³ “Tajatuxanenē, mapamonaeje, Israel nacuapijivi, catobepona daxita pecajumelivaisipaebivimi profetavi. Toxobabianua altarvēnējavanē, itsajota tajutabiaba dajubivi pecarajutsinexa ofrendacuena. Nexata baja xanē caenēnē, nijajibitonēnē, nacopatajē. Xanē ata baja jamatabēnebexuaba,” jai pina profeta Elíaspijinē Diosojavabelia Israel nacuapijivi yabara.

⁴ Itsiata baitsi jane Dioso pina jumaitis profeta Elíaspijinējavabelia mapacueniaje: “Apo caenēmē raja. Xainajē baja tajajivi, siete mil ponēbeje, Israel nacuapijiviyajuvēnēvi. Bajarapamonae xaniavaetia nejumecovēnētavanapa. Pematabacabēta apo tonubena penavajēcaenexa Baalvēnēnē, jumapecaetaeya pexanaenētsi, pitabarata,” jai pina Dioso bajayata profeta Elíaspijinējavabelia.

⁵ Bajara pijinia itsi maparucacae ataje. Caejiviyobeje pijinia Dioso itapetatsi pijajivinexa pitaxutotsoniataexaetsi.

⁶ Bajarapamonae Dioso pexaniacuene petoexanavanapaejava yabara, apo itapetsitsi. Bajarapamonae Dioso itsa itapetsipatsi ēpexaniacuene Dioso petoexanavanapaejava yabara, nexata saya bajarapamonae Dioso itapetsipatsi ēpexaniacuene petoexanavanapaejava yabara. Nexata bajarapamonae saya Dioso pitaxutotsoniataexaetsi, apo itapetsitsi tsipae.

⁷ Mara pacuenia itsi Israel nacuapijivije, Dioso apo pejumecovēnētsivi. Bajarapamonae apo jumecovēnētsi Dioso pecapanepaejavanexatsi. Itsiata baitsi jane bajarapamonae yajuvēnēvi, caejiviyobeje, Dioso itapetatsi pijajivinexa. Bajarapamonae jumecovēnēta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamonae apo jumecovēnētsi bajarapalivaisi. Tsipaji ajamatabēcuenetaja. Apo jumecovēnētsi Dioso pejumelivaisi, pexaniajailivaisi, pecapanepaelivaisinexatsi picani Diosojavabelia.

⁸ Israel nacuapijivi, Dioso apo pejumecovēnētsivi, yabara Dioso pejumelivaisibaxutota jumaitis mapacueniaje: “Dioso ajamatabēcuenetajayaexanatsi. Bajaraxuata bajarapamonae lebabibi ata Dioso pejumelivaisibaxuto, apo jumecovēnētsi. Bajara itsi bajarapamonae mapamatacabijavaberena ataje,”

jai Dioso pejumelivaisibaxutota Israel nacuapijivi, Dioso apo pejumecovēnsivi, yabara.

⁹ Israel nacuapijivi, Dioso apo pejumecovēnsivi, yabara bajayata Davidpijinē ata jumaitsi mapacueniaje:

Israel nacuapijivi fiesta itsa exanabiaba, jamatabēcuenenavēxaniabiaya jamatabējumai tsabiabi: “Dioso cajena nacasivabarēya. Bajaraxuata ayaijava vajaxinaejava xainatsi,” jamatabējai tsabiabi. Itsiata baitsi jane pebarēyjavata, itsamatacabi jemata tocopiapatsianatsi pijaneconi yabara Dioso jane baja penaneconitsiaexanaejavanexatsi.

¹⁰ Bajarapamonae apo yapētae pijaneconi peyavajinavanapaejava daxitamatacabi. Pacuenia bitso piarevejava pecaponaevi, nabēxētsitsiaya bacapona, bajara itsi bajarapamonae pejamatabēthētota pijaneconi yabara. Bitso yanajamatabēxaina pijaneconi, jai bajayata Davidpijinē Israel nacuapijivi, Dioso apo pejumecovēnsivi, yabara.

Pacuenia apo judíovi ata Dioso capanepaejitsiatsi yabara pelivaisi

¹¹ Judíovi apo jumecovēnsi ata Cristo pesivatēpaejavatsi pecapanepaenexatsi Diosojavabelia, itsiata abaxē Dioso apo navecuaxuabi judíovi daxitamatacabijavabelianexa. Judíovi apo jumecovēnsixae Cristo pelivaisi, juya apo judíovi Dioso tocopatatsi pejumecovēnsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovēnsijava Cristo pelivaisi, judíovi itsa taena, nexata judíovi ata jumecovēnsiana Cristo pelivaisi pecapanepaenexatsi Diosojavabelia.

¹² Judíovi apo jumecovēnsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovēnsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuene, judíovi apo pejumecovēnsixae Cristo pelivaisi. Bajarapacuenia apo judíovi ata aeconoxae baja toxanepanatsi Dioso petocopatsixaetsi pejumecovēnsinexa Cristo pelivaisi. Itsiata baitsi jane pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuene caxitajarabiana pamatacabi judíovi ayaibitsaēto jane baja jumecovēnsiana Cristo pelivaisi.

¹³ Aeconoxae baja palivaisi pacatsipaebatsi, bajarapalivaisi paxamē apo pajudíovinexamē. Jitsipajē paneyapētaenexa Dioso taneitorobicuene. Dioso nitoroba paxamē apo pajudíovimējavabelia patacatsipaebinexa Dioso pejumelivaisi. Nexata jamatabējumaitsinē: “Dioso cajena netocopata ayaijamatabēcuene pexinaelivaisi jivi tatsipaebaponaenexa,” jamatabējanē.

¹⁴ Bajarapacuenia Dioso pejumelivaisi pacatsipaebaponatsi tsipaji jitsipajē tajaviriavi ata, judíovi, Dioso petoexanaenexatsi pacuenia paxamē ata Dioso pacatoexana papecacapanepaenexa. Nexata meta bajarapacuenia judíoviyajuvēnēvi ata jumecovēnsiana Cristo pelivaisi pecapanepaenexatsi Diosojavabelia.

¹⁵ Judíoviyajuvēnēvi Cristo navecuaitaveta. Nexata juya pamonae apo judíovi, Dioso barajamatabēcuenexanepanaeyatane. Pamatacabi judíovi jumecovēnsiana Cristo pelivaisi, Dioso pitsianatsi pijajivinexa. Bajaraxua bitso pinijicuene tsane. Judíovi aeconoxae bepetēpaevi Dioso tanetsi apo pejumecovēnsixae Cristo pelivaisi. Nexata pamatacabi judíovi jumecovēnsiana Cristo pelivaisi, Dioso taenatsi petēpaecujinae bepiasaēyaxanaevitsi.

¹⁶ Panbē jivi ofrendacuenia itsa rajuta Diosojavabelia, copiaya pexanaepanbē barajuta. Nexata bajarapapanmatabēta cotocaevi pexanaepan

ata, apo rajutsi ata Diosojavabelia, Dioso pijapancuenia tane. Naejava ata petabunepe jivi ofrendacuenia itsa rajuta Diosojavabelia, nexata daxita pemaxërananë ata Dioso pijamaxërananëcuenia tane. Bajara pijinia itsi judíovi ata. Judíovi pijasalinaivimi Dioso itsa itapeta pijajivínexa, nexata judíovi pemomoxi ata Dioso pijajivicuenia tane.

¹⁷ Dioso tane judíovi, beolivonaemaxërananë. Olivonaenë pexainanë, pepo olivonaemaxërananë caucuba juya saicayaviria olivonaemaxëranaxi perubinexa bajarapacovëta. Nexata pepo olivonae ënëtuatuajëpijijimera junua bajarapamaxëranaxi ënëtuatuajëjava pejuvarubenaenexa pepo olivonaemaxëranajavaberena. Bajara pijinia pacuenia Dioso pacatoexana paxamë apo pajudíovimë. Judíovi apo pejumecovënëtsixae Cristo pelivaisi, paxamë juya, apo pajudíovimë, Dioso papijajivimë pacaexana.

¹⁸ “Judíovivecua Dioso papijajivinë paneexana. Nexata paayaijamatabëcuenevinë judíovivecua,” pajamë pëtsa. Tsipaji payapëtaneme mapacuenije. Naejava, petabunepe pejamatabëcueneta, xaniavaetsia nuca. Pemaxërana pejamatabëcueneta, xaniavaetsia apo nucae. Bajara pijinia paxamë ata paitsimë. Apo pacacaëjëpae paneyavenonaenexa judíovijavabelia. Biji rajane judíovi bepapecayavenonae. Tsipaji judíovi apo jumecovënëtsi Cristo pelivaisi. Nexata judíovi apo pejumecovënëtsixae, Cristo pelivaisi juya paxamë Dioso pacaitaxutotsoniatane. Nexata pacatocopata Cristo pelivaisi panejumecovënëtsinexa Dioso papecacapanepaenexa panijaneconivecua.

¹⁹ Nexata meta pajumaitsimë: “Pacuenia olivonaenë pexainanë, olivonaemaxërananë caucuba, bajarapacovëta juya perubinexa itsaviriaolivonaemaxëranaxi, bajara pijinia itsi Dioso. Dioso navecuatsata judíovi juya apo judíovitsi vajanacaitapetsinexa pijajivínexatsi,” pajamë meta.

²⁰ Pacuenia olivonaenë pexainanë, pibisiamaxërana caucuta, bajara pijinia itsi Dioso. Dioso navecuatsata judíovi apo pejumecovënëtsixae Cristo pelivaisi. Pacuenia olivonaenë pexainanë, pecaucutsimaxërana pecovëta juya itsaviriaolivonaemaxërana ruta, bajara pijinia pacuenia paxamë ata judíovi pejamatabëcuenemi, pacapita Dioso papijajivínexamë panejumecovënëtsixae Cristo pelivaisi. Bajaraxuata pëtsa panataneme paayaijamatabëcuenevimë. Biji rajane xania. Cujunaviaya Dioso pajinavanapare panevecuajopaeyaniva Dioso panejumecovënëtsijava.

²¹ Pacuenia olivonaenë pexainanë, pibisiamaxërana bacaucuta, bajara pijinia pacuenia Dioso judíovi navecuatsata apo pejumecovënëtsixae Cristo pelivaisi. Judíovi picani Dioso itapeta pijajivínexa. Nexata judíovi Cristo pelivaisi apo pejumecovënëtsixae, Dioso navecuatsata pitapetsivimi ata. Nexata bajarapacuenia paxamë ata Dioso pacanavecuatsatsipa panevajënaeyabelia itsa apo pajumecovënëtavanapaemë tsipae Cristo pelivaisi.

²² Bajaraxuata pacanaëjëre mapacuenije. Dioso bitso papecaitaxutotsoniatæxae, pacatocopata Cristo pelivaisi panejumecovënëtsinexa. Pacanaëjërenua mapacuenije. Apo pejumecovënëtsixae Cristo pelivaisi, Dioso navecuatsata pitapetsivimi ata. Xaniajai cajena. Dioso naneconitsiaexanapona daxita pamonae apo jumecovënëtsi Cristo pelivaisi. Itsiata paxamëjavabelia Dioso pacaitaxutotsoniatane. Nexata panevajënaeyabelia tsiteca Dioso pajumecovënëtavanapare. Itsa pacopabijitsipame Dioso panejumecovënëtsijava, nexata pacuenia olivonaenë pexainanë, pibisiamaxërana bacaucuta pexuabinexa, bajara pijinia pacuenia paxamë ata Dioso pacanavecuaxuabijitsipa.

²³ Judíovi Dioso pejumeaebijava itsa copatsiana, nexata jumecovënëtsiana Cristo pesivatëpaejavatsi pecapanepaenexatsi Diosojavabelia. Nexata ba-

jarapamonae ata Dioso pijajivi tsane. Nexata pacuenia olivonaenë pex-
ainaenë, pecaucutsimaxëranami icatsia caevëarena pecovëta ruta, bajara
pijinia pacuenia Dioso icatsia pitsianatsi judíovi Dioso pijajivinexa.

24 Pacuenia saicayaviria olivonaemaxërana ruta pepo olivona-
maxëranacovëta, bajarapacovëta pejuvarucaenexa, bajara pijinia pacuenia
Dioso pacapita paxamë apo pajudíovi atamë Dioso papijajivinexamë.
Paxamë apo pajudíoviriavi atamë, itsiata Dioso pacapita papijajivinexamë.
Judíovi biji toyapëxanepanatsi icatsia pepitsinexatsi Dioso pijajivinexa.
Tsipaji bajarapamonae pijasalinaivimi ata Dioso itapeta pijajivinexa.

Pacuenia Dioso capanepaejitsia judíovi, Israel nacuapijivi, yabara pelivaisi

25 Tajamonae, panejamatabëjumaitsiyaniva mapacueniaje: “Vaxaitsi bitso
vajayapëtaevi,” panejamatabëjaiyaniva, jitsipajë paneyapëtaenexa mapali-
vaisije, Dioso muetsia pexainabuatsilivaisimi. Judíoviyajuvënëvi baja cajena
ajamatabëcuenetaja. Nexata bajarapamonae apo jumecovënëtsi Cristo pe-
livaisi. Nexata ayaibitsaëtoxaneto apo judíovi, itsa jumecovënëtsiana Cristo
pelivaisi, matapania jane baja judíovi ata jumecovënëtsiana Cristo pelivaisi.

26 Nexata daxita pamonaë judíovi, itsamatacabi Dioso capanepaenatsi
pacuenia baja Dioso pejumelivaisibaxutota tajëvelia jumaitsi. Dioso pejumel-
ivaisibaxutota tajëvelia jumaitsi mapacueniaje:

Jerusalén tomaraverena najetarucaena daxitajivi pecapanepaenënexa. Ba-
jaraponë daxita judíovi, pamonaë Israelpijinë pemomoxi, vecuaajibi-
aexanaena pibisiacuene pexanaeconomics.

27 Itsa bajaraponë vecuaajibiaexanaena pibisiacuene pexanaeconomics,
nexata jane baja toexanaenajë pacuenia bajayata tajëvelia najumeca-
panepaeya jumaitsinë bajarapamonae pijasalinaivimijavabelia,
jai tajëvelia Dioso pejumelivaisibaxutota Dioso pejumaitsijava judíovi peca-
panepaejavanexa Cristo pejamatabëcueneta.

28 Judíoviyajuvënëvi Dioso pijavajabitsaë naexana. Tsipaji apo jume-
covënëtsi Cristo pelivaisi pecapanepaenexatsi Diosojavabelia. Itsiata abaxë
tsiteca Dioso asiva judíovi. Tsipaji bajayata copiata Dioso itapeta bajarapa-
monae pijasalinaivimi pijajivinexa.

29 Xua Dioso rajuta judíovijavabelia, apo vecuacnaviatsi. Pamonaë pi-
jinia Dioso junata pijajivinexa, apo navecuaxuabi tsane. Nexata itsamat-
acabi bajarapamonae Dioso athëbëtsia yajavaecaena daxitamatacabijav-
abelianexa.

30 Paxamë apo pajudíovimë, pamatacabi abaxë Cristo pelivaisi apo pa-
jumecovënëtsimë, Dioso picaní apo papijajivimë. Judíovi apo pejumel-
covënëtsiaë Cristo pelivaisi, nexata apo pajudíovi atamë, Dioso pacaitaxu-
totsoniatane. Papijajivimë baja pacaexana.

31 Bajara pijinia pacuenia itsane judíovi ata. Maparucaeje abaxë judíovi
apo jumecovënëtsi Cristo pelivaisi. Itsiata itsamatacabijavabelia judíovi ata
Dioso itaxutotsoniataenatsi pacuenia paxamë ata Dioso pacaitaxutotsoni-
atane.

32 Dioso tocopata daxitajivi pijacuata penatojitsipacuenia pexanavana-
paenexa Dioso pitorobicueniatsi apo pejumecovënëtsiaë. Nexata daxitajivi
naneconita Diosojavabelia. Bajarapacuenia Dioso tocopata itsamatacabi-
javabelia icatsia pitaxutotsoniataenexa bajarapamonae.

33 ¡Dioso baja cajena pitaxutotsoniataenë daxitajivi pecapanepaenexa!
¡Dioso cajena bitso peyapëtaenë! ¡Daxitalivaisi bitso pejumeyapëtaenëna!
Pacuenia Dioso najamatabëcuenevereta pexanaenexa, pacuenia ata baja ex-
anapona, vaxaitsi bajaraxua Dioso apo jamatabëcueneypëtaetsi.

³⁴ Dioso pejumelivaisibaxutota jumaitsi mapacueniaje. “Vaxaitsi apo jamatabëcueneyapëtaetsi xua najamatabëxaina Dioso. Apo nacacaëjëpaenua vajamuxujiobinexa ata.

³⁵ Dioso cajena itsajivijavabelia ata apo amoneyabi. Nexata xua Dioso rajuta itsajivijavabelia, apo rajutsi piamoneyabimatamo,” jai Dioso pejumelivaisibaxutota Dioso yabara.

³⁶ Tspaji cajena Dioso pijacuata exana daxitacuene. Evetanua daxitacuene. Daxitacuene baja cajena Dioso pijajava. Nexata Diosojavabelia vaxaitsi bejumaitsitsi tsabiabi mapacueniaje: “¡Diosomë, bitso ayaijamatabëcuenenëmë!” bejaitsi tsabiabi daxitamatacabijavabelianexa. Bajara itsi tsane.

12

Pacuenia Dioso pejumecovënëtsinë benajamatabëcuenerajuta Diosojavabelia pijajivitonënexa daxitamatacabijavabelianexa yabara pelivaisi

¹ Tajamonae, payapëtaneme rabaja Dioso ayaicuenia vajanacaitaxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Dioso pijajavanexa, bajara pijinia pacuenia panajamatabëcuenerajure Diosojavabelia, pacuenia Dioso pacaitorobapona paneexanabiabinexa daxitamatacabijavabelianexa. Nexata ëDioso pijacuene panetonacuenebijava, pacaasaëmëre tsavanapae papecasivabarëyanexa Dioso. Bajarapacuenia Diosojavabelia panajamatabëcuenerajure panejamatabëëthëtojavavetsina panetsitanajamatabëcuenëitajëtsinexa pepacuene panejitsipaejava Dioso.

² Pëtsa paexananapame pacuenia exananava Dioso apo pejumecovënëtsivi. Biji rajane panajamatabëcuenecopare Diosojavabelia papecarajutsinexa pejanajamatabëcuene. Nexata bajarapacuenia payapëtaename xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bajaraxua bitso pexaniacuene. Bajaraxua itsa paexanabiabinexa, Dioso pacasivabarëya tsane.

³ Dioso raja taneitaxutotsoniataexae, nitoroba tatonacuenebinexa. Bajaraxuata mapacuenia pacajumaitsitsije. Pacuenia baja aeconoxae pajamatabëcuenëtsimë tsavanapae, bajarapajamatabëcuene matatoxenetsia pëtsa panataneme paayajamatabëcuenëvimë bitso. Biji rajane pacaëjivimë canacujitsia, xuvajëto Dioso pacajamatabëcuene caëjëpaeyaexanapona paneexanabiabinexa panenajamatabëcuenecopatsixae Diosojavabelia, bajarapacuenia saya baja panataema.

⁴ Jivi itsa naexana, yajavanaexana peperabëto, caeperabëtoreca. Itsiata bajaraperabëtopijivi saicaya xainapona pevënëanë. Caevito canacujitsia saicaya xaina pexanabiabijavanexa.

⁵ Bajara pijinia pacuenia vaxaitsi ata itsitsi, Jesucristojavabelia vajanajamatabëcuenecopatsivi. Ayaibitsaëto atatsi, itsiata caenë Cristo beperabëtotsi. Nexata namataenetsia nayavenonabiabianatsi.

⁶ Caëjivitsi canacujitsia, pacuenia Dioso nacatojitsipa, saicaya nacajamatabëcuene caëjëpaeyaexanapona vajaexanabiabinexa. Nexata Dioso betonacuenebavanapatsi pacuenia nacajamatabëcuene caëjëpaeyaexanapona. Dioso itsa nacajamatabëcuene caëjëpaeyaexana jivi vajatsipaebabiabinexa Dioso pejumelivaisi, nexata betsipaebabiabatsi xaniavaetsia pacuenia nacajamatabëcuene caëjëpaeyaexana.

⁷ Itsa pijinia Dioso nacajamatabëcuene caëjëpaeyaexana vajayavenonabiabinexa itsamonae Dioso pejumecovënëtsivi, nexata xaniavaetsia beyavenonabiabatsi Dioso pejumecovënëtsivi. Pajivi pijinia Dioso

jamatabêcuene caējēpaeyaexanatsi Dioso pejumelivaisi jivi petsipaebabiabinexa, xaniavaetsia betsipaebabiaba daxita pejamatabêcuenesaêta.

8 Pajivi pijinia Dioso jamatabêcuene caējēpaeyaexanatsi itsamonae pemuxujobabiabinexa pejamatabêcueneasaēyaexanaenexa Dioso pejumecovēnētsijava, bajarapajivi bemuxujobabiaba xaniavaetsia bajarapamonaejavabelia. Pajivi pijinia rajutabiaba pexinaeyajuvēnējava bepejiojivijavabelia, berajutabiaba itsajamatabêcuene xainaenejeva. Pajivi pijinia itsacuenejava evetsiaexanatsi, bevetaponapona xaniavaetsia. Pajivi pijinia yavenonabiaba piavitanevi, pamonae ata bitso najamatabêxaina pijamonaejiviyo itsa totēpatsi, beyavenonabiaba barēyaya.

Pacuenia Jesucristo pijajivi bexanavanapa yabara pelivaisi

9 Xaniavaetsia namataenetsia panaasivamēre tsavanapae. Paitoyamēre pibisiacuene pexanaejava. Pacaasaēmēre tsavanapae ēpexaniacuene paneexanaejava.

10 Pacuenia nacaenapijivi bitso nasiva, bajarapacuenia panaasivamēre tsavanapae Cristo papijajivixaemē. Itsamonae Dioso pejumecovēnētsivi, patojitsipare itsamonae petaenexatsi ayajamatabêcuenevi paxamē mata-toxenetsia. Namataenetsia panayaiyataeyabiabare.

11 Pacaasaēmēre tsavanapae Dioso pijacuene panetonacuenebijava. Pētsa pafaetabimē. Daxita panejamatabêcuenesaêta patonacuenebabiabare Dioso pijacuene.

12 Pasivabarēyamēre tsavanapae. Tsipaji rabaja payapētaneme itsamat-acabi panexainaejavanexa matakabi apo pevereverecejava. Itsamonae itsa pacabejiobiaexana Cristo papijajivixaemē, bajayajebi ata, pētsa pacopatame. Daxitamatakabi pavajētabiabare Diosojavabelia pacopatsinejevamē.

13 Itsajota Dioso pejumecovēnētsivi namatavenona, payavenonabiabare. Pamonaepacasivaxaina panijaboyaberena, xaniavaetsia pacopiapitabiabare.

14 Pamonaepibisiacuene pacaexana, patovajētabiabare Diosojavabelia Dioso peyavenonaenexatsi. Patovajētabiabare pexaniacuene. Pētsa patovajētabiabame pibisiacuene juya pibisiacuene pexanaenexatsi.

15 Pamonaeparēya petocopiapatsixaetsi pexaniacuene, bajarapamonae paxamē ata pajamatabêcueneyavenonaeya barēyamēre. Pamonaepijinia nua petocopiapatsixaetsi apo pejitsipaecuene, bajarapamonae paxamē ata pajamatabêcueneyavenonaeyanuema.

16 Najamatabêcuenejēpaeya pajinavanapare. Pētsa panataneme paayaijamatabêcuenevimē. Pamonaebeveliajamatabêcuenevi ata, xaniavaetsia pataema. Xaniavaetsia payajavajinavanaparenu. “Xanē bitso tayapētaenē itsamonae matatoxenetsia,” pajamatabējamē pētsa.

17 Itsajivi pibisiacuene itsa pacaexana, pētsa juya pibisiacuene panamata-moexanamē. Paexanabiabare ēpexaniacuene, xua jivi tsitaxanepanatsi.

18 Xua Dioso pacajamatabêcuenecaējēpaeyaexana paneexanaenexa, bajaraxua paexanabiabare xaniavaetsia panejinavanaparenexa, daxitajivijavabelia itsacuene paexanaenejevamē.

19 Tajamonae bitso patacaasivavi, itsamonae pibisiacuene itsa pacaexana, pētsa panamatamotame. Pacopare saya bajarapamonae Dioso penaneconitsiaexanaenexatsi. Tsipaji Dioso pejumaittsijava, Dioso pejumelivaisibaxutota jumaitsi mapacueniaje: “Pamonaepibisiacuene exana itsamonaejavabelia, xanē naneconitsiaexanaenajē,” jai Dioso pejumelivaisibaxutota.

²⁰ Dioso pejumelivaisibaxutota itsabaxutota pijinia jumaitsi mapacueni-aje: “Nijavajabitsaēnē itsa piajani, rajure pexaejava. Mera itsa jitsipa, rajure mera piapaenexa. Bajarapacuenia itsa exaname, nexata caurataena nijavajabitsaēnē ata,” jai Dioso pejumelivaisibaxutota.

²¹ Itsajivi pibisiacuene itsa pacaexana, pētsa pibisiacuene panamata-moexaname. Tspiji bajarapacuenia panajamatabēcuene bijianaejitsi-pame. Biji rajane pajivi pibisiacuene pacaexana, pexaniacuene patoex-anare. Nexata bajarapacuenia pibisiacuene papecaexanaejivi ata, paja-matabēcuene caeviaexanaename.

13

¹ Daxita pamonaе gobierno pijajivi, papecayanacuaeetsivi, pacuenia bajarapamonaе pacaitoroba, xaniavaetsia pajumecovēnētabiabarē. Tspiji bajarapamonaе, caenē canacujitsia, Dioso pejamatabēcueneta pacayanacuaeaveta. Daxita pamonaе nacua pevetsivi, pacaaveta Dioso petocopatsixaetsi.

² Nexata pajivi apo jumecovēnētsi pacuenia nacuaeetsinē itorobatsi, bajarapajivi Dioso ata apo jumecovēnētsi. Pamonaе apo jumecovēnētsi, nexata bajarapamonaе Dioso naneconitsiaexanaenatsi.

³ Pamonaе pexaniacuene exanavanapa, nacuaeetsivi apo cujunavi. Pamonaе pijinia pibisiacuene exanavanapa, nacuaeetsivi cujunava. Paxamē nexata pexaniacuene paexanavanapare ajunavijibia panejinavana-paenexa. Nexata pacasivabarēya tsane papecayanacuaeetsivi.

⁴ Bajarapamonaе Dioso pejamatabēcueneta nacuenebavanapa. Nexata pacaavetavanapa pibisiacuenevecua. Itsiata pibisiacuene itsa paexaname, papecayanacuaeetsivi hepacujunavame. Tspiji bajarapamonaе Dioso tocopatatsi papecananeconitsiaexanaenexa. Dioso tocopatatsi bajarapamonaе penaneconitsiaexanaenexa daxita pamonaе pibisiacuene pexanaevi.

⁵ Bajaraxuata bejumecovēnētsi pamonaе vajanacayanacuaeetsivi. Apo jumecovēnētsi saya vajanacananeconitsiaexanaeyaniva. Jume baja ca-jena. Biji rajane jumecovēnētsi tspiji Dioso pijajivixaetsi, vajajamatabēcueneta yapētanetsi pacuenia bexanavanapatsi.

⁶ Bajaraxuata nacuaeetsivijavabelia impuestomatamo pamatamotabi-abame panematamotsipalatata penaevetsinexa. Nacuaeetsivi, Dioso pejamatabēcueneta, tocopatatsi nacua pevetsinexa. Nexata nacua ēpevetsicuene nacueneba.

⁷ Pacuenia pacaevijimē canacujitsia hepatoexaname gobierno pejamatabēcueneta penacuenebivijavabelia, bajarapacuenia patoexanabiabarē. Bajarapamonaeyajuvēnēvi itsa caetuata impuestomatamo, xuavajēto pamoneyabame, pamatamotabiabarē. Pamonaе pijinia peyaiyataevitsi, payaiyataeyabiabarē. Pamonaе peyaiyataevitsi, bajarapamonaе pexaniacuene pabaracuaicuaijamēre tsabiabi.

⁸ Pētsa pamoneyabame itsajivi ata. Biji rajane pacuenia Cristo pacaasiva, bajarapacuenia paxamē ata panaasivamēre tsavanapae. Pajivi asiva itsajivi ata pacuenia nasiva pijacuata, bajarapajivi jumecovēnētsicapanepa Dioso Moiséspijinēta penajumecopatsilivaisi.

⁹ Dioso Moiséspijinēta penajumecopatsilivaisi, itaveta mapacueni-aje: “Pētsa jaitame itsava nijavavecu. Pētsa beyaxuabame jivitonē. Pētsa nacobetoxotame. Pētsa najumetsēnētsiaya baracuaicuaijamē itsajivi. Pētsa cobecaēbame itsajivi pexinaejjava,” jai Dioso Moiséspijinēta penajumecopatsilivaisi. Nexata paxamē itsa pajumecovēnētsicapanepaejitsipame daxita mapalivaisije, itsalivaisiyo ata yajava, pajumecovēnētsicapanepaejitsipame

mapejumaitsilivaisiyoje: “Asivamëre itsajivi ata pacuenia xamë nijacuata nasivamë,” pejaillivaisiyo.

¹⁰ Tsipaji pajivi asiva itsajivi ata, pibisiacuene apo exanae bajara-pajivijavabelia. Bajaraxuata itsa asivatsi itsamonae ata, nexata jume-covënëtsicapaneatsi daxita pacuenia Dioso nacaitoroba.

¹¹ Bajarapacuenia itsamonae ata biasivatsi. Tsipaji baja yapëtanetsi bitso baja imoxoyo pevajënae icatsia Jesucristo pepatsijavanexatsica. Vajanaca-capanepaenënexa, najetarucaena vajanacacapanepaenexa mapanacuave-cuaje. Pamatacabi taxuxuabatsi Jesucristo vajajumecovënëtsijava, nacatsita tajëvajënae abaxë itajara Jesucristo icatsia pepatsijavanexatsica. Aeconoxae baja bitso imoxoyo pevajënae icatsia Jesucristo pepatsijavanexatsica.

¹² Meravi abaxë aitaquiri. Itsa baja icatsia matababijitsia, pitaquiri-javami baja ajibi tsaponae. Bajara pijinia pacuenia imoxoyo baja pevajënae pecopiarucaenexa mapanacuapijivi pibisiacuene pexanaejava yabara pijamatabëcueneitaquirijavami. Tsipaji baja imoxoyo pevajënae icatsia Jesu-cristo pepatsijavanexatsica. Bajaraxuata bexanavanapatsi ëpexaniacuene Dioso pejitsipaecuenia.

¹³ Aeconoxae baja vajavajënaeyabelia, jinavanapaenatsi xaniavaetsia vajayapëtaexae pexaniajailivaisi. Apo ponae tsanetsi piatajibivijava. Apo ponae tsanetsi fiestajava ata, itsajota pibisiacuene exanavanapa. Apo ex-anae tsanetsi pibisiacuene vajavitota. Apo exanae tsanetsi itsacuenejava ata, xua pibisiacuene. Nabijataeya apo najumeanaenotsi tsanetsi. Itsa-monae ata apo cuenecaëbi tsanetsinua.

¹⁴ Biji rajane vajëtabiabianatsi vajatuxanenë Jesucristojavabelia vajanacayavenonabiabinexa. Vajatuxanenë Jesucristo nacaja-matabëcueneasaëyaexanaena vajatojinavanapaenexa vajanacatojitsipaecue-nia. Apo sivanajamatabëxainae tsanetsi pacuenia vajacuata natojitsipatsi pibisiacuene vajaexanaenexa.

14

Pacuenia Pablo itaveta Roma tomarapijivi Dioso penajuajume-covënëtsivi itsa janitane pexaejava jumapecataeya pexanaenëanëjavabelia peyajuvënërajutsivi, “Pibisiacuene exana mapajivije,” pejaiyaniva, yabara pelivaisi

¹ Pajivi jumecovënëtsi ata Jesucristo pesivatëpaejavatsi pijaneconi yabara, itsiata abaxë itsa apo ajamatabëcuenesaë pejumecovënëtsijava, bajarapa-jivi ata xaniavaetsia pacopiapire panenacatuatsibojavaberena itsa na-junua. Bajarapajivi pijaneconi yabara Jesucristo pesivatëpaejavatsi pe-jumecovënëtsicujinae, copata baja pexaeyabiabijavami jumapecataeya pex-anaenëanëjavabelia perajutsiyajuvënëvi. Nexata baja cujunava pexaejava, bepibisiacuene pexanaejava petaexae. Pëtsa pajumeanaenotame bajarapit-sijivijavabelia panexaeyaexanaenexa icatsia bajarapayajuvënëvi.

² Itsamonae Cristojavabelia penajamatabëcueneocopatsivi, jamatabëjumaitsi: “Daxitacuene xanepana vajaxaenexa,” jamatabëjai. Itsamonae pijinia abaxë jamatabëjumaitsi: “Dioso nacananeconitsiaexanaejitsipa jumapecataeya pexanaenëanëjavabelia perajutsiyajuvënëvi itsa xanetsi,” jamatabëjai. Nexata ëpeubijava xane jumapecataeya pexanaenëanëjavabelia perajutsiyajuvënëvi pexayaniva.

³ Nexata pajivi xane jumapecataeya pexanaenëanëjavabelia perajutsiyajuvënëvi, pëtsa bijiaya tane pajivi apo xae jumapecataeya pexanaenëanëjavabelia perajutsiyajuvënëvi. Pajivi pijinia apo xae

jumapecataeya pexanaenēanējavabelia perajutsiyajuvēnēvi, pētsa neconitsiya jumaitsi jivijavabelia: “Pibisiacuene exana pajivi xane jumapecataeya pexanaenēanējavabelia perajutsiyajuvēnēvi,” jai pētsa. Tsipaji Cristojavabelia penajamatabēcuenecopsatsijivi daxitacuene itaxutojema xae ata, itsiata Dioso tanetsi aneconijibia. Nexata bajarapajivi Dioso capanepaenatsi.

⁴ Dioso apo pacatocopsatsi Dioso pijajivitonē neconitsiya jivijavabelia panejumaitsinexa mapacueniaje: “Xua exana bajaraponē, pibisiacuene. Nexata Dioso naneconitsiaexanaenatsi,” panejainexa. Dioso pijajivitonē xaniavaetsia Dioso itsa tonacueneba, xaniavaetsia apo tonacuenebi atanua, caenē, Dioso, toxanepanatsi, pacuenia jamatabējumaitsi, pejumaitsinexa pijajivitonējavabelia. Dioso cajena caējēpatsi peyavenonaenexa pijajivi pejit-sipaecuenia xaniavaetsia petojinavanapaenexatsi pesivabarēyanexa.

⁵ Itsamonae Dioso pejumecovēnētsivi yaiyataeyabiaba matabaci. Nexata itsamatacabianēvecua caematacabi yaiyataeyabiaba. Itsamonae pijinia najēpaeya tane daxitamatacabianē. Pamonaē yaiyataeyabiaba caematacabi itsamatacabianēvecua, bajarapamonaē xaniavaetsia beypāētane pajamatabēcuenelivaisi yabara yaiyataeyabiaba caematacabi. Pamonaē ata pijinia najēpaeya tane daxitamatacabianē, xaniavaetsia beypāētane pajamatabēcuenelivaisi yabara najēpaeya tane daxitamatacabianē.

⁶ Pajivi nacueraeveta itsamatacabi, bajarapajivi nacueraeveta peyaiy-ataenexa Dioso. Pajivi pijinia apo nacueraevetsi bajarapamatacabi, apo nacueraevetsi tsipaji jamatabēexana pacuenia Dioso itorobatsi. Pajivi pijinia xane jumapecataeya pexanaenēanējavabelia perajutsiyajuvēnēvi, bajarapajivi xane peyaiyataenexa Dioso. Tsipaji jamatabējumaitsi: “Dioso cajena netocopata daxitacuene taxaenexa,” jamatabējai. Nexata pexaniajamatabēcuenē rajutabiaba Diosojavabelia. Pajivi pijinia apo xae jumapecataeya pexanaenēanējavabelia perajutsiyajuvēnēvi, bajarapajivi apo xae peyaiyataenexa Dioso. Tsipaji jamatabējumaitsi: “Mapavije apo xanē tananeconitsianiva Diosojavabelia,” jamatabējai. Nexata pexaniajamatabēcuenē rajutabiaba Diosojavabelia ēpeubijava pexaeayabiabixae.

⁷ Itsajivi ata vaxaitsiyajuvēnējivi, Dioso pejumecovēnētsijivi, apo ponaponae ēpijacuata penatojitsipaecuenia pexanaponaponenexa. Biji rajane exanaponapona pacuenia Cristo tojitsipatsi. Petēpaematacabinexa ata yabara, apo jamatabējumaitsi: “Tēpaenajē pamatacabi natojitsipajē tatēpaējava,” apo jamatabējai.

⁸ Vaxaitsi abaxē vajaasaētsavanapaepato, tojinavanapatsi pacuenia vajatuxanenē nacatojitsipa. Itsiata baitsi jane itsamatacabi, tēpaenatsi. Tsipaji Dioso nacatojitsipaena vajatēpaenexa. Aeconoxae abaxē vajaasaētsavanapaevi, vajatuxanenē pijajivitsi tsavanapaē. Vajatēpacujinae ata tsane, tsiteca vajatuxanenē pijajivitsi tsavanapaē tsane.

⁹ Cristo baja cajena nacasivatēpa vajatuxanenē vajaexanaenexa. Nexata icatsia Cristo asaē tsaponaponae petēpacujinae. Bajaraxuata Cristo daxitajivi pijatuxanenē. Piasaētsavanapaevi, petēpaevi ata, daxita pamonaē najamatabēcuenecopata bajaraponējavabelia, Cristo cajena pijatuxanenē.

¹⁰ Bajaraxuata nexata jumapecataeya pexanaenēanējavabelia perajutsiya-juvēnēvi paxamē panijabanānē pexaejava yabara, baracuaicuajiyai apo be-pajumaitsimē mapacueniaje: “Maponēje pibisiacuene exana. Nexata Dioso naneconitsiaexanaenatsi,” apo bepajamē. Bijiaya ata apo bepataemē bajaraponē. Tsipaji cajena itsamatacabi daxitatsi vaxaitsi Cristo pitabarata

nubenaenatsi, caejivitsi canacujitsia, vajanavajunupaebaponaenexa daxita pacuenia exanavanapatsi mapanacuataje.

¹¹ Bajaraxua yabara Dioso pejumelivaisibaxutota tajëvelia jumaitsi mapacueniaje:

Dioso tajëvelia jumaitsi: “Xanë daxitamatacabijavabelianexa tasaëtsaponaponaenë. Nexata tajumaitsijume xaniajanë. Itsamatacabi daxitajivi taitabarata pematabacabëta netonubenaena taneyaiyataexae. Daxitajivi nevajunupaebiana Diosonëcuenenë,” jai Dioso pejumelivaisibaxutota mapacueniaje Dioso tajëvelia pejumaitsi-
java daxitajivi yabara.

¹² Nexata vaxaitsi itsamatacabi, caejivitsi canacujitsia, navajunupaebaponaenatsi Diosojavabelia daxita pacuenia exanavanapatsi mapanacuataje.

Pacuenia Pablo itaveta Roma tomarapijivi Dioso penajuajumecovënëtsivi Diosovecua pejpopaeyaexanaeyaniva petsitaexanaejava pejamatabëcueneta yabara pelivaisi

¹³ Itsamatacabi caejivitsi canacujitsia nubenaenatsi Cristo pitabarata vajanavajunupaebaponaenexa pacuenia exanavanapatsi mapanacuataje. Bajaraxuata itsanë vajabananë pexanaejava yabara, apo bebaracuacuajitsi pibisiacuenia. Biji rajane bejamatabëjumaitsitsi mapacueniaje: “Apo tsi-taexanaenë tsane itsacueneyavayo ata, xua yabara itsajivi, Dioso pejumecovënëtsijivi, jamatabëcuenebijianaejitsipatsi,” bejamatabëjaisi.

¹⁴ Najamatabëcuenecopatajë xaniavaetsia vajatuxanenë Jesucristojavabelia. Nexata yapëtaniji Dioso tanetocopatsijava taxaenexa xua picani cujunavajë taxaejava Jesucristojavabelia tanajamatabëcuenecopatsivajënaeya. Itsiata meta itsanë Dioso pejumecovënëtsinë bajaraxua itsa xane, jamatabëjumaitsi tsipae: “Dioso apo netocopatsi taxaenexa bajaraxua. Itsa xaejitsipajë, naneconitsipajë Diosojavabelia,” jamatabëjai tsipae. Nexata apo xae tsipae bajaraxua.

¹⁵ Panijabananë itsa apo pexaenë jumapecataeya pexanaenëanëjavabelia perajutsiyajuvënëvi, pëtsa patsitaxaneme. Tsipaji paxamë itsa patsitaxaejitsipame jumapecataeya pexanaenëanëjavabelia perajutsiyajuvënëvi, panijabananë bepacasivajamatabëjiovi tsipae. Tsipaji panijabananë bepibisiacuenë patsitaexanaejitsipame itsa patsitaxaejitsipame jumapecataeya pexanaenëanëjavabelia perajutsiyajuvënëvi. Nexata jumapecataeya pexanaenëanëjavabelia perajutsiyajuvënëvi, panijabananë itsa patsitaxaejitsipame, nexata panijabananë asivaya apo pataemë tsipae. Tsipaji itsa pacajanitaejitsipa panexaejava jumapecataeya pexanaenëanëjavabelia perajutsiyajuvënëvi, nexata bajaraponë ata naxaejitsipa. Nexata Diosojavabelia bepenaneconitsinë nataejitsipa penaxaexae jumapecataeya pexanaenëanëjavabelia perajutsiyajuvënëvi. Panetsitaxaejava pejamatabëcueneta Diosovecua panenaxuabiaexanaeyaniva panijabananë, pëtsa patsitaxaneme jumapecataeya pexanaenëanëjavabelia perajutsiyajuvënëvi. Tsipaji rabaja vajatuxanenë Cristo sivatëpa bajaraponë ata penaxuabianiva.

¹⁶ Payapëtae atamë, xua picani xanepana paneexanaenexa, itsiata panijabananë itsa cujunava bajaraxua pexanaenexa, pëtsa patsitaexaname. Tsipaji panijabananë pacataejitsipa pibisiacuenë bepeneexanaevi.

¹⁷ Vaxaitsi baja najamatabëcuenecopabatsi Cristojavabelia. Nexata jumecovënëtavanapatsi Dioso. Apo nacaitorobi vajanayanijobabiabinexa évajaxaejava yabara, vajaapaejava ata yabara. Biji rajane nacaitoroba

xaniavaetsia aneconijibia najamatabëcuenejëpaeya vajajinavanapaenexa. Nacaitorobanua jamatabëcuenebarëyaya vajajinavanapaenexa Espíritu Santo vajanacatsijamatabëccaexae.

¹⁸ Pajivi Dioso pijacuene tonacuenebaponapona, sivajamatabëcuenebarëyatsi Dioso. Jivi ata xaniavaetsia yaiyatanetsi.

¹⁹ Xua Dioso nacayavenona vajajinavanapaenexa najamatabëcuenejëpaeya, bajaraxua exanavanapaenatsi. Xua ata nacayavenona namataenetsia vajanajamatabëcuene asaëyaexanaenexa Diosojavabelia, bajaraxua ata exanavanapaenatsi.

²⁰ Pëtsa patsitaxaneme xua panijabananë tane bepitavetsijavatsi pexaeyaniva. Nexata itsa pacajanitaejitsipa panexaejava, bajarapajivi ata naxaejitsipa. Nexata bepenaneconitsinë Diosojavabelia nataejitsipa. Panexaejava pejamatabëcueneta, bajarapajivi Diosovecua pajopaeyaexanaejitsipame. Bajaraxuayaniva pëtsa patsitaxaneme xua cujunava panijabananë. Xaniajai rabaja. Daxitacuene rabaja picani xanepa vajaxaenexa. Itsiata pibisiacuene paxanaejitsipame itsa patsitaxaejitsipame xua panijabananë taejitsipa bepbisiacuene paneexanaejava itsa paxaejitsipame.

²¹ Bajaraxuata pëtsa paxaneme jumapecataeya pexanaenëanëjavabelia perajutsiyajuvënëvi. Pëtsa papamenua pīatanera paneaitajibyaniva. Pëtsa paexanamenua itsacuenejava ata, xua pejamatabëcueneta panijabananë pajopaeyaexanaejitsipame Diosovecua. Pëtsa patsitaexaname xua panijabananë jamatabëcuene faefaenaeyaexanaejitsipatsi.

²² Itsa baja xaniavaetsia payapëtaneme pexanepanaecueene panexaenexa, xua picani pacujunavame panexaejava Jesucristojavabelia panenajamatabëcuene copatsivajënaeya, saya pamoyamë tsane. Tspipaji Dioso yapëthane pacuenia panajamatabëxainame bajaraxua yabara. ¡Bitso jamatabëcuenebarëya pajivi pexanabiabijava yabara jamatabëjumaitsi: “Dioso pitabarata aneconijibia toponaponajë,” jamatabëjai!

²³ Pajivi pijinia jamatabëjumaitsi ata: “Apo xanepanae tsipae taxaenexa bajaraxua,” jamatabëjai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tspipaji pijacuata najamatabëcuenebijianaejitsipa. Daxita pijinia xua yabara vaxaitsi jamatabëjumaitsi: “Dioso apo jitsipae vajaexanaenexa bajaraxua,” jamatabëjai atatsi, itsiata itsa exanaejitsipatsi bajaraxua, nexata pibisiacuene natoexanaejitsipatsi Diosojavabelia.

15

Pacuenia becanaëjëtatsi vajabananë vajajamatabëcuenejavenonaenexa yabara pelivaisi

¹ Vaxaitsi ajamatabëcuenesaëtsi Dioso vajajumecovënëtsijava. Nexata beyavenonatsi pamona abaxë jamatabëcuenefaefaena Dioso pejumecovënëtsijava. Pëtsa exanatsi vaxaitsi vajacuata vajanatojitsipaecuenia.

² Biji rajane caejivitsi canacujitsia becanaëjëtatsi vajabananë vajajamatabëcuenejavenonaenexa. Xua yabara vajabananë ajamatabëcuenesaëjitsia, bajaraxua betoexanavanapatsi vajabananë pejamatabëcuenevitsabinexa Diosojavabelia.

³ Tspipaji Cristo ata, ponë Dioso athëbëvetsica itorobica jivi pecapanepaenexa, abaxë itsa ponapona mapanacuataje, apo exanae pijacuata penatojitsipaecuenia. Biji rajane nacopata pebejiobiaexanaenexatsi pacuenia Dioso tojitsipatsi. Paxa Diosojavabelia Cristo pejumaitsiyava, Dioso pejumelivaisibaxutota tajëvelia jumaitsi mapacueniaje: “Pacuenia

picani jivi xamë pibisiacuenia jamatabëcabaracuaicuaijai, xanë nebaracuaicuaijai tsane,” jai tajëvelia Dioso pejumelivaisibaxutota paxa Diosojavabelia Cristo pejumaitsijava.

⁴ Palivaisi bajayata yaquina Dioso pejumelivaisibaxutota, bajarapalivaisi vaxaitsi ata nacatocopata vajajumecovënëtsinexa, vajanacajamatabëcuene yavenonaenexana. Bajaraxuata bajayajebi nacabejiobiaexanabiabi ata Dioso pijajivixaetsi, itsiata ajamatabëcuenesaëtsi tsavanapae. Tsipaji yapëtanetsi pacuenia Dioso najumecapanepaeya jumaitsi bajarapalivaisita vajanacacapanepaenexa.

⁵ Itsacuenejavaxi yabara bajayajebi itsa nacajamatabëcuenejëta, nexata Dioso nacajamatabëcuene yavenonapona. Nacajamatabëcueneasaëyaexanapona bajayajebinexa ata. Pacatovajëtatsi Diosojavabelia Dioso papecayavenonaenexa, najamatabëcuenejëpaeya daxita panejinavanapaenexa Jesucristo papecatojitsipaecuenia.

⁶ Nexata daxita paxamë najamatabëcuenejëpaeya vajatuxanenë Jesucristo paxa Diosojavabelia pajumaitsimë tsabiabi tsane: “Diosomë, bitso ayaijamatabëcuenenëmë,” pajamë tsabiabi tsane.

Pacuenia apo judíovi ata pexanialivaisi tsipaebatsi pecapanepaelivaisinexatsi yabara pelivaisi

⁷ Pajudíovinë, apo pajudíovi atamë, najëpaeya Cristo nacapita pijajivinxetsi. Bajara pijinia pacuenia paxamë ata najëpaeya xaniavaetsia namataenetsia panacopiapitabiabianame. Nexata bajarapacuenia itsa paexanabiabianame, daxitajivi Dioso yayataena. Nexata daxitajivi jumai tsabiabi tsane Dioso yabara: “Dioso cajena bitso ayaijamatabëcuenenë. Tsipaji pijajivi yavenona xaniavaetsia petojinavanapaenexatsi,” jai tsabiabi tsane.

⁸ Mara pacajumaitstsije. Jesucristo athëbëvetsica patsica mapanacuayabetsicaje petayavenonaenexa judíovi. Bajarapacuenia Jesucristo athëbëvetsica patsica petocopiapatsixaetsi pacuenia bajayata Dioso najumecapanepaeya jumaitsi judíovi pijasalinavijavabelia. Nexata bajarapacuenia Dioso pexaniajainëcuene najamatabëcueneitajëta judíovijavabelia.

⁹ Jesucristo athëbëvetsica patsica pecapanepaenexa apo judíovi ata. Nexata apo judíovi ata Jesucristo pejamatabëcueneta: “Diosomë, bitso ayaijamatabëcuenenëmë,” jai tsabiabi tsane Diosojavabelia. Bajarapacuenia apo judíovi ata jumai tsabiabi tsane Diosojavabelia pitaxutotsoniataexaetsi Dioso. Nexata bajaraxua yabara Cristo paxa Diosojavabelia pejumaitsjava, Dioso pejumelivaisibaxutota jumaitsi mapacueniaje:

Xanë tajamatabëcueneta, daxitanacuanëpijivi: “Diosomë, bitso ayaijamatabëcuenenëmë,” cajai tsabiabi tsane. Catonaxëanabiabianana vajanë ata,

jai Dioso pejumelivaisibaxutota paxa Diosojavabelia Cristo pejumaitsjava.

¹⁰ Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumaitsi mapacueniaje:

Apo pajudíovimë, pajamatabëcuenebarëyamëre Dioso pijajivi, judíovi yajava, jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

¹¹ Itsabaxutota pijinia Dioso pejumelivaisibaxutota jumaitsi icatsia mapacueniaje:

Paxamë apo pajudíovimë, Diosojavabelia pajumaitsimëre: “Diosomë, bitso ayaijamatabëcuenenëmë,” pajamëre. Paxamë, padaxitamë, itsamonajavabelia pajumaitsimëre: “Caenë Dioso bitso ayaijamatabëcuenenë,” pajamëre,

jai Dioso pejumelivaisibaxutota.

¹² Isaíaspijinē pijinia itsabaxutota tajēvelia yaquina Jesucristo pelivaisi. Jumaitsi mapacueniajē:

Penacuetonēyo naexanaena. Nexata Isaípijinē bepemomonēyocuenia naexanaena. Itsa vitsabiana, Dioso evetsiaexanaenatsi jivi, daxitanacuanēpijivi. Pamonae apo judíovi, jumecovēnētsiana bajaraponē pesivatēpaejavatsi pecapanepaenexatsi pijaneconivecua, jai tajēvelia Isaíaspijinē peyaquinaebaxutota Jesucristo yabara.

¹³ Yapētanetsi Dioso vajanacapanepaejavanexa Jesucristo pejamatabēcueneta. Nexata pacatovajētatsi Dioso papecajamatabēcuenē barēyayaexanaenexa. Pacatovajētatsinua jamatabēcuenexanepanaeya panejinavanapanexa. Bajarapacuenia Dioso pacajamatabēcueneyavenonaena tsipaji Dioso pajumecovēnētame. Espiritu Santo ata, ponē pacatsijamatabēeca, pesaēta panevajēnaeyabelia pacajamatabēcuenē asaēyaexanaponaena Dioso papecacapanepaejavabelianexa.

¹⁴ Tajamonae, pacayapētanetsi paxamē papexaniajamatabēcuenēvijavamē. Pacayapētanetsinua paxamē bitso paneyapētaejava Cristo papecasivatēpaejava pibisiacuene paneexanaeconi yabara. Pacayapētanetsinua paneyapētaejava xaniavaetsia namataenetsia panenamuxujiobinexa.

¹⁵ Tajamonae, palivaisi baja payapētaneme, bajarapayajuvēnēlivaisi panenajamatabēnapitsinexa, icatsia ajumeurajibia pacatoyaquinatsi mapabaxutotajē. Bajarapacuenia ajumeurajibia pacatoyaquinatsi tsipaji Dioso nitoroba.

¹⁶ Dioso taneitaxutotsoniataexae, bajarapacuenia nitoroba Jesucristo pijajivitonēxanē Jesucristo pelivaisi tatsipaebabiabinexa apo judíovijava. Nexata apo judíovi tsipaebabiabajē pexanialivaisi, Jesucristo pelivaisi, pecapanepaelivaisinexatsi Diosojavabelia. Espiritu Santo pejamatabēcueneta apo judíovi ata Cristo pijajivi exanatsi. Bajaraxuata Dioso sivabarēyatsi Dioso pepitsinexatsi bajarapamonae, apo judíovi ata.

¹⁷ Jesucristo pijajivitonēxaenē, Jesucristo neyavenonabiaba itsa tonacuenebabiabajē. Bajaraxuata barēyanē tatsipaebaponaenexa itsamonaejavabelia Jesucristo taneyavenonabiabijava tatonacuenebinexa Dioso.

¹⁸ Rovialia tsipaebabiabajē ajumeurajibia. Tsipaebabiabajē vajatuxanenē Jesucristo taneyavenonabiabijava tatonacuenebinexa Dioso. Vajatuxanenē Jesucristo neyavenonabiaba tatsipaebabiabinexa apo judíovijavabelia apo judíovi ata pejumecovēnētsinexa Dioso. Nexata apo judíovi itsa jumetane tatsipaebabiabilivaisi, itsa tanenua Dioso pesaēta piniñicuene taexanaponaejavanē, bajarapamonae jumecovēnēta baja Jesucristo pesivatēpaejavatsi pibisiacuene pexanaeconi yabara.

¹⁹ Vajatuxanenē Dioso pesaēta nejamatabēcuenecaējēpaeyaexana piniñicuene taexanaenexa. Espiritu Santo ata pesaēta nejamatabēcueneyavenona. Bajaraxuata apo judíovi tsipaebaponajē pexanialivaisi, Jesucristo pelivaisi, Diosojavabelia pecapanepaelivaisinexatsi. Tsipaebaponajē baja bajarapalivaisi Jerusalén tomarajava. Bajaraxuacujinae tsipaebaponajē daxitanacuanējava. Tajēnacuajavabelia ata, Ilírico nacuajavabelia, tsipaebaponajē.

²⁰ Itsa tsipaebaponajē pexanialivaisi, Jesucristo pelivaisi, jitsipajē tatsipaebaponaenexa itsaxuayo abaxē jivi apo vēnēlivaisitae Cristo. Apo jitsipaenē tatsipaebaponaejava itsaxuayo baja tavajēnaeya itsamonae tsipaebapona.

21 Bajarapacuenia apo judíovi itsa tsipaebaponajë Jesucristo pelivaisi, copiapata jane baja pacuenia baja cajena Dioso pejumelivaisibaxutota tajëvelia jumaisi tatsipaebaponaejavanexa yabara. Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajëvelia jumaisi mapacueniaje:

Pamonae abaxë apo vënëlivaisitae, ponë athëbëvetsica Dioso itorobjiitsitsica jivi pecapanepaenexa, bajarapamonae bajaraponë pelivaisi tsipaebianatsi. Nexata bajarapamonae jumecovënëtsiana ponë pelivaisi tsipaebianatsi,

jai tajëvelia Dioso pejumelivaisibaxutota Dioso pitorobinëtsitsica pelivaisi apo judíovijava mapamatacabitaje tatsipaebaponaejavanexa yabara.

Pacuenia picani Pablo jamatabëponabiaba Roma tomarabelia yabara pelivaisi

22 Bajayajebi picani bitso jamatabëpacataeyabiabatsi. Itsiata apo necuenecaëjêpae taponaeenexa paxamëjavabelia daxitanacuanëjava Dioso pejumelivaisi tatsipaebanajetarucaexae.

23 Aeconoxae baja veretajë tanacuenebijava mapanacuajavaje. Nexata jane baja ponaenajë paxamëjavabelia. Tspaji picani bajayajebi jamatabëpacataeyabiabatsi.

24 Pamatacabi ponaenajë España nacuayabelia, patsianajë copiaya paxamëjavata patacataenexa. Itsa baja nataenatsi, bitso jamatabëcuenebarëya tsavanapae tsanetsi. Bajaraxuacujinae jitsipajë pataneyavenonaenexamë tajanamutonexa taponaeenexa jane baja España nacuayabelia.

25 Bajara masaya pamatacabitaje ponaenajë Jerusalén tomarabelia ofrenda tatocaponaeenexa Dioso pejumecovënëtsivi.

26 Dioso pejumecovënëtsivi, Macedonia nacuapijivi, Acaya nacuapijivi ata, ofrenda baja toexana. Bajarapaofrenda toexana petoitorobinexa Dioso pejumecovënëtsivi, pamonae bepejiobivi, Jerusalén tomarata pejinavana-paevi.

27 Macedonia nacuapijivi, Acaya nacuapijivi ata, apo judíovi. Itsiata tsitanepanatsi bajarapacuenia ofrenda petoexanaenexa peyavenonaenexa juya judíovijavabelia, Jerusalén tomarapijivi. Tspaji judíovi copiaya yapëtane pexanialivaisi pecapanepaelivaisinexatsi Diosojavabelia. Nexata judíovi pejamatabëcueneta, pamonae apo judíovi ata, yapëtane baja pecapanepaelivaisinexatsi Diosojavabelia. Bajaraxuata pamonae apo judíovi beyavenona juya judíovijavabelia. Judíoviyajuvënëvi aeconoxae bitso namatavenona peyavenonaenexatsi mapanacuata penamatavenonaejavaxi yabara.

28 Copiaya tocalianë tsane mapaofrendaje Jerusalén tomarapijivijavabelia. Nexata bajaraxuacujinae itsa ponaenajë España nacuayabelia, copiaya patsianajë paxamëjavata.

29 Itsa patsianajë paxamëjavabelia, orijibia pacatsipaebianatsi pexanialivaisi, Cristo pelivaisi, bitso panejamatabëcuenebarëyanexa.

30 Tajamonae, pajumecovënëtame vajatuxanenë Jesucristo. Paneasi-vamënuua Espíritu Santo pejamatabëcueneta papecajamatabëcueneitorobixae pataniasivanexamë. Bajaraxuata pexaniacuenae pacavajëtsi. Itsa pavajëtame Diosojavabelia, xanë ata asaëyata panetovajëtsianame, pacuenia tajacuata natovajëtabijajë.

³¹ Panetovajëtsianame Diosojavabelia taneiyavenonaenexa taneitsacueniabiyaniya Judea nacuapijivi, Dioso apo pejumecovënëtsivi. Panetovajëtsianamenua Dioso pejumecovënëtsivi, Jerusalén tomarapijivi, tanevecuapitsinexa xaniavaetsia paofrenda tocaponaejitsianë. Pamona apo judiövi pejebipalataxa, belia bajarapaofrenda apo nevecuapitsi tsipae bajarapamona judiövi.

³² Panetovajëtsianamenua, itsa Dioso jitsipa, barëyaya tapatsinexa paxamëjavabelia. Panetovajëtsianamenua tanejamatabëcuene asaëyaexanaenexa Diosojavabelia itsa ponaponajë paxamëjavata.

³³ Xanë pacatovajëtabiabatsi Diosojavabelia papecayajavaponaponaenexa Dioso. Dioso cajena nacayavenonabiaba jamatabëcuenebarëyaya vajajinavanapaenexa. Bajara itsi tsane.

16

Pacuenia Pablo jamatabënajinalia peyapëtaevitsi, Roma tomarapijivi, yabara pelivaisi

¹ Payavenonaename vajabanava Febe, pova ponaejitsia paxamëjavabelia. Bajarapova yavenonabiaba Dioso pejumecovënëtsivi, Cencrea tomarapijivi.

² Pacopiapitsianame xaniavaetsia bajarapova vajatuxanenë Jesucristo pejamatabëcueneta, pacuenia voxaitsi copiapitabiabatsi Dioso vajanajuajumecovënëtsivi. Xua namatavenona bajarapova, payavenonaename. Tsipaji bajarapova yavenonabiaba ayaibitsaëto Dioso pejumecovënëtsivi. Xanë ata neyavenonabiaba.

³ Nebajacobiana Prisca. Prisca pamona ata, Aquila, nebajacobiana. Bajarapajivibeje tayajavanacuenebijivibeje vajatuxanenë Jesucristo pijacuenë.

⁴ Bajarapajivibeje toyai atatsibeje petëpaejavanexabeje picani, necapanepabeje tatëpaejavaminexavecu. Nexata jumaitsinë: “Pexaniacuenë baja cajena bitso panetoexanamebeje,” janë bajarapajivibejejavabelia. Itsiata ëxanë bajarapacuenia apo jumaitsinë. Daxita pamona apo judiövi, Dioso pejumecovënëtsivi, bajarapamona ata, bajarapacuenia jumaitsibeje tanecapanepaexabeje.

⁵ Pamona Dioso pejumecovënëtsivi, pamona nacaetuatabiaba Priscabeje Aquilabeje pijabota, bajarapamona ata nebajacobiana. Nebajacobiananua tasivanë Epeneto. Bajaraponë daxita Asiavënë nacupijivivecu copiya najamatabëcuenecopata Jesucristojavabelia.

⁶ Nebajacobiananua María, pova bitso tonacuenëbabiaba Dioso pijacuenë paxamë tuatuajëta.

⁷ Nebajacobiananua tajanacuapijinëbeje, Andrónicobeje Juniasvënënëbeje. Bajayata bajaraponëbeje panenajuajeba penaneconitsivi pejebabiabibota. Bajaraponëbeje yayiataeya baracuaicuajitsibeje pevëna apóstolevi ata. Xanë ata tanajamatabëcuenecopatsivajënaeya, bajaraponëbeje najamatabëcuenecopatabeje Cristojavabelia.

⁸ Nebajacobiananua Ampliato. Bitso tasivanë. Tsipaji bajaraponë ata Cristojavabelia najamatabëcuenecopata.

⁹ Nebajacobiananua Urbano. Bajaraponë ata tonacuenëbaponapona vajatuxanenë Jesucristo pijacuenë pacuenia voxaitsi tonacuenëbavanapatsi. Nebajacobiananua Estaquis, bitso tasivanë.

¹⁰ Nebajacobiananua Apelles, ponë picani dovathi pejamatabëcueneta jamatabëcuenejëtatsi Cristo pelivaisi pejumecovënëtsijava yabara. Itsiata apo

copatsi pejumecovënëtsijava Cristo pelivaisi. Nebajacobiananua Aristóbulo pijamonae.

¹¹ Nebajacobiananua tajanacuapijinë Herodión. Nebajacobiananua Narciso pijamonae, pamonaē penajamatabëcopatsivi Cristojavabelia.

¹² Nebajacobiananua Trifenabeje Trifosabeje, povabeje tonacuenebabiaba Dioso pijacuene. Nebajacobiananua vajaasivava Pérsida, pova bitso tonacuenebabiaba Dioso pijacuene.

¹³ Nebajacobiananua Rufo, ponë bitso xaniavaetsia jumecovënëta vajatuxanenë. Bajaraponë pena ata nebajacobiana. Bajarapova bepexënatonë neteayabiaba.

¹⁴ Nebajacobiananua Asíncrito, Flegonte ata, Hermas ata, Patrobas ata, Hermes ata, itsamonae ata, pamonaē najinavanapa bajarapamonaejavata.

¹⁵ Nebajacobiananua Filólogo, Julia ata, Nereo ata, Nereo pejuyapijiva ata, Olimpas ata, daxita itsamonae ata, Dioso pejumecovënëtsivi, pamonaē najinavanapa bajarapamonaejavata.

¹⁶ Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare. Daxita pina Dioso pejumecovënëtsivi majotaje pejinavanapaevi pacabajacobalia.

¹⁷ Tajamonae, pacatsipaebatsi itsalivaisi. Penajumetsënëtsilivaisi petsipaebaponaevi, panayajivitaeneme papecayamaxëitojorobiyanima. Bajarapamonae namataenetsia pacanajumeanaenotsiaexanaena najamatabëcuenejëpaeya panejinavanapaeyanima panenavecuansanaenexa. Palivaisi baja paxamë pajumecovënëtamē, bajarapalivaisivecua saicayalivaisi bajarapamonae tsipaebapona. Panavecuatsare bajarapamonae.

¹⁸ Bajarapamonae apo jamatabëexanaē pacuenia jitsipa vajatuxanenë Jesucristo. Biji rajane saya jamatabëexana bajarapamonae pijacuata penatojitsipaecuenia. Bajarapamonae jivi tsipaebapona bepexaniajailivaisi itajara. Itsiata baitsi jane bajarapamonae saya jamatabëyamaxëitojoroba pamonaē abaxë xaniavaetsia apo jumeyapëtaē pexaniajailivaisi.

¹⁹ Daxitajivi paxamë pacavënëlivaisitane xaniavaetsia panejumecovënëtsijava Dioso. Bajaraxuata pacasivabarëyatsi. Pacatojitsipatsi paneyapëtaenexa bitso ëpexaniacuene paneexanaenexa. Pëtsa panacopatame itsajivi ata papecayamaxëitojorobinexa pibisiacuene paneexanaenexa.

²⁰ Dioso baja cajena vajanacayavenonaenë najamatabëcuenejëpaeya vajajinavanapaenexa, itsajivi ata vajanacayamaxëitojorobiyanima penajumetsënëtsilivaisita. Nexata Dioso bepijia pacayavenonaena panejamatabëcueneamoneyabinexa dovathi. Pacatovajëtabiatsi Diosojavabelia vajatuxanenë Jesucristo papecayavenonabiabinexa.

²¹ Pabajacobianame pina Timoteo, Dioso patatonajuanacuenebinëbeje. Pabajacobianamenua pina tajanacuapijivi Lucio, Jasón ata, Sosípater ata.

²² Xanë, Tercionë, mapabaxutotaje Pablo pijume tajumeyaquinaponenë. Xanë ata pacajamatabënajinatsi. Tsipaji Jesucristojavabelia vajanajamatabëcuenecopatsivi.

²³ Pabajacobianame pina Gayo. Naponaponajë Gayo pijabota. Gayo tocopatabiaba daxita Dioso pejumecovënëtsivi penacetautabiabinexa Gayo pijabota. Pabajacobianamenua pina Erasto, ponë etetabiaba palata, Corinto tomarapijipalata. Pabajacobianamenua pina vajabanenë Cuarto.

²⁴ Pacatovajëtabiatsi Diosojavabelia daxita paxamë vajatuxanenë Jesucristo papecayavenonabiabinexa. Bajara itsi tsane.

Pacuenia cotocaevipijilivaisita Pablo jumaitsi yabara pelivaisi

²⁵ Vaxaitsi Dioso yabara jumaitsitsi tsabiabi: “Dioso cajena bitso ayai-jamatabëcuenenë,” jaitsi tsabiabi. Dioso, daxitamatacabijavabelianexa pe-ponaponanë, caëjëpatsi papecajamatabëcuene asaëyaexanaenexa pejumeliv-aisita. Bajarapalivaisi pexanialivaisi, Jesucristo pelivaisi, jivi pecapanepae-livaisinexatsi Diosojavabelia. Bajarapalivaisi jivi tsipaebaponajë. Bajara-palivaisi bajayajebi picani Dioso muetsia xainabuata. Dioso nacua pexanae-javaveliacujinae, muetsia Dioso xainabuata Jesucristo pelivaisi.

²⁶ Bajarapalivaisi bajayata Diosojumelivaisipaebivi profetavi tajëvelia yapëtane baja cajena. Nexata bajarapalivaisi profetavi yaquina. Nexata ba-jarapalivaisi mapamatacabitaje Dioso jane baja nacayapëtaeyaexana. Nexata Dioso pijajivi itorobapona daxitanacuanëpijivijava petsipaebinexa Jesucristo pelivaisi. Bajarapacuenia Dioso pijajivi itorobapona daxitanacuanëpijivi ata pejumecovënëtsinexa Jesucristo pelivaisi.

²⁷ ¡Caenë rabaja Dioso daxitacuene peyapëtaenë! Bajaraxuata daxitamatacabijavabelianexa vaxaitsi vajatuxanenë Jesucristo pejamatabëcueneta Diosojavabelia jumaitsitsi tsabiabi: “¡Diosomë, bitso ayaijamatabëcuenenëmë!” jaitsi tsabiabi. Bajara itsi tsane.

Mapabaxutoje San Pablo copiaya toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa daxitanacuanëjava. Vajabananë Sóstenes neyavenona mapalivaisije patacatoyaquinaejava paxamëjavabelia.

² Mapabaxutoje patacatoyaquinatsibeje Dioso panejumecovënëtsivi, paCorinto tomarapijivimë. Dioso baja papijajivimë Jesucristo pejamatabëcueneta aneconijibia Dioso papecataexae. Dioso pacajunata papijajivinexamë xaniavaetsia panetoinavanapaenexa. Pacayajavajunata baja cajena daxita Dioso pejumecovënëtsivi, itsanacuanëjava pejinavanapaevi, pamonaev navajëcabiaba Jesucristojavabelia. Vajatuxanenë Jesucristo rabaja bajarapamonaev ata pijatuxanenë.

³ Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavana-paenexa.

Pacuenia Corinto tomarapijivi Cristo pijajivixae, Dioso yavenonabiabatsi yabara pelivaisi

⁴ “Xanepana rabaja pacuenia yavenonabiabame bajarapamonaev Jesucristo pijajivixae,” janë tsabiabi Diosojavabelia tavajëtabiabijavata paxamë yabara.

⁵ Jesucristo papijajivixae, daxitacuene yabara Dioso pacajamatabëcueneyavenonabiaba. Pacayavenonabiabanua xaniavaetsia jivi panetsipaebinxae Dioso pejumelivaisi. Pacajumeyapëtaeyaexananua pepo pexaniajailivaisi.

⁶ Xua yabara pacatsipaebabiabatsi Cristo papecajamatabëcuene yavenonabiabinexa, baja rajane pacatocopiapata. Bajarapacuenia papecatocopiapatsixae, nexata baja pajamatabëcuenesaemë tsavanapae panejumecovënëtsijava bajarapalivaisi.

⁷ Nexata abaxë paepatojebi pacopiaevetavanapame vajatuxanenë Jesucristo icatsia pepatsijavanexatsica, Dioso pacacaejëpaeyaexanabiaba pane-texanavanapaenexa daxita pacuene Dioso pacatojitsipa.

⁸ Dioso cajena pacayavenonaponaena paneajamatabëcuenesaenexa Dioso panejumecovënëtsijava daxitamatabijavabelianexa. Nexata pamatacabi vajatuxanenë Jesucristo icatsia patsianica, toacuenebi tsanetsi itsajivi ata papecaneconitsinexa.

⁹ Dioso cajena bajarapacuenia pacatoexanaena. Tsipaji pacuenia Dioso najumecapanepaeya jumai tsabiabi pexanaenexa, exanabiaba. Dioso pacajunata pexënëto, vajatuxanenë Jesucristo, papijajivinexamë.

Pacuenia Dioso pejumecovënëtsivi navecuanatsanapona apo penajamatabëcuenejëpaexae yabara pelivaisi

10 Tajamonae, pacaitorobatsi vajatuxanenē papijajivixaemē, najamatabēcuenejēpaeya panejinavanapaenexa. Pētsa panavecuonat-sanaeyajoneponame itsajavabelia. Biji rajane najamatabēcuenejēpaeya pajinavanapare. Najamatabēcuenejēpaeya xaniavaetsia panajamatabēxainare caelivaisi.

11 Mapacuenia pacatoyaquinatsije tsipaji Cloévēnēva pijajivi netsipaeba. Apo panajamatabēcuenejēpaemē pina. Daxitatsi baja cajena caenē vajatuxanenē Jesucristo pijajivitsi. Paxamē tuatuajēta pina itsamonae nabijataeya namataenetsia najumeanaenotabiaba.

12 Itsamonae pina xanē yabara jumai tsabiabi: “Xanē raja saicaya Pablo pijajivitonēnē,” jai pina tsabiabi. Itsamonae pina jumai tsabiabi: “Xanē raja saicaya Apolos pijajivitonēnē,” jai pina tsabiabi. Itsamonae pina jumai tsabiabi: “Xanē raja saicaya Pedro pijajivitonēnē,” jai pina tsabiabi. Itsamonae pina jumai tsabiabi: “Xanē raja saicaya Cristo pijajivitonēnē,” jai pina tsabiabi.

13 Bajarapacuenia paxamēyajuvēnēvi apo bejumaitsi tsabiabi. Tshipaji bajarapalivaisi yabara nabijataeya namataenetsia pena-jumeanaenotabiabixae, navecuatatsanapona. Bajarapacuenia apo benavecuatatsanapona tsipaji baja cajena Cristo caenē tsaponapona. Apo navitsanae baja cajena. Nexata pamonaē ata Cristo pijajivi, caebitsaēto rabaja tsavanapae. Nexata apo benavecuatatsanapona. Nexata itsajivi ata xanē yabara apo bejumaitsi: “Xanē raja saicaya Pablo pijajivitonēnē,” apo bejai. Tshipaji xanē itsajivi ata apo sivanabeyaxuabiaexanaenē cruzata. Itsajivi ata baja cajena apo bautisabitsi tavēnēta tajajivitonē penaexanaenexa.

14 Xanē baja cajena apo bautisabinē jivi ayaibitsaēto. Saya bautisabajē anijanēbeje, Cristobeje Gayobeje. Bajaraponēbeje itsa bautisabajē, bautisabajē Cristo pevēnēta. Nexata jivi ayaiBITSaēto apo tabautisabixae, sivabarēyanē Diosojavabelia.

15 Nexata acuenebi itsajivi ata pejumaitsijava: “Xanē raja nebautisaba Pablo pevēnēta. Nexata Pablo pijajivitonēnē,” pejaijava.

16 Jemajanē tsaena. Bautisabajēnua tsaena Estēfanās pijamonae. Pematatsēnēa baja apo najamatabēnapitsinē pajiviyo bautisabajē.

17 Cristo apo nitorobi bitso jivi tabautisabaponaenexa. Biji rajane Cristo nitoroba tatsipaebaponaenexa jivi pexanialivaisi pecapanepaelivaisinexatsi Diosojavabelia. Nexata pacuenia Dioso nejamatabēcuenecaējēpaeya exanapona, bajarapacuenia pacatsipaebaponaitsi. Apo nitorobi baja cajena tatsipaebaponaenexa pematatsēnēa itsalivaisuenia. Pacuenia tsipaebabiaba pamonaē yapētane saya maēpanacuapijilivaisije, bajarapacuenia tatsipaebinexa, Cristo apo nitorobi. Nexata itsa tsipaebaponaejitsipajē pacuenia tsipaebabiaba pamonaē yapētane saya maēpanacuapijilivaisije, nexata Jesucristo vajanacasivatēpaejava cruzata tsipaebi atanē tsipae jivijavabelia, ajumematamobinē tsipae.

Pacuenia Cristo jivijavabelia tsitajēta Dioso piasaēnēcuene, Dioso bitso daxitacuenē peyapētaenēcuene ata, yabara pelivaisi

18 Itsamonae pijaneconi yajavatēpaena. Bajarapamonaē jumetaē ata Jesucristo cruzata vajanacasivatēpaejava, bajarapalivaisi apo jumecovēnētsi. Benatsiquejermalivaisi saya tane. Itsiata baitsi jane vaxaitsi Dioso vajanacapanepaevinexa, bajarapalivaisi nacayapētaeayaexana Dioso piasaēnēcuene.

19 Dioso baja cajena pejumelivaisibaxutota tajēvelia jumaitsi mapacueni-aje:

Itsamonae bitso yapētane mapanacuapijilivaisije. Bajarapamonae peyapētaelivaisimi, itsamatacabi vecuaajibiaexanaenajē. Pamonaē ata bitso peyapētaēvi itajara tanetsi mapanacuapijivije, xanē itsamatacabi jamatabēcueneitajētsianajē pacuenia jamatabēcueneitsi. Nexata bajarajota daxitajivi jamatabēcuenyapētaenatsi bajarapamonae saya bevelia peyapētaevicuene, jai baja cajena tajēvelia Dioso pejumelivaisibaxutota.

²⁰ Ponē yapētane saya maēpanacuapijilivaisije, ajumematamobi cajena. Ponē ata bajayajebi nacujaruba maēpanacuapijilivaisije, nexata yapētaē ata, ajumematamobi cajena. Ponē ata bitso ajumelivaisisaēya cuaicuuijai, bajaraponē ata ajumematamobi cajena. Daxita bajarapantsivi ajumematamobi, itsa apo natovajētsi Diosojavabelia peyavenonaenexatsi peyapētaenexa jane baja xaniavaetsia. Dioso baja cajena nacayapētaēyaxana mapanacuapijilivaisije natsiquejemalivaisicuene. Tsipaji Dioso apo penajamatabēxainaelivaisi.

²¹ Dioso baja cajena daxitacuene bitso peyapētaenē mapanacuapijilivaisi peyapētaēvi matatoxenetsia. Nexata Dioso apo tocopatsi pejamatabēcuenyapētaenexatsi pamonaē bitso yapētane saya mapanacuapijilivaisije. Biji rajane Dioso jamatabēcapanepa pijaneconivecua pamonaē jumecovēnēta pexanalivaisi, palivaisi patsipaebaponajē, Jesucristo cruzata vajanacasivatēpaelivaisi. Bajarapalivaisi itsamonae betsitantsiquejemalivaisi atsi, itsiata bajarapalivaisi pejamatabēcueneta capanepaenatsi pamonaē jumecovēnētavanapa bajarapalivaisi.

²² Judíovi itsa jumetaeyabiaba patatsipaebijava Diosojavabelia picani pecapanepaelivaisinexatsi, najumai tsabiabi ēpamonae: “Itsa taejitsipatsi Dioso pesaēta pinijicuene pexanaejava pamonaē nacatsipaeba mapalivaisije, nexata matapania jumecovēnētsipatsi bajarapalivaisi pexaniajailivaisicuene,” najai tsabiabi judíovi. Griegovi ata itsa patsipaebabiabajē bajarapalivaisi, najumai tsabiabi ēpamonae: “Mapalivaisije itsa jumepēpaejitsipa palivaisi nacatsipaebabiaba vajayajuvēnēvi, daxitalivaisi bitso peyapētaēvi, nexata matapania jumecovēnētsipatsi pexaniajailivaisicuene mapalivaisije,” najai tsabiabi griegovi.

²³ Itsiata baitsi jane paxanē itsa patsipaebaponajē bajarapalivaisi, “Cristo raja nacasivatēpa cruzata vajanacacapanepaenexa vajaneconivecua,” pajanē tsabiabi. Bajarapacuenia patatsipaebijava judíovi jumetaeyabiabi ata, itsiata apo jumecovēnētsi. Anaepanabiaba saya. Apo judíovi ata itsa jumetaeyabiaba Cristo vajanacasivatēpaejava cruzata, benatsiquejemalivaisi saya jumetaeyabiabi.

²⁴ Itsiata pamonaē Dioso junatatsi pecapanepaenexatsi, judíovi, apo judíovi ata, bajarapamonae jumeyapētaēpona bajarapalivaisi. Nexata bajarapamonae yapētaēpona Dioso piasaēnēcuene. Tsipaji bajarapamonae Dioso capanepaejitsiatsi pijaneconivecua Cristo pesivatēpaexaetsi cruzata. Bajarapamonae yapētaēponanua Dioso bitso daxitacuene peyapētaenēcuene. Tsipaji Dioso tajēvelia najamatabēxaina bajarapamonae pibisicuene pexanaenconivecua pecapanepaenexa Cristo pejamatabēcueneta.

²⁵ Pacuene Dioso exana jivi pecapanepaenexa pijaneconivecua, bajarapacuenē mapanacuapijivije, Dioso apo pejumecovēnētsivi, betsitantsiquejemacuenetsi. Pacuenia baja cajena Dioso tajēvelia najamatabēxaina jivi pecapanepaenexa, exana baja. Bajaraxua bitso pexanicuene. Bitso peyapētaēvi ata mapanacuapijilivaisije, apo caējēpaetsi bajarapacuenia penajamatabēxainanexa. Dioso itsa copata Cristo pebeyaxuabinexatsi cruzata,

bajarapaepatota Dioso saya bepiasaëjibinë tanetsi mapanacuapijivije. Itsiata baitsi jane bajarapaepatota Dioso najamatabëcueneitajëta bitso pi-asaënëcuene daxita mapanacuapijivije matatoxenetsia. Tsipaji bajarapaepatota Dioso pinijicue ne exana vajanacacapanepaenexa vajaneconivecua.

²⁶ Tajamonae, pacanaëjere mapacueneje. Paxamëyajuvënëvi caejivibeje saya bitso peyapëtaevi mapanacuapijilvaisije. Caejiviyobeje pijinia saya ayaijamatabëcuenevi. Caejiviyobeje saya petuxanevi pexi. Paxamë paayaibitsaëttoxanetomë beveliajamatabëcuene saya panexainaevi. Bajarapacuenia beveliajamatabëcuene panexainaevi ata, itsiata Dioso pacajunata papijajivinexamë.

²⁷ Pamonaë bitso peyapëtaevi mapanacuapijilvaisije, jumai tsabiabi paxamë bajarapalivaisi apo paneyapëtaevi yabara: “Mara pamonaë bitso apo peyapëtaevije,” jai tsabiabi. Itsiata Dioso pacaitapeta papijajivinexamë, apo paneyapëtaevi ata. Bajarapacuenia Dioso pacaitapeta, pamonaë bitso peyapëtaevi natane, piauranexa Dioso pitabarata, pamatacabi daxita Dioso papijajivimë bitso paneyapëtaevi pacaexanaena. Dioso cajena pacaitapetanua papijajivinexamë, mapanacuapijivije bepaveliajamatabëcuenevimë pacatae ata. Bajarapacuenia Dioso pacaitapeta, pamonaë bitso ayaijamatabëcuenevi natane, piauranexa Dioso pitabarata, pamatacabi daxita Dioso papijajivimë paayaijamatabëcuenevimë pacaexanaena. Bajaramonaë aura tsane itsa nayapëtaena jamatabëcuenenavëxaniabiaya beveliajamatabëcuenevi papecataejava Dioso papijajivimë.

²⁸ Dioso baja cajena pacaitapeta papijajivinexamë, daxitajivi papecaitoaxae, bijiaya papecanaëcotsivi ata. Bajarapacuenia Dioso pacaitapeta, pamonaë bitso ayaijamatabëcuenevi itajara daxitajivi tanetsi mapanacuataje, Dioso piaurabinexa. Bajarapamonaë Dioso urabiana, pamatacabi daxita Dioso papijajivimë paayaijamatabëcuenevimë pacaexanaena. Bajarapamat-acabi daxitajivi Dioso yapëtaeyaexanaena pijumematamobijava, pamonaë ayaijamatabëcuenevi itajara tanetsi mapanacuataje.

²⁹ Bajaraxuata Dioso pitabarata jamatabëcuenenavëxaniabiaya itsajivi ata apo bejumaitsi itsajivijavabelia: “Xanë bitso ayaijamatabëcuene taxainaenë,” apo bejai.

³⁰ Dioso papecaitaxutotsoniataexae, pacaitapeta papijajivinexamë. Nexata Jesucristo payajavajinavanapame. Vaxaitsi Dioso jamatabëcueneypëtanetsi. Tsipaji Jesucristo nacajamatabëcueneypavenona Dioso vajajamatabëcueneypëtaenexa. Jesucristo pejamatabëcueneta Dioso aneonijibia nacatane. Pijajivitsinua Dioso nacaexana. Nacavecuaajibiaexananua pibisiacuene vajaexanaeneonimi.

³¹ Bajaraxuata jivijavabelia benavajunupaebatsi Dioso vajanacayavenonaejava. Tsipaji Dioso pejumelivaisibaxutota jumaitsi mapacueniaje: “Pëtsa navajunupaebame saya nijacuata nexanaejava yabara jivi pecayiyataenexa. Biji rajane navajunupaebare Dioso pecayavenonaponaejava. Nexata jivi Dioso yayiyataena,” jai Dioso pejumelivaisibaxutota.

2

Pacuenia Jesucristo sivatëpa mapanacuapijivije yabara pelivaisi

¹ Tajamonae, pamatacabi ponajë paxamëjavabelia, pacatsipaebatsi baja cajena pexaniajailivaisi, Dioso pejumelivaisi. Nexata bajarapamatacabi apo pacatsipaebitsi pacuenia tsipaebabiaba pamonaë bitso peyapëtaevi mapanacuapijilvaisije. Biji rajane pacatsipaebatsi xaniavaetsia jumenapebet-siaya panejumeyapëtaenexa patacatsipaebilivaisi.

² Itsa ponaponajë paxamëjavata, najamatabëxainajë patacatsipaebinxaxa ejesucristo pelivaisi. Nexata bitso pacatsipaebabiabatsi Jesucristo vajanacasivatëpaejava cruzata.

³ Paxamëjavata itsa ponaponajë patacatsipaebinxaxa pexaniajailivaisi, Jesucristo pelivaisi, najamatabëcueneypätaniji apo tanecaëjëpaejava tajacuata patacatsipaebinxaxa. Nexata natsijamatabëcuenebëjanë. Jamatabëcueneconeconajë Dioso pitabarata bajarapalivaisi patacatsipaebijavanexa yabara.

⁴ Bajarapamatacabi pexaniajailivaisi itsa pacatsipaebabiabatsi, Dioso neyavenonabiaba. Xanë ëtajamatabëcuenesaëta bajarapalivaisi apo pacajumecovënëtsiaexanaetsi. Biji rajane Espiritu Santo pacatsijamatabëcuaiquaijai. Dioso pesaëta pinijicuene taexanaejava ata, pataneme. Bajaraxuata patacatsipaebilivaisi pexaniajailivaisicuene, payapëtaneme. Nexata bajarapalivaisi pajumecovënëtime.

⁵ Bajarapacuenia pacatsipaebatsi panenajamatabëcuenecopatsinxaxa Dioso javabelia, Dioso pesaëta papecayavenonaponanexaxa. Tspijai apo pacatojitsipaetsi paneyajavajumecovënëtsinxaxa pamonae mapanacuataje tanetsi bitso peyapëtaevi mapanacuapijilivaisije.

Pacuenia Dioso najamatabëcueneitajëtaçona pejumecovënëtsivitsijavabelia Espiritu Santo pejamatabëcueneta yabara pelivaisi

⁶ Dioso bitso pejumecovënëtsivi tuatujëta itsa pajinavanapajë, patsipaebavanapajë Dioso pejumelivaisi, pexaniajailivaisi. Bajarapalivaisi apo yapëtae mapanacuapijivije. Mapanacuanë pevetsivi ata apo yapëtae. Bajarapamonae saicaya itsalivaisi xaina. Bajarapamonae bajarapalivaisi yajavatëpaena.

⁷ Dioso pejumelivaisi, pexaniajailivaisi, itsa patsipaebavanapajë, patsipaebavanapajë Cristo vajanacasivatëpaejava vajanacapanepaenexaxa vajaneconivecua. Bajarapalivaisi baja cajena Dioso bajayata tajëvelia muetsia xainabuata. Matapania aeconoxae mapamatacabitaje Dioso nacayapëtaeyaxana bajarapalivaisi. Dioso baja cajena nacua pexanaevajënaeya ata, najamatabëxaina pacuenia exanaejitsia vajanacarajutsinxaxa matacabi apo pevereceajava.

⁸ Nexata abaxë pamatacabi Cristo ponapona mapanacuataje, itsanë ata mapanacuanë pevetsiviyajuvënënë apo jumeyapëtae bajarapalivaisi, Cristo pelivaisi. Bajarapamonae itsa jumeyapëtaejitsipa bajarapalivaisi, nexata Cristo apo beyaxuabi tsipaetsi cruzata, ponë pepo petuxanenë, Dioso pexënato.

⁹ Nexata bajarapamonae apo pejumeyapëtaexaxa Cristo pelivaisi, copiapata janae baja pacuenia Dioso pejumelivaisibaxutota tajëvelia jumaitsi mapacueniaje:

Xua abaxë itsajivi ata apo tae, apo jumetaenua, apo sivanajamatabëxainaenua, bajaraxua Dioso baja cajena toxaniavaeta pamonae Dioso pejitsipaevinexaxa, jai tajëvelia Dioso pejumelivaisibaxutota Cristo vajanacasivatëpaejavanexa cruzata.

¹⁰ Nexata vaxaitsi Cristo vajanacasivatëpaejava, Dioso nacayapëtaeyaxana Espiritu Santo pejamatabëcueneta. Espiritu Santo baja cajena daxitacuene nacayapëtaeyaxana. Pacuenia Dioso najamatabëxaina vajanacapanepaenexaxa, bajaraxua ata Dioso nacayapëtaeyaxana Espiritu Santo pejamatabëcueneta.

¹¹ Vaxaitsi apo nacacaējēpae vajajamatabēcueneyapētaenexa pacuenia bēpēnēa najamatabēxaina itsajivi. Itsiata bajarapajivi pijacuata najamatabēcueneyapētane. Bajara pijinia pacuenia vaxaitsi ata Dioso apo jamatabēcueneyapētae tsipaetsi pacuenia Dioso najamatabēxaina Espiritu Santo itsa apo nacayapētaeyaexanae tsipae.

¹² Tspaji Dioso apo natatocopatsi vajacuata vajajamatabēcueneyapētaenexa pacuenia Dioso najamatabēxaina. Bajaraxuata Dioso nacarajuta Espiritu Santo vajanacatsijamatabēcaenexa. Nexata Espiritu Santo pejamatabēcueneta nacayapētaeyaexana pacuenia Dioso nacayavenonaejitsia Jesucristo pejamatabēcueneta.

¹³ Nexata livaisi itsa tsipaebaponatsi Dioso pejumecovēnētsivijavabelia, tsipaebaponatsi pacuenia Espiritu Santo nacayapētaeyaexanapona. Apo tsipaebaponaetsi mapanacuapijicuene yabaraje, xua vajacuata banajamatabēxainatsi.

¹⁴ Pajivi Dioso apo jumecovēnētsi, bajarapajivi apo jumecovēnētsi palivaisi picani Espiritu Santo ata yapētaeyaexanaejitsiatsi. Tspaji saya bajara-palivaisi betsitantsiquejemalivaisitsi. Bajarapajivi apo caējēpaetsinua pejumeyapētaenexa palivaisi Espiritu Santo yapētaeyaexanatsi. Tspaji Espiritu Santo petsijamatabēnaevitsi, caējēpatsi pejumeyapētaenexa palivaisi Espiritu Santo yapētaeyaexanatsi.

¹⁵ Pajivi tsijamatabēcatsi Espiritu Santo, bajarapajivi pejamatabēcueneta yapētaeyaexanaponatsi xua Dioso tsitapexaniacuenetsi. Yapētaeyaexanaponatsinua xua ata Dioso tsitapibisiacuenetsi. Nexata Dioso apo pejumecovēnētsivi apo caējēpaetsi peneconitsinexatsi bajarapajivi Diosojavabelia.

¹⁶ Dioso pejumelivaisibaxutota bajaraxua yabara jumaisi mapacueni-aje: "Itsajivi ata apo yapētae pacuenia najamatabēxaina pepo petuxanēnē Dioso. Nexata itsajivi ata apo caējēpaetsi pemuxujio binexa Dioso," jai Dioso pejumelivaisibaxutota. Nexata pacuenia Cristo jamatabēcuenetsi, bajara vaxaitsi ata jamatabēcuenetsitsi. Nexata itsajivi ata apo caējēpaetsi vajanacajamatabēcueneyapētaenexa. Apo caējēpaetsinua vajanacamuxujio binexa.

3

Pacuenia Dioso pejumecovēnētsivi najamatabēcueniejēpaeya Dioso betonacuenebavanapa yabara pelivaisi

¹ Tajamonae, palivaisi abaxē ayapēbeje jivi pejumeyapētaenexa, bajara-palivaisi tsipaebabiabajē Espiritu Santo pitorobicueniatsi pejinavanapae-vijavabelia. Nexata bajarapamonae nejumeyapētaeyaabiaba. Itsiata baitsi jane paxamē bajayajebi baja Cristo pelivaisi panejumecovēnētsivi ata, pi-ayapēbejelivaisi apo pacatsipaebabiabitsi. Tspaji apo panejumeyapētaemē tsipae. Bajaraxuata abaxē pacatsipaebabiabatsi pacuenia tsipaebabiabajē pamonae pejanajumecovēnētsivi Cristo pelivaisi. Tsitecaeya abaxē bepapejevaxijamatabēcuenemē Cristo panejumecovēnētsijava yabara. Tspaji apo panejumeyapētaeponaemē panevajēnaeyabelia Cristo pelivaisi.

² Penacuetojiviyo abaxē ěmito barajutatsi. Apo rajutsitsi abaxē pexaenexa pevi. Bajara pijinia pacuenia paxamē ata pamatacabi ajena pajumecovēnētame Cristo pelivaisi, pacatsipaebatsi peyapēxanepanalivaisi panejumeyapētaenexa. Tspaji abaxē bajarapamatacabi apo pacacaējēpae panejumeyapētaenexa palivaisi abaxē ayapēbeje. Itsiata baitsi jane abaxē aeconoxae ata saya patsitecavanapame. Apo pacacaējēpae

panejumeyapëtaenexa pematatsënëa. Bajaraxuata paxamë abaxë bemito paneapaejivixi Cristo pelivaisi panejumecovënëtsijava yabara.

³ Bajarapacuenia pajamatabëcuenëtsimë tsipaji abaxë mapanacuapijivije, Dioso apo pejumecovënëtsivi, jamatabëcuenëjêpaeya pajinavanapame. Paxamë abaxë panacuenecaëbabiabame. Nabijataeyanua namataenetsia panajumeanaenotabiabame. Natsanaeyanua jamatabëpanavecuajinavanapame. Nexata abaxë pacatsitecavanapame mapanacuapijivi pijacuene.

⁴ Pacuenia Dioso apo pejumecovënëtsivi najamatabëcuenëjêpaeya apo jinnanapae, bajarapacuenia paxamë ata najamatabëcuenëjêpaeya apo pajinavanapae. Tsipaji paxamëyajuvënëvi, itsamonae, xanë yabara jumai tsabiabi: “Pablo raja Apolosvecua ayaijamatabëcuenenë. Bajaraxuata xanë saicaya Pablo pijajivitonënë,” jai tsabiabi. Itsamonae pijinia jumai tsabiabi: “Apolos raja Pablovecua ayaijamatabëcuenenë. Bajaraxuata xanë Apolos pijajivitonënë,” jai tsabiabi.

⁵ Xanë Pablonë, apo ayaijamatabëcuenenënë. Apolos ata raja apo ayaijamatabëcuenenë. Paxanëbeje ata raja Apolosbeje saya Dioso papijajivitonënëbeje. Bajaraxuata pacatsipaebatsibeje vajatuxanenë Cristo pelivaisi. Nexata baja pajumecovënëtame vajatuxanenë Cristo pelivaisi. Paxanëbeje patonacuenëbajêbeje vajatuxanenë Cristo pacuenia paneitorobabeje.

⁶ Pabixainaevi bauba pabita xua jamatabëuba. Bajaraxuacujinae pabita peubijava eveta petoayacabejeyanivatsi. Itsiata baitsi jane xua uba pabita, Dioso pejamatabëcueneta tovitsabiaexanatsi. Bajara pijinia pacuenia xanë ubajê Dioso pejumelivaisi paxamë panejamatabëëthëtota. Bajaraxuacujinae Apolos pacaevetaponapona Dioso pejumelivaisita. Itsiata baitsi jane Dioso pejamatabëcueneta pacajamatabëcuenë vitsabiaexanapona.

⁷ Nexata ponë uba, ponë ata evetaponapona, apo ayaijamatabëcuenenëbeje. Caenë baja cajena Dioso ayaijamatabëcuenenë. Tsipaji pacuenia pabita peubijava Dioso pejamatabëcueneta vitsabiaexana, bajara pijinia pacuenia Dioso pejamatabëcueneta pacatsijamatabëvitsabiaexanapona Dioso pejumelivaisi.

⁸ Pamonae jivi tsijamatabëuba Dioso pejumelivaisi, pamonae ata evetavanapa Dioso pijajivi, najamatabëcuenëjêpa daxita. Itsanë ata apo ayaijamatabëcuenenë itsamonaevecua. Itsiata Dioso matamotsianatsi caenë canacujitsia saicaya petonacuenëbimatamo.

⁹ Paxanë raja Dioso pijacuene panebarënacuenëba. Paxamë ra pijinia bepapimë, papabita Dioso panebarëubapona pejumelivaisi. Pacuenia pabita peubijava Dioso pejamatabëcueneta vitsabiaexana, bajara pijinia pacuenia panejamatabëëthëtota Dioso pejumelivaisi vitsabiaexanapona.

Paxamë raja Dioso bepapijabomënu, paboxaneto Dioso panebarëexanapona.

¹⁰ Bo pexanaevi, pexaniabo pexanaenexa, itsaxuayo bo ënëtuatuajënexa, copiaya feratonë bamatatorotsia cueruba ibotoxanetonë pemëthëcaenexa bajarapaferatonëjava. Bajaraxuacujinae bajara paibotoxanetonëjumavereca itsaibotonë banajumacatsanejebapona. Nexata xanë, pacuenia Dioso netocopata, copiaya pacatsipaebatsi pexanialivaisi Jesucristo pelivaisi. Nexata baja pajumecovënëtame bajarapalivaisi. Bajaraxuata xanë bo ënëtuatuajënexa matatorotsia taferacuejava, bitso betanecujaninë. Bajarapaferatonëjava ibotoxanetonë tamëthëcaejava ata, bitso betanecujaninë. Tsipaji xanë copiaya pacatsipaebatsi Cristo pelivaisi. Nexata juya pamonae cotocaevi pacatsipaebavanapa, pacatsipaeba panevajënaeyabelia panejamatabëcuenesae tsaponanexa Cristo pelivaisi panejumecovënëtsijava. Bajarapamonae boyenepananexa

ibotonë bepecatsanaponaevi bo ënëtuatuajënexa matatoyorotsia tamëthëcaebotoxanetonëjumavereca. Boyenepananexa pecatsanaponaevi baitapetapona ëpexaniavirijava, pavirijava tsixanepana boyenepananexa. Bajara pijinia itsi pamonaë pacaëvetavanapa. Ëpexanialivaisi pacatsipaebabiaba paneajamatabëcuenesaënexa Diosojavabelia.

¹¹ Payapëtaneme rabaja mapacuejeje. Itsajivi baja capanepaeya boyenepananexa, itsa tsivajënaëmëthëca ibotoxanetonë, nexata baja itsajivi ata bajarapajumabereca icatsia itsaibotoxanetonë apo bemëthëcae. Bajara pijinia paitsimë paxamë ata. Capanepaeya baja pajumecovënëtime Jesucristo papecasivatëpaejava Dioso papecavecuajibiaexanaenexa pibisiacue ne paneaxanaeconimi. Nexata baja apo bepajumecovënëtsimë saicayalivaisi. Tspijivi baja ajibi pematatsënëa itsalivaisi papecacapanepaelivaisinexa panijaneconivecu.

¹² Pamonaë bo exana, maitsije. Itsamonaë exana bitso penamatamotsijavanëta. Itsamonaë exana bevelia penamatamotsijavanëta. Pamonaë pacatsipaebapona pexanijailivaisi pacuenia Dioso yapëtaeyaexanapontsi, bajarapamonaë bo bepexanaevi bitso penamatamotsijavanëta bajayajebi bo piagamatabësaëtsecaenexa. Bajarapamonaë bo bepexanaevi oronantonëta, platanantonëta ata, penamatamotsiibotonëta ata. Pamonaë pijinia saya pejamatabëcueneta peyapëtaelivaisi pacatsipaebapona, bajarapamonaë bo bepexanaevi bevelia penamatamotsijavanëta, bajayajebi apo piagamatabësaëjavanëta. Bajarapamonaë bo bepexanaevi saya naëjavanëta, patebaxutoxita ata, bearrozbotoxita ata.

¹³ Nexata pamatacabi Cristo patsianica, bajarapamatacabi nayapëtaena caejivi canacujitsia Cristo pijajivi, pamonaë xaniavaetsia tonacuenebavanapa. Bajarapamatacabi Cristo isoto yajavapatsianica. Nexata bajarapaisotota Cristo ëjëtaponaena xua pijajivi, caejivi canacujitsia, tonacuenebatsi. Nexata bajarapacuenia Cristo yapëtaena xaniavaetsia pijajivi petonacuenëbijavatsi.

¹⁴ Itsanë bo tonacuenëbijitsipa itsanë pijabonexa. Nexata bo petoveretetsicujinae, isoto najetaruae ata, itsiata bo apo tajue tsipae isoto apo petajuejavanëta bo pexanetsixae. Nexata bo penacuenëbinë matamotsipatsi.

¹⁵ Itsiata baitsi jane peveretetsibo itsa totajuejitsipatsi isoto petajuejavanëta, bo pexanetsixae, nexata naxuabijitsipa penacuenëbijava. Bo ata naxuabijitsipa. Penacuenëbimatamo ata naxuabijitsipa. Itsiata bo pexanaenë apo naxuabi tsipae. Panepaejitsipa itsiata tsiquirijavayota. Bajara pijinia itsi Cristo pelivaisi papecatsipaebivi ata. Baitsi pamonaë xaniavaetsia pacatsipaeba, capanepaenatsi Dioso. Matamotsianatsinua Dioso. Tspijivi pacuenia Dioso yapëtaeyaexanatsi, pexanialivaisi pacatsipaebapona. Pamonaë pijinia apo pacatsipaebi xaniavaetsia, apo matamotsi tsanetsi. Tspijivi saya pejamatabëcueneta peyapëtaelivaisi, pacatsipaebapona. Itsiata bajarapamonaë ata tsiquirijavayota capanepaenatsi Dioso.

¹⁶ Payapëtaneme rabaja mapacuejeje. Paxamë rabaja Dioso bepapijatem-plobomë. Tspijivi Espiritu Santo pacayajavaponapona.

¹⁷ Pajivi bijianaena bajarapatem-plobo, Dioso pijabo, nexata juya bajarapajivi Dioso navecuaxuabianatsi. Dioso baja cajena pijatem-plobo saicaya Diosonexa. Paxamë rabaja Dioso bepapijatem-plobomë.

¹⁸ Pëtsa pajamatabëcuenenavëxaniabame. Itsajivi paxamëyajuvënëjivi itsa jamatabëjumaitsi: "Xanë cajena daxitajivi matatoxenetsia bitso tayapëtaenë mapanacuapijilivaisije," itsa jamatabëjai, nexata bajarapajivi becopata bajarapajamatabëcuene. Beveliajamatabëcuenejivi saya benatane. Nexata

Dioso jamatabëcuenaçejëpaeya exanaenatsi peyapëtaenexa jane baja Dioso pejumelivaisi.

¹⁹ Daxita palivaisi bitso bepexaniajailivaisitane mapanacuapijivije, itsiata daxita bajarapalivaisi Dioso tsitanatsiquejemalivaisitsi saya. Dioso pejumelivaisibaxutota jumaisi mapacueniaje: “Dioso cajena naneconitsiaexanaena bitso peyapëtaevi mapanacuapijilivaisije peyamaxëitojorobavanapaejavata itsamonae,” jai Dioso pejumelivaisibaxutota.

²⁰ Icatsia itsalivaisita Dioso pejumelivaisibaxutota jumaisi mapacueniaje: “Pepo petuxanenë baja cajena yapëtane piamatamobicuene mapanacuapijilivaisije, bitso peyapëtaevi penajamatabëxainacuene,” jai Dioso pejumelivaisibaxutota.

²¹ Bajaraxuata itsajivi ata paxamëyajuvënëjivi, Dioso pejumelivaisi patacatsipaebivi, paxanë bepatajajivitonë apo benatae. Bepaayajamatabëcuenevinëna, apo bepanetae. “Xanë raja saicaya bajaraponë pijajivitonënë,” apo bejai paxanëyajuvënëvi yabara. Biji rajane paxanë bepanijajivinë panataniji Dioso pejumelivaisi patacatsipaebaponaexae. Tspijaji baja cajena Dioso pacatocopata daxita xua panamatavenoname.

²² Xanë Pablonë, Apolos ata, Pedro ata, bajarapamatabëxëyo Dioso panecopata paxamë patacjamatabëcuenyavenonaenexa. Daxita mapanacuata panejinavanapaenexa ata, Dioso pacatocopata. Paneasaëtsavanapaenexa, panetëpaenexa ata, Dioso pacatocopata. Panejinavanapaenexa ajena, panevajënaeyabelia ata panejinavanapaenexa, Dioso pacatocopata. Daxita rabaja bajaraxua Dioso pacatocopata paxamënexa.

²³ Pematatsënëa rabaja Dioso pacatocopatannua paxamë Cristo papijajivinxamë. Cristo rabaja pijinia Dioso bepijajivitonë, Dioso pejitsipaecuenia petoexanaexae.

4

Pacuenia Cristo pijajivi, apóstolevi, nacuenebavanapa yabara pelivaisi

¹ Paxamë saya panetaema Cristo papijajivinëcuenia. Cristo raja panetocopata jivi patatsipaebavanapaenexa pexanialivaisi. Bajarapalivaisi Dioso pepo bajayata muetsia xainabuata.

² Pajivi itsanë pijajivitonë naexana, bajarapajivi pijatuxanenë pitorobicueniatsi, xaniavaetsia betonacuenebaponapona.

³ Bajaraxuata xanë ata exanaponajë pacuenia vajatuxanenë nitoroba. Nexata paxamë panebaracuaicuajamë tsabiabi ata, itsamonae ata nebaracuaicuajai tsabiabi ata jivi tatsipaebaponaelivaisi yabara, taexanaponaejava ata yabara, itsiata apo nasivajamatabëcuenebëjanë patanebaracuaicuajaitsabiabijava yabara. Apo nacuenecanaëjëtsinëna pacuenia tonacuenebajë vajatuxanenë. Nexata tajamatabëcueneta apo jamatabëjumaitsinë: “Xaniavaetsia meta tajatuxanenë tonacuenebaponaponajë. Itsa jume, bijiata meta tonacuenebaponaponajë,” apo jamatabëjanë.

⁴ “Jumecovënëtajë daxita pacuenia Dioso nitoroba. Nexata taneitorobicuenia xaniavaetsia tonacuenebajë. Bajaraxuata ajibi Dioso taneyabara naneconitsiaexanaejavanexa,” jamatabëjanë ata tspiae, itsiata ajumematamobinë tspiae. Bajaraxuata evetajë vajatuxanenë pijacuata tanejumaitsinexa itsa apo jumecovënëtsinë taneitorobicuenia.

⁵ Bajaraxuata pëtsa pabaracuaicuajamë itsamonae ata Dioso petonacuenebavanapaevi. Pacopiaevetavanapare abaxë vajatuxanenë pepatsijavatsica. Bajaraponë itajëtsiana bajarapamonae muetsia

pexanaejavanēmi ata. Pacuenia caejivi canacujitsia vajatuxanenē pijajivi bēpēnēa najamatabēxaina petonacuenebavanapaejavata, vajatuxanenē itajētsiananua. Bajaraxuacujinae nexata xaniavaetsia petonacuenebavanapaevi, caejivi canacujitsia, Dioso barēyataenatsi petonacuenebavanapaejaya yabara.

6 Tajamonae, bajarapacuenia pacatoyaquinatsi Apolos yabara, xanē ata yabara, patacayapētaeayaexanaenexa. Bajarapacuenia pacatoyaquinatsi, Dioso pejumelivaisibaxutota pejumaitsicueniavecua, bitso bepaayaijamatabēcuenenēnēbeje patanetaeyanivamē. Bajarapacuenia pacatoyaquinatsi itsamonae ata, pamonae Dioso petonacuenebavanapaevi, najēpaeya paneyaiyataenexa. Pētsa itsamonaevecua beayaijamatabēcuenenē pataneme caenē ata. Bajara pijinia pacuenia beveliajamatabēcuenenē pētsa pataneme caenē ata.

7 Paxamē ata pētsa itsamonaevecua bepaayaijamatabēcuenemimē panataneme. Itsa panavajunupaebabiabame, apo panavajunupaebabiabimē Dioso papecayavenonabiabijava. Xua daxita paxainame, Dioso baja cajena pacarajuta panexainaenexa. Pamonaē ata pata paxamējavata papecatsipaebinexa Dioso pejumelivaisi, bajarapamonae ata Dioso pacatocopata. Nexata daxita bajaraxua Dioso papecatocopsixae, bepaayaijamatabēcuenemimē pētsa panataneme itsamonaevecua.

8 Paxamē jamatabēcuenenavēxaniabiaya panajamatabēxainame mapacueni-aje: “Pacuenia ricovi ayaijava pecobcovē xaina, bajara vaxaitsi itsitsi Dioso pejumelivaisi vajajumecovēnētsijava. Tsipaji ayailivaisi xainatsi. Tsi-paji baja itsamonae bitso nacatsipaebabiaba Dioso pejumelivaisi. Nexata baja pematatsēnēa apo namatavenonaetsi itsajivi ata vajanacatsipaebaponaenexa,” pajamatabējamē tsabiabi jamatabēcuenenavēxaniabiaya. Jamatabēcuenenavēxaniabiaya Dioso pijacuene bepaneevetsivi panataneme. Nexata meta paxanē matatoxenetsia bitso bepaayaijamatabēcuenemimē panataneme. Dioso pijacuene itsa paneevetsivi tsipae, nexata pacasivajamatabēcuenenavēyatsi tsipae. Nexata vajanajuaevetsivi tsipae Dioso pijacuene.

9 Paxanē, paapóstolevinē, Dioso covē panetocopata daxitajivi patanetaenexa bijiaya. Panetocopata bepatananeconitsivicuenia patanebeyejebinexa. Bajarapacuenia Dioso panetocopata bijiaya patanetaenexa ángelevi ata, daxitajivi ata.

10 Paxanē, Cristo xaniavaetsia patajumecovēnētsivi, itsamonae panetane bepatanematajemabivi. Paxamē, Cristo xaniavaetsia apo panejumecovēnētsivi ata, Cristo pijacuene bitso bepaneyapētaevi itajara panataneme. Caranata paxanē itsamonae bepataajamatabēcuenesaējibivi panetane. Caranata juya paxamē bepaneajamatabēcuenesaēvi panataneme. Paxanē itsamonae apo paneyaiyatae. Paxamē panayaiyanetane.

11 Cristo pelivaisi jivi itsa patsipaebaponajē mapamatacabijavaberena ataje, bitso baja cajena panabejiobitabiabajē. Patajani tsabiabi. Mera pajit-sipiabiabajē. Bitso pajumaesebejenē tsabiabi. Jivi panebeyabiaba pecobeta. Apo paxainabiabinē pabota panapatsijitsianē.

12 Pacueranabiabajē bitso panatanacuenebabiabijava patacobeta. Jivi panebijataeyabiaba pibisiacuenia. Itsiata apo pajumeanaecanaviatabiabinē. Biji caranata paxanē bajarapamonae patovajētabiabajē Diosojavabelia Dioso peyavenonaenexatsi. Jivi panebejiobiaexanabiaba. Itsiata pajamatabēcuenemoyanē tsabiabi.

13 Pibisiacuenia panebaracuaicuaijai tsabiabi itsamonaejavabelia. Itsiata bajarapamonae pexaniajamatabēcuenia xaniavaetsia pamuxujiobabiabajē

bajayajebi. Ajena, mapamatacabijavaberena ataje, panetaeyabiaba daxitajivivecua bepaveliajamatabëcuenevinë. Bepaavirinënuua panetaeyabiaba.

¹⁴ Apo pacatoyaquinaetsi raja mapacueniaje patacaurabinexa. Biji rajane pacatoyaquinatsi saya patacamuxujobinexa xaniavaetsia. Pacuenia muxujobijitsipajë taxi, bajarapacuenia pacamuxujobatsi.

¹⁵ Xanë copiaya pacatsipaebatsi pexanialivaisi, Cristo pelivaisi. Nexata baja panajamatabëcueneocopatame Jesucristojavabelia. Bajaraxuata xanë bepatacavitsatsivixae, panetaneme bepeneaxanë. Paxainae atamë tsipae diez mil ponëbeje papecatsipaebivinexa Cristo pelivaisi, itsiata xanë caenëne panetaejitsipame bepeneaxanë.

¹⁶ Bajaraxuata asaëyata pacamuxujobatsi. Pacuenia baja pacatsitaexanaponaponatsi, bajarapacuenia necuenejëpaeya pajinavanapare.

¹⁷ Bajaraxuata Timoteo baja pacatoitorobatsi paxamëjavabelia. Bajaronë bitso tasivanë. Betaxënatocuenia tataenë. Xaniavaetsia pejumecovënënaponaponaenë Dioso. Bajaronë Timoteo pacatoitorobatsi baja papecatsipaebinexa pacuenia ponaponajë. Nexata Timoteo pacatsipaebiananua pacuenia xanë Jesucristo pijajivitonëxanë, tsitaexanabiabajë daxita Dioso pejumecovënënsijava, itsaxuayo tsipaebaponajë Cristo pelivaisi.

¹⁸ Itsamonae paxamëyajuvënëvi, taitorobicuenia apo exanae. Bajaramonae beayaijamatabëcuenevi natane. Nexata itsa pacatoitorobatsi Timoteo, bajarapamonae xanë yabara jamatabëcuenenavëxaniabiaya jamatabëjumaiatsi: “Pablo rabaja apo patsi tsane. Nacacujunava rabaja vajanacataenexa,” jamatabëjai bajarapamonae xanë yabara.

¹⁹ Itsiata baiatsi jane Dioso itsa netocopatsiana patacataenexa, ponae-najë naxanitsiayo paxamëjavabelia. Nexata tajacuata taenajë pacuenia jamatabëcueneitsi tsavanapae pamona beayaijamatabëcuenevi natane. Tsipaji raeta bajarapamonae pepacune ajamatabëcuensaë Diosojavabelia. Itsa jume, nexata meta saya pecuibovojotota jumaiatsi.

²⁰ Pamona Dioso pijajivi, bajarapamonae nayapëtane. Tsipaji peneta Dioso pesaëta ajamatabëcuensaë tsavanapae. Èpecuibovojotota apo jumaiatsi. Biji rajane bajarapamonae pejamatabëëthëtojavavetsina Dioso jumecovënëta.

²¹ ¿Detsa xua pajitsipame paxamë itsa ponaenajë paxamëjavabelia? ¿Patacabijataejava tsaja pajitsipame? Itsa jume, ¿pajitsipame tsaja pexaniajamatabëcuena asivaya patacataejava?

5

Pacuenia Dioso pejumecovënëtsivi tuatuajëta ponapona bitso pibisiacuene pexanaponaponaenë yabara pelivaisi

¹ Paxamë tuatuajëta bitso pibisiacuene pexanaponaponaenë pevitota, daxitajivi pina baracuaicuajiai tsabiabi. Dioso apo pejumecovënëtsivi ata, papibisiacuene apo exanae, bajaraponë pina exanaponapona. Bajaraponë paxamëyajuvënëne pita pina pijavanexa paxa pijavami.

² ¡Bjaraponë pibisiacuene pexanaejava, apo pacueneitavetsi atamë, itsiata bepaayaijamatabëcuenevimë panataneme! ¡Biji rajane bajaraponë pibisiacuene pexanaejava, bitso bepasivanajamatabëxainame! ¡Bepayapiviviauramënuua bajaraponë! Bajaraponë pibisiacuene pexanaponaponaenë, bepanavecuacapitsapame.

³ Paxamējāvata apo naponaponae atanē, itsiata paxamējāvata betanaponaponaenē, nataniji. Nexata tajēvelia bitso sivanajamatabēxainabiabajā bajaraponē Dioso penaneconitsiaexanaejavanexatsi yabara pibisiacuene pexanaponaponaexae.

⁴ Paxamē panacaetuare vajatuxanenē Jesucristo papijajivixaemē. Apo pacayajava atatsi tsane, itsiata panenacaetuatsijavata, pacajamatabēnajinaenatsi. Diosojavabelia pacatovajētsianatsinua bajarapaepatota. Vajatuxanenē Jesucristo ata pesaē, pacayajava tsane bajarajota.

⁵ Pibisiacuene pexanaponaponaenē paxamē tuatujēta, panavecuacapitsapare baja dovathijavabelia. Nexata daxita pibisiacuene penatojitsipacuenia pexanaejava yabara, dovathi pebejioxiaexanaenexatsi. Nexata belia icatsia Dioso jumecovēnētsiana. Bajarapajamatabēcuene jane baja capanepaenatsi pamatacabi vajatuxanenē Jesús patsianica.

⁶ Papiibisiacuene bajaraponē exanaponapona, panaitaxutojematsi atamē, itsiata bepaayaijamatabēcuenevimē panataneme. Abeje raja pibisiacuene pexanaponaponaenē panucenenaitaxutojematsijava. Payapētaneme rabaja mapacueneye. Pan pexanaematabēnexa, ayaimatabē ata, levadurajava pijinia tsiquirijavayo ata, itsiata pematajērēabijavata, bacaējēpa daxitamatabējava. Nexata levadura, tsiquirijavayo ata, bafufunaeyaexana daxitamatabē. Bajara pijinia itsi tsipae caenē itsa pacuenecopatsipame pibisiacuene pexanaponaponaejava paxamē tuatujēta. Daxitajivi belia pibisiacuene exanaponaejitsipa bajaraponē pejamatabēcueneta.

⁷ Bajaraxuata panavecuacapitsapare baja, ponē pibisiacuene exanaponapona paxamē tuatujēta, daxitajivi pejamatabēcuenebijianaeyaniva bajaraponē pejamatabēcueneta. Pacuenia itsi perujupanmatabē, levadurata pematajērēabimatabē, bajara jamatabēcueneitsi bajaraponē, pibisiacuene pexanaponaponaexae. Bajaraxuata bajaraponē panavecuacapitsapare baja. Paxamē rabaja Jesucristo pejamatabēcueneta pejanajamatabēcuene paxainame. Nexata pacuenia itsi levadurata apo pematajērēabipanmatabē, bajarapajamatabēcueneitsimē. Tspiji baja Dioso aneonijibia pacatane. Paxamē baja aneonijibia Dioso pacatane. Tspiji Cristo pacasivatēpa. Cristo baja cajena beovejayo tanetsi Dioso. Tspiji nacasivatēpa cruzata pibisiacuene vajaexanaeoneconimi vajanacavecuajibiaexanaenexa.

⁸ Nexata baja aeconoxae pibisiacuene apo beexanavanapaetsi. Jesucristo pijajivixaetsi, itsajamatabēcuene xainaenejevatsi, pexaniajailivaisi jumecovēnētavanapaenatsi. Bajarapacuenia itsa jumecovēnētavanapaenatsi, nexata pacuenia itsi levadurata apo pematajērēabipanmatabē, bajarajamatabēcuene itsanetsi aneonijibia vajajinavanapaexae.

⁹ Itsabaxutota baja cajena pacatoyaquinatsi pevitota pibisiacuene pexanaponaevi paneyajavajinavanapaeyaniva.

¹⁰ Dioso apo pejumecovēnētsivi, itsamonae, pibisiacuene exana pevitota. Itsamonae najamatabēxaina ēpamonaenexa ayajava pexainaeuene pexainaeenexa. Itsamonae nacobetoxota. Itsamonae, jumapecataeya pexanaenēanējavabelia, navajēca. Bajarapitsicuene pexanaevi, Dioso apo pejumecovēnētsivi, panavecuatsatsinexa, patacatoyaquinaebaxutota apo pacaitorobitsi. Bajarapitsicuene pexanaevi, Dioso apo pejumecovēnētsivi, itsa panavecuatsatsipame, nexata pepacuene mapanacuavecuaje athēbēabetsia ēpaneponaenexa tsipae. Tspiji daxita mapanacuajavaje bajarapitsicuene pexanaevi yacaējēpa.

¹¹ Patacatoyaquinaebaxutota raja pacaitorobatsi mapacueniaje. Pajivi jumatsi ata: “Xanē cajena Jesucristo pelivaisi jumecovēnētajē,” jai ata, itsiata pibisiacuene itsa exana pevitota, ēpamonaenexa ata pexainaeuene

itsa natojitsipa, jumapecataeya pexanaenēanējavabelia ata itsa navajēca, itsa monae ata pibisiacuenia itsa baracuaicuajai, itsa aitajibi tsabiabinua, itsa nacobetoxotanua, bajarapajivi pētsa payajavajinavanapame. Pētsa payajavaxanomenua caejavata, pacajunatsi ata.

¹²⁻¹³ Pamonae abaxē Dioso apo pejumecovēnētsivi, bajarapamonae yabara tajumaitsinexa Dioso apo netocopatsi: “Bajarapamonae cajena pijaneconi xaina Diosojavabelia,” tajainexa. Dioso cajena abaxē saicaya pepacuene naneconitsiaexanaena bajarapamonae. Itsiata baitsi jane pamonae Dioso panenajuajumecovēnētsivi, panenacaetuabiabibota panenajuajoneyabiabivi, pibisiacuenie itsa exana, paxamē bepacueneitavetame. Bajaraxuata nexata panavecuacapitsapare baja ponē paxamē tuatuajēta pevitota pibisiacuenie exanaponapona.

6

Pacuenia Dioso pejumecovēnētsivi itavetatsi Dioso penajuajumecovēnētavanapaevi peneconitsiyaniva juezmonaejavabelia yabara pelivaisi

¹ Itsanē paxamēyajuvēnēnē, Dioso pejumecovēnētsinē, itsa pacaitsacueniaba paxamējavaberena, nexata jueznējavabelia paneconitabiabame. Pētsa bajarapacuenia paexaname. Tsipaji raja juezmonae Dioso apo pejumecovēnētsivi. Bajaraxuata Dioso panenajuajumecovēnētsivi apo bepaneconitsimē juezmonaejavabelia. Biji rajane bepayanijobame Dioso pejumecovēnētsivijavabelia papecatoxanetsinexa bajarapalivaisi.

² Payapētaneme rabaja mapacueneje. Pamatacabi Cristo evetsiana mapanacuaje, daxita Dioso vajajumecovēnētsivi Dioso nacatocopatsiana vajananeconitsiaexanaenexa pamonae pijaneconi pexainaevi. Daxita mapanacuapijivije, pamonae Dioso apo pejumecovēnētsivi, vaxaitsi naneconitsiaexanaenatsi. Nexata aeconoxae ata pacacajēpa panelivaisixanetsinexa paneconi exana panetuatuajēta. Tsipaji mapanacuata jivi pevetsijamatabēcuene bevelijamatabēcuene saya. Apo ayapēbeje bitso.

³ Payapētaneme rabaja mapacueneje. Pamatacabi Cristo patsianica, vaxaitsi naneconitsiaexanaenatsi daxitajivi. Naneconitsiaexanaenatsi ángelevi ata. Nexata abaxē aeconoxae panejinavanapaepato mapanacuataje, pacacajēpa panelivaisixanetsinexa paneconi exana panetuatuajēta, mapanacuapijilivaisije.

⁴ Itsiata baitsi jane paxamēyajuvēnējivi itsa pacaitsacueniaba mapanacuataje, itsiata panijacuata apo palivaisixanetabiabimē pacuenia picani bepaexaname. Nexata pajivi pacaitsacueniaba, pacaponabiabame juezmonaejavabelia pananeconitsiaexanaenaxatsi.

⁵ Mapacuenia pacajumaititsije patacaurabinexa. Paxamēyajuvēnējivi itsa pacaitsacueniaba, ajibi tsabaja caenē ata paxamēyajuvēnēnē pexanalivaisi peyapētaenē pelivaisixanetsinexa bajarapalivaisi?

⁶ Dioso panejumecovēnētsivixae, juezmonaejavabelia apo bepaneconitsimē Dioso panenajuajumecovēnētsivi.

⁷ Bajarapacuenia panacaevēnavi atomē paneneconitabiabixae juezmonaejavabelia, daxitajivi pacacueneypētane xaniavaetsia apo panejinavapaejava Dioso pitabarata. Nexata panacaevēnavimē itsa pacaitsacueniaba, itsa pcatonacobetoxotanua, Dioso panejumecovēnētsivixae, xanepanaejit-sipa itsa pajamatabēcuenemoyamē tsipae.

⁸ Itsiata baitsi jane paxamē Dioso panenajuajumecovēnētsivijavabelia ata, paitsacueniabiabame. Yamaxēitojorobiaya pavecuanacobetoxotabiabamenua.

9-10 Payapëtaneme rabaja mapacueneje. Pibisiacuene pexanaevi apo yavajinavanapaetsi tsane Dioso pijanacuatatsia. Bajaraxuata pëtsa paexaname panijacuata penanatojitsipaecuenia. Dioso pijanacuatatsia apo yavajinavanapaetsi tsane pëvitota pibisiacuene pexanaevi. Apo yavajinavanapaetsi tsane jumapecataeya pexanaenëanëjavabelia penavajëcaevi. Apo yavajinavanapaetsi tsane pejaitsivi itsava pijavavecua. Apo yavajinavanapaetsi tsane pejaitsivi itsanë pamonavecua. Apo yavajinavanapaetsi tsane penaquenetsiataevi nacaevënapebibeje. Apo yavajinavanapaetsi tsane penacobetoxotsivi. Apo yavajinavanapaetsi tsane ëpamonaenexa pexainaecuene penatojitsipaevi. Apo yavajinavanapaetsi tsane piaitajibitsabiabivi. Apo yavajinavanapaetsi tsane itsamonae pibisiacuenia pebaracuaicuajiaivi. Daxita bajarapitsivi apo yavajinavanapaetsi tsane Dioso pijanacuatatsia.

11 Bajara picani bajayata paxamëyajuvënëvi pacuenia exanavanapa. Itsiata baitsi jane aeconoxae baja pibisiacuene paneexanaeconimi, Dioso baja pacavecuajibiaexana. Pacatsata baja Dioso papijajivinxamë. Dioso baja aneconijibia pacatane vajatuxanenë Jesucristo pejamatabëcueneta. Espiritu Santo ata pesaëta pacayavenona panejumecovënëtsinexa vajatuxanenë papecaitorobicuenia.

Pacuenia Dioso pejumecovënëtsivi xaniavaetsia bejinavanapa Dioso pitabarata yabara pelivaisi

12 Itsamonae jumaitsi: “Mapanacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa,” jai itsamonae. Xaniajai rabaja picani. Itsiata baitsi jane daxita bajarapacuene vajaexanaenexa, apo nacatoxanepanae. Mapanacuata navitsi ata vajaexanaejavanexa, xua itsajivi ata apo nacaitavetsi, itsiata bejamatabëjumaititsi mapacueniaje: “Papibisiacuene taexanaenexa tajamatabëcuene nitorobabiaba, apo exanaenë tsane Cristo pijajivitonëxaenë. Tsipaji itsa exanaejitsipajë bajarapapibisiacuene, nexata tajamatabëcuene beprijajivitonëncuenia jumecovënëtabiabijsipajë,” bejamatabëjajitsi pibisiacuene vajaexanaeyaniva.

13 “Vajaxaejava raja vajacotsorotopijijavanexa. Vajacotsoroto raja pijinia vajaxaejava peecaenexa,” pejalivaisi, xaniajai baja cajena. Itsiata baitsi jane itsamatacabi Dioso bajarapacuenebeje verevercaeyaexanaena. Daxita raja vajaperabëtuareca pibisiacuene apo vajaexanavanapaenexa. Vajaperabëto raja Dioso nacatocopata vajatuxanenë vajatonacuenebavapanenexa. Vajatuxanenë rabaja pijinia vajaperabëtota vajanacayavavaponanexa.

14 Dioso baja cajena icatsia asaëyaexanatsi vajatuxanenë petëpacujinae. Bajara pijinia pacuenia vaxaitsi ata itsamatacabi Dioso pesaëta nacaasaëyaexanaena vajatëpacujinae.

15 Payapëtaneme rabaja mapacueneje. Pacaenëmë canacujitsia, caenë Cristo peperabëttojavabelia becaeperabëto panaexaname papijajivixaemë. Xanë ata rabaja Cristo bepeperabëttojajuvënënënë. Bajaraxuata pibisiacuene apo hexanaenë tavitota pibisiacuene pexanabiavijavabelia, bajarapova bepeperabëttojajuvënëjavanë tanaexanaeyaniva.

16 Payapëtaneme rabaja mapacueneje. Pëbi pibisiacuene itsa exana pëvitota pibisiacuene pexanabiavijavabelia, bajarapajivibeje becaeperabëto naexanabeje. Dioso pejumelivaisibaxutota jumaitsi penapitsivibeje yabara mapacueniaje: “Anijajivimibeje becaejivi naexanabeje,” jai.

17 Nexata pijinia pajivi najamatabëcuenecopata vajatuxanenë Jesucristojavabelia, bajarapajivi becaejivi naexana vajatuxanenë Jesucristojavabelia.

18 Pevitota pibisiacuene pexanaeyaexanaejamatabëcuene, pavecuanajetabajiravabiabare. Itsajava raja pibisiacuene pexanaejava, bitso jivi apo jamatabëcuenebijianaetsi. Pacuenia pevitota pibisiacuene pexanaejava, jamatabëcuenebijianatsi, apo itsi. Ponë jaita itsava pijavecua pibisiacuene pexanaenexa pevitota, bitso pibisiacuene exana. Petiriva ata, pova jaita itsanë pamonavecua pibisiacuene pexanaenexa pevitota, bitso pibisiacuene exana. Pajivi bajarapapibisiacuene exana, bitso najamatabëcuenebijiana.

19 Payapëtaneme rabaja mapacueneje. Paneperabëto baja cajena Espiritu Santo pijabo papecatsijamatabëecaexae. Dioso cajena pacarajuta pijaEspiritu Santo papecatsijamatabëecaenexa. Dioso baja cajena papijajivimë. Nexata paneperabëto ata paxamënexa. Apo panaperabëxainamë panijacuata panenatojitsipaecuenia paneexanavanapænexa.

20 Tsipaji Dioso ayaimatamota pacacomuata. Nexata Dioso papijajivix-aemë, xaniavaetsia panejamatabëëthëtovetsina Dioso jumecovënëtsiaya pajinavanapare. Nexata daxitajivi Dioso yayataeponaena paxamë xaniavaetsia itsa patsitajinavanapame.

7

Pemuxujiobilivaisi penapitsijivibeje yabara pelivaisi

1 Xua yabara panetoyaquinaremena pataneyanijobinexamë, nexata aeconoxae pacajumecanaviatsijitsiatsi. Xaniajai rabaja picani. Xanepana itsa apo nacojiobi pebi.

2 Itsiata baitsi jane jivi navita pevitota pibisiacuene pexanaevi. Bajaraxu-ayaniva caepebi canacujitsia pijava bexaina. Bajara pijinia itsi petiriavi ata.

3 Nexata pebi pijava xaniavaetsia bevetaponapona pijavaxae. Bajara pijinia itsi petiriva ata. Xaniavaetsia bevetaponapona pamonaxae.

4 Petiriva, penacojiobiva, pijacuata apo naperabëxainae ëbajarapovanexa. Biji rajane petiriva baja itsa nacojioba, pamona pijaperabëtocuenia xainatsi. Bajara pijinia itsi pebi ata. Peperabëto apo naperabëxainae ëbajaraponënexa. Itsa baja nacojioba, pijava pijaperabëtocuenia xainatsi. Nexata namataenet-sia naperabëxainabeje.

5 Papetiriavimë panenacojiobivi baja, pëtsa panaperabëasivamë paneamonajivivecua. Bajara pijinia pacuenia paxamë ata papebijivimë. Pëtsa panaperabëasivamë panijavajivivecua. Matapania pamatacabimaxëto Diosojavabelia panavajëcaejitsiamëbeje, pacatocopatabeje panavecuanaperabëasivanexabeje. Bajarapacuenia paexanaenamebeje itsa panajamatabëcuenejëpamebeje panenavajëcaenexabeje Diosojavabelia. Pamatacabimaxëto panavajëcaejitsiamëbeje Diosojavabelia, bajarapamatacabimaxëto pëtsa panaimoxoyotamebeje. Itsa baja paveretsianamebeje Diosojavabelia panenavajëcaejavabeje, pëtsa baja panavecuanaperabëasivamëbeje. Tsiapaji panevajënaeyabeliabeje itsa panavecuanaperabëasivamëbeje tsaponae tsipae, nexata dovathi pacajamatabëcuene yamaxëtojobijitsipabeje. Nexata pibisiacuene paxanaejitsipamebeje, pacuene picani apo bepaexanamebeje.

6 Itsa pacamuxujiobatsi panenacojiobinexa pibisiacuene paneexanaeyaniva panevitota, apo pacaitorobitsi daxita panenacojiobinexa. Pamona jitsipa penacojiobijava, nacojiobi.

7 Pacuenia xanë imasia ponaponajë, bajarapacuenia picani paxamë ata imasia panejinavanapaejava, pacatojitsipatsi. Itsiata baitsi jane Dioso pacaenëmë canacujitsia papecayavenonaponaexae, pacacajëpa baja pacuenia paexanavanapaejitsiamë. Itsamonae

paxamëyajuvënëvi itsacuenia Dioso jamatabëcuene caëjëpaeyaexanaponatsi Dioso pejitsipaecuenia petoexanavanapaenexa. Itsamonae pijinia saicaya itsacuenia Dioso jamatabëcuene caëjëpaeyaexanaponatsi.

⁸ Mapacuenia saicaya jumaitsinëje pimasiarubenaevijavabelia, pamonajivi pevecuatëpaevitsijavabelia ata. Bajarapamonae picani toxanepanatsi imasia pejinavanapaejaya pacuenia xanë imasia ponaponajë.

⁹ Itsiata baitsi jane itsa apo caëjëpaetsi penajamatabëcuenesaëtsijava, nexata pibisiacuene pevitota pexanaeyaniva, roviaalia benacojioba. Bajara-pamonae toxanepanatsi roviaalia penacojiobijava. Tshipaji itsa apo nacojiobi tsipae, ëpibisiacuene pexanaenexa najamatabëxainaejitsipa. Nexata najamatabëcuene bijianaponaejitsipa.

¹⁰ Paxamë baja panenacojiobivi mapacuenia pacajumaitstsijje. Itsiata xanë apo tajamatabëcuene. Pacuenia vajatuxanenë jumaitsi, pacaitorobatsi. Papetiriavimë, pëtsa pavecuanaviabame paneamonajivi.

¹¹ Pacamuxujiobi atatsi, itsiata pova vecuanaviata pamona, bajarapova beponapona imasia. Apo benacojiobi baja. Itsa jume, benapitabeje icatsia pamonacovënëbeje. Bajara pijinia itsi pebi ata. Pebi apo bexuabi pijava.

¹² Paxamë tuatujëta Dioso apo pejumecovënëtavanapaevi yabara, jumaitsinë mapacueniaje. Itsiata vajatuxanenë apo pejumaitsjume. Dioso pejumecovënëtsinë pijava, itsa apo pejumecovënëtsiva Dioso, itsiata bajarapova itsa jitsipa peponaponaenëxa bajaraponëjavabelia, nexata bajaraponë pijava apo benavecuaitavetsi pevecuanaviatsinexatsi.

¹³ Dioso pijinia pejumecovënëtsiva pamona, itsa apo pejumecovënëtsinë Dioso, itsiata bajaraponë itsa jitsipa peponaponaenëxa bajarapovajavabelia, nexata bajarapova pamona apo benavecuaitavetsi pevecuanaviatsinexatsi.

¹⁴ Dioso pejumecovënëtsiva pamona, apo jumecovënëtsi ata Dioso, itsiata bajaraponë Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajaraponë pijava Dioso pejumecovënëtsiva. Bajara pijinia itsane Dioso pejumecovënëtsinë pijava. Apo jumecovënëtsi ata Dioso, bajarapova Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajarapova pamona Dioso pejumecovënëtsinë. Bajarapacuenia Dioso itsa apo copatsiaexanae tsipae pibisiacuene pexanabiabijavami, nexata pacuenia Dioso coxidane pamona Dioso apo pejumecovënëtsivi, bajarapacuenia coxitaëjitsipatsibeje Dioso. Nexata bajarapajivibeje caejivi pejumecovënëtsixae, Dioso coxitaenatsibeje bepenajuajumecovënëtsijivibeje Dioso.

¹⁵ Itsiata Dioso pejumecovënëtsiva pamona, itsa apo pejumecovënëtsinë Dioso, itsa jamatabëvecuanaviatatsi, nexata becopata roviaalia pevecuanaviatsinexatsi. Dioso pijinia pejumecovënëtsinë pijava, itsa apo pejumecovënëtsiva Dioso, itsa jamatabëvecuanaviatatsi, nexata becopata roviaalia pevecuanaviatsinexatsi. Nexata Dioso pejumecovënëtsinë, pijava pevecuanaviatsinëtsi, bepimasiarucaenë penaexanaenexa. Pova pijinia Dioso pejumecovënëtsiva, pamona pevecuanaviatsivatsi, bepimasiarucaeva penaexanaenexa. Bajarapacuenia hexana imasia peponaponaenexa. Tshipaji Dioso nacajunata jamatabëcuenexanepanaeya vajjinavanapaenexa.

¹⁶ Papetiriavimë, paneamonajivi Dioso itsa apo pejumecovënëtsivi, paxamë xaniavaetsia panetsitajinavanapaexae tsane paneamonajivi, paneamonajivi ata meta najamatabëcuenecopatsiana Cristojavabelia. Papebijivimë pijinia, panijavajivi Dioso itsa apo pejumecovënëtsivi, paxamë xaniavaetsia panetsitajinavanapaexae tsane panijavajivi, panijavajivi ata meta najamatabëcuenecopatsiana Cristojavabelia.

Bajaraxuata jamatabëcuenexanepanaeya panacajinavanapare. Pëtsa panavecuanaviabame.

17 Caenë canacujitsia tsiteca hexanaponapona pacuenia Dioso tocopatatsi pexanaponaponaenexa. Xua nacuenebaponapona Dioso pejunatsivajënaeyatsi Jesucristojavabelia penajamatabëcuenecopatsinexa, bajaraxua mapamatabaci ataje tsiteca benacuenebaponapona. Bajarapacuenia itorobaponajë daxita Dioso pejumecovënëtsivijava pexanialivaisi itsa tsipaebanajetarucajë.

18 Ponë Dioso junatatsi pepua peperabëcaucutsinëtsi baja judíovi pijacuenia, bajaraponë baja bajarapacuenia Dioso bejumecovënëtaponapona. Ponë pijinia Dioso junatatsi abaxë apo peperabëcaucutsinë atatsi judíovi pijacuenia, bajaraponë baja bajarapacuenia Dioso bejumecovënëtaponapona. Apo benaperabëcaucutsiaexanae.

19 Vajanacaperabëcaucutsijava, amatamobi Diosojavabelia. Apo vajanacaperabëcaucutsijava ata, amatamobi Diosojavabelia. Dioso rajane vajanacaitorobicuenia vajajumecovënëtanapaejava, bajara jane xua, namatamota Diosojavabelia.

20 Caejivi canacujitsia benacuenebaponapona xua nacuenebaponapona Dioso pejunatsivajënaeyatsi.

21 Itsamonae baja paxamëyajuvënëvi Jesucristojavabelia penajamatabëcuenecopatsivajënaeya, dajubicuenia canajetatsi itsamonaejavabelia amoneya petonacuenebavanapaenexa. Nexata bajarapamonae pijatuxanevi amoneya tonacuenebabiaba. Itsiata baitsi jane bajarapamonae Dioso baja pejunatsixaetsi Jesucristojavabelia penajamatabëcuenecopatsinexa, pëtsa natsinajamatabëxaina pijatuxanevi amoneya penacuenebiaexanabiabijavatsi yabara. Jamatejema saya tonacuenebavanapae pijatuxanevi. Itsiata baitsi jane itsamatabaci itsa tocopiapatsianatsi pevecuapitsapaenexa baja bajarapamonae, nexata vecuapitsapaena amoneya petonacuenebabiabivi.

22 Ponë itsamonaejavabelia canajetatsi, nexata amoneya itsa tonacuenebaponapona, bajaraponë bitso pibisiacuenia pexanabiabineconimi Cristo baja vecuaajibiaexanatsi. Bajarapacuenia vecuaajibiaexanatsi pamatabaci najamatabëcuenecopata Cristojavabelia. Copata baja pibisiacuenia pexanabiabijavami. Nexata Dioso pitorobicueniatsi exanaponapona. Bajara pijinia itsi ponë ata apo canajetsitsi itsamonaejavabelia. Itsa najamatabëcuenecopata Cristojavabelia, bajaraponë Cristo pijajivitonë baja naexana. Nexata bajaraponë ata exanaponapona Dioso pitorobicueniatsi.

23 Dioso baja cajena pacacomuata ayaimatamota. Bajaraxuata pëtsa baja panacopatame itsajivi ata papecajamatabëcuenebijianaenexa Dioso panejumecovënëtanapaejavavecu. Itsa bajarapacuenia panacopatsipame papecajamatabëcuenebijianaenexa, nexata bajarapajivi bepapijajivimë tsipae panajanavanapaenexa papecaitorobicuenia.

24 Bajaraxuata, xua baja panacuenebavanapame, tsiteca panevajënaeyabelia xaniavaetsia panacuenebavanapare Dioso pitabarata. Pacaenëmë canacujitsia panacuenebavanapare xua panacuenebavanapame pamatabaci abaxë Dioso apo pacajunatsi panejumecovënëtsinexa. Itsa apo pacaperabëcaucutsi judíovi pijacuenia, nexata bajarapacuenia pajinavanapare. Itsamonaejavabelia papeccanajetsixae, nexata amoneya itsa patonacuenebavanapame, bajarapacuenia tsiteca patonacuenebavanapare.

25 Itsa panetoyaquinaremena, paneyanijobame abaxë apo penacojiobavanapaevi yabara. Apo yapëtaenë pacuenia vajatuxanenë jumaitsi bajarapitsivi yabara. Itsiata baitsi jane pacatsipaebianatsi pacuenia sivanamatabëxainajë bajarapitsivi. Dioso tajamatabëcueneta neyapëtaeyaexana taneitaxutotsoniataexae. Bajaraxuata pacatoxanepana pacuenia pacatsipaebijitsiatsi patanejumecovënëtsinexamë.

26 Dioso vajajumecovënëtavanapaevi, nacatsiyayi bitso aeconoxae vajajinavanapaepato abaxë mapanacuataje. Tsipaji itsamonaevajanacaitoyaxae, nacabejiobiaexanaponaena. Bajaraxuata netsitaxanepana bajarapamonae itsa apo nacojiobavanapaev.

27 Itsa baja capanepaeya penacojiobivi, pëtsa xuaba pijava. Itsiata baitsi jane itsa abaxë apo nacojiobi, pëtsa jaita pijavanexa.

28 Ponë baja capanepaeya nacojioba, apo pibisiacuene. Petiriva ata baja itsa nacojioba, apo exanaev pibisiacuene. Aeconoxae daxita Dioso vajajumecovënëtsivi bitso vajanacatsiyaixae, pamonaev baja nacojioba, bajarapamonae toayapëbeje tsanetsi pevecuapanepaenexa bajarapapiyaicuene. Bajarapacuenia petoyapëbejeyanivatsi, bajarapamonae picani tojitsipajë imasia pejinavanapaenexa.

29 Tajamonae, mara pacuenia jamatabëpacajumaitsitsije. Imoxoyo rabaja pevajënaev vajatuxanenë icatsia pepatsijavanexatsica. Ajena, mapamat-acabicujinaelia tsaneje, penacojiobivi ata bepimasiarubenaevicuenia asaëyata betonacuenebavanapa vajatuxanenë.

30 Daxitajivi bejamatabëcuenenatsi ëDioso pijacuene petonacuenebavana-paenexa. Pamonaev bitso najamatabëxaina peyajuvënëtëpaexae, bajarapamonae ata najamatabëxainaenejeva asaëyata betonacuenebavanapa vajatuxanenë. Apo bepenajamatabëxainaevicuenia, bejinavanapa. Pamonaev ata jamatabëcuenebarëya tsavanapae, asaëyata betonacuenebavanapa vajatuxanenë. Apo bepejamatabëcuenebarëyavicuenia betonacuenebavanapa. Pamonaev ata comuaca pexinaevajanexa, asaëyata betonacuenebavanapa vajatuxanenë. Asivaya apo betae xua natocomuaca.

31 Pamonaev ata, mapanacuata pexinaevajava, canacuenebavanapa, bajarapamonae becanacuenebavanapa jamatabëcuenecënënaenejevatsi bajarapajamatabëcuene. Tsipaji mapanacuapijicuene vajataevjavami verevere-capona.

32 Apo pacatojitsipaetsi papecajamatabëcueneenaenexa mapanacuapijicueneje. Ponë abaxë imasia ponapona, jamatabëcueneenatsi ëvajatuxanenë pijacuene. Tsipaji jitsipa pesivajamatabëcuenebarëyanexatsi vajatuxanenë.

33 Itsiata baitsi jane penacojiobinë yajavajamatabëcueneenatsi pevetsinexa pijava pesivajamatabëcuenebarëyanexatsi.

34 Apo najamatabëcuenejëpaebeje pijinja penacojiobivabeje pimasiaru-caevabeje. Pova apo nacojiobi, jamatabëcueneenatsi ëvajatuxanenë pijacuene. Jitsipa pexaniacuene pexanaponaponaenexa. Jitsipanua pexaniacuene penajamatabëxainaponaponaenexa Dioso pesivajamatabëcuenebarëyanexatsi. Itsiata baitsi jane penacojiobiva yajavajamatabëcueneenatsi pevetsinexa pamonaev pesivajamatabëcuenebarëyanexatsi.

35 Bajarapacuenia itsa pacajumaitsitsi, apo penacojiobivi apo itavetsinë penacojiobijava. Patacajamatabëcuenevavenonaenexa raja, pacajumaitsitsi bajarapacuenia. Tsipaji pacatojitsipatsi xaniavaetsia panejinavanapaenexa. Vajatuxanenë bepatonacuenebavanapame daxita panejamatabëcueneta, panajamatabëcuene epatajërërëcaenejevamë.

³⁶ Ponē pexēnatoyo xaina, itsa tsitaxanepanatsi pexēnatoyo petonacoiobinexatsi, nexata betocopata penacojiobinexa. Tsipaji baja penaveretsiva tsaponaponae. Bajarapova ata baja itsa jitsipa penacojiobinexa, betocopata penacojiobinexa. Itsa tocopata pexēnatoyo penacojiobinexa, apo pibisiacuene.

³⁷ Ponē pijinia pexēnatoyo itsa apo jitsipae abaxē penacojiobinexa, bajaraponē ata itsa najamatabēcuenevereta apo petocopatsinexa pexēnatoyo penacojiobijava, nexata bajaraponē ata pexaniacuene exana.

³⁸ Nexata ponē apo tocopatsi pexēnatoyo penacojiobinexa, bajaraponē itsanēvecua bitso pexaniacuene exana.

³⁹ Penacojiobiva baja acuenebi pevecuanaviatsinexa pamona. Tsipaji pamona piasaētsaponaponaepato, bajaraponē abaxē tsiteca pijava tsaponapona. Tsipaji bajarapacuenia Dioso najumecopata. Itsiata baitsi jane pamona itsa vecuatēpatsi, bajarapova tocopatatsi icatsia penacojiobinexa. Tocopatatsi penacojiobinexa ponējavabelia jamatabēnacojioba, itsa bajaraponē ata Dioso pejumecovēnētsinē.

⁴⁰ Itsiata bajarapova pamona pevecuatēpacujinaetsi, imasia abaxē itsa ponapona, jamatabēcuenebarēya tsaponapona tsane ēDioso pijacuene pejamatabēcueneenaponaepataetsi. Nexata baja itsa nacojiobiana, bevelia baja jamatabēcuenebarēya tsane. Pacuenia copiaya jamatabēcuenebarēya tsaponapona, apo itsi tsane baja. Bajarapacuenia najamatabēxainajē bajarapacuenie yabara. Bajarapacuenia itsa pacajumaitsitsi, Espiritu Santo neyjavacuaucaijai.

8

Jumapecataeya pexanaenēanējavabelia perajutsiviyajuvēnējava yabara pelivaisi

¹ Jumapecataeya pexanaenēanē itsamonae tane bepijadiosovi. Nexata bajarapomonaē dajubi beyabiaba perajutsinexa bajarapavi jumapecataeya pexanaenēanējavabelia. Bajarapaviyajuvēnējava panexaejava ata yabara, paneyanijobame itsa panetoyaquinaremena. Nexata bajaraxua yabara juya mapacatoyaquinatsijē. Xaniajai rabaja cajena. Daxitatsi baja cajena bajarapacuenie yapētanetsi. Pavi rajuta jumapecataeya pexanaenēanējavabelia, bajarapaviyajuvēnējava xae atatsi tsipae, apo nacaitsacueniabi tsipae. Itsiata vajaxaecujinae bajarapaviyajuvēnējava, itsa jamatabējumaitsitsi: “Xanē bitso yapētaniji pamonaē mapavije atsobabiaba matatobenetsia,” itsa jamatabējaitsi, abeje rajane bajarapajamatabēcuene. Tsipaji beayajamatabēcuenejivitsi nataejitsipatsi bajarapomonaevēcu. Biji rajane xanepana vajajamatabējumaitsinexa mapacueniaje: “Asivaya taniji Dioso patanajuajumecovēnētsivi, pamonaē atsobabiaba jumapecataeya pexanaenēanējavabelia perajutsivivajuvēnējava. Nexata xanē ata apo xaenē tsane bajarapaviyajuvēnējava. Nexata xaniavaetsia tsitaponaponaenajē bajarapomonaē taneitaxutua ajamatabēcuenesaēnexa Diosojavabelia,” vajajamatabējajava xanepana. Bajarapacuenia itsa tsitaponaponatsi Dioso pejumecovēnētsivi, nexata nacaitaxutuaajamatabēcuenesaē tsaponae Diosojavabelia.

² Pajivi jamatabējumaitsi: “Xanē cajena bitso yapētaniji daxitacuene,” jamatabējai, bajarapajivi pejamatabēcuenenavēxaniabijivi. Abaxē ayaijava tosaicatsi xaniavaetsia peyapētaenexa.

³ Itsiata baitsi jane pajivi Dioso jitsipa, bajarapajivi Dioso ata jamatabēcuene yapētanetsi Dioso pejitsipaejava.

⁴ Nexata jitsipajë patacyapëtaeyaxanaenexa itsamonae jumapecataeya pexanaenëanëjavabelia perajutsiviyajuvënëjava pexaejava yabara. Vaxaitsi baja cajena yapëtanetsi jumapecataeya pexanaenëanë apo pexaniajaicuene. Tsipaji saya jivi pecobeta pexanaejavanë. Yapëtanetsi baja cajena caenë Dioso peponaponaejava. Pematatsënëa baja cajena itsadioso ajibi.

⁵ Jivi raja apo yapëtae. Bajaraxuata saya jamatabëcuenenavëxaniabiaya jumai tsabiabi: “Diosovi raja navitsiajinavanapa athëbëtatsia. Jinavanapa mapanacuajava ataje,” jai tsabiabi jivi jamatabëcuenenavëxaniabiaya.

⁶ Itsiata vaxaitsi yapëtanetsi caenë vaxa Dioso peponaponaejava. Bajaraponë daxitacuene pexanaenë. Bajaraponënexa tojinavanapatsi. Caenë rabaja pijinia pepo vajatuxanenë Jesucristo. Bajaraponë pejamatabëcueneta exana daxitacuene. Bajaraponë pejamatabëcuenetanua nacacapanepaena vajaneconivecua.

⁷ Itsiata baitsi jane itsamonae Dioso pejumecovënëtsivi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. Bajarapamonae pejevaxijavaveliacujinae jumapecataeya pexanaenëanë taeyabiaba bepiasaëtsavanapaevi. “Papexaejava itsamonae rajutabiaba jumapecataeya pexanaenëanëjavabelia, diosovijavabelia rajutabiaba bajaraxua,” sivajamatabëjai tsabiabi bajarapamonae jamatabëcuenenavëxaniabiaya. Bajaraxuata bajarapamonae aeconoxae Dioso jumecovënëtsi ata, itsa xane jumapecataeya pexanaenëanëjavabelia perajutsiviyajuvënëjava, bajarapamonae jamatabëcuenenavëxaniabiaya jamatabëjumai tsabiabi: “Pibisiacuene meta exanjë Dioso pitabarata mapavi taxaexaeje,” jamatabëjai tsabiabi. Tsipaji Dioso jumecovënëtsi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi.

⁸ Yapëtanetsi rabaja vaxaitsi. Vajaxaejava yabara Dioso pexitsi apo nacaexanae. Xae atatsi, apo xae atatsinua, najëpabeje. Vajaxaejava apo nacavënananeconitsiaexanae Dioso.

⁹ Paxae atamënuu, apo paxae atamënuu, itsiata picani apo pacaitsacueniabi tsipae. Itsiata baitsi jane xania baja tsane. Dioso panenajumecovënëtsivi asivaya panetaexae, pëtsa patsitaexaname itsacuenejavayo ata, xua bepibisiacuene taejitsipa bajarapamonae. Tsipaji itsa pacacuenetaejitsipa, exanaejitsipa bajarapajivi ata. Nexata Dioso pejumecovënëtsijavavecua pajopaeyaexanaejitsipame bajarapajivi. Tsipaji abaxë jamatabëcuenefaena Dioso pejumecovenëtsijava.

¹⁰ Paxamë pëtsa panabaneme pabojavata jumapecataeya pexanaenëanëjavabelia perajutsiviyajuvënëjava abatabiaba. Paxamë baja payapëtaneme pacuenia apo pacaitsacueniabi picani tsipae, bajarapaviyajuvënëjava paxae atamë. Nexata itsa paxaejitsipame bajarajota, panexaejavata pacataejitsipa itsanë Dioso pejumecovënëtsinë, ponë abaxë bepibisiacuene pexanaejava tane bajarapavi itsa naxaejitsipa. Nexata itsa pacajanitane, bajaraponë ata naxaejitsipa. Nexata penaxaexae, bepenaneconitsinë Diosojavabelia nataejitsipa.

¹¹ Paxamë picani bajarapitsinë matatoxenetsia paneyapëtaexae, paxaejitsipame bajarapaviyajuvënëjava. Itsiata nexata bajarapacuenia pajamatabëcuenebijianaejitsipame, ponë Dioso pejumecovënëtsinë ata, abaxë jamatabëcuenefaena Dioso pejumecovënëtsijava. Bajaraponënexa ata cajena Cristo sivatëpatsi.

¹² Bajarapacuenia itsa pajamatabëcuenebijianaejitsipame Dioso pejumecovënëtsijivi, nexata pananeconitsipame Cristojavabelia.

13 Bajaraxuata xanë itsa yapëtaniji pacuenia itsajivi, Dioso pejumecovënëtsijivi, belia jopaejitsipa Dioso pejumecovënëtsijavavecua xanë tatsitaxejava pejamatabëcueneta, nexata caeto ata apo tsitaxaenë tsipae bajarapaviyajuvënëjava asivaya tataexae bajarapajivi.

9

Pacuenia apóstolevi tocopatatsi, xua namatavenona, pevajëtsinexa Dioso pejumecovënëtsijivajavelia yabara pelivaisi

1 Payapëtaneme rabaja mapacueneye. Xanë apo xae atané jumapecataeya pexanaenëanëjavavelia perajutsiviyajuvënëjava, itsiata Dioso netocopata daxitacuenetaexanaenexa Jesucristojavavelia tanajamatabëcuenecopatsixae. Payapëtanemenua vajatuxanenë Jesucristo taneitapetsijava apóstolenëxanë. Taitaxutota baja cajena taniji vajatuxanenë Jesús. Paxamë ata patacatsipaebixae Jesucristo pelivaisi, nexata baja panajamatabëcuenecopatame Jesucristojavavelia. Tsipaji asaëyata tonacuenebaponaponajë vajatuxanenë.

2 Itsamonae apo beapóstolenënetae ata, itsiata paxamë apóstolenëcuenenë paneyapëtaneme. Patacatsipaebixae pexanialivaisi, paxamë baja vajatuxanenë pajumecovënëtame. Bajaraxuata picani daxitajivi xaniavaetsia beneyapëtane apóstolenëcuenenë.

3 Itsajota pexanialivaisi jivi tsipaebaponaponajë, Dioso picani netocopata tanerajutsinexa tanamatavenonaejavaxi. Itsamonae paxamëyajuvënëvi nejumeebababiaba livaisi tatsipaebabibijava mapacueniaje.

4 Paapóstolevinë itsa panacuenebajë Dioso pijacuene, panetocopata itsajota pexanialivaisi patsipaebavanapajë patanerajutsinexa pataxaejava, patapaajava ata.

5 Itsa tanacojobinë tsipae, xanë ata pijinia Dioso netocopatsipa tabarëponaenexa tajava, Dioso pejumecovënëtsiva. Bajarapacuenia netocopatsipa tsipaji bajarapacuenia exanavanapa itsamonae apóstolevi. Vajatuxanenë pejuyapijivi ata, apóstolenë Pedro ata, pijava barëponabiaba.

6 Itsamonae itsa pacatsipaeba Cristo pelivaisi, pajamatabëcueneyavenonabiabame penamatavenonaejava yabara. Itsiata baitsi jane paxanëbeje Bernabébeje panacuenebabibajëbeje patajacuatabeje patanaevetsinexabeje. Bajarapacuenia picani apo benacuenebinëbeje patajacuatabeje patanaevetsinexabeje. Nexata picani paxamë, paxanëbeje ata, bepanerajutame patanamatavenonaejavaxibeje. Tsipaji paxanëbeje Cristo pelivaisi patacatsipaebabibixaebeje, Dioso picani panetocopatabeje patanerajutsinexamë patanamatavenonaejavaxibeje.

7 Payapëtaneme baja cajena mapacueneye. Itsanë itsa tonacueneba pijatuxanenë, barajutatsi pexaejava. Pamonaeta pijinia vajabitsaë naexanavanapa, itsa rajutaponatsi pexaejava, apo matamotaponae pexaejavamatamo pijapalatata. Jume cajena. Tocomuatabiabatsi ponë itorobatsi. Pamonaeta pijinia xaina uvabacabo, itsajivi ata apo janiitavetsitsi pexaeayaniva penotsicuaiyajuvënëjava. Pamonaeta pijinia itsanë pijaoveja toeveta, itsajivi ata apo janiitavetsitsi pemiyyucaebarëmeneyajuvënëjava pia-paayaniva. Jume cajena.

8 “Maraeta pacuenia Pablo nacajumaitsije saya jivi petsitaxanepanaecueniatsi vajeaxanavanapaenexa,” pajamatabëjamë pëtsa. Tsipaji rabaja Dioso pejumelivaisibaxutota ata bajarapacuenia jumaitsi.

9 Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata ata. Jumaitsi mapacueniaje: “Pabueyu

canacuenebame trigoxu pecatotanabataxuabinexa, pëtsa pumuxatatame nepumuxatatabijavata. Pëtsa pumuxatatame trigoxu pexaenexa pecatotanabataxuabijavata,” jai Dioso pejumelivaisibaxutota. Bajarapacuenia Dioso pejumelivaisibaxutota itsa jumaitsi, ëbueyu yabara apo jumaitsi.

¹⁰ Biji rajane bajarapacuenia Dioso pejumelivaisibaxutota jumaitsi vajanacayapëtaeyaxanaenexa vajamatamotsijavanexa vajanacatonacuenebinë. Ponë canacueneba iracuemo itsanë pijatrigoxu petoubinexa, penacuenebijavata jamatabëjumaitsi: “Pamatacabi naveretsiana trigoxu, bajarapaxuyajuvënëjava nerajutsiana tatonacuenebimatamo,” jamatabëjai. Nexata penaveretsimatacabi trigoxu rajutatsi. Ponë ata icatsia juya trigoxu penaveretsimatacabi totanabataxuaba, bajaraponë ata jamatabëjumaitsi: “Mapatrigoxuyajuvënëjavaje nerajutsiana tatonacuenebimatamo,” jamatabëjai. Nexata rajutatsi. Bajara pijinia pacuenia Dioso pijacune patatonacuenebivi patanamatavenonaejavaxi, paxamë bepanerajutame Cristo pelivaisi patacatsipaebijamatabëcuene.

¹¹ Paubajë baja cajena panejamatabëëthëtota Dioso pejumelivaisi. Jica, nexata juya itsa pacajamatabëcuenevetsipatsi patanerajutsinexamë patanamatavenonaejavaxi, çpacatsitaayajava tsaja tsipae bajarapacuenë?

¹² Paxamë rabaja Dioso pejumelivaisibaxutota papecaitorobicuenia, parajutabiabame itsamonae penamatavenonaejavaxi papecatsipaebijamatabëcuene Cristo pelivaisi. Paxanë biji picani panetoxanepana copiaya patanerajutsinexamë itsamonaevectu.

Dioso picani panetocopata patanerajutsinexamë patanamatavenonaejavaxi Cristo pelivaisi patacatsipaebaponaenamatabëcuene. Itsiata apo pacavajëtsitsi patanerajutsinexamë. Biji rajane piyapëbejecuenia panatonacuenebaponajë patajacuata patanaevetsinexa bajarapacuenia. Apo pacavajëtsitsi caeto ata patanerajutsinexamë patanamatavenonaejavaxi. Itsa pacavajëtsipatsi, itsajamatabëcuene meta paxainaejitsipame paxanëjavaberena. Nexata meta apo pajumecovënëtsimë tsipae patacatsipaebilivaisi, pexanialivaisi, Cristo pelivaisi.

¹³ Payapëtaneme rabaja mapacuenije. Templobota Dioso petonacuenebivi, tocopatatsi bajara patemplobopijipexaejava pexaenexa. Baitsi pamonaë penacuenebivi altarvënëjavata, itsajota dajubi tobeyabiaba ofrendacuenia perajutsinexa bajarapavi Diosojavabelia, bajarapamonae ata Dioso tocopatatsi pexaenexa bajarapaviyajuvënëjava.

¹⁴ Bajara pijinia pacuenia vajatuxanenë Jesucristo itoroba Dioso pejumelivaisi petsipaebaponaevi penamatavenonaejavaxi perajutsinexatsi. Pamonaë jumecovënëtaponae petsipaebilivaisitsi, bajarapamonae juya berajutapona xua namatavenona petsipaebivitsi.

¹⁵ Itsiata baitsi jane xanë bajarapacuenia netocopatsi ata, apo pacavajëtsitsi itsacuenejavayo ata. Mapabaxutoje pacatoyaquinae atatsi, apo pacatoyaquinaetsi patanerajutaponaenexamë itsacuenejavaxi. Bitso cajena jamatabëcuenebarëyanë. Tsipaji Cristo pelivaisi pacatsipaebabiabatsi, apo panerajutsi atamë itsacuenejavayo ata. Bajaraxuata baja cajena apo jitsipaanë patanematamotsijavamë. Itsa panematamotsijitsiamë tsipae, nexata jitsipaejitsipajë tatëpaejava patanematamotsiyaniyamë. Tsipaji itsa panematamotsipame, copiarucaejitsipa baja patacasivajamatabëcuenebarëya tsabiabijavami. Tsipaji amoneya patacatsipaebabiabixae Cristo pelivaisi, pacasivajamatabëcuenebarëyatsi tsabiabi.

¹⁶ Apo jamatabëjumaitsinë: “Ayaijamatabëcuenenënë tatsipaebinëxae jivi pexanialivaisi pecapanepaelivaisinexatsi Diosojavabelia,” apo

jamatabëjanë. Jume baja cajena. Pexanialivaisi jivi tsipaebabiabajë. Tsipaji baja vajatuxanenë nitoroba. ¡Bitso meta naneconitsipajë Diosojavabelia jivi itsa apo tsipaebinë tsipae bajarapalivaisi!

17 Dioso nitorobinejeva, saya xanë tajamatabëcueneta jivi itsa tsipaebaponajitsipajë pexanialivaisi, Jesucristo pelivaisi, nexata jamatabëcuene evetabiabijitsipajë jivi tanematamotabiabinexa pexanialivaisi tatsipae-babiabijamatabëcuene. Itsiata baitsi jane pexanialivaisi jivi tsipaebaponajë vajatuxanenë taneitorobixae. Jumecovënëtaponaponajë pacuenia Dioso nitorobapona.

18 Bajaraxuata apo nematamotsi ata, tsipaebaponajë pexanialivaisi jivi pecapanepaelivaisinexatsi Diosojavabelia. Dioso netocopatsi ata jivi tanematamotsinexa pexanialivaisi tatsipaebaponaejamatabëcuene, itsiata apo vajëtsinë tanerajutsinexa itsacueneyavayo ata. Jivi itsa tsipaebaponajë bajarapalivaisi, bitso jamatabëcuenebarëyanë tsaponae. Bajaraxuata apo jitsipaenë tanematamotsijava.

19 Apo tanecanajetsinë raja dajubinëcuenia itsamonaejavabelia amoneya tatonacuenebinexa. Itsiata baitsi jane daxitajivi bepijajivitonënëcuenia ponaponajë. Bajarapacuenia exanaponaponajë itsamonae ayaibitsaëtoxaneto ata tayavenonaenexa, penajamatabëcueneocopatsinexa Cristojavabelia, pecapanepaenexatsi Diosojavabelia.

20 Judíovi jumecovënëtsiajinavanapa bajayata Dioso Moiséspijinëta pena-jumecopatsilivaisi. Xanë picani apo jitsipaenë taexanaponaponaeenexa pacuenia itoroba Dioso Moiséspijinëta penajumecopatsilivaisi. Tsipaji baja najamatabëcueneocopatajë Cristojavabelia tajaneconi tanevecuaajibi-aexanaenexa. Itsiata judíovijava itsa naponaponabiabajë, pacuenia Dioso Moiséspijinëta penajumecopatsilivaisi itorobatsi, judíovi itsa exana, xanë ata bajarapacuenia naexanabiabajë. Bajarapacuenia naexanabiabajë bajarapamonae judíovi xaniavaetsia tanenamuxunaevetsinexa Cristo pelivaisi itsa tsipaebajë. Nexata judíovi itsa najamatabëcueneocopata Cristojavabelia, pecapanepaenexatsi Diosojavabelia.

21 Bajara pijinxa pacuenia apo judíovijava ata itsa naponaponabiabajë, judíonë atanë, pacuenia apo judíovi jinavanapa, cuenejëpaeya naponaponabiabajë. Bajarapacuenia apo judíovi cuenejëpaeya naponaponabiabajë bajarapamonae xaniavaetsia tanenamuxunaevetsinexa Cristo pelivaisi itsa tsipaebajë. Nexata apo judíovi ata itsa najamatabëcueneocopata Cristojavabelia, pecapanepaenexatsi Diosojavabelia. Bajarapamonae apo judíovi apo jumecovënëtsiajinavanapae bajayata Dioso Moiséspijinëta penajumecopatsilivaisi. Bajarapamonaejava naponaponabiabi atanë, itsiata apo copatsinë tajumecovënëtsijava Dioso pejumelivaisi saicaya tajitsipaecuenia taponaponaeenexa. Jume baja cajena. Tsipaji jumecovënëtajë Cristo taneitorobicuenia.

22 Itsamonae abaxë ajena najamatabëcueneocopaba Cristojavabelia. Nexata abaxë apo ajamatabëcuenesaë tsavanapae Dioso pejumecovënëtsijava. Bajarapamonaejava cuenejëpaeya naponaponabiabajë. Bajarapacuenia cuenejëpaeya naponaponabiabajë tajamatabëcueneavenonaenexa bajarapamonae pevajënaeyabelia piagamatabëcuenesaë tsavanapaenexa vajatuxanenëjavabelia. Baitsi pacuenia caeviria canacujitsia jivi pijasalinaicuenia jinavanapa, bajarapacuenia xanë ata cuenejëpaeya naponaponabiabajë. Bajarapacuenia cuenejëpaeya naponaponabiabajë bajarapamonae tajamatabëcueneavenonaenexa. Jamatabëcueneavenonaejitsianë bajarapamonaeajuvënëvi ayaibitsaëtoxaneto ata penajamatabëcueneocopatsinexa Cristojav-

abelia pecapanepaenexatsi Diosojavabelia.

²³ Bajarapacuenia exanaponaponajë baja jivi pejumecovënëtsinexa pexanialivaisi pecapanepaelivaisinexatsi Diosojavabelia, bajarapamonae ata tanejavavacapanepaenexatsi Diosojavabelia.

²⁴ Payapëtaneme rabaja mapacueeneje. Penayacobivi pecujinaejinaejava, bacujinaejina daxita. Itsiata baitsi jane ponë bitsojina pecujinaejinaejava daxita penayacobivi matatoxenetsia, bajaraponë caenë bapita xua tsipae-batsi pecujinaejinaematamo, premiovënëjava. Pacuenia penayacobivi pecujinaejinaejava, daxitasaëta bacujinaejina, bajara pijinia pacuenia paxamë ata daxita panesaëta panevajënaeyabelia patonacuenebavanapare Dioso.

²⁵ Daxita pamonae penayacobivnixa pecujinaejinaejava, tajëvelia banajamatabëveretavanapa pebitsojinaenexa itsamonae matatoxenetsia. Naxaniavaetavanapanua. Daxitamatacabi canacujitsia nasisaëjëbavanapa caenë canacujitsia. Bajarapamonae najamatabëcuenesaëtanapanapa, daxita xua abeje, pexanaeyaniva pïajumalisaënexa. Bajarapacuenia naxaniavaetavanapa, penayacobijavata itsamonae matatoxenetsia pebitsojinaenexa, perajutsinexatsi corona, naebaxucorona. Itsiata baitsi jane bepïjia saya piabejecoronanexa. Biji rajane vaxaitsi Dioso vajajumecovënëtsivi, Dioso tonacuenebavanapatsi athëbëtatsia vajanacarajutsinexa xua nacatsipaeba, apo pevereveceajëvanexa.

²⁶ Pacuenia pebitsojinaenë asaëyata cujinaejina rovia pepatsinexalia petocaëjëtsijavabeliatsi, bajara pijinia pacuenia xanë ata asaëyata tavajënaeyabelia exanaponaponajë vajatuxanenë taneitorobicuenia. Tonacuenebaponaponajë asaëyata. Apo tonacuenebinë saya jema penaxuabinexa tatonacuenebijava.

²⁷ Bajaraxuata naperabëevetsia naevetaponaponajë pibisiacuene taexanaeyaniva. Bajarapacuenia naperabëevetsia naevetaponaponajë tsipaji jitsipajë vajatuxanenë tanesivajamatabëcuenebareya tsaponaejava itsamonae itsa tsipaebaponajë pexanialivaisi. Apo jitsipaenë tanecopatsiaexanaejava Dioso tatonacuenebijava. Itsamonae pexanialivaisi tatsipaebicujinae, biji-ata itsa ponaponaejitsipajë, Dioso necopatsiaexanaejitsipa tatonacuenebijava.

10

Pemuxujobilivaisi penavajëcaeyaniva jumapecataeya pexanaenëanëjavabelia yabara pelivaisi

¹ Tajamonae, pacatojitsipatsi icatsia panenajamatabënapitsinexa pacuenia bajayatami vajasalinaivimi Moiséspijinë barëpitsaparena Egipto nacuaverena. Moiséspijinë Dioso tsitajëtaponatsi itsaxuayo vajasalinaivimi barënajetarucaejitsia. Vajasalinaivimi pematatsënëatsia itarërëbo namataxainaeja najetaruca. Nexata bajarapaitarërëbo vajasalinaivimi pënanajetarubena. Daxitabitsaëto vajasalinaivimi Moiséspijinë barënicabarena Rojovënë manuamenemaxërana epatuarena.

² Pacuenia pebi itsa bautisabatsi merata, naexana Dioso pijajivitonë, bajara pijinia pacuenia vajasalinaivimi Moiséspijinë pijajivi naexana itsa pënaponarena Egipto nacuaverena. Moiséspijinë pijajivi naexana vajasalinaivimi itarërëbo pebëxëpana itsa pënanajetarubena Moiséspijinë. Rojovënë manuamenemaxërana epatuarena ata itsa barënicabarenatsi, Moiséspijinë pijajivi naexana vajasalinaivimi.

³ Daxita vajasalinaivimi caevirijava pexaejava najuanabanepona itsa najetarubena bajarapatusato nacuayarena. Papexaejava Dioso rajutaponatsi, bajarapamonaemi xaepona.

⁴ Itsa najetarubena, caeviriamera najuaapaepona, Dioso perajutsiratsi. Bajarapamera Dioso tocapihsapatsi ibotoxanetojavaverena. Bajarapamatacabi vajasalinaivimi Cristo yajavaponatsi. Cristo rabaja cajena bajarapai-botoxaneto.

⁵ Itsiata baitsi jane vajasalinaivimiyajuvënëvi, caejiviyobeje, saya jume-covënëta pacuenia Dioso najumecapanepaeya jumaitsitsi. Nexata bajarapajiviyobeje Dioso sivajamatabëcuenebarëyatsi. Daxita itsamonae apo jume-covënëtsi Dioso. Bajaraxuata vajasalinaivimi Dioso verebiabatsi petusato nacuata.

⁶ Nexata vaxaitsi becanaëjëtatsi pacuenia vajasalinaivimi bajayata Dioso verebiabatsi pibisiacuene pexanaexae. Nexata vaxaitsi ata vajajamatabëëthëtovetsina becanaëjëtatsi pibisiacuene vajaexanaeyaniva.

⁷ Bajaraxuata apo benavajëcaetsi jumapecataeya pexanaenëanëjavabelia pacuenia bajayata vajasalinaivimiyajuvënëvi navajëca jumapecataeya pexanaenëanëjavabelia. Dioso pejumelivaisibaxutota jumaitsi pacuenia vajasalinaivimi pibisiacuene exanavanapa, fiesta itsa toexana jumapecataeya pexanaenëanënexa. Dioso pejumelivaisibaxutota vajasalinaivimi yabara jumaitsi mapacueniaje: “Bajarapamonae enabiaba penabaninexa, pia-paenexanua. Bajaraxuacujinae nonobapunabiaba peyavajbinexa,” jai Dioso pejumelivaisibaxutota vajasalinaivimi yabara.

⁸ Apo hexanaetsinua vajavitota pibisiacuene pacuenia bajayata vajasalinaivimiyajuvënëvi exana. Bajarapitsivi tēpa caematacabita veintitrés mil pajivibeje.

⁹ Apo bejamatabëcueneëjëtatsinua vajatuxanenë pacuenia bajayata vajasalinaivimiyajuvënëvi Dioso jamatabëcueneëjëta. Papibisiacuene vajasalinaivimi pejamatabëëthëtota natojitsipa pexanaenexa, Dioso jamatabëcueneëjëtisiaya exanavanapa, peyapëtaenexa pacuenia Dioso exanaejitsia bajarapamonaejavaberena. Bajaraxuata vajasalinaivimi jomo pesinicujiruatsi vereverecapona.

¹⁰ Pëtsa panaepaname Dioso pejumelivaisi papecatsipaebavanapaevijavabelia pacuenia bajayata vajasalinaivimiyajuvënëvi anaepanabiaba Moiséspijinëbeje Aarónpijinëbejevavelia. Bajaraxuata Dioso itoroba pijaángel peverebiabinexatsi vajasalinaivimiyajuvënëvimi.

¹¹ Bajarapacuenia exanatsi bajayata vajasalinaivimi. Dioso baja cajena nacayapëtaeyaexana pacuenia bajayata vajasalinaivimi Dioso naneconitsiaexanatsi pibisiacuene pexanaexae. Bajarapalivaisi itanerubena Dioso pejumelivaisibaxutota vajanacamuxujobinexa, vaxaitsi ata bajarapacuenia pibisiacuene vajaexanaeyaniva. Vaxaitsi rabaja nacua pevereverecaeitabarayota jinavanapatsi.

¹² Itsa pajamatabëjumaitsimë: “Xanë cajena jamatabëcuenesaënë Dioso tajumecovënëtsijava. Nexata apo exanaenë tsane pibisiacuene pacuenia bajayata tajasalinaivimi exana,” itsa pajamatabëjamë, xania baja tsane! Tspipaji paxamë ata bajarapacuenia pibisiacuene paexanaejitsipame.

¹³ Xua baja aeconoxae pataepoename, dovathi pejamatabëcueneta papecajamatabëcueneëjëtatsijava, bajaraxua daxita Dioso pejumecovënëtsivi tocopiapataponatsi mapanacuataje. Itsiata baitsi jane Dioso pacayavenonaponana pacuenia najumecapanepaeya jumaitsi. Dioso cajena apo pacacopatsi tsane dovathi papecajamatabëcueneëjëtaponanexa paneajamatabëcuenesaëjava matatoxenetsia. Nexata dovathi itsa

pacajamatabëcueneëjêta, itsiata Dioso pacayavenonaponaena panejamaatabëcuenesaë tsaponaenexa. Nexata papecajamatabëcueneëjêtsijava, pavecuapanepaponaename pibisiacuene paexanaenejevamë.

14 Tajamonae bitso patacaasivavi, jumapecataeya pexanaenëanëjavabelia itsamonae penavajëcaecuene, nayajivitaeya pajinavanapare.

15 Pacajamatabëcuenecaëjêpa baja cajena panejumeyapëtaenexa patacatsipaebilivaisi. Nexata panejumecanaëjêre patacatsipaebilivaisi paneypëtaenexa itsa pexaniajailivaisi.

16 Itsa nacaetuanatsi vajanajamatabënapitsinexa xua yabara Cristo nacativatêpa, najuaxanetsi pan. Najumatavëjêaapatsinua vajamatavëjêaapaera. Nexata pan yabara, vajamatavëjêaapaera ata yabara, Diosojavabelia jumaitsi: “Pexaniacuene bitso panetoexaname. Panerajutame pan. Panerajutame patamatavëjêaapaera ata,” jaitsi. Itsa nacaetuatatsi vajanajamatabënapitsinexa xua yabara Cristo nacativatêpa, caebitsaëto naexanatsi Cristo yajava, ponë nacativatêpa cruzata.

17 Ayaibitsaëttoxaneto atatsi, caepan itsiata najuaxanetsi. Nexata vaxaitsi Cristo vajayajavajinavanapaexae, caebitsaëtotsi Cristo pijajivitsi naexanatsi.

18 Pacanaëjêre pacuenia judíovi baexana. Itsamonae dajubi beyabiaba bajarapavi ofrendacuenia perajutsinexa Diosojavabelia. Nexata pamonaenaxanë bajarapavi, caebitsaëto Dioso pijajivi naexana.

19 Mara pajamatabëcuene yabara jumaitsinêje. Jumapecataya pexanaenëanë, itsacuenejavayo ata pexanaenexa, apo caëjêpaetsi. Bajara pijinia itsi pavi ata jumapecataeya pexanaenëanëjavabelia rajuta. Apo caëjêpaetsi jivi xae ata pejamatabëcuenebijianaenexatsi. Tsipaji jumapecataeya pexanaenëanë, bajarapavi apo ithianae bajarapavivecua.

20 Nexata abaxë pamonaenexa Dioso apo yapëtae, dajubinë itsa tobeyaxuaba ofrendacuenia pevi perajutsinexa jumapecataeya pexanaenëanëjavabelia, bajarapavi dovathinexa saya. Apo Diosonexa cajena. Bajaraxuata apo pacatojitsipaetsi panenaxaenexa bajarapamonaejavata. Itsa panaxaejitsipame bajarapamonaejavata, nexata caebitsaëto panaexanaejitsipame dovathi yajava.

21 Paxamë baja panenabanivi, paneapaevinua, vajatuxanenë pijamesata. Nexata baja acuenebi panenabaninexa, paneapaenexanua, itsajota Dioso apo pejumecovënëtsivi dovathi pijacuene exanavanapa.

22 Vaxaitsi Dioso vajajumecovënëtsivi, apo jitsipaetsi vajatuxanenë vajanacabaraanaepanaejava. Dioso pijacuene, dovathi pijacuene ata, anijacuenebeje itsa exanaponaejitsipatsi, nexata vajatuxanenë nacabaraanaepanaejitsipa. Vaxaitsi cajena apo vecuaasaëtsi vajatuxanenë. Nexata apo vecuapanepaetsi tsipae vajatuxanenë itsa nacananeconitsiaexana.

Pacuenia Dioso pejumecovënëtsivi bejinavanapa itsamonae pejamatabëcuenebijianaeyaniva yabara pelivaisi

23 Xaniajai rabaja pacuenia itsamonae jumaitsi. Mapanacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa. Itsiata baitsi jane apo nacatoxanepanae daxita bajarapacuene vajaexanaenexa. Daxitacuene, xua itsajivi ata apo nacaitavetsi vajaexanaenexa, exanae atatsi tsipae, itsiata apo nacajamatabëcueneasaëyaxanae tsipae Dioso vajajumecovënëtsijava.

24 Pëtsa pajamatabëjumaitsimë: “¿De tsaeta xua natoexanaenajë, xua êxanênexa netoxanepanaejitsia?” pajamatabëjamë pëtsa. Biji rajane pajamatabëjumaitsimëre. “¿De tsaeta xua toexanaenajë, xua itsamonaenexa toxanepanaejitsiatsi?” pajamatabëjamëre.

25 Dioso baja cajena pacatocopata panexaenexa itaxutojema. Nexata pacatocopata panexaenexa pavi canajeta pecanajetsibota. Nexata pëtsa payanijobame. “¿Matsa pavi jumapecataeya pexanaenëanëjavabelia peyajuvënërajutsivije?” pajamë pëtsa. Itsa payanijobijitsipame bajarapacuenia: “Jājā, bajarapayajuvënëvi,” pacajai tsipae. Nexata paxamë pajamatabëjumaitsimë tsipae bajarapavi yabara: “Mapavije itsa xaejitsipajë, nexata pibisiacuene exanaejitsipajë Dioso pitabarata,” pajamatabëjamë tsipae. Saya pacomuare payanijobatejevamë.

26 Dioso baja cajena pacatocopata itaxutojema panexaenexa. Tsipaji mapanacuae, daxita mapanacuapijicuene ataje, Dioso baja cajena pijajava.

27 Dioso apo pejumecovënëtsijivi ata itsa pacajunata panenanabaninexa pijaboyabelia, panaponare panenanabaninexa itsa pajitsipame. Xua pacaabata, paxaema payanijobinejevamë. “¿Matsa pavi jumapecataeya pexanaenëanëjavabelia peyajuvënërajutsivije?” pajamë pëtsa.

28 Itsamonaë Dioso pejumecovënëtsivi bepibisiacuene pexanaejava taejitsipa itsa xaejitsipa bajarapayajuvënëvi. Nexata panexaevajënaeya, bajarapamonaeyajuvënëni itsa pacajumaitsi: “Mara pavije jumapecataeya pexanaenëanëjavabelia ofrendacuena peyajuvënërajutsivije,” itsa pacajai, pëtsa patsitaxaneme. Itsa apo patsitaxaemë tsane, nexata apo pajamatabëcuenebijianaemë tsane bajaraponë.

29 Itsa patsitaxaejitsipame, bajaraponë ata naxaejitsipa. Nexata bajaraponë jamatabëjumai tsipae: “Pibisiacuene baja cajena exanajë Dioso pitabarata mapavije tanaxaexae,” jamatabëjai tsipae.

Bajarapacuenia patacatsipaebijava, itsanë Dioso pejumecovënëtsinë itsa jumetaena, jamatabëcuenenavëxaniabiaya meta jumaitsi tsane mapacueniaje: “Jumapecataeya pexanaenëanëjavabelia perajutsiviyajuvënëjjava taxaeyabiabinexa, Dioso netocopata. Nexata baja xaeyabiabajë. Itsiata icatsia aeconoxae nitaveta itsanë Dioso pejumecovënëtsinë itsa tsitaxaniji bajarapayajuvënëvi, bepibisiacuene petaeayaniva. ¿De meta xuajitsia xanë epatua copatsipajë bajarapayajuvënëvi taxaeyabiabijavami?”

30 Taxaevajënaë bajarapavi, ‘Xanepana rabaja,’ janë tsabiabi Diosojavabelia tanerajutsixae taxaenexa. ¿Detsa nexata xuajitsia jivi nebaracuaicuajijai tsipae bepibisiacuene taexanaenë taxaejamatabëcuene bajarapayajuvënëvi?” jai meta tsane jamatabëcuenenavëxaniabiaya itsanë Dioso pejumecovënëtsinë.

31 Mara pacuenia pacatsipaebatsije panecopatsinexa paneexanabiabijavami ata, itsajivi ata panejamatabëcuenebijianaeyaniva panetsitaexanaejava pejamatabëcueneta. Itsa paxaneme, itsa papamenua, daxitacuene itsa paexanamenua, xaniavaetsia itsamonaë patsitaexanavanapaeneme paxamë panetsitaexanaejava yabara jivi papecasivajamatabëjumaitsinexa: “Dioso cajena ayaijamatabëcuenenë. Tsipaji pijajivi yavenona xaniavaetsia petojinavanapaenexatsi,” papecasivajamatabëjainexa.

32 Bajaraxuata pëtsa patsitaexaname itsacuenejavayo ata itsajivi ata Diosovecua itsajamatabëcuene pexainaeyaniva.

33 Pacuenia xanë tsitaexanapononajë itsamonaë tanesivajamatabëcuenebarëyanexa, bajarapacuenia paxamë ata patsitaexanavanapare itsamonaë. Apo najamatabëxainabiabinë taexanaenexa xua êxanênexa

netoxanepana. Biji rajane najamatabëxainabiabajë tatoexanaenexa xua toxanepanatsi itsamonae ata. Bajarapacuenia toexanaponajë bajarapamonae ata Dioso pejumecovënëtsinexa pecapanepaenexatsi pijaneconivecua.

11

¹ Itsamonae patsitaexanavanapare pacuenia xanë pacatsitaexanaponatsi. Xanë raja pijinia cuenejëpaeya ponaponajë Cristo.

Pacuenia petiriavi namataacatsiaya bejunua Dioso pejumecovënëtsivi penacaeuatabiabibota yabara pelivaisi

² Tajamonae, panejamatabënajinabiabame. Pacuenia pacaitorobatsi, bajarapacuenia paexanavanapamenua. Bajaraxuata pacasivajamatabëcuenebarëyatsi.

³ Pacatojitsipatsi paneyapëtaenexa mapacueneye. Athëbëvetsica Dioso itorobicatsi Cristo. Nexata juya mapanacuataje Cristo caepebi canacujitsia itorobapona. Bajara pijinia itsi pebi ata. Pebi juya itorobapona pijava. Pebi peyaiyataenexa Cristo, apo benamataacatsi papaëbërëpanayota jivi penacaeuatsibota.

⁴ Bajaraxuata pebi Diosojavabelia penavajëtsijavata, itsamonaejavabelia ata Dioso pejumelivaisi petsipaebijavata, itsa namataacatsipa papaëbërëpanayota, nexata Cristo athëbëvetsica yapijiviaura tsipaetsi.

⁵ Petiriva rajane pamona pejumecovënëtabiavacuene itsamonae peyapëtaenexatsi, benamataacata papaëbërëpanayota jivi penacaeuatsibota. Bajarapacuenia benamataacata penavajëtsijavata Diosojavabelia, itsamonaejavabelia petsipaebijavata ata Dioso pejumelivaisi. Itsa apo namataacatsi tsipae, nexata pamona yapijiviaura tsipaetsi. Pacuenia petiriva amataura tsipae itsa mataxunaejitsipatsi, bajara pijinia pacuenia petiriva pamona yapijiviaura tsipaetsi, papaëbërëpanayota itsa apo namataacatsi tsipae jivi penacaeuatsibota.

⁶ Petiriva itsa apo namataacatsi tsipae papaëbërëpanayota, pacuenia pebi apo namataacatsi, nexata itsa bemataxunatsi pacuenia pebi bamataxunatsi, bajarapova namatacaura tsipae. Bajaraxuata petiriva jivi penacaeuatsibota, benamataacata papaëbërëpanayota pamona peyapijivaurayanivatsi.

⁷ Dioso itsa exana pebi, nacujirujëpaeyaexana. Nexata pacuenia itsi Dioso, bajara itsi pebi. Nexata pebi xaniavaetsia itsa ponapona, jivi pecanaëjëtsinexa Dioso bitso ayaijamatabëcuene pexainaëcuene. Bajaraxuata pebi apo benamataacatsi papaëbërëpanayota penavajëtsijavata Diosojavabelia, itsamonaejavabelia Dioso pejumelivaisi petsipaebijavata ata. Itsiata baitsi jane petiriva benamataacata papaëbërëpanayota penayapëtaenexa pamonavecua beveliajamatabëcuene pexainaevacuene.

⁸ Copiata Dioso pebi itsa exana, petiriva peyeneyajuvënësitomita apo exanaë. Biji rajane pebi peyeneyajuvënësitomita cotocaevi Dioso exana petiriva.

⁹ Petiriva baja cajena Dioso exana pebinexa.

¹⁰ Bajarapajamatabëcuene yabara petiriva benamataacata papaëbërëpanayota. Petiriva namataacatsia itsa ponapona, ángelevi tanetsi pamona pejumecovënëtabiavacuene.

¹¹ Vaxaitsi Dioso vajajumecovënëtavapavevi, xanepana namataenetsia vanajamatabëcuene asaëyaexanaenexa. Pebi namatavenona petiriva. Petiriva pijinia namatavenona pebi.

12 Xaniajai rabaja. Pebi peyenyajuvënësitota Dioso exana petiriva. Itsiata baitsi jane bajaraxuacujinae petiriavita naexanapona pebijivi. Tspiji Dioso pejamatabëcueneta bajarapacuenia copata.

13 Panijacuata pacanaëjère. ¿Xanepana tsaja petiriavi penavajëtsinexa Diosojavabelia papaëbërëpanayota namataacatsinejeva? Jume raja. Namataacatsiaya raja papaëbërëpanayota petiriavi benavajëta Diosojavabelia.

14 Vaxaitsi baja cajena vajajamatabëëthëtota yapëtanetsi mapacuneje. Pebi itsa amatanapiareca, amataura tsipae.

15 Vajajamatabëëthëtota yapëtanetsinua mapacuneje. Petiriva pijinia itsa amatanapiareca, toxanepanatsi. Yabarëya pematana. Dioso cajena petiriva tocopatatsi piamatanapianaxareca. Nexata bepemataacatsitsi pematana.

16 Itsajivi itsa jamatabëpanejumeanaenota petiriavi papaëbërëpanayota penamataacatsijava yabara, nexata bajarapajivijavabelia pajumaitsinë tsane mapacueniaje: “Paxanë bajarapacuenia panajamatabëxainajë petiriavi papaëbërëpanayota penamataacatsijava yabara. Bajarapacuenia itsamonae ata, pamonaë Dioso pejumecovënëtsivi, najamatabëxaina. Tspiji baja cajena patajacuene,” pajanë tsane pajivijavabelia jamatabëpanejumeanaenota petiriavi papaëbërëpanayota penamataacatsijava yabara.

Pacuenia itsamonae ayajava xaeyabiaba itsa nacaetuatabiaba penajamatabënapitsinexa xua yabara Cristo sivatëpatsi yabara pelivaisi

17 Pacatoyaquinatsi mapalivaisije patacasmusujioinexa. Aeconoxae xua paexanabiabame, apo pacatoxanepanae. Panacaetuatabiabi atamë, itsiata apo pajamatabëcuenesaëmë tsaponae panevajënaeyabelia Dioso panejumecovënëtsijava. Caranata saya panevajënaeyabelia pajamatabëcuenecueranaponame.

18 Najamatabëxainajë copiaya patacajumaitsinexa mapacueniaje. Pacavënëlivaisitanetsi. Apo panajamatabëcunejëpabiabimë pina itsa panacaetuatabiabame panenacaetuatabiabibota. Caebota pina panacaetuatabiabi atamë, navecuanatsanaeya pina panavecuaenabiabame pacaebitsaëtöximë canacujitsia. “Xaniajai raeta baja. Baja raeta pacuenia exanabiaba,” jamatabëjanë belia paxamë yabara.

19 Baja raeta pacuenia navecuanatsanaeya panavecuaenabiabame. Tspiji meta pajamatabëjumaitsimë tsabiabi: “Vaxaitsi cajena Dioso pepacune jumecovënëtatsi. Nexata vajanacaetuatsijavata, Dioso apo pejumecovënëtsivi navecuatsatsianatsi Dioso apo ëpejumecovënëtsivi saicaya penaenexa,” pajamatabëjamë meta tsabiabi.

20 Xua yabara Cristo pacasivatëpa, panenajamatabënapitsinexa panacaetuatabiabi atamë, najamatabëcunejëpaeya apo panacaetuatabiabimë. Nexata Dioso pacatane saya jema bepanenacaetuatsivi.

21 Tspiji copiaya panepatsivi panenabaniepatota, ayajivanë paxaeyabiabame. Apo paevetabiabimë abaxë itsamonae pepatsijava caecuenia panenajuanabaninexa. Itsamonae paxamëyajuvënëvi ayajava xaeyabiaba. Ayaira vinora matavëjëa apaeyabiabanua. Nexata vënaaitajibi tsabiabi. Nexata pamonaë cotocaevi pepatsivi, yavereverecabiaba. Nexata pijani tsabiabi.

22 Epanaxaejavanexa itsa pasivanacaetuatabiabame, panijabonë paxainame panijabonëjava panenabaninexa, paneapaenexanua. Bijijaya pataeyabiabame pamonaë nacaetuatabiaba penavajëcaenexa Diosojavabelia. Paurababiabamenua pamonaë bepejiobivi, paxaejava apo penacapatsivi. Pexaniacune cajena apo paexanabiabimë bajarapacuenia itsa paexanabi-

abame. Bajarapacuenia saya paneexanabiabixae, pananeconitame Diosojavabelia.

Pajamatabëcuene yabara nacaetuatabiaba Dioso pejumecovënëtsivi caejuameto canacujitsia yabara pelivaisi
(Mt 26.26-29; Mr 14.22-25; Lc 22.14-20)

²³ Imata baja cajena pacatsipaebatsi pacuenia vajatuxanenë Jesús pijajivi barëexana. Pameravi vajatuxanenë pijavajabitsaë pecobeyabelia canajetsi-jitsiatsi, bajarapameravi vajatuxanenë cobenanuca panbë.

²⁴ “Pexaniacuene panetoexaname. Pan panerajutame,” pejaicujinae Diosojavabelia, panbë epatsënëca. Jumaitsi pijajivijavabelia: “Mara tavije patacasivatëpaejava paxamënexa. Mapacueniaje tacovëta paexanabiabianame patanenajamatabënapitsinexamë,” jai vajatuxanenë Jesús pijajivijavabelia.

²⁵ Penabanicujinae bajara icatsia pacuenia Jesús cobenanuca pecaapaejava. Nexata icatsia jumaitsi pijajivijavabelia: “Dioso baja cajena najumecapanepaeya jumaitsi papecacapanepaenexa. Nexata pacuenia Dioso najumecapanepaeya jumaitsi, pacacapanepaena tajana pejamatabëcueneta. Tajana raja nevecuarunaena tatëpaejavata papeacomuatsinexa panijaneconivecua. Mapacaapaejavataje, itsa papaeyabiabianame, panenajamatabënapitabiabianame,” jai vajatuxanenë Jesús pijajivijavabelia.

²⁶ Nexata paxamë bajarapacuenia itsa paexanabiabame, patsitanaitajëtabiabame itsamonaejavabelia xua yabara vajatuxanenë pacasivatëpa cruzata. Bajarapacuenia paexanabiabare vajatuxanenë icatsia pepatsimatacabitsicajavabelianexa.

Pacuenia Dioso pejumecovënëtsivi benaxaniavaeta, itsa nacaetuata penajamatabënapitsinexa xua yabara Cristo sivatëpatsi, yabara pelivaisi

²⁷ Jivi itsa nacaetuata penajamatabënapitsinexa xua yabara Cristo sivatëpatsi, becanaëjëtëna. Tspijaji canaëjëtësinëjeva itsa naxane pan, itsa apanua vajatuxanenë pecaapaejavata, bajarapajivi naneconitsipa vajatuxanenëjavabelia, vajatuxanenë pevito, pijana ata, apo peyaiyataexae.

²⁸ Bajaraxuata caejivi canacujitsia xaniavaetsia benajamatabëcuenejaita pecaxitajarabinexa paneconi xainaponapona Dioso pitabarata. Bajarapacuenia benajamatabëcuenejaita pan penaxaevajënaeya, pematavëjëaapaera ata penaapaevajënaeya.

²⁹ Itsa naxane pan, itsa naapanua pematavëjëaapaera, becanaëjëta pajamatabëcuene yabara vajatuxanenë sivatëpatsi cruzata. Pajivi canaëjëtësinëjeva naxane pan, naapanua pematavëjëaapaera, bajarapajivi pijacuata naneconitapona Diosojavabelia.

³⁰ Bajaraxuata paxamë ayaibitsaëto payajuvënëavitane më. Nexata itsamonae payajuvënëcueraname. Itsamonae payajuvënëtëpame baja.

³¹ Bajaraxuata vaxaitsi vajanaxaevajënae pan, vjanaapaevajënae ata pematavëjëaapaera, benajamatabënapitatsi Jesucristo vajanacasivatëpaejava vajaneconi yabara. Benajamatabëcuenejaitatsinua paneconi xainatsi Dioso pitabarata vajanavajunupaebine xua Diosojavabelia. Bajarapacuenia itsa exanaenatsi, vajatuxanenë apo nacananeconitsiaexanae tsane.

³² Itsa naneconitsianatsi, nexata vajatuxanenë nacabejiobiaexanaponaena Dioso apo pejitsipacuene vajaexanaejava vajacopatsinexa. Bajarapacuenia vajatuxanenë nacaexanaena Dioso apo pejumecovënëtsivi yajava Diosovecua vajanaxuabianiva.

³³ Bajaraxuata itsa panacaetuatame panenajamatabēnapitsinexa xua yabara Cristo pacasivatēpa, paevetabianame abaxē daxita pepatsijava caecuenia panenajuaxaenexa.

³⁴ Pajivi pijani, bajarapajivi copiaya benabane pijabota pejonevajēnaeya panacaetuatsibojavabereña. Nexata panenacaetuatsijavata, bajarapajivi apo naneconitsi tsane Diosojavabelia. Itsajamatabēcuenējavaxi pematatsēnē, xua yabara paneyanijobame, abaxē apo pacatoyaquinaetsi mapabaxutotaje. Itsa pacataenatsi, pacatsipaebianatsi bajarajotalia.

12

Pacuenia Dioso pejumecovēnētsivi Espiritu Santo pejamatabēcueneta jamatabēcuenecaējēpaeyaexanatsi pexanaenexa pacuenia Dioso itorobaponatsi yabara pelivaisi

¹ Tajamonae, jitsipajē patacatoyaquinaejava paneyapētaenexa mapacuenēje. Caejivi canacujitsia Dioso pejumecovēnētsivi Espiritu Santo pejamatabēcueneta jamatabēcueneta caējēpaeyaexanaponatsi pexanaenexa pacuenia Dioso itorobaponatsi.

² Paxamē rabaja payapētaneme mapacuenēje. Pamatacabi abaxē Dioso apo pajumecovēnētsimē, dovathi pacayamaxēitojorobabiaba. Nexata panevajētsinexa jumapecataeya pexanaenēanējavabelia, panematabacabēta patonubenabiabame. Jumapecataeya raja pexanaenēanē, apo caējēpaetsi itsacuenējavayo ata pexanaenexa.

³ Bajaraxuata pacatoyaquinatsi paneyapētaenexa mapacuenēje. Pajivi jumaitsi: “Jesús raja Dioso apo pexēnato,” jai, bajarapajivi Espiritu Santo apo yajavaponaponatsi. Pajivi rajane jumaitsi: “Jesucristo raja pepo petuxanē,” jai, bajara jane pajivi Espiritu Santo yajavaponaponatsi.

⁴ Daxita xua Dioso pejumecovēnētsivi Espiritu Santo pejamatabēcueneta jamatabēcueneta caējēpaeyaexanaponatsi, apo najēpae. Caenē canacujitsia saicayacuenia jamatabēcueneta caējēpaeyaexanaponatsi. Itsiata baitsi jane caenē Espiritu Santo pejamatabēcueneta jamatabēcueneta caējēpaeyaexanaponatsi daxita bajarapamonae.

⁵ Xua jivi Dioso tonacuenebavanapa, apo caevirianacuenēbijava. Navita cajena xua jivi Dioso tonacuenebavanapa. Itsiata caenē Dioso pijacuenetonaenēbavanapa.

⁶ Dioso pijacuenetonaenēbivi, apo nacuenējēpae. Itsiata rabaja caenē Dioso daxita yavenonatsi petonacuenēbavanapaenexa.

⁷ Caejivi canacujitsia, Dioso pejumecovēnētsivi, Espiritu Santo pejamatabēcueneta jamatabēcuenecaējēpaeyaexanatsi xua Dioso tonacuenēbavanapaejitsia. Nexata bajarapamonae, caejivi canacujitsia, caējēpatsi peyavēnonaenexa bajarapajamatabēcueneta daxita Dioso pejumecovēnētsivijavabelia.

⁸ Itsamonae Dioso pejumecovēnētsivi, Espiritu Santo pejamatabēcueneta jamatabēcueneta caējēpaeyaexanaponatsi pemuxujobinexa xaniavaetsia itsamonaejavabelia, xaniavaetsia pejinavanapaenexa Dioso pitabarata. Itsamonae pijinia jamatabēcueneta caējēpaeyaexanaponatsi jivi xaniavaetsia peyapētaeyaexanaenexa pexaniajailivaisi, Jesús pelivaisi. Itsiata baitsi jane caeEspiritu Santo pejamatabēcueneta bajarapacuenia jamatabēcueneta caējēpaeyaexanaponatsi bajarapamonae.

9 Itsamonae pijinia jamatabëcuene caējëpaeyaexanaponatsi penajamatabëcuenerutsinexa Diosojavabelia Dioso peyavenonabiabinexatsi daxitacuene yabara. Itsamonae pijinia jamatabëcuene caējëpaeyaexanaponatsi pejamatejemayaexanaenexa piavitanevi. CaeEspíritu Santo rabaja pejamatabëcueneta bajarapacuenia jamatabëcuene caējëpaeyaexanaponatsi.

10 Itsamonae pijinia jamatabëcuene caējëpaeyaexanaponatsi Dioso pesaëta pinijicuene pexanaejavanë pexanaenexa. Itsamonae pijinia jamatabëcuene caējëpaeyaexanaponatsi petsipaebinexa itsamonaejavabelia pacuenia Dioso yapëtaeyaexanatsi. Itsamonae pijinia jamatabëcuene caējëpaeyaexanaponatsi pejumeyapëtaenexa itsajivi itsa tsipaebatsi penajumetsënëtsilivaisi dovathi pejamatabëcueneta. Jamatabëcuene caējëpaeyaexanatsinua pejumeyapëtaenexa itsajivi itsa tsipaebatsi pexaniajailivaisi Espiritu Santo pejamatabëcueneta. Itsamonae pijinia jamatabëcuene caējëpaeyaexanaponatsi pecuaicuajainexa itsajivi ata mapanacuata apo pejumetaejumeta. Itsamonae pijinia jamatabëcuene caējëpaeyaexanaponatsi pejumetaenexa bajarapajume juya pejumevajunupaebaponaenexa itsamonaejavabelia. Nexata bajarapamonae tsipaebapona pajamatabëcuenelivaisi xainapona caelivaisi canacujitsia, palivaisianë tsipaebapona pamonae cuaicuajai itsajivi ata mapanacuata apo pejumetaejumeta.

11 Itsiata baitsi jane caeEspíritu Santo pejamatabëcueneta jamatabëcuene caējëpaeyaexanaponatsi daxita bajarapamonae. Pacuenia Espiritu Santo jitsipa pejamatabëcuene caējëpaeya exanaponaenexa Dioso pejumecovënëtsivijavabelia, bajarapacuenia Espiritu Santo caejivi canacujitsia jamatabëcuene caējëpaeyaexanaponatsi Dioso pejumecovënëtsivi.

Pacuenia daxita Dioso pejumecovënëtsivi caenë Cristo bepeperabëto yabara pelivaisi

12 Pavi xainatsi vajaperabëtota, caevito canacujitsia pevënë xainapona. Vajavi xainatsi navitsiaya. Caevito canacujitsia saicaya pexanaejavanexa, xainapona. Itsiata baitsi jane caeperabëtotsireca. Bajara pijinia itsitsi daxita Dioso vajajumecovënëtsivi. Caejivitsi canacujitsia saicaya vajanacuenebijavanexa, Espiritu Santo pejamatabëcueneta nacajamatabëcuene caējëpaeyaexanaponae ata, itsiata caenë Cristo bepeperabëtotsi.

13 Daxitatsi rabaja Dioso vajajumecovënëtsivi, itsa nacabautisaba, caeEspíritu Santo nacatsijamatabëca caebitsaëtonexatsi, caenë Cristo bepeperabëtonexatsi. Judíovi atatsi, apo judíovi atatsi, dajubicuenia vajanacacanajetsivi ata itsamonaejavabelia amoneya vajatonacuenebinexa, apo vajanacacanajetsivi ata itsamonaejavabelia, daxitatsi, caeEspíritu Santo nacatsijamatabëca.

14 Pavi jivi peperabëtuareca xaina, caevito canacujitsia pevënë xainapona. Nexata caevënëvito jivi apo xinae peperabëtuareca.

15 Nexata jivi petaxu itsa caējëpaejitsipatsi pecuaicuajainexa, petaxu meta jumaitsi tsipae: “Apo pecobenë raja. Bajaraxuata maapo paperabëttoyajuvënëjavanëje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabëttoyajuvënëjava tsipae. Pijumeta saya apo naexanae tsipae saicayajava.

16 Jivi pemuxyoroto ata itsa caējëpaejitsipatsi pecuaicuajainexa, pemuxyoroto meta jumai tsipae: “Apo pitaxutonë raja. Bajaraxuata maapo paperabëttoyajuvënëjavanëje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabëttoyajuvënëjava tsipae. Pijumeta saya apo naexanae tsipae saicayajava.

17 Jivi daxitanē peperabētuaeca itša xainaejitsipa ēpitaxutonē, ζdetsa nexata pacuenia jumetaejitsipa? Acuenebi tsipae. Daxitanē peperabētuaeca itša xainaejitsipa ēpemuxuyorotonē, ζdetsa nexata pacuenia tuxunijitsipa? Acuenebi tsipae.

18 Bajaraxuata jivi peperabētuaeca caevēnēvito Dioso apo torutsi. Saicaya pevēnē pexainaevitonē, caevito canacujitsia, jivi peperabētuaeca Dioso torutapona itsajota jitsipa petorutsinexa.

19 Itša meta jivi peperabētuaeca xainaejitsipa caevitoreca, aitothia meta tsipae. Nexata apo bejivitonē perabēto tsipae.

20 Itsiata baitsi jane maitsije. Jivi peperabētuaeca navitsiaxainae ata saicaya caevito canacujitsia pevēnē pexinaeivi, itsiata rabaja caeperabētoreca.

21 Nexata jivi pitaxutobeje caējēpae atatsibeje tsipae pecuaicuaijainexabeje, itsiata acuenebi tsipae pejumaitsinexabeje pecobebejevavelia: “Apo pacanamatavenonaetsibeje cajena,” pejainexabeje. Jivi pematobocotota ata caējēpae atatsi tsipae pecuaicuaijainexa, itsiata acuenebi tsipae pejumaitsinexa petaxubejevavelia: “Apo pacanamatavenonaetsibeje cajena,” pejainexa. Tsipaji daxita pavi xainatsi vajaperabētota, namatavenonatsi.

22 Bajaraxuata vajaperabētota pavi xainatsi, pavi itajara apo bevajanacatitanamatavenonae, bajarapavi bitso pepacune namatavenonatsi.

23 Pavi xainatsi vajaperabētota, pavi vaxaitsi natanetsi beveliavi, bajarapavi banaperabēxatatatsi naitabētsiaya. Pavi naperabēcauratsi, naperabēcaranatsiaya banaperabēxatatatsi xaniavaetsia.

24 Pavi apo naperabēcauratsi, apo naperabēxatatatsi xaniavaetsia. Bajarapacuenia vajaperabētota Dioso nacavimataropobiaruba. Nexata picani pavi bevelia vajanamatavenonaevi, bajarapavi itsiata naitabētsia banaperabēxatatatsi. Nexata bajarapacuenia bajarapavi ata bevajanamatavenonaeivi tanetsi.

25 Nexata pavi vajaperabētota xainatsi, apo navecuanatsanae. Nexata daxita pavi xainatsi vajaperabētota, namataenetsia naeveta.

26 Vajaperabētota pavi xainatsi, caevito itša atane, nexata daxita itsavijavelia ata baatane. Caevito ata pijinia itša naitabētsianaxatatatsi, nexata daxitaperabētotsireca bayajavarēyatsi.

27 Daxita rabaja paxamē Dioso papijajivimē. Nexata caenē Cristo beperabēto panaexaname. Pavi Cristo peperabētota xaina, bajara bepajajuvēnēvito Dioso pacatane pacaenēmē canacujitsia.

28 Vajaperabētota pavi xainatsi, caevito canacujitsia saicaya xainapona pexanaponaejavanexa. Bajara pijinia itsi Dioso pejumecovēnētsivi. Caējivi canacujitsia Dioso itapetaponatsi saicaya caējivi canacujitsia pexanaponaevenexa xua Dioso tocopatatsi. Copiata Dioso itapeta apóstolevinexa. Xuacujinae icatsia cotocaevi itapeta petsipaebivinexa itsamonaejavavelia pacuenia Dioso yapētaeyaexanatsi. Xuacujinae icatsia Dioso itapeta, pacuenia Dioso pejumelivaisibaxutota jumaitsi, peyapētaeyaexanaevinexa itsamonaejavavelia. Xuacujinae icatsia Dioso itapeta Dioso pesaēta pinijicuene pexanaejava pexanaponaevinexa. Xuacujinae Dioso itapeta piavitanevi pejamatejemayaexanaevinexa. Xuacujinae icatsia Dioso itapeta bepejiovivi peyavenonaevinexa. Xuacujinae icatsia Dioso itapeta Dioso pejumecovēnētsivi penamatacaitorobivinexa. Xuacujinae icatsia Dioso itapeta pecuaicuaijainexa itsajivi ata mapanacuata apo pejumetaejumeta.

29 Nexata daxita apo ēapóstolevi. Nexata pijinia daxita apo ēpetsipaebivinexa itsamonaejavavelia pacuenia Dioso yapētaeyaexanatsi. Nexata pijinia daxita

apo ëpeyapëtaeyaxanaponaevinexa itsamonaejavabelia pacuenia Dioso pejumelivaisibaxutota jumaitsi. Nexata pijinia daxita Dioso pesaëta pini-
jicuene pexanaejava, apo ëpexanaponaevinexa.

³⁰ Nexata pijinia daxita apo ëpejamatejemayaexanaevinexa piavitanevi. Nexata pijinia daxita apo ëpecuaicuajiaevinexa itsajivi ata mapanacuata apo pejumetaejumeta. Nexata pijinia daxita apo ëpejumetaevinexa bajara-
pajume, juya itsamonaejavabelia pejumevajunupaebaponaenexa pajama-
tabëcuenelivaisi xainapona caelivaisi canacujitsia, palivaisianë tsipae-
bapona pamonaë cuaicuajiai itsajivi ata mapanacuata apo pejumetae-
jumeta.

³¹ Bajarapacuenia itsamonae pejamatabëcuenecaëjëpaeya exanaejavatsi
matatoxenetsia panevajënaeyabelia bitso pajitsipare Dioso papecaja-
matabëcuenecaëjëpaeya exanaenexa, paneyavenonaenexa daxita Dioso
pejumecovënëtsivijavabelia. Daxita baja xua yabara pacatsipaebatsi, daxita
bajaraxua matatoxenetsia panevajënaeyabelia bitso pajitsipare Dioso
papecajamatabëcuenecaëjëpaeya exanaenexa itsamonae ata paneasivanexa.

13

Pacuenia jivi namataenetsia benaasiva yabara pelivaisi

¹ Dioso nejamatabëcuenecaëjëpaeya exanaejitsipa tacuaicuajainexa it-
sajivi ata mapanacuata apo pejumetaejumeta. Angelevi ata pijajumeta
cuaicuajianë tsipae. Nexata jivi netaejitsipa ayajiamatabëcuenenënë. Ba-
jarapacuenia Dioso nejamatabëcuenecaëjëpaeyaxanaë ata tsipae, itsiata itsa-
monae ata itsa apo asivanë tsipae, nexata saya bajaraxua netoamatamobi
tsipae Dioso pitabarata. Nexata palivaisi ata tsipaebaponaejitsipajë jivi
pejumetaejumeta, apo nejumecovënëtsi tsipae. Nexata pacuenia tambor,
itsa jume, plato itsajivi penajumetsiaexanaejava namuxujematatsi, baja-
rapacuenia nenamuxujematatsi tatsipaebilivaisi.

² Dioso nejamatabëcuenecaëjëpaeya exanaejitsipa xaniavaetsia
tayapëtaenexa Dioso pejumelivaisi, asaëyata tatsipaebinexa itsamonaejav-
abelia. Yapëtaejitsipajënuu daxita Dioso muetsia penajamatabëxainaelivaisianë
ata. Yapëtaejitsipajënuu daxita Dioso pijacuene ata. Bajarapacuenia
xaniavaetsia yapëtae atanë tsipae, itsiata itsamonae ata itsa apo asivanë
tsipae, nexata saya bajaraxua netoamatamobi tsipae Dioso pitabarata.
Dioso bitso tajumecovënëtsinë tsipae. Nexata itsa jumaitsinë tsipae: “Dioso
baja cajena mapatsutoxanetoje nevecuatixitsiana,” itsa janë tsipae, nexata
Dioso nevecuatixitsipa. Bajarapacuenia exanaë atanë tsipae, itsiata itsa apo
asivanë tsipae itsamonae ata, nexata saya bajaraxua netoamatamobi tsipae
Dioso pitabarata.

³ Rajutaponaejitsipajë bepejiobivijavabelia daxita taxainaejavaximi.
Nacaevetsipajënuu tanetajuitsinexa, tanebeyaxuabonexa ata, Dioso
pejumelivaisi yabara. Bajarapacuenia nacaevetsi atanë tsipae, itsiata itsa
apo asivanë tsipae itsamonae ata, nexata saya bajaraxua netoamatamobi
tsipae Dioso pitabarata.

⁴ Majamatabëcuenetsije pajivi asiva itsamonae ata. Bajarapajivi bajaya-
jebi itsacueniabi atatsi, ajamatabëcuenesaë bajarapamonaejavabelia. Pa-
jivi asiva itsamonae ata, itaxutotsoniatane bajarapamonae. Pajivi asiva
itsamonae ata, apo cuenecaëbi bajarapamonae. Pajivi asiva itsamonae
ata, “Xanë ayajiamatabëcuenenënë bajarapamonae matatoxenetsia,” apo jai
itsajivijavabelia.

5 Pajivi asiva itsamonae ata, bajarapajivi apo ataejitsibi itsajivi ata. Apo exanae itsacuene ata piurabinexa bajarapamonaejavabelia. Pajivi asiva itsamonae ata, daxita xua xanepana, eponēnēxa apo natonajamatabēxainae. Pajivi asiva itsamonae ata, bepījia apo anaepanae bajarapamonaejavabelia. Pajivi asiva itsamonae ata, itsacueniabi atatsi, apo jamatabēsitecae juya pecuenecanaviatsinexa bajarapamonaejavabelia.

6 Pajivi asiva itsamonae ata, bajarapamonae itsa tocopiapatatsi pibisiacuene, bajarapajivi apo sivajamatabēcuenebarēya bajarapamonae pibisiacuene petocopiapatsijavatsi yabara. Biji rajane pajivi asiva itsamonae ata, itsa bajarapamonae Dioso pejitsipaecuenia exanavanapa, bajarapajivi sivajamatabēcuenebarēya bajarapamonae Dioso pejitsipaecuenia pexanavanapaejava yabara.

7 Pajivi asiva itsamonae ata, bajarapajivi piasivavijajuvēni itsacueniabi atatsi, najamatabēcuenesaēta pevājēnaeyabelia piasivajava bajarapamonae. Pajivi asiva itsamonae ata, bajarapajivi apo peyapētaevi ata, sivajamatabējumaitsi mapacueniaje: “Maraeta pamonae ata pexaniajamatabēcuenevije,” sivajamatabējai. Pajivi asiva itsamonae ata, bajarapajivi pibisiacuene pexanaevi ata, sivajamatabējumaitsi mapacueniaje: “Maraeta pamonae itsamatacabi pexaniaacuene pexanaevi tsaneje,” sivajamatabējai. Pajivi asiva itsamonae ata, bajarapajivi tsiaypēbeje atatsi daxitacuene yabara, apo copatsi piasivajava itsamonae ata.

8 Itsamonae Espiritu Santo pejamatabēcueneta jamatabēcuene caējēpaeyaexanaponatsi petsipaebinexa itsamonaejavabelia pacuenia Dioso yapētaeyaexanatsi. Itsamonae pijinia jamatabēcuene caējēpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabēcuene caējēpaeyaexanaponatsi pacuenia Dioso pejumelivaisibaxutota jumaitsi peyapētaeyaexanaenexa itsamonaejavabelia. Daxita bajarapacuene, xua Dioso Espiritu Santo pejamatabēcueneta Dioso pejumecovēnētsivi jamatabēcuenecaējēpaeyaexanatsi, itsamatacabi tocopiarucaenatsi. Itsiata baitsi jane jivi namataenetsia penasivacuene, apo copiaruca tsane.

9 Dioso nacajamatabēcuene caējēpaeyaexanae ata vajayapētaenexa, abaxē tsiquirijavayo yapētaeponatsi. Palivaisi ata tsipaebatsi itsamonaejavabelia Dioso pejumelivaisi, apo ayajava.

10 Pamatacabi icatsia Cristo patsianica, Espiritu Santo pejamatabēcueneta vajanacajamatabēcuene caējēpaeyaexanaejamatabēcuenemi, nacatocopiarucaena. Nexata jane baja bajarapamatacabi vajatuxanenē xaniavaetsia nacayapētaeyaexanaena daxitacuene Dioso pijacuene.

11 Pamatacabi abaxē pejevaxinēyonē, cuaicuaijanē pejevaxinēyonēcuenia. Najamatabēxainajēna pejevaxinēyonēcuenia. Jumetanijinua abaxē pejevaxinēyonēcuenia. Itsa baja tanaveretsinē, pejevaxijamatabēcuenemi baja copatajē.

12 Bajara pijinia itsinē Dioso tajamatabēcueneyapētaejava. Tsiquirijavayo abaxē Dioso jamatabēcueneyapētāniji. Pacuenia pitatsēcēnaetsaxuta itsa naitatanetsi, apo nacatonapebetsi, bajarajamatabēcueneitsinē Dioso tajamatabēcueneyapētaejava. Abaxē saya tsiquirijavayo Dioso jamatabēcueneyapētāniji. Itsiata baitsi jane itsamatacabi Dioso xaniavaetsia jamatabēcueneyapētaenajē. Pacuenia aeconoxae Dioso xaniavaetsia nejamatabēcueneyapētane, bajara pijinia pacuenia xanē ata itsamatacabi xaniavaetsia Dioso jamatabēcueneyapētaenajē.

13 Apo vereverecae daxitamatacabi vaxaitsi vajanajamatabœcuenecopatsijava Diosojavabelia. Vaxaitsi evetavanapatsinua Dioso vajanacacapanepaenexa. Nexata vajanajamatabœcuenecopatsijava Diosojavabelia, vajaevetavanapaejava ata Dioso vajanacacapanepaenexa, bajaraxuabeje matatoxenetsia bitso xanepana vajaasivajava itsamonaē ata.

14

Pacuenia Espíritu Santo pejamatabœcueneta itsamonaē cuaicuajiyaiyax-anatsi itsajivi ata mapanacuata apo pejumetaejumeta yabara pelivaisi

1 Panajamatabœcueneverere panevajœnaeyabelia panecasaœtsavanapaenexa itsamonaē ata paneasivajava pacuenia panijacuata panaasivamœ. Panatojitsiparenuā xua Dioso pacatojitsipa papecajamatabœcuene caējœpaeyaexanaenexa Espíritu Santo pejamatabœcueneta. Bitso jane panatojitsipare palivaisi Dioso payapœtaeyaexana panetsipaebinxaxa itsamonaējavabelia. Nexata patsipaebianame palivaisi Dioso pacayapœtaeyaexana.

2 Itsamonaē Espíritu Santo pejamatabœcueneta jamatabœcuene caējœpaeyaexanaponatsi pecuaicuajiyainexa itsajivi ata mapanacuata apo pejumetaejumeta. Nexata bajarapajivi itsajivi ata mapanacuata apo pejumetaejumeta livaisi itsa paeba, tsipaeba Diosojavabelia. Nexata Dioso jumetanetsi palivaisi paeba. Bajarapajivi apo tsipaebi jivijavabelia. Nexata bajarapajivi livaisi itsa paeba itsajivi ata mapanacuata apo pejumetaejumeta, jivi jumetae atatsi, itsiata itsajivi ata apo jumetaetsi palivaisi paeba. Tspajivi itsajivi ata mapanacuata apo pejumetaejumeta paeba. Bajarapajivi Espíritu Santo pejamatabœcueneta livaisi paebiaexanatsi. Palivaisi Espíritu Santo bœpœnœa xainaponapona, paebiaexanatsi.

3 Itsamonaē pijinia Espíritu Santo pejamatabœcueneta jamatabœcuenecaējœpaeyaexanatsi jivi pejumetaejumeta petsipaebinxaxa palivaisi Dioso yapœtaeyaexanatsi. Nexata bajarapajivi tsipaeba jivi pejumetaejumeta pejumetaenexatsi paivaisi tsipaeba. Nexata jivi pejumetaejumeta bajarapalivaisi bajarapajivi itsa tsipaeba, itsamonaē pevajœnaeuabelia sivaajamatabœcuenesaē tspanœ Dioso pejumecovœnœtavanapaejava. Bajarapajivi jamatabœcuenebabatanua bitso penajamatabœxainaevi.

4 Pajivi Espíritu Santo pejamatabœcueneta jamatabœcuenecaējœpaeyaexanatsi livaisi pepaebinxaxa itsajivi ata mapanacuata apo pejumetaejumeta, bajarapajivi pijacuata jamatabœcuenevitsabapona Diosojavabelia bajarapalivaisita. Itsiata baitsi jane pejamatabœcuenecaējœpaeyaexanatsi jivi pejumetaejumeta petsipaebinxaxa palivaisi Dioso yapœtaeyaexanatsi, bajarapajivi petsipaebilivaisita Diosojavabelia jamatabœcuenevitsabiaexanapona daxita Dioso pejumecovœnœtsivi.

5 Pacatojitsipatsi picani daxita paxamœ Espíritu Santo pejamatabœcueneta papecajamatabœcuene caējœpaeyaexanaenexa panecuaicuajiyainexa itsajivi ata mapanacuata apo pejumetaejumeta. Itsiata rajane bajaraxua matatoxenetsia bitso pacatojitsipatsi papecajamatabœcuene caējœpaeyaexanaenexa jivi pejumetaejumeta panetsipaebinxaxa palivaisi Dioso pacayapœtaeyaexana. Pajivi tsipaebapona jivi pejumetaejumeta palivaisi Dioso yapœtaeyaexanatsi, bajarapajivi bitso jamatabœcuenyavenona itsamonaē Dioso pejumecovœnœtsivi. Pajivi livaisi tsipaeba itsajivi ata mapanacuata apo pejumetaejumeta, bajarapajivi apo jumetaetsi palivaisi tsipaeba. Nexata bajarapajivi Dioso pejumecovœnœtsivi apo jamatabœcuenevitsabiaexanaē Diosojavabelia. Itsiata

bajarapajivi itša caējēpatsinua jivi pejumetaejumeta penajumevajunupaebinexa pejumetaenexatsi palivaisi tsipaeba, nexata bajarapajivi Dioso pejumecovēnētsivi jamatabēcuenevitsabiaexana Diosojavabelia.

6 Bajaraxuata xanē ata pijinia paxamējavata itša patsipajē livaisi patacatsipaebinxaxa apo panejumetaejumeta, nexata apo panejumetaemē tsipae palivaisi pacatsipaebijitsipatsi. Nexata apo pacajamatabēcuene vitsabiaexanae tsipaetsi Diosojavabelia. Itsiata baitsi jane itša patsipajē panejumetaejumeta patacatsipaebinxaxa pacuenia Dioso bemajitsinaebota netsitajēta, nexata pacajamatabēcuene vitsabiaexanaejitsipatsi Diosojavabelia. Itša pacatsipaebijitsipatsinua pexaniajailivaisi, nexata pacajamatabēcuene vitsabiaexanaejitsipatsi Diosojavabelia. Palivaisi Dioso neyapētaeyaexana, palivaisi ata Dioso jumaitsi, pexaniajailivaisi, itša pacatsipaebijitsipatsi, nexata pacajamatabēcuene vitsabiaexanaejitsipatsi Diosojavabelia.

7 Pamonae Espiritu Santo pejamatabēcueneta jamatabēcuenecaējēpaeyaexanatsi pecuaicuaijainexa itsajivi ata mapanacuata apo pejumetaejumeta, bajarapamonae livaisi tsipaebi ata, itsajivi ata apo jumetaetsi palivaisi tsipaeba. Bajara pijinia itši tsipae penaxēanaejavanē peracatsivi ata xaniavaetsia itša apo racatsi tsipae. Flauta piobinē, bijiata itša obijitsipa, arpa pijinia peracatsinē ata, bijiata itša racatsipa, nexata itsajivi ata apo vajiyapētaetsibeje tsipae, pavaji picani naxēanaeyaexanabeje. Flauta piobijava, arpa ata peracatsijava, amatamobi tsipae.

8 Bajara pijinia itši tsipae vajabitsaē trompeta piobijava ata. Vajabitsaē itša ponaejitsia penavajabitsaētsinexa, trompeta baoba penajunathsinexa. Nexata trompeta piobijava vajabitsaē itša jumetane, bamuxunaothopa penacaetuatsinexa. Nexata trompeta piobinē xaniavaetsia itša apo obi tsipae, nexata trompeta piobijava vajabitsaē jumetae ata tsipae, apo muxunaothopae tsipae penacaetuatsinexa penavajabitsaētsinexa.

9 Bajara pijinia paitsimē tsipae paxamē ata. Itsajivi ata mapanacuata apo pejumetaejumeta itša patsipaebijitsipame itsamonaejavabelia palivaisi Dioso pacayapētaeyaexana, nexata apo pacajumetae tsipae palivaisi patsipaebame. ¡Nexata saya pajumenaxuabijitsipame bajarapalivaisi panetsipaebijava!

10 Daxitaviriajumevi bitso navita mapanacuajavaje. Caeviriajumevi canacujitsia yapētaepona xaniavaetsia pijajume.

11 Itsiata baitsi jane tajanacuapijinē ata itša nebarēcuaiicuaijai tsipae it-saviriavi pijajumeta, apo tajumetaejumeta, nexata besaicaya nacuapijinē taejitsipajē bajaraponē. Bajaraponē ata pijinia itsaviriavi pijumeta, apo pejumetaejumeta, itša barēcuaiicuaijanē tsipae, besaicaya nacuapijinēnē ne-taejitsipa.

12 Itša pajitsipame Dioso papecajamatabēcuene caējēpaeyaexanaenexa daxitacuene, nexata panatovajēre Diosojavabelia papecajamatabēcuene caējēpaeyaexanaenexa. Itsiata baitsi jane bitso panatojitsipare Dioso papecajamatabēcuene caējēpaeyaexanaenexa itsamonaejavabelia panetsipaebinxaxa palivaisi Dioso pacayapētaeyaexana. Nexata Dioso pejumecovēnētsivi itša pacajumetane palivaisi patsipaebame, ajamatabēcuenesaē tsane Dioso pejumecovēnētsijava.

13 Nexata pajivi Espiritu Santo pejamatabēcueneta jamatabēcuenecaējēpaeyaexanatsi jivijavabelia livaisi petsipaebinxaxa itsajivi ata mapanacuata apo pejumetaejumeta, bajarapajivi bevajēta Diosojavabelia pejamatabēcuenecaējēpaeya exanaenexatsinua jivi pejumetaejumeta penajumevajunupaebinexa bajarapalivaisi. Nexata bajarapajivi Dioso itša jamatabēcuenecaējēpaeyaexanatsi jivi

pejumetaejumeta penajumevajunupaebinexa daxitajivijavabelia, itsa najumevajunupaebiana, yapëtaeyaexanaena palivaisi tsipaeba.

¹⁴ Xanë ata apo tajumetaejumeta vajëtsi atanë tajamatabëethëtojavavetsina, itsiata apo yapëtaenë xua vajëtajë Diosojavabelia.

¹⁵ Mara pacuenia tavajënaeyabelia xanë exanaenajëje. Vajëtsianajë Diosojavabelia anijavirijumetaheje. Vajëtsianajë apo tajumetaejumeta. Vajëtsianajënuu tajajumeta ata daxitajivi tanejumetaenexa. Tanaxëanaejavata ata pijinia bajarapacuenia exanaenajë. Naxëanaenajë apo tajumetaejumeta. Naxëanaenajënuu tajajumeta ata daxitajivi tanejumetaenexa.

¹⁶ Pexaniacuene Dioso papecatoexanaejava yabara itsa pavajëtsipame Diosojavabelia itsajivi ata mapanacuata apo pejumetaejumeta, nexata pajivi pacajumetaeyeca, apo pacajumetae tsipae xua yabara pavajëtsipame Diosojavabelia. Nexata bajarapajivi toacuenebitsi tsipae papecayavenon-aejavajëtsinexa Diosojavabelia.

¹⁷ Paxamë picani Dioso pexaniacuene papecatoexanaexae, Diosojavabelia pavajëtsipame xaniavaetsia. Itsiata baitsi jane itsajivi ata mapanacuata apo pejumetaejumeta panevajëtsixae Diosojavabelia, pajivi pacajumetaeyeca, ajamatabëcueneconvëbi tsipae. Tsipaji apo pacajumetae tsipae xua yabara pavajëtsipame. Nexata apo pacamuxunajamatabëcuenevitsabi tsipae Diosojavabelia.

¹⁸ Dioso baja cajena xanë nejamatabëcuenecaëjëpaeyaexana tacuaicuai-jainexa itsajivi ata mapanacuata apo pejumetaejumeta. Bajarapacuenia cuaicuaijanë itsajivi ata mapanacuata apo pejumetaejumeta daxita paxamë matatoxenetsia. Bajarapacuenia Dioso tanejamatabëcuene caëjëpaeyaexanaexae, jumaitsinë tsabiabi Diosojavabelia: “Xanepana rabaja. Pexaniacuene bitso netoexaname,” janë tsabiabi Diosojavabelia.

¹⁹ Itsiata baitsi jane Dioso pejumecovënëtsivi penacaeuatsijavata, ayailivaisi tsipaebi atanë tsipae itsajivi ata mapanacuata apo pejumetaejumeta, bajarapamonae apo nejumetae tsipae palivaisi tsipaebajë. Bajaraxuata Dioso pejumecovënëtsivi penacaeuatsijavata, apo jitsipaenë tatsipaebinexa itsajivi ata mapanacuata apo pejumetaejumeta. Biji rajane jitsipajë bajarapamonae pejumetaejumeta tatsipaebinexa saya tsiquirilivaisiyo ata tanejumetaenexa, palivaisi tsipaebajë.

²⁰ Tajamonae, pacuenia pejevaxi bajamatabëcueneitsi, pëtsa bajara pajamatabëcueneitsimë. Xaniavaetsia panajamatabëxainaname. Pacuenia penaveretsivi bajamatabëcueneitsi, bajara pajamatabëcueneitsimë tsane. Itsiata baitsi jane pibisiacuene paneexanaeyaniva, bepapejevaxijiviximë panataename. Tsipaji pejevaxijivixi abaxë bitso apo najamatabëxainae pibisiacuene pexanaenexa.

²¹ Dioso pejumelivaisibaxutota tajëvelia jumaitsi mapacueniaje: “Itsamonaе cuaicuaijiaeyaexanaenajë itsajivi ata mapanacuata apo pejumetaejumeta. Nexata bajarapamonae tajumelivaisi netotsipaebiana tajajivijavabelia. Itsiata baitsi jane tajajivi apo jumecovënëtsi tsane tajumelivaisi,” jai tajëvelia Dioso pejumelivaisibaxutota judïovi Dioso apo pejumecovënëtsijavanexa yabara.

²² Nexata Dioso pejumecovënëtsivi Espiritu Santo pejamatabëcueneta jamatabëcuene caëjëpaeyaexanaponaeatsi pecuaicuaijainexa itsajivi ata mapanacuata apo pejumetaejumeta. Nexata Dioso apo pejumecovënëtsivi itsa taena bajarapacuenie, canaëjëtsiana Diosojavabelia. Canaëjëtsianuua bajarapamonae penaneconitavanapaejava Diosojavabelia. Dioso pejumecovënëtsivi jamatabëcuene caëjëpaeyaexanaenatsi petsipaebinexa itsamonaejavabelia palivaisi Dioso yapëtaeyaexanatsi. Nexata

itsamonae Dioso pejumecovënëtsivi xaniavaetsia pejumetaexae palivaisi tsipaebatsi, canaëjëtsiana pepacuene Dioso pitaxutotsoniataejavatsi pecapanepaenexatsi pijaneconivecua.

²³ Nexata pijinia itsamonae Dioso apo pejumecovënëtsivi napatsipa panacaeuatsijavata. Nexata bajarajota paxamë livaisi patsipaebijitsipame itsajivi ata mapanacuata apo pejumetaejumeta. Nexata pamonaenepanatsivi apo papecajumetaexae palivaisi patsipaebame itsajivi ata mapanacuata apo pejumetaejumeta, nexata pacabarajamatabëjumai tsipae: “Mara pamonaenje saya pematajemabivitsije,” pacabarajamatabëjai tsipae. Tsipaji apo pacajumetae tsipae palivaisi patsipaebame.

²⁴ Jivi pejumetaejumeta panetsipaebijavata palivaisi Dioso pacayapëtaeyaexana, Dioso apo pejumecovënëtsijivi napatsipa. Nexata bajarapajivi papecajumetaexae palivaisi patsipaebame, najamatabëxainaejitsipa. Nayapëtaejitsipanua bajarapajivi penaneconitsijava Diosojavabelia. Nexata pijaneconi bitso yanajamatabëxainaejitsipa Diosojavabelia.

²⁵ Papecanamuxunaevetsijavata, bajarapajivi muetsia penajamatabëxainabiabijava najamatabëcuenyapëtaejitsipa. Nexata nayapëtaejitsipa penaneconitsijava Diosojavabelia. Nexata pematabacabëta nucaejitsipa. Vajëtsipa Diosojavabelia. Pevajëtsijavata jumai tsipae Diosojavabelia: “Diosomë, bitso baja cajena ayaijamatabëcuenenëmë,” jai tsipae Diosojavabelia. Nexata paxamëjavaberena ata bajarapajivi pacajumaitsi tsipae: “Pepacuene majotaje paxamë Dioso pacayajavaponapona,” pacajai tsipae.

Pacuenia Dioso pejumecovënëtsivi muxujiobatsi peyapëtaenexa pacuenia exanaejitsia culto pejanaejavata yabara pelivaisi

²⁶ Tajamonae, itsa panacaeuatame Dioso pejumelivaisi yabara, mapacuenia paexanaenameje. Itsamonae naxëanaena vaji. Itsamonae najamatabëcueneveretsiana jivi pejumetaejumeta livaisi petsipaebinexa daxitajivijavabelia. Itsamonae najamatabëcueneveretsiana palivaisi Dioso yapëtaeyaexanatsi juya petsipaebinexa itsamonaejavabelia. Itsamonae najamatabëcueneveretsiana livaisi petsipaebinexa itsajivi ata mapanacuata apo pejumetaejumeta. Itsamonae pijinia najamatabëcueneveretsiana jivi pejumetaejumeta juya pejumevajunupaebaponaenexa daxitajivijavabelia, palivaisi tsipaeba itsajivi ata mapanacuata apo pejumetaejumeta pecuaicuajivai. Bajarapacuenia paexanaename panenacaeuatsijavata daxita Dioso pejumecovënëtsivi pevajënaeyabelia pejamatabëcuenevitsabaponaenexa Dioso pejumecovënëtsijava.

²⁷ Panenacaeuatsijavata, jivijavabelia itsamonae livaisi itsa tsipaebijitsia itsajivi ata mapanacuata apo pejumetaejumeta, nexata Dioso tocopatatsi petsipaebinexa anijavibeje, acueyabi pajivibeje ata. Baitsi pejumevajunupaebinexatsi palivaisi tsipaeba itsajivi ata mapanacuata apo pejumetaejumeta. Itsiata baitsi jane caecuenia acueyabi pajivibeje apo benajuatsipaebi. Nexata pajivi jivijavabelia livaisi tsipaebijitsia itsajivi ata mapanacuata apo pejumetaejumeta, bajarapajivi copiatu betsipaeba. Nexata pijinia pajivi jumevajunupaebaponaejitsia jivi pejumetaejumeta, bajarapajivi cotocaevi bejumevajunupaebapona jivijavabelia. Bajarapacuenia itsamonae jivijavabelia livaisi itsa tsipaeba itsajivi ata mapanacuata apo pejumetaejumeta, nexata juya itsajivi jivi pejumetaejumeta bejumevajunupaebapona daxitajivijavabelia peyapëtaenexa palivaisi tsipaeba itsajivi ata mapanacuata apo pejumetaejumeta.

28 Nexata itsa ajibi jivi pejumetaejumeta pejumevajunupaebijivinexatsi daxitajivi peyapëtaenexa palivaisi tsipaeba itsajivi ata mapanacuata apo pejumetaejumeta, nexata panenacaetuatsijavata livaisi apo betsipaeabi itsajivi ata mapanacuata apo pejumetaejumeta. Bajarapamonae moya beena. Bëpënëa saya pejamatabëëthëtota becuacuajjai tsenae itsajivi ata mapanacuata apo pejumetaejumeta. Diosojavabelia ata pijinia bajarapacuenia bëpënëa pejamatabëëthëtota bevajëtëna.

29 Bajara pijinia pacuenia Dioso tocopata itsamonae ata jivijavabelia petsipaebinexa palivaisi Dioso yapëtaeyaexanatsi. Bajarapamonae ata Dioso tocopata jivijavabelia petsipaebinexa anijajivibeje, acueyabi pajivibeje ata. Nexata petsipaebijavata, itsamonae xaniavaetsia benamuxunaevetena pejumeyapëtaenexa itsa xaniajai Dioso pejamatabëcueneta bajarapamonae tsi-paebatsi bajarapalivaisi.

30 Nexata bajarapamonae livaisi petsipaebaponaejavata, bajarajota penamuxunaevetecaenë Dioso pejamatabëcueneta livaisi itsa yapëtaeyaexanatsi, nexata ponë jivijavabelia livaisi tsipaebapona, benajumecopata baja. Nexata ponë penamuxunaevetecaejavata, Dioso livaisi yapëtaeyaexanatsi, bajaraponë juya daxitajivijavabelia betsipaeaba palivaisi Dioso yapëtaeyaexanatsi penamuxunaevetecaejavata.

31 Bajarapacuenia daxita paxamë Dioso pejumelivaisi papecayapëtaeyaexanaevi Dioso pacatocopata jivijavabelia livaisi panetsipaebinexa pacaevivimë tsaponae. Bajarapacuenia Dioso pacatocopata daxitajivi peyapëtaenexa Dioso papecayapëtaeyaexanaelivaisi, pesivaajamatabëcuenesaë tsaponaenexanua Dioso pejumecovënëtsijava panetsipaebilivaisita.

32 Pamonae tsipaeba daxitajivijavabelia palivaisi Dioso yapëtaeyaexanatsi, bajarapamonae yapëtane paepatota najumecopatsijitsia. Tspiji Espiritu Santo pejamatabëëthëtota itorobatsi paepatota najumecopatsijitsia. Nexata itsa najumecopata bajaraponë, juya itsanë petsipaebinexa daxitajivijavabelia.

33 Dioso apo tocopatsi caecuenia anijajivibeje jivijavabelia livaisi penajuat-sipaebinexa. Tspiji caecuenia anijajivibeje livaisi itsa najuat-sipaebijitsipabeje, xaniavaetsia apo jumetaetsi tsipae penajuanacaetuatsivi. Bajaraxuata Dioso tocopata jivijavabelia livaisi petsipaebinexa caejivi tsaponae.

Pacatsipaebijitsiatsi pacuenia exanabiaba daxita Dioso pejumecovënëtsivi penacaetuatsijavata.

34 Petiriavi moya beena Dioso pejumecovënëtsivi penacaetuatsijavata. Tspiji petiriavi Dioso apo focopatsitsi Dioso pejumecovënëtsivi penacaetuatsijavata pecuacuajjait-senaenexa. Petiriavi pamonajivi bejumecovënëtsiajinavanapa pacuenia Dioso pejumelivaisibaxutota itorobatsi.

35 Petiriva itsa jamatabëyanijoba itsalivaisiyo, nexata bota beyanijoba pamonajavabelia. Piauracuene exanaejitsipa Dioso pejumecovënëtsivi penacaetuatsijavata petiriva itsa cuacuajjai tsecae tsipae.

36 Pëtsa pacopatame Dioso pejumecovënëtsivi penacaetuatsijavata petiriva pecuacuajjaitsecaenexa. Tspiji itsatomanëjjava Dioso pejumecovënëtsivi bajarapacuenia apo exanae. Pëtsa bepaayajamatabëcuenevimë panataneme bajarapacuenia paneexanavanapaenexa.

37 Itsamonae paxamëyajuvënëvi natane bepetsipaebarutsivinexa daxitajivijavabelia palivaisi Dioso yapëtaeyaexanatsi. Itsamonae natane Espiritu Santo pejamatabëcueneta bepejamatabëcuene cajëpayaexanaevitsi pacuenia

Dioso jitsipa. Nexata bajarapamonae itsa xaniajai Espírítu Santo yajavajinavanapa, beyapétane pìcani patacatoyaquinaelivaisi, mapalivaisije vajatuxanenè pitoroblilivaisi jivi pejumecovènètsinexa.

³⁸ Itsiata baitsi jane pajivi apo namuxunaevetsi pejumecovènètsinexa mapalivaisije, pètsa pajumecovènètame bajarapajivi penavajunupaebijava Dioso pejamatabècuenecaējèpaeya exanaejavatsi.

³⁹ Bajaraxuata asaēyata panatojitsipare Dioso papecajamatabècuene caējèpaeyaexanaenexa panetsipaebinexa daxitajivijavabelia palivaisi Dioso pacayapètaeyaexana. Itsiata baitsi jane pètsa pajumeitavetame itsamonae itsa cuaicuaijai itsajivi ata mapanacuata apo pejumetaejumeta.

⁴⁰ Nexata panenacaetuatsijavata, itsa patsipaebame daxitajivijavabelia palivaisi Dioso pacayapètaeyaexana, xaniavaetsia pacaenèmè tsaponae patsipaebabianame.

15

Jesucristo petèpaecujinae Dioso icatsia piasaēyaexanaejavatsi yabara pelivaisi

¹ Tajamonae, pacatojitsipatsi panenajamatabènapitsinexa palivaisi baja imata pacatsipaebatsi. Bajarapalivaisi, pexanialivaisi, papecacapanepaelivaisinexa panijaneconivecua. Pajumecovènètame baja bajarapalivaisi. Nexata panevajènaeyabelia asaēya pajumecovènètavanapaename bajarapalivaisi.

² Panevajènaeyabelia itsa pajumecovènètavanapaename bajarapalivaisi, nexata pibisiacuene paneexanaeconivecua Dioso pacacapanepaena. Matacabi apo pevereverecaejava paxainaname. Itsiata baitsi jane copiaya panejamatabèthètojavavetsina itsa apo pajumecovènètsimè tsane bajarapalivaisi, nexata Dioso apo pacacapanepae tsane.

³ Copiaya baja cajena pacatsipaebatsi palivaisi vajatuxanenè copiaya netsipaeba. Pacatsipaebatsi baja cajena Cristo vajanacasivatèpaejava pibisiacuene vajaexanaecononi yabara. Cristo baja cajena nacasivatèpa pacuenia Dioso pejumelivaisibaxutota tajèvelia jumaitsi.

⁴ Nexata Cristo petèpaenè pemèthètsicujinaetsi, acueyabi matakabita, icatsia Dioso asaēyaexanatsi. Bajarapacuenia Cristo Dioso icatsia asaēyaexanatsi pacuenia baja cajena tajèvelia Dioso pejumelivaisibaxutota jumaitsi Cristo yabara.

⁵ Nexata Cristo Dioso piasaēyaexanaecujinaetsi, copiaya Pedrojavabelia tsitanaitajèta. Bajaraxuacujinae Jesús pijajivi, doce ponèbeje apóstolevijavabelia, tsitanaitajèta.

⁶ Bajaraxuacujinae Jesús pijajivi quinientos pematatsènèa pajivibejevavabelia penacaetuatsijavata, tsitanaitajèta. Bajarapamonaeyajuvènèvimi Jesús petaevitsi itsamonae baja tèpae ata, itsiata ayaibitsaètòxaneto abaxè asaè tsavanapae.

⁷ Bajaraxuacujinae icatsia Santiagojavabelia Jesús tsitanaitajèta. Bajaraxuacujinae icatsia daxita apóstolevijavabelia Jesús tsitanaitajèta.

⁸ Xanè daxita apóstolevivecua bexèjavaberena apóstolenènè nexana. Nexata pacuenia pexi pexinaejivi cotocaevi pexinaenacueto itsi, bajarapacuenia nataniji bajarapamonaevetua. Itsiata baitsi jane daxita Jesús pijajivijavabelia petsitanaitajètsicujinae, xanèjavaberena ata Jesús netsitanaitajèta tavaenexa.

⁹ Daxita apóstolevivecua xanè beveliajamatabècuenenènè nataniji. Tsipaji abaxè xanè Jesús itsa apo jumecovènètsinè, Jesús pijajivi bejiobiaexanabiabajè. Bajaraxuata: “Apóstolenè,” tanejainexa ata, auranè tsabiabi.

10 Itsiata baiſi jane Dioso taneitaxutotſoniataexae, nitapeta baja apóstolenēnēxanē. Xanējavaberena Dioso taneitaxutotſoniataejava, apo nacueratsi. Biji rajane xanē daxita itsaapóstolevi matatoxenetsia bitso Dioso tonacuenebaponaponajē. Itsiata xanē tajamatabēcuenesaēta apo tonacuenebaponaponanē. Dioso raja pesaēta tonacuenebaponaponajē. Nexata Dioso pesaēta nejamatabēcueneyavenonapona asaēya tatonacuenebaponaponanēna.

11 Xanē meta bitso Dioso tonacuenebaponaponajē itsamonae apóstolevi matatoxenetsia. Itsa jume, nexata meta bajarapamonae bitso Dioso tonacuenebavanapa xanē matatoxenetsia. Itsiata baiſi jane bajarapacueneyabara apo canaējētſinē. Bitso rajane pacatojitsipatsi paneyapētaenēna pali-vaiſi baja pacatsipaebatsi, pexanialivaiſi, Jesucristo pelivaiſi. Nexata baja bajarapalivaiſi pajumecovēnētavanapame.

Pacuenia itsamatacabi Dioso icatsia asaēyaexanaejitsia petēpaevimi yabara pelivaiſi

12 Pacatsipaebatsi baja cajena Cristo petēpaecujinae Dioso icatsia pi-asaēyaexanaejavatsi. Itsiata baiſi jane itsamonae paxamēyajuvēnēvi ja-matabēcuenenavēxaniabiaya jumai tsabiabi: “Jivi rabaja petēpaecujinae ajibi icatsia piasaējavanēna,” jai tsabiabi. Nexata bajarapacuenia apo bejumaitſi bajarapamonae.

13 Tſipaji peneta itsa pepacuene ajibi tſipae petēpaevi icatsia piasaējavanēna, nexata baja Cristo ata icatsia Dioso apo asaēyaexanaeſi tſipae petēpaecujinae.

14 Itsa baja Cristo petēpaecujinae icatsia Dioso apo asaēyaexanaeſi tſi-pae, nexata palivaiſianē pacatsipaebavanapatsi, amatamobi tſipae. Pax-amē ata panenajamatabēcuenecopatsijava Cristojavabelia Dioso papecaca-panepaenēna panijaneconivecua, amatamobi tſipae.

15 Pematatsēnēa xua Dioso exana patavajunupaebijava, pana-jumetsēnētſipajē. Tſipaji pajumaitſinē tsabiabi mapacueniaje: “Cristo raja petēpaecujinae Dioso baja icatsia asaēyaexanaeſi,” pajanē tsabiabi. Itsa pepacuene ajibi tſipae petēpaevi icatsia piasaējavanēna, nexata baja Cristo Dioso icatsia apo asaēyaexanaeſi tſipae.

16 Itsa peneta pepacuene ajibi tſipae petēpaevi icatsia piasaējavanēna, nex-ata Cristo ata petēpaecujinae icatsia Dioso baja apo asaēyaexanaeſi tſipae.

17 Nexata Cristo petēpaecujinae Dioso baja icatsia itsa apo asaēyaexanaeſi tſipae, nexata paxamē ata panenajamatabēcuenecopatsijava Cristojavabelia Dioso papecapanepaenēna panijaneconivecua, panacueratsipame baja. Tſiteca abaxē panijaneconi paxinaejitsipame.

18 Bajarapacuenia itsa itsipae, nexata baja pamonaemi tēpa Cristo pepua pejumecovēnētſivi, bajarapamonaemi ata naxuabijitsipa baja.

19 Vaxaitsi ata pijinia Cristojavabelia vajanajamatabēcuene copatsicujinae, xua Dioso nacayavenonabiaba, saya nacayavenonaejitsipa vajajinavanapaeepatojebi mapanacuataje. Vajatēpaecujinae, Cristo pejamatabēcueneta Dioso itsa apo nacacapanepaejitsia tſipae va-janeconivecua, vajajamatabēcuenenavēxaniabivi baja tſipae. Tſipaji vaxaitsi jamatabējumaitſi tsabiabi mapacueniaje: “Cristo pejamatabēcueneta Dioso nacacapanepaena,” jamatabējaitſi tsabiabi. Nexata ayaiacuenia Dioso vajatonacuenebabiabijava ata, nacueratsipatsi. Matacabi apo peverevereaejava Dioso vajanacarajutsinēna vajeavetavanapaejava

ata, nacueratsipatsi. Caranata meta jitsipaejitsipatsi Dioso apo pejumecovênëtsivi vajanacaitaxutobejiobiataenexa.

²⁰ Itsiata baitsi jane mapalivaisije xaniajai cajena. Tshipaji baja Cristo petêpaecujinae, capanepaeya baja icatsia Dioso asaëyaexanatsi. Nexata pacuenia Cristo petêpaecujinae mêtêvecua pitsapa, bajara pijinia pacuenia itsamatacabi mêtêvecua pitsapaena daxita pamonaemi têpa Dioso pepua pejumecovênëtsivi. Nexata baja Cristo petêpaecujinae, mêtêvecua itsa pitsapa, daxita petêpaevivecua Cristo baja namataxainaeya pitsapa mêtêvecua.

²¹ Caenë Adânpijinë pejamatabëcueneta taxuxuaba jivi petêpaejava manacuataje pibisiacue ne pexanaexae. Bajara pijinia pacuenia caenë Cristo pejamatabëcueneta vajanacasivatêpaexae cruzata, taxuxuaba petêpaevimi itsamatacabi mêtêvecua pepitsapaejavanexa.

²² Daxitajivi têpaponâ Adânpijinë petaxuxuabicuenia. Bajara pijinia pacuenia daxita pamonaemi Cristo pijajivi, petêpaecujinae icatsia Dioso asaëyaexanaenatsi pacuenia Cristo Dioso asaëyaexanatsi.

²³ Paepatota Dioso jitsipa petêpaevi piasaëyaexanaenexa, caejivi canacujitsia asaëyaexanaponaena. Cristo baja petêpaecujinae, Dioso itsa asaëyaexanatsi, daxita petêpaevivecua namataxainaeya baja asaëyaexanatsi. Bajaraxuacujinae icatsia pamatacabi Cristo patsianica, daxita pamonaemi Cristo pijajivi, Dioso icatsia asaëyaexanaenatsi.

²⁴ Bajaraxuacujinae jane baja daxitacue ne pecopiarucaeyaexanaejavanexa, copiapatiana. Bajarapamatacabi Cristo copiarucaeyaexanaena daxita xua Cristo pijavajabitsaë evetavanapa. Nexata bajaraxua Cristo pecopiarucaeyaexanaecujinae, xua paxa Dioso tocopatatsi Cristo pevetsinexa, bajaraxua tocanaviatsiana baja paxa Dioso javabelia.

²⁵ Cristo evetaponaponaena daxitacue ne. Matapania Dioso cuenea-moneyabiana daxita Cristo pijavajabitsaë, Cristo copatsiana daxitacue ne pevetsijava.

²⁶ Daxita Cristo pijavajabitsaë verebiabiana. Bajaraxuacujinae cotocaevi copiarucaeyaexanaena jivi petêpaecuenemi.

²⁷ Dioso pejumelivaisibaxutota tajêvelia jumaitsi mapacueniaje: “Dioso itsamatacabi pexênato Cristo tocopatsiana daxitacue ne viria petoevetsinexatsi,” jai Dioso pejumelivaisibaxutota. Itsiata baitsi jane Dioso pexênatojavabelia apo jumaitsi: “Xanë ata nitorobianame,” apo jai Dioso. Dioso raja itorobiana pexênato petoevetsinexatsi daxitacue ne viria.

²⁸ Nexata itsamatacabi Cristo daxitacue ne viria itsa evetsiana, daxitacue ne viria Cristo pitorobicuenia jumecovênëtabi abianatsi. Nexata jane baja bajarapamatacabi Cristo jumecovênëtsiana paxa Dioso pitorobicueniatsi. Bajarapacuenia Cristo paxa Dioso pejumecovênëtsixae tsane, nexata bajarapamatacabi Dioso daxitanacuanêjava daxitacue ne viria pitorobinê tsane.

²⁹ Itsamonae pepua penabautisabivi baja, pijamonaemi totêpatsi. Pijamonaemi ata baja pepuanajamatabëcuenecopabi Cristojavabelia, totêpatsi. Itsiata baitsi jane bajarapamonaemi têpa nabautisabinejeva. Nexata pajivi pijamonaemi totêpatsi, bajarapajivi penabautisabijivi ata baja, pijamonaemi pevênamoto icatsia nabautisaba. Bajarapacuenia anijatobeje nabautisaba pevecatêpaejivitsi bepenabautisabijivi petotaenexatsi Dioso. Petêpaevimi peneta icatsia Dioso itsa apo asaëyaexanaetsijitsia tsipae, penabautisabijivi baja pijamonaemi pevênamoto icatsia apo nabautisabi tsipae, nabautisabinejeva pevecatêpaejivitsi bepenabautisabijivi petotaenexatsi Dioso.

³⁰ Petêpaevimi peneta icatsia Dioso itsa apo asaëyaexanaejitsiatsi tsipae, nexata Dioso pejumelivaisi apo patsipaebavanapænê tsipae, daxitamatacabi

panetsiyayi tsabiabi ata.

³¹ Tajamonae, daxitamatacabi baja cajena netsiyayi tsabiabi. Itsamonae picani jamatabēnebeyaxuababiaba. Bajaraxua paneyapētaenexa, pacatsipae-batsi. Tspiji pacasivajamatabēcuenebarēyatsi vajatuxanenē Jesucristo xaniavaetsia panejumecovēnētavanapaexae.

³² Majotaje Efeso tomarapijivi ata jamatabēnebeyaxuaba picani. Bajarapamonae benevēthējamatabēcuenevi. Tsiquirijavayota vecuapanepajē. Jivi petēpaecujinae icatsia Dioso ita apo asaēyaexanaejitsiatsi tspiae, nexata xanē ata nacueratsipajē. Nacueratsipajē, netsiyayi ata, jivi tatsipae-baponaejava Dioso pejumelivaisi. Vajatēpaecujinae icatsia Dioso ita apo nacaasaēyaexanaejitsia tspiae, nexata xaniavaetsia jumecovēnētsipatsi pamonae jamatabēcuenenavēxaniabiaya nacatsipaeba mapacuenia pejumaitsilivaisije: “Ayaijavanē vajaxaejava xaejabiabianatsi. Aitajibitsinua tsabiabi tsane vajabarēyatsabiabinexa. Tspiji raja bepjiia tēpaenatsi,” pejailivaisi vajanacatsipaebivi jumecovēnētsipatsi.

³³ Itsiata baitsi jane pētsa panacopatame papecayamaxēitojorobinexa bajarapacuenia pejumaitsiivi. Tspiji raja itsamonae bajumaitsi: “Ita yjavaponaponaejitsipame pibisijamatabēcuenevi, cajamatabēcuenebijianaejitsipa. Nexata pexaniajamatabēcuenenē atamē, bajarapamonae cuenejēpaeya ponaponaejitsipame,” bajai itsamonae.

³⁴ Panajamatabēxainare xaniavaetsia. Pētsa baja pematatsēnēa pibisiacuene paexaname. Itsamonae paxamēyajuvēnēvi Dioso apo yapētae. Mapacuenia pacajumaitsijsije paneauranexa.

Pacuenia petēpaevimi Dioso icatsia ita asaēyaexanatsi, perabēitothianaejitsiatsi yabara pelivaisi

³⁵ Itsamonae raeta yanijobiana petēpaevimi icatsia Dioso piasaēyaexanaejavanexatsi yabara. Jumaitsi meta tsane bajarapamonae: “¿Detsa meta pacuenia petēpaevimi icatsia asaēyaexanaenatsi? ¿Detsa meta nexata pitsiperabēto icatsia xainaena bajarapamonae?” jai meta tsane bajarapamonae.

³⁶ Bajarapacuenia ita yanijobiana, apo canaējētsinejeva jamatabēcuenenavēxaniabiaya bajarapacuenia yanijobiana. Vajaubijava, pexuto ita ubatsi, pejuvicujinae bajarapaxutomi batsabana pepitsapaenexa pejananae.

³⁷ Arrozxuto, itsavirixutoxi ata, pexu saya ubatsi. Apo mēthēcaetsi pepabotonē.

³⁸ Peubixu, caevirixu canacujitsia, peubicujinae capitsapapona pijaviriabotonē, pijaviriabaxu yajava. Dioso baja cajena pecopatsicuenia caeviriaboto canacujitsia naexanapona.

³⁹ Mapanacuata Dioso copatsi ata daxitacueneviria pejinavanapaenexa, itsiata apo naperabējēpae. Jivi saicaya itsaviriaperabēto xaina. Unupijidujui pijinia saicaya itsaviriaperabēto xaina. Pepunaevi pijinia saicaya itsaviriaperabēto xaina. Menepijidujui pijinia saicaya itsaviriaperabēto xaina.

⁴⁰ Bajara pijinia itsi athēbētatsia pejinavanapaevi ata. Bajarapamonae saicaya itsaviriaperabēto xaina mapanacuapijivivecuaje. Athēbētatsia pejinavanapaevi nacavecuapexaniaperabētovi. Mapanacuata pejinavanapaevi ata, itsamonae nacatsitapexaniaperabētovi picani. Itsiata pijinia saicayacuena.

41 Matabipijjuameto itayota. Meravipijjuameto ata itayota. Itsiata saicayacuenia navecuaitayotabeje. Tulupu ata pijinia itayota. Itsiata caelutulupo canacujitsia saicayacuenia navecuaitayotapona.

42 Bajara pijinia nacavecuaitane petêpaevimi. Saicayaperabêto nacavecuaxainaena Dioso icatsia itsa asaëyaexanaenatsi. Petêpaejivi irabelia mëthêtatsi. Nexata baja tsabana. Bajaraxuacujinae Dioso icatsia itsa asaëyaexanaenatsi, apo petsabanaeperabêtonexa jane baja xainaena.

43 Petêpaejivi mëthêtatsi vajaataejitsibiperabêto yajava. Bajaraxuacujinae Dioso icatsia itsa asaëyaexanaenatsi, pexaniapenivenivenaeperabêto jane baja xainaena. Petêpaejivi mëthêtatsi pecuernaeperabêtomî yajava. Bajaraxuacujinae Dioso icatsia itsa asaëyaexanaenatsi, daxita matabijavabelianexa jane baja pesaë pexainaeperabêto xainaena.

44 Petêpaejivi mëthêtatsi mapanacuapijiperabêto yajava. Bajaraxuacujinae Dioso icatsia itsa asaëyaexanaenatsi, athêbênacuapijiperabêto xainaena. Itsaviriaperabêto abaxê aeconoxae xainatsi mapanacuata vajajinavnapaenexa. Bajara icatsia pacuenia itsamatabi itsaviriaperabêto xainaenatsi athêbênacuataitsa vajajinavnapaenexa.

45 Dioso pejumelivaisibaxutota jumaitsi mapacueniaje: “Adânpijinê copiaya Dioso exanatsi mapanacuataje. Bajaraponê Dioso exanatsi pecuernaeperabêto yajava peponaponaenexa mapanacuataje,” jai Dioso pejumelivaisibaxutota. Itsiata baitsi jane Adânpijinê matatoxenetsia Cristo bitso ayaijamatabêcuenenê. Nexata Cristo petêpaeacujinae icatsia Dioso itsa asaëyaexanatsi, caëjêpatsi vajanacajamatabê cuenacasaëyaexanaenexa Diosojavabelia. Caëjêpatsinua vajanacarajutsinexa matabasi apo peverevereaejava.

46 Pacuenia athêbênacuapijivi perabêitsi, abaxê copiaya apo perabêitsi. Biji rajane pacuenia mapanacuapijivi perabêitsije, bajaraperabêitsi. Itsiata baitsi jane vajatêpaeacujinae Dioso icatsia itsa nacaasaëyaexanaena, pacuenia athêbênacuapijivi perabêitsi, bajara vaxaitsi ata perabêitsi tsanetsi.

47 Adânpijinê copiaya Dioso exanatsi mapanacuataje. Atsabenota exanatsi. Bajaraxuacujinae hexêajavabelia athêbêvetsica Cristo patsica, ponê vajatuxanenê. Bajaraponê saicaya athêbêvetsica pepatsinë.

48 Daxitatsi vaxaitsi, mapanacuapijivitsije, perabêjêpatsi Adânpijinê, atsabenota pexanaenêtsi. Itsiata baitsi jane itsamatabi daxitatsi, Cristo vajajumecovênêtsivi, perabêjêpaenatsi Cristo. Nexata pacuenia athêbênacuapijivi perabêitsi, bajaraperabêitsi tsanetsi Cristo vajajumecovênêtsivi.

49 Aeconoxae abaxê perabêjêpatsi Adânpijinê, ponê atsabenota pexanaenêtsi. Bajara icatsia pacuenia itsamatabi Cristo perabêjêpaenatsi, ponê athêbêvetsica pepatsinë.

50 Tajamonae, jitsipajê patacatsipaebinxaxa mapacuenieje. Acuenebi caejivi ata mapanacuapijivije mapanacuapijiperabêto yajava pejonenexa Dioso pijanacuayabetsia. Tsipaji vajaperabêto saya peverevereaejavanaxa. Bajaraxuata acuenebi vajayavajinavnapaenexa bajaraperabêto daxita matabijavabelianexa.

51 Nexata panamuxunaevere mapalivaisije, Dioso bajayata muetsia pexainabuatsilivaisimi, palivaisi aeconoxae Dioso nacayapêtaeyaexanapona. Daxitatsi raja vaxaitsi Cristo icatsia pepatsimatabinexatsica pevajênaeya, apo têpaetsi tsane. Itsiata baitsi jane apo têpae atatsi tsane, pamatabi Cristo patsianica, daxitatsi nacaperabêithianaena Dioso.

⁵² Itsa najumetsiana cotocaevi piobijava trompeta, bepijiayo tsatabi tsane, paepatoyovajëto banaitsaquetajarabatsi, bajarapaepatoyovajëto Dioso nacaperabëitothianajonena.

⁵³ Vajaperabëto raja pevereverecaejavanexa. Bajaraxuata xanepana vajanacaperabëitothianaenexa, apo pevereverecaeperabëto vajaxainaenexa.

⁵⁴ Nexata paepatota bajarapacuenia nacaperabëitothianajonena, copiajopaena jane baja pacuenia Dioso pejumelivaisibaxutota tajëvelia jumaitsi. Dioso baja cajena pejumelivaisibaxutota tajëvelia jumaitsi mapacueniaje: “Jivi petëpaecuenemi itsamatacabi copiarucaena. Piniicuenia Dioso copiarucaeyaexanaena jivi petëpaecuenemi.

⁵⁵ Jivi petëpaeyaexanaecuenemi ajibi tsane pesaë vajanacaavita-niaexanaeyaniva. Ajibi tsane vajanacatëpaeyaexanaecuenemi,” jai tajëvelia Dioso pejumelivaisibaxutota jivi petëpaeyaexanaecuenemi Dioso pecopiarucaeyaexanaejavanexa yabara.

⁵⁶ Pibisiacuene vajaexanaeneconi yabara tëpaenatsi. Palivaisi bajayata Dioso Moiséspijinëta najumecopata, bajarapalivaisi pejamatabëcueneta yapëtanetsi vajatëpaecujinae Diosovecua picani vajanaxuabijavanexa pibisiacuene itsa exanatsi.

⁵⁷ Itsiata baitsi jane baja vajatëpaecujinae Diosovecua apo naxuabitsi tsane. Tshipaji baja vajatuxanenë Jesucristo nacasivatëpa cruzata vajanacapanepaenexa vaneconivecua. Bajaraxuata vaxaitsi Diosojavabelia jumaitsi tsabiabi mapacueniaje: “Pexaniacuene rabaja panetoxaname,” jaitsi tsabiabi.

⁵⁸ Tajamonae, bitso patacaasivavi. Payapëtaneme rabaja mapacuenije. Dioso panetonacuenëbijava, apo panacueratsimë tsane. Bajaraxuata panevajënaeyabelia asaëya patonacuenebavanapare Dioso. Pëtsa pacopabame Dioso panejumecovënëtsijava. Panevajënaeyabelia asaëya Dioso panetonacuenebaponare.

16

Pacuenia Pablo itoroba Corinto tomarapijivi ofrenda pexanaenexa Jerusalén tomarata Dioso pejumecovënëtavanapaevi petoitorobinexa yabara pelivaisi

¹ Pacatsipaebijitsiatsi pacuenia pacaetuatsijitsiamë ofrenda panetoitorobinexa Jerusalén tomarata Dioso pejumecovënëtavanapaevijavabelia bajarapacuenia paneyavenonaenexa. Pacuenia Galacia nacuata Dioso pejumecovënëtsivi, caebitsaëto canacujitsia, itorobajë ofrenda pecaetuataponaenexa, bajara pijinia pacuenia paxamë ata pacaetuataponaename ofrenda.

² Pacaejivimë canacujitsia, caesemana canacujitsia panenacanabipalatayajuvënëjjava, ofrendanexa saicaya patsataponaename caedomingo canacujitsia. Pajivi tsiquirijavayo nacanaba, tsiquirijavayo pijinia saicaya tsatsiana. Pajivi ayaijjava nacanaba, ayaijavayo pijinia saicaya tsatsiana. Bajarapacuenia paxaniavaetaponaename palata. Nexata pamatacabi paxamëjavabelia patsianajë, palata ofrendanexa apo pacaetuataponaemë tsane.

³ Nexata pamatacabi paxamëjavabelia patsianajë, paitapetsianame bajarapapalata pecaponaevinexa Jerusalén tomarapijivijavabelia. Pamonaepalata pecaponaevinexa, tsicobeyaquinaenajë cuyalato. Bajarapacuyalato

bajarapamonae peyajavacaponae naxa, panecaetuatsiofrenda itsa tocaponaena Jerusalén tomarata Dioso pejumecovênêtsivijavabelia. Nexata bajarapapalata pecaponaevi, Jerusalén tomarapijivi yapêtaenatsi xaniavaetsia Dioso pejumecovênêtsivicuene, peyajavacaponae xae tsane tatsicobeyaquinaebaxuto.

⁴ Xanê ata itsa jitsipaenajê taponae naxa, ponaenajê Jerusalén tomarabelia. Nexata meta bajarapamonae naponae tapêta.

Pacuenia Pablo tajêvelia navajunupaeba pacuenia exanaejitsia yabara pelivaisi

⁵ Itsa ponaenajê paxamêjavabelia, tapatsivajênaeya paxamêjavabelia, copiaya pataponae naxa Macedonia nacuajava. Bajaraxuacujinae jane baja patsianajê paxamêjavabelia, Corinto tomarata.

⁶ Ponaponae naxa meta paxamêjavata bajayajebi. Daxita emarapaejebi ata meta naponae naxa paxamêjavata. Nexata bajaraxuacujinae paneyavenonaename tajanamutonexa, itsabelia jitsipajê taponae naxa icatsia.

⁷ Caepatoyo saya tanaponae naxa paxamêjavata, apo jitsipaenê. Biji rajane jitsipajê bajayajebi taponae naxa paxamêjavata pacuenia vajatuxanenê netojitsipa.

⁸ Itsiata baitsi jane abaxê aeconoxae ponae naxa majotaje Efeso tomarata. Pentecostêsvênê fiestacujinae meta, matapania vecuaponae naxa Efesotomara.

⁹ Majotaje aeconoxae baja bitso xanepana tatsipaebine xaxa Dioso pejumelivaisi. Tspaji mapatomarapijivije bitso baja jitsipapona pejumetaenaxa Dioso pejumelivaisi. Itsiata baitsi jane itsamonaeye ayabitsaêto apo jitsipae. Nexata tatsipaebilivaisi pejumecovênêtsivi, jamatabêcopabiaexanaponatsi.

¹⁰ Timoteo itsa patsiana paxamêjavabelia, pacopiapitsianame xaniavaetsia jamatabêcuenebarêyaya peponae naxa paxamêjavata. Bajarapacuenia xaniavaetsia pacopiapitsianame. Tspaji pacuenia xanê vajatuxanenê pejamatabêcuene tonacuenabaponae naxa, bajara pijinia pacuenia bajaraponê ata vajatuxanenê pejamatabêcuene tonacuenabaponae naxa.

¹¹ Bajaraxuata pêtisa itsajivi ata pacopatame pequenetsiataenexatsi. Biji rajane payavenonaename pijanamutonexa jamatabêcuene xanepanaeya pepatsinexa xanêjavaberena. Xanê, itsamonaeye yajava, vajênaevetaponae naxa Timoteo pepatsinexarena xanêjavaberena.

¹² Vajabanenê Apolos pelivaisi pacatsipaebijitsiatsi. Bajaraponê picani itorobajê itsamonaeye Dioso pejumecovênêtsivi pepêta penaponae naxa paxamêjavabelia papecataenaxa. Itsiata baitsi jane aeconoxae abaxê apo jamatabêponae. Ponaena meta itsiata itsajota cuenecaêjêpatsi.

Pacuenia Pablo jamatabênajina Corinto tomarapijivi yabara pelivaisi

¹³ Dovathi pejamatabêcuene yaniva, jamatabêcuene naecotsiaya pajinavapare. Pajamatabêcuene saêmêre tsavanapae Jesucristojavabelia panenajamatabêcuene copatsi java. Pêtisa jamatabêcuene aitejepaebiaya pajinavapame. Pajamatabêcuene aitsacamêre tsavanapae pebicuenia. Itsamonaeye patsitaa-jamatabêcuene saêmêre tsavanapae.

¹⁴ Daxita xua paexanavapame, itsamonaeye ata asivaya paexanavapare.

¹⁵ Tajamonae, payapëtaneme rabaja mapacueneje. Estéfanas pijabopijivi barëjumecovënëta Jesús pelivaisi. Bajarapamonae daxita pijanacuapijivivecua copiaya jumecovënëta Jesús pelivaisi Acaya nacuata. Nexata bajarapamonae jamatabëcueneenabiabatsi ëDioso pijacuene. Bajaraxuata bajarapamonae asaëyata bitso yavenonabiaba itsamonae Dioso pejumecovënëtsivi.

¹⁶ Pacatojitsipatsi xaniavaetsia panejumecovënëtsinexa xua pacaitoroba bajarapitsivi. Bajarapitsivi peyajavanacuenebivi ata, xua pacaitoroba, pejumecovënëtsianame.

¹⁷ Paxamëyajuvënëvi parena xanëjavaberena mapamatabëxëyoje. Estéfanas, Fortunato, Acaico, bajarapamatabëxëyo parena. Bajaraxuata sivajamatabëcuenebarëyanë. Bitso picani pacaitaxanabiabatsi. Itsiata baitsi jane bajarapamonae tanetopatsixaerena, neyavenonabiaba pacuenia paxamë itsa papatsiparemena, paneyavenonaejitsipame.

¹⁸ Nexata bajarapamonae itaxutuanajamatabëcuenesaëtajë. Paxamë ata bajarapamonae pacajamatabëcuenesaëyaexanaena icatsia itsa naviabiana paxamëjavabelia. Bajarapitsivi bepayaivaname.

¹⁹ Caebitsaëto canacujitsia Dioso pejumecovënëtsivi, Asiavënë nacuapijivi, pacabajacobalia. Aquila pijava, Prisca, pacabajacobalia. Aquila ata pacabajacobalia. Daxita Dioso pejumecovënëtsivi, pamonae nacaetuatabiaba bajarapajivibeje pijabota, bajarapamonae ata, daxita pacabajacobalia vajatuxanenë pevënëta.

²⁰ Daxita Dioso pejumecovënëtsivi, majotaje pejinavanapaevi, pacabajacobalia. Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare.

²¹ Xanë Pablonë, tajacuata tacobeta pacatoyaquinatsi mapacotocaevilivaisiyoje. Apo itorobinë taneyavenonabiabinë tanetoyaquinaenexa. Bitso pacabajacobatsi.

²² Pajivi apo jitsipae vajatuxanenë Jesucristo, bajarapajivi Dioso navecuaxuabianatsi. ¡Vajatuxanenë raja naxanitsiayo patsianica!

²³ Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

²⁴ Daxita paxamë asivaya pacajamatabënajinatsi caenë Jesucristo pijajivix-aetsi.

Mapabaxutoje San Pablo cotocaevi toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi tatsipaebinexa pexanialivaisi. Vajabananë Timoteo xanëjavata ponapona. Nexata pacatoyaguinatsibeje mapalivaisije Dioso panejumecovënëtsivi, paCorinto tomarapijivimë. Patoyaquinajëbejenua mapalivaisije Acaya nacujava pejinavanapaevi ata.

² Pacatovajëtatsi vaxa Diosojavabelia, vajatuxanenë Jesucristojavabelia ata, papecaifaxutotsoniataenexa jamatabëcuenexanepanaeya panejinavana-paenexa.

Pacuenia Pablo navajunupaeba itsamonae pebejiobiaexanaejavatsi yabara pelivaisi

³ “Ayaicuenia panejamatabëcueneyavenoname,” pajanë vaxa Diosojavabelia. Bajaraponë Dioso, vajatuxanenë Jesucristo paxa. Dioso, vajanacaitaxutotsoniataenë, vajanacajamatabëcuenebabatsinë bitso vajanajamatabëxainaeayaniva.

⁴ Pamatacabi panetocopiapatabiaba daxita xua bitso panenajamatabëxainaeaya exanaejitsia, itsiata Dioso panejamatabëcuenebabatabiaba bajaraxuavecua. Bajara pijinia pacuenia paxanë ata panejamatabëcuenecaëjêpa itsamonae juya patajamatabëcuenebabatsinexa pamatacabi bajarapamonae ata tocopiapatatsi xua bitso najamatabëxainaeaya exanaejitsiatsi.

⁵ Itsamonae bitso panebejiobiaexanabiaba Jesucristo patajumecovënëtsixae. Nexata pijinia Jesucristo pejamatabëcueneta Espíritu Santo panejamatabëcuenebabatabiaba bitso patanajamatabëxainaeayaniva.

⁶ Nexata paxanë itsamonae itsa panebejiobiaexanabiaba, Dioso panejamatabëcueneyavenonabiaba patanejamatabëcuenebabatsinexa. Nexata paxanë ata panejamatabëcuenecaëjêpaena juya itsamatacabi paxamë patacajamatabëcuenebabatsinexa itsa pacatocopiapata xua bitso pacanajamatabëxainaeaya exanaejitsia. Nexata itsa pacajamatabëcuenebabatsianatsi, bajayajebi pajamatabëcuenesaëmë tsane Dioso panejumecovënëtsijava matapania Dioso papecacapanepaejavabelianexa. Paxamë ata raja itsamonae pacabejiobiaexanabiabiana.

⁷ Payapëtaniji baja cajena paxamë ata Dioso papecacapanepaejavanaxa. Pacuenia paxanë itsamonae panebejiobiaexanabiaba, bajarapacuenia paxamë ata itsamonae pacabejiobiaexanabiabiana. Nexata paxamë ata itsamonae itsa pacabejiobiaexanabiabiana, Dioso pacajamatabëcuenebabatabiabiana panevajënaeyabelia panejamatabëcuenesaënexa Dioso panejumecovënëtsijava. Bajarapacuenia Dioso pacajamatabëcuenebabatabiabiana matapania Dioso papecacapanepaejavabelianexa.

⁸ Tajamonae, pajitsipajë paxamë ata paneypëtaenexa itsamonae Asiavënë nacuata patanebejiobiaexanabiabijava. Ayaicuenia bitso panebejiobiaexanabiaba. Nexata baja picani pasaëjibinë tsaponae. Apo panecaëjêpae

baja picani patavajënaeyabelia pataponaenexa. Nexata pajamatabëjumaitsinë tsabiabi: “Patëpaenajë meta baja rovia,” pajamatabëjanë tsabiabi.

⁹ “Pepacuene raeta baja panebeyejebiana,” pajamatabëjanë tsabiabi. Dioso baja cajena panetocopata bajarapacuenia itsamona patanebejiobiaexanabiabinexa. Nexata paepatota panebejiobiaexana patajamatabëjumaitsinexa mapacueniaje: “Xanë tajacuata apo necaëjêpae tavecuapanepaenexa mapacueneje. Matapania Dioso neyavenonaena, necaëjêpaena tavecuapanepaenexa mapacueneje,” patajamatabëjainexa. Dioso caëjêpatsi pataneyavenonaenexa. Tsipaji baja cajena Dioso pematacotsinë petëpaevi ata.

¹⁰ Dioso baja panecapanepa itsamona patanebejiobiaexanaejavata patanebeyaxuabiyani. Icatsia bajarapacuenia itsamona ita panebejiobiaexanaena, Dioso icatsia panecapanepaena. Bajaraponejavabelia panajamatabëcuenecopatajê bajarapacuenia pataneyavenonabiabinexa.

¹¹ Paneyavenonaeyavajêtaponaname Diosojavabelia bajarapacuenia Dioso pataneyavenonabiabinexa. Paayaibitsaëttoxanetomê ita panetovajêtaponaname Diosojavabelia, nexata Dioso paneyavenonabiabiana. Nexata pijinia jivi ayaibitsaëttoxaneto paxanë yabara jumai tsabiabi tsane Diosojavabelia: “Pexaniacuene bitso toexaname Pablobana. Ayaicuenia yavenoname pebeyebiyani vatsi,” jai tsabiabi tsane.

Pajamatabëcuene yabara Pablo apo ponae Corinto tomarabelia yabara pelivaisi

¹² Itsa pajinavanapajê daxitajivijava, paxamëjava ata, xaniavaetsia pajinavanapajê Dioso pitabarata. Itsa pajinavanapajê paxamëjava, pibisiacuene apo pacasivanajamatabëxainaetsi. Bajaraxuata panasivajamatabëcuenebarëyanë. Paxanë raja saya mapanacuapijilivaisita apo panejamatabëcuene yavenona xaniavaetsia patajinavanapaenexa. Dioso raja patanejamatabëcuene yavenonaexae, bajarapacuenia xaniavaetsia pajinavanapajê.

¹³ Palivaisianë baja pacatoyaquinabiabatsi, caelivaisita anijajamatabëcuene livaisibeje apo xainapona. Palivaisianë pajumetaneme ita palebame patacatoyaquinaelivaisianë, bajarapalivaisianë saya caejamatabëcuene livaisi xainapona. Pematatsënëa itsajamatabëcuene livaisi apo xainapona. Pacatojitsipatsi xaniavaetsia panejumeyapëtaenexa palivaisianë pacatoyaquinatsi.

¹⁴ Pacatojitsipatsi xaniavaetsia patanejamatabëcuene yapëtaenexamê. Tsi-paji abaxê xaniavaetsia apo panejamatabëcuene yapëtaemê pacuenia pajamatabëcuene itsinë tsavanapae. Nexata pamatacabi vajatuxanenë Jesús icatsia patsianica, paxamê panesivajamatabëcuene barëyamê tsane. Bajara pijinia pacuenia paxanë ata pacasivajamatabëcuene barëyatsi tsane.

¹⁵ Nexata xanë pacasivajamatabëcuene jumai tsitsi mapacueniaje: “Corinto tomarapijivi baja cajena xaniavaetsia nejamatabëcuene yapëthane. Yapëthane pacuenia apo sivanajamatabëxainaenë itsajamatabëcuene bajarapamonaejavabelia,” pacasivajamatabëjaiti. Bajaraxuata picani jamatabëpatajê paxamëjavata patanesivajamatabëcuene barëyanexamê ita patajê paxamëjavata.

¹⁶ Pamatacabi ponajê Macedonia nacuayabelia, talianë picani jamatabëpacataeponatsi bajaraxuayo. Bajaraxuacujinae icatsia tanaviatsinërena jamatabëpacataeponatsi picani icatsia bajaraxuayo. “Bajarajota bajarapamonae neyavenonaena tajanamutonexa, Judea nacuayabelia taponaeenexa,” pacasivajamatabëjaiti picani.

17 Pacuenia najamatabëxainabiabajë taponae nexa itsajavabelia, ponabiabajë baja cajena. Itsiata aeconoxae bajarapacuenia apo exanaenë taponae nexa paxamëjavabelia. Mapanacuata itsamonaë najamatabëxainae ata itsacueneyavayo pexanaenexa, itsiata apo exanabiabi. Bajarapacuenia itsiata xanë apo jamatabëcuenesinë. Paxamë baja cajena panecueneyapëtaneme.

18 Dioso ata panecueneyapëtane apo patacayamaxëitojorobicuene. Dioso baja cajena pejumelivaisi pacatsipaebabiabatsi. Nexata icatsia xuacujinaë bajarapalivaisi itsa pacatsipaebabiabatsi, saicayalivaisicuenia icatsia apo pacatsipaebabiabatsi.

19 Xanë Pablonë, Silvano, Timoteo, bajarapamatabëxëyo, pacatsipaebabiabatsi Jesucristo, Dioso pexënato, pelivaisi. Bajaraponë Jesucristo caejamatabëcuene xainabiaba. Nexata pacuenia jumaitsi, xaniajai tsabiabi.

20 Jesús pejamatabëcueneta Dioso baja daxita nacatoexana pacuenia tajëvelia najumecapanepaeya jumaitsi vajanacatoexanaenexa. Bajaraxuata Diosojavabelia vajavajëtsijavata itsa jumaitsi: “Diosomë, bitso ayaijamatabëcuenenëmë,” itsa jaitsi, nexata Jesucristo pejamatabëcueneta jumaitsi.

21 Dioso pacajamatabëcueneyavenonapona panevajënaeyabelia panejamatabëcuenesaënexa Cristojavabelia panenajamatabëcuenecopatsijava. Bajarapacuenia paxanë ata Dioso panejamatabëcueneyavenonapona. Dioso nacaitapeta Jesucristo pijajivnexasi, Dioso pijacuene vajatonacuenebavanapaenexa.

22 Dioso raja Espíritu Santo nacatsijamatabëcaeyaexana. Nexata nayapëtanetsi Dioso pexicuenetsi. Bajaraxuata yapëtanetsi pepacuene xaniajai Dioso vajanacapanepaejavanexa.

23 Mapacuenia pacajumaitsijsije Dioso pitabarata. Dioso baja cajena nejamatabëcueneyapëtane. Pamatacabi picani jamatabëponabiabajë paxamëjavabelia, caecuenia itsa ponaejitsipajë, nexata pacabijataejitsipatsi. Tsipaji abaxë apo paexanavanapaemë patacaitorobicuenia. Bajaraxuata abaxë apo navecuaponanë paxamëjavabelia, itsa pacabijatanetsi, bitso panenajamatabëxainaejanë.

24 Nexata apo jitsipaanë icatsia patacatsipaebaponaenexa paneypëtaenexa pacuenia bëpaexanavanapame. Tsipaji baja xaniavaetsia Dioso pajumecovënëtanapame. Jamatabëpacayavenonatsi. Pacuenia baja pajamatabëcuenebarëyamë tsavanapae, matatoxenetsia icatsia panejamatabëcuenebarëyanexa Dioso pitabarata.

2

1 Najamatabëcopatajë baja taponaejava paxamëjavabelia. Tsipaji jamatabëjumaitsinë paxamë yabara mapacueniaje: “Apo ponanë abaxë tsane Corinto tomarapijivijavabelia tanajamatabëxainaeaxanaeyaniva bajarapamonaë,” jamatabëjanë.

2 Paxamë itsa pajamatabëcuenebarëyamë, nexata xanë ata pacasivajamatabëcuenebarëyatsi tsabiabi. Itsiata itsa pacanajamatabëxainaeaya exanaejitsipatsi, nexata apo pajamatabëcuenebarëyamë tsipae. Nexata xanë ata apo pacasivajamatabëcuenebarëyatsi tsipae. Tsipaji ajibi tsipae patacasivajamatabëcuenebarëyajanexa.

3 Bajaraxuata taponaevajënaeya paxamëjavabelia copiata baja cajena pacatoitorobaliatsi itsabaxuto, patacatoyaquinaebaxuto. Bajarapacuenia pacatoyaquinatsi tsipaji abaxë apo jamatabëponanë paxamëjavabelia patacasivanajamatabëxainaejanë, itsa pacatanetsi

panejinavanapaejava apo patacaitorobicuenia. Jitsipajë picani paxamë patacasivajamatabëcuenebarëyanexa. Paxamë yabara jamatabëjumaitsinë mapacueniaje: “Corinto tomarapijivi baja cajena nejamatabëcueneypëtane. Bajarapamonae itsa jamatabëcuenebarëya, xanë ata bajarapamonae sivajamatabëcuenebarëyanë tsabiabi,” jamatabëjanë.

4 Apo jitsipaeñë picani patacatoyaquinaenexa bajarapabaxuto. Itsi-ata itsa pacatoyaquinatsi, nuajë paxamëjitsia. Najamatabëxainajë cajena bitso tajamatabëëthëtovetsina. Apo pacatoyaquinaetsi raja saya patacana-jamatabëxainaeya exanaenexa. Ayaicuenia raja patacaasivajava patanejamatabëcueneypëtaenexamë, pacatoyaquinatsi.

Pacuenia Pablo itoroba Corinto tomarapijivi barajamatabëcuenexanepanaeya baja petanenexa pibisiacuene pexanaponaponanemi yabara pelivaisi

5 Ponë pibisiacuene exana, caenënë xanë apo nenajamatabëxainaeyaexanae. Daxita paxamë ata bajarapacuenia pacanajamatabëxainaeyaexana.

6 Ponë yabara itsabaxutota pacatoyaquinatsi, paxamë baja cajena namatabëcuenejëpaeya panavecuaitavetame bajaraponë, pibisiacuene pexanaenë, penapatsiyaniya panenacaetuatsijavata. Nexata baja bajaraponë belia copata pibisiacuene pexanaejava. Xanepana rabaja. Pëtsa baja pematsënëa icatsia panavecuaitavetame bajarapacuenia.

7 Aeconoxae baja pajamatabëcuenecaevare bajaraponë pibisiacuene pexanaejava. Pabarajamatabëcuenexanepanare baja. Bajaraponë juya pajamatabëcueneavenonaename piaurayaniva. Bajarapacuenia pajamatabëcueneavenonaename pejamatabëcuene matatoxenetsiyaniivatsi bitso pejamatabëcuenebëjjajava pijaneconi yabara.

8 Bitso pacatojitsipatsi panetsitanajamatabëcueneitajëtsinexa paneasivajava bajaraponë.

9 Nexata pabaxuto copiaya pacatoyaquinatsi, bajarapabaxuto pacatoyaquinatsi saya patacajamatabëcuenejëtsinexa. Jitsipajë xaniavaetsia tayapëtaenexa itsa panejumecovënëtsijitsiamë daxita pacuenia pacaitorobatsi.

10 Nexata baja aeconoxae itsa pajamatabëcuenecaevame papibisiacuene bajaraponë exana paxamë tuatuajëta, xanë ata baja jamatabëcuenecaevajë bajaraponë pibisiacuene pexanaejava. Xanë baja jamatabëcuenecaevajë paneconi bajaraponë exana xanëjavaberena. Jamatabëcuenecaevajë baja bajaraponë pibisiacuene pexanaejava, daxita paxamë aneonijibia jamatabëcuenebarëyaya panejinavanapaenexa Cristo pitabarata.

11 Jamatabëcuenecaevatsi baja papibisiacuene bajaraponë exana vaxaitsi-javaberena. Tsipaji vaxaitsi itsa apo jamatabëcuenecaevitsi tsipae bajarapapibisiacuene pexanaejava, vaxaitsi ata dovathi nacayamaxëitojorobijitsipa. Vaxaitsi baja dovathi cueneypëtanetsi, xua exanabiaba vajanacacopabiaexanaenexa Dioso pejumelivaisi vajajumecovënëtsijava.

Pacuenia bitso Pablo Tito sivanajamatabëxaina yabara pelivaisi

12 Patajopajë Troas tomarata tatsipaebinexa Cristo pelivaisi. Troas tomarata tapatsivajënaeya, taniji Dioso tanetoxanepanaeyaexanaejava tatsipaebinexa pejumelivaisi bajarapatomarata. Nexata Troas tomarata itsa tsipaebabiabajë Dioso pejumelivaisi, Troas tomarapijivi nenamuxunaevetababaxaniavaetsia.

¹³ Itsiata baitsi jane bajarajota abaxë apo jamatabëcuenebarëyanë. Namatabëxainajë vajabananë Tito yabara. Tspijaj abaxë Tito apo caxitarabaxuabinë Troas tomarata. Nexata baja napëjijobajë Troas tomarapijivi taponaaenexa baja Macedonia nacuyabelia.

Pacuenia Cristo nacajamatabëcueneyavenona yabara pelivaisi

¹⁴ “Pexaniacuene rabaja panetoexaname,” pajanë Diosojavabelia, Cristo pejamatabëcueneta Dioso patanejamatabëcuene yavenonabiabixae. Itsajavabelia itsa paponajë, Dioso paneyajavaponabiaba. Panejamatabëcueneyavenonabiaba pacuenia Dioso jitsipa pataexanaenexa. Panejamatabëcueneyavenonabiabanua itsamonaejavabelia xaniavaetsia patatsipaebinxaxa Dioso pejumelivaisi. Pamonaë jumecovënëta bajarapalivaisi, tsitapexanialivaisitsi bitso.

¹⁵ Dioso sivajamatabëcuenebarëyatsi pajivi itsamonaejavabelia tsipaeba Cristo pelivaisi. Paxanë ata Dioso panesivajamatabëcuenebarëya. Tspijaj patsipaebabiabajë Cristo pelivaisi daxitajivijavabelia. Itsamonae baja jumecovënëta pona Cristo pelivaisi Dioso pecapanepaevinexatsi. Itsamonae pijinia apo jumecovënëtsi Cristo pelivaisi Diosovecua penaxuabivinxaxa.

¹⁶ Pamonaë Diosovecua naxuabiana apo pejumecovënëtsixae Cristo pelivaisi, naxuabiana. Pamonaë pijinia Dioso capanepaenatsi pejumecovënëtsixae Cristo pelivaisi, capanepaenatsi. Paxanë, paapóstolevinë, Dioso paneyavenonabiaba. Nexata panejamatabëcuenecajëpa patatsipaebabiabinxaxa pexanialivaisi, Cristo pelivaisi, jivi pecapanepaelivaisinxaxa.

¹⁷ Pacuenia itsamonae tsipaebabiaba Cristo pelivaisi ëpematamotsinxaxa, paxanë apo paitsinë. Biji rajane itsajamatabëcuene ata apo pasivanajamatabëxainaanë jivijavabelia itsa patsipaebabiabajë Cristo pelivaisi. Dioso baja cajena panejamatabëcueneyapëtane. Dioso paneitoroba Cristo pata-tonacuenebinxaxa.

3

Pacuenia Dioso pejanalivaisi najumecapanepaeya jumaitsi jivi pecapanepaenexa yabara pelivaisi

¹ Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinxaxa, paayajamatabëcuenevinë apo panataenë. Itsamonae pata paxamëjavata penajumetsënëtsilivaisi papecatsipaebinxaxa beDioso pejumelivaisicuenia. Bajarapamonaë pacatocapata cuyalato itsamonae petsicobeyaquinaebaxutotsi. Bajarapabaxutota pacatoyaquina: “Dioso raja pejumelivaisi pepaebivi,” pejailivaisi. Bajaraxuata xaniavaetsia pacopiapitame bajarapamonaë. Itsiata baitsi jane paxanë itsa papatajë paxamëjavata, apo pacarajutsitsi itsamonae patanetsicobeyaquinaecuyalato. “Pablo raja apóstolenë,” pejailivaisi itsamonae patanetsicobeyaquinaebaxuto, apo pacarajutsitsi xaniavaetsia patanecopiapitsinxaxamë. Apo panamatavenonaenë paxamë ata cuyalato patanetsicobeyaquinaenexamë patacaponaenexa itsamonaejavabelia bajarapamonaë pataneyapëtaenexa xaniavaetsia patanecopiapitsinxaxa.

² Bajarapacuenia cuyalato apo panamatavenonaenë patacaponaenexa jivi pataneyapëtaenexa xaniavaetsia patanecopiapitsinxaxa. Tspijaj baja jivi yapëtane xaniavaetsia Jesucristo pelivaisi patacatsipaebixaxa panenajamatabëcuene pënëyorotsijava Diosojavabelia pibisiacuene paneexanabiabijavamivecua. Nexata jivi bajarapamonaë yapëtanenua Dioso patanitorobijava.

³ Paxamē xaniavaetsia panejumecovēnētame patacatsipaebilivaisi, Jesucristo pelivaisi. Nexata itsamonae, apo pataneyapētaevi ata, itsa pacavēnēlivaisitane patanejumecovēnētsijavamē, panesivajamatabējumaisi: “Pabloana Corinto tomarapijivi cuyalato apo tsicobeyaquinae atatsi, itsa jume, ibopanata ata apo tsicobeyaquinae atatsi vajayapētaenexa, itsi-ata yapētanetsi Dioso pitorobijavatsi pexaniajailivaisi, Jesucristo pelivaisi, jivi petsipaebavanapaenexa,” panesivajamatabējai. Piasaētsaponaponaeñe baja cajena Espiritu Santo pacatsijamatabēeca. Nexata baja pacajamatabēcuenepeñeyorota pejanajamatabēcuene panexainaenexa. Nexata itsamonae xaniavaetsia itsa patsitajinavanapame, bajarapamonae ata baja pacayapētane Cristo pelivaisi papecatsijamatabēecaejava.

⁴ Paxanē payapētaniji Dioso patanitorobijava pepacuene Cristo pelivaisi jivi patatsipaebavanapaenexa. Tsipaji baja Dioso paneyavenonabiaba Jesucristo pejamatabēcueneta.

⁵ Paxanē patasaēta Dioso patatonacuenebinexa, apo panejamatabēcueneceājēpae. Nexata xua Dioso patoexanavanapajē, Dioso baja cajena paneyavenonabiaba.

⁶ Dioso panejamatabēcuene yavenonabiaba patatsipaebabiabinexa itsamonaejavabelia Dioso najumecapanepaeya pejanalivaisi pejumaisijava jivi peapanepaenexa. Bajarapamonaejavabelia apo pajumaitsinē tsabiabi: “Pajumecovēnētavanapare Dioso Moiséspijinēta penajumecopatsilivaisi. Itsa apo pajumecovēnētsimē tsane, nexata panaxuabianame,” apo pajanē tsabiabi. Biji rajane jivi patsipaebabiabajē pacuenia Espiritu Santo jamatabēcueneasaēyaexanaejitsiatsi. Palivaisi bajayata Dioso Moiséspijinēta najumecopata, itoroba pebeyaxuabinexatsi pajivi apo jumecovēnētsi bajarapalivaisi. Itsiata baitsi jane pajivi jumecovēnēta papejanalivaisi jivi patsipaebabiabajē, Espiritu Santo pesaēta jamatabēcueneasaēyaexanaponatsi.

⁷ Bajayatami Dioso Moiséspijinēta najumecopata. Bajarapalivaisi Dioso yaquina ibopanabejejumata. Bajarapalivaisita Dioso itoroba pajivi apo jumecovēnētsi bajarapalivaisi pebeyaxuabaponaenexatsi. Bajarapacuenia Dioso Moiséspijinēta itsa najumecopata bajarapalivaisi, Moiséspijinē itabarativenivena bitso. Nexata Israelpijinē pemomoxi apo itabaranaēcotsicapanepaetsi. Itsiata baitsi jane bajaraxuacujinae itsamatacabianējavabelia, itabaracotiacae vapona baja.

⁸ Palivaisi bajayata Dioso Moiséspijinēta najumecopata, xanepana baja picani caepatoyonexa saya. Bajarapalivaisimi matatoxenetsia bitso xanepana papejanalivaisi mapamatacabitaje jumecovēnētavanapatsi Dioso vajanacapanepaenexa. Bajarapacuenia Dioso nacacapanepaena Espiritu Santo vajanacatsijamatabēecaexae daxitamatacabijavabelianexa.

⁹ Bajayata Dioso Moiséspijinēta najumecopata. Nexata bajarapalivaisi xanepana. Tsipaji bajarapalivaisi pejamatabēcueneta, jivi yapētane Dioso penaneconitsiaexanaejavanexatsi pibisiacuene pexanaeconi yabara. Itsiata baitsi jane bajarapalivaisimi matatoxenetsia bitso xanepana papejanalivaisi pejamatabēcueneta Dioso nacacapanepaejitsia. Bajarapapejanalivaisi pejamatabēcueneta, Dioso baja aneconijibia nacatane.

¹⁰ Palivaisi bajayata Dioso Moiséspijinēta najumecopata, xanepana baja picani. Itsiata baitsi jane palivaisi Dioso cotocaevi najumecopata, bajarapalivaisi bitso xanepana. Bajaraxuata palivaisimi copiaya Dioso najumecopata Moiséspijinēta, aeconoxae baja nacatsitaajumematamobi.

¹¹ Palivaisi copiaya Dioso Moiséspijinēta najumecopata, xanepana picani caepatoyonexa saya. Biji rajane palivaisi cotocaevi Dioso najumecopata,

bitso xanepana. Tsipaji daxitamatacabijavabelianexa bajarapalivaisi tsitecaena.

¹² Payapëtaniji papejanalivaisi Dioso cotocaevi najumecopata bitso pexanepanaejava. Tsipaji daxitamatacabijavabelianexa apo vereverecae tsane bajarapalivaisi. Bajaraxuata apo pajumejunavabiabinë bajarapalivaisi patatsipaebinexa jivijavabelia. Palivaisivajëto payapëtaniji, patsipaebabiabajë jivijavabelia.

¹³ Bajayata Moiséspijinë yapëtae ata livaisi. itsiata xaniavaetsia apo tsipaebi pijajivijavabelia. Itsiata paxanë bajarapacuenia apo paitsinë. Bajayata Moiséspijinë itsa itabaranivenivena, naitabaraacata papaëbërëpanata. Bajarapacuenia naitabaraacata pijajivi, Israelpijinë pemoxi, pitabarataeyanivatsi bajarapacotia pecaevaponaejava.

¹⁴ Itsiata baitsi jane bajarapamonaejavabelia Moiséspijinë tsipaebi ata, apo jumeyapëtaetsi pajamatabëcuenelivaisi yabara tsipaeba. Bitso ajamatabëcuenetaja bajarapamonaemi. Nexata apo jumeyapëtae palivaisi tsipaebatsi. Bajara pijinia pacuenia ajena mapamatacabijavaberena ataje, tsiteca abaxë ajamatabëcuenetaja bajarapamonae pemoxi ata. Bajarapamonae penacaetuatabiabibota, itsa lebabiaba Dioso Moiséspijinëta penajumecopatsilivaisimi, apo jumeyapëtaeyabiabi pajamatabëcuenelivaisi xaina. Bajarapamonae itsa jumecovënëtsipa Cristo pesivatëpaejavatsi, nexata matapania jumeyapëtaejitsipa pajamatabëcuenelivaisi xaina palivaisi bajayata Moiséspijinë tsipaebabiaba.

¹⁵ Ajena mapamatacabijavaberena ataje, judíovi penacaetuatabiabibota itsa lebabiaba Dioso Moiséspijinëta penajumecopatsilivaisimi, apo jumeyapëtaeyabiabi pajamatabëcuenelivaisi xaina. Bitso ajamatabëcuenetaja bajarapamonae.

¹⁶ Itsiata baitsi jane pajivi najamatabëcuenecopata vajatuxanenë Jesucristojavabelia, bajarapajivi Dioso vecuaajibiaexanatsi pibisiacuene pexanaeconimi. Nexata bajarapajivi xaniavaetsia jumeyapëtanë pajamatabëcuenelivaisi xaina palivaisi bajayata Moiséspijinë tsipaebabiaba.

¹⁷ Vajatuxanenë Jesucristobeje, Espíritu Santobeje, najamatabëcueneyëpabeje. Jesucristo pejamatabëcueneta Espíritu Santo ponapona vajajamatabëëthëtota. Nexata Espíritu Santo nacajamatabëcueneyavenonapona pibisiacuene vajaexanaeyaniva.

¹⁸ Nexata Jesucristo pejamatabëcueneta, Espíritu Santo nacayavenona. Nexata pacuenia Moiséspijinë jivi vecuanaitabaraacata pitabaracotiataeyanivatsi pitabaranivenivenaejava, bajara vaxaitsi apo itsitsi. Biji rajane tsitanacueneitajëtsiaya jinavanapatsi xaniavaetsia jivi peyapëtanexa Dioso ayaijamatabëcuene pexainaejava. Espíritu Santo nacajamatabëcueneyavenonapona vajavajënaeyabelia pejanajamatabëcuene vajaxainaponaenexa. Nexata pacuenia Jesucristo jamatabëcueneitsi, bajara vaxaitsi ata vajajamatabëcueneitsinexa.

4

¹ Dioso baja cajena patanitaxutotsoniataexae, panetocopata patatsipaebabiabinexa jivijavabelia pexanialivaisi, Jesucristo pelivaisi. Bajaraxuata itsajavata panetsiayati tsabiabi ata, itsiata apo pajamatabëcopatsinë patatsipaebabiabijava Jesucristo pelivaisi. Tsipaji baja Dioso panetocopata bajarapacuenia.

² Muetsia apo paexanaenë itsacuenejava ata. Apo paexanaenë daxita xua piauracuene ata. Jivi patayamaxëitojorobinexa, itsacuenejava ata apo paexanaenë. Apo patsipaebabiabinëna saicayalivaisi Dioso pejumelivaisivecua. Dioso baja cajena yapëtane jivijavabelia ëpexaniajailivaisi patatsipaebabiabijava. Patanejumetaeyenaevi ata bajarapacuenia jumai tsipae.

³ Itsa patsipaebabiabajë jivi pecapanepaelivaisinexatsi, jumenapebetsi-aya patsipaebabiabajë xaniavaetsia patanejumeyapëtaenexa. Nexata patsipaebi atanë, pajivi apo jumecovënëtsi bajarapalivaisi, bajarapajivi pijacuata nanaxuabiaexanaena Diosovecua. Nexata bajarapajivi daxitamatacabijavabelianexa, Diosovecua naxuabiana.

⁴ Bajarapacuenia apo jumecovënëtsi tsipaji dovathi pejamatabëcueneta ajamatabëcueneitaquiriayaexanatsi pejumecovënëtsiyaniva bajarapalivaisi. Bajarapapexanialivaisi, Cristo pelivaisi, bepinijicotia jivi pejamatabëcueneitayotsinexa itsa jumecovënëta bajarapalivaisi. Nexata dovathi, mapanacuapijivi pijatuxanenë, apo jitsipae bajarapalivaisi jivi pejumecovënëtsinexa pejamatabëcueneitayotsiyanivatsi. Cristo paxa Dioso jamatabëcuenejëpa. Nexata pacuenia Dioso jamatabëcueneitsi, bajara Cristo ata jamatabëcueneitsi.

⁵ Livaisi itsa pacatsipaebabiabatsi, paxanë apo panalivaisipaebabiabinë pataneyajataenexamë. Biji rajane vajatuxanenë Jesucristo pelivaisi pacatsipaebabiabatsi. Paxanë saya panataniji bepanijajivinë. Jesucristo bitso pajitsipajë. Bajaraxuata paxamë ata jamatabëpacayavenonatsi.

⁶ Bajayata Dioso mapanacuaje itsa exana, pitaquirijavata pitayotsinexa, itoroba juameto penaexanaenexa. Bajara pijinia pacuenia paxanë ata patajamatabëcueneitaquirijavami, Jesucristo pelivaisi itsa pajumecovënëtajë, Dioso panejamatabëcueneitayota. Bajarapacuenia itsa panejamatabëcueneitayota, payapëtaniji Dioso bitso ayajamatabëcuene pexinaejava. Jesucristo itsa itabaranivenivena Dioso pexënatoxae, paxa Dioso jamatabëcueneitajëta Dioso bitso ayajamatabëcuene pexinaejava.

Pacuenia Dioso jamatabëcuenejavona pijajivi, itsa tonacuenebavanapatsi, yabara pelivaisi

⁷ Paxanë Dioso patanejamatabëcueneitayotsivi ata, pataperabëto apo ajamatabësaë. Pacuenia atsavaxi bajayajebi apo ajamatabësaë, bajara saya itsi. Pataperabëto apo paperabësaë atanë, Dioso pataneyavenonaeaxae, pajamatabëcuenesaënë tsavanapae. Nexata bajarapacuenia patajamatabëcuenesaë tsavanapaejava patanetaevi, jamatabëjumai tsane paxanë yabara: “Mapamonaeye ajamatabëcuenesaë tsavanapae Dioso pesaëta,” jamatabëjai tsane.

⁸ Nexata panetocopiapatabiabi ata itsacuene patanetoyapëbejecuene, itsiata Dioso paneyavenonabiaba patavecuapanepaenexa bajarapacuenia. Apo payapëtaeyabiabi atanë pajamatabëcuene yabara panetocopiapata panetotoyapëbejecuene, itsiata paxanë apo pacopatsinë Dioso patajumecovënëtsijava.

⁹ Itsamonae panebejiobiaexanabiabi ata Dioso patajumecovënëtsijava yabara, itsiata Dioso apo panecopatsi patajaepato. Itsamonae irata panepenatabiabi ata patanebeyejebinexa picani, itsiata pepacuene apo panebeyaxuababiabi Dioso pataneyavenonabiabixae.

¹⁰ Pacuenia Jesús pijavajabitsaë bajayajebi picani jamatabëbeyaxuababiabatsi, bajarapacuenia paxanë ata Jesús papijajivixanë, itsamonae jamatabëpanebejebabiaba picani. Itsiata apo panebeyejebicanepae. Bajaraxuata daxita jivi yapëtane Jesús pataneyavenonabiabijava.

11 Daxitamatacabi patajinavanapaematacabianë, panetsiyai tsabiabi itsamonaë patanebeyejebinexa Jesús papijajivixaenë. Bajarapacuenia panetocopiapatabiaba jivi pataneyapëtaenexa Jesús pataneyajavaponaponaejava.

12 Panetsiyai tsabiabi itsamonaë patanebeyejebinexa patacatsipaebabiabixae papecacapanepaelivaisinexa Diosojavabelia. Nexata paxanë patacatsipaebilivaisi panejumecovënëtsixae, itsamatacabi athëbëtsia Dioso pacarajutsiana matacabi apo peverevereceaëjava.

13 Dioso pejumelivaisibaxutota jumaitsi mapacueniaje: “Jumecovënëtajë Dioso taneyavenonaëjavanexa. Bajaraxuata tsipaebajë jivijavabelia Dioso taneyavenonaëjavanexa,” jai. Bajara pijinia pacuenia paxanë ata pamatabëcuenëitsinë. Pajumecovënëtajë Dioso pataneyavenonaëjavanexa. Bajaraxuata patsipaebabiabajë jivijavabelia Dioso pataneyavenonaëjavanexa.

14 Vajatuxanenë Jesús petëpaecujinaë Dioso icatsia asaëyaexanatsi. Bajaraxuata payapëtaniji baja pexaniajaicuenë Dioso icatsia paxanë ata pata-niasaëyaexanaëjavanexa patatëpaecujinaë, Dioso patayajavajinavanapaenexa pijanacuatsia.

15 Paxanë itsamonaë panebejiobiaexanabiabi ata, itsiata apo pacopatsinë patacatsipaebabiabijava pexaniajailivaisi. Nexata panevajënaeyabelia pajumecovënëtaponame patacatsipaebilivaisi. Nexata baja itsa paayaibit-saëtomë tsaponae Dioso panejumecovënëtsivi, paayaibitsaëtomë baja pijinia tsaponae Diosojavabelia panejumaitshivinexa: “Xanëpana rabaja. Tsipaji bitso pexaniacuenë panetoexaname,” panejaivinexa Diosojavabelia. Nexata papecajumetaevi ayaibitsaëto yapëtaena Dioso bitso ayaijamatabëcuene pexainaejava.

16 Bajaraxuata itsamonaë panebejiobiaexanabiabi ata, itsiata apo pajamatabëcopsinë jivi patatsipaebabiabijava pexaniajailivaisi. Pataperabëto cueranaponae ata, itsiata patavajënaeyabelia, caematacabi canacujitsia, pajamatabëcuenesaënë tsaponae Dioso patajumecovënëtsijava.

17 Xua nacatocopiapatabiaba itsamonaë vajanacabejiobiaexanabiabinexa, saya caepatoyo bajarapacuenia nacabejiobiaexanabiaba mapanacuataje vajajinavanapaepatoyo. Bajaraxuacujinaë athëbëtsia xainanatsi daxitacuenëvecua pexaniajava, baitsi matacabi apo peverevereceaëjava.

18 Nexata apo vajënaeëvetavanapaetsi vajanacatocopiapatsinexa, xua nacacajëpa vajataenexa. Biji rajane jamatabënajinavanapatsi vajanacatocopiapatsinexa xua apo nacacajëpae vajataenexa. Tsipaji xua nacacajëpa vajataenexa, daxita bajaraxua, vereverecaena. Itsiata baitsi jane xua apo nacacajëpae vajataenexa, daxitamatacabijavabelianexa apo vereverecae tsane.

5

1 Mapanacuata jivi pexanaebobërëto bepijia baabeje. Bajara pijinia itsi vajaperabëto ata. Bepijia vereverecaena. Itsiata baitsi jane yapëtanetsi mapacuenëje. Vajatëpaecujinaë itsamatacabi Dioso athëbëtsia nacarajutsiana apo peverevereceaëperabëtonexa.

2 Xaniajai cajena. Itsa abaxë jinavanapatsi mapanacuataje, bitso picani jitsipabiabatsi vajanacaperabëitothianaenexa athëbëpjiiperabëtonexa. Jitsipabiabatsi picani vajajonaenexa athëbëabetsia pejanaperabëto vajayajavajinavanapaenexa athëbëtsia.

³ Athëbëtatsia raja aperabëjibia apo jinavanapae tsanetsi. Biji rajane pejanaperabëto yajavajinavanapaenatsi.

⁴ Itsa abaxë jinavanapatsi mapanacuataje, bitso picani jitsipabiabatsi vanacaperabëitothianaenexa. Apo jitsipaetsi picani vajatëpaejava. Itsiata baitsi jane yapëtanetsi mapacueje. Vajatëpaeucijinae itsamatacabi athëbëtatsia yajavajinavanapaenatsi pejanaperabëto, apo peverevereaeperabëtonexa jane baja. Nexata mapanacuata vajayajavajinavanapaeperabëtomu ajibi baja tsane. Xainaenatsi juya apo peverevereaeperabëtonexa.

⁵ Bajarapacuenia vajanacaperabëitothianaenexa Dioso nacatoxaina. Nexata Dioso nacatocopata Espiritu Santo vajanacayajavaponaponaenexa. Nexata Dioso yabara bejamatabëjumaitsi mapacueniaje: “Mapacueniaje Espiritu Santo Dioso pataneyajavaponaponaeyaexanaexae, nexata payapëtaniji xaniajai pepacue ne itsamatacabi Dioso patanepërabëitothianaeyavanexa. Xaniajai baja cajena. Pepacue ne itsamatacabi Dioso panepërabëitothianaena pacuenia baja najumecapanepaeya jumaitsi,” bejamatabëjaiti Dioso yabara.

⁶ Bajaraxuata apo jamatabëcopatsi vajajumecovënëtsijava Dioso. Vajavajënaeyabelia jamatabëcuenebarëyatsi. Yapëtanetsi mapacueje. Itsa abaxë vajaperabëto yajavajinavanapatsi mapanacuataje, panacuata itsamatacabi vajatuxanenë daxitamatacabijavabelianexa yajavajinavapaejitsiatsi, bajarapanacua abaxë tajë vecujinavanapatsi.

⁷ Apo taetsi abaxë athëbëtatsia vajatuxanenë vajajavajinavanapaejavanexa. Itsiata yapëtanetsi itsamatacabi xaniajai vajatuxanenë athëbëtatsia vajajavajinavanapaejavanexa.

⁸ Bajaraxuata jitsipatsi vajatëpaejava. Tspaji mapanacuata vajajinavapaejava, matatoxenetsia bitso jitsipatsi vajatuxanenë pijanacuatatsia vajajavajinavanapaenexa.

⁹ Bajaraxuata mapanacuata vajajinavanapaeatacabibeje, asaëyata vajatuxanenë tonacuenebavanapatsi. Tspaji jitsipatsi vajanacasivajamatabëcuenë barëyajava. Vajatëpaeucijinae ata, pijanacuatatsia jamatabëtojinavanapatsi pejitsipacuenia.

¹⁰ Vajatuxanenë pejitsipacuenia jamatabëtojinavanapatsi mapanacuata ata vajajinavanapaeepato. Tspaji caejivitsi canacujitsia Cristo pitabarata tonaitajëtaponaenatsi. Nexata bajarapamatacabi nacarajutsiana daxita pijajivitsi xua nacatoxaina vajanacarajutsinexa. Xaniavaetsia vajatuxanenë ita tonacuenebavanapatsi, nacarajutsiana xua nacatoxaina vajanacarajutsinexa. Pamonae xaniavaetsia apo tonacuenebavanapae, nacueratsiana.

Pacuenia Dioso nacabarajamatabëcuenexanepana vajaneconi yabara Cristo vajanacasivatëpaeaxae yabara pelivaisi

¹¹ Payapëtaniji baja cajena itsamatacabi vajatuxanenë pitabarata cujnaviaya patananubenaeyavanexa. Bajaraxuata asaëyata jivijavelia pat-sipaebabiabajë Jesucristo pesivatëpaejavatsi pejumecovënëtsinexa. Itsajamatabëcuenë apo panajamatabëxainabiabinë bajarapalivaisivecua. Dioso baja cajena panejamatabëcueneyapëtae pacuenia pajamatabëcuenëitsinë. Pajitsipajë paxamë ata patanejamatabëcueneyapëtaenexamë.

¹² Bajarapacuenia paxanë apo pacanavajunupaebitsi saya pataneyaiy-ataenexamë. Pacanavajunupaebatsi rajane pataneyapëtaenexamë vajatuxanenë papijajivicunenë. Nexata bajarapacuenia paxamë papecajamatabëcuenecaëjëpaenexa pejumecanaviatsijava pamonae pibisiacuenia panebaracuaicuaijai. Bajarapamonae paneyalivaisiaex-anabiaba. Beayajamatabëcuenëvi nataeyabiaba. Pexaniacuenë exanabiabi

ata, bajaraxua exanabiaba saya jivi petaenexatsi. Itsiata baitsi jane bitso naneconita Diosojavabelia pibisiacuene pexanaeconi yabara. Apo canaejētsi pexaniajamatabēcuene pexainaenexa.

13 Paxanē picani xaniavaetsia Dioso jumecovēnētsiaya jivi patsipaebabiabajā Jesús pelivaisi. Itsiata Dioso apo pejumecovēnētsivi, panejumai tsabiabi: “Pematajemabivitsi raja saya,” panejai tsabiabi. Itsiata itsa pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamē ata Dioso papecacapanepaenexa. Paxamē apo panetaemē bepatanematajemabivi.

14 Cristo raja paneasiva tsabiabi. Bajaraxuata patonacuenebavanapajē. Pajamatabējumaitsinē tsabiabi: “Caenē Cristo nacasivatēpa daxitanexatsi. Bajaraxuata Dioso baja nacatane Cristo bevajayavatēpaevi. Nexata baja bevajananeconimatamotsicapanepaevi Dioso nacatane,” pajamatabējanē tsabiabi.

15 Cristo jivi sivatēpa. Petēpaecujinae Dioso icatsia asaēyaexanatsi. Nexata daxita pamonaē jumecovēnēta Cristo pesivatēpaejavatsi, matacabi apo peverevereaejava xainaena. Nexata bajarapamonaē apo bexanavanapae pijacuata penatojitsipaecuena. Biji rajane bexanavanapa pacuena Cristo tojitsipatsi pesivajamatabēcuenebarēyanexatsi.

16 Bajaraxuata ajena mapamatabējavaveliacujinaeje, patavajēnaeyabelia tsaponaē, Dioso pejumecovēnētsivi yabara apo bepanajamatabēxainaenē pibisiacuena, pacuena Dioso apo pejumecovēnētsivi banajamatabēxaina. Tsipaji pamonaē Dioso pejumecovēnētsivi pacuena bēpēnēaverena jamatabēcueneitsi, apo pajamatabēcueneyapētaenē. Xanē ata rajaba picani Jesucristojavabelia tanajamatabēcuenecopatsivajēnaeya, Jesucristo yabara najamatabēxainajē pibisiacuena, pacuena banajamatabēxaina Dioso apo pejumecovēnētsivi. Bepenajumetsēnētsinē taniji Cristo. Itsiata baitsi jane aeconoxae baja bajarapacuena apo najamatabēxainaenē Cristo yabara. Tsipaji baja yapētaniji Cristo pexaniajainēcuene.

17 Pajivi najamatabēcuenecopata Jesucristojavabelia, bajarapajivi xaina pejanajamatabēcuene. Pijaperujujamatabēcuenemi baja vecuaajibiaexanatsi. Nexata bajarapajivi daxitacuene sivanajamatabēxaina pexaniajamatabēcueneta.

18 Daxitatsi Dioso pejanajamatabēcuene nacarajuta. Dioso nacabarajamatabēcuenexanepana Cristo vajanacasivatēpaexae vajaneconi yabara. Nexata Dioso panetocopata pejumelivaisi patatsipaebanajetarubenaenexa daxitajivijava, bajarapamonaē ata itsa jumecovēnēta, Dioso pebarajamatabēcuenexanepanaenexatsi.

19 Nexata Cristo cruzata itsa sivatēpa mapanacuapijivije, Cristo pesivatēpaexaetsi, Dioso barajamatabēcuenexanepanaeya tanetsi daxita pamonaē jumecovēnēta Cristo pesivatēpaejavatsi. Paneconi picani bajarapamonaē xaina, Dioso baja vecuaajibiaexanatsi Cristo pesivatēpaejamatabēcuenetatsi. Bajarapalivaisi Dioso panetocopata patatsipaebanajetarubenaenexa jivijavabelia.

20 Nexata paxanē Cristo papijajivinē tsanajetarubenaē. Cristo baja cajena pejamatabēcueneta, papatajē paxamējavata patacatsipaebinexa pexanialivaisi. Pacuena Dioso itsa patsipa, pacamuxujiojibitsipa, bajarapacuena xanē ata pacamuxujiojibatsi Cristo papecasivatēpaexae panijaneconi yabara Dioso papecabarajamatabēcuenexanepanaenexa.

21 Cristo pibisiacuene apo exanaē, tsiquirijavayo ata. Itsiata baitsi jane Cristo Dioso tsijumaxuabatsi daxita vaxaitsi vajaneconimi. Nexata vajaneconi yabara Cristo bepibisiacuene pexanaenēcuena cruzata beyaxua-

batsi. Bajarapacuenia Cristo cruzata vajanacasivatëpaexae, nexata Dioso aneconijibia nacatane ita jumecovënëtatsi Cristo vajanacasivatëpaejava vaneconi yabara.

6

¹ Dioso pataneyajavanacuenebixae, asaëyata pacamuxujjobatsi. Dioso pinijicuenia papecaitaxutotsoniataejava, pacatsipaebatsi panejumeaebiyaniwa. Itsa pajumeaebijitsipame, nexata Dioso nacueratsipa papecaitaxutotsoniataejava.

² Tspaji Dioso jivi pitaxutotsoniataejava, tajëvelia Dioso pejumelivaisibaxutota jumaitsi mapacueniaje:

Pamatacabi jivi itaxutotsoniataenajë, cajumetaenatsi. Nexata pamatacabi jivi capanepaenajë, xamë ata cayavenonaenatsi, jai tajëvelia Dioso pejumelivaisibaxutota.

Aeconoxae rabaja nacatocopiapata Dioso vajanacaitaxutotsoniataejava vajanacapanepaenexa jane baja.

³ Itsa patonacuenebavanapajë Dioso, pajitsipajë daxitajivi xaniavaetsia patatsitajinavanapaejava, daxitajivi Dioso pejumecovënëtsinexa. Apo paexanaenë pibisiacuene, tsiquirijavayo ata, pataexanaejava yabara jivi patanejumeaebiyaniwa Dioso pejumelivaisi itsa patsipaebajë.

⁴ Biji rajane daxita xua paexanavanapajë, xaniavaetsia patsitaexanavanapajë jivi pataneyapëtaenexa Dioso papijajivicuenenë. Itsamonae panebejibiaexanabiaba. Itsajavata bitso panamatavenonabiabajë itsacuenejavaxi. Itsajavata bitso panetsiayai tsabiabi itsamonae patanebeyejebinxaxi. Bajarapacuenia panetsiayai tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patatsipaebavana-paejava.

⁵ Itsajavata panejumatitibabeyabiaba. Itsajavata penaneconitsivi pejebabiabibota panejebabiaba. Itsajavata Cristo pelivaisi jivi itsa patsipaebajë, itsamonae anaeya panebarajinabiaba patanebeyejebinxaxi picani. Itsajavata bitso panacuenebabiabajë. Itsajavata meravi ata apo pamajitabiabinë Dioso pejitsipaecuenia pataexanaenexa. Itsajavata bitso patajani tsabiabi. Bajarapacuenia panetoayapëbeje tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patatsipaebavana-paejava. Nexata jivi paneyapëtane Dioso papijajivicuenenë.

⁶ Dioso papijajivicuenenë jivi pataneyapëtaenexa, jivi patsitajinavanapajëna mapacueniaje. Pamatacabibeje pajinavanapajë, pibisiacuene apo paexanavanapaenë. Biji rajane jivi patsitajinavanapajë pexaniajaillivaisi patayapëtaevicuenia. Bajayajebi itsamonae pibisiacuene paneexanabiabi ata, apo pacueneacanaviatabiabinëna. Pexaniaacuene patoexanabiabajëna itsamonaejavabelia. Patsitajinavanapajëna pacuenia Espiritu Santo paneyapëtaeyaexanapona Espiritu Santo patanetsijamatabëccaexae. Patsitanajamatabëcuene itajëtavanapajëna itsamonae ata pataasivajava patajamatabëethëtojavavetsina. Bajarapacuenia patatsitajinavanapaexae, jivi xaniavaetsia paneyapëtane Dioso papijajivicuenenë.

⁷ Dioso papijajivicuenenë jivi pataneyapëtaenexa, patsitajinavanapajëna mapacueniaje. Ëpexaniajailivaisi jivi patsipaebabiabajë. Patsitanacueneitajëtavanapajëna daxita xua paexanavanapajë, Dioso patanayavenonabiabijava. Dioso baja aneconijibia patanetaexae, Espiritu Santo paneyavenonabiaba patanayajivitaeyabiabinexa dovathi pijacuene. Paneyavenonabiabanua Espiritu Santo patacueneamoneyabinexa dovathi.

Bजारापacuēnia patatsitajinavanapaexae, jivi paneyapētane Dioso papijajivicuēnenē.

⁸ Itsamonae paneyaiyataeyabiaba. Itsamonae pijinia apo paneyaiyataeyabiabi. Itsamonae pexaniacuēnia panebaracuaicuajai tsabiabi. Itsamonae pijinia pibisiacuēnia panebaracuaicuajai tsabiabi. Itsamonae panetaeyabiaba pexaniajailivaisi patatsipaebivicuēne. Itsamonae pijinia panetaeyabiaba bepatanajumetsēnētsivi.

⁹ Itsamonae pataneyapētaevi ata, itsiata apo bepataneyapētaevi pane-
taeyabiaba. Itsajavata itsamonae jamatabēpanebejejebababiaba picani. Itsiata
tsiteca asaēya bajarapalivaisi patsipaebavanapajē. Dioso baja cajena pane-
tocopata itsamonae ayaicuēnia patanebejiobiaexanabiabinexa, itsiata apo
patanebejejebinexa.

¹⁰ Panajamatabēxainabiabi atanē bitso itsamonae pibisiacuēne pexanae-
java yabara, itsiata bēpēnē pepacuēne pajamatabēcuēnebarēyanē tsavana-
pae daxitamatacabijavabelianexa. Patabejiobivi picani. Itsiata jivi ayai-
bit-
saētoxonetonē ricovi paexanaponajē Dioso pejumelivaisi patatsipaebija-
matabēcuēneta pejumecovēnētsixae. Apo paxainanē picani mapanacuapi-
jicuēne. Itsiata baitsi jane Diosojavabelia daxitacuēne paxainajē, apo pev-
ereverecaejavanaxa jane baja.

¹¹ Tajamonae, paxamē paCorinto tomarapijivimē, pacanajamatabēcuēne
vajunupaebatsi baja cajena rovalia. Apo pacavecuānamatabēcuēne
matayatsitsi.

¹² Asivaya pacatae atatsi, paxamē itsiata bajarapacuēnia asivaya apo
panetaemē.

¹³ Pacuēnia pexi pexainanē asaēya banacoximuxujioaba, bajara
pijinia pacuēnia paxanē ata pacamuxujioabatsi. Paxamē ata
panejamatabēcuēnevetsina asivaya panetaema pacuēnia baja paxanē
asivaya pacatanetsi.

*Pacuēnia piasaētsaponaponanē Dioso nacatane bepijatemplobotsi tsavana-
pae yabara pelivaisi*

¹⁴ Dioso apo pacatojitsipae mapacuēneje. Paxamēyajuvēnēva, Dioso pe-
jumecovēnētsiva, pētsa pitatsi Dioso apo pejumecovēnētsinē. Paxamē ata
papebijivimē, pētsa papitame Dioso apo pejumecovēnētsiva. Bajayajebinexa
ata pētme Dioso apo pejumecovēnētsivi. Tspaji apo pacajamatabēcuēnejēpae
tsipae. Dioso pejumecovēnētsivi apo jamatabēcuēnejēpae Dioso apo pejume-
covēnētsivi. Tspaji Dioso jivi pejamatabēcuēne itayotsijamatabēcuēnetsi,
mapanacuata pitaquirijamatabēcuēnebeje, apo najamatabēcuēnejēpaebeje.

¹⁵ Cristobeje dovathibeje apo najamatabēcuēnejēpaebeje. Nexata pi-
jinia pajivi Dioso pejumecovēnētsijivi, Dioso apo pejumecovēnētsijivibeje,
acuēnebi bajayajebi penajuanacuēnebaponaponanēxabeje. Tspaji apo
najamatabēcuēnejēpaebeje.

¹⁶ Bajara pijinia navecuaitisibeje Dioso pijatemplobobeje, jumapecataeya
pexananēanē penubenaetemplobobeje. Apo najamatabēcuēnejēpaebeje.
Vaxaitsi baja cajena piasaētsaponaponanē Dioso, nacatane bepijatem-
plobotsi tsavanapae. Bजारापacuēnia nacatane tspaji pacuēnia bajayata
Dioso templobota ponaponabiaba, bajara pijinia pacuēnia aeconoxae Dioso
nacayajavaponapona. Bजारापajamatabēcuēne yabara bajayata Dioso vax-
aitsi yabara tajēvelia jumaitsi mapacuēniaje:

Tsijamatabēcaenajē bajarapamonae tayajavaponaponanexa. Bजारapa-
monae pijaDiosonē tsane. Bajara pijinia pamonaē tajajivi tsane,
jai Dioso bajayata tajēvelia vaxaitsi yabara.

¹⁷ Bajaraxuata Dioso apo pejumecovënëtsivi vajavecuapitsapaejavanexa, vajatuxanenë Dioso tajëvelia nacavajunupaeba. Vajanacavajunupaebijavata jumaiti mapacueniaje:

Pamonae tuatuajëta pajinavanapaename, pavecuapitsapaename. Bajara-pamonae navecuatsatsi pajinavanapaename. Paxamë pëtsa pibisi-acuene panaexanaename bajarapamonaeta papecajamatabëcuene bijnanaeyaniva. Nexata xanë pacasivabarëya tsanetsi.

¹⁸ Paneaxanë tsane. Nexata daxita paxamë pataximë tsane, jai bajayata vajatuxanenë Dioso tajëvelia vaxaitsi yabara, daxitacuene pevetsinë.

7

¹ Tajamonae bitso patacaasivavi, daxita baja pacuenia Dioso pejumelivaisibaxutota tajëvelia najumecapanepaeya jumaiti pexicueniatsi vajanacataenexa, yapëtanetsi baja. Bajaraxuata Dioso pitabarata aneconijibia jinavanapaenatsi. Vajavitota pibisiacuene vajaexanabiabijavami, copatsianatsi baja. Vajajamatabëëthëtota pibisijamatabëcuene vajanajamatabëxainabiabijavami ata, copatsianatsi baja. Dioso yayyataeya jinavana-paenatsi Dioso vajanacatojitsipaecuenia.

Pacuenia Pablo sivajamatabëcuenebarëya Corinto tomarapijivi yabara pelivaisi

² Panetsitanajamatabëcueneitajëre pataniasivajavamë. Caejivi ata paxamëyajuvënëjivi apo pacayajuvënëitsacueniabitsi. Apo pacayajuvënë jamatabëcuenebijanaetsinua. Apo pacayajuvënë yamaxëitojorobitsinua bajarapacuenia panijapalata patacavecuapitsinexa.

³ Itsa pacajumaititsi mapacueniaje, apo pacabijataetsi. Jume baja caena. Pacuenia baja cajenã cajenã pacajumaititsi, daxita matabijavabelianexa asivaya pacajamatabënajinabiabatsi.

⁴ Payapëtanijinua caejamatabëcuene panenajamatabëxainaejava. Bajaraxuata bitso pacasivajamatabëcuenebarëyatsi. Paepatota ata itsamonae panebejiobiaexanabiaba, apo panasivabëjanë tsabiabi. Tspiji bajarapaepatota itsa pacavënëlivaisitaeyabiabatsi xaniavaetsia panejinavanapaejava, pacasivanajamatabëcuene saëtabiabatsi. Nexata panebejiobiaexanabiabi ata, bitso pabarëyanë tsabiabi paxamë yabara.

⁵ Macedonia nacuata patapatsicujinae, caeto ata cajena xaniavaetsia apo panacueraevetsinë. Daxitajava, itsaxuayo panajetarubenajë, paneyalivaisiaexanabiaba. Nexata itsa panayajumetaeyabiabajë itsacuenlivaisi, patajamatabëëthëtota bëpënëa payajunavijinavanapabiabajë.

⁶ Itsiata baitsi jane Dioso, jivi pejamatabëcueneasaëyaexanaenëxae, panejamatabëcueneasaëyaexana. Bajarapacuenia Dioso panejamatabëcueneasaëyaexana paxamëjavaverena peponaenë, Tito, itsa patajopa paxanëjavata.

⁷ Tito pepatsixa paxamëjavaverena, panejamatabëcueneasaëyaexana. Itsiata Tito ëpëpatsijava, apo panejamatabëcueneasaëyaexanae. Biji rajane Tito paxamëjavabelia itsa patajopa, paxamë pina Tito pajamatabëcueneasaëyaexaname. Bajarapacuenia paneexanaejava, Tito itsa pacavajunupaeba paxanëjavaverena, pamuxunanajamatabëcuenesaëtajë. Bitso pina picani jamatabëpanetaneme. Bajarapalivaisinua Tito panetsipaeba. Panetsipaebanua bitso paneyanajamatabëxainaejava pibisiacuene paneexanaeconia. Panetsipaebanua bitso patanesivanajamatabëxainaejavamë itsa panevënëlivaisitaneme bitso patacasivanajamatabëxainaejava.

Bajarapacuenia paneexanaejava, Tito itsa pacavajunupaeba paxanējavaberena, bitso pamuxunajamatabēcuenēbarēyanē.

8 Pabaxutomi copiaya patoayaquinatsi, itsa palebame, bitso pacanajamatabēcainaeyaexana. Itsiata saya caepatoyonexa. Bajarapacuenia papecanajamatabēcainaeyaexanaexae, bajarapabaxutomi yabara jamatabējumaitsinē mapacueniaje: “Apo betoyaquinaenē picani bajarapabaxutomi,” jamatabējanē. Itsiata baitsi jane aeconoxae baja bajarapabaxutomi yabara bajarapacuenia apo sivanajamatabēcainaenē.

9 Aeconoxae baja sivabarēyanē patacatoitobixae bajarapabaxutomi. Itsiata apo sivabarēyanē xua pacanajamatabēcainaeyaexanatsi panijaneconi yabara. Biji rajane sivabarēyanē tsipaji patacanajamatabēcainaeya exanaejavata bajarapabaxutomita, pacopabame baja pibisiacuene paneexanabiabijava. Panajamatabēcuenepēnēyorotame baja Diosojavabelia. Nexata pacuenia Dioso patatojitsipa, paexanavanapame. Itsiata apo pacait-sacueniabi patacatoyaquinaebaxutomi. Biji rajane bajarapabaxutomi pejamatabēcueneta, pacajamatabēcueneyavenonatsi.

10 Nexata pacuenia Dioso patatojitsipa, bitso payanajamatabēcainame panijaneconi. Nexata baja pacopabame pibisiacuene paneexanaejavami. Panajamatabēcuenepēnēyorotame baja Diosojavabelia. Nexata paxamē Dioso pacacapanepaena. Pamonaē Dioso capanepaenatsi, apo jumaitsi tsane: “Apo jitsipaenē picani Dioso tanecapanepaejava,” apo jai tsane. Itsiata baitsi jane pamonaē yanajamatabēcainavanapae ata pibisiacuene pexanaeconi, itsiata itsa apo copabi tsane pibisiacuene pexanabiabijava, itsa apo najamatabēcuenepēnēyorotsi Diosojavabelia, bajarapamonaē Diosovecua naxuabiana daxitamatacabijavabelianexa.

11 Panajamatabēcuenecanaējēre mapacuenije. Pacuenia Dioso patatojitsipa, bitso paxamē payanajamatabēcainame panijaneconi. Nexata baja aeconoxae paneconijibimē Dioso pitabarata. Najamatabēcuenereviabiaya baja pacanaējētame panijaneconi. Pepacuene panavajunupaebamenua Diosojavabelia pacuenia paexanavanapame. Paxamē picani bitso pabaraanaepanabiabame paxamēyajuvenēnē, ponē pibisiacuene exanaponapona paxamē tuatujēta. Panecujunavabiabamenua picani bajaraponē pijaneconi yabara. Itsiata bitso pajitsipame paneexanaenexa Dioso papecatojitsipaecuenia. Pasivanajamatabēcueneveretamenua panenaneconitsiaexanaenexa paxamēyajuvenēnē, ponē pibisiacuene exanaponapona paxamē tuatujēta. Bajarapacuenia itsa pasivanajamatabēcainame pibisiacuene pexanaponaponaenē, Dioso patsitanajamatabēcuenetajētame Diosojavabelia apo panenaneconitsijava.

12 Itsa patoayaquinatsi copiaya pabaxutomi, patoayaquinatsi padaxitamē patacamuxujiobinexa. Apo toyaquinaenē caenē paxamēyajuvenēnē tamuxujiobinexa, ponē pibisiacuene exanaponapona paxamē tuatujēta. Apo toyaquinaenēnua tamuxujiobinexa ēponē ata pibisiacuene toexanatsi itsanē. Patoayaquinatsi bajarapabaxutomi padaxitamē patacamuxujiobinexa. Patoayaquinatsi bajarapabaxutomi tsipaji pajitsipajē panijacuta panenajamatabēcueneyapētaenexa juya pataniasivajavamē. Baitsi pacuenia pajitsipame, Dioso pitabarata patanejumecovēnētsinexamē patacasivajamatabēcuenēbarēyanexa.

13 Nexata baja panejumecovēnētame. Bajarapacuenia patanejumecovēnētsixaemē, bitso pacasivajamatabēcuenēbarēyatsi.

Pibisiacuene itsa paexaname, Tito bitso pacasivanajamatabēcaina. Itsiata baja aeconoxae daxita paxamē Dioso pitabarata xaniavaetsia panejinavanapaexae, apo pacasivanajamatabēcainae baja. Bajaraxuata pacasiva-

jamatabëcuenebarëya Tito. Nexata Tito papecasivajamatabëcuenebarëyjava yabara, paxanë ata bitso pacasivajamatabëcuenebarëyatsi.

¹⁴ Tito peponaevajënaeya paxamëjavabelia, jumaitsinë bajaraponëjavabelia: “Corinto tomarapijivi, Dioso pejumecovënëtsivi, tatoyaquinaebaxuto pejamatabëcueneta, itsiata najamatabëcuenexanebiana Diosojavabelia,” janë paxamë yabara Titojavabelia. Nexata bajarapacuenia paexaname baja. Bitso nexata Tito pacasivajamatabëcuenebarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoyaquinatsi, paexanavanapame. Bajaraxuata pacasivajamatabëcuenebarëyatsi.

¹⁵ Tito najamatabënapitabiaba panejumecovënëtabibijava pacuenia pacaitoroba. Najamatabënapitabiabanua yayiataeya panecopiapitsijava ata. Bajaraxuata Tito bitso pacaitaxanapona pevajënaeyabelia.

¹⁶ Pacasivajamatabëcuenebarëyatsi. Tsipaji xaniavaetsia yapëtaniji paneexanavanapaejava pacuenia Dioso pacatojitsipa.

8

Pacuenia Dioso pejumecovënëtsivi penajamatabëcuenerajutsixae Diosojavabelia, ofrenda tojeba Diosonexa yabara pelivaisi

¹ Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcuenevavenonatsi Dioso pejumecovënëtsivi, Macedonia nacuapijivi.

² Macedonia nacuapijivi petoayapëbejecuenetsi tocopiapataponae atatsi ayaiucuenia pejamatabëcuenejëtsinexatsi, itsiata jamatabëcuenebarëya tsavanapae. Bajarapamonae bitso bepejiobivi picani. Itsiata ofrenda itsa exana petoitorobinexa bepejiobivi Jerusalén tomarapijivijavabelia, ayajjava jebabiaba.

³ Xanë yapëtaniji bajarapamonae bepejiobivicuene. Itsiata bepejiobivi ata, ayajjava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayajjava pejebinexa.

⁴ Bajarapamonae pinijicuenia paneitoroba patatocaponaenexa pejebiofrenda. Panejumaitsi mapacueniaje: “Pexaniacuene panetoexanaename. Panetocaponaename mapaofrendaje Jerusalén tomarjavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai.

⁵ Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,” pasivajamatabëjanë picani. Itsiata bajarapamonae ayajjava jeba. Bajarapamonae ëofrenda apo rajutsi Diosojavabelia. Biji rajane copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatacabijavabelianexa. Bajaraxuacujinae pejebiofrenda paxanëjavaberena panerajuta patatocaponaenexa bepejiobivijavabelia. Bajarapacuenia itsa exana, exana Dioso petojitsipaecueniatsi.

⁶ Paxamë, paCorinto tomarapijivimë, paofrenda paxamë ata pacaetutame panerajutsinexa Dioso pejumecovënëtsivi, Jerusalén tomarapijivi, Tito pacajamatabëcuenevavenona panecaetuatsijava. Itsiata abaxë apo paveretsimë panecaetuatsijava. Bajaraxuata aeconoxae baja icatsia Tito paitorobajë paxamëjavabelia paneveretsinexa jane baja bajarapaofrenda panecaetuatsijava.

⁷ Paxamē itsamonaevēcua xaniavaetsia Dioso patojinavanapame. Xaniavaetsia panajamatabēcuenecopatame Diosojavabelia. Payapētanemēna xaniavaetsia Dioso pejumelivaisi. Pacacaējēpanua xaniavaetsia Dioso pejumelivaisi panetsipaebinxā itsamonaē. Bitso pacajamatabēcueneenabiabanua Dioso pijacuenē panetonacuenebavanapaenexa. Bitso paneasivamēna. Nexata paneyavenonaenexa bepejiobivi, Jerusalén tomarapijivi, ayaijava bepajebame ofrenda ita paexaname.

⁸ “Macedonia nacuapijivi, bepejiobivi ata, ayaijava ofrenda jeba,” ita janē, apo pacaitorobitsi paxamē ata ayaijava ofrenda panerajutsinexa. Biji rajane saya pacatsipaebatsi paneyapētaenexa pacuenia Macedonia nacuapijivi bitso jamatabēcuenebarēyaya toexana ofrenda bepejiobivi peyavenonaenexa. Bajarapacuenia paxamē ata ita paexanaenexa, itsamonaē patsitanajamatabēcuene itajētsianame panexaniajaicuene Dioso paneasivajava.

⁹ Bajarapacuenia paxamē ata ofrenda parajutsianame. Tsipaji payapētanemē pacuenia vajatuxanēnē Jesucristo nacayavenona vajanacaasivaxae. Bajaraponē picani ayaijamatabēcuene. Daxitacuenē pevetsinē. Itsiata papecaasivaxae, nabejiobiaexana papecayavenonaenexa. Bajarapacuenia papecasivanabejiobiaexanaexae, nexata paxamē ata itsamatacabi paayaijamatabēcuenevimē tsane Dioso pijanacuatatsia.

¹⁰ Pacatsipaebatsi paneyapētaenexa pacuenia panetsitaxanepana paxamē paneexanaexa bajarapofrenda. Paxamē picani imata pavaimi bitso jamatabēpayavenoname Dioso pejumecovēnētsivi, Jerusalén tomarapijivi. Nexata paxamē daxitajivivajēnaeya jamatabēpatoexaname ofrenda.

¹¹ Paxamē picani imata pavaimi Jerusalén tomarapijivi bitso jamatabēpayavenoname ofrendanexa. Bajarapacuenia aeconoxae ata tsiteca paexanare paneveretsinexa jane baja palata panecaetuatsijava bajarapofrendanexa. Parajutsianame pacuenia pacacaējēpa.

¹² Nexata ita pepacuenē parajutsianame pacuenia pacacaējēpa, Dioso pacasivajamatabēcuenebarēya tsane. Tsipaji apo pacaitorobi xua apo paxainaemē panerajutsinexa.

¹³ Apo pacaitorobitsi raja mapacueniaje: “Itsamonaē paneyavenonaenexa, ofrenda ita paexaname, pabuare daxita panexainaepalatayomi,” apo pacajaitsi. Tsipaji juya paxamē panamatavenonaējitsipame.

¹⁴ Jitsipatsi namataenetsia vajanayavenonaenexa vajanamatavenonaējavaxi yabara. Aeconoxae baja pacacaējēpa paneyavenonaenexa bepejiobivi, Jerusalén tomarapijivi. Itsamatacabijavabelia, pamatacabi paxamē panamatavenonaenexa, caējēpaenatsi juya bajarapamonae papecayavenonaenexa. Bajarapacuenia nexata daxita paxamē panenamataavenonaējavaxi, apo panamatavenonaemē tsane.

¹⁵ Bajarapajamatabēcuenelivaisi yabara Dioso pejumelivaisibaxutota jumaitsi mapacueniaje: “Itsajivi bitso ayaijava xinae ata, itsiata apo toyajuvēnēnacopatsitsi. Itsajivi pijinia tsiquirijavayo xinae ata, itsiata apo namatavenonaē,” jai Dioso pejumelivaisibaxutota. Bajaraxuata paxamē ata panexainaeyajuvēnējava, beparajutame penamatavenonaevijavabelia.

Pacuenia Tito, anijanēbeje yajava, pona Corinto tomarabelia yabara pelivaisi

¹⁶ Xanē bitso jitsipajē paxamē patacayavenonaenexa. Tito ata bajarapacuenia jitsipa papecayavenonaenexa. Bajaraxuata pexaniajamatabēcuene rajutajē Diosojavabelia. Tsipaji Espiritu Santo pejamatabēcueneta Titobeje panajamatabēcuenejēpajēbeje paxamē yabara.

17 Nexata Tito itorobajê papecataenexalia, papecayavenonaenexanua bajarapaofrenda panecaetuatsijava paneveretsinexa baja tavajênaelia. Barêyaya Tito jejai peponaenexa paxamêjavabelia. Bajaraponê ata pijacuata pejitsipaexae peponaejava paxamêjavabelia, ponaena papecayavenonaenexa.

18 Tito pepêta paitorobajê itsanê Dioso pejumecovênêtsinê. Bajaraponê Macedonia nacuata daxita Dioso pejumecovênêtsivi bitso peyapêtaenêtsi. Peyaiyataenêtsinua. Tsipaji xaniavaetsia tsipaebabiaba Dioso pejumelivaisi jivi pecapanepaelivaisinexatsi.

19 Ponê, Tito yajava, ponaejitsia paxamêjavabelia, bajaraponê Macedonia nacuata itapetatsi daxita Dioso pejumecovênêtsivi. Nexata pamatacabi paponaeñajê Jerusalén tomarajavabelia, bajaraponê payajavaponaenajê. Nexata paofrenda pacaponaejitsianê, bajaraponê paneyavenonaeyacaponae. Bajarapaofrenda pacaponaenajê Jerusalén tomarapijivi pesivajamatabêcuenebarêyanexa Dioso. Patsitanajamatabêcuene itajêtsianajênuua patajitsipaejava patayavenonaenexa pamona bepejiobivi. Nexata bajarapamonae jamatabêjumai tsane: “Matsaena pamona jitsipa peyavenonaenexa bepejiobivije,” jamatabêjai tsane.

20 Bajarapacuenia Macedonia nacuapijinê payajavaponaenajê itsajivi ata patanebaracuacuajaiyaniva bajarapapalataxaneto yabara. “Pabloana raeta bajarapalata yajuvênêcopata,” patanejaiyaniva.

21 Dioso baja cajena paneyapêtane apo patanacobetoxotsivicuene. Itsiata pajitsipajê daxitajivi ata pataneyapêtaenexa apo patanacobetoxotsivicuene.

22 Titobeje icatsia itsanê patsicueyaitorobajê Dioso pejumecovênêtsinê peyajavaponaenexabeje paxamêjavabelia. Bajaraponê anijatonê pajamatabêcueneêjêtabiabajê. Xaniavaetsia bitso paneyavenonabiaba. Nexata aeconoxae paxamê bitso jamatabêpacayavenona. Tsipaji pacavênêlivaisitane paneyavenonaejavanexa Jerusalén tomarapijivi.

23 Nexata Tito yabara itsajivi itsa pacayanijobiana: “¿Detsa pacuenia maponê peponaponaenêje?” itsa pacajai tsane, pajumaitsimê tsane: “Pablobeje raja penajuaponaenêbeje. Bajaraponê Tito Pablo yavenonabiaba vaxaitsi juya Pablo vajanacayavenonaenexa,” pajamê tsane. Itsajivi itsa pacayanijobiana Tito peyajavaponaenêbeje yabara, pajumaitsimê tsane: “Bajaraponêbeje Dioso pejumecovênêtsivi pitorobinêtsibeje. Bajaronêbeje xaniavaetsia Cristo petoponaenajavabeje jivi petaexae, nexata jivi yaiyatane Cristo pelivaisi,” pajamê tsane.

24 Nexata bajaraponêbeje itsa patsianabeje paxamêjavata, patsitana-jamatabêcuene itajêtsianame paneasivajava bajaraponêbeje. Nexata Dioso pejumecovênêtsivi, pamona itorobatsibeje bajaraponêbeje, pacavênêlivaisitaena paneasivajava bajaraponêbeje. Nexata asivaya itsa pacopiapitsianame Dioso pejumecovênêtsivi pitorobinêtsibeje, nexata Dioso pejumecovênêtsivi jamatabêjumai tsane paxamê yabara: “Pacuenia baja Plobana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabêjai tsane.

9

Ofrenda pecaetuatsijava Dioso pejumecovênêtsivijavabelia peyavenonaenexa yabara pelivaisi

1 Ofrenda pacaetuataponame paneyavenonaenexa bepejiobivi, Dioso pejumecovënëtsivi, Jerusalén tomarapijivi. Apo jitsipañë picani icatsia patacatoyaquinaenexa bajaraxua yabara.

2 Tsipaji baja yapëtaniji pacuenia bitso jamatabëpayavenoname bajaramonae. Bajaraxuata pacasivajamatabëcuenebarëyatsi. Nexata paxamë yabara jumaitsinë Macedonia nacuapijivijavabelia: “Acaya nacuapijivi, Corinto tomarata penacaetuatabiabi, imata baja cajena pavaimi najamatabëcuenevereta perajutsinexa ofrenda Jerusalén tomarapijivijavabelia,” janë paxamë yabara. Nexata Macedonia nacuapijivi ita pacavënëlivaisitane paneyavenonaejavanexa Jerusalén tomarapijivi, Macedonia nacuapijivi ata ayaiBITSaëtOXaneto tocaetuatapona ofrenda peyavenonaenexa Jerusalén tomarapijivi.

3 Nexata pacatoitorobatsi Titobana papecayavenonaenexa paneveretsinexa baja bajarapaofrenda panecaetuatsijava panerajutsinexa Jerusalén tomarapijivi. Tavajënaelia ita apo paveretsimë tsipae ofrenda panecaetuatsijava, paxamë yabara pexaniacunia tajumait्सijava, najumecovëauranë tsipae Macedonia nacuapijivijavabelia.

4 Tsipaji itsamonae Macedonia nacuapijivi belia naponaejitsipa tapëta paxamëjavabelia. Itsa bajarapamonae taejitsipa bajarapaofrenda apo paneveretsijava, nexata bitso paxamë yabara auranë tsipae. Tsipaji paxamë yabara bajaya baja jumaitsinë: “Corinto tomarapijivi jamatabëveretapona baja ofrenda pecaetuatsijava,” janë paxamë yabara. Nexata paxamë ata bitso pauramë tsipae.

5 Bajaraxuata jamatabëjumaitsinë: “Titobana Corinto tomarabelia tavajënaeyabelia itorobianajë,” jamatabëjanë. Nexata Titobana pacajamatabëcuenyavenonaena ofrenda panecaetuatsijava, paneveretsinexa baja pacuenia najumecapanepaeya panetocaëjëtame. Nexata baja tavajënaelia bajarapaofrenda ita paxaniavaetabuatsianame, panajamatabëcueneitajëtsianame Jerusalén tomarapijivi paneasivaxae paneyavenonaejava, apo ëpatacaitorobixae.

6 Pacanaëjëre mapalivaisije. Tsiquirijavayo peubinë, tsiquirijavayo pijinia batopitsapatsi. Ayaijava pijinia peubinë, ayaijava batopitsapatsi. Nexata ayaijava ita parajutsianame itsamonaejavabelia, Dioso juya pacarajutsiana ayaijava.

7 Nexata caejivi canacujitsia berajuta pacuenia najamatabëcuenevereta perajutsinexa. Pëtsa pajamatabëjumaitsimë: “Apo jamatabërajutsi atanë picani, itsiata taneitorobixae, rajutsianajë,” pajamatabëjamë pëtsa. Tsipaji pajivi rajuta itsajivijavabelia jamatabëcuenebarëyaya, Dioso asivatsi.

8 Dioso baja cajena caëjëpatsi papecarajutaponaenexa pacuenia panamatavenoname matatoxenetsi. Nexata xua panamatavenoname, paxainaponaename. Pacatonacopatsiananua panerajutsinexa bepejiobivijavabelia.

9 Dioso pejumelivaisibaxutota jumaitsi mapacueniaje:

Ponë rajutabiaba bepejiobivi penamatavenonaecuene, bajaraponë pexaniacuene exanabiaba Dioso pitabarata. Nexata bajarapacuene Dioso apo nacofënëtsi daxitamatacabijavabelianexa, jai Dioso pejumelivaisibaxutota.

10 Dioso rajuta jivi peubixunexa. Bajaraxuacujinae icatsia Dioso pejamatabëcueneta penaveretsixu capitsapa penotsinexa jivi pexaejavanexa. Bajara pijinia pacuenia Dioso pacarajutsiana panexainaejavanexa, panerajutsinexanua bajaraxuayajuvënëjava

bepejio bivijavabelia. Pacacaējēpaeyaexanaenanua ēpexaniacuene ayaijava paneexanaenexa.

¹¹ Bajarapacuenia Dioso pacarajutsiana panexainaenexa ayaijava. Nexata pacacaējēpaena bajaraxuayajuvēnēja juya panerajutsinexa bepejio bivijavabelia. Nexata paofrenda panerajutame patatocaponaeenexa Dioso pejumecovēnētsivi, Jerusalén tomarapijivi, ita parajutsianajē bajarapamonae, pexaniajamatabēcuene rajutsiana Dioso javabelia bajarapacuenia paneyavenonaexae.

¹² Bajarapacuenia Dioso pejumecovēnētsivi, bepejio bivivi, ita parajutame, payavenoname bitso penamatavenonaejavata. Bajarapamonae paneyavenonaejava ita taena, pexaniajamatabēcuene Dioso javabelia perajutabiabijava pematatsēnēa bitso pexaniajamatabēcuene rajutsiana Dioso javabelia.

¹³ Bajarapacuenia Jerusalén tomarapijivi ofrenda ita parajutsianame paneyavenonaenexa, bajarapamonae patsitanajamatabēcuene itajētsianame pepacuene xaniajai panejumecovēnētsijava pexanialivaisi, Cristo pelivaisi. Nexata bajarapamonae pexaniajamatabēcuene rajutsiana Dioso javabelia Cristo pelivaisi panejumecovēnētavanapaejava yabara. Ofrenda ata panerajutsijava Jerusalén tomarapijivi, paofrenda ata parajutame itsamonaejavabelia, bajaraxua ata yabara Jerusalén tomarapijivi pexaniajamatabēcuene rajutsiana Dioso javabelia.

¹⁴ Nexata bajarapamonae bitso asivaya pacajamatabēnājinaeya pacato vajētabiabiana Dioso javabelia. Tsipaji paxamē bajarapamonae payavenoname Dioso pejamatabēcueneta papecaitorobixae.

¹⁵ Vaxaitsi pexaniajamatabēcuene rajutabiabatsi Dioso javabelia. Tsipaji Dioso pexēnato athēbēvetsica nacatoitorobica vajanacasivatēpaenexa mapanacuataje. ¡Cristo vajanacasivatēpaejava pexaniacuene bitso!

10

Pacuenia Pablo navajunupaeba Cristo pitorobijavatsi Dioso pejumelivaisi daxitanacuanēja jivi petsipaebanajetarucaenexa yabara pelivaisi

¹ Pacuenia Cristo pexaniacuena pacaitorobijitsipa, bajarapacuenia xanē ata pexaniacuena ajumesaēya pacaitorobatsi. Itsiata baitsi jane itsamonae paxamēyajuvēnēvi xanē yabara jamatabēcuenenavēxaniabiaya jumai tsabiabi: “Itsa abaxē Pablo tajē nacavecuaponapona, ajumelivaisisaēya nacatoyaquinabiabarena. Itsiata baitsi jane majotaje, vaxaitsijavata, ita patajopaena, piaitejēpaebinēcuena patajopaena. Ajumejibia ponaponaena pijameuraxae,” jai tsabiabi paxamēyajuvēnēvi xanē yabara jamatabēcuenenavēxaniabiaya. Itsiata bajarapacuenia apo itsinē tsane.

² Nexata pexaniacuene pacavajētatsi. Pētsa itsajamatabēcuene panetoexaname, ita pātsialijē paxamējavabelia, ayaijumeta pacabijataeya patacamuxujobiyaniava. Itsamonae paxamēyajuvēnēvi xanē yabara jamatabēcuenenavēxaniabiaya jumai tsabiabinua: “Pablo apo ponapona Dioso pejumecovēnētsinēcuena. Saya ponapona Dioso apo pejumecovēnētsinēcuena. Yajavaponapona pijaperujumatabēcuene,” jai tsabiabi paxamēyajuvēnēvi xanē yabara. Bajarapacuenia xanē yabara pecuaicuaijatsabiabivijavabelia ayaijumeta bijataeya cuaicuaijanē tsane.

³⁻⁴ Mapanacuapijivi, Dioso apo pejumecovēnētsivi, saicayacuenia nayajiviyapētane pijavajabitsaēvecua penaevetsinexa pitsacueniabiyanivatsi. Vaxaitsi ata mapanacuata vajajinavanapaevi, Dioso vajajumecovēnētsivi, saicayacuenia pijinia nayajiviyapētanetsi vajanaevetsinexa

dovathivecua. Dovathivecua apo naevetsitsi mapanacuapijicueneta. Pajamatabêcuenesaê Dioso nacarajuta, bajarapajamatabêcuenesaêta jamatabêcueneamoneyabaponatsi dovathi.

⁵ Nexata Dioso pejamatabêcuenesaêta, paajibiaexanaponajê jivi Dioso yabara penajumetsênêtsilivaisimi. Bajarapamonae dovathi pejamatabêcueneta itorobatsi penajumetsênêtsilivaisi pêtisipaebabiabinexa itsamonaejavabelia. Nexata pamonaê Dioso yabara penajumetsênêtsivi, pajumecovênêtsiaexanaponajê Cristo pelivaisi Dioso pejamatabêcuenesaêta. Itsamonae pijinia dovathi pejamatabêcueneta beayaijamatabêcuenevi natane. Pamonaê bajarapacuenia najamatabêxaina, apo yapêtae Dioso. Bajaraxuata bajarapajamatabêcuenemi paajibiaexanaponajê baja. Nexata pamonaê ata bajarapacuenia beayaijamatabêcuenevi natane, pajumecovênêtsiaexanaponajê Cristo pelivaisi Dioso pejamatabêcuenesaêta.

⁶ Bajarapacuenia paxamêjava ata paexanaponaeajê. Paxanê panajamatabêcueneveretajê pataexanaenexa mapacueniaje. Paxamê baja xaniavaetsia Dioso itsa pajumecovênêtavanapaename, paxanê pacavecuacapitapaenatsi pamonaê apo jitsipae patanejumecovênêtsinexa Cristo pelivaisi.

⁷ Paxamê raja saya jema pataneme daxitajivi. Nexata daxitajivi pataneme pacuenia Dioso apo pejumecovênêtsivi tane daxitajivi. Nexata apo payapêtaemê pacuenia paxanê pajamatabêcuenetsinê. Pajivi nayapêtane Cristo pijajivitonêcuene, bajarapajivi bepaneyapêtane paxanê ata Cristo papijajivicuenenê.

⁸ Paxamê meta xanê yabara pajamatabêjumaitsimê tsabiabi: “Pablo saya bitso navajunupaebabiaba Dioso pitapetsijavatsi apóstolenênexa,” pajamatabêjamê meta tsabiabi xanê yabara. Dioso baja cajena paneitoroba patacajamatabêcuene asaêyaexanaenexa. Apo paneitorobi patacajamatabêcuene faefaenaeyaxanaenexa. Bajaraxuata apo ajumeuranê tsabiabi tanavajunupaebabiabijava apóstolenêjavanê.

⁹ “Pablo saya nacajamatabêcuenenabenajacaeya exanabiaba vajanacatoyaquinaelivaisianêta,” panejajiva xanê yabara apo jitsipaenê. Tsipaji bajaraxua yabara apo pacatoyaquinaetsi.

¹⁰ Itsamonae xanê yabara jumai tsabiabi: “Pablo ajumelivaisisaêya naca-toyaquinabiabarena. Itsiata bajaraponê itsa patajopa majotaje, vaxaitsijavata, apo ajumesaê tsabiabi. Saya ajumelivaisixaebi tsabiabi,” jai tsabiabi itsamonae xanê yabara.

¹¹ Itsiata baitsi jane pamonaê bajarapacuenia jumai tsabiabi xanê yabara, beyapêtane pacuenia bajarapamonaejavabelia exanaejitsianê itsa papatsialiajê paxamêjavabelia. Pacuenia baja pacatoyaquinaliatsi taexanaenexa paxamêjavabelia, bajarapacuenia exanaenajê paxamêjavabelia.

¹² Palivaisi paxanê pacatsipaebabiabatsi, bajarapalivaisivecua saicayalivaisi itsamonae pacatsipaebabiaba. Bajarapamonae apo canaêjêtsi pacuenia Dioso pejumelivaisibaxutota jumaitsi. Nexata bajarapamonae namataenetsia natane bepexaniajamatabêcuenevi. Nexata pamonaê apo bajarapamonaeayajuvênêvi, bepibisijamatabêcuenevi tane. Saya xua bajarapamonae tsitaxanepanatsi, bajaraxua yabara jumai tsabiabi: “Maxuaje pexaniacuene,” jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: “Maxuaje pibisiacuene,” jai tsabiabi. Bajarapamonae cajena bitso apo yapêtae. Paxanê raja bajarapacuenia apo pajamatabêcuenetsinê.

¹³ Paxanê Dioso paneitoroba Dioso pijacuene patatonacuenebinexa. Nexata panacuanêjava Dioso paneitoroba, bajarapanacuanêjava Dioso pejumelivaisi patsipaebanajetarubenajê. Dioso paneitoroba tajê ata paxamê paCorinto tomarapijivimêjavabelia ata pataponaenexa patacatsipaebinexa

pejumelivaisi. Nexata itsa panavajunupaebabiabajë Dioso patanitorobijava, xuayovajëto Dioso panetocopata patatonacuenebinexa, panavajunupaebabiabajë. Ayailivaisi apo panavajunupaebabiabinë saya itsamonae pataneyaiyataenexa patanavajunupaebijava yabara.

¹⁴ Bajaraxuata itsa papatajë paxamëjavata, pacatsipaebatsi pexanialivaisi, Cristo pelivaisi. Tsipaji bajarapanacuanëjava Dioso paneitoroba pejumelivaisi patacatsipaebinxaxa. Bajarapalivaisi copiaya baja paxanë pacatsipaebatsi.

¹⁵ Itsamonae baja Cristo pelivaisi jumecovënëta itsamonae petsipaebix-aetsi. Nexata Cristo pelivaisi pejumecovënëtsivi yabara najumetsënëtsiyaaya apo pajumaitsinë tsipae mapacueniaje: “Paxanë raja patatsipaebixaxa, bajarapamonae jumecovënëta Cristo pelivaisi,” apo pajanë tsipae. Pacatojitsipatsi panevajënaeyabelia panejumecovënëtanapanaxa Dioso. Nexata pajitsipajë orijibia patacatsipaebavanapanaxa pexanialivaisi, Cristo pelivaisi. Itsiata baitsi jane ëpanacuanëjava Dioso paneitoroba patatsipaebavanapanaxa pejumelivaisi, bajaraëpanacuanëjava patsipaebavanapanajë.

¹⁶ Nexata paxamë majotaje patacatsipaebicujinae, panepënëyabelia penaetomaranëjava ata jamatabëpatsipaebajë pexanialivaisi, Cristo pelivaisi. Apo pajitsipaeenë patatsipaebinxaxa bajarapalivaisi itsaxuayo baja patavajënaeya itsamonae tsipaebapona bajarapalivaisi.

¹⁷ Pajivi itsamonaejavabelia navajunupaeba pexanaejava, benavajunupaeba Dioso peyavenonaejavatsi. Bajarapacuenia benavajunupaeba pejumetaevitsi peyayataenexa Dioso. Bajarapajivi apo benavajunupaebi pijacuata pexanaejava jivi saya peyayataenexatsi.

¹⁸ Pajivi pijacuata navajunupaebabiaba: “Xanë ra bitso pexaniacuene exanabiabajë,” jai tsabiabi, bajarapajivi ajumematamobi. Tsipaji saya pijacuata navajunupaebabiaba. Itsiata baitsi jane pajivi yabara vajatuxanenë jumaitsi: “Mara pajivije xaniavaetsia netoponapona,” jai, nexata tojumematamotatsi.

11

Pablo pelivaisi, penajumetsënëtsilivaisi petsipaebaponaevi ata, yabara pelivaisi

¹ Natsiquejemalivaisi pecuaicuaijainë, xua exana, pijacuata banavajunupaeba itsamonaejavabelia. Bajara pijinia pacuenia xanë ata, xua exanajë, tajacuata pacanavajunupaebijitsiatsi. Bajarapacuenia tajacuata pacanavajunupaebi ata tsanetsi, itsiata jitsipajë xaniavaetsia ajamatabëcuenesaëya patanenamuxunaevetsinexamë.

² Bajarapacuenia pacanavajunupaebijitsiatsi tsipaji bitso pacaasivatsi pacuenia Dioso pacaasiva. Pacatojitsipatsi ëCristo panejitsipaxenaxa. Pacuenia petiriva caenë jitsipa ëpamonanexa, bajarapacuenia caenë Cristo pajitsipare.

³ Bajayata Evapijiva yamaxëitojorobatsi dovathi penajumetsënëtsicueneta. Pacacacujunavatsi paxamë ata bajarapacuenia dovathi papecaya-maxëitojorobiyaniya. Nexata paxamë yabara jamatabëjumaitsinë mapacueniaje: “Dovathi meta jamatabëcuenebijianaenatsi Corinto tomarapijivi. Cristo meta pejitsipaevjavami copabiana,” jamatabëjanë paxamë yabara.

⁴ Pacacacujunavatsi penajumetsënëtsilivaisi petsipaebaponaevi papecatsipaebiyaniya. Tsipaji bajarapamonae pata baja paxamëjavata. Xanë Jesús pelivaisi pacatsipaebabiabatsi. Nexata Jesús pelivaisivecua bajarapamonae

saicayacuenia pacatsipaebabiabi ata, itsiata bajarapalivaisi panamuxunaevetabiabame xaniavaetsia. Espiritu Santo, poné pacatsijamatabēeca, pelivaisi, xanē pacatsipaebabiabatsi. Nexata Espiritu Santo pelivaisivecua saicayacuenia bajarapamonae pacatsipaebabiabi ata, itsiata bajarapalivaisi ata panamuxunaevetabiabame xaniavaetsia. Xanē pacatsipaebabiabatsi pexanialivaisi papecacapanepaelivaisinexa Diosojavelia. Nexata bajarapalivaisivecua bajarapamonae saicayalivaisi pacatsipaebabiabi ata, itsiata panamuxunaevetabiabame xaniavaetsia.

⁵ Pamonae penajumetsēnētsilivaisi pacatsipaebabiaba, ayaijamatabēcuenevi nataeyabiaba. Paxonē paapóstolevinē bajarapamonae bitso panevecuaayaijamatabēcuenevi natane. Itsiata baitsi jāne xanē bajarapamonaevecua beveliajamatabēcuenenēnē apo nataenē.

⁶ Jivijavelia xaniavaetsia livaisi tatsipaebinxexa, apo necujani ata, itsiata xaniavaetsia yapētāniji xua yabara tsipaebajā. Xaniavaetsia Jesús pelivaisi patayapētaejava paneyapētaenexa, pacatsitanajamatabēcuene itajētabiabatsi paxamējavata itsa pacatsipaebavanapatsi Jesús pelivaisi.

⁷ Paxamējavata itsa pacatsipaebaponaponatsi pexanialivaisi papecacapanepaelivaisinexa Diosojavelia, itsacuenejavayo ata paxamējavelia apo pacavajētsitsi. Xanē tacobeta asaēyata nacuenebabiabajā tanaevetsinexa. Bajarapacuenia betajiobicuenia nacuenebabiabajā tanaevetsinexa pamatacabi pacatsipaebaponaponatsi Jesús pelivaisi. Nexata baja pajumecovēnētame Jesús pelivaisi itsamatacabi panexaināenexa matacabi apo peververecaejava.

⁸ Itsamonae Dioso pejumecovēnētsivi itsa netoitoroba palata, itsiata pitājē paxamējavata tanaevetaponaponāenexa bajarapapalatata. Nexata pacayavenonaponaponatsi. Bajarapacuenia paxamējavata naevetaponaponajā. Paxamē apo panerajutsimē palata.

⁹ Nexata pamatacabi paxamējavata ponaponajā, namatavenonae atanē, apo pacavajētsitsi panexaināeyajuvēnējāva patanerajutsinexamē. Itsiata Dioso pejumecovēnētsivi, Macedonia nacuaverena pepatsivi, netocapata daxita tanamatavenonaejava. Bajarapacuenia paxamējavata ponaponajā itsacuenejavayo ata pacavajētsinejevatsi patacajamatabēitonotsiyaniva. Apo najamatabēxaināenē bexējavelia ata patacavajētsinexa.

¹⁰ Yapētāniji Cristo pelivaisi pepacuene pexaniajailivaisicuene. Bajaraxuata daxita Acaya nacuajava Cristo pelivaisi amoneya asaēya tatsipaebaponaejava, sivajamatabēcuenebarēyanē.

¹¹ Itsamonae xanē yabara jamatabēcuenenavēxaniabiaya pacajumaitsi: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonae. Dioso raja yapētane bitso patacaasivajava.

¹² Itsiata tavajānaeyavelia Dioso pejumelivaisi pacatsipaebaponāenatsi pacavajētsinejevatsi itsacuenejavayo ata. Pamonae penajumetsēnētsilivaisi pacatsipaebabiaba, bajarapamonae pacamatamoyanijobabiaba papecatsipacibatamo. Bajarapacuenia papecamatamoyanijobabiabixae, nexata toacuenebitsi pevajānaeyavelia papecajumaitsamoyaninexa: “Paxonē ata patonacuenebavanapajā Dioso pacuenia Pablo tonacuenebaponāona Dioso,” papecajainexa.

¹³ Bajarapamonae apo pepo apóstolevi. “Paxonē raja paapóstolevinē,” itsa pacajai, saya raja pacayamaxēitojoroba. Paxonē Cristo pipijajivinē, paapóstolevinē, bajarapamonae saya panecuenecataeya apóstolevi naexana.

¹⁴ Paxamē apo bebasivajamatabēcuenenabenajacaemē bajarapamonae. Bajarapacuenia saya bajarapamonae exanavanapa

papecayamaxëitojorobinexa. Dovathi raja caëjëpatsi Dioso bepijaängelnë penaexanaenexa, bepexaniajailivaisi itajara petsipaebinë jivi petaenexatsi.

¹⁵ Nexata dovathi pijijivi ata pexaniacuene itajara exanavanapae ata, itsi-ata apo besivajamatabëcuenenabenajacaetsi. Paneconivajëto bajarapamonae xaina, bajarapaneconivajëto itsamatacabi Dioso naneconitsiaexanaena bajarapamonae.

Pacuenia Pablo apóstolenëxae nabejibotsiaponapona yabara pelivaisi

¹⁶ Icatsia pacajumaitsitsi. Xua aeconoxae pacajumai tsanetsi, bajaraxua yabara pëtsa panetaneme betanematajemabinë. Bajarapacuenia panetae atamë, itsiata panenamuxunaevere palivaisi pacatsipaebijitsiatsi. Pacuenia peyamaxëitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanë ata ajumeurajibia pacanavajunupaebijitsiatsi pataneyaiyataenexamë.

¹⁷ Vajatuxanenë picani apo nitorobi patacanavajunupaebinexa. Itsiata pacuenia pematajemabinëtsi ajumeurajibia banavajunupaeba xua exana, bajarapacuenia xanë ata aeconoxae ajumeurajibia pacanavajunupaebijitsiatsi pataneyaiyataenexamë.

¹⁸ Pamonaë peyamaxëitojorobiapóstolevi, ayaijamatabëcuenevi nataeyabiaba. Nexata ajumeurajibia pacanajamatabëcuene vajunupaebabiaba bajarapamonae. Nexata xanë ata bajarapacuenia ajumeurajibia pacanajamatabëcuene vajunupaebijitsiatsi.

¹⁹ Paxamë bitso ayailivaisi bepaneyapëtaevi panataneme. Itsiata apo payapëtaemë. Tshipaji saya jamatabëcuenebarëyaya panamuxunaevetabiabame palivaisi pacatsipaebabiaba peyamaxëitojorobiapóstolevi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebabiaba peyamaxëitojorobiapóstolevi.

²⁰ Bajarapamonae bepapijavitonëmëcuenia pacaitorobabiabi ata, itsi-ata xaniavaetsia panamuxunaevetabiabame. Panexinaejaxaxi pacavecuaveretaponae ata, itsiata xaniavaetsia panamuxunaevetabiabame. Bijiyaya pacanaëcotabiabi ata, itsiata xaniavaetsia panamuxunaevetabiabame. Pacaitabarapacababeyabiabi ata, itsiata xaniavaetsia panamuxunaevetabiabame.

²¹ Paxanë bajarapacuenia apo pacaexanaetsi pamatacabi pajinavanapajë paxamëjavata.

Xua yabara bajarapamonae ajumeurajibia pacanavajunupaebabiaba, xanë ata necaëjëpa bajarapitsicuene yabara ajumeurajibia patacanavajunupaebinexa pataneyaiyataenexamë.

²² Bajarapamonae ayaijamatabëcuenevi nataeya itsa pacanavajunupaebabiaba, pacajumai tsabiabi paneyaiyataenexa: “Paxanë raja pajudïovinë,” pacajai tsabiabi. Xanë ata raja judïonënë. Itsiata bajarapacuenia apo pacajumaitsitsi pataneyaiyataenexamë. Bajarapamonae pacajumai tsabiabinua: “Paxanë raja Israelpijinë papemomoxinë,” pacajai tsabiabi. Xanë ata raja Israelpijinë pemomonë. Itsiata bajarapacuenia apo pacajumaitsitsi. Bajarapamonae pacajumai tsabiabinua: “Paxanë raja Abrahampijinë papemomoxinë,” pacajai tsabiabi. Xanë ata raja Abrahampijinë pemomonë. Itsiata bajarapacuenia apo pacajumaitsitsi.

²³ Bajarapamonae Cristo bepijajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponapojë. Xanë picani apo jitsipænë patacanavajunupaebinexa. Itsiata Cristo tatonacuenebaponaponaëjava, xanë ajumeurajibia pacanavajunupaebijitsiatsi. Pacuenia pematajemabinëtsi ajumeurajibia banavajunupaeba

xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsije. Xanë bitso Cristo tonacuenebapononajë bajarapamonae matatoxenetsia. Bajarapamonae matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonae matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonae matatoxenetsia anijatonë imoxo tanebeyaxuababiabi.

²⁴ Cinco xuabeje judiövi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y nueve xuabeje nejumaconibabeyabiaba caenevaetabita. ²⁵ Acueyabi icatsia xuabeje apo judiövi nevaetaba tanenaneconitsiaexanaenexa. Bajaraxuanë saicaya naebota nejumaconibabia. Icatsia itsamatacabijavabelia caeto judiövi ibotonëta netsecona. Acueyabi pijinia panamutobeje menia barcota tanaponaejavata, acueyabi xuabeje nayabubunajë manuameneta. Caepayajopaetanë, caemeravi, caematacabi yajava, manuameneta juenajetarucajë.

²⁶ Xanë ayaicuenia jinarutabiabajë Cristo pelivaisi jivi tatsipaebapon-aenexa. Nexata itsajavata netsiayai tsabiabi menia taponabiabijava. Itsajavata namutua itsa ponajë, netsiayai tsabiabi tanevecuanacobetoxotsinexa tacobecovëjavaxi. Itsajavata netsiayai tsabiabi tajanacuapijivi taneitsacueniabinexa. Itsajavata netsiayai tsabiabi saicayanacuapijivi taneitsacueniabinexa. Itsajavata netsiayai tsabiabi tomaranëjava, petusato nacuanëjava ata, manuamenejava ata. Itsajavata netsiayai tsabiabi pamonaejava Dioso bepejumecovënëtsivi penataevijava.

²⁷ Itsajavata bitso nacuenebabiabajë. Cueranabiabajënuu. Itsajavata apo majitabiabinë. Itsajavata bitso tajani tsabiabi. Meranua jitsipabiabajë. Itsajavata taxaejava xaenejevanë ponaponabiabajë. Itsajavata bitso aquenë tsabiabi apo taxainaexae tanaxatatsijava.

²⁸ Bajaraxua icatsia pematatsënëa mapacueneye. Caematacabi canacujitsia bitso sivanajamatabëxainabiabajë caetomarapijivi canacujitsia, Dioso pejumecovënëtsivi.

²⁹ Pajivi jamatabëcuenecuerana Dioso pejumecovënëtsijava, xanë ata siva-jamatabëcuenecueranabiabajë. Pajivi itsajivi pejamatabëcueneta pibisiacuenexanaeyaexanatsi pejopaenexa Dioso pejumelivaisivecua, bajarapajivi yapijiviauranë tsabiabi Diosojavabelia. Baraanaepanabiabajënuu pajivi pejamatabëcueneta jopaeayaexanatsi.

³⁰ Itsajivi itsa nitoroba tanajamatabëcuenevajunupaebinexa, nexata najamatabëcuenevajunupaebianajë tanajamatabëcueneitajëtsinexa tajamatabëcuenefaefaenaejava.

³¹ Vajatuxanenë Jesucristo paxa Diosojavabelia pexaniajamatabëcuene berajutabiabatsi dexitamatacabijavabelianexa. Dioso baja cajena yapëthane jivi tatsipaebilivaisi pexaniajaicuenene.

³² Imata ponaponajë Damasco tomarata. Nexata pepo iraevetsinë, Aretasvënënë, eveta bajarapaira. Nexata pijajivitonë eveta Damascotomara. Damascotomara matatoyorotsia yacaranata piaitayaëibopanaxanetota. Bajara payacaranatsijavaxaneto ibopananë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavaxaneto apia. Nexata Damascotomara pevetsinë pijajivi itoroba tanevajënaeevetsinexa pabaupajava pitsapaajtitsianë picani bajarapatomaravecua. Bajaraponë itoroba pijajivi tanevaetabinexa tanecaponaenexa picani penaneconitsivi pejebabiabiboyabelia.

³³ Itsiata baitsi jane itsamonae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatoyorotsia peyacaranatsi ibopanaxanetojumabelia neyamäeyacopareca athëbëyo perucaeventanavojotualia. Bajarapacuenia Damasco tomarata vecuapanepajë Damascotomara pevetsinë pijajivi.

12

Pacuenia Pablo navajunupaeba bemajitsinaebota vajatuxanenë petsitanaitajëtabiibijavatsi yabara pelivaisi

¹ Apo netsitaxanepanae picani ajumeurajibia patacanavajunupaebinxä. Itsiata baitsi jane pamona peyamaxëitojorobiapóstolevi, ajumeurajibia pacanavajunupaebabiaba saya paneyaiyataenexa. Nexata xanë ata ajumeurajibia pacanavajunupaebatsi bemajitsinaebota vajatuxanenë Jesucristo tanetsitanaitajëtabiibijava. Neyapëtaeyaexananua pajamatabëcuenelivaisi xaina xuanë ata netsitajëtabiaba.

²⁻³ Catorce pavaibeje xainajë tanecapanepaecujinae athëbëabetsia Dioso pijanacuayabetsia. Apo nayapëtaenë athëbëabetsia tanecaponaejava taperabëto yajava. Itsa jume, ëtajamatabëcuene meta saya capona. Caenë Dioso yapëtane pacuenia necapona athëbëabetsia.

⁴ Itsiata necapona paraísojavabetsia. Bajararajotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinëxa itsajivi ata.

⁵ Bajarapacuenia athëbëabetsia tanecaponaejava tanavajunupaebinxä, necaëjëpa picani jivi taneyaiyataenexa. Itsiata apo navajunupaebabiabinë tsane bajaraxua. Ètasaëjibijava saya navajunupaebabiabianajë.

⁶ Ayailivaisi picani xainajë ajumeurajibia tanavajunupaebaponaenexa pacuenia tani athëbëtatsia. Ajumeurajibia itsa navajunupaebaponaejitsipajë, apo navajunupaebaponaenë tsipae betanematajemabinëcuenia. Tsi-paji ëpexaniajalivaisi navajunupaebaponaejitsipajë. Itsiata baitsi jane apo navajunupaebaponaenë tsane daxita xua yapëtaniji. Tsi-paji apo jitsipaanë bajarapalivaisita jivi taneyaiyataenexa. Biji rajane jitsipajë jivi taneyaiyataenexa taexanaponaejava yabara, livaisi tatsipaeaponaejava ata yabara.

⁷ Dioso netocopata tanavixaetaeyabinexa. Bajarapacuenia Dioso netocopata tanavixaetaeyabiabinexa tajacuata tanabarajamatabëjumaitsiyaniva mapacueniaje: “Xanë baja cajena pinijicuene Dioso netsitajëtabiaba xua itsajivi ata apo tae. Bajaraxuata bitso xanë ayaijamatabëcuenenënë daxitajivi matatoxenetsia,” tanabarajamatabëjayaniva, Dioso netocopata tanavixaetaeyabiabinexa. Dioso netocopata dovathi pejamatabëcueneta tanevixaeitonotabiabinexa daxitamatacabi.

⁸ Diosojavabelia picani vajëtajë acueyabi xuabeje tanevecuajibiaexanaenexa bajarapavixae.

⁹ Itsiata baitsi jane vajatuxanenë nejumaitsi mapacueniaje: “Jume. Apo cavecuajibiaexanaetsi tsane. Bitso casivatsi. Nexata cayavenonaenatsi daxita xua namatavenoname. Pajivi apo jamatabëcueneceajëpae atatsi pesaëta tanetonacuenebinexa tajacuene, itsiata baja itsa caëjëpatsi tanetonacuenebinexa, nayapëtane tayavenonaecuenë,” nejai vajatuxanenë. Bajaraxuata vajatuxanenë pijacuene tatonacuenebinexa, xanë tasaëta apo tanejamatabëcueneceajëpaejava, nasivajamatabëcuenebarëyanë. Tsi-paji Cristo pesaëta neyavenonabiaba daxitacuene yabara.

¹⁰ Apo tanejamatabëcueneceajëpaeaxae tasaëta tatonacuenebinexa vajatuxanenë pijacuene, nasivajamatabëcuenebarëyanë tsabiabi.

Itsamonae pibisiacuenia itsa nebijataeyabiaba Cristo pijajivitonëxaenë, nasivajamatabëcuenebarëyanë tsabiabi. Itsacueneyavaxi itsa namatavenonabiabajë, itsiata nasivajamatabëcuenebarëyanë tsabiabi. Itsamonae itsa nebejiobiaexanabiaba Cristo pijajivitonëxaenë, itsiata nasivajamatabëcuenebarëyanë tsabiabi. Itsa netsiayapëbeje tsabiabi tatonacuenebinea Cristo pijacuene, itsiata nasivajamatabëcuenebarëyanë tsabiabi. Tsipaji paepatota apo nejamatabëcuenecajëpae, bajarapaepatota vajatuxanenë bitso nejamatabëcueneavenonabiaba.

Pacuenia bitso Pablo sivanajamatabëxaina Dioso pejumecovënëtsivi, Corinto tomarapijivi, yabara pelivaisi

¹¹ Pamonae peyamaxëitojorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinëtsi banavajunupaeba ajumeurajibia. Bajarapacuenia xanë ata navajunupaebajë. Apo jitsipañë picani tanavajunupaebinea. Paxamë xaniavaetsia itsa panevajunupaebijitsipame pacuenia exanapononajë paxamëjavata, nexata xanë tajacuata apo navajunupaebinë tsipae. Beveliajamatabëcuenenë atañë, itsiata pamonae peyamaxëitojorobiapóstolevivecua, xanë apo beveliajamatabëcuenenënë.

¹² Paxamëjavata itsa ponaponajë, netsiayapëbeje ata, bajayajebi pacatsitaexanapononatsi pacuenia Dioso nitoroba. Pacatsipaebaponaponatsi Jesús pelivaisi. Nexata pacatsitaexanabiabatsi pinijicune taexanaejava Dioso pesaëta. Nexata paneyapëtaneme Dioso taneyavenonabiabijava.

¹³ Pacuenia taniji daxita Dioso pejumecovënëtsivi, bajarapacuenia paxamë ata pacatanetsi. Nexata itsamonae Dioso pejumecovënëtsivivecua bepaveliajamatabëcuenevimë, apo pacataetsi. Itsamonae Dioso pejumecovënëtsivi, neyavenonabiaba itsajota namatavenonajë. Itsiata bajarapacuenia paxamë ata pataneyavenonaenexamë, apo pacavajëtsitsi. Pamatacabi ponaponajë paxamëjavata, apo pacavajëtsitsi itsacueneyavayo ata. Pëtsa itsiata bajaraxua pasivanajamatabëxainame. Biji rajane pasivajamatabëcuenebarëyamëre itsacueneyavayo ata apo patacavajëtsijava.

¹⁴ Mabaja panamutotaje, acueyabi namuto taponae nexa paxamëjavabelia naxaniavaetaponaponajë baja. Itsiata apo pacamatamoyanijobi tsanetsi Dioso pejumelivaisi patacatsipaebimatamo. Tsipaji palata apo jitsipañë. Jitsipajë rajane xaniavaetsia panejumecovënëtsinexa Dioso. Bepafaximë pacatanetsi. Pacuenia pejevaxi paxajavabelia apo rajutsi palata paxa penaevetsinexa, bajara pijinia pacuenia paxamë ata apo panerajutsimë palata tanaevetsinexa.

¹⁵ Xanë patacayavenonaenexa, mapacuenia exanaejitsipajë. Daxita taxainaejavami, veretsipajë jamatabëcuenebarëyaya. Tasaëtsaponaponaepatojebi abaxë mapanacutajë, pacayavenonabiabijitsipatsi. Bajarapacuenia pacayavenonabiabijitsipa patacajamatabëcueneavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva tsaponae atatsi, itsiata covë paxamë juya bevelia saya paneasivamë tsaponae.

¹⁶ Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabi: "Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipaebimatamo. Itsiata Pablo piatatsacanë. Nexata meta itsacuenia nacayamaxëitojorobiaya nacavecuapitabiaba palata," jai tsabiabi itsamonae xanë yabara.

¹⁷ Itsanë ata cajena, paxamëjavabelia xanë taitorobiviyajuvënënë, yamaxëitojorobiaya palata apo pacavecuapitsi.

18 Itorobajë baja Tito peponaenexa paxamëjavabelia papecataenexa. Itorobajëna itsanë Dioso pejumecovënëtsinë Tito peyajavaponaenexa. Nexata pamatacabi Tito ponapona paxamëjavata, ¿pacavajëta tsaja palata? Jume. Apo pacavajëtsi cajena. Paxanëbeje Titobeje panajamatabëcuenejëpajëbeje. Nexata panacuenejëpajëbeje.

19 Panesivajamatabëjumaitsimë raeta: “Bajarapacuenia Pablobana nacanajamatabëcuenelivaisipaeba saya penayajivicuaicuaijainexa vaxaitsi vajananeconitsiaexanaeyaniva,” panesivajamatabëjamë raeta. Bajarapacuenia itsa pacanavajunupaebatsi, apo pacanavajunupaebitsi patacujunavixae patanenaneconitsiaexanaejavamë. Pacatsipaebatsi raja Dioso pitabarata pacuenia Cristo panetojitsipa. Tajamonae bitso patacaasivavi, daxita palivaisi baja pacatsipaebabiabatsi, pacatsipaebabiabatsi patacajamatabëcuene yavenonaponaenexa. Nexata bajarapalivaisi panevajënaeyabelia pacatsijamatabëvitsabaponaena Dioso pajijavixamë.

20 Pamatacabi ponaenajë paxamëjavabelia, bitso meta najamatabëxainae patsianajë paxamëjavata. Aeconoxae pajitsipame tapatsinexa paxamëjavata. Itsiata meta itsa patsianajë paxamëjavata, apo pajitsipaemë tsane patacananeconitsiaexanaenexa. Tsipaji meta apo pacacaxitajarabi tsanetsi pexaniacuenia panejinavanapaejavata pacuenia pacatojitsipatsi. Itsa patsianajë paxamëjavata, pacataenatsi meta panenajumeanaenotabiabijava. Pacataenatsi meta panenacaëbabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyo ata. Pacataenatsi meta itsamonae pepëya pibisiacuenia najumetsenëtsia panebaracuaicuaijaisabiabijava ata. Pacataenatsi meta itsamonaevecu paayajamatabëcuenevimë panenataeyabiabijava ata. Pacataenatsi meta apo panenajamatabëcuenejëpaexae navecuanatsanaeya panejinavanapaejava ata.

21 Paxamëjavata icatsia itsa patsianajë, Dioso meta pitabarata pacayapijivaura tsanetsi pibisiacue neeexanavanapaejava yabara. Bajaraxuata bitso pacasivanajamatabëxainatsi icatsia patacataenexalia. Tsipaji itsa apo pajinavanapaemë tsane pacuenia pacaitorobatsi, patacasivajamatabëcuenebarëyajavami, nevecuaajibi meta tsane. Paxamëyajuvënëvi bajayatajavaverenacujinae pibisiacue pexanavanapaxae, sivajamatabënuenajë. Bajarapamonae pibisiacue pexanavanapaejava pevitota, apo sivajamatabëcuenebëjai. Apo jamatabëcopatsinua pibisiacue pexanavanapaejava pevitota.

13

Pacuenia icatsia Pablo itaveta Corinto tomarapijivi Diosojavabelia pananeconitsiyanima yabara pelivaisi

1 Aeconoxae baja icatsia ponaejitsianë paxamëjavabelia acueyabi namutonexa. Pibisiacue pexanaejivi yabara, Dioso pejumelivaisibaxutota jumaitsi mapacueniaje: “Pajivi pibisiacue exana, xanepana pevajunupaebinxatsi anijajivibeje, acueyabi pajivibeje ata, petaevitsi. Nexata xuacujinae xanepana jane baja pananeconitsiaexanaenexatsi,” jai Dioso pejumelivaisibaxutota. Nexata paxamëjavabelia itsa patsianajë, bajarapacuenia xanë pacananeconitsiaexanaenatsi.

2 Imata panamutomi pacaitavetatsi daxita paxamë pibisiacue paneexanavanapaejava panecopatsinexa, Diosojavabelia panenaneconitsiyanima.

Bajrapacuenia itavetajë itsamonae ata pibisiacuene pexanavana-paeyaniva. Aeconoxae tajë pacavecuaponaponae atatsi, pacatoyaquinatsi icatsia patacaitavetsinexa pibisiacuene paneexanaeyaniva. Icatsia paxamëjavabelia itsa patsianajë, pacananeconitsiaexanaenatsi padaxitammë. Caeviji ata apo bejobiataenë tsane pibisiacuene pexanaeconi yabara.

³Itsa pacananeconitsiaexanaenatsi, ajumesaenë tsane patacananeconitsiaexanaenexa. Nexata bajarajota xaniavaetsia paneyapëtaename tayajavacuaucaijajitsabiabijava Cristo. Cristo baja cajena pijamatabëcuenesaëjjava, pacatsitanajamatabëcueneitajëta itsa pacayavenonaponapona paxamëjavata.

⁴Xaniajai rabaja. Pacuenia vaxaitsi mapanacuapijivitsi ajamatabëcuenesaëjibitsi, bajara pijinia itsi Cristo ata mapanacuata itsa naexana pacuenia vaxaitsi banaexanatsi. Nexata Cristo cruzata itsa beyaxuabatsi, Dioso pesaëta icatsia asaëyaexanatsi petëpaecujinae. Paxanë pajamatabëcuenesaëjibi atanë, itsiata aeconoxae Dioso pesaëta Cristo pajayavajnavanapajë patacajamatabëcuenevaxanaenexa.

⁵Jica jane. Panajamatabëcuenelivaisiëjere itsa xaniajai pepacueni Cristo papijajivimë. Itsa pepacueni Cristo papijajivimë, nexata payapëtaename Cristo papepayajavaponaponaejava. Itsa Cristo apo papijajivimë, nexata Cristo apo pacayajavaponaponae.

⁶Paxanë pajamatabëjumaitsinë paxamë yabara mapacueniaje: “Corinto tomarapijivi vaxaitsi itsa nacacuenecanaëjëtisiana, xaniavaetsia yapëtaena pepacueni Cristo pijajivicuenetsi,” pajamatabëjanë.

⁷Pacatovajëtaponatsi Diosojavabelia pibisiacuene paneexanaponaeayaniva. Bajrapacuenia itsa pacatovajëtaponatsi Diosojavabelia, itsajamatabëcuene apo pacasivanajamatabëxainatsi. Nexata apo pajamatabëjumaitsinë paxamë yabara: “Itsa bajarapamonae xaniavaetsia jinavanapaena, nexata pijinia daxitajivi nacayapëtaena pepacueni apóstolevicuenetsi,” apo pajamatabëjanë paxamë yabara. Bajrapacuenia Diosojavabelia pacatovajëtatsi tsipaji pacatojitsipatsi ëpexaniacuene paneexanavanapaejava. Xaniavaetsia itsa pajinavanapaename, nexata itsa papatsianajë paxamëjavabelia, ajibi tsane patacayabarananeconitsiaexanaejava. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane.

⁸Tsipaji acuenebi patananeconitsiaexanaejava pajivi baja jumecovënëta pexaniajailivaisi, Jesucristo pelivaisi. Pananeconitsiaexanaenajë ëpijaneconi pexainaevi.

⁹Aneconijibia itsa pajinavanapaename, acuenebi patacananeconitsiaexanaenexa. Itsiata pacasivajamatabëcuenebarëyatsi. Tsipaji apo paxainaevi paneconi yabara pacananeconitsiaexanaejitsiatsi. Pacatovajëtaponatsinua Diosojavabelia panevajënaeyabelia panejamatabëcuenevitsabaponaenexa Dioso panejumecovënëtsijava.

¹⁰Pacatoyaquinaliatsi mapabaxutoje taponaevajënaeya paxamëjavabelia tavajënaetia panenajamatabëcuenevaxanabinexa pibisiacuene paneexanaejavavecuca. Nexata itsa patajopaeliajë paxamëjavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinënexa. Nexata itsa patsialiajë paxamëjavabelia, apo jitsipañë tsane patacananeconitsiaexanaenexa. Biji rajane jitsipajë patacajamatabëcuene saëyaexanaejava panevajënaeyabelia panejamatabëcuenesaënexa Dioso panejumecovënëtsijava.

¹¹Tajamonae, pajamatabëcuenebarëyamëre tsavanapae. Panevajënaeyabelia panajamatabëcuene vitsabiaexanaponare Dioso

panejumecovënëtsijava. Panamuxunaevere palivaisi pacatoyaquinaliatsi. Najamatabëcuenejëpaeya pajinavanapare jamatabëcuenexanepanaeya. Dioso vajanacaasivanë. Bajaraponë jamatabëcuenexanepanaeya nacajinavanapaeyaexana. Nexata Diosojavabelia pacatovajëtabiabatsi Dioso papecayajavaponaponaenexa.

¹² Paxamë ata Dioso panejumecovënëtsixae, xaniavaetsia nasivaya namataenetsia panabajacobabiabare.

¹³ Daxita pamonaë Dioso pejumecovënëtsivi, majota pejinavanapaevije, pacabajacobalia.

¹⁴ Pacatovajëtabiabatsi Diosojavabelia vajatuxanenë Jesucristo papecayavenonabibinexa. Pacatovajëtabiabatsinua itsamonae ata asivaya panetaenexa pacuenia paxamë ata Dioso pacaasiva. Pacatovajëtabiabatsinua Espiritu Santo ata papecayajavaponaponaenexa.

Mapabaxutoje San Pablo toyaquina Galacia nacuapijivijavabelia

Pacuenia Pablo toyaquina mapabaxutoje Dioso pejumecovënëtsivi, Galacia nacuapijivijavabelia, yabara pelivaisi

¹ Xanë Pablonë, apóstolenënë. Jivi pejamatabëcueneta apo nitorobi tatsi-paebaponaenexa Jesucristo pelivaisi. Nitorobabeje raja Jesucristobeje, paxa Diosobeje, ponë icatsia Jesucristo asaëyaexanatsi petëpaecujinae.

² Pacatoyaquinatsi mapabaxutoje paGalacia nacuapijivimë, Dioso panejumecovënëtsivi. Daxita majota Dioso pejumecovënëtsivi pacajamatabënajinalia.

³ Pacatovajëtabiatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

⁴ Pacuenia vaxa Dioso itorobatsi, vajatuxanenë Jesucristo pijacuata tonacaeveta pebexuabinexatsi pibisiacuene vaxaexanaecononi yabara. Nexata Jesucristo pejamatabëcueneta vaxa Dioso aneconijibia nacatane.

⁵ Bajaraxuata vaxaitsi Diosojavabelia jumaitsitsi tsabiabi: “¡Xamë Diosomë, bitso ayaijamatabëcuenenëmë!” jaitsi tsabiabi daxitamatacabijavabelianexa. Bajara itsi tsane.

Pacuenia baja Jesús pelivaisivecua pematatsënëa ajibi itsalivaisi jivi peca-paxepaelivaisinexatsi yabara pelivaisi

⁶ Paxamë saya caematacabibecejinae, pacopabame Dioso panejumecovënëtsijava. Bajaraxuata xanë bitso pacasivajamatabëcuene nabena-jacatsi. Jesucristo picani pejamatabëcueneta, Dioso pacaitaxutotsoni-atane itsa pacajunata papecacapanepaenexa. Itsiata baja aeconoxae jamatabëcuenenavëxaniabiaya pavecuanajamatabëcuene pënëyorotame saicayalivaisijavabelia, bepaecacapanepaelivaisinexa itajara panejumetaexae.

⁷ Itsiata baitsi jane baja pematatsënëa ajibi itsalivaisi papecacapanepaelivaisinexa. Itsamonae pata paxamëjavata livaisi papecatsipaebineja. Bajara-pamonae pata papecajamatabëcuene naepatajërëcaeyaexanaenexa. Bajarapa-monae saicayalivaisi jamatabëpacatsipaebapona panecopabinexa panejumecovënëtsijava pexanialivaisi, Jesucristo pelivaisi.

⁸ Copiaya baja cajena paxanë pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia. Nexata acuenebi paxanë pataitothianaenexa bajarapalivaisi. Athëbëvetsica pepatsinë ata tsipae, ángelnë, acuenebi piaithianaenexa bajarapalivaisi. Jesucristo pelivaisivecua, saicayalivaisi, itsa pacatsipaebijitsipatsi, nexata Diosojavabelia pananeconitsipajë. Nexata Dioso pananeconitsiaexanaejitsipa daxitamatacabijavabelianexa.

⁹ Copiaya baja cajena pacuenia pacatsipaebatsi, bajara icatsia pacuenia aeconoxae ata pacatsipaebatsi. Pajivi Jesucristo pelivaisivecua, saicayalivaisi pacatsipaeba bepaecacapanepaelivaisinexa itajara, nexata bajarapa-jivi Dioso naneconitsiaexanaenatsi daxitamatacabijavabelianexa. Tsipaji pacacopatsiaexana panejumecovënëtsijava pexanialivaisi, Jesucristo pelivaisi.

¹⁰ Payapëtaneme rabaja xua yabara bajarapacuenia pacajumaitsitsi. Bajarapacuenia itsa pacajumaitsitsi, apo pacajumaitsitsi saya jivi tanesivabarëyanexa. Jume cajena. Jivi apo nesivabarëya ata Jesucristo pelivaisi jivi

tatsipaebaponaejava yabara, itsiata jitsipajë jivi tatsipaebinexa Jesucristo pelivaisi, Dioso tanesivajamatabëcuenenarëyanexa. Saya jema jivi livaisi itsa tsipaebijitsipajë saya tanesivabarëyanexa, nexata pacuenia Jesucristo nitoroba, apo tsipaebaponaenë tsipae. Nexata Jesucristo apo pijajivitonënë tsipae.

Pacuenia Pablo Dioso junatatsi apóstolenënexa yabara pelivaisi

¹¹ Tajamonaë, jitsipajë patacatsipaebinexa mapalivaisije. Palivaisi tsi-paebaponaë jivi pecapanëpaelivaisinexatsi Diosojavabelia, bajarapalivaisi itsajivi ata pejamatabëcueneta apo pexanaelivaisi.

¹² Itsajivi ata cajena bajarapalivaisi apo netsipaebi. Jesucristo raja neyapëtaeyaexana bajarapalivaisi. Nexata Jesucristo nitoroba jivi tatsipaebaponaenexa bajarapalivaisi.

¹³ Panevënëlivaisitaneme rabaja pacuenia exanaponaponajë pamatacabi abaxë jumecovënëtajë Dioso Moiséspijinëta penajumecopatsilivaisi. Bajarapalivaisi Dioso Moiséspijinëta najumecopata pajudíovinë patajumecovënëtsinexa. Panevënëlivaisitanemenua pacuenia barajinabiabajë Jesucristo pijajivi. Apo itaxutobejiobiataeyabiabinë cajena tsiquirijavayo ata. Jamatabëverebiaxuababiabajë Jesucristo pijajivi.

¹⁴ Xanë abaxë itsa pevëjëatonë, jumecovënëtajë bitso Dioso Moiséspijinëta penajumecopatsilivaisi. Xanë bitso asaëyata jumecovënëtsiaponaponajë bajarapalivaisi pitorobicuenia. Daxita pamonaë pevëjëavi judíovi, Israel nacuapijivi, matatoxenetsia xanë bitso casaenë tajumecovënëtsijava bajarapalivaisi.

¹⁵ Itsiata baitsi jane tanaexanaevajënaeya ata, Dioso nitapeta Jesucristo tajumecovënëtsinexa. Dioso taneitaxutotsoniataexae, nejunata apóstolenëxanë.

¹⁶ Nexata pamatacabi ponajë Damasco tomarabelia, namutoepatota Dioso netsitajëta pexënato. Nexata Dioso neyapëtaeyaexana pexënato pelivaisi. Bajarapacuenia Dioso pexënato pelivaisi neyapëtaeyaexana tatsipaebaponaenexa apo judíovijava. Nexata Dioso taneyapëtaeyaexanaecujinae pexënato pelivaisi, apo ponaenë itsajivijavabelia ata tayanijobinexa Dioso pexënato pelivaisi. Apo ponaenë tanemuxujobinexanua Dioso pexënato pelivaisita.

¹⁷⁻¹⁸ Pamatacabi namutoepatota Dioso netsitajëta pexënato, apo naviatecaenë Jerusalén tomarabelia tayanijobinexa pamonaëjavabelia xanëvecua coplaya exanatsi apóstolevi. Biji rajane rovia paliajë Damasco tomarabelia. Nexata Damasco tomarata tapatsicujinae, caenënë ponajë Arabia nacuayabelia, petusato nacuayabelia. Nexata petusato nacuata Dioso xaniavaetsia neyapëtaeyaexanapona pexënato pelivaisi. Bajaraxuacujinae icatsia bexëa Arabia nacuaverena naviarenaë Damasco tomaraberena. Bajaraxuacujinae tapuaxainae baja acueyabi pavaibeje tajumecovënëtsicujinae Dioso pexënato pelivaisi, ponajë jane baja Jerusalén tomarabelia apóstolenë Pedro tacaxitajarabinexa. Nexata Jerusalén tomarata, Pedrojavata, naponaponajë quince pamatacabibeje.

¹⁹ Itsiata Jerusalén tomarata pematatsënëa itsaapóstolenë apo taenë. ËSantiago saya, vajatuxanenë pejuyapijinë, taniji.

²⁰ Xaniavaetsia pacajumaitsitsi Dioso pitabarata. Palivaisi pacatoy-aquinatsi, pexaniajailivaisi cajena.

²¹ Jerusalén tomarata taponaponaecujinae, ponajë icatsia Siria nacuayabelia Jesucristo pelivaisi jivi tatsipaebaponaenexa. Ponajë Cilicia nacuayabelia ata.

²² Jesucristo pelivaisi jivi itsa tsipaebanajetarucajê, Jesucristo pelivaisi pejumecovênêtsivi, Judea nacuapijivi, abaxê apo neyapêtae. Tsipaji abaxê Judea nacuata apo tsipaebaponaenê Jesucristo pelivaisi.

²³ Bajarapamonae saya nevênêlivaitsitane itsamonae xanê yabara pejumaitsijava: “Ponê pina nacabarajinabiaba Jesucristo pelivaisi vajajumecovênêtsivi, aeconoxae pina baja bajaraponê ata jumecovênêta. Nexata pina itsamonae ata pejumecovênêtsinexa Jesucristo pelivaisi, bajaraponê tsipaebapona. Bajarapalivaisi yabara bajaraponê jamatabênacaverebiaxuaba picani,” pejaijava, itsamonae xanê yabara nevênêlivaitsitane Judea nacuapijivi, Jesucristo pelivaisi pejumecovênêtsivi.

²⁴ Bajaraxuata Judea nacuapijivi, Jesucristo pelivaisi pejumecovênêtsivi, jumai tsabiabi Diosojavabelia: “Diosomê, bitso ayaijamatabêcuenenê. Tsipaji Pablo ata najamatabêcuenecopatsiaexaname nexênato Jesucristojavabelia,” jai tsabiabi xanê yabara.

2

Pacuenia Pablo pevêna apóstolevi Jerusalén tomarata xaniavaetsia copiapi-tatsi yabara pelivaisi

¹ Jerusalén tomarata naropotajê Jesucristo pelivaisi jivi tatsipaebanajetarucaenexa Siria nacujava, Cilicia nacujava ata. Nexata Jesucristo pelivaisi jivi tatsipaebanajetarucaecujinae bajarapanacuabejjava, catorce pavaijecujinae matapania icatsia patajê tacovêyaberena, Jerusalén tomarata. Bernabêbeje Titobeje barêpatajê.

² Patajê Jerusalén tomarata tsipaji Dioso nitoroba tapatsinexa Jerusalén tomarata. Nexata Jerusalén tomarata Dioso pejumecovênêtsivi êpenamatacaitorobivi penacaetuatsijavata, navajunupaebajê bajarapamonaejavabelia. Bajarapacuenia navajunupaebajê Dioso pejumecovênêtsivi penamatacaitorobivijavabelia, taneyapêtaenexa Jesucristo pelivaisi tatsipaebaponaejava apo judíovijava pecapanepaelivaixinexatsi Diosojavabelia. Bajarapacuenia navajunupaebajê Dioso pejumecovênêtsivi penamatacaitorobivijavabelia tsipaji jamatabêjumaitsinê: “Maraeta pamonae apo pejitsipaecuenia, tsipaebaponajê apo judíovijavaje,” jamatabêjanê. Itsiata baitsi jane Dioso pejumecovênêtsivi penamatacaitorobivi, tsitaxanepanatsi pacuenia tsipaebaponajê apo judíovijava.

³ Bajarapacuenia tanavajunupaebixae, taneyanabinê Tito, apo judionê ata, Dioso pejumecovênêtsivi penamatacaitorobivi pajudíovinê patajacuenia apo perabêcaucutsiaexanaetsi. Baitsi apo bou Piperabêcaucutsiaexanaetsi.

⁴ Itsamonae, judíovi, Jesucristo pelivaisi apo jumecovênêtsi. Nexata bajarapamonae Jesucristo pelivaisi bepejumecovênêtsivicuenia, saya jema najunua paxanê Jesucristo pelivaisi patajumecovênêtsivijavaberena. Bajarapamonae picani jitsipa Tito peperabêcaucutsiaexanaenexatsi. Itsiata apo perabêcaucutsiaexanaetsi. Bajarapamonae saya jema najunua patane naitaxutocaevetsinexa patanetaenexa jamatejema patavecuajinavanapajava Dioso Moiséspijinêta penajumecopatsilivaisi, palivaisimi patajasalinaivi jumecovênêta. Bajarapalivaisi patajumecovênêtsijavami, pacopatajê baja Jesucristo pejamatabêcueneta. Nexata pamonae panenaitaxutocaeveta, jamatabêpanejumecovênêtsiaexana picani icatsia Dioso Moiséspijinêta penajumecopatsilivaisi.

⁵ Itsiata baitsi jane tsiquirijavayo ata apo paexanaenê pacuenia bajarapamonae paneitoroba. Nexata Jesucristo pelivaisi jivi itsa patsipaebaponajê, apo payajavatsipaebaponaenê Dioso Moiséspijinêta

penajumecopatsilivaisi. Dioso Moiséspijinëta penajumecopatsilivaisi, itsa pacatsipaebijitsipatsi, jamatabëcuenenavëxaniabiaya pajamatabëjumaitsimë tsipae: “Naperabëcaucutsiaexanaenajë pacuenia judíovi naperabëcaucuba. Jumecovënëtsianajënuua Dioso Moiséspijinëta penajumecopatsilivaisi. Nexata Dioso pepacue necapanepaena,” pajamatabëjamë tsipae jamatabëcuenenavëxaniabiaya.

⁶ Jerusalén tomarata Dioso pejumecovënëtsivi penamatacaitorobivijavabelia, navajunupaebajë Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Itsiata bajarapamatacabi Dioso pejumecovënëtsivi penamatacaitorobivi, apo netsipaebi itsalivaisiyo ata Jesucristo pelivaisi tayajavatsipaebaponaenexa apo judíovijava. Bajarapamonaë yabara itsamonaë jamatabëjumai tsabiabi: “Mapamonaëje Dioso pejumecovënëtsivi bitso pepo penamatacaitorobivi. Nexata bitso ayaijamatabëcuenevi,” jamatabëjai tsabiabi. Itsiata xanë apo sivanajamatabëxainaenë bajarapamonaë ayaijamatabëcuenevi tataenexa. Tsipaji cajena daxita vaxaitsi, Jesucristojavabelia vajanajamatabëcuenecopatsivi, Dioso najëpaeya nacatane.

⁷ Dioso pejumecovënëtsivi penamatacaitorobivi, apo nitorobi itsalivaisiyo ata tayajavatsipaebaponaenexa apo judíovijava itsa tsipaebajë Jesucristo pelivaisi pecapanepaelivaisinexatsi Diosojavabelia. Biji rajane Dioso pejumecovënëtsivi penamatacaitorobivi, neypëtane Dioso taneitorobinëcuenë. Nexata Dioso pejumecovënëtsivi penamatacaitorobivi, jumaitsi xanë yabara: “Xaniajai. Pablo Dioso itorobatsi Jesucristo pelivaisi petsipaebaponaenexa apo judíovijava. Pacuenia copiaya Pedro Dioso itorobatsi Jesucristo pelivaisi petsipaebaponaenexa judíovijava, baja pijinia pacuenia Pablo ata Dioso itorobatsi Jesucristo pelivaisi petsipaebaponaenexa apo judíovijava,” jai Dioso pejumecovënëtsivi penamatacaitorobivi xanë yabara.

⁸ Apóstolenë Pedro Dioso pesaëta Jesucristo pelivaisi petsipaebaponaexae judíovijava, judíovi baja najamatabëcuenecopabapona Jesucristojavabelia. Bajara pijinia pacuenia xanë ata Dioso pesaëta Jesucristo pelivaisi tatsipaebaponaexae apo judíovijava, apo judíovi ata baja najamatabëcuenecopabapona Jesucristojavabelia.

⁹ Mara pamatabëxëyo Jerusalén tomarata Dioso pejumecovënëtsivi penamatacaitorobivije. Santiago, Pedro, Juan, bajarapamatabëxëyo. Dioso pejumecovënëtsivi penamatacaitorobivi, itsa neypëtane Dioso taneitorobinëcuenë tatsipaebaponaenexa Jesucristo pelivaisi apo judíovijava, nexata Dioso pejumecovënëtsivi penamatacaitorobivi, panebajacobabeje pexaniacuenia Bernabébeje. Bajarapacuenia Dioso pejumecovënëtsivi penamatacaitorobivi, pexaniacuenia panebajacobabeje tsipaji paneyapëtanebeje patatonajuanacuenebivicuene Dioso pijacuene. Bajaraxuata paxanëbeje Bernabébeje, Jesucristo pelivaisi patavajënaeyabeliabeje patsipaebaponañëbeje apo judíovijava. Santiagobana pijinia, Pedrobana, Juanbana, tsipaebapona judíovijava.

¹⁰ Bajarapamonaë calivaisiyo panejumaitsiibeje Jerusalén tomarata. Paneitorobabeje patayavenonaenexabeje Dioso pejumecovënëtsivi, bitso bepejiobivi, Jerusalén tomarata pejinavanapaevi. Bajaraxuata xanë jamatabëcuenëbarëyaya bajarapamonaenexa ofrenda toexanaeyaexanaponajë itsaxuayo tatsipaebilivaisi, Jesucristo pelivaisi, jumecovënëtapona.

Pacuenia Pablo muxujioba Pedro Antioquia tomarata yabara pelivaisi

11 Perujulivaisimi, judíovi pijalivaisi, itavetatsi judíovi caejavata peyavanabanianiva apo judíovi. Pedro itsa ponapona Antioquía tomarata, muxujobajé daxitajivi pitabarata. Tsipaji Pedro apo pexanepanaecuene exana. Pedro apo judíovijavata itsa naponapona, jemata apo judíovi vecuanaicayaba.

12 Pedro, judioné ata, pecopatsixae baja pejumecovénétsijava perujulivaisimi, judíovi pijalivaisi, abaxé picani Pedro jamatejema nanabanebiaba apo judíovijavata. Nexata itsa pata Santiago pijajivi Antioquía tomarata, Pedro baja vecuanaicayaba apo judíovi. Tsipaji Pedro cujunava Santiago pijajivi petaejanivatsi apo judíovijavata penanabanijava. Pedro baja nexata copata apo judíovijavata penanabanebiabijava. Santiago pijajivi perujulivaisi tsiteca jumecovénétavana. Nexata Santiago pijajivi jumai tsabiabi: “Pamonae apo judíovi ata, Jesús pelivaisi itsa jumecovénéta, bajarapamonae ata benaperabécaucubiaexana,” ja! tsabiabi. Nexata Pedro cujunava bajarapamonae. Nexata Pedro jamatabējumaitsi: “Itsa netaejitsipa Santiago pijajivi tananabanijava apo judíovijavata, neneconitsipa judíovijavabelia Jerusalén tomarata. Nexata judíovi ayaicuenia nebijataejitsipa,” jamatabėjai Pedro. Bajaraxuata Pedro vecuanaicayaba baja apo judíovi.

13 Pedro yapétae ata pacuenia picani apo bevecuanaicayabi apo judíovi, itsiata vecuanaicayaba. Nexata daxita judíovi, pamonae najamatabécuenecopaba Jesucristojavabelia, itsa tane Pedro pevecuanaicayabijava apo judíovi, bajarapamonae ata vecuanaicayaba apo judíovi. Bernabé ata yapétae ata pacuenia picani apo bevecuanaicayabi apo judíovi, itsiata vecuanaicayaba apo judíovi.

14 Nexata pacuenia jumaitsi pexanialivaisi jivi pecapanepaelivaisinexatsi Diosojavabelia, bajarapamonae apo exanae. Nexata saya bajarapamonae vecuanaicayaba apo judíovi. Bajaraxuata itsa taniji bajarapamonae pevecuanaicayabijava apo judíovi, nexata muxujobajé. Daxita Dioso pejumecovénétsivi pitabarata, jumaitsiné Pedrojavabelia: “Xamé judioné atamé, itsiata apo judíovijavata naponapona. Nexata pacuenia apo judíovi jinavanapa, naponaponabiabame picani. Apo ponaponabiabimé judionécuenia. Pacuenia baja picani naponaponabiabame apo judíovijavata, xanepana baja picani. Xamé judioné atamé, itsa apo ponaponaemé judionécuenia, ¿detsa nexata xuajitsia caranata apo judíovi aeconoxae jamatabéjinavanapaeyaexaname judíovicuenia?” jané Pedrojavabelia pevecuanaicayabixae apo judíovi.

Pacuenia judíovi ata xanepana penajamatabécuenecopatsinexa Cristojavabelia pecapanepaenexatsi Diosojavabelia yabara pelivaisi

15 Paxané baja cajena pajudíoviné. Patanaexanaejavaveliacujinae itsa pavitsabaponajé, payapétaniji patajumecovénétsinexa pexaniajailivaisi, Dioso pejumelivaisi. Nexata pacuenia apo judíovi pejevaxijavaveliacujinae apo yapétae pejumecovénétsinexa pexaniajailivaisi, Dioso pejumelivaisi, apo paitsiné.

16 Pexaniajailivaisi patajumecovénétsinexa, patajamonae baja cajena paneyajavavitsata. Nexata payapétaniji mapacuenije. Itsajivi jumecovénétsi ata tsipae Dioso Moiséspijinéta penajumecopatsilivaisi, itsiata Dioso aneonijibia apo taetsi tsipae. Bajarapacuenia paxané pajudíoviné payapétaniji. Bajaraxuata paxané pajudíovi atané, panajamatabécuenecopatajé Jesucristojavabelia. Nexata Dioso aneonijibia panetane patanamatabécuenecopatsixae Jesucristojavabelia. Dioso aneonijibia apo panetae patajumecovénétsixae

Dioso Moisésþijinēta penajumecopatsilivaisi. Tspaji itsajivi ata apo jumecovēnētsicapanepae bajarapalivaisi. Nexata itsamonae jumecovēnētsi ata bajarapalivaisi, itsiata Dioso aneconijibia apo taetsi.

¹⁷ Pexaniajailivaisi patacatsipaebijavata, itsajivi jamatabēcuenenavēxaniabiaya nejumlahi tsipae: “Xamē jumaitsimē tsabiabi: ‘Dioso aneconijibia netane tajumecovēnētsixae Cristo tanesivatēþaejava tajaneconi yabara. Nexata baja apo jumecovēnētsinē Dioso Moisésþijinēta penajumecopatsilivaisi,’ jamē tsabiabi. Dioso Moisésþijinēta penajumecopatsilivaisi apo nejumecovēnētsixae, nexata Dioso catane pibisiacuene nexanaenē,” nejai tsipae itsajivi jamatabēcuenenavēxaniabiaya. Itsiata bailsi jane bajarapacuenia itsajivi nejumlahi ata tsipae, itsiata Dioso apo netae tsipae pibisiacuene taexanaenē.

¹⁸ Diosojavabelia rajane naneconitsipajē mapacuenia itsa exanaejitsipajē. Dioso Moisésþijinēta penajumecopatsilivaisi, tajumecovēnētsijavami tacopatsicujinae, icatsia caevēalia itsa jumecovēnētsipajē, nexata Diosojavabelia naneconitsipajē.

¹⁹ Pamatacabi abaxē ajamatabēcuenesaenē tsabiabi tajumecovēnētsijava Dioso Moisésþijinēta penajumecopatsilivaisi, naneconitajē picani Diosojavabelia. Tspaji ajamatabēcuenesaenē tsabiabi ata tajumecovēnētsijava bajarapalivaisi, itsiata apo necaējēþae tajumecovēnētsicapanepaenexa daxita pacuenia jumlahsi bajarapalivaisi. Itsa meta abaxē tsiteca bajarapalivaisi jumecovēnētaþonaponaejitsipajē, yajavatēþaejitsipajē meta tajaneconi. Bajaraxuata aeconoxae baja icatsia bajarapalivaisi tajumecovēnētsinexa, apo sivanajamatabēxainaenē. Pacuenia baja petēþaejivi itsacuenejavayo apo sivanajamatabēxainae, bajara itsinē taexanaeyaniva icatsia pacuenia bajarapalivaisi nitoroba. Biji rajane aeconoxae baja Dioso nerajuta pejanajamatabēcuenē taexanaponaponae pacuene Dioso jitsipa.

²⁰ Cristo cruzajavabelia itsa cobematabiabarutatsi, xanē ata tajaneconi yabara nesivatēþa. Nexata xanē ata Cristo betaneyajavatēþae. Bajaraxuata þerujumatabēcuenemi, pibisiacuene taexanaenexa taneitorobabijamatabēcuenemi, nevecuatēþa baja cruzata. Nexata baja þiasaējumatabēcuenē, pejanajamatabēcuenē, xainajē. Cristo baja neyajavaponapona. Pajamatabēcuenē yaasaenē tsaponaponae, Dioso pexēnatojavabelia najamatabēcuenecopatsiaya ponaponajē. Dioso pexēnato nejitsipa. Nesivatēþanua baja cajena.

²¹ Apo namuxjematsinē Dioso vajanacaitaxutotsoniataejava. Dioso Moisésþijinēta penajumecopatsilivaisi, jivi þejumecovēnētsixae, Dioso aneconijibia jivi itsa taejitsipa, nexata Cristo jivi apo sivatēþae tsipae þijaneconi yabara. Nexata Cristo saya jema tēþaejitsipa.

3

Pacuenia Cristo þejumecovēnētsivi, Dioso aneconijibia tanetsi þecapanepaenexatsi þijaneconivecua, itsa jumecovēnēta pacuenia Abrahampijinē jumecovēnēta, yabara þelivaisi

¹ þPaxamē þaGalacianacuapijivimē, bitso cajena paneajamatabēcuenetajavil Itsamonae raeta þaicayalivaisi yamaxēitojorobiaya pacatsipaeba, pexaniajailivaisi, þalivaisi baja picani þajumecovēnētame, þanecopabinexa. Xanē Jesucristo þelivaisi patacatsipaebijavata, xaniavaetsia baja cajena pacatsipaebatsi, pacuenia Jesucristo cruzajavabelia cobematabiabarutatsi. Nexata baja picani þanijacuata þepanetae Jesucristo þapecasivatēþaejava cruzata.

² Caejumeyo pacayanijobatsi. ¿Detsa xua yabara pacatsijamatabējūna Espírītu Santo? Apo pacatsijamatabējone raja panejumecovēnētsixae Dioso Moiséspijnēta penajumecopatsilivaisi. Espírītu Santo raja pacatsijamatabējūna panejumecovēnētsixae Jesucristo papecacapanepaejavanexa panijaneconivecua.

³ Paxamē bitso pajamatabēcuenetajamē. Pamatacabi pataxuxuabame panejumecovēnētsijava Jesucristo papecacapanepaejavanexa panijaneconivecua, panajamatabēxainabiabame Espírītu Santo papecayavenonabiabinexa. Aeconoxae baja icatsia caevēalia panajamatabēxainame panejumecovēnētsinexa Dioso Moiséspijnēta penajumecopatsilivaisi. Itsiata apo caējēpaetsi bajarapalivaisi papecacapanepaenexa.

⁴ Itsamonae bitso pacabejiobiaexanabiaba pexanalivaisi, Jesucristo pelivaisi, panejumecovēnētsixae. Bajaraxuata apo bepacopatsimē panejumecovēnētsijava Jesucristo pelivaisi, palivaisi yabara itsamonae pacabejiobiaexanabiaba. Tshipaji itsa pacopabijitsipame panejumecovēnētsijava Jesucristo pelivaisi, saya panacueratsipame.

⁵ Payapētaneme rabaja Dioso papecarajutsijava Espírītu Santo. Pinijicue ne pexanējavanē ata Dioso pacatsitaexana paxamē tuatuajēta. Baitsi piavitanevi jamatejemaya exanapona. Petēpaevimi ata asaēyaexanapona. ¿Detsa xua yabara bajarapacue ne Dioso pacatsitaexana? Dioso raja apo pacatsitaexanae bajarapacue ne panejumecovēnētsixae Dioso Moiséspijnēta penajumecopatsilivaisi. Dioso raja pacatsitaexana bajarapacue ne panejumecovēnētsixae patacatsipaebilivaisi, Jesucristo pelivaisi.

⁶ Bajayata Abrahampijinē Diosojavabelia najamatabēcuenecopatsiaya jamatabējumaitsi: “Xaniajai. Dioso netoexanaena pacuenia najumecapanepaeya nejumaitsi,” jamatabējai. Bajaraxuata Dioso Abrahampijinē aneonijibia tanetsi Dioso pijanacuayabetsia pecapanepaenexatsi.

⁷ Bajaraxuata paxamē bepayapētaneme mapacue ne je. Pamona ne jumecovēnēta pacuenia Dioso najumecapanepaeya jumaitsi, bajarapamona e Abrahampijinē apo pemomoxi ata, itsiata Dioso tanetsi Abrahampijinē bepepo pemomoxi. Bajarapamona e Dioso capanepaenatsi.

⁸ Dioso pejumelivaisibaxutota tajēvelia jumaitsi pacuenia apo judiōvi ata Dioso capanepaejitsiatsi pijaneconivecua. Nexata apo judiōvi ata Dioso itsa jumecovēnētsiana, capanepaenatsi pacuenia Dioso najumecapanepaeya jumaitsi. Dioso jivi pecapanepaejavanexa yabara, tajēvelia Abrahampijinējavabelia Dioso jumaitsi mapacueniaje: “Tacatsipaebilivaisi tanejumecovēnētsixaemē, daxitanacuapijivi ata aneonijibia taenajē, bajarapamona e ata itsa nejumecovēnētsiana pacuenia xamē nejumecovēnētame,” jai Dioso Abrahampijinējavabelia. Bajarapacuenia Dioso pejumelivaisibaxutota tajēvelia jumaitsi.

⁹ Nexata baja vaxaitsi xaniavaetsia yapētanetsi mapacue ne je. Pamona e jumecovēnēta Jesucristo pelivaisi, bajarapamona e Dioso aneonijibia tanetsi pecapanepaenexatsi pijaneconivecua. Tshipaji bajarapamona e ata jumecovēnēta pacuenia bajayata Abrahampijinē jumecovēnēta pacuenia Dioso najumecapanepaeya jumaitsi.

¹⁰ Pajivi Dioso Moiséspijnēta penajumecopatsilivaisi apo jumecovēnētsicapanepe ata, jamatabējumaitsi: “Bajayata Dioso Moiséspijnēta najumecopata jivi pejumecovēnētsinexa. Nexata baja xanē bajarapalivaisi jumecovēnētaponajē Dioso tanecapanepaenexa,” jamatabējai, itsiata bajarapajivi Dioso naneconitsiaexanaenatsi. Tshipaji Dioso pejumelivaisibaxutota jumaitsi mapacueniaje: “Pamona e apo

jumecovēnētsicapanepeae tsane daxita pacuenia itorobatsi Dioso Moiséspijinēta penajumecopatsilivaisi, bajarapamonae cajena Dioso naneconitsiaexanaenatsi,” jai Dioso pejumelivaisibaxutota.

11 Nexata baja vaxaitsi xaniavaetsia yapētanetsi bajarapacuene. Dioso Moiséspijinēta penajumecopatsilivaisi, jivi jumecovēnētsi ata, itsiata itsajivi ata Dioso aneconijibia apo taetsi pecapanepaenexatsi Diosojavabelia. Tsi-paji itsajivi ata apo jumecovēnētsicapanepeae daxita pacuenia itorobatsi Dioso Moiséspijinēta penajumecopatsilivaisi. Bajarapacuene vaxaitsi yapētanetsi. Tsi-paji Dioso pejumelivaisibaxutota icatsia jumaitsi mapacueniaje: “Pajivi pepacuene Dioso pejumecovēnētsixae, jamatabējumaitsi: ‘Xanē pepacuene Dioso neyavenonaena pacuenia najumecapanepaeya jumaitsi,’ jamatabējai, Dioso aneconijibia tanetsi. Bajarapajivi xainaena matacabi apo pevereverecaejava,” jai Dioso pejumelivaisibaxutota.

12 Dioso Moiséspijinēta penajumecopatsilivaisi jivi jumecovēnētsi ata, itsiata apo jumecovēnētsicapanepeae daxita pacuenia itorobatsi bajarapalivaisita. Bajaraxuata Dioso Moiséspijinēta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi apo jumecovēnētsicapanepeae ata Dioso Moiséspijinēta penajumecopatsilivaisi, itsiata itsa jamatabējumaitsi tsane: ‘Xanē pepacuene Dioso neyavenonaena pacuenia najumecapanepaeya jumaitsi,’ itsa jamatabējai tsane, apo jumecovēnētsicapanepeae ata, bajarapajivi Diosojavabelia capanepaenatsi,” apo jai. Biji rajane Dioso Moiséspijinēta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi matapania jumecovēnētsicapanepeaena daxita pacuenia itorobatsi Dioso Moiséspijinēta penajumecopatsilivaisi, bajarapajivi capanepaenatsi Diosojavabelia. Itsa apo jumecovēnētsicapanepeae tsane daxita pacuenia itorobatsi Dioso Moiséspijinēta penajumecopatsilivaisi, nexata tēpaena. Naxuabiana Diosovecua,” jai Dioso pejumelivaisibaxutota Dioso Moiséspijinēta penajumecopatsilivaisi yabara.

13 Vaxaitsi baja cajena naneconitatsi Diosojavabelia. Tsi-paji apo jumecovēnētsicapanepeaetsi Dioso Moiséspijinēta penajumecopatsilivaisi. Itsiata baitsi jane Cristo itsa tēpa cruzata, naneconimatamota pijanata. Dioso Moiséspijinēta penajumecopatsilivaisi apo vajajumecovēnētsicapanepeaxae, naneconitatsi picani Diosojavabelia. Itsiata Cristo cruzata itsa tēpa, nacavecuajaibiaexana baja bajarapaneconimi. Nexata baja Dioso apo naneconitsiaexanae tsane. Cristo saya tsijumaxuabatsi vajaneconimi. Nexata Dioso tanetsi Cristo bepenaneconitsinē vajaneconi pejamatabēcueneta. Nexata vajaneconi yabara Cristo nacopata pebeyaxuabinexatsi pacuenia Dioso pejumelivaisibaxutota jumaitsi. Dioso pejumelivaisibaxutota jumaitsi mapacueniaje: “Pajivi bitso naneconita Diosojavabelia pibisiacuene pexanaeconi yabara, bajarapajivi naejavajavabelia rutatsi,” jai.

14 Nexata Cristo pibisiacuene bepexanaenē vajaneconi yabara, nacopata cruzajavabelia pecobematabiabarutsinexatsi. Bajarapacuena Cristo itsa nacopata cruzajavabelia pecobematabiabarutsinexatsi vajaneconi yabara, copiajopa jane baja pacuenia tajēvelia Dioso najumecapanepaeya jumaitsi Abrahampijinējavabelia. Nexata apo judiōvi ata Dioso capanepaenatsi Jesucristo pejamatabēcueneta. Vaxaitsi vajanajamatabēcuenecopatsixae Jesucristojavabelia vajanacapanepaenexa Diosojavabelia, nexata pacuenia Dioso tajēvelia najumecapanepaeya jumaitsi, bajarapacuena Dioso nacatsi-jamatabēcaeyaexana Espiritu Santo.

Pacuenia Abrahampijinjējavabelia Dioso najumecapanepaeya jumaiti, pacuenia ata icatsia cotocaevi Moiséspijinējavabelia najumecapanepaeya jumaiti, yabara pelivaisi

¹⁵ Tajamonae, livaisi pacatsipaebijitsiatsi paneyapētaenexa mapacuenije. Pepacuenē raja Dioso exanaena pacuenia bajayata tajēvelia Abrahampijinjējavabelia Dioso najumecapanepaeya jumaiti. Mapanacuapijinē ata, pecobecovē pexainaenē, petēpaevajēnae bayaquina pecobecovē yabara. Nexata pecobecovē pexainaenē itsa tēpa, pevēnamuto pexi penatsicobet-sanaenexa. Nexata jumenamatamota pecobecovē pexainaenē peyaquinaelivaisi. Nexata acuenēbi itsajivi ata pejumaitsinexa: “Ajumematamobi mapalivaisije,” pejainexa. Mataropotsia ata itsanē peyaquinaponaenexa, acuenēbi. Tsipaji pecobecovē pexainaenē peyaquinaelivaisi, jumenamatamota.

¹⁶ Bajara pijinia pacuenia Dioso jumenamatamota bajayata tajēvelia Dioso najumecapanepaeya pejumaitsijava Abrahampijinjējavabelia. Baitsi Abrahampijinjē pemomo pejamatabēcueneta, jivi ayaibitsaēto Dioso aneconihibia petaejavanexa, Dioso jumenamatamota. Bajayata tajēvelia Dioso najumecapanepaeya jumaiti Abrahampijinjējavabelia ayaibitsaēto mapanacuapijivi Abrahampijinjē pemomo pejamatabēcueneta Dioso aneconihibia petaenexa. Ayaibitsaēto Abrahampijinjē pemomoxi pejamatabēcueneta Dioso jivi aneconihibia petaenexa, bajarapacuenia tajēvelia Dioso najumecapanepaeya apo jumaiti. Biji rajane caenē, Jesús, pejamatabēcueneta Dioso jivi aneconihibia petaenexa, tajēvelia najumecapanepaeya jumaiti. “Abrahampijinjē pemomo,” itsa jai, tajēvelia jumaiti Cristo yabara.

¹⁷ Palivaisi pacatsipaebatsi, maitsije. Bajayatami copiaya Dioso tajēvelia najumecapanepaeya jumaiti Abrahampijinjējavabelia pacuenia Dioso toexanaejitsia Abrahampijinjējavabelia. Bajaraxuacujinae icatsia cotocaevi, cuatrocientos treinta pavaibejecujinae, Dioso icatsia Moiséspijinēta najumecopata jivi pejumecovēnētsinexa. Itsiata palivaisi copiaya Dioso tajēvelia najumecapanepaeya jumaiti Abrahampijinjējavabelia, bajarapalivaisi acuenēbi Dioso penajumeamatamobiaexanaenexa.

¹⁸ Nexata palivaisi cotocaevi Dioso Moiséspijinēta najumecopata, bajarapalivaisi jivi pejumecovēnētsixae, Dioso aneconihibia jivi itsa taejitsipa pecapanepaenexa pijaneconivecua, nexata palivaisi copiaya Dioso tajēvelia najumecapanepaeya jumaiti Abrahampijinjējavabelia, ajumematamobi tsi-pae. Itsiata baitsi jane palivaisi cotocaevi Dioso Moiséspijinēta najumecopata, jivi jumecovēnētsi ata tsipae, itsiata Dioso apo capanepae tsi-paetsi. Nexata yapētanetsi pejumenamatamotsijava palivaisi copiaya Dioso tajēvelia najumecapanepaeya jumaiti Abrahampijinjējavabelia. Tsi-paji pajivi jumecovēnēta pecapanepaejavanexatsi pacuenia Dioso tajēvelia najumecapanepaeya jumaiti Abrahampijinjējavabelia, bajarapajivi Dioso aneconihibia tanetsi.

¹⁹ Itsa baja jumenamatamota palivaisi copiaya Dioso tajēvelia najumecapanepaeya jumaiti Abrahampijinjējavabelia, ¿detsa nexata xuajitsia icatsia Dioso Moiséspijinēta nacatonajumecopata bajarapalivaisi? Dioso raja nacatonajumecopata bajarapalivaisi saya vajanacueneyapētaenexa pibisi-acuene vajaexanavanapaejava Dioso pitabarata. Bajarapalivaisi Dioso nacatonajumecopata vajajumecovēnētavanapaenexa matapania Abrahampijinjē pemomo, Cristo, pepatsimatacabitsicajavabelianexa. Tajēvelia Dioso najumecapanepaeya jumaiti Cristo pejamatabēcueneta ayaibitsaēto xaneto mapanacuapijivije Dioso aneconihibia petaenexa. Palivaisi Dioso Moiséspijinēta

najumecopata, pijacuata Dioso apo jumaitsi Moiséspijinējavabelia. Dioso saya itoroba ángelevi Moiséspijinē petsipaebinexatsi. Nexata juya Moiséspijinē tsipaeba jivijavabelia. Moiséspijinē jivi petocuaicuaijainē Diosojavabelia. Dioso juya Moiséspijinē itorobatsi petocuaicuaijainexa jivijavaberena.

²⁰ Pamatacabi Dioso najumecapanepaeya jumaitsi Abrahampijinējavabelia pacuenia Dioso toexanaejitsia Abrahampijinējavabelia, Dioso pijacuata jumaitsi Abrahampijinējavabelia. Dioso apo itorobi ángelevi petotsipaebinexatsi Abrahampijinējavabelia. Dioso pijacuata najumecapanepaeya jumaitsi Abrahampijinējavabelia pacuenia pepacune toexanaejitsia.

Pajamatabēcuenelivaisi yabara bajayata Dioso Moiséspijinēta najumecopata yabara pelivaisi

²¹ Dioso icatsia cotocaevi Moiséspijinēta itsalivaisi najumecopatsi ata, palivaisi copiaya Dioso najumecapanepaeya jumaitsi Abrahampijinējavabelia, itsiata apo ajumematamobiaexanae. Tsipaji Dioso Moiséspijinēta penajumecopatsilivaisi pejamatabēcueneta, jivi Dioso apo capanepaejitsiatsi. Jivi itsa caējēpaejitsipatsi pejumecovēnētsicapanepaenexa daxita palivaisi Dioso Moiséspijinēta najumecopata, nexata Dioso jivi capanepaejitsipa pijaneconivecua Dioso Moiséspijinēta penajumecopatsilivaisi pejumecovēnētsicapanepaenexa.

²² Itsiata baitsi jane itsajivi ata apo caējēpaetsi pejumecovēnētsicapanepaenexa Dioso Moiséspijinēta penajumecopatsilivaisi. Dioso pejumelivaisibaxutota jumaitsi pacuenia daxitajivi pibisiacuene pexanaexae, Dioso naneconitsiaexanaejitsiatsi Dioso vecua penaxuabinexa. Bajarapacuenia Dioso pejumelivaisibaxutota jumaitsi vajayapētaenexa. Nexata yapētanetsi vajanajamatabēcuenecopatsinexa Jesucristojavabelia, vajanacapanepaenexa pacuenia Dioso copiaya tajēvelia najumecapanepaeya jumaitsi Abrahampijinējavabelia.

²³ Cristo abaxē athēbēvetsica pepatsivajēnaeyatsica, Dioso Moiséspijinēta penajumecopatsilivaisi nacayapētaeyaexana pamatacabi Cristo patsica vajanajamatabēcuenecopatsinexa Cristojavabelia. Nacayapētaeyaexananu pacuenia vajacuata vajaexanaejava pejamatabēcueneta, acuenēbi Dioso vajanacapanepaenexa. Nexata Dioso Moiséspijinēta penajumecopatsilivaisi, nacajamatabēcueneevetapona matapania Cristo athēbēvetsica pepatsimatacabitsicajavabelianexa. Nexata bajarapalivaisi vajanacajamatabēcueneevetsijavata, Cristo baja nacacaxitaraba.

²⁴ Pacuenia pejevaxi pevetsijivi, pejevaxi baeveta, bajarapacuenia Dioso Moiséspijinēta najumecopatsilivaisi, nacajamatabēcueneeveta daxita vajajumecovēnētsivi bajarapalivaisi. Bajarapacuenia nacajamatabēcueneeveta matapania Cristo athēbēvetsica pepatsimatacabitsicajavabelianexa. Nexata jane baja athēbēvetsica Cristo pepatsicujinaetsica, vajanajamatabēcuenecopatsixae bajaraponējavabelia, Dioso aneconijibia nacatane.

²⁵ Aeconoxae baja najamatabēcuenecopatsi Cristojavabelia. Nexata pacuenia pejevaxi pevetsijivi, pejevaxi baeveta, bajarapacuenia baja Dioso Moiséspijinēta najumecopatsilivaisi, apo nacajamatabēcueneevetsi.

²⁶ Paxamē rabaja Dioso papeximē panenajamatabēcuenecopatsixae Jesucristojavabelia.

²⁷ Nexata baja daxita paxamē panabautisabame panetsitanaitajētsinexa jivijavabelia Cristo papijajivicuenemē. Nexata Cristo, Dioso

pexēnatojavabelia, panenajamatabēcuenecopatsixae, paxamē ata baja Dioso papeximē.

²⁸ Daxitatsi vaxaitsi vajanajamatabēcuenecopatsivi Jesucristojavabelia, pajudíovinē, apo pajudíovi atamē, aeconoxae baja Dioso najēpaeya nacatane. Paxamē ata pijinia dajubicuenia papecanajetsivi itsamonaejavabelia amoneya panetonacuenebavanapaenexa, apo patanecacanajetsivi ata itsamonaejavabelia amoneya panetonacuenebavanapaenexa, daxitatsi Dioso najēpaeya nacatane. Paxanē papebijivinē, paxamē pijinia papetiriavi atamē, bajarapacuenia daxitatsi Dioso najēpaeya nacatane.

²⁹ Cristo pijajivixaetsi, nexata Abrahampijinē bepepo pemomoxitsi Dioso nacatane. Nexata pacuenia Dioso bajayata tajēvelia najumecapanepaeya jumaitsi Abrahampijinējavabelia, bajarapacuenia Dioso nacacapanepaena.

4

¹ Mara pacuenia jitsipajē patacajumaitsinexaje. Pejevaxinēyo paxa itsa vecuatēpatsi, paxami riconē ata, abaxē apo rajutsitsi paxami pecobecovē pepitsinexa pijajavanexa. Tsipaji abaxē pejevaxinēyo. Pacuenia itorobabiabatsi pevetsijivitsi, bajarapacuenia exanabiaba. Daxitacuenē pexainaenēnexa ata, bajaraponēyo jumecovēnētabiaba pevetsijivitsi pitorobicueniatsi.

² Itsa abaxē pejevaxinēyo, pevetsijivitsi evetatsi. Xua ata pijajavanexa, tovetatsi. Matapania baja itsa tocopiapatatsi paxapijinē petocaējētsimatacabitsi, tocopatatsi jane baja petoevetsijavatsi pevetsinexa baja pijacuata. Pevetsijavatsi ata baja copatatsi.

³ Bajara pijinia paitsinē pajudíovinē Jesucristo abaxē athēbēvetsica pepatsi-vajēnaeyatsica. Itsa abaxē apo payapētaenē pexaniajailivaisi, Jesucristo pelivaisi, pajumecovēnētabiabajē pacuenia paneitoroba Dioso Moiséspijinēta penajumecopatsilivaisi. Nexata pacuenia pejevaxinēyo jumecovēnētabiaba pevetsijivitsi pitorobicueniatsi, bajarapacuenia pajumecovēnētabiabajē Dioso Moiséspijinēta penajumecopatsilivaisi. Jamatabēcuenenavēxaniabiaya pajamatabējumaitsinē tsabiabi: “Pacuenia Dioso Moiséspijinēta najumecopata vajaexanaexae, nacacapanepaena Dioso,” pajamatabējanē tsabiabi.

⁴ Itsiata Dioso pecaējētsimatacabi itsa copiapata, Dioso pexēnato itorobica judíovata penaexanaenexa mapanacuataje. Nexata Dioso pexēnato mapanacuataje judíonēcuenia ponapona. Nexata pacuenia itoroba Dioso Moiséspijinēta penajumecopatsilivaisi, bajarapacuenia Dioso pexēnato exanaponapona.

⁵ Bajarapacuenia Dioso pexēnato naexana mapanacuataje vajanacave-cuaajibiaexanaenexa pibisiacuene vaneconimi. Nexata baja nacacopatsiaexana vajaexanabiabijavami pacuenia nacaitoroba Dioso Moiséspijinēta penajumecopatsilivaisi. Bajarapacuenia Dioso nacatoexana pexicueniatsi Dioso vajanacataenexa.

⁶ Bajaraxuata paxamē Dioso papexicuenemē panenayapētaenexa, Dioso pacatoitorobica Espíritu Santo papecatsijamatabējonenexa. Nexata Espíritu Santo pejamatabēcueneta: “¡Taxa!” pacajaiyaexana Diosojavabelia.

⁷ Nexata Dioso papexixaemē, aeconoxae baja apo pajumecovēnētsimē pacuenia pacaitoroba Dioso Moiséspijinēta penajumecopatsilivaisi. Dioso papexixaemē, itsamatacabi pacarajutsiana xua Dioso toxaina pexi perajutsinexa.

Pacuenia Pablo sivanajamatabēxaina Galacia nacuapijivi, Dioso pejumecovēntavanapaevi, yabara pelivaisi

⁸ Pamatacabi abaxē Dioso apo payapētaemē, panematabacabēta panubeniabame panevajēcabiabinexa bediosovi panetaevijavabelia. Bajarapamonaē baja cajena apo diosovi. Nexata saya panacuertabiabame.

⁹ Itsiata baitsi jane aeconoxae baja payapētaneme pepo Dioso. Bajaraponē jane xaniavaetsia pacayapētane. ¿Detsa xuajitsia nexata pajitsipame panejumecovēntsinea Dioso Moiséspijinēta penajumecopatsilivaisi? Pamatacabi abaxē apo payapētaemē pepo Dioso, panematabacabēta pavajēcabiabame bediosovi panetaevijavabelia. Itsiata baitsi jane bajarapamonaē apo caējēpaetsi papecacapanepaenexa. Bajara pijinia itsi Dioso Moiséspijinēta penajumecopatsilivaisi. Pajumecovēntsi atamē tsipae Dioso Moiséspijinēta penajumecopatsilivaisi, itsiata Dioso aneconijibia apo pacatae tsipae papecacapanepaenexa.

¹⁰ Judíovi nacueraevetabiaba penacueraevetsimatacabita. Exanabiabana fiesta Dioso Moiséspijinēta penajumecopatsilivaisi pitorobicueniatsi. Bajara pijinia pacuenia paxamē ata paexanabiabame. Pajuametota, pavaita ata, judíovi nacueraevetabiaba, fiesta ata exanabiaba, bajara pijinia pacuenia paxamē ata paexanabiabame. Jamatabēcuenenavēxaniabiaya pajamatabējumaitsimē tsabiabi: “Bajarapacuenia vaxaitsi ata itsa exanaenatsi, Dioso aneconijibia nacataena,” pajamatabējamē tsabiabi.

¹¹ Bajarapacuenia paneexanabiabixae, bitso pacasivanajamatabēxainatsi. Tsiapaji paxamē yabara jamatabējumaitsinē mapacueniaje: “Ayaicuenia Jesucristo pelivaisi tatsipaebabiabijava bajarapamonaējavabelia, saya meta nacueratajē,” jamatabējanē paxamē yabara.

¹² Tajamonae, pacaitorobatsi paxamē ata panenajamatabēcuenecopatsinea Jesucristojavabelia pacuenia xanē najamatabēcuenecopatajē. Tanajamatabēcuenecopatsixae baja Jesucristojavabelia, judionē atanē, copatajē baja tajumecovēntsijavami Dioso Moiséspijinēta penajumecopatsilivaisi. Nexata pacuenia paxamē, apo pajudíovimē, apo pajumecovēntsimē picani Dioso Moiséspijinēta penajumecopatsilivaisi, bajarapacuenia xanē ata baja apo jumecovēntsinē Dioso Moiséspijinēta penajumecopatsilivaisi. Nexata pētsa baja pajumecovēntēame Dioso Moiséspijinēta penajumecopatsilivaisi. Pamatacabi copiaya pacatsipaebatsi Jesucristo pelivaisi, paxamē apo paneitsacueniabimē.

¹³ Paxamē baja cajena payapētaneme mapacuenije. Tavitanexae, copiaya patajopajē paxamējavata. Nexata bajarapacuenia paxamējavata pacatsipaebatsi pexanialivaisi, Jesucristo pelivaisi, papecacapanepaelivaisinea Diosojavabelia, palivaisi picani abaxē apo payapētaemē.

¹⁴ Dioso baja cajena netocopata tanevaetabinexa bajarapavitane pataneyaaitajitsibinexamē picani. Itsiata baitsi jane bajarapavitane yabara bijiata apo panetaemē. Apo panenavecuaitorobimē patacavecuaponaenexa itsajavabelia. Biji rajane xaniavaetsia panecopiapitame. Pacuenia ángel xaniavaetsia pacopiapitsipame, itsa jume, pacuenia Jesucristo xaniavaetsia pacopiapitsipame, bajarapacuenia xaniavaetsia panecopiapitame.

¹⁵ Bajarapamatacabi bitso pajamatabēcuenabarēyamē patacatsipaebixae pexanialivaisi, Jesucristo pelivaisi. ¿Detsa baja aeconoxae paitsimē panejamatabēcuenabarēyajavami? Bajarapamatacabi meta itsa pacavajētsipatsi, paneitaxuto ata panerajutsipame tanaitaxutorutsinea.

¹⁶ Aeconoxae meta bepanijavajabitsaēnēnē panetaejitsipame patacatsipaebixae pexaniajailivaisi, Jesucristo pelivaisi.

17 Pamonaē saicayalivaisi Jesucristo pelivaisivecua petsipaebaponaēvi, pata paxamējavata bajarapalivaisi papecatsipaebinexa. Bajarapamonae najamatabēxainabiaba pexanaenexa xua yabara pasivabarēyamējitsia bajarapamonae. Itsiata baitsi jane bajarapamonae apo najamatabēxainae papecatsipaebinexa pexaniajailivaisi papecacapanepaelivaisinexa Diosojavabelia. Bajarapamonae jitsipa paxanē patanevecuanasaicayabinexamē. Jitsipa panejamatabēcuenejēpaenexa bajarapamonae.

18 Xanepana picani itsamonae ata panesivabarēyanexa itsa pacayavenona, itsa baitsi jane pepacuenē xaniavaetsia pacasivanajamatabēxaina papecayavenonaenexa. Bepacayavenona bajarapamonae daxitamatacabijavabelianexa. Nexata paxanē étapatsimatacabi paxamējavata, apo bepacayavenonae.

19 Paxamē bepataximē pacatanetsi. Petiriva itsa vixaenotatsi penacueto pevecuanaexanaenexatsi, bitso banajamatabēxaina ēpexanaejavabelianexa. Bajara pijinia pacuenia xanē ata bitso pacasivanajamatabēxainatsi. Tsipaji bitso patojitsipatsi, pacuenia Cristo jamatabēcueneitsi, bajara paxamē ata panejamatabēcueneitsinexa.

20 Bitso picani jitsipajē aeconoxae taponaponaejava paxamējavata bitso patacasivanajamatabēxainaexae. Nexata itsa ponaponaejitsipajē paxamējavata, apo patacatoyaquinae tsipaetsi. Pacabarēcuaijaiatsi tsipaē pexaniaacuenia. Apo patacataexae, nexata abaxē xaniavaetsia apo yapētaenē pacuenia exanaejitsianē paxamējavabelia.

Agarpijivabeje Sarapijivabeje yabara pelivaisi

21 Paxamē pajumaitsimē tsabiabi: “Jumecovēnētsianatsi Dioso Moiséspijinēta penajumecopatsilivaisi Diosojavabelia vajanacacapanepaenexa,” pajamē tsabiabi. ¡Nexata panamuxunaevere xaniavaetsia paneyapētaenexa pacuenia Dioso jumaitsi bajarapalivaisi yabara!

22 Dioso pejumelivaisibaxutota jumaitsi pacuenia bajayata Abrahampijinē xaina pexēnatoebeje. Abrahampijinē pexēnato itsanē xaina Agarpijivata. Agarpijiva, Abrahampijinē bedajubicuenia pecomuatsiva amoneya petonacuenebaponaponaenexatsi pijabota. Nexata Agarpijiva jumecovēnētabiaba pijatuxanejivibeje pitorobicueniatsi. Bajaraxuacujinae icatsia Abrahampijinē itsanē xaina Sarapijivata, pepo pijavata jane baja. Bajarapova apo pecomuatsiva.

23 Panacuetonēyo Abrahampijinē xaina Agarpijivata, pecomuatsivata jane baja, xaina pacuenia baxaina pexi pexinaēvi. Panacuetonēyo pijinia xaina Sarapijivata, pepo pijavata jane baja, mavecova ata bitso pepua perujuvata, xaina. Bajarapanacuetonēyo xaina petocopiapatsixaetsi pacuenia Dioso tajēvelia najumecapanepaeya jumaitsi Abrahampijinē pexēnato pexainaenexa.

24 Bajarapovabeje pelivaisita Dioso nacayapētaeyaexana pacuenia Dioso jivi tane anijacueniabeje. Dioso Moiséspijinēta najumecopata Moiséspijinē pijajivi pebarējumecovēnētsinexa bajarapalivaisi. Bajarapalivaisi Dioso najumecopata Moiséspijinēta Sinaivēnē tsutojumata, Arabia nacuata.

25 Itsamonae abaxē mapamatacabi ataje tsiteca jumecovēnētavanapa Dioso Moiséspijinēta penajumecopatsilivaisi. Bajarapamonae abaxē tsiteca pejumecovēnētavanapaexae Dioso Moiséspijinēta penajumecopatsilivaisi, Abrahampijinē pecomuatsivami, Agarpijivami, cuenejēpavanapa. Tsipaji pacuenia Agarpijiva daxitamatacabi jumecovēnētabiaba pijatuxaneva pitorobabiabicueniatsi, bajara pijinia pacuenia bajarapamonae jumecovēnētabiaba Dioso Moiséspijinēta penajumecopatsilivaisi pitorobicueniatsi.

²⁶ Vaxaitsi pijinia Jesucristojavabelia vajanajamatabëcuenecopatsivi, Abrahampijinë pepo pijavami, Sarapijivami, cuenejêpavanapatsi. Nexata itsamat-acabi Dioso pijatomarata, pejanaJerusalên tomarata, jinavanapaenatsi. Tsi-paji pacuenia Abrahampijinë pepo pijavami, Sarapijivami, itsajivi ata apo pijajivitova pitorobabiabicueniatsi pexanaenexa, bajara pijinia vaxaitsi ata itsitsi. Tsipaji Dioso Moiséspijinêta penajumecopatsilivaisi pitorobicuenia apo jumecovênêtavanapaetsi.

²⁷ Nexata ayaibitsaêtotsi tsaponae Jesucristojavabelia vajanajamatabëcuenecopatsivi. Abrahampijinë pepo pijavami, Sarapijivami, yabara, Dioso pejumelivaisibaxutota tajêvelia jumaitsi mapacueniaje:

Mavecovamê, nexi apo nexainaeva. Jamatabëcuenebarêyamê tsane. Caeto ata apo nenavixaetaeva ata, itsiata jamatabëcuenebarêyaya vavajamê tsaxuabi tsane, navixaetae atamê. Tsipaji nemomoxi ayaibitsaêto xainaename. Xainaename ayaibitsaêto nemomoxi, nijajivitova pemomoxi matatoxenetsia,

jai tajêvelia Dioso pejumelivaisibaxutota ayaibitsaêtotsi Jesucristojavabelia vajanajamatabëcuene copatsijavanexa yabara.

²⁸ Tajamonae, pacuenia Abrahampijinë pepo pijavata, Sarapijivata, naexana Isaacpijinê pacuenia Dioso tajêvelia najumecapanepaeya jumaitsi, bajara pijinia pacuenia vaxaitsi ata Dioso nacatane. Jesucristojavabelia vajanajamatabëcuenecopatsixae, Dioso nacatane Sarapijiva bepepo pemomoxitsi. Nexata pacuenia Dioso tajêvelia najumecapanepaeya jumaitsi vajanacapanepaenexa, bajarapacuenia Dioso nacacapanepaena.

²⁹ Bajayata Abrahampijinë pexênato, matapijinê, ponê naexana Agarpijivata, bajaraponê jamatabêitonotabiaba pejuyapijinê, ponê naexana Sarapijivata Dioso pejamatabëcueneta Espíritu Santo peyavenonaexaetsi. Bajara pijinia pacuenia aeconoxae ata, pamonae casaê tsavanapae pejumecovênêtsijava Dioso Moiséspijinêta penajumecopatsilivaisi, nacajamatabêitonotabiaba Dioso pejamatabëcueneta Espíritu Santo vajanacatsijamatabêcaevî.

³⁰ Pijuyapijinê, pejamatabêitonotabiabinê yabara, Dioso pejumaitsijava Abrahampijinëjavabelia Dioso pejumelivaisibaxutota jumaitsi mapacueniaje: “Ponê nexênato xainame necomuatsivata, apo rajutsimê tsane nexainaeyajuvênêjava nevênamoto pepitsinexa. Daxita rajutsianame ponê xainame pepo nijavata. Bajaraxuata nijabovecua pitsapaeyaexanaename necomuatsiva, nexênato yajava,” jai Dioso pejumelivaisibaxutota Abrahampijinëjavabelia Dioso pejumaitsijava.

³¹ Tajamonae, Dioso apo nacatae Abrahampijinë pecomuatsiva bepemomoxitsi. Biji rajane Dioso nacatane Abrahampijinë pepo pijava bepemomoxitsi. Bajaraxuata vaxaitsi baja apo jumecovênêtsitsi Dioso Moiséspijinêta penajumecopatsilivaisi.

5

Pacuenia icatsia apo bejumecovênêtsi Dioso Moiséspijinêta penajumecopatsilivaisi, pamonae baja najamatabëcuenecopaba Cristojavabelia, yabara pelivaisi

¹ Cristo pejamatabëcueneta nacacopatsiaexana Dioso Moiséspijinêta penajumecopatsilivaisi vajajumecovênêtsijavami. Nexata Dioso Moiséspijinêta penajumecopatsilivaisi panejumecovênêtsijavami panecopatsijava, tsiteca baja pacopatavanapare. Pêtsa icatsia caevêalia pajumecovênêtame Dioso

Moiséspijinëta penajumecopatsilivaisi, bajarapalivaisi bepapijajivimë papecaitorobabiabicuenia paneexanavanapaeyaniva.

² Xanë Pablonë, panenamuxunaevere palivaisi pacatsipaebijitsiatsi. Jamatabëcuenenavëxaniabiaya pëtsa pajamatabëjumaitsimë: “Xanë rabaja taneperabëcaucutsinë. Bajaraxuata tajaneconivecua Dioso necapanepaena,” pajamatabëjamë pëtsa. Bajarapacuenia itsa panajamatabëxainaejitsipame, nexata Cristo papecasivatëpaejava papecacapanepaenexa panijaneconivecua, saya pacasivanacueratsipa. Nexata pajumecovënëre Cristo papecasivatëpaejava papecacapanepaenexa panijaneconivecua.

³ Icatsia pacamuxujobatsi asaëyata. Pajivi jamatabëcuenenavëxaniabiaya jamatabëjumaitsi: “Xanë naperabëcaucutsiaexanaenajë tajaneconivecua Dioso tanecapanepaenexa,” jamatabëjai, bajarapajivi bejumecovënëtsicapanepa daxita pacuenia Dioso Moiséspijinëta penajumecopatsilivaisi itorobatsi.

⁴ Jamatabëcuenenavëxaniabiaya itsa pajamatabëjumaitsimë tsipae: “Xanë jumecovënëtsianajë Dioso Moiséspijinëta penajumecopatsilivaisi. Nexata Dioso aneconijibia netaena tanecapanepaenexa,” itsa pajamatabëjamë tsipae, nexata pacopabijitsipame panejumecovënëtsijavami Cristo papecasivatëpaejava panijaneconi yabara. Dioso papecaitaxutotsoniataexae aneconijibia papecataejavami ata, pacopabijitsipame.

⁵ Vaxaitsi baja cajena yapëtanetsi Dioso vajanacacapanepaejavanexa. Tsi-paji jumecovënëtsi Jesucristo vajanacasivatëpaejava vajaneconi yabara. Bajaraxuata Espiritu Santo pejamatabëcueneta vajanacayavenonaexae, evetavanapatsi Dioso vajanacajumaitsinexa: “Paxamë rabaja paneconijibimë,” vajanacajainexa, pamatacabi Dioso pitabarata nubenaenatsi.

⁶ Vaxaitsi baja Jesucristo pijajivitsi. Nexata nacaperabëcaucutsi ata, apo nacaperabëcaucutsi ata, itsiata bajarapacuenie amatamobi Dioso pitabarata. Namatamota rajane asivaya vajayavenonaponaejava itsamonae ata vajanajamatabëcuenecopatsixae Jesucristojavabelia.

⁷ Pajumecovënëtanapame baja picani pexaniajailivaisi. ¿Jipatsa nexata pacacopatsiaexana bajarapalivaisi panejumecovënëtsijavami?

⁸ Dioso raja apo pacacopatsiaexanae. Biji rajane Dioso pacajunata Jesucristojavabelia panenajamatabëcuenecopatsinexa.

⁹ Pëtsa panacofënëtime mapalivaisije. Pan pexanaematabënexa ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjëpa daxitamatabëjava. Nexata bafufunaeyaexana daxitamatabë. Bajara pijinia itsi penajumetsënëtsilivaisi jivi petsipaebaponaevi. Penajumetsënëtsilivaisi jivi petsipaebaponaevi, caenëbeje ata, itsiata ayaibitsaëto Jesucristojavabelia penajamatabëcuenecopatsivi, jamatabëcuenebijianapona.

¹⁰ Yapëtaniji baja cajena mapacueneye. Paxamë baja Jesucristo papijajivimë. Nexata Dioso pacayavenonaena. Xanë yapëtaniji pacuenia paexanaejitsiamë. Tsiteca pajumecovënëtanapanaename patacatsipaebilivaisi. Dioso cajena itsamatacabi naneconitsiaexanaenatsi ponë Jesucristo pelivaisivecua pacajamatabëcuenebijiana penajumetsënëtsilivaisita.

¹¹ Tajamonae, Jesucristo pelivaisi apo judíovi tatsipaebabiabijavata, itsa jumaitsinë tsabiabi tsipae: “Paxamë apo pajudíovimë, Jesucristojavabelia panenajamatabëcuenecopatsivi, bepanaperabëcaucubiaexaname Diosojavabelia papecacapanepaenexa,” itsa janë tsabiabi tsipae, nexata judíovi apo nebejibiaexanabiabi tsipae. Apo judíovi ata, Jesucristojavabelia penajamatacuenecopatsivi, itsa itorobaponaejitsipajë peperabëcaucubinxatsi,

nexata Jesucristo cruzata petëpaelivaisi tsipaebi atanë, itsiata judíovi apo nitoya tsipae.

¹² Pamonae pacajamatabëitonotabiaba panenaperabëcaucutsiaexanaenexa, bajarapamonae tojitsipajë mapacueniaje. Tojitsipajë bajarapamonae papecavecuapitsapaenexa, papecacopatsinexa baja papecajamatabëitonotabiabijava.

¹³ Tajamonae, Dioso pacajunata panecopabinexa Dioso Moiséspijinëta penajumecopatsilivaisi panejumecovënëtsijavami. Itsiata baitsi jane pëtsa pajamatabëjumaitsimë: “Dioso Moiséspijinëta penajumecopabilivaisi tajumecovënëtsijavami, tacopatsixae baja, nexata exanaenajë daxita pibisiacuene pacuenia jitsipajë,” pajamatabëjamë pëtsa. Biji rajane Dioso Moiséspijinëta penajumecopatsilivaisi panejumecovënëtsijavami, panecopabixae baja, Jesucristojavabelia penajamatabëcuenecopatsivi bepapijajivimë panataema namataenetsia panenayavenonabiabinexa. Bajarapacuenia namataenetsia panayavenonabiabianame panenasivaxae.

¹⁴ “Asivamëre itsamonae ata pacuenia nijacuata nasivamë,” pejailivaisi itsa pajumecovënëtsianame, nexata daxita palivaisi Dioso Moiséspijinëta najumecopata, pajumecovënëtsicapanepaenname.

¹⁵ Itsa panaitoyamë, itsa panabaracuauaijamënuua pibisiacuena, nexata xaniavaetsia panaitavere. Tsipaji itsa panaitoyamë tsipae, itsa panabaracuauaijamënuua tsipae pibisiacuena, nexata Jesucristojavabelia panenajamatabëcuenecopatsijava, namataenetsia panajamatabëcuene faefaenaeyaexanaejitsipame. Pacopatsipamenuua baja Dioso pejumelivaisi yabara panenacaetuatabijava ata.

Pacuenia Espíritu Santo nacajamatabëcueneyavenona yabara pelivaisi

¹⁶ Mapacuenia pacajumaitסיםije. Pacuenia Espíritu Santo pacaitorobiaba, paexanabiabare daxitamatacabi canacujitsia. Pëtsa pibisiacuene paexanabiabame panijacuata panenajamatabëxainaejava.

¹⁷ Xua vajacuata vajajamatabëëthëtotata najamatabëxainabiabatsi pibisiacuene vajaexanabiabinexa, bajaraxua vajaexanaenexa, Espíritu Santo apo jitsipae. Xua pijinia Espíritu Santo nacaitorobiaba pexaniacuene vajaexanabiabinexa, bajaraxua juya vajajamatabëcuene vajaexanabiabinexa apo jitsipae. Nexata vajajamatabëcuenebeje, Espíritu Santobeje apo najamatabëcuenejëpaebeje. Bajaraxuata pexaniacuene pajamatabëexanabiabi atamë, itsiata apo paexanabiabimë pexaniacuene.

¹⁸ Itsa baja paexanavanapaenname pacuenia Espíritu Santo pacaitorobiaba, nexata baja tsiteca apo paexanavanapaemë tsane pacuenia pacaitoroba Dioso Moiséspijinëta penajumecopatsilivaisi. Tsipaji baja pacuenia Espíritu Santo pacaitoroba, paexanavanapaenname.

¹⁹ Xua jivi pijacuata najamatabëxaina, itsa exana, yapëxanepana vajayapëtaenexa. Tsipaji xua jivi pijacuata najamatabëxaina itsa exana, pebi itsava jaita pijavavecuua. Petiriva pijinia jaita itsanë pamonavecuua. Pamonae pevivotata pibisiacuene exana pacuenia pijacuata najamatabëxaina, bajarapamonae jitsipanua daxita xua pibisiacuene pexanaenexa.

²⁰ Pamonae pibisiacuene exana pacuenia pijacuata najamatabëxaina, pematabacabëta nubenabiaba pevajëtabiabinexa jumapecataya pexanaenëanëjavabelia. Junatabiabanua penajorobivi. Bajarapamonae yajuvënëvi naexananua penajorobivi. Itoyanua tsabiabi itsamonae. Jumeanaenotabiabanua itsamonae. Cuenecaëbabiabanua itsamonae.

Anaepanabiabanua apo vajayabaraanaepanaejavayo ata. Natoexanabiabanua daxitacuene epamonaenexa. Vecuanasaicayababiabanua itsamonae Dioso pejumecovënëtsivi. Caebitsaëto caejavata apo najuanacaetuanabiabi.

21 Pamonae pibisiacuene exana pacuenia pijacuata najamatabëxaina, jamatabëyacajërëtabiabanua itsamonae pexainaejava. Jamatabëbeyaxuababiabanua jivi. Aitajibinua tsabiabi pijabonëjava. Aitajibinua tsabiabi fiestajava ata. Itsacuenenua pematatsënëa, bajara bepitsipibisiacuene, exanabiaba. Pacuenia copiata pacamuxujobatsi, bajara icatsia pacuenia pacamuxujobatsi. Pamonae bajarapacuenia pibisiacuene exana, bajarapamonae apo jinavanapae tsane Dioso pijanacuataatsia.

22 Pacuenia peubinae, pexaniana, pexaniacuai capitsapa, bajara pijinia pacuenia Espiritu Santo vajajamatabëëthëtovetsina capitsapa mapacueneje. Capitsapa itsamonae ata vajaasivajamatabëcuene. Capitsapa vajabarëyajamatabëcuene. Capitsapa Diosojavabelia, itsamonaejavabelia ata, barajamatabëcuenexanepanaeya vajataenexa. Capitsapa, itsamonae nacait-sacueniabi ata, vajavajënaeyabelia vajaajamatabësaëjamatabëcuene. Capitsapa itsamonae vajaitaxutotsoniatae jamatabëcuene. Capitsapa itsamonae pexaniacuene vajatoexanaejamatabëcuene. Capitsapa Dioso vajajumecovënëtsijava vajaajamatabësaëjamatabëcuene.

23 Espiritu Santo vajajamatabëëthëtovetsina capitsapa vajaanitejepaebijamatabëcuene. Capitsapa vajanajamatabëcataitsi jamatabëcuene pibisiacuene vajaexanaeyaniva. Daxita bajarapajamatabëcuene, Espiritu Santo vajajamatabëëthëtovetsina pecapitsapaejamatabëcuene, xanepana. Itsalivaisi ata cajena apo itavetsi daxita bajarapacuene.

24 Pamonae Jesucristo pijajivi, bajarapamonae jamatabëjumaitsi: “Jesucristo cruzajavabelia itsa cobematabiabarutatsi, tajaperujujamatabëcuenemi yajavatëpa,” jamatabëjai. Nexata vecuaajibiaexanatsi pajamatabëcuene itorobabiabatsi pibisiacuene pexanaenexa.

25 Vaxaitsi Espiritu Santo nacayajavaponapona. Nexata betonacopatabi-abatsi vajanacaitorobinexa pacuenia Espiritu Santo nacatojitsipa vajaexanabiabinexa.

26 Ayajamatabëcuenejivitsi apo benataetsi. Namataenetsia itsacuenejavayo ata pibisiacuene apo benatoexanaetsi vajanabaraanaepanaeyaniva, vajanacuenecaëbivaniva ata.

6

Pacuenia Dioso pejumecovënëtsivi itorobatsi namataenetsia penajamatabëcueneyavenonaenexa yabara pelivaisi

1 Tajamonae, itsa pacaxitajarabame Dioso pejumecovënëtsijavavecua pejopaejivi, paxamë pacuenia Espiritu Santo pacaitoroba panejinavanapaevi, payavenonare bajarapajivi. Payavenonare bajarapajivi pijamatabëcuenesaënexa icatsia Dioso pejumecovënëtsijava. Itsiata baitsi jane pexaniajamatabëcuenia xaniavaetsia payavenonare. Paxamë ata pibisiacuene nayajivitaeya pajinavanapare. Belia paxamë ata Dioso panejumecovënëtsijavavecua, pajopaejitsipame dovathi itsa pacajamatabëcuenejëta pibisiacuene paneexanaenexa.

2 Namataenetsia panayavenonabiabare dovathi itsa pacajamatabëcuenejëta, pibisiacuene paneexanaeyaniva. Namataenetsia itsa panayavenonabiabianame panenasivaxae, nexata pajumecovënëtsianame pacuenia Cristo pacaitoroba.

³ Pajivi jumaitsi itsa vënëlivaisitane itsajivi Dioso pejumecovënëtsijavavecua pejopaajava: “Xanë cajena ayaijatabêcuenenënë bajarapajivi matatox-enetsia. Nexata Dioso tajumecovënëtsijavavecua apo jopaenë tsane,” jai, bajarapajivi najamatabêcuenecapaeaba. Tsipaji bajarapajivi ata dovathi itsa jamatabêcuenenêjêtatsi pibisiacuene pexanaenexa, apo ajamatabêcuenesaê tsipae Dioso pejumecovënëtsijava.

⁴ Caejivi canacujitsia benacuenecanaëjêta peyapêtaenexa xua exanapon-aponona Dioso pitabarata. Nexata pajivi pexaniacuene exanaponaponona, bajarapajivi jamatabêcuenenarêya Dioso pitabarata. Itsiata baitsi jane bajarapajivi pexaniacuene exanaponaponae ata, apo bejamatabêjumaitsi mapacueniaje: “Xanê itsamonaevēcua pexaniacuene Dioso toexanaponaponajê,” apo bejamatabêjai.

⁵ Caejivi canacujitsia baja cajena saicaya xaina pexanaponaejavanexa Dioso pitorobicueniatsi.

⁶ Pamonae tsipaebatsi Dioso pejumelivaisi, bajarapamonae pexainayajuvënëjava juya berajuta Dioso pejumelivaisi petsipaebinêtsijavabelia.

⁷ Pêtsa pajamatabêcuenenavêxaniabame saicayacuena paneexanaeyaniva Dioso papecaitorobicuenevecua. Tsipaji itsajivi ata apo caëjêpaetsi peyamaxêitorobinexa Dioso. Xua jivi bauba pabita, pamatacabi baja navereta bajaraxua, icatsia banota. Bajara pijinia itsane Dioso ata. Pajivi pibisiacuene exana, bajarapajivi juya pibisiacuene tocopiapatsianatsi pamatacabi Dioso naneconitsiaexanaenatsi.

⁸ Pajivi pibisiacuene exanaponaponona pijacuata penatojitsipaecuenia, nexata bajarapajivi itsa tēpaena, pepacuene Diosovecua naxuabiana. Pajivi pijinia pexaniacuene exanaponaponona Espiritu Santo pesivabarêyanexatsi, nexata bajarapajivi tēpae ata, xainaena matacabi apo peverevercaejava.

⁹ Vaxaitsi itsa apo yabaracueranaetsi tsane pexaniacuene vajaexanavanapaejava, nexata Dioso pecaëjêtsimatacabitata nacarajutsiana pexaniacuene. Bajaraxuata pexaniacuene vajaexanavanapaejava, apo beyabaracueranaetsi.

¹⁰ Nexata itsajota nacacuenecaëjêpa, pexaniacuene betoexanabiabatsi itsamonaejavabelia. Pamonae Jesucristo vajanajuajumecovënëtsivi, bajarapamonae bitsoyo beyavenonaponatsi.

Pacuenia Pablo pemuxujobilivaisi Galacia tomarapijivi toyaquina peveretsinexa baja petoyaquinaelivaisi mapabaxutotaje yabara pelivaisi

¹¹ Pataema mapaayaiitanetonêje. Xanê raja Pablonê tajacuata pacatoy-aquinatsi mapalivaisije.

¹² Itsamonae judíovi ajumesaëya pacajumai tsabiabi: “Paxamê apo pajudíovi atamê, Jesucristo pelivaisi itsa pajumecovënëtame, bepanaperabêcaucubiaexaname papecacapanepaenexa Diosojavabelia,” pacajai tsabiabi. Pajudíovi bajarapacuenia pacajumai tsabiabi, jamatabêcuenenavêxaniabiaya jamatabêjumai tsabiabi: “Jesucristo pelivaisi apo judíovi itsa tsipaebianatsi, yajavaitorobianatsi penaperabêcaucubiaexanaenexa. Nexata bajarapacuenia itsa exanaenatsi, vajamonae judíovi nacasivajamatabêcuenenarêya tsane. Nexata vajamonae judíovi apo nacaitacueniabatsi tsane, apo judíovi tsipaebi atatsi Cristo vajanacasivatêpaejava cruzata,” jamatabêjai tsabiabi bajarapajudíovi jamatabêcuenenavêxaniabiaya.

¹³ Pajudíovi bajarapacuenia pacajumai tsabiabi, pijacuata naperabêcaucubiaexanae ata, itsiata apo exanavanapae daxita pacuenia

itorobatsi Dioso Moiséspijinëta penajumecopatsilivaisi. Bajarapamonae jitsipa panenaperabëcaucubiaexanaenexa, saya papecevajunupaebinexa pevëna judíovijavabelia: “Paxanë patajamatabëcueneta Galacia nacuapijivi naperabëcaucubiaexana,” pejainexa paxamë yabara. Tsipaji bajarapajudíovi jitsipa pesivajamatabëcuenegarëyajavatsi pevëna judíovi.

¹⁴ Xanë cajena bajarapacuenia apo exanaenë. Apo najamatabëxainaenë, xua exanaje, tanavajunupaebinexa jivi saya tanesivabarëyanexa. Itsiata jitsipajë caelivaisiyo jamatabëcuenegarëyaya jivi tatsipaebinexa. Jitsipajë jivi tatsipaebinexa Jesucristo vajanacasivatëpaejava cruzata. Jesucristo cruzata tanesivatëpaexae, nevejamatabëcaeva baja tajitsipaejavami mapanacuapijicueneye. Mapanacuapijivi pijinia tanejitsipaejamatabëcuenemi ata ajibi baja.

¹⁵ Espíritu Santo vajanacaitorobicuenia itsa exanavanapatsi, nacaperabëcaucutsi ata, apo nacaperabëcaucutsi ata, najëpabeje. Tsipaji cajena amata-mobi bajarapacuenie Dioso pitabarata. Vajanajamatabëcuene pënëyorotsijava rajane pejanajamatabëcueneyavabelia, namatamota vajanacacapanepaenexa Diosojavabelia.

¹⁶ Nexata pamonaie exanavanapa pacuenia pejanajamatabëcuene itorobatsi, bajarapamonae jamatabëcuenexanepanaeya jinavanapaena Dioso pitabarata. Dioso itaxutotsoniataenatsinua. Bajarapamonae daxita Dioso baja pepo pijajivi tsane.

¹⁷ Tavajënaeyabelia baja apo jitsipaenë tanejamatabëitonotaponaenexa pamonaie nejumeaeba Jesucristo taneitorobinëcuene. Jesucristo pelivaisi yabara tanejumaconibabeyabiabijavata, nejumatitibabeyabiaba. Bajara-pavajënëcovëanë tanetsijumarubenaexae, daxitajivi neyapëtane Jesucristo pijajivitonëcuenenë.

¹⁸ Tajamonae, pacatovajëtabiabat si Diosojavabelia vajatuxanenë Jesucristo papecayavenonabiabinexa. Bajara itsi tsane.

Mapabaxutoje San Pablo toyaquina Efeso tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Efeso tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata.

² Pacatovajëtatsi vaxa Diosojavabelia, vajatuxanënë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso jivi capanepaejitsia pijaneconivecua Jesucristo pesivatëpaexaetsi yabara pelivaisi

³ “Pexaniacuene rabaja panetoexaname,” jaitsi vaxaitsi, vajatuxanënë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenonapona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vajanaponaenexa Dioso pjanacuayabetsia.

⁴ Dioso mapanacuaje pexanaevajënaeya ata, tajëvelia nacaitapeta pija-jivinexatsi. Tshipaji baja Dioso tajëvelia yapëtane Jesucristojavabelia vajana-jamatabëcuene copatsijavanexa Jesucristo vajanacasivatëpaexae. Bajarapacuenia Dioso tajëvelia nacaitapeta pijajivinexatsi vajajinavanapaenexa aneconijibia Dioso pitabarata.

⁵ Dioso bitso vajanacajitsipaexae, tajëvelia najamatabëcuenevereta pexicueniatsi vajanacataenexa. Jesucristo nacasivatëpa Dioso petojitsipaecueniatsi. Bajaraxuata nexata Dioso nacatane pexicueniatsi.

⁶ Nexata Dioso pexaniacuena vajanacaitaxutotsoniataexae, daxitamatacabi canacujitsia Diosojavabelia jumaitsitsi tsabiabi. “Xanëpana rabaja. Tshipaji pexaniacuene panetoexaname,” jaitsi tsabiabi Diosojavabelia. Dioso pexënato piasivanë pijajivixaetsi, Dioso nacaitaxutotsoniatane.

⁷ Pinijicuenia Dioso vajanacaitaxutotsoniataexae, nexata pexënato itorobica mapanacuayabetsicaje vajanacasivatëpaenexa. Bajarapacuenia Dioso nacavecuajaaxana pibisiacuene vajaexanaeconimi.

⁸ Dioso pinijicuenia vajanacaitaxutotsoniataexae, nacayapëtaeyaexana pexaniajailivaisi. Nacayapëtaeyaexanua pacuene nacatoxanepana Dioso pejitsipaecuenia vajaexanavanapaenexa.

⁹ Xua Dioso tajëvelia najamatabëcuenevereta pexanaenexa, bajaraxua baja aeconoxae Dioso nacayapëtaeyaexana. Bajaraxua picani abaxë itsajivi ata apo yapëtae. Xua Dioso tajëvelia najamatabëcuenevereta pexanaenexa, mait-sije. Dioso itorobijitsiatsica pexënato mapanacuayabetsicaje petoexanaev-eretsinexatsi daxita pacuenia itoroba.

¹⁰ Pacuenia Dioso tajëvelia najamatabëcuenevereta, bajarapacuenia daxita Cristo pijajivitsi nacacaeuatsiana Dioso pecaëjët simatacabi itsa copiapatsiana. Dioso pecaëjët simatacabi itsa copiapatsiana daxitacuene mapanacuapijicuenije, athëbëpjiacuene ata, Dioso baja tocopatsiana pexënato juya pevetsinexa.

¹¹ Jesucristo pijajivonexatsi tajëvelia Dioso nacaitapeta. Bajarapacuenia Dioso tajëvelia nacaitapeta tsipaji baja cajena Dioso tajëvelia najamatabëcuenevereta bajarapacuenia pexanaenexa. Dioso daxitacuene exana pacuenia tsitaxanepanatsi.

¹² Bajarapacuenia Dioso tajëvelia nacaitapeta vajanajamatabëcueneocopatsinexa Jesucristojavabelia. Nexata vaxaitsi Dioso tojinavanapatsi Diosojavabelia vajajumaitsitsabiabinexa: “Diosomë, ayaijamatabëcuenenëmë bitso,” vajajaitsabiabinexa Diosojavabelia.

¹³ Pexaniajailivaisi papecacapanepaelivaisinexa, paxamë ata itsa pajumetaneme, nexata baja panajamatabëcueneocopatame Jesucristojavabelia papijajivexamë. Nexata pacuenia Dioso tajëvelia najumecapanepaeya jumaitsi, pacarajuta baja Espiritu Santo papecatsijamatabëcaenexa. Nexata bajarapacuenia panayapëtaneme Dioso papijajivicuene.

¹⁴ Espiritu Santo vajanacatsijamatabëcaexae, yapëtanetsi pexaniajaicuene Dioso vajanacarajutsinexa matababi apo peverevereaejava. Yapëtanetsinua Dioso vajanacacapanepaejavanexa pexë nato vajanacasivatëpaexae. Bajaraxuata vaxaitsi bejumaitsitsi Diosojavabelia: “Diosomë, ayaijamatabëcuenenëmë bitso,” bejaitsi.

Pacuenia Pablo tovajëta Diosojavabelia Dioso pejumecovënëtsivi, Efeso tomarapijivi, yabara pelivaisi

¹⁵ Pacavënëlivaisitanetsi panenajamatabëcueneocopatsijava vajatuxanenë Jesucristojavabelia. Pacavënëlivaisitanetsinua paneasivajava daxita pamonaë Dioso pejumecovënëtsivi.

¹⁶ Bajaraxuata itsa vajëtajë Diosojavabelia, pacatovajëtabiabatsi. Nexata pexaniajamatabëcuene rajutabiabajë Diosojavabelia paxamë yabara.

¹⁷ Ayaijamatabëcuenenë Dioso, vajatuxanenë Jesucristo paxa. Bajaraponëjavabelia pacatovajëtabiabatsi. Pacatovajëtabiabatsi Espiritu Santo pejamatabëcueneta xaniavaetsia panevajënaeyabelia papecayapëtaeyaexanaponaenexa pacuenia Dioso jamatabëcueneitsi. Nexata Espiritu Santo pejamatabëcueneta panevajënaeyabelia pacayapëtaeyaexanaponaena pacuenia Dioso jamatabëcueneitsi. Pacayapëtaeyaexanaponaenanua pacuenia Dioso nacatsitanajamatabëcueneitajëta.

¹⁸ Pacatovajëtabiabatsinua Diosojavabelia Dioso papecajamatabëcueneitayotsinexa panevajënaeyabelia paneyapëtaeponaenexa pajamatabëcuene yabara Dioso pacajunata papijajivexamë. Pacatovajëtabiabatsinua Diosojavabelia paneyapëtaenexa xua Dioso pacarajutsijitsia, bitso ayaijamatabëcuenejava, matababi apo peverevereaejava. Tajëvelia Dioso najumecapanepaeya jumaitsi Dioso pijajivitsi vajanacarajutsinexa matababi apo peverevereaejava.

¹⁹⁻²⁰ Pacatovajëtabiabatsinua paneyapëtaenexa Dioso bitso piasaënëcuene. Vajanacayavenonaenë vajanajamatabëcueneocopatsivi bajaraponëjavabelia. Dioso bitso piasaënëcuene jivi tsitanajamatabëcueneitajëta pamatababi Cristo asaëyaexanatsi petëpaecujinae. Nexata baja Cristo paxa Dioso athëbëtsatsia pemuxuneneta ecaeyaexanatsi pecujanenia penajuaevetsinexabeje daxitacuene. Nexata bajarapasaëta vaxaitsi ata Dioso nacayavenonapona.

²¹ Bajarapacuenia Cristo athëbëtsatsia, paxa Dioso pemuxuneneta, ecaeyaexanatsi pecujanenia Cristo pevetsinexa daxitacuene. Nexata daxitanacuanëjava pevetsivi matatoxenetsia aeconoxae jane baja daxitacuene Cristo pepo pevetsinë. Cristo baja daxitacuene eveta mapamatababitaje. Pejanamatabacijavabelianexa ata evetsiana.

²² Dioso tocopatatsi Cristo daxitacuene pevetsinexa. Nexata Cristo pepo pitorobinē daxita pamonaē najamatabēcuēnecopata bajaraponējavabelia.

²³ Daxita baja pamonaē najamatabēcuēnecopata Jesucristojavabelia, Dioso tanetsi Cristo pijajivi. Cristo nexata itoroba bajarapamonaē. Nexata Cristo bajarapamonaē yajavaponapona daxita mapanacujavaje.

2

Pacuenia Dioso pijajivi, piisivaxae, capanepaejitsia yabara pelivaisi

¹ Dioso baja cajena pacajamatabēcuēneaitavayaexana Jesucristo pejamatabēcuēneta. Paxamē abaxē bajayata Dioso itsa apo pajumecovēnētšimē, naxuabiaya picani Diosovecua pajinavanapame pibisiacuene paneexanavanapaeconī yabara. Nexata pacuenia itsi petēpaevi, bajara picani pajamatabēcuēneitsimē Diosojavabelia itsa abaxē Dioso apo pajumecovēnētšimē.

² Pacuenia Dioso apo pejumecovēnētšivi, pibisiacuene exanavanapa, bajara picani pacuenia paxamē ata bajayata pibisiacuene paexanavanapame. Pajumecovēnētavanapame picani ēdovathi, ponē eveta pitaquirijamatabēcuene mapanacuataje. Aeconoxae dovathi jamatabēcuēneasaēyaexanapona pamonaē Dioso apo pejumecovēnētšivi pibisiacuene pexanaenexa.

³ Daxita picani bajayata vaxaitsi pibisiacuene exanavanapatsi. Pacuenia vajamatabēēthētota jitsipatsi vajaexanaenexa, exanabiabatsi. Xua najamatabēxainatsi, exanabiabatsi. Bajaraxuata pacuenia daxita itsamonaē naneconita Diosojavabelia, bajara picani pacuenia vaxaitsi ata naneconitsi Diosojavabelia vajanacananeconitsiaexanaenexa.

⁴ Itsiata baitsi jane Dioso, bitso jivi pitaxutotsoniataenē, vaxaitsi bitso nacajitsipa.

⁵ Diosovecua naxuabiaya picani vajajinavanapaevimi ata pibisiacuene vajaexanaeneconī yabara, itsiata Dioso nacajamatabēcuēneaitavayaexana, Jesucristo Dioso itsa asaēyaexanatsi petēpaecujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacacapanepaena pibisiacuene vajaexanaeneconimivecua.

⁶ Jesucristo petēpaecujinae, Dioso icatsia asaēyaexanatsi petēpaejavavecua. Nexata vaxaitsi Jesucristojavabelia vajanajamatabēcuēnecopatsixae, Dioso nacatane bevajanacayajavaasaēyaexanaevi. Dioso nacatanenua Jesús athēbētatsia bevajanacayajavaeaevi daxitacuene vajanacabarēevetsinexa.

⁷ Bajarapacuenia Dioso nacatoexana vajanacatsitanajamatabēcuene itajētšinexa daxitamatacabijavabelianexa vajanacajitsipaeuene. Nacatsitanajamatabēcueneitajētanua vajanacaitaxutotsoniataeuene Jesucristo vajanacasivatēpaexae.

⁸ Dioso cajena bitso pacajitsipa. Bajaraxuata Jesucristojavabelia itsa panajamatabēcuēnecopatame, Dioso pacacapanepaena panijaneconivecua. Bajarapacuenia Dioso papecacapanepaejanexa, panijacuata apo panatoexanaemē. Biji rajane Dioso pejamatabēcuēneta pacacapanepaena.

⁹ Itsajivi ata Dioso petonacuenebaponaponaejamatabēcuene, Dioso apo capanepaetsi tsane. Biji rajane Jesucristojavabelia penajamatabēcuēnecopatsixae, Dioso capanepaenatsi. Bajaraxuata itsajivi ata beayajamatabēcuenejivi apo benatae Dioso pecapanepaejavanexatsi yapētae ata. Apo bejumaitšinua: “Xanē Dioso tatonacuenebixae, nexata necapanepaena,” apo bejai.

¹⁰ Vaxaitsi raja Dioso nacaexana. Nacaexananua Jesucristo pijajivitsi Dioso vajatoexanavanapaenexa pexaniacuene. Bajarapacuenia Dioso tajëvelia najamatabëxaina vajatoexanavanapaenexa.

Pacuenia Dioso pejumecovënëtsivi jamatabëcuenexanepanaeya jinavanapa Jesucristo pejamatabëcueneta yabara pelivaisi

¹¹ Panajamatabënapire pacuenia picani paxamë bajayata pajamatabëcuenëitsimë tsavanapae itsa abaxë Dioso apo pajumecovënëtsimë. Paxamë apo pajudíovimë. Judíovi saicaya peperabëcaucubivitsi Dioso pijajivi penayapëtaenexa. Nexata judíovi jumai tsabiabi: “Vaxaitsi vajanacaperabëcaucubivi, Dioso pijajivitsi nayapëtanetsi,” jai tsabiabi. Paxamë pijinia apo pajudíovixaemë, judíovi paxamë yabara jumai tsabiabi: “Bajarapamonaë apo peperabëcaucubivitsi. Nexata Dioso apo pijajivi,” jai tsabiabi judíovi paxamë yabara.

¹² Bajarapamatacabi abaxë apo pajumecovënëtsimë Cristo. Pasaicayavimë abaxë tsavanapae Diosovecua. Pasaicayavimë abaxë tsavanapae judíovi atavecua. Bajarapamatacabi abaxë apo payapëtaemë pacuenia Dioso pacayavenonaëjitsia papecacapanepaenëxa. Mapanacuata picani abaxë naxuabiaya Diosovecua pajinavanapame. “Pamatacabi tēpaenajë, pepacuene naxuabianajë,” pajamatabëjamë tsabiabi.

¹³ Paxamë picani Diosovecua bitso naxuabiaya pajinavanapame. Itsiata baitsi jane aeconoxae baja Cristo papijajivimë. Cristo papecasivatēpaexae, aeconoxae baja payajavajinavanapame Dioso.

¹⁴ Paxanë pajudíovinë, paxamë apo pajudíovi atamë, Jesucristo pejamatabëcueneta daxitatsi Dioso nacajamatabëcuenexanepanaeyaexana namataenetsia vajanasivatsavanapaenexa. Jesucristo pejamatabëcueneta benacaemonaetsi Dioso nacaexana. Jesucristo daxitatsi vajanacasivatēpaexae, ajibi vajanayabaraitoyacuene vajanavecuanatsanaenexa.

¹⁵ Jesucristo cruzata itsa tēpa, copiarucaeyaexana baja namataenetsia vajanaitoyacuenemi. Tspaji baja Jesucristo itsa tēpa, copiarucaeyaexana palivaisimi bajayata Dioso Moiséspijjinëta najumecopata. Bajarapalivaisimi paxanë pajudíovinë bitso picani asaëyata pajumecovënëtavanapajë. Nexata bajarapalivaisimi Jesucristo baja copiarucaeyaexana. Dioso Moiséspijjinëta penajumecopatsilivaisi itsa pajumecovënëtavanapajë, paxamë apo pajudíovimë apo pacabarajamatabëcuenexanepanaetsi. Aeconoxae baja Jesucristo vajajumecovënëtsixae, Jesucristo pijajivitsi nacaexana. Nexata baja Jesucristo pejamatabëcueneta nacanabarajamatabëcuene xanepanaeyaexana.

¹⁶ Jesucristo cruzata vajanacasivatēpaexae, copiarucaeyaexana baja namataenetsia vajanaitoyacuenemi. Nexata paxanë pajudíovinë, paxamë pijinia apo pajudíovi atamë, Cristo baja caebitsaëtotsi nacaexana pijajivinxatsi. Nexata baja Dioso jamatabëcuenexanepanaeya nacatanë.

¹⁷ Jesucristo patajopa mapanacuayabetsicaje. Nexata capatsica pexanalivaisi vajayapëtaenexa daxitatsi Dioso jamatabëcuenexanepanaeya vajanacataejava. Paxamë apo pajudíovimë bitso picani Diosovecua naxuabiaya pajinavanapame. Bajaraxuata Dioso pacatocopata Jesucristo pelivaisi panejumecovënëtsinëxa. Paxanë pajudíovinë pajumecovënëtajë picani palivaisi bajayata Dioso Moiséspijjinëta najumecopata. Nexata paxanë ata Dioso panetocopata Jesucristo pelivaisi patajumecovënëtsinëxa.

¹⁸ Nexata Jesucristo daxitatsi vajanacasivatēpaexae, paxanë pajudíovinë, paxamë pijinia apo pajudíovi atamë, vaxa Dioso nacatocopata vajajonenexa Dioso pijatomarabetsia. Bajarapacuenia vaxa Dioso nacatocopata vajajonenexa pijatomarabetsia Espiritu Santo vajanacayavenonaexae.

¹⁹ Bajaraxuata apo pajudíovi atamē, aeconoxae baja Dioso panejume-covēnētsixae, bepasaicayavimē baja Dioso apo pacatae. Biji rajane it-samonae, Dioso pejumecovēnētsivi yajava, paxamē baja Dioso papeximē pacaexana Dioso pijanacuatatsi panenajuajinavanapaxenaxa.

²⁰ Palivaisi bajayata Diosojumepaebivi profetavi tajēvelia yaquina, Jesu-cristo baja cajena pelivaisi, bajarapalivaisi pajumecovēnētame baja. Paxanē ata Jesucristo papijajivinē, paapóstolevinē, paneitoroba patacatsipaebapon-aenexa bajarapalivaisi, Jesucristo pelivaisi. Nexata bajarapalivaisi pane-jumecovēnētsixae, panajamatabēcuenecopabame baja Jesucristojavabelia pa-pecacapanepaenexa. Bajaraxuata Dioso baja papeximē pacaexana.

²¹ Nexata baja itsamonae ata ayaibitsaētoخانەتو najama-tabēcuenecopabapona Jesucristojavabelia. Nexata Cristo pejamatabēcueneta itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa.

²² Bajara pijinia pacuenia paxamē ata, itsamonae yajava, pamonaē Je-sucristojavabelia penajamatabēcuenecopabivi, caebitsaēto Dioso papeximē pacaexana. Nexata Dioso pacayajavaponapona Espíritu Santo papecatsija-matabēcaexae.

3

Pacuenia Pablo itorobatsi pexanialivaisi, Jesucristo pelivaisi, petsipae-baponaenexa apo judíovijava yabara pelivaisi

¹ Paxamē apo pajudíovi atamē, Dioso papijajivixaemē, pacatovajētabiabatsi Diosojavabelia. Xanē Pablonē, Jesucristo pijajivitonēnē. Nexata Jesucristo pelivaisi jivi tsipaebabiabajā. Nexata Jesucristo pelivaisi jivi tatsipaebabi-abixae, nenaneconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabjavata, jumaitsinē tsabiabi: “Pamonae apo judíovi ata, itsa jumecovēnēta Jesucristo pelivaisi, bajarapamonae ata Dioso pijajivi,” janē tsabiabi paxamē yabara. Bajarapacuenia Jesucristo peliv-aisi jivi tatsipaebabiabixae, penaneconitsivi pejebabiabibota tavēna judíovi neeta.

² Bepayapētaneme xanē Dioso taneitorobicuene patacatsipaebinxaxa apo pajudíovi atamē Dioso papecaitaxutotsoniataejava.

³ Apo pajudíovi atamē, Dioso papecaitaxutotsoniataejava tayapētaenexa, Dioso baja cajena neyapētaeyaexana. Dioso papecaitaxutotsoniataexae papecacapanepaejavanexa ata tayapētaenexa, Dioso baja cajena neyapētaeyaexana. Nexata Dioso papecaitaxutotsoniataejava paneyapētaenexa, pacatoyaquinarutetatsi caelivaisiyobeje saya.

⁴ Itsa palebianame, payapētaename pacuenia Dioso neyapētaeyaexana ēpajudíovinē Dioso apo patanitaxutotsoniataejava. Payapētaenamenua pacue-nia Dioso neyapētaeyaexana, apo pajudíovi atamē, Dioso papecaitaxutotsoni-ataejava.

⁵ Bajayata abaxē itsajivijavabelia ata Dioso apo yapētaeyaexanae, apo pajudíovi atamē, Dioso papecaitaxutotsoniataejavanexa. Aeconoxae baja paxanē Dioso papijajivinē, paapóstolevinē, Dioso paneyapētaeyaexana, apo pajudíovi atamē, Dioso papecaitaxutotsoniataejava. Profetavijavabelia ata Dioso yapētaeyaexana, apo pajudíovi atamē, Dioso papecaitaxutotsoniatae-java. Aeconoxae baja bajarapacuenē Dioso paneyapētaeyaexana Espíritu Santo pejamatabēcueneta.

6 Xua picani itsajivijavabelia ata Dioso apo yapētaeayaexanae, bajaraxua maitsije. Paxanē pajudíovinē, itsa pajumecovēnētajē pexanialivaisi, Jesucristo pelivaisi, pancapanepaena Dioso. Bajara pijinia pacuenia paxamē ata, apo pajudíovi atamē, itsa pajumecovēnētame pexanialivaisi, Jesucristo pelivaisi, pacacapanepaena Dioso. Pajudíovinē, apo pajudíovi atamē, daxitatsi benacaemonaetsi nataenatsi. Jesucristo pelivaisi vajajumecovēnētsixae, daxitatsi Dioso nacarajutsiana xua Dioso najumecapanepaeya nacarajutsiapaeba.

7 Piasaēnē Dioso taneitaxutotsoniataexae, netocopata Jesucristo pelivaisi tatsipaebaponaenexa daxitajivijava. Dioso necaējēpaeyaexananua xaniavaetsia jivi tatsipaebaponaenexa bajarapalivaisi.

8 Xanē itsiata beveliajamatabēcuenenēnē nataniji daxita Dioso pejumecovēnētsivivecua. Itsiata baitsi jane mapapexaniacueneje Dioso netocopata. Dioso netocopata apo pajudíovimējava patacatsipaebaponaenexa pexanialivaisi, Jesucristo pelivaisi. Nexata pacatsipaebaponatsi ayaicuenia Jesucristo vajanacayavenonaponaejavanexa.

9 Dioso nitoroba patacatsipaebaponaenexa, apo pajudíovi atamē, Dioso papecacapanepaejavanexa. Dioso daxitacuene pexanaenē mapanacuataje. Dioso cajena tajēvelia najamatabēxaina paxamē ata, apo pajudíovi atamē, papecacapanepaenexa. Itsiata itsajivijavabelia ata Dioso apo yapētaeayaexanae, apo pajudíovi atamē, Dioso papecacapanepaejavanexa.

10 Bajarapacuenia Dioso pacacapanepaena, apo pajudíovi atamē, petsitanajamatabēcuene itajētsinexa athēbētatsia pevetsivijavabelia. Nexata athēbētatsia pevetsivi itsa nacataena daxitatsi Dioso vajajumecovēnētsivi, pajudíovinē, apo pajudíovi atamē, benacaemonaetsi vajanajuajinavanapaejava, athēbētatsia pevetsivi yapētaena bitso Dioso peyapētaenēcuene daxitacuene pexanaenexa.

11 Pacuenia Dioso tajēvelia copiaya najamatabēxaina, mapanacua pexanaevajēnaeya ataje, bajarapacuenia baja Dioso exanaevereta. Tsipaji baja Dioso itorobica vajatuxanenē Jesucristo vajanacasivatēpaenexa cruzata.

12 Vaxaitsi baja najamatabēcuenecopatatsi Jesucristojavabelia vajanacapanepaenexa. Bajaraxuata Diosojavabelia vajētabiabatsi ajumejunavijibia.

13 Bajaraxuata Diosojavabelia asaēyata pacatovajētabiabatsi patanesivajamatabēcuene cueranaeyanivamē abaxē naneconitsia taponaponaejava penaneconitsivi pejebabiabibota. Jesucristo pelivaisi jivi tatsipaebijavata, jumaitsinē tsabiabi: “Pamonae apo judíovi ata itsa jumecovēnēta Jesucristo pelivaisi, bajarapamonae ata Dioso pijajivi,” janē tsabiabi paxamē yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavēna judíovi nenaneconitsiaexaneta. Bajaraxuata panesivajamatabēcuenebarēyamēre naneconitsia taponaponaejava penaneconitsivi pejebabiabibota.

Pacuenia Pablo Diosojavabelia tovajēta Dioso pejumecovēnētsivi yabara pelivaisi

14 Itsa najamatabēnapitabiabajē, apo pajudíovi atamē, Dioso papecacapanepaejavanexa, nexata tamatabacabēta nucabiabajē asaēyata patacatovajētsinexa vajatuxanenē Jesucristo paxa Diosojavabelia.

15 Daxita Dioso pijajivi, pamonae athēbētatsia jinavanapa, pamonae ata mapanacuataje jinavanapa, daxita bajarapamonae Dioso tanetsi benacaemona. Caenē paxa exana Dioso.

16 Dioso baja cajena bitso piasaenë. Ayaijamatabëcuene pexainaenë. Bajaraxuata pacatovajëtabiatsi Diosojavabelia Dioso pesaëta papecajamatabëcuene asaëyaexanaenexa Espiritu Santo pejamatabëcueneta.

17 Pacatovajëtabiatsinua Jesucristo papecatsijamatabëcaenexa panesivanajamatabëcopatsixae bajaraponëjavabelia. Pacatovajëtabiatsinua bitso paneasivanexa itsamonae ata, pamonaë Dioso pejumecovënëtsivi.

18 Pacatovajëtabiatsinua daxita Dioso panejumecovënëtsivi panejamatabëcueneyapëtaenexa Jesucristo bitso papecaasivajava.

19 Pacatovajëtabiatsinua panijacuata xaniavaetsia paneyapëtaenexa Jesucristo vajanacaasivajava. Jesucristo vajanacaasivajava, bitso pexaniacuene, apo vajayapëtaecapanepaejava xaniavaetsia vajayapëtaenexa. Nexata itsa payapëtaename Jesucristo vajanacaasivajava, paxainaename pajamatabëcuene Dioso pacatojitsipa.

20 “Diosomë, bitso ayaijamatabëcuenenëmë,” jaitsi vaxaitsi Diosojavabelia. Bajarapacuenia jumaitsitsi tsipaji bitso Dioso pecaëjëpaenëtsi vajanacayavenonaenexa. Dioso caëjëpatsi vajanacatoexanaenexa vajavajëtsienia. Vajanajamatabëxainaejava ata matatoxentzia, Dioso caëjëpatsi vajanacatoexanaenexa. Dioso pesaëta nacayavenonabiaba.

21 Dioso pejumecovënëtsivi Dioso peyavenonaponaexaetsi, itsamonaejavabelia tsipaebavanapa Dioso bitso ayaijamatabëcuene pexainaenëcuene. Jesucristo ata itsa ponapona mapanacuataje, nexata Dioso tsitanajamatabëcueneitajëta jivijavabelia Dioso bitso ayaijamatabëcuene pexainaenëcuene. Bajaraxuata daxitajivi bejumai tsabiabi Diosojavabelia: “¡Diosomë, bitso ayaijamatabëcuenenëmë!” bejai tsabiabi Diosojavabelia daxitamatabijavabelianexa. Bajara itsi tsane.

4

Pacuenia Espiritu Santo pejamatabëcueneta daxita Dioso pejumecovënëtsivi najamatabëcuenejëpaeya jinavanapaena yabara pelivaisi

1 Naneconitsiaponaponajë majotaje, penaneconitsivi pejebabiabibota, tajumecovënëtsixae vajatuxanenë Jesucristo taneitorobicuenia. Asaëyata pacamuxujibatsi panejinavanapaenexa pacuenia Dioso pacatojitsipa Dioso papecajunatsivi papijajivinexamë.

2 Itsamonaevēcua beveliajamatabëcuenevi nataeya pajinavanapare. Panajamatabëxainarenua pexaniajamatabëcuene daxitajivijavabelia. Pajamatabëcuenesaëmērenua tsavanapae bajayajebi, itsamonae pacaitsacueniababiabi ata. Namataenetsianua panayavenonabiabare namataenetsia panenasivaxae.

3 Pajamatabëcuenesaëmēre tsavanapae najamatabëcuenejëpaeya panejinavanapaenexa. Bajaraxua yabara Diosojavabelia panatovajëtabiabare papecayavenonaenexa Espiritu Santo. Nexata nabarajamatabëcuenexanepanaeya pajinavanapaenexa.

4 Jesucristojavabelia vajanajamatabëcuenecopatsixae, vaxaitsi baja nexata caenë Jesucristo pijajivitsi. Xainatsi baja caeEspiritu Santo Dioso vajanacajunatsivi. Bajaraxuata caejamatabëcuene xainavanapatsi. Evetavanapatsi pacuenia Dioso najumecapanepaeya jumaitsi vajanacacapanepaenexa.

5 Caenë rabaja vajatuxanenë Jesucristo. Daxitatsi najamatabëcuenecopatatsi caenëjavabelia. Nacabautisabanua caenë Jesucristo pevënëta.

⁶ Xainatsi caenë vaxa Dioso. Caenë Dioso daxitatsi vajanacanamata-caitorobinë. Dioso pijajivitsi, daxitatsi, nacayavenona. Nacayajavaponapomanua.

⁷ Caejivitsi canacujitsia, Cristo pejitsipaecuenia nacajamatabëcuene caëjêpaeyaexanapona pecovëta vajatonacuenebavanapaenexa vajanacaitorobicuenia.

⁸ Tsipaji baja cajena Dioso pejumelivaisibaxutota tajëvelia jumaitsi Jesucristo yabara mapacueniaje:

Ayaibitsaëtoxaneto pitoyavitsi pepuajamatabëcueneamoneyabi, athëbëabetsia naviatiania. Pijajivi pijinia pepuajamatabëcuenecaëjêpaeyaexanae pecaëjêpaejamatabëcueneitsi pecovëta petonacuenebavanapaenexatsi, naviatiania, jai tajëvelia Dioso pejumelivaisibaxutota Jesucristo yabara.

⁹ Bajarapacuenia Dioso pejumelivaisibaxutota Jesús yabara tajëvelia jumaitsi. Tsiipaji Jesús patsijitsiatsica mapanacuayabetsicaje. Bajaraxuacujinae icatsia Jesús naviatijitsia athëbëabetsia. Mapanacuaje bevelianacua saya Dioso pijanacuavecu.

¹⁰ Ponë yabara Dioso pejumelivaisibaxutota bajarapacuenia tajëvelia jumaitsi, patsica baja mapanacuayabetsicaje. Bajaraxuacujinae icatsia bajaraponë naviatia baja tajënacuyabetsia. Bajaraxuacujinae Jesucristo itorobica Espiritu Santo. Nexata daxitanacuanëjava Espiritu Santo yajavaponapona daxita Dioso pejumecovënëtsivi.

¹¹ Nexata Dioso pejumecovënëtsivi, caejivi canacujitsia, Espiritu Santo jamatabëcuene caëjêpaeyaexanapontsi saicayacuenia. Itsamonae Espiritu Santo jamatabëcuenecaëjêpaeyaexanatsi apóstolevinexa Jesucristo pexanaejavanë pevajunupaebaponaenexa. Itsamonae pijinia Espiritu Santo jamatabëcuenecaëjêpaeyaexanatsi peyapëtaenexa pajamatabëcueneilivaisi xaina Dioso pejumelivaisi. Nexata tsipaeba itsamonaejavabelia. Itsamonae pijinia Espiritu Santo jamatabëcuenecaëjêpaeyaexanatsi petsipaebaponaenexa apo peyapëtaevi abaxë pexanialivaisi, Jesucristo pelivaisi. Itsamonae pijinia Espiritu Santo jamatabëcuenecaëjêpaeyaexanatsi pevetsinexa Dioso pejumecovënëtsivi. Jamatabëcuene caëjêpaeyaexanatsinua xaniavaetsia peyapëtaeyaexanaenexa Dioso pijacuene.

¹² Bajarapacuenia Espiritu Santo, daxita Dioso pejumecovënëtsivi, jamatabëcuenecaëjêpaeyaexanatsi petonacuenebavanapaenexa Dioso pijacuene. Nexata daxita Dioso pejumecovënëtsivi, caejivi canacujitsia, ajamatabëcuenesaë tsaponae pevajënaeyabelia.

¹³ Nexata belia daxitatsi bajarapacuenia najamatabëcuenejêpaeya jumecovënëtsianatsi Dioso. Jamatabëcueneypëtaenatsinua xaniavaetsia vajatuxanenë Jesucristo, Dioso pexënato. Nexata daxitatsi Espiritu Santo nacajamatabëcuene caëjêpaeyaexanaena Dioso vajajumecovënëtsinexa. Nacajamatabëcuene caëjêpaeyaexanaenana xaniavaetsia Dioso vajatojinavapaenexa. Nexata pacuenia Jesucristo jamatabëcueneitsi, bajara vaxaitsi ata jamatabëcueneitsitsi tsane. Nexata jinavanapaenatsi pacuenia Dioso nacatojitsipa.

¹⁴ Nexata pacuenia pejevaxi caejamatabëcuene apo najamatabëxainae, bajara vaxaitsi apo jamatabëcueneitsitsi tsane. Itsajamatabëcuene apo vecuanajamatabëxainaetsi tsane, palivaisi baja jumecovënëtavanapatsi. Nexata itsamonae penajumetsënëtsilivaisi bepexanjajailivaisicuenia nacatsipaebi ata tsane vajanacayamaxëitojorobinexa picani, itsiata apo nacayamaxëitojorobi tsane.

¹⁵ Nexata itsamonaejavabelia itsa tsipaebaponatsi pexaniajailivaisi, bajarapamonae asivaya betanetsi. Pacuenia Cristo vajanacaitorobinē jamatabēcuenetsi, bajara vaxaitsi ata vajajamatabēcuenetsinexa, natojitsi-patsi Cristo vajajamatabēcuenējēpaenexa.

¹⁶ Daxitatsi Cristo pelivaisi vajajumecovēñetsivi, caenē Cristo pijajivitsi. Vajaperabētota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua nasivatsi tsavanapae tsane. Bajarapacuenia nexata jamatabēcuenevitsabaponaenatsi Dioso vajajumecovēñetsijava.

Pacuenia Cristo pijajivi pejanajamatabēcuenē xaina yabara pelivaisi

¹⁷ Jesucristo taneitorobixae, mapacuenia pacajumaitsijitsiatsije. Pētsa baja pajinavanapame pacuenia jinavanapa Dioso apo peyapētaevi. Dioso apo pejumecovēñetsivi najamatabēcainavanapa pexanaenexa piamatamobicuene Diosojavabelia.

¹⁸ Dioso apo pejumecovēñetsivi ajamatabēcuenetaquiri tsavanapae. Tsipaji apo yapētae Dioso. Bitso saya ajamatabēcuenetaja. Bajaraxuata Dioso pejitsipacuenia apo tojinavanapae. Diosovecua naxuabiaya jinavanapa.

¹⁹ Nexata apo yapētae piauracuene. Casaē bitso pexanaenexa daxita xua pibisiacuene.

²⁰ Itsiata baitsi jane paxamē itsa pajumecovēñētame Jesucristo pelivaisi, apo pacaitorobi pibisiacuene paneexanaenexa.

²¹ Pajumetaneme baja cajena Jesucristo pelivaisi. Jesucristo pelivaisi panejumecovēñetsixae, nexata Jesucristo pijajivi pacatsipaeba pexaniajailivaisi pacuenia copiaya Jesucristo tsipaebatsi.

²² Nexata pacopabare panijaperujumatabēcuenē. Bajarapajamatabēcuenē bajayata abaxē Dioso itsa apo pajumecovēñetsimē, pacaitorobabiaba pibisiacuene paneexanaenexa. Panijaperujumatabēcuenē cajena bitso abeje. Bajarapajamatabēcuenē picani pacayamaxēitojorobabiaba panejitsipacuenia pibisiacuene paneexanaenexa.

²³ Paxamē Diosojavabelia panajamatabēcuenepēñēyorore. Papejanajamatabēcuenēvimē panaexanare.

²⁴ Pacuenia Dioso jamatabēcuenetsi, bajara paxamē ata pajamatabēcuenetsimēre. Nexata jivi xaniavaetsia patsitajinavanapaname pacuenia Dioso pacatojitsipa.

²⁵ Bajaraxuata pētsa baja panajumetsēñētame. Pacaenēmē canacujitsia namataenetsia panatsipaebare pexaniajailivaisi. Tsipaji daxitatsi caenē Jesucristo pijajivitsi.

²⁶ Itsa panabaraanaepaname, pētsa pibisiacuene panaexaname panabaraanaepanaejavata. Pētsa panasivajamatabēcuenetsitecame itsamatacabijavabelia ata.

²⁷ Tsipaji itsa panasivajamatabēcuenē tsitecaejitsipame, nexata dovathi pacayamaxēitojorobijitsipa. Nexata pibisiacuene paexanaejitsipame.

²⁸ Pajivi penacobetoxotsijivi, copatsi baja penacobetoxotabiabijava. Nacuenēbi pepitsinexa xua namatavenona, peyavenonaenexanua bepejiobivijavabelia.

²⁹ Pētsa pacuaicuaijamē pibisialivaisi. Biji rajane pacuaicuaijamēre pexanialivaisi. Pexanialivaisi itsa pacuaicuaijamē tsane, nexata pacajumetaevi pajamatabēcueneyavenonaename. Tsipaji paepatota jamatabēcuenēfaeana, itsa pacajumetaena, pacamuxunaajamatabēcuenesaē tsane.

³⁰ Pëtsa itsacuene paexaname Espíritu Santo papecatojitsipaecueneve-cua panejamatabëcuenebejiobitsiyanima Espíritu Santo. Dioso pijaEspíritu Santo papecatsijamatabëcaexae, panayapëtaneme pepacuene Dioso papija-jivicuenemë. Nexata Dioso pacacapanepaena pamatacabi Dioso pijajivi capanepaena mapanacuavecuaje.

³¹ Daxita pibisiajamatabëcuene pacopabare. Pacopabarenaua baja, itsajivi itsa pacaitsacueniaba, bajayajebi panejamatabësitecabiabijava. Pëtsa bajaya-jebi pajamatabësitecame paneanaepanaejava. Bepijia pajamatabëcaevare. Pacopabarenaua baja paneajamatabëcuenebejejava ata. Pacopabarenaua baja panenabaraanaepanabiabijava ata. Pacopabarenaua baja itsamonae pibisi-acuenia panebijataeyabiabijava ata. Pacopabarenaua baja itsamonae pibisi-acuenia panebaracuaicuajaitsabiabijava ata.

³² Biji rajane pexaniajamatabëcuene paxainare. Namataenetsia panaitaxutobejiobiataema. Pacuenia Jesucristo pejamatabëcueneta Dioso pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata panabarajamatabëcuenexanepanare, paxamëyajuvënëvi pacaitsacueniabi ata.

5

Pacuenia Dioso pexi bejinavanapa yabara pelivaisi

¹ Paxamë Dioso papeximë. Pacuenia Dioso jamatabëcueneitsi, bajara paxamë ata pajamatabëcueneitsimëre tsavanapae.

² Pacuenia bitso Cristo nacaasiva, bajara pijinia pacuenia paxamë ata bitso pasivamëre tsavanapae itsamonae ata. Bajayata judiovi Diosojavabelia pijaneconi itsa xaina, oveja pebito beyaxuababiaba. Nexata judiovi ofren-dacuenia ovejavi rajutabiaba Diosojavabelia pijaneconi Dioso pevecuaa-jibiaexanaenexatsi. Bajara pijinia pacuenia Cristo bitso vajanacaasivaxae, nacopata pebeyaxuabinexatsi vaxaitsi vajaneconi vajanacavecuaajibiaex-anaenexa. Bajarapacuenia Cristo bitso vajanacaasivaxae, itsa nacopata vajanacasivatëpaenexa, nexata paxa Dioso bitso sivajamatabëcuenebarëyatsi.

³ Paxamë rabaja Dioso papijajivimë. Bajaraxuata pëtsa baja paexaname daxita xua pibisiacuene. Pëtsa panajamatabëxainamenua pibisiacuene pa-neexanaenexa panevitota. Pëtsa panajamatabëxainamenua bitso pananax-ainaeyabinexa daxitacuene mapanacuapijicuenije.

⁴ Pëtsa panabarëcuaicuajiamënua piauracuene yabara ata. Pëtsa panabarëcuaicuajiamënua saya jema natsiquejemalivaisixi ata. Tsipaji apo pexanepanaecuene. Biji rajane Diosojavabelia pexaniajamatabëcuene parajutabianame.

⁵ Payapëtaneme rabaja pexaniajaicuene mapalivaisije. Pajivi daxita pibisiacuene exana, apo jone tsane Dioso pijanacuayabetsia. Ponë jaita itsava pijavavecua, pova pijinia jaita itsanë pamonavecua, apo jone tsane Dioso pijanacuayabetsia. Pamonaevata bitso jitsipa pexainaenexa daxitacuene mapanacuapijicuenije, apo jone tsane Dioso pijanacuayabetsia. Pamonaevata bitso jitsipa pexainaenexa daxitacuene mapanacuapi-jicuenije, jamatabëcueniejëpa pamonaevata vjëcabiaba jumapecataeya pex-anaenëjavabelia. Bajarapamonaevata jamatabëcueniejëpa tsipaji bitso jitsipa saicayacuene Diosovecua.

⁶ Pëtsa pacayamaxëitoroba itsajivi ata paxamë ata paneexanaenexa ba-jarapitsipibisiacuene. Tsipaji Dioso ayacuenua naneconitsiaexanaena pa-monaevata Dioso apo pejumecovënëtsivi, bajarapitsipibisiacuene pexanaevi.

⁷ Bajaraxuata pëtsa payajavajinavanapame pibisiacuene pexanaevi.

⁸ Paxamē picani bajayata pajamatabēcueneaitaquirimē tsavanapae itsa abaxē apo payapētaemē pexanialivaisi, Jesucristo pelivaisi. Itsiata baitsi jane aeconoxae baja Jesucristojavabelia panenajamatabēcopatsixae, Dioso baja pacajamatabēcueneitayota. Bajaraxuata pajinavanapare Dioso pejtisipaecuenia, pacuenia Dioso pijajivi jinavanapa.

⁹ Dioso baja papecajamatabēcueneitayotsixae pexanialivaisita, paexanavanapare ēpexaniacuene. PacanaējētaPONARENUA ēpexaniajaicuene paneyapētaenexa, xaniavaetsia panejinavanapaenexa Dioso pejtisipaecuenia.

¹⁰ Panevajēnaeyabelia pacanaējētaPONARE paneypētaenexa xua yabara Dioso pacasivajamatabēcuene barēyajitsia. Nexata itsa payapētaename xua yabara Dioso pacasivajamatabēcuene barēyajitsia, bajaraxua tsiteca asaēyata panevajēnaeyabelia paexanavanapaename.

¹¹ Dioso apo pejumecovēnētsivi pibisiacuene itsa exanavanapa, pētsa panaexaname bajarapapibisiacuene. Biji rajane paitavetsianame bajarapamonae pibisiacuene pexanaeyaniva Dioso pitabarata.

¹² Xua bajarapamonae exana muetsia, bajaraxua bitso pibisiacuene. Nexata itsajivi itsa cuenetaejitsipatsi bajaraxua pexanaejava, bajarapajivi bitso ajumeura tsipae juya petsipaebinexa itsamonaejavabelia. Tspaji bitso pibisiacuene xua muetsia exana bajarapamonae.

¹³ Itsiata baitsi jane bajarapamonae itsa paitavetsianame Dioso pejumelivaisita, nacueneyapētaena bajarapamonae bitso pibisiacuene pexanaejava.

¹⁴ Bajaraxuata pina bajarapamonae yabara, itsamonae Dioso pijajivi jumaitsi mapacueniaje:

Jamatejema saya pajinavanapame, pibisiacuene paexanavanapae atamē. Bajaraxuata Diosovecua naxuabiaya pajinavanapame. Pacopabare baja pitaquirijamatabēcuene. Nexata Cristo pejamatabēcueneta panijaneconivecua Dioso pacacapanepaena. Pacajamatabēcueneitayotsiana,

jai pina itsamonae Dioso pijajivi.

¹⁵ Nexata baja xania tsane. Panayajivitaema pibisiacuene xaniavaetsia panejinavanapaenexa. Pētsa pajinavanapame pacuenia bajinavanapa Dioso apo peypētaevi. Biji rajane pajinavanapare pacuenia bajinavanapa bitso peypētaevi Dioso pijacuene.

¹⁶ Dioso papecaitorobicuenia xaniavaetsia patojinavanapare daxitamatacabijavabelianexa. Pamuxujobabiabare itsamonae ata Cristo pelivaisi pejumecovēnētsinexa. Tspaji mapanacuapijivije, Dioso apo pejumecovēnētsivi, ēpibisiacuene exanavanapa.

¹⁷ Pētsa pajinavanapame pacuenia Dioso apo peypētaevi jinavanapa. Pacaasaēmēre tsavanapae Dioso panejumecovēnētsijava, pacuenia Dioso pacatojitsipa paneexanavanapaenexa.

¹⁸ Pētsa paitajibimē tsabiabi. Tspaji bajarapacuene Diosovecua pacanaxuabiaexanaejitsipa infernojavabelia. Biji rajane panacopatatabare Espiritu Santo papecatsijamatabēvēnēcaenexa, Espiritu Santo papecaitorobicuenia paneexanabiabinexa.

¹⁹ Namataenetsia panatsipaebabiabare vajatuxanenē ayajamatabēcuene pexainaecuene. Bajarapacuena namataenetsia itsa panatsipaebabiabianame, daxita panejamatabēthētovetsina panaxēanabiabianame pavajianē rubena Salmosbaxutota. Panaxēanabiabianamenua himnobaxutota ata pavajianē rubena. Panaxēanabiabianamenua pavaji ata Espiritu Santo jemata pacanaxēanaeyaexanaena.

²⁰ Pajumaitsimë tsabiabi tsane Diosojavabelia: “Xanepana rabaja. Tsipaji bitso pexaniacuene panetoexaname,” pajamë tsabiabi tsane daxitacuene yabara vaxa Diosojavabelia vajatuxanenë Jesucristo pevënëta. Bajarapacuenia Diosojavabelia pajumaitsimë tsabiabi tsane pexanepanaecuene yabara, apo pexanepanaecuene ata yabara.

Pacuenia muxujibatsi penapitsijivibeje yabara pelivaisi

²¹ Padaxitamë namataenetsia panajamatabëcueneevere, xua jamatabëpanaitorobame, namataenetsia panenaitorobabiabinexa Cristo pajumecovënëtsivixae.

²² Paxamë papetiriavimë, pacuenia yaiyataeya pajumecovënëtabiabame vajatuxanenë Jesucristo papecaitorobicuenia, bajara pijinia pacuenia yaiyataeya pajumecovënëtabiabare paneamonajivi ata.

²³ Pacuenia Cristo Dioso tocopatatsi daxita vaxaitsi Dioso vajajumecovënëtsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinxatsi vajanacapanepaenexa daxita vaxaitsi vajanajamatabëcueneecopatsivi Cristo javabelia. Daxitatsi caenë Cristo pijajivitsi.

²⁴ Nexata bejumecovënëtavapanatsi pacuenia nacaitorobapona Cristo. Bajara pijinia pacuenia paxamë ata, papetiriavimë, bepajumecovënëtavapanapame daxita pacuenia pacaitoroba paneamonajivi.

²⁵ Paxamë pijinia papebijivimë, pasivamëre panijavajivi. Bepaasivamë panivajivi pacuenia daxitatsi Cristo nacaasiva daxita Dioso vajajumecovënëtsivi. Vajanacaasivaxae, Cristo nacopata pebeyaxuabinxatsi vajanacapanepaenexa vajaneconiveua.

²⁶ Bajarapacuenia Cristo exana caenë Cristo pijajivitsi vajanacaexanaenexa. Nexata baja Cristo vajanacajamatabëcuene xuirajibiaexanaejava, najamatabëcueneitajëtatsi vajanacabautisabijavata. Vajajumecovënëtavapanapaxae Dioso pejumelivaisi, nacaajamatabëcuene xuirajibiaexanapona.

²⁷ Bajarapacuenia Cristo exana daxita Dioso vajajumecovënëtsivi itsamatacabi vajanubenaenexa Cristo pitabarata. Nexata itsamatacabi nubenaenatsi Cristo pitabarata vajaaneconijibivi, Dioso vajanacajamatabëcuenexaniavaetsivi.

²⁸ Nexata pebijivi bitso biasiva pijavajivi. Pacuenia pijacuata naperabëasiva, bajarapacuenia biasiva pijavajivi. Nexata ponë asiva pijava, bajaraponë asiva pijava pacuenia pijacuata naperabëasiva.

²⁹ Itsajivi ata apo naperabëitoya. Biji rajane xaniavaetsia naperabëeveta. Bajara pijinia pacuenia Cristo ata nacaeveta daxita Dioso vajajumecovënëtsivi.

³⁰ Tsipaji vaxaitsi Cristo pijajivitsi, ayaibitsaëto atatsi, becaejivitsi Dioso natatane.

³¹ Nexata nayapëtane pexaniajaicuene mapacueneye. Pebi petiriva itsa pita pijavanexa, naexanabeje becaejivi peperabëtocuenia. Tsipaji Dioso pejumelivaisibaxutota jumaitsi mapacueniaye: “Pebi itsa nacojioba, paxavecua, pena atavecua, havecuanatsata pijavajavabelia. Nexata anijajivimibeje becaejivicuenia naexanabeje,” jai Dioso pejumelivaisibaxutota.

³² Mapalivaisije bitso ayapëbeje vajajumeyapëtaenexa. Itsiata baitsi jane comparacióncuenia nacayapëtaeyaexana. Cristo vajanacaasivaxae, vaxaitsi Cristo pijajivitsi Dioso natatane becaenë Cristo peperabëtotsi.

³³ Bajarapalivaisi comparacióncuenia pacayapëtaeyaexana nexata paxamë, pacaenëmë canacujitsia, paneasivanexa panijavajivi. Nexata panijavajivi

pasivamëre. Pacuenia panijacuata panaperabëasivamë, bajara pijinia pacuenia panijavajivi pasivamëre. Panijavajivi ata pijinia bepacayaiyatane.

6

¹ Paxamë papeximë, Dioso panejumecovënëtsivixae, pajumecovënëtabiabarë paneaxajivi, paneenajivi ata. Bajarapacuenia panijamonae pajumecovënëtabiabarë. Tspiji bajarapacuenia Dioso pacatocopata panejumecovënëtabiabinexa panijamonae.

²⁻³ Dioso pejumelivaisibaxutota jumaitsi mapacueniaje: “Yaiyataema axa. Yaiyataema ena ata nejamatabëcuenebarëyanexa, neponaponaenexanua bajayajebi mapanacuataje,” jai Dioso pejumelivaisibaxutota. Bajarapalivaisi Dioso itsa najumecopata jivi pejumecovënëtsinexa, yajavanajumecopata pacuenia Dioso yavenonaejitsia pajivi jumecovënëta bajarapalivaisi. It-salivaisianë copiaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovënëta bajarapalivaisianë. Nexata matapania mapalivaisitaje Dioso yajavanajumecopata pacuenia yavenonaejitsia pajivi jumecovënëta bajarapalivaisi.

⁴ Paxamë panexi panexainaeivi, anaeyacuenia pëtsa panexi paitorobabiabame papecabaraanaepanaeyaniva. Biji rajane xaniavaetsia panacoxivitsare papecajumecovënëtabiabinexa paneitorobijava. Pacujarubarenua Dioso pejumelivaisi pejumecovënëtsinexa.

⁵ Paxamë pijinia itsamonae papijajivimë, dajubicuenia papeccanajetsivi, itsamonae amoneya panetonacuenebavanapaenexa. Patoexanabiabarë pacuenia panijatuxanevi pacaitoroba. Payaiyataema panijatuxanevi. Cujnucaviaya panijatuxanevi patonacuenebabiabarë asaëyata. Pacuenia Cristo panejitsipaexae, xaniavaetsia patonacuenebabiabarë Cristo pijacuene, bajara pijinia pacuenia xaniavaetsia panijatuxanevi patonacuenebabiabarë.

⁶ Xaniavaetsia panijatuxanevi patonacuenebabiabarë daxitamatacabi canacujitsia pacuenia patonacuenebijitsipame Cristo. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panetonacuenebijava yabara. Patoexanabiabarë panijatuxanevi pacuenia Dioso pacatojitsipa panetoxanaanexa daxita panejamatabëëthëtovetsina.

⁷ Jamatabëcuenebarëyaya patonacuenebavanapare panijatuxanevi. Xua panijatuxanevi patonacuenebavanapame, bajaraxua yabara pasivajamatabëjumaitsimëre: “Maxuaje nacuenebajë apo ëtajatuxanenënexa. Taniji pepo tajatuxanenë, Cristo, betonacuenebijava,” pasivajamatabëjamëre panijatuxanevi panetonacuenebijava yabara.

⁸ Payapëtaneme rabaja mapacueje. Pajivi pexaniacuene toexana itsamonae ata, bajarapajivi matamotsianatsi Dioso. Pamonae ata dajubicuenia canajetatsi itsamonae amoneya petonacuenebabiabinexa, bajarapamonae ata Dioso matamotsianatsi pexaniacuene itsa toexana itsamonae ata. Pamonae ata apo pecanajetsivitsi, bajara pijinia pacuenia bajarapamonae ata Dioso matamotsianatsi pexaniacuene itsa toexana itsamonae ata.

⁹ Paxamë pijinia papijatuxanevimë, pacamuxujibatsi mapacueniaje. Xaniavaetsia pataema panijajivi, papecatonacuenebivi. Pëtsa anaeya patiobabiabarë panijajivi asaëya papecatonacuenebabiabinexa. Pacanaëjere pacuenia paxamë ata panijatuxanenë Dioso eca athëbëtatsta. Pamonae ata apo pecanaia. Bajaraponëjavabelia pananeconitsipame. Bajaraponë panijajivi ata pijatuxanenë baja cajena. Bajaraponë saya najëpaeya nacatane

daxitatsi. Nexata paneconivajëto xainatsi caejivitsi canacujitsia, bajara-paneconivajëtota nacananeconitsiaexanaponaena. Bajaraxuata panijajivi ata itorobajë xaniavaetsia pepecatonacuenebabiabinexa.

Pacuenia Dioso pejumecovënëtsivi itorobatsi penayajivitaenexa dovathi yabara pelivaisi

¹⁰ Tajamonae, icatsia cotocaevi patacatoyaquinaelivaisita, pacajumaitsitsi mapacueniaje. Pajamatabëcuenesaëmëre tsavanapae vajatuxanenë pesaë paneyajavajinavanapaexae.

¹¹ Vajabitsaënë banayajivinaxatata piatajajava pijavajabitsaënë pejorojoronaeyanivatsi. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Nexata bajarapacuenia pajamatabëcuenesaëmë tsane dovathi pepecajamatabëcuene yamaxëitojorobiyanima.

¹² Tsipaji Dioso vajanacatojitsipaecuenia itsa exanavanapatsi, nexata dovathi jamatabënacaitacueniaba. Nexata bëpënëa vajajamatabëcuenesaëta asaëyata vajabitsaë beخانatsi, dovathi pijajivijavabelia, apo vajataevijavabelia. Dovathi cajena pijajivi ayabitsaëttoxaneto. Dovathi pijajivi xaina penamatacaitorobivitsi, bitso piagamatabëcuenesaëvi. Nexata dovathi pijajivi jinavanapa athëbëtatsia. Jinavanapa mapanacuata ataje. Nexata dovathi pijajivi itoroba daxitajivi pibisiacuene pexanaeyaxanaenexatsi mapanacuataje. Bajaraxuata bëpënëa vajajamatabëcuenesaëta, asaëyata vajabitsaë beخانatsi dovathi pijajivijavabelia.

¹³ Nexata paxamë dovathi pepecajamatabëcuene yamaxëitojorobiyanima, panayajivinajamatabëcuenexatare Dioso pejumelivaisita. Nexata pamatacabi pibisiacuene pacatocopiapatsiana dovathi pejamatabëcueneta pepecajamatabëcuenejëtsinexa, itsiata pajamatabëcuenesaëmë tsane bajarapalivaisita. Nexata pibisiacuene apo paexanaemë tsane.

¹⁴ Vajabitsaënë itsa nayajivinaxatata piatajajava, caecovëta banuca. Nexata pijavajabitsaë apo tixitsitsi pecovëvecua. Bajara pijinia pacuenia paxamë ata pajamatabëcuenesaëmëre Dioso pejumelivaisita dovathi pepecajopaeyaexanaeyanima Dioso pejumelivaisi panejumecovënëtsijavavecu. Vajabitsaënë piatajajava itsa nayajivinaxatata, bayanaepacëta penaepacëtsijavata pesarabiyanivatsi penayajivinaxatatsijava. Bajara pijinia pacuenia paxamë ata Dioso pejumelivaisita, pexaniajilivaisita, panayajivinajamatabëcuenexatare. Vajabitsaënë piatajajava banamëpabëxatata pijavajabitsaënë pejorojoronaeyanivatsi. Bajara pijinia pacuenia paxamë ata Dioso pejumelivaisita panayajivinajamatabëcuenexatare. Pajamatabënajinavanapare Dioso baja aneconijibia pepecataejava. Nexata dovathi nayajivitaeya pajinavanapare pepecajamatabëcuene yamaxëitojorobiyanima.

¹⁵ Vajabitsaënë najamatabëcueneveretsiaya pexaniazapato banataxuxatata pijavajabitsaëjavabelia jamatejema peponaenexa. Bajara pijinia pacuenia paxamë ata panajamatabëcueneverere, jamatejema pexanialivaisi jivi panet-sipaebavanapanaenexa. Daxita baja pamonaë jumecovënëta bajarapalivaisi, Dioso baja barajamatabëcuenexanepanaeya tanetsi.

¹⁶ Panajamatabëcuenecopare Diosojavabelia pepecayavenonabiabinexa. Vajabitsaënë banayajivicapona escudovënëjava, pijavajabitsaënë itsa bixabajarabatsi piupiitarunutsipuyaeneta, penacaranatsinexa bajarapescudota, penayajiviitacaëbinexanua. Bajara pijinia pacuenia paxamë ata dovathivecu Dioso pajamatabëcuenecaranatsiana, itsa panajamatabëcuenecopatsianame Diosojavabelia pepecayavenonabiabinexa.

¹⁷ Vajabitsaēnē banamataxatata piatajajava, cascovēnējāva, pematathi-naxuabiyanivatsi pijavajabitsaēnē. Bajara pijinia pacuenia paxamē ata panayajivinajamatabēcuenexatare Dioso pejumelivaisita. Pajumecovēnēre papecacapanepaelivaisinexa panijaneconivecua. Vajabitsaēnē itsa pona pijavajabitsaējāvavelia, banayajivicapona espada. Bajara pijinia pacuenia paxamē ata panayajivicauponare Dioso pejumelivaisi, palivaisi baja pacayapētaeyaexana Espiritu Santo.

¹⁸ Dioso pejumelivaisita najamatabēcuenexatatsiaya itsa pajinavana-paename, nexata pacuenia Espiritu Santo pacaitoroba, daxitamatacabi canacujitsia Diosojavavelia pavajētābiabianame Dioso papecajamatabēcuene yavenonabiabinexa. Pajamatabēcueneitatsacamēre tsavanapae dovathi papecajamatabēcuene yamaxēitojorobiyani. Nexata pacopatsinejevamē Diosojavavelia panevajētābiabijava, ajamatabēcueneitatsacaya Diosojavavelia panayajivivajētābiabare. Asaēyata patovajētābiabarenua daxita Dioso pejumecovēnētsivi.

¹⁹ Xanē ata panetovajētābiabarenua Dioso taneyapētaeyaexanaenexa paepa-tota bajarapalivaisi tsipaebajē itsamonaejavavelia. Panetovajētābiabarenua ajumeurajibia tatsipaebabiabinexa apo judīovi ata Dioso pecapanepaeja-vanexatsi.

²⁰ Naneconitsiaponaponajē majotaje, penaneconitsivi pejebabiabibota, itsamonaejavavelia tatsipaebabiabixae bajarapapexanialivaisi, Dioso tane-tocopatsilivaisi. Bajaraxuata Diosojavavelia panetovajētābiabare, naneconit-siaponaponae atanē, ajumeurajibia jivijavavelia tatsipaebabiabinexa ba-jarapalivaisi pacuenia jamatabētsipaebajē.

Pacuenia Pablo toyaquina Efeso tomarajivi peveretsinexa baja petoy-aquinaelivaisi mapabaxutotaje yabara pelivaisi

²¹ Vajabanānē Tíquico itsa patsiana paxamējavavelia, pacatsipaebiana daxita pacuenia netane. Bajaraponē bitso vajaasivanē. Xaniavaet-sia paneyavenonabiaba itsa patonacuenebabiabajē pacuene vajatuxanenē paneitoroba.

²² Bajaraxuata Tíquico pacatoitorobatsi baja paxamējavavelia papecatsi-paebinexa pacuenia pajinavanapajē. Nexata Tíquico itsa pacatsipaebiana pacuenia pajinavanapajē, pamuxunaajamatabēcuenesaēmē tsane.

²³ Pacatovajētābiabatsi vaxa Diosojavavelia, vajatuxanenē Jesu-cristojavavelia ata, jamatabēcuenexanepanaeya panejinavanapaenexa. Pacatovajētābiabatsinua namataenetsia panenasivanexa Diosojavavelia panenajamatabēcuenecopatsivixae.

²⁴ Pacatovajētābiabatsinua Diosojavavelia daxita paxamē Dioso papecayavenonabiabinexa. Paxamē abaxē tsiteca bitso pasivamē tsavanapae vajatuxanenē Jesucristo. Bajara itsi tsane.

Mapabaxutoje San Pablo toyaquina Filipos tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Filipos tomarapijivijavabelia, pamatacabi naneconitsia ponapona penaneconitsivi pejebabiabibota yabara pelivaisi

¹ Xanë Pablönë, Timoteobeje, Jesucristo papijajivitonënëbeje. Pacatoy-aquinatsibeje mapabaxutoje padaxitamë paFilipos tomarapijivimë, Jesucristo pelivaisi panejumecovënëtavanapaevi. Paancianovimë, paxamë ata padiaconovimë, pacatoyaquinatsibeje.

² Pacatovajëtsibeje vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëta Jesucristo pelivaisi pejumecovënëtsivi yabara pelivaisi

³ Itsa pacanajamatabënapitatsi Diosojavabelia tavajëtsijavata, jumaitsinë tsabiabi Diosojavabelia: “Xaniavaetsia yavenonabiabame nijajivi, Filipos tomarapijivi,” janë tsabiabi Diosojavabelia paxamë yabara.

⁴ Itsa vajëtajë Diosojavabelia, nexata pacatovajëtabiabatsi jamatabëcuenegarëyaya.

⁵ Bajarapacuenia pacatovajëtabiabatsi tsipaji Dioso pejumelivaisi, pexanialivaisi, panejumecovënëtsijavaveliacujinae, paneyavenonabiabame tanamatavenonaejavaxi yabara. Patsipaebabiabamenua Jesucristo pelivaisi itsamonaejavabelia.

⁶ Yapëtaniji baja cajena pacuenia Dioso pacayavenonaejitsia bitso pexaniajamatabëcuene panexainavanapaenexa. Tshipaji baja Dioso taxuxuaba papecajamatabëcuene xanepanaeyaexanaenexa. Bajaraxuata panevajënaeyabelia Dioso pacajamatabëcuene xanepanaeyaexanaponaena copatsinejeva matapania Jesucristo icatsia pepatsimatacabitsicajavabelianexa.

⁷ Bajarapacuenia paxamë patacasivanajamatabëxainaejava, netsitaxanepana. Tshipaji bitso pacaasivatsi. Pamatacabi naneconitsiaponaponajë penaneconitsivi pejebabiabibota, panejamatabëcueneyavenoname. Panejamatabëcueneyavenonamenua pamatacabi nacuaejetsivi pitabarata nenuta Jesucristo pelivaisi jivi tatsipaebaponaejava yabara. Nexata bajarapamatacabi jumaitsinë bajarapamonaejavabelia: “Mara palivaisije, Jesucristo pelivaisi, pexaniajailivaisi cajena jivi pecapanepaelivaisinexatsi Diosojavabelia,” janë nacuaejetsivijavabelia.

⁸ Dioso cajena nejamatabëcueneyapëtane pacuenia bitso paxamë pacaasivatsi. Jesucristo neyavenona bitso patacaasivanexa.

⁹ Pacatovajëtsi Diosojavabelia itsamonae ata bitso paneasivatsavana-paenexa panevajënaeyabelia. Pacatovajëtsinua paneyapëtaenexa Dioso. Pacatovajëtsinua paneyapëtaenexa xua Dioso pacatojitsipa paneexanavanapaenexa.

¹⁰ Nexata payapëtaename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia pacacajëpaena xaniavaetsia panejinavanapaenexa aneconijibia.

Matapania Jesucristo icatsia pepatsimatacabitsicajavabelianexa, bajara-pacuenia panaevetavanapaename.

11 Nexata êpexaniajamatabêcuene paxainaename panejamatabêêthêtojavavetsina Jesucristo papijajivixaemê. Nexata itsamonae paxamê yabara jamatabêjumaiti tsane Diosojavabelia: “Diosomê, ayajamatabêcuenenemê bitso. Pexaniacuene bitso toexaname Filipos tomarapijivi êpexaniajamatabêcuene pexainaenexa pejamatabêêthêto,” jamatabêjai tsane itsamonae Diosojavabelia paxamê xaniavaetsia panetsitajinavanapaexae.

Pacuenia Pablo jumecovênêtaponapona Cristo yabara pelivaisi

12 Tajamonae, payapêtaneme rabaja pajamatabêcuene yabara naneconitsia ponaponajê penaneconitsivi pejebabiabibota. Jitsipajê paneyapêtaenexa mapacueneye. Majotaje penaneconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanê neetsi ata penaneconitsivi pejebabiabibota, itsiata apo yacaranatsicapanepae pexanialivaisi, Jesucristo pelivaisi, peyacaêjêpaponaeenexa daxitanacuanêjava. Nexata baja aeconoxae bajarapalivaisi pevajênaeyavelia yacaêjêpaponae daxitanacuanêjava daxitajivi Diosojavabelia pecapanepaenexatsi.

13 Nacuaevetsinë pijabopijivi, vajabitsaê, daxita itsamonae ata, neyapêtane majôta naneconitsia taponaponaejava Jesucristo pijajivitonêxaenê.

14 Mapatomarataje ayaibitsaêtoxaneto Dioso pejumecovênêtsivi, itsa nevênêtane tananeconitsiaponaponaejava, najamatabêcuenesaêtavanapa. Diosojavabelia asaêyata najamatabêcuenecopaba peyavenonaenexatsi. Nexata ajumejunavijibia Dioso pejumelivaisi tsipaebapona itsamonaejavabelia.

15 Pamonaê ajumejunavijibia Dioso pejumelivaisi tsipaebapona itsamonaejavabelia, bajarapamonaeyajuvênêvi, panecuenecaêba. Nexata itsamonaejavabelia asaêyata tsipaebapona Cristo pelivaisi. Bajarapamonaê xanê yabara jamatabêjumaiti: “Pablo bitso ayaicuenia Dioso pejumelivaisi jivi nacatsutsipaebapona. Pacuenia bajaraponê tsipaebapona, matatoxenetsia vaxaitsi tsipaebaponaenatsi jivi vajanacayaiyataenexa,” jamatabêjai bajarapamonaê. Itsiata itsamonae, bajarapamonaeyajuvênêvi, taneyavenonaenexa, itsamonaejavabelia tsipaebapona Cristo pelivaisi bajarapamonaê ata xaniavaetsia pejumecovênêtsinexa.

16-17 Itsamonae tsipaebapona Cristo pelivaisi pejumetaevitsi saya peyayataenexatsi, pepênaponaenexatsinua. Bajarapamonaê pejamatabêêthêtovetsina apo jumecovênêtsi ata Cristo, saya jema Cristo pelivaisi tsipaebapona. Jamatabêjumaiti: “Vecae Pablo naneconitsiaponaponaê penaneconitsivi pejebabiabibota, pecovêta itsajamatabêcuene xainaeyaexanaenatsi Cristo pelivaisi pejumecovênêtsivi. Bajarapacuenia Pablo jamatabêcuenebêjaiyaexanaenatsi,” jamatabêjai bajarapamonaê xanê yabara. Itsiata itsamonae xaniavaetsia tsipaebapona Cristo pelivaisi pejumecovênêtsixae Cristo. Bajarapamonaê yapêtane Dioso tanetocopatsijava penaneconitsivi pejebabiabibota naneconitsia taponaponaejavata, tajumaitsijavanexa nacuaevetsivijavabelia mapacueniaje: “Jesucristo pelivaisi jivi pecapanepaelivaisinexatsi, pexaniajailivaisi cajena,” tajaijavanexa nacuaevetsivijavabelia, bajarapamonaê yapêtane.

18 Majotaje nenaneconitsiaexanae ata, apo natsinajamatabêxainaenê. Itsamonae pejamatabêêthêtovetsina Cristo pelivaisi pejumecovênêtsixae, tsipaebapona jivi pejumecovênêtsinexa bajarapalivaisi. Itsamonae pijinia pejamatabêêthêtovetsina apo jumecovênêtsi ata, itsiata Cristo

pelivaisi tsipaebapona jivi pejumecovënëtsinexa bajarapalivaisi. Bajaraxuata bajarapamonae ata jivi petsipaebaponaejava yabara, itsiata sivajamatabëcuenebarëyanë.

Bitso orijibia tavajënaeyabelia jamatabëcuenebarëyanë tsaponae tsane.

19 Tshipaji yapëtaniji pacuenia panetovajëtaponame Diosojavelia. Espiritu Santo, ponë Jesucristo itorobica, bajaraponë neyavenonapona. Bajaraxuata yapëtaniji daxita pacuenia netoxanepanaejitsia. Nexata baja pitsapaenajë tananeconitsia ponaponaejavavecu.

20 Bitso jitsipajë ëpexaniacuene taexanaenexa. Apo jitsipañë taexanaenexa itsacuenejavayo ata, xua yabara auranë tsipae. Cristo tajume-covënëtsijavaveliacujinae, aeconoxae ata, ajunavijibia jitsipajë taexanaenexa Cristo pejitsipaecuenia daxitamatacabijavabelianexa. Bajarapacuenia jitsipajë taexanaponaenexa ëbajaraponënexa. Bajaraponë tanetojitsipaecuenia abaxë taasaëtsaponaponaepato mapanacuataje, tatëpaeepatotanexa ata, jitsipajë taexanaenexa xua pejamatabëcueneta daxitajivi yayataejitsia Cristo.

21 Tasaëtsaponaponaepato abaxë mapanacuataje, Cristo pejitsipaecuenia toexanaponaenajë. Itsa pamatacabi tēpaenajë, netoxanepanaejitsia mapanacuata tasaëtsaponaponaejava matatoxenetsia. Tshipaji Cristo yajavaponaponaenajë athëbëtsia.

22 Tasaëtsaponaponaepato abaxë mapanacuataje, necaëjēpa tatoexanaponaenexa Cristo tanetojitsipaecuenia. Itsiata apo yapëtaenë xua pepacuene jitsipajë.

23 Itsajavata bitso jitsipabiabajë tatēpaejava taponaenexa Cristo pijanacuayabetsia. Bajaraxua bitso netoxanepanaejitsipa.

24 Itsiata paxamë panenamatavenoname abaxë taponaponaenexa mapanacuata, patacayavenonaponaenexa.

25 Yapëtaniji baja cajena abaxë taponaponaejava paxamënexa. Ponaponaenajë abaxë patacayavenonaenexa, paneajamatabëcuenesaenexa panevajënaeyabelia, panejamatabëcuenebarëyanexanua panejumecovënëtsixae Cristo pelivaisi papecacapanepaenexa panijaneconivecu.

26 Nexata pamatacabi Jesucristo neyavenonaena penaneconitsivi pejebabiabibovecu tapitsapaenexa, ponaponaenajë icatsia paxamëjavata. Nexata jamatabëcuenebarëyaya panevajunupaebianame itsamonaejavabelia pacuenia Jesucristo neyavenona tapitsapaenexa penaneconitsivi pejebabiabibovecu.

27 Pajinavanapare xaniavaetsia, pacuenia pexanialivaisi, Cristo pelivaisi, pacaitoroba. Nexata itsa pacataenatsi, apo pacatae atatsinua tsane, itsiata jitsipajë patacavënëlvivaisitaeponaejava najamatabëcuenejēpaeya panecasaëtsavanapaejava Cristo pelivaisi panejumecovënëtavanapaejava. Jitsipajë patacavënëlvivaisitaejava asaëyata najamatabëjēpaeya jivi panetsipaebavanapaejava Jesucristo pelivaisi jivi pecapanepaelivaisinexatsi.

28 Pëtsa pacujunavame pamonaepacaitoya. Dioso papecayavenonaexae, itsa apo pacujunavimë tsane itsamonae pacabejiobiaexanae ata, nexata bajarapamonae jamatabëjumaitsi tsane: "Pexaniajailivaisi cajena bajarapamonae tsipaebapona. Tshipaji Dioso yavenonatsi. Nexata vaxaitsi bajarapamonae vajabejiobiaexanaexae, Dioso nacaverebiabiana," jamatabëjai tsane. Yapëtaenanua paxamë papecacapanepaejavanexa Dioso.

29 Cristo pejamatabëcueneta pacatocopata bajaraponë panejumecovënëtsinexa. Itsiata baitsi jane apo pacatocopatsi ëbajaraponë panejumecovënëtsinexa. Pacatoyajavacopatanua baja cajena itsamonae papecabejiobiaexanaenexa bajaraponë papijajivixamë.

30 Pacuenia Cristo pijajivitonēxaenē itsamonae nebejiobiaexanapona, bajara pijinia pacuenia paxamē ata itsamonae pacabejiobiaexanaena. Pacuenia baja imata panetaneme itsamonae tanebejiobiaexanaejava, bajarapacuenia abaxē tsiteca nebejiobiaexanapona pacuenia baja panevēnlivaisitaneme.

2

Pacuenia Dioso pejumecovēntsivi itavetatsi beayajamatabēcuenevi pe-nataeyaniva yabara pelivaisi

¹ Payapētaneme rabaja mapacueneye. Jesucristo paneyajavajinavana-paexae, panajamatabēcuenesaētame panejumecovēntsijava. Payapētaneme rabaja. Jesucristo papecaasivaxae, pacajamatabēcuenebabata. Payapētaneme rabaja Espiritu Santo papecatsijamatabēcaejava papecajavaponapon-aenexa. Payapētaneme rabaja Jesucristo papecaitaxutotsonia taeyabiabi-
java.

² Bajaraxuata nexata pacaitorobatsi mapacuenia panejinavanapaenex-
aje patacasivabarēyanexa. Najamatabēcuenejēpaeya pajinavanapare. Naja-
matabēcuenejēpaeya namataenetsia panaasivamēre tsavanapae. Xua paex-
anaejitsiamē Dioso pejamatabēcueneta, najamatabēcuenejēpaeya paexana-
vanapare.

³ Pētsa panatoexaname itsacuenejavayo ata, xua ēpaxamēnexa pacatox-
anepana. Biji rajane paexanare xua itsamonaenexa ata toxanepanatsi. Pētsa
paexanamenua itsacuenejavayo ata saya bepaayajamatabēcuenevimē
papecataenexa itsamonae. Biji rajane beveliajamatabēcuenevi panataeyabi-
abianame. Itsamonae paxamēvecua ayajamatabēcuenevi pataeyabiabi-
aname.

⁴ Pētsa panajamatabēxainabiabame ēpaxamē panenatojitsipaeuene. Biji
rajane payajavanajamatabēxainabiabianame itsamonae ata penatojitsipae-
cuene.

⁵ Pacuenia Jesucristo jamatabēcueneitsi, bajara pijinia paxamē ata paja-
matabēcueneitsimēre.

⁶ Pacuenia Dioso jamatabēcueneitsi, bajara pijinia Jesucristo ata ja-
matabēcueneitsi. Itsiata baitsi jane Jesucristo apo jamatabējumaitsi: “Jitsi-
pajē daxitajivi taneyaiyataenexa pacuenia taxa Dioso yaiyatanetsi,” apo
jamatabējai.

⁷ Bajaraponē picani ayajamatabēcuenenē. Paxa Dioso yajavaponapona
athēbētatsia. Itsiata itsa patsica mapanacuayabetsicaje, naexana pacuenia
vaxaitsi banaexanatsi mapanacuataje. Nexata paxa Dioso bepijajivitonē
naexana, pacuenia Dioso itorobatsi pexanaenexa.

⁸ Bejivitonēcuenia itsa naexana, beveliajamatabēcuenenēcuenia ponapona.
Paxa Dioso pitorobicueniatsi jumecovēnēta. Pacuenia bitso pibisiacuene
pexanaevi pijaneconi yabara cruzajavabelia bacobematabiabarutatsi pe-
beyaxuabinexatsi, bajara pijinia pacuenia Jesucristo ata nacopata cruzajav-
abelia pecobematabiabarutsinexatsi.

⁹ Bajaraxuata Dioso mēthēvetsina matacotatsi. Caponatsi athēbēabetsia
peecaenexa paxa Diosojavatatsia, pebarēevetsinexatsi daxitacuene.

¹⁰ Nexata bajaraponē itsa vēnlivaisitaenatsi, pematabacabēta yaiyataeya
tonubenaenatsi daxitajivi. Athēbētatsia pejinavanapaevi, mapanacuapijivi
ata, petēpaevimi ata, pematabacabēta yaiyataeya tonubenaenatsi.

¹¹ Nexata daxitajivi jumai tsane Jesucristo yabara: “Jesucristo rabaja
cajena pepo petuxanenē,” jai tsane. Nexata daxitajivi yapētaena pacuenia
paxa Dioso bitso ayajamatabēcuenenē.

Pacuenia Dioso pejumecovënëtsivi pexaniajailivaisi pejumecovënëtavanapaexae, bepecotia mapanacuataje yabara pelivaisi

12 Tajamonae bitso patacaasivavi, pacuenia panejumecovënëtame pamatacabi pacatsipaebaponaponatsi Dioso pejumelivaisi, bajarapacuenia matatoxenetsia Dioso pajumecovënëtavanapare, aeconoxae xanë tajë pacavecuaponaponae atatsi. Pacaejivimë canacujitsia cjunaviaya Dioso pajumecovënëre. Nexata epexaniacuene paexanavanapaename. Tsipaji Dioso papacapanepaevinexa.

13 Dioso rabaja pacajamatabëcuene yavenona panejamatabëëthëtovetsina jitsipaeya paneexanaenexa, pacuenia Dioso pacatojitsipa. Dioso pacajamatabëcuene cajëpae ya exananua paneexanaenexa bajarapacuenia.

14 Daxitacuene paexanavanapare pajamatabëcuenenatsipaebinejevamë. Pëtsa anaeya namataenetsia najumenotsia panabijatanemenua.

15 Bajarapacuenia itsa pajinavanapaename, nexata daxita paxamë aneconijibia jivi patsitajinavanapaename Dioso papexixaemë. Nexata mapanacuapijivi pibisiacuene pexanaevi tuatujëta pajinavanapae atamë tsane, itsajivi ata acuenebi tsane pibisiacuena papecabaracuaicuaijainexa. Pacuenia pecotia itayota pitaquirijavata, bajara pijinia pacuenia paxamë ata paitsimë tsane. Bepapecotiamë tsane pexaniajailivaisi panejumecovënëtavanapaexae bajarapamonaejavata.

16 Bepapecotiamë tsane xaniavaetsia itsa patsitajumecovënëtavanapaename bajarapamonaejavata pexaniajailivaisi, Jesucristo pelivaisi. Bajarapacuenia itsa patsitajumecovënëtavanapaename, pacasivabarëyatsi tsane pamatacabi icatsia Cristo patsianica. Bajarapacuenia pacasivabarëyatsi tsane tsipaji baja yapëtaenajë apo tanacueratsijava asaëya tanacuenebijava paxamëjavata.

17 Dioso pacasivabarëya panenajamatabëcuenerajutsixae Diosojavabelia panetoinavanapaenexa bajaraponë papecatojitsipaecuenia. Itsamonae nebeyaxuabijitsia ata tsipae Cristo pelivaisi patacatsipaebixae, xanë itsiata nasivajamatabëcuenebarëyanë tsipae. Tsipaji Cristo pelivaisi bajarapacuenia patacatsipaebinxae, Dioso netocopata. Nexata daxita paxamë pacayajavajamatabëcuenebarëyatsi tsane.

18 Bajarapacuenia paxamë ata pajamatabëcuenebarëyamëre tsavanapae. Paneyajavabarëyamërenua tsavanapae.

Timoteobeje Epafroditobeje yabara pelivaisi

19 Itsa vajatuxanenë Jesús jitsipa, naxanitsiayo jamatabëitorobajë Timoteo papecataenexalia. Pepatsicujinaerena, itsa pacavënëlivaisitaenatsi pacuenia pajinavanapame, nejamatabëcuenebarëyaya exanaejitsia.

20 Bajaraponë caenë nejamatabëcuenejëpa. Bajaraponë bitso pacasivanajamatabëxaina xaniavaetsia panejinavanapaenexa.

21 Daxita itsamonae bitso najamatabëxaina epenatojitsipaecuenia pexanaenexa. Apo sivanajamatabëxainae Jesucristo petonacuenebinexa.

22 Paxamë baja payapëtaneme pacuenia Timoteo pacatsitaponapona pexaniajamatabëcuenia. Pacuenia itsamonae paxa penacuenebijava bayavenona, bajara pijinia pacuenia Timoteo neyavenona jivi tatsipaebaponaejava pexanialivaisi, Jesucristo pelivaisi.

23 Bajaraxuata jamatabëitorobajë Timoteo paxamëjavabelia papecataenexalia. Itsa yapëtaenajë pacuenia nexanaejitsia penaneconitsivi pejebabiabibota taneconitsiaponaponaevajava yabara, nexata bajaraxuacujinae paca-toitorobialitsi Timoteo papecataenexalia.

²⁴ Xanë jamatabëjumaitšinë paxamë yabara: “Itsa Dioso netojitsipaena xanë ata taponænena bajarabelia, nexata neyavenonaena bepïjia taponænena tataenexalia Filipos tomarapïjivi,” jamatabëjanë paxamë yabara.

²⁵ Panetoitorobaremena rabaja vajabananë Epafrodito pataneyavenonænexamë bajarapacuenia tanamatavenonaepatota. Nexata Jesucristo patonajuanacuenebajëbeje. Asaëyata panajuanacuenXanë jamatabëjumaitšinë paxamë yabara: “Itsa Diosobajëbeje, Dioso apo pejumecovënëtsivi paneit-sacueniababiabi atabeje. Nexata icatsia netsitaxanepana bajaraponë pata-catoitorobinexalia.

²⁶ Majotaje Epafrodito piavitaneucujinae, jamatejema baja. Nexata aeconoxae bitso jamatabëpona paxamëjavabelia papecataenexa. Bitso jamatabëpona tsipaji yapëtane panevënëlivaisitaejava pebitsojava piavitaneucue.

²⁷ Xaniajai rabaja picani. Avitane petëpaejavabelianexa. Itsiata baitsi jane Dioso itaxutotsoniatanetsi. Xanë ata Dioso nitaxutotsoniatane. Tsi-paji ita nevecuatëpaejitsipa, xanë bitso najamatabëxainaejitsipajë. Tsi-paji penaneconitsivi pejebabiabibota taneetsixae tanajamatabëxainaejavata, nevecuatëpaejitsipa.

²⁸ Bajaraxuata bitso jitsipajë bajaraponë patacatoitorobinexalia panetaenexa, nexata paxamë panejamatabëcuenebarëyanexa ita pataneme icatsia bajaraponë. Nexata xanë ata paxamë yabara bevelia najamatabëxainaeajë.

²⁹ Pacopiapitsianame bajaraponë bitso jamatabëcuenebarëyaya Dioso pejamatabëcueneta vajabananëxae. Pamonae jamatabëcueneitsi pacuenia bajaraponë jamatabëcueneitsi, payaiyataeneme.

³⁰ Paxamë apo papatsi atamërena maberena je pataneyavenonaenexamë, itsiata panejamatabëcueneta bajaraponë panetoitorobaremena taneyavenonaenexa. Nexata bajaraponë neyavenonabiaba Cristo pijacuene tatonacuenebijava. Bajaraxuacujinae ita avitane, imoxo picani petëpae.

3

Pacuenia jivi Dioso pejitsipaecuenia betojinavanapa yabara pelivaisi

¹ Tajamonae, palivaisi capanepaeya pacatoyaquinatsi baja, bajarapalivaisi pasivajamatabëcuenebarëyamëre Cristo papijajivixaemë. Xanë apo pacasivacueranaetsi patacatoyaquinaenexa icatsia bajarapalivaisi. Tsi-paji xanepana icatsia panejumetaenexa bajarapalivaisi.

² Panayajivitaema pijamatabëcuenebejevi, pamonae beaviri pianapanaevi. Tsi-paji raja bajarapamonae apo aura pexanaejava yabara. Bajarapamonae jamatabëcuenenavëxaniabiaya jumaitsi tsabiabi Jesucristo pijajivijavabelia: “Xanepana paxamë ata papecaperabëcaucubinexa judïovicuenia Dioso pepacuene papecacapanepaenexa panijaneconivecua,” jai tsabiabi.

³ Nacaperabëcaucutsi ata tsipae, vajanacaperabëcaucutsijava yabara, Dioso pexitsi apo nacaexanae tsipae. Vaxaitsi pepacuene vajanacapanepaevinexa Diosojavabelia. Tsi-paji vajamatabëëthëtojavavetsina najamatabëcuenecopatatsi Diosojavabelia vajanacapanepaenexa. Jamatabëcuenebarëyatsi Jesucristo pijajivixaetsi. Yapëtanetsinua pacuenia Dioso apo nacacapanepae tsipae vajacuata vajaexanaejava pejamatabëcueneta.

4 Itsajivi itsa caejëpaejitsipatsi pijacuata penacapanepaenexa Diosojavabelia judionëxae, Dioso petonacuenebijava yabara ata, nexata xanë ata necaejëpaejitsipa tajacuata tanacapanepaenexa.

5 Xanë picani mataitsinëje. Itsa baja xainajë ocho pamatacabibeje tanaexanaecujinae, tajasalinaivucenia neperabëcaucuta. Baitsi neboupiperabëcaucuta. Xanë raja tajasalinainëmi Israelpijinë. Benjamínpijinë pemomoxiyajuvënënenë. Taxa judionë. Taena ata judiova. Xanë picani fariseonë. Pacuenia fariseovi bitso jumecovënëta Dioso Moiséspijinëta penajumecopatsilivaisi, bajara pijinia pacuenia xanë ata itsinë.

6 Daxita tajamatabëcuenesaëta caasaënë tajumecovënëtsijava Dioso Moiséspijinëta penajumecopatsilivaisi. Jamatabëcuenenavëxaniabajë tsaena bitso. Jesús pelivaisi pejumecovënëtsivi yabara, jumaitsinë tsabiabi: “Dioso Moiséspijinëta penajumecopatsilivaisivecua saicayalivaisi jumecovënëta. Nexata bajarapamonae bebeyejebatsi,” janë tsabiabi. Nexata Jesús pijajivi bejiobiaexanabajë. Dioso Moiséspijinëta penajumecopatsilivaisi, bitso xaniavaetsia jumecovënëtaaponaponajë. Nexata itsajivi ata acuenebi pejumaitsiyava xanë yabara: “Pablo xaniavaetsia apo jumecovënëtsi Dioso Moiséspijinëta penajumecopatsilivaisi,” pejaiyava.

7 Daxita bajarapalivaisi yabara xanë picani sivabarëyanë. “Itsa jumecovënëtsianajë bitso, netonamatamotsiana Diosojavabelia,” jamatabëjanë picani. Itsiata aeconoxae yapëtaniji daxita bajarapalivaisi piamatamobilivaisicueene. Tsipaji baja najamatabëcuenecopatajë Cristojavabelia tanevecuaajibiaexanaenexa tajaneconi.

8 Aeconoxae baja yapëtaniji daxita bajarapalivaisi piamatamobilivaisicueene. Daxita bajarapalivaisivecua netonamatamota tayapëtaenexa xaniavaetsia tajatuxanenë Jesucristo. Jesucristo taneyajavaponaponaexae, nexata piamatamobilivaisi tajumecovënëtsijavami, copatajë baja.

9 Dioso aneconijibia apo netae tajumecovënëtsixae Dioso Moiséspijinëta penajumecopatsilivaisi. Aeconoxae baja Dioso aneconijibia netane tsipaji najamatabëcuenecopatajë Jesucristojavabelia tanevecuaajibiaexanaenexa tajaneconi.

10 Tavajënaeyabelia bitso jitsipajë daxitacuenivecua tayapëtaenexa pacuenia Cristo jamatabëcueneitsi. Pasaëta Dioso matacotatsi Cristo petëpaejavavecua, bajarapaasaë jitsipajë tayajavaponaponaenexa. Cristo pijajivitonëxaenë, jitsipajë xanë ata tanebejiobiaexanaenexa, tatëpaenexa ata.

11 Tsipaji xanë ata copiaevetaponaponajë Dioso tanematacotsinexa tatëpaejavavecua.

Pacuenia Pablo najamatabëcuenesaëta xaniavaetsia Cristo peyajavaponaponaenexa, pepatsinexa Dioso pijanacuayabetsia, yabara pelivaisi

12 Xanë apo jamatabëjumaitsinë: “Daxita baja Dioso pejitsipaecuenia toexanajë. Nejamatabëcuenecaejëpa baja tajumecovënëtsinexa pacuenia Dioso netojitsipa taexanaenexa,” apo jamatabëjanë. Itsiata tavajënaeyabelia tanejamatabëcuene caejëpaponaponaenexa, caasaënë tsaponapona taexanaejava pacuenia Dioso netojitsipa. Jitsipajë bitso tajamatabëcuenexanepanaejava tavajënaeyabelia pacuenia Dioso netojitsipa. Tsipaji bajarapacuenie yabara Jesucristo nesivatëpa.

13 Tajamonae, apo jamatabëjumaitsinë: “Xanë rabaja nejamatabëcuenecaejëpa Dioso tajumecovënëtsinexa pacuenia Dioso

netojitsipa taexanaenexa,” apo jamatabëjanë. Jume baja cajena. Mapacuenia najamatabëxainajëje. “Daxita xua exanajë Jesús pelivaisi tajumecovënëtsivajënaeya, nacofënëtajë baja,” jamatabëjanë. Najamatabëcuenesaëtajë xaniavaetsia tatoponaponanexa Dioso. Pacuenia pebitsojinaenë pecujinaejinaejava penayacobijavata, nasaëta pepatsinexa petocaëjëtsijavabeliatsi, bajara pijinia pacuenia xanë ata najamatabëcuenesaëtajë xaniavaetsia tatoponaponanexa Dioso. Tavajënaeyabelia najamatabëcuenesaëtajë taexanaenexa pacuenia Dioso netojitsipa. Bajarapacuenia najamatabëxainaponaponajë.

14 Pacuenia pecujinaejinaenë nasisaëta penacanabinexa perajutsinexatsi premiovënëjava, bajara pijinia pacuenia najamatabëcuenesaëtajë. Najamatabëcuenesaëtajë xaniavaetsia tatoponaponanexa Dioso tanerajutsinexa athëbëtatsia taxinaejavanexa tayajavaponaponaxae Jesucristo.

15 Daxita pamonaë xaniavaetsia jumecovënëtavanapa Dioso, bajarapamonae ata benajamatabëcuenesaëtavanapa xaniavaetsia petojinavanapaenexa Dioso. Itsa abaxë paxamë saicaya itsajamatabëcuene paxainame, nexata Dioso pacayapëtaeyaexanaena saicaya abaxë itsajamatabëcuene panexinaejava.

16 Nexata palivaisivajëto jumeyapëtanetsi pexaniajailivaisi, bajarapalivaisi bejumecovënëtavanapatsi. Beacaasë tsavanapaetsinua vajavajënaeyabelia orijibia vajajumeyapëtaeponaenexa.

17 Tajamonae, pacuenia baja pacatsitaponaponatsi, bajara pijinia pacuenia paxamë ata pajinavanapare. Itsamonae paxamëyajuvënëvi xaniavaetsia jinavanapa pacuenia pacatsitaponaponatsi. Bajarapamonae ata panaitaxutocaevetsianame paxamë ata xaniavaetsia panëjinavanapaenexa pacuenia bajarapamonae jinavanapa.

18 Ayaibitsaëtoxaneto paxamëyajuvënëvi apo jumecovënëtsi Jesucristo cruzata pesivatëpaejavatsi pecapanepaenexatsi. Bajarapamonae yabara pacatsipaebatsi baja anijatonë. Itsiata icatsia aeconoxae yaitaxutonueya pacatsipaebianatsi.

19 Mapanacuaje pecopiarucaematacabita, bajarapamonae Dioso veriabianatsi. Tsipaji bitso jitsipa pijacuata penatojitsipaecuenia pexanavanapanexa. Piauracuene exanabiabi ata, jamatabëcuenenavëxaniabiaya jamatabëjumaitsi tsabiabi: “Pexaniacuene bitso vaxaitsi exanavanapatsi,” jamatabëjai tsabiabi bajarapamonae. Ëmapanacuapijicuene saya sivanajamatabëxainabiabi.

20 Vaxaitsi baja cajena jinavanapaenatsi Dioso pijanacuataatsia. Bajaraxuata copiaevetavanapatsi vajatuxanenë Jesucristo pepatsijavatsica vajanacapanepaenexa Dioso pijanacuayabetsia.

21 Vajaperabëto vereverecaena. Itsiata vajatuxanenë Jesús nacaperabëitothianaena. Nexata pacuenia bajaraponë perabëitsi athëbëtatsia, bajara vaxaitsi ata perabëitsitsi tsane. Nexata pasaëta Jesús caëjëpatsi pitorobinexa daxitacuene, bajarapasaëta nacaperabëitothianaena.

4

Pacuenia vaxaitsi besivabarëyatsi tsabiabi vajatuxanenë Jesucristo yabara pelivaisi

1 Tajamonae bitso patacaasivavi, pacaitaxanatsi. Bitso jamatabëpacatanetsi. Bitso pacasivajamatabëcuenebarëyatsi. Tsipaji xaniavaetsia pajumecovënëtavanapame Jesús pelivaisi pacuenia baja

pacatsipaebatsi. Pajamatabëcuenesaëmère tsavanapae pacopatsinejevamë panejumecovënëtsijava Jesús pelivaisi.

² Papatirivamëbeje, Evodia Síntique, paxamëbeje pacatoyaquinatsibeje patacaitavetsinexabeje mapacueniaje. Pëtsa baja icatsia pematatsënëa namataenetsia panajumeanaenotamebeje. Panajamatabëcueneyëparebeje Jesús pelivaisi panejumecovënëtsivaxaabeje.

³ Xamë ata xaniavaetsia taneyavenonaenëmë Dioso pijacuene tanacuenebijava, catoyaquinatsi. Jitsipajë neyavenonaenexa bajarapapetirivabeje, penabaramatabëcuenexanepanaenexabeje namataenetsia icatsia penajumeanaenotsiyanivabeje. Bajarapovabeje bitso neyavenonabeje tatsipaebijava itsamonaejavabelia pexaniajailivaisi pepadaneaelivaisinexatsi Diosojavabelia. Bajarapacuenia Clemente ata neyavenona. Itsamonae ata patanajuanacuenebivi, bajarapacuenia neyavenona. Daxita baja bajarapamonae vënërubena Dioso pijabaxutota, itsa pabaxutota vënëyaquinarubatsi pamonaex pexinaevinexa matababi apo pevereverecejava.

⁴ Jesús pelivaisi panejumecovënëtsivixae, pajamatabëcuenearëyamëre daxitamatabibjavabelianexa. Icatsia pematatsënëa pacajumaitsitsi. ¡Pajamatabëcuenearëyamëre tsavanapae!

⁵ Jamatabëcuenexanepanaeya xaniavaetsia pajinavanapaename daxitajivi papecajamatabëcueneyapëtaenexa. Tsipaji rabaja vajatuxanenë imoxoyo pevajënæ pepatsinexatsica.

⁶ Pëtsa pajamatabëcuenebëjamë itsacueneyavayo ata yabara. Biji rajane pavajëre Diosojavabelia daxitacueneyavanë yabara. Pexaniajamatabëcuenenua parajutabiabare Dioso papecayavenonaevavanë yabara.

⁷ Nexata Dioso pacajamatabëjemayaexanaena panejamatabëcuenebëjaiyaniva. Pexaniacuene bitso bajarapajamatabëcuene. Dioso itsa nacajamatejemayaexana vajajamatabëcuenebëjaiyaniva, itsiata apo yapëtaetsi pacuenia nacajamatejemayaexana vajajamatabëcuenebëjaiyaniva. Dioso itsa pacajamatejemayaexanaena panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovënëtavanapame, daxitacuene yabara panenajamatabëxainaejava atavecua Dioso pacaeveysiana.

Pacuenia benajamatabëxainabiabatsi ëpexaniacuene yabara pelivaisi

⁸ Tajamonae, pecotocaevilivaisi pacatoyaquinatsi mapacueniaje. Panajamatabëxainabiabare ëpexaniajailivaisi yabara. Panajamatabëxainabiabarenua panenayaiyataacuene ata yabara. Panajamatabëxainabiabarenua xua xanepana paneexanavanapaenexa. Panajamatabëxainabiabarenua Dioso papecajamatabëcuene barëyayaexanaenexa. Panajamatabëxainabiabarenua xua jivi baracuacuajijitsia pexaniacuena. Panajamatabëxainabiabarenua daxita xua pexaniacuene. Panajamatabëxainabiabarenua xua yabara Dioso pacabarëyataejitsia.

⁹ Daxita pacuenia pacatsipaebatsi, pacuenia pacatsitaponaponatsinua, bajarapacuenia paexanavanapare. Nexata Dioso, ponë pacajamatejemayaexanaejitsia panejamatabëcuenebëjaiyaniva, pacayajavaponaponaena.

Pacuenia Filipos tomarapijivi ofrenda tojebabiabatsi Pablonexa yabara pelivaisi

10 Vajatuxanenē bitso nejamatabēcuenēbarēyayaexana. Tsiipaji baja paxamē icatsia panesivanajamatabēxainame pataneyavenonaenexamē. Nexata baja icatsia ofrenda panetoitorobaremena. Bajayajebi apo panetoitorobi atamē ofrenda, itsiata paxamē yabara apo jamatabējumaitsinē: “Apo jitsipae raeta icatsia taneyavenonaenexa bajarapamonae,” apo jamatabējanē. Jume cajena. Yapētaniji pacuenia picani jamatabēpanetoitorobi atamē ofrenda pataneyavenonaenexamē, itsiata apo pacacuenecaējēpae patanetoitorobinexamē.

11 Apo pacatoyaquinaetsi mapacueniaje ofrenda patanetoitorobivajēnaeyamē bitso tanamatavenonaexae itsacuenējavayo. Dioso tanematatejemayaexanaexae tajamatabēcuenēbējaiyaniva daxitacuene yabara, sivajamatabēcuenēbarēyanē saya xuayovajēto xainajē.

12 Yapētaniji pacuenia ponaponajē, pamatacabi tsiquirijavayo xainae atanē. Yapētanijinua pacuenia ponaponajē pamatacabi ayaijava xainajē. Yapētanijinua pacuenia jamatabēcuenēbarēyanējitsia daxitamatacabijavabelianexa. Nexata itsa xainajē daxita tanamatavenonaejavaxi, barēyanē. Apo xainae atanē itsacuenējavayo ata, itsiata barēyanē tsabiabi.

13 Nejamatabēcuenecaējēpa tanajamatabēcuenēsaētsinexa daxitacuene yabara. Tsiipaji Cristo pesaēta nejamatabēcuenecaējēpaeyaxana.

14 Itsiata baitsi jane paxamē pexaniacuene bitso panetoexaname itsa panetoitorobaremena bajarapaofrenda bitso tanamatavenonaejavata.

15 Payapētaneme rabaja mapacuenēje. Pamatacabi copiaya tsiipaebanajetarucajē jivi pecapanepaelivaisinexatsi Macedonia nacujava, paxamē paFilipos tomarapijivimē panijanacuavecua itsa ponajē, paxamē panerajutame ofrenda pataneyavenonaenexamē. Itsatomarapijivi, Dioso pejumecovēnētsivi ata, apo nerajutsi ofrenda bajarapacuenia taneyavenonaenexa. Ēpaxamē itsiata paneyavenoname.

16 Nexata bajaraxuacujinae, itsa abaxē ponaponajē Tesalónica tomarata, panetoitorobabiabame icatsia ofrenda anijatonē tanamatavenonabiabijavata.

17 Sivabarēyanē tsabiabi itsa panetoitorobabiabame bajarapacuenia. Itsiata apo sivabarēyanē tsabiabi tanetoxanepanaexae bajarapacuenia pataneyavenonaejavamē. Jume baja cajena. Biji rajane sivabarēyanē tsabiabi bajarapacuenia pataneyavenonaejavamē. Tsiipaji juya paxainaejitsiamē Diosojavabelia papecarajutsijavanexa athēbētatsia.

18 Nexata pitajē daxita patanetoitorobijavamē Epafroditota. Xainajē baja nexata vena ayaijava, tanamatavenonaejava matatoxenetsia. Xua panetoitorobame ofrendacuena, tsitapexaniacuenetsi Dioso. Bajaraxua Dioso sivajamatabēcuenēbarēya.

19 TajaDioso bitso pexainanē. Nexata pacarajutsiana daxita pacuenia panamatavenoname. Bajara pijinia pacuenia ayaijava Dioso pacarajutsiana Jesucristojavabelia xaniavaetsia panenajamatabēcuenecopatsixae.

20 ¡Vaxa Dioso ayaijamatabēcuenenē daxitamatacabijavabelianexa! Bajara itsi tsane.

Pacuenia Pablo tonajumeitoroba Dioso pejumecovēnētsivi pebajacobinexatsi yabara pelivaisi

21 Nebajacobiana paxamējavata daxita Jesús pelivaisi pejumecovēnētsivi, pamonaē Dioso pijajivi. Dioso pijajivi, pamonaē xanējavata jinavanapa, pacabajacobalia.

²² Daxita Dioso pijajivi, mapatomarataje pejinavanapaevi, pacabajacobalia. Romanonacua pepo pevetsinë pijabota penacuenebivi ata bitso pacabajacobalia.

²³ Pacatovajëtabiabatsi Diosojavabelia, vajatuxanenë Jesucristo papecayavenonabiabinexa. Bajara itsi tsane.

Mapabaxutoje San Pablo toyaquina Colosas tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Colosas tomarapijivijavabelia, yabara pelivaisi

¹⁻² Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje xaniavaetsia Jesucristo pelivaisi panejumecovënëtsivi, Colosas tomarata panejinavanapaevi. Vajabananë Timoteo ata pacajamatabênajina. Aeconoxae baja nacaemonaetsi, paxamë ata Jesús pelivaisi panejumecovënëtsixae. Pacatovajëtsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëtabiaba Colosas tomarapijivi, Jesús pelivaisi pejumecovënëtsivi, yabara pelivaisi

³ Paxanëbeje Timoteobeje pacatovajëtabiatsibeje vajatuxanenë Jesucristo paxa Diosojavabelia. Nexata Diosojavabelia patacatovajëtsijavatabeje, paxamë yabara Diosojavabelia pajumaitsinëbeje tsabiabi mapacueniaje: “Pexaniajamatabëcuene pacarajutatsibeje. Tspaji pexaniacuenia yavenonabiabame Colosas tomarapijivi,” pajanëbeje tsabiabi Diosojavabelia paxamë yabara.

⁴ Bajarapacuenia pajumaitsinëbeje tsabiabi tspaji pacavënëlvaisitanetsibeje xaniavaetsia panejumecovënëtavanapaevaja Jesús pelivaisi. Pacavënëlvaisitanetsibejenua paneasivatsavanapaevaja daxita Jesús pelivaisi pejumecovënëtsivi.

⁵ Bajara pajamatabëcueneitsimë tspaji baja xaniavaetsia payapëtaneme xua Dioso pacatoxaniavaeta athëbëtatsia papecarajutsinexa. Pamatacabi ajena pajumetaneme pexanialivaisi papecacapanepaelivaisinexa, bajara-pamatacabi payapëtaneme baja xua Dioso pacatoxaniavaeta athëbëtatsia papecarajutsinexa.

⁶ Bajarapaxanialivaisi pajumetaneme baja pamatacabi copiaya Epafras pacatsipaeba Dioso papecaasivajava. Bajarapalivaisi baja aeconoxae daxitanacuanëjava yacajëpapona. Nexata daxitanacuanëjava, pamonaë jumecovënëtaona bajarapalivaisi, copatapona baja perujujamatabëcuenemi. Nexata baja pejanajamatabëcuene xainapona. Bajarapamonaë pejanajamatabëcuene xainapona, pacuenia paxamë ata pejanajamatabëcuene paxainame pamatacabi ajena pajumecovënëtime bajarapalivaisi. Bajara pamatacabijavaverenacujinae paxamë baja payapëtaeponame pepacueni Dioso papecaitaxutotsoniataevaja.

⁷ Dioso papecaitaxutotsoniataevaja, copiaya baja cajena vajaa-sivanë Epafras pacatsipaeba. Bajaraponë Jesucristo xaniavaetsia petonacuenëbinë. Nexata bajaraponë panetoitorobaremena pataneyavenonaenexabeje Dioso patatonajuanacuenëbinexa majotaje.

⁸ Nexata pamatacabi Epafras pata paxanëbejevaberena, panetsipaebabeje xaniavaetsia panejinavanapaevaja. Panetsipaebabejenua Espiritu Santo papecayavenonaevaja paneasivanexa itsamonaë ata.

⁹ Nexata patacavënëlvaisitaecujinaebeje, pacatovajëtabiatsi Diosojavabelia. Pacatovajëtabiatsi xua Dioso pacatojitsipa

papēcayapētaeyaexanaenexa. Nexata Dioso itša pacayapētaeyaexana xua Dioso pacatojitsipa, bajaraxua paneexanavanapaenexa. Bajarapacuenia pacatovajētabiabatsi daxitacuene, Dioso pijacuene ata, Dioso papēcayapētaeyaexanaenexa.

¹⁰ Pacatovajētabiabatsinua xaniavaetsia jivi panetsitajinavanapaenexa, Dioso papēcasisvabarēyanexa pexaniacuene paneexanabiabixae. Pacatovajētabiabatsinua Diosojavabelia panevajēnaeyabelia Dioso panejamatabēcueneyapētaeponaenexa.

¹¹ Pacatovajētabiabatsinua Dioso papēcajamatabēcuenesaē ašāyaexanaenexa pesaēta. Nexata bajayajebi itsamonaē pacaitsacueniabiabiāta, pacajamatabēcuenecaējēpaena paneajamatabēcuenesaē tsavanapaējāva.

¹² Pacatovajētabiabatsinua paxamē panejumaitsabiabinexa Diosojavabelia: “Xanepana rabaja. Tšipaji bitso pexaniacuene panetoexaname,” panejaitsabiabinexa Diosojavabelia. Bajarapacuenia pajumaitsimē tsabiabi tsane tšipaji bajaraponē pacavecuajibiaexana baja panijaneconimi. Nexata baja Dioso aneconijibia pacatane. Nexata paxamē ata Dioso pacarajutsiana xua xaina pijajivi perajutsinexa pijapenivenivenaenacuatatsia.

¹³ Vaxaitsi bajayata apo yapētaetsi pexaniajailivaisi. Nexata picani bepitaquirinacuata vajajinavanapaevi. Tšipaji picani dovathi pijajivitsi tsavanapaē. Pibisiacuene exanabiabatsi pacuenia dovathi nacaitoroba. Itsiata baja aeconoxae Dioso nacapita dovathivecua. Nexata baja Dioso pexēnato, piasivanē, pijajivitsi nacaexana.

¹⁴ Nacasivatēpa Cristo. Nexata baja Cristo pejamatabēcueneta Dioso nacavecuajibiaexana vajaneconimi. Nexata baja aneconijibia jinavanapatsi.

Pacuenia Dioso nacavecuajibiaexana pibisiacuene vajaexanaeconimi Cristo vajanacasivatēpaexae yabara pelivaisi

¹⁵ Dioso cajena caeto ata apo vajataenē. Itsiata Dioso pexēnato, Cristo, naexana mapanacuataje. Cristo paxa jēpa. Dioso daxitacuene mapanacuata pexanaevajēnaeya ata, Cristo baja cajena ponapona athēbētatsia.

¹⁶ Cristo baja cajena exana daxitacuene Dioso pejamatabēcueneta. Athēbētatsia xua apo taetsi, Cristo exana. Daxitacuene xua tanetsi mapanacuata atajē, Cristo exana. Cristo daxitacuene itša exana, āngelevi ata exana. Angelevi penamatacaitorobivinexa ata, Cristo exana. Bajarapacuenia Cristo āngelevi ata exana pacuenia Cristo jitsipa petonacuenebavanapaenexatsi.

¹⁷ Daxitacuene Cristo pexanaevajēnaeya ata, Cristo baja cajena athēbētatsia ponapona. Daxitacuene xua Cristo exana, bajaraxua pexanaecujinae abaxē Cristo pesaēta mapamatacabita ataje tsitecanajetaruca.

¹⁸ Cristo baja cajena pevetsinē daxita Dioso pejumecovēnētsivi. Nexata daxita Dioso pejumecovēnētsivi Cristo penamatacaitorobinē. Cristo pejamatabēcueneta daxita Dioso pejumecovēnētsivi Dioso pijajivi exanatsi. Cristo taxuua jivi petēpaecujinae icatsia jivi piasaējavanexa. Bajaraxuata itsamonaē ata icatsia asaē tsane petēpaecujinae. Nexata Cristo daxitajivi matatoxenetsia bitso ayaijamatabēcuenenē.

¹⁹ Bajarapacuenia Cristo bitso ayaijamatabēcuenenē tšipaji Dioso pexēnato tojitsipa pejamatabēcuenējēpaenexatsi.

²⁰ Daxitajivi, pamonaē jinavanapa mapanacuataje, naneconita Diosojavabelia. Pamonaē ata jinavanapa athēbētatsia, naneconita Diosojavabelia. Nexata Dioso jitsipa daxita bajarapamonaē pebarajamatabēcuenexanepanaenexa. Nexata Dioso itorobica Cristo

mapanacuayabetsicaje cruzata pesivatēpaenexa daxita bajarapamonae. Nexata daxita bajarapamonae Dioso aneonijibia tane Cristo pesivatēpaejamatabēcueneta. Bajaraxuata Dioso baja barajamatabēcuenexanepana bajarapamonae.

²¹ Paxamē picani abaxē bajayata Diosovecua naxuabiaya pajinavana-pame. Dioso bepapijavajabitsaēmē tsavanapae pibisiacuene paneex-anavanapaexae. Itsiata baitsi jane aeconoxae baja Dioso pacabarajamatabēcuenexanepana.

²² Dioso baja aeconoxae pacabarajamatabēcuenexanepana. Tsipaji Jesucristo bepejiobicuena cruzata pacasivatēpa. Nexata baja Dioso pacavecuajibiaexana pibisiacuene paneexanaeconimi. Bajaraxuata aeconoxae baja Dioso papijajivimē. Dioso baja pitabarata aneonijibia pajinavanapame.

²³ Nexata panevajēnaeyabelia aneonijibia Dioso pitabarata panejinavana-paenexa, asaēyata pajumecovēntavanapare Cristo papecasivatēpaejava panijaneconi yabara. Palivaisi baja pajumecovēntame papecacapanepaelivaisinexa, pētsa pacopatame panejumecovēntsijava. Bajarapalivaisi baja yacaējēpa daxitanacuanējava petsipaebaponaejava. Xanē ata, Pablonē, tsi-paebaponajē bajarapalivaisi.

Pacuenia Pablo itorobatsi peyavenonaenexa Dioso pejumecovēntsivi yabara pelivaisi

²⁴ Xanē Pablonē, majotaje penaneconitsivi pejebabiabibota, naneconitsiaponaponajē paxamē apo pajudíovimējava Cristo pelivaisi patacatsipae-baponaexae. Itsiata jamatabēcuenebarēyanē taponaponae, nebejiobiaex-anabiabi ata. Pacuenia Cristo bejiobiaexanatsi pijajivi pecapanepaenexa, bajara pijinia pacuenia xanē ata itsamonae nebejiobiaexanabiaba. Bajara-pacuenia Dioso netocopata tanebejiobiaexanabiabinexa tavajēnaeyabelia tamatabēcuenesaētsaponaenexa Dioso tajumecovēntsijava. Nexata tanesivaa-jamatabēcuenesaēnexa daxita pamonaē jumecovēnta Cristo pelivaisi.

²⁵ Dioso netocopata tayavenonaenexa Dioso pijajivi, pamonaē Cristo pelivaisi jumecovēnta. Bajaraxuata paxamē ata pacayavenonatsi. Tsipaji Dioso nitoroba daxitajivi xaniavaetsia tatsipaebaponaenexa pexanialivaisi, Dioso pejumelivaisi.

²⁶ Dioso nitoroba jivi tatsipaebaponaenexa pacuenia Dioso tajēvelia namatabēxaina pijajivi pecapanepaenexa. Dioso baja cajena nacua pexanaevajēnaeya ata, najamatabēxaina pacuenia exanaejitsia pijajivi pecapanepaenexa. Abaxē picani itsajivi ata Dioso apo yapētaeyaexanae bajarapacuenē. Itsiata baitsi jane aeconoxae baja Dioso tocopata daxita Dioso pejumecovēntsivi peyapētaenexa pacuenia Dioso exana pijajivi pecapanepaenexa.

²⁷ Dioso tojitsipa apo judíovi ata peyapētaenexa pexanialivaisi, palivaisi picani itsajivijavabelia ata Dioso apo yapētaeyaexanae. Bajarapalivaisi mapacuenia itsije. Cristo cajena pacatsijamatabēcēca papecayajavaponapon-aenexa. Bajaraxuata nexata payapētaneme itsamatacabi Cristo paneyajava-jinavanapaejavanexa Dioso pijapenivenivenaenacuataatsia.

²⁸ Paxanē patanecaējēpacuenia, daxitajivi xaniavaetsia patsipaebaponajē Cristo pelivaisi. Pamuxujiobaponajēnua xaniavaetsia daxita bajarapamonae pejumecovēntsixinexa Cristo pelivaisi. Bajarapacuenia pamuxujiobaponajē pevajēnaeyabelia piamatabēcuenesaētsaponaenexa Cristo pelivaisi pejumecovēntsijava.

²⁹ Bajaraxuata asaēyata Dioso tonacuenebaponajē daxita pasaēta Cristo nerajutapona.

2

¹ Jitsipajë paneyapëtaenexa pacuenia bitso pacasivanajamatabëxainatsi. Nexata asaëyata Diosojavabelia pacatovajëtabiabatsi. Laodicea tomarapijivi ata tovajëtabiabajë. Itsamonae ata, pamonaë abaxë apo netae, bajarapamonae ata tovajëtabiabajë.

² Asaëyata Diosojavabelia pacatovajëtabiabatsi papecajamatabëcuene asaëyaexanaenexa Cristo pelivaisi panejumecovënëtsijava. Pacatovajëtabiabatsinua najamatabëcuenejëpaeya panejinavanapaenexa namataenentsia panenasivaxae. Pacatovajëtabiabatsinua panejamatabëëthëtota ayailivaisi paneyapëtaeponaenexa xaniavaetsia itsa payapëtaneme Cristo. Bajarapacuenia pacatovajëtabiabatsi xaniavaetsia paneyapëtaenexa pexaniajailivaisi, palivaisi picani Dioso apo yapëtaeyaexanaë itsajivijavabelia ata, baitsi jane baja Cristo pelivaisi.

³ Cristo pelivaisi xaniavaetsia itsa yapëtanetsi, nexata yapëtanetsi pacuenia Cristo nacatojitsipa vajatonacuenebavanapaenexa.

⁴ Bajarapacuenia pacatsipaebatsi itsajivi ata papecayamaxëitojorobivaniva, penajumetsënëtsilivaisi itsa pacatsipaeba, bepexaniajailivaisi itajara panjumetaeyaniva.

⁵ Apo pacayajavaponaponae atatsi, itsiata pacajamatabënajinabiabatsi. Jamatabëcuenebarëyanë itsa pacavënëlivaisitanetsi najamatabëcuenejëpaeya panejinavanapaejava. Jamatabëcuenebarëyanënu ita pacavënëlivaisitanetsi panevajënaeyabelia panejamatabëcuenesaë tsavanapaejava panejumecovënëtsijava Cristo pelivaisi.

⁶ Bajaraxuata pacuenia baja copiaya panajamatabëcuenecopatame vajatuxanenë Jesucristojavabelia papecacapanepaenexa Diosojavabelia, bajarapacuenia tsiteca panajamatabëcuenecopatavanapare. Panajamatabëcuenecoparenua panevajënaeyabelia Cristo papecayavenonapon-aenexa daxitacuene yabara. Nexata pajinavanapaname Cristo papecatojitsipaecuenia.

⁷ Paxamë xaniavaetsia panajamatabëcuenecopare Jesucristojavabelia papecayavenonaenexa. Nexata Jesucristo pacajamatabëcueneasaëyaexanaena. Nexata papexaniajailivaisi itsamonae pacatsipaeba, tsiteca pajumecovënëtavanapaname. Pajumaitsimënu tsabiabi tsane Diosojavabelia: "Xanepana rabaja. Tsipaji bitso pexaniacuene panetoexaname," pajamë tsabiabi tsane Diosojavabelia.

Pacuenia Cristo pijajivi pejanajamatabëcuene xainavanapa yabara pelivaisi

⁸ Xania. Nayajivitaeya pajinavanapare. Pëtsa panacopatame papecaya-maxëitojorobinexa pamonaë tsipaebavanapa saicayalivaisi Dioso pejumelivaisivecua. Bajarapamonae apo tsipaebaponae Cristo pelivaisi. Saya tsipaebapona mapanacuapijivi penajamatabëxainaelivaisi, penajumetsënëtsilivaisi, saya natsiquejemalivaisi.

⁹ Pacuenia Dioso jamatabëcueneitsi, Cristo itajëta mapanacuata itsa ponapona.

¹⁰ Pacuenia Dioso jamatabëcueneitsi, bajara paxamë ata itsamatacabi pajamatabëcueneitsimë tsane. Tsipaji Cristo payajavajinavanapame. Bajaraponë bitso ayajamatabëcuenenë. Caëjëpatsi pitorobinexa daxitacuene. Caëjëpatsinua pitorobinexa daxitanacuanë pevetsivi ata.

¹¹ Itsa panajamatabëcuenecopatame Cristojavabelia, nexata baja Dioso pacavecuaajibiaexana pibisiacuene paneexanaeconimi papecacapanepaenexa. Pibisiajamatabëcuene ata baja pacavecuaajibiaexana.

Nexata pacuena judiōvi pijacuenia perabēcaucubatsi, bajarapacuenia paxamē apo pacaperabēcaucubi pibisiacuene paneexanaeconimi Dioso papecavecuajibiaexanaenexa. Jume baja cajena. Biji rajane Cristo papecasivatēpaejava panejumecovēnētisixae, Dioso pacavecuajibiaexana pibisiacuene paneexanaeconimi.

¹² Itsa pacabautisaba, merata pacabubutaxuareca. Nexata papecabautisabijavata itsa pacabubutaxuareca, Dioso pacatane Cristo bepapecaya-javamēthētisivi itsa mēthētatsi petēpaecujinae. Nexata papecabautisabijavata, papecabubutaxuabicujinaereca icatsia itsa pacamatacotsina menevetsina, Dioso pacatane Cristo icatsia bepapecayajavaasaēvi petēpaecujinae icatsia itsa asaē. Bajarapacuenia Dioso pacatane tsipaji Cristo yabara pajamatabējumaitsimē mapacueniaje: “Xaniajai rabaja. Dioso pesaēta Cristo asaēyaexanatsi petēpaecujinae,” pajamatabējamē.

¹³ Paxamē picani abaxē bajayata bepanetēpaevi. Diosovecua naxuabiaya pajinavanapame pibisiacuene paneexanaecononi yabara. Bajarapacuenia picani Diosovecua naxuabiaya pajinavanapame apo pajudiōvixaemē. Itsiata baitsi jane aeconoxae baja Cristo payajavajinavanapame papecapanepaenexa. Tshipaji baja Cristo pejamatabēcueneta Dioso pacavecuajibiaexana pibisiacuene paneexanaeconimi.

¹⁴ Bitsō picani pibisiacuene exanavanapatsi. Tshipaji apo exanaetsi pacuena Dioso pejumelivaisita nacaitoroba. Itsiata baitsi jane Dioso baja nacavecuajibiaexana daxita bajarapaneconimi Cristo cruzata vajanacasivatēpaexae.

¹⁵ Bajarapacuenia Cristo cruzata vajanacasivatēpaexae, Cristo baja cueneamoneyaba dovathi. Tshipaji bajarapacuenia Cristo itsa nacasivatēpa cruzata, asaējibiaexana dovathi, pijajivi yajava. Pacuene dovathi pijajivi barēvetaponapona pitorobinexa, bajarapacuenia Cristo cueneamoneyaba. Nexata Cristo daxitajivijavabelia tsitanacueneitajēta pecueneamoneyabi-
java dovathi, pijajivi yajava.

Pacuenia Pablo muxujioba Jesús pelivaisi pejumecovēnētisivi pejamatabēnajinavanapaenexa Cristo peecaejava athēbētatsia yabara pelivaisi

¹⁶ Cristo baja pecueneamoneyabixae dovathi, pētsa panacopatame itsajivi ata papecapaniitavetsinexa panexaejava, panematavējēaapaejava ata. Itsa-monae abaxē tsiteca jumecovēnētavanapa perujulivaisi, Dioso Moiséspijinēta penajumecopatsilivaisi. Nexata pacuenia itorobatsi bajarapalivaisita, fiestanē exanabiaba caevai canacujitsia. Itsa fiestanē exanabiaba caejumeto canacujitsia, pejanajumeto itsa ecaica. Itsa fiestanē exanabiaba penacuer-
aevetsimatacabianē canacujitsia. Pētsa pajumecovēnētame, itsajivi pacaju-
natsi ata panenaponaenexa bajarapafiestanējavabelia.

¹⁷ Bajayata picani jivi ponabiaba bajarapafiestanējavabelia. Tshipaji pali-
vaisi bajayata Dioso Moiséspijinēta najumecopata, itorobatsi penaponabi-
abinexa bajarapafiestanējavabelia. Itsiata baja Cristo itsa patsica ma-
panacuayabetsicaje, Cristo baja copiarucaeyaexana bajarapacuenemi. Nex-
ata pacuenia Cristo nacaitoroba, bajarapacuenia exanavanapaenatsi.

¹⁸ Pētsa pajumecovēnētame itsamonae pacajumaitsi ata mapacueniaje: “Beveliajamatabēcuenivi panataema. Pavajētabiabarenua āngelevijavabelia Diosovecua panenaxuabiyani-
va. Bemajitsinaebota baja cajena pataniji bajarapacuenia vajaexanabiabinexa,” pacajai ata, pētsa
pajumecovēnētame. Bajarapamonae beayaijamatabēcuenivi nataeyabiaba
pejamatabēcuenepijilivaisi saya petsipaebaponaejava yabara.

¹⁹ Bajarapamonae Cristo apo pejumecovënëtsivi. Daxita vaxaitsi Cristo vajajumecovënëtsivi, Cristo pijajivitsi. Nexata Dioso nacatane caenë Cristo bepeperabëtotsi. Caejivi canacujitsia peperabëtota vinamataropotsiarubeneponareca. Bajara pijinia pacuenia vaxaitsi ata caenë Cristo bepeperabëtotsi Dioso nacatane. Bajarapacuenia Dioso nacatane Cristo pejamatabëcueneta. Nexata Dioso nacajamatabëcueneyavenonapona. Nacajamatabëcuene vitsabiaexanaponanua pacuenia Dioso nacatojitsipa.

²⁰ Itsamonae jamatabëcuenenavëxaniabiaya jumai tsabiabi: “Vajanacapanepaenexa Diosojavabelia, pexaniacuene toexanavanapaenatsi itsamonaejavabelia. Jumecovënëtanapaenatsinua daxita pacuenia nacaitoroba mapanacuapijivije,” jai tsabiabi itsamonae jamatabëcuenenavëxaniabiaya. Itsiata baitsi jane paxamë baja payapëtaneme bajarapalivaisi apo pexaniajailivaisicuene. Cristo itsa tēpa, paxamë ata, Cristo bepepecayajavatēpaevi, Dioso pacatane. Nexata baja picani paxamë mapanacuapijicuene yabaraje apo bepasivanajamatabëxainaemë. ¿Detsa nexata xuajitsia itsiata pajumecovënëtanapame mapanacuapijivi jamatabëcuenenavëxaniabiaya papecatsipaebilivaisije?

²¹ Bajarapamonae jumai tsabiabi: “Dioso pitabarata panenajamatabëcuene bijianaeyaniva, pëtsa pajayatame maxuaje. Pëtsa paxaneme maxuaje. Pëtsa papitame panecobeta maxuaje,” jai tsabiabi bajarapamonae.

²² Bajarapamonae xua itaveta itsamonae pejayatsiyaniva, pexaeyaniva ata, pepitsiyaniva ata, bajarapacuene daxita vereverecaena. Bajarapacuenia pitavetsicuene saya jivi pejamatabëcuenepijilivaisita itaveta.

²³ Pamonae bajarapacuenia pacaitavetapona, bepacatsita peyapëtaevi itajara. Tsipaji bajarapamonae jamatabëpacaitoroba panevajëtabiabinexa ângelevijavabelia. Bajarapamonae pacaitorobanua beveliajamatabëcuenevi panenataenexa. Pacaitavetanua panijacuata panenatojitsipaecuene paneexanaeyaniva. Bajarapamonae papecaitavetsicuene pajumecovënëtanapone atamë tsipae, itsiata apo pacajamatabëcueneyavenonae tsipae papecavecuajibiaexanaenexa papibisijamatabëcuene paxainame panejamatabëthëtota.

3

¹ Cristo petëpaecujinae Dioso icatsia itsa asaëyaexanatsi, paxamë ata Cristo bepepecayajavaasaëyaexanaevi, Dioso pacatane. Bajaraxuata athëbëpijicuene pajamatabënajinavanapare, Dioso pijanacuapijicuene. Athëbëtatsia Cristo eca Dioso pemuxuneneta, pecujanenia, penajuaevtsinexabeje daxitacuene.

² Pasivanajamatabëxainabiabare ëathëbëpijicuene. Pëtsa pasivanajamatabëxainabiabame mapanacuapijicueneje.

³ Cristo itsa tēpa, paxamë ata Cristo bepaneyajavatēpaevi, Dioso pacatane. Aeconoxae baja paxamë Cristo papecayajavaponaponeajava, itsamonae apo tae. Apo yapëtaenua. Pacuenia Cristo Dioso yajavaponapona, bajara pijinia pacuenia paxamë ata Dioso payajavajinavanapame.

⁴ Cristo baja cajena nacayajavaponapona. Vaxaitsi ata pijinia Cristo yajavajinavanapatsi. Pamatacabi Cristo icatsia athëbëvetsica patsianica, paxamë ata paxainaeneme panenivenaecotia Cristo papijajivixaemë.

Pacuenia Dioso pejumecovënëtsivi perujujamatabëcuenemi baja copata pejanajamatabëcuene pexainaenexa yabara pelivaisi

⁵ Mapacuenia pajamatabëjumaitsimëre tsavanapaeje: “Tajaperujujamatabëcuenemi baja copatajë. Nexata baja apo jitsipanenë icatsia taxinaejava perujujamatabëcuene, mapanacuapijijamatabëcueneje. Apo

jitsipaenē baja itsapetiriva tajaitsijava tajavavecua. Apo jitsipaenē baja piauracuene ata taexanaponaejava. Apo jitsipaenē baja pibisiacuene ata tanajamatabēxainaejava. Apo jitsipaenē baja pibisijamatabēcuene ata tajitsipaejava. Apo jitsipaenē baja ayaijava taxainaejava tanaxainaeyabinexa. Daxita baja bajarapajamatabēcuenemi copatajē. Nexata baja matavējēa apo jitsipaenē bajarapajamatabēcuene taxainaejava,” pajamatabējamēre tsavanapae. Tspaji itsa pajitsipaejitsipame ayaijava panexainaejava panenaxainaeyabinexa, nexata pacopabijitsipame Dioso panejitsipaejavami. Tspaji Diosovecua bitso pajitsipaejitsipame mapanacuapijicueje. Nexata pajamatabēcuenejēpaejitsipame pamonaē vajēcabiaba jumapecataeya pexanaenēanējavabelia. Tspaji bajarapamonae Diosovecua jitsipa jumapecataeya pexanaenēanē.

6 Daxita pamonaē Dioso apo pejumecovēnētšivi, bajarapitsipibisiacuene pexanavanapaevi, Dioso ayaicuēnia naneconitsiaexanaenatsi.

7 Paxamē ata picani daxita bajarapitsicuene paexanavanapame Dioso panejumecovēnētšivajēnaeya.

8 Nexata baja aeconoxae pacopabare daxita mapajamatabēcueneje. Paneanaepanabiabijava itsamonaējavabelia, pacopabare. Pibisiacuene paneexanaenexa panenajamatabēxainabiabijava ata, pacopabare. Pibisiacuēnia itsamonaē panebaracuaicuajitsabiabijava ata, pacopabare. Itsa pacuaicuajiamē, pētša pacuaicuajiamē pibisialivaisi.

9 Pētša namataenetsia panatsipaebame penajumētšēnētšilivaisi. Perujumatabēcuene picani bajayata panexainaexae, bajarapacuenia paexanavanapame. Itsiata baja aeconoxae pacopabame bajarapaperujumatabēcuenemi.

10 Nexata baja pejanajamatabēcuene paxainavanapame. Panevajēnaeyabelia payapētaeponame paneexanavanapaenexa pexaniacuene. Dioso, ponē pacaexana, pacuenia jamatabēcueneitsi, bajara pijinia paxamē ata pajamatabēcueneitsimēre tsavanapae.

11 Daxita pamonaē Dioso pejumecovēnētšivi, pejanajamatabēcuene xaina. Nexata daxita Dioso pejumecovēnētšivi Dioso najēpaeya tane. Judiovi, apo judiovi ata, daxita bajarapamonae Dioso najēpaeya tane. Pamonaē peperabēcaucubivitsi, pamonaē ata apo peperabēcaucubivitsi, daxita bajarapamonae Dioso najēpaeya tane. Saicayanacuapijivi ata, pamonaē ata dajubicuenia canajetatsi itsamonaējavabelia amoneya petonacuenebavana-paenexa, pamonaē ata apo canajetsitsi itsamonaējavabelia amoneya petonacuenebavanapaenexa, daxita bajarapamonae Dioso najēpaeya tane. Tspaji bajarapamonae Cristo tsijamatabēcatsi peyajavajinavanapaenexa caejivi canacujitsia. Nexata bajarapamonae xaina baja pajamatabēcuene Dioso tane bitso penamatamotsicuene mapanacuataje.

12 Dioso bitso pacaasiva. Pacaitapetanua papijajivinexamē. Bajaraxuata paitaxutotsoniataeyabiabianame itsamonaē ata. Nexata ēpaxaniajamatabēcuēneta pajinavanapaename. Beveliajamatabēcuēnevi nataeya pajinavanapaename. Pajamatabēcuēnesaēmē tsavanapae tsane itsamonaē, bajayajebi pacaitsacueniababiabi ata.

13 Namataenetsia panajamatabēcuēneyavenonare bajayajebi ata. Itsa pacaitsacueniaba itsajivi, bajarapajivijavabelia pabarajamatabēcuēnexanepanare. Pacuenia paxamē ata Cristo pacabarajamatabēcuēnexanepana pibisiacuene paneexanaēvi ata, bajara pijinia pacuenia paxamē ata pabarajamatabēcuēnexanepanare itsamonaējavabelia.

14 Matavējēa mapacuenia paexanavanapareje. Namataenetsia

bitso panaasivamëre tsavanapae. Bajarapacuenia nexata najamatabëcuenejëpaeya pajinavanapaename.

15 Pavajëtabiabarë Diosojavabelia papecayavenonaenexa jamatabëcuenexanepanaeya panejinavanapaenexa. Bajarapacuenia panejinavanapaenexa, Dioso pacajunata caebitsaëto papecaexanaenexa Cristo yajava. Nexata Dioso itsa pacayavenona jamatabëcuenexanepanaeya panejinavanapaenexa, pajumaitsimë tsabiabi tsane Diosojavabelia. "Xanepana rabaja. Tsipaji bitso pexaniacuene panetoexaname," pajamë tsabiabi tsane Diosojavabelia.

16 Pavajëtabiabarë Diosojavabelia Cristo pelivaisi itsamonae papecatsipaebijava papecajamatabëcueneenabiabinexa. Pavajëtabiabarënia Diosojavabelia xaniävaetsia Dioso panejamatabëcuenepätaenexa. Namataenetsia panatsipaebabiabarë Cristo pelivaisi. Namataenetsia panajamatabëcuene yävenonabiabarënia panejamatabëcuenesaënexa Cristo pelivaisi panejumecovënëtsijava. Daxita panejamatabëcuenevetsina pexaniajamatabëcuene rajutsiaya Diosojavabelia panaxëanabiabarë vaji. Palivaisianë ata rubena Salmosbaxutota, panaxëanabiabarë. Pavajianë ata rubena vajibaxutonëta, panaxëanabiabarë. Pavajianë ata Espiritu Santo pejamatabëcueneta pacanaxëanaeyaexana, panaxëanabiabarë.

17 Daxita xua paexanavanapame, paexanavanapare vajatuxanenë Jesucristo pejitsipaecuenia. Palivaisianë ata pacuaicuajamë tsabiabi, pacuaicuajamë tsane vajatuxanenë Jesucristo pejitsipaecuenia. Pexaniajamatabëcuene itsa parajutabiabianame vajatuxanenë Jesucristo paxa Diosojavabelia, Dioso papecayavenonabiabixae, Jesucristo pevënëta pexaniajamatabëcuene parajutabiabianame.

Pacuenia Pablo Dioso pejumecovënëtsivi muxujioba yabara pelivaisi

18 Paxamë papetirivimë, pajumecovënëtabiabarë pacuenia pacaitoroba paneamonajivi. Tsipaji bajarapacuenia vajatuxanenë pacatojitsipa paneexanavanapaenexa.

19 Paxamë pijinia papebijivimë, pasivamëre panijavajivi. Pëtsa anaeyacuena paitorobabiabame panijavajivi.

20 Paxamë pijinia papeximë, daxita xua paneaxajivi, paneenajivi ata, pacaitoroba paneexanaenexa, pajumecovënëtabiabarë. Tsipaji bajarapacuenia vajatuxanenë sivabarëya.

21 Paxamë pijinia panexi panexinaevi, pëtsa panexi anaeya paitorobabiabame papecajumecovënëtabiabinexa xua paitorobame. Tsipaji saya belia panexi jamatabëcuenefaefaenajitsipa Dioso pejumecovënëtsijava.

22 Paxamë pijinia itsamonae papijajivimë, dajubicuenia papecacanajetsivi itsamonae amoneya panetonacuenebavanapaenexa. Pacuenia panijatuxanevi pacaitoroba, bajarapacuenia patonacuenebabiabarë panijatuxanevi. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panijatuxanevi panetonacuenebijava yabara. Biji rajane daxitamatacabi asaëyata xaniävaetsia patonacuenebabiabarë. Panejamatabëcuenevetsina cuenejitsipaeya panijatuxanevi patonacuenebabiabarë papecasivabarëyanexa vajatuxanenë.

23 Daxita xua panijatuxanevi patonacuenebabiabame, jamatabëcuenebarëyaya patonacuenebabiabarë panijatuxanevi. Xua panijatuxanevi patonacuenebabiabame, bajaraxua yabara pajamatabëjumaitsimëre tsabiabi mapacueniaje: "Xua tajatuxanenë tonacuenebajë, bajaraxua taniji Cristonexa betatonacuenebijava. Apo ëtajatuxanenëna," pajamatabëjamëre tsabiabi.

²⁴ Payapëtaneme rabaja mapacueneye. Vajatuxanenë pacarajutsiana pacuene pijajivi toxaina perajutsinexa, baitsi matacabi apo pevereverecaejava. Patonacuenebavanapame baja cajena Cristonexa. Bajara jane ponë pepacuenepanijatuxanenë.

²⁵ Panejumecovënere pacuenia pacaitorobatsi. Tshipaji pajivi pibisiacuene exana, bajarapajivi itsamatacabi Dioso naneconitsiaexanaenatsi pibisiacuene pexanaeconi yabara. Pamatacabi Dioso daxitajivi naneconitsiaexanaena, paneconivajëto caejivi canacujitsia xainapona, bajarapaneconivajëtota Dioso naneconitsiaexanaena caejivi canacujitsia. Nexata it-sajivi ata apo vecuapanepae tsane Dioso jivi penaneconitsiaexanaecuene.

4

¹ Paxamë papetuxanevimë, xaniavaetsia paevere panijajivi, papecatonacuenebabiabivi. Panajamatabënapitabiabare paxamë ata panijatuxanenë athëbëtatsia peecaejava.

² Daxita Dioso panejumecovënëtsivi icatsia pacatoyaquinatsi mapacueniaje. Diosojavabelia pavajëtabiabare ajamatabëcueneitatsacaya pajamatabëcuenemajitsinejevamë. Itsa pavajëtabiabianame Diosojavabelia, Dioso papecayavenonabiabijava yabara, pajumaitsimë tsabiabi tsane mapacueniaje: "Xanepana rabaja. Tshipaji bitso pexaniacuene panetoexaname," pajamë tsabiabi tsane Diosojavabelia.

³ Itsa pavajëtabiabianame Diosojavabelia, paxanë ata panetovajëtabiabianame. Panetovajëtabiabianame Diosojavabelia Dioso pataneyavenonaenexa nacuanë pevetsivi patanitavetsiyaniva jivi patatsipaebaponaejava Cristo pelivaisi. Pajitsipajë jivi patatsipaebinexa pacuenia Jesucristo patsica mapanacuayabetsicaje vajanacasivatëpaenexa pibisiacuene vajaexanaeconi yabara. Bajarapalivaisi jivi tatsipaebaponaexae, nenaneconitsiaexana. Nexata abaxë naneconitsiaya ponaponajë penaneconitsivi pejebabiabibota.

⁴ Cristo pelivaisi jivi itsa tsipaebabiabajë, jitsipajë jumenapebetsiaya tatsipaebabiabinexa. Nexata panetovajëtabiabianamenua Cristo pelivaisi jivi jumenapebetsiaya tatsipaebabiabinexa tanejumeyapëtaenexa xaniavaetsia.

⁵ Paepatota pacatoxanepana pexanialivaisi, Cristo pelivaisi, panetsipaebinexa itsamonaiejavabelia, patsipaebabiabare. Xaniavaetsianua patsitajinavanapare pamonaë Dioso apo pejumecovënëtsivi. Tshipaji rabaja imoxoyo pevajënaë Cristo icatsia pepatsijavanexatsica.

⁶ Daxita palivaisianë pacuaicuanetsipaebilivaisi. Panajamatabëcuenevererenua xaniavaetsia panejumecanaviatsinexa caejivi canacujitsia bajarapamonae itsa pacayanijobapona Dioso pejumelivaisi yabara.

Pacuenia Pablo toyaquina pecopatsinexa baja petoyaquinaelivaisi mapabaxutotaje yabara pelivaisi

⁷ Vajabanenë Tíquico, bitso vajaasivanë. Bajaraponë xaniavaetsia tonacuenebabiaba vajatuxanenë. Vajatuxanenë pijacuene patonajuanacuenebajëbeje. Bajaraponë pacatsipaebiana daxita pacuenia xanë ponaponajë.

⁸ Bajaraxuata bajaraponë pacaitorobaliatsi papecatsipaebinexa pacuenia pajinavanapajë. Bajaraponë nexata itsa pacatsipaebiana, nexata pane-sivaajamatabëcuenesaëmë tsane.

⁹ Bajaraponë paxamëjavabelia yajavaponaejitsia vajabananë Onésimo. Bajaraponë Onésimo panijatomarapijinë. Tonacuenebabiaba xaniavaetsia vatuxanenë. Bajaraponëbeje pacatsipaebiana daxita pacuenia Dioso pejumecovënëtsivi jinavanapa majotaje Roma tomarata.

¹⁰ Aristarrobeje naneconitsivi paponaponajëbeje penaneconitsivi pejebabiabibota. Aristarco ata pacabajacobalia. Marcos ata, Bernabé pejuyapijinë, pacabajacobalia. Paxamë rabaja payapëtaneme pacuenia paexanaejitsiamë. Nexata Marcos itsa patsialia paxamëjavabelia, pacopiapitsianame xaniavaetsia.

¹¹ Pacabajacobalia Jesús ata, ponë itsavënë, Justo. Judíovi picani ayaibitsaëto Jesucristo pelivaisi jumecovënëta. Itsiata bajarapamonaeyajuvënëvi, caenëbeje saya, neyavenona vatuxanenë pijacuene tatonacuenebijava. Neyavenona saya mapamatabëxëyoje. Aristarco, Marcos, Jesús. Bajara saya pamatabëxëyo neyavenona. Bajarapamona bitso neyavenona.

¹² Epafra ata, Cristo pijajivonë, panijatomarapijinë. Bajaraponë ata pacabajacobalia. Bajaraponë bitso pacatovajëtabiaba Diosojavabelia. Pacatovajëtabiaba ajamatabëcuenesaëya panejumecovënëtanapaenexa Dioso pejumelivaisi. Pacatovajëtabiabanua xaniavaetsia paneexanabiabinexa pacuene Dioso pacatojitsipa.

¹³ Pacatsipaebatsi baja cajena pacuenia Epafra pacatovajëtabiaba Diosojavabelia bitso papecajamatabënajinaexae. Bajara pijinia pacuenia bitso tovajëtabiaba Dioso pejumecovënëtsivi, pejinavanapaevi Laodicea tomarata. Bitso tovajëtabiabanua Hierápolis tomarata pejinavanapaevi ata.

¹⁴ Vajaasivanë Lucas, ponë jivi vaëbabiaba, bajaraponë ata pacabajacobalia. Demasvënëta ata pacabajacobalia.

¹⁵ Nebajacobi vajamona, daxita Dioso pejumecovënëtsivi, Laodicea tomarata pejinavanapaevi. Nebajacobi Ninfas ata. Pamonae ata nacaetutabiaba bajaraponë pijabota, nebajacobi.

¹⁶ Itsa baja paveretame panelebijava mapabaxutoje, patoitorobianame Laodicea tomarapijivijavabelia penalebixaxa bajarapamona ata. Bajarapamona ata tatoyaquinaebaxuto juya pacatoitorobiana panenalebixaxa paxamë ata.

¹⁷ Arquipojavabelia pajumaitsimë tsane mapacueniaje: “Dioso pecatocopsijava netonacuenebinexa, verere xaniavaetsia,” pajamë tsane.

¹⁸ Xanë Pablonë, pacatoyaquinatsi baja cajena tacobeta mapalivaisiyoje patanebajacobinexamë. Pajamatabënajinavanapare penaneconitsivi pejebabiabibota taponaponaejava. Pacatovajëtabiabatsi Diosojavabelia papecayavenonabiabinexa Dioso. Bajara itsi tsane.

Mapabaxutoje San Pablo copiaya toyaquina Tesalónica tomarapijivijavabelia

Pacuenia Pablobana, Silvanobana, Timoteobana toyaquina mapabaxutoje Dioso pejumecovënëtsivijavabelia yabara pelivaisi

¹ Xanë, Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsi baja vaxa Diosojavabelia, vajatuxanenë Jesucristojavabelia ata. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

Pacuenia Tesalónica tomarapijivi Dioso pejumecovënëtsivi xaniavaetsia Dioso jumecovënëtsia jinavanapa yabara pelivaisi

² Itsa pavajëtabiabajë Diosojavabelia, pexaniajamatabëcuenë parajutabiabajë Diosojavabelia paxamë yabara. Pacatovajëtabiabatsi Diosojavabelia daxitamatacabi canacujitsia Dioso papecayavenonabiabinexa.

³ Itsa pacatovajëtabiabatsi vaxa Diosojavabelia, panajamatabënapitabiabajë Dioso pinijicuenia panetonacuenebavanapaejava panenajamatabëcuenecopatsixae Diosojavabelia. Panajamatabënapitabiabajënu bitso pinijicuenia panejitsipaejava Dioso. Paxamë rabaja pajamatabëcuenesaëmë tsavanapae panecopiaevetavanapaejava vajatuxanenë Jesucristo icatsia pepatsijavanexatsica.

⁴ Tajamonae, Dioso baja cajena pacaasiva. Payapëtaniji baja cajena Dioso papecaitapetsijava papijajivinexamë.

⁵ Bajayata itsa pacatsipaebatsi mapapexanialivaisije Diosojavabelia papecacapanepaelivaisinexa, saya patacuibovojotota apo pacatsipaebitsi. Jume baja cajena. Biji ra Espiritu Santo pesaë yajava pacatsipaebabiabatsi. Nexata baja payapëtaneme palivaisi pacatsipaebatsi, pexaniajailivaisicuenë. Payapëtanemenua pacuenia paxanë xaniavaetsia panajinavanapajë paxamëjavata patanitaxutua ajamatabëcuenesaënexamë.

⁶ Pacuenia paxanë pajinavanapajë, pacuenia Jesús ata ponapona, bajarapacuenia paxamë ata pajinavanapame. Barëyaya baja pajumecovënëtavanapame patacatsipaebilivaisi Espiritu Santo papecatsijamatabëccaexae. Bajarapacuenia barëyaya pajumecovënëtavanapame patacatsipaebilivaisi, itsamonae bitso pacabejiobiaexanabiabi ata.

⁷ Bajarapacuenia panejinavanapaejava daxita Dioso pejumecovënëtsivi, Macedonia nacuapijivi, Acaya nacuapijivi ata, itsa pacavënëlivaisitane, bajarapamonae ata yapëtane bajarapacuenia xaniavaetsia Dioso petojinavanapaenexa. Nexata bajarapamonae ata xaniavaetsia jinavanapa pacuenia paxamë pajinavanapame.

⁸ Itsiata ëMacedonia nacuapijivi, ëAcaya nacuapijivi ata, bajarapacuenia xaniavaetsia panejinavanapaejava, apo pacavënëlivaisitae. Tajë nacuapijivi ata pacavënëlivaisitane panenajamatabëcuenecopatsijava Diosojavabelia. Bajarapacuenia itsa pacavënëlivaisitane, bajarapamonae ata yapëtane baja Jesús pelivaisi pexaniajailivaisicuenë. Bajaraxuata paxanë apo pacavajunupaebitsi daxita bajarapamonaejavabelia. Tsipaji baja yapëtane.

⁹ Biji rajane bajarapamonae pijacuata panetsipaeba paxamë xaniavaetsia patanecopiapitsijavamë pamatacabi pancanasivaxainatsi. Paxamë

picani jumapecataeya pexanaenëanëjavabelia panavajëcabiabame. Itsiata baja aeconoxae pacopatame jumapecataeya pexanaenëanëjavabelia panenavajëcabiabijavami. Nexata baja pepo Diosojavabelia panajamatabëcuenecopatame. Patonacuenebavanapame pepo Dioso, ponë piasaëtsaponaponaenë daxitamatacabijavabelianexa. Bajarapacuenia paxamë yabara panetsipaeba baja cajena daxita bajarapamonae.

¹⁰ Bajarapamonae panetsipaebanua panecopiaevetavanapaejava Jesús, Dioso pexënato, athëbëvetsica icatsia pepatsijavanexatsica. Bajaraponë, Jesús, Dioso baja cajena asaëyaexanatsi petëpaecujinae. Jesús nacacapanepaena pibisiacuenë vajaexanaeneconi yabara Dioso vajanacananeconitsia exanaejavaminexavecua.

2

Pacuenia Pablo nacueneba Tesalónica tomarata yabara pelivaisi

¹ Tajamonae, apo panacueratsinë itsa pacasivaxainatsi. Bajarapacuenë paxamë panijacuata payapëtaneme.

² Paxamë baja cajena payapëtaneme mapacuenëje. Paxanëbeje Silasbeje patapatsivajënaejeje paxamëjavabelia, Filipos tomarata panenaneconitsiaexanabeje itsaneconi apo paxainae atanëbeje. Panebejiobiaexanabejenua bajarapamonae. Itsiata baitsi jane Dioso pataneyavenonaexaebjeje, ajumeurajibia pacatsipaebatsi pexanialivaisi Diosojavabelia papecacapanepaelivaisinexa. Pacatsipaebatsi bajarapalivaisi, patanitoyavi picani apo panetocopatsi ata patacatsipaebinexa.

³ Palivaisi pacatsipaebatsi, pexaniajailivaisi cajena. Apo penajumetsënëtsilivaisi. Apo pacatsipaebitsi bajarapalivaisita patacayamaxëitojorobinexa.

⁴ Biji ra Dioso paneitoroba. Panetocopatania jivi patatsipaebinexa pexanialivaisi pecapanepaelivaisinexatsi Diosojavabelia. Bajaraxuata bajarapalivaisi jivi itsa patsipaebaponajë, apo patsipaebaponaenë saya jivi patanebarëyataenexa bajarapalivaisi patatsipaebijava yabara. Biji ra bajarapalivaisi jivi patsipaebaponajë Dioso patanebarëyataenexa. Tsipaji Dioso vajanacajamatabëcueneyapëtaenë.

⁵ Paxamë baja cajena payapëtaneme mapacuenëje. Caeto ata paxanë itsalivaisi apo pacabarëcuaicuaijaitsi saya jema bajarapalivaisi yabara patanebarëyataenexamë. Yamaxëitojorobiaya livaisi apo pacatsipaebitsi palata patacavecuapitsinexa. Dioso baja cajena daxita bajarapacuenë panejamatabëcueneyapëtanë.

⁶ Cristo patanitorobixae, panejamatabëcuenecaëjëpa picani patacaitorobinexa pataneyaiyataenexamë. Itsiata baitsi jane caeto ata apo pacaitorobitsi pataneyaiyataenexamë. Apo paitorobinë itsamonae ata pataneyaiyataenexa.

⁷ Biji rajane pacuenia petiriva asivaya xaniavaetsia baevetaponapona pexi, bajara pijinia pacuenia paxanë ata asivaya xaniavaetsia pacaevetanapatsi.

⁸ Bitso pacaasivatsi. Nexata pacatsipaebatsi Dioso pejumelivaisi. Bitso patacaasivaxae, itsamonae jamatabëpanebejeyebabiabi ata, itsiata apo pacopsinë patacayavenonaponaeejava.

⁹ Tajamonae, panecuenecanaëjëre mapacuenëje. Pamatacabi paxamëjavata pajinavanapajë, pinijicuenia panacuenebabiabajë. Pinijicuenia panacuenebabiabajë patajacuata patanaevetsinexa. Pacatsipaebaponatsinua pexanialivaisi, palivaisi Dioso nacayapëtaeyaexana.

Paepatota pacuenesajinajë, panatonacuenebabiabajë maticabita, meravi ata. Bajarapacuenia panatonacuenebabiabajë itsanë ata paxamëyajuvënënë petoayapëbejeyanivatsi patanevetaponaejava.

10 Paxamë baja cajena paneyapëtaneme pacuenia pajinavanapajë. Dioso ata paneyapëtaneme. Paxamë baja cajena paneyapëtaneme paxanë pibisiacuene apo pataexanaevi. Paxamë baja cajena paneyapëtaneme paxanë bitso Dioso patajumecovënëtsivi. Paxamë baja cajena paneyapëtaneme paxanë itsacueneneconiyo ata apo paxainaenë, paneconi yabara pananeconitsijitsianë paxamëjavata itsa pacatsipaebavanapatsi Dioso pejumelivaisi.

11 Paxamë baja cajena paneyapëtaneme paxamë pacanëmë canacujitsia patacamuxujobaponaejava paneajamatabëcuenesaënexa Diosojavabelia. Pacuenia pexi pexainaenë nacoximuxujoba, bajara pijinia pacuenia paxanë ata pacamuxujobatsi.

12 Pacaitorobatsi baja cajena xaniavaetsia panetoinavanapaenexa Dioso papecabarëyataenexa. Dioso baja cajena pacajunata daxitacuene papecabarëevetsinexa pijapenivenivenaenacuataatsia.

13 Itsa pacatsipaebatsi Dioso pitorobilivaisi, panenamuxunaevetame. Nexata panejumecovënëtameme patacatsipaebilivaisi. “Xaniajai baja cajena. Dioso pejumelivaisi nacatsipaeba,” panejamatabëjaixae, panejumecovënëtameme. Apo pajumetaemë saya bejivitonë pejamatabëcueneta pepaebilivaisi. Xaniajai cajena. Dioso pejumelivaisi pacatsipaebaponatsi. Bajarapalivaisi panejumecovënëtsixae, panevajënaeyabelia paexanavanapame pacuenia Dioso pacaitoroba. Bajaraxuata paxamë yabara pexaniajamatabëcuene parajutabiabajë Diosojavabelia.

14 Tajamonae, pacuenia Judea nacuata Dioso pejumecovënëtsivi bejiobiaexanatsi pijanacuapijivi, judíovi, bajara pijinia pacuenia pacabejiobiaexana panijanacuapijivi.

15 Pacuenia bajarapajudíovi pijasalinaivimi bajayata beyaxuabapona Diosojumepaebivimi profetavi, bajara icatsia pacuenia bajarapamonaemi pemomoxi beyaxuaba pepo petuxanenë Jesús. Nexata Jesús papijajivixanë, paxanë ata bajarapamona panecapitsapa judíovi penacaetuatabiabibovecua. Dioso apo pejitsipaecuene bajarapajudíovi exanapona. Bajarapajudíovi daxitajivi bitso itoya.

16 Paxanë pexanialivaisi itsa patsipaebabiabajë apo judíovijavabelia, apo judíovi ata pecapanepaenexatsi Diosojavabelia, nexata bajarapajudíovi panejumeitavetabiaba. Bajarapacuenia pananejumeitavetabiabixae, pibisiacuene pexanaeneconi pematatsënëa ayaineconi natsixaina Diosojavabelia. Nexata baja aeconoxae bajarapamonaecocopiapatatsi ayaicuenia Dioso penaneconitsiaexanaematacabinexatsi.

Pacuenia picani icatsia Pablo jamatabëtane Tesalónica tomarapijivi yabara pelivaisi

17 Tajamonae, patacavecuaponaecujinae, caematacabibeje apo pacatae atatsi, itsiata pacajamatabënjinavanapatsi. Bitso picani icatsia jamatabëpaponajë paxamëjavabelia patacataenexa.

18 Jamatabëpaponajë picani paxamëjavabelia. Xanë Pablonë, jamatabëponabiabajë picani. Itsiata dovathi apo panecopatsi.

19 Vajatuxanenë Jesucristo icatsia itsa patsianica, pacavajunupaebianatsi bajaraponëjavabelia xaniavaetsia Dioso panejumecovënëtsijava. Bitso pacasivajamatabëcuenebarëya tsanetsi.

20 Paxamë yabara baja cajena pexaniajamatabëcuene parajutabiabajë Diosojavabelia. Pacasivajamatabëcuene barëyatsinua tsabiabi.

3

1 Bajajajebi baja cajena apo pacataetsi. Nexata baja belia apo panajamatabëcuene saëtaponaejitsipaenë matavëjêa pataevetaponaejava patacataenexa. Nexata baja panajamatabëxainajêbeje ëTimoteo paitatorobinexabeje, peponaenexa paxamëjavabelia papecataenexa. Paxanêbeje Silvanobeje, Atenas tomarata panacopatsianajêbeje.

2 Nexata baja pacatoitorobatsibeje vajabananë Timoteo. Timoteobeje baja cajena Dioso patatonajuanacuenebinêbeje, jivi patatsipaebaponaenexabeje pexanialivaisi, Cristo pelivaisi. Pacatoitorobatsibeje Timoteo papecayavenonaenexa, papecajamatabëcuene asaëyaexanaenexa Dioso panejumecovënëtsijava yabara.

3 Pacatoitorobatsibeje Timoteo papecayavenonaeya tsipaebabiabinexa pexanialivaisi, caenë ata paxamëyajuvënënë Dioso pejumelivaisi pejumecovënëtsijava pecopabijaniva, itsamonae itsa bejiobiaexanaponatsi. Paxamë baja cajena payapëtaneme Dioso vajanacatocopatsijava itsamonae vajanacabejiobiaexanaponaenexa.

4 Pamatacabi abaxë pacayajavajinavanapatsi, tajëvelia baja cajena pacatsipaebabiabatsi itsamonae papecabejiobiaexanaponaejavanexa Dioso papijajivixaemë. Nexata jane baja bajarapacuene aconoxae pacatocopiapata.

5 Bajaraxuata baja apo najamatabëcuene saëtaponaejitsipaenë matavëjêa taevetaponaejava patacataenexa. Nexata baja itorobajê Timoteo peponaenexa paxamëjavabelia papecataenexa pacuenia pajumecovënëtavanapame Dioso pitorobilivaisi. Xanë picani paxamë yabara jamatabëjumaitsinë: "Dovathi meta bajarapamonae jamatabëcuenejëtatsi. Othopaica meta baja. Nacueratajê meta baja bajarapamonaejavata pexanialivaisi tatsipaebabiabijava," jamatabëjanë picani paxamë yabara.

6 Timoteo nexata itsa parena paxamëjavaverena, Tesalónica tomaraverena, panetsipaebabeje pexanialivaisi. Xaniavaetsia pina Dioso pajumecovënëtavanapame. Paxamë pina pasivamë tsavanapae itsamonae ata. Panejamatabëxainavanapame pina pexaniajamatabëcuenia. Bitso pina jamatabëpanetaneme picani pacuenia paxanë ata jamatabëpacatanetsi picani.

7 Tajamonae, panetocopiapata rajane baja pibisiacuenia itsamonae patanebejiobiaexanaponaenexa. Itsiata baitsi jane panajamatabëcuenesaëtavanapajê paxamë yabara. Panajamatabëcuenesaëtajê itsa pacavënëlivaisitanetsi asaëya Dioso panejumecovënëtsijava.

8 Itsa pacavënëlivaisitanetsi asaëya Dioso panejumecovënëtsijava, nexata pacasivanajamatabëcuenesaëtatsi.

9 Nexata pexaniajamatabëcuene parajutajê Diosojavabelia paxamë yabara. Pexaniajamatabëcuene parajutajê Diosojavabelia bitso patacasivajamatabëcuenebarëyaxae Dioso pitabarata.

10 Matacabita, meravi ata, daxita patajamatabëëthëtovetsina pavajëtabiabajê Diosojavabelia patanetocopatsinexa icatsia pataponaenexa paxamëjavabelia patacataenexa. Pacatovajëtabiabatsinua Dioso papecayapëtaeyaexanaenexa palivaisi abaxë pacatosaiça xaniavaetsia panejumecovënëtsinexa Dioso pejumelivaisi.

11 Pavajëtajê vaxa Diosojavabelia, vajatuxanenë Jesucristojavabelia ata, pataneyavenonaenexa pataponaenexa paxamëjavabelia.

12 Pacuenia paxanë pacaasivatsi tsavanapae, bajarapacuenia paxamë ata caejivi canacujitsia panevajënaeyabelia namataenetsia panenasivanexa, pacatovajëtatsi Diosojavabelia papecayavenonaenexa. Pacatovajëtatsi Dioso papecayavenonaenexa itsamonae ata paneasivanexa.

13 Pacatovajētatsi Dioso papecajamatabēcuene asaēyaexanaenexa, jamatabēcuenexanepanaeya panejinavanapaenexa. Nexata paneconijibimē tsane. Paneconijibimē tsane Dioso pitabarata panenubenaejavata, pamatacabi vajatuxanenē Jesús, daxita pijajivi yajava, patsianica.

4

Pacuenia Dioso pitabarata xaniavaetsia bejinavanapatsi Dioso vajanacativajamatabēcuenebarēyanexa yabara pelivaisi

¹ Tajamonae, nexata pinijicuenia pacamuxujiobatsi. Vajatuxanenē Jesús pejamatabēcueneta pacaitorobatsi xaniavaetsia panejinavanapaenexa. Pacatsipaebatsi rabaja cajena pacuenia pajinavanapaejitsiamē Dioso papecasivajamatabēcuenebarēyanexa. Bajarapacuenia panevajēnaeyabelia xaniavaetsia pajinavanapare daxitamatacabijavabelianexa.

² Payapētanemenua baja cajena palivaisi vajatuxanenē Jesús pejamatabēcueneta pacaitorobatsi panejumecovēnētsinexa.

³ Dioso raja jitsipa xaniavaetsia panetojinavanapaenexa ēponēnexa. Dioso raja pacatojitsipa panecopabinexa pibisiacuene panevitota paneexanaejava.

⁴ Dioso raja pacatojitsipa pacaenēmē canacujitsia paneyapētaenexa macueneje. Petiriva itsa papitame panijavanexa, xaniavaetsia paevere. Payaiyataemanua.

⁵ Pētsa petiriva papitame pibisiacuene saya panevitota paneexanaenexa bajarapovajavabelia pacuenia Dioso apo pejumecovēnētsivi baexana.

⁶ Dioso cajena apo jitsipae itsanē ata pevitota pibisiacuene pexanaenexa itsanē pijavajavabelia. Vajatuxanenē cajena pinijicuenia naneconitsiaexanaena daxita pamonae exana bajarapacuene. Bajarapacuene yabara imata baja cajena pacatsipaebatsi pamatacabi abaxē pajinavanapajē paxamējavata.

⁷ Dioso baja cajena nacajunata ēpexaniacuene vajaexanavanapaenexa. Dioso apo nacajunatsi pibisiacuene vajaexanavanapaenexa.

⁸ Itsamonae apo panejumecovēnētsi patatsipaebilivaisi. Bajarapamonae itsa apo panejumecovēnētsi paxanē, apo jumecovēnētsi Dioso, ponē nacarajuta Espīritu Santo.

⁹ Paxamē rabaja namataenetsia panaasivamē tsavanapae itsamonae Dioso pejumecovēnētsivijavabelia. Dioso baja cajena pacayapētaeyaexana bajarapacuenia panenasivanexa. Bajaraxuata apo namatavenonaenē baja patacatoyaquinaenexa patacayapētaeyaexanaenexa bajarapacuene. Tsipaji baja payapētaneme.

¹⁰ Xaniajai rabaja. Pasivamē tsavanapae daxita vajamonae, Macedonia nacujava pejinavanapaevi. Itsiata icatsia pacaitorobatsi namataenetsia bitsoyo orijibia panenasivanexa.

¹¹ Pacuenia baja cajena copiaya pacaitorobatsi, bajarapacuenia jamatabēcuenexanepanaeya pajinavanapare. Ēpanijacuene saya paexanare panejamatabēitonotsiyaniva itsamonaejavabelia. Panijacuata panatonacuenebare bajarapacuenia panenaevetavanapaenexa.

¹² Bajarapacuenia nexata Dioso apo pejumecovēnētsivi pacayaiyataena. Nexata apo pacatosaicae tsane itsacuenejavayo ata panenamatavenonaejava.

Pacuenia pepo petuxanenē Jesús icatsia patsijitsatsica yabara pelivaisi

13 Tajamonae, pacatojitsipatsi xaniavaetsia paneyapëtaenexa pacuenia itsamatacabi itsijitsia Dioso pepua pejumecovënëtsivi petëpaevi. Pacatsipaebatsi baja cajena bitso panenajamatabëxainaeayaniva itsa pacavecuatëpa itsajiviyo. Pacatsipaebatsi baja cajena bitso panenajamatabëxainaeayaniva, pacuenia bitso banajamatabëxaina Dioso apo pejumecovënëtsivi itsa vecuatëpatsi itsajiviyo. Bajarapamonae jamatabëcuenenavëxaniabiaya bajumaitsi: “Petëpaevi rabaja peponaxuabi,” bajai Dioso apo pejumecovënëtsivi.

14 Vaxaitsi baja cajena jumecovënëtatsi Jesús vajanacasivatëpaejava. Jesús vajanacasivatëpaeujinae, Dioso icatsia asaëyaexanatsi petëpaejavavecu. Dioso icatsia itsamatacabi asaëyaexanaena daxita pamona Dioso pepua pejumecovënëtsivi petëpaevimi. Bajarapalivaisi vaxaitsi baja jumecovënëtatsi.

15 Palivaisi pepo petuxanenë Jesús netsipaeba, bajarapalivaisi pacatsipaebijitsiatsi. Vaxaitsi abaxë mapanacuata vajaasaëtsavanapaevi pamatacabi pepo petuxanenë Jesús icatsia patsianica. Vaxaitsi athëbëabetsia apo namataxainaeitsia tsane. Petëpaevimi rajane copiaya namataxainaeenia.

16 Angelevi penamatacaitorobinë vavajai tsaxuabi tsane. Dioso pijatrompeta najumetsiana. Pepo petuxanenë jane baja pijacuata patsianica athëbëvetsica. Nexata pamonaë Cristo pepua pejumecovënëtsivi tëpa, bajarapamonae asaëyaexanaenatsi petëpaejavamivecu.

17 Bajaraxuacujinae vaxaitsi, abaxë mapanacuata vajaasaëtsavanapaevi bajarapamatacabita, itarërëbotatsia nacacaetuatsiania petëpaevimi yajava. Caxitajarabianatsi jane baja athëbëtatsia pepo petuxanenë Jesús. Nexata jane baja daxitamatacabijavabelianexa yajavajinavanapaenatsi bajaraponë.

18 Bajaraxuata panajamatabëcuenesaëtvapanapare mapalivaisitaje.

5

1 Tajamonae, itsiata apo panamatavenonaenë patacatoyaquinaenexa patacayapëtaeayaexanaenexa pamatacabita, paepatota ata, copiapatsijitsia daxita bajarapacuene.

2 Payapëtaneme baja cajena pepo petuxanenë Jesús icatsia pepatsijavanexatsica. Paepatota apo vajënaevetsitsi, jemata patsianica. Pacuenia penacobetoxotsinënexa meravi bapata itsajota apo jamatabënajinaetsi, bajarapacuenia jemata patsianica pepo petuxanenë Jesús.

3 Pamatacabita jivi jumai tsaponae tsane: “Daxitanacuanëjava baja cajena xanepana. Daxitajivi xaniavaetsia jinavanapa,” jai tsane, bajarapaepatota jemata tocopiaatsianatsi Dioso apo pejumecovënëtsivi peverebiabinexatsi. Nexata acuenebi tsane Dioso apo pejumecovënëtsivi pevecuarëcëpecaenexa bajarapacuene. Pacuenia petiriva, penacoxitsiva, itsa vixaenotatsi penacueto pevecuanexanaenexatsi, acuenebi pevecuanajetabajiravijava bajarapavixae, bajara pijinia itsane pamonaë Dioso apo pejumecovënëtsivi.

4 Tajamonae, paxamë baja apo pajamatabëcueneitaquirimë. Pacuenia Dioso apo pejumecovënëtsivi ajamatabëcueneitaquiri, bajarapacuenia apo pajamatabëcueneitaquirimë. Pepo petuxanenë Jesús pepatsimatacabinexatsica pacopiaevetavanapame. Nexata pamatacabi pepo petuxanenë patsianica, apo pajamatabëcuenenabenajacaemë tsane. Pacuenia penacobetoxotsinë itsa pata, basivajamatabëcuenenabenajacatsi, apo paitsimë tsane.

5 Tsipaji baja daxita paxamë pexanialivaisita pacajamatabëcueneitayota. Nexata baja daxita vaxaitsi pitaquirijamatabëcuene apo xainaeitsi.

6 Bajaraxuata nexata vaxaitsi apo bejamatabëcuenemajitsitsi. Pacuenia Dioso apo pejumecovënëtsivi jamatabëcueneitsi, bajara apo

bejamatabëcueneitsitsi. Biji rajane jamatabëcueneaitavaya bejinavanapatsi. Nayajivitaeya bejinavanapatsinua pibisiacuene vajaexanaeyaniva.

7 Pamonaë jamatabëcueneaitaquiri, jamatabëcuenemajitabiaba. Aitajibi tsabi-abinua meravi.

8 Itsiata baitsi jane vaxaitsi baja pexanialivaisita nacajamatabëcueneitayota. Nexata nayajivitaeya jinavanapatsi pibisiacuene vajaexanaeyaniva. Najamatabëcuenecopatatsi baja ëDiosojavabelia. Asivatsi tsavanapae Dioso. Itsamonae ata asivatsi tsavanapae. Copiaevetavanapatsi Cristo vajanacacapanepaenexa Diosojavabelia. Bajarapacuenia itsa copiaevetavanapatsi Cristo vajanacacapanepaenexa Diosojavabelia, nexata dovathi pejamatabëcuenevecua nayajivinajamatabëcuenexatatsi Dioso pejumelivaisita. Nexata pacuenia vajabitsaënë nayajivinaxatata piatajajava, namataxatatana piatajajava pejorojoronaeyanivatsi pijavajabitsaënë, baja vaxaitsi ata itsitsi dovathi vajanacayamaxëitorobiyaniva.

9 Dioso apo nacaitapetsi vajanacananeconitsiaexanaenexa pibisiacuene vajaexanaeconi yabara. Biji rajane Dioso nacaitapeta vajanacacapanepaenexa pibisiacuene vajaexanaeconivecua pepo petuxanenë Jesucristo pejamatabëcueneta.

10 Jesucristo baja cajena nacasivatëpa vajanacayajavaponaponaenexa vajaasaëtsavanapaevi mapanacuataje. Vajatëpaecujinae ata, Dioso pijanacuatatsia Cristo nacayajavaponaponaena.

11 Bajaraxuata pacuenia baja namataenetsia panajamatabëcueneasaëya exanaponaë, bajarapacuenia panevajënaeyabelia tsiteca paexanavanapare.

Pacuenia Pablo Dioso pejumecovënëtsivi muxujioba yabara pelivaisi

12 Tajamonae, pinijicuenia pacamuxujiobatsi paneyaiyataenexa pamonaë paxamë tuatuajëta Dioso tonacuenebavanapa. Bajarapamonae Dioso pitorobicueniatsi pacaevetavanapa. Pacamuxujiobabiabanua.

13 Payaiyataema bajarapamonae. Asivaya pataema. Tspaji bajarapamonae xaniavaetsia Dioso tonacuenebavanapa. Jamatabëcuenexanepanaeya panajuajinavanapare.

14 Pacaitorobatsinua panemuxujiobinexa pamonaë piafaetabivi. Pamonaë pijinia jamatabëcuenecuerana itsamonae bepejiobiaexanaponaeaxaetsi Dioso pejumecovënëtsijava yabara, pajamatabëcueneasaëyaexanare. Payavenonare pamonaë jamatabëcuenefaefaena Dioso pejumelivaisivecua. Itsa pamuxujiobianame bajarapamonae, itsa pamuxujiobianamenua itsamonaejavabelia ata, ajamatabëcueneasaëya pamuxujiobianame bajayajebi pacopatsinejevamë.

15 Pëtsa bajarapamonaejavabelia pibisiacuene panamatamoexaname, copiaya pibisiacuene pacaexanae ata. Biji pajamatabënajinavanapare pexaniacuene namataenetsia panenatoexanaponaenexa. Pajamatabënajinavanapare daxitajivijavabelia ata pexaniacuene panetoexanaenexa.

16 Daxitamatacabi pajamatabëcuenebarëyamëre tsavanapae.

17 Daxitamatacabi Diosojavabelia pavajëtabiabarë pacopatsinejevamë.

18 Daxita pacuene apo panejitsipacuene ata, Dioso itsa pacatocopata pacatocopiapatsinexa, nexata itsa pacatocopiapata bajarapacuene, itsiata pexaniajamatabëcuene parajutabianame Diosojavabelia bajarapacuene yabara. Bajarapacuenia paneexanavanaponaenexa, Dioso pacatojitsipa Jesucristo papijajivixaemë.

¹⁹ Espíritu Santo itsa pacajamatabëcueneitoroba itsacuenejavayo paneexanaenexa, pëtsa pajamatabëjumaitsimë: “Apo exanaenë tsane bajarapacuenia,” pajamatabëjamë pëtsa.

²⁰ Pëtsa panamuxjematame Espíritu Santo peyajavacuaicuaijaivi, Dioso pejumelivaisianë pepaebivi.

²¹ Nexata pacuenia bajarapamonae pacaitoroba panejumecovënëtsinexa, copiaya pajaire Dioso pejumelivaisibaxutota paneyapëtaenexa. Nexata xani-ajai bajarapacuenia Dioso pejumelivaisibaxutota itsa jumaitsi, bajarapacuenia paexanare.

²² Daxita xua pibisiacuene, panayajivitaema.

²³ Dioso baja cajena vajanacajamatabëcuenexaniavaetsinë. Bajaraponë pibisiacuene paneexanaeconimi pacavecuajibiaexanaena. Dioso evetsiana panejamatabëcuene, paneperabëto ata, pibisiacuene paneexanaeyaniva. Bajarapacuenia Dioso pacaevetsiana matapania vajatuxanenë Jesucristo icatsia pepatsimatacabitsicajavabelianexa.

²⁴ Bajarapacuenia Dioso pacaevetsiana, ponë pacajunata papexinexamë. Dioso cajena pacatoexanaena daxita pacuenia najumecapanepaeya pacajumaitsi.

*Pacuenia Pablo jamatabënajina Tesalónica tomarapijivi, pacuenia ata to-
vajëta Dioso peyavenonaenexatsi, yabara pelivaisi*

²⁵ Tajamonae, Diosojavabelia panetovajëtabiabile.

²⁶ Asivaya nebajacobiana daxita bajarajotalia Dioso pejumecovënëtsivi.

²⁷ Pacaitorobatsi Dioso pejamatabëcueneta. Patsimuxulebianame mapabaxutoje daxita Dioso pejumecovënëtsivi pejumetaenexa.

²⁸ Pacatovajëtabiabatsi Diosojavabelia vajatuxanenë Jesucristo papeyavenonabiabinexa.

Mapabaxutoje San Pablo cotocaevi toyaquina Tesalónica tomarapijivijavabelia

Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecovēnētsivijavabelia yabara pelivaisi

¹ Xanē Pablonē, Silvano, Timoteo, mapamatabēxēyoje pacatoyaquinatsi mapabaxutoje. Pacatoyaquinatsi Dioso panejumecovēnētsivi, paTesalónica tomarapijivimē. Panenajamatabēcuenecopatsivi baja vaxa Diosojavabelia, vajatuxanenē Jesucristojavabelia ata.

² Pacatovajētatsi vaxa Diosojavabelia, vajatuxanenē Jesucristojavabelia ata, papecaitaxutotsoniataenexa jamatabēcuenexanepanaeya panejinavana-paenexa.

Pacuenia Dioso naneconitsiaexanaena pibisiacuenē pexanaevi pamatacabi Cristo icatsia patsianica yabara pelivaisi

³ Tajamonae, panevajēnaeyabelia bitso orijibia panajamatabēcuenecopataponame Diosojavabelia. Pacaenēmē canacujitsia namataenetsia panaasivamēnua tsavanapae. Bajaraxuata daxitamatacabi paxamē yabara pajumaitsinē tsane Diosojavabelia: “Xanepana rabaja. Pexaniacuenia yavenonaponame Tesalónica tomarapijivi,” pajanē tsane.

⁴ Diosojavabelia pajamatabēcuenesaēmē tsaponae itsamonae pinijicuenia pacabijataeyabiabi ata, pacabejiobiaexanabiabi atanua. Bajaraxuata paxanē barēyaya pacavēnēlivaisipaebaponatsi itsatomaranējava, Dioso pejumecovēnētsivijava.

⁵ Bajarapacuenia pacabejiobiaexanabiabi ata, Diosojavabelia paneajamatabēcuenesaē tsaponaexae, nayapētane Dioso papecajamatabēcueneyavenonaejavanexa pamatacabi naneconitsiaexanaena pijaneconi pexinaevi. Bajarapamatacabi Dioso papecasivajamatabēcuenēbarēyaxae, pacatocopatsiana panejonenexa Dioso pijanacuayabetsia Dioso papecaevetsinexa.

⁶ Dioso baja cajena najamatabēcuenevereta pacuenia exanaejitsia. Nexata juya Dioso bejiobiaexanaena pamonaē pacabejiobiaexanapona maparucaejē.

⁷ Paxamē abaxē pacabejiobiaexanaponaena pacuenia paxanē ata panebejiobiaexanapona. Itsiata Dioso nacayavenonaena bajarapacuenēveveua. Bajarapacuenia Dioso nacayavenonaena pamatacabi pepo petuxanenē Jesús icatsia patsianica piasaēāngelevi yajava, pitarunutsicotia ata yajava.

⁸ Jesús jane baja patsianica penaneconitsiaexanaenexa pamonaē apo yapētae Dioso. Pamonaē ata apo jumecovēnētsi pepo petuxanenē Jesucristo pelivaisi, Jesús naneconitsiaexanaena.

⁹ Bajarapamonae pijaneconi yabara Jesús naneconitsiaexanaenatsi daxitamatacabijavabelianexa. Dioso pitabaraveua tajē xuabianatsi. Bajarapamonae Dioso pijapenivenivenaecotia apo tae tsane caeto ata.

¹⁰ Pamatacabi vajatuxanenē icatsia patsianica, pinijicuenia pijajivi yaiyataenatsi. Pinijicuenia sivajamatabēcuenē nabenajacaenatsi daxita Jesús pejumecovēnētsivitsi. Bajarapacuenia tocopiaatsianatsi pamatacabi patsianica vajatuxanenē. Paxamē ata Jesús pijajivi payajavamē tsane patanejumecovēnētsixaemē patacatsipaebilivaisi.

¹¹ Bajaraxuata pacatovajëtabiabatsi Diosojavabelia. Pacatovajëtabiabatsi vajaDiosojavabelia papecajamatabëcuene xaniavaetsinexa. Pacuenia bejamatabëcueneitsi Dioso pijajivi, bajara panejamatabëcueneitsinexa. Pacatovajëtabiabatsinua Diosojavabelia pecaëjëpaejamatabëcuenetatsi papecajamatabëcueneayavenonaenexa, paneexanaenexa daxita pacuenia pajamatabëexanaponame. Pacatovajëtabiabatsinua Diosojavabelia papecaayavenonaponaeenexa daxita pacuene paexaname Jesucristo papijajivixaemë.

¹² Nexata paxamë xaniavaetsia panejinavanapaejamatabëcueneta, vajatuxanenë Jesucristo daxitajivi yayataenatsi. Paxamë ata juya Dioso pacayayataeyaexanaena daxitajivi. Bajarapacuenia pacayayataeyaexanaena papecaitaxutotsoniataexae vajaDioso, vajatuxanenë Jesucristo ata.

2

Pibisiacuene bitso pexanabiabinë yabara pelivaisi

¹ Tajamonae, pacatsipaebatsi baja cajena paneyapëtaenexa pacuenia vajatuxanenë Jesucristo patsijitsiatsica. Pacatsipaebatsinua baja cajena pacuenia ata nacacaetuatsijitsia bajaraponëjavabelia pamatacabi patsianica.

² Nexata pajivi najumetsënëtsiaya pacajumai tsane: “Espíritu Santo raja neyapëtaeyaexana. Jesucristo rabaja patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pepacuene rabaja Jesucristo patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pabloana raja nacatoyaquina: ‘Jesucristo rabaja patsica,’ jai raja vajanacatoyaquinaebaxutota,” pacajai tsane, pëtsa pajumecovënëtame. Itsamonae najumetsënëtsia itsa pacatsipaeba Jesús pepatsijavatsica yabara, pëtsa panajamatabëcueneepatajërërëcame panejumecovënëtavanapae livaisivecua. Pëtsa pajamatabëcuenenabenajacamenua.

³ Pëtsa pajumecovënëtame pematatsënëa itsalivaisicuenia itsa pacatsipaeba Jesucristo pepatsijavatsica yabara. Jesucristo raja abaxë apo patsitsica tsane. Peneta raja itsa baja imoxoyo pevajënae tsane Jesucristo pepatsinexatsica, jivi ayaibitsaëtonë Dioso pejumelivaisi pejumecovënëtsijava copabiana. Bajara pijinia pamatacabi patsiana ponë bitso pibisiacuene pexanabiabinënexa. Bajaraponë itsamatacabi Dioso xuabiana isotuabelia, bitso bejiobiaya peponaponaeenexa daxitamatacabijavabelianexa.

⁴ Bajaraponë cueneitoya tsane Dioso pijacuene. Pamonaen ata vajëcabiaba bedioso petaevijavabelia, itavetsiana pevajëcabiabianiva. Dioso pijatemplobota ata belia ecaena bediosonë jivi petaenexatsi. Bajaraponë jumai tsane: “Xanë rajane baja diosonënë,” jai tsane. Bajarapacuenia jivi ayaibitsaëto bajaraponë yamaxëitojorobiana.

⁵ Pamatacabi abaxë paxamëjavata naponaponajë, tajëvelia baja cajena pacatsipaebabiabatsi bajarapalivaisi. ¿Panacofënëtame tsabaja bajarapalivaisi?

⁶ Payapëtaneme baja cajena pacuenia abaxë Dioso yacaranata pibisiacuene bitso pexanabiabinënexa pepatsiyaniva. Dioso petocaëjëtsimatacabita bajaraponë patsiana.

⁷ Mapamatacabita ataje jivi pibisiacuene pexanaejava navitapona pevajënaeyabelia. Itsiata abaxë apo patsi ponë bitso pibisiacuene pexanabiabinënexa. Matapania pamatacabi Dioso copatsiana pecaranatsijava bajaraponë pepatsiyaniva, patsiana jane baja pibisiacuene bitso pexanabiabinexa.

⁸ Bajarapamatacabi bajaraponë patsiana bitso pibisiacuene pexanabinexa. Nexata pepo petuxanenë Jesús pijumalisaëta bajaraponëmi beyaxuabiana. Pamatacabi Jesús patsianica, bajaraponëmi Jesús verevere-caeyaexanaena pijapenivenivenaecotiata.

⁹ Bajaraponë patsiana dovathi pejamatabëcueneta pibisiacuene bitso pexanabinexa. Nexata bajaraponë dovathi pesaëta piniñicuene pexanaejava exanaponaena jivi peyamaxëitojorobinexa, beayajamatabëcuenenë petanexatsi.

¹⁰ Bajaraponë exanaena daxita xua pibisiacuene, jivi peyamaxëitojorobinexa. Nexata bajaraponë pejamatabëcueneta Diosovecua jivi naxuabiana. Jivi Diosovecua naxuabiana tsipaji apo jitsipae pejumecovënëtsinexa pexaniajailivaisi pecapanepaelivaisinexatsi Diosojavabelia.

¹¹ Bajaraxuata Dioso tocopatsiana bajaraponë penajumetsënëtsilivaisi pet-sipaebinexatsi peyamaxëitojorobinexatsi. Nexata bajarapamonae jumecovënëtsiana ëpenajumetsënëtsilivaisi.

¹² Bajaraxuata nexata daxita bajarapamonae Dioso naneconitsiaexanaenatsi. Tsipaji apo jumecovënëtsi tsane pexaniajailivaisi. Caranata saya sivabarëya tsabiabi tsane ëpibisiacuene pexanaejava.

Pacuenia Dioso pijajivi itapeta pecapanepanexa yabara pelivaisi

¹³ Tajamonae Dioso papecaasivavi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papecacapanepanexa. Dioso baja cajena pacacapanepaena. Espiritu Santo pesaëta pacajamatabëcuenexaniavaetsiana panejumecovënëtsixae pexaniajailivaisi, Jesús pelivaisi. Bajaraxuata paxamë yabara pajumaitsinë tsabiabi Diosojavabelia: “Xanepana rabaja. Pexaniacuene exaname. Tsipaji tajëvelia itapetame Tesalónica tomarapijivi pecajumecovënëtsinexa. Nexata baja cajumecovënëta,” pajanë tsabiabi.

¹⁴ Dioso paneitoroba patacatsipaebinexa pexanialivaisi papecapanepaelivaisinexa Diosojavabelia. Nexata baja pajumecovënëtame bajarapalivaisi. Bajarapacuenia Dioso pacajunata panepatsinexa vajatuxanenë Jesucristojavabetsia, papecayajavaponaponaenexa.

¹⁵ Tajamonae, bajaraxuata panevajënaeyabelia pacaasaëmëre tsavanapae panejumecovënëtsijava Dioso. Pajumecovënëtavanapare patacatsipaebilivaisi. Palivaisi ata patacatoyaquinatsi panejumecovënëtsinexa, pëtsa panacofënëtame.

¹⁶ Vajatuxanenë Jesucristo, vaxa Dioso ata, nacaasiva. Bajaraponëbeje nacaitaxutotsoniatane. Bajaraxuata nacajamatabëcueneasaëyaexanapona daxitamatacabijavabelianexa. Nacatocopatanua vajacopiaevetavana-paenexa pepo petuxanenë Jesucristo icatsia pepatsijavanexatsica.

¹⁷ Nexata pacatovajëtatsi vajatuxanenë Jesucristojavabelia, vaxa Diosojavabelia ata, papecajamatabëcuene asaëyaexanaenexa. Pacatovajëtatsinua jivi panetsipaebinexa pexanialivaisi. Pacatovajëtatsinua paneexanaenexa daxita xua pexaniacuene.

3

Pacuenia Pablo toyaquina Dioso pejumecovënëtsivi: “Panetovajëre Diosojavabelia,” pejailivaisi yabara pelivaisi

¹ Tajamonae, pecopiarucaelivaisi rabaja maje pacatoyaquinatsije. Pane-tovajère Diosojavabelia Dioso pejumelivaisi bepíjia peyacaéjèpaenexa daxi-tanacuajava. Patovajèrenua daxitajivi pejumecovènètsinexa Dioso pejume-livaisi pacuenia baja paxamè pajumecovènètame bajarapalivaisi. Pato-vajèrenua daxitajivi peyaiyataenexa Dioso pejumelivaisi.

² Panetovajèrenua Dioso patanevetsinexa pibisiajamatabècuenevivecua. Ba-jarapacuenia panetovajère tsipaji raja daxitajivi Dioso apo jumecovènètsi.

³ Itsiata baitsi jane vajatuxanenè nacayavenonabiaba. Bajaraponè paca-jamatabècueneasaèyaexanaena. Pacaevetsiananua dovathivecua.

⁴ Paxamè yabara baja cajena pajamatabèjumaitsinè: “Bajarapamonae va-jatuxanenè yavenonaenatsi. Nexata xaniavaetsia exanavanapaena daxita pacuenia itorobatsi. Pevajènaeyabelia xaniavaetsia exanavanapaena pacue-nia itorobatsi,” pajamatabèjanè baja cajena paxamè yabara.

⁵ Diosojavabelia pacatovajètatsi xaniavaetsia paneyapètaenexa Dioso papecaasivajava. Pacatovajètatsinua panevajènaeyabelia paneajamatabècuenesaè tsavanapaenexa Cristo papecajamatabècuene yavenonabiabinexa.

Pacuenia daxitajivi benacueneba penaevetsinexa yabara pelivaisi

⁶ Tajamonae, vajatuxanenè Jesucristo pejamatabècueneta pacaitorobatsi. Dioso pejumecovènètsivi ata itsa piafaetabivi, bajarapamonae panavecuat-sare. Bajarapamonae apo nacuenebabiabi penaevetsinexa pacuenia picani paitorobajè.

⁷ Payapètaneme rabaja pacuenia paxanè paexanavanapajè pamatacabi panajinavanapajè paxamèjavata. Nexata pacuenia pacatsitajinavanapatsi, bajarapacuenia bepajinavanapame. Pamatacabi abaxè panajinavanapajè paxamèjavata, apo pafaetabinè tsavanapae.

⁸ Amoneya baja cajena itsajivi ata apo pavecuaenè itsacuenejavayo ata. Biji rajane panatonacuenebabiabajè pinijicuenia. Matababita, meravi ata, panatonacuenebabiabajè patanaevetsinexa. Bajarapacuenia pana-tonacuenebabiabajè itsajivi ata paxamèyajuvènèvi petoayapèbejeyanivatsi patanevetsijava patanajinavanapaejavata.

⁹ Paxamèjavata pexanialivaisi patacatsipaebavanapaexae, vajatuxanenè picani panetocopata patacavajètsinexa xua panamatavenonajè patanera-jutsinexamè. Itsiata baitsi jane apo pacavajètsitsi. Pacatsitanacuenebabi-abatsi baja cajena. Bajarapacuenia paxamè ata panatonacuenebabiabare panenaevetsinexa.

¹⁰ Pamatacabi abaxè panajinavanapajè paxamèjavata, pacajumaitsitsi baja cajena: “Pajivi afaetabi, pètsa naxane,” pacajaitsi baja cajena.

¹¹ Pavènèlivaisitaniji pacuenia itsamonae paxamèyajuvènèvi saya jina-vanapa nacuenebinejeva. Bajarapamonae pina bitso jamatabèitonotabiaba itsamonae.

¹² Bajarapamonaejavabelia pajumaitsimè tsane: “Pablo raja vajatuxa-nenè Jesucristo pejamatabècueneta jumaitsi: ‘Panacuenebianame pina pa-nenaevetsinexa,’ jai raja Pablo,” pajamè tsane.

¹³ Tajamonae, pètsa pajamatabècuenequeraname pexaniacuene paneexana-vanapaejava.

¹⁴ Pajivi apo nacuenebi tsane penaevetsinexa, apo jumecovènètsinua tsane palivaisi pacatoyaquinatsi mapabaxutotaje, bajarapajivi panavecuatsare. Pètsa payajavajinavanapame. Nexata aura tsane apo penacuenebijava yabara.

¹⁵ Itsiata baitsi jane bajarapajivi bepanijavajabitsaëjivi pëtsa pataneme. Dioso panenajuajumecovënëtsivixae, pexaniajamatabëcuenia pamuxujio-bianame.

Pacuenia Pablo toyaquina peveretsinexa baja petoyaquinaelivaisi mapabaxutotaje yabara pelivaisi

¹⁶ Vajatuxanenë vajanacajamatabëcuene xanepanaeyaexanaenë. Pacatovajëtatsi bajaraponëjavabelia daxitamatacabi papecajamatabëcuene xanepanaeyaexanaenexa, itsamonae pacaitsacueniababiabi ata. Pacatovajëtatsi vajatuxanenë papecajajavaponaponabiabinexa.

¹⁷ Xanë Pablonë, tacobeta pacatoyaquinatsi mapalivaisiyoje patacajamatabënajinaexae. Paitanecuenia yaquinabiabajë daxita tayaquinaebaxutonëta, bajarapaitanecuenia pacatoyaquinatsi mapalivaisiyoje paneyapëtaenexa xanë patacatoitorobicuene mapabaxutoje.

¹⁸ Pacatovajëtabiabatsi Diosojavabelia daxita paxamë vajatuxanenë Jesu-cristo papecajavenonabiabinexa.

Mapabaxutoje San Pablo copiaya toyaquina Timoteojavabelia

Pacuenia Pablo mapabaxutoje toyaquina Timoteojavabelia yabara pelivaisi

¹ Xanë Pablonë, Jesucristo pijaapóstolenënë. Dioso, ponë nacacapanepaejitsia, bajaraponë nitoroba pijacuene tatonacuenebinexa. Vajatuxanenë Jesucristo, ponë pejamatabëcueneta Dioso nacacapanepaejitsia, bajaraponë ata nitoroba pijacuene tatonacuenebinexa.

² Timoteo, bepepo taxënatomë tacataenë, Jesucristo pelivaisi xamë ata nejumecovënëtsixae. Catoyequinatsi mapabaxutoje. Catovajëtatsi vaxa Diosojavabelia, vajatuxanenë Jesucristojavabelia ata, pecayavenonaenexabeje pecaasivaxaabeje. Catovajëtatsinua bajaraponëbeje pecaitaxutotsoniataenexabeje pecajamatabëcuene xanepanaeyaexanaenexabejenua.

Pacuenia Pablo itoroba Timoteo pejumeitavetsinexa penajumetsënëtsilivaisi petsipaebaponaevi yabara pelivaisi

³ Pamatacabi baja ponajë Macedonia nacuyabelia, capuenetatsi neponaponaenexa Efeso tomarata. Nexata icatsia matavëjêa caitorobatsi tsiteca abaxë neponaponaenexa bajarajota. Tsipaji itsamonae bajarajota tsipaebavanapa saicayacuenia Dioso pejumelivaisivecua. Palivaisi tsipaebavanapa bajarapamonae, apo pexaniajailivaisi cajena. Jumeitavetsianame bajarapamonae matavëjêa baja petsipaebaponaeyaniva bajarapalivaisi.

⁴ Itavetsianamenua bajarapamonae penajamatabëxainabiabiyanima saya jemalivaisixi, perujulivaisiximi. Itavetsianamenua pijasalinaivimi pevënëxi yabara ata penajamatabëxainabiabiyanima. Bajarapitsilivaisixi ajumemata-mobi baja cajena itsa nabarëcuaicuaijai tsaponae jivi. Bajarapalivaisixi apo nacajamatabëcuene yavenonae tsipae pacuenia Dioso nacaitoroba jumecovënëtsiya vajatoexanaenexa.

⁵ Bajarapacuenia caitorobatsi nejumeitavetsinexa bajarapamonae pecopatsinexa bajarapalivaisi pecuaicuaijait sabiabijava. Nexata juya pexanaenexa pacuenia Dioso jitsipa. Dioso cajena jitsipa jivi pejamatabëëthëtovetsina jamatabëcuenexanepanaeya namataenetsia penaasivatsavanapaejava. Dioso jitsipanua jivi pejinavanapaenexa aneconijibia Dioso pitabarata. Dioso jitsipanua jivi pejamatabëëthëtovetsina xaniavaetsia pejumecovënëtavapanapenexa Dioso pejumelivaisi.

⁶ Bajarapamonae pacuenia Dioso jitsipa apo pexanavanapaexae, Dioso pejitsipaejavami vecuanajamatabëcuenemuxufeta. Nexata jamatabëcuenenaxuaba natsiquejemalivaisixi pecuaicuaijait sabiabinxaxa.

⁷ Bajarapamonae picani jamatabënaexana jivi livaisi petsipaebabiabivinxaxa. Palivaisi Dioso Moiséspijinëta najumecopata, bajarapalivaisi picani jivi asaëya jamatabëtsipaebapona. Itsiata baitsi jane bajarapamonae apo jumeyapëtae pajamatabëcuenelivaisi xaina bajarapalivaisi.

⁸ Vaxaitsi baja cajena yapëtanetsi pexanepanaecuenelivaisi Dioso Moiséspijinëta najumecopata. Bajarapalivaisi Dioso nacatocopata vajatsipaebinxaxa jivijavabelia, jivi peyapëtaenexa penaneconitsicuenelivaisi Diosojavabelia.

⁹ Pamonae pexaniacuene exanavanapa, apo toyaquinabiabitsi pitavetsilivaisinexatsi. Biji rajane pamonae pibisiacuene exanavanapa, toyaquinabiabatsi pitavetsilivaisinexatsi. Pamonae ata apo yayiatae itsacuenejavayo ata Dioso pijacuene, toyaquinabiabatsi pitavetsilivaisinexatsi. Pamonae ata najamatabëcuenebijiana Dioso pijacuenevecua, toyaquinabiabatsi pitavetsilivaisinexatsi. Pamonae ata jivivevi, paxa ata, pena ata, pebeyaxuabivi, toyaquinabiabatsi pitavetsilivaisinexatsi.

¹⁰ Pamonae ata pijavajivi vecuanamatayajita itsavajavabelia, toyaquinabiabatsi pitavetsilivaisinexatsi. Pamonae ata pevëna pebijavabelia pevitota pibisiacuene exana, toyaquinabiabatsi pitavetsilivaisinexatsi. Bajara pijinia pacuenia petiriavi ata. Pamonae pamonajivi vecuanamatayajita itsanëjavabelia, toyaquinabiabatsi pitavetsilivaisinexatsi. Pamonae ata pevëna petiriavijavabelia pevitota pibisiacuene exana, toyaquinabiabatsi pitavetsilivaisinexatsi. Pamonae ata jivi nacobetoxotsiaya pita, toyaquinabiabatsi pitavetsilivaisinexatsi. Pamonae ata najumetsënëta, toyaquinabiabatsi pitavetsilivaisinexatsi. Pamonae ata itsamonae yabara najumetsënëtsiaya baracuaicuajai tsabiabi, toyaquinabiabatsi pitavetsilivaisinexatsi. Pamonae ata apo jitsipae pexaniajailivaisi jivi petsipaebaponaenexa, toyaquinabiabatsi pitavetsilivaisinexatsi.

¹¹ Bajarapalivaisicuenia xanë ata itavetaponajë itsa tsipaebaponajë palivaisi Dioso netocopata jivi tatsipaebaponaenexa. Bajarapalivaisi itsa tsipaebaponajë, tsipaebaponajë daxitajivi peyapëtaenexa pacuenia Dioso itaxutotsoniatanetsi pecapanepaenexatsi.

Pacuenia Pablo pexaniajamatabëcuene rajuta Jesucristojavabelia yabara pelivaisi

¹² Pexaniajamatabëcuene rajutajë vajatuxanenë Jesucristojavabelia tanerajutsixae pesaë tatonacuenebinexa. Jesucristo nesivanajamatabëxaina xaniavaetsia tatonacuenebinexa. Bajaraxuata pexaniajamatabëcuene rajutajë.

¹³ Copiata abaxë itsa apo jumecovënëtsinë Jesucristo, pibisiacuenia picani baracuaicuajianë tsabiabi Jesucristo. Pijajivi ata tobarajinabiabajë tabejiobiaexanaenexa. Pibisiacuenia bijataeyabiabajë Jesucristo pijajivi. Bajarapacuenia taexanabiabinë ata, Dioso itsiata nebejiobiatane. Tsipaji jamatabëcuenenavëxaniabiaya bajarapacuenia exanabiabajë. Apo yapëtaenë picani xua exanaponajë Jesucristojavabelia. Tsipaji abaxë apo jumecovënëtsinë Jesucristo Dioso pexënatocuene.

¹⁴ Nexata baja itsiata belia vajatuxanenë Jesucristo pinijicuenia neyavenona tanajamatabëcuenecopatsinexa bajaraponëjavabelia. Bajaraxuacujinae pijajivitonëxanë, neyavenona tasivanexa itsamonae ata.

¹⁵ Mapalivaisije pacatsipaebijitsiatsi. Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta mapalivaisije. Jesucristo baja cajena patsica mapanacuayabetsicaje pibisiacuene pexanaevimi pecapanepaenexa Diosojavabelia. Xanë ata picani bitso pibisiacuene taexanaenëmi daxitajivi matatoxenetsia.

¹⁶ Xanë itsiata bajara taitsinëmi ata, Dioso itsiata nebejiobiatane. Bajarapacuenia Dioso nebejiobiatane daxitajivi peyapëtaenexa Jesucristo bajajajebi tanesivaajamatabëcuenesaëjava tajumecovënëtsinexa, pibisiacuene taexanaenëmi ata. Nexata pamonae bexëjavabelia ata Jesucristojavabelia najamatabëcuenecopataponaena, xainaena matababi apo pevevereverecejaya. Bajarapamonae nesivaajamatabëcuenesaë tsane itsa nevënëlivaisitaena Jesús taneitapetsijava pijajivitonëxanë, pibisiacuene bitso taexanabiabinëmi ata.

¹⁷ Bajaraxuata vaxaitsi pepo Dioso, daxitacuene peyapëtaenëjavabelia, jumaitsi tsabiabi: “Xamë Diosomë bitso ayaijatabëcuenenëmë. Bitso ayaiacuene nexanaenë,” jaitsi tsabiabi. Bajaraponë Dioso daxitacuene peyapëtaenë. Pepo pevetsinënuu daxitacuene. Apo petëpaenënexanua daxitamatacabijavabelianexa. Apo petaenëtsinua itsajivi ata.

¹⁸ Timoteo, betaxënatomë tacataenë. Pacuenia caitorobatsi, exanaename. Bajayata baja cajena itsamonae Dioso pejumecovënëtsivi Dioso pejamatabëcueneta tajëvelia cavajunupaeba pacuenia exanaejitsiamë. Bajarapacuenia Dioso asaëyata tocanacuenebaponare mapalivaisije. Nexata bajarapacuenia Dioso pitorobilivaisi daxitajivi yapëtaena. Catoayapëbeje ata dovathi pecajamatabëcueneëjëtsixae, ajamatabëcuenesaëmëre Diosojavabelia nenajamatabëcueneocopatsijava. Exanabiabare xua yapëtaneme pexaniajacuene nenajamatabëcuenebijianaeyaniva Diosovecua.

¹⁹ Itsamonae baja yapëtae ata pacuenia Dioso itorobatsi, itsiata pibisiacuene exana. Nexata bajarapamonae Diosovecua naxuabiana pecopabixae Cristo pejumecovënëtsijavami.

²⁰ Bajarapamonaeyajuvënënëbeje Himeneobeje Alejandrobeje. Pibisiacuena Dioso baracuaicuajibeje tsabiabi. Nexata pecopatsinexabeje Dioso pebaracuaicuajijavabeje, bajaraponëbeje copatajë dovathijavabelia. Nexata bexëa itsa najamatabëxainabeje pexanialivaisi, xaniavaetsia jane baja Dioso pejumecovënëtsinexabeje.

2

Pacuenia Dioso pejumecovënëtsivi daxitajivi betovajëta Diosojavabelia yabara pelivaisi

¹ Timoteo, copiaya caitorobatsi mapacueniaje. Caitorobatsi panetovajëtabianexa daxitajivi Diosojavabelia. Daxitajivi Diosojavabelia patovajëtabianame pitaxutotsoniaenexatsi Dioso. Itsa baja Dioso itaxutotsoniaenatsi bajarapamonae, nexata pexaniajatabëcuene parajutsianame Diosojavabelia bajarapamonae yabara.

² Patovajëtsianamenua Diosojavabelia presidentevi ata. Patovajëtsianamenua daxita gobierno pijalivaisi pevetsivi ata. Bajarapacuenia patovajëtsianame bajarapamonae Dioso peyavenonaenexatsi. Nexata xaniavaetsia jinavanapaenatsi avajabitsaëjibia. Nexata xaniavaetsia Dioso jumecovënëtavanapaenatsi. Nexata exanavanapaenatsi ëpexaniacuene.

³ Bajarapacuenia Diosojavabelia daxita bajarapamonae vajatovajëtsijava, xanepana Dioso, ponë nacacapanepaejitsia, vajanacasivabarëyanexa.

⁴ Bajarapacuenia daxitajivi vajatovajëtsijava Dioso jitsipa. Tsipaji Dioso jitsipa daxitajivi pecapanepaenexa bajaraponëjavabelia. Dioso tojitsipanua daxitajivi peyapëtaenexa pexaniajailivaisi, Jesucristo pelivaisi.

⁵ Nexata daxitajivi itsa yapëtaena pexaniajailivaisi, Jesucristo pelivaisi, yapëtaenanua pacuenia caenë Dioso daxitajivi capanepaejitsia. Yapëtaenanua pacuenia pijinia caenë Jesucristo daxitajivi petocuaicuajainënexa Diosojavabelia.

⁶ Jesucristo rabaja nacopata pebeyaxuabinexatsi. Nexata Jesucristo petëpaejavata, daxitajivi pijaneconimi matamota. Bajarapacuenia daxitajivi peyapëtaenexa, Dioso pecaëjëtsimatacabita pijajivi itoroba daxitanacuanëjava pexaniajailivaisi jivi pitsipaebinexa. Tsipaji baja cajena Dioso jitsipa daxitajivi pecapanepaenexa.

⁷ Bajarapalivaisi jivi tatsipaebinexa Dioso nitoroba. Dioso nitoroba bajarapalivaisi tatsipaebinexa pamonaë apo judiovi ata

penajamatabëcuenecopatsinexa Diosojavabelia. Nexata pexaniajailivaisi jivi tatsipaebijava, itsa canavajunupaebatsi, xaniajanë cajena. Cristo najumecovënëtsinëxae, pexaniajailivaisi jivi tsipaebaponajë. Apo tajumetsënëtsinë cajena.

⁸ Bajaraxuata daxitanacuanëjava pebijivi, pamonaë baja Dioso pitabarata aneconijibi, itsa vajëta Diosojavabelia, jitsipajë nacobeyotsiaya pevajëtsijava Diosojavabelia. Bajarapamonaë bevajëta Diosojavabelia anaepanaenejeva itsajivivojavabelia, jumeanaenotsinejevanua itsajivivojavabelia.

⁹ Jitsipajë pijinia petiriavi penaxatabinexa xanepanaeya. Pëtsa bitso naitabëtsiaya naxataba. Itsa naxaniavaeta, bitso pëtsa namataitabëta pexaniacuenia. Pëtsa bitso naitabëta oronanitota pexanaejavanëta. Pëtsa naitabëta penamatamotsiviriaibotoxita ata. Pëtsa naitabëtsiaya naxataba bitso penamatamotsinavanë ata.

¹⁰ Petiriavi, pamonaë baja xaniavaetsia najamatabëcuenecopata Diosojavabelia, pëtsa naitabëta bitso. Bajarapamonaë Dioso pitabarata pexaniacuenie betoexanabiaba itsamonaëjavabelia penajamatabëcueneitabëtsinexa bënënejavaverena.

¹¹ Dioso pejumecovënëtsivi itsa nacaetuata Dioso pejumelivaisi penamuxunaevetsinexa, petiriavi beveliajamatabëcuenevi nataeya ajumejibia benamuxunaevetena pejumecovënëtsinexa palivaisi tsipaebatsi.

¹² Petiriavi apo tocopatsinë pemuxujobinexa pebijivi. Apo tocopatsinënuu petiriavi beayajamatabëcuenevi nataeya pitorobabiabinexa pebijivi. Biji rajane petiriavi beveliajamatabëcuenevi nataeya ajumejibia benamuxunaevetena.

¹³ Bajarapacuenia itorobajë tsipaji copiaya Dioso exana pebi. Bajaraponë pevënë Adán. Bajaraxuacujinae cotocaevi Dioso exana petiriva. Bajarapova pevënë Eva.

¹⁴ Adán cajena picani dovathi apo yamaxëitojorobitsi. Biji rajane copiaya petiriva dovathi yamaxëitojorobatsi. Nexata petiriva copiaya pibisiacuene exana.

¹⁵ Bajaraxuata daxita petiriavi Dioso tocopatatsi pevixaeitonotsinexatsi penacueto itsa vecuanaexanatsi. Itsiata baitsi jane bajarapamonaë capanepaenatsi Diosojavabelia itsa casaë tsane penajamatabëcuenecopatsijava Diosojavabelia. Capanepaenatsi Diosojavabelia daxitajivi ata asivaya itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojitsipatsi.

3

Pacuenia ancianovinexa bejamatabëcueneitsi yabara pelivaisi

¹ Pexaniajailivaisi cajena maje. Ponë jitsipa pitapetsinexatsi ancianonënexa, Dioso pejumecovënëtsivi pevetsinënexa, bajaraponë pexaniacuene, Dioso pijacuene, jamatabëtonacueneba.

² Ancianonënexa, xanepana ponë apo xainae itsacueneneconi ata, paneconi yabara itsamonaë neconitsijitsiatsi. Caevayo pepitsinë. Penajamatabëcueneruviabinë. Xaniavaetsia penajamatabëxainanë. Peyaiyataenëtsi. Xaniavaetsia pecopiapitabiabinë pijaboyaberena pesivaxainaveitsi. Pecaëjëpaenëtsi xaniavaetsia jivi Dioso pejumelivaisi pëtsipaëbinexa.

³ Ancianonënexa, xanepana ponë apo piapaenë piatajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya palata pevécuanacobetoxotsinexa. Biji rajane ancianonënexa xanepana ponë

pexaniajamatabēcuenenē. Anaeya itsajivi ata apo pejumepitsinē pebarēnajumeanaenotsinexa. Bitso pexainaenexa ata pexinaejava, apo penajamatabēxainaenē.

⁴ Ancianonēnexa, xanepana ponē xaniavaetsia eveta pexi, pijava yajava. Pexi pejumecovēnētsinētsi. Pejumejayataenētsinua.

⁵ Ponē apo caējēpaetsi xaniavaetsia pexi pevetsinexa, pijava yajava, nexata bajaraponē apo caējēpae tsipaetsi pevetsinexa Dioso pejumecovēnētsivi.

⁶ Apo xanepanae tsipae ancianonēnexa ponē abaxē ajena jumecovēnēta Dioso. Beayaijamatabēcuenenē itajara nataejitsipa bajaraponē. Nexata epatua Diosovecua jopaejitsipa. Bajarapacuenia bajayata dovathi penajamatabēxainaenē, Dioso vecuajopaica. Nexata dovathi daxitamatacabijavabelianexa naneconita Diosojavabelia.

⁷ Ancianonēnexa, xanepana ponē peyayataenētsi pamonaē Dioso apo pejumecovēnētsivi ata. Bajarapitsinē xanepana ancianonēnexa ancianonē pexanaecujinaetsi jivi pequenetsiataeyanivatsi, dovathi ata peyamaxēitojorobiyανivatsi.

Pacuenia diáconovinexa bejamatabēcuenētsi yabara pelivaisi

⁸ Diáconovinexa pijinia, xanepana pamonaē penajamatabēcuenereviabivi. Itaxutojema apo pecuaicuaijaiivi. Apo piapaevi piaitajibinexa. Apo pejitsipaeivi itsajivi ata yamaxēitojorobiaya palata pevecuanacobetoxotsinexa.

⁹ Diáconovinexa, xanepana pamonaē xaniavaetsia najamatabēcuenecopata Cristojavabelia. Pejamatabēēthētota peyapētaevi pexaniajaicue ne palivaisi jumecovēnēta.

¹⁰ Pamonaē diáconovinexa, copiaya bitorobatsi itsacueneyavayo pevetsinexa bajarapacuenia pejamatabēcuenējētsinexatsi. Nexata xaniavaetsia itsa eveta xua evetsiaexanatsi, diáconovi jane baja hexanatsi. Nexata jane baja bitorobatsi penacuenebinexa xua diáconovi banacueneba.

¹¹ Diáconovi pijinia pijavajivi xanepana penajamatabēcuenereviabinexa, apo bebarcuaiicuajaii itsamonaē. Xaniavaetsia benajamatabēxaina. Nexata xaniavaetsia hexanabiaba pacuenia itorobatsi.

¹² Diácononēnexa, xanepana ponē caeva pepitsinē. Pecaējēpaenētsinua xaniavaetsia pevetsinexa pexi, pijava yajava.

¹³ Diáconovi xaniavaetsia itsa eveta penacuenebijava, nexata diáconovi xaniavaetsia yayataenatsi daxitajivi. Ajumeurajibianua jivijavabelia navajunupaebiana Jesucristojavabelia penajamatabēcuenecopatsijava.

Pacuenia Timoteo toyaquinatsi peyapētaenexa pacuenia exanaponaponaējitsia Dioso pejumecovēnētsivi tuatujēta yabara pelivaisi

¹⁴ Timoteo, bepijia picani jamatabēponajē xamējavabelia tacataenexa. Itsiata tavajēnaeyabelia catoyaquinatsi mapacuene yabarajē.

¹⁵ Nexata abaxē itsa cuenajematsianajē tapatsijava xamējavabelia, neyapētaenexa pacuenia exanaponaponaējitsiamē Dioso pejumecovēnētsivi tuatujēta. Pamonaē baja Dioso pejumecovēnētsivi, Dioso rabaja piasaēnē pijajivi. Bajarapamonaē Dioso pejumelivaisi, pexaniajailivaisi, xaniavaetsia baja jumecovēnētavanapa. Daxita nacuanēpijivi ata pejumecovēnētsinexa bajarapalivaisi. Bajarapamonaē pexaniajailivaisi itsamonaējavabelia tsipaeapona. Bajarapamonaē apo tocopatsinua itsajivi ata pexaniajailivaisivecua saicayalivaisi pejumecovēnētsiyaniva.

¹⁶ Pepo pexaniajailivaisi cajena Cristo pelivaisi. Bajaraponē baja vaxaitsi jumecovēnētavanapatsi. Itsiata baitsi jane itsamonaē apo jamatabēcueneyapētae bajaraponē. Bajaraponē Cristo ayaijamatabēcuenenē bitso:

Bajaraponë Cristo mapanacuata naexana bevaxaitsi jivitonëcuenia. Espiritu Santo pejamatabëcueneta daxitajivi yapëtaeyaexanatsi Cristo planeconijibinëcuene. Angelevi ata Cristo tanetsi. Cristo pijajivi vënëlivaisipaebaponatsi daxitanacuanëpijivijava. Nexata daxitanacuanëpijivi najamatabëcuenecopabapona Cristojavabelia. Dioso pijanacuatatsia ata Cristo copiapitatsi.

4

Dioso pejumelivaisi pejumecovënëtsijava pecopabivi yabara pelivaisi

¹ Espiritu Santo baja cajena tajëvelia nacayapëtaeyaexana pacuenia bexëajavabelia itsamonae copabijitsia Dioso pejumelivaisi pejumecovënëtsijavami. Bajarapamonae nexata jumecovënëtsiana penajumetsënëtsilivaisi petsipaebaponaevitsi. Nexata bajarapamonae asaëya jumecovënëtaponaena itsamonae dovathi pejamatabëcueneta petsipaebilivaisitsi.

² Bajarapamonae namuxunaevetsiana penajumetsënëtsilivaisi petsipaebaponaevitsi, betsitapexaniajamatabëcuenevitsi itajara tsane, pibisiajamatabëcuenevi ata. Bajarapamonae tsipaebaponaena penajumetsënëtsilivaisi. Apo acueneura cajena tsane.

³ Bajarapamonae itavetsiana penacasabicuene. Bajarapamonae itavetsiananua itsacuenejavanë jivi pexaeyaniva. Dioso cajena daxitacuene pexaejava exanae ata, jivi pexaeyaniva apo itavetsi. Bajaraxuata Dioso pejumecovënëtsivi, pexaniajailivaisi peyapëtaevi, jumai tsabiabi pexaejava yabara: “Xanepana rabaja,” jai tsabiabi Diosojavabelia pexaejava pexaevajënae.

⁴ Daxitacuene, xua Dioso exana vajaxaejavanexa, pexaniacuene bitso. Nexata apo biatsobitsi itsacuenejavayo ata Dioso pexanaejava. Biji rajane itsa pitatsi Dioso pexanaejava, “Xanepana rabaja,” bejai tsabiabitsi Diosojavabelia vajanacarajutsixae vajaxaejavanexa.

⁵ Bajarapacuenia Dioso pejumelivaisibaxutota pejumaitsixae, xanepana daxitacuene vajaxaenexa. Pexaniajamatabëcuene rajutatsi Diosojavabelia vajaxaejavanexa vajanacarajutsixae. Bajaraxuata Dioso nacatoxanepanaeyaexana vajaxaejavanexa.

Pacuenia Timoteo itorobatsi xaniavaetsia peponaponaenexa, xaniavaetsia petsipaebinexanua Dioso pejumelivaisi, yabara pelivaisi

⁶ Itsa tsipaebianame pexaniajailivaisi Dioso pejumecovënëtsivijavabelia, penajumetsënëtsilivaisi petsipaebaponaevi pejumecovënëtsiyaniva, nexata xaniavaetsia Jesucristo netonacuenebinë tsane. Nijamatabëcuenesaënexa nevajënaeyabelia, asaëya jumecovënëtaponaponare palivaisi baja jumecovënëtavapanatsi. Pexaniajailivaisi, Dioso pejumelivaisi, palivaisi itsamonae catsipaeba, tsiteca asaëya jumecovënëtaponaponare.

⁷ Itsiata baitsi jane pëtsa jumecovënëtame mapanacuapijilivaisianëje, saya natsiquejemalivaisianë. Daxita nesaëta nacujaubare xaniavaetsia neponaponanexa Dioso pejitsipaecuenia.

⁸ Vajajumalixanepanaenexa, xanepana picani vajaperabësaëta vajacujinaejava. Itsiata baitsi jane daxitacuenevecua xanepana bitso vajajinavanapaenexa pacuenia Dioso nacatojitsipa. Bajarapacuenie nacatoxanepana tsipaji vajatëpaecujinae ata Dioso nacajamatabëcueneyavenonaena xaniavaetsia vajajinavanapaenexa.

⁹ Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta bajarapalivaisi.

¹⁰ Bajaraxuata Dioso tonacuenebaponaponatsibeje. Casaëtsibeje tsaponaponae Dioso vajatonacuenebaponaponaejavabeje, itsamonae pibisiacuenia nacabijataeyabiabi atabeje. Bajarapacuenia exanatsibeje tsipaji najamatabëcuenecopatatsibeje piasaënë Diosojavabelia. Bajaraponë Dioso daxitajivi pecapanepaenë pijaneconicueca. Dioso capanepaena daxita pamonaenajamatabëcuenecopata bajaraponëjavabelia.

¹¹ Bajarapalivaisi tsipaebaponare. Itorobaponarenua bajarapacuenia pexanaenexa.

¹² Pëtsa nacopatame pevëjëatoxaemë itsajivi ata pecaquenetsiataenexa. Biji rajane Dioso pejumecovënëtsivijava, xaniavaetsia tsitaponaponare. Cuaicuajiamëre xaniavaetsia. Livaisi ata itsa tsipaebame, tsipaebare xaniavaetsia. Ponaponare xaniavaetsia. Asivamëre daxitajivi. Najamatabëcopenare xaniavaetsia Diosojavabelia pecayavenonaenexa daxitacuenia yabara. Ëpexaniacuenia yabara najamatabëxainare. Bajarapacuenia itsa tsitaexanaponaponanename, nexata Dioso pejumecovënëtsivi cacuenjëpaeyajinavanapaena.

¹³ Tavajënaelia bajarapacuenia exanaponaponare. Jivi penacaetuatsijavata, Dioso pejumelivaisibaxuto tsimuxulebabiabare. Tsipaebaponarenua pacuenia jumaisi Dioso pejumelivaisibaxutota bajarapamonae piamamatabëcuenesaënexa Diosojavabelia.

¹⁴ Dioso baja cajena carajuta pecacajëpaejamatabëcuenia xaniavaetsia jivi livaisi netsipaebinexa, pecacajëpaejanexanua xaniavaetsia nevetsinexa Dioso pejumecovënëtsivi. Bajaraxua xaniavaetsia najamatabëcueneevetaponaponare. Pamatacabi ancianovi nacaetuata, catsimatanacobeuatsiaya catovajëta Diosojavabelia. Nexata bajarajota Dioso carajuta pecacajëpaejamatabëcuenia.

¹⁵ Daxita nesaëta evetaponaponare daxita pacuenia caitorobatsi nexanaenexa. Nexata daxitajivi cayapëtaena xaniavaetsia tanejumecovënëtaponaponaejavamë pacuenia caitorobatsi.

¹⁶ Pibisiacuenia nayajivitaeya ponaponare. Palivaisi ata tsipaebaponame, xaniavaetsia tsipaebaponare. Saicayacuenia pëtsa bajarapalivaisivecua tsipaebaponame. Bajarapacuenia nexanaejava casaëmëre tsaponaponae. Nexata Dioso cacapanepaena. Pamonaenata cajumecovënëta netsipaebilivaisi, Dioso capanepaenatsi.

5

Pacuenia Timoteo itorobatsi penaponaponanexa Dioso pejumecovënëtsivijava yabara pelivaisi

¹ Pëtsa asaëya muxujioabame pamonaenavajënaeyapijivi. Biji xaniavaetsia yayataeya beaxacuenia muxujioabare. Necovëpijivi pijinia benejuyapijivicuenia muxujioabare.

² Petiriavi ata nevajënaeyapijivi beenacuenia muxujioabare. Necovëpijivaxi pijinia benejuyapijivaxicuenia muxujioabare. Ëpexaniajamatabëcuenia taema bajarapovaxi itsajamatabëcuenia bënëna nejamatabëëthëtota sivanajamatabëxainanejevamë.

³ Pamona pevecuatëpaevatsi, Dioso pejumecovënëtsiva, yayataeya javenonare itsa bitso bejiobi.

⁴ Itsiata baitsi jane pamona pevecuatëpaevatsi, itsa xaina pexi, pemomoxi ata, bajarapamonae xanepana pevetsinexatsi. Bajarapamonae xanepana peyavenonaenexa pijamonae. Bajarapamonae juya beveta paxa, pena ata,

pamo ata, pacue ata, pamonaē vitsatatsi. Bajarapacuenia itša exana, exana pexaniacuene. Nexata Dioso barēyataenatsi.

5 Pamona peveuatēpaevatsi, Dioso pejumecovēnētsiva, itša apo xainae itsajivi ata pevetsinexatsi, bajarapova najamatabēcuenecopataponaponaē Diosojavabelia peyavenonaenexatsi. Navajētabiabi Diosojavabelia matacabita, meravi ata.

6 Itsiata baitsi jane pamona peveuatēpaevatsi pejitsipaecuenia pibisiacuene itša exanaponapona, Dioso tanetsi bepetēpaeva, abaxē asaē tsaponaponaē ata.

7 Bajarapacuenia itorobare Dioso pejumecovēnētsivi pijamonae peyavenonaenexa itša bitso bejiobi. Nexata pamonaē Dioso apo pejumecovēnētsivi, toacuenebi tsanetsi pebaracuaicuajijavatsi bajaraxua yabara.

8 Dioso pejumecovēnētsivi, pijamonae beveta. Pajivi apo itaxutotsoniatāē pevetsinexa pepo pijamonae ata, bajarapajivi apo exanaē pacuenia Dioso itorobatsi. Nexata pijamonae itša apo evetsi, bajarapajivi bitso pibisiacuene exana Dioso apo pejumecovēnētsijivi matatoxenetsia.

9 Petiriva sesenta pavaibeje pexainaeva, caeto penacojiobicujinaē pamona peveuatēpaevatsi, xanepana pevēnēyaquinarutsinexatsi pamona peveuatēpaevatsi pevēnēyaquinarubibaxutota. Nexata daxita Dioso pejumecovēnētsivi peyavenonabiabinexatsi.

10 Pova pamona peveuatēpaevatsi itša cueneyapētanetsi pexaniacuene pexanaejava, bajarapova xanepana pevēnēyaquinarutsinexatsi pamona peveuatēpaevatsi pevēnēyaquinarubibaxutota. Mabaitsi pacuene pexanaeva xanepana pevēnēyaquinarutsinexatsije. Pexi xaniavaetsia pevitsatsiva. Jivi ata itša sivaxainatsi, xaniavaetsia pijabota pecopiapitsiva. Ajamatabēcuenecovēbia Dioso pejumecovēnētsivi peyavenonaeva. Peyavenonaevanua itsamonae itša bejiobiaexanatsi Dioso pejumecovēnētsijiva yabara. Daxita xua pexaniacuene, pexanaeva, xanepana pevēnēyaquinarutsinexatsi pamona peveuatēpaevatsi pevēnēyaquinarubibaxutota.

11 Itsiata baitsi jane pova abaxē sesenta pavaibeje apo pexainaeva, pētsa vēnēyaquinarutame nevēnēyaquinarubibaxutota peyavenonaenexatsi daxita Dioso pejumecovēnētsivi. Tsipaji bajarapova itša jitsipa pexanaenexa pacuenia natojitsipa, copatsipa Cristo pejumecovēnētsijivami. Nexata icatsia nacojiobijitsipa.

12 Nexata pijaneconi xainaejitsipa Diosojavabelia. Tsipaji copatsipa Cristojavabelia penajamatabēcuenecopatsijivami: “Capanepaeva baja jumecovēnētājē Cristo,” jai ata.

13 Pematatsēnēa bajarapova sivaxainarutsipa itša bonējava. Afaetabinua tsipae. Pematatsēnēa baracuaicuajijai tsabiabi tsipae itsamonae. Jamatabēitonotabiabijitsipa itsamonae. Xuaxi yabara ata apo becuacuajijaitsi, cuacuajijai tsabiabi tsipae.

14 Bajaraxuata pamona peveuatēpaevatsi, pova abaxē bitso apo perujuva, jitsipajē icatsia penacojiobijava pexi pexainaevenexa, pijabo ata xaniavaetsia pevetsinexa. Nexata bajarapacuenia vajanacacuenētoyavi ata toacuenebi tsanetsi pebaracuaicuajijavatsi bajarapitsiva.

15 Bajarapacuenia jumaitsinē tsipaji baja itsamonae pamonajivi peveuatēpaevatsi copaba baja Cristo pejumecovēnētsijivami. Nexata pacuenia dovathi itorobatsi, exanavanapa.

16 Dioso pejumecovēnētsivi, pebijivi, petiriavi ata, itša pijamonaeya-juvēnēva pamona vecuatēpatsi, nexata bajarapamonae bitaxutotsoniatane

bajrapova. Bajrapacuenia nexata apo namatavenonae tsane peyavenon-aenexatsi daxita Dioso pejumecovënëtsivi. Tsipaji baja pijamonae evetatsi. Nexata Dioso pejumecovënëtsivi caëjëpaejitsiatsi peyavenonaenexa pamonaë bitso bepejibivi, pamona pevecuatëpaevitsi pijamonae petoajibivitsi.

17 Ancianovi, pamonaë xaniavaetsia evetabiaba Dioso pejumecovënëtsivi, bajrapamonae xaniavaetsia bematamotatsi. Beyaiyatansinua. Ancianovi, pamonaë Dioso pitorobilivaisi bitso tsipaeba, bitso cujarubana, bajrapamonae xaniavaetsia bematamotatsi.

18 Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabijavata. Pëtsa pumuxatatame trigoxu pexaenexa pecatotanabataxubijavata,” jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamotsijavanexa yabara jumaitsi mapacueniaje: “Penacuenebinë bematamotatsi,” jai Dioso pejumelivaisibaxutota. Bajaraxuata bematamotatsi ancianovi Dioso pejamatabëcueneta bitso penacuenebivi.

19 Pëtsa jumexanianatame caejivi pepaebijava ancianonë pibisiacuene pexanaejava yabara. Matapania anijajivibeje, acueyabi pajivibeje ata, petaevitsi catsipaebiana, jumecovënëtsianame.

20 Nexata xaniajai ancianovi pibisiacuene itsa exanapona, itavere daxita Dioso pejumecovënëtsivi pitabarata. Nexata pijinia itsamonae ancianovi itsa cacuenetane nitavetsijava pibisiacuene pexanaevi, cjunaviana pibisiacuene pexanaejava.

21 Dioso pitabarata, vajatuxanenë Jesucristo ata pitabarata, Dioso pi-jaängelevi ata pitabarata, xanë jamatabëcuenereviaya caitorobatsi pacuenia caitorobatsi nexanaponaponaenexa. Daxita ancianovi, pibisiacuene pexanaevi, najëpaeya itavetsianame. Ponë ancianonë, bitso pecayapëtaenë, pibisiacuene itsa exana, pëtsa sivaajumeuramë nitavetsinexa pibisiacuene pexanaejava.

22 Pëtsa itsanë ata bepiglia exaname ancianonënexa. Tsipaji ponë bepiglia ancianonënexa exanaejitsipame, bepiglia pibisiacuene itsa exana, nexata itsamonae cataejitsipa pibisiacuene pexanaevi benejamatabëcueneyavenonaenë. Daxita pibisiacuenevacqua, xaniavaetsia naevetsiaya ponapnare.

23 Xamë raja ajamatabëepatanemë tsabiabi. Nexata pëtsa apaeyabiabame ëpitaranae. Tsiquirijavayo vinorayo, pitaranae yajava, apaeyabiabianame.

24 Itsamonae pibisiacuene itsa exana, bananeconitsiaexanatsi daxitajivi pepuacueneyapëtaetsi. Itsamonae pijinia pibisiacuene exanae ata, bepiglia apo cueneyapëtaetsi. Bexëa matapania xaniavaetsia vënëlivaisinaitajëta pibisiacuene pexanaejava.

25 Bajara pijinia itsi itsamonae pexaniacuene itsa exana. Pexaniacuene itsa exana, daxitajivi cuenetanetsi pexaniacuene pexanaejava. Itsajavata pexaniacuene exanae ata, jivi apo cuenetaetsi. Itsiata baitsi jane bajarapajivi pexaniacuene itsa exana, acuenebi navënëmatayatsia peponaponaejava. Nexata bexëajavabelia daxitajivi vënëlivaisitanetsi pexaniacuene pexanaejava.

6

1 Pamonaë dajubicuenia canajetatsi itsamonaejavabelia amoneya petonacuenebabiabinexa, bajrapamonae Jesús pelivaisi itsa pejumecovënëtsivi, yayiataeya tonacuenebi pijatuxanenë. Bajrapacuenia tonacuenebi pijatuxanenë pesivajamatabëcuenearëyanexatsi. Nexata pijatuxanenë Dioso pibisiacuenia apo baracuaicuajiai tsane. Jesús pelivaisi

ata, palivaisi vaxaitsi jivi tsipaebaponatsi, pijatuxanenë pibisiacuenia apo baracuaicuaijai tsane.

² Dajubicuenia pecanajetsivitsi pijatuxanenë, Dioso itsa pejumecovënëtsinë, pecanajetsivitsi pëtsa jamatabëjumaiti pijatuxanenë yabara mapapomonae: “Tajatuxanenë rabaxë abaxë Dioso pejumecovënëtsinë. Nexata asaëyata apo tonacuenebi atanë tsane, itsiata apo nebijatae tsane,” jamatabëjai pëtsa. Biji rajane asaëya xaniavaetsia tonacuenebi pijatuxanenë. Tsipaji raja Dioso pejumecovënëtsinë yavenonaeya tonacueneba Dioso penajuaasivavitsiyajuvënë. Bajarapalivaisi tsipaebaponare. Itorobarena bajarapacuenia pexanavanapaenexa.

Pacuenia Dioso pejumecovënëtsijivi jamatabëcuenebarëya yabara pelivaisi

³ Itsamonae saicaya itsalivaisi tsipaebapona. Bajarapalivaisibeje apo najamatabëcuenejëpaebeje palivaisi vajatuxanenë Jesucristo tsipaebapona. Palivaisi vaxaitsi jumecovënëtavanapatsi, apo nalivaisijëpaebeje.

⁴ Cueneyapëtanetsi pamonaë penajumetsënëtsilivaisi tsipaebapona. Bajarapamonae beayajamatabëcuenevi itajara natane. Itsiata bajarapamonae pexaniajailivaisi apo yapëtae. Bitso bepematajemabivitsi jinavanapa. Nexata bajarapamonae jitsipabiaba itsamonaejavabelia pejumeanaeyanotabiabinexa saya jema itsacuenelivaisixi peyanijobijavata. Apo barënajamatabëcuenejëpae itsajivi ata. Bajarapamonae yajuvënëvi itsa xaina itsacueneyavayo, bajarapamonae nacobecaëbabiaba. Anaepanabiaba. Nabijataeyabiaba. “Itsamonae covë nitsacueniabijitsia,” jamatabëjai tsabiabi, itsamonae apo itsacueniabijitsia atatsi.

⁵ Bajarapamonae anaeya namataenetsia najumenotabiaba. Tsipaji pijamatabëcuenebejevi. Bajarapamonae pexaniajailivaisi, Cristo pelivaisi, apo yapëtae xaniavaetsia jivi petsipaebinxaxa. Saya bajarapamonae jamatabëjumai tsabiabi: “Xanë raja Dioso pejumelivaisi tatsipaebaponaexaxa, palata nacanabianajë,” jamatabëjai tsabiabi bajarapamonae. Bajarapitsivi najavivitsare.

⁶ Vaxaitsi Dioso vajajumecovënëtsivi, bitso cajena vajaxinaeavi Diosojavabelia, itsa sivajamatabëcuenebarëyatsi xuayovajëto Dioso nacatocopata vajaxinaenexa mapanacuataje.

⁷ Pamatacabi vaxaitsi naexanatsi mapanacuataje, itsacueneyavayo ata apo capatsitsi. Pamatacabi pijinia tēpaenatsi, apo caponae tsanetsi itsacueneyavayo ata mapanacuapijicueneye.

⁸ Bajaraxuata nexata itsa xainatsi vajaxaejava, vajanaxatabijava ata, besivajamatabëcuenebarëyatsi.

⁹ Itsiata baitsi jane pamonaë najamatabëxaina ëpexinaejavanexa, bajarapamonae dovathi jamatabëcueneçëtsatsi. Nexata pibisiacuenexana palata pepitsinexa. Jamatabëcuenebijanatsi. Nexata bajarapamonae Diosovecua naxubiaya jinavanapa.

¹⁰ Pamonaë bitso palata jitsipa, daxita xua pibisiacuenexana palata pepitsinexa. Itsamonae bitso najamatabëxaina ëpexinaecuenexana. Nexata baja copaba Dioso pejumecovënëtsijavami. Nexata bajarapajamatabëcuene bëpënëa bitso yajamatabëcuenebëjai.

Pacuenia Timoteo muxujibatsi pijamatabëcuenesaënexa Diosojavabelia penajamatabëcueneçopatsijava yabara pelivaisi

¹¹ Timoteo, xamë Dioso pijajivitonëmë. Navecuatsare mapanacuata jivi palata pejitsipaejamatabëcuene. Biji jane ajamatabëcuenesaëmëre Dioso

nejumecovënëtaponaponaejava. Dioso asivamëre. Diosojavabelia najamatabëcuenecopatsiaya ponaponare. Itsamonae ata asivamëre tsaponapona. Itsamonae caitsacueniababiabi ata, bajayajebi casaëmëre tsaponapona. Dioso nejumecovënëtaponaponaejava. “Xanë ayaijamatabëcuenenënë,” nejaiyaniva, beveliajamatabëcuenenë nataeya ponaponare.

¹² Catoayapëbeje ata Diosojavabelia nenajamatabëcuenecopatsijava, ajamatabëcuenesaëmëre nepitsinexa xua Dioso carajutsijsitsia, matakabi apo pevereverecejava. Pamatakabi navajunupaebame nejumecovënëtsijava Jesüs Dioso pexënatocuene, Dioso cajunata pecarajutsinexa matakabi apo pevereverecejava. Ayabitsaëttoxaneto Dioso pejumecovënëtsivi pitabarata, Dioso cajunata pecarajutsinexa matakabi apo pevereverecejava.

¹³ Dioso baja cajena pesaëta daxita vaxaitsi asaë tsavanapaetsi. Pamatakabi Jesucristo nutatsi Poncio Pilato pitabarata, ajumejunavijibia navajunupaeba pexaniajailivaisita. Nexata Diosobeje Jesucristobeje pitabarata caitorobatsi aeconoxae mapacueniaje.

¹⁴ Caitorobatsi xaniavaetsia nejumecovënëtaponaponaenexa daxita pacuenia jumaitsi pexanialivaisi, Cristo pelivaisi. Nexata acuenebi tsane itsajivi ata pecaitavetsinexa. Bajarapacuenia vajënaeetaponaenexa vajatuxanenë Jesucristo matapania pepatsimatocabitsicajavabelianexa.

¹⁵ Pamatakabi Dioso caëjëta, itsa copiapatsiana, Cristo icatsia patsianica. Caenë Dioso bitso ayaijamatabëcuenenënë daxitanacuanënë pevetsivivecua.

¹⁶ Caenë Dioso apo tēpae tsane daxita matakabijavabelianexa. Dioso peycotiyaponaponaenë. Bajaraxuata itsajivi ata acuenebi pimoxoyotsijava Dioso. Itsajivi ata cajena caeto ata apo tae Dioso. Tspaji apo caëjēpaetsi petaejva. ¡Daxitamatakabi Dioso pijajivi yayiatanetsi! ¡Dioso cajena ayaijamatabëcuenenënë daxitamatakabijavabelianexa!

¹⁷ Pamonaen bitso pexainaevi mapanacuapijicueneye, bajarapamonaen muxujiobare beayaijamatabëcuenevi penataeyaniva. Muxujiobarenua pejamatabëjumaitsiyaniva: “Palata baja taxainaeaxae, apo namatavenonaenë itsacuenejava ata,” pejamatabëjaiyaniva. Tspaji saya palata pevereverecejava. Biji rajane itorobare bitso pexainaevi penajamatabëcuenecopatsinexa piasaëtsaponaponaenë Diosojavabelia. Dioso nacarajuta daxita vajaxainaejava barëyaya vajacajinavanapaenexa.

¹⁸ Itorobarenua bajarapamonaen pijapalata pecanacuenebinexa, itsamonaejavabelia pexaniacuene petoexanabiabinexa bajarapapalatata. Itorobarenua penajamatabëcueneveretsinexa palata perajutsinexa bepejiobivijavabelia, bajarapacuenia peyavenonaenexa. Itorobarenua pëtsicobetnanaponaenexa pexainaejava bepejiobivijavabelia.

¹⁹ Bajarapacuenia itsa exanaena, nexata athëbëtatsia Dioso tobuataponaenatsi pepacune penamamotsijava pexainaejava daxitamatakabijavabelianexa. Xainaanua matakabi apo pevereverecejava.

Pacuenia Pablo Timoteo pemuxujiobilivaisi toyaquina, pecopatsivajënae petoyaquinaelivaisi mapabaxutotaje, yabara pelivaisi

²⁰ Timoteo, exanaponaponaen daxita xua Dioso catocopata nexanaenexa. Pëtsa namuxunaevetame pamonaen bitso pecuaicuaijaivi saya mapanacuapijicueneye yabaraje. Pëtsa namuxunaevetame pecuaicuaijaivi natsiquejemalivaisixi. Pëtsa namuxunaevetame pamonaen jivi tsipaebapona penajumetsënëtsilivaisi. Bajarapamonaen tsipaebapona itajara pepacune bepexaniajailivaisi. Itsiata cajena apo pexaniajailivaisi.

²¹ Itsamonae bajarapalivaisi jumecovënëta. Nexata baja copaba Dioso pejumecovënëtsijavami.

Catovajētatsi Dioso pecayavenonaenexa.

Mapabaxutoje San Pablo cotocaevi toyaquina Timoteojavabelia

Pacuenia icatsia Pablo cotocaevibaxuto toyaquina Timoteojavabelia yabara pelivaisi

¹ Xanë Pablonë, Jesucristo nitoroba Dioso pejamatabëcueneta. Jesucristo nitoroba daxitanacuanëjava jivi tatsipaebineja pacuenia Dioso najumecapanepaeya jumaitsi vajanacarajutsinexa matababi apo pevereverecejava. Dioso nacarajutsiana matababi apo pevereverecejava, Jesucristo vajajumecovënëtsivi.

² Timoteo, bitso tacaasivanë, betaxënatomëcuenia tacataenë. Catoyaquinatsi mapabaxutoje. Catovajëtatsi vaxa Dioso, vajatuxanenë Jesucristo ata, pecayavenonaenexa pecaasivaxaebeje. Catovajëtatsi pecaifaxutotsoniataenexabeje, pecajamatabëcuene xanepanaeyaexanaenexanua bajaraponëbejevabelia.

Pacuenia Pablo Cristo vajunupaeba yabara pelivaisi

³ Pexaniajamatabëcuene rajutabiabajë Diosojavabelia. Dioso tonacuenebabiabajë pacuenia bajayata tajasalinaivimi ata Dioso tonacuenebavanapa. Pacuenia Dioso nitoroba, bajarapacuenia xaniavaetsia toponaponajë. Itsa canajamatabënapitatsi tavajëtsijavata Diosojavabelia, meravi, matababita ata, Diosojavabelia pexaniajamatabëcuene rajutabiabajë xamë yabara.

⁴ Najamatabënapitabiabajë tanepënuayabaxuabijavamë pamatababi navecuanatsatsibeje. Bitso icatsia jamatabëcatanetsi tacasivajamatabëcuenebarëyanexa itsa catanetsi.

⁵ Najamatabënapitabiabajë pacuenia daxita nejamatabëëthëtovetsina najamatabëcuenecopatame Diosojavabelia. Copiaya acue Loidabeje, ena Eunicebeje, pejamatabëëthëtovetsina najamatabëcuenecopatabeje Diosojavabelia. Nexata yapëtaniji bajarapacuenia xamë ata nenajamatabëcuenecopatsijava Diosojavabelia.

⁶ Bajaraxuata canajamatabënapitsiaexanatsi mapacueniaje. Exanaponenname pacuenia Dioso caitoroba pecavejamatabëcaeviyaniava Dioso pecacajëpaeyaexanaejamatabëcuene. Nexata xaniavaetsia evetaponaponenname Dioso pejumecovënëtsivi. Pajamatabëcuene Dioso cacajëpaeyaexana, Dioso carajuta pamatababi catsimatanacobebuatatsi tacatovajëtsijavata Diosojavabelia.

⁷ Dioso cajena nacarajuta Espiritu Santo. Espiritu Santo nexata vanacayajavaponaponaeaxa, apo cjunavitsi itsacueneyava ata. Espiritu Santo pesaëta nacacajëpaeyaexana pacuenia Dioso nacatojitsipa vajaexanabiabinexa. Nacayavenonanua vajasivanexa itsamonae ata. Nacanajamatabëcuene cataitsiaexananua pibisiacuene ata vajaexanaeyaniava.

⁸ Pëtsa ajumeuramë nevajunupaebaponaejava vajatuxanenë Jesús. Pëtsa ajumeuramë xanë ata tanevajunupaebijavamë. Jesucristo pijajivitonëxanë penaneconitsivi pejebabiabibota taneetsijava. Biji rajane xamë ata tonacopare itsamonae pecabejiobiaexanaenexa, jivi Diosojavabelia pecapanepaelivaisinexatsi yabara. Itsamonae pecabejiobiaexanaejavata, Dioso cajena cajamatabëcuenebabatsiana.

⁹ Dioso cajena nacacapanepaena pibisiacuene vajaexanaeconomicsivecua. Nacajunata vajatojinavanapaenexa xaniavaetsia. Itsacuenejavayo pexaniacuene apo exanae atatsi, Dioso itsiata nacajunata. Nacajunata tsipaji Dioso jitsipa vajanacajunatsinexa. Dioso nacaitaxutotsoniatanenua Jesucristo pejamatabëcueneta. Pepo bajayatamicujinae, pamatacabi abaxë Dioso nacua ata apo exanae, Dioso baja cajena nacajitsipa.

¹⁰ Dioso cajena nacatsitanajamatabëcuneitajëta vajanacaasivajava. Dioso vajanacaasivaxae, pexënatõ itorobica vajanacacapanepaenexa. Nexata tẽpae ata tsanetsi, apo nacatoitsacuene. Tsipaji itsa najamatabëcuenecopatatsi Jesucristojavabelia, nacacapanepaena Diosojavabelia. Nexata xainaenatsi matacabi apo pevereverecejava.

¹¹ Dioso cajena nitapeta jivi tatsipaebaponaenexa bajarapapexaniali-vaisi. Nitoroba apõstolenënexanë tatsipaebaponaenexa bajarapalivaisi apo judivõjavabelia.

¹² Bajarapalivaisi jivi tatsipaebaponaexae, itsamonae nebejiobiaex-anapona mapacueniaje. Itsiata baitsi jane apo auranë tanebejiobi-aexanaejava yabara. Tsipaji ponëjavabelia najamatabëcuenecopatajë, jamatabëcueneyapëtaniji. Jamatabëcueneyapëtaniji pacuenia bajaraponë jamatabëcuenecaëjëpatsi taneyavenonaenexa. Nexata bajaraponë nayavenonabiabiana pacuene netocopata taexanaponaenexa matapania icatsia Cristo pepatsimatacabitsicajavabelianexa.

¹³ Timoteo, casaëmëre tsaponapona nejumecovënëtsijava pexaniajaili-vaisi, palivaisi baja catsipaebatsi. Pacuenia baja catsipaebatsi, bajara-pacuenia juya itsamonaejavabelia tsipaebabianame. Bajarapalivaisi jamatabënaponapona. Xaniavaetsia jumecovënëtsia ponapona. Asivaya taeyabiabare itsamonae ata Jesucristo pijajivitonëxaemë.

¹⁴ Espõritu Santo cajena nacayajavaponapabeje. Nexata nacayavenon-aponapabeje. Bajaraxuata pexaniajailivaisi xaniavaetsia tsipaebapona-ponare. Pacuenia Dioso caitoroba, exanabiabare. Saicayalivaisicuenia pëtsa tsipaebapona. Espõritu Santo cayavenonaena.

¹⁵ Xamë baja cajena yapëtaneme pacuenia Asiavënë nacuapijivi, daxita Dioso pejumecovënëtsivi, nexuabarëcëpeca. Tanexuabarëcëpecaevi ya-juvënënebeje Figelobeje Hermõgenesbeje.

¹⁶ Onesõforo, pijamonae yajava, Dioso pitaxutotsoniataenexatsi, tovajëtajë Diosojavabelia. Onesõforo nejamatabëcuenebabatabiaba. Penaneconitsivi pejebabiabibota ecae atanë, nesivaxaina anijatonë. Onesõforo cajena apo neyabaraaura, penaneconitsivi pejebabiabibota ecae atanë.

¹⁷ Biji rajane Onesõforo itsa patajopa Roma tomarata, nejaitaruta. Apo copatsi cajena tanejaitarutsijava. Matapania itsa necaxitaraba penaneconit-sivi pejebabiabibota, copata baja tanejaitarsijava.

¹⁸ Diosojavabelia Onesõforo tovajëtajë Dioso pitaxutotsoniataenexatsi pa-matacabi icatsia Cristo patsianica. Xamë baja cajena yapëtaneme pacuenia Onesõforo nacayavenonabeje pamatacabi ponaponaatsibeje Efeso tomarata.

2

Pacuenia Jesucristo pijajivitonë jamatabëcuneitsi, ponë xaniavaetsia jume-covënëta, yabara pelivaisi

¹ Timoteo, xamë betaxënatomëcuenia tacataenë. Catovajëtatsi Diosojav-abelia pecajamatabëcuene asaëyaexanaenexa. Nacayavenonaena Jesucristo pijajivixaetsi.

² Xamē rabaja cajena nejumetaeyabiabame palivaisi tsipaebabiabajē jivi ayaibitsaētoxanetonējavabelia. Bajarapalivaisi juya tsipaebare itsamonaejavabelia. Pamonaē apo piacuenējitsibivi pexanaenexa pacuenia itorobatsi, pecaējēpaevitsinua xaniavaetsia jivi livaisi petsipaebinexa, bajarapamonae itorōbare juya mataropotsia bajarapalivaisi petsipaebinexa itsamonaejavabelia.

³ Dioso pejumelivaisi jivi netsipaebaponaejavata, itsa catoayapēbeje, itsamonae itsa cabejibiaexanaejitsianua, pētsa najetabajiravame. Jesucristo pijajivitonēxamē, jamatabēcueneevetaponaponare pacuenia caitoroba nexanaenexa. Pacuenia pexaniavajabitsaēnē itsi, bajaraitsimēre.

⁴ Vajabitsaēnē pitorobabiabinētsi jamatabēcueneevetaponapona pacuenia itorobatsi pexanaenexa. Nexata apo vecuanajamatabēcueneepatajērētsi saicayacuene pevetaponaenexa.

⁵ Bajara pijinia pacuenia pebitsojinaevi pecujinaejinaejava, penayacobiavata, cujinaejina pacuenia itorobatsi pijatuxanevi. Penacanabinē jamatejema perajutsinexatsi itsacuenejavayo. Pajivi xaniavaetsia apo cujinaejinae pacuenia itorobatsi, bitsojinae ata pecujinaejinaejava, itsiata apo nacanabi. Nexata apo rajutsitsi pecujinaejinaematamo.

⁶ Ponē pijinia pabi nacueneba peubinexa peubijava, bajaraponē copiaya nacueneba asaēyata. Nexata peubijava itsa tonaveretatsi, pita baja pe-nacuenebimatamo. Bajara pijinia pacuenia xamē ata asaēya tonacuenebare vajatuxanenē. Nexata vajatuxanenē carajutsiana netonacuenebimatamo.

⁷ Najamatabēxainare tacatsipaebilivaisi. Nexata vajatuxanenē cayapētaeyaexanaena bajarapalivaisi.

⁸ Canaējēre Jesucristo. Bajaraponē cajena Dioso asaēyaexanatsi petēpaecujinae. Bajaraponē cajena Davidpijinē pemomoxiyajuvēnēnē. Bajaraponē pelivaisi jivi tsipaebabiabajē. Itsa jumecovēnēta bajarapalivaisi, pecapanepaelivaisinexatsi Diosojavabelia.

⁹ Bajarapalivaisi tatsipaebaponaexae, penaneconitsivi pejebabiabibota neeta tavajēnaeyabelia daxitanacuanējava tatsipaebaponaeyaniva. Cadena-maētonēta xanē necēta, pacuenia bitso pibisiacuene pexanaenē bacētatsi. Itsiata Jesucristo pelivaisi apo cētsicapanepae. Nexata xanē majotaje naneconitsia ponaponae atanē, aeconoxae baja Jesucristo pelivaisi yacaējēpapona daxitanacuanējava.

¹⁰ Bajaraxua tayapētaexae, tonacaevetajē itsamonae ayaicuenia tanebejibiaexanaenexa, Dioso pitapetsivitsi pecapanepaenexatsi Jesucristo pelivaisi pejumecovēnētsixae. Nexata bajarapamonae ata Dioso capanepaenatsi pexinaenexa matakabi apo pevereveceajava daxita matakabijavabelianexa. Nexata bajarapamonae Jesucristo yajavajinavanapaena pinijicotia yajava.

¹¹ Palivaisi aeconoxae jumaitsinējitsia, pexaniajailivaisi cajena:

Itsa xaniajai Cristo yajavatēpatsibeje, nexata icatsia Cristo yajavaasaētsibeje tsaponaponae tsane.

¹² Itsa casaē tsaponaponaetsibeje tsane Cristo pelivaisi vajajumecovēnētsijavabeje, itsamonae nacabejibiaexanae atabeje, nexata daxitacuene Cristo cobenaevetsianatsibeje pamatacabi daxitacuene evetsiana pijanacuatsia. Itsa vaxaitsibeje bajaraponē pelivaisi vajajumecovēnētsijavabeje nayavajunuaxainaenatsibeje jivijavabelia, nexata juya bajaraponē pijajivitonēcuenetsibeje nacayavajunuaxainaenabeje paxa Diosojavabelia.

¹³ Vaxaitsi itsajamatabēcuene Dioso vecuanajamatabēxainae atatsi, itsiata Dioso nacatoexanaena pacuenia baja cajena najumecapanepaeya jumaitsi.

Pacuenia jamatabëcueneitsi xaniavaetsia Dioso petonacuenebinë yabara pelivaisi

¹⁴ Daxita Dioso pejumecovënëtsivi najamatabënapitsiaexanaename palivaisi catsipaebatsi. Vajatuxanenë pitabarata tsipaebare bajarapamonae. Pëtsa bajarapamonae anaeya jumenota saya itsamonae pecuaicuaijajava. Pejumeanaenotsijava itsamonae, apo jamatabëcuenyeyavenonae tsipaetsi itsajivi ata. Saya jamatabëcuenebijnajetsipatsi daxita pejumetaevitsi.

¹⁵ Pacuenia cacaëjêpa, Dioso pecaitorobicuenia exanaponaponare. Nexata pamatacabi naitajëtsianame Dioso pitabarata, cabarëyataena xaniavaetsia nejumecovënëtsixae pacuenia caitoroba. Ajibi tsane neyabaraaurajava Dioso-javabelia. Tsipaji xaniavaetsia jivi tsipaebaponaponame Dioso pejumelivaisi, pepo pexaniajailivaisi.

¹⁶ Pëtsa namuxunaevetame pamonae tsipaebapona natsiquejemalivaisi, mapanacuapijilivaisi. Tsipaji raja bajarapamonae petsipaebaponaelivaisita, jivi Dioso pejumecovënëtsijavami copabiaexanapona pevajënaeyabelia.

¹⁷ Bitso cajena abeje bajarapalivaisi. Pacuenia ayaivajënë banaexanapona pevajënëtsabanajetarucæjava, bajara pijinia jamatabëcueneitsi bajarapamonae petsipaebaponaelivaisi. Tsipaji pevajënaeyabelia jivi ayaibitsaëto jamatabëcuenebijnajaponatsi bajarapalivaisi petsipaebaponaexaetsi. Bajarapalivaisi petsipaebaponaevi yajuvënënebeje Himeneobeje Filetobeje.

¹⁸ Bajaraponëbeje copatabeje baja pexaniajailivaisi pejumecovënëtsijavamibeje. Jamatabëcuenenavëxaniababeje saya. Tsipaji jumaitsibeje tsabiabi: “Panepa rabaja jivi petëpaecujinae icatsia Dioso piasaëyaxanaponaejavaminexa,” jaibeje tsabiabi. Nexata bajarapacuenia Dioso pejumelivaisivecua najamatabëcuene epatajërërëcaponabeje. Nexata bajaraponëbeje itsamonae ata Dioso pejumecovënëtsijavamivecua najamatabëcueneepatajërërëcaeya exanaponabeje.

¹⁹ Pacuenia ibotoxaneto apo tixitsicapanepaetsi, bajara pijinia itsi Dioso pejumelivaisi, pexaniajailivaisi. Caelivaisi rabaja tsiteca. Nexata itsalivaisijavabelia apo tixitsicapanepaetsi. Bajarapalivaisijavata mapacuenia pejumaitsilivaisiyo rucaje: “Pepo petuxanenë cajena yapëtane pijajivi,” pejailivaisiyo ruca. Itsalivaisijavata pijinia mapacuenia pejumaitsilivaisiyo rucaje: “Pajivi jumaitsi: ‘Xanë raja Cristo pijajivitonënë,’ jai, bajarapajivi becopata pibisiacune pexanaejava,” pejailivaisiyo ruca.

²⁰ Riconë pijaboxanetota jivi pecanabaninëanënexa, xaina daxitacunevirianënë. Itsanënë penioponaeplatanitota pexanaenënë. Itsanënë oronanitota pexanaenënë. Pamatacabi riconë topatatsi petuxanevi, ayajamatabëcuenevi, pexaejava abatabiaba bajaraponëanëta. Itsanënë bevelianënë, naejavanënë. Itsanënë atsananinënë. Bajaraponënë xaina daxitamatacabi jivi pecanabaninexa.

²¹ Bajara pijinia jamatabëcueneitsi Dioso pejumecovënëtsivi ata. Pajivi xaniavaetsia najamatabëcuenevetaponapona pibisiacune pexanaeyaniva, bajarapajivi jamatabëcueneitsi pacuenia oronanitota pexanaenënë itsi. Baitsi baja ajamatabëcuenexuirajibi. Nexata pijatuxanenë tsitaxanepana pitorobinexatsi xua pexaniacuene pijatuxanenë petonacuenebinexa. Timoteo, bajaraxuata xaniavaetsia benaevetaponaponame pibisiacune nexanaeyaniva.

²² Pacuene pevëjëavi najamatabëxaina pibisiacune pexanaenexa, bajarapacuene vecuanajetabajiravaponare. Casaëmëre tsaponaponae epexaniacuene nexanaponaponaejava. Diosojavabelia najamatabëcuene copatsiyaponaponare. Asivamëre tsaponaponae itsamonae ata. Jamatabëcuenexanepanaeya ponaponare Dioso pitabarata. Bajarapacuenia

barëajamatabëcuenesaëmëre tsaponaponae, pamonae xaniavaetsia penaevetavanapaevi pibisiacuene pexanaeyaniva, penavajëcabiabivinia Diosojavabelia peyavenonaenexatsi.

²³ Namuxujemare natsiquejemalivaisixi pecuaicuajiaivi. Yapëtaneme rabaja. Bajarapitsilivaisixi jivi itsa cuaicuajjai, belia najumeanaenotabi-abapona.

²⁴ Jesús cajena pijajivitonë, itsamonae apo bejumeanaenotsi. Biji rajane pexaniajamatabëcuene bexaina daxitajivijavabelia. Livaisi jivi betsipaeba xaniavaetsia. Bajayajebi ata apo becopatsi livaisi petsipaeaponaejava.

²⁵ Xaniavaetsia muxujobiaya livaisi betsipaeaponapona pamonae Dioso apo pejitsipaevi ata. Nexata bevetaponapona bajarapamonae ata pecopabinexa pibisiacuene pexanabiabijava penajamatabëcuene pënëyorotsinexa Diosojavabelia. Nexata bajarapamonae ata Dioso yapëtaeyaxanaenatsi Jesús pelivaisi pexaniajailivaisicuene.

²⁶ Nexata icatsia najamatabëxainaena xaniavaetsia Dioso pejume-covënëtsinexa. 25 Xaniavaetsia muxujobiaya livaisi betsipaeaponapona pamonae Dioso apo pejitsipaevi ata. Nexata bevetaponapona bajarapamonae ata Nexata dovathi pejamatabëcuene itorobabiabijavatsivecua najamatabëcuenepënëyorotsiana Diosojavabelia.

3

Pacuenia jivi itsane itsa baja imoxoyo pevajënae nacua pevereverecaenexa yabara pelivaisi

¹ Timoteo, xaniavaetsia beyapëtaneme mapacueneje. Itsa baja imoxoyo pevajënae tsane nacua pevereverecaenexa, bajarapamatacabi bitso ayapëbeje tsane daxitacuenejavabelia.

² Bajarapamatacabi cajena caejivi canacujitsia pexinaejava, natoasiva tsane ëbajarapamonae ayaijava pexainaenexa. Navajunupaebiana saya peyaiyataenexatsi pejumetaevitsi. Beayijamatabëcuenevi nataena. Nava-junupaebiana pexanaejava yabara peyaiyataenexatsi. Bajarapamonae pibisiacuenia baracuaicuajjai tsane Dioso. Apo jumecovënëtsi tsane paxajivi, penajivi ata, pitorobicueniatsi. Vitsatsi atatsi, yavenonabiabi atatsi, apo jamatabënajinae tsane pijamonae. Bajarapamonae apo yaiyatae tsane itsamonae Diosojavabelia pevajëcabiabijava.

³ Bajarapamatacabita bajarapamonae apo asiva tsane pijamonae ata. Apo itaxutotsoniatæ tsane itsamonaejavabelia ata. Najumetsënëtsiaya baracuaicuajjai tsabiabi tsane itsamonae. Apo caëjëpaetsi tsane penajamatabëcuenecataitsinexa pibisiacuene pexanaejava. Anaepanabiabiana bitso pebejioxiaenexaenexa itsamonae. Itoya tsane daxita pexaniacuene pexanaevi.

⁴ Bajarapamonae canajetsiana penajuajinavanapaevi ata pijavajabitsaë pecobeyabelia. Xaniavaetsia najamatabëxainaenejeva, exanaena daxitacuene. Bijlaya naëcotsiana itsamonae. Dioso apo jamatabënajinae tsane. Jaitsiana biji pebarëyajamatabëcuene saya pebarëyanexa.

⁵ Bajarapamonae itajara najonena Dioso pejumecovënëtsivijavabelia. Itsi-ata baitsi jane apo jumecovënëtsi tsane Dioso pejumelivaisi, jumetae ata. Bajarapamonae navecuatsatsianame.

⁶ Bajarapamonae navecuatsatsianame tsipaji bajarapamonaeayajuvënëvi itsamonae pijabonëjavabelia joneyabiabiana. Nexata bajarapabonëpijivi, petiriavi, bajarapamonae yamaxëitojorobabiabiana. Bajarapapetiriavi jamatabëcuenefaenaena. Daxitacuene pibisiacuene jamatabëexanabiabiana.

Nexata pamatacabi bajarapapetiriavi pibisiacuene jamatabëexana, patabiabiana penajumetsënëtsilivaisi petsipaebinexatsi. Nexata bajarapapetiriavi itsa tsipaebianatsi penajumetsënëtsilivaisi, beDioso itajara pejumelivaisi petsipaebivi taeyabiabiana.

⁷ Bajarapapetiriavi picani jitsipaena petsipaebibabinexatsi Dioso pejumelivaisi. Itsiata baitsi jane apo tsijamatabëjonetsi tsane pepo pexaniajailivaisi pecapanepaelivaisinexatsi Diosojavabelia.

⁸ Bajayata penajorobinëmibeje, Janespijinëmibeje Jambrespijinëmibeje, nayajiviitavetabeje Moiséspijinë pexaniajailivaisi petsipaebiyaniavatsibeje. Bajara pijinia pacuenia pamonaë petiriavijavabelia penajumetsënëtsilivaisi tsipaebaponaena. Bajarapamonaë nayajiviitavetaponaena pepo pexaniajailivaisi petsipaebiyaniavatsi. Bajarapapebijivi apo caëjêpaetsi tsane penajamatabëxainæna xaniavaetsia. Bajarapamonaë saya yamaxëitojorobiaya jumai tsabiabi tsane itsamonaëjavabelia: "Paxanë raja Dioso patajumecovënëtsivi," jai tsabiabi tsane.

⁹ Itsiata bajarapamonaë ayaiabitsaëto jivi apo pënäponaetsi tsane. Daxitajivi cuenyapëtaenatsi bajarapamonaë saya jema livaisi petsipaebaponæjava. Nexata pacuenia bajayata Janespijinëmibeje Jambrespijinëmibeje daxitajivi cuenyapëtanetsibeje pibisiacuene pexanaponæjavabeje, bajara pijinia pacuenia bajarapamonaë ata daxitajivi cuenyapëtaenatsi penajumetsënëtsilivaisi petsipaebaponaëjava.

Pacuenia baja Pablo copatsijitsia Timoteo pemuxujibijava yabara pelivaisi

¹⁰ Timoteo, xamë baja cajena yapëtaneme palivaisi tsipaebabiabajë jivibitsaëtoxanetojavabelia. Yapëtanemenua baja cajena pacuenia xaniavaetsia ponaponajë. Yapëtanemenua pacuene yabara Dioso tonacuenebaponaponajë. Yapëtanemenua pacuenia Dioso jumecovënëtaponaponajë. Yapëtanemenua pacuenia itsamonaëjavabelia livaisi tsipaebaponajë bajayajebi copatsinejevanë. Yapëtanemenua pacuenia itsamonaë ata asivanë. Yapëtanemenua pacuenia casaënë tsaponaponæ jivi livaisi tatsipaebaponæjava netoayapëbeje ata.

¹¹ Yapëtanemenua pacuenia itsamonaë pibisiacuena nebaracuaicuaijai tsabiabi Jesucristo tajumecovënëtsinëxae. Yapëtanemenua pacuenia nebejiobiaexanapona. Yapëtanemenua pacuenia nebejiobiaexana Antioquia tomarata, Iconia tomarata ata, Listra tomarata ata. Bajarapatomaranëpijivi bitso nebejiobiaexana. Itsiata baitsi jane Dioso necapanepa daxita bajara pacuenevecu.

¹² Xaniajai cajena. Daxita pamonaë najamatabëcuene copata xaniavaetsia petojinavanapænæna Jesucristo, bajarapamonaë bejiobiaexanaponaenatsi.

¹³ Nexata pibisiajamatabëcuenevi, pamonaë dovathi pejamatabëcueneta jivi yamaxëitojorobapona, orijibia bitso pevajënaeyabelia pibisiacuene exanaponaena. Bajarapamonaë dovathi pejamatabëcueneta jivi yamaxëitojorobaponaena. Nexata pijinia bajarapamonaë ata bitsoyo dovathi yamaxëitojorobaponaenatsi.

¹⁴ Timoteo, itsiata baitsi jane xamë casaëmëre tsaponaponæ palivaisi baja capanepaeya jumecovënëtamë. Tsipaji baja cajena xamë jamatabëcuenyapëtaneme pacuenia jamatabëcueneitsi pamonaë catsipaeba bajarapalivaisi.

¹⁵ Tsiquirinëyomëjavaveliacujinaë baja cajena yapëtaneme Dioso pejumelivaisi. Bajarapalivaisi cayapëtaeyæxana pecacapanepæjavanæna Diosojavabelia nenajamatabëcuene copatsixæ Jesucristo javabelia.

¹⁶ Dioso pijajivi Espíritu Santo itorobatsi peyaquinaenexa Dioso pejumelivaisi. Nexata pacuenia Espíritu Santo itorobatsi, bajarapacuenia Dioso pijajivi yaquina daxita Dioso pejumelivaisibaxutonēnexa. Nexata nacatoxanepana Dioso pejumelivaisi itsamonae vajanacatsipaebinexa vajayapētaenexa pexaniajailivaisiucene. Nacatoxanepanana Dioso pejumelivaisi vajanacaitavetsinexa apo pexanepanaecuenē itsa exanatsi. Nacatoxanepanana Dioso pejumelivaisi vajanacajamatabēcueneitorobinexa ēDioso pejitsipaecuenē vajatoexanabiabinexa. Nacatoxanepanana Dioso pejumelivaisi vajanacayapētaeyaexanaenexa xaniavaetsia vajatojinavanapaenexa Dioso.

¹⁷ Nexata Dioso pejumecovēnētsinē itsa yapētane Dioso pejumelivaisi, jamatabēcuenecaējēpaenatsi daxita xua pexaniacuene pexanaenexa.

4

¹ Pepo petuxanenē Jesucristo patsianica penaneconitsiaexanaenexa daxita pibisiacuene pexanaevi. Naneconitsiaexanaena piasaētsavanapaevi, petēpaevi ata. Bajaraponē itsa patsianica, daxitacuene pevetsinexa, patsianica. Jesucristo pitabarata, Dioso ata pitabarata, xanē jamatabēcuenereviaya caitorobatsi mapacueniaje.

² Daxitamatacabi jivi tsipaebare Dioso pitorobilivaisi. Ajamatabēcuenesaēya Dioso pitorobilivaisi tsipaebaponare. Paepatota jivi jitsipa pecanamuxunaevetsinexa, tsipaebare. Paepatota ata apo jitsipae pecanamuxunaevetsinexa, itsiata tsipaebare. Dioso pitorobilivaisi jivi jumecovēnētsiaexanare. Itavere pibisiacuene pexanaejava. Muxujibare pajamatabēcuenesaēnexa Diosojavabelia. Tsipaebaponare xaniavaetsia Dioso pejumelivaisi bajayajebi jamatabēcuene cueranaenejevamē.

³ Bajarapacuenia tsipaebaponare tsipaji raja itsamatacabi jivi apo namuxunaevetsi tsane pexaniajailivaisi petsipaebijavatsi. Biji rajane itsamatcabi jivi pijacuata natojaitisiana saicayalivaisi Dioso pejumelivaisivecua ayaiBITSaēto petsipaebinexatsi. Bajarapamonae pijacuata junatsiana petsipaebinexatsi palivaisi muxujitsipa.

⁴ Nexata pexaniajailivaisi petsipaebiyaniivatsi, navecuaitavetsiana. Jumecovēnētsiana saya ēnatsiquejemalivaisixi.

⁵ Itsiata baitsi jane xamē saicaya nayajivitaeyaponaponare. Daxita pacuenia Dioso catocopata nexanaenexa, veretsianame. Catoayapēbeje ata, itsamonae cabejiobiaexanae ata, casaēmēre tsaponaponae nevajēnaeyabelia. Casaēmēre tsaponaponae jivi netsipaebijava pexaniaalivaisi pecapanepaelivaisinexatsi Diosojavabelia.

⁶ Xanē baja netoimoxoyo tsaponae tatonacaevetsinexa tanebeyaxuabinexa.

⁷ Pacuenia pebitsojinaenē pecujinaejinaejava daxitasaēta cujinaejinaejava pata, bajarapacuenia xanē ata xaniavaetsia daxita tasaēta tonacuenebajē tajatuxanenē. Toveretaponajē baja tatonacuenebijava taneitorobicuenia. Apo copatsinē cajena tanajamatabēcuene copatsijava Diosojavabelia.

⁸ Pacuenia penayacobijavata, pebitsojinaenē pecujinaejinaejava, barajutatsi corona pecujinaejinaematamo, bajara pijinia pacuenia xanē ata vajatuxanenē athēbētatsia nerajutsiana pexaniacuene taneitorobicuenia tatonaponaeaxae. Bajarapacuenē nerajutsiana pamatacabi vajatuxanenē patsianica. Itsiata baitsi jane ēxanē apo nerajutsi tsane bajarapacuenē. Daxita pamonaē ata ajamatabēcuenesaēya vajēnaeevetavanapa pepatsijavatsica Jesucristo, bajarapamonae ata rajutsianatsi bajarapacuenē. Vajatuxanenē itsa patsianica, naneconitsiaexanaena daxita pamonaē naneconita

bajaraponëjavabelia. Vajatuxanenë itsa naneconitsiaexanaena daxita pamonae naneconita bajaraponëjavabelia, itaxutojema apo naneconitsiaexanae tsane. Paneconivajëto caejivi canacujitsia xainapona, bajarapaneconivajëtota naneconitsiaexanaponaena.

Pacuenia Pablo jumaitsi Timoteojavabelia yabara pelivaisi

⁹ Itsa cacuenecaëjëpa neponaejava, bepijiayo netaeyojopaeremena.

¹⁰ Demasvënënë rabaja nexuabatabajirava. Tsipaji Dioso pejumelivaisi matatoxenetsia jitsipa bitso mapanacuapijicuenëje. Pona baja nexata Tesalónica tomarabelia. Crescentevënënë baja itorobajë Galacia nacuyabelia. Tito pijinia itorobajë Dalmacia nacuyabelia.

¹¹ Caenë Lucas xanëjavata ponapona. Jaire Marcos. Bajaraponë caëjëpatsi taneyavenonaenexa Dioso tatonacuenebijava. Nexata barërenamë tsane.

¹² Tíquico baja itorobajë Efeso tomarabelia.

¹³ Itsa renamë tsane xanëjavaberena, Troas tomarata tajacamisajumavelia tanaxatatsijava netopitaponaeremena. Carpovënënë raja pijabota puenatarutajë. Tajalibronënuu, tajacuyalatobaxutoxinua, netopitaponaeremena. Bitso tajacuyalatobaxutoxi namatavenonajë.

¹⁴ Alejandro, cobrenanita daxitacuene pexanaenë, bitso baja cajena pibisiacuene nexana. Itsiata baitsi jane Dioso neyamamatamotsiana tanebejio-biaexanaematamo.

¹⁵ Nayajivitaema bajaraponë. Tsipaji raja bitso itoya patatsipaebaponaelivaisi.

¹⁶ Pamatacabi nayajivicuaicuaijanë majotaje Roma tomarata, nacua pevetsivi pitabarata, itsajivi ata apo neyavenonaeyacuaicuaijai. Daxita nexuabanuta. Nexata bajarapamonae tovajëtajë Diosojavabelia penaneconitsiaexanaeyanivatsi tanexuabanutsijamatabëcuene.

¹⁷ Itsiata baitsi jane bajarapaepatota vajatuxanenë neyavenona. Vajatuxanenë pesaë nerajuta daxitalivaisi tatsipaebinexa. Apo judíovi ata pejumecovënëtsinexa, bajarapalivaisi tsipaebaponajë Diosojavabelia pecapanepaelivaisinexatsi. Tanexuabanutsijavata picani netsiayai tanebeyaxuabinexa. Itsiata vajatuxanenë necapanepa tanebeyaxuabijavaminexavecua.

¹⁸ Vajatuxanenë cajena necapanepaponaena daxita pibisiacuene taneexanaeyaniva. Necaponaena athëbëabetsia bajaraponë pevetsinacuayabet-sia. Vaxaitsi jumai tsabiabi tsanetsi Diosojavabelia daxitamatacabijavabelianexa: “Diosomë, pinijicueña baja cajena nexanaenë,” jai tsabiabi tsanetsi.

Pacuenia Pablo Timoteo tonajumeitoroba Efeso tomarabelia pebajacobinexatsi peyapëtaevitsi yabara pelivaisi

¹⁹ Nebajacobiana Prisca. Prisca pamona ata, Aquila, nebajacobiana. Nebajacobiana Onesiforo pijamonae ata.

²⁰ Erasto nacopatajopa Corinto tomaratalia. Trófimo pijinia puenetajë Mileto tomaratalia. Tsipaji avitane.

²¹ Itsa cacuenecaëjëpa, naxanitsiayo renamë tsane emarapae pecopiajopaevajënaeya. Cajamatabënajina pina Eubulo, Pudente ata, Lino ata, Claudia ata, daxita itsamonae Dioso pejumecovënëtsivi yajava.

²² Catovajëtatsi vajatuxanenë Jesucristo pecayajavaponaponaenexa. Daxita paxamë pacatovajëtatsi Dioso papecayavenonaenexa.

Mapabaxutoje San Pablo toyaquina Titojavabelia

Pacuenia Pablo mapabaxutoje toyaquina Titojavabelia yabara pelivaisi

¹ Xanë Pablonë, Dioso pijajivitonënë. Jesucristo ata pijaapóstolenënë. Jesucristo baja cajena nitoroba jivi tayavenonaenexa Diosojavabelia penajamatabëcuenecopatsinexa. Dioso baja cajena tajëvelia itapeta bajarapamonae penajamatabëcuenecopatsinexa Diosojavabelia. Jesucristo nexata nitoroba bajarapamonae tatsipaebinexa pexaniajailivaisi Dioso pitabarata bajarapamonae xaniavaetsia pejinavanapaenexa.

² Jesucristo nitoroba tatsipaebinexa pexaniajailivaisi bajarapamonae ata pexainaenexa matababi apo pevereverecejava. Pepo bajayatami, Dioso abaxë nacua ata itsa apo exanae, Dioso najumecapanepaeya jumaitsi vajanacarajutsinexa matababi apo pevereverecejava. Dioso baja cajena apo penajumetsënëtsinë.

³ Nexata baja Dioso pecaëjëtsimatababita, bajarapalivaisi nacayapëtaeyaexana. Nexata Dioso, vajanacapanepaenënexa, xanë nitoroba jivi tatsipaebinexa bajarapalivaisi. Nexata xanë daxitajivi tsipaebaponajë bajarapalivaisi.

⁴ Tito, betaxënatomëcuenia tacataenë. Tsipaji cayavenonatsi xamë ata nejumecovënëtsinexa Jesucristo pelivaisi. Catoyaquinatsi mapabaxutoje. Catojitsipatsi vaxa Dioso pecayavenonaenexa, Jesucristo ata, vajanacapanepaenënexa, pecayavenonaenexa. Catojitsipatsi pecaitaxutotsoniataenexa, pecajamatabëcuene xanepanaeyaexanaenexana.

Pacuenia Pablo Tito puenetanuta Cretatunaeto nacuata petonacuenebinexa Dioso pijacue yabara pelivaisi

⁵ Capuenetatsi baja cajena Cretatunaeto nacujavata. Capuenetatsi nexanaponaponae, xua abaxë catosajina nejamatabëcuenesaëyaexanaenexa Dioso pejumecovënëtsivi. Caitorobatsinua baja cajena caetomarapijivi canacujitsia nitapetsinexa ancianovinexa, Dioso pejumecovënëtsivi pevetsivinexa.

⁶ Nejumenajamatabënapire pacuenia caitorobatsi. Itsa itapetsijitsiamë ponë ancianonënexa, itapetsianame ponë toajibitsi jivi peyabaraneconitsijavanexatsi. Caeva pepitsinë. Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi itoroba, pejumecovënëtsinëtsi.

⁷ Tsipaji ponë itapetsianame ancianonënexa, Dioso pijacue tonacuenebiana. Bajaraxuata ancianonënexa, itapetsianame ponë xaniavaetsia peponaponae, pianeconijibinë. Beayaijamatabëcuenenë apo penataenë. Bepijia apo pianaepanaenë. Apo piapaenë piatajibinexa. Pevëna pebi apo pebenë. Apo pejitsipaenë itsajivi ata yamaxëitorobiaya pevecuanacobetoxotsinexa palata.

⁸ Ancianonënexa, xanepana ponë xaniavaetsia copiapitabiaba pijabota pectatsivi. Pexaniacuene pexanaenë. Xaniavaetsia copiaya penajamatabëxainaenë pacuene exanaejitsia. Xaniavaetsia peponaponae jivi pitabarata, Dioso ata pitabarata. Pexanaponaponae daxita pacuenia Dioso pejumelivaisita itoroba jivi pexanaenexa. Pecaëjëpaenëtsi penajamatabëcuenecatatsinexa pibisiacuene pexanaeyaniva.

⁹ Ancianonënexa, xanepana ponë casaë tsaponaponae pejumecovënëtsijava palivaisi tsipaebatsi, pexaniajailivaisi. Bajarapacuenia

nexata bajaraponē caējēpaenatsi itsamonae ata pejamatabēcuenebabatsinexa pexaniajailivaisita. Caējēpaenatsinua xaniavaetsia pejumecanaviatsinexa pamonae jamatabēcuenenavēxaniabiaya pibisiacuenia baracuaicuaijai Dioso pejumelivaisi. Nexata ancianonē xaniavaetsia itsa jumecanaviatsiana pamonae pibisiacuenia baracuaicuaijai Dioso pejumelivaisi, bajarapamonae ata jumecovēnētsiana Dioso.

¹⁰ Bajarapitsijamatabēcuenevi itapetaponaename ancianovinexa. Tsipaji raja Cretatunaeto nacuata, Dioso pejumecovēnētsivi tuatujēta, ayaibitsaēto jinavanapa apo pejumecovēnētsivi pacuenia itorobatsi pevetsivitsi. Bajarapamonaeajuvēnēvi ayaibitsaēto judiōvi. Bajarapajudiōvi jumai tsabiabi: “Pamonae apo judiōvi ata Jesūs pelivaisi itsa jumecovēnēta, bajarapamonae ata benaperabēcaucubiaexana,” jai tsabiabi. Bajarapajudiōvi natsiquejemalivaisi saya cuaicuaijai tsabiabi. Nexata yamaxēitojorobapona Dioso pejumecovēnētsivi.

¹¹ Bajarapajudiōvi bejumeitavetame. Tsipaji saya penajumetsēnētsilivaisi jivi tsipaebapona Dioso apo pejitsipaecuenia. Bajarapajudiōvi, caebopijivi canacujitsia, Dioso pejumecovēnētsivi, najamatabēcuene epatajērērēcaeyaexanapona Dioso pejumecovēnētsijavavecu. Bajarapajudiōvi penajumetsēnētsilivaisi jivi tsipaebapona saya pematamotsinexatsi palata.

¹² Bajayata pina livaisi bitso peyapētaenēmi ponapona Cretatunaeto nacuata. Nexata pina bajaraponēmi jumaiṣi Cretatunaeto nacuapijivi yabara mapacueniaje: “Cretatunaeto nacuapijivi cajena bitso penajumetsēnētsivi. Bitso piacujirubejevi. Ayaijavanua jamatabēxayabiaba. Bitso afaetabinua,” jai pina cajena bajayata Cretatunaeto nacuapijinēmi.

¹³ Xaniajai baja cajena pacuenia jumaiṣi bajaraponēmi. Bajara jamatabēcueneṣi Cretatunaeto nacuapijivi. Tito, nexata xamē asaēyata itorobare bajarapamonae xaniavaetsia penajamatabēcuene copatsinexa Dioso javabelia.

¹⁴ Itavere bajarapamonae penamuxunae vetsiyaniva judiōvi pijasalinaivimi pijalivaisixi. Itaverenua bajarapamonae pejumecovēnētsiyaniva pacuenia itorobaponatsi pamonae copaba pexaniajailivaisi pejumecovēnētsijavami.

¹⁵ Pajivi jumecovēnēta Jesucristo pesivatēpaejavatsi, bajarapajivi jamatabēcuenexuirajibi. Bajarapajivi daxita xua tane, ēpexaniacuenia sivanamatabēxaina. Nexata itsacuenjavayo ata apo jamatabēcuenebijianaetsi. Pajivi pijinia apo jumecovēnētsi Jesucristo pesivatēpaejavatsi, bajarapajivi ajamatabēcuenexuira. Nexata bajarapajivi daxita xua tane, pibisiacuenia sivanajamatabēxaina. Nexata daxitacuene jamatabēcuenebijianatsi. Pibisiacuenie exanabiabi ata, jamatejema saya ponapona.

¹⁶ “Xanē rabaja bitso Dioso yapētaniji,” jai tsabiabi. Itsiata baitsi jane bajarapamonae pibisiacuenie exanavanapa. Nexata nayapētane Dioso apo peyapētaejava. Bajarapamonae itoya Dioso. Bajarapamonae apo jumecovēnētsi pacuenia Dioso itorobatsi. Nexata apo caējēpaetsi itsacuenjavayo ata pexaniacuenie pexanaenexa.

2

Pacuenia Pablo Tito itoroba pexanialivaisi jivi petsipaebaponaenexa yabara pelivaisi

¹ Tito, xamē jivi livaisi itsa tsipaebabibianame, tsipaebabibianame ēpexaniajailivaisi.

² Perujupebijivi muxujiobabiabianame penajamatabëcuenerëviabinexa. Muxujiobabiabianame xaniavaetsia pejinavanapaenexa jivi peyaiyatuënexatsi. Muxujiobabiabianame penajamatabëcuëncataitsinexa pibisiacuene pexanaeyaniva. Muxujiobabiabianame pexaniajailivaisi, Jesús pelivaisi, xaniavaetsia pejumecovënëtsinexa. Muxujiobabiabianame daxitajivi asivaya petaenexa. Muxujiobabiabianame, itsamonae bejiobiaexanae atatsi Dioso pejumelivaisi yabara, pevajënaeyabelia pecaasaënexa Dioso pejumecovënëtsijava.

³ Bajara pijinia pacuenia muxujiobabiabianame perujupetiriavi ata jamatabëcuenerëviaya pejinavanapaenexa Dioso pitabarata. Bajarapamonae pibisiacuënia itsamonae apo bebaracuaicuajjai. Apo biaitajibi tsabiabinua. Bajarapapetiriavi itsamonae pexaniacuëne betsitaxanavanapa.

⁴ Nexata perujupetiriavi itsamonae pexaniacuëne itsa tsitaexanavanapa, jamatabëcuëncujarubiana pecovëpijipetiriavi ata xaniavaetsia pamonajivi pi-asivanaexa, penacoxiasivanexana.

⁵ Perujupetiriavi itorobianame pemuxujiobabiabinexa pecovëpijipetiriavi ata penajamatabëcuenerëviabinexa, pexaniajamatabëcuëne ata penajamatabëxainanexa. Perujupetiriavi muxujiobabiabianame pijabo ata xaniavaetsia pevetsinexa, pexaniacuëne ata pexanabiabinexa, pamonajivi ata xaniavaetsia pejumecovënëtabiabinexa. Nexata juya perujupetiriavi muxujiobabiabiana pecovëpijipetiriavi xaniavaetsia pejinavanapaenexa. Nexata bajarapamonae xaniavaetsia itsa jinavanapaena, itsajivi ata pibisiacuënia Dioso pejumelivaisi apo baracuaicuajjai tsane.

⁶ Bajara pijinia pacuenia muxujiobabiabianame pevëjëavi penajamatabëcuëncataitsinexa pibisiacuëne pexanaeyaniva.

⁷ Xamë xaniavaetsia bajarapamonae ëpexaniacuëne tsitaexanaponaponae-name. Nexata bajarapacuenia daxitajivi cacuenetaena xaniavaetsia nepon-aponaejava. Pexaniajilivaisi itsa tsipaebabiabianame, tsipaebabiabianame nejamatabëëthëtovetsina nexaniajajijumeta jamatabëcuenerëviaya.

⁸ Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, pecaitoyavi ata aura tsane. Tsipaji ajibi tsane pecayabarananeconitsiaexanaejava.

⁹ Pajivi bedajubicuenia canajetatsi petonacuënebabiabinexa amoneya pijatuxanenë, bajarapajivi muxujiobabiabianame pijatuxanenë pejumecovënëtsinexa daxita pacuenia itorobatsi. Muxujiobabiabianame xaniavaetsia pijatuxanenë petonacuënebabiabinexa pesivajamatabëcuënebarëyanexatsi. Pëtsa bajarapajivi apo jejai pijatuxanenë pitorobijavatsi. Pëtsa jumaitsi pijatuxanenëjavabelia: "Jume raja. Bajarapacuenia apo xanepanae tacatoexanaenexa. Mara jane pacuenia xanepana tacatoexanaenexaje," jai pëtsa.

¹⁰ Pëtsa bajarapajivi muetsia pita pijatuxanenë pijajava. Biji rajane pijatuxanenëjavabelia tsitanajamatabëcuëneitajëtsi daxitacuëne xaniavaetsia petonacuënebabiabijava nacobetoxotsinejeva. Bajarapacuenia itsa exanaena bajarapajivi, nexata daxitajivi yapëtaena Dioso vajanacapanepaenënexa pejumelivaisi pexaniajailivaisicuëne.

¹¹ Dioso baja cajena nacayapëtaeyaxana vajanacaitaxutotsoniataejava. Nexata Dioso nacacapanepaena daxitanacuapijivitsi.

¹² Dioso vajanacayapëtaeyaxanaexae vajanacaitaxutotsoniataejava vajanacapanepaenexa, nexata becopatatsi pibisiacuëne vajaexanaejavami. Bitso vajajitsipaajava ata mapanacuapijicuëne vajaxanaenaxa, becopatatsi. Dioso rajane jitsipa mapanacuata nayajivitaeya vajajinavanapaenexa pibisiacuëne vajaexanaeyaniva. Nexata Dioso

pejitsipaecuena betoexanavanapatsi. Dioso cjunaviaya xaniavaetsia bejinavanapatsi.

¹³ Bajarapacuenia Dioso cjunaviaya xaniavaetsia bejinavanapatsi paepatojebi Jesucristo copiaevetavanapatsi icatsia pepatsijavanexatsica. Nexata icatsia pamatacabi Jesucristo patsianica, sivajamatabëcuenebarëyatsi tsane. Pacuenia Dioso tajëvelia najumecapanepaeya nacajumaitsi Jesucristo pepatsijavanexatsica, bajarapacuenia xaniajai Jesucristo patsianica. Jesucristo rabaja cajena, pinijiDiosonë, vajanacapanepaenexa. Bajaraponë penivenivaecotia yajavapatsianica.

¹⁴ Bajaraponë pijacuata tonacaeveta pijavajabitsaë pebeyaxuabinexatsi. Nexata Jesucristo ita beyaxuabatsi, pijanata nacacomuata pibisiacuene vajaexanaeconivecua. Nacavecuajibiaexana baja bajarapaneconimi Jesucristo pijajivitsi vajanacaexanaenexa. Nacajitsipaeyaexananua ëpexaniacuene Jesucristo vajatoexanaenexa.

¹⁵ Daxita bajarapacuenia muxujobaponaename. Jamatabëcuenebabataponaename asaëya bajarapamonae. Asaëya muxujobabiabianame pibisiacuene ita exanapona. Bajarapacuenia muxujobabiabianame Dioso pecatocopatsixae bajarapacuenia nexanaponaenexa. Pëtsa copatame itsajivi ata bjiya pecataenexa.

3

Pacuenia Dioso pejumecovënëtsivi pexaniacuene bexanavanapa yabara pe-livaisi

¹ Dioso pejumecovënëtsivi, Cretatunaeto nacupijivi, najamatabënapitsiaexanaename yayataeya pejumecovënëtsinexa gobierno pitorobilivaisi, pejumecovënëtsinexanaa gobierno pijajivi ata. Itorobianamenua bajarapamonae pexanaenexa daxitaxua pexaniacuene.

² Muxujobabiabianame bajarapamonae itsajivi ata pibisiacuena pe-baracuaicuajiyaniya. Muxujobabiabianame bajarapamonae, itsamonae itsacueniabi atatsi, pecunenacaviatsiyaniva. Muxujobabiabianame bajarapamonae pexanijamatabëcuena pebarëcuaiacuajainexa daxitajivijavabelia. Itorobianamenua daxitajivivecua bevelijamatabëcuenevi nataeya pejinavanapaenexa.

³ Itsa abaxë vaxaitsi ata Dioso apo jumecovënëtsitsi, saya picani jema jinavanapatsi. Apo exanavanapaetsi pacuenia Dioso nacaitoroba. Apo exanavanapaetsinua pacuenia nacuaevevtsivi ata nacaitoroba. Naxuabiaya saya jinavanapatsi Dioso pejumelivaisivecua. Pibisiacuene, pacuene vajavitota jamatabëexanatsi, exanavanapatsi. Pacuene ata nacajamatabëcuenebarëyayaexana, exanavanapatsi. Pibisiacuene bitso exanavanapatsi itsamonaejavabelia. Itsamonae cuenecaëbabiabatsi. Daxitajivi nacaitoya tsabiabi. Vaxaitsi ata namataenetsia naitoyatsi tsabiabi.

⁴ Bajara vajaitsivimi ata, itsiata Dioso, vajanacapanepaenënexa, nacayapëtaeyaexana vajanacaitaxutotsoniataecuene. Nacayapëtaeyaexananua pacuenia ata Dioso nacaasiva daxitatsi manacupijivitsije.

⁵ Dioso nacacapanepaena vajaneconivecua. Itsiata baitsi jane pexaniacuene vajaexanaejaya yabara, Dioso apo nacacapanepae tsane. Jume baja cajena. Dioso raja nacacapanepaena tsipaji nacaitaxutotsoniatane. Nexata nacajamatabëcuenequiata. Dioso vajanacaitaxutotsoniataexae, nacacapanepaena. Espíritu Santo pejamatabëcueneta pejanajamatabëcuenevitsi baja nacaexana.

⁶ Dioso baja cajena ayaicuenia vajanacayavenonaenexa, Espiritu Santo nacatoitorobica vaxaitsijavabetsica. Bajarapacuenia Dioso Espiritu Santo nacatoitorobica Jesucristo vajanacapanepaenēnēxa pejamatabēctsoniatane. Nexata nacajamatabēcuenequiata. Dioso vajanacaitaxutotsueneta.

⁷ Bajaraxuata Dioso vaxaitsi yabara jumaitsi: “Bajarapamonae baja aneconijibia taniji,” jai Dioso. Tsipaji nacaitaxutotsoniatane. Nexata vaxaitsi xainenatsi matabi apo pēvereverecaejava, xua copiaevetavanapatsi.

⁸ Daxita baja palivaisi pacatoyaquinatsi, pexaniajailivaisi cajena. Nexata jitsipajē ajumesaēya jivi netsipaebaponaenexa bajarapalivaisi. Nexata Dioso pejumecovēnētsivi ēpexaniacuene pexanaenexa pejamatabēcueneenaenexatsi. Bajarapalivaisi bitso xanepana daxitajivi pejumecovēnētsinexa.

⁹ Nexata navecuaitavetsianame saya jema natsiquejemalivaisixi itsamonae pecabarēcuaiicuaijayaniva. Navecuaitavetsianamenua judiōvi pijasalinavimi pevēnēxi yabara pecabarēcuaiicuaijayaniva. Navecuaitavetsianamenua Dioso Moiséspijinēta penajumecopatsilivaisi yabara anaeya pecajumenotsiyaniya. Bajarapacuenia pecabarēcuaiicuaijajava apo xanepanae tsipae itsacunejavayonexa ata.

¹⁰ Itsamonae penajumetsēnētsilivaisi jivi tsipaebapona. Nexata bajarapamonae penajumetsēnētsilivaisita Dioso pejumecovēnētsivi navecuantsanaeyaexanapona. Bajarapamonae jumeitavetsianame. Anijato-beje ata jumeitavetsianame. Nexata bajarapamonae copatsiana penajumetsēnētsilivaisi jivi petsipaebaponaejava. Jumeitavetsi atamē, itsiata itsa apo cajumecovēnētsi tsane, nexata bajarapamonae itorobianame itsajavabelia peponaenexa.

¹¹ Yapētaneme rabaja mapacueneje. Ponē peneta copata pexaniajailivaisi pejumecovēnētsijavami, pibisiacuene exana. Nexata bajaraponē naneconita Diosojavabelia pibisiacuene pexanaexae.

Pacuenia icatsia Pablo itsalivaisi toitoroba Tito asaēya Dioso petonacuenebinexa yabara pelivaisi

¹² Catoitorobialiatzi Artemas. Itsa jume, catoitorobialiatzi Tiquico. Bajaraponē itsa patsialia xamējavabelia, nexata xamē bepija renamē tsane xanējavaberena. Nacaxitarabianatsibeje Nicāpolis tomarata. Daxita emarape raja ponaponaenajē Nicāpolis tomarata.

¹³ Itsa baja pacavecuaponaena Zenasbeje Apolosbeje, nexata yavenonaenename pacuenia namatavenonaenabeje pijanamutobejenexa. Zenas raja abogadonē, penaneconitsivi peyavenonaeyacuaiicuaijainē. Rajutsianame pacuenia namatavenonabeje, itsacunejavayo ata petosajinaeyanivatsibeje itsa najetarucabeje namuto.

¹⁴ Pamonaē vaxaitsi pexanialivaisi tsipaebatsi, bajarapamonae tojitsipajē peyapētaenexa xua pexaniacuene. Nexata ēpexaniacuene pexanaenexa. Nexata bajarapamonae tojitsipajē asaēya penacuenebinexa, peyavenonaenexa pamonaē bitso bepejiobivi. Pētsa saya bajarapamonae jinavanapa nacuenebinejeva.

Pacuenia Pablo itsamonae jamatabēnajina yabara pelivaisi

¹⁵ Daxita pamonaē yajavaponaponajē, cajamatabēnajinalia. Pajamatabēnajinaliajē daxita pamonaē pataniasivavi, Dioso pejumecovēnētsivi. Pacatovajētatsi Diosojavabelia daxita paxamē Dioso papecayavenonaenexa.

Mapabaxutoje San Pablo toyaquina Filemónjavabelia

Pacuenia Pablo mapabaxutoje toyaquina Filemónjavabelia yabara pelivaisi

¹ Xanè Pablonè, Jesucristo pijajivitonèxaenè, Jesucristo pelivaisi jivi tsi-paebabiabajè. Bajaraxuata nenaneconitsiaexana. Nexata penaneconitsivi pejebabiabibota naneconitsiaponaponajè. Filemón, paxanèbeje vajabanané Timoteobeje, bitso pacaasivatsibeje patacayajavanacuenebabiabinèxaebeje. Paxanèbeje, pacatoyaquinatsibeje mapabaxutoje.

² Patoyaquinajèbejenua mapabaxutoje pamonaè Dioso pejumecovènètsivi, nijabota penacatuatabiavivi. Patoyaquinajèbejenua mapabaxutoje vajabanava Apiavènèva ata. Patoyaquinajèbejenua mapabaxutoje Arquipovènèna ata. Pacuenia xanè Dioso pijacuene tonacuenebabiabajè, bajarapacuenia Arquipo ata Dioso pijacuene tonacuenebabiaba.

³ Pacatovajètabiabatsi vaxa Diosojavabelia, vajatuxanenè Jesucristojavabelia ata, papecaitaxutotsoniataenexa jamatabècuenexanepanaeya panejinavanapaenexa.

Pacuenia Pablo tovajèta Filemón Diosojavabelia yabara pelivaisi

⁴⁻⁵ Filemón, cavènèlivaitsitanetsi niasivajava vajatuxanenè Jesucristo, daxita Dioso pejumecovènètsivi yajava. Cavènèlivaitsitanetsinua nenajamatabècuenecopatsijava pepo petuxanenè Jesúsjavabelia. Bajaraxuata itsa cajamatabènjainatsi, catovajètabiabatsi Diosojavabelia. Nexata pexaniajamatabècuene rajutabiabajè Diosojavabelia xamè yabara.

⁶ Pamonaè ata Diosojavabelia najamatabècuenecopaba xamè pexanialivaisi netsipaebixae, bajarapamonaè ata tovajètabiabajè Diosojavabelia. Tovajètabiabajè bajarapamonaè xaniavaetsia pepapètaenexa Dioso vajanacayavenonabiabijava Jesucristo pijajivixaetsi.

⁷ Itsamonaè ata Dioso pejumecovènètsivi niasivaxae, casivajamatabècuenebarèyatsi. Cavènèlivaismuxua najamatabècuenesaètsi. Tsi-paji daxita Dioso pejumecovènètsivi jamatabècuenebabatabiabame.

Pacuenia Pablo itoroba, Filemónjavata Onésimo itsa pata, xaniavaetsia Filemón pecopiapitsinexa yabara pelivaisi

⁸ Xanè Cristo taneitorobinèxae, nejamatabècuenecaèjèpa picani tacaitorobinexa xua bexaname Dioso pecasivabarèyanexa. Itsiata baitsi jane apo caitorobi tsanetsi.

⁹ Tacaasivaxae, saya pexaniacuena cavajètatsi pexaniacuene tanetoexanaenamè. Xanè Pablonè, perujunènè baja. Maparucæje naneconitsiaponaponajè penaneconitsivi pejebabiabibota Jesucristo pijajivitonèxaenè.

¹⁰ Majotaje, xanèjavata, nijajivitonè Onésimo patajopa, pecavecuana-jetabajiravinè. Nexata cavajètatsi pexaniacuene tanetoexanaenamè Onésimojavabelia. Onésimo raja betaxènatocuena tataenè pejumecovènètsixae Jesucristo pelivaisi. Pexanialivaisi, Jesucristo pelivaisi, Onésimo tatsipaebixae, jumecovènèta baja Jesucristo pelivaisi. Jesucristo pelivaisi Onésimo jumecovènèta majotaje, penaneconitsivi pejebabiabibota.

¹¹ Onésimo baja cajena bajayata bedajubinècuena comuatame amoneya nijabota pecatonacuenebabiabinexa. Nexata bajarapamatacabi catonacuenebi ata, itsiata itsacuenejavayo ata xaniavaetsia apo

catonacuenebi. Itsiata baitsi jane maparucaeje Jesucristo baja pelivaisi Onésimo pejumecovēnētsixae, xanēnexa xaniavaetsia netonacuenebaponapona. Nexata baja aeconoxae itsa naviatsipa xamējavabelia, xamēnexa ata xaniavaetsia catonacuenebijitsipa.

12 Nexata icatsia Onésimo catoitorobaliatsi mapabaxuto yajavaje. Copiapitsianame xaniavaetsia. Tspaji Onésimo bitso tasivanē. Itsa baja ponaponaena xamējavatalia, jamatabēnainabiabianajē bitso.

13 Naneconitsiaya ponaponajē penaneconitsivi pejebabiabibota pexanialivaisi, Jesucristo pelivaisi, jivi tatsipaebabiabixae. Bitso picani Onésimo asivanē xanējavata peponaponaenexa. Nexata Onésimo itsa ponaponaejitsipa xanējavata, neyavenonaponaeponeajitsipa xaniavaetsia. Taneyavenonaeenexa, betanetoitorobinēmēcuenia neyavenonabiabijitsipa.

14 Itsiata baitsi jane apo jitsipaenē Onésimo taneyavenonaponaenexa copiaya cavajētsinejevatsi. Apo jitsipaenēnua tacavajētsinexa tanetocopsinexamē bajaraponē taneyavenonabiabinexa. Biji rajane picani jitsipajē cavajētsinejevatsi nijacuate tanetocopsinexamē bajaraponē.

15 Onésimo picani itsa cavacuanajetabajirava, cavacuanatsata caematcabibeje. Itsiata baja icatsia aeconoxae xamējavabelia naviatsijitsialia. Nexata jane baja daxitamatacabijavabelianexa nijajivitonē tsaponaponaen tsane.

16 Pētsa baja taneme saya nijajivitonēcuenia. Biji rajane nijajivitonē ata, Dioso pejamatabēcueneta asivaya taenane benejuyapijinēcuenia. Xanē picani bitso asivanē Onésimo. Itsiata xanē bajaraponē tasivajava matatoxenetsia, xamē bitso asivamē tsane. Tspaji xamē bajaraponē nijajivitonē. Nejuyapijinēnua baja Dioso pejamatabēcueneta.

17 “Pablobeje rabaja patanajuaponaenēbeje,” itsa nesivajamatabējamē tsane, nexata Onésimo xaniavaetsia copiapitsianame, pacuenia xanē necopiapitabiabame.

18 Onésimo itsa catonaneconita, itsa camoneyabanua, nexata xanē bajaraxumatamo neyanijobianame.

19 Peneta raja paitanebērētoyo jumaitsi: “Xanē Pablonē. Camatamot-sianatsi cajena,” jai, xanē tajacuata tacobeta yaquinajē. Itsiata pijinia pacuenia niamoneyabame, apo catoitajētsitsi. Tspaji itsa catoitajētsipatsi pacuenia niamoneyabame, nexata jitsipaejitsipame daxitanēmē, nejamatabēcuenē yajava, tanerajutsinexamē.

20 Tajabananē, pacuenia cavajētatsi, xaniavaetsia copiapitsianame Onésimo Jesucristo pijajivitonēxaemē. Xaniavaetsia Onésimo itsa copiapitsianame, bitso nejamatabēcuenēbarēyaya exanaenane.

21 Catoyaquinatsi mapabaxutoje tspaji yapētani tanejumecovēnētsijavanexa tacaitorobucuenia. Casivajamatabējumaitssitsi mapacueniaje: “Filemón cajena taitorobucuenia matatoxenetsia xaniavaetsia copiapitsiana Onésimo,” casivajamatabējajitsi.

22 Caecuenia tavajēnaeyabelia cavajētatsi tavajēnaelia nijabota tanetoxaniavaetsinexamē, itsajota patsijitsianē itsa ponajē paxamējavabelia. Tspaji bajayajebi panetovajēcabiabame Diosojavabelia tapatsinexa paxamējavabelia. Nexata jamatabējumaitsinē: “Pacuenia bajaraponaenē netovajēcabiaba Diosojavabelia, bajarapacuenia Dioso netocopsiana,” jamatabējanē taponaeenexa paxamējavabelia.

²³ Epafras, ponëbeje panajuaponaponajëbeje penaneconitsivi pejebabiabi-bota Jesucristo pijinia pijajivitonëxae, bajaraponë cajamatabënajinalia.

²⁴ Cajamatabënajinalia Marcos ata, Aristarco ata, Demas ata, Lucas ata. Cajamatabënajinalia daxita bajarapamonae patanajuanacuenebivi Dioso pijacue.

²⁵ Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

Mapabaxutoje Dioso pijajivitonë toyaquina judíovijavabelia

Pacuenia Dioso pexënato itoroba jivijavabelia petocuaicuajainexatsi yabara pelivaisi

¹ Bajayatami Dioso anijatonë najamatabëcueneitajëtabiaba Dioso-jumepaebivi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. Bajarapacuenia Dioso najamatabëcueneitajëtabiaba profetavijavabelia matabacabita bemajitsinaebocuenia. Itsajavata Dioso najamatabëcueneitajëtabiaba profetavijavabelia meravi majitsinaebota. Itsajavata pepacuenia Dioso roviaalia barëcuaicuajai tsabiabi profetavijavabelia. Nexata juya profetavi tsipaebabiaba vajasalinaivijavabelia pacuenia Dioso itorobatsi.

² Nexata jane baja aeconoxae, mapamatabacabitaje, Dioso itorobica pexënato vajanacatsitanajamatabëcuene itajëtsinexa, vajayapëtaenexa Dioso vajanacatojitsipaejava. Bajayata Dioso itoroba pexënato pexanaenexa mapanacuaeje, daxitacuenia yajava. Nexata daxitacuenia mapanacuaejeje Dioso pexënato tocopata pevetsinexa.

³ Nexata pacuenia Dioso bitso ayaijamatabëcuenenë, pexaniajamatabëcuenenëna, bajara pijinia Dioso pexënato ata jamatabëcueneitsi. Dioso pexënato cajëpatsi daxitacuenia pexanaenexa pijumesaëta. Nexata pijumeta ita itoroba mapanacuaeje penaexanaenexa, daxitacuenia yajava naexana. Bajaraponë pexanaecujinae mapanacuaeje, bajaraponë pejamatabëcueneta abaxë tsiteca xanepana mapamatabacabijavaberena ataje. Bajaraponë nacasivatëpa cruzata vajanacavecuaxuabinexa pibisiacuenia vajaexanaeconimi. Bajaraxuacujinae pona jane baja athëbëabetsia peecaenexa paxa Dioso pemuxuneneta, pecuajuanenia, penajuaevetsinexabeje daxitacuenia.

Pacuenia Dioso pexënato bitso ayaijamatabëcuenenë ángelevi matatoxenetsia yabara pelivaisi

⁴ Dioso pexënato bitso ayaijamatabëcuenenë ángelevi matatoxenetsia. Bajarapajamatabëcuene yapëtanetsi. Tsipaji Dioso pexënato tocopata daxitacuenia pevetsinexa. Dioso saya ángelevi tocopata beveliajamatabëcuenejava pevetsinexa.

⁵ Dioso baja cajena jumaitsi pexënatojavabelia mapacueniaje: Xamë raja taxënatomë. Xanë raja axanë, jai Dioso.

Dioso icatsia jumaitsi pexënato yabara mapacueniaje: Xanë raja bajaraponë paxanë. Xanë raja bajaraponë taxënato, jai Dioso pexënato yabara.

Bajarapacuenia Dioso apo jumaitsi ángelevi yabara. Biji rajane Dioso pexënato yabara jumaitsi. Bajaraxuata nayapëtane Dioso pexënato bitso ayaijamatabëcuenenëcuene ángelevi matatoxenetsia.

⁶ Pacujinae Dioso itorobijitsiatsica pepo caenë pexënato mapanacuata penaexanaenexa, Dioso jumaitsi pexënato yabara mapacueniaje: Daxita tajajivi, ángelevi, pematabacabëta tonubenaena ayaijamatabëcuene perajutsinexa bajaraponëjavabelia, jai Dioso pexënato yabara.

⁷ Dioso icatsia jumaiti ángelevi yabara mapacueniaje: Tajajivi, ángelevi, tanelivaisipaebinexa, bepíjia pona pacuenia jovibo. Bajarapamonae beisotocotiata verebiabiana daxita pamonaē naneconita xanējavaberena, jai Dioso ángelevi yabara.

⁸ Itsiata baitsi jane icatsia Dioso pexēnatojavabelia jumaiti mapacueniaje: Diosomē, daxita xua evetame, daxitamatacabijavabelianexa evetsianame. Xua xamē evetame, xaniavaetsia evetabianame.

⁹ Xamē jitsipame jivi pexaniacuene pexanaejava. Apo jitsipaemē pibisiacuene pexanaejava. Bajaraxuata xanē, nijaDiosonē, cajamatabēcuenebarēyayaexanatsi. Cajamatabēcuenebarēyayaexanatsi daxita itsamonae matatoxenetsia, jai Dioso pexēnatojavabelia.

¹⁰ Icatsia Dioso pexēnatojavabelia jumaiti mapacueniaje: Xamē petuxanenēmē. Itsa abaxē daxitacuene ajibi, xamē exaname mapanacuaje. Nesaēta exaname daxita itaboxopijicuene yajava. Xua jivi apo tae, bajaraxua ata exaname.

¹¹ Daxita bajaraxua, nexanaejava, vereverecaena. Itsiata baitsi jane xamē apo vereverecaemē tsane daxitamatacabijavabelianexa. Daxita xamē nexanaejava, perujujava naexanaena. Pacuenia jivi penaxatatsijava, perujujava banaexana, bajara pijinia itsi tsane nexanaejava.

¹² Pacuenia jivi baquiona penaxatatsijava, bajarapacuenia itsamatacabi xamē quionaename itaboxo, ira yajava, pejananacua icatsia nexanaenexa. Itsiata baitsi jane xamē tsitecaename. Apo vereverecaemē tsane, jai Dioso pexēnatojavabelia.

¹³ Dioso baja cajena caeto ata ángeleviyajuvēnēnējavabelia apo jumaiti mapacueniaje: Ecare abaxē tacujuanenia daxitacuene vajanajuaevetsinexabeje. Nijavajabitsaē abaxē copiaya vecatsivajēnae jumecovēnētsiaexanaenatsi nitobobicuēnianexa, apo jai Dioso ángeleviyajuvēnēnējavabelia.

Biji rajane Dioso pexēnatojavabelia bajarapacuenia jumaiti.

¹⁴ Daxita ángelevi apo taetsi vajaitaxutota. Bajarapamonae saya Dioso tonacuenebabiaba pacuenia Dioso itorobatsi. Nexata ángelevi yavenona pamonaē jumecovēnēta Dioso pecapanepaejavanexatsi.

2

Pacuenia apo benamuxujematsitsi pexaniajailivaisi Dioso vajanacapanepaenexa yabara pelivaisi

¹ Dioso pexēnato bitso ayaijamatabēcuēnenē ángelevi matatoxenetsia. Bajaraxuata vajanacatsipaebilivaisi xaniavaetsia benamuxunaevetatsi. Bitso baja cajena pexaniajailivaisi nacatsipaeba. Nexata vajavajēnaeyabelia asaēyata bejumecovēnētatsi bajarapapexaniajailivaisi vajajumecovēnētsijava, itsamatacabijavabelia ata vajacopatsivaniva.

² Bajayata palivaisi Dioso najumecopata Moiséspijinēta, Dioso najumeitoroba ángelevita. Nexata juya ángelevi bajarapalivaisi tsipaeba Moiséspijinējavabelia. Xaniajai baja cajena bajarapalivaisi. Pamonaē apo jumecovēnētsi bajarapalivaisi, paneconivajēto xaina, bajarapaneconivajēto Dioso naneconitsiaexanatsi.

³ Itsa namuxujematatsi papinijicueneta Dioso nacapanepaejitsia, ¿detsa pacuenia nacacaējēpaejitsipa vajacuata vajanacapanepaenexa? Ajibi. Vajaxanenē Jesucristo baja cajena copiaya tsipaeba itsamonaejavabelia

pacuenia capanepaejitsia daxitajivi. Nexata bajarapamonae yapētane bajarapalivaisi pexaniajailivaisiucene. Nexata juya bajarapamonae vaxaitsi-javaberena nacatsipaeba bajarapalivaisi.

⁴ Nexata nayapētane bajarapamonae vajanacatsipaebilivaisi pexaniajailivaisiucene. Tsipaji Jesucristo petsipaebilivaisitsi, jivi itsa tsipaebavanapa, Dioso pesaēta pinijicuene pexanaejavanē tsitaexanapona. Bajarapamonae piavitanevi ata jamatejemayaexanapona. Petēpaevi ata icatsia asaēyaexanapona. Espíritu Santo ata jamatabēcuene caējēpaeyaexanaponatsi, caejivi canacujitsia, bajarapamonae pexanaenexa pacuenia Dioso tojitsipatsi.

Pacuenia baja Jesucristo naexana bejivitonēcuenia yabara pelivaisi

⁵ Papejananacua yabara pacatsipaebatsi, Dioso baja itsa exanaena bajarapanacua, Dioso apo tocopatsi tsane ángelevi pevetsinexa. Biji rajane jivi tocopatsianatsi pevetsinexa bajarapanacua.

⁶ Tsipaji Dioso pejumelivaisibaxutota, tajēvelia jumaitsi pacuenia jivi ayaijamatabēcuenevi Dioso exanaejitsiatsi ángelevi matatoxenetsia. Bajaraxua yabara Dioso pejumelivaisibaxutota jumaitsi mapacueniaje:

Diosomē, jivi matatoxenetsia bitso ayaijamatabēcuenenē atamē, ¿detsa xua-jitsia itsiata jivi sivanajamatabēxainame nevetsinexa?

⁷ Jivi itsa exaname, ángelevivecua jivi bevelijamatabēcuenevi exaname. Bajarapacuenia picani exaname. Itsiata baitsi jane aeconoxae jivi pecajumecovēnētsixae, ayaijamatabēcuenevi baja exaname ángelevi matatoxenetsia.

⁸ Nexata itsamatacabi tocopatsianame jivi pevetsinexa daxitacuene nexanaejava, jai Dioso pejumelivaisibaxutota Dioso pejumecovēnētsivi yabara.

Bajarapacuenia Dioso itsa tocopatsiana daxitacuene Dioso pexanaejava jivi pevetsinexa, itsacuenejavayo ata Dioso apo vecuacopatsi tsane jivi pevetsiaexanaejava. Itsiata baitsi jane abaxē apo taetsi vajaitaxutota jivi pevetsijava daxita bajaraxua.

⁹ Pamatacabi Jesús bejivitonēcuenia naexana mapanacuataje, bajaraponē ata ángelevivecua bevelijamatabēcuenenē picani naexana. Dioso pitaxutotsoniataexae daxita mapanacuapijivije, Dioso pexēnato itorobica penaexanaenexa mapanacuata, pesivatēpaenexa daxitajivi pijaneconi yabara. Jesús baja daxitajivi pesivatēpaexae, aeconoxae baja Dioso tocopatatsi Jesús athēbētatsia pecaenexa paxa Dioso pemuxuneneta.

¹⁰ Dioso baja cajena daxitacuene natoexana bajaraponēnexa. Dioso daxitacuene pexanaecujinae, Dioso abaxē pejamatabēcueneta daxitacuene tsiteca xanepana mapamatacabijavaberena ataje. Daxita pamonae jumecovēnētatsi, pexicuenia petaevi, Dioso jitsipa pebarēevetsinexa daxitacuene Dioso pexanaejava. Bajaraxuata Dioso tocopata Jesucristo cruzata ayaicuenia bepejibiaexanaenexatsi. Nexata Jesucristo capanepaena daxita pamonae najamatabēcuene copata Jesucristojavabelia, peyajavaponaponenexa Dioso pijapenivenivenaenacuatatsia.

¹¹ Jesucristo baja cajena jivi tsata Dioso pijajivinexa. Nexata pamonae Jesucristo tsata Dioso pijajivinexa, bajarapamonae, Jesús yajava, benacaexapijivi baja tanetsi Dioso. Bajaraxuata Jesús, Dioso pexēnato, pijajivi yabara itsa cuacuajiai, apo ajumeura: “Tajuyapijivi,” pejajiva.

¹² Jesús pijajivi yabara pejumaitsijavanexa, Dioso pejumelivaisibaxutota tajēvelia jumaitsi mapacueniaje:

Taxa Diosomē, tajuyapijivijavabelia cavajunupaebianatsi. Nexata daxita bajarapamonae tabarēnacaetuatsijavata, xamēnexa catonaxēanaenatsi, tanaxēanaejavata ayaijamatabēcuene tacarajutsinexa, jai Dioso pejumelivaisibaxutota Jesús paxa Diosojavabelia pejumaitsijavanexa.

¹³ Jesús icatsia pijajivi yabara pejumaitsijavanexa, Dioso pejumelivaisibaxutota tajēvelia jumaitsi mapacueniaje:

Xanē ata najamatabēcuenecopatsianajē taxa Diosojavabelia taneyavenonaenexa pacuenia najamatabēcuenecopaba tajuyapijivi, jai Dioso pejumelivaisibaxutota.

Jesús icatsia pijajivi yabara pejumaitsijavanexa, Dioso pejumelivaisibaxutota tajēvelia jumaitsi mapacueniaje:

Yajavaponaponajē baja mapamonaeje, Dioso pexi tanetocopatsivi tatoevetsinexa,

jai Dioso pejumelivaisibaxutota.

¹⁴ Vaxaitsi, Dioso pexitsi, mapanacuata jinavanapatsi. Bajaraxuata Jesús ata naexana mapanacuataje, pacuenia vaxaitsi banaexanatsi, peponaponaenexa mapanacuataje. Nexata Jesús penaexanaexae mapanacuataje pacuenia vaxaitsi banaexanatsi, caējēpatsi pebeyaxuabinexatsi vajanacasivatēpaenexa. Jesús baja itsa nacasivatēpa, jamatabēcuenematatoxeneta dovathi. Nexata baja copiaruca dovathi vajanacaitorobabiabijava. Nexata jivi tēpae ata tsane, itsiata icatsia asaē tsane petēpaecujinae.

¹⁵ Bajarapacuenia Jesús vajanacasivatēpaexae, nacavecuajibiaexana baja vajacujunavababijavami, vajatēpaejava. Vajatēpaejava picani cujunavababatsi daxita vajajinavanapaematacabianē.

¹⁶ Jesús baja cajena patsica mapanacuayabetsicaje, jivi peyavenonaenexa, pamonae Abrahampijinē pepo pemomoxi, baitsi Dioso pejumecovēnētsivi. Jesús apo patsi peyavenonaenexa ángelevi.

¹⁷ Bajaraxuata Jesús naexana mapanacuataje pacuenia vaxaitsi banaexanatsi, jivi petocuaicuaijainexa Diosojavabelia. Jesús nacaitaxutotsoniatane. Nacatoexana pexaniacuene. Jesús nacatoexana pacuenia Dioso itorobatsi vajanacatoexanaenexa. Jesús pijacuata nacopata pebeyaxuabinexatsi, bajaraponē pejamatabēcueneta Dioso vajanacavecuajibiaexanaenexa pibisiacuene vajaexanaeeneconimi.

¹⁸ Nexata Jesús jamatabēcuenecaējēpatsi peyavenonaenexa pijajivi, dovathi pejamatabēcueneējētsivitsi. Tsipaji baja copiaya Jesús ata jamatabēcueneējētatsi dovathi. Bejiobiaexanatsinua.

3

Pacuenia bitso Jesús ayaijamatabēcueneñe Moiséspijinē matatoxenetsia yabara pelivaisi

¹ Tajamonae, Dioso papijajivimē, Dioso pacajunata papijajivinexamē. Nexata xaniavaetsia pacanaējēre Jesucristo yabara. Bajaraponē Dioso nacaitorobica vajanacatsipaebinexa Dioso pejumelivaisi, vajanacatocuaicuaijainexana vajatuxanenē Diosojavabelia.

² Bajayatami Moiséspijinē daxita Dioso pijajivi toevetabiaba Dioso pitorobicueniatsi. Bajara pijinia pacuenia Jesús ata mapanacuataje jumecovēnēta Dioso pitorobicueniatsi.

³ Nexata Jesús jivi pecapanepaenëxae, ayaijamatabëcuenenë Moiséspijinë matatoxenetsia. Pacuenia bo pexainanë, ayaijamatabëcuene xaina pija-jivitonë matatoxenetsia, bajara pijinia pacuenia Jesús ayaijamatabëcuenenë Moiséspijinë matatoxenetsia.

⁴ Caebo canacujitsia tanetsi jivi pexanajebixae bajarapabonë. Itsiata baitsi jane mapanacuata Dioso pexanaejavanëta, jivi exanejeba bonë.

⁵ Bajayata Moiséspijinë Dioso itorobatsi daxita Dioso pijajivi petoevetsinexa xaniavaetia. Nexata Moiséspijinë Dioso pijajivi itsa toevetaponapona, tajëvelia itorobatsi petsipaebinxaxa jivijavabelia pacuenia itsamatacabijavabelia Dioso jumaitsijitsia pijajivijavabelia.

⁶ Cristo Dioso pexënatoxae, xaniavaetsia toeveta paxa Dioso pijajivi. Vax-aitsi baja Dioso vajajumecovënëtsivi, Dioso nacatane pijajivitsi. Tsipaji baja nacayajavaponapona Jesucristo. Bajarapacuenia vajavajënaeyabelia Dioso nacataeponaena xaniavaetsia Jesucristo itsa jumecovënëtavapanapenatsi vajatëpaejavabelianexa. Jamatabëcuenebarëyaya jinavanapatsi. Tsipaji yapëtanetsi Dioso pexaniajaicuene vajanacapanepaenexa.

Pacuenia Dioso pejumecovënëtsivi tocopatatsi pejonenexa Dioso pijanacuyabetsia yabara pelivaisi

⁷⁻⁸ Jesucristo baja cajena ayaijamatabëcuenenë Moiséspijinë matatoxenetsia. Angelevi ata matatoxenetsia ayaijamatabëcuenenë. Bajaraxuata Espiritu Santo Dioso pejumelivaisibaxutota jumaiti mapacueniaje:

Ajena, mapamatacabitaje, itsa pajumetanemë pacuenia Dioso jumaiti, pëtsa pajamatabëcuenetajamë panejumecovënëtsinexa. Pacuenia bajayata panijasalinaivimi ajamatabëcuenetaja baja, pëtsa paitsimë. Bajarapamonaemi pamatacabi petusato nacuata jinavanapa, apo jitsipae pexanaenexa pacuenia Dioso itorobatsi. Bajarapacuenia bajayajebi Dioso apo jumecovënëtsi ata, bajarapamonaemi itsiata abaxë Dioso apo verebiabitsi.

⁹ Bajarajota petusato nacuata panijasalinaivimi jamatabëitonotabiaba Dioso. Apo jumecovënëtsi pacuenia Dioso itorobatsi pejinavanapaenexa. Cuarenta picani pavaijeje Dioso ayaiacuene pexanaejavanë, tsitaexanapona bajarapamonaë peyavenonaenexa. Bajaraxua panijasalinaivimi taeyabiabi ata, itsiata Dioso apo jumecovënëtsi.

¹⁰ Bajaraxuata Dioso baranaaepana panijasalinaivimijavabelia. Nexata panijasalinaivimi yabara Dioso najumecapanepaeya jumaiti: “Najamatabëxainabiaba saya ëpibisiacuene yabara. Apo jitsipae pejinavanapaenexa pacuenia picani tojitsipajë,” jai Dioso.

¹¹ Bajaraxuata Dioso bitso baranaaepana panijasalinaivimijavabelia. Nexata Dioso najumecapanepaeya jumaiti: “Bajarapamonaë apo jone tsane xanëjavaberena. Nexata apo jinavanapae tsane itsajota picani toxaniavaetajë pejinavanapaenexa,” jai Dioso,

jai Espiritu Santo panijasalinaivimi yabara Dioso pejumelivaisibaxutota.

¹² Tajamonaë, dovathivecua panajamatabëcuenevetavanapare, paxamëyajuvënëjivi ata, pacuenia panijasalinaivi najamatabëxaina pibisiacuene pexanaenexa, penajamatabëxainaeyaniva. Tsipaji Dioso itsa apo pajumecovënëtsimë tsipae, nexata pacopabijitsipame panejumecovënëtsijavami Dioso, daxitamatacabijavabelianexa piasaëtsaponaponaenë.

¹³ Nexata namataenetsia panajamatabëcuenevavenonare daxitamatacabi canacujitsia panecasaëtsavanapaenexa Dioso panejumecovënëtsijava. Bajarapacuenia panajamatabëcuenevavenonare itsajivi ata paxamëyajuvënëjivi

dovathi peyamaxëitojorobiyaniavatsi pibisiacuene pexanaeyaniva. Panajamatabëcueneyavenonare itsajivi ata paxamëyajuvënëjivi pecopabiyaniava Dioso pejumecovënëtsijava.

¹⁴ Vajataxuxuabijavaveliacujinae Dioso vajajumecovënëtsijava, tsiteca abaxë Dioso jumecovënëtavanapatsi vajatëpaejavabelianexa. Nexata daxita xua Cristo Dioso rajutsianatsi, bajaraxua vaxaitsi ata Dioso nacarajutsiana.

¹⁵ Bajaraxuata papecamuxujobinexa, Dioso pejumelivaisibaxutota jumaiti mapacueniajæ:

Ajena, mapamatacabije, itsa pajumetaneme Dioso papecajumaitisijava, pëtsa pajamatabëcuenetajamë. Pacuenia panijasalinaivimi petusato nacuata ajamatabëcuenetaja, pëtsa paxamë bajarapacuenia paitsimë, jai Dioso pejumelivaisibaxutota.

¹⁶ ¿Detsa pamonaë bajayata bajarapacuenia jumetae ata Dioso pejumaitisjavatsi, itsiata apo jumecovënëtsi? Baiti pamonaemi bajayata Moiséspijinë matacapona Egipto nacuaverena.

¹⁷ ¿Detsa jane pamonaemijavabelia Dioso baraanaepana cuarenta pavaibeje? Dioso baraanaepana pamonaemijavabelia pibisiacuene exana petusato nacuata. Nexata daxita bajarapamonaemi pijaneconi yatëpa petusato nacuata.

¹⁸ ¿Detsa jane pamonaemijavabelia Dioso najumecapanepaeya jumaiti: “Apo pajonemë tsane xanëjavaberena,” jai? Bajarapacuenia Dioso najumecapanepaeya jumaiti apo pejumecovënëtsivitsijavabelia.

¹⁹ Nexata yapëtanetsi panijasalinaivimi apo pejonejava Diosojavabelia. Tspaji apo jumecovënëtsi Dioso pitorobicueniatsi.

4

¹ Dioso baja cajena najumecapanepaeya jumaiti vajajonenexa bajaraponë pijanacuayabetsia vajanacueraevetavanapaenexa, itsajotatsia nacatoxaniavaeta vajajinavanapaenexa. Bajaraxuata nexata benajamatabëcuenexaniavaetavanapatsi. Tspaji itsamonaë paxamëyajuvënëvi apo jonecapanepae tspae Dioso pijanacuayabetsia itsa apo jumecovënëtsi Dioso.

² Vaxaitsi ata rabaja jumetanetsi pexanialivaisi vajanacacapanepaelivaisinexa pacuenia bajayata vajasalinaivimi ata jumetane picani. Itsiata baiti jane vajasalinaivimi apo toxanepanaetsi bajarapalivaisi pecapanepaenexatsi. Tspaji jumetae ata, apo jumecovënëtsi.

³ Nexata vaxaitsi Dioso vajajumecovënëtsivi, nacacajëpaena vajajonenexa Dioso pijanacuayabetsia, itsajotatsia nacatoxaniavaeta vajajinavanapaenexa. Dioso apo pejumecovënëtsivi apo jone tsane. Tspaji bajarapitsivi yabara Dioso bajayata jumaiti mapacueniajæ:

Anaepanaenajë apo tanejumecovënëtsivijavabelia. Nexata najumecapanepaeya jumaitinë baja: “Bajarapamonaë apo jone tsane xanëjavaberena,” janë,

jai Dioso.

Dioso nacua pexanaejavaveliacujinae, toxaniavaetsi atatsi picani panijasalinaivimi pejinavanapaenexa bajaraponëjavatatsia, itsiata apo jone.

⁴ Yapëtanetsi pacuenia Dioso petoxaniavaetsicujinaetsi, copiaevetatsi picani panijasalinaivimi pejonenexa pejinavanapaenexa bajaraponëjavatatsia. Tspaji Dioso pejumelivaisibaxutota jumaiti mapacueniajæ:

Dioso baja daxita mapanacuajæ, daxitacuene yajava, itsa vereta pexanaejava, vemaxënacuaeraeveta siete matacabita, jai Dioso pejumelivaisibaxutota.

⁵ Icatsia Dioso pejumelivaisibaxutota jumaitsi Dioso apo pejumecovënëtsivi yabara mapacueniaje:

Bajarapamonaē apo jone tsane xanëjavaberena, pejinavanapaenexa xanëjavata,”

jai Dioso pejumelivaisibaxutota.

⁶ Pamonaē baja picani copiaja jumetane pexanialivaisi pecapanepaelivaisinexatsi, itsiata apo pejumecovënëtsixae, nexata apo jone tsane Dioso pijanacuayabetsia. Itsiata baitsi jane Dioso najumecapanepaeya jumaitsi mapacueniaje: “Pamonaē tajajivi, jonena xanëjavaberena,” jai. Nexata pamonaē jumecovënëtaƀona Dioso, jonena Dioso pijanacuayabetsia.

⁷ Bajarapacuenia bajayata itsamonaē Dioso apo pejumecovënëtsixae, nexata icatsia Dioso caëjëta itsamatacabi itsamonaē pejonenexa. Bajarapacuenia Dioso itsa caëjëta itsamonaē pejonenexa, mapamatacabitaje cajena caëjëta itsamonaē pejonenexa. Bajayata Davidpijinë Dioso itorobatsi tajëvelia pevajunupaebinexa itsamonaē mapamatacabitaje pejoneponaejavanaxa Diosojavabelia. Nexata bajayata Davidpijinë tajëvelia itsa vajunupaeba itsamonaē mapamatacabije pejonejavanexa Diosojavabelia, jumaitsi mapacueniaje:

Mapamatacabitaje itsa pajumetaneme Dioso papecajumaitsijava, pëtsa pajamatabëcuenitajamë panejumecovënëtsinexa Dioso, jai Davidpijinë tajëvelia.

⁸ Bajayata Josuëpijinë vajasalinaivimi petusato nacuajavaverena matacapona Israel nacuajavaberena. Panacua bajarapamonaenexa Dioso toxaniavaetatsi pejonenexa, bajarapanacua daxitamatacabijavabelianexa. Bajarapanacua cajena xaina Dioso pijanacuatsia. Nexata panacua yabara jumaitsi: “Dioso pijajivi pejinavanapaenacuana, toxaniavaeta,” itsa jai, Israelnacua yabara apo jumaitsi. Itsa meta peneta Israelnacua yabara jumai tsipae, nexata mapamatacabitaje Dioso apo caëjëtsi tsipae itsamonaē pejonenexa Diosojavabelia. Tsipaji baja vajasalinaivimi bajayata baja pata Israel nacua.

⁹ Bajaraxuata yapëtanetsi pacuenia abaxë Dioso tocopata mapamatacabitaje itsamonaē ata Dioso pejumecovënëtsinexa pejonenexa Dioso pijanacuayabetsia.

¹⁰ Pajivi jonena Dioso pijanacuayabetsia peponaponaenexa Diosojavatsia, bajarapajivi penacuenebabiabijava vemaxënacueraevetsiana. Pacuenia bajayatami Dioso ata nacua baja pexanaejava itsa vereta, vemaxënacueraeveta, bajarapacuenia vemaxënacueraevetsiana.

¹¹ Daxita vaxaitsi vajajitsipaejamatabëcueneta, bejitsipatsi Dioso pijanacuayabetsia vajajonenexa, bajaraponëjavatsia vajajinavanapaenexa. Bajayata pamonaemi Dioso apo jumecovënëtsi, nexata apo jone Dioso pijanacuayabetsia. Nexata vaxaitsi bajarapamonaemi apo becuenejëpaetsi.

¹² Dioso cajena pejumelivaisi bitso asaë. Nexata Dioso pejumelivaisi caëjëpatsi ayaicuene pexanaenexa pijumesaëta. Dioso pejumelivaisi bitso pexiujailivaisi inijabarëneniabeje espada matatoxenetsia. Nexata bajarapalivaisi itsa yapëtanetsi, nacayapëtaeayaxana pacuenia pepacuene jamatabëcueneitsitsi.

¹³ Vaxaitsi Dioso vajanacaexanaevi, apo nacacaëjëpae Dioso vajavecuana matayabinexa. Bajaraponë tane daxita xua exanatsi. Nexata itsamatacabi bajaraponëjavabelia navajunupaebianatsi daxita xua exanatsi.

Pacuenia Jesús ayajamatabëcuenenë, jivi petocuaicuajainë Diosojavabelia, yabara pelivaisi

¹⁴ Jesús cajena Dioso pexēnato, ayajamatabēcuēnenē. Pepo sacerdotenē vajanacatocuaicuajainē Diosojavabelia. Jesús baja pona Diosojavabetsia vajanacayavenonaenexa. Bajaraxuata nexata vaxaitsi becaasāē tsavana-paetsi Dioso vajajumecovēnētsijava mapanacuataje.

¹⁵ Jesús, Diosojavabelia vajanacatocuaicuajainē, nacajamatabēcuēnyapētane pacuenia vaxaitsi jamatabēcuēneitsitsi. Nexata dovathi itsa nacajamatabēcuēneējēta pibisiacuene vajaexanaenexa, Jesús nacajamatabēcuēnyapētane. Bajarapacuenia nacajamatabēcuēnyapētane tsipaji Jesús ata abaxē itsa ponapona mapanacuataje, jamatabēcuēneējētatsi dovathi. Itsiata baitsi jane Jesús caeto ata pibisiacuene apo exanae.

¹⁶ Bajaraxuata ajumejunavijibia vajacuata benavajētatsi Diosojavabelia. Dioso nacaitaxutotsoniatane vajanacaasivaxae. Nexata nacayavenonaena paepatota vaxaitsi namatavenonatsi vajanacayavenonaenexa.

5

¹ Sacerdoteviyajuvēnēnē, caenē, itapetatsi sacerdotevi penamatacaitorobinēnēxa, daxitajivi petocuaicuajaitsabiabinēxa Diosojavabelia. Nexata jivi Diosojavabelia ofrendacuenia perajutsijavanēxa, capatabiaba sacerdotenējavaberena. Nexata juya sacerdotenē rajutabiaba Diosojavabelia bajarapaofrenda. Dajubinē, pijana ata yajava, bajarapacuenia rajutabiaba Diosojavabelia, daxitajivi pibisiacuene pexanaeconi Dioso pevecuaajibiaexanaenexatsi.

² Sacerdotenē caējēpatsi dovathi pejamatabēcuēneējētsinēxatsi pibisiacuene pexanaenēxa. Tsipaji bajaraponē ata saya jivitonē. Nexata sacerdotenē jamatabējumaitsi jivi yabara: “Jamatabēcuēnyapētaniji pamonaē abaxē apo yapētae Dioso pejumelivaisi. Nexata pibisiacuene exana. Jamatabēcuēnyapētanijinua pamonaē dovathi jamatabēcuēneējētatsi pibisiacuene pexanaenēxa,” jamatabējai sacerdotenē. Bajaraxuata jivi pibisiacuene itsa exana, sacerdotenē itaxutotsoniatane jivi.

³ Sacerdotenē ata apo ajamatabēcuēnesaē. Sacerdotenē dajubinē, pijana yajava, Diosojavabelia ofrendacuenia rajutabiaba jivi pibisiacuene pexanaeconi Dioso pevecuaajibiaexanaenexatsi. Bajarapacuenia itsa rajutabiaba, bajaraponē ata pibisiacuene pexanaeconi Dioso pevecuaajibiaexanaenexatsi, yajavarajutabiaba.

⁴ Itsanē ata pijacuata pepo sacerdotenē apo naexanae daxitajivi petocuaicuajainēxa Diosojavabelia daxitajivi peyayataenexatsi. Biji rajane sacerdoteviyajuvēnēnē, caenē, Dioso itapetatsi pepo sacerdotevi penamatacaitorobinē pexanaenexatsi, pacuenia bajayata Aarónpijinē ata Dioso itapetatsi pepo sacerdotenē pexanaenexatsi. Nexata bajayata Aarónpijinē ata daxitajivi yayatanetsi.

⁵ Bajara icatsia itsi Cristo ata. Pijacuata apo naexanae pepo sacerdotenē, vajanacatocuaicuajainēxa Diosojavabelia. Biji rajane Dioso itapetatsi Cristo pepo sacerdotenēnēxa daxitajivi peyayataenexatsi. Cristojavabelia copiaya Dioso jumaitsi mapacueniaje: Xamē raja taxēnatomē. Xanē raja axanē, jai Dioso.

⁶ Icatsia itsabaxutota, Dioso pejumelivaisibaxutota, jumaitsi pacuenia Dioso itapeta pexēnato pepo sacerdotenēnēxa. Jumaitsi mapacueniaje: Xamē raja pepo sacerdotenēmē tsane daxitamatacabijavabelianēxa. Jivi netocuaicuajainē tsane xanējavaberena. Pacuenia bajayatami itsi Melquisedec, bajara xamē ata itsimē tsane, jai Dioso pexēnatojavabelia.

⁷ Jesucristo abaxë itsa ponapona mapanacuataje, pinijijumeta yaitaxu-tonueya vajëta Diosojavabelia. Bajarapacuenia vajëta Diosojavabelia peca-panepaenexatsi petëpaejavavecu. Nexata Jesucristo xaniavaetsia Dioso jumetanetsi. Tsipaji Jesucristo jamatabëjumaiti Dioso yabara: “Jitsipajë taneexanaenexa pacuenia taxa netojitsipa,” jamatabëjai.

⁸ Jesucristo, Dioso pexënato, ayaijamatabëcuenenë ata, itsiata paxa jume-covënëta. Nexata pijacuata nacopata pebejiobiaexanaenexatsi pacuenia Dioso tojitsipatsi.

⁹ Nexata Jesucristo paxa itsa jumecovënëta, nacopata pebeyaxuabinexatsi jivi pesivatëpaenexa. Nexata daxita pamonaë jume-covënëta vanapa pacuenia Jesucristo itorobatsi, Dioso rajutsianatsi matacabi apo pevereverecejava.

¹⁰ Dioso baja cajena itapetatsi Jesús pepo sacerdotenënexa, jivi petocuaicuaijainexa Diosojavabelia, pacuenia bajayata itsi Melquisedecpijinë.

Pacuenia Dioso pejumecovënëtsivi muxujibatsi pecopabianiva Dioso pejumecovënëtsijava yabara pelivaisi

¹¹ Xainajë picani ayailivaisi patacatsipaebinxaxa paneyapëtaenexa pacuenia Cristo pepo sacerdotenë vajanacatocuaicuaijainexa Diosojavabelia. Itsiata baitsi jane ayapëbeje patacajumeyapëtae yaexanaenexa bajarapalivaisi. Pacuenia pejevaxi beaxayo bayapëtaepona vajacujarubijava, bajara pajamatabëcueneitsimë.

¹² Bajayajebi baja picani Jesucristo pajumecovënëta. Juya baja picani bepatsipaebaponaë itsamonaëjavabelia. Itsiata baitsi jane abaxë panamatavenoname icatsia papecatsipaebinxaxa bajarapalivaisi. Palivaisi picani yapëxanepana, Dioso pejumelivaisi, itsiata apo pajumeyapëtaemë. Nexata abaxë panamatavenoname icatsia papecatsipaebinxaxa bajarapalivaisi. Pacuenia pejevaxinacuetoxi ëmitobarëmene apa, apo xae abaxë pexaejaveja, bajara pajamatabëcueneitsimë. Tsipaji palivaisi ayapëbejevajëto, apo paca-cäjëpae orijibia panejumeyapëtaenexa.

¹³ Pamonaë abaxë namatavenona petsipaebinxaxatsi peyapëxanepanaelivaisixi, Dioso pejumelivaisi, bajarapamonaë pejamatabëcuene abaxë mito bepiapaenacuetoxi. Bajarapamonaë abaxë apo yapëtae pexanaenexa pacuenia Dioso tojitsipatsi.

¹⁴ Pacuenia penaveretsivi pijacuata xane pexaejaveja, bajara jamatabëcueneitsi pamonaë pejamatabëcueneitsabivi Diosojavabelia. Nexata pacuenia Dioso itorobatsi, jumecovënëta. Najamatabëxainabiaba pexanaenexa ëpexaniacuene. Apo jitsipae pibisiacuene pexanaejaveja.

6

¹ Vaxaitsi Dioso vajajumecovënëtsijavaveliacujinae, vajavajënaeyabelia jume-covënëta ponatsi vajajamatabëcuenevitsabaponaenexa Diosojavabelia, pacuenia jamatabëcuenevitsabapona bitso Dioso pejumecovënëtsivi. Bajaraxua baja vaxaitsi yapëtanetsi. Nexata baja apo namatavenonaetsi icatsia vajanacatsipaebinxaxa Cristo pelivaisi, pacuenia coplaya nacatsipaeba pamat-acabi ajena najamatabëcuene-copatatsi Diosojavabelia. Vaxaitsi baja copabatsi pibisiacuene vaje-xanabiabijava. Najamatabëcuene-pënyorotatsi baja Diosojavabelia. Bajaraxuata apo namatavenonaetsi baja icatsia itsajivi ata vajanacatsipaebaponaenexa bajaraxua vajayapëtaenexa.

² Apo namatavenonaetsinua baja icatsia vajanacatsipaebaponaenexa vajayapëtaenexa pajamatabëcuene-livaisi xaina vajanacabautisabijava. Apo namatavenonaetsi baja icatsia vajanacatsipaebaponaenexa vajayapëtaenexa pajamatabëcuene yabara pijinia tsimatanacobejuata

ancianovi Dioso pejumecovënëtsivijavabelia. Pacuenia ata icatsia Dioso asaëyaexanaejitsia petëpaevimi, vajayapëtaexae baja, apo namatavenonaetsi icatsia vajanacatsipaebaponaenexa. Pacuenia ata daxita pamonaenaneconita Diosojavabelia, naneconitsiajinavanapaejitsia daxitamatabijavabelianexa, vajayapëtaexae baja, apo namatavenonaetsi vajanacatsipaebaponaenexa.

³ Dioso itsa nacatocopataponaena, vajavajënaeyabelia jamatabëcuenevitsabaponaenatsi pacuenia Dioso nacatojitsipa.

⁴ Itsamonae baja picani yapëtane pexaniajailivaisi. Jumecovënëtanua baja picani Jesucristo pelivaisi Dioso pecapanepaenexatsi. Espiritu Santo ata baja picani tsijamatabëcatsi.

⁵ Yapëtanenua baja picani pacuenia Dioso pejumelivaisi bitso xanepana. Yapëtanenua baja picani pacuenia taejitsia Dioso pinijicue ne pexanaejava pamatacabi pejananacua Dioso exanaena.

⁶ Itsiata baitsi jane bajarapamonae itsa copaba baja Jesucristo pelivaisi pejumecovënëtsijavami, nexata baja acuenebi icatsia penajamatabëcuenepeñeyorotsijava pibisiacue ne Diosojavabelia. Pecopabixae Jesucristo pelivaisi pejumecovënëtsijava, naexana quenetsiataeya bepecapocaponaevi Jesucristo pelivaisi. Bajaraxuata bajarapamonae jamatabëcuenejëpa pamonaemi bajayata Jesucristo beyaxuabatsi cruzata. Tsipaji pamonaemi Jesucristo beyaxuabatsi, quenetsiataeya capocaponatsi daxitajivi pitabarata.

⁷ Ema itsa runa mapairataje, Dioso pejamatabëcueneta pecopatsixae, runa bajarapaema. Nexata Dioso pejamatabëcueneta perunaexae, bajarapaema banacale naxaniabiaexana mapairataje. Nexata capitsapa pexaniabanacale.

⁸ Itsiata baitsi jane mapanacuataje saya itsa juva piabejejava, apo xanepanae itsacuenejavayonexa ata. Nexata bajaraxua tajuatsi. Bajara pinia itsi tsane jivi ata. Pamonaenae Jesucristo pelivaisi pejumecovënëtsicujinae, copabiana bajarapalivaisi pejumecovënëtsijavami, nexata tajuenatsi infiernojavabelia.

Pajamatabëcuene yabara Dioso pejumecovënëtsivi casaë tsavanapae Dioso pejumecovënëtsijava yabara pelivaisi

⁹ Tajamonae bitso patacaasivavi, pacuenia itsamonae jumecovënëtsi ata Dioso pecapanepaejavanexatsi, itsiata copaba, bajara paxamë apo paitsimë tsane. Dioso panejumecovënëtsijava apo pacopabimë tsane. Yapëtaniji baja cajena paxamë xaniavaetsia panejinavanapaejavanexa. Dioso baja nexata panejumecovënëtsixae, Dioso pacacapanepaena.

¹⁰ Dioso ëpexaniacue ne exana. Apo nacofënëtsinua xua baja paexaname paneyavenonaenexa itsamonae Dioso pejumecovënëtsivi. Tsiteca abaxë payavenonaponame bajarapamonae. Bajarapacuenia itsa payavenonaponame itsamonae, patsitanacueneitajëtaaponame Cristo bitso panejitsipaejava.

¹¹ Pacatojitsipatsi, pacaejivimë canacujitsia, itsamonae panetsitanacueneitajëtaaponanexa namataenetsia bitso panenasivajava panetëpaejavabelianexa. Nexata bajarapacuenia itsa paexaname, pacacapanepaena Diosojavabetsia.

¹² Apo pacatojitsipaetsi paneayabarafaetabijava Dioso panejumecovënëtsijava. Biji rajane pacatojitsipatsi paneajamatabëcuenesaënexa, pacuenia itsamonae ajamatabëcuenesaë bajayajebi penajamatabëcuene copatsijava Diosojavabelia. Bajarapamonae rajutsianatsi xua Dioso najumecapanepaeya jumaitsitsi perajutsinexatsi.

13 Bajayata Dioso pexaniajajumeta tajëvelia najumecapanepaeya jumaitsi pacuenia Dioso toexanaejitsia Abrahampijinëjavabelia. Dioso navënëcacuaicuajaiya jumaitsi mapacueniaje: “Xanë Diosonëxaenë, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. Bajarapacuenia Dioso najumecapanepaeya jumaitsi Abrahampijinëjavabelia pepacuene petoexanaenexa pacuenia najumecapanepaeya jumaitsi. Jivi namataenetsia penajumexaniataenexa Dioso pevënë bacuaicuajai. “Xaniajanë. Pepacuene Dioso pitabarata cajumaitsitsi,” banajai. Itsiata baitsi jane ponë pevënë Dioso cacuaicuajajitsia, ajibi. Tsipaji baja pematatsënëa Dioso matatoxenetsia ayaijamatabëcuenenë ajibi. Bajaraxuata Dioso pexaniajajumeta navënëcacuaicuajaiya jumaitsi pacuenia toexanaejitsia Abrahampijinëjavabelia.

14 Nexata Dioso jumaitsi Abrahampijinëjavabelia mapacueniaje: “Pepacuene xanë cayavenonabiabiansi. Xainaenamenua ayaibitsaëto nemomoxi,” jai Dioso pexaniajajumeta.

15 Nexata Abrahampijinë Dioso jamatabëcueneevetsiaponapona bajayajebi. Nexata jane baja belia Abrahampijinë Dioso rajutatsi pacuenia najumecapanepaeya jumaitsi.

16 Itsamonae Dioso pevënë bacuaicuajai pejumexaniataenexatsi xua toexanaejitsia itsajivijavabelia. “Paxaniajanë. Pepacuene Dioso pitabarata pacajumaitsitsi,” bajai. Nexata bajarapacuenia itsa jumaitsi, acuenebi itsajivi ata pejumatsijava bajarapamonaejavabelia: “Apo pacajumexaniataetsi,” pejaijava. Tsipaji Dioso pevënë cacuaicuajai pexaniajajumeta.

17 Dioso baja cajena pexaniajajumeta najumecapanepaeya jumaitsi jivi peyavenonaenexa. Dioso najamatabëcueneitajëta jivijavabelia xaniajai peyavenonaejava jivi pejumeaebiyaniatsi, “Jemajai raja. Dioso epatua itsajamatabëcuene xainaena,” pejaiyanivatsi. Bajaraxuata nexata Dioso tajëvelia navënëcacuaicuajaiya jumaitsi Abrahampijinëjavabelia mapacueniaje: “Xanë Diosonëxaenë, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia.

18 Bajarapacuenia Dioso najumecapanepaeya pejumaitsicujinae, acuenebi epatua itsajamatabëcuene pexainaejava. Tsipaji baja Dioso acuenebi penajumetsënëtsijava. Nexata vaxaitsi Dioso vajanacapanepaejavanexa vajajumecovënëtsivi, bejamatabëjematsi. Apo bejamatabëcuenebëjajitsi. Tsipaji baja yapëtanetsi Dioso pexaniajajava vajanacapanepaenexa, pacuenia baja bajayata tajëvelia najumecapanepaeya jumaitsi.

19 Cristo vajanacasivatëpaenë, athëbëtatsia peecaexae Dioso pemuxuneneta, nexata baja yapëtanetsi vajanacapanepaejavanexa Diosojavabelia. Nexata ajamatabëcuenesaëtsi tsavanapae Dioso vajajumecovënëtsijava.

20 Jesús athëbëbetsia vajavajënaeyabetsia pona vajanacatoexanarutsinexatsia namuto. Nexata jane baja Jesús athëbëtatsia pepo sacerdotenë Dioso exanatsi, jivi petocuaicuajainexa Diosojavabelia daxitamatacabijavabelianexa. Nexata Jesús pepo sacerdotenë pacuenia bajayatami itsi Melquisedecpijinë.

7

Pacuenia Jesús pepo sacerdotenë pacuenia bajayatami itsi Melquisedecpijinë yabara pelivaisi

1 Bajayatami Melquisedecpijinē ponapona. Salemtomara pevetsinēmi. Bajaraponēmi sacerdotenē, jivi petocuaicuajainexa, athēbētatsia peacaenē, Diosojavabelia. Nexata bajarapamatacabi Abrahampijinē vajabitsaē exana itsanacuanē pevetsivjavabelia. Itsa baja Abrahampijinē verebiaba pijavajabitsaē, naviarena. Nexata penaviatsinērena caxitajarabatsi Melquisedecpijinē. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenonabiabinexa,” jai.

2 Abrahampijinē pijavajabitsaē peverebiabivimi pecobecovē penotsijavanē, caponapona. Nexata bajaraxua diez xuabejeyajuvēnējavanē tsaponae, Abrahampijinē caejavayo ofrendacuenia rajutapona Melquisedecpijinējavabelia. “Melquisedec,” itsa jai hebreojumeta, mapajumetaje pejumaitsijume: “Dioso pitabarata aneconijibia xaniavaetsia jivi pevetsinē,” pejaijume. “Salemtomara pevetsinē,” itsa jai hebreojumeta, mapajumetaje pejumaitsijume: “Jamatabēcuenexanepanaeya tomara pevetsinē,” pejaijume. Nexata Melquisedecpijinē Salemtomara pevetsinēmi.

3 Melquisedecpijinē paxa yabara, pena ata yabara, pamojivimi ata yabara, Dioso pejumelivaisibaxutota apo jumaitsi. Penaexanaejava ata yabara, petēpaejava ata yabara, apo jumaitsi. Nexata pacuenia Dioso pexēnato, Jesucristo, jivi petocuaicuajainē Diosojavabelia daxitamatacabijavabelianexa, bajara pijinia itsi Melquisedecpijinē. Melquisedecpijinē jivi petocuaicuajainē Diosojavabelia daxitamatacabijavabelianexa.

4 Nexata aeconoxae pacanaējere mapacuenije. Melquisedecpijinē bitso ayaijamatabēcuenenē vajasalinainēmi Abrahampijinē matatoxenetsia. Bajaraxuata Abrahampijinē ayaijamatabēcuenenēmi ata, ofrenda rajuta Melquisedecpijinējavabelia. Pamatacabi Abrahampijinē pijavajabitsaē verebiaba, pecobecovē nota. Nexata Abrahampijinē itsa caxitajaraba Melquisedecpijinē, diez xuabejeyajuvēnējavanē tsaponae, caejavayo rajutapona Melquisedecpijinējavabelia.

5 Bajayatami Dioso najumecopata Moiséspijinēta. Bajarapalivaisi juya itorobatsi Levípijinēmi pexi, pemomoxi ata, sacerdotevi penaexanaponaevinexa, jivi petocuaicuajainexa Diosojavabelia. Nexata Levípijinē pemomoxi, sacerdotevi naexanapona. Nexata bajarapamonae Dioso tocopatatsi perajutsinexatsi daxita judíovi pexainaeyajuvēnējava. Baitsi tocopatatsi pematamoyanijobinexa diez xuabejeyajuvēnējavanē tsaponae, caejavayo pevecuapitaponaenexa. Nacaeviriavi ata, daxita bajarapamonae Abrahampijinē ēpemomoxi ata, itsiata Dioso tocopatatsi nacaeviriavi ata pexainaeyajuvēnējavanē perajutsinexatsi.

6 Melquisedecpijinē picani Levípijinē apo pemomo. Itsiata Melquisedecpijinē ayaijamatabēcuenenēxae, Abrahampijinē ofrenda rajuta Melquisedecpijinējavabelia. Diez xuabejeyajuvēnējavanē tsaponae, caejavayo rajutapona. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenonabiabinexa,” jai Abrahampijinējavabelia, ponējavabelia Dioso najumecapanepaeya jumaitsi peyavenonaenexa.

7 Pajivi jumaitsi: “Catovajētsianatsi Diosojavabelia pecayavenonaenexa,” jai, bajarapajivi ayaijamatabēcuenējivi Dioso pitabarata pajiviyo tovajētsijitsia matatoxenetsia. Daxita baja cajena yapētanetsi bajarapacuenē.

8 Majotaje, vaxaitsijavata, itsamonae sacerdotevijavabelia ofrenda rajutabiaba. Diez xuabeje pexainaeyajuvēnējavanē, caejavayo rajutabiaba sacerdotevijavabelia. Pasacerdotevijavabelia rajutabiaba bajaraxuanē,

petëpaevinexa. Tshipaji saya jivi. Itsiata baitsi jane Dioso pejumelivaisibaxutota Melquisedecpijinë yabara jumaiti pacueniaje: “Melquisedec abaxë mapamatacabita ataje asaë tsaponaponae. Nexata tsiteca jivi tocuaicuaijai tsabiabi Diosojavabelia,” jai.

9-10 Bajayatami Abrahampijinë ofrenda rajuta Melquisedecpijinëjavabelia. Bajarapamatacabi abaxë Levípijinë apo naexanae. Pexi ata abaxë ajibi. Pemomoxi ata abaxë ajibi, pamonae jane baja mapamatacabitaje sacerdotevi naexana jivi petocuaicuaijainexa Diosojavabelia. Itsiata paofrenda Abrahampijinë rajuta Melquisedecpijinëjavabelia, bajaraxua Dioso tane Levínexa, daxita Leví pemomoxinexa ata. Bajarapacuenia Abrahampijinë daxitanexa yayitaeaya ofrenda rajuta Melquisedecpijinëjavabelia.

11 Pamatacabi Aarónpijinë, pexi ata, sacerdotevi baja tsavanapae, bajarapamatacabi judíovi pejumecovënëtsinexa Dioso Moiséspijinëta najumecopata. Pamonae Aarónpijinë pexi, Levípijinë baja cajena pemomoxi. Judíovi itsa jumecovënëtsipa Dioso Moiséspijinëta penajumecopatsilivaisi Dioso aneonijibia petaenexatsi, nexata Dioso apo itorobitsica tsipae Cristo, ponë beMelquisedecjamatabëcuenenë, jivi petocuaicuaijainexa Diosojavabelia daxitamatacabijavabelianexa. Dioso Moiséspijinëta penajumecopatsilivaisi pejamatabëcueneta Dioso aneonijibia judíovi itsa taejitsipa, nexata icatsia Dioso saya mataropotsia pepo sacerdotenë exanaponaejitsipa Aarónpijinë pemomoxi.

12 Nexata Cristo sacerdotenë itsa exanatsi, jivi petocuaicuaijainexa Diosojavabelia daxitamatacabijavabelianexa, yajavacopatatsi pijinia itsalivaisi Dioso Moiséspijinëta penajumecopatsilivaisivecua.

13 Vajatuxanenë, ponë Dioso pejumelivaisibaxutota tajëvelia vajunupaebatsi, bajaraponë Levípijinë apo pemomo. Biji rajane saicayavirianë. Bajaraponë pijaviriavi bajayata caenë ata sacerdotenë apo naexanae.

14 Vajatuxanenë itsa naexana mapanacuataje, daxitajivi baja cajena yapëtane penaexanaejava mapanacuataje. Vajatuxanenë naexana Judápijinë pemomoyota. Daxitajivi yapëtanenua pacuenia bajayata Moiséspijinë tajëvelia vajunupaeba pamonae sacerdotevi naexanaponaejitsia. “Judápijinë pemomoxi ata sacerdotevi naexanaena,” apo jai picani.

15 Bajaraxuata vaxaitsi xaniavaetsia jane baja yapëtanetsi pepatsijava itsaviriasacerdotenë. Tshipaji Cristo, ponë jane baja pepo sacerdotenë jivi petocuaicuaijainexa Diosojavabelia daxitamatacabijavabelianexa, bajaraponë beMelquisedecjamatabëcuenenë.

16 Levípijinë pemomoxi sacerdotevi exanaponatsi. Tshipaji bajayata Moiséspijinë tocopata bajarapamonaeyajuvënëvi sacerdotevi pexanaenexatsi. Itsiata baitsi jane Cristo, pepo sacerdotenë itsa exanatsi jivi petocuaicuaijainexa Diosojavabelia daxitamatacabijavabelianexa, Levípijinë pemomoxae, pepo sacerdotenë apo exanaetsi. Jume baja cajena. Biji rajane Cristo pepo sacerdotenë exanatsi icatsia piasaëxae petëpaeucujinae.

17 Dioso baja cajena tajëvelia pexënatojavabelia pejumaitisijava, Dioso pejumelivaisibaxutota jumaiti mapacueniaje:

Xamë raja pepo sacerdotenëmë tsane daxitamatacabijavabelianexa. Pacuenia Melquisedec jamatabëcuenetsi, bajarajamatabëcuenetsimë tsane, jai baja cajena tajëvelia Dioso pejumelivaisibaxutota Dioso pejumaitisijava pexënatojavabelia.

18-19 Nexata baja palivaisimi copiaya Dioso Moisésþijinëta najumecopata jivi pejumecovënëtsinexa, Dioso baja copiarucaeyaexana. Tspipaji bajarapalivaisimi apo caëjþaetsi jivi pevecuaajibiaexanaenexatsi pibisiacuene pexanaeneconi. Nexata palivaisi aeconoxae Dioso nacatocopata, xanepana bitso bajarapalivaisimi matatoxenetsia. Tspipaji baja Cristo vajanacasivatëþaexae, bajaraponë pejamatabëcueneta Dioso baja aneconiþibia nacatane. Nexata nacatocopata vajajamatabëcuene saya vajaimoxoyotsinexa Dioso.

20 Dioso baja cajena tajëvelia najumecapanepaeya jumaiti Cristo pepo sacerdotenë pexanaenexatsi, jivi petocuaicuaijainexa Diosojavabelia daxitamatacabijavabelianexa.

21 Pamonaemi bajayata copiaya Cristo pevajënaeya sacerdotevi exanaponatsi, bajarapamonaemi yabara Dioso bajarapacuenia apo jumaiti. Itsiata baitsi jane tajëvelia Dioso najumecapanepaeya jumaiti Cristo pepo sacerdotenë pexanaenexatsi. Bajaraxuata tajëvelia Dioso pejumelivaisibaxutota jumaiti mapacueniaje:

Dioso baja cajena najumecapanepaeya itsa jumaiti, itsajamatabëcuene icatsia epatua apo xainae. Bajaraxuata tajëvelia Dioso pexënatovajabelia pejumaitisijava, Dioso pejumelivaisibaxutota jumaiti mapacueniaje: "Xamë baja cajena pepo sacerdotenëmë tsane daxitamatacabijavabelianexa. Pacuenia Melquisedec jamatabëcueneitsi, bajarajamatabëcueneitsimë tsane,"

jai Dioso pejumelivaisibaxutota tajëvelia Dioso pejumaitisijava pexënatovajabelia.

22 Bajarapacuenia tajëvelia Dioso najumecapanepaeya pejumaitsixae Cristo yabara, nexata yapëtanetsi xua Cristo nacatoexana, bitso pexaniacuene. Bajaraxua bitso pexaniacuene, palivaisimi copiaya Dioso Moisésþijinëta najumecopata matatoxenetsia.

23 Copiaya pamonaemi sacerdotevi exanaponatsi, ayailbitsaëto jonepona sacerdotevinexa. Tspipaji tþapona. Nexata apo caëjþaetsi pevetsinexa daxitamatacabijavabelianexa.

24 Itsiata baitsi jane Jesús baja icatsia apo tþepae tsane. Nexata pepo sacerdotenë tsane daxitamatacabijavabelianexa. Nexata baja icatsia itsanë pepo sacerdotenë apo exanaetsi tsane.

25 Nexata pajivi najamatabëcuenecopata Diosojavabelia pibisiacuene pexanaeneconi Dioso pevecuaajibiaexanaenexatsi, daxitamatacabijavabelianexa Dioso vecuaajibiaexanaenatsi. Bajarapacuenia daxitamatacabijavabelianexa pibisiacuene pexanaeneconi vecuaajibiaexanaenatsi Jesús pejamatabëcueneta. Tspipaji Jesús daxitamatacabijavabelianexa asaë tsaponapona tsane jivi petocuaicuaijainexa Diosojavabelia.

26 Pacuenia baja Jesús pepo sacerdotenë, bajarapitsinë vaxaitsi vajanamatavenonaexae, Jesús baja patsica. Jesús cajena Dioso pejamatabëcuenejþepenë, planeconijibinë Diosojavabelia. Pibisiacuene pexanaevi ata, apo jamatabëcueneþijianaetsi. Tocopatatsi peecaenexa athëþëtatsia, paxa Dioso pemuxuneneta, penajuaevetsinexabeje daxitacuene.

27 Pacuenia itsamonae pepo sacerdotevi jamatabëcueneitsi, bajara Jesús apo jamatabëcueneitsi. Itsamonae pepo sacerdotevi, daxitamatacabi dajubi beyabiaba ofrendacuenia bajarapavi perajutsinexa Diosojavabelia, perajutsinexa pijana ata. Bajarapacuenia sacerdotevi exanabiaba, pibisiacuene pexanaeneconi Dioso pevecuaajibiaexanaenexatsi, itsamonae ata pibisiacuene pexanaeneconi Dioso pevecuaajibiaexanaenexatsi. Bajarapacue-

nia Jesús apo exanae. Jesús saya nacopata pebeyaxuabinexatsi ofrendacuenia penarajutsinexa Diosojavabelia. Bajarapacuenia Jesús itsa nacopata pebeyaxuabinexatsi, caecuenia matamota daxitajivi pibisiacuene pexanaeconimi daxitamatacabijavabelianexa.

²⁸ Bajayata palivaisi Dioso Moiséspijinëta najumecopata, bajarapalivaisi Dioso tocopata pepo sacerdotevi penaexanaenexa mapanacuapijivi. Bajarapamonae apo caëjêpae atatsi pejinavanapaenexa pibisiacuene exanaenejeva, itsiata Dioso tocopata pepo sacerdotevi penaexanaenexa. Itsiata baitsi jane bajaraxuacujinae Dioso najumecapanepaeya jumaitsi Dioso pexênato pepo sacerdotenë penaexanaenexa daxitamatacabijavabelianexa. Jesús caeto ata pibisiacuene apo exanae.

8

Pacuenia Jesús daxitajivi petocuaicuajainë Diosojavabelia yabara pelivaisi

¹ Xua yabara baja pacatsipaebatsi, maitsije. Aeconoxae baja xainatsi Jesús, pepo sacerdotenë vajanacatocuaicuajainexa Diosojavabelia. Bajaraponë ecaeyaexanatsi athëbëtatsia, Dioso ayaijamatabëcuenenë pemuxuneneta, pecujanenia, penajuaevetsinexabeje daxitacuene.

² Nexata jane baja aeconoxae Jesús Dioso pijatemplobota athëbëtatsia nacueneba pepo sacerdotenë penacuenebijava. Bajarapatemplobo Dioso pexanaetemplobo. Jivi apo pexanaetemplobo.

³ Daxita pamonae pepo sacerdotevi, tocopatatsi perajutabiabinexa ofrenda Diosojavabelia. Dajubi ata beyabiaba ofrendacuenia bajarapavi perajutsinexa Diosojavabelia. Bajaraxuata Jesucristo ata, vajanacatocuaicuajainë Diosojavabelia, ofrenda rajuta Diosojavabelia. Nexata Jesucristo ofrenda itsa rajuta Diosojavabelia, pijacuata nacopata pebeyaxuabinexatsi ofrendacuenia penarajutsinexa Diosojavabelia.

⁴ Itsa abaxë Jesucristo mapamatacabi ata ponaponaejitsipa mapanacuataje, apo sacerdotenë tsipae. Jesucristo apo exanae tsipae pacuenia itsamonae sacerdotevi exanabiaba. Bajarapamonae saya dajubi beyabiaba ofrendacuenia bajarapavi perajutsinexa Diosojavabelia Moiséspijinë pitorobiciuatsi.

⁵ Xua Jesucristo athëbëtatsia exanaponapona, bajaraxua saya sacerdotevi cuenecataeya exanavanapa templobota mapanacuataje. Bajaraxua sacerdotevi cuenecataeya pexanavanapaenexa, Dioso tocopatatsi. Yapëtanetsi baja cajena xua Jesucristo athëbëtatsia exana, bajaraxua mapanacuapijisacerdotevi saya cuenecataeya exanavanapa. Tsipaji pamatacabi Dioso Moiséspijinë itorobatsi mapanacuata pexanaenexa Dioso pijacarpaboxaneto, Moiséspijinëjavabelia Dioso jumaitsi mapacueniaje: “Exanaename daxita pacuenia baja catsitajëtatsi petsutojumata,” jai Dioso. Bajaraxuata mapamatacabijavaberena ataje sacerdotevi templobota exanapona pacuenia Moiséspijinë Dioso tsitajëtatsi petsutojumata.

⁶ Itsiata baitsi jane Cristo, ponë pepo sacerdotenë, xua Dioso athëbëtatsia tocopatatsi petonacuenebinexa, bajaraxua bitso ayaijamatabëcuene. Xua bajayata sacerdotevi Dioso tonacuenebavanapa mapanacuataje, beveliajamatabëcuenejeva saya. Tsipaji Cristo jivi tocuaiacuajai tsane Diosojavabelia daxitamatacabijavabelianexa. Cristo nacayavenonabiabiana. Pepacuene baja Cristo pejamatabëcueneta Dioso nacavecuaajibiaexana vajanëconimi. Cristo nacayavenonaenanua Dioso vajanacarajutsinexa xua yabara Dioso

najumecapanepaeya jumaitsi vajanacarajutsinexa, baitsi matacabi apo peverevereaejava. Bajaraxua bitso pexaniacuene. Palivaisimi copiaya Dioso Moiséspijinëta najumecopata, bevelialivaisimi saya.

⁷ Itsa baja xanepanaejitsipa copiaya palivaisi Dioso Moiséspijinëta najumecopata, nexata baja icatsia cotocaevi itsalivaisi Dioso najumecapanepaeya apo nacatonajumecopatsi tsipae.

⁸ Israelpijinë pemomoxi xaniavaetsia apo jumecovënëtsi palivaisi bajayata Dioso najumecopata Moiséspijinëta. Bajaraxuata Dioso tajëvelia najumecapanepaeya pejumaisijava, Dioso pejumelivaisibaxutota jumaitsi mapacueniaje:

Itsamatacabijavabelia icatsia najumecapanepaeya jumaitsinë tsane pejanalivaisi jivi pejumecovënëtsinexa. Pajivi jumecovënëtsiana bajara-palivaisi, rajutsianajë matacabi apo peverevereaejava. Bajara-pacuenia najumecapanepaeya jumaitsinë tsane Israel nacuapijivijavabelia, Judea nacuapijivijavabelia ata.

⁹ Bajarapamonaepijasalinavimi bajayata matacarenanë Egipto nacuaverena. Bajarapamatacabi baja najumecapanepaeya jumaitsinë pacuenia bajarapamonaemi yavenonaejitsianë picani. Itsiata baitsi jane bajarapamonaemi apo nejumecovënëtsi. Bajaraxuata copatajë baja bajarapamonaemi tayavenonaejava, jai Dioso pejumelivaisibaxutota tajëvelia Dioso pejumaisijava Israelpijinë pemomoxi yabara.

¹⁰ Dioso icatsia tajëvelia pejumaisijava, Dioso pejumelivaisibaxutota jumaitsi mapacueniaje:

Nexata icatsia itsamatacabijavabelia najumecapanepaeya jumaitsinë tsane Israel nacuapijivi yabara mapacueniaje: “Caejivi canacujitsia pejamatabëthëtota yapëtaeyaexanaponaenajë pacuenia netojinavanapaejitsia. Nexata bajarapamonaepjamatabëthëtotojavavetsina jitsipaena tanejumecovënëtsinexa. Nexata bajarapamonaepijaDiosonënë tsane. Bajarapamonaepijinia tajajivi tsane.

¹¹ Nexata bajarapamatacabi itsajivi ata apo jumai tsane itsanëjavabelia, pijamonaenëjavabelia ata: “Xamë ata beyapëtaneme Dioso,” apo jai tsane. Tsipaji baja daxitajivi neyapëtaena. Neyapëtaena beveliamatabëcuenevi. Neyapëtaena ayajiamatabëcuenevi ata. Daxita bajarapamonaepiyapëtaena.

¹² Xanë baja daxita tajajivi pibisiacuene pexanaeconimi, vecuajibiaexanaenajë. Apo najamatabënapitsinë tsane bajarapapibisiacuenemi, jai Dioso pejumelivaisibaxutota bajayata tajëvelia Dioso pejumaisijava.

¹³ Bajarapacuenia Dioso itsamatacabijavabelia icatsia najumecapanepaeya pejumaisijavanexa yabara jumaitsi. Tsipaji baja ajumematamobi palivaisimi copiaya Dioso najumecapanepaeya jumaitsi judiovi pijasalinavimijavabelia. Pacuenia mapanacuapijicuene ajibi tsaponae, bajara itsi bajarapalivaisimi. Vereverecapona baja.

9

Pacuenia mapanacuata eca Diosojavabelia jivi penavajëcabiabibo, bajara pijinia pacuenia athëbëtatsia ata peecaebo, yabara pelivaisi

¹ Dioso copiaya najumecopata Moiséspijinëta. Bajarapalivaisita itoroba Israel pemomoxi pexanaenexa Dioso pijacarpoboxaneto, bajarapabota Diosojavabelia penavajëcabiabinexa. Itorobanua sacerdotevi Dioso pijacuene petonacuenebavanapaenexa bajarapacarpabota.

² Itsa baja vereteta carpoboxaneto Diosojavabelia penavajëcabiabibonexa, bajarapabo ënëtuatujë yatuucutsiaya epatajërëtsiarena rurena

ayaipapaëbërëpana. Bajarapaënëyatuucutsijava jumavereca, paënëtuatujä pevenë Lugar Santo. Bajarajota nuta candelerovënëjava pitayotanucaenexa. Mesa ata nuta bajarajota. Bajarapamesajumata pejebinexa pan, papan ofrendacuenia rajutabiaba Diosojavabelia. ³ Bajara papapaëbërëpanacujinaerca, paënëtuatujä, pevenë pijinia Lugar Santísimo, itsajota baitsi Dioso peponaponaenexa yatuucuta.

⁴ Bajarapaënëyatuucutsijava tuatujëta, nuca orota pexanaejava, altarvenëjava. Bajara paaltarjumata jeba petuxujuvijavanë, inciensovënëjavanë, petajuitsinexa. Bajarapaënëyatuucutsijava tuatujëta boca baula, orota pexanaebaula. Bajarapabaula ënëtuatujëta nuca orota pexanaebotellabë. Bajarapabotellabëta yanuca pexaejava, manávënëjava. Bajarapabaula ënëtuatujëta bocanua Aarónpijinëmi pijanaeboyo. Bajarapanaeboyo bajayata Aarónpijinë: “Baxujuvare,” itsa jai, baxujuvatabiaba. Bajarapabaula ënëtuatujëta bocabejenua ibopanabeje. Bajarapaiopanatabeje Dioso jivi pitavetsilivaisi najumeyaquinabuata.

⁵ Bajarapabaula matatsënëta anijanëbeje pecorofeto pexainaenëbeje nucabeje. Bajaraponëbeje beángelnëbeje, jumapecataeya pexanaenëtsibeje. Bajaraponëbeje nutatsibeje Dioso pijapenivenivenaecotia pitajëtsinexabeje. Bajaraponëbeje pecorofetota baula matatsënëcaranatanucabeje. Nexata pepo sacerdotenë caevai canacujitsia bajarapabaula jumatsicababiaba dajubinë pijanata. Pepo sacerdotenë bajarabaula itsa jumatsicababiaba, jamatabëjumai tsabiabitsi: “Dioso nacaitaxutotsoniataena. Nacavecuajibiaexanaena pibisiacuene vajaexanaeiconimi,” jamatabëjai tsabiabi pepo sacerdotenë dajubinë pijanata baulajuma peticababiabijavata. Itsiata aeconoxae apo necuenecaëjëpae patacatoyaquinaponaenexa pajamatabëcuenelivaisi xainapona daxita bajaraxua.

⁶ Bajarapacuenia bajayata Diosojavabelia penavajëcabiabibonexa, vereteta Dioso pijacarpaboxaneto. Nexata sacerdotevi joneyabiaba daxitamatacabi canacujitsia bajarapabojavabelia. Bajarapabo pënëyatuucutsijava penamataxainaeënëtuatujëtatsina, sacerdotevi jinavanapabiaba. Sacerdotevi joneyabiaba penacuenebinexa Dioso pijacuene petonajumecopatsicueniatsi.

⁷ Nexata bajarapabo pënëyatuucutsijava penamataxainaeënëtuatujëtatsina kujinaereca, paënëtuatujëjavabereca, sacerdotevi pepo penamatacaitorobinë caenë joneyabiaba. Bajarapacuenia joneyabiaba caeto caevai canacujitsia. Itsa joneyabiaba, cajoneyabiaba dajubi pijana. Bajarapajanata sacerdotevi pepo penamatacaitorobinë jumatsicababiaba bajarapabaula. Bajarapacuenia exanabiaba bajarapajana ofrendacuenia perajutsinexa Diosojavabelia. Bajarapacuenia exanabiaba pibisiacuene pexanaeiconi Dioso pevecuajibiaexanaenexatsi. Bajarapacuenia exanabiaba daxita itsamonexa xua pibisiacuene exanae ata, itsiata apo nacueneyapëtae, Dioso pevecuajibiaexanaenexatsi.

⁸ Espiritu Santo pejamatabëcueneta nacayapëtaeyaexana mapacueneje. Pamatacabi abaxë Dioso pijacarpaboxaneto piapiapapaëbërëpanaxanetota ënëtuatujë yatuucutarurena, sacerdotevi Dioso pijacuene tonacuenebavanapa bajarapacarpaboxanetota. Bajarapamatacabi Dioso apo tocopatsi jivi pejonenexa Lugar Santísimojavabelia pijacuata pevajëtsinexa Diosojavabelia. Bajaraxua vajayapëtaenexa Espiritu Santo pejamatabëcueneta nacayapëtaeyaexana.

⁹ Bajaraxua bajayata sacerdotevi exana comparacióncuenia ajena mapamatacabijavaberenaje vajanacayapëtaeyaexanaenexa bajaraxua yabara. Jivi

dajubi beyabiaba ofrendacuenia bajarapavi perajutsinexa Diosojavabelia. Vaxaitsi baja yapêtanetsi mapacueneye. Bajarapacuenia jivi exanae ata, nacueratabiaba. Tspaji jivi dajubinêvi ofrendacuenia rajutabiabi ata Diosojavabelia, tsiteca pijaperujujamatabêcuene xainavanapa.

¹⁰ Paperujulivaisimi bajayata Dioso Moiséspijinêta najumecopata, jivi apo itorobitsi penajamatabêcuenexaniavaetsinexa. Biji rajane saya itorobatsi pexaejavanexa xaniavaetsia pevetsinexa, piapaeranexa ata xaniavaetsia pevetsinexa, xaniavaetsia penaperabêquiatsinexanua. Bajarapacuenia itorobatsi bajarapalivaisimi pejumecovênêtavanapaenexa abaxê Cristo pepatsi-vajênaeyatsica. Nexata Cristo pepatsicujinaetsica, Dioso jane baja bajarapalivaisimi pevereverecaeyaexanaenexa pejanalivaisita.

¹¹ Capanepaeya baja pata Cristo, pepo sacerdotenê. Bajaraponê vajanacatocuaicuajinênexa Diosojavabelia daxitamatacabijavabelianexa. Aeconoxae baja Cristo pexaniacuene nacatoexana. Cristo baja pona athêbêabetsia, Dioso pepo pijaboyabetsia. Bajarapabo bitso pexaniabo mapanacuata jivi pexanaebo matatoxenetsia. Dioso saicaya pexanaebo.

¹² Bajarabetsia Cristo ita junua bajarapabotatsia, caecueneta junua bajarapaboênêalia, Lugar Santísimojavabelia, itsajota baitsi Dioso peponapon-aenexa yatuucuta. Cristo ita junua, apo cajone chivojana, becerrojana ata. Biji rajane Cristo najanacajunua daxitajivinexa. Nexata baja caecuenia nacanecomitamota daxitamatacabijavabelianexa Dioso vajanacapanepaenexa.

¹³ Xaniajai. Bajayata Israelpijinê pemomoxi ita naneconita Diosojavabelia, abaxê apo tocopatabiabitsi penajonenexa Diosojavabelia penavajêcabiabibojavabelia. Nexata Israelpijinê pemomoxi copiaya matatsicababiabatsi chivojanata, torojanata ata. Becerrami altarvênêjavajumata petajuitsiipumana ata tsimataothoothotabiabatsi. Nexata jane baja xuacujinae tocopatabiabatsi icatsia penajonenexa Diosojavabelia penavajêcabiabibojavabelia.

¹⁴ Bajarapacuenia bajayata Dioso tocopatatsi dajubinê pijana pejamatabêcueneta Israelpijinê pemomoxi pejonenexa Diosojavabelia penavajêcabiabibojavabelia. Dajubinê pijana matatoxenetsia Cristo bitso caêjêpatsi vajanacayavenonaenexa Dioso pexênatoxae. Espíritu Santo, apo pevereverecaenê daxitamatacabijavabelianexa, Cristo yavenonatsi. Nexata Cristo nacopata pebeyaxuabinexatsi vajanacasivatêpaenexa. Cristo cajena caeto ata pibisiacuene apo exanae. Nexata Cristo pijanata nacavecuajibiaexana baja pibisiacuene vajaexanae neconimi. Bajarapaneconi yabara picani Diosovecua vajanaxuabiviminexa. Bajarapacuenia Cristo vajanacatoexanaexae, tonacuenebavanapatsi piasaêtsaponaponenê Dioso.

¹⁵ Nexata Jesucristo pejamatabêcueneta nacavecuajibiaexana baja vaneconimi. Nexata baja aneconijibia Dioso nacatane. Bajaraxuata daxita pamonae Dioso junatatsi, rajutsianatsi matacabi apo pevereverecaeyava, pacuenia baja Dioso najumecapanepaeya jumaitsi perajutsinexatsi. Cristo ita nacasivatêpa, nacanecomitamota baja. Nexata nacavecuajibiaexana daxita paneconimi xainatsi ita abaxê jumecovênêtavanapatsi copiaya palivaisimi Dioso Moiséspijinêta najumecopata.

¹⁶⁻¹⁷ Itsajivi petêpaevajênae, yaquina pecobecovê yabara. Bajarapajivi ita têpa, pijamonae pevênamoto penatsicobetsanaenexa. Nexata yaquina pacuenia caejivi canacujitsia pifaponaejitsia. Itsiata baitsi jane abaxê ita asaê tsaponaponae pecobecovê pexainaejivi, ajumematamobi abaxê bajarapalivaisi. Matapania baja ita têpa pecobecovê pexainaejivi,

jumenamatamota jane baja bajarapalivaisi. Nexata jane baja xanepana pijamonae penatsicobetsanaenexa pacuenia petêpaejivi yaquina petêpaevajênaeya pecobecovê yabara.

¹⁸ Bajara pijinia itsi paperujulivaisimi bajayata Dioso Moiséspijinêta najumecopata Israelpijinë pemomoxi pejumecovênêtsinexa. Jumenamatamotapona Israelpijinë pemomoxi dajubi pebeyabiabixae ofrendacuenia bajarapavi perajutsinexa Diosojavabelia.

¹⁹ Bajayata Moiséspijinê copiaya tsipaeba daxitajivijavabelia daxitajivi bajarapalivaisi pejumecovênêtavanapaenexa. Nexata Moiséspijinê pita hisopovênê naeboxi pepacêtetsicunuyo petsobialanamaêtota. Bajaraxuacujinae bajarapacunuyo Moiséspijinê jabuta merata, becerrojanata, chivojanatanua, peyajavamatajêrêabijanarata. Nexata Moiséspijinê tsmatatsicaba pabaxutota itanerubena palivaisi Dioso najumecopata Moiséspijinêta. Bajaraxuacujinae Moiséspijinê daxitajivi tsmatatsicabapona.

²⁰ Nexata Moiséspijinê jumaiti jivijavabelia: “Mara pacuenia pacamatatsicabatsije. Nexata patacamatatsicabixae, xaniavaetsia jane baja Dioso pajumecovênêtavanapaename. Nexata pacuenia Dioso najumecapanepaeya pacajumaiti, pacatocopiapatsiana,” jai Moiséspijinê jivijavabelia.

²¹⁻²² Bajaraxuacujinae icatsia Moiséspijinê tscabanajaenajaeba Diosojavabelia penavajêcabiabibo ênêtuatuajê. Xuanê bajarapabo ênêtuatuajêta xaina pecanacuenebinexa Dioso pijacuene, daxita bajaraxuanê yajavatsicabanajaenajaeba. Bajarapacuenia pexanaenexa itoroba baja cajena Dioso Moiséspijinêta penajumecopsilivaisimita. Itoroba dajubinê pijanata daxitacuenê petsicabinexa, petsicabicujinae Dioso axuirajibia petaenexa daxita bajaraxuanê, jivi ata Dioso aneconijibia petaenexa. Tsipaji jivi pibisiacuene pexanaeneconi yabara, acuenebi Dioso aneconijibia petaenexatsi. Matapania dajubinê itsa beyaxuaba, pijanata itsa matatsicabatsi, Dioso jane baja aneconijibia tanetsi.

Pacuenia Cristo nacopata pebeyaxuabinexatsi mapanacuapijivi pijaneconi pevecuaajibiaexanaenexa yabara pelivaisi

²³ Diosojavabelia penavajêcabiabibota, xuabeje xaina pecanacuenebinexa Dioso pijacuene, dajubinê pijanata bajayata Moiséspijinê tscabanajaenajaeba. Bajarapacuenia Moiséspijinê itsa exana, tajêvelia comparacióncuenia itajêtaponajivi peyapêtaenexa itsamatacabijavabelia Cristo pesivatêpaejavanexa mapanacuapijivi. Cristo dajubinê pijanata apo tscabanajaenajaebi Diosojavabelia penavajêcabiabibo ênêtuatuajê. Biji rajane Cristo nacopata pebeyaxuabinexatsi. Nexata Cristo pijana pejamatabêcueneta, mapanacuapijivi pibisiacuene pexanaeneconi, Dioso baja vecuaajibiaexanatsi. Cristo cajena bitso jananamatamota Dioso pitabarata, dajubinê pejana matatoxenetsia.

²⁴ Cristo baja cajena vajanacasivatêpaecujinae, athêbêabetsia pona. Aconoxae baja Cristo athêbêtatsia eca, paxa Dioso pemuxuneneta, vajanacatocuaicuaijaitsecaenexa Diosojavabelia. Nexata Dioso pepo pijabotatsia Cristo nacatocuaicuaijai tsaponae. Bajarapabo apo pexanaebo itsajivi ata. Apo bemapanacuapijibo. Tsipaji pacarpaboxaneto mapanacuata jivi exana Diosojavabelia penavajêcabiabibonexa, bajarapabo saya cuenecataeya exana pacuenia athêbêtatsia Dioso pepo pijabo itsi.

²⁵ Sacerdotevi pepo penamatacaitorobinê, bajaraponê judionê. Caevai canacujitsia cajoneyabiaba dajubinê pijana Lugar Santîsimovênêjavabelia, itsajota baitsi Dioso peponaponaenexa yatuucuta. Itsiata baitsi jane Cristo

bajarapacuenia apo exanabiabi caevai canacujitsia. Caeto penacopatsicujinae pebeyaxuabinexatsi vajanacasivatēpaenexa, icatsia baja pematatsēnēa apo nacopatsi petēpaenexa.

²⁶ Dioso mapanacuaje pexanaejavaveliacujinae, Dioso itsa tocopatsipa Cristo jivi pesivatēpaponaeenexa caevai canacujitsia, nexata Cristo bitso aniatonē jivi pijaneconi yabara sivatēpaponaejitsipa. Itsiata baitsi jane Cristo caeto petēpaecujinae, icatsia baja apo tēpae. Itsa baja copiarucaejijsia perujulivaisimi, Cristo naexana mapanacuataje. Nexata caeto nacopata pebeyaxuabinexatsi vajanacasivatēpaenexa, pibisiacuene vajaexanaeneconimi vajanacavecuajibiaexanaenexa.

²⁷ Bajara pijinia pacuenia vaxaitsi ata caeto tēpaponaeatsi. Bajaraxuacujinae jane baja Dioso naneconitsiaexanaponaena daxita pamonaē pijaneconi pepainaēvi.

²⁸ Bajara pijinia pacuenia Cristo caeto nacopata pebeyaxuabinexatsi vajanacasivatēpaenexa, ayaiBITSaētOXANetotsi pibisiacuene vajaexanaeneconi vajanacavecuajibiaexanaenexa. Bajaraxuacujinae Cristo baja athēbēabetsia pona. Icatsia patsianica cotocaevijava. Itsiata baitsi jane baja icatsia apo nacasivatēpae tsane pibisiacuene vajaexanaeneconi yabara. Saya baja nacasivapatsianica vajavajēnaēvetavanapae vi vajanacacaponaeenexa athēbēabetsia.

10

¹ Palivaisi bajayata Dioso Moiséspijinēta najumecopata, bajarapalivaisi saya Dioso najumecopata tajēvelia vajayapētaenexa papexaniacuene aconoxae Cristo nacatoexana. Pacuenia jumaitsi Dioso Moiséspijinēta penajumecopatsilivaisi, sacerdotēvi exanabiaba Cristo pepatsivajēnaeyatsica. Caevai canacujitsia dajubinē beyaxuababiaba ofrendacuenia pevi perajutsinexa Dioso javabelia, pibisiacuene pexanaeneconi Dioso pevecuajibiaexanaenexatsi. Itsiata baitsi jane bajarapacuenia exanabiabi ata, pepacuene apo jamatabēcuenexaniavaetsitsi.

² Pacuenia bajayata itorobatsi Dioso Moiséspijinēta penajumecopatsilivaisi, sacerdotēvi exanabiaba. Dajubinē beyaxuababiaba ofrendacuenia pevi perajutsinexa Dioso javabelia. Bajarapacuenia pexanabiabixae, pepacuene Dioso itsa vecuajibiaexanaejitsipatsi pibisiacuene pexanaeneconi, nexata bajarapamonae apo yanajamatabēxainae tsipae pijaneconi. Nexata baja itsa aneonijibi tsipae, pematatsēnēa dajubinē apo beyaxuababiabi tsipae ofrendacuenia pevi perajutsinexa Dioso javabelia pijaneconi yabara. Caeto saya ofrenda rajutsipa Dioso javabelia.

³ Bajarapacuenia dajubinē caevai canacujitsia beyaxuababiabi ata ofrendacuenia pevi perajutsinexa Dioso javabelia, itsiata jivi jamatabēcuenebarēyaya apo jinavanapae. Biji rajane bajarapacuenia exanabiabi ata, pevajēnaeyabelia tsiteca yanajamatabēxainapona pijaneconi.

⁴ Bajarapacuenia beyaxuababiabi ata toro, chivo ata, bajarapajana apo caējēpaetsi jivi pijaneconi pepacuene pevecuajibiaexanaenexatsi.

⁵ Bajaraxuata Cristo pepatsicujinaetsica mapanacuayabetsicaje, paxa Dioso javabelia jumaitsi mapacueniaje:

Apo jitsipaemē xamē xua jivi carajutabiaba ofrendacuenia. Apo jitsipaemēnua dajubinē ata pebeyaxuababiabijava pevi pecarajutsinexa ofrendacuenia. Bajaraxuata xanē nitorobimica pacuenia banaexana mapanacuapijivi, tanaexanaenexa mapanacuata, mapanacuapijivi tasivatēpaenexa pijaneconi yabara.

6 Jivi picani dajubinē beyaxuababiaba ofrendacuenia pevi pecarajutabiabinexa, altarvēnējavajumata pecatotajuitsinexa. Jamatabējumai tsabiabi bajarapamonae: “Tajaneconi Dioso nevecuaajibiaexanaena mapacuenia itsa exanaenajėje,” jamatabėjai tsabiabi. Itsiata baitsi jane apo sivajamatabēcuenēbarēyamē bajaraxua yabara.

7 Bajara jane manucajėje pacuenia jitsipame tacatoexanaenexa, pacuenia nijumelivaisibaxutota tajēvelia jumaitsi xanē yabara, tasivatēpaenexa nijajivi, jai Cristo paxa Diosojavabelia.

8 Nexata bajarapacuenia Cristo pejumaitsixae, aeconoxae baja vaxaitsi yapētanetsi mapacuneje. Dioso aeconoxae apo sivajamatabēcuenēbarēya jivi dajubinē pebeyaxuababiabijava ofrendacuenia pevi perajutabiabinexa Diosojavabelia.

9 Icatsia Cristo jumaitsi paxa Diosojavabelia mapacueniaje: “Bajara jane manucajėje pacuenia jitsipame tacatoexanaenexa,” jai Cristo. Cristo baja mapanacupijivi pibisiacuene pexanaeconi yabara sivatēpa cruzata pacuenia paxa Dioso itorobatsi. Nexata sacerdotevi dajubinē pebeyaxuababiabijava ofrendacuenia pevi perajutabiabinexa Diosojavabelia, Cristo baja copiarucaeyaxana.

10 Pacuenia Dioso tojitsipatsi, Jesucristo nacopata pebeyaxuabinexatsi vajanacasivatēpaenexa cruzata. Bajarapacuenia Jesucristo nacasivatēpa vajanacavecuajibiaexanaenexa pibisiacuene vajaexanaecononimi. Caeto baja Jesucristo nacasivatēpa daxita mapanacupijivitsije.

11 Caematacabi canacujitsia picani sacerdotevi nubenabiaba altarvēnējava muxuneneta, dajubinē itsa beyaxuaba, ofrendacuenia pevi perajutabiabinexa Diosojavabelia. Itsiata baitsi jane bajarapacuenia exanabiabi ata, Dioso pepacuene apo vecuaajibiaexanaetsi pibisiacuene pexanaeconi.

12 Jesucristo baja cajena nacopata pebeyaxuabinexatsi, vajanacaneconimatamotsinexa pibisiacuene vajaexanaecononimi. Caeto baja Jesucristo tēpa pibisiacuene vajaexanaeconi vajanacaneconimatamotsinexa daxitamatacabijavabelianexa. Bajaraxuacujinae Jesucristo athēbētatsia eca, paxa Dioso pemuxuneneta, penajuaevetsinexabeje daxitacuene.

13 Cristo abaxē aeconoxae athēbētatsia ecaya. Jamatabēcuenēevetecaya abaxē pijavajabitsaē paxa Dioso petojamatabēcuenamoneyabinexatsi. Nexata Jesús pijavajabitsaēmi ata pacuenia itoroba, pejumecovēnētsinexatsi.

14 Caeto baja Cristo nacopata vajanacasivatēpaenexa. Nexata vaxaitsi, Cristo pelivaisi vajajumecovēnētavanapevi, Cristo pejamatabēcueneta Dioso nacavecuajibiaexana pibisiacuene vajaexanaecononimi daxitamatacabijavabelianexa.

15 Cristo baja cajena caeto vajanacasivatēpaejavanexa daxitamatacabijavabelianexa, Espiritu Santo tajēvelia nacayapētaeyaxana. Espiritu Santo tajēvelia nacayapētaeyaxana pexaniajaicuene, xua baja aeconoxae Cristo nacatoexana. Tsipaji baja cajena Dioso pejumelivaisibaxutota tajēvelia jumaitsi mapacueniaje:

16 Najumecapanepaeya tajajivi yabara pejanalivaisi itsamatacabi jumaitsinē tsane mapacueniaje: “Caejivi canacujitsia pejamatabēēthētota yapētaeyaxanaponaponajē pacuenia netojivananapaejitsia. Nexata bajarapamonae pejamatabēēthētōjavavetsina jitsipaena tanejumecovēnētsinexa,”

jai Dioso.

17 Bajaraxuacujinae icatsia Dioso jumaitsi mapacueniaje:

Apo najamatabēnapitsinē tsane itsamatacabijavabelia ata daxita papibisiacuene bajarapamonae exana, jai Dioso tajēvelia pija-jivi yabara.

¹⁸ Nexata jane baja Cristo nacasivatēpa pibisiacuene vajaexanaeneconimi Cristo pejamatabēcueneta Dioso vajanacavecuajibiaexanaenexa. Nexata baja pematatsēnēa dajubinē apo beyaxuababiabi tsanetsi ofrendacuenia pevi vajarajutabiabinexa Diosojavabelia, pibisiacuene vajaexanaeneconio Dioso vajanacavecuajibiaexanaenexa.

Pacuenia saya vajajamatabēcuene imoxoyotsijtsiatsi Dioso yabara peliv-aisi

¹⁹ Tajamonae, Jesucristo baja vajanacasivatēpaexae, aeconoxae baja Dioso nacatocopata ajunavijibia vajajonenexa Dioso pijanacuayabetsia. Nacatocopatanua bajarajotatsia vajajonenexa Lugar Santisimovēnējavabelia, itsajota baihsi Dioso ponapona.

²⁰ Jesucristo nacatoexana pejananamuto vajaponaenexa athēbēabetsia, Dioso vajanacarajutsinexa matacabi apo peverevereaejava. Jesucristo baja itsa nacasivatēpa cruzata, nacasivatēpa vajapatsinexa Diosojavabetsia.

²¹ Bajayata sacerdotevi toevetavanapa Dioso pijacarpaboxaneto. Bajara pijinia pacuenia aeconoxae Jesucristo, pepo sacerdotenē jane baja, nacaeve-taponapona vaxaitsi vajanacatocuaicuaijainexa Diosojavabelia.

²² Bajaraxuata vajajamatabēēthētojavavetsina vajajamatabēcuene saya bimoxoyotatsi Dioso. Bēpēnēa vajajamatabēcueneta Dioso yamaxēitojorobiaya apo bejumecovēnētsiatsi. Tsipaji yapētanetsi Dioso vajanacapanepaejavanexa. Bajarapacuenia Dioso nacacapanepaena tsipaji baja pibisiacuene vajaexanaeneconimi Dioso nacavecuajibiaexana. Nexata baja nacaajamatabēcuene xuirajibiaexana Jesucristo vajanacasivatēpaexae. Vajanacabautisabijavata, nacaperabēquiatanua piaxuirajibimerata.

²³ Vajavajēnaeyabelia asaēyata copiaevetavanapaenatsi Dioso vajanacapanepaejavanexa. Bajarapacuenia asaēyata copiaevetavanapaenatsi Dioso jumeaehinejevatsi. Nexata itsamonejavabelia navajunupaebabiabianatsi Dioso vajanacapanepaejavanexa. Tsipaji baja pacuenia Dioso najumecapanepaeya nacajumaitsi, xaniajai baja cajena. Dioso nacacapanepaena.

²⁴ Nexata vaxaitsi namataenetsia benayavenonatsi vajanajamatabēcueneitajētsinexa vajanasivacuene. Namataenetsianua pexaniacuene benatoexanabiabatsi.

²⁵ Itsamonae baja vaxaitsiyajuvēnēvi copabapona penajoneyabiabijava vajanacaetuatabiabijavabelia. Vaxaitsi nexata bajarapamonae apo becuenejēpaetsi. Namataenetsia benajamatabēcueneasaēyaexanaponatsi. Aeconoxae baja bitsoyo biamamatabēcueneasaētsi tsavanapae. Tsipaji baja imoxoyo pevājēnae vajetuxanenē pepatsinexatsica.

²⁶ Vaxaitsi tsiteca vajavajēnaeyabelia pibisiacuene itsa exanaponaejitsipatsi, yapētae atatsi Cristo vajanacasivatēpaejava, nexata nacatoacuenebi tsipae Dioso vajanacavecuajibiaexanaenexa pibisiacuene vajaexanaeneconio.

²⁷ Bajarapacuenia vajavajēnaeyabelia tsiteca pibisiacuene itsa exanaponaejitsipatsi, nexata saya copiaevetavanapaejitsipatsi pinijicuenia Dioso ēvajanananeconitsia exanaejavanexa. Pamatacabi Dioso pijavajabitsaēnaneconitsiaexanaena pinijiisotojavabelia peverebiabinexa, bajarapamat-acabi vaxaitsi ata, bajarapamonae yajava, pinijicuenia Dioso nacayajavananeconitsia exanaejitsipa.

²⁸ Bajayata Dioso Moiséspijinëta najumecopata jivi pejumecovënëtsinexa. Nexata pajivi apo jumecovënëtsi Dioso Moiséspijinëta penajumecopatsilivaisi, beyaxuabaponatsi. Anijajivibeje, acueyabi pajivibeje ata, itsa jumaiti pibisiacuene pexanaejivi yabara: “Pataniji pepaciuene pibisiacuene pexanaejava mapajivi,” itsa jai, nexata bajarapajivi apo itaxutotsoniataetsi. Beyaxuabatsi pibisiacuene pexanaeconi yabara.

²⁹ Pacanaëjere mapacueneye. Pajivi apo jumecovënëtsi Dioso Moiséspijinëta penajumecopatsilivaisi, naneconitsiaexanatsi. Nexata bajaraxua mata-toxenetsia Dioso bitso naneconitsiaexanaenatsi pajivi copata pejumecovënëtsijava Dioso pexënato pesivatëpaejavatsi pijaneconi yabara. Pajivi copata pejumecovënëtsijava Dioso pexënato pesivatëpaejavatsi pijaneconi yabara, bajarapajivi tane Dioso pexënato pesivatëpaejavatsi bepíamatamo-bicujiru. Apo canaëjëtšinua Espíritu Santo piasivajavatsi.

³⁰ Yapëtanetsi baja cajena Dioso pejumaitisijava mapacueniaje: “Pamonaë pibisiacuene exanapona itsamonaëjavabelia, bajarapamonaë xanë naneconitsiayaxanaenajë,” pejaijiva. Jumaitisinoa Dioso mapacueniaje: “Xanë Diosonënë, naneconitsiaexanaenajë tajajivi,” jai.

³¹ Pajivi Dioso apo jumecovënëtsi, nexata Dioso itsa naneconitsiaexanaenatsi, jbitso piayaicuene taeyaexanaenatsi piasaëtsaponaponaenë Dioso!

³² Panajamatabënapire pacuenia pajamatabëcueneitsimë tsavanapae pamatacabi ajena Cristo pajumecovënëtamë. Bajarapamatacabi pajamatabëcuenesaëmë tsavanapae panejumecovënëtsijava vajatuxanenë pelivaisi, itsamonaë pacabejiobiaexanaë ata bajarapalivaisi yabara.

³³ Paxamëyajuvënëvi baja cajena jivi ayaibitsaëto pitabarata itsamonaë capocaponatsi. Ayacuena baja cajena bejiobiaexanatsinua bajarapamonaë pitabarata. Nexata pijinia itsamonaë paxamëyajuvënëvi bitso sivana-jamatabëxaina bajarapacuenia papecayajuvënëbejiobia exanaëxatsi.

³⁴ Paxamë paitaxutotsoniataneme pamonaë jebatsi penaneconitsivi pejebabiabibota Dioso pejumelivaisi yabara. Paxamë itsamonaë pacave-cuanotsi ata panijairanëmi, panecobecovëjavaximi yajava, itsiata paxamë pajamatabëcuenebarëyamë. Bajarapacuenia pajamatabëcuenebarëyamë tsi-paji baja payapëtaneme xua athëbëtatsia paxainaëjitsiamë. Bajaraxua mapanacuapijicuene matatoxenetsia bitso pexaniacuenejiva. Tsi-paji daxitamatacabi javabelianexa apo pevereverecejavanexa.

³⁵ Bajaraxuata pëtsa pacopabame panesivanajamatabëcuene copatsijava Dioso javabelia papecayavenonaenexa. Dioso cajena athëbëtatsia pacarajutsiana ayacuenejava panenajamatabëcuene copatsixae bajaraponëjavabelia.

³⁶ Bajajajebi ata panevajënaeyabelia paexanaponaë pacuenia Dioso pacatojitsipa. Nexata xua yabara tajëvelia Dioso najumecapanepaeya jumaiti papecarajutsinexa, bajaraxua Dioso pacarajutsiana.

³⁷ Cristo icatsia pepatsijavanexatsica yabara, Dioso pejumelivaisibaxutota tajëvelia jumaiti mapacueniaje: Bepijia patsianica ponë patsijitsiatsica. Apo cuenenajematsi tsane pepatsinexatsica.

³⁸ Nexata pajivi Dioso aneconijibiatanetsi Dioso javabelia penajamatabëcuene copataponaponaëxae, bajarapajivi xainaena matacabi apo pevereverecejava. Itsiata bailsi jane pajivi nevecuanaviata pecovëyabelia, apo sivajamatabëcuenebarëyanë tsane, jai Dioso pejumelivaisibaxutota.

³⁹ Itsiata bailsi jane vaxaitsi vajacovëyabelia Diosovecua apo naviabi tsanetsi Diosovecua vajanaxuabiyani. Biji rajane vaxaitsi

najamatabëcuenecopabatsi Diosojavabelia ëvajanacacapanepaejavabelianexa.

11

Pacuenia Dioso pejumecovënëtsivi apo jumeaebi xua Dioso najumecapanepaeya jumaitsi yabara pelivaisi

¹ Itsa pepacuene vaxaitsi xaniavaetsia najamatabëcuenecopatatsi Diosojavabelia, nexata najamatabëxainatsi mapacueniaje: “Abaxë daxitacuene apo copiapatsi ata, xua yabara Dioso najumecapanepaeya jumaitsi, itsiata yapëtaniji pexaniajaicuene. Pacuenia Dioso najumecapanepaeya jumaitsi, xaniajai baja cajena. Pepacuene Dioso exanaena,” jamatabëjaitsi.

² Bajayata vajasalinaivimi jumecovënëta Dioso. Nexata bajarapamonaemi jamatabëjumaitsi tsabiabi: “Pacuenia Dioso najumecapanepaeya jumaitsi, pepacuene neyavenonaena,” jamatabëjai tsabiabi. Bajaraxuata bajarapamonaemi yabara Dioso jumaitsi: “Sivajamatabëcuenegarëyanë,” jai.

³ Vaxaitsi ata jumecovënëtsi Dioso. Nexata yapëtanetsi pexaniajaicuene mapacuenia pejumaitsilivaisije: “Dioso baja cajena nacua exana daxitacuene yajava. Dioso saya pijumeta daxitacuene exana. Daxita xua aeconoxae vajaitaxutota tanetsi, Dioso baja cajena exana. Abaxë pamatacabi ajibi itsacuenëjavayo ata mapanacuataje, Dioso baja cajena exana daxitacuene,” pejailivaisi yapëtanetsi pexaniajaicuene.

⁴ Bajayatami Abelpijinë najamatabëcuenecopata Diosojavabelia. Abelpijinë jumecovënëta pacuenia Dioso itorobatsi. Nexata Abelpijinë dajubinë beyaxuaba. Nexata ofrendacuenia pevi rajuta Diosojavabelia. Dioso nexata sivajamatabëcuenegarëyatsi. Abelpijinë pijinia pematapijinëmi, Caïnpijinë, apo jumecovënëtsi pacuenia Dioso itorobatsi. Saicaya pijinia itsavirijava ofrendacuenia rajuta Diosojavabelia. Dioso nexata apo sivajamatabëcuenegarëyatsi Caïnpijinë. Nexata Abelpijinë bajayatami baja tēpae ata, itsiata mapamatacabi javaberena ataje vënëlivaisitaeponatsi Dioso pejumecovënëtsijava. Nexata baja vaxaitsi yapëtanetsi, vaxaitsi ata Dioso itsa jumecovënëtsi, Dioso vajanacasivabarëjavanaxa.

⁵ Bajayata Enocpijinë ata najamatabëcuenecopata Diosojavabelia. Bajaraxuata apo tēpaenejeva Dioso caponatsi athëbëabetsia. Jemata pitajjarabatsi. Nexata itsamonae jaitsi atatsi, itsiata apo caxitajjarabatsi. Dioso pejumelivaisixutota jumaitsi pacuenia Enocpijinë Dioso pepitsivajënaeyatsi, Dioso sivajamatabëcuenegarëyatsi.

⁶ Pajivi apo najamatabëcuenecopatsi Diosojavabelia, bajarapajivi yabara Dioso apo jamatabëcuenegarëya. Pajivi najamatabëcuenecopatsijitsia Diosojavabelia, bajarapajivi copiaya bejamatabëjumaitsi mapacueniaje: “Xaniajai tsaena baja. Dioso ponapona. Bajaraponë jivi pitaxutotsoniataenë. Nexata pamonaë asaëyata vajëta Diosojavabelia pibisiacuene pexanaeneconi pevecuaajibiaexanaenexatsi, bajarapamonaë pijaneconi Dioso vecuaajibiaexanatsi,” bejamatabëjai copiaya.

⁷ Bajayata Noëpijinëmi ata najamatabëcuenecopata Diosojavabelia. Nexata Noëpijinëmijavabelia tajëvelia Dioso jumaitsi pacuenia mapairaje Dioso bubutsiaexanaejitsia. Nexata Noëpijinëmi abaxë apo tae ata mapairaje pebubutsijava, itsiata jumecovënëta pacuenia Dioso jumaitsi. Nexata baja pinijibarcaxaneto exana pebarëpanepaenëxa pijamonae mapaira pebubutsijavavecuaje. Bajarapacuenia Noëpijinëmi pijamonae pebarëjumecovënëtsixae Dioso, nexata Dioso aneonijibia tanetsi. Bajarapamatacabi daxita mapanacuapijivimi apo jumecovënëtsi Dioso. Caenë Noëpijinë pijamonae

barējumecovēnēta Dioso. Nexata daxita pamonaemi apo jumecovēnētsi Dioso, nayapētane bitso penaneconitsijava Diosojavabelia.

⁸ Bajayata Abrahampijinēmi ata najamatabēcuenecopata Diosojavabelia. Nexata Dioso itsa itorobatsi Abrahampijinē pevecuapitsapaenexa pijanacuami, jumecovēnēta. Nexata baja Abrahampijinē pona itsanacuayabelia. Panacua Dioso rajutsiapaebatsi, bajarapanacuayabelia pona. Abrahampijinē abaxē apo natsivajēnaeyapētae ata panacuayabelia patsijitsia, itsiata vecuapitsapa pijanacuami Dioso pitorobixaetsi.

⁹ Panacuata Abrahampijinē Dioso patsiaexanatsi, bajarapanacuata itsiata Abrahampijinē pepo pijabo apo exanae. Carpabota saya ponapona. Be-caematacabibejenexa saya pepatsinēcuenia carpabota Abrahampijinē ponapona. Itsiata bajayajebi bajarapanacuata carpabota ponapona. Abrahampijinē pexēnato ata, Isaacpijinē, bajarapaira Dioso rajutsiapaebi atatsi, itsiata Isaacpijinē ata carpabota ponapona. Bajara icatsia itsi Isaacpijinē pexēnato ata, Jacobpijinē, Abrahampijinē jane baja pemomo. Jacobpijinē bajarapaira Dioso rajutsiapaebi atatsi, itsiata Jacobpijinē ata carpabota ponapona.

¹⁰ Bajarapacuenia Abrahampijinē bajayajebi carpabota saya ponapona. Tsipaji abaxē vajēnaeetapona pecaponaenexatsi athēbēabetsia, Dioso pexanaetomarabetsia, apo peverevereaetomarabetsia, daxitamatacabijavabelianexa jane baja peponaponaenexa bajarapatomaratsia.

¹¹ Bajayata Abrahampijinē pijava pevēnē Sara. Bajarapovami ata najamatabēcuenecopata Diosojavabelia. Bajarapova mavecova picani. Nexata bitso pepua perujuva ata, itsiata Dioso caējēpaeyaexanatsi pexēnato pexainaenexa. Jumecovēnēta pacuenia Dioso najumecapanepaeya jumaiatsi pexēnato pexainaenexa. Bajaraxuata xaina pexēnatonēyo.

¹² Bajarapacuenia Abrahampijinē bitso pepua perujunē ata, pexēnato xaina. Nexata Abrahampijinē pevēnamuto pemomoxibitsaēto baja tsaponae. Athēbētatsia, itaboxota, bitso navita tulupu. Mapanacuata pijinia tajetabota bitso navita tajetaboatsapērē. Nexata acuenebi itsajivi ata penamataējētsicapaneapenexa tulupu, tajetaboatsapērē ata. Bajara pijinia it-saponae Abrahampijinē pemomoxi. Bitso cajena Abrahampijinē pemomoxi navita.

¹³ Daxita pamonaemi bajayata Dioso jumecovēnēta, tēpa baja. Bajarapamonaemi xua yabara Dioso najumecapanepaeya jumaiatsi perajutsinexatsi, pitsinejeva tēpa baja. Abaxē apo tocopiapatsi atatsi xua yabara Dioso najumecapanepaeya jumaiatsi perajutsinexatsi, itsiata siva-jamatabēcuenebarēya bajarapamonaemi. Jamatabējumai tsabiabi mapacueniaje: “Daxita pacuenia Dioso najumecapanepaeya jumaiatsi, bajarapacuenia pepacuenē Dioso exanaena,” jamatabējai tsabiabi bajarapamonaemi. Bajarapamonaemi namataenetsia najumai tsabiabi: “Mara panacuataje pepacuenē apo jinavanapaetsi tsane daxitamatacabijavabelianexa. Vaxa-itsi saya caematacabibeje bevajanajinavanapaevinexa. Bevajanapatsivi mapanacuataje,” najai tsabiabi bajarapamonaemi.

¹⁴ Pamonaemi bajarapacuenia namataenetsia najumai tsabiabi, itsamonae tsitanajamatabēcueneitajētavanapa. Bajarapamonaemi tsitanajamatabēcueneitajētavanapa pevetavanapaejava athēbēabetsia Dioso pecaponaejavanexatsi, bajarajotatsia jane baja pejinavanapaenexa daxitamatacabijavabelianexa.

¹⁵ Bajarapamonaemi apo najamatabēxainavanapae caevēalia icatsia penaviabinexa pijanacuamijavabelia. Itsa najamatabēxainaejitsipa caevēalia icatsia penaviabinexa pijanacuamijavabelia, nexata naviabijitsipa.

16 Biji rajane bajarapamonaemi najamatabëxainavanapa peponaenexa athëbëabetsia. Tsipaji athëbëtatsia panacua, bitso pexanianacua, mapanacua matatoxenetsia. Bajaraxuata bajarapamonaemi: “TajaDiosomë,” pejaijava Diosojavabelia, Dioso sivabarëyatsi. Vaxaitsi ata baja yapëtanetsi bajarapamonaemi Dioso pesivabarëyajavatsi. Tsipaji baja athëbëtatsia bajarapamonaemi Dioso toxaniavaetatsi pepo pijatomaranexa.

17-18 Copiaya Dioso tajëvelia najumecapanepaeya jumaitsi Abrahampijinëjavabelia. Abrahampijinë pexënato, Isaac, yabara Dioso jumaitsi mapacueniaje: “Nexënato Isaac xainaena pexi. Nexata nemomoxi xainaename,” jai Dioso. Bajaraxuacujinae icatsia Abrahampijinë Dioso itorobatsi penacoxibeyaxuabinexa picani. Bajarapacuenia Abrahampijinë Dioso itorobatsi penacoxibeyaxuabinexa picani saya pejamatabëcuenejëtsinexatsi. Abrahampijinë Dioso itorobatsi penacoxibeyaxuabinexa ofrendacuenia perajutsinexa Diosojavabelia. Nexata baja picani Abrahampijinë jejai. Nacoxibeyaxuabijitsia picani.

19 Bajarapacuenia picani Abrahampijinë exanaejitsia Dioso pitorobicueniatsi. Tsipaji Abrahampijinë jamatabëjumaitsi: “Dioso baja cajena caëjëpatsi piasaëyaexanaenexatsi taxënato icatsia piasaënexa,” jamatabëjai Abrahampijinë. Ajena baja picani Abrahampijinë nacoxicacuatsijitsia cusiupata penacoxibeyaxuabinexa, nexata Abrahampijinë jamatabëjumaitsi: “Taxënato baja aeconoxae tëpaena,” jamatabëjai. Nexata bajarapaepatota Abrahampijinë Dioso itavetatsi penacoxibeyaxuabianiva. Nexata baja itsiata Abrahampijinë apo nacoxibeyaxuabi. Nexata itsiata Abrahampijinë bepetëpaenë baja nacoxitane. Nexata bajaraxuacujinae icatsia Dioso bepetoasaëyaexanaenëtsi nacoxitane.

20 Bajayata Abrahampijinë pexënato ata, Isaacpijinë, najamatabëcuenecopata Diosojavabelia. Bajaraxuata Isaacpijinë itsa baja perujunë, pexënatobejejavabelia tajëvelia najumecapanepaeya jumaitsi: “Dioso pacayavenonabiabianabeje,” jai Isaacpijinë pexënatobejejavabelia. Isaacpijinë pexënatobeje itsanë pevënë Jacob. Itsanë pevënë Esau. Jacobpijinë itsavënë, Israel.

21 Nexata Jacobpijinë ata najamatabëcuenecopata Diosojavabelia. Nexata baja pamatacabi Jacobpijinë perujunë, itsa baja nayapëtane petëpaejavanexa, bajarapamatacabi Diosojavabelia tovajëta pemomobeje Dioso peyavenonabinexatsibeje. Ponëbeje Jacobpijinë pemomobeje tovajëta Diosojavabelia, Josépijinë pexënatobeje. Bajarapacuenia Jacobpijinë itsa tovajëta Diosojavabelia, pemomobeje, caenë canacujitsia, tovajëtaona. Pecobenaboupita saya Jacobpijinë nayaëtanucaeya vajëtanuca Diosojavabelia.

22 Bajayata Josépijinë ata najamatabëcuenecopata Diosojavabelia. Bajarapamatacabi Egipto nacuata Josépijinë daxita pijamonae barëponapona, Israelpijinë pemomoxi. Nexata baja Josépijinë itsa nayapëtane petëpaejavanexa, tajëvelia vajunupaeba daxita Israelpijinë pemomoxi Dioso pejamatabëcueneta pecapitsapaejavanexatsi Egipto nacuavecua. Josépijinë petëpaevajënae, najumepuënetanua pijamonae pesicaponaenexatsi pamatacabi Dioso pejamatabëcueneta daxita Israelpijinë pemomoxi capitsapatsi Egipto nacuavecua.

23 Bajayata Moiséspijinë paxapijinë, penapijiva ata, tajëvelia yapëtanebeje Dioso peyavenonaejavanexatsibeje. Nexata bajaraxuacujinae pexënatonëyo xainabeje, Moisésnexa janë baja. Nexata matayatsia caponaponabeje acueyabi pajuametoheje. Bajarapacuenia matayatsia caponaponabeje tsi-paji bitso tsitapexanianëyotsibeje. Egiptonacua pepo pevetsinë itoroba

piciani daxita Israelpijiniñ pemomoxi penacoxibeyaxuabaponaenexa ita tonaexanatsi pebinëyo. Itsiata bajarapajivibeje apo jumecovënëtsibeje penacoxibeyaxuabinexabeje. Tspajaji apo jumecujunavibeje.

²⁴ Bajaraxuacujinae Moiséspijinë jane baja vitsatatsi Egiptonacua pepo pevetsinë pexënatoyo. Moiséspijinë bajarapova vitsatatsi bepexënatonëyocuenia. Moiséspijinë baja ita penaveretsinë, yapëtane Dioso peyavenonaejavanexatsi. Nexata Moiséspijinë apo jitsipae Egiptonacua pepo pevetsinë bepemomocuenia petaeenexatsi.

²⁵ Nexata Moiséspijinë najamatabëcueneveretsia jamatabëjumaitsi: “Tajamonae, Israelpijiniñ pemomoxi, Dioso pijajivinexa. Nexata yavenonaenajë tajamonae. Egipto nacuapijivi nebejiobiaexanae ata tsane, pacuenia tajamonae bejiobiaexanabiabatsi, itsiata yavenonaenajë,” jamatabëjai Moiséspijinë. Nexata baja Moiséspijinë Egiptonacua pevetsinë bepemomocuenia petaejavatsi ita vecuapitsapa, copata baja pibisijamatabëcuene, mapanacuapijijamatabëcuene. Tspajaji saya bajarapajamatabëcuene caepatoyonexa jamatabëcuenebarëya.

²⁶ Moiséspijinë Dioso jumecovënëta pacuenia tajëvelia Dioso jumaitsi pijajivi pecapanepaenexa Egipto nacuavecua. Nexata Moiséspijinë tajëvelia jamatabëjumaitsi: “Itsamatacabi Cristo itsamonae bejiobiaexanaenatsi. Bajarapacuenia xanë ata Egipto nacuapijivi nebejiobiaexanaejitsia ata tsane, itsiata Dioso pejitsipaecuenia toexanaenajë. Tspajaji xua Dioso athëbëtatsia nerajutsijitsia, bajaraxua bitso pexaniacuene daxita Egipto nacuapijivi pexainaecuene matatoxenetsia,” jamatabëjai Moiséspijinajëvelia Dioso jumaitsi pijajivi pecapanepaenexa Egipto nacuavecua. Nexata Moiséspijinë tajëvelia jamatabëjumaitsi: “Itsamatacabi Cristo itsamonae bejiobiaexanaenatsë.

²⁷ Nexata baja Moiséspijinë Egipto nacuavecua pitsapa. Tspajaji najamatabëcuenecopata Diosojavabelia peyavenonaenexatsi. Egiptonacua pepo pevetsinë Moiséspijinë baraanaepanae atatsi, apo cujanavi. Pevajënaeyabelia ajamatabëcuenesaë tsanajetaruae pacuenia Dioso itorobatsi pexanaenexa. Moiséspijinë baja apo naviatsi pecovëyabelia. Tspajaji abaxë Moiséspijinë apo tae ata Dioso, itsiata yapëtane Dioso bitso piasaënëcuene Egiptonacua pepo pevetsinë matatoxenetsia.

²⁸ Moiséspijinë Dioso peyavenonaenexatsi, tajëvelia najamatabëcuenecopata Diosojavabelia. Bajaraxuata pamatacabi Moiséspijinë pijamonae barëpitsapa Egipto nacuavecua, ayaicuenia Dioso yavenonatsi pijamonae pebarëpanepaenexa. Bajaraxuata Moiséspijinë pacuenia Dioso itorobatsi, juya daxita pijamonae itoroba. Moiséspijinë pijamonaejavabelia jumaitsi mapacueniaje: “Daxita paxamë, pacaebopijivimë canacujitsia, pabename ovejaji, pejanapebitoxi. Nexata panijabobaupanë, caebaupa canacujitsia, pamuxunenetsicabianame ovejajanata. Nexata ajena, pameravi, ángelnë najetaruae ata tsane peverebiabinexa pebinacuetoxi, matapijinacuetoxi, itsiata apo pacoxitëpaemë tsane,” jai Moiséspijinë pijamonaejavabelia. Nexata Moiséspijinë pijamonae pijabobaupanë, caebaupa canacujitsia, tsicaba ovejajanata. Nexata ángelnë najetaruae ata peverebiabinexa pebinacuetoxi, matapijinacuetoxi, itsiata Moiséspijinë pijamonae apo coxitëpae.

²⁹ Bajayata pamatacabi Moiséspijinë pijamonae barëpitsapa Egipto nacuaverena, Egipto nacuapijivi picani barajinatsi pebeyejebinexatsi. Nexata bajarapamatacabi Moiséspijinë pijamonae barënajamatabëcuenecopata Diosojavabelia peyavenonaenexatsi. Nexata ayaicuenia Dioso

yavenonatsi. Bajarapamonaē Dioso pejamatabēcueneta nicaba Rojovēnē manuamenemaxērana tuatuajēalia. Dioso pejamatabēcueneta benamutocuenia totseviaexanaxualiatsi. Nexata jane baja Egipto nacuapijivi, pamonaē jane baja picani barajinatsi pebeyejebinexatsi, nanicabarubenapona. Ajena baja epatota najetarubena, mera baja icatsia avajubua tsaxuabi. Bubuna baja nexata Egipto nacuapijivi.

³⁰ Bajayata Jericó tomarapijivi piatayaēibopanaxaneto exana pijatomara matatoyorotsia penayajivicanatsinexa pijavajabitsaēvecua. Bajara payacaranatsijavaxaneto mataropotsia catsanaruba ibopananē. Bajaraxua athēbēabetsia apia pacuenia pinijinaejavaxaneto apia. Nexata Israelpijinē pemomoxi vajabitsaē pexanaevajēnaeya Jericó tomarapijivijavabelia, tajvēlia najamatabēcuenecopaba Diosojavabelia peyavenonaenexatsi. Israelpijinē pemomoxi itsa pata Jericó tomarata, jinavanapa bajara payacaranatsijavaxaneto jumavelia. Nexata jane baja vajabitsaē exana Jericó tomarapijivijavabelia. Israelpijinē pemomoxi Dioso pitorobicueniatsi Jericótomara matatoyorotsia najetarubena seis xuabeje. Seis baitsi baja pijinia pamatacabibeje. Nexata jane baja siete matacabita, caematacabita, matatoyorotsia najetarubena siete xuabeje. Nexata jane baja siete matcabita bajarapayacaranatsijavaxanetomi jopaica. ³¹ Bajayata Rahabpijiva, Jericó tomarata peponaponaeva, pibisiacuene pevitota pexanabiabiva ata, marapijivimi Dioso verebiabatsi. Itsiata baitsi jane Rahabpijiva bajarapamonaē apo yajavatēpae. Tsipaji pexaniacuene exana. Dioso pejamatabēcueneta Jericó tomarapijivimi peverebiabivajēnaetsi, Israelpijinē pemomobeje yaenebabeje Jericó tomarapijivi. Bajarapacuenia yaenebabeje vajabitsaē jane baja pexanaenexa Jericó tomarapijivijavabelia. Bajarapamatacabi Rahabpijiva xaniavaetsia copiapita Israelpijinē pemomobeje. Bajaraxuata Jericó tomarapijivimi Dioso verebiabi atatsi, Rahabpijiva apo yajavabeyaxuabitsi.

³² Apo necuenecaējēpae baja pematatsēnēa itsamonaē pelivaisi patacatoyaquinaenexa patacamuxujiobinexa, panenajamatabēcuenecopatsinexa Diosojavabelia papecayavenonaenexa. Apo necuenecaējēpae patacatoyaquinaenexa Gedeónpijinē pelivaisi, Baracpijinē ata pelivaisi, Sansónpijinē ata pelivaisi, Jeftépijinē ata pelivaisi, Davidpijinē ata pelivaisi, Samuelpijinē ata pelivaisi. Apo necuenecaējēpaenua patacatoyaquinaenexa itsamonaē, Diosojumepaebivimi profetavi, pelivaisi.

³³ Daxita bajarapamonaemi ata najamatabēcuenecopaba Diosojavabelia peyavenonaenexatsi. Bajaraxuata bajarapamonaemi Dioso yavenonaponatsi. Bajarapamonaemi itsa navajabitsaētatuatapona itsanacuanēpijivijavabelia, bajarapanacuanēpijivimi verebabilia Dioso peyavenonaexaetsi. Bajarapamonaē pijanacuanējava pijajivi itsa eveta, xaniavaetsia evetabiaba. Tsipaji Dioso yavenonaponatsi. Bajaraxuata xaniavaetsia pijajivi evetabiaba. Paepatota ata toayapēbejetsi itsacuenejavayo yabara, Dioso yavenonabiabatsi. Yavenonabiabatsi pacuenia Dioso tajvēlia najumecapanepaeya jumaitsi peyavenonaenexatsi. Bajaraxuata bajarapamonaeyajuvēnēvi xuabi atatsi nevēthēbitsaēto penubenaebayabelia, bajarapacuenia picani pebeyaxuabinexatsi, itsiata Dioso yavenonatsi. Nexata Dioso peyavenonaexaetsi Dioso pejamatabēcueneta nevēthēvecua cuibocataitatsi. Nexata baja nevēthē apo itsacueniabitsi.

³⁴ Itsamonaē pijinia bajarapamonaeyajuvēnēvi xuabi atatsi pinijiisotualia, Dioso peyavenonaexaetsi, itsiata apo tajuetsi. Itsamonaē pijinia jamatabēbeyaxuabi atatsi espadata, vecuapanepa Dioso peyavenonaexaetsi.

Pamonae pijinia apo aitatsaca picani penavajabitsaëtsinexa, bajarapamonae ata bitso baja piaitatsacavi naexanapona vajabitsaë penaexanabuataponaejavata Dioso peyavenonaexatsi. Nexata bajarapamonae pijavajabitsaë cueneamoneyaba. Vecuarëcëpecatsi.

³⁵ Bajayata pijinia petiriavi penajamatabëcueneocopatsixae Diosojavabelia peyavenonaenexatsi, itsa coxitépa, Dioso icatsia toasaëyaexanabiabatsi.

Bajayata pijinia itsamonae Dioso pejumecovënëtsiviyajuvënëvi bejiobiaexanatsi Dioso pejumecovënëtsixae. Bajarapacuenia pebejiobiaexanaejavatatsi, itsamonae tēpabiaba. Bajarapacuenia yajuvënëexanatsi pecopabinexa picani Dioso pejumecovënëtsijava. Itsiata baihsi jane apo copabi Dioso pejumecovënētavanapaejava. Bajarapacuenia apo copabi Dioso pejumecovënëtsijava. Tsipaji bajarapamonae jamatabējumaitsi tsavanapae: “Mapanacuataje taponaponaejava matatoxenetsia bitso jitsipajē matakabi apo peverevereceajava Dioso tanerajutsinexa,” jamatabējai tsavanapae bajarapamonae.

³⁶ Itsamonae pijinia Diosojavabelia penajamatabëcueneocopatsixae, itsamonae capocaponabiabatsi. Jumattitibabeyabiabatsinua penaneconitsivi pejumaconitabiabimacata. Itsamonae pijinia cadenamaëtota cēbejebabiabatsi. Penaneconitsivi pejebabiabibota jebabiabatsi.

³⁷ Itsamonae pijinia ibotonēta saya tseconabiabatsi pebeyaxuabinexatsi. Itsamonae pijinia petēpaenexa, epacaucubatsi sierrata. Itsamonae pijinia jamatabëcuenejëtatsi pecopabinexa Dioso pejumecovënëtsijava. Bajaraxuacujinae espadata beyaxuababiabatsi. Itsamonae pijinia pijabovecua capitsapatsi. Apo pexainaeaxe penaxatabijava, bajarapamonae naxataba ovejabóco, chivoboco ata. Pexainaejava ata apo xainae. Nexata bitso bejiobi bajarapamonae. Barajinabiabatsi. Bejiobiaexanatsinua.

³⁸ Bajarapamonaemi petusato nacuanējava jinaruta. Petsutonē nacuanējava ata, jinaruta. Pitajanitonējava perubenaevajuanē jaita meravi pemajitabiabinexa. Bajarapamonae yabara itsamonae najumaitsi: “Mapamonaeje vajatomarata pejinavanapaenexa, apo betocopatsitsi,” najai. Itsiata bajarapamonaemi Dioso asivatsi.

³⁹ Daxita bajarapamonaemi najamatabëcueneocopaba Diosojavabelia peyavenonaenexatsi. Bajaraxuata bajarapamonaemi Dioso aneconijibia tanetsi. Itsiata baihsi jane abaxē bajarapamonaemi itsa asaē tsavanapae, mapanacuataje Dioso abaxē apo rajutsitsi xua yabara Dioso najumecapanepaeya jumaitsi perajutsinexatsi. Matapania baja bajarapamonae itsa tēpa, Dioso jane baja rajutatsi matakabi apo peverevereceajava.

⁴⁰ Dioso abaxē evetavanapaeyaexanatsi xua rajutsijitsiatsi bajarapamonae. Tsipaji Dioso apo najamatabëxainae ēbajarapomonaejavabelia perajutsinexa bajaraxua. Vaxaitsi ata mapamatacabita vajajinavanapaevi, bajarapamonae yajava, Dioso jamatabēnacarajuta bajarapapexaniacuene, matakabi apo peverevereceajava.

12

Pacuenia vajavajēnaeyabelia becaasaē tsavanapaetsi Dioso vajajumecovënëtsijava Jesucristo cruzata vajanacasivatēpaexae yabara pelivaisi

¹ Pamonae yabara pacatoyaquinatsi, bajayata najamatabëcueneocopaba Diosojavabelia peyavenonaenexatsi. Nexata bajarapamonaemi vajavënëlivaisitaexae, bemuxunanajamatabëcuenesaëtatsi vaxaitsi ata Dioso vajanacayavenonaenexa. Itsa nayacobijitsiatsi vajacujinaejinaejava, nexata najonotatsi piarevejava bitsojinaeya vajacujinaejinaenexa,

vajapatsinexa itsabelia nacatocaējēta vajanacaitorobinē. Bajara pijinia pacuenia Dioso pitabarata xaniavaetsia bejinavanapatsi asaēyata vajatonacuenebinexa pacuenia Dioso nacaitoroba. Nexata copiaya benavecuacopatatsi papibisijamatabēcuene xainatsi. Tsipaji bajarapapibisijamatabēcuene nacaitorobabiaba pibisiacuene vajaexanaenexa. Bajarapapibisijamatabēcuene baja becopabatsi vajaexanavanapaenexa xua Dioso nacaitoroba.

² Itsa najamatabēcueneocopatatsi Diosojavabelia vajanacayavenonaponaenexa, nexata benajamatabēnapitabiabatsi Jesús. Tsipaji Jesús vajanacasivatēpaexae, Dioso aneonijibia nacatane. Jesús pejamatabēcuenea Dioso nacayavenonanua vajaanamatabēcuenesaē tsavanapaenexa Dioso vajajumecovēnētsijava matapania vajanacapanepaejavabelianexa. Pajivi naneconita, cruzata rutatsi pebeyaxuabinexatsi pijaneconi yabara. Bajarapacuenia itsa naneconitsiaexanatsi, bitso piauracuene. Itsiata baitsi jane Jesús nacopata bajarapacuenia pebeyaxuabinexatsi. Bajarapacuenia Jesús nacopata pebeyaxuabinexatsi tsipaji natsivajēnaeyapētane pejamatabēcuenebarēyajavanexa icatsia itsa asaē petēpaecujinae, daxitajivi pijaneconi pematamotsixae. Aeconoxae baja nexata Jesús tronovēnējavata athēbētatsia eca, Dioso pemuxuneneta, pecujanenia, penajuaevetsinexabeje daxitacuene.

³ Pacanaējēre Jesús pijamatabēcuenesaē tsaponaponeajava, pibisiacuene pexanaevi pinijucenia bejibioaexanae atatsi. Bajarapacuenia pacanaējētsianame itsamonae itsa pacabejiobiaexana Jesús panejumecovēnētsijava yabara. Nexata apo pacueranaemē tsane Dioso panetonacuenebijava. Apo pajamatabēcuenefaefaenaemēnua tsane.

⁴ Paxamē panajamatabēcuenesaētavanapame pibisiacuene paneexanaeyaniva. Bajarapacuenia panajamatabēcuenesaētavanapae atamē pibisiacuene paneexanaeyaniva, itsiata abaxē pibisiacuene pexanaevi apo pacayajuvēnēbeyaxuabi. Bajaraxuata panevajēnaeyabelia bepanajamatabēcuenesaētavanapame pibisiacuene paneexanaeyaniva.

⁵ Pētsa panacofēnētame Dioso papecamuxujobijsava papecajamatabēcueneasaēya exanaenexa itsa pacamuxujoba bepapeximēcuenia. Tsipaji Dioso pejumelivaisibaxutota paxamē yabara jumaitsi mapacueniaje: Taxi, xanējavaberena pananeconitsixae, itsa pacananeconitsiaexanaenatsi, pētsa payaanaepaname. Pētsa pasivajamatabēcuenefaefaanamenua itsa pacabijatanetsi xua yabara pananeconitame.

⁶ Pacananeconitsiaexanaenatsi. Tsipaji xanē muxujobijsava bananeconitsiaexanaejē pajivi asivanē, baitsi daxita pamonaē taxicuenia tataevi, jai Dioso pejumelivaisibaxutota paxamē yabara.

⁷ Nexata patonacaevere Dioso muxujobijsava papecananeconitsiaexanaenexa. Tsipaji Dioso papeximēcuenia pacatane. Jivi ata baja cajena pexi muxujobijsava banacoxivitsata.

⁸ Nexata Dioso muxujobijsava itsa apo pacaevetsi tsipae, Diosojavabelia pananeconitsi atamē, nexata Dioso papeximēcuenia apo pacatae tsipae. Tsipaji jivi ata, pexi pexainaevi, muxujobijsava banacoxiconita.

⁹ Vaxaitsi abaxē pamatacabi pejevaxitsi mapanacuata, vaxajivi nacamuxujobijsava banacoxita. Nexata vaxajivi yayatanetsi. Nexata biji vaxaitsi bitsoyo bejumecovēnētatsi vaxa Dioso, ponē eca athēbētatsia, vajanacara-jutsinexa matacabi apo pevereverecejava.

¹⁰ Itsa abaxë vaxajivi mapanacuata nacavitsata, muxujiobiaya banacaconita. Tsipaji vaxajivi nacatojitsipa xaniavaetsia vajatojinavanapaenexa. Bajaraxuata nacamuxujiobiaya banacaconita pacuenia vaxajivi nacatojitsipa vajatojinavanapaenexa. Itsiata baitsi jane vaxa Dioso muxujiobiaya nacananeconitsiaexana pepacuene vajacopatsinexa pibisiacuene vajaexanaejava. Nexata bajarapacuenia Dioso nacajamatabëcuene yavenona vajaperujamatabëcuene mivecua vajanajamatabëcuene pënëyorotsinexa Dioso javabelia. Nexata pacuenia Dioso jamatabëcuene itsi, bajara vaxaitsi ata vajajamatabëcuene itsinexa.

¹¹ Paepatota vaxa Dioso nacamuxujiobiaya nacananeconitsiaexana, bajarapaepatota abaxë apo sivajamatabëcuene barëyatsi xua nacatocopiapata. Itsiata baitsi jane pajivi Dioso muxujiobiaya naneconitsiaexanatsi, yapëthane baja xua yabara naneconitsiaexanatsi. Nexata baja copata bajaraxua. Nexata baja jamatabëcuene barëyaya xaniavaetsia ponapona.

Pacuenia tsiyaitsi tsane pajivi namuxujemata Dioso pejumelivaisi yabara pelivaisi

¹² Pacopabare baja panejamatabëcuene cueranaejavami. Panevajënaeyabelia panajamatabëcuene saëtaponare. Tsipaji baja panajamatabëcuene copatame Dioso javabelia papecayavenonaenexa.

¹³ Pëtsa pajumecovënëtame itsalivaisi Dioso pejumelivaisivecua. Èpexaniajailivaisi, Dioso pejumelivaisi, panevajënaeyabelia pajumecovënëtavanapare. Nexata itsamonae Dioso pejumecovënëtsivi, pamona abaxë apo ajamatabëcuene saë Dioso pejumecovënëtsijava, pacaitaxutua ajamatabëcuene saëtaponae tsane.

¹⁴ Daxitajivijavelia pexaniajamatabëcuene patoxainare. Nexata aneconijibia pajinavanapaename Dioso pitabarata. Pajivi aneconijibia apo ponaponae tsane Dioso pitabarata, bajarapajivi Dioso apo yajavaponaponae tsane.

¹⁵ Xania baja panayajivitaema. Pëtsa pacopabame Dioso panejumecovënëtsijava, Dioso papecacopatsiyaniva papecaitaxutotsoniataejava panepuajumecovënëtsivi Dioso. Pacuenia piatsaxaënëboto daxitamera bijianaejitsipa, bajara pajamatabëcuene itsimë tsipae caenë ata, paxamëyajuvënënë, pibisiacuene itsa exanaejitsipa. Pacajamatabëcuene bijianaejitsipa padaxitamë.

¹⁶ Panayajivitaemanua itsanë ata, paxamëyajuvënënë, pejaitsiyaniva itsava pepo pijavavecua. Petiriva ata pejaitsiyaniva itsanë pepo pamonavecua. Panayajivitaemanua panejumeebiiyaniva Dioso najumecapanepaeya papecajumaitsijava. Pëtsa Dioso pajumeebame pacuenia bajayata Esaúpijinë jumeaeba Dioso najumecapanepaeya pejumaitsijavatsi. Esaú picani matapijinëxae, Dioso yavenonabiabijitsiatsi. Nexata itsajota Esaú bitso pijani, pejuyapijinëjavabelia pexaejava caenabani namitsavajëta. Nexata pejuyapijinë jumaitsitsi: “Pacuenia nexaejava nevajëthane, carajutsianatsi. Nexata xua Dioso cayavenonabiapiaba, bajaraxua juya xanë netocopatsianame,” jaitsi. Nexata Esaú jejai. Pejuyapijinëjavabelia baja tocopata xua picani Dioso yavenonabiabijitsiatsi.

¹⁷ Payapëtaneme rabaja pacuenia Esaúpijinë exana pejuyapijinë petocopatsicujinae xua picani Dioso yavenonabiabiapaebatsi. Esaúpijinë picani paxa itoroba Dioso javabelia petovajëtsinexatsi Dioso peyavenonabiabinexatsi paxa pevënamuto. Itsiata baitsi jane paxa apo jumejejaitsi. Nexata Esaúpijinë bitso nua pejuyapijinë petocopatsixae xua picani Dioso yavenonabiabijitsiatsi. Itsiata baja acuenebi pexanaejava. Bajaraxuata paxamë ata

pëtsa pacopabame Dioso panejumecovënëtsijava Dioso najumecapanepaeya papecajumaitsijava.

¹⁸ Paxamë panejumecovënëtsixae Dioso, pacatocopata roviaalia panevajëtsinexa Diosojavabelia. Nexata apo panamatavenonaemë paneponaenexa itsanacuajavabelia panevajëtsinexa Diosojavabelia. Bajayata Israelpijinë pemomoxi pata ibotsutoxanetotabayaberena. Nexata bajarapatsutotabuta navajëca Diosojavabelia. Nexata bajarapatsutojumatatsia Israelpijinë pemomoxi tane beisotocotia itsajota aitaquiri. Bajarapaepatota bitso emaxaneto, ayaijovibo yajava.

¹⁹ Bajarapaepatota Israelpijinë pemomoxi jumetane penajumetsijava trompeta. Jumetanenua Dioso pecuaicuajajavatsica athëbëvetsica bajarapamonaejavabelia. Nexata judiovi pecajunavi bitso, vajëta Diosojavabelia Dioso pecuaicuajaiyaniva pematatsënëa.

²⁰ Bajarapacuenia Israelpijinë pemomoxi vajëta Diosojavabelia tsipaji bitso jumecujunava Dioso pejumaitsijavatsicatsi mapacueniaje: “Pajivi ponaena mapatsutoyenepanajavaje, bajarapajivi tseconaenatsi ibotonëta. Itsa jume, becuererebonëta cacuatsianatsi pebeyaxuabinexatsi bajarapacuenia. Dajubinë ata itsa ponaena mapatsutoyenepanajavaje, bajarapacuenia exanaenatsi,” pejjajavatsica Dioso athëbëvetsica, Israelpijinë pemomoxi bitso jumecujunava.

²¹ Nexata Israelpijinë pemomoxi bajarapajume itsa jumetane, pecajunavi, bitso neconecojai. Moisésipijinë ata jumaitsi: “Xanë ata rabaja tacajunavi, bitso neconecojanë,” jai.

²² Itsiata baitsi jane paxamë baja aeconoxae Dioso panejumecovënëtsixae, Dioso baja pacatocopata panepatsinexa Dioso pijatomarabetsia roviaalia panevajëtsinexa Diosojavabelia. Bajarapatomaratsia eca Dioso, piasaëtsaponaponaenë. Bajarapatomara pevënë Jerusalén. Eca Siónvënë tsutojumata. Bajarapatomaratsia Dioso pijajivi ángelevi, miles paángelevibeje, yajavaponapona.

²³ Bajarapatomaratsia payajavanacaetuatsianame itsamonae, pamona panevajënaeya jumecovënëta Dioso. Bajarapamonae vënëyaquinarubatsi bajarapatomaratsia. Panacaetuatsianame Dioso pitabarata, ponë naneconitsiaexanaena daxita pamona naneconita bajaraponëjavabelia. Payajavanacaetuatsianamenua daxita pamonaemi tëpa Dioso pepua jumecovënëtsivi.

²⁴ Panajamatabëcuenecopatame baja Jesucristojavabelia, ponë pejamatabëcueneta Dioso nacavecuajibiaexana vajanekonimi. Nexata Dioso aneonijibia nacatene. Bajayata Abelpijinë itsa beyaxuabatsi, ponë beyaxuabatsi, juya picani xanepana peyamatamobeyaxuabinexatsi. Itsiata baitsi jane pamatacabi Jesús beyaxuabatsi cruzata, itsajivi ata apo najamatabëxainae Jesús peyamatamobeyaxuabinexatsi. Tsipaji Jesús petëpaejava pejamatabëcueneta, Dioso aneonijibia taejitsia daxita pamona jumecovënëta Dioso.

²⁵ Bajaraxuata Dioso pejumelivaisi vajanacatsipaebijava, bejumecovënëtsi. Bajayata pamona apo jumecovënëtsi Dioso Moisésipijinë penajumecopatsilivaisi, naxuaba Diosovecua. Dioso apo capanepaetsi bajarapamonae. Vaxaitsi ata bitsoyo Dioso nacananeconitsiaexanaejitsipa itsa apo jumecovënëtsi ponë nacajunata athëbëvetsica.

²⁶ Paepatota pina Dioso athëbëvetsica Sinaivënë tsutojumavetsica cuaicuajjai, baja pina paepatota ira najëbaba. Nexata icatsia xuacujinae bexëa Dioso tajëvelia najumecapanepaeya jumaitsi mapacueniaje: “Itsamatacabi icatsia

ira najëabiaexanaenäjë. Nexata jane baja caecuenia ira, itaboxo yajava, najëabiana,” jai Dioso tajëvelia najumecapanepaeya.

²⁷ Xua yabara tajëvelia Dioso najumecapanepaeya jumaitsi, maitsi tsaneje. Mapairaje, itaboxo yajava, itsa najëabiana, daxitacuene xua Dioso exana mapanacuataje, verevereacaena. Itsiata Dioso pejumelivaisi, pijatomara ata, apo verevereae tsane.

²⁸ Xua itsamatacabi Dioso nacatocopatsiana athëbëtatsia vatoevetsinexa, bajaraxua apo verevereae tsane. Bajaraxuata vaxaitsi pexaniajamatabëcuene rajutatsi Diosojavabelia. Yaiyataeya vajajamatabëëthëtovetsina Diosojavabelia jumai tsabiabi tsanetsi: “Diosomë, bitso ayaijamatabëcuenenëmë,” jai tsabiabi tsanetsi Dioso vajanacasivajamatabëcuene barëyanexa.

²⁹ VajaDioso jivi penaneconitsiaexanaenë. Pacuenia isoto vayafo itsa tajuenajetaruca, verebiaba daxita piabejjava petajuejavata, bajara pijinia pacuenia Dioso verebiabiana pamonae pibisiacuene pexanaevi.

13

Pacuenia bexanavanapatsi Dioso vajanacasivajamatabëcuene barëyanexa yabara pelivaisi

¹ Pëtsa pacopabame namataenetsia panenasivajava Dioso panejumecovënëtavapanaevi. Panevajënaeyabelia namataenetsia panaasivamëre.

² Pëtsa panacofënëtime xaniavaetsia panecopiapitabiabinexa apo paneyapëtaevi ata itsa pata panijaboyaberena. Bajayata pina bajarapacuenia xaniavaetsia jivi pecopiapitabiabivi, xaniavaetsia copiapita ängelevi, apo yapëtae ata ängelevicuene.

³ Panajamatabënapitabiabare pamonae jebatsi penaneconitsivi pejebabiabibota Dioso pejumecovënëtsixae. Paxamë ata, bajarapamonae yajava, bepnanajuananeconitsivi panataema. Pamonae ata bejiobiaexanatsi Dioso pejumelivaisi yabara, bajarapamonae ata pajamatabëcuene yavenonare. Paxamë ata, bajarapamonae yajava, bepapecabejjiobiaexanaevi panataema.

⁴ Daxitajivi beyaiyatane penacojiobijivi. Pajivibeje baja napitabeje, apo benavecuenamata yajitsibeje. Pebi apo bejaitsi itsava pijavavecu. Petiriva pijinia apo bejaitsi itsanë pamonavecu. Tspijaji Dioso naneconitsiaexanaena bajarapitsipibisiacuene pexanaevi.

⁵ Pëtsa bitso pajitsipame palata. Pasivajamatabëcuenebarëyamëre saya xuyovajëto paxainame. Tspijaji Dioso jumaitsi mapacueniaje: “Apo copatsinë tsane patacayajavaponaponejava,” jai Dioso.

⁶ Bajaraxuata ajumejunavijibia namataenetsia najumaitsitsi mapacueniaje:

Dioso cajena vajanacayavenonaenë. Nexata apo junavitsi tsane, itsajivi nacaitsacueniabijitsia ata, najaitsi vaxaitsi namataenetsia.

⁷ Panajamatabënapitabiabare pamonaemi bajayata pacatsipaeba Dioso pejumelivaisi. Pacanaëjere pacuenia bajarapamonaemi Dioso pejumecovënëtsijavaveliacujinae, xaniavaetsia jinavanapa Dioso pitabarata matapania petëpaejavabelianexa. Bajarapacuenia paxamë ata Dioso pitabarata xaniavaetsi pajinavanapare matapania panetëpaejavabelianexa.

⁸ Jesucristo epatua itsajamatabëcuene apo xainae tsane. Pamatacabibeje ponapona, caejamatabëcuene xainaponaponaena. Pevajënaeyabelia ata daxitamatacabijavabelianexa, caejamatabëcuene xainaponaponaena.

⁹ Pëtsa pacopabame panejumecovënëtsijava palivaisi baja pajumecovënëtime. Pëtsa pajumecovënëtime itsalivaisi bajarapalivaisivecua. Paxamë baja Dioso panejumecovënëtsijava, pajamatabëcuenesaëmë tsavanapae Dioso asivaya papecayavenonaexae. Diosojavabelia apo pajamatabëcuenesaëmë tsavanapae tsipae, panexaejava paatsobi atamë. Itsamonae jumecovënëta pexaejava piatsobinexa pitavetsilivaisi. Nexata pexaejava atsobabiaba. Itsiata baitsi jane pexaejava piatsobijava pejamatabëcueneta apo jamatabëcuenesaëyaexanaetsi Dioso pejumecovënëtsijava.

¹⁰ Jesús itsa cobematabiabarutatsi cruzajavabelia, vaxaitsi nacasivatëpa. Nexata pamona tsiteca ëperujulivaisimi sivajamatabëjumaitsi: “Itsa jumecovënëtaponaponaenajë Dioso Moiséspijinëta penajumecopatsilivaisi, nexata xanë ata Dioso necapanepaena,” sivajamatabëjai, bajarapamona saya jamatabëcuenenavëxaniaba. Bajarapitsijamatabëcuene penajamatabëxainaevi, apo capanepaetsi tsane Diosojavabetsia. Tsipaji Jesús pesivatëpaejavatsi, apo jumecovënëtsi.

¹¹ Sacerdotevi pepo penamatacaitorobinë dajubinë beyaxuababiaba. Nexata bajarapajana cajoneyabiaba Lugar Santísimojavabelia, itsajota baitsi Dioso peponaponaenexa yatuucuta. Bajarapayatuucutsijavaënëta sacerdotenë dajubinë pijana rajutabiaba ofrendacuenia Diosojavabelia, Dioso pevecuaajibiaexanaenexatsi pibisiacuene pexanabiabineconi. Nexata bajarapadajubinë pevi sacerdotenë itsa tajuita, tomarapënyabelia tajuitabiaba.

¹² Bajaraxuata Jesús ata Jerusalén tomarapënyabelia bejiobiaexanatsi. Bajaraxuacujinae beyaxuabatsi. Nexata daxita pamona jumecovënëta Jesús pesivatëpaejavatsi, bajarapamona Jesús pijana pejamatabëcueneta Dioso vecuaajibiaexanatsi pibisiacuene pexanaeconimi. ¹³ Nexata vaxaitsi ata becopatatsi baja perujulivaisi vajajumecovënëtsijavami. Nexata bejumecovënëtatsi Jesús pelivaisi. Nexata pacuenia Jesús nacopata itsamonae pebejiobiaexanaenexatsi vajanacasivatëpaenexa vajaneconi yabara, bajara pijinia pacuenia vaxaitsi ata benacopatatsi itsamonae vajanacabejiobiaexanaenexa Jesús pelivaisi yabara.

¹⁴ Mapanacujataje apo xainaetsi patomarata daxitamatacabijavabelianexa jinavanapaejitsiatsi. Biji rajane abaxë vajënaeevetavanapatsi athëbëpijtomara, patomarata patsijitsiatsi athëbëtatsia.

¹⁵ Jesucristo vajanacasivatëpaexae, Dioso nacatocopata vajavajëtabiabinexa Diosojavabelia. Nexata itsa vajëtabiabinatsi Diosojavabelia, jumaitsi tsabiabi tsane: “Diosomë, bitso ayajamatabëcuenenëmë,” jaitsi tsabiabi tsane Diosojavabelia. Bajarapacuenia vajajumaitsiabijava Diosojavabelia, Dioso taena ofrendacuenia bevajarajutaponaejava Diosojavabelia. Bajaraxuata itsa vajëtabiabinatsi Diosojavabelia, bajarapacuenia jumai tsabiabi tsane.

¹⁶ Pëtsa panacofënëtime pexaniacuene panetoexanavanapaejava itsamonaejavabelia. Itsajivi penamatavenonaejava, parajutsianame paneyavenonaenexa bajarapacuenia. Bajarapacuenia itsa parajutsianame itsajivi penamatavenonaejava, Dioso pacasivajamatabëcuenenëbarëya tsane.

¹⁷ Pamonae ancianovi, xua pacaitoroba, pajumecovënëtabiabarë. Itsamonae ata, pamona pijinia Dioso tocopatatsi papecaevetsinexa Dioso panejumecovënëtsivixae, xua pacaitoroba, pajumecovënëtabiabarë. Bajaramona paxëpëtanenua pacuenia Diosojavabelia naneconitsipa, xaniavaetsia itsa apo pacaevetsi. Itsa pajumecovënëtabiabiname papecaevetsivi papecaitorobicuenia, nexata papecaevetsivi jamatabëcueneyavenonaeya pajina-

vanapaename. Nexata pacasivajamatabêcuenebarëya tsane papecaeveta-vanapaevaja yabara. Paxamê itsa apo pajumecovênëtsimê tsipae, nexata papecaevetsivi pacasivajamatabêcuenebêjai tsipae. Nexata papecaevetsivi toacuenebi tsipaetsi papecajamatabêcuene yavenonaenexa Dioso panejume-covênëtsijava yabara.

¹⁸ Panetovajêta ponaename Diosojavabelia. Paxanê pajamatabêjumaitsinê: “Vaxaitsi baja apo naneconitsitsi Diosojavabelia, jivijavabelia ata,” paja-matabêjanê. Bajarapacuenia patavajênaeyabelia Dioso pitabarata anecon-iibia patajinavanapaenexa, panetovajêtsianame Diosojavabelia.

¹⁹ Panetovajêta ponaenamenua Diosojavabelia Dioso patanetocopatsinexa pataponaenexa paxamêjavabelia. Tsipaji icatsia pajitsipajê bepîjia patap-atsinexa paxamêjavabelia.

Pacuenia Pablo Dioso pejumecovênëtsivi tovajêta Diosojavabelia, pacuenia ata jamatabênjina itsamonaë Dioso pejumecovênëtsivi, yabara pelivaisi

²⁰⁻²¹ Jesucristo vajanacasivatêpacujinae, vaxa Dioso icatsia asaëyaexanatsi. Bajaraxuata yapêtanetsi pexaniajaicue ne Dioso athêbêabetsia vajanacaca-panepaejavanexa daxitamatacabijavabelianexa. Dioso yavenona daxita-jivi jamatabêcuenexanepanaeya pejinavanapaenexa. Nexata pacatovajêtatsi Diosojavabelia papecarajutsinexa xua panamatavenoname, panetoexana-vanapaenexa pacuenia Dioso pacatojitsipa. Vajêtajênuu Diosojavabelia Je-sucristo pejamatabêcueneta vajanacajamatabêcuenexanebinexa pacuenia jît-sipa. Pacuenia oveja pexainaenê xaniavaetsia evetaponapona pijaoveja, ba-jara pijinia pacuenia vajatuxanenê Jesucristo xaniavaetsia nacaevetapon-aponna. ¡Jesucristo bitso ayaijamatabêcuenenê tsaponaponae daxitamatacabi-javabelianexa! Bajara itsi tsane.

²² Tajamonaë, pacaitorobatsi xaniavaetsia panenamuxunaevetsinexa palivaisi pacatoyaquinatsi mapabaxutotajê. Tsiquirilivaisiyo saya pacatoyaquinatsi patacamuxujiobinexa panevajênaeyabelia panejamatabêcuenesaënexa Dioso panejumecovênëtsijava.

²³ Pexanialivaisiyo pacatoyaquinatsi patacatsipaebinexa mapacuenije. Vajabananê Timoteo rabaja pitsapa penaneconitsivi pejebabiabibovecua. Itsa patsiarena bepîjiayo xanêjavaberena, nexata barêponaenajê paxamêjavabelia.

²⁴ Nebajacobiana daxita Dioso pejumelivaisita papecaevetsivi, daxita va-jamonaë Dioso pejumecovênëtsivi yajava. Vajamonaë ata, Italia nacuapîjivi, pacajamatabênjinalia.

²⁵ Daxita paxamê pacatovajêtatsi Diosojavabelia papecayavenonaenexa Dioso. Bajara itsi tsane.

Mapabaxutoje Santiago toyaquina Dioso pejumecovēnētsivijavabelia

Pacuenia Santiago toyaquina mapabaxutoje Dioso pejumecovēnētsivi nacayajatsia pejinavanapaevi yabara pelivaisi

¹ Xanē Santiagonē, Dioso pijajivitonēnē, vajatuxanenē Jesucristo ata pijajivitonēnē. Pacatoyaquinatsi pajudíovimē patacabajacobinexa. Israelpijinēmi pexi doce ponēmibeje papemomoxiyajuvēnēvimē. Pepo panijanacuata picani panejinavanapaevimi. Aeconoxae baja pepo panijanacuamivecua, nacayajatsia pajinavanapame daxita nacuanējava.

Pacuenia Dioso pejumecovēnētsivi itsa jamatabēyapētane pacuene xanepana pexanaenexa, bevajēta Diosojavabelia yabara pelivaisi

² Tajamonae, pasivajamatabēcuenebarēyamē tsane daxitacuene, apo panejitsipaecuene ata, itsa pacatocopiapatsiana. Tsipaji raja bajarapacuene pacatocopiapatsiana papecajamatabēcuenejētsinexa Dioso panjumecovēnētsijava yabara.

³ Bajarapacuenia Dioso panejumecovēnētsivi pacajamatabēcuenejētaponae paneajamatabēcuenesaē tsaponae xanepa panevajēnaeyabelia Dioso panejumecovēnētsijava. Payapētaneme rabaja bajarapacuene yabara.

⁴ Apo panejitsipaecuene pacatocopiapatsi ata, pajamatabēcuenesaēmē tsavanapae tsane bajayajebī. Nexata pajamatabēcuenevitsabaponaename Diosojavabelia. Nexata apo pacatosaicae tsane itsalivaisi ata panejamatabēēthētota.

⁵ Paxamē itsa pajamatabēyapētaneme pacuene xanepana paneexanaenexa, nexata bepavajētame Diosojavabelia papecayapētaeyaexanaenexa Dioso. Nexata Dioso pacayapētaeyaexanaenexa pacuene xanepana paneexanaenexa. Dioso cajena bayapētaeyaexana daxita pamonae vajēta bajaraponējavabelia. Apo jumeitavetsi cajena itsa vajētatsi.

⁶ Itsa pavajētame Diosojavabelia, pajamatabējumaitsimēre: “Dioso cajena nacayapētaeyaexanaenexa xua vajētatsi,” pajamatabējamēre. Pētsa pajamatabējumaitsimē: “Dioso cajena itsiata apo nacayapētaeyaexanae tsane xua vajētatsi,” pajamatabējamē pētsa. Pajivi jumeaeba Dioso peyapētaeyaexanaejavanexatsi, bajarapajivi xaniavaetsia apo najamatabēxainae. Bajarapajivi pejamatabēcuene bemalataca picani. Pacuenia malataca xaniavaetsia apo rucae jovibota, bajara saya jamatabēcueneitsi bajarapajivi. Apo najamatabēxainae caelivaisi, palivaisi Dioso yapētaeyaexanaejitsiatsi.

⁷⁻⁸ Bajarapajivi anijajamatabēcuenebeje xaina. Najamatabēcuene epatajērērcabiaba itsa exana daxitacuene. Nexata pajivi jumeaeba Dioso peyapētaeyaexanaejavanexatsi, pētsa patocopatame pejamatabējumaitsinexa: “Dioso cajena nerajutsiana tavajētsijava,” pejamatabējainexa. Dioso cajena apo rajutsitsi tsane xua vajēta bajarapajivi.

⁹ Dioso pejumecovēnētsinē apo xainae ata pecobecovējavayo, jivi apo yayiatae atatsinua, itsiata bejamatabēcuenebarēya Dioso pejumecovēnētsinēxae. Tsipaji Dioso pejunatsixaetsi Dioso pijajivitonēnēxa, apo bejiobi tsane daxitamatacabijavabelianexa.

¹⁰ Dioso pejumecovënëtsinë itsa bitso pexainaenë pexainaeyava, itsamonae itsa yacajërëtsati pexinaecuene, itsiata bejamatabëcuenebarëya Dioso pejumecovënëtsinëxae. Tshipaji pacuenia ponatoxi bepijia matonoverevereca, bajara pijinia itsi tsane bitso pexinaecuene ata. Bepijia vereverecaena.

¹¹ Itsa baja juameto tajë rucaina, icotia bitso ataju. Nexata ponatoxi tsaquena. Pematono ata othopa. Nexata pexaniamatonojavami ata verevereca bepijia. Bajara pijinia itsi tsane bitso pexainaeyava pexinaeavi ata. Yajavavereverecaena pexainaeyava pexanajetanucaepatota ata.

Pacuenia Dioso jivi apo jamatabëcuenejëtsi pibisiacuene pexanaeyaexanaenexa yabara pelivaisi

¹² Pamonae jamatabëcuenejëtsi atatsi, najamatabëcueneecataita pibisiacuene pexanaeyaniva, bajarapamonae jamatabëcuenebarëya. Tshipaji itsa vecuapanepa pejamatabëcuenejëtsijavatsi, pibisiacuene exanaenejeva, nexata bajarapamonae Dioso rajutsianatsi pexaniacuenejava. Rajutsianatsi matakabi apo pevereverecaejava. Bajarapacuenie yabara Dioso najumecapanepaeya jumaitsi perajutsinexatsi pamonae jitsipa Dioso.

¹³ Itsa pacajamatabëcuenejëta pibisiacuene paneexanaenexa, pëtsa jamatabëcuenenavëxaniabiaya pajumaitsimë: “Dioso raja nejamatabëcuenejëta pibisiacuene taexanaenexa,” pajamë pëtsa. Dioso cajena apo jamatabëcuenejëtsi itsajivi ata pibisiacuene pexanaeyaexanaenexa. Itsajivi ata pijinia apo cajëpaetsi pejamatabëcuenejëtsinexa Diosojavabelia pibisiacuene pexanaenexa Dioso.

¹⁴ Pajivi jamatabëcuenejëtsati pibisiacuene pexanaenexa, bajarapajivi copiaya pejamatabëëthëtota jamatabënaponapona papibisiacuene jamatabëexana. Nexata jane baja itsa jamatabëcuenejëtsati pibisiacuene pexanaenexa, bajarapapibisiacuene exana.

¹⁵ Pajivi pibisiacuene exana, bajarapajivi exana pacuenia copiaya pejamatabëëthëtota najamatabëxaina. Nexata tsiteca pibisiacuene itsa exanapona, pepacuenie Diosovecua naxuabiana bajarapapibisiacuene pexanaponaexae.

¹⁶ Tajamonae bitso patacaasivavi, jamatabëcuenenavëxaniabiaya pëtsa pajamatabëjumaitsimë: “Dioso nejamatabëcuenejëta pibisiacuene taexanaenexa,” pajamatabëjamë pëtsa.

¹⁷ Tshipaji daxita pacuenie pepo pexaniacuene, Dioso baja cajena vajanacatoitorobicuenetsica. Bajaraponë pexanaenë daxita xua naitayotarubena itaboxotatsia. Dioso cajena daxitamatacabijavabelianexa caejamatabëcuene penajamatabëxainaenë. Caejamatabëcuene Dioso nacasivanajamatabëxaina vaxaitsijavaberena.

¹⁸ Dioso baja cajena copiaya najamatabëxaina pexanaenexa pacuenia jitsipa. Nexata nacayapëtaeyaexana pejumelivaisi pexaniajailivaisi. Bajaraxuata nacarajuta pejanajamatabëcuene pitavajamatabëcuene. Vaxaitsi copiaya Dioso itsa jumecovënëtsati, Dioso pexitsi nacaexana. Pamonae ata coto-caevi Dioso jumecovënëtsi, bajarapamonae ata Dioso pexi exanatsi. Nexata vaxaitsi, copiaya Dioso vajajumecovënëtsivi, Dioso nacatane bematapijivitsi. Coto-caevi pijinia Dioso pejumecovënëtsivi, Dioso tanetsi bejuyapijivi.

Pacuenia bexanavanapa pamonae xaniavaetsia jumecovënëta Dioso yabara pelivaisi

19 Tajamonaē bitso patacaasivavi, pacanaējētsianame mapalivaisije, pali-vaisi pacatsipaebijitsiatsi. Daxita paxamē xaniavaetsia bepanamuxunaēve-tame Dioso pejumelivaisi. Apo bepacuaicuaijamē abaxē copaiya xaniavaet-sia panajamatabēxainaejevamē. Apo bepaanaepanaemēnua bepijia.

20 Tspipaji itsa anapanatsi, Dioso apo toexanaetsi pexaniacuene, pacuene Dioso jitsipa.

21 Bajaraxuata pacopabare daxita pibisiacuene panenaja-matabēxainaejava. Pacopabarenau daxita pibisiacuene paneexanaejava itsamonaējavabelia. Dioso raja pejumelivaisi pacatsijamatabēuba. Bajaraxuata beveliajamatabēcuenevi nataeya pajumecovēnēre Dioso pejumelivaisi. Bajarapalivaisi itsa pajumecovēnētame, nexata pacacapanepaena Diosojavabelia.

22 Pacuenia Dioso pejumelivaisita jumaitsi, jumecovēnētsiaya paexanaponare. Pētsa pajamatabējumaitsimē: “Pacuenia Dioso pejumelivaisita jumaitsi, apo exanaē atanē, apo itsacuene,” pajamatabējamē pētsa. Tspipaji saya pajamatabēcuenenavēxaniabijitsipame. Nexata itsa apo paexanaemē tsipae pacuenia Dioso pejumelivaisita jumaitsi, pananeconitsipame Diosojavabelia.

23 Pajivi jumetae ata Dioso pejumelivaisi, itsiata itsa apo exanaē pitoro-bicueniatsi, bajarapajivi jamatabēcueneitsi pacuenia itsi ponē naitabaratane tsaxuta.

24 Ponē tsaxuta naitabaratane, penaitabarataecujinae pona baja. Nexata bajaraponē bepijia nacofēnēta pacuenia itabarajumapeitsi.

25 Dioso cajena pejumelivaisi bitso xanepana. Caējēpatsinua vajanacaca-panepaenexa bajaraponējavabelia. Pajivi daxita bajarapalivaisi pitorobicue-niatsi exanaponapona copatsinejeva, bajarapajivi bitso Dioso yavenonaes-natsi daxitacuenejavabelia.

26 Pajivi jumaitsi ata: “Xanē bitso toexanaponaponajē Dioso pejitsipae-cuenia,” jai ata, itsiata itaxutojema itsa cuaicuaijai tsabiabi, bajarapajivi saya jamatabēcuenenavēxaniaba. Tspipaji Dioso apo pejitsipacuenua cuaicuai-jai. Nexata bajarapajivi xua Dioso toexanaponapona apo tonamatamotsi tsanetsi Diosojavabelia.

27 Dioso pejumecovēnētsijivi, pajivi Dioso aneconijibiatanetsi, exanapon-aponapona mapacueniaje. Yavenona tsonijivixi. Yavenonanua pamona pevecu-atēpaevitsi bitso itsa namatavenona itsacuenejavaxi. Pajivi Dioso pejume-covēnētsijivi, nayajivitaeyaponapona pibisiacuene pexanaeyaniva, pacuene exanabiaba mapanacuapijivi, Dioso apo pejumecovēnētsivi.

2

Pacuenia Dioso pejumecovēnētsivi muxujiobatsi daxitajivi najēpaeya ja-matabēcuenexanepanaeya petaenexa yabara pelivaisi

1 Tajamonaē, ayaijamatabēcuenenē vajatuxanenē Jesucristo panejumecovēnētsixae, daxitajivi najēpaeya pataema. Pētsa itsamonaē bijiaja pataneme.

2 Nexata panenacaetuatsijavata, riconē, pexaniajava penaxatatsinē, nap-atsipa, oro anillo penacobexatatsinē. Bajarapaepatota pijinia bepejiohinē, perujuesetoyo penaxatatsinē, napatsipa. ¿Detsa pacuenia pacopiapitsipame bajarapitsinēbeje?

3 Caenē meta xaniavaetsia pacopiapitsipame, pexaniajava penaxatatsinē. Paecaeyaexanaejitsipame pexaniajavata. Ponē bepejiohinē, apo pacopi-apitsimē tsipae xaniavaetsia. Saya panucaeyaexanaejitsipame. Itsa jume,

paecaeyaexanaejitsipame irata. Nexata bajarapacuenia itsa paexanaejitsipame, pexaniacuene apo paexanaemë tsipae Dioso pitabarata.

⁴ Bajarapacuenia itsa paexanaejitsipame, najëpaeya bajaraponëbeje apo pataemë tsipae. Caenë payaiyataejitsipame. Itsanë saya bijiaya pataejitsipame. Nexata bajarapacuenia itsa paexanaejitsipame, pibisiacuenia panajamatabëxainaejitsipame.

⁵ Tajamonae bitso patacaasivivi, panejumetaema. Dioso raja itapetatsi pamonaepo pexainaevi mapanacuataje. Bajarapamonae Dioso itapetatsi pexi pexanaenexatsi. Nexata bajarapamonae itsa najamatabëcuenecopatsiana Cristojavabelia, bitso pexainaevi tsane athëbëatsia, Dioso pijanacuataatsia, itsajotatsia Dioso eveta daxitacuene. Bajarapamonae ata tocopatsianatsi Cristo pebarëevetsinexatsi daxitacuene, pacuenia Dioso najumecapanepaeya jumaitsi Dioso pijajivi yabara.

⁶ Itsiata baitsi jane bajarapacuenia bepejiobivi yabara pejumaitsijava payapëtae atamë, paxamë bijiaya pataeyabiabame bepejiobivi. Ricovi baja cajena xainapona bitso pexainaejava panejumata. Bajarapamonae pacaneconitabiabanua juezmonaejavabelia juezmonae papecananeconitsiaexanaenexa.

⁷ Ricovi cuaicuaijai tsabiabi pibisiacuenia Cristo yabara, ponë vaxaitsi yayiataeya jumecovënëtavapanatsi.

⁸ Dioso pejumelivaisibaxutota jumaitsi mapacueniaje: “Asivamëre itsamonae ata pacuenia xamë nijacuata nasivamë,” jai. Bajarapalivaisi pexanialivaisi bitso daxitalivaisianë matatoxenetsia. Nexata bajarapalivaisi pepacuene itsa pajumecovënëtsianame, pexaniacuene paexanaename.

⁹ Itsa payaiyataejitsipame itsamonae, itsamonae pijinia bijiaya itsa pataejitsipame, nexata paexanaejitsipame pibisiacuene. Pananeconitsipame Diosojavabelia. Tsipaji najëpaeya apo pataemë tsipae daxitajivi Dioso papecaitorobicuenia.

¹⁰ Pajivi jumecovënëtsi ata Dioso Moiséspijinëta penajumecopatsilivaisi, itsiata bajarapalivaisita caelivaisiyo itsa apo jumecovënëtsi, nexata itsiata naneconitsiana Diosojavabelia bajarapalivaisita caelivaisiyo apo pejumecovënëtsixae. Nexata bajarapajivi daxita bajarapalivaisi apo bepejumecovënëtsijivicuenia, Dioso taenatsi.

¹¹ Dioso jumaitsi: “Pëtsa jaitame itsava nijavavecua,” jai. Petiriavinexa pijinia jumaitsi: “Pëtsa jaitame itsanë amonavecua,” jai. Dioso icatsia itsajumeyo jumaitsi: “Pëtsa beyaxuabame jivitonë,” jai. Nexata ponë apo jaitsi ata itsava pijavavecua, itsiata itsa beyaxuaba jivitonë, Dioso tanetsi daxita bajarapalivaisi apo pejumecovënëtsinëcuenia.

¹² Jesucristo papecaitorobicuenia itsa paexanaename, nexata apo pananeconitsimë tsane Diosojavabelia. Itsa apo pajumecovënëtsimë tsane, nexata pananeconitsianame Diosojavabelia. Bajaraxuata itsa pacuaicuaijamë, pacuaicuaijamëre pexanialivaisi. Paexanavanaparenua pexaniacuene pacuenia Jesucristo pacaitoroba.

¹³ Paxamë itsa apo paitaxutotsoniataemë itsamonae ata, nexata juya Dioso apo pacaitaxutotsoniatae tsane pamatacabi Dioso naneconitsiaexanaena daxitajivi pibisiacuene pexanaeconi yabara. Itsiata baitsi jane itsa paitaxutotsoniataneme itsamonae ata, juya Dioso pacaitaxutotsoniataena. Nexata Dioso apo pacananeconitsiaexanae tsane.

Pacuenia Dioso pejumecovënëtsivi pexaniacuene bexanavanapa yabara pelivaisi

14 Tajamonae, pajivi jumaitsi ata: “Xanë jumecovënëtajë Jesús pelivaisi,” jai ata, itsiata itsa apo exanae pexaniacuene itsamonaejavabelia pacuenia Dioso nacaitoroba, bajarapajivi apo jumenamatamotsi Diosojavabelia. Bajarapacuenia itsa jumaitsi tsane pecuibota, bajarapajivi Dioso apo capanepae tsanetsi.

15-16 Itsamonae Dioso pejumecovënëtsivi bitso namatavenonaejitsipa penaxatatsijava, pexaejava ata. Nexata bajarapamonaejavabelia paxamëyajuvënëjivi jumaitsi ata tsipae: “Xaniavaetsia baja paponare. Dioso pacayavenonaena panenaxatatsijavanexa paneaqueyaniva. Pacarajut-siananua panexaejavanexa ata,” jai ata tsipae, nexata itsiata bajarapajivi apo jumenamatamotsi tsipae. Tsipaji apo itaxutotsoniatae. Saya itoroba peponaenexa.

17 Bajara pijinia itsi Jesús pelivaisi vajajumecovënëtsijava. Pajivi pexaniacuene apo toexanae itsamonaejavabelia, bajarapajivi jumaitsi ata: “Xanë jumecovënëtajë Jesús pelivaisi,” jai ata, itsiata apo jumenamatamotsi. Tsipaji pacuenia Dioso itorobatsi, apo exanae.

18 Nexata pajivi Jesús pelivaisi jumecovënëtsi ata, itsiata pexaniacuene itsa apo toexanabiabi tsane itsamonaejavabelia, nexata meta itsajivi jumai tsane bajarapajivijavabelia: “Xamë jumaitsimë tsabiabi: ‘Xanë jumecovënëtajë Jesús pelivaisi,’ jamë tsabiabi. Itsiata pexaniacuene apo toexanabiabimë itsamonaejavabelia pacuenia Dioso nacaitoroba. Nexata apo cajamatabëcueneypëtaetsi nexaniajacuene nejumecovënëtsijava Jesús pelivaisi. Tsipaji pexaniacuene apo toexanabiabimë itsamonaejavabelia pacuenia Dioso nacaitoroba. Xanë rajane pexaniacuene toexanabiabajë itsamonaejavabelia pacuenia Dioso nacaitoroba. Bajarapacuenia pexaniacuene tatoexanabiabixae itsamonaejavabelia catsitanajamatabëcueneitajëtatsi taxaniajacuene tajumecovënëtsijava Jesús pelivaisi,” jai meta tsane itsajivi pajivijavabelia pexaniacuene apo toexanabiabi itsamonaejavabelia, Jesús pelivaisi jumecovënëtsi ata.

19 “Caenë rabaja tsaponaponae Dioso,” pejailivaisi paxamë pajumecovënëtame. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, pijajivi yajava, jumecovënëta: “Caenë rabaja tsaponaponae Dioso,” pejailivaisi. Bajaraxuata dovathi pijajivi barëneconecojai pecajunavi.

20 Paxamë pajamatabëcuenelivaisijibimë. Vaxaitsi jumaitsi atatsi: “Xanë jumecovënëtajë Jesús pelivaisi,” jai paxamë pajumecovënëtame. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, atatsi, itsiata pexaniacuene itsa apo toexanabiabitsi itsamonaejavabelia pacuenia Dioso nacaitoroba, ajumematamobitsi cajena Diosojavabelia.

21 Bajayata vajasalinainëmi Abrahampijinë xaina pexënatonëyo. Pevënë Isaac. Nexata Abrahampijinë Dioso jamatabëcuenejëtsiaya itorobatsi penacoxibeyaxuabinexa picani. Dioso jumaitsi Abrahampijinëjavabelia: “Nexënatonëyo beyaxuare ofrendacuenia tanerajutsinexamë,” jai Dioso Abrahampijinëjavabelia. Nexata Abrahampijinë ajena nacoxibeyaxuabijitsia, Dioso itavetatsi. Abrahampijinë pejumecovënëtsixae pacuenia Dioso itorobatsi, nacoxicëtabuata picani penacoxibeyaxuabinexa. Bajaraxuata Abrahampijinë Dioso aneconijibiatanetsi.

22 Abrahampijinë cajena Dioso jumecovënëta pacuenia tajëvelia Dioso najumecapanepaeya jumaitsitsi. Bajaraxuata exana pacuenia Dioso itorobatsi. Bajarapacuenia itsa exana Abrahampijinë, najamatabëcueneitajëta

pepacuene Dioso pejumecovënëtsijava pejamatabëëthëtojavavetsina.

²³ Nexata bajarapajamatabëcuenelivaisi yabara Dioso pejumelivaisibaxu-tota jumaitsi Abrahampijinë yabara mapacueniaje: “Abrahampijinë jumecovënëta pacuenia Dioso najumecapanepaeya jumaitsitsi. Bajaraxuata Dioso aneconijibia tanetsi,” jai baja cajena Dioso pejumelivaisibaxutota Abrahampijinë yabara. Nexata Abrahampijinë yabara jivi jumai tsabiabi: “Abraham raja Dioso piasivanëtsi,” jai tsabiabi.

²⁴ Nexata baja paxamë payapëtaneme mapacueeneje. Pajivi jumecovënëtsi ata pacuenia Dioso najumecapanepaeya jumaitsi, itsiata itsa apo exanabiabi pexaniacuene, bajarapajivi aneconijibia Dioso apo taetsi. Pajivi jumecovënëta pacuenia Dioso najumecapanepaeya jumaitsi, nexata itsa exanabiaba pexaniacuene, bajarapajivi Dioso aneconijibia tanetsi.

²⁵ Bajara pijinia pacuenia bajayata Dioso aneconijibia tanetsi Rahabpijivami pibisiacuene pexanabiabivami ata. Bajarapovami palata pepitsinexa, pibisiacuene exanabiaba pevitota. Itsiata baitsi jane bajarapovami pexaniacuene exana. Tsipaji copiapita xaniavaetsia Israelpijinë pemomobeje. Bajaraponëbeje jivi peyaenebinëbeje vajabitsaë pexanaenexa bajara patomara-pijivijavabelia. Rahabpijivami yavenonanua bajaraponëbeje peponaenexabeje saicaya namutua pijavajabitsaë pebeyaxuabiyanimvatsibeje. Bajara-pacuenia Rahabpijivami pexaniacuene pexanaexae Dioso aneconijibia tanetsi.

²⁶ Piasaëtsaponaponaejivi ata itsa baja ajumalijibi, tēpa baja. Apo exanae baja itsacuenejavayo ata pexaniacuene pevajënaeyabelia. Bajara pijinia vaxaitsi ata jamatabëcuenetsitsi Jesús pelivaisi vajajumecovënëtsivi. “Xanë jumecovënëtajë Jesús pelivaisi,” jai atatsi, itsiata itsa apo exanaetsi pexaniacuene pacuenia Dioso nacaitoroba, bevajajamatabëcuenetēpaevi Dioso tsitajinavanapatsi.

3

Pacuenia itsi vajeabarëto yabara pelivaisi

¹ Tajamonaë, paxamëyajuvënëvi vënëlivaisitaniji pacuenia ayaibitsaëto jitsipa penaexanaenexa Jesús pelivaisi jivi petsipaebivinexa. Itsiata baitsi jane ayaibitsaëto apo benaexanae jivi livaisi petsipaebaponaevinexa. Paxamë rabaja payapëtaneme mapacueeneje. Paxanë Jesús pelivaisi jivi patatsipaebaponaevi, paitavetaponajë pibisiacuene pexanaejava. Nexata pibisiacuene pexanaejava pataitavetsicujinae, bajarapapibisiacuene itsa paexanaejitsipajë, Dioso bitso ayaicuenia panenaneconitsiaexanaejitsipa daxitajivi matatoxenetsia.

² Daxitatsi vaxaitsi itsajavata banacajumejemaba pibisiacuenia vajacuaicuaijainexa, pacuenia picani apo becuaiicuaijaitsi. Pajivi pibisiacuenia apo cuaiicuaijai, bajarapajivi ajamatabëcuenesaë baja Diosojavabelia. Nexata bajarapajivi caëjëpatsi penajamatabëcuenesaëtsinexa daxita pibisiacuene pexanaeyaniva.

³ Caballo vajavësimuxufetsinexa tscuiboxatatsi freno. Nexata freno caballovecuia tsiquirijavayo ata, itsiata caëjëpa caballo vajavësimuxufetsinexa itsabelia jitsipatsi vajaponaenexa.

⁴ Bajara pijinia itsi barco ata, pinijimo ata. Jovibo ayai ata, itsiata petabufetaicaenë tsiquiritenapayo ata, barcotabufe cajënapona itsabelia jamatabëpona peponaenexa.

⁵ Bajara pijinia itsi tsiquiriisotoyo ata. Itsa tajua, naexana ayaiisoto petajuvenexa pinijiunu ata. Bajara pijinia itsi vajeabarëto ata. Tsiquirijavayo picani vajeabarëto. Itsiata caëjëpatsi pecuicuaijainexa ayailivaisi.

6 Vajaearëto cajena ayai, pacuenia isoto ayai. Vajaearëtota raja pibisiacuene exanatsi daxita vajavi matatoxenetsia. Nexata vajacuaicuajajava nacajamatabëcuenebijiana. Tsiquirijiviyotsijavaveliacujinae vajatëpaejavabelianexa, bajarapacuenia cuaicuajajatsi. Dovathi vajanaacitorobjava vajajumecovënëtsixae, cuaicuajajatsi pibisiacuena.

7 Pacanaëjere mapacueneye. Jivi caëjëpatsi penaitajuaniaexanaenexa daxitaviriadajubiyajuvëni. Caëjëpatsinua penaitajuaniaexanaenexa unupijivi ata, pepunaevi ata. Caëjëpatsinua penaitajuaniaexanaenexa pecotobëxëta pejinavanapaevi ata, manumenepejijidujuai ata. Itsamonae bajarapacuenia naitajuaniaexana baja pejumecovënëtsinexatsi.

8 Itsiata baitsi jane itsajivi ata apo caëjëpaetsi penaearëttoitavetsinexa jumejemabiaya pibisiacuena pecuaicuajajava pecopatsinexa. Vajaearëto cajena bitso abeje. Apo nacacaëjëpae vajanajumecataitsinexa. Nexata pacuenia jomo pijaveneno xaina pebeyaxuabinexa, bajara pijinia itsi vajaearëto.

9 Vajaearëtota pexaniacuena jumaittsi vaxa Diosojavabelia: “Xamë bitso ayajamatabëcueneëmë,” jaitsi. Vajaearëtota icatsia pibisiacuena cuaicuajajatsi itsamonaejavabelia. Bajarapamonae picani beyaiyatanetsi. Tspaji Dioso nacuenecataeya pexanaevitsi.

10 Caearëtota pexaniacuena cuaicuajajatsi Diosojavabelia. Pibisiacuena ata cuaicuajajatsi itsamonaejavabelia. Tajamonae, apo bexanaetsi cajena bajarapacuenia.

11 Pacanaëjere mapacueneye. Mera pepitsapaemëthëatsina pitsapaina caera, pexaniara. Apo pitsapae pexaniara, piatsaxara yajava.

12 Bajara pijinia itsi peubijava ata. Higeranaejavaverena apo pitsapae saicayacuai. Uvanaejavaverena ata apo pitsapae saicayacuai. Jume cajena. Bajara pijinia itsi mera pepitsapaemëthë. Caeyatsina apo pitsapae pexaniara, piatsaxara yajava. Bajara pijinia itsi vajaearëto ata. Caearëtota apo becuacuajajatsi pibisialivaisi, pexanialivaisi yajava. Nexata becuacuajajatsi ëpexanialivaisi.

Pacuenia Dioso pijajivi yapëtaeyaexana pexanaenexa pexaniacuene yabara pelivaisi

13 Paxamë rabaja xaniavaetsia pajumeyapëtaneme Dioso pejumelivaisi. Nexata itsamonae pexaniacuene bepatsitaexanavanapame pacuenia pajumetaneme Dioso pejumelivaisita. Bajarapacuenia itsamonae pexaniacuene bepatsitaexanavanapame beveliajamatabëcuenevi nataeya. Nexata daxitajivi pacacueneyapëtaena bitso panejumeyapëtaevicuene Dioso pejumelivaisi.

14 Itsiata baitsi jane bitso itsa pacuenecaëbabiabame itsamonae, itsa pajitsipabiabamenua jivi paneevetsivinexa papecaexanaenexa, pëtsa jamatabëcuenenavëxaniabiaya pajumaitsimë mapacueniaje: “Xanë bitso xaniavaetsia yapëtaniji Dioso pejumelivaisi,” pajamë pëtsa. Tspaji saya panajamatabëcuene capaebijitsipame xaniavaetsia Dioso pejumelivaisi paneyapëtaejava.

15 Itsa pejumelivaisi itsa payapëtaejitsipame xaniavaetsia, nexata apo panajamatabëxainaemë tsipae bajarapacuenia. Dovathi rajane pejamatabëcueneta pacaitoroba panenajamatabëxainaenexa bajarapacuenia. Itsa jume, nexata paxamë panejamatabëcueneta panajamatabëxainame bajarapacuenia.

16 Itsajota jivi cuenecaëba itsamonae, itsa jitsipabiabanua jivi pevet-sivinexa pexanaenexatsi, bajarajota nexata jivi najamatabëcuenejëpaeaya apo jinavanapae. Daxitacuene pibisiacuene ata exanavanapa.

17 Biji rajane Dioso itsa nacayapëtaeyaexana pexaniajamatabëcuene, nexata pexaniajamatabëcuene xainatsi. Apo namaxëvanitsitsi. Itsamonae yaityatanetsi vaxaxanaeyaniva bajarapamonaejavabelia apo pejitsipaecuena. Najamatabëxainatsi itsamonae ata vajanacamuxujobilivaisi vajajumeyapëtaenexa. Itaxutotsoniatanetsi itsamonae ata. Pexaniacuene exanatsi. Apo najamatabëcuene epatajërërëcaetsi. Apo yamaxëitojorobitsi itsamonae ata. Bajarapacuenia exanatsi Dioso pejamatabëcueneta pexaniajamatabëcuene itsa nacayapëtaeyaexana.

18 Vaxaitsi jivi itsa nabarajamatabëcuene xanepanaeyaexanaenatsi, namataenetsia penaitoyavi ata, nexata vaxaitsi ata nabarajamatabëcuenexanepanaeya jinavanapaenatsi. Pexaniacuenua exanavanapaenatsi.

4

Pacuenia jamatabëcueneitsi pajivi jitsipa mapanacuapijicueneje yabara pëlivaisi

1 ¿Detsa xuajitsia paxamëyajuvenëvi anaeya namataenetsia pijanajumenoabiabi pecanabeyabiabi? Bajarapacuenia najumeanaenotabiaba tsipaji pejamatabëëthëtota bitso jitsipa pexanaenexa daxita xua pibisiacuene. Bajaraxuata nabeyabiaba.

2-3 Paxamë picani pajitsipame itsacuenejava panexainaenexa. Itsiata apo pacacajëpae panepitsinexa. Bajaraxuata nexata pexainaevi payabarabeyaxuababiabame. Pacobecaëbabiabame itsamonae pexainaejava. Nexata pexainaevi payabarabeyabiabame paneyacajërëtsinexa pecobecovë. Paxamë apo paxainaemë panejitsipaecuene. Tsipaji pavajëcabiabi atamë Diosojavabelia, itsiata apo pacarajutabiabi xua pavajëcame. Tsipaji saya bajaraxua pavajëcabiabame paneexanaenexa daxita xua pibisiacuene.

4 Caejamatabëcuene Diosojavabelia apo paxainaemë. ËDioso pijacuene apo pajitsipaemë. Mapanacuata pexainaecuene ata bitso payajavajitsipame. Bajarapacuenia panenajamatabëxainaexae, pacuenia petiriva jamatabëcueneitsi, pova pamonavecua jaita itsanë, bajarapajamatabëcueneitsimë. Payapëtaneme rabaja mapanacuapijicuene bitso pejitsipaevi, bajarapamonae Dioso bepijavajabitsaë naexana. Bajara pijinia paxamë ata paitsimë.

5 Bajarapajamatabëcuene yabara Dioso pejumelivaisibaxutota jumaiti mapacueniaje vajacanajëtsinexa xaniavaetsia Diosojavabelia: “Espiritu Santo, ponë nacatsijamatabëeca, bajaraponë bitso nacaasiva. Bitso naca-tojitsipa vajasivanexa ëDioso,” jai Dioso pejumelivaisibaxutota vajajitsipaeyaniva mapanacuapijicueneje.

6 Dioso cajena nacayavenona vajanajamatabëcuene cataitsinexa pibisiacuene vaxaxanaeyaniva. Dioso pejumelivaisibaxutota jumaiti mapacueniaje: “Dioso yavenona pamonaë beveliajamatabëcuenevi natane. Pamonaë pijinia beyajamatabëcuenevi natane, Dioso apo yavenonaë,” jai Dioso pejumelivaisibaxutota.

7 Nexata beveliajamatabëcuenevi nataeya paexanavanapare pacuenia Dioso pacatojitsipa. Panavecuaaitavere dovathi. Nexata dovathi pacavecuanajetabajiraviana.

8 Pavajëre Diosojavabelia. Nexata Dioso pacayavenonaena. Paxamë pibisiacuene paneexanaevi, pacopare bajarapacueni. Paxamë anijajamatabëcuenebeje panexainaevi, Dioso pijalivaisi, pibisiajamatabëcuene ya-

java. Pacopare bajarapajamatabëcuene Dioso papecajamatabëcuene xaniavaetsinexa pibisiajamatabëcuenevevua.

⁹ Pibisiacuene paneexanaeconi yabara, bitso panatsinajamatabëxainare. Bitso payaauramërenua. Pëtsa payabarëyamë.

¹⁰ Beveliajamatabëcuenevi panataema Dioso pitabarata. Nexata pibisiacuene paneexanaeconimivevua, Dioso pacajamatabëcuene yavenonaena. Nexata panajamatabëcuene yotsianame Dioso javabelia.

Pacuenia nacaitaveta itsamonae Dioso pejumecovënëtsivi pibisiacuenia vajabaracuaicuajaiyaniva yabara pelivaisi

¹¹ Tajamonae, pëtsa najumetsënëtsia namataenetsia panabaracuaicuajamë. Pajivi najumetsënëtsia baracuaicuajai Dioso penajuajumecovënëtsivi, bajarapajivi naneconita Dioso javabelia. Dioso penajuajumecovënëtsivi, pibisiacuene pexanaejava xaniavaetsia cueneyapëtaejeveva, itsa jamatabëjumaitsinua: “Bajarapamonae Diosovevua naxuabiana pibisiacuene pexanaexae,” itsa jamatabëjai, nexata bajarapajivi ata naneconita Dioso javabelia. Dioso penajuajumecovënëtsivi, najumetsënëtsia itsa baracuaicuajai, nexata apo jumecovënëtsi pacuenia Dioso itorobatsi. Pacuenia Dioso itorobatsi, itsa apo jumecovënëtsi, nexata apo bepxaniajailivaisi tane. Caranata bajarapajivi jivi bepaneconitsiaexanaenë natane.

¹² Caenë Dioso nacatonajumecopata vajajumecovënëtsinexa. Bajara jane ponë nacananeconitsiaexanaena pibisiacuene vajaexanaeconi yabara. Bajaraponë caenë caëjëpatsinua pejumaitsinexa itsajiviyojavabelia: “Xamë pepacuene naneconitame. Nexata nevecuanaxuabianame infiernojavabelia,” pejainexa. Itsa jume, caëjëpatsi pejumaitsinexa: “Xamë baja caaneconijibiaexanatsi. Nexata aneconijibia catanetsi. Nexata cacapanepaenatsi,” pejainexa. Bajaraxuata paxamë Dioso apo pacatocopatsi itsamonae yabara panejumaitsinexa mapacueniaje: “Bajarapamonae Diosovevua naxuabiana pibisiacuene pexanaexae,” panejainexa.

Pacuenia itsajivi ata apo natsivajënaeyapëtae pacuene meravia pitsijavata tocopiapatsijitsiatsi yabara pelivaisi

¹³ Panenamuxunaevere mapalivaisije. Paxamë abaxë xaniavaetsia payapëtaejevamë xua Dioso pacatocopatsijitsia paneexanaenexa, ayaijamatabëcuenevi nataeya tajëvelia panavajunupaebabiabame. Tajëvelia pajumaitsimë tsabiabi: “Ajena. Itsa jume, pepacuene jane baja meravia, pon-aenatsi bajarapatomarabelia. Bajarajotalia caevai nacuenebianatsi palata vajanacanabinexa,” pajamë tsabiabi.

¹⁴ Pëtsa bajarapacuenia ayaijamatabëcuenevi nataeya tajëvelia panavajunupaebabiabame. Tsipaji raja apo panatsivajënaeyapëtaemë xua pacatocopiapatsijitsia meravia pitsijavata. Vajajinavanapaepatoyo saya tsiquirimatacabi yota jinavanapatsi vajatëpaenexa. Pacuenia itsi nojoba, bajara saya itsitsi vaxaitsi. Nojoba pitsapa bajayacunua caepatoyonexa saya. Bajaraxuacujinae icatsia ajibi baja. Bajara pijinia itsitsi vaxaitsi ata.

¹⁵ Nexata saya bepajumaitsimë: “Itsa Dioso nacatocopatsiana abaxë vajaanatsavanapaenexa, jinavanapaenatsi. Exanaenatsi mapacueniaje. Itsa jume, itsacuenia exanaenatsi,” bepajamë saya.

¹⁶ Paxamë saya bepaayaijamatabëcuenevimë panataeyabiabame. Nexata paneexanaejavanexa, abaxë tajëvelia panavajunupaebabiabame panatsivajënaeyapëtaejevamë xua Dioso pacatocopatsijitsia paneexanaenexa. Bajarapacuenia ayaijamatabëcuenevi nataeya panavajunupaebabiabijava,

pibisiacuene. Tspaji panajamatabēxainabiabame bepanijacuata itajara paneexanaejavanexa. Apo pacanaējētsimē bajaraxua Dioso papecatocopatsijava, bajarapacuenia paneexanaenexa.

¹⁷ Pajivi yapētae ata pacuenia picani bexana, itsiata itsa apo exanae, bajarapajivi naneconita Diosojavabelia.

5

Pacuenia bitso pexainaevi muxujiobatsi yabara pelivaisi

¹ Bitso panexainaevi, ipanenamuxunaevere mapalivaisije! Panatsinuema bitso ayajumeta. Tspaji raja Dioso pacabejiobiaexanaena.

² Bitso panexainaecuene panexaniavaetsijavami, pacatotsabanaena. Pexaniavirijavanē, panenaxatabijavanēmi ata, daxita pacatoucubaxaena.

³ Palatanēanē ata, bitso penamatamotsinēanē, pacatotasibianatsi. Nexata nayapētaena bajarapapalata apo panecanacuenebijava. Bajarapapalatata apo paneyavenonaexae itsamonaē, pacatotasibianatsi. Isoto pacaveri-ajaviana daxita panexainaevajava. Pacaetuatoname picani papecatoayajivanexa. Itsiata baitsi jane pamatacabi Dioso naneconitsiaexanaejitsia daxitajivi, imoxoyo baja pevajēnae tsaponae pecopiapatsinexa. Dioso pacananeconitsiaexanaena. Tspaji ēpaxamēnexa panatoxaniavaetame panexainaecuene.

⁴ Panejumetaema. Pamonae pacatonacueneba panijacuene, bajarapamonae tsipaeba itsamonaējavabelia paneyamaxēitojorobijava. Apo pamatamotsimē xaniavaetsia pacuenia picani pamatamotsiapaebame. Nexata vajatuxanenē Dioso, daxita athēbēnacuatatsia pevetsinē, jumetanetsi bajarapamonae pepaebijava xaniavaetsia apo panematamotsijava.

⁵ Mapanacuata picani panatsitajinavanapame xaniavaetsia. Pacabarēyamē tsavanapae panexainaecuene. Paexanavanapame panejitsipaecuenia. Pacuenia baca bitso penasitsiepatota beyaxuabatsi, bajara pijinia pacuenia paxamē ata pacatoimoxoyo baja Dioso papecananeconitsia exanaematacabinexa, bitso pananeconitsixae Diosojavabelia.

⁶ Jivi pananeconitsiaexanabiabame. Pabeyaxuababiabamenua pianeconijibivi ata. Bajarapacuenia paexanabiabame pamonaējavabelia apo caējēpaetsi papecanayajiviitavetsinexa.

Pacuenia icatsia petuxanenē patsijitsiatsica yabara pelivaisi

⁷ Tajamonae, pajamatabēcuenesaēmēre tsavanapae panecopiaeve-tavanapaejava vajatuxanenē matapania icatsia pepatsimatocabitsicajavabelianexa. Pabi penacuenibinē, vajēnaeeveta ema peubinexa peubijava. Peubiveretsicujinae peubijava, bajayajebi ajamatabēcuenesaēya evetaponapona petonaveretsijavabelianexatsi.

⁸ Bajara pijinia pacuenia paxamē ata bajayajebi itsamonaē pibisiacuene pacaxanae ata, pajamatabēcuenesaēmē tsane. Pētsa pajamatabēcuenefaenae. Tspaji rabaja imoxoyo pevajēnae tsaponae vajatuxanenē pepatsinexatsica.

⁹ Tajamonae Dioso panenajujumecovēnētsivi, pētsa namataenetsia panabaracuaicuaijamē Diosojavabelia pananeconitsiyaniva. Tspaji rabaja Jesucristo, ponējavabelia panavajunupaebijitsiamē daxita pacuene paexanavanapame mapanacuataje, imoxoyo baja pevajēnae tsaponae pepatsinexatsica. Bajaraponē pacaējivimē nacacujitsia pacarajutaponaena xuavajēto pacatoxainapona.

10 Tajamonae, pacanaejëre profetavimi, pamonae bajayata Diosojumelivaisi paeba. Bajarapamonaemi bajayajebi bejiobiaexanae atatsi, ajamatabëcuenesaë tsavanapae. Itsajamatabëcuene apo xainae.

11 Pamonae ajamatabëcuenesaë, bajayajebi bejiobiaexanae atatsi, bajarapamonae aeconoxae baja topexaniacuenetsi tsane Diosojavabelia. Pavënëlivaisitaneme rabaja pacuenia bajayata Jobpijinë bejiobiaexanae atatsi, itsiata ajamatabëcuenesaë Diosojavabelia. Pavënëlivaisitanemenua pacuenia pejamatabëcuenejëtsicujinaetsi, bitso Dioso yavenonatsi. Bajaraxuata nexata payapëtaneme Dioso jivi pitaxutotsoniataenëcuene.

12 Tajamonae, palivaisi baja pacatsipaebatsi, matatoxenetsia mapalivaisiyoje bitso pajumecovënëtsianame. Itsa pacuaicuajamë itsamonaejavabelia, pexaniajailivaisi pacuaicuajamë tsabiabi tsane. Pëtsa Dioso pevënë pacuaicuajamë itsamonae papecajumexaniataenexa. Nexata pëtsa pajumaitsimë mapacueniaje: “Xaniajanë raja. Cajumaitsitsi mapacueniaje Dioso pitabarata,” pajamë pëtsa. Tspaji baja pexaniajailivaisi itsa pacuaicuajamë tsabiabi tsane, itsamonae ata pacacueneyapëtaena apo panenajumetsënëtabiabicuene. Nexata itsa pacayanijoba itsacueneyavayo yabara, rovalia pajumaitsimëre pacuenia panajamatabëxainame. Itsa pajejëjitsia, pajejamëre rovalia. Itsa jume, “jume!” pajamëre rovalia. Bajarapacuenia rovalia itsa paxaniajamë tsabiabi tsane, nexata apo pananeconit-simë tsane Diosojavabelia. Tspaji Dioso pevënë apo pacuaicuajamë tsabiabi tsane papecajumexaniataenexa itsamonae.

13 Paxamëyajuvënëjivi itsa tocopiapatatsi pibisiacuene, bajarapajivi bevajëta Diosojavabelia. Itsa jume, barëyaya itsa ponapona, betonaxëana Diosojavabelia: “Xamë ayaijamatabëcuenenëmë,” bejai Diosojavabelia penaxëanaejavata.

14 Itsa jume, itsa avitane, bejunata ancianovi, Dioso pejumecovënëtsivi pevetsivi. Nexata ancianovi patsiana petovajëtsinexatsi Diosojavabelia. Nexata ancianovi piavitanejivi aceiterata perabëcalirabiana vajatuxanenë pevënëta.

15 Petovajëcaejavata, daxita ancianovi itsa jamatabëjumaitsi: “Dioso cajena pepacuene jamatejemayaexanaenatsi mapajivije,” itsa jamatabëjai ancianovi, nexata Dioso jamatejemayaexanaenatsi piavitanejivi. Piavitanejivi pibisiacuene itsa exana piavitanevajënaeya, itsiata Dioso vecuaajibiaexanaenatsi bajarapaneconimi.

16 Bajaraxuata pibisiacuene namataenetsia itsa panatoexaname, namataenetsia panatsipaebare. Itsa pavitanemënuu, namataenetsia panatovajëre Diosojavabelia papecajamatejemayaexanaenexa Dioso. Xaniavaetsia peponaponaenë Dioso pitorobicueniatsi, daxita pejamatabëëthëtojavavetsina itsa vajëta, bajaraponë jumenamatamota Diosojavabelia. Ayaiacuena Dioso pexaniacuene toexanaenatsi.

17 Diosojumepaebinëmi, profeta Elíaspijinë, bevaxaitsijamatabëcuenenëmi. Bajayata bajaraponëmi asaëyata vajëta Diosojavabelia ema pejopaeyaniva. Nexata acueyabi pavaibeje eputua ema apo jopae bajaraponëmi pijanacuta. Nexata daxita peubijavaximi, totëpatsi. Nexata daxita bajarapanacuapijivi bitso janibo.

18 Bajaraxuacujinae icatsia asaëyata Elíaspijinë vajëta Diosojavabelia ema pejopaenexa. Nexata icatsia ema jopa. Ira icatsia capitsapa pexaejavanexa. Bajarapacuenia vaxaitsi ata asaëyata bevajëtatsi Diosojavabelia.

19 Tajamonae, paxamëyajuvënëjivi itsa copaba Dioso pejumelivaisi pejumecovënëtsijavami, nexata icatsia bepajumecovënëtsiaexaname bajarapalivaisi.

²⁰ Bepayapëtaneme mapacueneje. Pajivi icatsia copabiaexana itsamonae pibisiacuene pexanaejavami, pejumecovënëtsinexa icatsia Dioso, bajarapajivi jamatabëcueneyavenonaena bajarapamonae penaxuabiyaniwa pibisianacuayabelia. Jamatabëcueneyavenonaenanua bajarapamonae Dioso pevecuaajibiaexanaenexatsi ayaineconi ata, pibisiacuene pexanaeneconimi.

Mapabaxutoje San Pedro copiaya toyaquina Dioso pejumecovënëtsivijavabelia

*Pacuenia Pedro mapabaxutoje toyaquina Dioso pejumecovënëtsivi, nacaya-
jatsia penaevijavabelia, yabara pelivaisi*

¹ Xanë Pedronë, Jesucristo taneitorobinë. Nitoroba jivi tatsipaebapon-
aenexa Jesucristo pelivaisi. Pacatoyaquinatsi mapabaxutoje paxamë pepo
panijatomaravecua, Jerusaléntomara, nacayajatsia paneenarutsivi. Nacaya-
jatsia pajinavanapame Ponto nacujava, Galacia nacujava ata, Capadocia
nacujava ata, Asiavënë nacujava ata, Bitinia nacujava ata.

² Vaxa Dioso baja cajena bajayata tajëvelia panenaexanaevajënaeya
ata, pacaitapeta papijajivinexamë. Bajarapacuenia tajëvelia Dioso
papecaitapetsixae, aeconoxae baja Espiritu Santo pejamatabëcueneta
pacatsata Jesucristo panejumecovënëttavanapaenexa. Dioso pacaitapeta
papecavecuaajibiaexanaenexa, daxita pibisiacuene paneexanaeneconimi
Jesucristo papecasivatëpaexae. Pacatovajëtatsi Diosojavabelia
ayaicuenia Dioso papecayavenonabiabinexa. Pacatovajëtatsinua
jamatabëcuenexanepanaeya panejinavanapaenexa daxitacuenevecua.

*Pacuenia Jesucristo pelivaisi pejumecovënëtsivi Dioso rajutsianatsi mata-
cabi apo pevereverecejava yabara pelivaisi*

³ Vaxaitsi vajatuxanenë Jesucristo paxa Diosojavabelia jumaitsitsi tsabi-
abi: “Xanepana rabaja. Pexaniacuene panetoexaname,” jaitsi tsabiabi.
Ayaicuenia Dioso vajanacaitaxutotsoniataexae, pejanajamatabëcuenevitsi
nacaexana Jesucristo vajajumecovënëtsixae. Jesucristo petëpaecujinae, Dioso
icatsia asaëyaexanatsi. Bajaraxuata vaxaitsi ata evetavanapatsi vajanacara-
jutsinexa matababi apo pevereverecejava.

⁴ Nexata Dioso nacarajutsiana xua nacatoxaina athëbëtatsia vajanacara-
jutsinexa. Bajaraxua apo vereverecae tsane. Apo abejenua tsane.

⁵ Bajaraxua Dioso nacatoxaniavaeta athëbëtatsia vajanaja-
matabëcuenecopsixae Diosojavabelia. Nexata abaxë vajajinavanapaepato
mapanacuatajê, Dioso pesaëta nacaevetaponapona. Bajarapacuenia
Dioso pesaëta nacaevetaponapona vajanacacapanepaenexa. Pamatacabi
mapanacuajê vereverecaena, nayapëtaena jane baja xua Dioso
nacarajutsiana.

⁶ Bajaraxuata paxamë Dioso papecacapanepaejavanexa, pasivaja-
matabëcuenobarëyamëre tsavanapae. Aeconoxae abaxë mapamatacabitajê
pacajamatabëcuenebijobitsi ata daxitacuene papecajamatabëcuenëjëtsijava,
itsiata pasivajamatabëcuenobarëyamëre tsavanapae.

⁷ Pacajamatabëcuenëjëtapona papecajamatabëcueneyapëtaenexa
pepacuene panenajamatabëcuenecopsitsijava Jesucristojavabelia.
Oronanito ata itsa ëjêta, baseta isotota peyapëtaenexa itsa pepacuene
orojava. Panenajamatabëcuenecopsitsijava Jesucristojavabelia, bitso
namatamota orojava matatoxenetsia. Nexata pijinia paxamë ata
pacajamatabëcuenëjëtaponae papecajamatabëcueneyapëtaenexa
xaniavaetsia panenajamatabëcuenecopsitsijava Jesucristojavabelia.
Nexata itsa pavecupanepaename papecajamatabëcuenëjëtsijava,
panevajënaeyabelia pajamatabëcuenesaëmë taponae tsane Jesucristojav-
abelia panenajamatabëcuenecopsitsijava. Nexata pamatacabi vajatuxanenë

Jesucristo patsianica, pacasivajamatabëcuenebarëya tsane. Dioso ata pacasivabarëya tsane. Daxitajivinua pacayaiyataena.

⁸ Paxamë abaxë Jesucristo apo patae atamë, itsiata pajitsipame. Aeconoxae apo patae atamë Jesucristo, itsiata panajamatabëcuenecopatame bajaraponëjavabelia. Jesucristo bitso pasivajamatabëcuenebarëyamë tsavanapae. Jesucristo panesivajamatabëcuenebarëyajava, itsa panajamatabëcuenevajunupaebame itsamonaejavabelia, epatua saya payapëtaeyaexaname. Tsipaji xaniavaetsia apo payapëtaemë xaniavaetsia panenajamatabëcuene vajunupaebinxaxa itsamonaejavabelia peyapëtaenexa pacuenia bëpënëa pajamatabëcuenebarëyamë.

⁹ Jesucristo papecasivatëpaexae, panajamatabëcuenecopatame Diosojavabelia papecacapanepaenexa. Bajaraxuata Dioso pacacapanepaena Dioso papecananeconitsia exanaejavaminexavecua pibisiacuene paneexanaeconimi yabara.

¹⁰ Bajayatami Diosojumepaebivimi profetavi bajayajebi livaisijaitapona peyapëtaenexa. Nexata baja profetavi itsa yapëtane pacuenia Dioso pijajivi capanepaejitsia, nexata profetavi tajëvelia vajunupaebapona jivijavabelia. Profetavi tajëvelia vajunupaebapona pacuenia Cristo pejamatabëcueneta Dioso pacaitaxutotsoniataejitsia papecacapanepaenexa.

¹¹ Espiritu Santo baja cajena pejamatabëcueneta bajayata tajëvelia profetavimi yapëtaeyaexanaponatsi. Nexata profetavimi bajayata tajëvelia yaquina pacuenia yapëtaeyaexanaponatsi Espiritu Santo pejamatabëcueneta. Nexata profetavimi yaquina pacuenia itsamonae Cristo bejiobiaexanaejitsiatsi pebexuabinexatsi. Yaquinanua pacuenia Cristo petëpaecujinae, icatsia itsa asaë, athëbëabetsia caponaejitsiatsi peecaenexa paxa Dioso pemuxunenetasia. Nexata bajarapaprofetavimi jamatabëjumai tsabiabi: “¿De tsaeta pacujinae copiapatsiana xua tajëvelia vaxaitsi vajunupaebaponatsi?” jamatabëjai tsabiabi.

¹² Itsiata bailsi jane bajarapaprofetavimi Dioso yapëtaeyaexanatsi pacuenia bajarapamonaemi pevënamuto bexëa bajaraxua copiapatsijitsia. Nexata vaxaitsi, bajarapamonaemi pecovëpijivitsi, vajajinavanapaematacabita matapania jane baja copiapata pacuenia tajëvelia Cristo yabara vajunupaebapona profetavimi. Nexata baja paxamë bajarapalivaisi itsamonae pacatsipaeba papecacapanepaelivaisinexa. Espiritu Santo, ponë Cristo athëbëvetsica iforobica, bajaraponë pesaë pacayajavatsipaeba bajarapamonae. Angelevi ata bitso jitsipa xaniavaetsia peyapëtaenexa bajarapalivaisi.

Pacuenia Dioso nacajunata xaniavaetsia vajatojinavanapaenexa yabara pelivaisi

¹³ Panajamatabëcuenecopare Diosojavabelia. Tsipaji rabaja payapëtaneme xua Dioso pacarajutsijitsia. Bajaraxua Dioso pacarajutsiana papecaitaxutotsoniataexae pamatacabi Jesucristo icatsia patsianica. Bajaraxuata xaniavaetsia panajamatabëcueneverere paneexanaenexa daxita xua Dioso pacatocopata. Najamatabëcuenevetsiayanua xaniavaetsia pajinavanapare.

¹⁴ Pajumecovënëtavapanapare Dioso. Pëtsa panajamatabëxainame panenatojitsipaecuenia pibisiacuene paneexanaenexa, pacuenia paexanavanapame pamatacabi abaxë Dioso apo payapëtaemë.

¹⁵ Xaniavaetsia saya pajinavanapare pibisiacuene paexanaenejevamë. Tsipaji raja Dioso, ponë pacajunata papijajivinxamë, xaniavaetsia peponaponaenë. Pibisiacuene baja cajena caeto ata Dioso apo pexanaenë.

16 Dioso baja cajena pejumelivaisibaxutota jumaitsi mapacueniaje: “Xaniavaetsia pajinavanapare. Tspipaji xanē apo jitsipanenē pibisiacuene paneexanaejava,” jai Dioso pejumelivaisibaxutota.

17 Paxamē itsa pavajētame Diosojavabelia, pajumaitsimē tsabiabi: “Taxa Dioso,” pajamē tsabiabi. Bajaraponē Dioso najēpaeya tane daxita pamonaē jumecovēnētatsi, ayaijamatabēcuenēvi, beveliajamatabēcuenēvi ata. Dioso cajena yapētane paneconivajēto exanapona caejivi canacujitsia. Bajaraxuata Dioso cjunaviaya bepajinavanapame pamatacabibeje abaxē pasaēmē tsavanapae mapanacuataje.

18 Paxamē picani naxuabiaya Diosovecua pajinavanapame panijasalinavimi abaxē pijacuene itsa pacaasaēmē tsavanapae. Itsiata baitsi jane aeconoxae baja bajarapacuenēvecua Dioso baja pacacapanepa. Payapētaneme rabaja Dioso ayaimatamota papecanēconimatamotsijava papecacapanepaenexa. Apo pacacomuatsi baja cajena pevereverecejavata, pacuenia oro itsi, palata ata.

19 Dioso baja cajena pacacomuata bitso penamatamotsijavata, Cristo pijanata. Pajivi pijaneconi xaina Diosojavabelia, bajarapajivi oveja, pejanapebito, peperabēxanepanaenē, beyaxuaba ofrendacuēnia pevi perajutsinēxa Diosojavabelia. Nexata bajarapajivi pijaneconi Dioso baja veuaajibiaexanatsi bajarapaoveja pijana pejamatabēcueneta. Nexata pacuenia oveja, peperabēxanepanaenē, beyaxuabatsi, bajara pijinia itsi Cristo. Baitsi Cristo, planeconijilbinē, nacopata pebeyaxuabinexatsi. Nexata Cristo petēpaejamatabēcueneta, pacavecuaajibiaexana panijaneconimi.

20 Bajayatami Dioso mapanacuaje pexanaevajēnaeya ata, Dioso itapetatsi Cristo papecasivatēpaenexa. Belia jane baja mapamatacabitaje Cristo patsica papecasivatēpaenexa.

21 Itsiata baitsi jane Cristo petēpaeucujinae, acueyabi matababita, Dioso icatsia asaēyaexanatsi. Athēbētatsia, paxa Dioso pecujuanenia, Cristo ecaeyaexanatsi. Bajaraxuata panajamatabēcuenecopatame Diosojavabelia papecarajutsinēxa matababi apo pevereverecejava.

22 Nexata baja aeconoxae paxamē pajumecovēnētame pexaniajailivaisi, Jesucristo pelivaisi, Espiritu Santo papecajamatabēcuenēitayotsixae. Nexata pibisiacuene paneexanaeconimi, Dioso pacavecuaajibiaexana. Nexata xaniavaetsia pasivamē tsavanapae itsamonae ata, Dioso pejumecovēnētsivi. Bajarapacuenia asaēyata namataenetsia bepanaasivamē tsavanapae daxita panejamatabēēthētovetsina.

23 Pacuenia pejananaexanaenacuetooyo itsi, bajara paxamē pajamatabēcuenēitsimē Dioso pejumelivaisita pejanajamatabēcuenē panexainaexae. Itsiata baitsi jane bajarapapejanajamatabēcuenē paneaxajivi apo pacarajutsi. Dioso raja pejumelivaisi, apo pevereverecejavainexa panejumecovēnētsixae, pejanajamatabēcuenē baja paxainame.

24 Dioso pejumelivaisi apo pevereverecejavanexa yabara, Dioso pejumelivaisibaxutota jumaitsi mapacueniaje:

Pacuenia vafopijipona bepijia tsaquena, petsaquinaecujinae tēpa, bajara pijinia saya itsi jivi ata. Bepijia tēpa. Pacuenia pematono ata bepijia tsaquena, nexata othopa, bajara pijinia saya itsi ayaijamatabēcuenē pexainaenē ata. Bepijia tēpa.

25 Itsiata baitsi jane Dioso pejumelivaisi apo pevereverecejavanexa, jai Dioso pejumelivaisibaxutota.

Bajarapalivaisi papecacapanepaelivaisinexa, itsamonae baja pacatsipaeba.

2

¹ Bajaraxuata pacopare baja daxita pibisiacuene paneexanabiabijava itsamonaejavabelia. Pacoparenua paneyamaxëitojorobabiabijava. Pacoparenua saya yamaxëitojorobiaya panecuaicuaijaitisabiabijava. Tsipaji paxamë yamaxëitojorobiaya pacuaicuaijamë tsabiabi itsamonae bepapexaniajamatabëcuenevimë papecataenexa. Pacoparenua panecuenecaëbabiabijava itsamonae. Pacoparenua panebaracuaicuaijaitisabiabijava pibisiacuenia itsamonae.

² Pacuenia pejananaexanaenacueto bitso bajitsipa mitobarëmene pia-paenexa, bajara pijinia pacuenia paxamë bitso pajitsipare Dioso pejumelivaisi. Bajarapalivaisi baja cajena bevaxaxaejava tanetsi vajajamatabëcuenevitsabaponaena pevajënaeyabelia. Nexata bajarapalivaisi panelebabiabixae, pacatsijamatabëcueneta Dioso pacajamatabëcuene naveretsiaexanaena pacuenia Dioso pacatojitsipa.

³ Nexata baja pepacuene pajamatabëcueneyapëtaename vajatuxanenë pexaniajamatabëcuenenëcuene. Bajaraxuata pajitsipaponare orijilbia panevajënaeyabelia Dioso pejumelivaisi.

Pacuenia iboto apo vereverecae mapanacuataje, bajara pijinia pacuenia Cristo apo peverevecaenë daxitamatacabijavabelianexa yabara pelivaisi

⁴ Vajatuxanenë Cristo raja bepیاتajaiboto tsaponaponae. Apo peverevecaenë daxitamatacabijavabelianexa. Nexata paimoxoyore bajaraponë. Vajatuxanenë Cristo itsamonae apo pejumecovënëtsixaetsi, pacuenia ibota bo pexanaevi pibisiaboto naitaxutojematabuata, bajaraititsi. Itsiata baitsi jane Dioso tanetsi bepیاتajaiboto, bepexania penamatamotsiiboto tsaponaponae.

⁵ Paxamë ata rabaja Jesucristojavabelia panenajamatabëcuenecopatsixae, bepaiotonëmë Dioso pacatane. Nexata padaxitamë Cristo papijajivixamë, Dioso pacatane bepijatemplobo, ibotonëta bepexanaetemplobo. Tsipaji pacuenia Dioso ponapona templobota, bajara pijinia pacuenia Espiritu Santo pacatsijamatabëca. Paxamë rabaja cajena Dioso panetonacuenebavanapaevi, baitsi papijasacerdotevimë. Nexata Jesucristo pejamatabëcueneta neconijilbia papecataexae, Diosojavabelia najamatabëcuenerajutsiaya pavajëtabiabianame Dioso papecasivajamatabëcuenebarëyanexa.

⁶ Cristo, ponë athëbëvetsica Dioso itorobijitsiatsica jivi pecapanepaenexa, bajaraponë yabara tajëvelia Dioso jumaitsi: “Ponë itorobianajë, beiboto tsane,” jai. Nexata tajëvelia Dioso pejumaitsijava, Dioso pejumelivaisibaxutota jumaitsi mapacueniaje:

Taitapetsinë netoponaponaena Jerusalén tomarata. Bajaraponë beiboto tsane. Nexata pacuenia ibota bo pexanaevi, itsaboto bitso tsitaxanepanatsi daxitabotonëvecua, bajaraititsi tsane. Bepitapetsiibototsi tsane. Bitso bepenamatamotsiibotonua tsane. Nexata pajivi najamatabëcuenecopatsiana bajaraponëjavabelia, bajarapajivi apo nacueratsi tsane,

jai mapacueniaje Dioso pejumelivaisibaxutota tajëvelia Dioso pejumaitsijava Cristo yabara.

⁷ Paxamë Cristo pelivaisi panejumecovënëtsivi, pataneme Cristo bepیاتajaiboto tsaponaponae, bitso bepenamatamotsiibotonua. Itsiata baitsi

jane pamonae Cristo pelivaisi apo pejumecovënëtsivi, bajarapamonae bepi-abejeiboto tanetsi Cristo. Tsipaji baja copiajopa pacuenia Dioso pejumeliv-aisibaxutota tajëvelia najumecapanepaeya jumaitsi Cristo yabara. Tajëvelia Cristo yabara comparacióncuenia jumaitsi mapacueniaje:

Paiboto boexanaevi naitaxutojematabuata bepetsitaabejexaetsi itajara, bajarapaiboto itsamonae pita. Nexata bajarapaibotota xaniavaetsia yaëta botabu daxita itsaibo matatoxenetsia,

jai Dioso pejumelivaisibaxutota comparacióncuenia Cristo yabara.

Bajarapacuenia jumaitsi itsamonae Cristo apo pejumecovënëtsijavanexatsi yabara.

⁸ Copiajopanua jane baja Dioso pejumelivaisibaxutota tajëvelia Cristo yabara pejumaisijava mapacueniaje: “Bajarapaiboto jivi pefirapecaeayaex-anaeiboto tsane,” pejaijava Cristo yabara. Bajarapacuenia Dioso pejumeliv-aisibaxuta jumaitsi jivi itsa apo jumecovënëtsi Cristo pelivaisi, Diosovecua penaxuabijavanexa yabara jumaitsi. Tsipaji tajëvelia Dioso yapëtane jivi apo pejumecovënëtsijavanexa pexanialivaisi, Cristo pelivaisi, pecapanepae-livaisinexatsi picani.

Dioso pijajivi yabara pelivaisi

⁹ Dioso apo pejumecovënëtsivivecua, paxamë baja Dioso pacaitapeta papijajivinxamë. Dioso baja papijasacerdotevimë tsavanapaenua, daxitacuenepo pevetsinë panetonacuenebavanapaexae. Dioso baja papijajivimë tsavanapae panevajunupaebavanapaenexa Dioso ayaiucene pex-anaejavanë. Dioso baja cajena pacajunata pibisiajamatabëcuenevecua, mapanacuataje pitaquirijamatabëcuenevecua. Nexata baja pajunuame pexani-ajamatabëcuenejavabelia, Dioso pitayotsijamatabëcuenejavabelia.

¹⁰ Paxamë abaxë Cristo panejumecovënëtsivajënaeya, Dioso picani apo papijajivimë. Itsajivi ata picani abaxë paxamëyajuvënëvi Dioso apo itaxutot-soniataetsi. Itsiata baitsi jane aeconoxae baja Dioso papijajivimë pacaexana papecaitaxutotsoniataexae.

Pacuenia Dioso pejumecovënëtsivi jinavanapa Dioso petonacuenebavana-paenexa yabara pelivaisi

¹¹ Tajamonae bitso patacaasivavi, mapanacuataje abaxë pajinavanapae atamë, athëbëtsia baja Dioso pijanacuatatsia bepenejinavanapaevi panataema. Saya raja caeapatoyonexa mapanacuataje pajinavanapame. Bajaraxuata pacatoyaquinatsi mapacueniaje daxita picani papibisiacuenepanatabëpaexaname panecopabinexa. Bajarapitsijamatabëcuene jamatabënacanamatabëcuene bijianaeyaexana vajajamatabëcuenejavavetsina.

¹² Dioso apo peyapëtaevi petuatuajëa itsa pajinavanapame, xaniavaetsia patsitajinavanapame. Aeconoxae pacabaracuaicuaijai ata bepibisiacuenepaneexanaevi papecataexae, itsiata itsamatacabijavabelia itsa najamatabënapitsiana pexaniacuenepaneexanaejava, bajarapamonae ata Dioso jumecovënëtsiana. Nexata bajarapamonae jumaitsi tsane Diosojavabelia: “Diosomë, bitso ayajamatabëcuenenëmë,” jai tsane. Bajarapacuenia jumaitsi tsane itsa copiapatsiana pamatacabi Dioso naneconitsiaexanaejitsia daxita pamonae Dioso apo pejumecovënëtsivi.

¹³ Dioso papijajivixaemë, pajumecovënëre pacuenia pacaitoroba pamonae nacua pevetaavanapaevi. Daxita raja bajarapamonae mapanacuapijivi pejamatabëcueneta evetsiaexanatsi. Nexata pajumecovënëre presidentenë, ponë jane baja daxitajivi pevetsinë.

¹⁴ Pajumecovënërenua nacua pevetsivi. Bajarapamonae presidentenë itorobatsi penaneconitsiaexanaenexa pibisiacuenepexanaevi.

Itorobatsinua pejumaitsinexa pexaniacuene pexanavanapaevijavabelia: “Xanepana rabaja xua paexaname,” pejainexa.

15 Bajarapamonae pajumecovënëre. Tspaji raja Dioso pacatojitsipa xaniavaetsia panejinavanapaenexa. Nexata bajarapacuenia itsa patsitajinavanapaenae, belia moya tsane itsamonae papecabaracuaicuaijajava, pamonae apo pejumecovënëtsivi pexanialivaisi, Cristo pelivaisi.

16 Paxamë picani pajumecovënëtavapame Dioso Moiséspijinëta penajumecopatsilivaisi. Nexata picani paexanabiabame pacuenia pacaitoroba Dioso Moiséspijinëta penajumecopatsilivaisi. Aeconoxae baja Cristo pelivaisi panejumecovënëtsixae, apo pajamatabëcueneevetsimë baja pacuenia Dioso Moiséspijinëta penajumecopatsilivaisi pacaitoroba paneexanaenexa. Itsiata baitsi jane pibisiacuene paneexanaenexa apo pacatocopatsi. Biji rajane Dioso pacatocopata pacuenia Dioso jitsipa panetonacuenebavanapaenexa.

17 Daxitajivi yayiyataeya pajinavanapare. Itsamonae ata, pamonae Dioso pejumecovënëtsivi, pasivamëre. Cujunaviaya Dioso payaiyataema. Payaiyataema presidentenë ata.

Pacuenia itsamonae Cristo bejiobiaexanae atatsi, itsiata ajamatabëcuenesaë tsaponaponae, bajara pijinia pacuenia Cristo pejumecovënëtsivi ata itsamonae bejiobiaexanae atatsi, pijamatabëcuenesaë tsavanapaenexa, yabara pelivaisi

18 Paxamë itsamonae panetonacuenebavanapaevi, pacamuxujijobatsi mapacueniaje. Pajumeyaiyataeyabiabare pacuenia pacaitorobabiaba panijatuxanevi. Èpexaniajamatabëcuenevi pëtsa panijatuxanevi pajumeyaiyatane. Pajumeyaiyataema panijatuxanevi, piacujirubejevi ata.

19 Panijatuxanevijavabelia itsacueneneconi apo paxinae atamë, panijatuxanevi pacabejiobiaexanabiabijitsipa. Nexata panijatuxanevi papecabejiobiaexanabiabijavata: “Dioso nitaxutobejiobiataena,” itsa pajamatabëjamë tsabiabi tsipae, nexata Diosojavabelia pacatonamatamotsipa.

20 Itsa pananeconitsipame panijatuxanevijavabelia, nexata bajarapaneconi yabara panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” pajamatabëjamë ata tsipae, itsiata Diosojavabelia pacatoamatamobi tsipae. Itsa jume, pexaniacuene paexanae atamë, panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” itsa pajamatabëjamë tsipae Diosojavabelia, nexata Diosojavabelia pacatonamatamotsipa.

21 Bajarapacuenia itsacueneneconi apo paxainaenejevamë, itsamonae pacabejiobiaexanaponaena. Tspaji Dioso bajarapacuenia pacatocopata itsamonae papecabejiobiaexanaponaenexa. Payapëtaneme rabaja mapacuenije. Cristo itsa pacasivatëpa, bejiobiaexanatsi itsacueneneconi xainaenejeva. Nexata paxamë ata Dioso pacatocopata itsamonae papecabejiobiaexanaenexa.

22 Itsacuenejava ata pibisiacuene apo exanae Cristo. Apo yamaxëitojorobi cajena itsajiviyojavabelia ata.

23 Pibisiacuenia Cristo bijatae atatsi itsamonae, itsiata juya pibisiacuenia apo jumecanaviatsi. Bejiobiaexanae atatsi jivi, “Neyamatamotsiana Dioso,” apo jai Cristo bajarapamonaejavabelia. Biji rajane bajarapamonaejavabelia Cristo cujirucanaviatsinejeva, copata bajarapamonae Dioso penaneconitsiaexanaenexatsi pamatacabi Dioso naneconitsiaexanaena pijaneconi pexainaevi.

24 Cristo cruzata itsa tēpa, tsijumaxuabatsi vaxaitsi pibisiacuene vaæxanaeneconi. Bajarapacuenia Cristo nacatoexana vajacopatsinexa pibisiacuene vajaexanaejava. Bajarapacuenia Cristo nacatoexananua vajavajēnērubatsi paxamē papecajamatabēcuene xaniavaetsinexa pibisijamatabēcuenevecua, xaniavaetsia panejinavanapaenexa Dioso pitabarata.

25 Paxamē picani Diosovecua naxuabiaya pajinavanapame. Pacuenia oveja pevetsinētsivecua naxuabiaya jinavanapa, bajara picani paitsimē. Itsiata baitsi jane aeconoxae baja Cristo pejamatabēcueneta panaviabame Diosojavabelia. Pacuenia pijaoveja pevetsinē xaniavaetsia baevetaponapona pijaoveja, bajara pijinia pacuenia Cristo pacaevetaponapona. Panejamatabēcuene ata Cristo evetaponapona.

3

Pacuenia penacojobivi xaniavaetsia benabarējinavanapa yabara pelivaisi

1 Paxamē papetiriavimē, pacamuxujobatsi mapacueniaje. Pacaevamē canacujitsia paneamonajivi jumecovēnētsiaya pajinavanapare. Pova pamona abaxē apo jumecovēnētsi Jesús pelivaisi, bajarapova xaniavaetsia tsitaponaponaē pamona, pamona ata Jesús pelivaisi pejumecovēnētsinexa. Nexata bajarapova pamonajavabelia Jesús pelivaisi apo tsipaebi ata, pamona ata jumecovēnētsiana Jesús pelivaisi xaniavaetsia pētsitaponaponaēaxae pamona.

2 Bajarapacuenia pamona ata Jesús pelivaisi jumecovēnētsiana, pijava itsa cuenetaena Dioso paneyaiyataejava, itsa cuenetaenanua pijava Dioso pitabarata aneconijibia peponaponaejava.

3 Papetiriavimē, pētsa pajamatabējumaitsimē mapacueniaje: “Bepexaniavanē jivi tanetaenexa, naxatatsianajē naitabētsiaya. Namatafaratsianajē naitabētsiaya. Oronanita pexanaejavanēta naitabētsianajē. Itsa jume, nexata bitso pexaniaviriana naxatatsianajē,” pajamatabējamē pētsa. Pētsa bajarapacuenia panajamatabēxainame saya naniavelia panenaitabētsinexa.

4 Biji rajane bēpēnēaverena panajamatabēcueneitabēre. Bēpēnēaverena panenajamatabēcueneitabētsinexa, xaniavaetsia aneconijibia pajinavanapanaēname Dioso pitabarata. Nexata itsamonae pacaitsacueniabi ata, pētsa pacueneccanaviatame. Nexata xua bēpēnēaverena panajamatabēcueneitabētame, apo pacatovereverecae tsane. Bajarapitsijamatabēcuene pexainaeva tonamatamotsianatsi Diosojavabelia.

5 Pamonaemi petiriavi bajayatami Dioso pejetsipaecuenia exanavanapa, bajarapacuenia bēpēnēaverena Dioso pejumelivaisita najamatabēcueneitabēta. Bajarapamonaemi najamatabēcueneccopata Diosojavabelia. Jumecovēnētavanapanua pamonajivi.

6 Bajarapamonaeyajuvēnēvami, Sarapijivami, Dioso pejumelivaisita najamatabēcueneitabēta bēpēnēaverena. Sarapijivami jumecovēnētsia ponapona pamona, Abrahampijinē. Itsa junata pamona, “Tajatuxanenē,” jai tsabiabi pamonajavabelia. Papetiriavimē, panajamatabēcueneccopatavanapare Diosojavabelia. Paexanavanaparenua pexaniacuene. Pētsa pacujunavamenua pacaitsacueniabiijitsia ata itsajivi papecaitoyaxae. Nexata bajarapacuenia itsa paexanavanapanaēname, pajamatabēcuenejēpaename Sarapijivami.

7 Paxamē papebijivimē, pacamuxujobatsi mapacueniaje. Xaniavaetsia pabarējinavanapare panijavajivi. Pacuenia Dioso nacaitoroba, bajarapacuenia payaiyataema panijavajivi. Bajarapacuenia payaiyataema tsipaji raja bajarapamonaē vaxaitsi pebijivitsi nacavecuasaējibi. Payaiyataema tsipaji

raja bajarapamonae ata yajava Dioso pacarajutsiana matakabi apo peverevereaejava. Bajarapacuenia panijavajivi yaiyataeya pabarëjivanapare paneajumeurayaniva panenavajëtsijava Diosojavabelia.

Pacuenia pexaniacuene pexanaevi ata itsamonae bejibioaexanaenatsi yabara pelivaisi

⁸ Tajamonae bitso patacaasivavi, pematatsënëa pacamuxujiobatsi mapacueniaje. Najamatabëcuenejëpaeya pajinavanapare. Paxamëyajuvënëjivi itsacuene itsa tocopiapatatsi, nexata bajarapacuenie yabara bitso itsa najamatabëxaina, paxamë ata pacobenanajamatabëxainare. Daxita Dioso panenajuajumecovënëtsivixae, namataenetsia panaasivamëre. Naitaxutotsoniataeyanua pajinavanapare. Beveliajamatabëcuenevinua nataeya pajinavanapare.

⁹ Itsajivi pibisiacuene itsa pacaexana, pëtsa pacueneceanaviatame. Pibisiacuena itsa pacabijatanenua, pëtsa pajumecanaviatame. Biji rajane bajarapajivi patovajëre Diosojavabelia Dioso peyavenonaenexatsi. Tsipaji pamatakabi Dioso pacajunata papijajivinxamë, bajarapacuenia paneexanaenexa, pacaitoroba. Nexata juya paxamë Dioso pacaitaxutotsoniataena pacuenia najumecapanepaeya pacajumaitsi papecayavenonaenexa.

¹⁰ Bajarapacuenie yabara Dioso pejumelivaisibaxutota jumaitsi mapacueniaje:

Pajivi jitsipa peponaponaenexa jamatabëcuenebarëyaya, bajarapajivi benaebaretoeveta pibisilivaisi pecuaicuajaiyaniva. Benaebaretoevetanua penajumetsënëtsiyaniya ata.

¹¹ Bajarapajivi becopata pibisiacuene pexanabiabijavami pexanaponaenexa pexaniacuene. Beponapona xaniavaetsia itsajivi ata pebaraanaepanaeyanivatsi.

¹² Bajarapacuenia beponapona. Tsipaji raja Dioso naitaxutocaeveta xaniavaetsia pejinavanapaevi. Namuxunaevetanua penavajëtsijavatsi bajaraponëjavabelia. Dioso cajena baraanaepana pamonae pibisiacuene pexanavanapaevi, jai Dioso pejumelivaisibaxutota.

¹³ Itsa pajamatabëcuenesaëmë tsavanapae tsane pexaniacuene paneexanavanapaejava, nexata itsamonae pacabejibioaexanae ata, itsiata apo pacajamatabëcuene bijianaecapanepae tsane.

¹⁴ Itsa pacabejibioaexanaena xaniavaetsia pajinavanapae amamë, itsiata pajamatabëcuenebarëyamë tsane. Tsipaji raja Dioso pacayavenonaena. Pëtsa pacujunavame bajarapamonae. Pëtsa panasivajamatabëcuenebëjamënu papecabejibioaexanaejava yabara.

¹⁵ Biji rajane panejamatabëthëtojavavetsina yaiyataeya pajumecovënëre vajatuxanenë Cristo. Panajamatabëcuene veretavanaparenua xaniavaetsia panejumecanaviatsinexa itsajivi itsa pacayanijoba vajatuxanenë Cristo panejumecovënëtsijava yabara. Nexata itsa pacayanijoba mapacueniaje: “¿Detsa xuajitsia xamë jumecovënëtame Cristo?” itsa pacajai, nexata xaniavaetsia pajumecanaviatsianame. Itsiata baitsi jane itsa pajumecanaviatame, paxamë beveliajamatabëcuenevi panataename. Nexata bajarapajivi yaiyataeya pajumecanaviatsianame.

¹⁶ Cristo papijajivixamë, pexaniacuena pajinavanapaenename. Nexata payapëtaename Dioso pitabarata aneonijibia panejinavanapaejava. Nexata itsamonae najumetsënëtsiaya pacabaracuaicuajai tsabiabi ata tsane, bajarapamonae belia najumecopatsiana papecabaracuaicuajaijava. Naurabiana papecabaracuaicuajaitsabiabijava yabara.

¹⁷ Pexaniacuene paexanabiabi atamë, Dioso itsa pacatocopatsiana itsamonae papecabebiobiaexanaenexa, nexata bajaraxua pacatonamatamotiana Diosojavabelia. Itsiata baitsi jane itsamonae itsa pacabebiobiaexanaejitsipa pibisiacuene paneexanaejava yabara, nexata bajaraxua apo pacatonamatamotsi tsipae Diosojavabelia.

¹⁸ Cristo ata bejiobiaexanatsi itsa nacasivatëpa pibisiacuene vajaexanaeconi yabara. Caeto rabaja Cristo tëpa. Pematatsënëa baja apo nacasivatëpae tsane. Bajaraponë pepo pexaniacuene pexanaenë. Itsiata bejiobiaexanatsi vaxaitsi yabara, pibisiacuene vajaexanaevi, vajanacapanepaenexa Diosojavabelia. Peperabëtomì baja picani tëpa. Itsiata baitsi jane pepo pejamatabëcuene jane baja icatsia Dioso asaëyaexanatsi.

¹⁹ Nexata abaxë Cristo petëpaenë itsa boca, pepo pejamatabëcuene jane baja pona petëpaevijavabelia pexanialivaisi petsipaebinxexa. Tsipaji bajarapamonaenaneconitsia jinavanapa petëpaevi pijanacuata.

²⁰ Bajarapamonaemi bajayata jinavanapa, pamatacabi Noëpijinë ponapona. Bajarapamonaemi petëpaevajënæ Dioso apo jumecovënëtsi. Noëpijinë abaxë itsa exanabuatapona pinijibarcoxaneto, Dioso picani bajayajebi jamatabëcueneeveta pejumecovënëtsinexatsi daxita mapanacuapijivije. Itsiata baitsi jane apo jumecovënëtsitsi. Saya ocho pajiviyobeje, Noëpijinë, pijamonæ yajava, bajarapamota Dioso capanepatsi mapanacuaje pebubutsijavavecua. Yajavacapaneptsinua mapanacuataje pibisiacuene pexanaejavavecua.

²¹ Bajara pijinia itsi itsa nacabautisaba merata. Vajanacabautisabicujinae, meravecua itsa nonotajunatsi, itajëtatsi vajacopabijava pibisiacuene vajaexanaejavami. Apo nacabautisabi baja cajena saya vajanacaperabëquiatsinexa. Biji rajane nacabautisaba vajanacajamatabëcuenequiatsinexa vajavajëtsixæ Diosojavabelia. Nexata Dioso vajanacajamatabëcuenequiatsijava, pexaniajaicuene. Tsipaji Jesucristo vajanacasivatëpaecujinae, icatsia Dioso asaëyaexanatsi. Bajarapacuenia Jesucristo Dioso piasaëyaexanaexaetsi, nexata yapëtanetsi pepacune Dioso vajanacapanepaejavanexa.

²² Jesucristo Dioso piasaëyaexanaecujinaetsi, pona jane baha athëbëabetsia. Nexata athëbëtatsia Jesucristo eca paxa Dioso pecujanenia. Daxita ángelevi Jesucristo jamatabëcueneevetatsi pitorobinxexa.

4

Pacuenia Dioso asaëyata betonacuenebavanapatsi, pacuenia Dioso nacajamatabëcuene caëjëpaeyaexana, yabara pelivaisi

¹ Cristo abaxë itsa ponapona mapanacuataje, itsamonæ bejiobiaexanatsi. Bajara pijinia pacuenia paxamë ata tajëvelia bepaevetavanapame itsamonæ papecabebiobiaexanaenexa. Pajivi bejiobiaexanatsi Cristo pelivaisi pejumecovënëtsixæ, bajarapajivi pevajënaeyabelia ajamatabëcuenesaë baja tsaponæ. Copata baja pibisiacuene pexanaejava.

² Pevajënaeyabelia jamatabëexanaponapona pacuenia Dioso tojitsipatsi. Pibisiacuene baja apo exanae pacuenia Dioso apo pejumecovënëtsivi penatojitsipaecuenia baexana.

³ Dioso panejumecovënëtsivajënaeya, pibisiacuene paneexanavana-paneconi yabara, ayaicuenia picani pananeconitame Diosojavabelia. Dioso panejumecovënëtsivajënaeya, panevitota pibisiacuene paexanabiabame. Panajamatabëxainabiabamenua ëpibisiacuene yabara. Paitajibimënua tsabiabi panijabonëjæva. Paitajibimënua tsabiabi fiestajava

ata. Jumapecataeya pexanaenējavabelia ata panavajēcabiabame. Itsiata baitsi jane aeconoxae baja daxita bajarapacuene pacopabame.

⁴ Nexata pamonae Dioso apo peyapētaevi, pibisiacuene panenajuaexanabiabivimi, aeconoxae baja pacasivajamatabēcuenenabenajaca. Tspaji papibisiacuene bajarapamonae exana, paxamē baja apo pajamatabēcueneyavenonaemē. Bajaraxuata bajarapamonae pibisiacuenia pacabaracuaicuajjai.

⁵ Itsiata baitsi jane bajarapamonae itsamatacabi Dioso pitabarata nubianatsi. Nexata daxita bajarapamonae pibisiacuene pexanavana-paeneconi yabara, Dioso naneconitsiaexanaenatsi. Piasaētsavanapaevi, petēpaevimi ata, daxita Dioso naneconitsiaexanaena.

⁶ Petēpaevimijavabelia baja picani bajayata itsamonae tsipaebatsi pexanialivaisi, Cristo pelivaisi, itsa abaxē asaē tsavanapae bajarapamonaemi. Itsiata daxita bajarapamonaemi apo jumecovēnētsi Cristo pelivaisi. Itsiata bajarapamatacabi itsamonae baja jumecovēnēta Cristo pelivaisi. Nexata xuaacujinae daxita bajarapamonaemi tēpaponā. Itsiata baitsi jane pamonae baja pepuajumecovēnētsi Cristo pelivaisi, tēpa, bajarapamonae xaina baja matacabi apo pevereverecaejava.

⁷ Imoxoyo rabaja pevājēnae pevereverecaenexa mapanacuaje. Bajaraxuata itsacunejava ata pibisiacuene paexanaenejevamē, xaniavaetsia pajinavanapare. Namataenetsianua najamatabēcueneevetsiaya xaniavaetsia pajinavanapare panenajuavajētabiabinexa Diosojavabelia.

⁸ Namataenetsia panaasivamēre tsavanapae. Bajarapacuene daxitacuene matatoxenetsia bitso nacatoxanepana vajaexanaenexa. Tspaji itsa asivatsi itsajivi ata, nexata pibisiacuene nacaexanabiabi ata, bajarapajivi apo barajamatabētsitecaetsi.

⁹ Namataenetsia xaniavaetsia panacopiapire panijaboyaberena jamatabēcuenexanepanaeya.

¹⁰ Pacaenēmē canacujitsia Dioso saicayacuena pacajamatabēcuenecaējēpaeyaexanapona Dioso pijacuene panetonacuenebavanapaenexa. Nexata namataenetsia panajamatabēcueneyavenonare xua Dioso pacaenēmē canacujitsia pacajamatabēcuenecaējēpaeyaexanapona paneexanaenexa. Bajarapacuena Dioso patonacuenebavanapare xaniavaetsia.

¹¹ Itsajivi itsamonaejavabelia itsa tsipaeba Dioso pejumelivaisi, bajarapajivi betsipaeba palivaisi Dioso yapētaeyaexanatsi. Itsajivi pijinia itsa yavenonaejitsia itsanē, bajarapajivi beyavenona pacuenia Dioso jamatabēcuenecaējēpaeyaexanatsi peyavenonaenexa. Daxita xua paexanaejitsiamē Jesucristo papijajivixaemē, paexanare jivi peyaiyataenexa Dioso. Dioso baja cajena daxitacuene pitorobinē, penivenivenaecotia pexainaenē daxitamatacabijavabelianexa. Bajara itsi tsane.

Pacuena Jesucristo pelivaisi pejumecovēnētsivi itsamonae bejiobiaexanaponatsi yabara pelivaisi

¹² Tajamonae bitso patacaasivavi, pētsa pajamatabēcuenenabenajacame, itsamonae bitso pacabejiobiaexanaponaē ata. Bajarapacuene pacatocopiapatsiana papecajamatabēcuenējētsinexa papecajamatabēcueneyapētaenexa pepacuene panenajamatabēcuenecopatsijava Diosojavabelia. Nexata pētsa pajamatabējumaitsimē: “Xanē cajena Dioso tajumecovēnētsinē. Nexata bajarapacuenia caenēnē netocopiapatapona,” pajamatabējamē pētsa. Tspaji raja daxita Dioso pejumecovēnētsivi bajaracuenia tocopiapataponatsi pejamatabēcuenējētsinexatsi pejamatabēcueneyapētaenexatsi pepacuene pena-jamatabēcuenecopatsijava Diosojavabelia.

¹³ Nexata saya panasivajamatabëcuenebarëyamëre tsavanapae paxamë ata itsa pacabejiobiaexanapona pacuenia Cristo bejiobiaexanatsi. Nexata pamatacabi pataename Cristo pepatsijavatsica pijapenivenivenaecotia yava, pasivajamatabëcuenebarëyamë tsane.

¹⁴ Pibisiacuenia itsamonae itsa pacabijatane Jesucristo pelivaisi panejumečovënëtsivixae, pasivajamatabëcuenebarëyamëre. Tsipaji raja paepatota itsamonae pacabijatane, ayaijamatabëcuenenë Espíritu Santo, ponë pacayavaponapona, ayaicuenia pacayavenonaena.

¹⁵ Pëtsa jivitonë pabeyaxuabame. Pëtsa panacobetoxotame. Pëtsa paexaname itsacuenejava ata pibisiacueni. Pëtsa patoebetame itsamonae pijacueni pacajunatsinejeva panetoevetsinexa, bajarapacuenia itsamonae panejamatabëitonotsiyaniva. Pëtsa bajarapitsicuene paexaname itsajivi ata paxamë yabara pejumaitsiyaniva: “Pibisiacueni pexanaevixae, bejiobiaexanatsi bajarapamonae,” pejaiyaniva itsa pacabejiobiaexana itsamonae.

¹⁶ Pajivi bejiobiaexanatsi Jesucristo pelivaisi pejumecovënëtsixae, bajara-pajivi apo benacaura pebejiobiaexanaejavatsi. Pexaniajamatabëcuene bera-juta Diosojavabelia Jesucristo pelivaisi pejumecovënëtsixae.

¹⁷⁻¹⁸ Dioso yapëthane pacuenia daxita pijajivi tojinavanapatsi. Nexata aeconoxae Dioso tocopiapatatsi pijajivijavabelia pejumaitsinexa: “Paxamë xaniavaetsia panetojinavanapame. Pexaniacuenenua patoexanabiabame itsamonaejavabelia. Nexata pacasivajamatabëcuenebarëyatsi,” pejainexa Dioso, pexaniacueni pijajivi itsa toexanavanapatsi. Itsiata pamonaie Dioso pijajivi ata, xaniavaetsia Dioso apo tojinavanapae, pexaniacuenenua apo toexanabiabi itsamonaejavabelia, bajarapamonaejavabelia Dioso jumaitsi tsane: “Paxamë apo pacasivajamatabëcuenebarëyatsi. Tsipaji tajitsipacuenia apo paexanavanapaemë,” jai tsane. Bajarapacuenia Dioso itsa jumaitsi tsane pejumecovënëtsivitsijavabelia ata, ¿detsa nexata Dioso jumaitsi tsane Dioso apo pejumecovënëtsivitsijavabelia? Nexata Dioso ayaicuenia naneconitsiaexanaena bajarapamonae. Pamonaiejavabelia Dioso jumaitsi tsane: “Pacasivajamatabëcuenebarëyatsi,” jai tsane, bajarapamonae Dioso capanepaena pijanacuayabetsia. Pamonaiejavabelia ata Dioso jumaitsi tsane: “Paxamë apo pacasivajamatabëcuenebarëyatsi,” jai tsane, bajarapamonae ata itsiata tsiquirijavayota Dioso capanepaena pijanacuayabetsia. Bajara-pacuenia Dioso itsa exanaena pejumecovënëtsivitsijavabelia ata, nexata biji pamonaie apo jumecovënëtsi Dioso pejumelivaisi, pamonaie pibisiacueni pexanaevi, Dioso apo capanepae tsane pijanacuayabetsia.

¹⁹ Nexata paxamë Dioso patatocopatsi ata itsamonae papecabejiobiaexanaponaenexa, pëtsa pajamatabëcuenebëjamë. Tsiteca panavajënaeyabelia pexaniacueni paexanavanapare. Panajamatabëcuene copare papecaexanaenë, Diosojavabelia, papecayavenonaenexa. Dioso cajena pacuenia najumecapanepaeya jumaitsi, bajarapacuenia pacatoexanaena.

5

Pacuenia Dioso pejumecovënëtsivi muxujitobatsi yabara pelivaisi

¹ Aeconoxae ancianovi papecayajavajinavanapaevi, muxujitobijitsianë. Xanë ata rabaja ancianonë. Pacuenia itsi bajarapaancianovi, xanë ata rabaja itsinë. Taniji pacuenia Cristo cruzata bejiobiaexanatsi. Pamatacabi icatsia Cristo patsianica, daxitatsi, Cristo pijajivitsi, nacabarëevetsiana xua Cristo evetsiana.

² Pacuenia oveja pevetsivi xaniavaetsia baevetavanapa, bajara pijinia pacuenia paxamë ata xaniavaetsia paevetavanapare Dioso pejumecovënëtsivi, pamonaie Dioso patatocopata panetoevetsinexa.

Jamatabëcuenebarëyaya Dioso pejitsipaecuenia patoebetavanapare Dioso pejumecovënëtsivi. Pëtsa pajamatabëjumaitsimë: “Apo jitsipae atanë tatoevetsinexa Dioso pejumecovënëtsivi, itsiata toevetsianajë. Tspaji Dioso netojitsipa tatoevetsinexa,” pajamatabëjamë pëtsa. Pëtsa pajamatabëjumaitsimënuu: “Tanematamotsinexa toevetsianajë,” pajamatabëjamë pëtsa. Paxamë panejamatabëëthëtojavavetsina panejitsipaexae Dioso pejumecovënëtsivi panetoevetsinexa, patoebetavanapare.

³ Pamonae Dioso pacatocopata panetoevetsinexa, bajarapamonae pëtsa bepapijatuxanevimë panataneme saya jema paneitorobabiabinexa. Biji rajane xaniavaetsia patsitajinavanapare pacuenia patojitsipame bajarapamonae pejinavanapanaexa.

⁴ Nexata pamatacabi icatsia Cristo patsianica, ponë jane baja pepo vanacaevetsinënexa, nacarajutsiana pinijicuene. Xua Cristo nacarajutsiana, apo vereverecae tsane daxita matocabijavabelianexa.

⁵ Paxamë papevëjëavimë, pacuenia ancianovi pacaitoroba, pajumecovënëtabiabarë. Pacaejivimë canacujitsia namataenetsia panayavenonabiabianame beveliajamatabëcuenevi nataeya. Bajarapacuenia panataema tspaji raja Dioso pejumelivaisibaxutota jumaitsi mapacueniajæ:

Dioso apo yavenonae pamonae beayaijamatabëcuenevi penataevi. Itsiata baitsi jane Dioso pitaxutotsoniataexae, pexaniajamatabëcuenia yavenona pamonae beveliajamatabëcuenevi penataevi, jai Dioso pejumelivaisibaxutota.

⁶ Nexata saya paxamë beveliajamatabëcuenevi panataema ayaijamatabëcuenenë Dioso pitabarata. Nexata Dioso pecaëjëtsimatocabita, paayaijamatabëcuenevimë pacaexanaena.

⁷ Dioso papecaasivaxae, pacaevetaponapona. Bajaraxuata daxita panejamatabëcuenebëjajava, pacopare. Pavajëre Diosojavabelia papecayavenonaeana.

⁸ Nayajivitaeyanua pajinavanapare panijavajabitsaënë, dovathi, papecayamaxëitojorobianiva. Pacuenia nevëthë itsa piajani, jaitaponapona pexaeyabuatsinënexa, bajarajamatabëcueneitsi dovathi papecayamaxëitojorobinexa.

⁹ Paepatota dovathi jamatabëpacayamaxëitojoroba panecopabinexa Jesús pelivaisi panejumecovënëtsijava, bajarapaepatota pajamatabëcuenesaëmëre Jesús pelivaisi panejumecovënëtsijava. Diosojavabelia najamatabëcueneocopatsiaya dovathi panayajiviitavere. Itsamonae itsa pacabejiobiaexana dovathi pejamatabëcueneta, panajamatabënapire pacuenia itsamonae ata, Dioso pejumecovënëtsivi, daxitanacuanëjæva dovathi pejamatabëcueneta bejiobiaexanaponatsi.

¹⁰ Itsiata baitsi jane saya caepatoyo Dioso pacacopatsiana papecabejiobiaexanaenexa. Bajaraxuacujinae Dioso pacajamatabëcueneasaëyaexanaena. Bajaraponë Dioso vajanacayavenonaenë daxitacuenejavabelia. Nacajunatanua Jesucristo yajava athëbëtsia vajanacayajavaecaenexa, penivenivenaenacuatatsia, daxitamatacabijavabelianexa.

¹¹ Dioso baja cajena daxitacuene pevetsinë daxitamatacabijavabelianexa. Bajara itsi tsane.

Pacuenia Pedro toyaquina peveretsinexa baja petoyaquinaelivaisi mapabaxutotaje yabara pelivaisi

¹² Silvano betajuyapijinë taniji bajaraponë ata Dioso pejumecovënëtsixae. Silvano yaquinaeyaexanajë palivaisi pacatoitorobjitsiatsilia. Bajaraponë

ponaejitsia baja paxamëjavabelia. Nexata pacatoyaquinatsi mapabaxutoje patacajamatabëcuene asaëyaexanaenexa. Dioso vajanacayavenonabi-abixae, yapëtanetsi baja xaniajai pepacuene Dioso vajanacaasivacuene. Bajaraxuata pacabejioaexanabiabi ata, pajamatabëcuenesaëmëre tsavanapae paneyapëtaexae baja bajarapacuene.

¹³ Dioso pejumecovënëtsivi, Babilonia tomarapijivi, pacajamatabënajina. Pacuenia paxamë Dioso pacaitapeta papijajivinexamë, bajara pijinia pacuenia bajarapamonae ata Dioso itapëtatsi pijajivinexa. Marcos, ponë betaxënatocuenia tataenë, bajaraponë ata pacajamatabënajina.

¹⁴ Namataenetsia naasivaya panabajacobare bepanacaemonaemë panenataexae.

Pacatojitsipatsi daxita paxamë jamatabëcuenexanepanaeya panejinavana-paenexa Jesucristo papijajivixaemë. Bajara itsi tsane.

Mapabaxutoje San Pedro cotocaevi toyaquina Dioso pejumecovënëtsivijavabelia

Pacuenia Pedro mapabaxutoje cotocaevi toyaquina Dioso pejumecovënëtsivijavabelia yabara pelivaisi

¹ Xanë Simón Pedronë, Jesucristo taneitorobicuenia tatonacuenebapon-aponaeñë. Nitorobanua jivi tatsipaebabiabinexa Jesucristo pelivaisi. Paca-toyaquinatsi mapabaxutoje paxamë baja Dioso panejumecovënëtsivi. Jesu-cristo patanesivatëpaejava patajaneconi yabara patajumecovënëtsijava, pax-anë panetonamatamota Diosojavabelia. Bajara pijinia paitsimë paxamë ata. Jesucristo papecasivatëpaejava panijaneconi yabara panejumecovënëtsijava, pacatonamatamota Diosojavabelia. Bajarapacuenia daxitatsi Jesucristo vajanacasivatëpaejava vajaneconi yabara vajajumecovënëtsijava, nacatona-matamota Diosojavabelia. Tsipaji vajatuxanenë Jesucristo, vajanacacapanepaenë, nacaneconimatamota baja.

² Pacatovajëtatsi Diosojavabelia bitso papecayavenonaponaeñexa daxitacuene yabara. Pacatovajëtatsinua jamatabëcuenexanepanaeya panejinavanapaenexa. Bajarapacuenia Dioso pacayavenonaponaeñexa panevajënaeyabelia, Dioso itsa pajamatabëcueneyapëtaeponaename, vajatuxanenë Jesucristo ata itsa pajamatabëcueneyapëtaeponaename.

Pacuenia Dioso pejumecovënëtsivi jamatabëcueneitsi tsavanapae yabara pelivaisi

³ Dioso, ponë nacajunata pijajivinexatsi, yapëtanetsi baja bitso ayaijamatabëcuene pexainaenëcuene. Bajaraponë Dioso bitso pexaniacuene pexainaenë. Bajaraponë Dioso pesaëta pinijicuene pexanaejava, itsa exana mapanacuataje, nacatsitanajamatabëcueneitajëta bitso ayaijamatabëcuene pexainaenëcuene. Bajarapacuenia itsa yapëtaeponatsi Dioso, nexata Dioso nacarajutapona pesaë vajajinavanapaenexa xaniavaetsia pacuenia Dioso nacatojitsipa.

⁴ Bajarapacuenia Dioso pinijicuene pexanaejavanë pexanaexae mapanacuataje, nexata yapëtanetsi Dioso xaniajai vajanacacapanepaejavanexa pacuenia najumecapanepaeya jumaitsi. Dioso vajanacacapanepaejavanexa pinijicuene bitso. Jumecovënëtsi Dioso vajanacacapanepaejavanexa. Nexata Dioso nacayajavaponapona. Bajaraxuata Dioso pesaëta nacajamatabëcueneasaëyaexanaena vajajinavanapaenexa xaniavaetsia. Nexata nacajamatabëcuene caëjëpaeyaexanaena vajavecuapanepaenexa mapanacuata pibisiacuene vajanacaexanaeyaexanae jamatabëcuene. Nexata pacuenia Dioso jamatabëcueneitsi tsaponapona, bajara vaxaitsi ata jamatabëcueneitsitsi tsavanapae tsane.

⁵ Nexata pacuenia Dioso jamatabëcueneitsi tsaponapona, bajara panejamatabëcueneitsinexa, asaëyata Dioso pajumecovënëtaeponaere. Asaëyata Dioso itsa pajumecovënëtaeponaename, nexata icatsia itsajava payapëtaeponaename. Asaëyata paexanavanapare ëpexaniacuene. Asaëyata itsa paexanavanapaenae ëpexaniacuene, nexata icatsia orijibia pajamatabëcueneyapëtaeponaename Dioso. Nexata payapëtaename pacuenia Dioso pacatojitsipa asaëyata panetoexanavanapaenexa.

⁶ Paneyapëtaecujinae pacuenia Dioso pacatojitsipa asaëyata panetoexanavanapaenexa, icatsia payapëtaename panenajamatabëcuenecataitsinexa

pibisiacuene panenajamatabëxainaeyaniva. Paneyapëtaecujinae panenajamatabëcuenecatitsinexa pibisiacuene panenajamatabëxainaeyaniva, icatsia payapëtaename dovathi pejamatabëcueneta bajayajebi pacajamatabëcuenejëtaponae ata, asaëyata panenajamatabëcuenesaëtsinexa ëDiosojavabelia. Paneyapëtaecujinae dovathi pejamatabëcueneta bajayajebi pacajamatabëcuenejëtaponae ata, asaëyata panenajamatabëcuenesaëtsinexa ëDiosojavabelia, icatsia payapëtaename xaniavaetsia panejinavanapaenexa pacuenia Dioso pacatojitsipa.

⁷ Paneyapëtaecujinae xaniavaetsia panejinavanapaenexa pacuenia Dioso pacatojitsipa, icatsia payapëtaename asaëyata panenayavenonaenexa itsamonexa ata Dioso pejumecovënëtsivi. Paneyapëtaecujinae paneyavenonaenexa itsamonae ata Dioso pejumecovënëtsivi, icatsia payapëtaename asaëyata namataenetsia bitso panenasivanexa bajarapamonaejavabelia.

⁸ Daxita bajaraxua asaëyata panevajënaeyabelia itsa paexanavana-paename, nexata pacuenia Dioso jamatabëcueneitsi tsaponaponae, bajara pajamatabëcueneitsimë tsane. Bajarapacuenia asaëyata itsa paexanavanapaename, nexata pajamatabëcuenevitsabaponaename Dioso panejumecovënëtsijava. Nexata Dioso ata tsitaxanepanaenatsi xua patonacuenebavanapame. Nexata vajatuxanenë Jesucristo panejamatabëcueneyapëtaejava, apo panacueratsimë tsane.

⁹ Itsiata baitsi jane pajivi apo exanae tsane daxita bajaraxua, nexata apo yapëtae tsane Dioso pijacuene. Tsipaji bajarapajivi nacofënëtsiana Dioso picani pevecuaajibiaexanaejavatsi pibisiacuene pexanaeconimi.

¹⁰ Tajamonae, bajaraxuata pacaasaëmëre tsavanapae Dioso panejumecovënëtsijava, jivijavabelia panetsitanaitjëtsinexa Dioso papecajunatsijava, papecaitapetsijava ata papijajivinexamë. Nexata bajarapacuenia itsa paexanavanapaename, Dioso panejumecovënëtsijavavecu, apo pajopaemë tsane. Pacacapanepaena Dioso.

¹¹ Nexata Dioso pacatocopatsiana panejonenexa vajatuxanenë Jesucristo vajanacapanepaenënexa, pijanacuayabetsia, apo pevereverecaenacuaya-betsia, paneyajavajinavanapaenexa.

¹² Daxita rabaja bajaraxua payapëtaneme. Pajamatabëcuenesaëmënuu baja panejumecovënëtsijava pexaniajallivaisi. Itsiata icatsia pematatsënëa pacanajamatabënapitsiaexanaponatsi.

¹³ Abaxë tasaëtsaponaponaepato mapanacuataje, netsitaxanepana patacamuxujiobinexa, bajarapacuenia patacanajamatabënapitsia exanapon-aenexa.

¹⁴ Tsipaji baja vajatuxanenë Jesucristo tajëvelia neyapëtaeyaexana bepijia tatëpaejavanexa.

¹⁵ Itsiata baitsi jane pacuenia necaëjëpa, xaniavaetsia pacatoyaquinae-natsi panenacofënëtsiyaniva. Nexata itsa tēpajë, paxamë tavënamuto panena-jamatabënapitabiabinexa pacuenia pacamuxujiobatsi.

Pacuenia Jesucristo pijajivijavabelia tsitanajamatabëcueneitajëta ayajia-matabëcuene pexainanëcuene yabara pelivaisi

¹⁶ Imata vajatuxanenë Jesús pelivaisi itsa pacatsipaebatsi, xaniavaetsia pacatsipaebatsi mapacueniaje: "Vajatuxanenë Jesucristo baja cajena bitso pecaëjëpaenëtsi Dioso pesaëta pinijicuene pexanaejava pexanaenexa. Ba-jaraponë icatsia patsianica," pacajaitsi. Saya jivi pejamatabëcueneta pena-jumetsënëtsilivaisi, apo pacatsipaebitsi. Tsipaji baja pataitaxutota pataniji vajatuxanenë ayajiamatabëcuene pexainanëcuene.

17 Xaniavaetsia baja cajena pajumetaniji pamatacabi paxa Dioso athëbëvetsica barëcuaicuajiaitsi. Bajarapaepatota daxitanë Cristo nivenivenareca. Athëbëvetsica paxa Dioso jumaitsitsica mapacueniaje: “Mara ponë taxënatoje, tasivanë. Bitso sivajamatabëcuenenarëyanë,” jaitsica paxa Dioso athëbëvetsica.

18 Vajatuxanenë Jesucristo payajavanubenajë petsutojumata, itsajota jane baja paxa Dioso athëbëvetsica barëcuaicuajiaitsitsica. Nexata bajarapatsutojumata paxanë patajacuata pajumetaniji vajatuxanenë Jesucristo paxa Dioso athëbëvetsica pebarëcuaicuajiajavatsitsica.

19 Nexata pataniji. Payapëtanijinua. Xua bajayata Diosojumepaebivimi profetavi tajëvelia vajunupaeba pecopiapatsinexa, bajaraxua jane baja aconoxae copiapata. Paxamë pibisiacuene panenayajivitaenexa, pajumecovënere profetavimi pepaebilivaisi. Profetavimi pepaebilivaisi, pexaniajailivaisixae, belâmpara picani. Pacuenia lâmpara itayota pitaquirijavata, bajara pijinja itsi profetavimi pepaebilivaisi pibisiacuene panenayajivitaenexa mapanacuataje. Pajumecovënere xaniavaetsia profetavimi pepaebilivaisi. Nexata bajarapalivaisi pacajamatabëcueneyavenonaena pibisiacuene panenayajivitaevanapaenexa mapanacuataje. Bajarapacuenia pacajamatabëcueneyavenonaena matapania icatsia Jesucristo pepatsimatacabiticajavabelianexa. Nexata bitso pabarëyamë tsane pamatacabi icatsia Jesucristo patsianica.

20 Xaniavaetsia pacanaëjere daxitacuenevuca paneyapëtaenexa mapalivaisije. Daxita xua copiapatsijitsia mapanacuataje, tajëvelia Dioso pejumelivaisibaxutota vajunupaeba. Itsajivi ata cajena apo caëjëpaetsi saya pejamatabëcueneta bajaraxua xaniavaetsia pevajunupaebinexa itsamonaejavabelia, itsamonae ata peyapëtaenexa pajamatabëcuenelivaisi xaina bajaraxua. Matapania pajivi Espiritu Santo yapëtaeyaxanatsi, caëjëpatsi xaniavaetsia pevajunupaebinexa bajaraxua.

21 Bajayata Diosojumepaebivimi profetavi tajëvelia itsa vajunupaeba daxita xua copiapatsijitsia mapanacuataje, pejamatabëcueneta apo exanae bajarapalivaisi. Profetavimi Dioso pijajivixae, pacuenia Espiritu Santo yapëtaeyaxanatsi, paebabiaba.

2

Pacuenia Dioso pejumecovënëtsivi muxujiobatsi penajumetsënëtsilivaisi petsipaebaponaevi pejumecovënëtsiyaniva yabara pelivaisi
(Jud 4-13)

1 Bajayata itsamonae tsipaebapona penajumetsënëtsilivaisi Israel nacuapijivijava Dioso pejumelivaisi bepaebivi petaenexatsi. Bajara icatsia aconoxae ata itsane paxamëjava. Itsamonae pacatsipaebiana penajumetsënëtsilivaisi. Bajarapamonae yamaxëitojorobiaya pacatsipaebiana penajumetsënëtsilivaisi. Nexata bajarapalivaisita pacacopabiaexanaena Dioso panejumecovënëtsijavami. Bajarapamonae apo pejumecovënëtsivi tsane vajatuxanenë Jesucristo, ponë picani sivatëpatsi pecapanepaenexatsi. Bajarapacuenia pexanaexae tsane bajarapamonae, nexata bepija Dioso verebiabiana bajarapamonae.

2 Bajarapamonae pevitota pibisiacuene exanavanapaena. Nexata bajaraxua yabara jumaiti tsanë: “Apo itsacuene itsiata, bajaraxua exanae atatsi,” jai tsane bajarapamonae. Nexata ayaibitsaëto paxamëyajuvënëvi jumecovënëtsiana. Naexanaenanua papibisiacuene bajarapamonae exana. Nexata bajarapacuenia paxamëyajuvënëvi pibisiacuene petsitaexanaexae

tsane, pamonaē Dioso apo pejumecovēnētsivi pibisiacuēnia baracuaicuaijai tsane pexanialivaisi, Jesucristo pelivaisi.

³ Nexata pamonaē penajumetsēnētsilivaisi tsipaebaponaena, bitso jitsipaena palata. Bajaraxuata pacatsipaebiana penajumetsēnētsilivaisi papecat-sipaebijamatabēcuēne papecavecuapitsinexa panijapalata. Itsiata baitsi jane Dioso tajēvelia najamatabēcuēnevereta bajarapamonaē penaneconitsi-aexanaenexa. Nexata bajarapamonaē bajarapitsixae tsane, pepacuēne jemata Dioso naneconitsiaexanaena.

⁴ Angelevi ata baja cajena itsa naneconita, aneconijibia Dioso apo copatsi. Angelevi ata itsa naneconita, nexata Dioso xuaba infernojavabelia. Nexata bajarajota, pitaquirinacuata, cēbiaya Dioso jinavanapaeyaexana. Nexata bajarapaangelevi Dioso jane baja naneconitsiaexanaena pamatacabi Dioso naneconitsiaexanaena daxita pijaneconi pexinaeivi.

⁵ Dioso cajena aneconijibia apo copatsi bajayatami ata pamonaē pibisiacuēne exana. Dioso ira bubutsiaexana bajarapamonaē penaxuabinexa. Caenē, Noépijinē, Dioso capanepa pijamonaē yajava, siete pajiviyobeje. Noépijinē picani itavetabiaba jivi pibisiacuēne pexanaeyaniva.

⁶ Bajayata Dioso isotota verebiaba Sodoma tomarapijivimi. Bajara pijinia pacuēnia Dioso verebiaba Gomorra tomarapijivimi ata. Nexata Dioso copi-arucaeyaexana bajarapatomaramibeje. Tsipaji bitso pibisiacuēne exana bajarapatomaramibejepijivi. Bajarapatomaramibeje nacopata ēipumana. Bajarapacuēnia Dioso verebiaba bajarapamonaemi, pamonaē cotocaevi jinavanapa, peypātaenexa, bajarapamonaē ata pibisiacuēne pexanaeyaniva.

⁷ Pamatacabi Dioso verebiaba bajarapatomaramibejepijivi, caenē, Lotpijinē, Dioso capanepa pexaniacuēne pexanabiabixae. Lotpijinē itsa taeyabiaba bajarapamonaemi bitso pibisiacuēne pexanaejava, nexata bitso sivanamatabēxainabiaba.

⁸ Lotpijinē pexaniacuēne pexanaenē, bajarapamonaemi tuatuaejeta naponapona. Nexata caematacabi canacujitsia Lotpijinē bitso sivanamatabēxainabiaba, itsa tane bajarapamonaemi pibisiacuēne pexanaejava, itsa vēnēlivaisitanenua pibisiacuēne pexanaejava.

⁹ Bajaraxuata vaxaitsi baja yapētanetsi mapacuēneje. Vajatuxanenē caējēpatsi pejamatabēcuēneasaēyaexanaenexa pajivi najamatabēcuēnecopata vajatuxanenējavabelia. Nexata pajivi najamatabēcuēnecopata vajatuxanenējavabelia, dovathi itsa jamatabēcuēneējētatsi, vajatuxanenē jamatabēcuēneasaēyaexana. Vajatuxanenē caējēpatsinua pibisiacuēne pexanaēvi, nabejobitsiaya pejinavanapaeyaexanaenexa, mapanacuataje abaxē itsa asaē tsavanapae. Bajarapacuēnia vajatuxanenē nabejobitsiaya jinavanapaeyaexanaena penaneconitsiaexanaenexa icatsia petēpaecujinae ata, pamatacabi naneconitsiaexanaena daxita pijaneconi pexinaeivi.

¹⁰ Pamonaē bitso casaē tsavanapae pibisiacuēne pexanaejava pijacuata penatojitsipaecuēnia, bajarapamonaē bitso ayaicuēnia Dioso naneconitsiaexanaena itsamonaē penaneconitsiaexanaejava matatoxenetsia. Pamonaē ata apo jumecovēnētsi vajatuxanenē pevetsicuenetsi, bajarapamonaē ata Dioso bitso ayaicuēnia naneconitsiaexanaena. Pamonaē penajumetsēnētsilivaisi petsipaebaponaēvi, apo yayyatae itsamonaē ata. Ajamatabēcuēnetajanua. Apo jumejunavinua bajarapamonaē pibisiacuēnia pebaracuaicuaijainexa angelevi.

¹¹ Angelevi biji picani bitso piasaēvi penajumetsēnētsilivaisi petsipaebaponaēvi matatoxenetsia. Nexata angelevi vajatuxanenē pitabarata pejinavanapaexae, bitso piasaēvi ata penajumetsēnētsilivaisi

petsipaebaponaevi matatoxenetsia, itsiata pibisiacuenia apo baracuaicuajiai penajumetsënëtsilivaisi petsipaebaponaevi.

12 Pamonaev penajumetsënëtsilivaisi petsipaebaponaevi, beveliajamatabëcuenevi saya. Pacuenia saya jinavanapa unupijidujuai, bajara saya jamatabëcueneitsi bajarapamonaev. Apo najamatabëxainae pexanialivaisi. Saicaya xua jamatabëexana, exanabiaba. Unupijidujuai saya jema bajinavanapa. Nexata jivi jemata itsa tane, vaetaba, Beyaxuabanua. Pamonaev penajumetsënëtsilivaisi petsipaebaponaevi, pibisiacuenia baracuaicuajiai tsabiabi xaniavaetsia apo pepapëtaejava ata. Nexata pacuenia unupijidujuai baverebiabatsi, bajara pijinia pacuenia jemata Dioso verebiabiana bajarapamonaev.

13 Nexata Dioso bajarapamonaev juya bejiobia jinavanapaeyaexanaena. Tsipaji bajarapamonaev itsamonaev bejiobiaexanabiaba. Bajarapamonaev pibisiacuenia itsa exanabiaba, barëya tsabiabi. Bajarapamonaev apo pacajamatabëcuenejëpae ata, nanacaetuatsiana itsa panacaetuatame. Nexata yamaxëitojorobiaya pacayajavanabanebiabiana fiesta paneexanaematacabi. Bajarapamonaev pibisiacuenia pexanabiabixae tsane, nexata panetuatuajëta bepaxuirajava tsane.

14 Bajarapamonaev itsa tane petiriva, pibisiacuenia jamatabëexanabiaba pevitota bejarapovajavabelia. Apo yabaracueranaev pibisiacuenia pexanaejava. Penajumetsënëtsilivaisi petsipaebaponaevi, pibisiacuenia exanaeyaexanabiaba pamonaev abaxë apo ajamatabëcuenesaë Dioso pejumecovënëtsijava. Bajarapamonaev bitso jitsipa daxitacuene pexainaejava ëpamonaenexa. Bitso yapëtanenua pepitsinexa xua jitsipa. Nexata bajarapamonaev Dioso bitso ayaicuenia naneconitsiaexanaena.

15 Bajarapamonaev baja Diosovecua naxuabiaya jinavanapa. Tsipaji baja copaba pexaniaajailivaisi pejumecovënëtsijavami. Apo jumecovënëtsi Dioso. Nexata bajarapamonaev cuenejëpa Diosojumepaebinëmi, profeta Balaampijinëmi, Beorpijinëmi pexënato. Balaampijinëmi bajayata itsamonaev tsipaebatsi palata pibisiacuenia picani pexanaenexa. Nexata baja picani Balaampijinëmi jejai pibisiacuenia pexanaenexa.

16 Itsiata baitsi jane Balaampijinë Dioso itavetatsi bajarapapibisiacuenia bitso pexanaeyaniva Dioso pitabarata. Balaampijinë pijaburrota yanajetaruca. Dioso cuaicuajiaayaexana burro. Nexata pacuenia jivitonë bacuaicuajiai, bajarapacuenia Balaampijinë pijaburro barëcuaicuajiaitsi pitavetsinexatsi pibisiacuenia pexanaeyaniva. Nexata picani xua Balaampijinë jamatabëexana, copata baja.

17 Pamonaev penajumetsënëtsilivaisi petsipaebaponaevi, apo jumenamata-motsi. Yapëtanetsi pacuenia baitsi meramatathaibëmi itsa tseveca. Meramatathaibëmi itsa tseveca, apo jamatabëcueneavenonaev itsajiviyo ata. Tsipaji itsajivi mera jitsipae ata, piapaenexa apo puatsi bajarajota. Bajara pijinia itsi pamonaev petsipaebaponaevi penajumetsënëtsilivaisi. Itsajivi ata apo jamatabëcueneavenonaev bajarapamonaev petsipaebillivaisita. Pacuenia itarërëbo ata jovibota xaniavaetsia caecovëta apo rucae, bajara jamatabëcueneitsi bajarapamonaev. Caejamatabëcuene apo xainae. Nexata Dioso bajarapamonaev bitso ayaicuenia naneconitsiaexanaena. Bajarapamonaev pitaquirinacuata naneconitsia jinavanapaena daxitamatacabi javabelianexa.

18 Bajarapamonaev ayaijamatabëcuenevi nataeya cuaicuajiai tsabiabi. Itsiata baitsi jane saya natsiquejemalivaisi cuaicuajiai tsabiabi. Bajarapamonaev yamaxëitojorobiaya jumai tsabiabi: “Apo itsacuene raja apo payaiyatae atamë petiriva. Pibisiacuenia itsa jamatabëpaexaname panevitota petirivajavabelia, paexanare,” jai tsabiabi bajarapamonaev. Bajarapacuenia ba-

jarapamonae othopaeyaexanapona pamonaē pejanajumecovēnētsivi Dioso. Tspaji pibisiacuene exanaeyaexanapona.

¹⁹ Bajarapamonae yamaxēitojorobiaya jumai tsabiabinua: “Itsa panejumecovēnētsianame patacatsipaebilivaisi, nexata pacatoxanepanaena paneexanabiabinexa daxitacuene,” jai tsabiabi pamonaē pena-jumetsēnētsilivaisi petsipaebaponaēvi. Itsiata baitsi jane bajarapamonae apo jamatabēcuenecaējēpaetsi daxita xua pexaniacuene pexanaenexa. Saya ēpibisiacuene exanabiaba. Bajaraxuata Dioso bajarapamonae verebiabiana. Tspaji bajarapamonae pibisiacuene exanabiaba pijacuata penatojitsipaecuenia, pacuenia pejamatabēcuenē itorobatsi. Caējivitsi canacujitsia vajacuata vajanatojitsipaecuenia itsa exanaponatsi, vajajamatabēcuenē bepījajivitonētsi naexanatsi. Tspaji pacuenia vajajamatabēcuenē nacaitoroba, exanaponatsi.

²⁰ Pamonaē baja yapētane vajatuxanē Jesucristo, ponē capanepaejitsiatsi pibisiacuene pexanaeoneconimivecua, bajarapamonae baja Dioso vecuaajibiaexanatsi pibisiacuene pexanaeoneconimi. Pajamatabēcuenēmi ata jitsipaeyaexanabiabatsi pibisiacuene pexanaenexa, bajarapajamatabēcuenēmi ata baja vecuaajibiaexanatsi. Itsiata baitsi jane bajarapamonaeyajuvēnēvi icatsia pibisiacuene itsa exanapona, nexata icatsia bajarapajamatabēcuenē pejumecovēnētaponaeaxae, bitso naneconitsiana Diosojavabelia. Nexata jane baja copiaya pexinaeoneconimi matatoxenetsia, bitsoyo ayaineconī natsixainaena.

²¹ Pamonaē copaba pexaniajailivaisi pejumecovēnētsijavami, bitso ayaineconī natsixaina Diosojavabelia. Bajarapamonae itsa apo tsipaēbi tspaetsi bajarapapexaniajailivaisi, bevelia naneconitsipa Diosojavabelia. Tspaji apo yapētae tsipae bajarapalivaisi. Nexata baja peyapētaexae bajarapalivaisi, pecopabixanua pejumecovēnētsijavami bajarapalivaisi, naneconita bitso Diosojavabelia. Toxanepanaējitsipatsi meta bajarapamonae itsa apo tsipaēbi tspaetsi bajarapalivaisi bevelia penaneconitsinexa Diosojavabelia.

²² Bajayatapījilivaisi jumaitsi mapacueniajē: “Aviri peyacabicujinae, icatsia nayacabixane. Marrano pijinīa tsorobota peboacaecujinae, itsa matavanetsi pexaniamerata, pematavaecujinaetsi, icatsia caevēalia tsorobota boca,” jai bajayatapījilivaisi. Xaniajai baja cajena bajarapalivaisi. Bajara pijinīa jamatabēcuenēitsi pamonaē icatsia caevēalia pibisiacuene exana.

3

Pacuenia icatsia Jesucristo patsijitsiatsica yabara pelivaisi

¹ Tajamonae bitso patacaasivavi, copiaya baja cajena pacatoyaquinatsi itsabaxuto. Nexata icatsia mapabaxutoje cotocaevi pacatoyaquinatsi. Pacatoyaquinatsi bajarapabaxutobeje patacamuxujiobinexa nexata xaniavaetsia panenajamatabēcuxainaenexa.

² Panajamatabēnapire pacuenia Diosojumepaebivimi profetavi bajayata tajēvelia jumaitsi. Panajamatabēnapirenua pacuenia baja cajena apóstolevi pacatsipaeba vajatuxanē Cristo pelivaisi. Cristo, ponē papecacapanepaenēnexa, copiaya tsipaeba apóstolevijavabelia. Nexata juya apóstolevi paxamējavabelia pacatsipaeba.

³ Xaniavaetsia panamuxunaeverē daxitacuenēvecua paneypētaenexa mapacuenēje. Nacua pecopiarucaevajēnaeyotanexa, najetarubenaena itsamonae pecapocaponaevinexa pexaniajailivaisi. Bajarapamonae exanavanapaena pibisiacuene pacuenia pijacuata natojitsipa.

⁴ Bajarapamonae Cristo pepatsijavanexatsica apo pejumecovënëtsixae, najumequenetsiataeya saya jumaitsi tsane: “¿Jica Cristo icatsia pepatsijavanexatsica pacuenia baja Cristo tajëvelia najumecapanepaeya jumaitsi? Bajayata vajavajënaeyapijivimi, pamona jumečovënëta Cristo pepatsijavanexatsica, vajënaeevetavanapa picani. Itsiata Cristo apo patsitsica. Nexata bajarapamonaemi belia baja tēpa Cristo patsinejevatsica. Daxitanacua abaxë itsiata tsitecanua Dioso pexanaecujinae,” jai tsane saya bajarapamonae apo pejumecovënëtsixae Cristo pepatsijavanexatsica.

⁵ Bajarapacuenia jumaitsi tsane tsipaji bajarapamonae apo canaëjëtsi tsane pacuenia bajayata Dioso itoroba saya pijumeta itaboxo penaexanaenexa mapanacua yajavaje. Nexata mapairanexaje, manuamene tuatujëatsina Dioso ira jumapitsapaeyaexanaina.

⁶ Bajayata pijinia mapanacuaje Dioso itsa bubutsiaexana, daxitajivi Dioso verebiaba merata.

⁷ Itsiata baitsi jane itaboxo, ira yajava, daxita xua tanetsi, Dioso pejamatabëcueneta abaxë xaniavaetsia tsitecanua. Dioso abaxë xaniavaeta itsamatacabi isotota peveriapaenexa. Dioso isotota veriapaena mapanacuaje, itaboxo yajava, pamatacabi naneconitsiaexanaena daxita pijaneconi pexainaevi. Bajarapamatacabi Dioso naneconitsiaexanaena pibisiacuenē pexanaevi. Dioso verebiabiana daxitacuene.

⁸ Tajamonae bitso patacaasivavi, pëtsa panacofënëtame mapacueneje. Vajatuxanenē saya tsitacaematacabsi mil pavaibeje ata. Mil pavaibeje ata apo tsitabajajebitsi. Betsitacaematacabi tsanucaetsi saya vajatuxanenē.

⁹ Itsamonae jamatabëcuenenavëxaniabiaya jamatabëjumaitsi: “Dioso bitso cuenenajemata pexanaenexa pacuenia najumecapanepaeya jumaitsi,” jamatabëjai. Vajatuxanenē raja apo cuenenajematsi. Xua raja vajatuxanenē bajayajebi becuenenajematsi, abaxë saya eveta jivi pejumecovënëtsinexatsi. Tsipaji vajatuxanenē apo jitsipae itsajivi ata pevecuanaxuabijavatsi. Vajatuxanenē raja jitsipa daxitajivi pecopabinexa pibisiacuenē pexanabiabiava, penajamatabëcuenepënëyorotsinexa Diosojavabelia.

¹⁰ Vajatuxanenē baja cajena icatsia jemata patsianica. Pamatacabi jivi jamatejema jinavanapaena, jemata vajatuxanenē patsianica. Pacuenia penacobetoxotsinënexa jemata bapata, itsajota apo jamatabënajinaetsi, bajara pijinia itsi tsane vajatuxanenē. Jemata patsianica. Nexata jane baja bajarapamatacabita itaboxo copiarucaena. Ayaijume najumetsiana. Daxita athëbëpijicuene vereverecaena isotota. Mapanacuamije, daxita xua tanetsi mapanacuataje, yajavatajuena isotota.

¹¹ Daxitacuene bajarapacuenia vereverecaena. ¡Bajaraxuata bitso xaniavaetsia bepajinavanapame Dioso papecatojitsipaecuene!

¹² Bepacopiaevetavanapame vajatuxanenē pepatsijavanexatsica. Vajatuxanenē pijacuene bepatonacuenebavanapame bepijia pepatsinexatsica. Pamatacabita vajatuxanenē patsianica, itaboxo vereverecaena isotota. Daxita athëbëpijicuene veriajaviana isotocotiata.

¹³ Itsiata baitsi jane xuacujinae Dioso icatsia pejanaitaboxo, pejanairanua, exanaena pacuenia tajëvelia najumecapanepaeya jumaitsi. Nexata vaxaitsi evetavanapatsi vajataenexa pejanaitaboxo, pejanairanua. Itsamatacabi pejanairata daxitajivi ëpexaniacuenē exanavanapaena, xua Dioso tojitsipatsi.

¹⁴ Tajamonae bitso patacaasivavi, pejanaitaboxo, pejanairanua, pane-taenexa, panecopiaevetavanapaeepato xaniavaetsia pajinavanapaename. Nexata pamatacabi vajatuxanenē icatsia patsianica, pacasivabarëya tsane. Bajarapacuenia pacasivabarëya tsane itsa pacacaxitarabiana jamatabëcuenexanepanaeya aneconibia panejinavanapaejavata.

¹⁵ Pacanaäjere xua yabara abaxë vajatuxanenë apo patsitsica. Abaxë raja apo patsitsica daxitajivi apo pejumecovënëtsixae Dioso. Tsipaji daxitatsi vajatuxanenë jamatabënacacapanepa pijanacuayabetsia. Pacuenia daxitatsi vajatuxanenë jamatabënacacapanepa pijanacuayabetsia, bajaraxua vajaasivanë, vajabananë Pablo, peyapëtaenexa Dioso yavenonatsi. Nexata Pablo peyaquinaebaxutonëta, pacatoyaquina pacuenia vajatuxanenë daxitatsi jamatabënacacapanepa pijanacuayabetsia.

¹⁶ Pablo baja cajena peyaquinaebaxutonëta, pacatoyaquina pacuenia vajatuxanenë daxitatsi jamatabënacacapanepa pijanacuayabetsia. Pablo peyaquinaelivaisianë, itsalivaisi ayapëbeje tsabiabi vajajumeyapëtaenexa xua yabara Pablo yaquina. Nexata palivaisi apo jumeyapëtaetsi, apo yapëtaetsi pajamatabëcuenelivaisi xaina. Nexata pamonaë xaniavaetsia apo jumeyapëtae Pablo peyaquinaelivaisianë, juya tsipaebabiaba itsamonaëjavabelia apo jumeyapëtae ata. Pamonaë ata caejamatabëcuene apo xinaë Dioso pejumecovënëtsijava, juya itsamonaëjavabelia tsipaebabiaba Pablo peyaquinaelivaisianë. Nexata bajarapamonaë itsamonaëjavabelia itsa tsipaebabiaba, Pablo peyaquinaelivaisianë mataropotsia saicayacuenia tsipaebabiaba. Bajarapacuenia itsabaxutonëta ata, perubenaelivaisianë ata, bajarapamonaë saicayacuenia mataropotsia tsipaebabiaba. Bajarapamonaë itsamonaëjavabelia itsa tsipaebabiaba, apo tsipaebabiabi pacuenia Dioso pejumelivaisibaxutota jumaitsi. Saicayacuenia saya tsipaebabiaba. Nexata bajarapamonaë pijacuata naneconita Diosojavabelia. Nexata Dioso verebiabianatsi.

¹⁷ Tajamonaë bitso patacaasivavi, paxamë baja cajena tajëvelia payapëtaneme bajaraxua yabara. Bajaraxuata panayajivitaema pibisiacuene pexanaevi penajumetsënëtsilivaisi papecatsipaebiyanima. Tsipaji papecatsipaebilivaisita, pacajopaeyaexanaejitsipa Dioso panejumecovënëtsijavavecua.

¹⁸ Pacatojitsipatsi paneajamatabëcuenesaë tsavanapaenexa Dioso panejumecovënëtsijava Jesucristo papecaitaxutotsoniataexae. Panevajënaeyabelia payapëtaeponarenuu vajatuxanenë Jesucristo, ponë pacacapanepaejitsia pibisiacuene paneexanaeoneconivecua. Jesucristojavabelia daxitajivi jumai tsabiabi tsane: “¡Xamë Jesucristomë, bitso cajena ayajamatabëcuenenëmë!” jai tsabiabi tsane daxitamatacabijavabelianexa. Bajara itsi tsane.

Mapabaxutoje San Juan copiaya toyaquina Dioso pejumecovënëtsivijavabelia

Cristo vajanacajamatabëcuene asaëyaexanaenë yabara pelivaisi

1-2 Pacatoyaquinatsi Dioso pexënato pelivaisi. Bajaraponë athëbëtatsia ponapona baja cajena pepo bajayatami ata, itsa abaxë Dioso apo exanae mapanacuaje. Nexata bajaraponë patsica mapanacuayabetsicaje. Bajaraponë itsa patsica mapanacuayabetsicaje, naexana pacuenia vaxaitsi baexanatsi. Nexata abaxë itsa ponapona mapanacuataje, bajaraponë patanetsipae-bilivaisianë pajumetaniji. Bajaraponë pataniji baja cajena pataitaxutota. Pajayabajënuua patacobeta. Nexata bajaraponë pelivaisi pacatsipaebatsi. Bajaraponë matakabi apo pevereverecaajava pexainaenë. Paxa Dioso yavapona.

3 Pacatojitsipatsi paxamë ata paneyajavajinavanapaenexa Dioso. Pacatojitsipatsi Dioso pexënato, Jesucristo, ata paneyajavajinavanapaenexa. Bajaraxuata pacuenia pataniji, pacuenia ata pajumetaniji bajaraponë patanetsipae-bilivaisianë, juya paxamëjavabelia pacatsipaebaponatsi.

4 Nexata pacuenia pataniji, pacuenia ata pajumetaniji bajaraponë patanetsipae-bilivaisianë, pacatoyaquinatsi mapabaxutotaje paxamë ata paneyapëtaenexa, bitso panesivajamatabëcuenebarëyanexa Jesús.

Dioso pejumelivaisita vajanacajamatabëcueneitayotsinë yabara pelivaisi

5 Palivaisianë rabaja Jesucristo panetsipaeba, bajara mapalivaisianëje juya paxamëjavabelia pacatoyaquinatsije. Dioso raja pejumelivaisita vajanacajamatabëcueneitayotsinë. Dioso raja apo pijamatabëcueneitaquirinë.

6 Bajaraxuata vaxaitsi jumaitsi atatsi: “Dioso raja vaxaitsi yajavajinavanapatsi,” jai atatsi, itsiata pibisiacuene itsa exanavanapatsi, nexata najamatabëcuenecepaebatsi. Najumetsënëtatsi saya Dioso vajayajavajinavanapaajava. Najumetsënëtatsinua pexaniacuene vajaexanaejava ata.

7 Itsiata vaxaitsi xaniavaetsia itsa jumecovënëtanapaenatsi Dioso pejumelivaisi pacuenia Dioso ata pijacuata bajarapalivaisi najumecovënëtaaponapona, nexata vaxaitsi ata mapanacuata xaniavaetsia najamatabëcuenejëpaeya najuajinavanapaenatsi. Bajarapacuenia vaxaitsi itsa jinavanapaenatsi, nexata Jesucristo, Dioso pexënato, vajanacasivatëpaexae, nacavecuajibiaexanaena daxita vajapibisijamatabëcuenemi.

8 Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena aneconijibitsi. Tspaji pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Pexaniajailivaisi, Dioso pejumelivaisi, apo nacatsijamatabëcaae.

9 Dioso baja cajena nacayavenonabiaba pacuenia najumecapanepaeya nacajumaitsi. Dioso pexanepanaecuene exanabiabanua. Bajaraxuata pibisiacuene vajaexanaejavami, itsa navajunupaebatsi Diosojavabelia, nexata Dioso nacavecuajibiaexana pibisiacuene vajaexanaeiconimi. Nacavecuajibiaexananua daxita pibisijamatabëcuene vajaxanaejavami.

10 Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena caeto ata pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Dioso pejumelivaisi ata apo nacatsijamatabëcaae. Bajarapacuenia itsa jumaitsitsi, nexata Dioso tanetsi bepe-najumetsënëtsinë. Tspaji Dioso pejumelivaisisibaxutota jumaitsi pacuenia daxitatsi pibisiacuene évajaexanaevi.

2

Cristo vajanacatocuaicuaijainë Diosojavabelia yabara pelivaisi

¹ Tajamonae, pacatoyaquinatsi mapalivaisije patacamuxujjobinexa pibisiacuene paneexanaeyaniva. Itsiata baitsi jane cajena itsajivi pibisiacuene itsa exana, xainatsi Jesucristo, vajanacayavenonaenë, vajanacatocuaicuaijainë Diosojavabelia. Bajaraponë cajena caeto ata pibisiacuene apo pexanaenë.

² Jesucristo vajanacasivatëpaexae, nacavecuaajibiaexana baja daxita pibisiacuene vajaexanaeneconimi. Itsiata ëvaxaitsi apo nacasivatëpae. Daxita mapanacuapijivije pibisiacuene pexanaeneconi pevecuaajibiaexanaenexa, Jesucristo sivatëpa.

³ ¿Detsa pacuenia nayapëtanetsi Dioso pijajivitsi? Itsa exanavanapatsi pacuenia Dioso nacaitoroba, nayapëtanetsi Dioso pijajivitsi.

⁴ Itsajivi jumaitsi ata: “Xanë raja cajena Dioso yapëtaniji,” jai ata, itsiata itsa apo jumecovënëtsi pacuenia Dioso itorobatsi, bajarapajivi saya najumetsënëta. Pexaniajailivaisi cajena, Dioso pejumelivaisi, apo tsijamatabëcaetsi.

⁵ Pajivi exanaponapona Dioso pitorobicueniatsi, bajarapajivi pepacuene jumecovënëta Dioso bajarapajivi bitso pejitsipaexae Dioso. Bajarapacuenia vaxaitsi ata itsa jumecovënëtavapanatsi Dioso, nexata nayapëtaevanapaenatsi vajayajavajinavanapajava Dioso.

⁶ Pajivi jumaitsi: “Xanë rabaja Dioso yajavaponaponajë,” jai, bajarapajivi xaniavaetsia beponapona pibisiacuene exanaenejeva. Pacuenia Jesús ponapona, bajarapacuenia bajarapajivi beponapona.

Palivaisi baja bajayata jivi jumecovënëta, bajarapalivaisi icatsia bepejanalivaisicuenia jivi pejumecovënëtsinexa, yabara pelivaisi

⁷ Tajamonae, pacatoyaquinatsi mapalivaisije panejumecovënëtsinexa. Apo pejanalivaisi ra picani. Itsiata baitsi jane palivaisi baja copiaya bajayata pajumetaneme, pamatacabi ajena pajumecovënëtame Jesús pelivaisi, bajarapalivaisi jumejëpa.

⁸ Nexata mapalivaisije pacatoyaquinatsi pejanalivaisicuenia panejumecovënëtsinexa. Mapalivaisije pexaniajailivaisi cajena. Cristo cajena pijacuata bajarapalivaisi natoexanaponapona. Paxamë ata baja pajumecovënëtavapanape bajarapalivaisi. Nexata mapanacuapijijamatabëcuenemije, pitaquirijamatabëcuenemi, pacavecuaajibi baja tsaponae. Tspaji bajarapalivaisita Jesucristo nacajamatabëcueneyatopona.

⁹ Itsajivi jumaitsi ata: “Xanë raja Dioso pitorobicuenia exanaponaponajë,” jai ata, itsiata itsa itoya itsajivi Dioso penajuajumecovënëtsivi, nexata bajarapajivi abaxë tsiteca ajamatabëcueneyatopona.

¹⁰ Pajivi bitso asiva itsajivi ata, Dioso penajuajumecovënëtsivi, bajarapajivi Dioso jamatabëcueneyatotsi. Nexata bajarapajivi apo caëjëpaetsi itsacuenejavayo ata pibisiacuene itsajivi pexanaeyaexanaenexatsi.

¹¹ Pajivi itoya itsamonae ata Dioso penajuajumecovënëtsivi, bajarapajivi abaxë tsiteca ajamatabëcueneyatopona. Apo yapëtae pibisiacuene pexanaejava. Apo yapëtaenua itsabelia caponaejitsiatsi pibisiacuene pexanaeneconi yabara. Bajara jamatabëcueneyatsi tspaji pevajënaeyabelia dovathi yaajamatabëcueneyatopona exanaponatsi pijamatabëcueneyatopona.

¹² Tajamonae, pacatoyaquinatsi mapalivaisije. Tspaji baja Dioso pacavecuaajibiaexana pibisiacuene paneexanaeneconimi Jesucristo papecasivatëpaexae.

13 Patavajënaepijivimë, pacatoyaquinatsi mapalivaisije. Tsipaji baja payapëtaneme Jesucristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, pacatoyaquinatsi mapalivaisije. Tsipaji baja dovathi pajamatabëcueneamoneyabame.

Bepataxicueniamë patacataevi, imata baja cajena itsabaxuto pacatoyaquinatsi. Tsipaji baja vaxa Dioso payapëtaneme.

14 Patavajënaeyapijivimë, imata baja cajena itsabaxuto pacatoyaquinatsi. Tsipaji baja payapëtaneme Jesucristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, imata baja cajena itsabaxuto pacatoyaquinatsi. Tsipaji baja pajamatabëcuenesaëmë Dioso panejumecovënëtsijava. Pacatsijamatabëeca baja Dioso pejumelivaisi. Nexata baja dovathi pajamatabëcueneamoneyabame.

15 Pëtsa pajitsipame mapanacuapijicueneje. Pëtsa pajitsipame mapanacuapijipibisiacuene ataje. Itsa pajitsipaejitsipame mapanacuapijipibisiacueneje, nexata apo pajitsipaemë tsipae Dioso.

16 Pajamatabëcuene jivi jitsipaeyaexanabiabatsi pibisiacuene pexanaenexa, bajarapajamatabëcuene apo pitsapae Diosojavaverena. Bajarapajamatabëcuene pitsapa mapanacuataje. Pajamatabëcuene ata jivi najamatabëxainaeaexanabiabatsi penaxainaeabinexa xua itajitsipa, bajarapajamatabëcuene ata pitsapa mapanacuataje. Pajamatabëcuene ata jivi najamatabëxainaeaexanabiabatsi beayaijamatabëcuenevi penataenexa, bajarapajamatabëcuene ata pitsapa mapanacuataje. Daxita bajarapajamatabëcuene pitsapa mapanacuataje. Bajarapajamatabëcuene apo pitsapae vaxa Diosojavaverena.

17 Imoxoyo rabaja pevajënae tsaponae pevereverecaenexa mapanacuaje. Nexata daxita pajamatabëcuene jivi jitsipaeyaexanabiabatsi pibisiacuene pexanaenexa, yajavavereverecaena mapanacuaje. Itsiata baitsi jane pamonaexanavanapa Dioso pitorobicueniatsi, jinavanapaena daxitamatacabijavabelianexa.

Pexaniajailivaisi, penajumetsënëtsilivaisi ata, yabara pelivaisi

18 Tajamonae, imoxoyo rabaja pevajënae tsaponae pevereverecaenexa mapanacuaje. Pavënëlivaisitaneme rabaja pacuenia najetarucaejitsia ponë cueneitoyatsi Cristo. Pata rabaja cajena ayalbitsaëto, pamonaex Cristo cueneitoyatsi. Bajarapamonae pepatsixae, yapëtanetsi imoxoyo baja pevajënae tsaponae pevereverecaenexa mapanacuaje.

19 Pamonaex Cristo cueneitoyatsi, bajarapamonae vaxaitsiyajuvënëvimi picani. Itsiata baja nacavecuapitsapa. Bajarapamonae pepacuene apo vaxaitsiyajuvënëvi cajena. Itsa peneta bajarapamonae vaxaitsiyajuvënëvi tsipae, nexata tsitecaeya najinavanapaejitsipa vaxaitsita. Bajaraxuata bajarapamonae nacavecuapona baja. Nexata daxitajivi xaniavaetsia yapëtanë bajarapamonae pepacuene Dioso apo pejumecovënëtsivicuene.

20 Cristo rabaja acarajuta Espiritu Santo. Bajaraxuata daxita paxamë payapëtaneme baja pexaniajailivaisi, Dioso pejumelivaisi.

21 Pacatoyaquinatsi mapabaxutoje tsipaji baja payapëtaneme pexaniajailivaisicuene Jesús pelivaisi. Nexata apo pacatoyaquinaetsi matapania patacayapëtaeyaexanaenexa pexaniajailivaisicuene Jesús pelivaisi. Tsipaji baja bajaya payapëtaneme bajarapalivaisi pexaniajailivaisicuene. Payapëtanemenua baja Jesús pelivaisijavaverena acuenebi pepitsapaejava

penajumetsënëtsilivaisi. Tsipaji pexaniajailivaisijavaverena acuenebi pepitsapaajava penajumetsënëtsilivaisi.

²² ¿De jane peneta jumaitsi pepo penajumetsënëtsijivi? Pajivi peneta pepo penajumetsënëtsijivi, jumaitsi mapacueniaje: “Jesús raja apo Cristo, ponë Dioso athëbëvetsica itorobijitsiatsica vajanacacapanepaenexa,” jai. Bajara peneta pejumaitisijivi, pepo penajumetsënëtsijivi jane baja. Bajarapajivi Cristo pijavajabitsaëjivi. Bajarapajivi apo jumecovënëtsi Dioso. Apo jumecovënëtsinua Dioso pexënato ata.

²³ Pajivi peneta jumaitsi: “Jesús raja Dioso apo pexënato,” jai, bajarapajivi Dioso apo yajavaponaponae. Pajivi pijinia peneta jumaitsi: “Jesús raja Dioso pexënato,” jai, bajara jane pajivi Dioso yajavaponaponatsi.

²⁴ Bajaraxuata paxamë baja palivaisi pajumetaneme panejumecovënëtsijavaverenacujinae, panevajënaeyabelia tsiteca pacajinavanapare. Bajarapalivaisi tsiteca itsa pacatsijamatabëecaena, nexata panevajënaeyabelia payajavajinavanapaename Dioso. Payajavajinavanapaenamenua Dioso pexënato ata, Cristo.

²⁵ Jesucristo rabaja najumecapanepaeya jumaitsi vajanacarajutsinexa matabi apo pevereveceajava.

²⁶ Pacatoyaquinatsi mapabaxutoje patacayapëtaeyaexanaenexa panenayajivitaenexa pamonaë jamatabëpacayamaxëitojoroba.

²⁷ Paxamë rabaja Espiritu Santo pacatsijamatabëeca, ponë pacarajuta Jesucristo. Bajaraxuata apo panamatavenonaemë baja itsajivi ata papedatsipaebinexa paneyapëtaenexa daxitacuene. Tsipaji baja daxita xua Espiritu Santo pacayapëtaeyaexanapona, pexaniajaicuene baja cajena. Penajumetsënëtsicuene baja cajena Espiritu Santo apo pacayapëtaeyaexanapona. Pacuenia Espiritu Santo pacayapëtaeyaexanapona, bajarapacuenia pajumecovënëtaponare panevajënaeyabelia paneyajavajinavanapaenexa Cristo.

²⁸ Tajamonae, ajamatabëcuenesaëya yajavajinavanapaenatsi Cristo. Bajarapacuenia yajavajinavanapaenatsi vajacujunaviyaniva pamatacabi bajaraponë patsianica. Nexata apo aura tsanetsi bajaraponëjavabelia pamatacabi patsianica.

²⁹ Paxamë rabaja payapëtaneme Jesucristo, Dioso pexënatoxae, pexaniacuene pexanabiabijava. Nexata bepapapëtaneme mapacuenieje. Pamonaë peneta pexaniacuene exana, bajarapamonae Dioso pexi.

3

Dioso pexi yabara pelivaisi

¹ Pacanaëjëre vaxa Dioso vajanacaasivacuene. Nacaasiva bitso. Bajaraxuata Dioso pexicueniatsi nacatane. Xaniajai rabaja. Dioso pexitsi. Mapanacuapijivije Dioso apo peyapëtaexae, nexata bajarapamonae vaxaitsi ata apo nacayapëtae Dioso pexicuenetsi.

² Tajamonae bitso patacaasivavi, aeconoxae rabaja vaxaitsi daxitatsi Dioso pexitsi. Apo yapëtaetsi abaxë pacuenia itsamatacabi vaxaitsi cueneitsijitsiatsi. Itsiata Cristo itsamatacabi itsa patsianica, vaxaitsi cuenetaenatsi Cristo pacuenia cueneitsi. Nexata vaxaitsi itsa cuenetaenatsi Cristo, cuenejëpaenatsi. Tsipaji cuenetaenatsi pacuenia Cristo cueneitsi.

³ Cristo pibisiacuene apo pexanaenë caeto ata. Bajaraxuata daxita pamonaë copiaevetavanapa Cristo pepatsijavanexatsica, pevajënaë tonajamatabëcuene xaniavaetavanapaena. Pibisiacuene apo exanavanapae tsane.

⁴ Pajivi pibisiacuene exana, apo jumečovënëtsi palivaisi Dioso najumecopata jivi pejumecovënëtsinexa. Pibisiacuene itsa exana, nexata Dioso pitavetsijava exana.

⁵ Payapëtaneme rabaja mapacueneje. Cristo patsica mapanacuayabetsicaje vajanacavecuajibiaexanaenexa pibisiacuene vajaexanaeconomy. Cristo baja cajena caeto ata pibisiacuene apo pexanaenë.

⁶ Bajaraxuata pajivi baja Cristo yajavaponapona, pibisiacuene apo exanaponapona. Pajivi tsiteca pevajënaeyabelia pibisiacuene exanaponapona, bajarapajivi apo tae baja cajena Cristo. Apo yapëtaenua cajena.

⁷ Tajamona, pëtsa panacopatame itsajivi ata papeyamaxëitojorobinexa. Pajivi exanabiaba pexaniacuene, Dioso pejitsipaecuene, bajarapajivi Dioso aneconijibia tanetsi. Pacuenia Cristo jamatabëcueneitsi, bajarajamatabëcueneitsi bajarapajivi.

⁸ Pajivi tsiteca pevajënaeyabelia pibisiacuene exanaponapona, bajarapajivi dovathi pijajivitonë tsaponapona. Dovathi pibisiacuene pexanaecujinae, apo copatsi. Tsiteca pevajënaeyabelia pibisiacuene exanaponapona mapanacuataje. Bajaraxuata Dioso pexë nato patsica mapanacuayabetsicaje daxitajivi dovathi pejamatabëcueneta pibisiacuene pexanabiabijavami piajibiaexanaenexa.

⁹ Pajivi baja Dioso pexijivi exanatsi, bajarapajivi baja pibisiacuene apo exanaponapona. Tsipaji baja Dioso najamatabëcuenerajutatsi. Bajarapajivi baja copata pibisiacuene pexanabiabijava. Tsipaji baja Dioso pexijivi exanatsi.

¹⁰ Bajarapacuenia xaniavaetsia yapëtanetsi pajivi Dioso pexijivi exanatsi. Pajivi pijinia dovathi pexijivi exanatsi, yapëtanetsi. Tsipaji pajivi Dioso pexijivi apo exanaetsi, pexaniacuene apo exanae. Apo asivanua itsamonae ata.

Pacuenia vaxaitsi namataenetsia benaasivatsi tsavanapae yabara pelivaisi

¹¹ Dioso baja cajena panejumecovënëtsijavaveliacujinae, pajumetaeyabiabame pejumaitsilivaisi mapacueniaje: “Vaxaitsi namataenetsia benaasivatsi tsavanapae,” pejailivaisi.

¹² Vaxaitsi nexata apo bitoyatsi itsamonae ata. Pacuenia bajayatami Caïnpijinë itoya pejuyapijinëmi, bajara apo bitsitsi vaxaitsi. Caïnpijinë dovathi pijajivitonë tsaponapona. Nexata beyaxuaba pejuyapijinëmi. Pacatsipaebijitsiatsi pacuene yabara Caïnpijinë beyaxuaba pejuyapijinëmi. Caïnpijinë dovathi pitorobicueniatsi, pibisiacuene exanaponapona. Pejuyapijinëmi pijinia pexaniacuene, Dioso pitorobicueniatsi, exanaponapona. Bajaraxuata Caïnpijinë beyaxuaba pejuyapijinëmi.

¹³ Tajamona, pëtsa pajamatabëcuenenabenajacame paxamë ata itsa pacaitoya mapanacuapijivije.

¹⁴ Vaxaitsi picani bajayata Dioso pitabarata jamatabëcuenetëpavanapatsi. Itsiata baja aeconoxae Dioso nacajamatabëcueneasaëyaexana vajanajamatabëcuenecopatsixae bajaraponëjavabelia. Yapëtanetsi baja cajena Dioso vajanacajamatabëcuene asaëyaexanaejava. Tsipaji itsamonae ata Dioso vajanajuajumecovënëtsivi, asivatsi tsavanapae. Pajivi apo asiva itsamonae ata, Dioso penajuajumecovënëtsivi ata, bajarapajivi Dioso pitabarata jamatabëcuenetëpaponapona.

¹⁵ Pajivi itoya itsajivi, Dioso penajuajumecovënëtsivi ata, bajarapajivi jamatabëcuenejëpaponapona jivibenë. Paxamë rabaja payapëtaneme mapacueje. Jivibenë baja cajena apo xainae tsane matabi apo pevereverecajava.

¹⁶ Yapëtanetsi baja cajena mapacueje. Jesucristo vajanacaasivaxae, nacopata pebeyaxuabinexatsi vajaneconi yabara. Nexata vaxaitsi ata vajaasivaxae Dioso vajanajuajumecovënëtsivi, bejamatabëjumaitstsitsi mapacueniaje: “Itsamonae nebeyaxuabijitsia ata tsane, yavenonaenajë Dioso patanajuajumecovënëtsivi,” bejamatabëjaitsi.

¹⁷ Ponë Dioso pejumecovënëtsinë, bitso pexainaenë pexinaejava, tae ata itsanë pijinia Dioso pejumecovënëtsinë penamatavenonaejava, itsiata itsa apo yavenonae, nexata acuenebi pejumaitsjiva: “Xanë bitso Dioso jitsipajë jamatabëëthëtojavavetsina,” pejaljava.

¹⁸ Tajamonae, “Asivanë raja itsamonae ata,” apo bejaitsi saya vajacuibovojotota pexaniacue ne toexanaenejevatsi bajarapamonaejavabelia. Biji rajane bajarapamonae vajanacayapëtaenexa pepacue vajaasivajava, pexaniacue betoexanatsi. Beyavenonatsi bitso penamatavenonaejavata.

Pacuenia apo auratsi Dioso pitabarata yabara pelivaisi

¹⁹ Daxitatsi vaxaitsi itsa asivatsi tsavanapae tsane itsamonae ata, Dioso vajanajuajumecovënëtsivi, nexata nayapëtaenatsi Dioso pexicuenetsi. Ajunavijibianua jinavanapenatsi Dioso pitabarata. Dioso baja cajena pexani-ajailivaisi jivijavabelia petsipaebinë.

²⁰ Dioso baja cajena bitso ayajamatabëcueneenë. Dioso peyapëtaenë daxitacue. Bajaraxuata vaxaitsi jamatabëjumaitsi atatsi: “Xanë bitso jamatabëcuenebejenë pibisiacue taexanaejava yabara,” jamatabëjai atatsi, itsiata xainatsi Dioso vajanacayavenonaenë. Dioso vajanacaitaxutotsoniatanë. Tsiteca nacaasiva. Nacaevetana.

²¹ Tajamonae bitso patacaasivavi, vajajamatabëëthëtota itsacueneneconi itsa apo xainaetsi, nexata apo auratsi Diosojavabelia vajavajëtsinexa. Jamatejematsi Dioso pitabarata.

²² Dioso nacarajutsiana daxita xua vajëtsianatsi Diosojavabelia. Bajarpacuenia Dioso nacarajutsiana tsipaji Dioso jumecovënëtavapanatsi pacuenia nacaitoroba. Pacue yabara Dioso sivajamatabëcuenebarëya, bajarapacue ata vaxaitsi exanavanapatsinua.

²³ Dioso raja nacaitoroba vajajamatabëjumaitsinexa mapacueje: “Jesús baja patsica, ponë copiaevetavanapatsi vajanacacapanepaenexa. Bajaronë Dioso baja cajena pexënat,” vajajamatabëjainexa. Nacaitorobanua namataenetsia vajanaasivatsavanapaenexa.

²⁴ Pajivi jumecovënëta Dioso pitorobilivaisi, bajarapajivi Dioso yajavaponaponaena. Bajarapajivi ata pijinia Dioso yajavaponaponaenatsi. Yapëtanetsi pepacue Dioso vajanacayajavaponaponaejava. Tsipaji Espiritu Santo, ponë Dioso nacarajuta, bajaraponë nacayapëtaeyaexana pepacue Dioso vajanacayajavaponaponaejava.

4

Espiritu Santo yabara, Cristo pijavajabitsaë ata, yabara pelivaisi

¹ Tajamonae bitso patacaasivavi, itsamonae itsa pacajumi tsane mapacueniaje: “Espiritu Santo raja, ponë netsijamatabëca, netsipaeba. Nexata juya bajarapalivaisi pacatsipaebatsi,” itsa pacajai tsane, pëtsa abaxë caecuenia pajumecovënëta. Copiaya abaxë pajamatabëcuenejëbianame

paneyapëtaenexa itsa xaniajai bajarapamonae Espiritu Santo petsipaebilivaisitsi pacatsipaebiana. Bajarapacuenia pajamatabëcueneëjëbianame tsipaji raja daxitajava mapanacuajavaje yacaëjëpa penajumetsënëtsilivaisi petsipaebanajetarubenaevi. Bajarapamonae penajumetsënëtsilivaisi daxitajivijava tsipaebanajetarubena. BeDioso itajara pejumelivaisi petsipaebivicuena, tsipaebanajetarubena.

² Nexata bajarapacuenia copiaya itsa pajamatabëcueneëjëbianame, payapëtaename pamonae tsijamatabëcatsi Espiritu Santo. Pamonae raja peneta pepacuene Espiritu Santo tsijamatabëcatsi, jumaisi mapacueniaije: “Jesucristo itsa patsica mapanacuayabetsicaje, naexana pacuenia vaxaitsi baexanatsi mapanacuataje,” jai peneta pamonae pepacuene Espiritu Santo tsijamatabëcatsi.

³ Pamonae peneta jumaisi mapacueniaije: “Jesucristo raja Dioso apo pexënato,” jai, bajarapamonae cajena apo tsijamatabëcaetsi Espiritu Santo. Bajarapamonae tsijamatabëcatsi ponë cueneitoyatsi Cristo. Ponë baja pavënëlivaisitaneme pepatsijavanexa, ponë Cristo cueneitoyatsi, bajaraponë pata baja. Ponapona rabaja mapanacuajavaje.

⁴ Tajamonae, paxamë rabaja Dioso papijajivimë. Nexata baja penajumetsënëtsilivaisi papecatsipaebivi, apo pacayamaxëitojorobicapanepae. Apo caëjëpaetsi papecayamaxëitojorobijava. Tsipaji ponë pacatsijamatabëca, bajaraponë bitso piasaënë, ponë ponapona mapanacuajavaje, matatoxenetsia.

⁵ Pamonae tsipaebapona penajumetsënëtsilivaisi, bajarapamonae saya Dioso apo peyapëtaevi. Bajaraxuata mapanacuapijicuene cacuaicuaijai. Nexata pamonae bitso jitsipa maëpanacuapijicueneje, namuxunaevetabiatatsi.

⁶ Vaxaitsi raja Dioso pijajivitsi. Pajivi yapëtane Dioso, vaxaitsi ata nacanamuxunaeveta. Pajivi Dioso apo jitsipae, vaxaitsi ata apo nacanamuxunaevetsi. Nexata bajarapacuenia nayapëtane pajivi tsijamatabëcatsi Espiritu Santo. Espiritu Santo baja cajena jivi pexaniajailivaisi petsipaebinë. Bajara pijinia pacuenia nayapëtane pajivi ata tsijamatabëcatsi dovathi. Dovathi baja cajena penajumetsënëtsilivaisi jivi petsipaebinë.

Dioso vajanacaasivanë yabara pelivaisi

⁷ Tajamonae bitso patacaasivavi, daxitatsi namataenetsia benaasivatsi tsavanapae. Tsipaji Diosojavaverena pitsapa vajanacaasivajamatabëcuene. Pajivi peneta asiva Dioso penajuajumecovënëtsivi, bajarapajivi Dioso pexijivi. Bajarapajivi yapëtane Dioso.

⁸ Pajivi apo asiva itsamonae ata, bajarapajivi apo yapëtae Dioso. Tsipaji baja cajena Dioso bitso asiva daxitajivi.

⁹ Dioso raja vajanacaasivajava, nacayapëtaeyaexana mapacueniaije. Dioso athëbëvetsica nacatoitorobica pepo caenë pexënato mapanacuayabetsicaje. Bajarapacuenia Dioso pexënato nacatoitorobica matababi apo peverevere-caejava vajaxainaenexa pexënato vajanacasivatëpaexae.

¹⁰ Bajarajamatabëcueneitsi Dioso bitso vajanacaasivajava. Vaxaitsi rajane bevelia Dioso jitsipatsi. Dioso ra picani bitso vaxaitsi nacajitsipa. Bajaraxuata Dioso nacatoitorobica pexënato cruzata vajanacasivatëpaenexa. Nexata Jesús vajanacasivatëpaexae, Dioso baja nacavecuaajibiaexana daxita pibisiacuene vajaexanaeconimi.

¹¹ Tajamonae bitso patacaasivavi, itsa Dioso bajarapacuenia bitso nacaasiva, nexata vaxaitsi ata daxitatsi namataenetsia benaasivatsi tsavanapae.

¹² Itsajivi ata cajena abaxë Dioso apo tae. Itsiata bailsi jane vaxaitsi namataenetsia itsa nasivatsi, Dioso baja nacayjavaponapona.

Dioso vajanacatojitsipaecuenia itsamonae ata vajaasivanexa, Dioso nacajamatabëcueneasaëyaexanapona.

¹³ Vaxaitsi yajavajinavanapatsi Dioso. Bajara pijinia pacuenia Dioso ata nacayajavaponapona. Yapëtanetsi pexaniajaicue Dioso vajanacaya-javaponaponeajava. Tspaji baja Dioso nacarajuta Espiritu Santo.

¹⁴ Vaxaitsi baja cajena tanetsi Dioso pexënat. Nexata vaxaitsi tsipaebabi-abatsi itsamonaejavabelia Dioso pexënat pitorobijavatsica mapanacuaya-betsicaje pecapanepaenexa daxita mapanacuapijivije.

¹⁵ Pajivi jumaitsi mapacueniaje: “Jesús raja Dioso pexënat,” jai, bajara-pajivi Dioso yajavaponapona. Bajarapajivi pijinia Dioso ata yajavapon-aponatsi.

¹⁶ Nexata vaxaitsi jamatabëcueneyapëtanetsi pacuenia bitso Dioso nacaasiva. Dioso cajena piasivanë daxitanacuapijivi. Pamonae itsamonae ata namataenetsia naasiva tsavanapae, bajarapamonae Dioso yajavaponapona. Bajarapamonae ata pijinia Dioso yajavajinavanapa.

¹⁷ Nexata pacuenia Dioso nacatojitsipa itsamonae ata vajanasivatsavana-paenexa, bajarapacuenia itsamonae ata asivatsi tsavanapae tsane. Nexata pamatacabi Dioso naneconitsiaexanaponaena daxita pibisiacue pexanaevi, bajarapamatacabi vaxaitsi Dioso pitabarata apo junavitsi tsane. Apo junavitsi tsane Dioso pitabarata tspaji baja mapanacuataje vaxaitsi asivatsi tsavanapae tsane itsamonae ata pacuenia Cristo daxitatsi nacaasiva.

¹⁸ Itsa yapëtanetsi Dioso vajanacaasivajava, apo cujunavitsi itsacuenajava ata. Tspaji Dioso itsa nacaasiva, nacavecuajaibiaexana vajajunavijavami. Pajivi Diosojavabelia naneconita, yapëtan Dioso penaneconitsiaexanae-javanexatsi. Bajaraxuata daxitacue cujunava. Pajivi cujunava daxitacue, abaxë xaniavaetsia apo yapëtae pacuenia Dioso asivatsi. Bajaraxuata cujunava.

¹⁹ Vaxaitsi Dioso asivatsi tspaji Dioso copiaya nacaasiva.

²⁰ Pajivi jumaitsi ata mapacueniaje: “Xanë raja Dioso asivanë,” jai ata, itsi-ata itsa itoya itsajivi Dioso pejumecovënëtsijivi ata, nexata saya bajarapajivi penajumetsënëtsijivi. Bajarapajivi itsa apo asiva itsajivi ata, petaeyabiabijivi ata, nexata biji bitsoyo bajarapajivi apo asiva Dioso. Tspaji biji cajena caeto ata apo tae Dioso.

²¹ Pajivi asiva Dioso, bajarapajivi biasiva itsajivi ata, Dioso penajua-jumecovënëtsijivi. Tspaji baja cajena Cristo nacaitoroba vajaasivanexa itsamonae ata.

5

Pacuenia vaxaitsi mapanacuataje dovathi jamatabëcueneamoneyabatsi yabara pelivaisi

¹ Pajivi jumecovënëta: “Jesús raja Cristo, ponë Dioso athëbëvetsica itorobi-jitsiatsica vajanacapanepaenexa,” pejaillivaisi, bajarapajivi Dioso pexijivi exanatsi. Pajivi asiva itsajivi ata, caejivi apo biasiva. Nexata bajarapajivi daxita pexi beyajavaasiva.

² Bajara pijinia pacuenia vaxaitsi ata bexanatsi itsa asivatsi Dioso. Itsa jumecovënëtsi pacuenia Dioso nacaitoroba, nexata beyajavaasivatsi itsamonae ata, Dioso vajanajuajumecovënëtsivi. Tspaji bajarapamonae Dioso peji exanatsi.

³ Vaxaitsi itsa asivatsi Dioso, nexata pacuenia Dioso nacaitoroba, jumecovënëtsi. Pacuenia Dioso nacaitorobapona vajatosexanaenexa, apo nacat-sitaayapëbeje.

4 Apo nacatsitaayapëbeje tsipaji baja Dioso pexitsi. Nexata caejiv-itsi canacujitsia Dioso nacacaëjëpaeyaexanapona vajaexanaenexa pacuenia Dioso nacaitorobapona. Najamatabëcueneocopatatsi baja Cristojavabelia vajanacayavenonaenexa mapanacuapijijamatabëcuenevecuaje. Nexata bajarapacuenia mapanacuataje dovathi jamatabëcueneamoneyabaponatsi.

5 Pajivi jumecovënëta Jesús Dioso pexënatocuene, bajarapajivi caëjëpatsi dovathi pejamatabëcueneamoneyabinexa.

Pacuenia yapëtanetsi Jesús pepacuene Dioso pexënatocuene yabara pelivaisi

6 Jesucristo baja cajena athëbëvetsica pepatsinë. Yapëtanetsi Jesús pepacuene Dioso pexënatocuene. Tsipaji copiaya bautisabatsi merata. Bajaraxuacujinae cruzata beyaxuabatsi. Nexata saya Jesús ëpebautisabicujinaetsi apo ponaponae. Biji rajane copiaya bautisabatsi. Bajaraxuacujinae cruzata beyaxuabatsi. Espiritu Santo ata nacayapëtaeyaexana Jesucristo pepacuene Dioso pexënatocuene. Espiritu Santo baja cajena pexaniajainë. Nexata Espiritu Santo vajanacayapëtaeyaexanaejava, Jesús Dioso pexënatocuene, bejumecovënëtatsi.

7 Athëbëtatsia jinavanapa acueyabi ponëbeje, penajamatabëcuenejëpaevi, pevajunupaebivi Jesucristo Dioso pexënatocuene. Pamonaë jinavanapa athëbëtatsia, mapamonaëje: Dioso, Jesucristo, Espiritu Santo. Bajarapamonaë acueyabi ponëbeje, penajamatabëcuenejëpaevi, caenë rabaja picani tsaponaponae.

8 Mapanacuata ataje acueyabi xuabeje pejamatabëcueneta yapëtanetsi Jesucristo pepacuene Dioso pexënatocuene. Yapëtanetsi Espiritu Santo pejamatabëcueneta. Yapëtanetsinua Jesús pebautisabijavatsi ata pejamatabëcueneta. Yapëtanetsinua Jesús cruzata pebeyaxuabijavatsi ata pejamatabëcueneta. Bajarapaacueyabi xuabeje pejamatabëcueneta yapëtanetsi Jesucristo pepacuene Dioso pexënatocuene.

9 Dioso baja cajena nacayapëtaeyaexana Jesús Dioso pexënatocuene. Mapanacuapijivi ata, itsa nacatsipaeba itsacuenelivaisiyo, nexata jumecovënëtabiabatsi pacuenia nacatsipaebabiaba. Itsiata baitsi janë Dioso itsa nacatsipaeba, bejumecovënëtatsi xaniavaetsia pacuenia nacatsipaeba. Tsipaji Dioso bitso pejumenamamotsinë. Bitso pexaniajainë.

10 Pajivi jumecovënëta Jesús Dioso pexënatocuene, bajarapajivi pejamatabëëthëtota yapëtane bajarapalivaisi pexaniajailivaisicuene. Pajivi apo jumecovënëtsi Jesús Dioso pexënatocuene, bajarapajivi Dioso bepenajumetsënëtsinë tane. Tsipaji bajarapajivi Dioso peyapëtaeyaexanaejavatsi, apo jumecovënëtsi, Jesús Dioso pexënatocuene.

11 Dioso itsa nacayapëtaeyaexana Jesús Dioso pexënatocuene, nacayapëtaeyaexana mapalivaisije. Nacayapëtaeyaexana Dioso vajanacarajutsijavanexa matababi apo pevereverecejava. Nexata Dioso pexënatocuene pejamatabëcueneta xainaeatsi matababi apo pevereverecejava.

12 Pajivi yajavaponaponaena Dioso pexënatocuene, bajarapajivi xainaena matababi apo pevereverecejava. Pajivi apo yajavaponaponaë tsane Dioso pexënatocuene, bajarapajivi apo xinae tsane matababi apo pevereverecejava.

Pacuenia Juan muxujioba pecopatsivajënaë baja petoyaquinaelivaisi mapaxutotaje yabara pelivaisi

13 Pacatoyaquinatsi mapalivaisije panejumecovënëtsivi Dioso pexënatocuene. Pacatoyaquinatsi paneyapëtaenexa matababi apo pevereverecejava panexainaejavanexa.

¹⁴ Yapëtanetsi Dioso vajanacajumetaejava itsa vajëtatsi vajanacatojitsi-paecuenia. Bajaraxuata apo jumejunavitsi vajavajëtsinexa Diosojavabelia. Jamatejematsi Dioso pitabarata.

¹⁵ Yapëtanetsi Dioso vajanacajumetaejava itsa vajëtatsi. Nexata yapëtanetsi Dioso vajanacarajutsijavanexa xua vajëtatsi.

¹⁶ Dioso panenajujumecovënëtsivi itsa pataename pibisiacuene pexanaejava, patovajëtsianame Diosojavabelia, Dioso pejamatabëcuenexaniavaetsinexatsi pibisiacuene pexanaejivi. Bajarapacuenia Diosojavabelia patovajëtsianame itsa payapëtaename paneconi yabara abaxë Dioso apo vecuanaxuabijitsia. Itsajava raja jivi pibisiacuene itsa exana, bajarapaneconi yabara pepacuene jivi Diosovecua naxuabiana. Nexata baja itsa payapëtaename paneconi yabara pepacuene baja bajarapajivi Diosovecua naxuabijitsia, pëtsa patovajëtime Diosojavabelia. Bajarapitsineconi baja pexinaeavi panetovajëtsinexa Diosojavabelia, apo pacaitorobitsi.

¹⁷ Daxitacuene xua apo pexanepanaecuene jivi exana, pibisiacuene baja cajena. Itsiata baitsi janë bajarapapibisiacuene jivi pexanaejava itsa copabiana, nexata bajarapaneconi yabara itsiata jivi pepacuene Dioso apo vecuanaxuabi tsane.

¹⁸ Yapëtanetsi baja cajena mapacueneje. Pajivi Dioso pexijivi exanatsi, bajarapajivi copata baja pibisiacuene pexanaejava. Tsipaji baja Dioso pexë nato, Jesucristo, evetatsi bajarapajivi. Nexata dovathi apo itsacueni-abitsi.

¹⁹ Yapëtanetsi daxita vaxaitsi Dioso pexicuenetsi. Yapëtanetsinua itsamonae dovathi pitorobabiabijavatsi pibisiacuene pexanaenexa.

²⁰ Yapëtanetsinua baja Dioso pexë nato, Jesucristo, athëbëvetsica pepatsijavatsica. Patsica vajanacajamatabëcuene yapëtaeyaexanaenexa pepo Dioso. Vaxaitsi baja yajavajinavanapatsi Dioso. Tsipaji baja yajavajinavanapatsi Dioso pexë nato, Jesucristo. Bajaraponë ata pepo Dioso baja cajena, vajanacarajutsinënexa matakabi apo pevereverecaejava.

²¹ Tajamonae, panayajiviitavere papecatsipaebianiva palivaisi tsipae-bapona pamonaevajëcabiaba jumapecataeya pexanaenëanëjavabelia.

Mapabaxutoje San Juan cotocaevi toyaquina Dioso pejumecovënëtsivijavabelia

Pexaniajailivaisi yabara, jivi ata penaasivacuene, yabara pelivaisi

¹ Xanë ancianonënë, pacatoyaquinatsi mapabaxutoje Dioso pecaitapetsiva, nexi yajava. Xanë bitso pacaasivatsi. Itsamonae ata, pamonaе jume-covënëta Dioso pejumelivaisi, bajarapamonae ata pacaasiva.

² Bajarapacuenia pacaasivatsi tsipaji paxamë ata Dioso pejumelivaisi pajumecovënëtame. Bajarapalivaisi cajinavanapatsi vajajamatabëëthëtota daxitamatacabijavabelianexa.

³ Pacatovajëtabiabatsi Diosojavabelia, Jesucristo, Dioso pexënatojavabelia ata. Pacatovajëtabiabatsi papecayavenonabiabinexa, papecaitaxutotsonia taeyabiabinexanua. Pacatovajëtabiabatsinua jamatabëcuenexanepanaeya panejinavanapaenexa. Bajarapacuenia Dioso pacatoexanaena pexaniajailivaisi, Dioso pejumelivaisi, itsa pacajinavanapame, itsamonae ata asivaya itsa pajinavanapamenua.

⁴ Bitso sivajamatabëcuenearëyanë itsa caxitajarabaxuabajë nexiyajuvënëvi, pejumecovënëtavapanaeви pacuenia vaxa Dioso nacaitoroba.

⁵ Tajabanava, aeconoxae catsipaebatsi namataenetsia vajanasivanexa. Bajarapalivaisi apo pejanalivaisi picani. Bajayata palivaisi itsa copiaya jumetaneme Jesús pelivaisi, bajarapalivaisi jumejëpa.

⁶ Vaxaitsi itsa jitsipatsi Dioso, nexata pacuenia Dioso nacaitoroba, bejumecovënëtavapanapatsi. Bajarapalivaisi papecatsipaebijavaveliacujinae, pacaitoroba baja cajena namataenetsia panenasivatsavanapaenexa.

Penajumetsënëtsilivaisi daxitanacuanëjava petsipaebanajetarubenaevi yabara pelivaisi

⁷ Penajumetsënëtsilivaisi petsipaebanajetarubenaevi, ayaibitsaëto najetarubena daxitanacuanëjava. “Pacuenia vaxaitsi banaexanatsi, bajarapacuenia Jesucristo naexana mapanacuataje,” pejailivaisi, bajarapamonae apo pejumecovënëtsivi. Bajarapitsijamatabëcuenepexainaeви peymaxëitojorobivi baja cajena. Bajarapamonae Cristo pijavajabitsaë.

⁸ Panayajivitaevanapare papecavecuaxuabiyanima xua pasivanacuenebavanapame Dioso papecarajutsinexa. Bajarapacuenia panayajivitaevanapare Dioso papecarajutsinexa daxitajavayo panetonacuenebimatamo.

⁹ Pajivi tsiteca pevajënaeyabelia jumecovënëtaaponapona palivaisi Cristo tsipaebapona, bajarapajivi vaxa Dioso yajavaponaponatsi. Vaxa Dioso pexënato ata yajavaponaponatsi. Pajivi pijinia copata pejumecovënëtsiyava palivaisi Cristo tsipaebapona, bajarapajivi Dioso apo yajavaponaponatsi.

¹⁰ Nexata bajarapitsijivi itsa pona paxamëjavabelia livaisi papecatsipaebinxaxa, pëtsa pacajunuame panijaboyaberena. Pëtsa pabajacobamenua bajarapitsijivi.

¹¹ Pajivi bajacobijitsipa bajarapitsijivi, jamatabëcueneyavenonaеjitsipa pibisiacuene pexanaejava. Bajaraxuata pëtsa pabajacobame bajarapitsijivi.

Pacuenia Juan jumaitsi pecopiarutaponaelivaisita yabara pelivaisi

¹² Xanë picani xainajë ayailivaisi patacamuxujiobinexa. Itsiata abaxë apo jitsipænë bajarapalivaisi patacatoyaquinaenexa mapabax-utotaje. Evetajë abaxë taponaejava paxamëjavabelia patacataenexa, patacabarëcuaicuaajainexanua, vajajamatabëcuenebarëyanexa bitso.

¹³ Nejuyapijiva Dioso pitapetsivatsi pexi, catonajumeitoroba nebajacobinexa.

Mapabaxutoje, acueyabibaxuto, San Juan toyaquina Dioso pejumecovënëtsivijavabelia

Pacuenia Juan pexaniajamatabëcuenia tane Gayovënënë yabara pelivaisi

¹ Gayo bitso tacaasivanë. Xanë ancianonënë, catoyaquinatsi mapabaxutoje. Casivatsi bitso tsipaji xamë ata pexaniajailivaisi jumecovënëtime.

² Catovajëtabiabatsi Diosojavabelia. Catovajëtabiabatsi daxitacuenejavanë pecatoxanepanaenexa, jumalixanepanaeya neponaponaenexanua. Cavënëlivaisitanetsi rabaja Dioso pitabarata xaniavaetsia Dioso netoponaponaajava pibisiacuene exanaenejevamë.

³ Itsamonae Dioso pejumecovënëtsivi parena xanëjavaberena. Nexata bajarapamonae xanëjavaberena cavënëlivaisipaeba xaniavaetsia neponaponaajava. Netsipaeba xaniavaetsia asaëya nejumecovënëtaponaponaajava pexaniajailivaisi, Dioso pejumelivaisi. Nexata bitso casivajamatabëcuenegarëyatsi.

⁴ Pamonae tsipaebabiabajë Dioso pejumelivaisi, bajarapamonae taniji betaxicueniä. Nexata itsa vënëlivaisitaniji bajarapamonae Dioso pejumecovënëtavapanajava, nexata bitso sivajamatabëcuenegarëyanë tsabiabi. Itsacuenejava ata pematatsënëa bajarapacuenia apo nejamatabëcuenegarëyaxanae.

⁵ Xamë xaniavaetsia Dioso tonacuenebabiabame itsa yavenoname Dioso pejumecovënëtsivi. Bajarapamonae saicayanacuaverena pepatsivi ata, yavenoname.

⁶ Pamonae Dioso pejumecovënëtsivi parena xanëjavaberena, daxita matotaje Dioso pejumecovënëtsivi pitabarata, cavënëlivaisipaeba bajarajotalia asivaya neyavenonaajava Dioso pejumecovënëtsivi. Bajarapamonae itsa ponaena pevajënaeyabelia, Dioso pejumelivaisi jivi petsipaebaponaenexa, yavenonaename pacuenia namatavenonaena pijanamutonexa. Bajarapacuenia bajarapamonae itsa yavenonaename, Dioso casivabarëya tsane.

⁷⁻⁸ Bajarapamonae naropoba Jesucristo petonacuenebinexa pexaniajailivaisi, Dioso pejumelivaisi, daxitajivijava petsipaebanajetarubenaenexa. Bajarapamonae apo jitsipae peyavenonaenexatsi pamonae Dioso apo pejumecovënëtsivi. Bajaraxuata vaxaitsi Dioso vajajumecovënëtsivi, xanepana vajayavenonaenexa bajarapamonae. Bajarapacuenia itsa yavenonatsi, nexata Dioso nacatane bajarapamonaeta Dioso pijacueni bevajatonanacuenebivi.

Pacuenia Diótfrefes pibisiacuene exana yabara pelivaisi

⁹ Xanë bajayata copiaya toyaquinajë Dioso pejumecovënëtsivi, panijatamarata pejinavanapaevi. Itsiata bajarapabaxutota taitorobicuenia Diótfrefes apo jumecovënëtsi. Jesucristo ata taneitorobinëcuene, apo jumecovënëtsi. Bajaraponë ayajamatabëcuenenë jamatabënaexana papecanamat-acaitorobinënexa.

¹⁰ Bajaraxuata itsa patsianajë xamëjavata, catsipaebianatsi daxita pacuenia Diótfrefes exana. Bajaraponë pibisiacuena tanebaracuaicuaijajava, taneyabaranajumetsënëtsijava ata, catsipaebianatsi. Itsacuenejavannëna pematatsënëa pibisiacuene exanabiaba. Diótfrefes apo copiapitabiabi xaniavaetsia pamonae Dioso pejumecovënëtsivi. Itsamonae ata itaveta pecopiapitsiyaniya pepatsivi. Nexata picani pamonae Diótfrefes itaveta, itsiata copiapitabiaba Dioso pejumecovënëtsivi. Nexata pamonae

Diótrefes itavetsi ata, itsiata copiapitabiaba, bajarapamonae Diótrefes jamatabêvecuacapitsapa Dioso pejumecovênêtsivi penacaeuatsibovecua bajarapamonae pematatsênêa penajoneyaniva bajarapabota.

¹¹ Gayo, pëtsa exanaponaponame pacuenia pibisiajamatabêcuene pexainaevi baexanavanapa. Exanaponaponare jane pacuenia pexaniacuene pexanaevi baexanavanapa. Pajivi Dioso pexijivi exanatsi, bajarapajivi pexaniacuene exanaponapona. Pajivi Dioso pexijivi apo exanaetsi, bajarapajivi pibisiacuene exanaponapona. Tsipaji bajarapajivi Dioso apo yapêtae.

Pacuenia Demetrio pexaniacuene exana yabara pelivaisi

¹² Daxitajivi pexaniacuena Demetrio vênêlivaisipaebatsi pexaniacuene pexanaponaponaejava. Espíritu Santo baja cajena pexaniajailivaisi jivi peyapêtaeyaexanaenê. Nexata Espíritu Santo jivi yapêtaeyaexanaponatsi pexaniacuene Demetrio pexanaponaponaejava. Paxanê ata baja cajena payapêtaniji Demetrio pexaniacuene pexanaponaponaejava. Nexata daxitajivijava patsipaebaponajê bajarapalivaisi. Paxamê ata paneyapêtaneme pexaniajailivaisi patatsipaebaponaejava.

Pacuenia Juan jumaitsi pecopiarutsilivaisiyota yabara pelivaisi

¹³ Xanê picani xainajê ayailivaisi tacamuxujiobinexa. Itsiata abaxê apo jitsipañê bajarapalivaisi tacatoyaquinaenexa mapabaxutotaje.

¹⁴ Tsipaji jamatabêcatanetsi bepíjia. Nexata abaxê tajacuata cabarêcuaicuaijaitsi tsane.

¹⁵ Catovajêtatsi Diosojavabelia pecayavenonaenexa jamatabêcuenexanepanaeya neponaponaenexa. Daxita pecayapêtaevi, majotaje pejinavanapaevi, cabajacobalia. Nebajacobiana caejivi canacujitsia, daxita vajayapêtaevibeje.

Mapabaxutoje San Judas toyaquina Dioso pejumecovënëtsivijavabelia

Pacuenia Judas mapabaxutoje toyaquina Dioso pejumecovënëtsivijavabelia yabara pelivaisi

¹ Xanë Judasnë, Jesucristo pijajivitonënë, Santiago pejuyapijinënë. Paca-toyaquinatsi mapabaxutoje paxamë Dioso papecaasivaivi. Dioso pacajunata papijajivinexamë. Paxamë asaëya Dioso pajumecovënëtavanapame Jesucristo papecayajavaponaponaxae.

² Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexanepanaeya panejinavanapaenexa. Pacatovajëtatsinua Diosojavabelia namataenetsia panenasivanexa.

Pacuenia Judas toyaquina Dioso pejumecovënëtsivijavabelia pejumecovënëtsiyaniva penajumetsënëtsilivaisi petsipaebavanapaevitsi yabara pelivaisi (2 Pe 2.1-7)

³ Tajamonae bitso patacaasivavi, jamatabëpacatoyaquinatsi picani matavëjëa paneyapëtaenexa Dioso papecacapanepaejavanexa panijaneconivecua. Jamatabëpatoyaquinatsinua picani paneyapëtaenexa paxanë ata Dioso patanecapanepaejavanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlvaisitaniji paxamëjavata pepatsijava penajumetsënëtsilivaisi petsipaebaponaevi. Bajaraxuata jitsipajë patacatoyaquinaenexa panejumecovënëtsiyaniva bajarapamonae papecatsipaebilivaisi. Tshipaji bajarapamonae pexaniajailivaisi, palivaisi vaxaitsi jumecovënëtatsi, bajarapalivaisivecua, saicayalivaisi pacatsipaebavanapa. Nexata paxamë bajarapamonae ajumesaëya patsipaebare palivaisi vaxaitsi jumecovënëtavanapatsi.

⁴ Tshipaji bajarapamonae, penajumetsënëtsilivaisi papecatsipaebavana-paevi, paxamë tuatujëta najoneyabiaba pacatsitanajamatabëcuene itajëtsinejeva. Bajarapamonae jamatabëcuenenavëxaniabiaya jumai tsabiabi: "Diosu baja cajena nacaitaxutotsoniatane vajanacacapanepaenexa. Bajaraxuata pibisiacuene exanae atatsi, apo itsacuene," jai tsabiabi bajarapamonae. Bajarapamonae apo jumecovënëtsi caenë Diosu vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Diosu jitsipa. Apo exanaenua pacuenia Jesucristo ata jitsipa. Bajarapamonae itsamatacabi Diosu penaneconitsiaexanaejavanexatsi pijaneconi yabara, Diosu tajëvelia pejumelivaisibaxutota vajunupaebatsi.

⁵ Payapëtaneme rabaja mapacuneje. Bajayata vajatuxanenë Diosu pijajivi capanepa Egipto nacuavecua, Israel nacuayaberena. Nexata baja payapëtae atamë bajarapacune, itsiata jitsipajë panenajamatabënapitsinexa icatsia bajarapacune. Bajarapacuenia vajatuxanenë Diosu pijajivi capanepae ata, pecapanepaecujinae icatsia verebiaba bajarapamonaemiyajuvënëvi. Bajarapacuenia verebiaba tshipaji bajarapamonae apo jumecovënëtsi.

⁶ Panajamatabënapirenuu pacuenia Diosu exana angelevijavabelia ata. Angelevi Diosu tonacuenebavanapa athëbëtatsia. Angeleviyajuvënëvi apo exanae pacuenia Diosu itorobatsi. Apo jinavanapaenua itsajota picani Diosu tocopata pejinavanapaenexa. Bajaraxuata

Dioso ángeleviyajuvënëvi cëbiaya jinavanapaeyaexana itsanacuata, pitaquirinacuata. Bajarajota ángelevi copiaevetavanapaeyaexanatsi Dioso penaneconitsiaexanaejavanexatsi. Nexata pamatacabi Dioso daxitamatacabijavabelianexa naneconitsiaexanaena daxita pamonaenaneconitsiaexanaena, bajarapamatacabi Dioso bajarapaángelevi ata naneconitsiaexanaena daxitamatacabijavabelianexa.

⁷ Panajamatabënapirenuu Sodoma tomarami ata, Gomorra tomarami ata, pemuxuneneta penaetomaranëmi ata. Pamonaemi jinavanapa bajarapatomaranëta, bitso pibisiacuene exanabiaba. Bajarapamonaemi apo jumecovënëtsi Dioso. Apo jumecovënëtsinua ángelevi ata. Bajarapamonaemi pevitota bitso pibisiacuene exanabiaba pevëna pebijivijavabelia. Bajaraxuata Dioso verebiaba bajarapamonaemi. Bajarapacuenia Dioso verebiaba bajarapamonaemi, pamonaecotocaevi jinavanapa mapamatacabitaje, peyapëtaenexa. Nexata bajarapamonaenata pibisiacuene pexanaeyaniva, apo pevereverecaeisotojavabelia Dioso penaneconitsiaexanaeyanivatsi.

⁸ Bajarapacuenia bajayata Dioso naneconitsiaexana pamonaemi pibisiacuene exanavanapa. Bajarapacuenia Dioso naneconitsiaexanaenata pamonaemi bajayata pibisiacuene exanavanapa, itsiata pamonaenajumetsënëtsilivaisi pacatsipaebavanapa, apo canaëjëtsi Dioso penaneconitsiaexanaejavanexatsi. Pamonaenajumetsënëtsilivaisi pacatsipaebavanapa, pibisiacuene exanabiaba. Bajarapamonaepina majitsinaebota tane pibisiacuene bajarapamonaenaxanaejitsia. Bajaraxuata nexata bajarapamonaepibisiacuene exanabiaba pevitota. Apo jumecovënëtsi pacuenia Dioso itorobatsi. Dioso pijaángelevi ata bajarapamonaepibisiacuene baracuaicuaijai tsabiabi.

⁹ Angelnë Miguel, ángelevi penamatacaitorobinë. Angelnë Miguel bitso ayaijamatabëcuenenë ata, yayatane dovathi. Pibisiacuenia apo baracuaicuaijai. Apo bijataenua. Bajayata Moiséspijinë petëpanucaenë jamatabëpitalsi picani dovathi. Nexata ángelnë Miguel apo copatsi Moiséspijinë dovathi pepitsinexatsi. Nexata dovathibeje, ángelnë Miguelbeje, najumenotabeje Moiséspijinëmi yabara. Itsiata bajarajota ángelnë Miguel pibisiacuenia apo bijatae dovathi. Saya xaniavaetsia ángelnë Miguel jumaitsi dovathijavabelia: “Dioso raja cabijataena,” jai.

¹⁰ Itsiata baitsi jane pamonaenajumetsënëtsilivaisi pacatsipaebavanapa, xaniavaetsia ángelevi apo tae ata, apo yapëtae atanua, pibisiacuenia baracuaicuaijai tsabiabi. Nexata pacuenia unupijidujuai apo cujarubi atatsi, itsiata pijacuata yapëtane pexanaejavanexa, bajara pijinia pacuenia bajarapamonaenata saya pijacuata yapëtane mapanacuapijicuenepexanaenexa. Nexata exanavanapa pibisiacuene pacuenia jamatabëexana. Nexata itsamatacabi Dioso verëbiabiana bajarapamonaebajarapapibisiacuene pexanaexa.

¹¹ ¡Bitso bejiobi tsane pamonaenajumetsënëtsilivaisi pacatsipaebavanapa! Bajarapamonaenadioso naneconitsiaexanaena. Tsipaji pacuenia bajayata Caínpijinë jamatabëcuenetsi, bajarapamonaenajamatabëcuenetsitsavanapae. Bajayata Caínpijinë pibisiacuene exanaponapona pacuenia jamatabëexana. Pacuenia bajayata Balaampijinë ata jamatabëcuenetsi, bajarajamatabëcuenetsitsavanapae pamonaenajumetsënëtsilivaisi pacatsipaebavanapa. Bajayata Balaampijinë Dioso apo jumecovënëtsi pacuenia itorobatsi. Balaampijine palata pepitsinexa, jivi matacapona pibisiacuene pexanaenexa. Pacuenia bajayata Corépijinë ata jamatabëcuenetsi, bajara

jamatabëcueneitsi tsavanapae pamonae penajumetsënëtsilivaisi pacatsipae-bavanapa. Bajayata Corépíjinë apo jumecovënëtsi pacuenia Moisésípijinë itorobatsi. Nexata Corépíjinë beyaxuabatsi Dioso. Bajara píjinya pacuenia pamonae penajumetsënëtsilivaisi pacatsipae-bavanapa, píbisiacuene pexanaxae, nexata Dioso verebiabiana bajarapamonae.

¹² Pamonae penajumetsënëtsilivaisi pacatsipae-bavanapa, payajavanacaetuatabiabame itsa panacaetuatabiabame panenabaninexa. Paxamë panacaetuatabiabame namataenetsia panenasivaxae. Nexata bajarapamonae najoneyabiaba panenacaetuatsijavata. Bajarapamonae píbisiacuene pexanabiabixae, bepíaxuirajava paxamë tuatujëta. Bajarapamonae aurajibia ayaijjava xaeyabiaba. Petocopatsinexa itsamonae ata penaxaenexa, apo najamatabëxainabiabi. Pacuenia píjaoveja pevetsivi xaniavaetsia baeveta píjaoveja, bajarapacuenia itajara pacaeveta. Itsiata apo pacaevetsi xaniavaetsia. Èpamonae saya naeveta. Bajarapamonae pexanaejava, itsacuenejavayonexa ata apo xanepanae. Yapëtanetsi pacuenia itsi vaita. Vaita itarërëbo pitsapae ata, itsiata ema apo jopae. Jovibo saya caponatsi. Nexata itsamonae peubijavaxi totsacquene atatsi, apo jamatabëcueneyavenonaetsi. Bajara saya jamatabëcueneitsi tsavanapae pamonae penajumetsënëtsilivaisi pacatsipae-bavanapa. Tspíjaji apo jamatabëcueneyavenonaetsi itsíjivi ata. Peubinae, ponae apo nacuaitabiabi penacuaitsimatacabita ata, bajaraponae apo xanepanae itsacuenejavayonexa ata. Bajara saya jamatabëcueneitsi tsavanapae pamonae penajumetsënëtsilivaisi pacatsipae-bavanapa. Tspíjaji apo jamatabëcueneyavenonaetsi itsíjivi ata. Peubinae, ponae apo nacuaitabiabi penacuaitsimatacabita ata, bajaraponae peubinë yatabutopaya juta petajuitsinexa isotojavabelia. Bajara píjinya pacuenia Dioso naneconitsiaexanaena pamonae penajumetsënëtsilivaisi pacatsipae-bavanapa píbisiacuene pexanabiabixae. Nexata bajarapamonae Dioso xuabianatsi infiernojavabelia.

¹³ Pacuenia malataca caecovëta apo rucae, caponana píaxuirapërë pítapayabelia, bajara saya jamatabëcueneitsi tsavanapae pamonae penajumetsënëtsilivaisi pacatsipae-bavanapa. Caejamatabëcuene apo xainabiabi. Bajarapamonae píauracuene pexanabiabixae, nexata bepíaxuirajava paxamë tuatujëta. Bajarapamonae pejamatabëcueneta jamatabëcuenebíjianabiaba itsamonae Dioso pejumecovënëtsivi. Pacuenia athëbëvetsica tulupu othopaena peververecaenexa, bajara píjinya pacuenia bajarapamonae ata verevercaena. Diosovecua naxuabiana. Tspíjaji copaba pejumecovënëtsíjavami pexaniajailivaisi. Bajaraxuata Dioso bajarapamonae naneconitsiaexanaenatsi. Nexata bajarapamonae pítaquirinacuata jínavanapaena daxitamatacabíjavabelianexa.

¹⁴ Enocpíjinë bajayata ponapona. Bajaraponaemi Adánpíjinë pemomoxiya-juvënë. Nexata Enocpíjinë Dioso pejamatabëcueneta bajayata tajëvelia vajunupaeba, pamonae aeconoxae mapamatacabítaje penajumetsënëtsilivaisi pacatsipae-bavanapa. Enocpíjinë baja cajena bajayata tajëvelia bajarapamonae yabara jumaitsi mapacueniaje: "Vajatuxanenë Cristo, píjávivi ángelevi, ayaiítsaëttoxaneto yajava, najetarucaena.

¹⁵ Najetarucaena penaneconitsiaexanaenexa daxita pamonae apo exanae Dioso pítorobicueniatsi. Najetarucaena penaneconitsiaexanaenexanae daxita pamonae píbisiacuenia baracuaicuajai Dioso," jai baja cajena bajayata tajëvelia Enocpíjinë.

¹⁶ Pamonae penajumetsënëtsilivaisi pacatsipae-bavanapa, apo sívajamatabëcuenebarëya itsacuenejavayo ata. Nexata píbisiacuenia

baracuaicuaijai tsabiabi daxita xua bajarapamonae tocopiapataponatsi. Apo jumecovënëtsi pacuenia Dioso itorobatsi. Nexata bajarapamonae exanavanapa pijacuata penatojitsipaecuenia. Bajarapamonae ayaijamatabëcuenevi nataeya navajunupaebabiaba xua exana. Itsamonaejavabelia itsa cuaicuaijai, pexaniacuenia cuaicuaijai tsabiabi. Bajarapacuenia pexaniacuenia cuaicuaijai tsabiabi saya pebarëyataenexatsi, perajutsinexatsinua penamatavenonaejavanë.

Pacuenia Dioso pejumecovënëtsivi muxujobatsi pejumecovënëtsiyaniva pe-najumetsënëtsilivaisi petsipaebavanapaevitsi yabara pelivaisi

¹⁷ Tajamonae bitso patacaasivavi, panajamatabënapire pacuenia baja cajena tajëvelia pacatsipaeba apóstolevi, vajatuxanenë Jesucristo pijajivi. Apóstolevi baja cajena tajëvelia pacatsipaeba pepatsijavanexa penajumetsënëtsilivaisi papecatsipaebivinexa.

¹⁸ Apóstolevi baja cajena tajëvelia pacajumaitsi mapacueniaje: “Nacua pecopiarucaevjänaeyota, itsamonae capocaponaena pexaniajailivaisi, Dioso pejumelivaisi. Bajarapamonae exanavanapaena pibisiacuene, pacuenia pijacuata natojitsipa,” pacajai baja cajena tajëvelia apóstolevi.

¹⁹ Pamonaevitso penajumetsënëtsilivaisi pacatsipaebavanapa, bajarapamonae papecatsipaebilivaisita, Dioso panejumecovënëtsivi pacanavecuanaatsanaeyaxanapona. Bajarapamonae saya najamatabëxaina ëmapanacuapijijamatabëcueneje. Nexata pibisiacuene exanavanapa pacuenia pijacuata natojitsipa. Bajarapamonae Espiritu Santo apo tsijamatabëcaetsi.

²⁰ Tajamonae bitso patacaasivavi, asaëyata Dioso pajumecovënëtavanapare. Pacuenia Espiritu Santo pacaitoroba, pavajëtabiabare Diosojavabelia.

²¹ Paxamë bitso Dioso pacaasiva. Bajaraxuata pacuenia Dioso pacaitoroba, pajinavanapare pibisiacuene paneexanaeyaniva. Bajajajebi pacopatsinejëvamë, pacöpiaevetavanapare matakabi apo pevereverecaeva papecarajutsinexa vajatuxanenë papecaitaxutotsoniaetaexae.

²² Itsamonae jumecovënëtsi ata pexaniajailivaisi, Dioso pejumelivaisi, itsiata jumeaebapona. Bajarapitsivi payavenonare xaniavaetsia pejumecovënëtsinexa bajarapalivaisi.

²³ Bajarapamonae isotojavabelia bepejopaevinexa. Tsipaji pibisiacuenejavabelia jamatabëjopa. Bajaraxuata payavenonare bajarapitsivi. Itsamonae pijinia bitso pibisiacuene exanavanapa. Bajarapapibisiacuene paitoyamëre. Bajarapamonae itsiata paitaxutobejiobiataema. Payavenonaponaer bajarapapibisiacuene pecopatsinexa. Itsiata baitsi jane xania. Panayajivitaema. Pëtsa paxamë ata bajarapamonaeta pibisiacuene panaexaname.

Pacuenia apóstolenë Judas itoroba daxita Dioso pejumecovënëtsivi: “Dioso, bitso ayaijamatabëcuenenëmë,” pejinexa Diosojavabelia yabara pelivaisi

²⁴ Dioso caëjëpatsi papecaevetsinexa pibisiacuene paneexanaeyaniva. Nexata pamatakabi Dioso naneconitsiaexanaena daxita pijaneconi pexainaevi, paxamë ata pacanubenaeyaxanaena bajaraponë Dioso, penivenivenaecotia pexainaenë, pitabarata. Itsiata baitsi jane paxamë paneanijibimë tsane. Bitso pabarëyamë tsane.

²⁵ Bajaraponë pepo caenë Dioso. Bajaraponë Dioso nacacapanepaena vajatuxanenë Jesucristo cruzata vajanacasivatëpaexae vajaneconi yabara. Bajaraxuata daxitajivi bejumaitsi Diosojavabelia: “Diosomë, bitso ayaijamatabëcuenenëmë,” bejai. Betsipaebaponanua itsamonaejavabelia Dioso bitso ayaijamatabëcuene pexainaenëcuene. Dioso cajena daxitanacua pevetsinë. Betsipaebaponanua itsamonaejavabelia Dioso pecaëjëpaejavatsi

pevetsinexa daxitajivi. Bjarapacuenia Dioso jamatabëcueneitsi tsapon-
aponaë mapanacuafe pexanaevajënaeya, mapamatacabi atafe, daxitamata-
cabijavabelianexa ata. Bajara itsi tsane.

San Juan peyaquinaelivaisi pacuenia tajëvelia Dioso tsitajëtatsi pacuenia itsijitsia mapanacuataje

Pacuenia tajëvelia Jesucristo Dioso tsitajëtatsi, juya bajarapacuenia Jesucristo petsitajëtsijava Juanjavabelia yabara pelivaisi

¹ Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepíjajo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtsiana pijajivijavabelia. Bajaraxuata nexata Jesús itorobica pijaángel xanëjavabetsica. Nexata bajaraxuanë jumapecataeya tajëvelia netsitajëta Jesús pijaángel. Neyapëtaeyaexananua pajamatabëcuenelivaisi xaina bajaraxuanë.

² Nexata daxita bajaraxuanë pacuenia taniji, pelivaisi yaquinajë mapabaxutotaje. Pacuenia Dioso nëjumaisi, yaquinajë. Pacuenia Jesucristo ata jumaisi, bajaraxua ata yaquinajë.

³ Pajivi tsimuxulebiana mapabaxutoje Dioso pejumecovënëtsivi penacaetsijsijavata, jamatabëcuenearëya tsane. Pamonaë ata namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaisi, bajarapamonaë ata jamatabëcuenearëya tsane. Bajarapacuenia jamatabëcuenearëya tsane tsipaji baja imoxoyo pevajënaë tsaponae pecopiapatsinexa daxita xuanë pelivaisi yaquinajë mapabaxutotaje.

Pacuenia Juan toyaquina siete patomarabejelijivi, Dioso pejumecovënëtsivi, yabara pelivaisi

⁴ Xanë rabaja Juannë. Pacatoyaquinatsi siete papabitsaëtomëbeje, Dioso panejumecovënëtsivi, Asiavënë nacuata panejinavanapaevi. Ajena, mapamatacabitaje, Dioso ponapona. Dioso nacua pexanaevajënaeya ata, Dioso ponapona. Daxitamatacabijavabelianexa ata Dioso ponapona. Pacatovajëtatsi Diosojavabelia papecajamatabëcuene barëyayaexanaenexa, papecayavenonaenexanua. Siete paespiritubeje nubena Dioso peecaejava, tronovënëjava, pitabarata. Pacatojitsipatsi bajarapamonaë papecajamatabëcuene barëyayaexanaenexa, papecayavenonaenexanua.

⁵ Jesucristojavabelia ata bajarapacuenia pacatovajëtatsi. Jesucristo baja cajena pexaniajailivaisi, Dioso pejumelivaisi, jivi tsipaebabiaba. Daxita petëpaevivecua, Jesús baja namataxainaeya Dioso asaëyaexanatsi petëpaejavavecua. Mapanacuata jivi pevetsivi ata matatoxenetsia, Jesús pepo pevetsinë daxitacuene. Jesús vajanacaasivaxae, nacasivatëpa. Nexata baja nacavecuajibiaexana daxita pibisiacuene vajaexanaeneconimi.

⁶ Nexata baja Jesús pijajivitsi nacaexana itsamatacabi vajanacabarëevetsinexa daxitacuene. Jesús baja nacaexananua sacerdotevitsi, Jesús paxa Diosojavabelia jivi vajatovajëtabiabinexa. Nexata vaxaitsi daxitamatacabijavabelianexa ayaijamatabëcuene rajutabiabianatsi Jesúsjavabelia. ¡Apo vereverecae tsane Jesús daxitacuene pevetsijava! Bajara itsi tsane.

⁷ ¡Panenamuxunaevere mapalivaisije! Cristo raja najetarucaena athëbëvetsica itarërëbota. Pamatacabi Cristo najetarucaena athëbëvetsica, daxitajivi taenatsi. Pamonaë ata yeneccuatatsi, bajarapamonaë ata

taenatsi. Daxita nacuanëpijivi, pamonaē Dioso apo pejumecovënëtsivi, itsa taena Cristo penajetarucaejava athëbëvetsica, nuena pecajunavi. Bajara itsi tsane jivi itsa taena Cristo athëbëvetsica penajetarucaejava.

⁸ Jesús nayabarajumaitsi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsia daxitacuene tacopiarucaeyaexanaenëxa,” nayabarajai Jesús daxitacuene pevetsinë, daxitacuene pexanaenexa ata pecaëjëpaenëtsi. Ajena mapamatacabitaje Jesús ponapona. Dioso nacua pexanaevajënaeya ata, Jesús ponapona. Daxitamatacabijavabelianexa ata Jesús ponapona.

Pacuenia Juan Jesús yacotiaya tsitanaitajëtsi yabara pelivaisi

⁹ Xanë Juannë, panijabananënë. Tspijai najuajumecovënëtavanapatsi Jesucristo. Nexata pacuenia paxamë ata itsamonae pacabejiobiaexanapona Dioso papijajivixae, bajara pijinia pacuenia xanë ata itsamonae nebejiobiaexanapona. Jesucristo pijajivitsi nacaexana itsamatacabi vajanacabarëvetsinexa daxitacuene. Jesucristo papecayavenonaexae, pacaasaëmë tsavanapae Dioso panejumecovënëtsijava. Bajara pijinia xanë ata itsinë. Dioso pejumelivaisi jivi tatsipaebabiabixae, naneconitsia ponaponajë Patmosvënë tunaetota. Jesucristo pelivaisi ata jivi tatsipaebabiabixae, naneconitsiaponaponajë.

¹⁰ Nexata Patmosvënë tunaetota domingota Espiritu Santo netsijamatabëvënëca. Nexata tapënëverena pecuaicuaijajava ayaijume, bromptetajume penajumetsijava, jumetaniji.

¹¹ Pecuaicuaijajava nejumaitsi mapacueniaje:

—Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenëxa. Xua baja taneme, bajaraxua baja pelivaisi copiaya yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. Bajaraxucujinae bajarapalivaisi toitorobianame Dioso pejumecovënëtsivi, siete patomarabejipijivijavabelia, Asiavënë nacuata pejinavanapaevi. Toitorobianame bajarapalivaisi Efeso tomarapijivijavabelia, Esmirna tomarapijivijavabelia ata, Përgamo tomarapijivijavabelia ata, Tiatira tomarapijivijavabelia ata, Sardis tomarapijivijavabelia ata, Filadelfia tomarapijivijavabelia ata, Laodicea tomarapijivijavabelia ata, nejai mapacueniaje tapënëverena pecuaicuaijajava.

¹² Nexata napënëyorotajë tatanexa ponë tapënëverena nebarëcuaicuaijai. Nexata taenubajë siete xuabeje orota pexanaejavanë. Bajaraxuanë pematatuta naitayotanubena.

¹³ Bajaraxuanë petuatuajëta taenutajë pebi. Bajaraponë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Bajaraponë penaxatatsijava apiareca. Nacorobëcëtanuca orota pexanaepana.

¹⁴ Mataniojai bitso pacuenia baniojai papaëputo. Pitaxutobeje naitayota. Pacuenia isotocotia bacotia itsi, bajara itaxutocotia itsi.

¹⁵ Petaxubeje ata nivenivenabeje pacuenia banivenivena broncevënëjava pesetsijava, beoronanitomi. Pecuaicuaijajava najumeta pacuenia banumeta jonca.

¹⁶ Pecujanenia cobenanuca siete patuluputobeje. Pecuibuatsina pitsapa anijabarëneniabeje pexiujaiespada. Pacuenia matabipijijuameto itsa aitavajënae, xaniavaetsia baitayota, bajarapacuenia itabaranaitayota.

¹⁷ Itsa taniji bajaraponë, betatëpaenë irataeya bocajunuajë bajaraponë pitabarata. Itsiata baitsi jane bajaraponë nejayarena pecujuacobeta. Neju-maitsi:

—Pëtsa necujunavame. Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa.

¹⁸ Xanë rajane baja pepo tasaëtsaponaponaenë daxitamatacabijav-abelianexa. Xanë picani tēpajë. Itsiata baitsi jane icatsia asaënë tatëpaecujinae. Nexata baja asaënë tsaponaponae daxitamatacabijav-abelianexa. Dioso netocopata tacapanepaenexa tajajivi peponaeyaniva infernojavabelia. Netocopatanua tananeconitsiaexanaenexa pijaneconi pexainaevi peponaenexa infernojavabelia.

¹⁹ Xua baja taneme, bajaraxua baja pelivaisi yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename.

²⁰ Xuanë, siete patuluputobeje, tacujuanenia cobenanucajë, mapajamatabëcuenelivaisi xainaje. Siete rabaja pijinia patomarabejepijivi Dioso pejumecovënëtsivi penamatacaitorobivi tsavanapae. Xuanë pijinia si-etë xuabeje orota pexanaejavanë pematatuta naitayotanubena, mapajamatabëcuenelivaisi xainaje. Siete rabaja pijinia patomarabejepijivi Dioso jumecovënëtavanapa, nejai Jesús, ponë taenutajë, siete xuabeje orota pexanaejavanë tuatuajëta penucaenë.

2

Pacuenia Juan vajatuxanenë Jesús itorobatsi petoyaquinaenexa Efeso tomarata Dioso pejumecovënëtavanapaevi penamatacaitorobinëjavabelia yabara pelivaisi

¹ Jesús icatsia neju-maitsi:

—Efeso tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare. Nexata daxita pijajivi yajava yapëtaena mapalivaisije, nejai Jesús, ponë siete patuluputobeje pecujuanenia cobenanuca, siete xuabeje orota pexanaejavanë pematatufa penaitayotanubenaevanë tuatuajëta penucaenë.

Jesús nitoroba Efeso tomarata peecaenë, Dioso pejumecovënëtavanapaevi penamatacaitorobinëjavabelia, tatoryaquinaenexa mapejumaitsilivaisije:

² “Yapëtaniji daxita xua paexanavanapame. Yapëtanijinua ayaicuenia Dioso panetonacuenebijava. Yapëtanijinua ajamatabëcuenesaëya Dioso panejumecovënëtavanapaejava. Yapëtanijinua panecuenetaejitsibijava pibisiacuene pexanaevi. Yapëtanijinua nayajivitaeya panejinavanapaejava itsamonae papecayamaxëitorobianiva. Itsamonae picani papecayamaxëitorobinexa, pacajamai tsabiabi: ‘Paxanë raja paapöstolevinë,’ pacajai tsabiabi. Itsiata penajumetsënëtsivicuene payapëtaeyabiabame panenayajiviyapëtaexae.

³ Paxamë bajayajebi pacaajamatabëcuenesaëmë tsavanapae Dioso panejumecovënëtavanapaejava, itsamonae pacabejiobiaexanabiabi ata. Ayaicuenia panacuenebame patacaitorobicuene. Apo payabaracueranaemë cajena. Bajarapacuenia panacuenebavanapaexae, pacasivajamatabëbarëyatsi.

⁴ Itsiata baitsi jane caejavayo yabara pananeconitame xanëjavaberena. Tspaji aeconoxae apo panejitsipaemë pacuenia picani bajayata copiaya panejitsipame.

⁵ Panenajamatabënapire icatsia pacuenia bajayata panejitsipame. Panajamatabëcuenepënëyore xanëjavaberena. Panetonacuenebavanapare icatsia pacuenia bajayata xaniavaetsia panetonacuenebavanapame. Itsa baja apo panejitsipaemë tsane icatsia, nexata baja apo patajajivimë tsane.

6 Itsiata baitsi jane pacasivajamatabëcuenebarëyatsi pataneja-matabëcuenejëpaexaemë mapacuene yabaraje. Pacujiruitoyamë nicolaítavi pibisiacuene pexanaponaejava. Bajaraxua pexanaejava xanë ata cujiruitoyanë.

7 Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia. Jumaitsi mapacueniaje: 'Pajivi Cristo jumecovënëtaaponapona ëpetëpaejavabelianexa, bajarapajivi Dioso tocopatsianatsi pejonenexa Dioso pijanacuayabetsia,' jai Espiritu Santo," pejailivaisi toyaquinare Efeso tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Esmirna tomarata Dioso pejumecovënëtavanapaevi penamatacaitorobinëjavabelia yabara pelivaisi

8 Jesús icatsia nejumaitsi:

—Esmirna tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë daxitacuene pepo petaxuxuabinë, daxitacuene icatsia pecopiarucaeyaexanaenëxexa.

Bajaraponë picani tëpa. Itsiata baitsi jane icatsia asaë petëpaeujinae. Nexata baja asaë tsaponaponaë daxitamatacabijavabelianexa. Jesús nitoroba Esmirna tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije:

9 "Yapëtanijiji daxita xua paexanavanapame. Yapëtanijinua itsamonae papecabejibiaexanaponaejava. Yapëtanijinua bepanejjobivicuene. Itsiata baitsi jane itsamatacabi Diosojavatatsia bitso panexainaevi tsane. Yapëtanijinua pibisiacuenia papecabaracuaicuajijajava judíovi, Dioso apo pejumecovënëtsivi. Bajarapamonae cajena saya dovathi pijajivi.

10 Pëtsa pacujunavame itsamonae, pacabejibiaexanaejitsia ata. Dovathi raja pejamatabëcueneta penaneconitsivi pejebabiabibota, pacananeconitsiaexanejebiana. Bajarapacuenia pacananeconitsiaexanejebiana dovathi papecajamatabëcuenejëbinexa, papecajamatabëcueneypëtaenexa xaniajai pepacuene patanejumecovënëtsijavamë. Pacabejibiaexanaponaena diez pamatacabibeje. Bajarapacuenia pacaexanae ata tsane, itsiata panejumecovënëtsianame matapania panetëpaejavabelianexa. Nexata xanë pacarajutsianitsi matacabi apo pevereverecejava.

11 Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia. Jumaitsi mapacueniaje: 'Pajivi Cristo jumecovënëtaaponapona ëpetëpaejavabelianexa, bajarapajivi apo itsacueniabi tsanetsi cotocaevi patëpaejajava,' jai Espiritu Santo," pejailivaisi toyaquinare Esmirna tomarata peecaenë, Dioso pejumecovëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Pérgamo tomarata Dioso pejumecovënëtavanapaevi penamatacaitorobinëjavabelia yabara pelivaisi

12 Jesús icatsia nejumaitsi:

—Pérgamo tomarata peecaenē, Dioso pejumecovēnētavanapaevi penamat-
acaitorobinējavabelia, toyaquinare daxita pijajivi yajava peyapētaenexa ma-
palivaisije, nejai Jesús, ponē pecuibuatsina pitsapa anijabarēneniabeje pexi-
ujaespada.

Jesús nitoroba Pérgamo tomarata peecaenē, Dioso pejume-
covēnētavanapaevi penamatacaitorobinējavabelia, tatoyaquinaenexa
mapejumaitsilivaisije:

¹³“Yapētaniji daxita xua paexanavanapame. Yapētanijinua dovathi pijajivi
tuatujēta panejinavanapaejava. Itsiata baitsi jane pajamatabēcuenesaēmē
tsavanapae patanejumecovēnētavanapaejavamē. Bajayata Antipaspijinē
tajumelivaisi jivijavabelia tsipaebabiaba. Nexata Antipaspijinē paxamē
tuatujēta dovathi pijajivi pebeyaxuabijavatsi, patae atamē, itsiata
apo pacopatsimē patanejumecovēnētavanapaejavamē. Bajarapacuenia
patanejumecovēnētavanapaexaemē, pacasivajamatabēcuenearēyatsi.

¹⁴ Itsiata baitsi jane itsajamatabēcuenējavaxi yabara pananeconitame
xanējavaberena. Bajarajota Pérgamo tomarata paxamējajuvēnēvi muxubiji-
apenetapona itsamonae pibisiacuene pexanaenexa. Bajayata Balaampi-
jinēmi jivi peyamaxēitojorobabiabinēmi ponapona. Nexata Israelpijinē pe-
momoxi penaneconitsinexa Diosojavabelia, Balaampijinēmi itoroba Bal-
acpijinēmi pemuxubijiapenetaponaenexa Israelpijinē pemomoxijavabelia.
Nexata Balacpijinēmi muxubijiapeneta Israelpijinē pemomoxi penapon-
aenexa fiestajavabelia. Nexata fiestajavata itsamonae dajubinē itsa
beyaxuaba, jumapecataeya pexanaenēanējavabelia ofrendacuenia perajut-
siyajuvēnēvi naxane Israelpijinē pemomoxi. Balacpijinēmi muxubijiapene-
tana Israelpijinē pemomoxi pibisiacuene pexanaenexa pevitota. Bajara
pijinia pacuenia aeconoxae paxamējajuvēnēvi ata exanapona. Pérgamo
tomarapijivi pibisiacuene pexanaenexa, muxubijiapenetapona.

¹⁵ Itsamonae pijinia paxamējajuvēnēvi nicolaítavi petsipaebaponaeliv-
aisi jumecovēnētavanapa. Nexata tanejumecovēnētsivi pibisiacuene pex-
anaenexa, bajarapamonae muxubijiapenetapona.

¹⁶ Bajaraxuata paxamē xaniavaetsia panajamatabēcuenepēnēyorore Dioso-
javabelia. Itsa jume, xanē nexata naxanitsiayo ponaenajē paxamējavabereca
tabarēnabenexa bajarapamonae tacuibuatsina pepitsapaeespadata.

¹⁷ Itsa pamuxuvojorubename, panatojumetaema pacuenia Espiritu
Santo jumaitsi Dioso pejumecovēnētsivijavabelia. Jumaitsi mapacueniaje:
‘Pajivi Cristo jumecovēnētaponapona ēpetēpaejavabelianexa, bajarapajivi
rajutsianajē pexaenexa manávēnējava, athēbēpijijava, pejamatabēcue-
nasaēyaxanaejavanexatsi. Rajutsianajēnua penioponaeboto. Bajarapaiboto
pijumata bajarapajivi vēnērutsianajē pejanavēnē. Itsajivi ata apo vēnēyapētae
tsanetsi. Caejivi, bajarapaiboto pepitsijivi, navēnēyapētaena,’ jai Espiritu
Santo,” pejailivaisi toyaquinare Pérgamo tomarata peecaenē, Dioso
pejumecovēnētavanapaevi penamatacaitorobinējavabelia, nejai Jesús, siete
xuabeje orota pexanaejavanē tuatujēta penucaenē.

*Pacuenia Juan vajatuxanenē Jesús itorobatsi petoyaquinaenexa Tiatira
tomarata Dioso pejumecovēnētavanapaevi penamatacaitorobinējavabelia yabara
pelivaisi*

¹⁸ Jesús icatsia jenumaitsi:

—Tiatira tomarata peecaenē, Dioso pejumecovēnētavanapaevi penamat-acaitorobinējavabelia, toyaquinare pijajivi yajava peyapētaenexa mapali-vaissije, nejai Dioso pexēnato, ponē pitaxutobeje naitayota. Pacuenia isotocotia bacotia itsi, bajara pitaxutocotiaitsinē, ponē petaxubejenivenivena ata pacuenia banivenivena broncevēnējava pesetsijava, beoronanitomi.

Jesús nitoroba Tiatira tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije:

19 “Yapētaniĵi daxita xua paexanavanapame. Yapētaniĵinua itsamonae ata paneasivatsavanapaejava. Yapētaniĵinua patanesivanajamatabēcuene copatavanapaejavamē. Yapētaniĵinua panetonacuenebijava Dioso. Yapētaniĵinua paneajamatabēcuenesaē tsavanapaejava, itsamonae pacait-sacueniababiabi ata. Yapētaniĵinua pacuenia panetonacuenebavanapame pamatacabi ajena panejumecovēnētame. Yapētaniĵinua pacuenia jane baja aconoxae bitsoyo panetonacuenebavanapame. Bajarapacuenia paneexanavanapaexae pacasivajamatabēbarēyatsi.

20 Itsiata baitsi jane itsajamatabēcueneyo yabara pananeconitame xanējavaberena. Tsipaji apo pacujiruitavetsimē Jezabelvēnēva pibisiacuene pexanaejava. Bajarapova beprofetava, Diosojumelivaisi bepepaebiva, natane. Nexata patajajivimē bajarapova pacayajuvēnyamaxēitojorobapona baja. Bajarapova papecayajuvēnē yamaxēitojorobinexa jumaī tsabiabi: ‘Pebijivi pijavavecua jaitsi ata itsava, itsiata apo itsacuene. Bajara pijinia itsi petiriavi ata. Itsanē jaitsi ata pamonavecua, itsiata apo itsacuene. Bajara pijinia itsi pevi ata. Dajubinē itsa beyaxuaba ofrendacuena pevi perajutsinexa jumapecataeya pexanaenēanējavabelia, bajarapaviyajuvēnējava xae atatsi, itsiata apo itsacuene,’ jai tsabiabi bajarapova patajajivimē papecayajuvēnē yamaxēitojorobinexa.

21 Bajarapova picani pecopatsijava pibisiacuene pexanabiabijavavecua, bajayajebi evetaponaponajē. Itsiata baitsi jane apo jamatabēcopatsi pevitota pibisiacuene pexanabiabijava. Apo najamatabēcuenepeñēyorotsi xanējavaberena.

22 Bajarapova nexata avitaniaexanaenajē camata pebobocaenexa. Nexata pamonaē paxamēyajuvēnēvi itsa apo copatsi tsane bajarapova pitorobicueniatsi pexanavanapaejava, pamatabēxēyo pevitota pibisiacuene exana bajarapova pitorobicueniatsi, nexata bajarapamonae ata bitso nabejiobitsi-xaexanaenajē.

23 Bajarapova pexi ata verebiabianajē. Nexata daxita Dioso pejumecovēnētsivi nejamatabēcueneyapētaena. Nejamatabēcueneyapētaena daxitajivi bēpēnēa pejamatabēēthētota, penajamatabēxainacuene ata, tayapētaenēcuene. Pacaejivimē canacujitsia xuavajēto panetonacuenebavanapame, bajara pijinia pitsijavavajēto pacarajutsianatsi. Xuavajēto pijinia panijaneconi paxiname, bajara pijinia paneconivajētota pacananeconitsiaexanaponaenatsi.

24 Paxamē apo panejumecovēnētsivi, Jezabel pacaitorobi ata pibisiacuene picani paneexanaenexa, mapacuenia pacajumaitsitsije. Paxamē apo pajumecovēnētsimē dovathi pijalivaisi, palivaisi Jezabel jivi tsipaebapona. Bajarapalivaisita cujarubapona dovathi pijacuene pevājēnaeyabelia peyapētaeyaexanaponaenexa. Bajaraxuata apo pacaitorobitsi panejumecovēnētsinexa pematatsēnēa itsalivaisi, piyapēbejelivaisi.

25 Nexata pacaasaēmēre tsavanapae panejumecovēnētsijava Dioso pejumelivaisi matapania ētapatstimatacabitsica javabelianexa.

26 Itsamonae ëpetëpaejavabelianexa, catsitecavanapaena tane-sivanajamatabëcuene copatavanapaejava. Tajitsipaeuene ata netoexanavanapaena. Bajarapamonae itsamatacabi tocopatsianajë pevetsinexa daxitanacuapijivi.

27 Bajarapamonae itsamatacabi daxitanacuapijivi itsa evetsiana, ajume-saëya itorobabiabiana pejumecovënëtsinexatsi. Pacuenia xanë ata taxa necopata daxitanacuapijivi taevetsinexa, bajara pijinia pacuenia bajara-pamonae ata pevetsinexa daxitanacuapijivi, tocopatsianajë. Pacuenia at-sananito pefaratsicanalito toxobiaxabatsi, hierronaebota itsa conitaxua-batsi, bajara pijinia itsanetsi pamonaë Dioso apo pejumecovënëtsivi. Tajajivi verebiabiana daxita Dioso apo pejumecovënëtsivi.

28 Pamonaë tajajivi, rajutsianajë pexainanexa papinijicotia xainajë ayai-jamatabëcuenevinexa.

29 Itsa pamuxuvojorubename, panatojumetaema pacuenia Espiritu Santo jumätsi Dioso pejumecovënëtsivijavabelia," pejaillivaisi toyaquinare Tiatira tomarata peecaenë, Dioso pejumecovënëtavanapaevi penamat-acaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

3

Pacuenia Juan vajatuxanenë Jesús itorobatsi petoyaquinaenexa Sardis tomarata Dioso pejumecovënëtavanapaevi penamatacaitorobinëjavabelia yabara pelivaisi

1 Jesús icatsia nejumaitsi:

—Sardis tomarata peecaenë, Dioso pejumecovënëtavanapaevi penamat-acaitorobinëjavabelia, toyaquinare pijajivi yajava peyapëtaenexa mapali-vaishije, nejai Jesús, ponë xaina siete paespíritubeje, Dioso pijaespíritu, ponë cobenanuca siete patuluputobeje.

Jesús nitoroba Sardis tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: "Yapëtaniji daxita xua paexanavanapame. Yapëtanijinua itsamonae papeca-sivajamatabëjumai tsabiabijava: 'Bajarapamonae bitso tonacuenebavanapa Dioso pijacuene,' papecasivajamatabëjai tsabiabijava. Itsiata baitsi jane xanë yapëtaniji pibisiacuene paneexanaejava. Yapëtanijinua bëpënëa panajamatabëcuenefaenaejava patanejumecovënëtsijavamë.

2 Nexata namataenetsia panajamatabëcueneasaëyaexanare. Paja-matabëcueneitsamonae papecasivajamatabëjumai tsabiabijava: 'Bajara-pamonae bitso tonacuenebavanapa Dioso pijacuene,' papecasivajamatabëjai tsabiabijava. Itsiata baitsi jane xanë yapëtaniji pibisiacuesaëya exanaenamenua itsamonae ata, pamonaë pijinia jamatabëcuenefaenaepona tanejumecovënëtsijava. Tsiapaji baja bajarapamonae imoxo pecopatsi tanejumecovënëtsijavami. Xua paexanavanapame, bajaraxua picani paxamë pacatsitapexaniacuene. Itsiata baitsi jane bajaraxua Dioso apo tsitapexaniacuene.

3 Panajamatabënapire palivaisi baja copiaya itsamonae pacatsipaeba xanë patacacapanepaejavanexa yabara. Pacaasaëmëre tsavanapae bajarapalivaisi panajamatabëcueneasaëyaexanaejava. Pacopabare pibisiacuene paneexanabiabijava. Panajamatabëcuenepeñëyorore Diosojavabelia. Namataenetsia itsa apo panajamatabëcueneasaëyaexanaemë tsane

patanejumecovënëtsijavamë, nexata jemata patsiarecajë patacananeconit-siaexanaenexa. Apo payapëtaemë tsane paepatota patsijitsianëreca. Tspaji paepatota apo panejamatabënajinaemë, jemata patsiarecajë. Pacuenia penacobetoxotsinënexa jemata bapata, paepatota apo jamatabënajinaetsi, bajara pijinia xanë ata itsinë tsane.

⁴ Paxamë Sardis tomarata panejinavanapaevi, itsamonae paxamëyajuvënëvi pibisiacuene apo exanae. Pacuenia itsi pamonae apo toxuiratsi penaxatabijavanë, bajara pijinia jamatabëcueneitsi tsavanapae bajarapamonae Dioso pitabarata aneconijibia pejinavanapaexae. Itsamatacabi bajarapamonae xanëjavata jinavanapaena. Bajarapamonae itsamatacabi xanëjavata itsa jinavanapaena, pianeconijibixae, naxatabiana penioponaejavanë.

⁵ Pamonae nejumecovënëtavanapaena ëpetëpaejavabelianexa, bajarapamonae naxatabiana penioponaejavanë. Bajarapamonae apo vënëiquinaenë tsane pabaxutota vënërubena pamonae matacabi apo pevereverecejava pexainaevinexa. Biji rajane pamonae tajajivi, vënëyapëtaeyaexanaponaenajë taxajavelia, taxa pijaängelevijavelia ata.

⁶ Itsa pamuxuvojorubename, panatojumetaema pacuenia Espiritu Santo jumaisi Dioso pejumecovënëtsivijavelia,” pejailivaisi toyaquinare Sardis tomarata peecaenë, Dioso pejumecovënëtavanapaevi penamat-acaitorobinëjavavelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Filadelfia tomarata Dioso pejumecovënëtavanapaevi penamatacaitorobinëjavavelia yabara pelivaisi

⁷ Jesús icatsia nejumaisi:

—Filadelfia tomarata peecaenë, Dioso pejumecovënëtavanapaevi penamat-acaitorobinëjavavelia, toyaquinare pijajivi yajava peyapëtaenexa mapalivaisi, nejai Jesús, ponë pianeconijibinë, ponë copiaevetavanapatsi icatsia pepatsijavanexatsica vajanacapanepaenexa.

Pacuenia bajayata Davidpijinë eveta Israelnacia, bajara pijinia pacuenia Jesús evetsiana mapanacuae. Evetsiana athëbëtatsia ata, Dioso pijanacia. Nexata itsamatacabi Jesús pijajivi itorobiana daxitanacuanëjava jivi petsipaebanajetarubenaenexa Diosojavelia pecapanepaelivaisinexatsi. Nexata panacuanëjava Jesús pijajivi itorobiana, bajarapanacuanëjava pejinavanapaevi Jesús pijajivi tsipaebanajetarubenaena Diosojavelia pecapanepaelivaisinexatsi. Nexata itsajivi ata apo caëjëpaetsi tsane Jesús pijajivi pitavetsinexa petsipaebanajetarubenaeyaniva bajarapanacuanëjava pejinavanapaevi. Panacuanëjava pijinia Jesús pijajivi apo tocopatsi tsane Diosojavelia jivi pecapanepaelivaisinexatsi petsipaebanajetarubenaenexa, bajarapanacuanëjava pejinavanapaevi Jesús pijajivi apo tsipaebanajetarubena tsane. Nexata itsajivi ata apo caëjëpaetsi tsane Jesús pijajivi pitorobinexa petsipaebanajetarubenaenexa bajarapanacuanëjava pejinavanapaevi. Jesús nitoroba Filadelfia tomarata peecaenë, Dioso pejumecovënëtavanapaevi penamatacaitorobinëjavavelia, tatoyaquinaenexa mapejumaisilivaisije:

⁸ “Yapëtaniji daxita xua paxanavanapame. Apo pasaemë. Itsiata panejumecovënëtavanapame. Apo panayavajunuaxainaemë patajajivicuenemë. Bajaraxuata pacatocopatatsi talivaisi jivi panetsipaebaponaenexa

panevajēnaeyabelia. Nexata itsajivi ata apo caējēpaetsi tsane papecacopatsi-aexanaenexa talivaisi jivi panetsipaebaponaejava.

⁹ Panejumetaema. Itsamonae rabaja judiovi ata, dovathi pijajivi. Tsipaji apo nejumecovēnētsi. Bajarapamonae jamatabēcuenenavēxaniabiaya jumai tsabiabi: ‘Paxanē raja pajudiovinē, Dioso papijajivinē; jai tsabiabi. Itsiata baitsi jane Dioso apo pijajivi. Tsipaji apo nejumecovēnētsi. Bajarapamonae itsamatacabi paneitabarata pematabacabēta pacatonubenaeyaexanaenatsi. Nexata bajarapamonae yapētaena paxamē patacaasivacuene.

¹⁰ Pacaitorobatsi patanejumecovēnētsijavamē bajayajebi pancasaētsavanapaenexa. Nexata baja bajarapacuenia panejumecovēnētavanapame. Bajaraxuata nexata pamatacabi daxitanacuapijivi piayaicuene taeponaena, paxamē pacaevetsianatsi. Nexata paxamē apo pacaitsacueniabi tsane.

¹¹ Naxanitsiayo rabaja ponaenajē paxamējavabereca. Xaniavaetsia baja pacasaēmēre tsavanapae patanejumecovēnētavanapaejavamē. Nexata itsajivi ata apo pacavecuapitsi tsane xua taxa Dioso pacarajutsiana athēbētatsia.

¹² Pamonaē nejumecovēnētavanapaena ēpetēpaejavabelianexa, bajarapamonae taxa Dioso bepijatemplobonaesituronē taenatsi athēbētatsia. Bajarapacuenia taxa Dioso bepijatemplobonaesituronē taenatsi bitso pijamatabēcuenesaē tsavanapaexae tsane tanejumecovēnētavanapaejava. Bajarapamonae taxa Dioso athēbētatsia yajavajinavanapaena daxitamatacabijavabelianexa. Nexata taxa Dioso pevēnē yaquinarutsianajē bajarapamonaejavabelia. Yajavayaquinarutsianajē taxa Dioso pijatomara pevēnē. Bajarapatomara, pejana Jerusalēntomara. Bajarapatomara athēbēvetsica patsianica, taxa Diosojavavetsica. Tavēnē ata, pejanavēnē, yaquinarutsianajē bajarapamonaejavabelia.

¹³ Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovēnētsivijavabelia,” pejailivaisi toyaquinare Filadelfia tomarata peecaenē, Dioso pejumecovēnētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatujēta penucaenē.

Pacuenia Juan vajatuxanē Jesús itorobatsi petoyaquinaenexa Laodicea tomarata Dioso pejumecovēnētavanapaevi penamatacaitorobinējavabelia yabara pelivaisi

¹⁴ Jesús icatsia nejumaitsi:

—Laodicea tomarata peecaenē, Dioso pejumecovēnētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Jesús, ponē copiaevetavanapatsi icatsia pepatsijavanexatsica vajanacacapanepaenexa.

Bajaraponē pexaniajailivaisi jivi tsipaebabiaba. Pexanaenēnua daxitacuene, xua Dioso exana mapanacuataje. Jesús nitoroba Laodicea tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije:

¹⁵ “Yapētaniji daxita xua paexanavanapame. Yapētanijina patanejumecovēnētsivi atamē, panejamatabēcuenevetsina bevelia patanejitsipaejavamē. Yapētanijina bevelia patanetonacuenebavanapaejavamē. Pacuenia apo tanejumecovēnētsivi jamatabēcuenētsi xanējavaberena, itsiata picani bitso apo pajamatabēcuenētsimē. Pacuenia pijinja xaniavaetsia tanejumecovēnētsivi jamatabēcuenētsi xanējavaberena, itsiata apo pajamatabēcuenētsimē. Pacuenia jamatabēcuenētsi pamonaē apo

tanejumecovēñetsivi, itsa pajamatabēcueneitsimē tsipae, nexata xanēpanaejitsipa. Itsa jume, pacuenia jamatabēcueneitsi pamonae xaniavaetsia tanejumecovēñetsivi, itsa pajamatabēcueneitsimē tsipae, nexata xanēpanaejitsipa. Tsipaji rovalia panajamatabēcuene yapētaejitsipame pacuenia pajamatabēcueneitsimē tsavanapae xanējavaberena.

¹⁶ Nexata pacuenia mera perēbēnaera apo cainejebi, bitso apo atajunua, bajara pajamatabēcueneitsimē xanējavaberena. Bajarapitsira apo jitsipaetsi vajaapaenexa. Nexata vajaapaeyaniva, navecuapatajarabatsi penaxuabinexa. Bajara pijinia pacuenia pacanavecuaxuabianatsi. Tsipaji apo jitsipaenē pacuenia bēpēnēa panejamatabēcuenevetsina pajamatabēcueneitsimē tsavanapae. Baitsi apo jitsipaenē bevelia patanejitsipaejavamē. Bajaraxuata pacanavecuaxuabianatsi.

¹⁷ Paxamē pajamatabējumaitsimē tsabiabi: ‘Xanē baja cajena bitso daxitacue taxainaenē. Daxita xua nacuenebaponaponajē taxinaejavanexa, netocapitsapona. Nexata itsacuenejava ata apo namatavenonaenē, pajamatabējamē tsabiabi. Itsiata baitsi jane Diosojavabelia apo panejamatabēcuenexanepanaexae, pepacuene apo pajamatabēcuenebarēyamē tsavanapae. Apo payapētaemēnua bitso bepanejiobicuene Dioso pitabarata. Paxamē cajena Dioso pacatane bepaneitaxutotsēcēnaevi bitso, bepanejumasajinaevinua.

¹⁸ Bajaraxuata pacamuxujiobijitsiatsi. Panevecuapire bitso penamatamotsijava paricovinexamē jane baja Diosojavatatsia. Panevecuapirenia penioponaenaxatatsijava panenaxatatsinexa, panenaperabēcaranatsinexa Dioso pitabarata paneaurajavavecu. Panevecuapirenia paneitaxutotsēcēnaevaē panetaenexa jane baja xaniavaetsia. Nexata dovathi pijacuene panayajivitaename papēcayamaxēitorobijaniva.

¹⁹ Daxita pamonae tasivavi, muxujiobajē peyapētaenexa. Naneconitsiaexanajēnua pecopatsinexa apo tajitsipaecuene pexanaejava. Nexata asaēyata panejumecovēñere. Pacopabare pibisiacuene paneexanabiabijava. Panajamatabēcuenepēñeyorore Diosojavabelia.

²⁰ Panejumetaema. Itsajivi itsa pata panijabota, nexata itsa pacajunata, patobaupatame pejonexa. Bajara pijinia pacuenia xanē ata panejamatabēēthēto itsa panetobaupatsianame, pacatsijamatabējonatsi. Nexata pacayjavaponaponaenatsi daxitamatacabijavabelianexa. ²¹ Xanē baja cajena taxa Dioso taneitorobicuenia jumecovēñētaponaponajē étatēpaejavabelianexa. Nexata baja aeconoxae yajavaecajē taxa pecaejavata, pijatronovēñejavata. Pamonae pijinia nejumecovēñētavanapaena ēpetēpaejavabelianexa, bajarapamonae pijinia tocopatsianajē tayajavaecaenexa tronovēñejavata.

²² Itsa pamuxuvojorubename, panatojumetaema pacuenia Espiritu Santo jumaiti Dioso pejumecovēñetsivijavabelia,” pejailivaisi toyaquinare Laodicea tomarata pecaenē, Dioso pejumecovēñētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatujēta penucaenē.

4

Pacuenia Juan tane Dioso pijajivi Dioso pijanacuatsia yabara pelivaisi

¹ Icatsia taniji baupa penabaupatanucaejava athēbētatsia. Ponē baja copiaya jumetaniji pecuaicuaijajava betrompetajume, bajaraponē icatsia pecuaicuaijajava jumetaniji. Nejumaitsi mapacueniaje:

—Junaimina xanējavabetsina. Catsitajētsianatsi majotatsinaje pacuenia pevajēnaeyabelia itsi tsaponaejitsia bajarapanacuatareca, nejai ponē jumetaniji pecuaicuajijava.

² Nexata bajarapaepatota nayapētaniji athēbētatsia Espīritu Santo pesaē tayjavaponaponeajava. Athēbētatsia taniiji tronovēnējava. Bajarapatronota Dioso taeyetajē.

³ Dioso, ponē eca bajarapatronota, itabaracotiabatsi. Pacuenia cotiaitsi penamatamotsiibotonē, bajara itabaracotiaitsi. Pacuenia cotiaitsi jaspevēnēiboto, pacuenia cotiaitsi cornalinavēnēiboto ata, bajaraitabaracotia itsi. Bajarapatrono matatoyorotsia aravalibo taenutajē. Pacuenia esmeraldavēnēiboto cotiaitsi, bajaracotia itsanucae bajarapaaravalibo.

⁴ Bajarapatrono matatoyorotsia taenubajēnua veinticuatro patronobeje. Caetronota canacujitsia ecapona ancianonēanē. Bajarapaancianovi naxatabena penioponeajavanē. Orota pexanaecoronanē mataena.

⁵ Patronota eca Dioso, bajarapatronojavaverena yamaxē binebinejai. Najumetajunujunua. Siete xuabeje pitayotanubeneajavanē taenubajē bajarapatronoitabarata. Bajarapaitayotanubeneajavanē mapajamatabēcuenelivaisi xainaje. Siete rabaja pijinia patomarabejepijivi, Dioso pejumecovēnētavanapaevi, Espīritu Santo peyavenonabiabijavanexatsi.

⁶ Bajarapatronoitabarata taeyetajē bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava.

Bajarapatronojavata taenubajē cuatro ponēbeje piaitothiavi, ayainēanē. Trono matatoyorotsia nubena. Bajarapamonae pitabarayareca, pejumareca ata, itaxutorubenaponareca.

⁷ Copiaya ponē, benevēthē petsobianē. Bajaraxuacujinae cotocaevinē, betoro. Bajaraxuacujinae acueyabinē, bejiviitabaranē. Bajaraxuacujinae cuatronē, pacuenia cotsala itsa punanajetaruca baitsi, bajaraitsi.

⁸ Ponēanē, cuatro ponēbeje piaitothiavi taniiji, xainapona seis pacorofotobeje caenē canacujitsia. Bajarapamonae daxitanēanēreca itaxutorubenaponareca. Bēpēnēaverena ata bajarapacuenia itaxutorubenaponareca. Matabacijebi, meravijebi ata, apo copatanubena pejumaitsanubeneajava Diosojavabelia.

Bitso nianeconijibinē. Bitso ayaijamatabēcuenenēmē. Nexata cacaējēpa daxitacue nexanaenexa. Ajena, mapamatababitaje, ponaponame. Mapanacuae nexanaevajēnaeya ata, ponaponame. Daxitamatabacijavabelianexa ata ponaponame, jai tsanubena bajarapamonae Diosojavabelia.

⁹ Pamonaе cuatro ponēbeje piaitothiavi, pexaniajamatabēcuenenua rajutabiaba Diosojavabelia. Bajarapamonae pexaniajamatabēcuenē itsa rajutabiaba Diosojavabelia, jumai tsabiabi mapacueniaje:

—;Diosomē, nenivenivenaecotia bitso pinijcuenē! ;Ayaijamatabēcuenenēmē bitso! jai tsabiabi.

Bajarapacuenia jumai tsabiabi tronota pecaenējavabelia, daxitamatabacijavabelianexa peponaponaenējavabelia.

¹⁰ Pamonaе cuatro ponēbeje piaitothiavi, bajarapacuenia itsa jumai tsanubenaе Diosojavabelia, nexata pijinia bajarapaepatota pamonaе veinticuatro ponēbeje ancianovi pematatababēta tonubenajunua Dioso pitabarata, daxitamatabacijavabelianexa peponaponaenē pitabarata. Bajarapacuenia tonubenajunua Dioso pitabarata peyayataexae. Bajarapaancianovi Dioso pijatronojavabelia topenelia pijacoronanē. Bajarapaancianovi Diosojavabelia jumai tsanubenaе:

¹¹ Patajatuxanenēmē, patajaDiosonēmē. Xanepana

itsamonaejavabelia patacavajunupaebaponaejava nenivenivenaecotia pexainaejava. “Diosomē, bitso ayaijamatabēcuenenēmē,” pacajai tsaponaetsinua. Xanepananua patajumaitsaponaejava: “Dioso cajena bitso piasaēnē,” patajaitsaponaejava. Tspiji baja daxitacuene nexanaenē. Nejtispaecuenia daxitacuene exaname. Mapamatacabijavaberena ata abaxē tsiteca daxitacuene nexanaejava nexanaecujinae. Bajarapacuenia abaxē tsiteca daxitacuene nexanaejava xamē nejamatabēcueneta, jai tsanubenaē ancianovi Diosojavabelia.

5

Pacuenia Juan athëbëtatsia cobetaeyeta Dioso pequionaecuyalatobaxuto pecobenaecaejava yabara pelivaisi

¹ Athëbëtatsia taeyetajē Dioso. Tronota eca. Pequionaecuyalatobaxuto cobenaeca pecujanenia. Bajarapacuyalatobaxuto peboxoverena, pejumavelia ata, xaina pitane. Bajarapacuyalatobaxuto siete pasellotabeje piupicatsanaruba.

² Nexata taenutajē bitso piasaēāngelnē. Bajarapaāngelnē pinijijumeta jumaitsi mapacueniaje:

—¿Jipatsa nexata jamatabēcuenecaējēpatsi Dioso petocopatsinexatsi pesaracaenexa sellovēnējavaxi, bajarapacuyalatobaxuto piupicatsanarubiseloxi? jai.

³ Itsiata baitsi jane ajibi pejamatabēcuenecaējēpaejivitsi bajarapacuyalatobaxuto piupicatsanarubiseloxi pesaracaenexa. Athëbëpijivi ata, mapanacuapijivi ataje, petëpaevimi ata, apo jamatabēcuenecaējēpaetsi cajena. Nexata itsajivi ata Dioso apo tocopatsi pesaracaenexa bajarapacuyalatobaxuto piupicatsanarubiseloxi bēpēnēa paitane rubena petaenexa.

⁴ Nexata xanē bajaraxua itsa taniji, bitso cajena nuajē. Bitso nuajē tspiji baja ajibi pejamatabēcuenecaējēpaejivitsi bajarapacuyalatobaxuto pequionaejava pebaxuisinaenexa pelebina.

⁵ Nexata itsanē ancianoviyajuvēnēnē nejumaitsi:

—Pëtsa baja nuame. Caenē raja jamatabēcuenecaējēpatsi bajarapacuyalatobaxuto pequionaejava pebaxuisinaenexa. Bajaraponē Judápijinē pemoxiyajuvēnēnē. Piasaēnē bitso. Nexata bajaraponē yabara itsamonaē jumai tsabiabi: “León,” jai tsabiabi. Bajaraponē nacuaevetsinēmi Davidpijinē pemomoxiyajuvēnēnē. Bajaraponē jamatabēcueneamoneyaba baja dovathi. Nexata bajaraponē jamatabēcuenecaējēpatsi pesaracaenexa bajarapacuyalatobaxuto piupicatsanarubiseloxi, nejai ancianoviyajuvēnēnē Jesucristo yabara.

⁶ Nexata jane baja taenutajē Corderonē. Nuca veinticuatro ponēbeje ancianovi pitabarata. Nucanua trono pitabarata. Nucanua pamonaē cuatro ponēbeje paitothiavi pitabarata. Cordero nayapētane pebeyaxuabinēmitsicuene. Tspiji cruzajavabelia pecobematabiabarutsvajēnēmitsi ruca pecobeta. Corderonē xaina siete pamataetobeje, siete pijinia paitaxutobeje. Xuanē, siete paitaxutobeje, mapajamatabēcuenelivaisi xainaje. Siete rabaja pijinia paespiritubeje, Dioso pijaespirituanē. Bajarapasiete paespiritubeje Dioso baja itoroba daxitanacuanējava.

⁷ Nexata jane baja Dioso, ponē eca tronota, ponē pequionaecuyalatobaxuto cobenaeca pecujanenia. Corderonē kujitabalia. Corderonē jane baja vecuapita bajarapacuyalatobaxuto.

⁸ Corderonē baja itsa pita bajarapacuyalatobaxuto, nexata pamonaē cuatro ponēbeje piatothiavi, Corderonē pitabarata pematocabēta tonubenajunua. Bajara pijinia pacuenia pamonaē veinticuatro ponēbeje ancianovi, Corderonē pitabarata pematocabēta tonubenajunua. Caeciano canacujitsia saicaya xainapona pijaarpa. Bajarapaancianovi capona orota pexanaecopanē. Bajarapacopanē vēnēca petuxujuvijava. Bajarapatuxujuvijava xaina mapajamatabēcuenelivaisije. Dioso pijajivi pevajētaponaējavami Diosojavabelia, Dioso tane bajarabepitsituxujuvijava.

⁹ Nexata pamonaē cuatro ponēbeje piatothiavi, pamonaē pijinia veinticuatro ponēbeje ancianovi, daxita bajarapamonaē, naxēana Corderojavabelia mapapejanavajije. Penaxēanaējavata vajita jumaitsi Corderojavabelia mapacueniaje:

Cajamatabēcuenecaējēpa rabaja Dioso pecatocopatsixae nepitsinexa mapacuyalatobaxutoje. Nexata baja cajamatabēcuenecaējēpanua bajarapacuyalatobaxuto piupicatsanarubiselloxi ata nesaracaenexa. Bajarapacuenia cajamatabēcuenecaējēpa baja tsipaji baja cabeyaxuaba pataneneconimatamotsinexamē. Nexata padaxitavirijumevi atanē, padaxitanacuanēpijivi atanēnua, nijanata baja panecomuatame Diosonexa.

¹⁰ Paneexanamenua baja Dioso papijajivinē itsamatacabi Dioso patanebarēevetsinexa daxitacuene. Paneexanamenua baja pasacerdotevinē jivi patatocuaicuajitsabiabivinexa Diosojavabelia. Paneexanamenua baja nacuanē pataevetsivinexa, jai ancianovi Corderonējavabelia penaxēanaējavata mapapejanavajije.

¹¹ Trono matatoyorotsia nubena cuatro ponēbeje piatothiavi. Nexata piatothiavi pepēnēvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Angelevi bitso ayaibitsaēto, millone peáangelbeje nubena. Nexata bajarapaángelevi pecuaicuajijajava jumetaniji.

¹² Angelevi ayaijumeta jumaitsi mapacueniaje:

Corderonē, ponē picani beyaxuabatsi, bitso ayaijamatabēcuenenē. Bajaraxuata Dioso tocopatsi pevetsinexa daxitacuene mapanacuataje. Tocopatatsinua daxitacuene pexainanenexa. Tocopatatsinua daxitacuene peyapētaenexa. Tocopatatsinua pinijisaē pexainanenexa. Tocopatatsinua itsamonaē pejumaitsinexatsi: “Xamē bitso ayaijamatabēcuenenēmē,” pejainexatsi. Tocopatatsinua pevajunupaebinxatsi penivenivenaecotia pexainaejava. Tocopatatsinua daxita pamonaē jumecovēnētatsi, pexaniajamatabēcuene perajutsinexatsi bajaraponējavabelia. Bajarapacuenia tocopatatsi tsipaji ayaijamatabēcuenenē bitso,

jai tsanubenaē mapacueniaje ángelevi Jesús yabara.

¹³ Jumetanijinua icatsia daxita Dioso pexanaevi pecuaicuajijajava. Athēbēpijivi cuaicuajiai. Mapanacuapijivi ata cuaicuajiai. Petēpaevimi ata cuaicuajiai. Manuamenianēpijivi ata cuaicuajiai. Nexata daxita bajarapamonaē Diosobeje Jesúsbeje yabara jumaitsi mapacueniaje:

Diosomē, tronota neecaenē. Xamē pijinia Corderonēmē. Paxamēbejejavabelia pexaniajamatabēcuene pacarajutatsi. Paxamēbeje bitso ayaijamatabēcuene panexainanenēbeje. Panenivenivenaecotiabeje paxainamebeje. Nexata panenivenivenaecotiabeje panexainaejavabeje itsamonaējavabelia pacavajunupaebaponatsi.

Pinijsaë bitso panexainaenëbeje. Bajarapajamatabëcuene panejamatabëcuenetsitecaenëbeje daxita matacabijavabelianexa, jai daxita Dioso pexanaevi Diosobeje Jesúsbeje yabara.

¹⁴ Pamonae pijinia cuatro ponëbeje piatiothiavi jumaitsi tsaponae macapueniaje:

—jBajara itsi tsane! jai bajarapamonae.

Nexata pamonae veinticuatro ponëbeje ancianovi, pematabacabëta tonubenajunua Dioso pitabarata. Pexaniajamatabëcuene rajutanubena Diosojavabelia, daxitamatacabijavabelianexa peponaponaenëjavabelia.

6

Siete pasellobeje yabara pelivaisi

¹ Corderonë taenutajë. Penamataxainaesello sarananuca. Nexata pamonae cuatro ponëbeje piatiothiaviyajuvënënë, caenë pecuaicuaijaijava ayaijumeta, jumetaniji. Pecuaicuaijaijava, beyamaxëjume najumeta. Nexata jumetaniji: “jNaxanitsia!” pejaijava caballojumata peponaenëjavabelia.

² Nexata bajaraxuacujinae icatsia taniji perenajava penioponaecaballota peyanajetarucaenë. Caballojumata peecaenë, cobenaeca bitsabi. Rajutatsi corona penamataxatatsinexa. Bajaraxuacujinae pona pijavajabitsaë pebarënabenexa. Nexata pijavajabitsaë cueneamoneyabanajetaruca pepacuene ëpecopiarucaeya exanaejavabelianexa.

³ Bajaraxuacujinae icatsia Corderonë sarananuca itsasello, pecotocaevijava. Nexata pamonae cuatro ponëbeje piatiothiaviyajuvënënë, icatsia itsanë: “jNaxanitsia!” pejaijava, jumetaniji.

⁴ Nexata bajaraxuacujinae icatsia taniji perenajava petsobiacaballota peyanajetarucaenë. Caballojumata peecaenë, piapiaespada rajutatsi. Tocopatatsi pecopiarucaeyaexanaenexa mapanacuata jivi xaniavaetsia pejinavanapaecuenemi. Jivi jane baja namataenetsia nabeyaexanaejitsia daxita nacuanëjava.

⁵ Bajaraxuacujinae icatsia Corderonë sarananuca itsasello, acueyabijava. Nexata pamonae cuatro ponëbeje piatiothiaviyajuvënënë, acueyabinë icatsia: “jNaxanitsia!” pejaijava, jumetaniji.

Nexata bajaraxuacujinae icatsia taniji perenajava petsaebiacaballota peyanajetarucaenë. Caballojumata peecaenë, cobenaeca pepesabaponaejava.

⁶ Icatsia jumetaniji pamonae cuatro ponëbeje piatiothiavijavata pejumait-sijava mapacueniaje: “Janibomatacabixae, caedenariota pecomuatsinexa caëjëpa saya caekilo trigoxu. Itsa pijinia cebadaxu, caëjëpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caëjëpae. Tspaji bajaraparanë bitso namatamota,” pejaijava, jumetaniji.

⁷ Bajaraxuacujinae icatsia Corderonë sarananuca itsasello, cuatrojava. Nexata pamonae cuatro ponëbeje piatiothiavi, pecopiarucaenë jane baja: “jNaxanitsia!” pejaijava, jumetaniji.

⁸ Nexata bajaraxuacujinae icatsia taniji perenajava pevayanaecaballota peyanajetarucaenë. Caballojumata peecaenë, pevënë Jivi Petëpaeaexanaponaenë. Itsanë pënaponatsi. Bajaraponë pijinia ponë pevënë Infernonë. Bajaraponëbeje Dioso tocopatsianatsibeje jivi ayaiBITSaëto pebeponaenexabeje. Pitsibitsaëtovajëto beponaenabeje, bajarapitsibitsaëtovajëto matatoxenetsia nacopatsiana mapanacuataje.

Daxita mapanacuajavaje bajarapacuenia exanaponaenabeje. Bajara-ponēbeje pejamatabēcueneta beyaexanaponaenabeje jivi vajabitsaēcuenia, janibocuenia ata, piavitaneucuenia ata. Unupijinēanē playainēanē pitsapaena. Nexata bajarapapiayainēanē jivi beponaenatsi. Bajarapacuenia itsi tsane mapanacuataje pamatacabi Dioso jivi nananeconitsiaexanaena pibisiacuene pexanaeconi yabara.

⁹ Bajaraxuacujinae icatsia Corderonē sarananuca itsasello, cincojava. Nexata daxita pamonaemi bajayata beyejebatsi Dioso pejumelivaisi yabara, taeyejebajē pebobenaejava altarjavabēxēpanata. Bajarapamonaemi bajayata beyejebatsi apo pecopatsixae Dioso pejumelivaisi jivi petsipaebaponaejava.

¹⁰ Daxita pamonaemi bajayata beyejebatsi, Diosojavabelia pinijijumeta jumai tsanubenae:

—Diosomē, pepo pexaniajamatabēcuenenēmē. Pacuenia najumecapanepaeya jumaitsimē, bajarapacuenia exanabiabame. ¿Detsa pamatacabibeje abaxē saica nenaneconitsiaexanaenexa mapanacuata pejinavanapaevije, pamonaē panebeyejeba? jai tsanubenae altarjavabēxēpanata pebobenaevi.

¹¹ Nexata jane baja bajarapamonaē Dioso rajutatsi penioponaenaxatabi-javanē. Abaxē Dioso itorobatsi bajarapamonaē penacueraevetanubenaenexa. Tsipaji abaxē saica itsamonae Dioso pijajivi, Jesucristo ata petonacuenebivi, pebeyejebinexatsi. Bajaraxuata bajarapamonaē abaxē nacueraevetsiaexanejebatsi Dioso.

¹² Bajaraxuacujinae icatsia Corderonē sarananuca itsasello, seisjava. Nexata icatsia taniji bitso ira penajēabijava. Matacabipijijuameto bitso itaxutotsobia. Pacuenia meravi bitso itsa aitaquiri, bitso batsaebia, bajara itaxutoitsi. Meravipijijuameto pijinia bitso itaxutotsobia. Pacuenia pijana batsobia, bajara itaxutoitsi.

¹³ Nexata tulupu irabetsica othopaica. Pacuenia naejavacuai baothopaica, naejava itsa najēaba pinijijovibota, bajarapacuenia othopaica tulupu.

¹⁴ Pacuenia cuyalato baquiona, bajarapacuenia quiona daxita itaboxomi. Ajibi baja nexata itaboxo. Daxita petsutonēmi, petunaetonēmi ata, najēaba.

¹⁵ Nexata daxita mapanacuanējavaje jivi pevetsivi, namatayaba ibovajuanējava. Namatayaba ibotoxanetonē tuatuaējjava ata. Daxita ayaijamatabēcuenenēanē, bitso riconēanē ata, namatayaba. Vajabitsaē penamatacatorobinēanē ata, piasaēnēanē ata, namatayaba. Dajubicuenia pecanajetsivitsi ata itsamonaejavabelia amoneya petonacuenebavanapaenexa, namatayaba. Apo pecanajetsivitsi ata itsamonaejavabelia amoneya petonacuenebavanapaenexa, namatayaba. Bajarapacuenia daxita namatayaba.

¹⁶ Nexata penamatayabivi jumaitsi ibotsutonējavabelia, ibotoxanetonējavabelia ata:

—Panetsimataothopare. Dioso, ponē eca tronota, bajaraponēvecua panamatayatsianamē. Pinijicuenia raeta pananeconitsiaexanaena Corderonē. Bajaraxuavecuā panamatayatsianame, jai picani pamonaē penamatayabivi.

¹⁷ Tocopiapatatsi jane baja pinijicuenia Dioso penaneconitsiaexanaemat-acabitsi. Itsajivi ata cajena apo caējēpaetsi pevecuapanepaenexa Dioso penaneconitsiaexanaecuenetsi.

7

Pacuenia Juan tane athëbëatsia pacuenia itsamatacabi itapaitanerubijitsi-atsi Israel nacuapijivi Dioso pijajivixae yabara pelivaisi

¹ Icatsia taniji cuatro ponëbeje ángelevi. Bajarapaángelevi nacua matatoyorotsia nubena. Caenë canacujitsia ángelevi caranatanubena jovibo. Irajava jovibo peponaeyaniva, caranatanubena. Manuamene atavecua caranatanubena. Caenae ata naejava penajëabiyániva jovibota, caranatanubena ángelevi.

² Tanijnua icatsia itsaángelnë penajetarucaenë orientejavavetsina. Bajarapaángelnë caponapona piasaenë Dioso pijasello. Bajarapasellota Dioso pijajivi pitapaitanerubaponaenexa. Bajarapaángelnë vavajai ayaijumeta cuatro paángelnëbejevavelia. Pamonaе cuatro ponëbeje, ángelevi, Dioso tocopatatsi pebijianaenexa ira, manuamene ata. Nexata orientejavavetsina paángelnë najetaruca, cuatro paángelnëbejevavelia jumaitsi mapacueniaje:

³ –Dioso pijajivi yajava peitsacueneyaniva, pëtsa abaxë pabijianame ira, naejavanë ata, manuamene ata. Matapania baja Dioso pijajivi Dioso pijasel-lota vaxaitsi itapaitanerubianatsi, bajara jane pabijianaename, jai ángelnë orientejavavetsina penajetarucaenë.

⁴ Bajaraxuacujinae jumetaniji jivi ayaibitsaëtoxaneto Dioso pijasel-lota pitapaitanerubijavatsi. Ciento cuarenta y cuatro mil pina pajivibeje itapai-tanerubatsi Dioso pijasel-lota. Pamonaе itapaitanerubatsi Dioso pijasel-lota, daxita bajarapamonae Israelpijnëmi pexi doce ponëmibeje pemomoxiyajuvënëvi.

⁵ Nexata Dioso pijasel-lota itapaitanerubatsi doce mil pajivibeje, Judápijinëmi pemomoxiyajuvënëvi. Doce mil pijinia pajivibeje, Rubépijinëmi pemomoxiyajuvënëvi. Doce mil pijinia pajivibeje, Gadpijinëmi pemomoxiyajuvënëvi.

⁶ Doce mil pijinia pajivibeje, Aserpijinëmi pemomoxiyajuvënëvi. Doce mil pijinia pajivibeje, Neftalípijinëmi pemomoxiyajuvënëvi. Doce mil pijinia pajivibeje, Manasépijinëmi pemomoxiyajuvënëvi.

⁷ Doce mil pijinia pajivibeje, Simeónpijinëmi pemomoxiyajuvënëvi. Doce mil pijinia pajivibeje, Levípijinëmi pemomoxiyajuvënëvi. Doce mil pijinia pajivibeje, Isacarpíjinëmi pemomoxiyajuvënëvi.

⁸ Doce mil pijinia pajivibeje, Zabulónpijinëmi pemomoxiyajuvënëvi. Doce mil pijinia pajivibeje, Josépijinëmi pemomoxiyajuvënëvi. Doce mil pijinia pajivibeje, Benjamínpijinëmi pemomoxiyajuvënëvi. Nexata bajarapacuenia caejavata Dioso pijasel-lota itapaitanerubatsi ciento cuarenta y cuatro mil pajivibeje, Israelpijnëmi pexi doce ponëmibeje pemomoxiyajuvënëvi.

Pacuenia Juan athëbëatsia tane jivi ayaibitsaëtoxanetonë, penioponaejavanë penaxatabivi, yabara pelivaisi

⁹ Icatsia taniji jivi ayaibitsaëtoxanetonë. Bajarapamonae daxitanacuanëpijiviyajuvënëvi, daxitaviriajumeviyajuvënëvi. Bajarapamonae nubena Dioso peecaetrone pitabarata, Corderonë ata pitabarata. Jivi cajena ayaibitsaëtoxanetonë bitso. Itsajivi ata cajena apo cajëpaetsi penamatajëitsicapanaenexa bajarapajivibitsaëtoxanetonë. Daxita bajarapamonae ëpenioponaejavanë penaxatabivi. Cobenanubena benaxarebobaxutonë.

¹⁰ Daxita bajarapajivibitsaëtoxanetonë vavajai tsanubenaе ayaijumeta. Jumaitsi tsanubenaе mapacueniaje:

VajaDioso, ponë Corderonë yajavaeca tronota, bajaraponë nacacapanepa pibisiacuene vajaexanaeconomics. Bajarapacuenia nacacapanepa Corderonë pejamatabëcueneta, jai tsanubenaec bajarapajivibitsaëtoxanetonë.

¹¹ Trono matatoyorotsia nubena cuatro ponëbeje piaithiavi. Nexata piaithiavi pepënëvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Daxita ángelevi ira taenubenaeya bobena irata Dioso peecaetrone pitabarata. Bobenaeya pexaniajamatabëcuene rajutanubena Diosojavabelia.

¹² Bajarapaángelevi ira taenubenaeya jumai tsanubenaec mapacueniaje: ¡Bajara itsi tsane! PatajaDiosomë, pexaniajamatabëcuene pacarajutabianatsi daxitamatabijavabelianexa. Nenivenivenaecotia nexainaejava, daxitacuene neyapëtaenëcuene ata, pacavajunupaebapon-aenatsi daxitajivijavabelia. Daxitajivi casivajamatabëcuenebarëya tsabiabi tsane itsa yavenonabianame bajarapamonae. Daxitajivi cayaiyataeyabiabiana. Bitso cajena niasaenë daxitamatabijavabelianexa. Cajamatabëcuenecaëjëpa nexanaenexa daxitacuene ata daxitamatabijavabelianexa. Bajara itsi tsane, jai tsanubenaec irataeya daxita bajarapaángelevi Diosojavabelia.

¹³ Nexata itsanë ancianonë nejumaitsi:

—¿Detsa mapamonae penioponaecjava penaxatabivije? ¿Detsa verena pata bajarapamonae? nejai ancianonë.

¹⁴ Xanë nexata jumaitsinë:

—Xamë raeta jane yapëtaneme, janë ancianonëjavabelia.

Nexata ancianonë nejumaitsi:

—Mara pamonaeje nacua pecopiarucaevajënaeya, piyaijunavixaneto pecanicabanubenaevimije. Corderonë pesivatëpaexaetsi, bajarapamonae pibisiacuene pexanaeconomics vecuaajibiaexanatsi baja. Bajaraxuata penioponaecjavanë naxataba.

¹⁵ Bajaraxuata baja bajarapamonae nubena Dioso peecaetrone pitabarata. Copatsinejeva Dioso petonacuenebijava, tonacuenebavanapa Dioso pijatemplobota. Dioso, ponë eca tronota, bajaraponë evetsianatsi peyavajinavanapaexae.

¹⁶ Bajarapamonae baja apo namatavenonae tsane pexaejava. Apo namatavenonae tsane mera ata. Icotia ata apo tsajavi tsanetsi. Icotia piatajujava ata apo jamatabëitonotsi tsanetsi.

¹⁷ Bajara itsane tsipaji Corderonë, ponë nuca trono pitabarata, evetsianatsi bajarapamonae. Evetsianatsi xaniavaetsia. Pacuenia pijaoveja pevetsinë xaniavaetsia baeveta pijaoveja, bajarapacuenia evetsianatsi. Bajaraponë matabaponabianatsi itsabelia rubena iravetsina pepitsaparubenaemeranë, jivi piitavayaexanaemeranëjavabelia. Daxita bajarapamonae Dioso pijanacuatatsia jamatabëcuenebarëya tsavanapae tsane. Tsipaji ajibi tsane peyabaranuejavanexa, nejai ancianonë mapacueniaje.

8

Sietejava sello yabara pelivaisi

¹ Icatsia Corderonë sarananuca cuyalatobaxuto piupicatsatarutsisello, sietejava. Nexata jane baja athëbëtsia ajumejibi. Bajayaepatovajëto ajumejibi.

² Bajaraxuacujinae icatsia taniji siete ponëbeje ángelevi. Dioso pitabarata nubena. Nexata bajarapaángelevi rajutatsi siete patrompetabeje.

³ Icatsia xuacujinae itsanë ángelnë najetaruca. Cobenanajetaruca orota pexanaevaxi. Bajarapavaxita pecaponaenexa pitatsajaviitaire. Nexata nucojopa altarvënëjava pitabarata. Nexata jane baja rajutatsi ayaijava petuxujuvijava. Nexata bajarapatuxujuvijava Dioso tane daxita Dioso pijajivi pevajëtaponaejumemi Diosojavabelia bepematajërëabijava. Nexata bajarapatuxujuvijava ángelnë buata altarjumata. Bajarapaaltar, orota pexanaealtar, nuca Dioso peecaetrono pitabarata.

⁴ Nexata jane baja bajarapatuxujuvijavami ángelnë tajuita. Nexata petsëxë athëbëabetsia junaya. Patsëxë athëbëabetsia junaya altarjavavetsia, ángelenë pecobejavavetsia junaya Diosojavabetsia. Bajarapatsëxë yajavajunaya Dioso pijajivi pevajëtaponaejumemi Diosojavabelia.

⁵ Bajaraxuacujinae ángelnë altarjumavecua nota pitatsajaviitaire. Bajara-paitatsajaviitaire vënëta pijavaxi. Bajaraxuacujinae ángelnë bajarapaitatsajaviitaire bajarapavaxi ënëtuatuajëvecua othotajarabareca irabereca. Nexata yamaxë iratareca najumeta. Yamaxë binebinejai iratareca. Iranë jane baja ayaicuenia najëaba.

Siete patrompetabeje yabara pelivaisi

⁶ Siete paángelbeje canaveretanubena pijatrompetanë piobinexa.

⁷ Nexata jane baja penamataxainaeángelnë oba pijatrompeta. Nexata bitso pecainejebimatarejetonë othopareca irabereca. Bajara pacainejebimatarejetonë matajërëaba isoto. Matajërëabanua pijana yajava. Nexata jane baja ira tajuepona daxita nacuanëjava. Panacuanëjava ira tajuepona, pairavajëto tajuepona matatoxenetsia itsiata yajuvënënacopatapona. Daxitaira apo veriajavapona. Nexata panacuanëjava ira tajuepona, daxita naejavanëmi, pejuvijavanëmi ata, yajavatajuepona.

⁸ Bajaraxuacujinae icatsia pecotocaeviángelnë oba pijatrompeta. Taniji bepinijitsutoxaneto petajueyecaejava. Bajaraxua jopareca manuameniareca. Manuamenemi nexata pijana. Pamenevajëto ëpijanamene tsarucae, bajarapamenevajëto matatoxenetsia itsiata pijananejeva yajuvënënacopata.

⁹ Pamanuamene ëpijanamene tsarucae, bajara pamanuamenepijidujuaimi tëpa baja. Pamanuamene pijinia pijananejeva nacopata, bajara pamanuamenepijidujuai apo tëpae. Pamanuamene ëpijanamene tsarucae, bajarapamanuamene perubenaebarcoxanetonëmi ata napeneta. Pamanuamene pijinia pijananejeva nacopata, bajarapamanuamene perubenaebarcoxanetonë apo napenetsi.

¹⁰ Bajaraxuacujinae icatsia acueyabiángelnë oba pijatrompeta. Nexata pinijituluputoxaneto jopareca irabereca. Bajarapatuluputoxaneto tajuerucaponareca. Pacuenia bepinijiiisotocotiaxaneto bacotia itsi, bajaracotia itsi tsarubareca. Panacuata jopa bajarapatuluputo, bajarapanacuata daxita perubenaemenianëmi, bijiana baja. Iravetsina mera pepitsaparubenaevanëmi ata, bijiana baja. Nexata baja abeje daxita bajarapameranëmi. Panacuata apo jopae bajarapatuluputo, bajarapanacuata perubenaemenianë, apo bijiana. Nexata xanepana daxita bajarapameranë. Mera iravetsina pepitsaparubenaevanëjava ata, xanepanarubena.

¹¹ Bajarapatuluputo pevënë Ajenjo. Pameraxavareca jopareca bajarapatuluputo, bajarapamera atsaxa baja. Jivi ayaibitsaëttoxanetonë tëpa penatsiapaxae bajarapamera.

12 Bajaraxuacujinae icatsia cuatroángelnē oba pijatrompeta. Nexata jane baja itaxutobijiana matabipijijuameto. Itaxutobijiana meravipijijuameto ata. Itaxutobijiana tuluputonē ata. Nexata matabipijijuameto bijiaya naitayota. Meravipijijuameto ata bijiaya naitayota.

13 Bajaraxuacujinae icatsia taniji itsanē ángelnē pepunanajetarucaenē. Pepunanajetarucaenē ángelnē jumai tsanajetarucaē ayaijumeta:

—¡Toabejetsi baja tsaponae tsane mapanacuapijivije itsa obiana trompeta acueyabi paángelnēbeje penacopabivi! jai tsanajetarucaē ángelnē pepunana-jetarucaenē.

9

1 Bajaraxuacujinae icatsia cincoángelnē oba pijatrompeta. Nexata taniji athēbēvereca ángelnē perunaejavareca irabereca. Nexata bajarapaángelnē Dioso rajutatsi llave, iravetsina pepitsapaemēthēxaneto pijallave.

2 Nexata jane baja bajarapallaveta ángelnē mēthēxaneto vēpacasarana. Ángelnē jane baja vēpata mēthēxaneto. Nexata bajarapamēthēxanetojavatsina pitsapaina ētsēxēxaneto. Pitsitsēxēxaneto bapitsapa pinijipabixaneto itsa tajuiŕa, bajarapitsitsēxēxaneto pitsapaina bajarapamēthēxanetojavatsina. Nexata bajarapatsēxēta matabipijijuametomi itaxutoaitaquiriayaexana. Itaboxo ata aitaquiriayaexana.

3 Bajarapatsēxējavaverena pitsapa bosome. Bajarapabosome daxitanacuanējava punanajetarubena. Bajarapabosome caējēpaeyaexanatsi jivi pecacuatsinexa pebosotota. Pacuenia aqueto cacuata pebosotota, bajarapacuenia jivi pecacuataponaenexa.

4 Bajarapabosome apo itorobitsi pebijianaenexa itsacuenjava ata xua pejivjava. Nexata bajarapabosome apo bijianaponae pona. Apo bijianaponae naejavanē ata. Tsipaji itorobatsi pecacuatsinexa saya ējivi. Nexata pamona Dioso pijasellota apo itapaitanerutsitsi, bajarapamonae pecacuatsinexa.

5 Itsiata baitsi jane apo tocopatsitsi caecuenia pebeyaxuabaponaenexa. Tocopatatsi saya jivi itsa cacuata, penavixaetaeyaexanaenexa cinco pajumetobeje. Nexata bajarapabosome jivi itsa cacuatsianatsi, bitso jivi navixaetaena. Pavixaevajēto aqueto itsa cacuata, baatane, bajarapavixaevajēto jivi navixaetaena.

6 Nexata pamonaē cacuatsianatsi bajarapabosome, jitsipaena picani petēpaenexa bajayajebi penavixaetaeyaniva. Itsiata baitsi jane bajarapamonae Dioso abaxē apo tocopatsi tsane petēpaenexa. Penabeyaxuabinexa ata, Dioso apo tocopatsi tsane.

7 Bajarapabosome ajumabocotaja. Pacuenia vajabitsaē itsa nabejitsia, pijacaballo bajumaxataba hierropananē pijavajabitsaē petojorojoronaeyanivatsi, bajara itsanubenae bajarapabosome. Beorota pexanaecoronanē namataxtabanubena. Pacuenia pebi itabaraitsi, bajaraitabaraitsi.

8 Pematana xaina. Pacuenia petiriva matanaitsi, bajara matanaitsi. Pevonotonē pijinia benevēthēvonotonē.

9 Bajarapamonae pejumabocotonē yajavanaexana baja cajena behier-rojumabocotonē pejorojoronaeyanivatsi itsajivi ata. Pecorofe najumeta. Pacuenia vajabitsaē penabenexa itsa pona pijavajabitsaējajavelia, caballo itsa roboca carrozavēnēmonē banajumeta, bajarapacuenia najumeta bosome pecorofe.

10 Bajarapabosome pebosotonēcopiata xaina peotonē jivi pecacuatsinexa. Pacuenia aqueto pebosotocopiata xaina peeto, bajnia benevēthēvonotara

itsi. Tocopatatsi peetota pecacuatsinexa jivi, jivi penavixaetaenexa cinco pajuametobeje.

11 Bosese cajena xaina ángelnē pitorobinēnexatsi, pinijimēthēxaneto pevetsinē. Bajarapaángelnē hebreojumeta pevēnē Abadón. Griegojumeta pijinia Apolión, “Peverebiabinē,” pejajiume.

12 Bajarapapiayaicuene penamataxainaejava. Itsiata baitsi jane abaxē saica anijavabeje.

13 Bajaraxuacujinae icatsia seisángelnē oba pijatrompeta. Paaltar nuca Dioso pitabarata, bajarapaaltarjavaverena penajumetsijava, ayaijume, jumetaniji. Bajarapaaltar orota pexanaealtar. Bajarapaaltar cuatro pamataetobeje xaina. Caeupi canacujitsia mataerucapona. Bajarapamataetonē tuatujēta jumepitsapa.

14 Bajarapaaltarjavaverena jumaitsi seisángelnē trompeta pexainaenējavabelia mapacueniaje:

–Isicare cuatro ponēbeje ángelevi, pamonaē cēbejebatsi pinijimenejavata, Eufratesvēnē menejavata, jai bajarapaaltarjavaverena.

15 Nexata jane baja pecēbejebiánglelevimitsi isicatsi. Isicatsi bajarapaánglelevi pebenexa jivi. Bajarapaánglelevi jivi ayaibitsaētonē beponaejitsia daxitanacuanējava. Bajara saya cajena ěxuanexa, paánglelevi Dioso jamatabēcueta pexainaenējavabelia mapacueniaje:

–Isicare cuatro ponēbeje ángelevi, pamonaē eneevetanubena Dioso pitorobinexatsi jivi pebeponaenexa paepatota tocaējētatsi.

16 Nexata icatsia jumetaniji bajarapaánglelevi pijajivi, vajabitsaēvi, pitorobijava peponaenexa caballota. Doscientos millones ponēbeje vajabitsaēvi pona jivi pebeponaenexa daxitanacuanējava.

17 Bemajitsinaebota taniji bajarapamonaē caballota peponaejava. Vajabitsaēvi namēpabēxataba hierropananē pejorojoronaeyanivatsi pijavajabitsaē. Vajabitsaēvi penamēpabēxatabijavanē itabēta acueyabi paviriabejevavata. Itabēta mapaviriabejevataje. Itabēta petsobijavata. Itabēta perajanaejavata. Itabēta pevayanaejavata. Bajarapaviriabejevavata itabēta. Pacuenia nevēthēmatabocoto itsi, bajaramataboco itsi bajarapacaballuanē. Pecuibovojotonējavavetsina pitsapa pitarunutsicotia, ětsēxē yajava, azufre ata yajava.

18 Xuanē caballuanē pecuibovojotonējavavetsina pitsapa, bajaraxuanē jivi ayaibitsaētoxanetonē yatēpapona daxitanacuanējava. Pabitsaētovajēto tēpa, bajarapabitsaētovajēto matatoxenetsia nacopata mapanacuataje.

19 Bajarapacaballuanē caējēpatsi jivi pebeponaenexa pecuibovojotonēta, pebosotonēta ata. Bajarapacaballuanē pebosotonēupianē bejomomatabocotonē. Pacuenia jomo pematabocotota caējēpatsi jivi pesininexa pebeyaxuabinexa, bajara itsi bajarapacaballuanē pebosotonēupianē.

20 Itsiata baitsi jane pamonaē peyajuvēnētēpaēvi, pamonaē penacopabivi, bajarapamonaē tsiteca pibisiacuene exanavanapa. Apo copatsi dovathivijavabelia penavajēcabiabijava. Apo copatsinua pecobeta jumapecataeya pexanaenējavabelia ata penavajēcabiabijava. Bajaraxuanē saya pexanaenēanē oronanitonēta, platananitonēta ata, broncejavananēta ata, ibotonēta ata, naejavanēta ata. Nexata bajaraxuanē apo caējēpaetsi petaenexa. Apo caējēpaetsi pejumetaenexa ata. Apo caējēpaetsi peponaenexa ata.

21 Pamonaē peyajuvēnētēpaēvi, pamonaē penacopabivi, bajarapamonaē apo copatsi jivi pebejava. Apo copatsi penajorobijava ata. Apo copatsi

pevitota pibisiacuene pexanaejava ata. Apo copatsi penacobetoxotsijava ata.

10

Pacuenia Juan tane ángelnē pecobenanucaejava cuyalatobaxutoyo yabara pelivaisi

¹ Icatsia taniji itsaángelnē athēbēvetsica perunaejavatsica. Runaica mapanacuayabetsicaje. Bajarapaángelnē bitso piasaéángelnē. Itarērēbo tuat-uajēta najetaruca. Natsimatatsēnērutanajetaruca aravalibo. Itabaranaitayotanajetaruca. Pacuenia matabapijijuameto baitayota, bajarapacuenia itabaranaitayotanajetaruca. Petopabeje pijinia pacuenia isotocotia tsofia, bajarapacuenia cotiatsobia.

² Cuyalatobaxutoyo baxupatanuca. Pecujanenia pataxu nataxunutanuca manuameneboxovereca. Petsavenonenia pijinia pataxu nataxunutanuca irajumavereca.

³ Nexata vavajai tsaxuabi ayaijumeta. Pacuenia nevēthē itsa fiaba ayaijume, bajarapacuenia ayaijume. Pevavajaicujinae siete payamaxēbeje najumeta athēbētatsia.

⁴ Yamaxē penajumetsicujinae, yaquinaejitsianē picani pajamatabēcuene yabara yamaxē penajumetsijava neyapētaeayaexana. Itacarajeta athēbēvetsica tanejumaitsijava, jumetaniji. Nejumaitsi athēbēvetsica mapacueniaje:

—Muetsia saya xainare pajamatabēcuene yabara yamaxē penajumetsijava, cayapētaeayaexana. Pētsa yaquiname bajarapalivaisi, nejai athēbēvetsica.

⁵ Bajaraxuacujinae ángelnē, ponē nataxunutanuca manuameneboxovereca, irajumavereca ata, bajaraponē nacobeyotanuca athēbēabetsia pecujanenia pacobe.

⁶ Bajarapaángelnē nacobeyotsiaya jumai tsanucac:

—Dioso, daxitamatacabijavabelianexa peponaponaenē, caecuenia exana mapanacuaje, itaboxo yajava. Nexata caecuenia yajavaexana mapanacuapijicueneje, itaboxopijicuene ata yajava. Caecuenia yajavaexana manuamene ata, manuamenepijicuene ata yajava. Bajaraponē pitabarata najumecapanepaeya cajumaitsijitsiatsi mapacueniaje. Copiapatsijitsia rabaja pacuenia Dioso tajēvelia najamatabēxaina pexanaenexa.

⁷ Itsa rabaja paepatota siete ángelnē obiana pijatrompeta, bajarapaepatota Dioso jane baja taxuxuabiana pexanaejava pacuenia baja cajena tajēvelia Dioso najamatabēxaina pexanaponaenexa jivijavabelia. Muetsia pexainabuatsilivaisimi itajētsiana. Copiapatsiana jane baja pacuenia bajajata Dioso tajēvelia najumecapanepaeya jumaiitsi profetavimijavabelia, jai tsanucac nacobeyotsiaya ángelnē.

⁸ Copiaya pajume jumetaniji athēbēvetsica tanejumaitsijava, bajarapajume icatsia jumetaniji. Nejumaitsi icatsia athēbēvetsica mapacueniaje:

—Ponē ángelnē nataxunutanuca manuameneboxovereca, irajumavereca ata, bajarapaángelnē cujiremelia. Vecuapire pacuyalatobaxutoyo bajarapaángelnē baxupatanuca, nejai athēbēvetsica.

⁹ Nexata kujiliajē ángelnē. Vajētajē nexata tanerajutsinexa bajarapacuyalatobaxutoyo. Bajarapaángelnē nejumaitsi mapacueniaje:

—Ājā, pire baja. Xaema necuiboxaicaenexa. Pacuenia jabēra xaica, bajara itsi mapacuyalatobaxutoyoje. Itsiata baitsi jane necotsorotubereca atsaxa tsane, nejai ángelnē.

¹⁰ Nexata baja ángelnë bajarapacuyalatobaxutoyo vecuapitajë. Xaniji jane baja. Nexata jane baja cuiboxaicajë. Pacuenia jabëra xaica, bajara itsi. Itsiata baitsi jane taquijonicujinae tacotsorotuabereca atsaxa.

¹¹ Nexata icatsia ángelnë nejumaitsi:

–Tspaebare pacuenia Dioso sivanajamatabëxaina daxitanacuanëpijivi. Tspaebare pacuenia Dioso sivanajamatabëxaina daxitaviriajumevi ata. Tspaebare pacuenia Dioso sivanajamatabëxaina caenacua canacujitsia pevetsinëanë ata, nejai ángelnë.

11

Pacuenia itsamatacabi anijanëbeje jivi tspaebaponaenabeje palivaisi Dioso yapëtaeyaexanaenatsibeje yabara pelivaisi

¹ Icatsia taniji ángelnë. Nerajuta piapianaabo. Nejumaitsi mapacueniaje:

–Nonotapunare. Caponare mapanaeboje necaëjëbinexa Dioso pijatemplobo, necaëjëbinexa altarvënëjava ata. Namataëjëtsianamenua pajivibeje bajarapatemplobota navajëca Diosojavabelia.

² Itsiata pëtsa caëjëtame templobopanabo. Tspaji bajarapapanabo tocopata baja Dioso apo pejumecovënëtsivinexa, pamonaë saicayanacuaverena pepatsivi pejinavanapaenexa. Bajarapamonae jinavanapaena Jerusalén tomarata cuarenta y dos pajuametobeje. Saicayanacuaverena pepatsivi, apo yayatae tsane judíovi pijatomara.

³⁻⁴ Bajayata profetanëmi peyaquinaebaxutota, comparacióncuenia tajëvelia jumaitsi mapacueniaje: “Anijanaebeje, olivonaebeje, anijajavabeje pijinia pitayotanuaejavabeje, nubenaena mapanacuapijivi pijatuxanenë Dioso pitabarata,” jai. Bajarapacuenia comparacióncuenia tajëvelia itsa jumaitsi, tajëvelia vajunupaeba anijanëbeje jivi petsipaebanajetarucaejavanexabeje palivaisi Dioso yapëtaeyaexanaenatsibeje. Nexata anijanëbeje Dioso itorobiana jivi petsipaebanajetarucaenexabeje palivaisi Dioso yapëtaeyaexanaenatsibeje. Palivaisi bajaraponëbeje Dioso yapëtaeyaexanaenatsibeje, bajarapalivaisi mil doscientos sesenta pamatacabibeje jivi tspaebanajetarucaenabeje. Naxatatsianabeje piayopapaëbërëjava. Bajarapacuenia naxatatsianabeje bitso pesivajamatabëcuenebëjaixabeje tsane pamonaë apo peyayataevi Jerusaléntomara, nejai ángelnë.

⁵ Itsajivi itsa jamatabëitsacueniabianatsibeje, bajaraponëbeje nayajivitajuit-sianabeje pecuivojotovetsina pepitsapaecotiata, pitarunutsicotiata.

⁶ Bajaraponebanajetarucaenabeje. Naxatatsianabeje piayopapaëbërëjava. Bajëbeje caëjëpaenatsibeje pitavetsinexabeje ema pejopaeyaniva. Pamatacabibeje jivi tspaebanajetarucaenabeje palivaisi Dioso yapëtaeyaexanaenatsibeje, bajarapamatacabibeje abaxë ema apo jopaeayaexanaeabeje tsane. Caëjëpaenatsibejenua mera ata pijanara pexanaenexabeje. Caëjëpaenatsibejenua daxitaviria piayaicuene pecapitsapaenexabeje pamatacabita jitsipaenabeje.

⁷ Bajaraponëbeje itsa veretsianabeje palivaisi Dioso yapëtaeyaexanaenatsibeje jivi petsipaebanajetarucaejavabeje, bitso piayainë pitsapaenina pinijimëthëxanetojavatsina. Bitso piayainë pitsapaenina pebenexatsibeje bajaraponëbeje. Nexata amoneyabianatsibeje. Nexata baja bexaxuabianatsibeje.

⁸ Nexata petëpaenëbeje boacaenabeje Jerusalén tomaraxaneto callejavata. Bajarapatomarata bajayatami vajatuxanenë ata cobematabiabarutatsi cruzajavabelia. Bajarapatomara yabara jivi itsajavata: “Sodomatomara

raja,” jai tsabiabi. Itsajavata: “Egiptotomara raja,” jai tsabiabi. Bajarapacuenia jumai tsabiabi Jerusaléntomara yabara tsipaji bajarapatomarapijivi bitso pibisiacuene exana.

⁹ Nexata bajaraponēbeje, Jerusaléntomara callejavata petēpaenēbeje, bo-caenabeje acueyabi pamatacabibeje epatua. Tsipaji Jerusaléntomara pevet-sivi apo tocopatsi tsane itsajivi ata pemēthētsinexatsibeje bajaraponēbeje. Nexata daxitavirijamevi, daxitanacuanēpijivi ata, taeyabuatsianatsibeje.

¹⁰ Dioso apo pejumecovēnētsivi sivajamatabēcuenebarēyatsibeje tsane petēpanucaejavabeje. Bitso cajena barēya tsane Dioso apo pejumecovēnētsivi. Nexata pebarēyajamatabēcuene fiesta exanaena. Namataenetsia narajutsiana amoneya itsacuenejavanē. Bajarapacuenia exanaena Dioso apo pejumecovēnētsivi bajaraponēbeje petēpaejavabeje yabara. Tsipaji Dioso apo pejumecovēnētsivi jumaitsi tsane: “Copiaruca rabaja maponēbeje livaisi vajanacatsipaebabiabijavaje. Copiaruca baja vajanacajamatabēitonotabiabijava,” jai tsane.

¹¹ Itsiata baitsi jane petēpaecujinaebeje, acueyabi pamatacabibejecujinae itsamatacabi epatua, icatsia Dioso piasaējumali rajutsianatsibeje. Nexata petēpaejavabejevecua, namatacotsianabeje. Daxita cajena pamonaē taeyabu-atsianatsibeje petēpanucaejavabeje, bitso cunjunavianatsibeje.

¹² Bajaraxuacujinae bajaraponēbeje jumetaenabeje athēbēvetsica piniji-jumeta pejumaitsijavatsibeje: “Pajunaiminabeje,” pejaijavatsibeje. Nexata bajaraponēbeje junaeniabeje athēbēabetsia itarērēbo tuatuaējjavabetsia. Daxita pitoyavitsibeje pētaenubenaenatsibeje.

¹³ Bajara jane paepatota ira najēabiana. Nexata Jerusalén tomarata, itsajota diez pabobeje najuaenaena, caebo yajuvēnējopaponaena. Nueve nexata pabobeje nacopataponaena. Nexata Jerusalén tomarata ayaijava bo othopaena. Siete mil pijinia pajivibeje bajarapairanajēabita tēpaena. Jerusalén tomarapijivi, pamonaē nacopabiana, bitso cajena javaviana. Nexata bajara-pamonaē pecajunavi, Diosojavabelia jumaitsi tsane:

—Diosomē, ayaijamatabēcuenenēmē bitso, jai tsane pecajunavi Diosojavabelia, athēbētatsia pecaenējavabelia.

¹⁴ Anijapiayaicuenebeje rabaja panepaena. Itsiata baitsi jane icatsia itsajava piayaicuenejava bepijia najetarucaena, acueyabijava.

Sietenē baja ángelnē pijatrompeta piobijava yabara pelivaisi

¹⁵ Sietenē jane baja ángelnē oba pijatrompeta. Nexata athēbēvetsica piniji-jumeta pejumaitsijava, jumetaniji. Jumaitsi mapacueniaje:

Daxitanacuanēpijivi rajane baja vajatuxanenē Cristobeje, Diosobeje, evetaponaponaenabeje. Bajaraponēbeje evetaponaponaenabeje daxitamatacabijavabelianexa, pejaijava athēbēvetsica, jumetaniji.

¹⁶ Nexata pamonaē veinticuatro ponēbeje ancianovi, pamonaē ena pija-tronota Dioso pitabarata, daxita bajarapamonaē irataeya bobena.

¹⁷ Bajarapamonaē ancianovi irataeya jumai tsanubenae Diosojavabelia: Xamē Diosonēmē, nijamatabēcuenesaēnē daxita mapanacuanē pevetsivivecuae. Ajena, pamatacabi, ponaponame. Bajayata mapanacuae nexanaevajēnaeya ata, ponaponame. Daxitamatacabijavabelianexa ata ponaponame. Pexaniajamatabēcuene pacarajutatsi. Tsipaji baja taxuxuabame pinijisaēta nevetaaponaponaenexa daxita mapanacuanēpijivije.

18 Daxita mapanacuanëpijivije cabaraanaepana bitso. Bajaraxuata tocopiapatatsi baja nenaneconitsiaexanaenexa daxita bajarapamonae. Tocopiapatatsinua baja petëpævimi ata nenaneconitsiaexanaenexa. Tocopiapatatsinua baja nijajivi, xuavajëto catonacuenebavanapa, bajarapitsijavavajëto nerajutsinexa pecatonacuenebavanapaematamo. Pamonae catotsipæbavanapa nijumelivaisi itsamonaëjavabelia, bajarapamonae jane baja rajutsianame xua toxainame bajarapamonae nerajutsinexa. Pamonae ayaijamatabëcuene pexainævi ata, cavënëlivaisiyaiyatane. Pamonae beveliajamatabëcuene pexainævi ata, cavënëlivaisiyaiyatane. Bajarapamonae ata jane baja rajutsianame xua toxainame bajarapamonae nerajutsinexa. Tocopiapatatsinua baja pijinia neverebiabinexa daxita pamonae bijiana mapanacuaje, pamonae ata jamatabëcuenebijiana pecajumecovënëtsivi, jai tsanubenae irataeya ancianovi Diosojavabelia.

19 Nexata athëbëtatsia Dioso pijatemplobo nabaupata. Bajarapatemplobo ënëtatsia taeyabuatsiajë baula. Bajarapabaulaënëta jeba Dioso pejumelivaisi peyaquinajebijava. Bajarapaitane jumai tsarubenae pacuenia Dioso najumecapanepaeya jumaisi pijajivi pecapanepaenexa pijaneconivecua. Yamaxë binebinejai. Najumetanua. Ira najëbanua. Bitso pecainejebimatarejtonë irabetsica othopaica pinijicuenia.

12

Pacuenia Juan athëbëtatsia tane dragón bitso pianaepanaejava yabara pelivaisi

1 Athëbëtatsia ayaiyuene naitajëta vajanacayapëtaeyaxanaenexa pacuenia itsamatacabi pevajënaeyabelia itsi tsaponaejitsia mapanacuataje. Athëbëtatsia petiriva taenutajë. Petiriva jumanava naitayotanuca. Pacuenia matacabi pijijuameto baitayota, bajarapacuenia jumanava naitayotanuca. Meravipijijuametojavavelia nataxunutanuca. Namataxatatatanuca doce patuluputobeje pexinaecorona.

2 Bajarapova petiriva penacueto peyacotajinaeva. Pevixænotsijavatatsi bitso yaaëajai.

3 Nexata bajarajotatsia naitajëta piayainë, petsobianë, pinijinëxaneto dragón, baitsi dovathi. Xaina siete pamatabocotobeje, diez pamataetobeje. Caematabocoto canacujitsia namataxatatapona corona.

4 Bajaraponë, dragón, nabosovebabia. Nexata penabosovebabejavata tulupu ayaijava penetsica irabetsica. Xuavajëto tulupu othopaica irabetsica, bajaraxuavajëto matatoxenetsia nacopabarubenaya athëbëtatsia. Bajaraponë, dragón, nucojopa penacueto pevixænotsivatitsi pitabarata, bajarapova itsa vecuanaexanatsi penacueto, pecoxixænexatsi picani.

5 Nexata jane baja petiriva vecuanaexanatsi pebinëyo. Bajaraponëyo caponatsi Diosojavabetsia Dioso pijatronota peecaenexa. Nexata baja bajaraponëyo apo xaetsi dragón. Bajaraponë itsamatacabi mapanacuata jivi pepo pevetsinë tsane. Itsa evetsiana, ajumesaëya itorobabiabiana pejumecovënëtsinexatsi.

6 Nexata petiriva penacuetonëyo pevecuanaexanaecujinaetsi, najetabajirava petusato nacuayabelia, itsabelia Dioso tsivajënaexaniavætsi peponaponaenexa. Bajarajota pexaejava baja Dioso rajutatsi mil doscientos sesenta pamatacabiobeje.

7 Bajaraxuacujinae athëbëtatsia vajabitsaë exana. Angelevi penamatacaitorobinë, Miguelvënënë, pijaängelevi yajava, barënbabia dragónjavabelia. Dragón pijinia, pijaängelevi yajava, barënbabia Migueljavabelia.

8 Itsiata baitsi jane dragón cujirumoneyabatsi. Nexata apo tocopatsitsi caenē ata dragón pijajivitonē penacopatsinexa athēbētatsia.

9 Dragón cajena ayainēxaneto. Itsiata baitsi jane xuabicatsi athēbēvetsica daxita pijajivi yajava. Nexata bajaraponē pevēnē Dovathi. Itsavēnē Satanás. Bajaraponē bajayata itsa naitajēta jivijavabelia, naitajēta bejomocuenia. Bajaraponē jivi yamaxēitojorobabiaba daxitanacuanējava.

10 Nexata jumetaniiji piniijumeta athēbēvetsica pejumaitsijava. Jumaitsi mapacueniaije:

—Copiapata rabaja Dioso vajanacacapanepaejavanexa vajaneconivecua. Copiapata rabaja Dioso pesaēta jivi pevetaaponaponaenexa. Copiapata rabaja Dioso pijajivi pitorobaponaenexa. Copiapata rabaja Cristo ata pitorobaponaenexa mapanacuajavaje. Bajarapacuenia copiapata baja daxita bajarapacuenie tsipaji baja ponē neconitabiaba Diosojavabelia Dioso vajanajuajumecovēnētavanapaevi, bajaraponē baja xuabicatsi athēbēvetsica. Baitsi dovathi. Bajaraponē picani Dioso pitabaratsia nuca. Nexata bajaraponē daxita matabijebi, daxitameravijebi ata, Diosojavabelia neconitabiaba Dioso vajanajuajumecovēnētavanapaevi.

11 Dioso vajanajuajumecovēnētavanapaevi pejumecovēnētsixae Cristo pevivatēpaejavatsi cruzata, cueneamoneyabapona dovathi. Bajarapacuenia cueneamoneyabapona tsipaji navajunupaebaponanua itsamonaejavabelia Cristo pecapanepaejavanexatsi pijaneconivecua. Dioso vajanajuajumecovēnētavanapaevi jamatabējumai tsabiabi: “Itsa nebeyaxuabiana Dioso pejumelivaisi yabara, jema baja nebeyaxuabiana,” jamatabējai tsabiabi.

12 Athēbēnacuatatsia panejinavanapaevi, pasivajamatabēcuenebarēyamēre Dioso mapanacuayabetsicaje papecavecuaxuabijavatsica dovathi. Mapanacuataje panejinavanapaevi, bitso cajena bepajiohimē tsane. Paxamē ata, manuameneta panejinavanapaevi, bitso cajena bepajiohimē tsane. Bajarapacuenia bitso bepajiohimē tsane tsipaji baja panetuatuajēatsica dovathi xuabicatsi. Nexata baja aeconoxae bitso bajaraponē anaepanapona. Tsipaji baja yapētane caematacabibeje saya petonacopatsijavatsi pexuabinexatsi infernojavabelia, pejaijume athēbēvetsica piniijumeta, jumetaniiji.

13 Nexata dragón, ponē dovathi, itsa yapētane athēbēvetsica pexuabijavatsitsica irabetsica, nexata barajinapona pova vecuanaexanatsi pebinēyo.

14 Itsiata baitsi jane bajarapova rajutatsi anijacorofetobeje, becotsalacorofetobeje. Bajarapova nexata dragón vecuapuna tajēbelia, petusato nacuyabelia, bajarajotalia peponaponaenexa. Nexata bajarajotalia Dioso rajutabiabatsi pexaejava acueyabi pavaibeje epatua.

15 Dragón pecuibovojotuatsina capitsapa mera, ayaira. Pecuibovojotuatsina pepitsapaemera naexana pepamene pecaponaenexatsi picani petiriva.

16 Itsiata baitsi jane petiriva Dioso yavenonatsi. Ira nexata navoconareca ayaijava. Nexata pamerami dragón pecuibovojotuatsina pitsapaina, bajarapamēthēareca jonēca.

17 Bajaraxuata nexata dragón bitso anaepana petirivajavabelia. Nexata baja icatsi dragón pona petiriva pexi penacopabivi pebejebinexa. Bajarapamonae jumecovēnētavanapa Dioso pejumelivaisi pitorobicueniatsi. Bajarapamonae caasaē tsavanapaenua penavajunupaebijava Jesucristo pejumecovēnētavanapaejava. Nexata bajarapamonae dragón tsimaxēponatsi pebejebinexatsi.

13

Pacuenia piayainēbeje pelivaisi Juan yaquina yabara pelivaisi

1 Nucajē manuamene tajetabota. Nexata taenucajē manuamenejavatsina pepitsapaejavatsina piayainē. Siete pamatabocotobeje diez pamataetobeje pexaināenē. Caemataeto canacujitsia xainapona corona. Caematabocoto canacujitsia Dioso apo pejitsipaevēnēanē itanerubena.

2 Ponē piayainē taenucajē pepitsapaejavatsina, benevēthē picani. Itsiata petaxu betsonētaxu. Pecuibovojoto pijinia benevēthē petsobianēcuibovojoto. Bajaraponē nasaērajutatsi dragón. Pijatrono ata rajutatsi. Jamatabēcuene caējēpaeyaexanatsinua ayaicuenia pitorobinexa daxitajivi mapanacuajavaje.

3 Piayainē caematabocoto matabocovajēnēbatsi apo bepeyaasaēvajēnēnexa itajara. Itsiata baja bajarapavajēnē matanacēta. Nexata daxitanacuanēpijivi itsa tane bajaraponē pematavajēnēnacētsijava, bitso jamatabēcuenenabenajaca. Nexata bajarapamonae jumecovēnēta bajaraponē.

4 Dragón tocopatatsi pitorobinexa daxitajivi mapanacuajavaje. Bajaraxuata daxitajivi pematabacabēta navajēcabiaba dragónjavabelia. Pematabacabēta navajēcabiabanua piayainējavabelia ata. Bajarapamonae najumaitsi mapacueniaje:

—Ajibi cajena itsanē ata pejamatabēcuenecaējēpaenētsi pacuenia itsi mapa-piayainēje. Ajibi cajena itsanē ata pecaējēpaenētsi pebarēnabenexa maponēje pecueneamoneyabinexa, najai bajarapamonae piayainē yabara.

5 Piayainē tocopatatsinua pibisiacuenia Dioso pebaracuaicuajainexa. Tocopatatsinua pejumaitsiabiabinexa: “Xanē cajena bitso ayaijamatabēcuenenēnē Dioso matatoxenetsia,” pejaitsabiabinexa. Tocopatatsinua pitorobinexa jivi mapanacuajavaje cuarenta y dos pajuametobeje, bāitsi acueyabi pavaibeje epatua.

6 Bajaraponē exanapona pacuenia tocopatatsi. Bitso pibisiacuenia Dioso baracuaicuajai tsabiabi. Dioso pijatemplobo ata pibisiacuenia baracuaicuajai tsabiabi. Athēbētatsia pejinavanapevi ata pibisiacuenia baracuaicuajai tsabiabi.

7 Tocopatatsinua vajabitsaē pexanaenexa Dioso pijajivijavabelia. Tocopatatsinua pecueneamoneyabinexa vajabitsaē itsa exana Dioso pijajivijavabelia. Tocopatatsinua pitorobinexa daxitaviriajumevi ata. Tocopatatsinua pitorobinexa daxita nacuanēpijivi ata.

8 Nexata daxita mapanacuapijivije pematabacabēta navajēcabiaba piayainējavabelia. Dioso nacua pexanaevajēnaeya, Dioso nacua pexanaecujinae ata, bajarapamonae apo vēnērubenaē Corderonē pijacuyalatobaxutota. Corderonē jivi rajuta maticabi apo pevereverecejava pesivatēpaexae cruzata.

9 Itsa pamuxuvojorubename, panatojumetaema mapalivaisije.

10 Pamonaē Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamonaē pijinia Dioso pijajivi espadata bona, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejiobiaexanabiabi atatsi, xanepana xaniavaetsia penajamatabēcuene copatsinexa Diosojavabelia epatua copatsinejeva.

11 Bajaraxuacujinae icatsia taenucajē iravtsina pepitsapaejava itsanē piayainē. Anijamataetobeje pexaināenē. Pacuenia oveja pebito mataeitsi, bajara pemataeitsinē. Itsiata bāitsi jane pecuaicuajaijava, pacuenia dragón pecuaicuajaijava jumeitsi, bajarajumeitsi.

¹² Papiayainē copiaya pitsapaina manuamenejavatsina, bajaraponē yavaponapona. Nexata papiayainē copiaya pitsapaina manuamenejavatsina, nasaērajuta iravetsina papiayainē cotocaevi pitsapainajavabelia. Nexata papiayainē cotocaevi iravetsina pitsapaina, daxita mapanacuapijivi itoroba papiayainē copiaya manuamenejavatsina pitsapainajavabelia pematabacabēta penavajēcaenexa. Baitsi ponē apo bepeyaasaēvajēnēnaxa itajara matavajēnēcēta baja, bajaraponējavabelia daxita mapanacuapijivije pematabacabēta penavajēcaenexa.

¹³ Nexata papiayainē iravetsina cotocaevi pitsapaina, ayai cuene pexanaejava jivi tsitaexanapona. Pitatsajaviitairē ata athēbēvetsica othopaeyaexana irabetsica daxitajivi petaenubenaevavata.

¹⁴ Bajarapacuenia ayai cuene pexanaejava pexanaponaexae, yamaxēitojoroba mapanacuajava pejinavanapaevi. Bajarapaayaicuene exanapona, papiayainē copiaya manuamenejavatsina pitsapaina, pitabarata. Bajaraxuacujinae, papiayainē cotocaevi iravetsina pitsapaina, itorobapona Dioso apo pejumecovēnēsivi pexanaenexa pejumapcataenē. Nexata Dioso apo pejumecovēnēsivi, papiayainē copiaya manuamenejavatsina pitsapaina, bajaraponē jumapecataeya exana jane baja.

¹⁵ Nexata papiayainē cotocaevi iravetsina pitsapaina, caējēpatsi piasaēyaexanaenexa Dioso apo pejumecovēnēsivi jumapecataeya pexanaenē. Nexata asaēyaexana. Bajarapacuenia asaēyaexana papiayainē copiaya manuamenejavatsina pitsapaina Dioso apo pejumecovēnēsivi jumapecataeya pexanaenē pecuacuajainexa. Pamonaē pematabacabēta apo nanavajēcae bajarapajumapecataenējavabelia, beyaxuabiaexanapona.

¹⁶ Papiayainē cotocaevi iravetsina pitsapaina, bajaraponē jane baja pejamatabēcueneta, daxitajivi mapanacuata pejinavanapaevi, cobejumaitanerubaponatsi, pecujanenia pacobe. Itsa jume, pitapathaitota ata itapaitanerubaponatsi. Nexata bajaraponē pejamatabēcueneta itanerubaponatsi daxitajivi. Itanerubaponatsi beveliajamatabēcuenēvi. Itanerubaponatsi ayaijamatabēcuenēvi ata. Itanerubaponatsi ricovi ata. Itanerubaponatsi bepejiobivi ata. Itanerubaponatsi pamonaē ata dajubicuenia canajetsitsi itsamonaevavelia amoneya petonacuenebababinexa. Itanerubaponatsi pamonaē ata dajubicuenia apo canajetsitsi itsamonaevavelia amoneya petonacuenebababinexa.

¹⁷ Nexata pajivi aitanejibi, apo tocopatsitsi itsacuenejavayo ata pecomutsinexa. Apo tocopatsitsinua itsacuenejavayo ata pecanajetsinexa. Paitanetota jivi itanerubaponatsi, papiayainē copiaya manuamenejavatsina pitsapaina, bajaraponē pevēnē. Itsa apo pevēnē, nexata pijanúmero.

¹⁸ Mapajamatabēcuenelivaisi bepacanaējētameje xaniavaetsia paneyapētaenexa. Pajivi yapētane, canaējētsi piayainē pijanúmero. Tsipaji bajaraponē panúmero xaina pevēnēnexa. Panúmero bajaraponē xaina seiscientos sesenta y seis.

14

Pacuenia Juan tane 144.000 pajivibeje Dioso pijajivi penaxēanaejava yabara pelivaisi

¹ Taenutajē Corderonē penucaejava Siónvēnē tsutojumata. Barēnuca ciento cuarenta y cuatro mil pajivibeje. Bajarapamonaē pitapathaitota itanerubena Corderonē pevēnē, Corderonē paxa ata pevēnē.

² Bajaraxuacujinae jumetaniji athēbēvetsica pecuacuajaijava. Pecuacuajaijava najumeta pacuenia bitso banajumeta pinijjonca.

Najumetanua beyamaxë penajumetsijume ata. Pecuaicuaijajava najumetanua pacuenia arpa banajumeta, ayaibitsaëtoxaneto itsa najuaracata.

³ Corderonë pijajivi naxëananubena pejanavaji trono pitabarata, cuatro ponëbeje piaithiavi pitabarata ata, ancianovi ata pitabarata. Itsajivi ata cajena apo caëjëpaetsi pecujaninexatsi bajarapavaji. Pamonae ciento cuarenta y cuatro mil pajivibeje, ëbajarapamonae, caëjëpatsi penaxëanaenexa bajarapavaji. Bajarapamonae neconimatamotatsi Corderonë pijanata. Nexata baja bajarapamonae Dioso capanepatsi mapanacuavecuaje.

⁴ Bajarapapebijivi penaexanaejavaverenacujinae apo naperabëquenetsiatae petirivajavabelia. Apo jamatabëcuenebijianaetsi itsajivi ata. Bajarapamonae pënjajinavanapa Corderonë itsaxuayo ponapona. Bajarapamonae Corderonë pijanata neconimatamotatsi. Nexata baja bajarapamonae capanepatsi Diosojavabelia mapanacuavecuaje. Bajarapamonae baja namataxainaeya capanepatsi Dioso pijajivinexa, Corderonë ata pijajivinexa.

⁵ Bajarapamonae caeto ata apo najumetsënëtsi. Aneconijibi tsavanapae Diosojavabelia.

Pacuenia acueyabi ponëbeje ángelevi vajunupaeba pacuenia itsamatacabi itsijitsia mapanacuataje yabara pelivaisi

⁶ Icatsia ángelnë taniji pepunanajetarucaejava. Canajetaruca pexanialivaisi, apo peverevereacelivaisi. Tsipaebijitsia bajarapalivaisi mapanacujava pejinavanapaevi. Tsipaebijitsia daxitanacuanëpijivi, daxitavirijajumevi ata.

⁷ Ángelnë pinijijumeta jumai tsanajetaruca:

—Diosu cujunaviaya pajinavanapare. “Xamë bitso ayaijamatabëcuenenëmë,” pajamëre tsabiabi Diosojavabelia. Copiapata rabaja Dioso penaneconitsiaexanaponaenexa daxitajivi. Ponë itaboxo exana, ira ata, manamene ata, mera pepitsaparubenaejavanë ata, bajaraponëjavabelia panematabacabëta panavajëtabiabare, jai tsanajetarucae ángelnë pinijijumeta.

⁸ Icatsia cotocaevi taniji itsanë ángelnë pepunanajetarucaejava. Jumai tsanajetarucae bajarapaángelnë:

—Verebiabatsi rabaja Babilonia tomaraxanetomita pejinavanapaevimi. Tsipaji Babilonia tomarapijivimi navajëcabiaba jumapecataeya pexanaenëanëjavabelia. Nexata belia daxita nacuanëpijivi ata navajëcabiaba jumapecataeya pexanaenëanëjavabelia. Babilonia tomarapijivimi jumapecataeya pexanaenëanëjavabelia penavajëcaejamatabëcueneta, jamatabëcuenebijianapona daxitanacuanëpijivi. Nexata pacuenia pevitota pibisiacune pexanabiabiva pejamatabëcueneta, daxitajivi jamatabëcuenebijianapona, bajara pijinia pacuenia Babilonia tomarapijivimi ata jumapecataeya pexanaenëanëjavabelia penavajëcabiabijamatabëcueneta, jamatabëcuenebijianapona daxitanacuanëpijivi. Bajaraxuata bajarapacuenia verebiabatsi, jai tsanajetarucae ángelnë, ponë cotocaevi taniji pepunanajetarucaejava.

⁹ Bajaraxuacujinae icatsia taniji acueyabiángelnë pepunanajetarucaejava. Bajarapaángelnë pinijijumeta jumai tsanajetaruca:

—Pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata, bajarapajivi naneconitsiana Diosojavabelia. Bajarapajivi itsa nacopatanua piayainë pevënëta

pitapaitanerutsinexatsi, itsa jume, pecobejumata ata pecobejumaitanerutsinexatsi, nexata bajarapajivi naneconitsiana Diosojavabelia.

¹⁰ Dioso bitso pebaraanaepanaexaetsi, bajarapajivi bevelia apo naneconitsiaexanaetsi tsane. Ayaucenia naneconitsiaexanaenatsi isotojavabelia, azufre petajueisotojavabelia. Nexata bajarapajivi isoto petajuta bitso jamatabēfaenaena Dioso pijaánglevi pitabarata, Corderonē ata pitabarata.

¹¹ Athēbēabetsia bajarapaisototsēxē junaenia daxitamatacabijavabelianexa. Ayaucenia bajarapajivi Dioso penaneconitsiaexanaejavatsi, tsitecaena daxitamatacabijavabelianexa. Bajarapajivi isoto petajuta bitso pejamatabēfaenaajava, caepatoyo ata apo copatsi tsane. Bajarapacuenia Dioso naneconitsiaexanaenatsi pajivi pematabacabēta navajēcabiaba piayainējavabelia, bajaraponē jumapecataeya pexanaenētsijavabelia ata. Bajarapajivi itsa nacopatanua piayainē pevēnēta pitanerutsinexatsi, bajarapacuenia Dioso naneconitsiaexanaenatsi.

¹² Bajaraxuata Dioso pijajivi xaniavaetsia bejumecovēnētavanapa Dioso pitorobilvaisitsi. Becaasaēnua tsavanapae Jesúsjavabelia penajamatabēcuenecopatsijava, jai tsanajetarucae acueyabi ángelnē pepunanajetarucaejavata.

¹³ Bajaraxuacujinae jumetaniji athēbēvetsica tanejumaitsijava. Nejumaitsi athēbēvetsica mapacueniaje:

—Yaquinarure mapacuenia pejumaitsiitaneje: “Mapamatacabijavaveliacujinaeje, pevajēnaeyabelia ata, jamatabēcuenēbarēya baja tsavanapae tsane pamonaē tēpapona Dioso pepua pejumecovēnētsivi,” pejaiitane, yaquinarure, nejai athēbēvetsica.

Espíritu Santo ata nejumaitsi bajarapamonae yabara mapacueniaje:

—Xaniajai rabaja tsane. Bajarapamonae nacueraevetsiana penacuenibijava. Pamatacabi abaxē bajarapamonae asaē tsavanapae mapanacuataje, daxita xua pexaniacuene exanavanapa, bajaraxuajamatabēcuene Dioso athēbētatsia matamotsianatsi. Bajaraxuata jamatabēcuenēbarēya tsavanapae tsane bajarapamonae, nejai Espíritu Santo.

Pacuenia itsamatacabi Dioso naneconitsiaexanaejitsia daxita pamonaē pijaneconi pexainaevi yabara pelivaisi

¹⁴ Icatsia taniji penioponaetarērēbo. Bajarapaitarērēbo tuatua jēta jivitonē eca. Itarērēbo tuatua jēta peecaenē yabara jamatabējumaitsinē:

—Jesús raeta, Daxitajivi Pematapijinē, jamatabējanē.

Namataxatateca orocorona. Cobenaeca bemasete pexiujaijava pecaucubinexa penaveretsiruanē.

¹⁵ Nexata icatsia itsanē ángelnē pitsaparena temploboēnēverena. Bajara paángelnē asaēyata vavajai itarērēbo tuatua jēta peecaenējavabelia. Jumaitsi bajarapaángelnē:

—Caucubare jane baja penaveretsiruanē mapanacuayaberecaje. Copiapata rabaja pecaatuatsinexa penaveretsixu mapanacuatarecaje, jai ángelnē, ponē pitsaparena temploboēnēverena.

¹⁶ Nexata bajaraxuacujinae ponē eca itarērēbo tuatua jēta, bemasete pexiujaijava yota irajumabereca. Caucuba jane baja penotsinexa penaveretsiruanē. Peacubijava penaveretsiruanē penotsinexa, mapajamatabēcuenelivaisi xainaje. Pacuenia caucuba penaveretsiruanē penotsinexa, bajara pijinia pacuenia itsamatacabi daxita Jesús pijajivi pitsiana.

17 Bajaraxuacujinae icatsia athëbëtatsia itsaángelnë pitsaparena temploëñëverena. Bajaraponë ata capona bemasete pexiujaijava pecacubinexa penaveretsiruanë.

18 Icatsia itsaángelnë pitsaparena altarjavaverena. Bajarapaángelnë altarpjiisoto pevetsinë. Junata pinijijumeta itsaángelnë, bemasete pexiujaijava pecaponaenëjavabelia. Jumaitsi bajarapaángelnëjavabelia mapacueniaje: —Mapanacuayaberecaje caucubaremecca daxita uvaruanë, penaveretsiruanë, jai.

19-20 Nexata jane baja bajarapaángelnë bemasete pexiujaijava yota irajumabereca. Caucuba jane baja uvaruanë, penaveretsiruanë. Nexata bajarapauvaruanë othotajarabaxuaba pinijivaxixaneto ënëabelia, bajarapavaxixanetoënëta pemaarëbeneyujubataxuabinexa. Nexata jane baja uvacuaimarëbene yujubataxuaba tomara jumaverena. Nexata pemaarëbeneyujubataxubijavata, pinijijjanaraxaneto pitsapapona. Nexata bajarapajanaraxaneto navotancapona. Bajarapajanaraxaneto penavotanucaponaejava, piapiajava xaina tresientos pakilómetrobeje. Piavajubuajava pijinia xaina bejamatabëcuene caemetro epatua. Xua taniji, uvaruanë penaveretsiruanë pecaucubijava, xua ata taniji, pinijivaxixaneto ënëabelia piothotajarabijava pemaarëbeneyujubataxubinexa, xaina mapajamatabëcuenelivaisije. Itsamatabi ángelnë caetuatsiana daxita pibisiacuene pexanaevi penaneconitsiaexanaenexa. Nexata pibisiacuene pexanaevi ayaibitsaëtoxonetonë tēpaena. Nexata bajarapacuenia ayaijana xuabiana.

15

Pacuenia Juan tane athëbëtatsia siete ponëbeje ángelevi, siete xuabeje piayaijavanë pecaponaevi peverebiabinexa mapanacuaje, yabara pelivaisi

1 Icatsia taniji athëbëtatsia pinijicuene pitajëtsijava pacuenia itsamatabi itsijitsia mapanacuataje. Pinijicuene pitajëtsijava itsa taniji, nabenjajacajë bitso. Siete paángelnëbeje capona siete xuabeje piayaijavanë peverebiabinexa mapanacuaje. Bajarapapiayaicuene pepanepaecujinae, Dioso bitso jivi pebaraanaepanaejava, copiarucaena baja.

2 Nexata icatsia taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava. Itsiata bajarapaboxoya pitarunutsicotia xaina. Tanijinua jivi bajarapamene boxojumaveroca penubenaevi. Bajarapamonae cueneamoneyaba piayainë. Cueneamoneyabanua bajaraponë jumapecataeya pexanaenëtsi ata. Tsipaji pamonaenubena bajarapamene boxojumaveroca, itorobi atatsi bajaraponëbejajavabelia pematabacabëta pevajëcaenexa, apo jumecovënëtsi. Apo nacopatsinua pitanerubinexatsi piayainë pijanúmerota, panúmero xaina piayainë pevënënexa. Bajaraxuata bajarapamonae canubena arpa, Dioso perajutsiarpatsi.

3 Bajarapamonae naxëananubena Moiséspijinë, Dioso pijajivitonë, pevaji. Bajarapavaji Corderonë ata pevaji. Penaxëanaejavata, bajarapamonae vajita jumai tsanubena mapacueniaje:

Xamë Diosomë, niajamatabëcuenesaënë daxita mapanacuata jivi pevetsivi matatoxenetsia. Xua pinijicuene exaname, bitso pexaniacuene. Xamë daxitanacuanë neveysinë. Daxita xua pexaniacuene, nexanaenë. Penajumetsënëtsicuene jivi neyamaxëitojorobinexa, apo nexanaenë.

4 Daxitajivi xamë pecacujunavinë tsane. “Dioso cajena bitso ayaijamatabëcuenenë,” cajai tsanë. Xamë rabaja cajena caenëmë nianeconijibinë,

caeto ata pibisiacuene apo nexanaenē. Daxita nacuanēpijivi xamējavaberena patsiana pematabacabēta xamējavabelia penavajēcaenexa. Bajarapacuenia catoitsane tsipaji baja daxitajivi tane ēpexaniacuene nexanaponaponaejava, jai tsanubenae Diosojavabelia bajarapamonae penaxēanaejavata.

⁵ Bajaraxuacujinae icatsia taniji athēbētatsia templobo ēnētuaatujēalia pey-atuucutsipana penapatsijava. Bajara paēnyatuucutsijavaēnēta bajayatami Dioso Moiséspijinēta penajumecopatsilivaisi peyaquinaeibopananē xani-avaetejeba.

⁶ Bajarapatemploboēnēverena pitsaparena siete paāngelnēbeje. Bajara-pamonae capona siete xuabeje piyaijavanē, bajaraxuanēta mapanacujaje peverebiabinexa. Bajarapaāngelevi naxataba pexaniaviriapapaēbērējavanē, piaxuirajibijavanē. Peniojaijavanē bitso. Nacorobēcēbanubena oropananē.

⁷ Bajaraxuacujinae pamonae cuatro ponēbeje piaitothiaiviyajuvēnēnē, āngelevijavabelia rajuta copanē. Piayainē caeāngelnē canacujitsia rajutapona caecopa. Bajarapacopanē orocopanē. Dioso, ponē daxitamatacabijavabelianexa peponaponaenē, ayaicuenia anaeya naneconitsiaexanaena pamonae naneconita bajaraponējavabelia. Xuanē vēnēba bajarapacopanē, bajaraxuanēta Dioso naneconitsiaexanaena bajarapamonae.

⁸ Bajarapatemplobo tuatujēmi bitso vēnēca ētsēxē. Bajarapatsēxē pitsapa Dioso ayaijamatabēcuenenējavaverena. Itsajivi ata cajena apo caējēpaetsi pejonenexa bajarapatemplobo ēnētuaatujēabelia. Xuanē siete paāngelnēbeje capona, piyaijavanē, itsa baja panepaena, matapania jivi caējēpaenatsi pejonenexa bajarapatemplobo ēnētuaatujēabelia.

16

Pacuenia Juan tane athēbētatsia pacuenia itsamatacabi Dioso naneconitsiaexanaejitsia daxita pijaneconi pexinaevi yabara pelivaisi

¹ Icatsia jumetaniji templobojavaverena pinijijumeta pejumaitsijava. Siete paāngelnēbejejavabelia jumaitsi mapacueniaje:

–Paponare baja iranējavabereca paneepacaponaeenexa jane baja xuanē siete pacopabeje vēnēca, piyaijavanē. Dioso jane baja anaeya ayaicuenia penaneconitsiaexanaenexa, daxita pamonae naneconita bajaraponējavabelia, pejajijava, templobojavaverena jumetaniji.

² Nexata jane baja pona penamataxainaeāngelnē. Pecaponaera epatajaraba iranējavabereca. Nexata daxita pamonae piayainē pevēnēitanetota itanerubatsi, daxita bajarapamonae bajarapaepatota bitso perabētsabanareca. Nexata bitso aperabētane bajarapamonae. Bajarapamonae bajarapapiayainē jumapecataeya pexanaenētsijavabelia ata pematabacabēta penavajēcaevi.

³ Bajaraxuacujinae icatsia pecotocaeviāngelnē pijacopapijira epatajaraba manuamenejavabereca. Manuamenemi nexata naexana bepetēpaenē pijanara. Daxita baja tēpa manuameneta pejinavanapaevimi.

⁴ Bajaraxuacujinae icatsia acueyabiāngelnē pijacopapijira epatajaraba menianējavabereca mera, iravetsina pepitsaparubenaejavanējavabereca ata. Nexata daxita bajarapameranēmi naexana ēpijanaranē.

⁵ Bajaraxuacujinae jumetaniji mera pevetsiāngelnē pejumaitsijava Diosojavabelia. Jumaitsi mapacueniaje:

—Diosomē, caeto ata pibisiacuene apo nexanaenē. Ajena, pamatacabi, ponaponame. Bajayata mapanacuaje nexanaevajēnaeya ata, ponaponame. Pibisiacuene pexanaevi, paneconivajēto xaina, bajarapaneconivajētota naneconitsiaexaname. Bajaraxuata meranēmi pijanaranē naexanaeyaexaname. Tobjijaname meranē piayainē pijajivi bajarapameranē penatsiapaenexa.

⁶ Bajarapamonae bajayata beyejeba nijajivimi. Pamonaē ata cava-junupaebapona, beyejeba. Bajaraxuata bajarapacuenia meranē pijanaranē naexanayaexaname penatsiapaenexa bajarapamonae, jai Diosojavabelia mera pevetsiāngelnē.

⁷ Icatsia jumetaniji itsaāngelnē altarjavaverena pejumaitisijava. Jumaitis mapacueniaje:

—Xamē Diosomē, nijamatabēcuenesaenē daxita mapanacuata jivi pevetsivi matatoxenetsia. Itsa naneconitsiaexaname jivi, paneconivajēto xaina, bajarapaneconivajētota bananeconitsiaexaname. Itsa aneconijibi tsipae, nexata cajena apo naneconitsiaexanaemē tsipae, pejaijiva itsaāngelnē altarjavaverena jumetaniji.

⁸ Bajaraxuacujinae icatsia cuatroāngelnē pijacopapijira epatajaraba. Epatajaraba maticabipijijuametojavabetsica. Nexata maticabipijijuameto pexotata jivi bitso ayaicuenia tsajavatsi.

⁹ Itsiata bajarapamonae apo copabi pibisiacuene pexanabiabijava. Apo najamatabēcuenepēñeyorotsi Diosojavabelia. “Xamē bitso ayaijamatabēcuenenēmē,” apo jai ata cajena Diosojavabelia. Biji rajane Dioso, ponē caējēpatsi daxitacuene pexanaenexa, bajaraponē caranata pibisiacuenia baracuaicuaijai.

¹⁰ Bajaraxuacujinae icatsia cincoāngelnē pijacopapijira epatajaraba. Epatajaraba piayainē pijatronojavabereca. Piayainē jane baja pevetsinacuami aitaquiri tsanucaē. Piayainē jane baja pijajivi bitso penavixaetaexae, navonosine.

¹¹ Itsiata baitsi jane bajarapamonae apo copabi papibisiacuene exanavanapa. Apo najamatabēcuenepēñeyorotsi Diosojavabelia. Biji rajane Dioso, ponē athēbētatsia peecaenē, bajaraponē caranata bajarapamonae pibisiacuenia baracuaicuaijai. Bajarapacuenia bajarapamonae Dioso pibisiacuenia baracuaicuaijai penavixaetaexae, bitso peperabētsabanaexaenua.

¹² Bajaraxuacujinae icatsia seisāngelnē pijacopapijira epatajaraba. Epatajaraba pinijimenexanetojavabetsica, Eufratesmenejavabetsica. Nexata Eufratesmenexaneto tsevajunua. Nexata bajarapacuenia namuto torucarenatsi iranē pevetsivi penicabinexa, penajetarubenaevi orientejavavetsina.

¹³ Bajaraxuacujinae taniji acueyabi padovathibeje. Bajarapadovathivi becauitoxicuenia pitsapa. Itsanē pitsapa dragón pecuibovojotuatsina. Itsanē pitsapa piayainē pecuibovojotuatsina. Itsanē pitsapa peyamaxēitojorobiprofetanē pecuibovojotuatsina.

¹⁴ Bajarapadovathivi pinijicuene pexanaejava, exanapona. Pona baja pecaetuatsinexa daxitanacuanē pevetsivi. Bajarapadovathivi caetuapona jivi vajabitsaē pebarēexanaenexa Diosojavabelia. Dioso piamatabēcuenesaenē daxitanacuanē pevetsivi matatoxenetsia. Bajarapamatacabi Dioso exanaena daxita pacuenia tajēvelia najumecapanepaeya jumaitis.

¹⁵ Bajaraxuacujinae jumetaniji Jesús pejumaitisijava: “Panenamuxunae-vere. Itsajota apo panejamatabēnajinaemē, bajarajota jemata patsianicajē. Pacuenia penacobetoxotsinē jemata bapata itsajota apo jamatabēnajinaetsi, bajara itsinē tsane. Nexata pajivi jamatabēcuenēaitavaya ponaponaena

tanecopiapitsinexa, bajarapajivi barëya tsane. Pacuenia itsajavabelia peponaejivinxexa, baxaniavaeta penaxatatsijava pecaponaenexa pejumasajinaeyaniva, bajara itsi tsane bajarapajivi. Nexata pãmatacabi patsianicajë, apo aura tsane,” pejaijava Jesús, jumetaniji.

¹⁶ Pacueta jane baja dovathi pijajivi caetuatsi daxitanacuanë pevet-sivi. Caetuatsi caejavata penacaetuatsinexa. Itsajota nacaetuata daxitanacuanë pevetsivi hebreojumeta pevënë Armagedón.

¹⁷ Bajaraxuacujinae icatsia sieteanğelnë pijacopajijira epatajaraba. Epatajaraba itaboxojavabetsia. Nexata athëbëtatsia templobo ënëtuatujëta Dioso peecaetronojavaverena pinijijumeta jumaitsi:

—Daxita rajane baja vereta, jai athëbëtatsia templobo ënëtuatujëta.

¹⁸ Nexata jane baja binebinejai yamaxë. Pinijijovibo bitso najumeta. Yamaxë ata najumeta. Iranë ata najëbaba pinijicuenia. Jivi pejinavanapaejavaveliacujinae mapanacuataje, caeto ata bajarapacuenia ira penajëabijava pinijicuenia apo tae.

¹⁹ Pinijitomaraxanetomi, Babilonia tomarami, acueyabi xuabeje natsanaeya othopa. Bajarapacuenia itsanacuanëpijtomaranëmi ata othopa irata. Dioso nexata najamatabënapita pinijitomaraxanetopijivimi, Babilonia tomarapijivimi. Ayaicuenia Dioso baraanaepana Babilonia tomarapijivimijavabelia pibisiacuene bitso pexanaexae. Bajaraxuata pinijicuenia Dioso naneconitsiaexana Babilonia tomarapijivimi.

²⁰ Itsa ira najëbaba, daxitatunaetonëmi, daxitatsutonëmi ata, ajibi baja. Ira namatajëpa baja.

²¹ Athëbëvetsica othopaica jivijavabetsica bitso pecainejebimatarejetonë. Bajarapamatarejetonë xaina piarevejava cuarenta pakilobeje. Nexata mapanacuajivi pibisiacuena Dioso baracuaicuajai. Tsipaji athëbëvetsica piothopaejava, bitso pecainejebimatarejetonë, bitso piayaicuenia.

17

Pacuenia itsamatacabi Dioso naneconitsiaexanaena pamonaenavajëcabiaba jumapecataeya pexanaenëanëjavabelia yabara pelivaisi

¹ Pamonaen siete paánğelnëbeje, siete pacopabeje pecaponaevi, bajarapaánğelyajuvënëne, caenë rena xanëjavaberena. Bajarapaánğelnë nejumaitsi:

—Naxanitsia. Catsitajëtsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonë imoxoyojavata. Bajarapatomarapijivi Diosojavabelia apo navajëcabiabi. Caranata saya navajëcabiaba jumapecataeya pexanaenëanëjavabelia. Nexata pacuenia petiriva pevitota bitso pibisiacuene pexanabiabiva jamatabëcueneitsi, bajarajamatabëcueneitsi Babilonia tomarapijivi. Pova petiriva pibisiacuene pevitota exanabiaba, bajarapova pejamatabëcueneta jamatabëcuenebijiana itsamonae ata. Bajara pijinia pacuenia Babilonia tomarapijivi ata pexanabiabijava pejamatabëcueneta, jamatabëcuenebijiana ayaibitsaëttoxaneto itsanacuanëpijivi ata.

² Tsipaji itsanacuanë pevetsivi patabiaba Babilonia tomaraberena. Nexata bajarapamonaen ata copaba Diosojavabelia penavajëcabiabijava. Caranata saya Babilonia tomarapijivi cuenejëpaeya navajëcabiaba jumapecataeya pexanaenëanëjavabelia. Nexata jamatabëcuenebijianatsi bajarapamonaen ata, nejai bajarapaánğelnë.

³ Bajaraxuacujinae Espiritu Santo netsijamatabëvënëca. Nexata bemajitsinaebota anğelnë nebarëpona petusato nacuyabelia. Bajarajotalia taeyetajë

petiriva. Bajarapova eca piayainē, petsobianē, pejumata. Bajaraponē peper-abētuaeca, Dioso apo pejitsipaevēnēanē, itanerubena. Bajarapapiayainē xaina siete pamatabocotobeje diez pamataetobeje.

⁴ Nexata bajarapova penaxatatsijavareca itsajava pabanaeya saējai. Itsajava tsohia. Naitabēteca orojavanēta, perlavēnējavanēta ata, penamatamotsi-ibotonēta ata. Cobenaeca orocopa. Pibisiacuene bitso pexanaejava pevitota, bajarapajamatabēcuenelivaisi vēnēca bajarapacopata.

⁵ Bajarapova pitapathaitota vēnēyaquinarutatsi. Pajamatabēcuenelivaisi yabara bajarapova pitapathaitota vēnēyaquinarutatsi, itsajivi ata apo yapētae. Pejumaitsijume picani mapacueniaje: “Pinijitomaraxaneto Babiloniatomara. Bajarapatomaraverena pitsapa jivi pejamatabēcuenebijianaejavatsi, jumapecataeya pexanaenēanējavabelia penavajēcabiabinexa. Bajarapatomaraverena pitsapanua jivi pejamatabēcuenebijianaejavatsi, daxitaxua pibisiacuene pexanaenexa mapanacuataje,” pejaijume, picani bajarapova pitapathaitota vēnēyaquinarutatsi.

⁶ Taeyetajē icatsia bajarapova. Aitajibi tsecae Dioso pijajivimi pijanarata. Pamonaē ata beyejebatsi pevajunupaebixae Jesús, bajarapamonaemi ata pijanarata aitajibi tsecae bajarapova. Bajarapitsecaejava itsa taniji, bitso baja cajena jamatabēcuenenajunaviacajē.

⁷ Nexata ángelnē nejumaisi:

—¿Detsa xujitsia jamatabēcuenenajunaviacame? Cayapētaeyaexanaenatsi pajamatabēcuenelivaisi xaina mapovaje. Ponē piayainē siete pamatabocotobeje diez pamataetobeje pexainēnē, ponējumata bajarapova eca, bajaraponē ata pajamatabēcuenelivaisi xaina, cayapētaeyaexanaenatsi.

⁸ Mapapiayainē tanemeje, bajaraponē picani bajayata ponapona mapanacuataje. Itsiata baja aeconoxae bajaraponē ajibi. Itsiata baitsi jane itsamatacabi pinijimēthēxanetojavatsina pitsapaenina icatsia peponaponaenexa mapanacuataje. Bajaraxuacujinae bajaraponēmi beyaxuabi-anatsi pepacuene jane baja bajaraponē pecopiarucaenexa. Daxita mapanacuapijivije, pamonaē Corderonē pijacuyalobaxutota apo vēnērubenaē Dioso nacua pexanaevajēnaeya, Dioso nacua pexanaecujinae ata, bajarapamonaē matacabi apo peverevereaejava apo xainae tsane. Bajarapamonaē jamatabēcuenenajunaviacaena piayainē itsa pitsapaenina pini-jimēthēxanetojavatsina, nejai ángelnē.

⁹ Icatsia ángelnē nejumaisi:

—Pamonaē baja peyapētaevi, pamonaē baja caējēpatsi pejumeyapētaenexa, bajarapamonaē pejumeyapētaenexa mapalivaisije. Papiayainē xaina siete pamatabocotobeje, ponējumata taeyetame petiriva, anijajamatabēcuenelivaisibeje itajēta. Bajaraponē pematabocotonē, siete pamatabocotobeje, mapajamatabēcuenelivaisi xainaje. Siete rabaja pijinia patsutobeje eca Babilonia tomarata. Bajarapasiete pamatabocotobeje mapajamatabēcuenelivaisi yajavaxainaje.

¹⁰ Siete rabaja pijinia ponēbeje Babiloniatomara pevetsivi. Nexata Babiloniatomara pevetsivyajuvēnēvi cinco baja ponēbeje pitsapa. Seisnē abaxē aeconoxae eveta Babiloniatomara. Sietenē abaxē apo taxuxuabi pevetsinexa. Itsiata sietenē itsa evetsiana, bajayajebi apo evetsi tsane.

¹¹ Papiayainē, petsobianē, taneme, mapajamatabēcuenelivaisi xainaje. Bajaraponē picani bajayata eveta Babiloniatomara. Itsiata baja aeconoxae bajaraponē apo evetsi. Tsiapai baja tēpa. Itsiata baitsi jane icatsia bajaraponē pinijimēthēxanetojavatsina pitsapaenina Babiloniatomara icatsia pevetsinexa. Nexata icatsia bajaraponē itsa evetsiana, ochonē baja

evetsiana Babiloniatomara. Bajaronē abaxē bajayata itsa ponapona, siete ponēbeje Babiloniatomara pevetsiviyajuvēnēnēmi baja cajena. Bajaronē icatsia Babiloniatomara itsa evetsiana, pevetsicujinae bajaraponēmi beyaxuabianatsi pepacuene jane baja bajaraponē pecopiarucaenexa, nejai āngelnē.

¹² Icatsia āngelnē nejumlahitsi:

—Ponē piayainē pemataetonē taneme diez pamataetobeje, mapajamatabēcuenelivaisi xainaje. Diez rabaja pijinia ponēbeje, itsamatacabi nacuanē evetsiana. Nexata bajarapamonae itsamatacabi nacuanē itsa evetsiana, evetsiana diez panacuabeje. Tspaji caenē canacujitsia evetaponae naenacua. Bajaronē abaxē apo taxuxabi bajarapanacuanē pevetafanapaenexa. Itsiata baitsi jane itsa taxuxabijitsia nacuanē jane baja pevetafanapaenexa, copatsianatsi pijanacuanējava pevetsinexa saya caepatoyovajēto. Bajaronē itsa evetsiana pijanacuanējava, piayainē barēevetsianatsi.

¹³ Pamonae diez ponēbeje, diez pijinia panacuabeje itsamatacabi itsa evetsiana, barēnajamatabēcuenējēpaenatsi piayainē. Nexata bajarapadiež ponēbeje jumlahsi tsane piayainējavabelia:

—Xamē pacatocopatsianatsi patanematacaitorobinēnexamē, jai tsane.

¹⁴ Pamatacabi bajarapadiež ponēbeje evetafanapaena pijanacuanē, piayainē vajabitsaē barēexanaenatsi Corderonējavabelia. Daxita pamonae Corderonē pijajivi, pamonae Dioso pejunatsivi, bajarapamonae pijinia Corderonē barēbena piayainējavabelia. Nexata Corderonē cuenamoneyabiana piayainējavabelia. Cuenamoneyabiana tspaji Corderonē daxita petuxanevi pijatuxanenē baja cajena. Nexata Corderonē daxita nacuanē pevetsivi matatoxenetsia pepo pevetsinē, nejai āngelnē.

¹⁵ Angelnē icatsia nejumlahitsi:

—Pamanuameneboxovereca taeyetame pibisiacuene pexanaeva, bajarapamanuamene mapajamatabēcuenelivaisi xainaje. Mapanacuata jinavanapa jivibitsaētoxfanetonē daxitavirijumevi, daxitanacuanēpijivinua. Bajaronējavatabēcuenē yabara taneme bajarapamanuamene.

¹⁶ Pamonae diez panacuabeje pevetsivinexa, bajarapamonae piayainē barēitoya tsane pibisiacuene pexanaevajavabelia. Nexata bajarapamonae beyaxuabiana bajarapova. Jumasa xuababuatsiana. Xaeyabuatsiananua. Bajaronējavajinae tajuitsiana isotota.

¹⁷ Pamonae diez ponēbeje itsamatacabi nacuanē itsa evetsiana, bajarapamonae najamatabēcuenējēpaena petocopatsinexa piayainē pijanacuanē petojevetsinexatsi. Bajaronēpacuenia najamatabēcuenējēpaena tspaji baja cajena Dioso jamatabēcuenēitorobatsi bajarapacuenia pexanaenexa bajarapamonae. Nexata piayainē bajarapamonae pijanacuanē bajayajebi toevetsianatsi matapania pecopiapatsijavabelianexa daxita pacuenia Dioso tajēvelia najumecapanepaeya jumlahsi.

¹⁸ Pova pibisiacuene pexanaeva taeyetame manuameneboxovereca, bajarapova mapajamatabēcuenelivaisi xainaje. Pinijitomaraxaneto Babiloniatomara. Bajaronēpatomarapijivi pejamatabēcueneta mapanacuanē pevetsivi pibisiacuene exanapona, nejai āngelnē.

1 Icatsia itsaängelne taniji perunaejavatsica athëbëvetsica. Caëjêpatsi pinijicuenia piayaiuene pitorobinexa. Bajarapaängelne pinijicotia yajavarunaica. Ira itayota daxitanacuanëjava.

2 Ayaijumeta vavajai. Jumaitsi mapacueniaje:

—Verebiabijitsiatsi rabaja Babilonia tomaraxanetota pejinavanapaevi. Nexata baja ëjoriminacua tsarucae tsane. Daxita xua pibisiacuenë pexanaedovathivi, juya bajarapatomarata jinavanapaena. Bitso pibisiaviriavi pepunaevi, pamonae daxitajivi apo itajitsipae petaenexa, juya bajarapatomarata jinavanapaena.

3 Babilonia tomarapijivi navajëcabiaba jumapecataeya pexanaenëanëjavabelia. Nexata belia daxitanacuanë pevetsivi ata, pijajivi yajava, navajëcapona jumapecataeya pexanaenëanëjavabelia. Nexata Babilonia tomarapijivi jumapecataeya pexanaenëanëjavabelia penavajëcabiabijamatabëcueneta, daxita xua pibisiacuenë pexanaejamatabëcuenetana, jamatabëcuenëbijianapona daxitanacuanëpijivi. Babilonia tomarapijivi bitso xainapona ayaijava palata pibisiacuenë pexanaejamatabëcueneta. Nexata pijinia pamonae Babilonia tomaraberena capatabiaba daxitacuenë pecanajetsinexa Babilonia tomarapijivijavabelia, bajarapamonae ata baja bitso ayaijava palata xainapona. Bajarapacuenia Babilonia tomarapijivimi pibisiacuenë pexanabiabixae, ayaiuenia naneconita Diosojavabelia. Bajaraxuata Babilonia tomarapijivi Dioso baja verebiabijitsiatsi, jaiängelne.

4 Bajaraxuacujinae icatsia athëbëvetsica jumetaniji itsajume. Jumaitsi mapacueniaje:

—Paxamë patajajivimë, papitsapare baja Babilonia tomaravecua. Papit-sapare baja pibisiacuenë paxamë ata paneexanaeyaniva, bajarapatomarapijivi yajava Dioso papecananeconitsiaexanaeyaniva.

5 Babilonia tomarapijivi pijaneconi baja bitso ayaijava xaina. Pijaneconi itsa napebetsipa, itsa najumaetaponaëjitsipa, nexata copiapatsipa itaboxojavabetsia. Dioso cajena yapëtane daxita Babilonia tomarapijivi pibisiacuenë pexanaejava.

6 Bajarapamonae bejiobiaexanabiaba itsamonae. Nexata Dioso itsa naneconitsiaexanaena, bajarapamonae bitso ayaiuenia bejiobiaexanaena.

7-8 Babilonia tomarapijivi bitso beayaijamatabëcuenëvini natane. Natocomuacabiaba ayaijava penamatamotsijavanë pibisiacuenë pexanabiabimatamota. Bajarapamonae pejamatabëëthëtota jamatabëjumaitsi tsabiabi: “Xanë raja majota ecajë nacua betaevetsinë. Nexata apo jamatabëcuenëbëjanë tsane itsacuenëjavayo ata yabara. Apo namatavenonaenë tsane itsacuenëjavayo ata,” jamatabëjai tsabiabi bajarapamonae pejamatabëëthëtota. Bajarapacuenia Babilonia tomarapijivi pejamatabëjumaitsixae, ayaiuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petëpaecuenë, pemataneuyabicuenë ata, janibocuene ata. Tajuenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonae tsipaji vajatuxanenë Dioso bitso piasënë.

9 Babilonia tomarapijivi pejamatabëcueneta daxitanacuanë pevetsivi jamatabëcuenëbijianapona. Nexata daxitanacuanë pevetsivi copaba Dioso pejumecovënëtsijavami. Natocomuacabiabanua ayaijava penamatamotsijavanë. Nexata bajarapamonae itsa tsëxëtaena Babilonia tomarapijivimi petajuejavatsi, yaitaxutonueya vavajai tsane.

10 Bajarapamonae pecajunavi, tajë vecuanubenaena Babilonia tomarapijivimi itsa tajuenatsi. Bajarapamonae najumai tsane:

—¡Bitso baja rovia bejiobi mapamonaeye! ¡Pinijitomaraxanetota, Babilonia tomaraxanetota, pejinavanapaevimi peyaiyataevimitsi! Caepatoyocujinae baja veriajavatsi Dioso penaneconitsiaexanaexaetsi, najai tsane bajarapamonae.

11 Daxitanacuanëjava, pamonaee pecanajetabiabavanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacaevitsi tsane.

12 Bajarapamonae capatabiaba oronanita pexanaejavanë, platananita pexanaejavanë ata, perlavënëjavanë ata, penamatamotsiibotonë ata. Capatabiabanua pexaniaviriapapaëbërë ata. Itsapapaëbërë linovënëjavanë. Itsajava sedajavanë. Bajarapapaëbërë itsajavanë peraënaejavanë. Itsajavanë petsobiajavanë. Capatabiabanua daxitavirianaeejava petuxujuvinaejavanë. Capatabiabanua pexaniajavanë, marfilvënëjavata pexanaejavanë, penamatamotsinaejavanë ata, broncenani ata, hierronani ata, mármolvënëibo ata.

13 Capatabiabanua canelavënëjavanë, especiavënëjavanë ata, inciensovënëjavanë ata, mirravënëjavanë ata. Capatabiabanua petuxujuviranë, vinoranë ata, aceiteranë ata, pexaniaviriatrigobenonë ata, trigobultonë ata. Capatabiabanua baca, oveja ata, caballo ata, perobobocaemonë ata, carrozavënëmonë. Jivi ata capatabiaba dajubicuenia pecanajetsinexa itsamonaejavabelia amoneya petonacuenebabiabivinxexa.

14 Nexata daxita bajaraxua pecanajetabiabavanapaevi, yaitaxutonueya najumai tsane Babilonia tomarapijivi yabara:

—¡Daxitacuene pejisipaecuenemi tovereverecatsi baja! ¡Tovereverecatsi baja bitso pexinaejavami, xua picani mapanacuapijivi tane penamatamotsi-
java! najai tsane bajarapamonae yaitaxutonueya.

15 Babilonia tomarapijivimi abaxë itsa apo tajueti, pamonaee pecanajetabiabavanapaevi, ayajava palata xainapona, xua capata, pecanajetabiabixae Babilonia tomarapijivimijavabelia. Bajarapamonae itsa taena Babilonia tomarapijivimi petajuejavatsi, yaitaxutonueya vavajai tsane. Tajë vecuanubenaena pecajunavi.

16 Bajarapamonae daxita najumai tsanubenaee tsane:

—¡Bejiobitatsi bitso pinijitomaraxanetota pejinavanapaevimi! Bajarapatomarapijivimi naxatabiaba pexaniaviriapapaëbërë, linovënëjavanë. Itsajava peraënaejava. Itsajava petsobiajava. Naitabëtabiaba orojavanëta, perlavënëjavanëta ata, penamatamotsiibotonëta ata.

17 ¡Caepatoyocujinae saya verevereca baja bitso pexinaejavami! najai tsanubenaee tsane daxita bajarapamonae.

Daxita pamonaee barcoxanetonë pevetsivi, bajarapamonëta penaponaevi ata, bajarapamonëta penacuenebivi ata, bajarapamonëta pecaponaejavanë pecanajetaponaevi ata, daxita bajarapamonae tajë vecuanubenaena pecajunavi Babilonia tomarapijivimi itsa tajuenatsi.

18 Bajarapabarcoxanetonëta peponaevi, tsëxëtaenubenaena Babilonia tomarami itsa tajuenatsi. Nexata vavajaija najumai tsanubenaee tsane bajarapamonae:

—¡Itsanacuanëjava ata baja ajibi itsatomara mapitsipinijitomaraxanetoje! ¡Caetomarami baja maje pinijitomaraxanetomi, tajuatije! najai tsanubenaee tsane.

¹⁹ Pamonae tsëxëtaenubenaena, natsimataothocaena atsabenonë, bitso pe-sivanajamatabëxainaeaxae Babilonia tomarapijivimi. Yaitaxutonueya naju-mai tsanubenaena tsane:

—¡Bitso pinijicuenia bejiobitatsi pinijitomaraxanetomita pejinavanapae-vimi! Babilonia tomarapijivimi ayaijava palata pexainaeaxae, bitso pex-ainaevi naexana daxita pamonae barco pexainaevi, pecanajetabiabixae xua capata bajarapatomaraberena. ¡Caepatoyocujinae saya bajarapatomarami verevereca baja! najai tsanubenaena tsane bajarapamonae.

²⁰ Dioso baja cajena itsamatacabi naneconitsiaexanaena Babilonia tomarapijivi pebejiobiaexanabiabijamatabëcuene Dioso pijajivi. Nexata itsamatacabi, Babilonia tomarami itsa vereverecaena, pevereverecaejava yabara, sivajamatabëcuenebarëya tsane daxita athëbëtatsia pejinavanapaevi. Daxita Dioso pijajivi, mapanacuata pejinavanapaevi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabi itsa vereverecaena.

²¹ Bajaraxuacujinae piasaëángelnë yotaxuaba ibotoxaneto. Bajarapaiboto pinijibotoxaneto bitso. Nexata ángelnë manuamienabereca asaëyata xu-abareca bajarapaibotoxaneto. Ángelnë jumaiti mapacueniaje:

—Pacuenia asaëyata xuarecajë mapabotoxanetoje, bajaia pijinia pacue-nia pinijitomaraxaneto, Babiloniatomara, itsamatacabi pinijicuenia xuabi-anatsi. Apo taetsi baja tsane icatsia matavëjëa.

²² Ajumejibi baja tsane pijacallejava arpa peracatabiabijava. Ajumejibi baja tsane flauta ata piobabiabijava. Ajumejibi baja tsane trompeta ata piobabiabijava. Itsajivi ata baja apo nacuenebi tsane bajarajota. Apo najumetsi baja tsane icatsia matavëjëa trigoxu pecaquiatabiabijava pecaquiatabiibotoxanetota.

²³ Itsalámpara ata baja apo naitayotsi tsane bajarajota. Ajumejibi baja tsane jivi penabarëcuaicuajitsabiabijava. Penacasabifiesta ata baja pexanabiabijava, ajibi tsane. Bajarapatomarapijivi pexainaejava pecanajetabiabivanapaevi, daxitanacuanëjava pevënëjoneyabiabivimi, ajibi baja tsane. Ajibinua baja tsane bajarapatomarapijivi daxitanacuanëjava yamaxëitojorobiaya penajorobabiabijava, jai bajarapaángelnë.

²⁴ Dioso yapëtane pacuenia Babilonia tomarapijivi pejamatabëcueneta, Diosojumepaebivimi profetavi beyejebiabatsi. Babilonia tomarapijivi pejamatabëcueneta, Dioso pijajivimi ata beyejebiabatsi. Bajaraxuata juya Dioso ayaicuenia naneconitsiaexanaena Babilonia tomarapijivi.

19

¹ Bajaraxuacujinae jumetaniji jivi ayaibitsaëtohaneto athëbëtatsia. Pinijijumeta jumai tsaponae mapacueniaje:

“Diosomë, ¡ayajamatabëcuenenëmë bitso!” jaitsi vaxaitsi Diosojavabelia. Bajaraponë nacacapanepa vajaneconivecua. Penivenivenaecotia pexainanë. Pijamatabëcuenesaenë bitso. Daxitacuene pexanaenexa pecaëjëpaenëtsi.

² Itsa naneconitsiaexana jivi, paneconivajëto jivi xaina bajaraponëjavabelia, bajarapaneconivajëtota bananeconitsiaexana. Pajivi aneconijibi, apo naneconitsiaexanae cajena. Nexata baja Dioso naneconitsiaexana pibisiacuene bitso pexanaevi, Babilonia tomarapijivimi. Bajarapamonaemi pibisiacuene pexanaejamatabëcueneta jamatabëcuenebijianapona daxitanacuanëpijivi. Bajarapamonaemi pejamatabëcueneta Dioso pijajivimi beyejebatsi. Bajaraxuata Dioso juya naneconitsiaexana bajarapamonae,

jai jivi ayaibitsaëtoخانeto athëbëtatsia.

³ Bajaraxuacujinae bajarapamonae icatsia jumaitsi:

—“¡Diosomë, ayaijamatabëcuenenëmë bitso!” jaitsi vaxaitsi Diosojavabelia. Athëbëabetsia petsëxëjunaejavatsia Babilonia tomarapijivimi petajuetsëxëtsi, apo vereverecanucae tsane daxitamatacabijavabelianexa, jai bajarapamonae.

⁴ Pamonaë veinticuatro ponëbeje ancianovi, pamonaë pijinia cuatro ponëbeje piaithiavi, daxita bajarapamonae Dioso yayataeya irata bobena. Ira taenubena. Bajarapamonae irata jumai tsanubenaë Diosojavabelia, tronota peacaenëjavabelia:

—¡Xanepana rabaja nexanaejava! ¡Bitso ayaijamatabëcuenenëmë! jai tsanubenaë irata bajarapamonae Diosojavabelia.

⁵ Bajaraxuacujinae icatsia tronojavaverena daxita Dioso pijajivijavabelia jumaitsi:

Dioso panecujunavivi, ayaijamatabëcuene panexainaevi, beveli-
ajamatabëcuene panexainaevinua, pexaniajamatabëcuene
parajutabiabare vajaDiosojavabelia,
jai tronojavaverena.

Corderonë penacasabifiesta yabara pelivaisi

⁶ Icatsia jumetaniyi ayaibitsaëtoخانeto jivi pecuaicuaijajava. Bajarapamonae pecuaicuaijajava, jumetaniyi bepiniijoncajume. Beyamaxëjume ata, ayaijume, najumeta. Jumai tsaponae bajarapamonae mapacueniaje:

VajaDioso pijamatabëcuenesaënë daxita mapanacuata jivi pevetsivi mata-toxenetsia. Taxuxuaba rajane baja daxitanacuanëjava Dioso jivi pevetsinexa. Bajaraxuata vaxaitsi jumaitsitsi: “Diosomë, ¡ayaijamatabëcuenenëmë bitso!” jaitsi vaxaitsi Diosojavabelia.

⁷ Sivajamatabëcuenebarëyatsi Dioso. Nexata tsipaebatsi itsamonaëjavabelia pacuenia sivajamatabëcuenebarëyatsi Dioso. “Diosomë, ¡bitso pinijicue ne xanaenë!” jaitsi vaxaitsi Diosojavabelia. Bajarapacuenia jumaitsitsi tsipaji baja copiapata fiesta pexanaematacabinexa, Corderonë penacasabifiestanexa. Petiriva rabaja naxaniavaeta Corderonë penacasabivanexa.

⁸ Bajarapova rajutatsi bitso pexaniaviriapapaëbërëjava penaxatatsinexa, pi-axuirajibijava, bitso peniojajava, jai bajarapamonae.

“Bajarapova rajutatsi bitso pexaniaviriapapaëbërëjava penaxatatsinexa,” itsa jai, comparaciñcuenia pejumaitsinexa picani mapacueniaje: “Dioso pijajivi aneconijibia tane Cristo pesivatëpaexaetsi pijaneconì yabara,” pe-jainexa picani. Bajarapajamatabëcuene livaisi: “Bajarapova rajutatsi bitso pexaniaviriapapaëbërëjava penaxatatsinexa,” pejaijava comparaciñcuenia.

⁹ Nexata bajaraxuacujinae ángelnë nejumaitsi:

—Yaquinare mapejumait silivaisije: “Jamatabëcuenebarëya pamonaë junatatsi Corderonë penacasabifiestajavaverena,” pejailivaisi. Daxita xua catsipaebatsi, bajaraxua pepacuene Dioso taneitorobijava, nejai ángelnë.

¹⁰ Nexata tamatabacabëta tonucajunuajë ángelnë pitabarata. Pexaniajamatabëcuene picani tarajutsinexa ángelnëjavabelia. Itsiata baitsi jane ángelnë nejumaitsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonaë ata, Dioso panenajuajumecovënëtsivi xaniavaetsia pajumecovënëtavanapame papexaniajailivaisi Jesús pacatsi-paeba, bajara saya xanë ata taitsinë. Nexata pexaniajamatabëcuene rajure Diosojavabelia, nejai ángelnë.

Papexaniajailivaisi Jesús pacatsipaeba, bajarapalivaisita ja-matabëcueneasaëyaexanatsi pamonaë jivijavabelia tsipaebapona Dioso pejumelivaisi.

Pacuenia athëbëtatsia Juan tane Cristo penioponaecaballojumata peecaejava yabara pelivaisi

11 Taniji itaboxo penapatsijava. Tanijinua penioponaecaballo. Bajara-pacaballojumata jivitonë eca. Ponë bajarapacaballojumata eca, pevënë Najumecapanepaya Pejumaitsicuenia Pexanaenë. Itsavënë Pepo Pexania-jailivaisi Petsipaebinë. Bajaraponë jivi naneconitsiaexana paneconivajëtota jivi naneconita. Vajabitsaë ata exana pibisiacuene pexanaevijavabelia.

12 Pitaxutobeje naitayota. Pacuenia isoto bacotiatsobia, bajara itaxu-tocotiaitsi. Bajaraponë matapona ayaijava coronanë. Pitapata vënëruca. Itsiata baitsi jane itsajivi ata apo vënëyapëtaetsi. Èbajaraponë pijacuata navënëyapëtane.

13 Penaxatatsijavareca tsofia. Pijanarata pejabutsijava. Bajaraponë pevënë Diosojamatabëcuenelivaisi itajëtsinë.

14 Bajaraponë pënaponatsi vajabitsaë ayaiBITSaëtOxaneto, athëbëpijivi. Ba-jarapamonaë naxataba bitso pexaniaviriapapaëbërëjavanë, piaxuirajibija-vanë, bitso peniojaijavanë. Bajarapamonaë ata yapona penioponaecabal-luanëta.

15 Ponë vajabitsaë barëexana, bajaraponë pecuibuatsina pitsapa pexiu-jaiespada penaneconitsiaexanaenexa daxitanacuanëpijivi. Bajaraponë dax-itanacuanëjava jivi pevetsinënexa. Itsa evetsiana, ajumesaëya itorobabiabi-ana pejumecovënëtsinexatsi. Pacuenia uvaruanë ita barëmeneyujubataxuaba, ayaiBARëmene pitsapa pexanaenexa vinoranë, bajara pijinia pacuenia dax-itanacuanëpijivi, pijaneconi pexainaevi, Dioso ita verebiabiana, ayai-jana xuabiana. Dioso, ponë piijamatabëcuenesaënë daxitanacuanë pevetsi-matatoxenetsia, ayaiacuenia naneconitsiaexanaena bajarapamonaë pe-baraanaepanaexae.

16 Ponë vajabitsaë barëexana, bajaraponë pijacamisajumavelia penaxatat-sijavata, pevënëitanebërëtoyo ruca. PethaëtOjumata ata pevënëitanebërëtoyo ruca. Jumai tsarucae bajarapaitanebërëtoyo: “Maponëje daxitanacuanë pevetsivi ata pepo pevetsinë. Daxita petuxanevi ata pijatuxanenë,” jai tsarucae.

17 Bajaraxuacujinaë taenutajë ángelnë, icotiata penucaenë. Pinijijumeta vavajai tsanucaë daxita quequeremonaëjavabelia. Jumai tsanucaë ma-pacueniaje:

—Naxanitsia. Panacaetuanare payaiBITSaëtOxanetomë ayaijava panenaba-ninxa Dioso pejamatabëcueneta.

18 Naxanitsia. Daxita petëpaevi pevi panexaenexa. Paponaremena nacuanë pevetsivimi, vajabitsaë penamatacaitorobivimi ata, vajabitsaë piatatsacavimi ata, pevi panexaenexa. Caballuanëmi, caballuanëjumata peponaevimi ata, pevi panexaenexa. Pamonaemi dajubicuenia pecanajet-sivimitsi itsamonaëjavabelia amoneya petonacuenebinexa, apo pecanajet-sivimitsi ata, beveliajamatabëcuene pexainaevimi ata, ayaijamatabëcuene pexainaevimi ata, daxita bajarapamonaë pevi panexaenexa paponare-mena, jai tsanucaë ángelnë quequeremonaëjavabelia.

19 Bajaraxuacujinaë taniji piayainë. Tanijinua daxitanacuanë pevetsivi pijajivi, vajabitsaë, pecaetuatsijava ata. Daxita bajarapamonaë nacaetuana vajabitsaë penaexanaenexa. Nexata barënabia penioponaecaballota pepon-aenëjavabelia, bajaraponë pijajivijavabelia ata.

²⁰ Nexata penioponaecaballota peponaenē vaetaba piayainē. Vaetaba peyamaxēitorobiprofetanē ata. Ponē peyamaxēitorobiprofetanē, jivi peyamaxēitorobinexa, bajayata pinijicuene exanaponapona piayainē pitabarata. Bajarapacuenia bajayata pinijicuene pexanaexae, peyamaxēitorobiprofetanē jivi yamaxēitorobapona. Nexata jivi nacaeveta piayainē pevēnēitanetota pitanerubapon-aenexatsi. Bajarapacuenia bajayata peyamaxēitorobiprofetanē jivi yamaxēitorobapona piayainē jumapecataeya pexanaenētsijavelia ata jivi pematabacabēta penavajēcabiabinexa. Bajaraxuata nexata piayainēbeje, peyamaxēitorobiprofetanēbeje, xuabaliatsibeje abaxē piasaēnēbeje isotopucabelia. Bajarapapuca tajueyabiaba azufre yajava.

²¹ Nexata daxita bajaraponēbeje pijajivi, pamonaē nacopaba, beyejebatsi. Beyejebatsi penioponaecaballota peponaenē, pecuibuatsina pepit-sapaeespadata. Nexata jāne baja daxita quequeremonaē napeneyaba bajarapamonaemi pevi.

20

Pacuenia Juan tane pacuenia itsamatacabi Cristo mil pavaibeje evetsijitsia mapanacuaje yabara pelivaisi

¹ Icacua taniji āngelnē perunaējavatsica athēbēvetsica. Cobenarunaica pinijimēthēxaneto pijallave. Cobenarunaicanua ayaicadenamaētoxaneto.

² Bajarapaāngelnē vaetaba dragón, ponē pevēnē Dovathi. Itsavēnē Sata-nás. Bajaraponē dovathi bajayata itsa naitajēta jivijavelia, naitajēta bejomocuenia. Nexata āngelnē cētabuata dovathi mil pavaibejenexa.

³ Pinijimēthēxanetojavareca xuareca. Yavēpaxatatabuata bajarapamēthēxanetojavareca. Pematatsēnēa icatsia sellovēnējavata yamēthēvēpajumacatsata. Nexata dovathi apo caējēpaetsi tsane peyamaxēitorobinexa mapanacuapijivi mil pavaibeje. Bajaraxuacujinae icatsia isinaenatsi caeepatoyo icatsia jivi peyamaxēitorobaponaenexa.

⁴ Bajaraxuacujinae icatsia taniji jivi tronojumata penaevi. Bajarapatronojumata penaevi, Dioso itorobatsi penaneconitsiaexanaenexa jivi, pijaneconi pexainaevi. Tanijinaua itsamonaē ata, pamonaē bajayata vēsiucubejebatsi. Bajarapacuenia bajarapamonaemi bajayata vēsiucubejebatsi tsipaji jivi tsipaebapona Jesús pelivaisi. Tsipaebanajetarubenanua Dioso pejumelivaisi. Bajarapamonaē apo navajēcae pematabacabēta piayainējavelia, piayainē jumapecataeya pexanaenētsijavelia ata. Apo nacopatsinua piayainē pevēnēitanetota pitapaitanerubinexatsi. Apo nacopatsinua pecobejumaitanerubinexatsi. Nexata bajarapamonaemi icatsia Dioso piasaēyaexanaejavatsi, taniji. Pacuenia ata bajarapamonaē mil pavaibeje Cristo barēevetatsi mapanacuaje, taniji.

⁵⁻⁶ Bajarapamonaē Dioso asaēyaexanatsi Dioso copiaya jivi piasaēyaexanaematacabita. Bajarapamonaē Dioso asaēyaexanatsi caecuenia ayaibitsaeto. ¡Pamonaē copiaya Dioso jivi piasaēyaexanaematacabita asaēyaexanatsi, bajarapamonaē pejamatabēcuenēbarēyavi, pianeconijibiv-inua! Cotocaevi patēpaejavanexa, acuenebi baja itsacuenē pexanaenexatsi bajarapamonaē. Biji rajane bajarapamonaē Dioso, Cristo ata, pijasacerdotevinexa, jivi petocuaicuajitsabiabivinexa Diosojavavelia. Bajarapamonaē Cristo barēevetsianatsi mapanacuaje mil pavaibeje. Itsamonaē petēpaevimi, pamonaē abaxē nacopabanubena, Dioso icatsia asaēyaexanaenatsi bajarapamil pavaibejecujinae.

⁷Itsa baja panepaena mil pavaibeje, dovathi icatsia isinaenatsi mēthēvecua pepitsapaenexa.

⁸Pitsapaena icatsia jivi peyamaxēitorobinexa daxitanacuanējava. Bajarapacuenia yamaxēitorobiana jivi ayaibitsaētoxaetonē, Dioso apo pejumecovēnētsivi. Nexata bajarapacuenia dovathi vajabitsaē caetuatsiana. Dovathi pijajivi bitso ayaibitsaētoxaetonē tsane. Pacuenia tajetaboatsapērē navita, bajara itsi tsane dovathi pijajivi, vajabitsaē.

⁹Bajarapamonae vajabitsaē copiata jivi benajetarubenaena daxitanacuanējava. Bajaraxuacujinae matatoyoronaena jane baja Jerusaléntomara peverebiabinexa picani Dioso pijajivi, Dioso piasivatomarata, Jerusalén tomarata, pejinavanapaevi. Itsiata baitsi jane dovathi pijajivi Dioso tsixuabianicatsi isoto athēbēvetsica. Nexata tajuenatsi daxita vajabitsaēmi, dovathi jane baja pijajivimi.

¹⁰Nexata dovathi, ponē jivi yamaxēitorobaponaena daxitanacuanējava, xuabialiatsi isotopucalia, azufre yajava petajueyabihipucalia. Bajarapapucalia baja cajena copiaya xuabatsibeje piayainēbeje peyamaxēitorobiprofetanēbeje. Nexata bajarajota bajarapamonae Dioso naneconitsiaexanaenatsi daxitamatacabijavabelianexa. Nexata bajarajota bajarapamonae isoto petajuta bitso jamatabēfaenaena. Bajarapamonae bitso pejamatabēfaenajava isoto petajuta tsitecaena daxitamatacabijavabelianexa.

Pacuenia Juan tane pacuenia itsamatacabi jivi nubenaejitsia penioponaetrono pitabarata Dioso penaneconitsiaexanaenexatsi yabara pelivaisi

¹¹Icatsia taniji penioponaetronoxanetojumata peecaenē. Bajaraponē nacua baja revererecaeyaexana. Itaboxo ata baja revererecaeyaexana.

¹²Taenubajē daxita petēpaevimi penubenaajava Dioso pitabarata. Nubena Dioso penaneconitsiaexanaenexatsi. Bajarapamonae ayaijamatabēcuene pexainaevimi. Itsamonae bevelijamatabēcuene pexainaevimi. Taeyejebajēnua cuyalatobaxutonē. Bajarapacuyalatobaxutonē baxupanejeba. Bajarapacuyalatobaxutonē itanerubena daxita petēpaevimi pacuenia exanavanapa petēpaevajēnaeya mapanacuataje. Itsacuyalatobaxuto ata taeyabuatajē. Bajarapacuyalatobaxuto ata baxupatabuata. Bajarapabaxutota vēnērubena pamonaē matakabi apo pevererecaejava pexainaevinexa. Nexata caejivi canacujitsia Dioso pijaneconi petorutaponaexaetsi, caejivi canacujitsia paneconivajēto xaina. Bajarapaneconivajētota Dioso naneconitsiaexanaponatsi.

¹³Manuameneta petēpaevimi ata, daxita pitsapaina. Jivi ata petēpaecujinae, pejinavanapaenacuajavavetsina, ira bēxēpanavetsina, daxita pitsapaina. Nexata caejivi canacujitsia paneconivajēto xaina, bajarapaneconivajētota Dioso naneconitsiaexanaponatsi.

¹⁴Bajaraxuacujinae jivi petēpaeyaexanaejamatabēcuenemi, jivi petēpaecujinae pejinavanapaenacuami ata yajava, Dioso xualia isotopucalia. Bajarapapuca jivi cotocaevi patēpaejava petēpaeyaexanaepuca.

¹⁵Pamonaē apo vēnērubenaē, pabaxutota vēnērubena pamonaē matakabi apo pevererecaejava pexainaevinexa, bajarapamonae peneliatsi bajara-papucalia.

21

Pacuenia Juan tane pacuenia itsamatacabi Dioso icatsia pejanaitaboxo, pejananacua yajava, exanaejitsia yabara pelivaisi

¹ Icatsia taniji pejanaitaboxo, pejananacua yajava. Paitaboxo, panacua ata, Dioso copiaya exana, ajibi baja. Manuamene ata ajibi.

² Xanë rabaja Juannë. Taniji Dioso pijatomara, pejana Jerusaléntomara. Athëbëvetsica, Diosojavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa sivapatsijtsiatsi, pevajënae banaxaniavaeteca, bajara pijinia pacuenia Dioso xaniavaeta baja Jerusaléntomara pijajivi petojinavanapaenexatsi.

³ Nexata jumetaniji pinijijume athëbëvetsica, tronojavavetsica. Jumaitsi mapacueniaje:

–Taema. Dioso rabaja jivijava ponapona. Dioso baja jivi yajavaponapona daxitamatacabijavabelianexa. Bajarapamonae pepo Diosonë pijajivi tsane. Dioso pijinia bajarapamonae pijatuxanenë tsane.

⁴ Dioso itaxutobarëmëiquinaponaena bajarapamonae. Ajibi baja tsane petëpaeuene, penuecuene ata, bitso penajamatabëxainaeuene ata, penavixaeuene ata. Daxita bajarapitsicuenemi copiarucaena jane baja, jai athëbëvetsica.

⁵ Bajaraxuacujinae Dioso, tronojumata peecaenë, jumaitsi:

–Taema. Daxitacuene bajayata taexanaejavami, xuami baja picani vereverecaeyaexanajë, pejanajava icatsia exanajë, jai.

Bajaraxuacujinae xanëjavabereña icatsia nejumlahitsi:

–Yaquinare bajaraxuanë pelivaisi. Tsipaji baja palivaisi catsipaebatsi, bajarapalivaisi pexaniajailivaisi cajena. Xanepana nexata daxitajivi pejumecovënëtsinexa bajarapalivaisi, nejai.

⁶ Bajaraxuacujinae icatsia nejumlahitsi Dioso, tronojumata peecaenë:

–Daxita rabaja icatsia pejanajava taexanaejava, veretajë. Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa. Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanaxa, nexata bajarapamonae rajutsianajë matacabi apo pevereverecaejava. Tocopatsianajë bajarapamonae amoneya pexainaenexa matacabi apo pevereverecaejava itsa jumecovënëta taxënato, Cristo, pesivatëpaejavatsi. Bajaraponë Cristo jivi pejamatabëcueneasaëyaexanaenë.

⁷ Pajivi tsiteca jumecovënëtaaponapona tajumelivaisi ëpetëpaejavabelianexa, bajarapajivi xanë pijaDiosonënë tsane. Bajarapajivi pijinia taxënatojiviyo tsane.

⁸ Itsiata baitsi jane pamona pejunavivi tajumelivaisi yabara itsamonae pebejiobiaexanaeyanivatsi, pamona ata apo tanejumecovënëtsivi, pamona ata pitoyavi itsamonae, pamona ata pevitota pibisiacuene pexanaevi, bajarapamonae ponaena petajueyabiabipucavabelia. Pamona ata penajorobivi, pamona ata jumapecataeya pexanaenëanëjavabelia penavajëcaevi, pamona ata penajumetsënëtsivi, daxita bajarapamonae ponaena petajueyabiabipucavabelia. Bajarapapuca tajueyabiaba azufre yajava. Bajarapatëpaejava cotocaevi jane baja petëpaejava tsane, nejai Dioso, tronojumata peecaenë.

Pacuenia Juan tane pejana Jerusaléntomara pacuenia itsamatacabi itsijtsia yabara pelivaisi

⁹ Nexata jane baja rena caenë ängelnë. Bajarapaängelnë siete paängelnëbeje siete pacopabeje piayaijavanë pevënëcaecopanë pepacaeviyajuvënënë. Bajarapaängelnë nexata nejumlahitsi:

–Naxanitsia. Catsitajëtsianatsi pova Corderonë pijavanexa, nejai ängelnë.

10 Bajaraxuacujinae Espiritu Santo netsijamatabëvënëca. Nexata bema-jitsinaebota ángelnë nebarëpona pinijitsutoxanetojavabelia, piapiatsutox-anetojavabelia. Nexata bajara patsutoxanetojavatalia ángelnë netsitajëta Dioso pijatomara, pinijitomaraxaneto, Jerusaléntomara. Athëbëvetsica Dioso-javavetsica runaica bajarapatomara.

11 Bajarapatomara cotianiveniveneca Dioso pijapenivenivenaecotiata. Pacuenia penamatamotsiiboto jaspevënëiboto cotianivenivena, bajarapacuenia cotianiveniveca. Nasabanua pacuenia nasaba vidriojava.

12 Bajarapatomara matatoyorotsia yacaranata piatayaëibopanaxanetota. Bajara payacaranatsijavaxaneto mataropotsia catsanaruba ibopananë. Bajara payacaranatsijavaxaneto apia athëbëabetsia pacuenia pinijinaejavax-aneto apia. Bajara payacaranatsijavaxaneto matatoyorotsia xaina doce pabaupabeje. Nexata ángelevi, caenë canacujitsia, nucapona caebaupa canacujitsia. Bajarapabaupanëjava Israelpijinë pexi, doce ponëmibeje, pevënëanë vënërubena.

13 Acueyabi pabaupabeje xainapona caeyenepana canacujitsia. Estevënënenia payenepana xaina acueyabi pabaupabeje. Nortevënënenia pijinia payenepana xaina acueyabi pabaupabeje. Survënënenia pijinia payenepana xaina acueyabi pabaupabeje. Oestevënënenia pijinia payenepana xaina acueyabi pabaupabeje.

14 Jerusaléntomara matatoyorotsia peyacaranatsiibopanaxanetonexa, ibo penajumaetaponaejavata, copiaya pinijiibotoxanetonë sasavia jebapona, doce paibotoxanetobeje. Bajarapaibotoxanetonë, caeibotoxaneto canacu-jitsia pejumavelia, Corderonë pijajivi doce ponëbeje, apóstolevi, pevënëanë rubena.

15 Paángelnë nebarëcuaicuajjai, cobenaponapona oronaëbo. Bajara-paoronaebota pecajëjëbinexa Jerusaléntomara, pecajëjëbinexa baupanë ata, pecajëjëbinexa Jerusaléntomara matatoyorotsia peyacaranatsiibopanaxaneto ata.

16 Jerusaléntomara matatoyorotsia peyacaranatsiibopanaxaneto, daxitayenepananë namatajëpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajërëtsialia ata payenepanabeje. Nexata jane baja ángelnë pecajëjëbinaebota cajëjëba Jerusaléntomara. Nexata Jerusaléntomara matonotsiareca piapiajava xaina dos mil doscientos pakilómetrobeje. Epatajërëtsialia ata xaina bajarapacuenia, dos mil doscientos pakilómetrobeje. Athëbëabetsia ata piapiajava bajarapacuenia xaina, dos mil doscientos pakilómetrobeje.

17 Bajaraxuacujinae ángelnë cajëjëba Jerusalén tomara matatoyorotsia peyacaranatsiibopanaxaneto peyapëtaenexa paitayaëtovajëto xaina. Jerusaléntomara matatoyorotsia peyacaranatsiibopanaxaneto, piatayaëjava xaina sesenta y cuatro pametrobeje. Pavirianaebota mapanacuapijivi bacajëjëba, bajarapavirianaebota ángelnë cajëjëba.

18 Jerusaléntomara matatoyorotsia peyacaranatsiibopanaxaneto, exana jaspevënëibota. Jerusaléntomara ëorojavanëta pexanaetomara. Nexata Jerusaléntomara nasaba bitso. Pacuenia bitso nasaba piaxuirajibidriojava, bajara itsi.

19 Jerusaléntomara matatoyorotsia peyacaranatsiibopanaxanetonexa, itsa taxxuaba pexanaejava, copiaya pinijiibotoxanetonë sasavia tsivajënaejeba. Bajarapaibotoxanetonë itabëtsiaya jumacatsanaruba daxitaviria ibotonëta, bitso penamatamotsiibotonëta. Penamataxainaeibotoxaneto itabëta jaspevënëibotonëta. Pecotocaeviibotoxaneto itabëta zafirovënëibotonëta.

Acueyabiibotoxaneto itabëta ágatavënëibotonëta. Cuatroibotoxaneto itabëta esmeraldavënëibotonëta.

²⁰ Cincoibotoxaneto itabëta ónicevënëibotonëta. Seisibotoxaneto itabëta cornalinavënëibotonëta. Sieteibotoxaneto itabëta crisólitovënëibotonëta. Ochoibotoxaneto itabëta berilovënëibotonëta. Nueveibotoxaneto itabëta topaciovënëibotonëta. Diezibotoxaneto itabëta crisoprasavënëibotonëta. Onceibotoxaneto itabëta jacintovënëibotonëta. Doceibotoxaneto itabëta amatistavënëibotonëta.

²¹ Doce rabaja pabaupabeje. Doce rabaja pijinia paperlavënëjavatabeje, bitso penamatamotsijavanëta, exana caebaupa canacujitsia. Bajarapatomarata caecalle ruca daxitacallevecua bitso ayaicallexaneto. Bajarapacalle ëorojavanëta pexanaecalle. Nasaba bitso. Pacuenia nasaba vidrijava, bajara itsi.

²² Bajarapatomarata apo taenë templobo. Itsiata baitsi jane daxita bajarapatomara betemplo. Bajarapacuenia betemplobo tsipaji Dioso, daxita mapanacuata jivi pevetsivi matatoxenetsia piamatabëcuenesaenë, Corderonëbeje, ponaponabeje bajarapatomarata.

²³ Dioso ayaijamatabëcuenenë pijapenivenivenaecotiata itayota bajarapatomara. Corderonë ata itayota pijapenivenivenaecotiata bajarapatomara. Bajaraxuata apo namatavenonae bajarapatomarata pitayotsinexa matacabipijjuameto, meravipijjuameto ata.

²⁴⁻²⁶ Daxitanacuanëpijivi, pamonaë baja Dioso capanepatsi pijaneconivecua, bajarapamonae itsamatacabi jinavanapaena Diosobeje Corderonëbeje pijapenivenivenaecotiata. Daxitanacuanë pevetsivi pijatomaranëjavaverena capatsiana bajarapatomaraberena bitso penamatamotsijavanë, Dioso yaityataeya perajutsinexa. Daxitamatacabijavabelianexa, bajarapatomara bautatanutsiana. Bajarapatomarata ajibi tsane meravi.

²⁷ Itsiata baitsi jane bajarapatomaraberena pibisijamatabëcuene pexainaevi, apo jone tsane. Piauracuene pexanaevi, penajumetsënëtsivi ata, apo jone tsane. Jonena ëpamonae vënërubena Corderonë pijacuyalatobaxutota. Corderonë pijacuyalatobaxutota vënërubena pamonaë matacabi apo pevevereceajava pexainaevinexa.

22

¹ Bajaraxuacujinae icatsia ángelnë netsitajëta pepamene, bitso pitaranaemene. Nasaba bitso. Pacuenia vidrijava nasaba, bajara itsi. Bajarapamene jivi petëpaejavavecua piitavayaexanaemene. Bajarapamene pitsaparena Diosobeje Corderonëbeje pijatronojavaverena.

² Bajarapamene bocapona ayaicallexaneto tuatuajëareca. Bajarapamene itapayareca anijamuxubëreneniabeje nubena naejavanë, jivi petëpaejavavecua piitavayaexanaenaenë. Bajaraponaenë caevaita nacuaitapona doce panacuaitsibeje. Caejuameto canacujitsia nacuaitapona. Bajaraponaenë pebaxuta xanepana daxitanacuanëpijivi penavaëbinexa, pejamatejemanexa pivitanejavavecua.

³ Nexata bajarapatomarata ajibi tsane jivi pejamatabëcuenebijianaëjavanexatsi. Nexata jivi pibisiacuene apo exanaë tsane. Diosobeje Corderonëbeje pijatronota ecaenabeje pijajivi pitorobabiabinexabeje daxitamatacabijavabelianexa bajarapatomarata. Nexata daxita pamonaë Dioso pijajivi, pexaniajamatabëcuene rajutsiana Diosojavabela.

⁴ Bajarapamonae Dioso itabarataena. Dioso pevënë ata rucaena bajarapamonae pitapathaitota.

⁵ Bajarapatomarata ajibi tsane meravi. Pepo petuxanenë Dioso pijapenivenivenaecotia itayotsiana. Nexata bajarapatomarata pejinavana-paevi apo namatavenonae tsane lámparacotia, matakabipijijjuametocotia ata. Pamonaë jinavanapaena Dioso pijanacuata, Dioso pijanacua barëevetsianatsi daxitamatacabijavabelianexa.

Pacuenia baja imoxoyo pevajënaë Jesucristo pepatsijavanexatsica yabara pelivaisi

⁶ Icatsia ángelnë nejumlahtsi:

–Palivaisi baja yaquiname, pexaniajailivaisi cajena. Daxita xua yabara yaquiname, pepacuene copiapatsiana. Dioso baja cajena bajayata tajëvelia yapëtaeyaexana profetavimi peyapëtaenexa pacuenia itsamatacabi itsijitsia mapanacuataje. BajarapaDiosonë icatsia itoroba pijaángelnë. Nexata Dioso pijaángelnë tsitajëta Dioso pijajivijavabelia, Dioso pijajivi peyapëtaenexa pacuenia baja imoxoyo pevajënaë pecopiapatsinexa xua copiapatsijitsia mapanacuataje, nejai ángelnë.

⁷ Icatsia ángelnë nejumlahtsi:

–Jesús raja jumaitsi: “¡Bepijia patsianicajë!” jai. ¡Nexata pajivi jume-covënëta Dioso pejumelivaisi, neyaquinaelivaisi mapabaxutotaje, bajarapa-jivi jamatabëcuenebarëya tsane Jesús ita patsianica! nejai ángelnë.

⁸ Xanë rabaja Juannë, daxita baja palivaisi yaquinajë, jumetaniji. Tanjinua. Bajaraxuacujinaë ángelnë, ponë netsitajëta daxita bajaraxua, pitabarata yayiataeya picani tamatabacabëta tonucajë.

⁹ Itsiata baitsi jane ángelnë nejumlahtsi:

–Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonae ata, pamonaë Diosojumepaebivi profeta-vi, pacuenia ata pamonaë jumecovënëtsiana mapabaxutotaje neyaquinaelivaisi, bajara saya xanë ata taitsinë. Nexata Dioso yayiataeya nematabacabëta tonucare nevajëtsinexa Diosojavabelia, nejai ángelnë.

¹⁰ Icatsia ángelnë nejumlahtsi:

–Pëtsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tsipaebianame daxitajivijava daxitajivi peyapëtaenexa. Tsipaji rabaja imoxoyo pevajënaë pecopiarucaenexa mapanacuataje. Pacuenia baja cajena Dioso tajëvelia najumecapanepaeya jumaitsi, bajarapacuenia Dioso exanaena.

¹¹ Neponaponaepato abaxë mapanacuataje, tocopare pibisiacuene pexanaponaevi, pibisiacuene pexanaejava pecatsitecaenexa. Ëpibisiacuene yabara penajamatabëxainaevi ata, tocopare pecatsitecaenexa penajamatabëxainaejava ëpibisiacuene yabara. Itsiata baitsi jane pijinia pamonaë pexaniacuene pexanavanapaevi, catsitecae pevajënaeyabelia pexaniacuene pexanavanapaejava. Pamonaë ata Dioso aneconijibia tanetsi pejumecovënëtsixae Jesucristo pesivatëpaejavatsi, casaë pevajënaeyabelia aneconijibia pejinavanapaenexa, nejai ángelnë.

¹² Icatsia ángelnë nejumlahtsi:

–Jesús raja jumaitsi: “Panejumetaema. Bepijia patsianicajë. Capatsianicajë tajajivi tarajutsijavanexa. Bajaraxua rajutsianajë caejivi canacujitsia, pamonaë xaniavaetsia netonacuenebavanapa. Pamonaë pijinia pibisiacuene exanavana, naneconitsiaexanaenajë.

¹³ Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa,” jai raja Jesús, nejai ángelnë.

¹⁴ Icatsia ángelnë nejumlahtsi:

–Jamatabëcuenebarëya baja pamonaē pibisiacuene pexanaeconomicsi Dioso vecuaajibiaexanatsi, pejumecovënëtsixae Jesucristo pesivatëpaejavatsi. Bajarapamonaē itsamatacabi Dioso tocopatsianatsi penajonenexa Dioso pijatomara baupanëjava. Tocopatsianatsinua jivi petëpaejavavecuā piatavayaexanaenaē pecuaixanexa.

¹⁵ Itsiata baitsi jane daxita pamonaē Dioso apo pejumecovënëtsivi, nacopabanubenaena Dioso pijatomarajumavelia. Nacopabanubenaena pamonaē bitso ëpibisiacuene pexanaevi, penajorobivi ata, pevitota pibisiacuene pexanaevi ata, jivibeivi ata, jumapecataeya pexanaenëjavavelia penavajëcabiata, bitso penajumetsënëtsivi ata. Daxita bajarapamonaē nacopabanubenaena Dioso pijatomarajumavelia, nejai ängelnë.

¹⁶ Nexata Jesús nejumaitsi:

–Xanë rabaja Jesúsne. Itorobajë tajaängelnë pecatsipaebinexa palivaisi baja catsipaeba. Bajarapacuenia itorobajë daxita Dioso pejumecovënëtsivi peyapëtaenexa palivaisi baja tajaängelnë catsipaeba. Xanë rabaja nacuaeveitsinëmi Davidpijinë pemomoxiyajuvënënë. Xanë rabaja taja-matabëcueneitayotsinë daxitajivi pexaniajailivaisita, nejai Jesús.

¹⁷ Espiritu Santo jumaitsi. Petiriva ata, pova Corderonë pijavanexa, bajara-pova ata jumaitsi. Jumaitsibeje Jesúsjavavelia mapacueniaje:

–Naxanitsiayo patsianimica, jaibeje.

Pamonaē jumetane bajarapacuenia pejumaitsijavabeje Jesúsjavavelia, bajarapamonaē ata bejumaitsi Jesúsjavavelia:

–Naxanitsiayo patsianimica, bejai bajarapamonaē ata.

Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena Dioso pecapanepaejavanexatsi, nexata bajarapamonaē Dioso rajutsianatsi matacabi apo peverevere-caejava. Tocopatsianatsi bajarapamonaē amoneya pexainaenexa matacabi apo peverevere-caejava itsa jumecovënëta Cristo pesivatëpaejavatsi. Tsipaji Cristo jivi petëpaejavavecuā piatavayaexanaenë.

¹⁸ Daxita pamonaē leba Dioso pejumelivaisi, tayaquinaelivaisi mapabaxutotaje, jamatabëcuenerëviaya tsipaebijitsianë roviaia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavavelia. Nexata Dioso naneconitsiaexanaenatsi. Papiayaicuene yabara jumaitsi mapabaxutotaje, bajarapacuenē Dioso taeyaexanaenatsi bajarapajivi.

¹⁹ Mapabaxutotaje tayaquinaelivaisi, itsajivi itsa xubiana itsalivaisiyo, nexata bajarapajivi naneconitsiana Diosojavavelia. Nexata bajarapaneconijamatabëcueneta bajarapajivi vënëyaquinae atatsi pabaxutota vënërubena daxita pamonaē matacabi apo peverevere-caejava pexainaevinexa, matacabi apo peverevere-caejava apo xainae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vënërubena matacabi apo peverevere-caejava pexainaevinexa pelivaisi, Dioso pijatomara ata pelivaisi, jumaitsi mapabaxutotaje.

²⁰ Jesús, ponë itoroba pijaängelnë tanetsipaebinexa pacuenia itsamatacabi itsijitsia mapanacuataje, bajaraponë nejumaitsi mapacueniaje:

–Bepijia patsianicajë, jai.

Nexata xanë jumaitsinë:

–Je. Xanepana rabaja. Jesús pepo petuxanenëmë, jnaxanitsiayo patsianimica! janë.

²¹ Pacatovajëtatsi daxita paxamë vajatuxanenë Jesucristo papecayavenon-aenexa. Bajara itsi tsane.